


Ley saa ni nacoo
Jesucristu



New Testament in Mixtec, Southern Puebla (MX:mit:Mixtec,
Southern Puebla)

Ley saa ni nacoo Jesucristu
New Testament in Mixtec, Southern Puebla (MX:mit:Mixtec, Southern Puebla)

copyright © 1978 Wycliffe Bible Translators, Inc.

Language: (Mixtec, Southern Puebla)

Translation by: Wycliffe Bible Translators, Inc.

Mixteco, Sur de Puebla [mit], Mexico

Copyright Information

© 1978, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Southern Puebla

© 1978, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-04-21

Contents

SAN MATEO	1
SAN MARCOS	61
SAN LUCAS	99
SAN JUAN	163
HECHOS	212
ROMANOS	271
1 CORINTIOS	297
2 CORINTIOS	322
GÁLATAS	338
EFESIOS	347
FILIPENSES	356
COLOSENSES	363
1 TESALONICENSES	369
2 TESALONICENSES	374
1 TIMOTEO	377
2 TIMOTEO	385
TITO	390
FILEMÓN	393
HEBREOS	395
SANTIAGO	414
1 PEDRO	421
2 PEDRO	428
1 JUAN	432
2 JUAN	439
3 JUAN	440
JUDAS	441
APOCALIPSIS	443

Ñà-nduá Nì Tiaa San Mateo sàhà Jesucristu

Nansa nìsa nani xii Jesucristu

¹ Ñà-yòhó nduú tutu nacání sàhà ana nduú xii Jesucristu. Iin yohòtéhè-yá nduú David, te iin yohòtéhè David mà nduú Abraham.

² Te Abraham yucán, nì ìa iin dèhe-ne nani Isaac. Te Isaac mà, nì ìa stná iin dèhe-ne nani Jacob. Te Jacob mà, nì ìa stná iin dèhe-ne nani Judá, xi stná cuàhà ñani-nè.

³ Te Judá mà, nì cacu ùi dèhe-ne, iin-ne nani Fares, te inga-nè nani Zara. Te Tamar nani dihi Zara mà. Daaní, Fares ma, nì ìa stná iin dèhe-ne nani Esrom. Te Esrom mà, nì ìa stná iin dèhe-ne nani Aram.

⁴ Te Aram mà, nì ìa stná iin dèhe-ne nani Aminadab. Te Aminadab mà, nì ìa stná iin dèhe-ne nani Naasón. Te Naasón mà, nì ìa stná iin dèhe-ne nani Salmón.

⁵ Te Salmón mà, nì ìa stná iin dèhe-ne nani Booz. Te Rahab nani dihi Booz. Daaní, nì nandàhà Booz mà xii Rut, te iin dèhe-ne nani Obed. Daaní, Obed mà, nì ìa stná iin dèhe-ne nani Isái.

⁶ Te Isái mà, nì ìa stná iin dèhe-ne nì sanduu rey David. Daaní, David mà, nì ìa stná iin dèhe-ne nani Salomón. Te dihi Salomón mà nduú nècuàchì ñaha nì sanduu ñahàdihí Urías antes.

⁷ Daaní, nì ìa stná iin dèhe Salomón mà nani Roboam. Te Roboam mà, nì ìa stná iin dèhe-ne nani Abías. Te Abías mà, nì ìa stna iin dèhe-ne nani Asa.

⁸ Te Asa mà, nì ìa stná iin dèhe-ne nani Josafat. Te Josafat mà, nì ìa stná iin dèhe-ne nani Joram. Te Joram mà, nì ìa stná iin dèhe-ne nani Uzías.

⁹ Te Uzías mà, nì ìa stná iin dèhe-ne nani Jotam. Te Jotam mà, nì ìa stná iin dèhe-ne nani Acáz. Te Acáz mà, nì ìa stná iin dèhe-ne nani Ezequías.

¹⁰ Te Ezequías mà, nì ìa stná iin dèhe-ne nani Manasés. Te Manasés mà, nì ìa stná iin dèhe-ne nani Amón. Te Amón mà, nì ìa stná iin dèhe-ne nani Josías.

¹¹ Te Josías mà, nì ìa stná iin dèhe-ne nani Jeconías, xi stná dava ga ñani-nè. Te divi tiempu yucán nì catavà tè-ñuu Babilonia nèhivì raza-ndà cuàhàn-nè presu ndè ñuù-te.

¹² Daaní, na ndoó-né ñuu Babilonia yucán, dandu nì ìa stná iin dèhe Jeconías mà nani Salatiel. Te Salatiel mà, nì ìa stná iin dèhe-ne nani Zorobabel.

¹³ Te Zorobabel mà, nì ìa stná iin dèhe-ne nani Abiud. Te Abiud mà, nì ìa stná iin dèhe-ne nani Eliaquim. Te Eliaquim mà, nì ìa stná iin dèhe-ne nani Azor.

¹⁴ Te Azor mà, nì ìa stná iin dèhe-ne nani Sadoc. Te Sadoc mà, nì ìa stná iin dèhe-ne nani Aquim. Te Aquim mà, nì ìa stná iin dèhe-ne nani Eliud.

¹⁵ Te Eliud mà, nì ìa stná iin dèhe-ne nani Eleazar. Te Eleazar mà, nì ìa stná iin dèhe-ne nani Matán. Te Matán mà, nì ìa stna iin dèhe-ne nani Jacob.

¹⁶ Te Jacob mà, nì ìa stná iin dèhe-ne nani José. Te divi José mà nduú ìi María dihi Jesucristu.

¹⁷ Ñàyùcànduá, nsidaa xii-yá yucán, ùxìn cùmì ní sanduu-ne dècuèndè tiempu xi Abraham xii dècuèndè tiempu xi David. Daaní, ndoó ùxìn cùmì gá-nè dècuèndè tiempu xi David xii dècuèndè quivì cuàhàn-nè presu ñuu Babilonia. Daaní, después ndoó ùxìn cùmì gá-nè dècuèndè tiempu xi Cristu.

Nansa nì tùinuù Jesucristu ñuhivì yohó

¹⁸ Cunaha-nsiá, dohó nì cuu na ní tùinuù Jesucristu. Sàni ndiadi tnùhu nandàhà dihi-yá María xii José. Doco tàñáha ga coo-ne xii nècuàchì mà, te nì sàcùñuhu méè xi-ne nì quida Espíritu ìi xii Dios.

¹⁹ Ñàyùcànduá, nì nacani ini José ñà-chicá vaha tàhndè tnùhu xi-ne cahan-né, doco mà cáchì vate-néà, vàchi nècuàchì vaha nduú-né, te có-cùnì-nè cuitnùhu nèhivì María.

²⁰ Doco na nacání îi ini-nè quida-ne ducán, nì sàní-nè nì ndecunu iin ángel xi Stoho-ndà Señor nùu-né, te dohó nì cachi ángel mà xì-né:

—Cunini-ní, José, descendencia xi David; màsà yúhî-nî nandàhà-ní xì María. Vàtùni cunduu-ne ñahàdihí-ní, vâchi mée xi-ne ñuhu-ma, mée sàhà Espíritu ìi xí Dios nduú-vé.

²¹ Te icúmí-vê tùinuù-vé, cunduu-ve iin mée tiàa, te Jesús cunani-vé, vâchi icúmí-yâ dacácu-ya nèhivì xí-yá nùu cuàchi-ne —nì cachi ángel.

²² Pues divi ducán nì cuu nsidaájàn sàhà-ñá nì cùú ndisa ñà-nduá nì cachitnùhu Stoho-ndà Señor antes na ní càhàn iin ana càhàn cuenta xi-ya, te nì cachi-nè:

²³ Cunaha-nsiá, icúmí coo mée xi iin ñahà chii nduú señorita; te nú sàni tùinuù-vé, dandu cunani-vé Emanuel, vâchi cuní cachà mà ñà-sàni quesaa Dios cutnahá-yá xì-ndà nduá.

²⁴ Daaní, nì nsicùhnú ini José, te nacua nì cachi ángel mà xì-né, divi ducán nì quida-ne, nì nandàhà-né xì María ñà-cunduu nècuàchìmà ñahàdihí-nè.

²⁵ Doco cóni ía-ne xì nècuàchìmà dècuèndè nì tùinuù mée mà. Te Jesús nì sàcùnani-vé.

2

Nansa nì casaà rey nchichí nùu Jesús, te nì cahvi-nyà

¹ Tiempu xi rey Herodes nì sandua na ní tùinuù Jesús ñuu tii Belén iá ladu Judea. Dandu nì casaà nècuàchì nchichí ñuu Jerusalén; ladu ndé caná orá nì quixi-ne.

² Te nì ndàcàtnùhù-né:

—¿Índù iá mée nì tùinuù-xí, divi mée cunduu rey xi nècuàchì Judea? Vâchi ndé caná orá sàni xini-nsì sítñúu cachítñuhu sàhà-yá; te vichi vâxi-nsi cahvi-nsiyà —nì cachi-nè.

³ Dandu rey Herodes, na ní xinitnùhu-tè ñà-nduá ndàcàtnùhù nècuàchìmà, nì ndu-locó-te, mii-té xi nsidaa gá stná nèhivì ñuu Jerusalén.

⁴ Ñàyùcànduá, nì cana-tè dùtù chicá xí-idònuù, xì stná nècuàchì dacuahá ley ìi, te nì xìcàn tnùhù-té nùu-né índù ñuu cuàhàn tùinuù Cristu.

⁵ Te nì naxiconihí-né nùu-té, cachí-nè:

—Divi ñuu tii Belén iá ladu Judea. Vâchi ducán nì tiaa iin nècuàchì nì càhàn cuenta xi Dios sàhana ndé cachí-yà:

⁶ Cunaha mii-nsiá nècuàchì ñuu Belén iá ladu Judea: màdì ñuu chicá có-ndiáá nduú ndé ndoó-nsiá; còò, divi ñà-chicá ndiáá nduá nùu nsidaa ñuu nahnú ladu xi-nsia, vâchi divi ñuu mii-nsiá icúmí tùinuù mii-yá ana cusahnú, te icúmí-yâ cunuù-yá nèhivì xí, divi nèhivì raza-nsià Israel.

⁷ Daaní, nì cana dèhé Herodes nècuàchì nchichí mà, te nì ndàcàtnùhù váha stná-te nùu-né índù tiempu meru nì tùi sítñúu mà.

⁸ Dandu nì techuún-tené cùhùn-nè ñuu Belén, cachí-te xi-né:

—Cuahán-nsià ñuu mà, te ndàcàtnùhù váha-nsia nansa ndisa iá sàhà mée mà, dandu nacachitnùhu-nsia xì, vâchi yùhù, cuní stnài cùhùn cahvi stnài-vè —nì cachì-te.

⁹ Daaní, na ní nsihi nì sàcùnaha nècuàchì nchichí mà nùu-té ñà-jaàn, dandu nì quihin-ne ichi cuàhàn-nè. Te cunaha-nsiá, yucán nì natùu tu sítñúu nì xini-nè antes ladu xínu orá. Te nì sàcòdonùu-sí nùu-né nì sàà-si nì ndòo-sì dìquì-xí nacua ndé iá mée mà.

¹⁰ Ñàyùcànduá, yáha ga nì cudìi ini-nè na ní xini tu-ne sítñúu mà.

¹¹ Dandu nì caquihvi-ne vehe, te nì xini-nè mée mà xì dihi-vé nani María. Te nì tutuyuhu-né ñuhù nùu-vé, te nì cahvi-névè. Dandu nì nacuna-ne ñà-ñuhú ñà-cuicà-né, te nì dàcútâhvi-nyà, divi oro xì inciensu xì tàtnà nani mirra.

¹² Doco después nì sàní-nè nì cachitnùhu Dios xì-né ñà-íá peligrú: màsà náyàha-ne ndé iá rey Herodes. Ñàyùcànduá, inga ichi nì naquihin-ne mànuhù-né ñuu-nè.

Nansa nì xinudèhé José xì María xì mée Jesús cuàhàn-nè ñuu Egipto

¹³ Dandu, na sàmànuhù nècuàchì nchichí, nì sàní stná José, nì xini-nè iin ángel nì quixi nùu Stoho-ndà Señor. Te dohó nì cachi ángel mà:

—Ndacuiin-ní, tnii-ní mée, te cundaca-nívè xì mamá xi-ve cuahán-nsià ñuu Egipto cunudèhé-nsià. Te divi ñuu mà icúmí-nsiâ cundoo-nsia ndè cachi sàì cachitnùhi xì-nsiá. Vàchi icúmí Herodes nanducu-tévê ñà-cahni-tévê —nì cachi ángel mà.

¹⁴ Ñàyùcàndùá, mate ñuú nduá, doco nì ndacuiin José nì saca-ne mée mà xì dihi-vé, te nì quihin-ne ichì cuahàn-nè ñuu Egipto.

¹⁵ Te ñuu mà nì sandoo-ne dècuèndè nì xihì Herodes. Te divi ducán nì cuu sàhà-ñá nì cuú ndísá palabra yohó nì cachitnùhu Stoho-ndà Señor antes na ní càhàn iin ana càhàn cuenta xi-ya: “Dècuèndè ñuu Egipto nì cani Dèhemanì ñà-ndixi-ya”.

Nansa nì dandàcú rey Herodes ñà-cui nsidaa mée tiàa ladu ñuu Belén

¹⁶ Daaní, na ní xini Herodes cóni ndúlócò nècuàchì nchichí sàhà ñà-nduá nì cachì-te, dandu yáha ga nì xidà inì-te. Ñàyùcàndùá, nì techuún-te soldadu nì sàhàn nì casahnì xì nsidaa mée tiàa ndoó ñuu Belén xì inicutu stná ladu yucán, nsidaa luchi cuati xicá ùì cuà cuahàn tìxi-xi, nì casahnì-tévê, vàchi ñà-jaàn nduú tiempu nì cachi nècuàchì nchichí na ní ndàcàtnùhù Herodes nùù-né.

¹⁷ Ñàyùcàndùá, quivì jaàn nì cuu ndisa ñà-nduá nì cachitnùhu Jeremías sàhana na ní càhàn-nè cuenta xì Dios, te dohó nì cachi-nè:

¹⁸ Tiacú tnaná cuahà-né ladu ñuu Ramá. Sacú nècuàchì ñahà, te cána-ne, divi nècuàchì descendencia xi Raquel. Sàhà mée xi-ne sacú-né; nì mà cùì cahnde ini-nè, vàchi còò cá-vè.

¹⁹ Daaní, José, iá va-ne ñuu Egipto. Dandu nì sàà quivì nì xihì rey Herodes. Te nì sàní tu José inga xichi, nì xini-nè iin iin ángel nì quixi nùù Stoho-ndà Señor,

²⁰ te cachí ángel mà xì-né:

—Ndacuiin-ní, cuaca-ní mée xì dihi-vé, te naxicocuñ-nsià ñuu Israel, vàchi sàní xihì nèhivì cuní cahni xì-vé.

²¹ Ñàyùcàndùá, nì ndacuiin José, nì saca-nevè xì dihi-vé mànuhù tú-né ñuu Israel.

²² Doco nì xinitnùhu-ne sàdandàcú dèhe Herodes mà nani Arquelao, cusáhnù-te lugar xi nsì-yua-té ladu Judea. Ñàyùcàndùá, nì yuhì-nè nùhù-nè ladu mà. Daaní, inga xichi nì sàní-nè, nì cachitnùhu Dios ñà-ndisa iá peligrú. Ñàyùcàndùá, nì yàha-ne chicá nùù-xì dècuèndè ladu Galilea,

²³ nì sàà-nè iin ñuu tii nani Nazaret, te yucán nì candòo-ne. Pues, divi ducán nì cuu sàhà ñà-nì cùú ndisa palabra nì cacachitnùhu profeta xi Dios sàhana ñà-divi ñuu Nazaret cunduu ñuu-yà, cachi nèhivì.

3

Nansa nì càhàn Juan Bautista sàhù ndé nduú yucù

¹ Daaní, después nì quixi Juan Bautista yucù iá ladu Judea. Te nì quesaha-né càhàn-nè sàhù yucán,

² cachí-nè xì nèhivì ñà-nì nàxícócuñ ini-nè sàhà cuàchi-ne, vàchi sà-ítúú cuni-nè cusahnú mii-yá iá ansivì.

³ Pues divi Juan mà nduú ana nì cachitnùhu Isaías sàhà-xí na ní càhàn-nè cuenta xi Dios, te nì tiaa-ne dohó:

Tiacú càhàn fuerte ana càhàn yucù, te cachí-nè xì-ndà ñà-nsidandoo-nda (anima-ndà) na ian nduví ichì ndé yàha Stoho-ndà Señor, te ichì ndàà cundua.

(Ducán nì cachi Isaías sàhana.)

⁴ Te Juan mà, dòò idì sìcamellu nì sandixi-ne, te iin quísi nì cuyucun siuhma tìxi-ne. Te sìca xì ndudi ñuñù yucù nduá nìsa itiacu-nè.

⁵ Daaní, cuahà nèhivì ñuu Jerusalén xì cuahà stná nèhivì ladu Judea, xì stná nèhivì ndoó yatni yùte Jordán, nsidaa-né nì casaà-nè nùù Juan yucán.

⁶ Te nì cuhì-né nì quida nècuàchì mà ini yùte mà na ní dātúi-ne cuàchi-ne.

⁷ Doco nì xini Juan ñà-vàxi stná cuàhà nècuàchì fariseu xì cuàhà stná nècuàchì saduceu, cuní-nè cuhì stná-nè. Ñàyùcànduá nì cachi-nè xì nècuàchì mà:

—Mii-nsiá, na quidá còò, ducán quidá-nsiá, vaxi-nsia yohó xinúdehé-nsiá nùu castigu icúmí quixi. ¿Ana divi nì cachi xì-nsiá ñà-quida-nsia ducán?

⁸ Cunaha-nsiá, xiñuhu quida ndisa-nsia cumplir nacua ndiá ìcà quida-nda na naxícuuìn ndisa ini-ndà sàhà cuàchi-nda.

⁹ Ni màsà cáhàn cuadú-nsiá cachi-nsiá inì-ni mii-nsiá ñà-divi Abraham nduú yohòtéhè stná-nsiá, te ñàyùcànduá còò ni-ñàha cuu xi-nsiá. Vàchi cunaha-nsiá, dècuèndè stná yùu ndoó yohó, vátùni nanduu stná nahi descendencia xì Abraham, nú cuní Dios.

¹⁰ Te vichi sà-íá cuàhàn (cachi-yà índù nèhivì ñhì-xì castigu), na ian cuàhàn-ndà nacàxin-nda yutnù có-càná fruta, te nihi-nda hacha cahnde-ndànú coco-nù. Pues ducán icúmí cuu stná xì nèhivì có-quidá ví.

¹¹ Vàchi yùhù, tècuí quidá íí mii-nsiá na cuú-nsiá arrepentir; doco nchícùn gà vaxi ana chicá cahnú poder-xi nùu yùhù: te nì có-nâtù (cundi nahi mozo xi-ya) ñà-chindeí quee ndisàn-yá. Doco mii-yá, tìxi Espíritu ì xí Dios icúmí-yâ quida ì-yá anima-nsiá. Te na quidá ñuhu, ducán icúmí-yâ quida stná-yà xì-nsiá (dandáñúhú stná-yà ñà-có-ndiá).

¹² Te vichi sà-íá cuàhàn-yà quida-ya na ian quida-nda xi trigu, dandiachi-ndañá xì yutnù chipála dècuèndè ndiachi nsihí trigu ndoó nùu ñuhù, dandu nùniá, chivàha-ndañá, doco mihì-ñá, coca. Te divi ducán icúmí-yâ quida stná-yà (xì nèhivì ñuhivì: nèhivì xí mii-yá, càcu-ne; doco nèhivì dava ga), nicanicuahàn icúmí-nê coco-ne —nì cachi Juan.

Nansa nì cuhì Jesús

¹³ Daaní, nì quee Jesús ladu Galilea, cuàhàn-yà yùte Jordán ndé íá Juan, vàchi cuní-yà quida ì nècuàchì mà-yá.

¹⁴ Doco nècuàchì mà, có-cuní-nè, vàchi cachí-nè xì-yá:

—Yùhù xiñuhí cuhì quida mii-ní, màdiá mii-ní quixi-ní nùu yùhù, (te cuhì-ní).

¹⁵ Dandu nì cachi-yà xì-né:

—Ducanicoó vichi, vàchi ducán xiñuhu quida-nda sàhà-ñá quida ndisa-nda nsidaa ñà-nduá ndiá ìcà-ndà.

Dandu nì candisá Juan, te nì quida ì-néyà.

¹⁶ Daaní, nì nsihì nì cuhì-yá, te nì quee-ya nùu tècuí, dandu nì nuna ansivi, te nì xini-yà mànuu Espíritu ì xí Dios vaxi-ya na iin sì-lomá, meru dìquì Jesús mànuu-ya vaxi-ya.

¹⁷ Dandu nì tiacu nì cáhàn iin ana cáhàn ansivi, cachí-yà:

—Dèhemaní nduú ana yohó, te cudì cuàhà inì sàhà-yá.

4

Nansa nì cuni ñà-malu dacà-sí Jesús ñà-quida-ya iin cuàchi

¹ Daaní, nihí Espíritu ì Jesús nì sàhàn ñà-coo-ya yucù dãná, vàchi yucán cuàhàn ñà-malu quida-sì lucha dacà-síyâ. Ñàyùcànduá, nì quihin-ya ichì cuàhàn-yà,

² te yucán íá-yà ùi dico quivì ndui te ñuú; te iníhí-yá, íá dòcò-yà. Ñàyùcànduá, cuàhà doco xihì-yà.

³ Dandu nì tnàtuu ñà-malu, vàchi cuní-si dacà-síyâ, te nì cachì-si xi-yá:

—Nú ndisa Dèhemaní Dios nduu-ní, dandu cachì-ní xì yùu jaàn ñà-nì nánduá pan cuxi-ní.

⁴ Doco nì cachi-yà xì-sí:

—Còó, vàchi dohó cachí nùu tutu ì: “Màdi cuisì pan cutiacu nèhivì; còó, vàchi xiñuhu cucumi stná-nè nsidaa palabra ì cachí Dios”.

⁵ Daaní, nì saca-síyá cuàhàn-si xi-yá ñuu ì Jerusalén, te nì chicoo-síyá ndè dìni veheñuhu cahnú,

⁶ te nì cachì-si xi-yá:

—Nú ndisa Dèhemanì Dios nduu-ní, dandu dandiachi-ní mii-ní, vèchi ducán cachí nùu tutu ì:

Icúmí Dios dandacú-yá nùu ángel xi-ya ñà-cundiaa-nè mii-ní.

Te cachí stná tutu mà:

Icúmí ángel natnii ndahà-né mii-ní ñà-màsà máquìhi sàhà-ní ni-iin yùu.

⁷ Dandu nì cachi Jesús xì-sí:

—Cachí stná tutu ì: “Màsà quidá cánûú-ndá ñà-có-cùnì Stoho-ndà Señor”.

⁸ Daaní, nì saca-siyá cuàhàn-si xi-yá dìnì iin yucù ducún sàstnùhù, te nì dàcùnì-siyá nsidanicuú ñuu iá ñuhiví xì nsidaa ñà-vico iá yucán.

⁹ Dandu nì cachì-si xi-yá:

—Yùhù dacútâhví mii-ní nsidaa ñuu jaàn nú ni mácuìn sìsì-ní nùí, te cahvi-ní yùhù.

¹⁰ Doco nì cachi-yà xì-sí:

—Cuahán-nì, Satanás, vèchi dohó cachí stná nùu tutu ì: “Cuisì mii Stoho-ndà Dios ndiá ìcà-ndà cahvi-nda, te cunucuachi-nda nùu-xí”.

¹¹ Dandu nì nacoò-siyá cuàhàn-si, te nì caquesaa ángel nì nacuahandee ini xi-yá.

Nansa nì quesaha Jesús quidá-yá chuun ndiaha xí-yá ladu Galilea

¹² Daaní, na ní xinitnùhu Jesús ndiadí Juan (Bautista) vehecàa, dandu mànuhù-yá ñuu-yà Nazaret iá ladu Galilea.

¹³ Doco cóni cuèé-yà yucán. Còó, nì quihin-ya ichì cuàhàn-yà ñuu Capernaum iá yuhù mar ladu ndé cachí xì-né ladu Zabulón xì Neftalí.

¹⁴ Yucán cuàhàn-yà coo-ya sàhà ñà-nì cùu ndisa palabra nì cachitnùhu Isaías sàhana na ní càhàn-nè cuenta xi Dios, cachí-nè:

¹⁵ Ladu Zabulón xì ladu Neftalí ndé yáha ichì yatni mar, yucán sàni dàtnùu fuerte Dios ini anima nèhivì. Stná inga ladu yùte Jordán, xì inicutu stná ladu Galilea ndé ndoó nèhivì có-ìnahá xí-yá,

¹⁶ pues yucán sàni dàtnùu ndiaha stná-yà anima-nè; vèchi nèhivì nsidaa lugar mà, nìsa xìca-ne ichì ñáa, te cuàhàn-nè ndañuhu dahuun-ne nì cùí, doco vichi sàni dàtnùu-yà sàxìnitnùnì-nè na ian nì natùu nuù-né, nì cachi Isaías.

¹⁷ Dandu divi tiempu mà nì quesaha Jesús càhàn-yà sàhù xì nèhivì, cachí-yà:

—Naxicocuìn inì-nsia sàhà cuàchi-nsia, vèchi sà-ìtúu tiempu cuni-nsia cusahnú mii-yá iá ansivi.

Nansa nì cana Jesús cùmì nècuàchì tavá xi siaca

¹⁸ Xicá Jesús yuhù mar iá Galilea, te nì xini-yà ùi ñàní nani Simón Pedro xì Andrés, dacanà-né ñunù xí-né mahì tècuí, vèchi nècuàchì tavá siaca nduú-né.

¹⁹ Te nì cachì-yà xì-né:

—Cunchicùn-nsia yùhù, vèchi mà cùndúú gá-nsia nècuàchì tavá xi siaca. Còó, vèchi icúmí dacuahí mii-nsiá ñà-cunduu-nsia nècuàchì tavá xi nèhivì (ichì malu).

²⁰ Dandu nècuàchì mà, vichi vichi nì nacoò-ne ñunù xí-né, te cuàhàn-nè nchìcùn-nèyà.

²¹ Daaní, nì sàà-yà chicá nùu-xí, te nì xini-yà inga ùi ñàní nani Jacobo xì Juan; dèhe iin tiàa nani Zebedeo xínduu-ne, te ndoó-né nùu lancha xi-ne, cutnàhâ-né xì yua-né nácàhmá-nè ñunù xí-né. Te nì cana stná-yà ndúì-nè.

²² Te hora mà nì nacoò-ne yua-né nùu lancha mà, te nì tenchicùn-nèyà cuàhàn-nè.

Cuàhà gá nèhivì nì chinaha Jesús

²³ Daaní, nì xicanuu Jesús inii ladu Galilea, te nì chinaha-yà nèhivì ini iin iin veheñùhu, nì càhàn-yà xì-né ñà-ndùú razón ndiaha sàhà ñuhivì ì xí Yua-nda Dios. Te nì dándúvaha stná-yà nèhivì ndohó nsidanuu clase cuèhè.

²⁴ Nàyùcàndüá, ndè inii ladu Siria nì xitià fama-yà. Sàhà ñà-jaàn cuàhà gá nècuàchì kuhí ndacá nèhivì nì quixi nùu-yá, xínduu-ne nèhivì ndohó quidá iin cuèhè, ò iin dolor, te

xínduu stná-nè ana ñuhú ñà-malu anima-xi, xì stná nèhivì xíhì ìhí, ò nèhivì sàni nduyutnu. Doco nsidaa-né, nì dándúvaha-yanè.

²⁵ Ñàyùcàndùá, yáha ga cuàhà nèhivì nì tenchicùn xì-yá, xínduu-ne nèhivì nì quixi ladu Decápolis, xì stná ñuu Jerusalén, xì stná ladu Judea, xì stná inga ladu yùte Jordán.

5

Ñà-nduá nì cachi Jesús na ní nana-ya yucù, te nì càhàn-yà sàhù

¹ Dandu nì xini Jesús ndoó cuàhà gá nèhivì. Ñàyùcàndùá, nì nana-ya iin yucù, te nì sàcòo-ya yucán. Dandu nì tnàtuu nsidaa nècuàchì dacuahá-yá nùu-yá,

² te nì quesaha-yá chináhá-yànè; te dohó nì cachi-yà xì-né:

³ —Nansicáhán nècuàchì ndahvi inì-xi, vàchi sàni ñihitáhvi-né ñuhivì ìì xí mii-yá iá ansivi.

⁴ 'Nansicáhán nècuàchì ndoó tnùnsí ini vichi, vàchi contentu icúmí-nê nàcùndoo-ne después.

⁵ 'Nansicáhán nècuàchì nihnú mání inì-xi, vàchi ñuhivì ndutahvi-né.

⁶ 'Nansicáhán nècuàchì yáha ga cuní quida viì, vàchi icúmí Dios chindee-yánè ñà-quida viì ndisa-ne.

⁷ 'Nansicáhán nècuàchì tùha cundehè ndàhvì xì ñanìtnaha-xi, vàchi icúmí Dios cundehè ndàhvì stná-yà mii-né.

⁸ 'Nansicáhán nècuàchì iá ndoo anima-xi, vàchi icúmí-nê cuni-nè nùu Dios.

⁹ 'Nansicáhán nècuàchì nachíndóó víi xì ñanìtnaha-xi, vàchi icúmí-nê cunduu ndisa-ne dèhe Dios.

¹⁰ 'Nansicáhán nècuàchì nú icúmí-nê ndoho-ne sàhà iin chuun viì nì quida-ne, vàchi sàni ñihitáhvi-né ñuhivì ìì xí Dios.

¹¹ 'Nansicáhán stná mii-nsiá na cánahá nèhivì xì-nsiá sàhí, te ò quidá quini-ne xì-nsiá, te ò dacuidádiquí stná-nè mii-nsiá.

¹² Vàchi quivì quida-ne ducán, dandu ni cúdí inì-nsia, te cundoo-nsia contentu, vàchi iin ñà-vàha cahnú cucumi-nsiá ndè ansivi. Vàchi ducán nisa quida quini stná nèhivì sànahà xi nècuàchì nisa càhàn cuenta xi Dios.

Nahi iin cuhádi ñà-xìxì-ndà, ducán nduú stná chuun quidá nèhivì xí Jesús ñuhivì yohó

¹³ 'Mii-nsiá, nahi chuun quidá iin, ducán quidá stná-nsiá ñuhivì yohó. Doco nú sàni ndañuhu ñà-ádì xán, dandu mà cúí nduhadi gá-ñà. Vàchi còò cá chuan, ñàyùcàndùá saté uun nèhivì-ñá, te sáníhni-neà.

¹⁴ 'Na quidá stná orá datnúù, ducán quidá stná mii-nsiá ñuhivì yohó. Te ducán nduú stná-nsiá na iin ñuu tuí dìni iin yucù, vàchi mà cúí coo dèhá` nùu nèhivì.

¹⁵ Stná iin lámpara, có-nàcuícun-ndañá ñà-coo dèhá` tìxi iin ìcà; còó. Sácùnùú ducún-ñà sàhà-ñá cutnuà, te cutùu nùu nsidaa nèhivì quíhvi vehe.

¹⁶ Ducán xiñuhu quida stná mii-nsiá: quida-nsia obra vaha sàhà-ñá cundehè nèhivì, dandu naquimanì-né Yuandiáhá-nsiá iá ansivi, vàchi na ian datnúù-nsiá nùu nècuàchì mà nduá.

Nansa nì cachi Jesús sàhà ley xi Moisés

¹⁷ 'Màsà cúcáhán-nsiá vaxi dacúxióé ley nì sàha Moisés. Mà dácúxióé ley mà, ni mà dácúxió stnái palabra nì cachi profeta nì sacahàn cuenta xi Dios. Còó, yùhù vaxi sàhà ñà-nì cùú ndisa nsidaa ñà-nduá cachí palabra mà.

¹⁸ Te ñà-ndàà nduá cachí xì-nsiá yohó, mate nsihi ansivi xi ñuhivì, doco mà nunca ndañuhu ni-iin palabra xi ley mà, te ni-iin xaan tii xán dècuèndè cuu ndisa nsidaa ñà-nduá cachá`.

¹⁹ Ñàyùcàndùá, nú cô-quidá iin tiàa cumplir mate iin ley chicá tii nduá, te ducán chináhá-nè nèhivì, pues divi tiàa-ma cunduu ana chicá có-ndiàá na sàà quivì cusahnú mii-yá iá ansivi. Doco nú ni quidá ndisa-ne cumplir ñà-nduá cachí ley xì-ya, te ducán

chináhá-nè ñanìtnaha-ne, dandu cunduu-ne ana chicá ndiaá na sàà quivì cusahnú-yá ñuhiví yohó.

²⁰ Vàchi yùhù cachí` xì-nsiá, chicá viì xiñuhu quida-nsia nù nècuàchì ley xi veheñùhu, xì nù stná nècuàchì fariseu, vachi nú coó, mà nunca sàà-nsià cuni-nsià ñuhiví lì xí mii-yá iá ansivi.

Cundoo mani-nda xì ñanìtnaha-nda, nì cachi Jesús

²¹ 'Mii-nsiá, sàni inini-nsia palabra nì cachi nècuàchì sàhana ñà-màsà cáhni stnaha-nda; doco te nú ni quida-nda ducán, dandu icúmí ndundaà sàhámà.

²² Doco yùhù cachí, mate cuísi ni cuidà ini-nsià sàhà ñanìtnaha-nsia, doco icúmí ndundaà sàhà stnámà. Te nú ni cachí-nsià xì ñanìtnaha-nsia neciu-nè, dandu icúmí ndundaà stná sàhájàn nù juez chicá cusáhnù; doco nú ni cachí-nsià xì ñanìtnaha-nsia tonto-nè, dandu cuidadu cundoo-nsia, vachi dècuèndè ñuhu andea ndiatu-xi-nsiá.

²³ 'Ni cachí-nda cuàhàn iin nèhivì veheñùhu, nihí-né promesa nacuahatahvì-né Dios lugar ndé cahvi nèhivì mii-yá. Doco te nú sàni sàà-nè yucán, te nì nsinuu ini-nè iá cuàchi-ne nù ñanìtnaha-ne,

²⁴ dandu (màsà cuáha-ne) promesa mà; yucan ni ndóa, te ni cùhùn-nè nù ñanìtnaha-nemà, te cuicahnú stnahá ini-nè sàhà-né. Cuisi nú ducán, dandu vátuni naxicocuñ-nè veheñùhu mà ñà-cuàha-ne promesa mà.

Nansa nì cachi Jesús ñà-yàchì xiñuhu nàcùndoo vaha stnaha-nda

²⁵ 'Nú sàni sanicuàchi iin tiàa sàhà iin-nsia, te ndacá-te mii-nsiá cuàhàn nù tè-nihí chuun, dandu chicá vaha nacòovàha yachì-nsià xì-té na cuàhàn-nsià ichì, còtó sàà-te xi-nsiá nù juez, te dayáha juez mà-nsiá ndahà comandante ñà-cundiadi-nsià vehecàa.

²⁶ Vachi ñà-ndàà nduá cachí` xì-nsiá yohó, nú ducan ni cuu-xi-nsiá, dandu mà queé-nsiá dècuèndè nú sàni dānāà nsihí-nsiá nsidaa ñà-nduá inihíca-nsiá.

Màsà cóo-ndá xí inga nècuàchì ñahà, cachi ley xi Jesús

²⁷ 'Sà-ínahá-nsià nansa nì cachi nècuàchì sàhana ñà-màsà cáhàn-nda xí inga ana có-nduú nècuàchì vehe-nda, nì cachi-nè.

²⁸ Doco yùhù, (màs gā) cachí` xì-nsiá vichi, vachi nú cuisì indéhe iin tiàa iin nècuàchì ñahà, te xího-téné, dandu dava-ni queámà na ian sàni quida-tè cuàchi xi nècuàchì mà, vachi iá cuàchi ma anima-te.

²⁹ Nàyucànduá, nú nduchínú-nsiá, cunià quida-nsia iin cuàchi, dandu chicá vaha tavà-nsiáñà, dacaná-nsiáñà, vachi chicá vaha ni ndáñúhú iyuhu iin xaan xí-nsiá, te màdiá sàà inii cuerpu xi-nsia andea.

³⁰ Te ni cachí-nda nú ndahàcuàhá-nsià cunià quida-nsia iin cuàchi, dandu chicá vaha ni táhndèà dacaná-nsiáñà, vachi chicá vaha ni ndáñúhú iyuhu iin xaan xí-nsiá, te màdiá sàà inii iquicúñú-nsià andea.

Màsà caté stnàhà-nda, cachí ley xi Jesús

³¹ 'Nisa cachi stná nèhivì (sàhana): "Nú cuàhàn-nsià cate stnàhá-nsiá, dandu xiñuhu cuyucun iin tutu índu itúámà", nisa cachi-nè.

³² Doco yùhù cachí, nú ni caté iin tiàa ñahàdihí-te, te màdiá nì cáhàn-ña xí inga tiàa nduá, dandu cuàchi cundua nú ni nándàhà tú-ña, vachi (còá dísàhà-xí) cate nècuàchì primeru mà-ñá. Te iin nècuàchì nandàhà xì ñahà nì xitià mà, divi-ni nsidá cuàchi stná-nè.

Cachí ley xi Jesús, màsà nunca chinaha-nda Dios sàhà iin chuun

³³ 'Sà-ínahá stná-nsià nì cachi nècuàchì sàhana: "Nú ni chináhá-ndá Stoho-nda Dios ñà-quida-nda iñàha, dandu fuerza icúmí-ndá quida ndisa-ndañá cumplir".

³⁴ Doco yùhù cachí, màsà nunca chinaha-nsiá Dios sàhà iin chuun: nì màsà ndácùcahan-nsiá ansivi, te chinaha-nsiá mii-yá sàhà ni-iñàha, vachi meru lugar ndé dandacú-yá nduá (te solo mii-yá dandacú-yá nùá).

³⁵ Ni màsà ndácùcahan stná-nsià quìvì ñuhìvì yohó, vàchi nahi lugar ndé ndetátú sàhà-yá nduá. Ni màsà ndácùcahan stná-nsià quìvì ñuu Jerusalén, vàchi divi ñuu mii-yá nduá, te rey fuerte nduú stná-yà.

³⁶ Ni màsà ndácùcahan stná-nsià dìni-nsiá, vàchi có-dàndàcú-nsiá sàhà dìni-nsiá ñà-chicata-nsia idi ndèhí, te ò idi cuxín, (mii-yá cachi-yà).

³⁷ Nú cuní-nsià cachi-nsià iin ñà-ndácuisì, dandu jaan, ò á coó cachi-nsià, vàchi nú más gà ni cachí-nsià, dandu ñà-vàxi nù ñà-malu nduá.

Màsà nàchítácùhá-ndà sàhà ñà-nduá nì quida nèhivì xì-ndà

³⁸ 'Sà-ìnáhá stná-nsià nìsa cachi-nè: “Nú ni tavá nèhivì iin nduchìnùù-ndà, dandu xiñuhu quee stná iin nduchìnùù mii-né. Te ò nú iin nùhu-nda ni tavá-né, dandu ni queé stná iin nùhu mii-né”.

³⁹ Doco yùhù cachí, màsà dúcun ndahà tnàhà-ndà xì nècuàchì quidá quíni xí-ndá. Vàchi nú ni caní-né nùù-ndà ladu cuàhá-ndà, dandu ni cuáha stná-ndà inga ladu-ndà.

⁴⁰ Te nú sanícuàchi-ne sàhà-ndà, te candiáá-nè dùhnù-ndà, dandu ni cuáha stná-ndàné dòò-ndà.

⁴¹ Te nú ni tnií-nèndó ñà-fuerza cunsida-nda carga xi-ne iin dava hora, dandu inga dava hora gà ni cúnsidá-ndáñâ.

⁴² Te nú xícàn iin nèhivì ñàhà nùù-ndà, dandu ni cuáha-ndané; te nú cuní toó-né ñàhà, dandu màsà cuídáhán-ndáñâ nùù-né.

Ndiá ìcà-ndà cuu ini-ndà sàhà ana xiní ùhì xì-ndà

⁴³ 'Sà-ìnáhá stná-nsià dohó nìsa cachi nèhivì sàhà: “Icúmí-ndá cuu ini-ndà sàhà nècuàchì cutnáhá vaha xi-nda, doco nèhivì xiní ùhì xì-ndà, ni cuní ùhì stná-ndàné”, nìsa cachi-nè.

⁴⁴ Doco yùhù cachí, xiñuhu cuu ini-ndà sàhà nèhivì xiní ùhì xì-ndà te casàhú vii-ndà xì nèhivì xícàn chihán dìquì-ndà; te obra vaha ni quidá stná-ndà sàhà nèhivì có-xiñùhù xì-ndà; te nú cânàhá-nè xì-ndà, te quidá quini-ne xì-ndà, dandu ni cécàn tàhvi-ndà nùù Dios sàhà-né.

⁴⁵ Cunaha-nsiá, nú ni quidá-nsiá ducán, dandu cunduu ndisa-nsia dèhe Yuandi-aha-nsiá íá ansivì, vàchi mii-yá, dandacú-yá ñà-xìnu orá nùù nsidanicuú nèhivì, vaha-ne ò malu-nè. Te dacuún stná-yà dàvì nùù nsidaa nèhivì, a quidá víi-né, ò có-quidá víi-né.

⁴⁶ Vàchi nú cuisì nèhivì cuú ini xì sàhà-nsiá cuú stná inì-nsia sàhà-xí, dandu mà níhì-nsiá premiù sàhájàn. Dècuèndè nècuàchì íá cuàchi-xi nahi tè-dàchíyàhvi (ñuu-ndà yohó), quidá stná-nè ducán.

⁴⁷ Te nú cuisì tnaha-nsia cásàhú xì-nsiá, pues màdì obra ndiaha nduájàn, vàchi divi ducán quidá stná nèhivì có-ìnáhá xí Dios.

⁴⁸ Ñàyùcànduá, xiñuhu quida vii ndisa-nsia nacua quidá Yuandiaha-nsiá íá ansivì.

6

Ñà-nduá nì cachi Jesús sàhà nansa quida-nda obra

¹ 'Màsà quidá-nsiá obra xi-nsia sàhà-ñá cundehè nèhivì, vàchi nú sàhà ñà-jaàn nduá, dandu còò ñà-vaha níhì-nsiá sàhàmà nùù Yuandiaha-nsiá íá ansivì.

² Ñàyùcànduá, nú cuàhàn-nsiá dacútàhvi-nsiá nècuàchì ndahví, màsà cátétnùhu-nsia ñà-jaàn. Vàchi ducán quidá nèhivì datiaá uun nduú nèhivì vaha, quidá váté-né obra xi-ne veheñuhu ò calle sàhà-ñá cuní-nè ndee vaha-ne nùù nèhivì. Te ñà-ndàà nduá cachí xì-nsiá yohó: cuisì ñà-jaàn cunduu ñà-vaha níhì-né.

³⁻⁴ Doco mii-nsiá, na quidá-nsiá iin obra, quida dèhé-nsiàñâ, dandu coo dèhà` nùù nèhivì. Doco nùù Yua-nda Dios, còò, vàchi indéhe-yá, te nùù mii-yá icúmí-nsiá níhì-nsiá ñà-vaha xi-nsia.

Ñà-nduá nì cachi Jesús na ní chinaha-yàndó nansa càcàn tàhvi-ndà nùù Dios

⁵ 'Na xicàn tàhvi-nsiá nùu Dios, màsà quidá-nsiá na quidá nècuàchì datiaá uun nduú nèhivì vaha. Vàchi mii-né, cudí ini-nè cuita-ne nacuat-veheñùhu ò esquina sàhà-ñá cundehè nèhivì-né. Doco ñà-ndácuìsì nduá yohó cachí: cuiì ñà-cundehè nècuàchìmànè cunduu ñà-vaha xi-ne.

⁶ Doco ndohó, na xicàn tàhvi-ndà nùu Yua-nda Dios, ni nánsìhvi-nda ini vehe-nda, te nacadi-ndà yehè; dandu miini-yá inini-yá na cáhàn-ndà xi-yá. Te indéhe-yá, mate nèhivì, còó, có-xini-nè ñà-nduá quidà-ndà. Dandísá nihì-ndà iin ñà-vaha xi-nda nùu-yá.

⁷ 'Na cáhàn-ndà xi-yá, màsà cáhì-ndà iin-ni iñaha cuàhà xichi na quidá nècuàchì có-ìnáhá xí Dios, vachi mà chindéàmà. Mii-né, tuxí ini-nè icúmí Dios cunini-yane ñà-cuàhà guá cáhàn-nè, doco còó.

⁸ Ñàyùcànduá, màsà quidá-nsiá na quidá mii-né. Vachi Yuandiaha-nsiá, mate táñaha ga cachi-nsiá xi-yá índu necesidad icúmí-nsiá, doco sà-ìnáhá-yá.

⁹ Ñàyùcànduá, nahi palabra yohó cachi-nsiá na xicàn tàhvi-nsiá nùu-yá:

Yua-nsí Dios ía ansivi, ni ndácùcahan tnùñuhu nèhivì quivì-ní.

¹⁰ Te yàchì ni sàá stná tiempu cusahnu-ní ñuhivì yohó, xicàn tàhvi-nsí. Te nacua quidá ana ndoó ansivi ñà-nduá dandacu-ní, divi ducan ni quidá stná nèhivì ñuhivì yohó.

¹¹ Pan xi-nsi iin quivì iin quivì, taxi tahvi-ñà nùu-nsí vichi.

¹² Te cuicahnú inì-ní sàhà cuàchi iníhíca-nsí, nacua xicahnú stná ini nsiùhù sàhà nèhivì iníhíca nùu-nsí.

¹³ Te chindee-ní nsiùhù ñà-màsà dáca nèhivì nsiùhù; te dacácu stná-ní nsiùhù nùu ñà-malu nicanicuahàn. Vachi cuiì mii-ní nduu-ní rey ndiaha cusáhnù dandacu inicutu, te cuiì mii-ní ndiaha-ní nicanicuahàn. Amén. (Ducán cachi-nsiá.)

¹⁴ 'Vachi nú ni cuicáhnù inì-nsia sàhà nèhivì ni quida quini xi-nsiá, dandu stná Yuandiaha-nsiá ía ansivi, cuicahnú stná ini-yà sàhà cuàchi mii-nsiá.

¹⁵ Doco nú màsà cuicáhnù ini-nsiá sàhà nèhivì dava ga, dandu mà cuicáhnù stná ini-yà sàhà cuàchi mii-nsiá.

Nansa quida-nda na iníhù-ndà ndoó dòcò-ndà

¹⁶ 'Na iníhù-nsiá ndoó dòcò-nsiá, màsà dátiaâ-nsiá cuhúun ini-nsiá. Vachi ducán xíquida stná nècuàchì datiaá uun nduú nèhivì vaha, quidá cánúu-nè ndoó-né tnùnsí ini sàhà-ñá cundaà ini nèhivì iníhù-né. Te ñà-ndácuìsì nduá cachí xi-nsiá vichi: cuiì ñà-jaàn cunduu ñà-vaha nihì-né.

¹⁷ Doco mii-nsiá (màsà quidá-nsiá ducán). Na iníhù-nsiá nùu Dios, quisi-nsia, te nduvì dínì-nsiá

¹⁸ sàhá màsà cundáà ini nèhivì iníhù-nsiá; cuiì Yua-nda Dios cundaà inì-xi, vachi indéhe-yá, mate có-tùí-yá nùu nèhivì; doco indéhe-yá, te cuàhatahvi stná-yànsiá ñà-vaha xi-nsia (sàhámà).

Ndè gloria xiñuhu càyà ñà-cuicà-ndà

¹⁹ 'Màsà dácâyà-nsiá ñà-cuicà-nsiá ñuhivì yohó, vachi icúmí cusiquidi-ñá, te ò nana ditnu-ña, te ò quíhvi tècuìhnà quida cuìhna xán.

²⁰ Còó, dècuèndè gloria ni càyà-ñà, vachi yucán mà nunca cusiquidiá, ni mà náná dítnú-ñá, ni mà quíhvi stná tècuìhnà quida cuìhna xán.

²¹ Ducán quida-nsia, vachi ndé quida-nda cuenta ía ñà-cuicà-ndà, divi lugar yucán cuàhàn-ndà cunihnu cuahà ini anima-ndà.

Ejemplu sàhà nduchìnúu nèhivì

²² 'Nduchìnúu-ndà nduú ñà-tùínúu iquicúñú-ndà. Ñàyùcànduá, nú ía vaha ma, dandu vátùnì cutuì nuù-ndà ñà-quida-nda nsidanicuú iñaha.

²³ Doco nú cuhíá, dandu inicutu nácuìln tnùu. Te ducán stná xi anima nèhivì, nú iin tnúú ndé xiñuhu datnúu mii-yá, dandu ¡ndahví-nè! Vachi tnùndoho nduá, nú ducán.

Mà cúí cundoo ùi patrón xi-nda

²⁴ 'Tin peón, mà cúí cundoo ùi patrón xi-tè, vèchi nú ducán, dandu iin-ne coo manì nùù-té, te inga-nè cundehè úhì-te. Te ò ni cachí-ndà, iin-ne cahíchi inì-te, te inga-nè mà coo vaha xi-té. Te ducán iá stná xì mii-nsiá, nú cuú inì-nsia sàhà dihùn, dandu mà cúí cunucuachi stná-nsià nùù Dios.

Nansa ndiaá Dios nècuàchì xínduu dèhe-ya

²⁵ 'Ñàyùcàndüá, yùhù cachí xì-nsiá, màsà nácání ini-nsià sàhà vida xi-nsia nansa nihì-nsiá ñà-cuxi-nsia coho-nsia, te cundixi-nsia. Còó, vèchi màdì cuísi ñà-cuxi-nda ndüá xiñuhu sàhà-ñá cucumi-nda iin vida ndiaha; te cuerpu xi-nda, chicá ndiaá nùù sìcoto ndixi-nda.

²⁶ Cundehè-nsiá laa ndavá ansivi, có-xitú-si, ni có-chívàha-sì nùnì, vèchi còò cosecha ndaní-si. Còó, cuisì nùù Yuandiaha-nda iá ansivi níhì-sí ñà-itiácù-si. Pues nàhà xicà, chicá ndiaá mii-nsiá nùù quisì mà.

²⁷ 'Ñàyùcàndüá, mate yáha ga ni cahní-nsiá dìnì-nsiá, te nacání ini-nsià, uun-ni queámà, vèchi mà níhì-nsiá cuahnu ga-nsià ni-inga dava metro.

²⁸ 'Ni màsà nácání stná inì-nsia sàhà ñà-ndüá cundixi-nsia. Cundehè-nsiá nansa sahnú ita yucù. Có-quidáchúün-yá, ni có-quidá vaha stná-yà sìcoto.

²⁹ Doco chicá ndiaha nàhà ita mà nùù rey Salomón (nìsa à sàhana), mate yáha ga vico nì sandixi-ne.

³⁰ Iin ita, yùcù-ni ndüá (có-ndiàá ndisa); quivì vitni iá` campu, te tnaa sàni ìchà, vihini quèa xitnù coca. Doco mate ducán ndüá, ndiaha gá nì quidavàha Dios ita-ñà. 'Ñàyùcàndüá, vihi gá icúmí-yà cuàhatahvì stná-yà ndohó (ñà-ndüá xiñuhu). Doco mii-nsiá, iyuhu gá xiníndísâ-nsiá mii-yá.

³¹ 'Pues yùhù cachí, màsà nácání ini-nsià, te màsà cáchì-nsià: “¿Índù tùi ñà-cuxi-nsi coho-nsi, te cundixi-nsi?”

³² Vèchi nèhivì nsidaa raza gà ndoó ñuhiví, divi ñà-jaàn ndüá nandúcu-nê. Doco mii-nsiá, iá Yuandiaha-nsiá ansivi, te sà-ínahá-yà xiñuhu nsidaájàn nùù-nsiá.

³³ 'Ñàyùcàndüá, xiñuhu nanducu-nsiá (nansa chivàha vii-nsiá ley xi), ñuhiví ìi xí-yá, te quida-nsia cumplir ñà-vàha cuní-yà quida-nda, dandísá nihì stná-nsià nsidaa gá ñà-ndüá quidámànì nùù-nsiá.

³⁴ Te màsà nácání inì-nsia sàhà ñà-ndüá cui yàha-nsia tnaa idá, vèchi nú sàni sàà quivì mà, dandu (nsidaámà icúmíâ quee viá), mate ni nácání cuáhà ini-nsià. Nsiquivì iá cuáhà ñà-ndüá yáha-nsia, ñàyùcàndüá có-xiñùhù nacani stná ini-nsià sàhà tnaa idá —nì cachi Jesús.

7

Màsà dácuídâ cuàchi stnaha-nda

¹ (Dandu nì cachi stná Jesús:)

—Màsà dácuídâ cuàchi stnahá-nsiá, dandu mà dácuídâ cuàchi stná Dios mii-nsiá.

² Vèchi nacua quidá mii-nsiá dacuidá cuàchi stnahá-nsiá, divi ducán icúmí stná-yà quida-ya xì-nsiá. Vèchi vara chitácùhá-nsià, divi icúmí stná-nsià cuitacùhá-nsià.

³ 'Iin nèhivì, ¿índù chuun (indéhe-né falta xi ñanìtnaha-ne, te xitnùhu-ne nècuàchì-mà)? Vèchi ducán queámà na ian cuní-nè cundehè-né iin mihì tìi inácaa ini nduchìnúù nècuàchì-mà, te nduchìnúù mii-né, iin yutnù cahnú ndüá inácaa.

⁴ Te nú ducán, ¿índù chuun cachí-nè xì ñanìtnaha-nemà: “Nacoo-ní yùhù nì tàvì mihì tìi inácaa cucuín nduchìnúù-ní”?

⁵ Nècuàchì cachí ducán, datiaá úún-né ndiaá ndisa-ne. Vèchi dihna xiñuhu quee yutnù cahnú nduchìnúù mii-né, dandu vètùnì cutùì vii núù-né ñà-tavà-né mihì tìi inácaa nduchìnúù ñanìtnaha-nemà.

⁶ (Mà váha ndatnuhu-nda xi nèhivì nansa ni nì cui sàhà) yà-ìi, còtó quida-ne xì-ndà na quidá sihina cuehé. (Uun-ni queá ñà-cachi-nda palabra ndiaha xi nèhivì síquinì mà), vèchi

na quidá cochí quidá stná-nè, vèchi mate sidiqi yáha ga ndiaá ni chindóó-ndá nù-sí, doco cuànihni sàhà-siá.

Nansa cundiatú anima-ndà

⁷ 'Càcàn tàhvì-nsiá, te nìhì-nsiá. Nanducu-nsiá (ñà-vàha nù-yá), te icúmíá tùia. Càhàn-nsiá, te nuna yehè-yá.

⁸ Vèchi nsidaa ana xicàn tàhvì, icúmí-nê nìhìtáhvì ndisa-ne, te nsidaa ana nandúcú xí ñà-vàha, icúmí-nê nìhì-néà; te nsidaa ana xicàn tàhvì yehè-yá, icúmí-yâ nacuna-ya nù-né.

⁹ 'Nú ni cãcàn iin dèhe-nsia pan cuxan, divi pan cuàha-nsiañà, màdì yùu.

¹⁰ Te nú cuñu siaca xicàn, pues divi cuñu quisi mà cuàha-nsiañà, màdì cóo.

¹¹ Cunaha-nsiá, mate nèhivì cuáchi nduú-nsiá, doco tùha-nsia cuàha-nsia dèhe-nsia ñà-íá viì. Ñàyùcàndùá, vihi gá icúmí Yuandiaha-nsiá íá ansivi cuàha-yansià ñà-vàha nú ni cãcàn tàhvì-nsiá nù-yá.

¹² 'Ñàyùcàndùá, nacua cuní mii-nsiá quida nèhivì xì-nsiá, divi ducán quida stná-nsiá xì mii-né. Vèchi ñà-jaàn nduá cachí nù nsidaa tutu nduú ley xi Dios, xì nù stná tutu nì tiaa profeta nìsa cahàn cuenta xi-ya.

¹³ 'Quìhvi-nsia yehè cuiín sáà (gloria), vèchi xica yehè ichì cahnú cuàhàn ndé ndañuhu-nda, te cuàhà gá nèhivì quìhvi yucán.

¹⁴ Doco sitnìhì yehè, te cuiín ichì cuàhàn ndé cutiacu ndiaha-nda; te sàhà-ñá nduá ichì cuiín, ñàyùcàndùá sacu nèhivì ndácùhun xán.

Nansa cundaà ini-ndà ìndù nèhivì càhàn ndisa cuenta xi Dios

¹⁵ 'Cuidadu cundoo-nsia xì nèhivì tnùhù dananí úún càhàn cuenta xi Dios, vèchi cutu vaxi-ne (datiaá úún-né màni ini-nè) nahi riì mansu, doco anima-nè, cóo, nahi lobu dana, ducán íá.

¹⁶ Doco cuisì cundehè-ndà ñà-nduá quidá-né, dandu cundaà ini-ndà nansa ndisa íá anima-nè. Te ducaní íá stná xì-né na íá xì yutnù fruta, mà cuáha yutnù ññu ni-iin sì-uva, te mà cuáha stná yucù ññu ni-iin stná sìhigu.

¹⁷ Mà cúí, vèchi nsidaa yutnù vaha, puru fruta vaha sáha-nù. Te yutnù cóo chuun xi, cutu ñà-chìcuéhè sáha-nù.

¹⁸ Doco iin yutnù vaha, mà cúí cuàha-nù iin fruta chìcuéhè. Ni-iin stná yutnù cóo chuun-xi, mà cuáha-nù ni-iin quisi vídì.

¹⁹ Te nsidaa yutnù có-sáha xì ñà-íá viì, icúmí-nù tàhndè-nu, te quèe-nù ññu coco-nù.

²⁰ Ñàyùcàndùá, na quida-nda xi iin yutnù, nacúní-ndànú sàhà fruta-nu, ducán nacúní stná-ndà nèhivì sàhà ñà-nduá quidá-né.

Màdì nsidaa nèhivì càcu-ne, nì cachi Jesús

²¹ 'Cuàhà nèhivì cachí-nè xì: "Stoho-nsì Señor nduu-ní". Doco màdì nsidaa nècuàchì mà sàa-nè cundoo-ne ññuhivì ì xì Yuamání íá ansivi; cuisì nèhivì quidá ndisa xi ñà-nduá cuní-yá, divi sàa yucán.

²² Te cunaha-nsiá, na sàa quivì (xìnu tiempu), dandu icúmí cuàhà nèhivì cachi-nè xì: "Stoho-nsì Señor, sàni càhàn-nsì cuenta xi-ní, te nì ndacùcahan-nsì quivì-ní; dècuèndè nì tavà stná-nsì ñà-malu ññuhú ini nèhivì, te cuàhà gá stná milagru nì quida-nsi na ní ndacùcahan-nsì quivì-ní", cachi-nè.

²³ Dandu yùhù naxiconihí nù-né, te cachì: "Tàcùnî nsiohó; cuahán-ndâ iladu, vèchi cuàhà ñà-chìcuéhè sàni quida-ndá".

Nansa nì nacani Jesús ejemplu sàhà ùi vehe

²⁴ 'Ñàyùcàndùá, nsidaa nèhivì iníní xí ñà-nduá cachí, te quidá ndisa-neà cumplir, nduú-né na iin tiàa nchichí nì nanducu xi iin xaan ndé íá cavà fuerte, te yucán nì chinduhù-né vehe-ne.

²⁵ Daaní, nì quesaha nì cuun dana dàvì, te nì xìnu tèñuhu cuáhà. Dandu nì dàñà stná tàchì fuerte, te nì dùcùn nsidaámà ìcà vehe ma. Doco cóni ndúá, vàchi nùù cavà fuerte indúhá.

²⁶ Doco cunaha-nsiá, nèhivì inínì uun xi ñà-ndúá cachí, te có-quihín casu-nè, na iin tiàa ndañuhu nduú-né, divi na iin tiàa nì quidavàha xi vehe-xi dìquì ñusì-ní.

²⁷ Vàchi na ní quesaha nì cuun dana dàvì, te nì dàñà stná tàchì fuerte, dandu nì xìnu tèñuhu cuáhà yucán. Te nì dùcùn nsidaámà ìcà vehe ma. Te nì ndua iá nì chàhmà dahuan —nì cachi Jesús.

²⁸ Daaní, na ní nsihi nì càhàn-yà xì nèhivì ducán, dandu nì ndulocó-nè sàhà ñà-ndúá chináhà-yà.

²⁹ Vàchi na iin nèhivì tùha dandacú, ducán nì chinaha-yànè, màdì nahi modo chináhà nècuàchì ley xi veheñùhu.

8

Nansa nì dandúvaha Jesús iin tiàa icúmí cuèhè lepra

¹ Daaní, nì nuu Jesús yucù yucán, te cuáhà gá nèhivì nì tenchicùn xì-yá.

² Te cunaha-nsiá, yucán nì tnàtuu stná iin tiàa icúmí cuèhè lepra, te nì tutuyuhu-né ñuhù sàhà-yá, cachí-nè xì-yá:

—Señor, nú cuní-ní, vètùni dandúvaha-ní yùhù.

³ Dandu nì chituu Jesús ndahà-yá nùù-né, te nì cachi-yà:

—Juùn. Vichi duha ni ndúvaha-ní, cachí xì-ní.

Dandu divi hora nì cachi-yà xì-né ducán, nì ndañuhu cuèhè xi-ne.

⁴ Dandu nì cachi-yà xì-né:

—Cunaha-ní, màsà cáchì-ní ni-iñàha xi nèhivì. Cuisì cuahán-ní nùù dùtù dacúndèhe-nínè ìcà-ní, dandu nacuàha-ní promesa xi Dios nacua cachí ley xi Moisés sàhà-ñá cundaà ini nèhivì ñà-sàni nduvàha-ní —nì cachi-yà.

Nansa nì dandúvaha Jesús mozo xi iin capitán nì quixi ladu Roma

⁵ Daaní, nì nasaa Jesús ñuu Capernaum, te yucán nì tnàtuu iin capitán romanu, nì sacundahví-nè nùù-yá,

⁶ cachí-nè:

—Señor, iá iin mozo xi cuhí, indúhu-né cama vehi; sàni dàñà ì cuerpu-nè, te yáha ga ndohó-né.

⁷ Dandu nì cachi Jesús xì capitán mà:

—Jaàn másàì dandúvahi-nè.

⁸ Te nì naxiconihí capitán mà nùù-yá, cachí-nè:

—Señor, có-nàtùì yàha-ní vehi. Cuisì dandacu-ní xì palabra xi-ní, te nduvàha mozo xi.

⁹ Vàchi yùhù, ndoó stná ana dandacu-xi nùù, te mií, dandacú stnàì nùù soldadu xi. Nú ni cachí xì iin-tè: “Cuahán”, dandu cùhùn-te; te ò nú ni cachí xì ingà-te: “Naha”, dandu quixi-tè; te na cachí stnàì xì iin mozo xi: “Dohó quido”, dandu ducán quida-te —nì cachi capitán mà.

¹⁰ Nì nsihi nì inini Jesús ñà-jaàn, dandu nì ndulocó-yà, te nì cachi-yà xì nèhivì xínchicùn xì-yá:

—Cunaha-nsiá, tàñáha ga cunì ni-iin nèhivì ñuu-ndà Israel yohó ndudává xì capitán yohó, vàchi cuáhà gá xiníndísà-né.

¹¹ Te cachí stnàì xì-nsiá, icúmí nataca cuáhà gá nèhivì quixi inicutu ñuhiví dècuèndè ndé xínu orá xì ndé quécahnu-ya, te nataca-nè cutnahá-né xì Abraham xì Isaac xì Jacob ñà-cundoo-ne (vicò) ñuhiví ì xì Dios.

¹² Doco nèhivì dava ga cuáhàn cundoo ñuhiví ì mà nì cùí, icúmí-nè ndiachi-né fuera ndé iín tnúú; te yucán icúmí-nè cuacu fuerte-nè, te càna nùhu-ne.

¹³ Daaní, nì cachi Jesús xì capitán mà:

—Vàtùni nùhù-ní vichi, te nacua sàni xinindisa-ní, divi ducán icúmí coo —nì cachi-yà. Dandu divi hora yucán nì nduvàha mozo xi nècuàchìmà.

Nansa nì dándúvàha Jesús dido Pedro

¹⁴ Daaní, nì sàà Jesús vehe Pedro, te yucán nì xini-yà cuhí dìdo-ne ñahà; indúhu-né, nácuàha yocá-nè.

¹⁵ Ñàyùcàndúá, nì tnii-ya ndahà-né, te nì cuxio cuèhè mà. Dandu nì ndacuiin-nè nì quesaha-né nì xinucuachi-né nùù-yá xì compañeru-yà.

Nansa nì nduvàha cuàhà gá nèhivì nì quida Jesús

¹⁶ Daaní, nì cuñaà, te yucán nì sàà stná cuàhà gá nèhivì, ndacá-né cuàhà nècuàchì inácaa ñà-malu inì-xi. Te cuisì-ní nì càhàn-yà xì iin iin nècuàchìmà nì dándàcú-yá nùù-sí, te nì quee dahuun-sì nùù-né. Te nsidaa gá stná nècuàchì cuhí nì casaà yucán, nì dándúvàha stná-yànè.

¹⁷ Ducán nì quida-ya sàhà ñà-nì cùú ndisa ñà-ndúá nì cachitnùhu nèhivì xí Dios nani Isaías na ní cachi-nè palabra yohó: “Mii-yá nì dàcúxíó-yá cuèhè xi-nda, vèchi nì nacuida-ya ñà-ndúá dandoho xi-nda”.

Nansa nì cachi Jesús xì nèhivì cuní cunchicùn xì-yá

¹⁸ Na ní xini Jesús sàni tnàtuu cuàhà gá nèhivì nùù-yá, dandu nì cachi-yà xì nècuàchì dacuahá-yá ñà-nì cùhùn-nè xì-yá ndé inga ladu mar.

¹⁹ Te daa nì tnàtuu stná iin nècuàchì ley xì veheñùhu, cachí-nè xì-yá:

—Maestro, dispuestu ié cunchicùn mii-ní ndéni nì cui nì cùhùn-ní.

²⁰ Doco nì cachi-yà xì-né:

—Lusu, iá nchihò-sí; te laa ndavá ansivi, iá stná tacà-si; doco yùhù ana nduú Tnaha Nèhivì Ñuhivì, còò ni-iin lugar ndé cunduhí cùdì.

²¹ Daaní, inga nèhivì nduú iin ana dacuahá-yá, nì cachi stná-nè xì-yá:

—Señor mío, dihna ni núhì vehi coo guè dècuèndè nú sàni ndùxin yué (dandu cunchicùn mii-ní).

²² Dandu nì cachi-yà xì-né:

—Còó. Cunchicùn dahuun-ní yùhù. Nècuàchì còò vida (ndiaha nùù anima-xi), divi ni cúxin xi nsì xi.

Nansa nì quida Jesús iin milagru, te nì cucuìn tàchì, te nì nàcùñuhu dadí tècuí mar

²³⁻²⁴ Daaní, nì nana Jesús lancha, mii-yá xì nècuàchì dacuahá-yá, te cuàhàn-yà xì-né nùù mar. Doco nì quesaha caná ndéé tàchì, te nì nacuahnu todò tècuí, te cuàhà gá-te nì quee stná ini lancha. Doco mii-yá, quídì naà-yá.

²⁵ Ñàyùcàndúá, nì nataca nècuàchì dacuahá-yá ndé indúhu-yá, te nì dànsícùihnu ini-nèyà, cachí-nè xì-yá:

—¡Stoho-nsì Señor! ¡Dacácu-ní nsiùhù, vèchi cuàhàn-ndà càhà-ndà!

²⁶ Dandu nì cachi-yà xì-né:

—¿Índù chuun yúhì guâ-nsià, te có-càhvì-nsiá xì Dios?

Dandu nì ndacuiin-yà nì càhàn-yà nì sadi-yà nùù tàchì xì nùù tècuí mar mà. Te (vichi vichi) nì nàcùin dàdí uun inicutu.

²⁷ Dandu nì candulocó nècuàchìmà nì cachi-nè:

—¿Índù clase tiàa nduú ana yohó ñà-dècuèndè tàchì xì mar iníní xí-nê?

Nansa nì tavà Jesús cuàhà ñà-malu ñuhú ini iin tiàa ñuu Gadara

²⁸ Daaní, nì sàà Jesús inga ladu mar yucán ndé nduú ñuu Gadara. Te yucán nì caquee ùi nèhivì mahì cueva ndé xí-indùxin nsi, te nì tnàtuu-ne nùù-yá. Ndúì-nè, ñuhú ñà-malu ini-nè, te dana sàstnùhù-né, mà cùì yáha ni-iin nèhivì ichì yucán ndé ndoó-né.

²⁹ Te nì càna ndee-né, cachí-nè xì-yá:

—Mii-ní, Dèhemanì Dios nduu-ní. ¿Ndíà cunduu-ní nsiùhù? ¿A váxi-ní dandoho-ní nsiùhù, mate tá sâà hora ndoho-nsi? —nì cachi-nè.

³⁰ Te xica yucán ndoó cuàhà stná cochi xixáhan-sì.

³¹ Ñàyùcàndùá, nì sacundahví nsidaa ñà-malu mà nùù-yá, cachá:

—Nú cuàhàn-ní tavà-ní nsiùhù, dandu dayáha-ní nsiùhù ini cochi cuàhà yucán.

³² Dandu nì cachi-yà xán:

—Cuahán-ndâ, cachí.

Dandu nì caquee nsiha nì sàcùñuha ini cochi yucán. Ñàyùcàndùá, carrera nì canuu nsihi-sì candiaa yucán, te nì còyo-sì ndè mar nì càhà-sì.

³³ Dandu tè-ndiáá xì cochi mà, yáha ga nì yùhí-te; te mànuhù-té carrera ndé nduú ñuu yucán, nì cachitnùhu-tè xì nèhivì ñuu mà ñà-ndùá nì cuu, xì sàhà stná nècuàchì nìsa ñuhu ñà-malu inì-xi.

³⁴ Ñàyùcàndùá, nì caquee nsihi nèhivì ñuu mà nì casaà-nè ndé iá Jesús; te na ní xini-nèyà nì sacundahví-nè nùù-yá ñà-nì quèé dahuun-ya ladu xi-ne.

9

Nansa nì dàndúvaha Jesús iin nèhivì nì dàñà ì cuerpu-xi

¹ Daaní, nì nana tu Jesús lancha, te nì yàha-ya mar mànuhù-yá inga ladu ndé nduú ñuu-yà.

² Te yucán nì tnàtuu nèhivì nsida-xi iin nècuàchì cuhí nì dàñà ì cuerpu-xi, indúhu-né camilla. Ñàyùcàndùá, na ní xini-yà ñà-cuàhà guá xíxinindisá nèhivì yucán mii-yá, nì cachi-yà xì nècuàchì cuhí mà:

—Màsà cúhúún inì-ní, hijo, vâchi yùhù xicáhnû inì sàhà cuàchi-ní.

³ Doco cunaha-nsiá, yucán ndoó stná dava maestru xi ley xi veheñùhu, te nacání ini-nè: “¡Mà ndóo ini Dios sàhà ñà-ndùá nì cachi Jesús mà!”

⁴ Doco mii-yá, ináhá-yâ nansa nacání ini nècuàchì mà, ñàyùcàndùá nì cachi-yà xì-né:

—¿Índù chuun có-nacání ví inì-nsia?

⁵ Cachi-nsià xí: ¿Índù milagru nduú ñà-chicá ùhì quida-nda: a ñà-cachi uun-nda (xì nècuàchì cuhí) ñà-xicáhnû ini-ndà sàhà cuàchi-ne, te ò ñà-cachi-ndà xì-né ni ndácuíin-nè, te nacaca-nè?

⁶ Pues yùhù ana nduú Tnaha Nèhivì Ñuhívì, cuàhìn quide iñàha sàhà-ñà cundaà ini-nsià iá ndisa derechu cuicahnú inì sàhà cuàchi nèhivì ñuhívì.

Dandu nì cachi-yà xì nècuàchì cuhí mà:

—Ndacuiin-ní, ndanihi-ní camilla xi-ní, te xuhun-ní vehe-ní.

⁷ Dandu, nì ndacuiin nècuàchì mà, mànuhù-né vehe-ne.

⁸ Na ní xini nèhivì cuàhà itá yucán ñà-ndùá nì cuu, dandu nì yùhí-nè, te nì naquimanì stná-nè Dios; vâchi nì xini-nè iá ndisa ana nì nihítáhvì cuàhà nùù-yá.

Nansa nì cana Jesús iin nècuàchì dachíyàhvi nani Mateo

⁹ Daaní, nì quee Jesús lugar yucán cuàhàn-yà. Te nì xini-yà yucán iá iin tiàa nani Mateo, iá-nè nùù mesa ndé dachíyàhvi-ne. Te nì cachi-yà xì-né:

—Nahà-ní cunchicùn-ní yùhù.

Dandu nì ndacuiin nècuàchì mà cuàhàn stná-nè xì-yá.

¹⁰ Daaní, después iá-yà iin vehe xixí-yá, te cutnáhâ stná-yà xì cuàhà nècuàchì dachíyàhvi, xì cuàhà gá stná inga nèhivì cachí-nè iá cuàchi-xi; xíndoo nsidaa-né xixí-né xì-yà xì nècuàchì dacuahá-yá.

¹¹ Te nì caxini nècuàchì fariseu nansa quidá-yá (xixí-yà xì nècuàchì mà), te nì càhàn-nè xì nècuàchì dacuahá-yà mà, cachí-nè:

—¿Índù chuun cutnáhâ maestru xi-nsia xixí-né xì cuàhà tè-dachíyàhvi, xì dava ga stná nèhivì cuàchi?

¹² Doco nì tiacu Jesús ñà-cachí-nè ducán; ñàyùcàndùá nì cachi-yà xì-né:

—Màdì nècuàchì ndáa vaha xiñuhu xi ana quidatatna xi-né. Còó, nècuàchì cuhí xiñuhu xi ana quidatatna xi-né.

¹³ Ñàyùcàndùá, cuahán-nsià dacuahá-nsiá nansa cuní cachi Dios nùù tutu ìì ndé cachí-yà: “Chicá cudî inì ñà-cundehè ndahví stnahá-nsiá, te màdiá cuàha-nsia yùhù iin promesa”, cachí-yà. Vàchi yùhù, màdì nèhivì nihnú ndàcuisì inì-xi vaxi càhàn xí ñà-naxicocuîin ini-né. Còó, nèhivì cuáchi vaxi nanduquí áma naxicocuîin ini-né sàhà cuàchi-ne —nì cachi Jesús.

Ñà-ndùá disáhà-xí cónisá ìnhî nècuàchì dacuahá Jesús na íá va-ya ñuhiví yohó

¹⁴ Dandu nì catnàtnuu nècuàchì nchícùn xì Juan Bautista, te nì ndàcàtnùhù-né nùù-yá, cachí-nè:

—Nsiùhù xì stná nècuàchì fariseu, ìnhî cuahà-nsí ndoó dòcò-nsi, doco nècuàchì dacuahá mii-ní, còó, có-ìnhî-né. ¿Índù chuun?

¹⁵ Dandu nì cachi-yà xì-né:

—Nècuàchì ndoó vicò nándàhà, ¿a cúí cundoo-ne tnùnsí ini na meru ndoó-né cutnàhà-né xì noviu? Còó. Doco vaxi iin quivì mà cóó gá noviu nùù-né; dandísá tiempu yucán icúmí-né cunihî-né cundoo dòcò-né.

Ñà-ndùá disáhà-xí icúmí ndañuhu estilu sàhana, divi sàhà estilu saa nì nacoó Jesús

¹⁶ 'Sicoto saa, màsà nàcàhmá-ndañá nùù ñá-tùhú, vaxi nú ducán, dandu dandánsiá ndé nì nàcàhmá, te chicá ndatá sicoto tuhú mà. Dandu ñà-sàni ndàtà dahuun sicoto-mà cundua.

¹⁷ Stná vinu, nú vinu saa nduá, dandu mà dáquêe nèhivì-ñá ini itni iin tuhú, vaxi nú ducán, dandu ndàtá-ñá, te cuitià vinu, te cuchicuehe stná iin mà. Ñàyùcàndùá, nú vinu saa nduá, dandu itni iin sàà ni quéa, te ducán còò ni-ñàha cuu xán, nì stná iin mà.

Nansa nì dånátíacú Jesús dèhe Jairo, te nì dåndúvaha stná-yà iin nècuàchì ñahà ndohó iin cuèhè ùxin ùi cuìà

¹⁸ Na càhàn va Jesús ducán xì nèhivì, dandu nì sàà stná iin nècuàchì dandacú, te nì tutuyuhu-né ñuhù nùù sàhà-yá, cachí-nè xì-yá:

—Làcà ní quesaha xihì nihni dèheyoquí; doco nú ni cùhùn-ní, te chitandòò-ní ndahà-ní dìquía, dandu nanihitáhviá ñuhiví —nì cachi-nè.

¹⁹ Ñàyùcàndùá, nì ndacuiin-yà cuahàn-yà xì-né. Te cutnàhà stná-nè xì nsidaa nècuàchì dacuahá-yá.

²⁰ Doco nisa là stná iin nècuàchì ñahà cuhí cuèhè nì. Sàcuahàn-nè ùxin ùi cuìà ndohó-né ducán. Ñàyùcàndùá, nì quixi-ne ladu yàtá-yá, te nì dàcùhùn canúú-né dìnindàhá-né nùù sicoto xi-ya.

²¹ Vaxi nihnú ini-nè: “Nú ni dúcùn ndahí mate sícotò-ni xi-ya, dandu nduvàhi”.

²² Dandu mii-yá, nì nacuíco-yá yàtá-yá, te nì xini-yà nècuàchì ñahà mà, te nì cachi-yà xì-né:

—Màsà cùhúún inì-ní, hija, vaxi sàni nduvàha-ní ñà-nì xinindisa-ní.

Dandu divi momentu mà nì nduvàha nècuàchì mà.

²³ Daaní, nì sàà-yà vehe nècuàchì dandacu-ma, te nì xini-yà yucán ndoó cuahà nèhivì xì stná tè-siví, sacú ndéé-né, te tnaná-né.

²⁴ Ñàyùcàndùá, nì cachi-yà xì-né:

—Quee-nsia fuera, vaxi ñahà chii yohó, cóni xihì ndisa-ñà, quídi uun ni-ñà.

Doco nèhivì mà, nì sàcùndiaa uun-neyà.

²⁵ Dandu mii-yá, nì dàcùhùn-yà nsidaa-né fuera, te nì quihvi-ya ndé indúhu ñahà chii mà. Dandu nì tnii-ya ndahà-ñá, te nì dåndácò-yàña (vaxi sàni natiacù-ña).

²⁶ Daaní, inicutu ladu yucán nì xitià palabra nansa nì quida-ya milagru mà.

Nansa nì dåndúvaha Jesús ùi nècuàchì cuaá

²⁷ Na ní quee-ya lugar mà, dandu yucán nì tenchicùn stná ùì nècuàchì cuaá mii-yá, cána-ne, cachí-nè xì-yá:

—Mii-ní descendencia ùì xí David, cundehè ndahví-ní nsiùhù.

²⁸ Dandu nì yàha-ya ini vehe, te ndè yucán nì casaà stná nècuàchì mà, nchìcùn-nèyà. Dandu nì cachi-yà xì-né:

—¿A xiníndísâ ndisa-nsia ñà-vàtùni dandúvahi mii-nsiá?

—Jaan, Señor —nì cachi-nè.

²⁹ Dandu nì chituu-ya òìndàhá-yà nduchìnúù-né, te nì cachi-yà:

—Nacua sàni xinindisá-nsiá, divi ducán nì coo-xi-nsiá, cachí.

³⁰ Dandu nì natùì nùù-né. Te nì chinaha-yànè, cachí-yà xì-né ñà-màsà cúnítñùhu nèhivì sàhà ñà-ndúá nì quida-ya.

³¹ Doco mii-né, nì caquee-ne nì nacani-ne sàhà-yá xì nsidaa nèhivì ndoó inicutu ladu yucán.

Nansa nì nìhì iin nècuàchì ìhìn nì nacahàn-nè nì quida Jesús

³² Meru queé nècuàchì cuaá mà, te nì quesaa stná itnii nèhivì ndaca-xi iin nècuàchì ìhìn iná cáá stná iin ñà-malu inì-xi.

³³ Dandu nì tavà Jesús ñà-malu mà, te nì nìhì-né nì nacahàn vii-né. Ñàyùcàndúá, nì ndulocó nèhivì, cachí-nè:

—Cò-xiní-ndà nì-iin ñà-ndiaha jaàn ñuu-ndà Israel yohó.

³⁴ Doco nècuàchì fariseu, nì cacachi-nè sàhà-yá:

—Còó. Sàhà-ñá chindéé jefe xi ñà-malu-nè, ñàyùcàndúá vátùni tavà-né dava ga ñà-malu.

Nansa cuhí ini Jesús nèhivì

³⁵ Daaní, chicá más nì xicanuu Jesús ladu yucán nì nacàhin-ya nsidaa ñuu nahnú xì ñuu cuati, dacuahá-yá nèhivì sàhàn veheñùhu iin iin ñuu, te cachítñùhu-ya razón ndiaha sàhà ñuhivì ùì xí Dios. Te nì dandúvaha stná-yà nèhivì ndohó nsidanuu clase cuèhè.

³⁶ Te na ní xini-yá yáha ga cuàhà nèhivì ndoó, dandu nì cuhi ga ini-yànè, vachi ndoó-né nahi riì còò stohò-xi.

³⁷ Dandu nì cachi-yà xì nècuàchì dacuahá-yá:

—Ñà-ndáà nduá (cuàhà nèhivì tàñáha ga cunindisá); te na iin cosecha cahnú ndaníhí-ndá nduú-né, doco sacu nèhivì nduú ana (chindéé xí-ndá) ndanchítóá.

³⁸ Ñàyùcàndúá, càcàn tàhvì-nsiá nùù Lamú dandacú sàhà chuun yohó ñà-nì téchúûn gá-yà nèhivì cùhùn quida xi chuun (ùì xí-yá mà), vachi na ian ndaníhí-ndá iin cosecha ndiaha nduá —nì cachi Jesús.

10

Nansa nì nacàxin Jesús ùxìn ùì tiàa ñà-cunduu-ne apóstol xi-ya

¹ Dandu nì cana Jesús ùxìn ùì nècuàchì dacuahá-yá, te nì sàhatahvì-yànè ñà-tavà-né ñà-malu ñuhú ini nèhivì. Te nì nìhitàhvì stná-nè dandúvaha-ne nècuàchì cuhí ndohó nsidanuu clase cuèhè.

² Cunaha-nsiá, dohó nani ùxìn ùì nècuàchì dacuahá-yá mà: primeru iá Simón; te Pedro nani stná-nè; daaní, iá stná ñani-nè Andrés, xì stná dèhe Zebedeo nani Jacobo, xì ñani Jacobo mà nani Juan.

³ Te iá stná Felipe, xì Bartolomé, xì Tomás, xì tè-dàchíyàhvi nani Mateo, xì stná dèhe Alfeo nani Jacobo, xì stná Lebeo; te Tadeo nduú inga quivì Lebeo mà.

⁴ Daaní, iá stná Simón nì sanduu iin nècuàchì partidu cachí-nè nècuàchì Canaán, te nì iá stná Judas Iscariote, divi nècuàchì nì cahin xì-yá nùù tè-xídandacú.

Nansa nì techuún Jesús nècuàchì dacuahá-yá ñà-dacútià-nè palabra ùì xí-yá

⁵ Pues divi ùxìn ùi nèhivì yucán nì techuún Jesús (cùhùn-nè cacanu-ne). Te dohó nì cachi-yà xì-né quida-ne:

—Màsà cùhùn-nsià ladu ndé ndoó nècuàchì inga raza, ni màsà cùhùn stná-nsià ndé ndoó nècuàchì samaritanu.

⁶ Còó, cuisì-ní ndé ndoó nèhivì raza-ndà Israel ni cùhùn-nsià, vàchi nahi riì nì tùcù xínduu-ne.

⁷ Cuahán-nsià cachitnùhu-nsia xì-né ñà-sà-ítúú tiempu cusahnú mii-yá iá ansivi.

⁸ Dandúvaha-nsia nècuàchì cuhí, te danátíacú-nsià nècuàchì nsìi. Te nècuàchì icúmí cuèhè xíhì cuñù-xi, dacúxíó-nsiá cuèhè quini ma, te tavà-nsiá ñà-malu nùù nèhivì inácàa-si inì-xi. Te màsà quídá-nsiá cobrar nùù nèhivì, vàchi uun-ni sàni ñihítàhvì stná-nsià ñà-quida-nsia ducán.

⁹ Ni dihùn oro, ni dihùn plata, ni dihùn yahá màsà cúníhí-nsiá cùhùn ini itni xi-nsia.

¹⁰ Ni morral màsà cúníhí-nsiá cùhùn ichì. Cuisì-ní iin-ni dùhnù-nsiá cunihì-nsia, xì ndisàn sà-ínàl-nsià, xì stná bastón xi-nsia. Cuisì ñà-jaàn-ní cunihì-nsia cùhùn, vàchi iin nèhivì quidáchúûn, xiñuhu cuàha nèhivì-né raya xi-ne.

¹¹ Daaní, nú sàni sàà-nsià iin ñuu, ò iin rancho, dandu nanducu-nsiá vehe iin nècuàchì vaha, te iin-ni cundoo-nsia yucán ndè cachi sàà quivì quee-nsia ñuu mà.

¹² Te nú sàni sàà-nsià vehe iin nèhivì, casàhú viì-nsiá xì-né ñà-nì cúndóó cueé-nè.

¹³ Te nú nduú-né nèhivì vaha, dandísá, ducán icúmí cuu xi-né, doco nú mà váha-ne, dandu ni cúnàhá ñà-ndúà nì cachi-nsiá xì-né.

¹⁴ Te nú có-cuní-nè dayáha-ne mii-nsiá, te ò có-cuní-nè cunini-ne palabra nihí-nsiá, dandu quee-nsia vehe ma, te ò ñuu mà, te nacatù-nsiá sàhà-nsiá ñà-nì cóyo yacá xi lugar mà.

¹⁵ Vàchi cunaha-nsiá, chicá cuàhà castigu icúmí nèhivì ñuu mà ñihì-né na sàà quivì juicio, te chicá menos icúmí ñihì nèhivì malu ñuu Sodoma xì ñuu Gomorra.

Nansa icúmí nèhivì quida quini-ne xì nècuàchì dacuahá-yá

¹⁶ Cunaha-nsiá, dana ga nèhivì ndé techuún mii-nsiá cacanu-nsia, nahi quisì íhì nduú-né, te mii-nsiá nduú-nsiá nahi riì. Ñàyùcàndúà, xiñuhu ñà-cunchito tùha-nsia, te coo mansu stná-nsià na iin loma.

¹⁷ Cuidadu gà cundoo-nsia sàhà nèhivì, vàchi dava-ne icúmí-né quida-ne mii-nsiá entregar nùù tè-nihí chuun, te yucán ñàhni cuií-nsià ini veheñùhu xi-nsia.

¹⁸ Te sàhà-ñá nchícùn-nsià yùhù, ñàyùcàndúà icúmí-né datnátuu-ne mii-nsiá nùù gobiernu xì nùù rey, dandu datúi-nsia nùù nècuàchì mà ñà-ndúà xiníndísá-nsiá, te cunini stná cuàhà gá nèhivì inga raza.

¹⁹ Doco na sàà-nsià nùù tè-xídandacu-ma, màsà nácání inì-nsia índù palabra naxi-conihí-nsiá nùù-té, vàchi divi hora mà icúmí-nsiá ñihítàhvì-nsiá nansa cachi-nsiá xì-té.

²⁰ Vàchi màdì mii-nsiá cunduu ana cuàhàn càhàn; còó, mii Espíritu Ìi xí Yuandiaha-nsiá cuàhàn dachítùnì xì ini-nsià nansa cachi-nsiá.

²¹ Te tiempu yucán, dècuèndè tñaha nèhivì icúmí quida xì-né entregar (nùù autoridad) ñà-cui-nè, mate ñání-nè, ò déhe-ne nduú nècuàchì mà. Ndè stná yuadíhí-né icúmí-né nacuni ùhì-nè, te canicuàchì stnahá-né sàhà-né ñà-cui-nè. Ducán icúmí-né quida-ne (quivì yucán).

²² Te mii-nsiá, sàhà-ñá ndácùcahan-nsiá yùhù, ñàyùcàndúà icúmí nsidaa nèhivì cuni ùhì-nènsiá. Doco nú iin-ni ni cúníhí vaha inì-nsia dècuèndè cachi sàà xínu tiempu, dandísá icúmí-nsiá càcu-nsia nùù Dios.

²³ Te nú quídá quíní nèhivì xì-nsiá iin ñuu, dandu cunudèhé-nsiá ndè inga ñuu. Vàchi cunaha-nsiá, tàñáha ga nacàhin-nsia nsidanicuú ñuu raza-ndà Israel, te sàni naxicocuñn yùhù ana nduú Tñaha Nèhivì Ñuhiví.

Nú dandohó nèhivì-ndó, dandu divi nduú nacua nì yàha stná Jesús, te xì ñà-jaàn ni cúdì ñi-ndà

²⁴ 'Cunaha-nsiá, màdiá chicá tùha iin nècuàchì làcà dacuahá nuu iin maestru; te ò iin peón, màdiá chicá ndiaá-te nùu lamú xi-tè.

²⁵ Cuisì nú sàni sàa iin nècuàchì dacuahá cunduu-ne nahi maestru xi-ne, dandu cudî ini-nè sàhàjàn. Stná iin peón, nú sàni sàa stná-te cunduu-tè nahi lamú xi-tè, dandu cudî stná ini-te sàhàjàn. Doco nú cachí nèhivì sàhà iin nècuàchì sahnú ñà-nduú-né ñà-malu Beelzebú, dandu chicá mà úhì càhàn quini stná-nè sàhà nèhivì vehe-ne.

Màsà yúhî-ndà nèhivì, ni màsà yúhî stná-ndà ñà-malu

²⁶ 'Ñàyùcànduá, màsà yúhî-nsià nèhivì. Cunaha-nsiá, còò ni-iñàha cui coo dèhé nicanicuhàn; icúmíâ tùia, te icúmí nèhivì cunitnùhu stná-nè sàhà-ñá.

²⁷ Doco mii-nsiá, ñà-nduá cachí` xi-nsiá (na ndoó cuaán-nda) ndé iin tnúú, ñà-jaàn cachitnùhu-nsia inicutu ndé tuí. Te nú nì càhàn cayí xi-nsiá iñàha, dandu mii-nsiá, nana-nsia dìni vèhé, te càhàn vate ndee-nsiá ñà-nduá nì cachì.

²⁸ Te màsà yúhî-nsià nèhivì cuní cahni xi-nsiá, vàchi cuisì iquícúñú-nsià cunduu ñà-cui, doco anima-nsià, mà cúí cahni-néa. Nàyùcànduá, mii-yá nduú ana xiñuhu yúhî-nsià, vàchi icúmí ndisa-ya poder daquéé-ya nèhivì nùu andea ndé ndañuhu dahuun anima-nè xì stná iquícúñú-nè.

²⁹ 'Sà-ináhá-nsiá ñà-ùì chòlìhì dicó-né cùmì tuní, doco mate ducán iyuhu ndiaá-si, ni-iin-si mà sàa cui nú có-chîtnùnì ini Yuandiaha-nsiá Dios ducán.

³⁰ Te divi ducán stná mii-nsiá (inúu stná-yà mii-nsiá), dècuèndè ináhá-yâ nadaa idìdìni iin iin-nsia.

³¹ Nàyùcànduá, màsà yúhî-nsià, vàchi chicá ndiaá-nsià nùu laa cuati ma.

Màsà chídèhé-ndà ñà-nchícùn-ndà Jesucristu

³² 'Nú cachí vate nèhivì ñà-nduú-né nèhivì xí, dandu yùhù cachi stnái xì Yuamání' ía ansivi ñà-divi nèhivì xí nduú stná-nè.

³³ Doco nú nì chídèhé-nè ñà-nduú-né nèhivì xí, dandu yùhù stná, icúmí nacuaà stnái mii-né nùu Yuamání'.

Sàhà Jesús icúmí tàhndè dava nèhivì ñuhiví

³⁴ 'Màsà cúcáhán-nsiá a vaxi yùhù ñuhiví yohó ñà-cucumi nèhivì paz. Còò. Mà cúndóó mánì-né; icúmí-nè cundoo-ne náa stnàhá-né.

³⁵ Vàchi ñà-nì quesai ñuhiví yohó, icúmí cuni ùhì iin tiàa yua-té, te cuni ùhì stná iin ñahà chii dihi-ñá, te ò iin nècuàchì ñahà, cuni ùhì stná-nè dìdo-ne.

³⁶ Vàchi dècuèndè tnaha-ne cuni ùhì xì-né.

³⁷ 'Doco nú chicá cuú ini iin nèhivì sàhà yua-né, ò dihi-né, te màdi yùhù, dandu có-nâtùì-ne cunduu-ne nèhivì xí. Te ò nú chicá cuú ini-nè sàhà dèhe-ne, te màdi yùhù, dandu có-nâtùì stná-nè cunduu-ne nèhivì xí.

³⁸ Te nú màsà cóó-né dispuestu cunchícùn-nè yùhù mate icúmí-nè cunsida stná-nè cruz xi-ne (te sàa-nè cui stná-nè), dandu có-nâtùì-ne cunduu-ne nèhivì xí.

³⁹ Nsidaa ana cuní dacácu xi vida-xi, cutu ñà-dandáñuhú-nèàmà quea. Doco nú sàhà yùhù ndañuhu vida xi-ne, dandu ñà-sàni càcu ndisa-ne nduá.

⁴⁰ 'Nú cudî ini nèhivì xì palabra cachí mii-nsiá, dandu davani queá na ian sàni xinindisá stná-nè yùhù. Te nú sàni xinindisá-né yùhù, dandu ñà-sàni xinindisá stná-nè mii-yá ana nì techuun-xí nduú stná.

⁴¹ Te nú quixi iin nècuàchì profeta càhàn cuenta xi Dios, te cudî ini nèhivì xì palabra cachí-nè, dandu dava-ni nihitáhvi stná nèhivì mà nùu-yá na ian nduú stná-nè iin profeta. Te divi ducání stná xì ndéni tiàa nì cui vaha inì-xi, nú cudî ini nèhivì xì ñà-nduá cachí-nè, dandu davani nihitáhvi stná-nè nahi nècuàchimà.

⁴² Dècuèndè, stná nèhivì chicá nduú nèhivì ùún, nú ni cuáha-nsianè chii tècuí coho-ne sàhà-ñá nchícùn-nè yùhù, dandu seguru nihitáhvi stná-nsià sàhámà nùu Dios —nì cachí Jesús.

11

Nansa nì naxiconihí Jesús nùu nèhivì nì techuún Juan Bautista nì quixi nùu-yá

¹ Nì nsihi nì sàcùnaha nèhivì dacuahá-yá nansa quida-ne, dandu cuàhàn mii-yá ñà-cacanu-u-ya ñuu te ñuu chinaha-yà nèhivì, càhàn-yà xì-né ñà-ndùú razón ndiaha xí Dios.

² Daaní, Juan, iá-nè vehecàa, te nì xinitnùhu-ne ñà-ndiaha guá milagru quidá Cristu. Ñàyùcàndùá, nì techuún-né iin ùì nèhivì dacuahá-né ñà-nì cùhùn-nè nùu-yá.

³ Ñàyùcàndùá, nì sàà nècuàchìmà nì ndàcàtnùhù-né nùu-yá, cachí-nè:

—¿A ndísá mii-ní nduú ana ndiaha icúmí quesaa, te ò inga ana vaxi cundiatu-nsi?

⁴ Dandu nì cachi-yà xi nèhivì mà:

—Cuahán-nsià cachitnùhu-nsia xì Juan sàhà ñà-ndùá iníní-nsiá, xì ñà-ndùá indéhe-nsiá yohó,

⁵ nansa cuú xi nècuàchì cuaá, níhì-né natùinuù-né, te nèhivì xicá cuéhê, níhì stná-nè nacaca vii-né; te nèhivì nì xihì cuñù-xi, níhì-né nduvàha-ne; te nèhivì dòhò, níhì-né natiacu-nè; te nèhivì nì xihì, ndanchító stná-nè natiácú-nè; te nèhivì ndahví, níhìtáhvì stná-nè cunini-ne razón ndiaha xí Dios.

⁶ Ñàyùcàndùá, nú cudí ini nèhivì modo xi, dandu contentu icúmí-né cundoo-ne —nì cachi-yà.

⁷ Daaní, na sámànùhù nèhivì nì quixi ma, dandu nì quesaha Jesús càhàn-yà xì nèhivì sàhà Juan, te dohó nì cachi-yà:

—Na ní caquee-nsia ñuu-nsià cuàhàn-nsià yucù cundehè-nsiá Juan, ¿a cuàhàn-nsià cundehè-nsiá iin nèhivì (tùha dàma dìnì-xí) na iin yutnù ndóyo quidá tàchì? (Còó.)

⁸ Doco nú coó, dandu ¿nansa iá-nè cahan-nsiá? ¿A nduú-né iin nèhivì ndixí vico? Còó, vachi nèhivì ndixí vico, vehe rey ndoó-né.

⁹ Pues nú màdì dúcán, dandu ¿nansa iá nècuàchìmà cahan-nsiá? ¿A iin profeta càhàn cuenta xi Dios nduú-né? Pues ñà-ndáà nduá. Doco màdì cuísi profeta nduú-né, vachi chicá más ndiaá-nè.

¹⁰ Vachi divì nècuàchìmà nduú ana càhàn tutu ì sàhà-xí ndé (cachí Dios palabra yohó): Cunaha-ní, cuàhìn techuún iin tiàa, te dihna-ne yàha-ne càhàn-nè xì nèhivì ñà-ndùú razón xi, te ducán (nsida vii-né anima-nè), na ian nduviì iin ichì, dandu después yàha stná mii-ní (Cristu), cachí Dios nùu tutu mà.

¹¹ Te yùhù cachí xì-nsiá, nùu nsidaa nèhivì nì tùinuù-xí ñuhiví, còò inga-nè chicá nì quidá ndiaha nùu Juan Bautista. Doco cachí stnài xì-nsiá, chicá ndiaha coo xi ana cuàhàn cuni tiempu cusáhnù mii-yá iá ansivi, mate nèhivì ùùn nduú-né.

¹² Cunaha-nsiá, dècuèndè quìvì nì quesaha Juan Bautista càhàn-nè sàhù xì dècuèndè vichi, cuàhà gá nèhivì sáhandee fuerte ini-nè ñà-nìhì-né cundoo-ne ñuhiví ì xí mii-yá iá ansivi. Yàha ga sáhandee ini-nè, te vátùnì sàcuàhàn cuàhà-né níhìtáhvì-né cundoo-ne yucán.

¹³ Vachi antes cuàhà nècuàchì profeta nìsa càhàn cuenta xi Dios, nì cachitnùhu-ne (sàhà tiempu dandacú-yá). Stná ley (xi Moisés), nì cachitnùhu stná` sàhámà. Te ducán nìsa ìa ndè cachi nì quesaa Juan (Bautista).

¹⁴ Te cunaha-nsiá, divì Juan mà nduú Elías (nì cachi nècuàchì sàna) icúmí naxicocuîn. Te nú cuní-nsiá, vátùnì mànhì inì-nsia sàhà ñà-jaàn.

¹⁵ Nì cúnínì vaha nsidaa-nsiá ñà-ndùá cachí xì-nsiá —nì cachi Jesús.

¹⁶⁻¹⁷ Dandu nì cachi tu-ya:

—Cuàhìn cachì xì-nsiá nansa quidá nèhivì tiempu vichi. Cunaha-nsiá, dohó quidá-né na ian quidá ñà-cuati ndoó idádiquí ini iin ñuu, dava cána xì tnaha, cachá: “Siví-nsì, doco nsiohó, có-ításáhà-ndà; daaní, xitó tàsi-nsi, doco nsiohó, có-sàcù-ndá”.

18 Te ducán iá stná xì Juan xì yùhù, vâchi nì quixi nècuàchìmà nìsa ìa-ne yohó, cóni sáxíxí-né comida vâha, nì cóni sáxíhí stná-nè (vinu), ñâyùcàndùá nì cachi nèhivì sàhà-né: “(Tè-locó nduú-te), sàni cundee ñà-malu nù-té”.

19 Daaní, nì quesaa stná yùhù ana nduú Tnaha Nèhivì Ñuhiví, te tùha stnái cuxi comida vâha, te xihí (vinu), doco cachí stná nèhivì xì ñà-yáha ga ndadí, te cachí stná-nè ñà-tùhe coho cuahí, dècuèndè iá vâha stnái xì tè-dàchíyàhvi, xì stná nsidaa gá nèhivì cuáchi, cachí-nè. Doco cunaha-nsiá, nú ndisa ñà-nchìchí ndiaha nduá quidà-ndà, dandu icúmí sàa-mà cunahà claruà después.

Nansa icúmí cuu xì nèhivì ñuu cóni cùú arrepentir; icúmí-né ndoho-ne

20 Daaní, nì quesaha Jesús chináhá-yâ nèhivì ñuu ndé nì quida guá-yà cuàhà milagru xi-ya, doco cóni náxícoçuìn ini-nè.

21 Dohó nì cachi-yà:

—¡Ndahví nècuàchì ñuu Corazín! Te ¡ndahví stná nècuàchì ñuu Betsaida! Vâchi cuàhà milagru fuerte sàni xini-nè (te cóni ndúlócô-nè). Doco cunaha-nsiá, nú ducání nì coó stná milagru mà ñuu Tiro ò ñuu Sidón nì cùí, dandísá, yàchì naxicocuìn ini nècuàchì ñuu mà sàhà cuàchi-ne, te nàcùndixi ndahví-nè, te nàcùndoo stná-nè mahì yàà tutnù, cunduumà seña ñà-ndisa cuhí ini-nè mii-né sàhà cuàchi-ne.

22 Doco yùhù cachí xì-nsiá, chicá iyuhu castigu icúmí nihì nèhivì ñuu Tiro mà xì nèhivì ñuu Sidón mà na sàa quivì juiciu, te chicá fuerte coo castigu xi ñuu Corazín xi ñuu Betsaida.

23 Daaní, stná nècuàchì ñuu Capernaum, mate tuxí ini-nè nana ducún-nè ndè gloria, doco còó, ndè andea icúmí-né nuu-ne. Vâchi cuàhà milagru fuerte nì quida Dios ñuu-nè (te cóni ndúlócô-nè). Doco nú ducán nì quida-ya milagru mà ñuu (malu) Sodoma, dandu iá ì ñuu mà ñuhiví yohó nì cùí.

24 Doco yùhù cachí xì-nsiá, chicá iyuhu castigu icúmí nihì nècuàchì ñuu Sodoma-mà na sàa quivì juiciu, te chicá fuerte coo castigu xi nècuàchì ñuu Capernaum —nì cachi-yà.

Nùù Jesús vâtùni nàcùndoo-nda contentu

25 Daaní, quivì yucán nì (naquimani) Jesús Yua-yá Dios, cachí-yà:

—Yùhù ndeníhí vâhi mii-ní, Yuamání; mii-ní nduu-ní Stoho ansivi xi ñuhiví, te palabra (ìì xí-ní), sàni chitnùnì inì-ní ndòò dèhá` nùù nècuàchì nchichí, doco nùù nècuàchì (nihnú ndáhví inì-xi) nahi ñà-cuati, sàni dàtnùù-ní sàxínítnùnì-nè.

26 Ducán iá, vâchi ñà-jaàn nduá nì chitnùnì ini mii-ní —nì cachi-yà xì Yuamánì-yá.

27 Dandu nì cachi stná-yà (xì nèhivì):

—Nùù Yuamánì sàni nihítáhvì` dandacuí nùù nsidanícuú iñàha. Te còò nì-iin nèhivì ináhá ndisa ana nduú yùhù, cuisì Yuamánì` Dios. Te mii-yá, cuisì yùhù ináhí ana ndisa nduú-yá, cuisì yùhù xì stná nèhivì cuní cundaà inì-xi sàhà-yá.

28 Nahà-nsia nùí, nsidaa mii-nsiá nècuàchì cuhúún inì-xi, te có-cùndéé gâ inì-xi, dandu nihì-nsiá ndòò dadí ndiaha inì-nsia quide.

29 (Quida-nsia ñà-nduá cachí xì-nsiá) na ian nsidá-nsiá yugu-xi quidáchúûn-nsiá. Daaní, dacuahá stná-nsiá palabra vâha xi, vâchi yùhù, màni inì, te ndahvi inì, vâtùni ndòò dadí ndiaha anima-nsiá quide.

30 Te mate na ian nsidá-nsiá yugu-xi quidáchúûn-nsiá nùí nduá, doco yugu ñama nduú-nu, te chuun sáhi-nsiá, ñà-mà úhì nduá.

12

Nansa nì xitnùhu nèhivì nècuàchì dacuahá-yá na ní sàhnù-nè sicàyòcò trigu quivì descansu

1 Daaní, iin quivì descansu nì quìhvi Jesús iin itu, te nì yâha-ya yucán, cutnâhâ stná-yà xì nècuàchì dacuahá-yá. Dandu nì xihì-nè doco. Ñâyùcàndùá, nì quesaha-né nì casahnù-nè sicàyòcò nùni trigu itá yucán, te nì saxì-nèa.

² Doco nècuàchì fariseu, nì xini-nè ñà-ndùá quidá nècuàchìmà, ñàyùcàndùá nì cachi-nè xì-yá:

—Cundehè-ní nansa quidá nècuàchì dacuaha-ní, quidá-né iin chuun có-sâha ley xi-nda quida-nda quivì descansu.

³ Dandu nì cachi-yà xì-né:

—¿A cóni càhví-nsiá (nùù tutu ì) ndé cachá` nansa nì quida David na ní xihì stná-nè doco xi compañeru-nè?

⁴ Vàchi nì quìhvi-ne ini veheñùhu xi Dios, te nì xixi-ne dità vídì ì yucán, mate ni mii-né ni compañeru-nè, có-sâha ley mà cuxi-neà, cuisì nècuàchì dùtù.

⁵ Te ò inga casu, ¿a cóni càhví stná-nsiá nùù ley ì nansa quidá dùtù quivì descansu, quidá-né (chuun ì) ini veheñùhu, có-chìvâha ndisa-ne quivì mà, doco màdì cuáchi nduá nùù-né?

⁶ Doco yùhù cachí xì-nsiá, yohó iá ana chicá ndiaá nùù veheñùhu xi Dios.

⁷ (Náhà xìcà) cumánì gá cundaà ini-nsiá sàhà ñà-ndùá cachí Dios nùù tutu ì. Vàchi dohó cachí-yà: “Yùhù chicá cudí inì ñà-cundehè ndahví stnahá-nsiá, te màdì ñà-cuàha guá-nsiá yùhù promesa”, cachí-yà. Nú ni sàà-nsiá cundaà ini-nsiá sàhájàn nì cùì, dandu mà dácuídá cuàchi-nsiá nèhivì còò falta xì.

⁸ Cunaha-nsiá, yùhù ana nduú Tnaha Nèhivì Ñuhiví, dandacú stnàì sàhà nansa quida nèhivì quivì descansu —nì cachi-yà.

Nansa nì nduvàha iin tiàa nì ìchì dahuun iin ndahà-xí

⁹ Daaní, nì quìhìn Jesús ìchì cuàhàn-yà veheñùhu, te nì quìhvi-ya yucán.

¹⁰ Te yucán iá stná iin tiàa nì ìchì dahuun iin ndahà-xí. Doco veheñùhu ma ndoó stná nèhivì cuní daquée cuàchi dìquì-yá, te sàháyùcàndùá nì cachi-nè xì-yá:

—¿Amádi cuáchi nduá dandúvâha-nda nèhivì nú quivì descansu nduá?

¹¹ Te nì cachi-yà xì-né:

—Ni cachí-ndà iá iin riì xì-nsiá, te sàni nacava-sì xìchi, pues ¿amádi cùhùn-nsiá tavà-nsiási xìchi ma, mate quivì descansu nduá?

¹² Cunaha-nsiá chicá ndiaá iin tiàa nùù iin riì. Ñàyùcàndùá cundaà ini-ndà, vátùni iá ñà-quida-nda chuun viì quivì descansu.

¹³ Dandu nì cachi-yà xì tiàa ma:

—Chitanini-ní ndahà-ní.

Dandu nì chitanini nècuàchìmà ndahà-né, te momentu mà nì nduvàha dahuan nahi ñà-inga mà.

¹⁴ Ñàyùcàndùá, nì caquee nècuàchì fariseu yucán, nì candatnuhu-né nansa cui dandáñùhú-nèyà.

¹⁵⁻¹⁶ Doco ináhà-yâ ñà-ndùá ndatnúhú-nê, ñàyùcàndùá nì quee-ya lugar mà cuàhàn-yà. Te nì tenchicùn stná cuàhà gá nèhivì. Te nì dandúvâha-ya nsidaa nècuàchì cuhí xi-ne, doco nì chinaha-yá nècuàchìmà ñà-màsà cáchí-nè xì nèhivì ana divi nduú-yá.

¹⁷ Ducán nì cachi-yà xì-né sàhà ñà-nì cùú ndisa ñà-ndùá nì cachitnùhu Isaías sàhana na ní nacani-ne palabra yohó nì (cachi Dios sàhà Dèhemanì-yá):

¹⁸ Ana yohó nduú ana xinúcuáchí nùì, vâchi sàni nacàxin mii-yá. Cuú inì sàhà-yá, te cudí inì sàhà nansa quidá-yá. Nùù anima-yà cuàhìn caquìn Espíritu Ì xí, dandu cachitnùhu-ya xì nèhivì nsidaa ñuu nansa iá modo ndiaha xí.

¹⁹ Mà náâ-yà xì nèhivì, ni mà cácanúú-yá calle ndàhì ndee-yá.

²⁰ Te nèhivì (yáha ndahví) na iin ndòò cuàhàn ndañuhu, mà cúcúú dana-ya xì-né. Còò. (Mànì gá) quida-ya xì-né na ian quidá nèhivì ni mà dándâhvà xì ñà-có-tnùù vâha. Te ducán icúmì cunduu modo xi-ya dècuèndè cundee palabra vâha xi-ya, te sàà-yà cundee dahuun-ya.

²¹ Dècuèndè stná nèhivì inga raza, tnùndé ini xi mii stná-nè cunduu-ya, te divi quivì mii-yá icúmì-nè ndacùcahan-né.

Nansa ni dàquée cuàchi nèhivì dìquì Jesús, te ni cachi-nè màdì Dios chindéé xí-yâ, cachí-nè

²² Daaní, ndacá-né iin tiàa inácaa ñà-malu anima-xi vâxi nùù-yá, te cuaá stná nècuàchìmà, te ihin stná-nè. Dandu ni dándúvâha-ya nècuàchìmà, te ni ñihí-né ni nacahàn-nè, te ni natùì stná nùù-né.

²³ Ñàyùcàndùá, ni ndulocó nèhivì cuáhà yucán, te ni ndàcàtnùhù-né nùù-né, cachí-nè:
—¿A víhíní nduú Jesús (nècuàchì ndiaha) descendencia xi David (icúmí ndecunu)?

²⁴ Doco iníni nècuàchì fariseu nansa cachí nèhivì mà, ñàyùcàndùá ni cachi-nè:

—Còò, vâchi ñà-malu cusáhnû nani Beelzebú, divi nduú ana chindéé, te ducán tavá Jesús ñà-malu.

²⁵ Doco ináhá-yâ nansa nacání ini nècuàchìmà, ñàyùcàndùá ni cachi-yà xì-né:

—Nú ni táhndè dava nècuàchì xídandacú nùù iin ñuu, te náâ stnàhá-né, dandu mà cúí dandacú gá-nè nùù ñuu mà. Stná nèhivì ndoó ñuu mà, nú ni táhndè dava-ne, mà cóó gá stná ñuu mà. Te ò nèhivì ndoó iin vehe, nú náâ stnàhá-né, dandu mà cúí cundoo tàcá gá-nè vehe ma.

²⁶ Te nú ducán ni cúndúú stná nacua cachí mii-nsiá, ñà-tavá stnahá ñà-malu xi Satanás, dandu ñà-sàni tàhndè dava stná-si cunduajàn ni cúí, mà cúí dandacú gá quisì cusáhnû má nùù tnaha-sì, nú ducán.

²⁷ 'Mii-nsiá, cachí-nsià ñà-chindéé sì-Beelzebú yùhù na taví ñà-malu. Doco còò, vâchi nèhivì xí mii stná-nsià, tùha stná-nè tavà-né ñà-malu. Te ¿ana dìpódèr-xi quidá-neàmà? (Amádi poder xi Dios chindéé xí-nê.) Ñàyùcàndùá, vâtùni cachi mii-né xì-nsiá ñà-cóni càchí vii-nsiá sàhí.

²⁸ Cunaha-nsiá, Espíritu Ìì xí Dios nduú ana chindéé xí taví-si, ñàyùcàndùá nàhà xìcà, vichi sàni sàà tiempu cuni-nsià nansa dandacú ndiaha mii-yá.

²⁹ 'Ìin tiàa ndacuì, mà cúí quìhvi ndevàha nèhivì vehe-tè nansa-ni ni cui ñà-tavà-né ñà-icúmí-tê. Còò, vâchi dihna ícúmí-nê chicuhni-nète, dandu vâtùni quida-neàmà.

³⁰ 'Nsidaa ana có-íá favor xi, contra xi nduú-né. Te nsidaa ana có-chindéé xí danátáquì nèhivì xí, ducán nduá na ian taxi-né nècuàchìmà.

³¹ 'Ñàyùcàndùá, yùhù cachí xì-nsiá, vâtùni cuicahnú ini Dios sàhà nsidanicuú cuàchi nèhivì, xì nsidanicuú modo cáhàn ùhí-nè dìquì-yá; doco nú ni cáhàn ùhí-nè dìquì Espíritu Ìì xí-yá, dandu mà ñihí-né cuicahnú ini-yà sàhà-né.

³² Mate ni cáhàn ùhí nèhivì dìquì yùhù ana nduú Tnaha Nèhivì Ñuhíví, doco vâtùni ñihí-né cuicahnú ini Dios sàhà-né. Doco nú dìquì Espíritu Ìì ni cáhàn ùhí-nè, dandu mà nunca sàà-yà cuicahnú ini-yà sàhà-né, ni tiempu ndoo-nda ñuhíví yohó, te ni stná tiempu cundoo-nda inga ñuhíví nicanicuahàn.

Na ian nacúní-ndà yutnù fruta, ducán nacuni stná-ndà nèhivì a váha-ne, ò á cóó, cachí Jesús

³³ 'Nú ni cachí-ndà vâha iin yutnù fruta, dandu cuní cachàmà vâha stná fruta sâha-nù. Te nú ni cachí-ndà còò chuun yutnù fruta mà, dandu cuní cachàmà ñà-còò chuun stná fruta-nu, vâchi sàhà fruta-nu cundáà ini-ndà a yútnu vâha nduú-nu, ò á cóó.

³⁴ Cunaha-nsiá, nahi anima còò, ducán íá anima mii-nsiá (nècuàchì fariseu), vâchi malu sàstnùhù-nsiá. Ñàyùcàndùá, mà cùì cáhàn-nsià ñà-íá viì. Vâchi cuisì ñà-ñùhú chitu ini anima-ndà nduá cáhàn-ndà sàhà-xí.

³⁵ 'Ìin nècuàchì vâha, cuáhà ñà-vâha ñuhú ini anima-nè, te ñàyùcàndùá divi palabra vâha ma nduá cachí-nè. Doco iin nècuàchì malu, cuáhà ñà-chìcuéhè ñuhú ini anima-nè, ñàyùcàndùá, ñà-chìcuéhè mà nduá cachí stná-nè.

³⁶ Te yùhù cachí xì-nsiá, na sàà quìvì juicio, dandu ícúmí nsidaa nèhivì nacuahà-ne cuenta índù chuun ni cachi-ne nsidaa palabra chìcuéhè mà.

³⁷ Vâchi nacua ni cachi-nè yuhù-né, divi ducán ícúmí ndundaà sàhà-né (nùù Dios), a cuáhàn-nè càcu-ne, te ò cuáhàn-nè ndañuhu-né —ni cachi Jesús.

Nansa nì xicàn nèhivì quida Jesús iin milagru cundehè-né, dandu cunindisá-néyà, cachí-nè

³⁸ Daaní, (nì sàà) dava maestru ley xi veheñùhu, xì stná dava nècuàchì fariseu, te nì cachi-nè xì-yá:

—Maestro, cuní-nsì quida-ní iin milagru fuerte cundehè-nsí.

³⁹ Dandu nì cachi-yà xì-né:

—Cuisì nèhivì malu te sìquini xicàn coo iin milagru cundehè-né, a ndísá icúmí yùhù poder cahan-né. Doco mà níhì-né cundehè-né inga milagru, cuisì ñà-nduá (nì xini nèhivì sàhana) na ní cuu milagru xi Jonás, iin profeta nìsa cahn cuenta xi Dios.

⁴⁰ Vàchi na ian nì ndòo Jonás mà ini tìxi iin siaca cahnú ùnì ndui te ùnì ñuú, divi ducán icúmí cuu stná xì yùhù ana nduú Tnaha Nèhivì Ñuhivì, cunacaa stnáì tìxi ñuhù ùnì ndui te ùnì ñuú.

⁴¹ 'Na quívì cuu juiciu, te màcuìta nsidaa nèhivì tiempu vichi (nùu Dios), dandu yucán icúmí màcuìta stná nèhivì ñuu sàhana nani Nínive, te daquéé cuàchi-ne dìquì nèhivì tiempu vichi, vachi nèhivì ñuu mà, nì naxicocuïn ini-nè na ní càhàn Jonás xì-né. Doco nèhivì vichi, còó, mate sàni quesaa ana chicá ndiaá nùu Jonás mà.

⁴² Daaní, yucán icúmí nàcuìn stná nècuàchì ñahà reina nìsa dandacú nùu ladu sur sàhana. Te daquéé cuàchi stná-nè dìquì nèhivì tiempu vichi, vachi dècuèndè iin ñuu chicá xica ní quixi-ne ñà-cunini-ne càhàn nchichí rey Salomón. Doco cunaha-nsiá, vichi sàni quesaa ana chicá ndiaá nùu Salomón mà, (doco có-ndùlócò nèhivì).

Nansa cuú xi iin nèhivì nú sàni naxicocuïn iin ñà-malu nì quee antes nùu-né

⁴³ 'Nú sàni quee iin ñà-malu ini iin nèhivì, dandu xicánúú-si yáha-sì lugar ìchí, nandúcú-sì ndé coo dadí-si. Te nú nì cundaà inì-si mà cùì,

⁴⁴ dandu cachí-si: “Còó, chicá vaha nùhì ini anima ndé nìsa ìe antes, vachi vehi nduá”. Ñàyùcànduá, mànuhù-sì anima nèhivì mà, doco nú nì xini-si còo inga ana inácáá, dandu quidá-si cuenta na ian sàni ndundoa, te nì nducutá.

⁴⁵ Ñàyùcànduá, cuàhàn-si nàcuàca-sì inga ùsà tnaha-sì chicá tùha quini, te quíhvi nsihi-sì ini anima nècuàchìma ñà-cuñuhu-sì yucán. Sàhájàn, chicá pesadu nácòo-ne nùu antes. Te cunaha-nsiá, divi ducán icúmí cuu stná xì nèhivì malu tiempu vichi —nì cachi Jesús.

Ñà-nduá nì cachi Jesús sàhà dihi-yá xì sàhà ñani-yà na ní casaà-nè caná-néyà

⁴⁶ Càhàn va Jesús xì nèhivì, te yucán nì sàà dihi-yá xì stná ñani-yà. Itá-né tùvèhé, cuní-nè càhàn-nè xì-yá.

⁴⁷ Dandu nì cachitnùhu iin nèhivì xì-yá:

—Cunaha-ní, tùvèhècà' iin mamá xi-ní, xì stná ñani-ní; cuní-nè càhàn-nè xì-ní.

⁴⁸ Dandu nì cachi Jesús xì nèhivì nì cachitnùhu ma:

—¿Ana divi nduú mamá xi (cahan-ní)? Te ò ¿ana divi xínduu ñani?

⁴⁹ Dandu nì chitanini-ya ndahà-yá, nì quida-ya señalar nsidaa nèhivì dacuahá-yá mà, te nì cachi-yà:

—Divi nècuàchì yohó xínduu nahi mamá xi, ò nahi ñani.

⁵⁰ Vachi nsidanicuú ana quidà-xì ñà-nduá cuní Yuamánì' iá ansivi, divi mii-né xínduu-ne nahi ñani, nahi cùhe, te nahi dihi stnáì.

13

Ejemplu sàhà iin nècuàchì xitú

¹ Daaní, divi quívì yucán, nì quee Jesús vehe ma cuàhàn-yà ndè yuhù mar.

² Te yucán nì nataca cuàhà gá nèhivì nùu-yá: ñàyùcànduá nì quècahnu-ya ini iin lancha, te yucán nì sàcòo-ya. Te nèhivì cuàhà mà, yuhù mar nì sàcùndoo-ne.

³ Dandu nì dàcuàhá-yánè cuàhà iñàha, nì nacani-ya xì-né cuàhà historia nduú nahi ejemplu. Te dohó nì cachi-yà:

—Cunaha-nsiá, nìsa ìa iin nècuàchì xitú, te nì quee-ne cuàhàn-nè chihi-ne.

⁴ Te nì sate uun-ne tata mà. Te dava-ña nì còya nùù ichì. Dandu nì quixi laa nì saxì-siá.

⁵ Te dava stná tata mà nì còya nùù cavà ndé còò cuàhà ñuhù. Te yàchì nì xitià, vàchi có-ndòò cucún ñuhù yucán.

⁶ Doco na ní dùcàn orá, dandu nì xixàn nì quida cahni, te nì ìchà, vàchi cóni níhà' yohá.

⁷ Daaní, dava stná tata mà, mahì iñù nì còya; te na ní sahnu iñù mà, dandu nì dàdáhvia viú cuati yucán.

⁸ Doco dava stná tata mà, nùù ñuhù váha nì còya, te nì cuàha viá, ùhùn dico gà tantu nì cana, te ò dava ga-ña, ùnì dico ga tantu, te ò dava gà, òcò ùxìn gà tantu nì cuàha.

⁹ Ni cúnini vaha nsidaa-nsiá ñà-nduá cachì —nì cachi Jesús.

Ñà-nduá disáhà-xì nì nacani Jesús ejemplu xi-ya

¹⁰ Daaní, nì catnàtuu nècuàchì dacuahá-yá nùù-yá, te nì cachi-nè:

—¿Índù chuun puru ejemplu nacání-nì xì nèhivì?

¹¹ Dandu nì cachi-yà xì-né:

—Mii-nsiá, sàni ñihitáhvi-nsiá cundaà inì-nsia nansa cuní cachi palabra sàhà ñuhivì ì xì mii-yá iá ansivi, mate antes nìsa ìa dèhé palabra mà. Doco nèhivì dava ga, cóni ñihitáhvi-né mànihì ini-nè.

¹² Vàchi nècuàchì sàñuhù (ña-vàha) inì-xi, chicá más icúmí-nè ñihitáhvi-né sàhà-ña cucumi-né más gà. Doco nèhivì có-ñuhù ndisa (ña-vàha) inì-xi, dècuènde iyuhu (ña-vàha) sàñuhù ini-nè, icúmíâ cuxio dahuan.

¹³ Ñàyùcànduá, puru ejemplu cáhìn xì nèhivì yohó, vàchi mate indéhe cuàhà-né, doco quidámáxini-nè; te mate iníni cuàhà stná-nè, doco có-sànihì ini-nè na ian doho-né.

¹⁴ Ducán quidá-né, te ducán sàni cuu ndisa stná ñà-nduá nì cachitnùhu Isaías sàhana (na ní tìaa-ne palabra yohó nì cachi Dios):

Mii-nsiá, cuàhà gà icúmí-nsiâ cunini-nsia, doco mà sàà-nsià mànihì inì-nsia. Te cuàhà gà icúmí-nsiâ cundehè-nsiá, doco mà cùndàà ndisa inì-nsia.

¹⁵ Vàchi nsidaa nèhivì raza-nsià yohó, quidámáxini-nè na ian ùhì tiacú-nè. Te quidá-né na ian danácuáni-nè nùù-né. Vàchi có-cùni-nè cundehè-né (ichì yùhù), nì có-cùni stná-nè cunini-ne, nì có-cùni stná-nè mànihì ini-nè, nì có-cùni stná-nè natnahnù-nè ichì yùhù, te ducán nsida vií' anima-nè, nì cachi Dios.

¹⁶ 'Doco mii-nsiá, ndiaha gà iá xì-nsiá vichi, vàchi cundàà inì-nsia sàhà ñà-nduá indéhe-nsiá; sànihì inì-nsia sàhà ñà-nduá iníni-nsiá.

¹⁷ Vàchi cunaha-nsiá, cuàhà gà nècuàchì profeta sàhana, xì cuàhà gà más nèhivì xì Dios, nsidaa-né nìsa cuni sàstnùhù-né cundehè-né ñà-ndiaha ì sàni xinìnùù-nsiá vichi, doco cóni ñihitáhvi-né ducán. Yáha ga nìsa cuni-nè cunini-ne palabra ndiaha sàni inini-nsia vichi, doco cóni ñihitáhvi-né ducán.

Ñà-nduá cuní cachi ejemplu sàhà nècuàchì xitú

¹⁸ 'Vichi cunini vaha-nsia, vàchi cuàhìn quide explicar nansa cuní cachi ejemplu sàhà nècuàchì xitù-mà.

¹⁹ Cunaha-nsiá, nú sàni xitià ley xi ñuhivì ì xì Dios, te iníni iin nèhivì, doco có-cùndàà vaha ini-nè sàhà-ña, dandu vaxi ñà-malu, te dacúxió-si palabra xi Dios iá ini anima nècuàchì mà. Ñàyùcànduá nacua nì cuu xi tata nì còyo yuhù íchì, ducán-nì cuú xi stná nècuàchì mà.

²⁰ Daaní, nahi tata nì còyo nùù cavà nduú nèhivì iníni xì palabra ì, te vichi vichi cudìl gà ini-nè sàhà-ña.

²¹ Doco na ian cuú xi viú còò yohò-xì, ducán cuú stná xì-né; iyuhu gà quidándéé ini-nè. Vàchi nú sàni yàha-ne iin tnùndoho, ò nú sàni quida quini nèhivì xì-né, dandu luegu naxíocuíìn ini-nè, te nacóó-né palabra mà.

²² Daaní, nahi tata nì còyo mahì iñù nduú nèhivì iníní xí palabra xi Dios, doco cuàhà gá nacaní ini-nè sàhà vida xi-ne ñuhiví yohó; cuàhà gá xího-né coo cuica-né; ñàyùcànduá, dandahvíàmáné, te sadíàmà nùù palabra xi-ya ini-nè, mà cùì níhìndèè palabra mà chindeá-nè.

²³ Daaní, nahi tata nì còyo nùù ñuhù vaha nduú nèhivì iníní xí palabra xi-ya, te cundáa ini-nè, te quidá ndisa-neà cumplir; quidá-né na iin viú nì cana vii, a sea cunduu-ne nahi viú nì cana ùhùn dico tantu, te ò viú nì cana ùnì dico tantu, te ò ñá-nì cana òcò ùxìn tantu.

Ejemplu sàhà yùcù chicuéhè nì sahnú mahì viú trigu

²⁴ Daaní, nì nacani Jesús xì-né inga ejemplu, te dohó nì cachi-yà:

—Ley xi ñuhiví ìì xí mii-yá iá ansivi, ducán iá` nacua nì cuu na ní chihi iin tiàa ñà-nduú tata vaha trigu itu-nè.

²⁵ Doco iá iin tè-xìní ùhì xì-né, te na quídì-nè, mii-né xì nsidaa compañeru-nè, dandu nì sàà tèmà nì chihi stná-te tata yùcù chicuéhè mahì itu-nèmà, te cuàhàn-te.

²⁶ Daaní, nì xitià viú cuati ma, nì sahnua, te nì cana sìcàyòcò-ñà. Dandu nì natùì stná ñà-nduú yùcù chicuéhè mà.

²⁷ Te na ní caxini peón nansa iá, nì sàhàn-te nì cachitnùhu-tè xì lamú xi-tè, cachí-te: “Señor, amádi tata vaha nduá nì chihi-ní itù-nímà. Te ¿índù chuun nì xitià guá yùcù chicuéhè?”

²⁸ Dandu nì cachi lamú mà xì-té: “Divi tè-xìní ùhì-xí nì quida xán”. Dandu nì cachi peón mà xì-né: “¿A cuní-nì cùhùn-nsì tnuhu-nsi yùcù mà?”

²⁹⁻³⁰ “Còó”, cachí-nè, “Còtó tnuhu stná-nsià viú. Chicá vaha ducání nì coá dècuèndè nú sàni sahnú nduá, te sà-íá ndanchito cosecha. Dandu quivì mà cuàhìn cachì xì-nsià ñà-dihna yùcù chicuéhè datacá-nsià, cunuhnià manojo, te coca. Daaní después, (tàhndè vii) trigu, te nàcòovaha nùnà”.

Ejemplu sàhà tata yutnù mostaza

³¹ Daaní, nì nacani tu-ya xì-né inga ejemplu, te dohó nì cachi-yà:

—Ley xi ñuhiví ìì xí mii-yá iá ansivi, ducán iá` nacua nì quida iin tiàa na ní chihi-ne iin tata yutnù mostaza itu-nè.

³² Tata mà nduú tata chicá cuati iá ñuhiví, doco nú sàni sahnua, yutnù nàhnú nduú-nu, dècuèndè laa ndavá ansivi vaxi stná quidávaha tacà-xi mahì-nú.

Ejemplu sàhà ñà-nsidátáchí xí yusàn pan, divi nduú levadura

³³ Ñuhiví ìì xí mii-yá iá ansivi, ducán nduá nahi tàtnà nsidátáchí xí yusàn pan, vachi divia nì quihin iin nècuàchì ñahà nì dàqué-ne mahì ùnì maquila yusàn harina, te nì ndutachi nsihá —nì cachi Jesús.

³⁴ Nsidaa palabra jaàn nì nacani-ya xì nèhivì cuàhà yucán, vachi cuisì-ní ejemplu nì nacani-ya xì-né.

³⁵ Ñàyùcànduá, ducán nì cuu ndisa palabra nì cachitnùhu iin profeta sànaha na ní càhàn-nè nì quida Dios, te dohó nì cachí-nè:

(Cachí Dios): cuàhà ejemplu cuàhìn nacani xì nèhivì. Cuàhìn datúì cuàhà iñàha nùù-né, cuàhà palabra nì ìa dèhé dècuèndè nì sàcòò ñuhiví, nì cachi-yà.

Nansa cuní cachi ejemplu sàhà yùcù chicuéhè

³⁶ Daaní, nì ndaquìndèè Jesús xì nèhivì cuàhà yucán, te nì nansihvi-ya vehe. Te nì catnàtuu nèhivì dacuahá-yá, cachí-nè xì-yá:

—Cachì-ní xì-nsí nansa cuní cachi ejemplu sàhà yùcù chicuéhè iá itu mà.

³⁷ Dandu nì cachi-yà xì-né:

—Nècuàchì nì chihi xi tata vaha ma nduú yùhù ana nduú Tnaha Nèhivì Ñuhiví.

³⁸ Te itu mà nduú ñuhiví yohó. Te tata vaha ma nduú nèhivì cusáhnú Dios nùù-xí, doco tata chicuéhè mà nduú nèhivì xí ñà-malu.

³⁹ Te tiàa nì chihi tata chicuèhè mà, divi nduú ñà-malu xiní ùhì xí'. Daaní, quìvì nì ndanchito cosecha mà, divi quìvì xìnu tiempu yohó nduá. Te peón nì ndanihi xì cosecha mà, divi nduú ángel xì Dios.

⁴⁰ Te nacua nì cuu xì yùcù chicuèhè mà, nì sàcùnuhnià, te nì xìxàn, ducán icúmí cuu stná (xì nèhivì malu) na xínu tiempu yohó.

⁴¹ Vàchi yùhù ana nduú Tnaha Nèhivì Ñuhivì, icúmí techuín ángel xì cùhùn-nè tavà-né nsidaa ana dàtúcù xì ñanìtnaha-xi, xì nsidaa gá stná ana quidà-xì ñà-có-ndiàá, te mà cundóó gá-nè ñuhivì xì,

⁴² vàchi icúmí-nè ndiachi-né ini xìtnù ndé xìxìn ñuhu, te yucán icúmí-nè cuacu fuerte-nè, te càna nùhu-ne.

⁴³ Dandu icúmí sàà meru tiempu xì nèhivì ndàcuisì inì-xi; ndiaha gá icúmí coo xi-né, na ian ndiaha gá orá, ducán ndiaha coo xi-né quìvì sàà Yua-nda Dios cusahnú-yá ñuhivì yohó. Ni cúnínì vaha nsidaa-nsiá ñà-nduá cachí xì-nsiá yohó.

Ejemplu sàhà dìhùn índùxin

⁴⁴ Ñuhivì ì xì mii-yá iá ansivi, ducán iá nahi dìhùn cuàhà índùxin dèhé nùù iin ñuhù, te nì ndacùhun iin tiàa-ña. Ñàyùcànduá nì nachidèhé-nèà, cudfì gá ini-nè. Dandu mànuhù-né nì dicò nsìhì-né ñà-ìcúmí-nè, te nì sàhàn-nè nì xiin-ne ñuhù mà.

Ejemplu sàhà sì-diqui yáha ga ndiaá

⁴⁵ Inga ejemplu. Ducán iá ñuhivì ì xì-yá nacua nì quida iin nècuàchì dicó te nacuíin, nducú-né sì-diqui perla chicá vico cuiin-ne.

⁴⁶ Por fin nì tui iin sì-diqui chicá nsiaha. Ñàyùcànduá nì sàhàn-nè nì dicò nsìhì-né ñà-ìcúmí-nè, te nì xiin-ne sì-diqui nsiaha ma.

Ejemplu sàhà ñunù tavá-nda siaca

⁴⁷ Inga ejemplu. Ducán iá ñuhivì ì xì mii-yá iá ansivi na iin ñunù chìcáá-nè mahì mar, te quìhvi nsidanuu clase siaca inià.

⁴⁸ Dandu nú sàni chituá, tavá-nèà yuhù mar, te nácùndoo-ne nacàxin-ne siaca ma. Siaca vii, nácòovàha-sì ìcà sicaté, te siaca chicuèhè, xítìà-sì.

⁴⁹ Te divi ducán icúmí coo stná quìvì xìnu tiempu yohó. Icúmí caquesaa ángel xì Dios, te nacàxin-ne nèhivì, cuaán cuita nèhivì malu, te cuaán cuita nèhivì vaha.

⁵⁰ Dandu icúmí nèhivì malu mà ndiachi-né ini xìtnù ndé xìxìn ñuhu, te yucán icúmí-nè cuacu fuerte-ne, te càna nùhu-ne.

Ejemplu sàhà ñà-cuicà

⁵¹ Dandu nì ndàcàtnùhù Jesús nùù nèhivì yucán:

—¿A sàni cundaà ini-nsià sàhà nsidaájàn?

—Jaan, Stoho-nsì Señor —nì cachi-nè.

⁵² Dandu nì cachi-yà:

—Iin nècuàchì cuàhàn chinaha xì ley ì, nú sàni dàcuàhá vaha-ne sàhà ñuhivì ì xì mii-yá iá ansivi, dandu (cuaha-ni iá, vàchi ináhá-nè ley sànhaha, te ináhá stná-nè ley saa), te ducán queé stnámà na iin tiàa ndoó vaha cuàhà traste xì, vètùnì tavà-né iin ñà-saa, te tavà stná-nè iin ñà-sànhaha.

Nansa nì quida nèhivì ñuu Nazaret na ní nùhù Jesús yucán

⁵³ Nì nsìhi nì nacani Jesús ejemplu jaàn, dandu nì quihin-ya ichì mànuhù-yá.

⁵⁴ Te na sàni nasaa-yà ñuu-yà, dandu cuàhàn-yà veheñùhu, te nì quesaha-yá dacuahá-yá nèhivì yucán. Ñàyùcànduá, nì ndulocó nècuàchìmà, cachí-nè:

—¿Índù nì xini-ndà nì cunchichí guâ nècuàchì yohó, te quidá stná-nè milagru?

⁵⁵ ¿Amádi déhe nècuàchì tùha yàcùn yutnù nduú-né, te dihi-né nduú María, te ñani-nè nduú Jacobo, xì José, xì Simón, xì Judas?

⁵⁶ Te cùha-ne, yohó xíndoo stná-nè ndé ndoo-nda. Pues nú ducán, dandu ¿índù nì nìhítáhvi guá-nè quidá-né ducán?

Ñà-jaàn nduá nì cacachi nèhivì,

⁵⁷ vàchi nì cuduchi ini-nè sàhà-yá. Dandu nì cachi-yà xì-né:

—Iin ana cáhàn cuenta xi Dios, nú inga ñuu ni cáhàn-nè, dandu siempre quidáñúhú nèhivì-né yucán; doco nú ñuu mii-né, ò vehe-ne, còó, có-quidáñúhú nècuàchìmà-né —nì cachi-yà.

⁵⁸ Ñàyùcàndùá, mànicùì quida-ya milagru fuerte ñuu-yàmà, vàchi có-xiníndísâ-néyà.

14

Nansa nì xihì Juan Bautista

¹ Daaní, tiempu yucán nì xinitnùhu rey Herodes ñà-cuàhà guá quidá Jesús.

² Te nì cachì-te xi nèhivì xí-te:

—Ádi nsi-Juan Bautista nduú Jesús, te sàni natiacu-nè vichi, te ñàyùcàndùá quidá-né cuàhà milagru —nì cachì-te.

³ Vàchi Herodes mà nduú ana nì chicadi xi Juan vehecàa. Ducán nì quida-tè sàhà ñahàdihí ñani-te Felipe nani Herodías.

⁴ Vàchi nì cachi Juan xì-té ñà-có-sàha Dios lugar coo-tè xì ñahà mà.

⁵ Ñàyùcàndùá, cuní-te cahni-ténê, doco yúhì-te nèhivì ñuu-te, vàchi quidá-né cuenta ñà-iin nèhivì yuhù núu Dios nduú nècuàchìmà.

⁶ Doco nì sàà quivì nì naxinu-tè cuià, te nì quida-tè vicò. Te vicò mà nì ìtasaha dèhe Herodías mà núu nèhivì (nì casaà) yucán, te cuàhà gá nì cudii ini Herodes.

⁷ Ñàyùcàndùá, nì chinaha-té Dios dacútáhvi-téñâ ndéni iñàha nì cui ni càcàn-ña.

⁸ Dandu (nì sàhàn-ña) núu dihi-ñá, te nì sàcùnaha-ñá (nansa càcàn-ña), te ñàyùcàndùá nì cachì-ña xi rey mà:

—Dìni Juan Bautista cunî taxi-ní, cunacaà ini iin charola quixi.

⁹ Dandu nì cuhuun ini rey mà, doco sàhà-ñá sàni chinaha guá-te Dios, te sàhà stná compañeru-te ndoó indéhe yucán, ñàyùcàndùá nì dándàcú-te ñà-nì còó nacua nì xicàn ñahà chii mà,

¹⁰ nì sàha-tè orden, te nì quendodò dínì ndómà vehecàa.

¹¹ Te nihí nèhivì dìnì-ndà nì nansihvi ndé iá-te, inácàa ini iin charola. Ñàyùcàndùá, nì tni ñahà chii mà-ñá nì sàhàn nì sàha-ñà dihi-ñá.

¹² Dandu nì quixi nècuàchì nisa dacuahá Juan nì ndanihi-ne nsi ma nì sùxin-ne. Dandu cuàhàn-nè cachitnùhu-ne xì Jesús.

Nansa nì dàcùxí Jesús ùhùn mil tiàa

¹³ Na ní nsihì nì inini Jesús, dandu nì quècahnu-ya ini iin lancha, cuàhàn cuaán-yá inì-nu dècuèndè iin xaan ndé có-ndòó nèhivì. Doco nì xinitnùhu nèhivì cuàhàn-yà, te ñàyùcàndùá nì caquee stná-nè ñuu-nè nì tenchicùn-nèyà ñuhù íchí.

¹⁴ Sàhámà (na ní sàà-yà yucán), te nì quee-ya núu lancha mà, dandu nì xini-yà ndoó cuàhà gá nèhivì. Te nì cuhi ini-yànè; ñàyùcàndùá nì dándúvaha-ya cuàhà nècuàchì cuhì xi-ne.

¹⁵ Te na ní cuaà, dandu nì catnàtuu nècuàchì dacuahá-yá núu-yá, cachì-nè:

—Vichi sàcuàhàn nì cuaà, te lugar yohó, còó ni-iin vehe. Ñàyùcàndùá ndaquìndèè-ní xì nèhivì ni cùhùn-nè ñuu cuati yatni cuiin-ne ñà-cutiacu-nè.

¹⁶ Doco nì cachi-yà xì-né:

—Còò necesidad cùhùn-nè inga xaan; mii-nsiá dacuxí-nsiánè.

¹⁷ Dandu nì cachì-nè:

—Cuisì ùhùn pan nihí-nsí, xì ùi siaca.

¹⁸ Te nì cachì-yà:

—Cunihi-nsiaña quixi.

¹⁹ Dandu ni dàndàcú-yá ni mácùndoo nsidaa nêhivì yucán nùù yùcù cuati. Te ni tniì-ya ùhùn pan mà xì ùì siaca, te ni ndacoto ndiaá-yà dìquì-xì, ni naquimani-yá Dios sàhà-ñá. Dandu ni dàcuàchì-yáña ni sàha-ya nècuàchì dacuahá-yá, te mii-né, ni dasàn-néa nùù nsidaa nêhivì ndoo yucán.

²⁰ Te nsidaa-né ni xixi-ne ni ndenuu ini-nè. Te pedazu ni ndòo ga ni chitu ùxìn ùì ìcà.

²¹ Pues cunaha-nsiá, nsidaa nêhivì ni xixi ma, nahi ùhùn mil tiàa ni sanduu-ne, te cuaán nduú stná nècuàchì ñahà xì ñà-cuati.

Nansa ni xicandodò Jesús nùù tècuí mar

²² Vichi duha ni cachi Jesús xì nècuàchì dacuahá-yá ñà-nì mácùñuhu-ne ini lancha te cùhùn cuéé-nè nùù-xì yàha-ne inga ladu mar, doco mii-yá, cuàhàn-ya danácuítia-yà nêhivì cuàhà yucán.

²³ Te na sàni ndaquìndèè-yá xì nsidaa nêhivì mà, dandu ni nana cuaán-yá iin yucù ni càhàn-ya xì Yuamáni-yá Dios. Daaní, na ní cuñaà, iá mindaa-yá yucù yucán.

²⁴ Doco lancha mà, sàcuàhàn-nu dava mahì mar, te cuàhà gá sàni nacuahnu todò tècuí. Ñàyùcànduá ndé ndiàchì nìhnì-nu, vàchi yàha ga ndee caná tàchì ladu nùù-nú.

²⁵ Daaní, sinduhá ni sàa-ya yucán xicándodo-yá nùù tècuí.

²⁶ Doco na ní caxini-nè vaxi-ya, ni cayùhì cuàhà-né, te ni càna ndee-né, cachí-nè:

—¡Duma nduá!

²⁷ Doco vichi vichi ni cachi-ya xì-né:

—Nacuàhandee inì-nsia, vàchi yùhù nduí. Màsà yúhì-nsià.

²⁸ Dandu ni cachi Pedro xì-yá:

—Stoho-nsì Señor, nú divi nduu-ní, cachì-ní xì caqui nùù tècuí sàì ndé vaxi-ní.

²⁹ Dandu ni cachi-ya xì-né:

—Nahà-ní.

Ñàyùcànduá, ni nuu Pedro nùù lancha mà ni quesaha-né ni xicandodò stná-nè nùù tècuí cuàhàn-nè ndé vaxi Jesús.

³⁰ Doco na ní xini-nè ñà-ndee guá caná tàchì, dandu ni yùhì-nè, te ni quesaha-né cuàhàn-nè càhà-nè ini tècuí mà ni cùì. Ñàyùcànduá, ni ndàhì ndee-né, cachí-nè:

—¡Stoho-nsì Señor, dacácu-ní yùhù!

³¹ Dandu vichi duha ni chitanini-ya ndahà-yá ni tniì-yanè, te ni cachi-ya xì-né:

—Iyuhu gá xiníndísá-ní. Chicá vaha màsà cóo-ní xì duda.

³² Dandu ni nana-ya lancha, mii-yá xì stná Pedro. Te vichi duha ni cucuìn tàchì.

³³ Te ni tnàtuu nsidaa nècuàchì ñuhú ini lancha mà ni sàcuítasisi-né nùù-yá, cachí-nè:

—¡Ndisa, Dèhemanì Dios nduu-ní!

Nansa ni dàndúvaha Jesús cuàhà nècuàchì cuhí ñuu Genesaret

³⁴ Daaní, na sàni yàha-ya xì-né mar mà, dandu ni sàa-ya ñuhù íchì iin ñuu nani Genesaret.

³⁵ Te ni nacuni nêhivì ñuu mà-yá, te ni cachitnùhu-ne xì nsidaa gá nêhivì ladu yucán. Ñàyùcànduá, yucán ni casaà cuàhà-né nùù-yá ndacá-né nsidaa nècuàchì cuhí xi-ne.

³⁶ Te ni sacundahví-nè nùù-yá áma cuàha-ya dùcùn ndahà úún-né siquiera orilla sìcoto xi-ya. Te nsidaa nêhivì ni dùcùn ndahà-xì ducán, ni nduvàha-ne.

15

Ñà-nduá dacuidá cuàchì ndisa xi anima-ndà

¹ Daaní, ñuu Jerusalén ni caquee dava nècuàchì fariseu, xì dava stná nècuàchì ley xi veheñuhu vaxi-ne, te ni casaà-nè nùù Jesús. Te ni cachi-nè xì-yá:

² —Nècuàchì dacuahá mii-ní, ¿índù chuun có-quidá-né estilu xi xì-ndà? Vàchi na cuàhàn-nè cuxi-ne, có-ndahá-né (nacua cachí estilu xi-nda).

³ Dandu nì cachi-yà xì nècuàchìmà:

—Te mii-nsiá tu, ¿índù chuun có-quidá stná-nsià ñà-nduá nì dandacú Dios? Vàchi iladu nacóo-nsiá ley xi-ya, te chívàha-nsià ñà-nduú estilu xi mii-nsiá.

⁴ Vàchi dohó nì cachi-yà: ni cóo tñũñuhu xi-nda nùu yuadíhí-ndá. Te nú ni cáhàn ùhì iin nèhivì dìquì iin yuadíhí-nê, dandu icúmí-nê cui-nè.

⁵ Doco mii-nsiá, tucu quidá-nsiá, vàchi cachí-nsià vátùnì cachi iin nèhivì xì yuadíhí-nê: “Mà cùì chindeí mii-nsiá xì ñá-nduá icúmí, vàchi sàni cachì sàhà nsidaámà ñà-nduá dìhùn ì”.

⁶ Te nú ducán sàni cachi nècuàchìmà, dandu còò cá obligaciòn icúmí-nê ñà-chindee-né yuadíhí-nê, cachí-nsià. Ñàyùcànduá, sàhà estilu xi-nsiamà iladu sàni nacoo-nsià ley nì cachi Dios, te cuisì estilu xi mii-nsiá chívàha-nsià.

⁷ ¡Ndahví-nsià! ¡Vàha ga-nsià cahan-nsiá, doco dananí úún-nsiá! (Náhà xicà) ñà-ndacuisì nduá nì cachitnùhu Isaías sàhà-nsiá sàna na ní tiaa-ne ñà-nduá nì cachi Dios, te dohó nì cachi-yà:

⁸ Nèhivì yohó, yuhù-né quidáñuhú-nê yùhù. Doco ini anima-nè, còò, vàchi xica ié cahan-né.

⁹ Cahvi-né yùhù tuxí-né, doco có-ndiáá, vàchi nèhivì ùún nduú ana nì quidavàha xi ley chináhà-nè nèhivì.

¹⁰ Dandu nì cana Jesús nèhivì cuáhà mà ñà-tnàtuu-ne nùu-yá, te nì cachi-yà xì-né:

—Cunini vaha-nsià, te cundaà ini-nsià.

¹¹ Mà cúnsidá cuàchi nèhivì sàhà ni-iin ñà-xixí-né; còò. Doco palabra queé yuhù-né na cachí-nè iñàha, ñà-jaàn ndisa dacuidá cuàchi xi-né.

¹² Dandu nì nataca nècuàchì dacuahá-yá nùu-ya, te nì cachi-nè:

—Cunaha-ní, cudúchí ini nècuàchì fariseu sàhà ñà-nduá nì cachì-ní.

¹³ Dandu nì naxiconihí-yá nùu-né, cachí-yà:

—(Có-quidámà), vàchi nú iá iñàha ñuhívì yohó có-nduú ñà-nì chitnùnì ini Yuamánì iá ansivi, dandu icúmíâ ndañuhá na ian ndañuhu yùcù tnuhu-nda itu.

¹⁴ Nacóo-nsiá nècuàchì fariseu mà, vàchi quidá-né na ian quidá iin nècuàchì cuaá cuní dacúndéhe xi inga nècuàchì cuaá ichì. Te (ináhà-ndá) nú ducán ni quida-nda, cutu sàà-ndà dacóyo nihni stnaha-nda xìchi.

¹⁵ Dandu nì cachi Pedro xì-yá:

—Nacani-ní xì-nsí nansa cuní cachi ejemplu nì cachì-ní (xì nècuàchìmà).

¹⁶ Dandu nì cachi-yà xì-né:

—¿A có-cùndàà stná ini mii-nsiá?

¹⁷ ¿A có-ìnhá-nsià nansa cuu-xi comida xixi-nda, quea yuhù-ndà, dandu yáha ndè tìxi-nda, te después quea?

¹⁸ Doco palabra queé yuhù-ndà, divi ñà-ñuhú ini anima-ndà nduá. Te divi ñà-jaàn ndisa dacuidá cuàchi xi anima nèhivì.

¹⁹ Vàchi ini anima-nè ñuhú cuáhà cuàchi, te divi sàhámà nacání quini guá ini-nè, te sahní stnahá-né, te ò cáhàn-nè xì inga nècuàchì có-nduú nècuàchì vehe-ne, te ò iá-nè xì ndéni nèhivì ní cui mate tà nándàhà-né. Te divi sàhà ñà-nduá ñuhú ini anima-ne, ñàyùcànduá xího stná-nè quida cuihna-né, te cuní-nè dandahví stnahá stná-nè, ò cáhàn quini-ne.

²⁰ Divi cuàchi jaàn nduá dacuidá cuàchi xi anima nèhivì, doco ñà-có-ndàhà-ndà na xixi-nda, có-dàcuídá cuàcha-ndó.

Nansa nì xinindisá iin nècuàchì ñahà inga ñuu

²¹ Dandu nì quee Jesús ladu yucán cuàhàn-yà ladu ñuu Tiro xì ñuu Sidón.

²² Te yucán nì tnàtuu iin nècuàchì ñahà raza cananeu nùu-yá, ndáhì-nè, cachí-nè xì-yá: —Señor, mii-ní nècuàchì descendencia xi David, cundehè ndahví-ní yùhù, vàchi yáha ga fuerte dandohó iin ñà-malu dèheyoquí.

²³ Doco Jesús, cóni nájícóníhî-yá nùu nècuàchìmà. Dandu nì catnàtuu nècuàchì dacuahá-yá, cachí-nè xî-yá:

—(Quida-ní favor xícàn-nè), dandu taxi-nínè, vâchi ndé cuñáñá-nsî ñà-ndáhì guá-nè.

²⁴ Dandu nì cachi-yà (xì nècuàchì dacuahá-yá):

—Cuisì nùu nècuàchì raza-ndà Israel nì techuún Dios yùhù càhàn xî, vâchi nahi riì nì tùcù xínduu-ne.

²⁵ Dandu nì tnàtuu nècuàchì ñahà mà nì sàcuìin sîsî-né nùu-yá, cachí-nè xî-yá:

—Chindee-ní yùhù, Señor mío.

²⁶ Dandu nì cachi-yà xî-né:

—(Ùhì quide ñà-ndùá xícàn-ní, vâchi) có-ndùá ducán dacúxió-ndá dîtà nùu dèhe-nda, te cuàha-nda sîhina cuati.

²⁷ Doco nì cachi-nè xî-yá:

—Ñà-ndáà nduá Señor. Doco cunaha-ní, dècuèndè stná sîhina cuati, níhì stná-si iyuhu xèhè dîtà cóyo tîxi mesa xi stohò-si. (Ñàyùcàndùá, chindee sacu stná-ní yùhù.)

²⁸ Dandu nì cachi-yà xî-né:

—Cuàhà gá xiníndísá-nî. Ñàyùcàndùá, ducán ni coó nacua xícàn-ní.

Ñàyùcàndùá, divi hora jaàn nì nduvàha dèheyoco-né.

Nansa nì nduvaha cuàhà gá nèhivì

²⁹ Dandu nì quee Jesús ladu yucán cuàhàn-yà ichì mar de Galilea. Te na nchícùn-yà ichì mà, nì nana-ya iin yucù nì sàcòo-ya.

³⁰ Te cuàhà ga nèhivì nì nataca nùu-yá yucán, ndacá-né nècuàchì cuhí xi-ne, xínduu-ne nècuàchì xicá cuéhê, xì nècuàchì cuaá, xì nècuàchì ìhìn, xì nècuàchì cuhí ndahà-xí, vâchi cuàhà gá cuèhè ndohó-né. Te nì chitànduhù-ñáné nùu-yá, te nì dándúvaha-yanè.

³¹ Ñàyùcàndùá, nì ndulocó nèhivì cuàhà mà na ní xini-nè nansa nì cuu nì nacahàn nècuàchì ìhìn, te nì nduvítà ndahà nècuàchì cuhí ndahà-xí; stná nècuàchì xicá cuéhê, nì nacaca viì stná-nè, te nì natùinuù stná nècuàchì cuaá. Te nèhivì nì xini mà, cuàhà gá nì naquimanì-né Dios ñà-cuàhà guá sàni chindee-yá nèhivì ñuu-nè Israel.

Nansa nì dàcùxí Jesús cùmì mil nèhivì

³² Daaní, nì cana-ya nècuàchì dacuahá-yá ñà-tnàtuu-ne nùu-yá, te nì cachi-yà xî-né:

—Cuhí inì nèhivì yohó, vâchi vichi sàcuàhàn-ndà ùnì quìvì ndoó-né cutnáhâ-né xî-ndà yohó, te còò cá ñà-cuxi-ne. Te có-cùnî nacuitià-nè nùhù-nè nú tàñáha ga cuxi-ne, vâchi vihini cuitá-nè ichì nùhù-nè.

³³ Dandu nì cacachi nècuàchì dacuahá-yá:

—Doco ¿índù nihì-ndà ñà-cutiacu-nè ñà-cuàhà guá-nè? vâchi yucù nduá yohó.

³⁴ Te nì ndàcàtnùhù-yá nùu-né:

—¿Nadaa pan nihí-nsiá?

—Ùsà-ñà xì iin ùi siaca cuati —cachí-nè.

³⁵ Dandu nì dándàcù-yá ni mácùndoo viì nsidaa nèhivì mà ñuhù.

³⁶ Te nì tnii-ya ùsà pan xì stná siaca ma, te nì naquimanì-yá Dios sàhà-ñá, dandu nì dàcuàchí-yáñà nì sàha-ya nècuàchì dacuahá-yá, te miì-né, nì dasàn-nèà nùu nèhivì cuàhà mà.

³⁷ Te nì xixi nsidaa-né nì ndenuu ini-nè. Dandu después nì dàtàcá-nè ùsà canasta nì chitu ñà-nì cuyodò gá.

³⁸ Cunaha-nsiá, nsidaa nècuàchì tiàa nì xixi ma, cùmì mil nì sanduu-ne, te cuaán nduú nècuàchì ñahà xì stná ñà-cuati.

³⁹ Daaní, nì dānācūtīā-yā nèhivì mà, te nì nana tu-ya iin lancha cuàhàn-yà dècuèndè ladu ñuu Magdala.

16

Nansa ni xicàn nècuàchì fariseu ñà-quida Jesús iin milagru cundehè-né

¹ Dandu ni quixi nècuàchì fariseu xì nècuàchì saduceu, te ni xicàn-nè ñà-ni quidá-yá iin milagru cundehè-né, te cundua seña cudî ndisa ini Dios sàhà-yá. Ducán ni xicàn-nè, áma níhìndèè-né daquée cuàchi-ne dìquì-yá.

² Doco mii-yá, ni cachi-yà xì-né:

—Nú ni cuaà, te cuahá laa ansivi, dandu cachí-nsià: “Seña nduá ñà-ìcúmí cuun dàvì”.

³ Daaní, dàtnàà tu, nú color cuahá iá ansivi, te ndiaha gá itá vïcò, dandu cachí-nsià: “Vàxi dàvì vitni”. ¡Ndahví-nsià! Dananí uun-nsia nchichí-nsià, vàchi mate vátùni nacuni-nsià seña iá ansivi, doco mà cùì nacuni stná-nsià índù tiempu nduá vichi.

⁴ Nèhivì tiempu vichi, malu cuàhà-né, vàchi có-càhvì sàhnú ví gá-nè Dios, cutu milagru-ni xicàn-nè cundehè-né. Doco mà níhì-né cundehè-né milagru cuní-nè, cuisì milagru ni cuu xi Jonás sàhana —ni cachi Jesús.

Dandu ni nacooyanè cuàhàn-yà.

Nansa ni cachi Jesús xì nèhivì xí-yá ñà-ni cúndóó-né cuidadu sàhà ñà-nduá chináhà nècuàchì fariseu

⁵ Dandu ni caquee nècuàchì dacuahá-yá, cuàhàn-nè (xì-yá) inga ladu mar yucán. Doco ni nandódó-né cunihi-ne pan cùhùn.

⁶ Dandu ni cachi-yà xì-né:

—Cundehè-nsiá, cuidadu gà ni cúndóó-nsiá sàhà tàtnà nsidátáchí xí pan xi nècuàchì fariseu xì stná nècuàchì saduceu.

⁷ Dandu ni quesaha-né ndatnúhú-nê, cachí-nè:

—Ádi sàhà ñà-còò pan nihi-nda vaxi, ñàyùcànduá cachí-yà xì-ndà ducán.

⁸ Dandu ni cundaà ini-yà ñà-nduá ndatnúhú-nê, ñàyùcànduá ni cachi-yà xì-né:

—Mii-nsiá, iyuhu gá xiníndísâ-nsiá. Có-xiñhù ndatnuhu-nsiá sàhà-ñá còò pan nihí-nsiá vaxi.

⁹ Yùhù xiní tãñáha ga cundaà inì-nsia. ¿A có-nsinúú inì-nsia sàhà ùhùn pan (ni xixi) ùhùn mil tiàa, te nadaa ga ìcà pedazu pan ni ndòò ni dàtàcá-nsiá?

¹⁰ Te ¿a có-nsinúú gá stná inì-nsia sàhà ùsà pan ni xixi cùmì mil nèhivì, te nadaa ga ìcà pedazu pan ni ndòò stná?

¹¹ Xiñuhu cundaà ini-nsiá ñà-màdì pan ndisa cáhìn sàhà-xí na ní cachì xì-nsiá ñà-ni càquín-nsiá cuidadu sàhà ñà-nsidátáchí xí pan xi nècuàchì mà.

¹² Dandu ni sàà nècuàchì dacuahá-yá ni cundaà ini-nè sàhà ñà-nduá ni cachi-yà, màdì ñá-nsidátáchí xí pan ndisa nduá cáhàn-yà sàhà-xí. Còò, sàhà ley chináhà nècuàchì fariseu xì nècuàchì saduceu, divi nduá cáhàn-yà sàhà-xí.

Nansa ni cachi Pedro ñà-xiníndísâ-né Jesús ñà-nduú ndisa-ya Cristu ni quixi nùù Dios

¹³ Daaní, cuàhàn Jesús xì nècuàchì dacuahá-yá ndè ladu ñuu Cesarea de Filipo. Te ni ndàcàtnùhù-yà nùù-né, cachí-yà:

—Yùhù ana nduú Tnaha Nèhivì Ñuhivì, ¿índù nècuàchì nduí cachí nèhivì?

¹⁴ Te ni cachi-nè xì-yá:

—Dava-ne cachí-nè Juan Bautista nduu-ní, te dava-ne, Elías nduu-ní, cachí-nè. Daaní, dava tu-ne cachí-nè ñà-nduú-ní Jeremías, te ò inga profeta sàhana ni sacahàn cuenta xi Dios.

¹⁵ Dandu ni cachi-yà xì-né:

—Doco mii-nsiá, ¿ana nduí cachí-nsiá?

¹⁶ Dandu ni cachi Simón Pedro xì-yá:

—Divi Cristu Dèhemanì Dios iá nicanicuàhàn nduu-ní.

¹⁷ Dandu ni cachi-yà xì-né:

—¡Nansicáhán mii-ní, Simón dèhe Jonás! vèchi màdì nèhivì ñuhiví yohó nì dàtnúu inì xì-ní ñà-nì cundaà inì-ní ducán. Còó, divi Yuamání íá ansivi nduú ana nì dàtnúu xì sàxìnítnùnì-ní.

¹⁸ Te yùhù cachí xì mii-ní, Pedro, ñà-ìcúmí-ní cunduu-ní na iin cavà fuerte ndé cuàha iin vehe. Te vehe-ma cundua nahi nèhivì-xí icúmí danátáquì. Te mate (ni queé) nsihì ñà-malu yehè andea (quixa), doco mà sàà cundeá nùu ana xínduu tàcá nèhivì xí.

¹⁹ Vèchi cuàhìn daníhítáhví mii-ní (ñà-sàhà palabra cachí-ní) icúmí yàha nèhivì ndé ñuhiví ìì xí Dios, na ian cucumi-ní ndahà cáa xán. Te nú cachì-ní xì-né ñà-nsidá cuàchi ndisa-ne, dandu cundiaa stná palabra mà ndé (íá Dios) ansivi. Te ò nú ni cachí-ní xì-né ñà-màdì cuàchi nduá sàni quida-ne, dandu divi cundiaa stná mà ndé ansivi —nì cachi-yà.

²⁰ Dandu nì sàcùnaha nsidaa nècuàchì dacuahá-yá mà ñà-màsà cáchì-nè xì nèhivì ñà-nduú-yá Cristu (nì quixi dìquì-xì).

Nansa nì cachitnùhu Jesús icúmí-yâ cui-yâ

²¹ Daaní, quivì yucán nì quesaha-yá cachitnùhu-ya xì nècuàchì dacuahá-yá nansa icúmí cuu xi-yá na sàà-yà ñuu Jerusalén. Icúmí-yâ ndoho cuahà-yá, nì cachi-yà xì-né, vèchi ducán icúmí quida nècuàchì sahnú dandacú, xì stná dùtù xícusahnú, xì nècuàchì ley xì veheñùhu. Te nú sàni xihì-yà, dandu icúmí-yâ natiacu-yâ tixi ùni quivì.

²² Dandu nì tavà cuaán Pedro-yà, te nì càhàn duchi ini-nè xì-yá, cachí-nè:

—Cahnú gà Dios, màsà nunca cuu xi-ní ducán.

²³ Doco nì naxiconihí-yá nùu-né, cachí-yà:

—¡Cuxio-ní nùí, vèchi nahi ñà-malu Satanás nduu-ní, te quidá quíní-ní xì! Cuisì chuun xi nèhivì ñuhiví yohó nduá nihnú inì-ní, màdì chuun xi Dios.

²⁴ Dandu nì cachi-yà xì nècuàchì dacuahá-yá:

—Nsidaa ana cuní cunchicùn xì, xiñuhu naco-ne ñà-nduá cuní inì-ni mii-né quida-ne, te quida-ne cuenta na ian nsidá stná-nè cruz xi-ne cutnáhâ-né xì ñà-cuí stná-nè.

²⁵ Vèchi nsidaa ana cuní dacácu xi vida xi, ñà-dandáñúhú dahuun-ne mii-né nduá. Doco nú ni cui-nè sàhí, dandu ñà-sàni càcu ndisa vida xi-ne nduá.

²⁶ Vèchi mate ni níhì iin nèhivì nsidaa ñà-íá ñuhiví, doco ni mà sàà-mà cundua ñà-vàha xi-ne nú màsà sàà stná anima-nè càcua nùu Dios. Còó. Te ò nú ni cuní stná iin nèhivì nacuiin-ne anima-nè, còó, mà cúí.

²⁷ Yùhù ana nduú Tnaha Nèhivì Ñuhiví, icúmí naxicocuín, cutnahá stnáì xì cuàhà ángel xi. Te ndiaha gà icúmí coo tnùñuhu xí, nahi tnùñuhu xí Yuamání. Dandu nsidandá sàhà nsidaa nèhivì ñuhiví, según nansa nì quida iin iin-ne.

²⁸ Te cunaha-nsiá, dava mii-nsiá nècuàchì itá yohó, mà cúí-nsià dècuèndè cuni-nsià nansa coo quivì naxicocuín yùhù ñuhiví yohó cusahnúí.

17

Nansa nì nadama Jesús mii-yá, nì natnuù nihni ndiaha-yá

¹ Daaní, na ní yàha ìñù quivì, dandu nì saca Jesús Pedro xì Jacobo, xì ñani Jacobo nani Juan, cuàhàn cuaán-yá xì-né ndé dìni iin yucù ducún.

² Te yucán nì nadama-ya, tucu nì nàcùnahà-yà nì xini nècuàchì mà, vèchi nì natnuù nihni fuerte nùu-yá nahi orá, te nì nanchiì cuxín yaa stná sìcoto xi-ya nahi nduà orá.

³ Dandu nanàá nì xini stná-nè jaàn sàni ndecoyo stná nèhivì (sànaha) nani Moisés xì Elías, ndatnúhú-nè xì-yá.

⁴ Dandu nì cachi Pedro xì-yá:

—Stoho-nsì Señor, ¡nansicáhán-ndá ndoo-nda yohó! Chicá vaha quidavàha-nsi ùni siahva, nú cuní-ní; ian coo mii-ní, ingà coo Moisés, te ingà coo stná Elías.

⁵ Meru càhàn Pedro ducán, te nì dàhvi nsidaa-né mahì iin vècò nchií ndiaha. Dandu nì tiacu-nè càhàn iin ana càhàn mahì vècò mà, cachí-yà:

—Dèhemaní nduú ana yohó, te cudû inì sàhà-yá. Ñàyùcànduá cunini-nsia ñà-nduá cachí-yà.

⁶ Daaní, na ní inini nècuàchì dacuahá-yá palabra mà, dandu nì tutuyuhu nsidaa-né ñuhù, vâchi nì yùhí cuàá-nè.

⁷ Dandu nì tnàtuu Jesús nùù-né, te nì chituu-ya ndahà-yá ìcà-né, cachí-yà:

—Vâtùni ndacuíta-nsia; màsà yúhí gà-nsia.

⁸ Dandu nì ndacoto-ne inicutu, te nì xini-nè, còò cá iin, ndé làcà mii Jesús iá yucán.

⁹ Daaní, nì naquihin-ya ichì mànuu-ya xì-né yucù yucán. Te ichì mà nì chinaha-yànè, cachí-yà xì-né:

—Màsà nácání-nsiá xì nèhivì ñà-nduá nì xini-nsiá vichi dècuèndè nú sàni natiacu yùhù ana nduú Tnaha Nèhivì Ñuhiví.

¹⁰ Dandu cachí-nè xì-yá:

—Nú ducán, dandu ¿índù chuun cachí nècuàchì ley xi veheñuhu ñà-dihna icúmí naxicocuín Elías?

¹¹ Dandu nì cachi-yà xì-né:

—Ñà-ndàà nduá, dihna icúmí Elías naxicocuín-nè, te nsidaviì-né nsidaa chuun có-ìá viì.

¹² Doco cunaha-nsiá, sàni quixi nècuàchìmà, doco nì nacuaà nèhivì-né, nì quida ndevàha-ne xì nècuàchìmà nacua cudû ini-nè. Te ducán icúmí-nè dandohó stná-nè yùhù ana nduú Tnaha Nèhivì Ñuhiví.

¹³ Dandu nì sàà nècuàchì dacuahá-yá nì cundaà ini-nè ñà-divi Juan Bautista cáhàn-ya sàhà-xí.

Nansa nì tavà Jesús iin ñà-malu inácaa ini iin tèchii

¹⁴ Nì nsihi nì nasaa-yà xì-né ndé ndoó cuàhà nèhivì, dandu ndacá nècuàchìmà iin tiàa nì quesaa nùù-yá. Te nì sàcuìn sìsì tiàa ma nùù-yà,

¹⁵ cachí-nè:

—Señor, cundehè ndahví sacù-ní dèhi, vâchi cuàhà gá xichi xíhì ìhí-te. Yáha ga ndohó-te, vâchi cuàhà xichi nduá-te mahì ñuhu xì mahì tècuí.

¹⁶ Ñàyùcànduá, ndaquí-te nì quixi nùù nècuàchì dacuaaha-ní, doco màni cùì dandúvaha-nète.

¹⁷ Dandu nì cachi-yà xì-né:

—Mii-nsiá, mà túha-nsia cunindisá-nsiá; ni có-sàà-nsia cundaà inì-nsia. ¿Nadaa ga quivì icúmí coi xì-nsiá, te quidandee gá stná inì sàhà-nsiá? Pues cundaca-nsiàte quixi nùì.

¹⁸ Dandu (nì saca-nète vâxi nùù-yá), te nì dândacú-yá nì sadi-yà nùù ñà-malu mà, te nì quea cuàhàn. Te nì nduvàha nchito-tè.

¹⁹ Daaní, después na iá cuaán-yá xì nècuàchì dacuahá-yá, dandu nì catnàtuu-ne nùù-yá, cachí-nè xì-yá:

—¿Índù chuun mànicùì tavà nsiùhù ñà-malu mà?

²⁰ Dandu nì cachi-yà xì-né:

—Sàhà-ñá iyuhu guá xiníndísâ-nsiá, ñàyùcànduá mànicùì. Vâchi ñà-ndàà nduú palabra cachí xì-nsiá yohó: nú xiníndísâ ndisa-nsia, mate (iyuhu nduá) nahi tata cuati yutnú mostaza, dandu vâtùni dandacú-nsiá nùù yucù jaàn, te cachi-nsiá xán: “Cuxio iladu”, te seguru icúmí cuu ducán, vâchi nsidanicuú iñàha cui quida-nsia, nú xiníndísâ-nsiá.

²¹ Doco ñà-malu tnaha quisì nìsa inacaa ini tèchii ma, có-queè yáchà, cuisì nú ni cácan tãhvi-nsiá nùù Dios, te cunihì dócô-nsiá.

Nansa nì cachitnùhu Jesús inga xichi ñà-icúmí-yà cui-yà

²² Na iá va-ya ladu Galilea, nì cachi-yà xì nèhivì xicánúú xí-yá:

—Yùhù ana nduú Tnaha Nèhivì Ñuhiví, icúmí yàhi ndahà nèhivì (malu), vâchi iá iin tiàa cuàhàn cahin xì nùù-né.

²³ Dandu cahni-né yùhù; doco tìxi ùnì quivì icúmî natiacuì —nì cachi-yà.
Te nèhivì dacuahá-yá, cuahà gá nì nàcùndoo-ne tnùnsí ini sàhámà.

Nansa nì nihì Jesús dihùn ñà-chiyàhvi-ya cuota xi-ya

²⁴ Daaní, na ní sàà-yà xì-né ñuu Capernaum, dandu nì tnàtuu tè-xicàn xì cuota nùu Pedro, cachí-te:

—¿A có-chiyàhvi maestru xi-nsia cuota xi-ne?

²⁵ —Jaan —cachí Pedro.

Dandu nì quihvi-ne ini vehe (ndé iá-yà). Te dihna-ya nì càhàn-yà xì-né, cachí-yà:

—¿Nansa tuxí inì-ní, Simón? ¿Nansa quidá rey ñuhiví yohó? ¿A núu nèhiví xí mii-té tavá-te cuota xi-tè, te ò núu nèhiví tùcù (dandacú-te nùu-xí)?

²⁶ Dandu nì cachi Pedro:

—Divi núu nèhiví tùcù.

Dandu nì cachi-yà xì-né:

—Nú ducán nduá, dandu nèhiví xínduu nèhiví xí rey, cò obligaciòn icúmí-nê, ¿á ma ndisá?

²⁷ Doco sàhà-ñá có-cùnì-ndà cuduchi ini ni-iin nèhiví sàhà-ndà, ñàyùcànduá cuahán-ní mar yucù siaca, te quisi primeru nihì-ní, nacuna-ní yuhù-sí, te tavà-ní dihùn inácaa mà. Dandu cunihi-ní cùhùn chiyàhvi-ní nùu nècuàchimà, vàchi vátùnì sàà mà sàhà nduì-ndà —nì cachi-yà.

18

Nansa nì cachi Jesús ana chicá ndiaá

¹ Daaní, hora yucán nì tnàtuu nècuàchì dacuahá-yà nùu-yá, te nì ndàcàtnùhù-né:

—¿Ana chicá ndiaá nùu nsidaa nèhiví ñuhiví ìì xí mii-yá iá ansivi?

² Dandu Jesús, nì cana-ya iin tètii, te nì chicani-yàte mahì nsidaa-né, cachí-yà xì-né:

³ —Palabra ndàcuisì nduá cachí xì-nsiá yohó; nú màsà nàxícócuìn ini-nsiá, te nàcùnihnu vii inì-nsia na iin ñà-cuati, dandu mà sàà-nsiá ñuhiví ìì xí mii-yá iá ansivi.

⁴ Ñàyùcànduá, iin nèhivì, nú nihnú ndáhvì ini-nè nahi tètii yohó, pues divi-ne nduú ana chicá ndiaá ndé nduú ñuhiví ìì xí Dios.

⁵ Te nú sàhà yùhù quidáñuhú nèhivì iin tètii nahi tàyòhó, dandu davani queá na ian yùhù quidáñuhú-né.

⁶ 'Nú ni datúcù iin nèhivì iin ñà-cuati xiníndísá-xì, ¡ndahví-nè! Vàchi chicá vaha màcùndiacu iin yùu yódò ducùn-né, te ndiachi-né mahì mar cunú sàhà-ñá màsà dátùcù gà-nè iin ñà-cuati.

⁷ ¡Ndahví nèhivì ñuhiví datúcù xì ñanìtnaha-xi! Vàchi mate fuerza cuahàn tùcù dava-ne, doco yáha ga ndahví tiàa dísàhà-xì túcù-nè.

⁸ 'Te ò nú sàhà ndahà-nsiá ò sàhà-nsiá xidá cuàchi-nsia, dandu chicá vaha nì táhndèà, te dacanà-nsiáñà, vàchi chicá nsiaha (sàà-nsiá nùu Dios), te cutiacu-nsiá nicanicuahàn, mate sàni ndañuhu iin ndahà-nsiá, ò iin sàhà-nsiá, te màdiá coo nsihi-nsia, te ndiachi-nsiá ndé xìxìn ñuhu nicanicuahàn.

⁹ Te nú sàhà nduchínùu-nsiá quidá-nsiá cuàchi, dandu chicá vaha tavà-nsiáñà dacanà-nsiá, vàchi chicá nsiaha (sàà-nsiá nùu Dios) xì mindaa nduchínùu-nsiá, te cutiacu-nsiá nicanicuahàn, te màdiá xì nduìà, dandu después icúmí-nsiá ndiachi-nsiá ndé xìxìn ñuhu andea.

Ejemplu sàhà rii nì tùcù

¹⁰ 'Màsà nunca cahíchì inì-nsia iin ñà-cuati nahi tàyòhó, vàchi cachí ndà xì-nsiá, ndé ansivi ndoó ángel (ndiaá) xán, te nicanicuahàn ndoó tùha-ne nùu Yuamánì.

¹¹ Vàchi yùhù ana nduú Tnaha Nèhivì Ñuhiví, nì quesai ñuhiví yohó ñà-dacácuì ana cuahàn ndañuhu ni cuí.

12 '¿Nansa tuxí inì-nsia quida iin tiàa nú ndoó iin cientu riì xí-né, te nì tucù iin-sì? ¿Amádi nácóó-né 99 quisì dava ga mà yucán ndé (xixáhan-sì) yucù yucán, te cùhùn-nè nanducu-né quisì nì ndañuhu ma?

13 Te nú sàni natù-sì, dandu cudfi gá ini-nè. Ndè chicá cudfi ini-nè sàhà quisì yucán nù nsidaa gá quisì cóni tucù mà.

14 Pues ducán iá stná xì nèhivì nahi ñà-cuati yohó, có-cùni Yuandiaha-nsiá iá ansivi ndañuhu ni-iin-ne.

Nansa quida-nda nú sàni quida iin ñanìtnaha-nda iin cuàchi nù-ndà

15 'Nú ni quidá iin ñanìtnaha-nsia iin cuàchi nù iin-nsia, dandu nècuàchì nì quida quini-ne nù-xí, xiñuhu tavà cuaán-ñánê iladu, te ndatnuhu ví-né xi nècuàchì mà. Te nú nì quihín casu nècuàchì mà, dandu ñà-sàni dàcácu tnahá-né nduá.

16 Doco nú có-quihín casu nècuàchì mà, dandu xiñuhu cuaca-ne iin ò úi gá nèhivì sàhà ñà-cunduu-ne testigu cundaà vaha inì-xi nansa ndisa iá chuun.

17 Doco nú ni-xi ñà-jaàn có-cùni-nè, dandu ni cùhùn-nsiá nù nsidaa nèhivì natácá càhvì xì Dios. Te nú iin-ni có-cùni-nè quihin casu-nè nsidaa nèhivì mà, dandu ni cùnàhá chuun ma, te quida-nsia cuenta na ian nècuàchì siùmí nduú-né, te ò iin ana nì cuchicuehe dahuun anima-xi.

18 'Ñà-ndàá nduá cachí xì-nsiá yohó: nú cachí-nsiá xì nèhivì ñà-nsidá cuàchi ndisa-ne, dandu cundiaa stná palabra mà ndé (iá Dios) ansivi. Stná palabra cachí-nsiá xì-né ñà-màdi cuàchi nduá sàni quida-ne, divi cundiaa stná mà ndè ansivi.

19 'Te cachí stnáì xì-nsiá, mate cuísi ùi-nsiá ndoó, doco nú iin-ni sàni cachi nduú-nsiá cuàhàn-nsiá càcàn tàhvì-nsiá iñàha nù Yuamánì' iá ansivi, dandu icúmí-yá quida-yañà, ndéni chuun nì cui nì cúnduá.

20 Vachi nú sàni nataca-nsiá mate úi ò úni-nsiá iin-ni xaan, te ndácùcahan-nsiá quivì, dandu yucán icúmí coo stnáì cutnahí xì-nsiá —nì cachi Jesús.

Xiñuhu cuicahnú stnahá ini-ndà sàhà-ndà; màsà quidá-ndá na ian nì quida peón cóni cùni cuicahnú inì-xi sàhà ñanìtnaha-xi

21 Dandu nì tnàtuu Pedro nù-yá, cachí-nè:

—Stoho-nsì Señor, ¿nadaa xichi icúmí cuicahnú inì sàhà iin ñanìtnahi nú nì quida-ne cuàchi nù? ¿A ndé' ùsà xichi, ò nadaa xichi?

22 —Còo —cachí Jesús xì-né— màdi cuísi ùsà xichi, cachí. Dècuèndè (yáha ga cuàhà tantu) ñà-jaàn xiñuhu cuicahnú inì-nì sàhà-né, mate 70 tantu gá nù ùsà xichi nì cúnduá.

23 'Ñàyùcànduá, ducán iá stná ñuhivì ìlì xí mii-yá iá ansivi nacua nì cuu na ní dànyàha iin rey nsidaa cuenta xi nèhivì nduú peón xi-ne.

24 Nì natavà ví-né cuenta, te nì cana-ne iin peón iníhíca cuàhà millón pesu nù-né.

25 Doco còo ni-iñàha icúmí-tè ñà-danáà-té. Ñàyùcànduá, nì dandàcú rey mà ñà-nì cùyàhvì-tè, mii-té, xì ñahàdihí-te, xì dèhe-tè, xì nsidanicuú stná traste xi-tè sàhà-ñá tui dikhùn danáà-té.

26 Doco nì tutuyuhu-tè ñuhù nù sàhà rey mà nì sacundahví-te nù-né, cachí-te: “¿Señor! Quida sacù-ní favor xí, cundiatu tahví gá-ní yuhù, dandu danáà nsihí”.

27 Ñàyùcànduá, nì cuhi ini rey mà-té, te nì naco-nète, nì dandùtù nsihí-né ñà-nduá iníhíca-tè.

28 'Doco nì quee cuisì-tè nù rey mà, te nì sàhàn-te nì nanducu-tè inga peón nduú compañeru-te, vachi iníhíca stná nècuàchì mà iin cientu dikhùn plata nù-tè. Te nì tni nìhni tnuu tehe-tè ducùn-né nì cachì-te xi-né: “Danáà dahuun ñà-nduá iníhíco nù”.

29 Dandu nì tutuyuhu stná nècuàchì mà ñuhù nù sàhà-tè nì sacundahví-nè nù-tè, cachí-nè: “Quida sacù-ní favor xí cundiatu tahví gá-ní yuhù, dandu danáà nsihí”.

30 Doco còo, cóni cùni-te. Nì sanicuàchi-tè sàhà-né nì chicadì-tené dècuèndè danáà nsihí-né ñà-nduá iníhíca-nè.

³¹ Doco na ní xini dava ga peón nduú compañeru-te, cuàhà gá nì cuduchi ini-nè. Ñàyùcànduá, nì sàhàn-nè nì nacani-ne xì rey mà ñà-nduá nì quida-tè.

³² Sàhámà tucutu nì cana rey mà-té nì cachi-nè xì-té: “¡Peón malu nduú-yó! Vàchi yùhù, nì xicahnú inì sàhù; nì dándùtù nsihí ñà-nduá nì ìnhícó, vàchi ducán nì sacundahvú núí’.

³³ ¿A có-ndiá ìcà stnáu cuhi inù compañeru nacua nì quide xì miun?” nì cachi rey mà.

³⁴ Cunaha-nsiá, yáha ga nì xidà ini-nè, ñàyùcànduá nì dáyáha-nète ndahà tè-dàndòhò-xì nèhivì ñà-coo-tè ndahà-témà ndè cachi danáà nsihí-te.

³⁵ ‘Pues ducán icúmí quida stná Yuamánì íá ansivi xi mii-nsiá nú có-cùnì-nsiá cuicahnú ndisa ini-nsiá sàhà ñanìtnaha-nsia —nì cachi Jesús.

19

Màsà caté stnàhà-ndà

¹ Daaní, na ní nsihì nì cachi Jesús ducán, nì quee-ya ladu Galilea cuàhàn-yà ndè inga ladu yùte Jordán ndé nduú stná ladu Judea.

² Te cuàhà gá stná nèhivì nì tenchicùn xì-yá nì sàà stná-nè yucán. Ñàyùcànduá nì dándùvaha-ya nècuàchì cuhí xi-ne.

³ Dandu nì catnàtuu nècuàchì fariseu nùu-yá nì càhàn-nè xì-yá áma níhìndèè-né daquée cuàchi-ne dìquì-yá. Te dohó nì cachi-nè xì-yá:

—(¿Nansa cachí-ní?) ¿A vátùni cate-ndà ñahàdihí-ndà nansa ni nì cui?

⁴ Te nì cachi-yà xì-né:

—Ádi sàni cahvi-nsia nùu tutu ìi ndé cachá` nansa nì quidayucun Dios nèhivì primeru, iin-ne nì sàcùnduu tiàa, te inga-nè ñahà.

⁵ Te nì cachi stná-yà ñà-jaàn nduá dísáhà-xí nándàhà iin nècuàchì tiàa xì iin nècuàchì ñahà, te quecuáân-né nùu yuadíhí-né. Ñàyùcànduá, mate diín diín nì sanduu-ne antes, doco vichì na imindaa nèhivì sàni nanduu-ne.

⁶ Sàhámà có-nduú gá-nè diín diín nèhivì; còó, vàchi quida-nda cuenta na ian imindaa nèhivì nduú-né. Ñàyùcànduá, nú ducán sàni dàcuàcátnáhà Dios-nè, dandu ni-iin nèhivì màsà caté stnàhá-né.

⁷ Dandu nì cachi nècuàchì fariseu xì-yá:

—Pues nú ducán, dandu ¿índù chuun nì cachi Moisés íá permisù, vátùni cuàha-nda ñahàdihí-ndà iin tutu cachí cuàhàn-ndà cate-ndañá, dandu nacoò-ndañá? —nì cachi-nè.

⁸ —Còó —cachí-yà—; sàhà ñà-cò-cùnì-nsiá cunini vii-nsiá, ñàyùcànduá nì sàha Moisés permisù cate stnàhá-nsiá. Doco na ní quesaha ñuhiví, còó, màdì ducàn nìsá ía.

⁹ Te yùhù cachí stnái xì-nsiá, cuàchi ndisa nduá nú ni caté iin nècuàchì tiàa ñahàdihí-nè, te coo-ne xì inga nècuàchì ñahà. Doco nú sàni càhàn ñahàdihí-nè xì inga tiàa, dandu màdì cuàchi cunduu ñà-cate-nè ñahàdihí-nèmà. Te nú ni nándàhà stná iin nècuàchì tiàa xi iin nècuàchì ñahà nì sate stnàhá, divini cuàchi cunduu stná mà.

¹⁰ Dandu nì cachi nècuàchì dacuahá-yá xì-yá:

—Nú ducán (ùhì) íá chuun sàhà iin ñahàdihí-ndà, dandu chicá vaha màsà nándàhà-ndà.

¹¹ Dandu nì cachi-yà xì-né:

—Cunaha-nsiá, màdì nsidaa nèhivì sàà mànihì inì-xi sàhà ñà-nduá nì cachi jaàn, cuisì nèhivì sàni nihítàhvì mànihì inì-xi.

¹² ‘Dava nèhivì, có-íá nsihì iquicúñú-nè, vàchi ducán nì cacu-ne, ñàyùcànduá, có-nándàhà-né. Daaní, dava nèhivì, có-íá nsihì-ne sàhà-ñá ducán nì quida nèhivì xì-né. Daaní, dava stná-nè cuisì sàhà-ñá (cudù ini-nè quida-ne) chuun xì ñuhiví ìi xì Dios, ñàyùcànduá có-cùnì-nè nándàhà-né. Nú ni sàà-nsiá mànihì ini-nsiá palabra yohó, vátùni, (te nú còó, pues mà cùndàà inì-nsia).

Nansa nì chitàndòó Jesús ndahà-yá dìni ñà-cuati ñà-cundiatúa

¹³ Daaní, ndacá nèhivì ñà-cuati vàxi nùu-yá ñà-chitàndòó-yá ndahà-yá dìni-vé, te càcàn tàhvì-yá nùu Dios sàhà-vé. Doco nècuàchì dacuahá-yá, nì sadi-nè nùu nècuàchìmà.

14 Ñàyùcàndùá nì cachi-yà xì-né:

—Nacoo-nsia ñà-cuati nì quixá núí. Màsà cádí-nsià núá, vàchi nsidaa ana nihnú inì-xi nahi ñà-cuati, divi cunduu ana sàà ñuhiví ìì xí mii-yá iá ansivi —nì cachi-yà.

15 Dandu nì chitàndòó-yá ndahà-yá dìniá, te cuàhàn-yà.

Nansa nì cachi Jesús xì iin tèchii cuica

16 Daaní, nì sàà iin tèchii nùù-yá, te nì cachì-te xi-yá:

—Maestro, mii-ní vaha ndisa-ní. Cachì-ní xí índù obra vaha quide, te nihitáhvi' vida ndiaha nicanicuahàn.

17 Dandu nì cachi-yà xì-té:

—¿A ndísá (cuní-ní) càhàn-ní xì yùhù sàhà índù iñàha nduú ñà-vàha? Vàchi còò ni-iin nèhivì ùùn vaha ndisa, cuisì nú nduí Dios, dandu vaha ndisa inì. Doco nú cuní-ní nihitáhvi-ní vida ndiaha, dandu chivàha-ní ñà-ndúá dandacú-yá.

18 Dandu nì cachi tèmà:

—¿Índù ñà-càchí-yà icúmî chivàhi?

Te nì cachi Jesús:

—Divi ñà-màsà cáhni stnaha-nda, ni màsà cáhàn-ndà xì inga ana có-nduú nècuàchì vehe-nda, ni màsà quídá cuíhná-ndá, ni màsà cáchí stná-ndà ni-iin tnùhu sàhà ñanìtnaha-nda.

19 Te ni cóó tnùñuhu xi-nda nùù yuadíhí-ndá; te nacua cuú íní-ndà sàhà mii-nda, divi ducán icúmí-ndá cuu stná ini-ndà sàhà ñanìtnaha-nda.

20 Dandu nì cachi tèchii ma xi-yá:

—Cunaha-ní, nsidaájàn sàni chivàhi dècuèndè na tíí. ¿Índù iñàha cumàni gá quide?

21 Dandu nì cachi-yà xì-té:

—Nú ndisa cuní-ní cunduu-ní iin ana vaha ndisa, dandu cuahán-ní dicò nsìhì-ní ñà-ndúá icúmí-ní, te dasàn-ní dìhùn mà nùù nècuàchì ndahví; dandísá nihitáhvi-ní cucumí-ní cuàhà ñà-cuicà iá ansivi. Te quixi-ní cunichicùn stná-ní yùhù —nì cachi-yà.

22 Daaní, na ní inini-tè ñà-jaàn, dandu yáha ga nì cuhuun inì-te, vàchi cuica cuáhà-té. Ñàyùcàndùá nì quihin-tè ichì mànuhù-té.

23 Dandu nì cachi Jesús xì nècuàchì dacuahá-yá:

—Ñà-ndácuìsì nduá cachí xì-nsiá: Ùhì sàstnùhù sàà iin tècuicà ñuhiví ìì xí mii-yá iá ansivi.

24 Te ùhì gá stná dayáha-nda iin camellu nùù chìcòhò ndúhu íqui, doco ñà-chicá ùhì nduú ñà-yàha iin tècuicà ndè ñuhiví ìì xí Dios —nì cachi-yà.

25 Na ní inini nècuàchì dacuahá-yá ñà-jaàn, dandu yáha ga nì ndulocó-nè, te nì cachi-nè iin-ne xì inga-nè:

—Pues nú ducán nduá, dandu ùhì ndisa càcu anima iin nèhivì.

26 Dandu nì indehè váha Jesús-nè, te nì cachi-yà:

—Nèhivì ñuhiví, mà cúí quida-neàmà. Doco Dios, vátuni, vàchi nsidaa iñàha, mà úhì quida-yañà.

27 Dandu nì cachi Pedro xì-yá:

—Nsiùhù, sàni nacoo-nsi nsidaa ñà-ndúá icúmí-nsí, te vaxi-nsi nchícùn-nsì mii-ní, Stoho-nsì Señor. Ñàyùcàndùá, ¿índù iin ñà-vàha icúmí-nsí nihì-nsí?

28 Dandu nì cachi-yà xì nsidaa-né:

—Cunini-nsia palabra ndácuìsì yohó: na sàà tiempu ndusaa nsidaa ley ñuhiví, dandu yùhù ana nduú Tnaha Nèhivì Ñuhiví, icúmî nàcòì nùù silla ndiaha xí. Te daa cunduu quivì nihitáhvi stná nsì-úxin ùì mii-nsiá, màcùndoo stná-nsià nùù iin iin silla vico ma, te dandacú-nsiá nùù nsidaa descendencia xì nsì-úxin ùì dèhe Israel.

29 Daaní, nú sàhà yùhù sàni nacoo iin nèhivì iñàha, dandu iin cientu gá tantu ñà-jaàn icúmí-nè nihitáhvi-né. Mate icúmí-nè nacoo-ne vehe-ne, ò ñani-nè, ò cúha-ne, ò yua-né,

ò dihi-né, ò ñahàdihí-nè, ò déhe-ne, ò ñuhù xí-né sàhà yùhù, có-quidámà, vàchi iin cientu gà tantu icúmí stná-nè ñihítàhvi-né, te ñihí stná-nè vida ndiaha nicanicuahàn.

³⁰ Doco cuàhà ñèhivì idónuu vichi, icúmí-né sàà-nè natenchicùn-nè ndè cahà-xí quivì yucán. Te cuàhà ana nchícùn cahà-xí vichi, icúmí-né nàcòdònù-né nùù-xí.

20

Ejemplu ni nacani Jesús sàhà peón xíquidachuún xì sè-úvà

¹ 'Ducán iá ñuhivì ìì xí mii-yá iá ansivi nacua ni quida iin lamú, naha ni quee-ne cuàhàn-nè nducu-né peón caquidachuún nùù-né.

² (Te na ní tui-tè), dandu ni ndòo-ne ñà-chiyàhvi-ne iin dihùn plata quivì, ñàyùcàndùá ni techuún-nète ñà-cacuhùn-te quidachuún-te itu-nè.

³ Daaní, nahi càhìn ni quee tu-ne cuàhàn-nè yàhvi, te yucán ni xini-nè itá uun itnii gà tiàa.

⁴ Ñàyùcàndùá ni càhàn-nè xì-té áma cùhùn stná-te quidachuún-te itu-nè, te quiyàhvi stná-te iyuhu nacua ndiá ìcà. Ñàyùcàndùá, ni dandàa stná-te cuàhàn-te.

⁵ Daaní, tucu tu ni quee-ne nahi càxíhùì, te yucán ni ñihí tú-né iin ùì gà peón; stná càhùnì ni cuaà, ducán ni quida stná-nè.

⁶ Daaní, nahi càhùhùn tucu tu ni quee-ne ni xini tu-ne itá úún más gà tiàa yucán, ñàyùcàndùá, ni cachi-nè xì-té: “¿Índù chuun ndui yacá itá úún-nsiá?”

⁷ Te ni cacachì-te xi-né: “Divi sàhá còò iin taxi xi chuun quida-nsi”. Dandu ni cachi-nè xì-té: “Pues cuahàn stná-nsià quidachuún stná-nsià itui, te quiyàhvi stná-nsià nacua ndiá ìcà”.

⁸ 'Daaní, na ní cuaà dahuun, dandu ni cachi lamú mà xì tiàa dandacú nùù nsidaa peón mà: “Cana-ní nsidaa-té ni quixí-te quiyàhvi-tè; doco dihna peón ni quihvi último ni cáyàha, dandu ducán cunchicùn tnahá-te quihvi-tè dècuèndè stná nùù peón ni quihvi primeru”.

⁹ Ñàyùcàndùá, dihna tiàa ni caquihvi nahi càhùhùn ni yàha, te iin iin-tè ni ñihí-té iin iin dihùn plata.

¹⁰ Daaní, ni cayàha stná peón ni quihvi naha, te chicá más cuàhàn-te ñihí-té cahan-té, doco còò. Iin-ni ni canihì nsidaa-té.

¹¹ Ñàyùcàndùá ni quesaha-té daquée cuàchi-tè dìquì lamú mà,

¹² cachì-te xi-né: “Cuisì iin hora-ni ni caquidachuún nècuàchì último jaàn, te quida-ní cuenta na ian dava-ni ni quidachuún-né xì nsiùhù, mate ndui yacá ni quidachuún ndee-nsí nùù cahni”.

¹³ Dandu ni cachi lamú mà xì iin tiàa mahì peón mà: “Còò, amigo, màdì cuàchi nduá quidé. ¿Amádi sàni ndòo sahnu-nda ñà-quiyàhvi iin iin-nsià iin-ni dihùn plata?”

¹⁴ Tnii-ní yàhvi-ní, te cuahàn-nì, vàchi yùhù cunì ñà-dava-ni quiyàhvi stná nècuàchì último yohó nacua quiyàhvi mii-nsiá.

¹⁵ ¿Á coo derechu xi ñà-quide xì dihùn xí nacua chítñuní inì? ¿ò cumbidiá inì-ní ñà-ni quide iin ñà-vàha (sàhà nècuàchì-mà?), ni cachi lamú mà).

¹⁶ Sàháyùcàndùá, nècuàchì chicá idónuu vichi, icúmí-né sàà-nè natenchicùn-nè ndè cahà-xí, te nècuàchì nchícùn cahà-xí vichi, icúmí-né sàà-nè nàcòdònù-né nùù-xí. Vàchi mate cuàhà ñèhivì cánà (cundoo nùù Dios), doco sacu-nè cunduu ana nacàxin-ya.

Nansa ni cachi tu Jesús inga xichi ñà-icúmí-yà cui-yà

¹⁷ Daaní, meru xicá Jesús ichì mánana-ya cuàhàn-yà ñuu Jerusalén, te ni tavà cuàán-yá nsì-úxìn ùì tiàa dacuahá-yá, te ni cachi-yà xì-né:

¹⁸ —Cunaha-nsiá, icúmí-ndá sàà-ndà ñuu Jerusalén, te yùhù ana nduú Tnaha Nèhivì Ñuhivì, icúmí yàhi ndahà dùtù xícusahnú yucán, xì ndahà stná nècuàchì ley xi veheñùhu, te icúmí-né cachi-nè ñà-fuerza icúmí cuì.

¹⁹ Dandu dayáha-ne yùhù ndahà tè-inga raza ñà-cuàcùndiaà-te yùhù, te cahni cuì-te yùhù, dandu chituu-tè yùhù nchìca cruz, doco tìxi ùnì quivì icúmì natiacuì.

Ñà-nduá nì xicàn dihi Jacobo xì Juan nùù Jesús

²⁰ Daaní, vaxi ñahàdihí Zebedeo nùù-yá, ndacá-né dèhe-ne, te nì sàcuìn sàsì-né nùù-yá, cuní-nè càcàn-nè iin favor nùù-yá.

²¹ Te nì cachi-yà xì-né:

—¿Índù ñàha cuní-nì?

Te nì cachi-nè xì-yá:

—Cuní ñihitáhvi ndúì dèhi yohó ñà-cundoo iin iin-tè ladu-ní quivì sàà-ní cusahnu-ní ñuhiví, iin-tè coo ladu cuahá-nì, te ingà-te ladu itnì-nì.

²² Dandu nì cachi-yà xì ndúì tiàa ma:

—Mii-nsiá, có-sànìhì ini-nsiá ñà-nduá xicàn tàhvi-nsiá nùì. ¿A vátuni cundee ini-nsiá ndoho-nsiá nacua icúmì ndohi te yàha stná-nsiá tnùndoho nacua icúmì yàhi?

—Jaan —nì cachi-nè— vátuni stná nsiùhù.

²³ Dandu nì cachi-yà xì-né:

—Ñà-ndàà nduá, icúmì-nsiá ndoho-nsiá nahi yùhù, te icúmì-nsiá yàha stná-nsiá tnùndoho nahi yùhù; doco ñà-danìhìtáhvi mii-nsiá cundoo iin iin-nsiá iin iin ladúì, mà cúí, vachi có-quidá tocar yùhù quide ñà-jaàn. Yuamání nduú ana chítùnì inì-xi índù nèhivì ñihitáhvi cundoo iin iin ladúì.

²⁴ Daaní, na ní xinitnùhu ùxìn gà nècuàchì dacuahá-yá, nì cuduchi gá ini-nè sàhà ù ñàní mà.

²⁵ Doco nì cana-ya nsidaa-né ni nátácá-nè nùù-yá, te nì cachi-yà xì-né:

—Sà-ínahá-nsiá nansa xíquida tè-cùsáhnù inga ñuu, fuerte cusáhnù-te nùù nèhivì ñuù-te; vachi nsidaa tè-nihí chuun ñuu yucán, ndee dandacú-te nùù nècuàchì ñuù-te.

²⁶ Doco mii-nsiá, màsà quidá-nsiá ducán. Còó, vachi nú iá ana cuní cunduu ana dandacú nùù-nsiá, dandu icúmì-nè cunduu-ne ana xinúcuáchì nùù nsidaa-nsiá.

²⁷ Vachi nècuàchì cuní codònùù nùù-xí, icúmì-nè cunduu-ne nahi peón chindéé xí nècuàchì dava ga.

²⁸ Dècuèndè stná yùhù ana nduú Tnaha Nèhivì Ñuhiví, cónì quésàì ñuhiví yohó ñà-cunucuachi nèhivì nùì. Còó, sàhà-ñá cunucuachi mií nùù-né nì quesàì, dandu después cuàhi vida-xi cuì cuenta xi-ne, te ducán nàcùndoo cuahà-né libre.

Nansa nì natùinuù ùì nècuàchì cuaá nì quida Jesús

²⁹ Daaní, mii-yá xì compañeru-yà, nì quihin-ya ichì nì quee-ya ñuu Jericó, te nchícùn cuahà gá stná nèhivì dava ga.

³⁰ Te yuhù íchì yucán ndoó ùì nècuàchì cuaá. Te na ní tiacu-nè cuahàn yàha Jesús, dandu nì quesaha-né cána ndee-né, cachí-nè:

—¿Stoho-nsì Señor! ¿Mii-ní descendencia ùì xí David! ¿Cuhì inì-ní nsiùhù!

³¹ Dandu nèhivì cuahà yucán, nì canahá-nè xì nècuàchì cuaá mà:

—Màsà cána ga-nsiá —cachí-nè.

Doco nècuàchì mà, chicá ndee ní càna-ne, cachí-nè:

—¿Stoho-nsì Señor! ¿Mii-ní descendencia ùì xí David! ¿Cuhì inì-ní nsiùhù!

³² Dandu nì cucuiin-yà, te nì cana-ya nècuàchì cuaá mà nì cachi-yà xì-né:

—¿Ndíà nduá cuní-nsiá quide sàhà-nsiá?

³³ Te nì cachi-nè xì-yá:

—Stoho-nsì Señor, cuní-nsì natùinuù-nsì.

³⁴ Ñàyùcànduá nì cuhi ini-yànè, te nì chituu-ya ndahà-yá nùù-né. Te vichi vichi nì natùinuù-né. Dandu nì tenchícùn stná-nè mii-yá cuahàn-nè.

21

Nansa ni tùi iin burru ñà-cuindànùú Jesús quìhvi-ya ñuu Jerusalén

¹ Daaní, ni sàà-yà xì-né yatni ñuu Jerusalén ndé iá iin ñuu tii nani Betfagé, yatni dìni yucù Olivo. Dandu ni càhàn-yà xì ùi nècuàchì dacuahá-yá ñà-ni cùhùn cueé-nè nùù-xí.

² Te dohó ni cachi-yà xì-né:

—Cuahán-nsiá ñuu tii chicá nùù-xí. Te yucán icúmí-nsiâ cuni-nsiâ nuhní iin burru xì dèhe-sì. Quisì yucán ndaxin-nsiá, cundaca-nsia quixì.

³ Te nú càhàn nèhivì xì-nsiá sàhà-sí, dandu cachi-nsiá xì-né ñà-Stoho-ndà Señor xiñuhu xi-sí, doco luego naxicocuñ-si —ni cachi Jesús.

⁴ Cunaha-nsiá, ducán (ni cachi-yà xì-né) sàhà ñà-ni cùú ndisa ñà-nduá ni cachitnùhu iin nèhivì xí Dios sàhana na ní cachi-nè palabra yohó:

⁵ Dohó cachitnùhu-nsia xi nèhivì ñuu Sión, (divi nduú ñuu Jerusalén): “Cundehè-nsiá, yucán vaxi rey xi-nsia, nihnú ndáhví ínì-yà, te indánuú-yá iin burru chii nduú dèhe iin quisì (sànsidá)”.

(Ducan ni cachitnùhu nècuàchì sàhana ma.)

⁶ Daaní, ni caquihin ùi nècuàchìmà ichì cuàhàn-nè chuun ma, ni caquida-ne nacua ni dàndàcú Jesús nùù-né.

⁷ Ni saca-ne burru mà vaxi xi dèhe-sì. Dandu ni chitándòò-né sìcoto xi-ne dìquì-sí, te ni sàcùnùú-yàsi.

Nansa ni quidañuhu nèhivì Jesús na ní quìhvi-ya ñuu Jerusalén, ni chitánduhù-né dòò-né ichì según estilu xi-ne

⁸ Daaní, dava nècuàchì cuàhà yucán, ni chitánduhù-né dòò-né ichì ndé icúmí-yà yàha-ya, te dava-ne, ni sahnde-nè ndahà yutnù ni chindoo stná-nè ichì mà, (te ducán ni nducutá).

⁹ Te nèhivì idónuu, xì stná nècuàchì nchícùn cahà-xí, cána ndee-né, cachí-nè:

—¡Viva ana sahnú yohó! ¡Descendencia ùi xí rey David nduú-né! ¡Ndiaha gá ndeníhí vaha-ndané, vaxi cuenta xi Stoho-ndà Señor vaxi-ne! ¡Ansivéhé cahnú mii-yá iá ansivi!

¹⁰ Daaní, na sàni quìhvi-ya ñuu Jerusalén mà, dandu ni ndulocó gà nsidaa nèhivì ndoó yucán, cachí-nè:

—¿Ana divi nduú nècuàchì yohó?

¹¹ Te ni naxiconihí nèhivì cuàhà mà:

—Jesús nani-né, te nduú-né iin nècuàchì càhàn cuenta xi Dios. Te meru ñuu-nè nduú ñuu Nazaret iá ladu Galilea.

Nansa ni tavà Jesús tè-dìcò xi tè-xiín fuera patiu veheñùhu cahnú

¹² Dandu cuàhàn-yà veheñùhu cahnú xí Dios, te ni taxi-yá nsidaa tè-dìcò xi tè-xiín yucán, te ni ducùn nsihí-yá mesa xi tiàa damá dìhùn inga ñuu, te ni ducùn stná-yà silla xi tè-dìcò loma,

¹³ cachí-yà xì nsidaa témà:

—Dohó cachí (Dios) nùù tutu ùi: “Veheñùhu xi cunduu iin vehe ndé nataca nèhivì càcàn tàhvi-né nùù”, cachí-yà. Doco sàhà mii-nsiá sàni nandua na iin lugar ndé ndoó cuàhà tècuìhnà —ni cachi Jesús.

Nansa ni cuduchi ini nècuàchì veheñùhu sàhà Jesús

¹⁴ Dandu ni catnàtuu cuàhà nècuàchì cuhí nùù-yá, dava-ne cuaá-nè, te dava-ne xicá cuéhè-nè; te ni dàndúvaha-yanè.

¹⁵ Doco dùtù xícusahnú, xì nècuàchì ley xi veheñùhu, ni cuduchi ini-nè na ní xini-nè ñà-cuàhà guá milagru quidá-yá. Te ni tiacu stná-nè cána ndee ñà-cuati ini veheñùhu, cachá sàhà-yá: “¡Ndiaha gá ana sahnú yohó; descendencia ùi xí rey David nduú-né!”

¹⁶ Ñàyùcànduá, ni candudana nècuàchìmà, cachí-nè xì-yá:

—¿A có-ínì-ní nansa cachí ñà-cuati jaàn?

Dandu nì cachi-yà xì-né:

—Jaan, iníni. Doco mii-nsiá, a táñaha ga cahvi-nsia (ndé cáhàn nèhivì xì Dios, cachí-nè palabra yohó):

Ndè stná ñà-cuati xi mée tíquìn sàni dàtnúu stná-ní sàxínítnùnì-xi, te nì nìhì-vé naquimanì ndiaha-vé mii-ní.

(Ducán nì cachi Jesús xì nècuàchìmà.)

¹⁷ Dandu nì nacooyanè, te nì quee-ya ñuu mà cuàhàn-yà ñuu tii Betania, te yucán nì quidì-yà.

Nansa nì sadi Jesús nùu nù-higu cóni càná quisì vídì-nu

¹⁸ Na ní tùinuù, nì quihìn-ya ichì màndixi-ya ñuu cahnú, dandu nì xihì-yà doco.

¹⁹ Te nì xini-yà jaàn yatni ichì mà íin iin nù-higu. Ñàyùcànduá, nì tnàtuu-ya ndé íin-nu, doco còò quisì vídì caá, cutu ndahà cuií-ni-nù iá. Ñàyùcànduá nì cachi-yà xì-nú:

—Màsà nunca cana ga quisì vídì yohó.

Dandu luego nì ichì dahuun-nù.

²⁰ Te na ní xini nècuàchì dacuahá-yà ñà-nduá nì cuu, nì ndulocó-nè, te nì cachi-nè:

—¿Índù chuun yàchì guá nì ichì nù-higu jaàn?

²¹ Dandu nì cachi-yà xì-né:

—Ñà-ndàà nduá cachì xì-nsiá yohó; nú ni cúníndísâ vaha-nsia, te có-ndòò-nsiá xì duda, dandu vátùni quida stná-nsiá milagru, doco màdì cuisì milagru na ian nì cuu xi nù-higu yohó. Còò, dècuèndè vátùni cachi stná-nsiá xì yucù jaàn ñà-nì cúxíóá, te quècahna ini mar, te divi ducán ndisa icúmí cuu.

²² Vàchi nú ni cúníndísâ ví-nsiá, dandu nìhítàhvi-nsiá nsidaa ñà-nduá nì cacán tàhvi-nsiá nùu Dios.

Nansa nì cachi tè-xídandacú ñà-còò derechu xi Jesús quida-ya ñà-nduá quidá-yá

²³ Daaní, nì nansihvi-ya veheñuhu cahnú, te nì quesaha-yá chináhá-yà nèhivì. Doco nì catnàtuu stná dùtù xícusahnú, xì stná nècuàchì xídandacú nùu ñuu mà, cachí-nè xì-yá:

—¿Índù nì nìhì-ní derechu quida-ní ñà-nduá quidà-ní? ¿Ana divi nì dándacú nùu-ní ñà-quida-ní ducán?

²⁴ Dandu nì cachi-yà xì-né:

—Yùhù cuní stnái ndàcàtnùhí nùu mii-nsiá, te nú ni nàxícónihî-nsiá nùí, dandu cachitnùhu stnái xì-nsiá ana divi nì dándacù-xì nùí.

²⁵ Cachi-nsiá xí ana divi nì dándacù-xì nùu Juan (Bautista) ñà-quida ì-né nèhivì. ¿A Dios nì cachi xì-né, te ò nèhivì ñuhiví?

Dandu nècuàchìmà, nì candatnuhu tnahá nsidaa-ní mii-né, cachí-nè:

—Nú ni cachí-ndà Dios nì dándacù-xì nùu Juan, dandu cachi Jesús xì-ndà: “¿Índù chuun cóni xíníndísâ-nsiá nècuàchìmà, nú ducán?”

²⁶ Doco nú ni cachí-ndà ñà-divi nèhivì ùún nì cachi xì nècuàchìmà, dandu yúhî-ndà ndiá nduá quida nèhivì xì-ndà, vachi nsidaa-né quidá-né cuenta iin ana nì cáhàn cuenta xì Dios nì sanduu ndisa Juan mà.

²⁷ Ñàyùcànduá, nì cacachi nècuàchìmà xì-yá:

—Cò-cùndàà ini-nsi ana divi nì dándacù-xì nùu Juan.

Dandu nì cachi-yà xì-né:

—Ni yùhù, mà cáchì stnái xì-nsiá ana divi nì dándacù-xì nùí ñà-quide ñà-nduá quidé.

Ejemplu sàhà tiàa ndoó ùi dèhe-xi

²⁸ (Dandu nì cachi Jesús xì-né:)

—¿Nansa tuxí inì-nsia (sàhà ejemplu yohó)? Nisa ìa iin tiàa ndoó ùi dèhe-xi. Te nì cachi-nè xì iin-tè: “Cuahán vichì duha, quidachuun itu-ndà ndé iá sì-uva xi-nda”.

²⁹ Te nì cachi dèhe-ne mà: “Còò, vachi có-càhín cùhìn”. Doco después nì naxicocuîin inì-te, te nì sàhàn-te nì quidachuún-te.

³⁰ Dandu nì sàhàn yua ma ní càhàn tu-ne xì inga dèhe-ne, cachí-nè xì-té nacua nì cachi-nè xì tè-primeru mà (ñà-nì cùhùn-te quidachuún-te). Te nì cachi tèchii ùi mà: “Juùn, yohó cùhìn, papá”. Doco cóni sàhàn-te.

³¹ Pues, vichi cachi-nsià xí índù tèchii ma nì quida ndisa ñà-nduá nì dandàcú yua-té.

Te nì cachi nèhivì iníní má:

—Divi tè-primeru mà.

Dandu nì cachi Jesús xì-né:

—(Cachí vaha-nsia.) Te palabra ndàcuisì nduá cachí xì-nsiá yohó: chicá mà ùhì càcu tè-dàchíyàhvi (cahíchì guá ini-nsià), ò iin nècuàchì ñahà quidá ndevàha, te sàà-nè ñuhivì ìì xí Dios, mientras mii-nsiá, ùhì gà càcu-nsia ducán.

³² Vàchi na ní quixi Juan Bautista cóni xìníndísâ-nsiá (na ní càhàn-nè sàhù) sàhà ichì váha Dios. Doco tè-dàchíyàhvi, xì stná nècuàchì ñahà iá cuàchi xi, nì xinindisá-né nècuàchìmà. Te nú sàni xini-nsià (nì xinindisá cuàhà nècuàchìmà), dandu ¿índù chuun cóni náxícócuìn stná ini-nsià ñà-cunindisá-nsiá?

Ejemplu sàhà medieru malu

³³ 'Cunini-nsia, vachi cuàhìn nacani inga ejemplu. Nì ìa iin lamú nì dandàndèe nducu yòhò sì-uva nù ñuhù xí-né, te nì quida-ne corra-ñà. Dandu nì quidavàha stná-nè iin pilá cahnú ndé cuñuhu ndudi quisì mà. Te nì quidavàha stná-nè iin torre ndé cundiaa peón inii itu mà. Dandu nì tatu-nè itnii medieru, te cuàhàn-nè inga ñuu xicà.

³⁴ Daaní, na ní sàà tiempu cùchi quisì vídì mà, dandu nì techuún-né iin ùi peón xi-ne nùhù naquihin xi fruta nù medieru mà.

³⁵ Doco na ní canasaa nècuàchìmà yucán, nì catnii medieru mà nsidaa-né, te nì sahnì cuí-te iin-ne, inga-nè nì sahnì dahuun-tè, te inga-nè nì cani yuu-té.

³⁶ Daaní, inga tu nì techuún lamú mà más gà peón xi-ne nùhù tu, te chicá más nduú-né nù nècuàchì nì nùhù primeru. Doco divi nì ducán nì quida quini medieru mà xì nècuàchìmà.

³⁷ Dandu último nì techuún lamú mà dèhemanì-né nùhù, vachi ádi quidañuhu-té dèhe-ne nì cahan-né.

³⁸ Doco na ní xini-te vaxi dèhe lamú mà, dandu nì candatnuhu tnahá-te, cachí-te: “Tè-yòhò nduú tè-ìcúmí ndutahví (xì ñuhù yohó). Vichi cahni-ndàtè chicá vaha, dandu mii-nda nanduu-nda stoho ñuhù”, nì cacachì-te.

³⁹ Ñàyùcànduá, nì catnii-tè nècuàchìmà nì tavà-ténê iladu nù ñuhù mà, te nì casahnì-ténê.

⁴⁰ 'Pues, vichi ¿ndià nduá icúmí quida stoho itu mà xì medieru mà nú sàni nasaa-né yucán? —nì cachi Jesús.

⁴¹ Dandu nècuàchì iníní, nì cachi-nè xì-yá:

—Ícúmí-nè dandáñuhú dahuun-ne tè-malu mà. Ni-iyuhu mà cùhì ini-nète. Dandu después nanducu gà-nè medieru tùha quida viì, divi nècuàchì tùha nacuàha xi-né quisì vídì tiempu iá-si.

⁴² Dandu nì cachi-yà xì-né:

—¿A táñaha ga cahvi-nsia nù tutu ìì ndé cachá palabra yohó?:

Nì ìa iin cavà, te nì cahíchì ini albañil-ñà, doco vichi sàni sàà mà nì sàcùndua yùù vïcò esquina vehe. Divi Stoho-ndà Señor nduú ana nì quida ducán, te ndulócô-nsì ñà-ndiaha guá nì quida-ya.

(Ducan nacánì nù tutu ìì.)

⁴³ Ñàyùcànduá, yùhù cachí xì-nsiá, mà níhì gà nèhivì ñuu yohó derechu cundoo-ne ñuhivì ìì xí Dios; còó, nèhivì inga ñuu icúmí nihitáhvi xán, te mii-né, ndisa, icúmí-né quida viì-né na iin medieru vaha tùha nacuàha viì xì cosecha.

⁴⁴ Te (cunaha-nsiá, yohó iá gà stná inga ejemplu sàhà cavà mà): nsidaa ana caquihì sahà-xì cavà ma, icúmí-nè nacuehè-nè. Te nsidaa ana nacava mà diquì-xì, tàdì nchìhì-nè quida —nì cachi Jesús.

⁴⁵ Te (cunaha-nsiá, yucán itá stná) dùtù xícusahnú, xì nècuàchì fariseu, te iníní stná-nè ejemplu nì nacani-ya, te nì cundaà ini-nè, divi mii-né cáhàn-yà sàhà-xí.

⁴⁶ Ñàyùcàndùá, nì cuni-nè tnii-neyà, doco yúhî-nè nèhivì cuáhà ndoo yucán, vàchi ndeníhí nècuàchì mà mii-yá ñà-ndùú-yá iin ana cáhàn cuenta xi Dios.

22

Ejemplu sàhà vicò nándàhà

¹ Daaní, nì quesaha Jesús nì nacani tu-ya xì-né inga ejemplu, te dohó nì cachi-yà:

² —Dohó iá ñuhivì ìì xí Dios nacua nì quida iin rey na ní nandàhà dèhe ii-né; nì quida-ne iin vicò cahnú.

³ Te nì techuún-né peón xi-ne ñà-cacanu-u-tè cachitnùhu-tè xì nsidaa nèhivì sàni càna. Doco cóni cùnì nècuàchì mà quixi-ne.

⁴ Ñàyùcàndùá, nì techuún rey mà más gà peón xi-ne cacanu-u-tè cachitnùhu-tè. Te dohó nì cachi-nè xì-té: “Cachì-ndá xì nèhivì càna mà ñà-sà-íá quixi-ne vicò, vàchi sàni cuyucun comida; sàni xihì buey xì nsidaa gà quisi ndatnù. Sà-íá nsidaa ndiatúá-nè”, nì cachi rey mà.

⁵ Doco nèhivì càna mà, cóni quihín casu-nè, nì caquee nsidaa-né cuáhàn-nè nùu chuun xi-ne. Iin-ne cuáhàn-nè nùu itú, inga-nè cuáhàn-nè ndé iá venta xi-ne.

⁶ Te dava ga-nè nì tnii xi peón xi rey mà nì quida quini-ne xì-té, nì sahnì-néte.

⁷ Ñàyùcàndùá na ní inini rey mà, cuáhà gà nì xidà ini-nè, te nì techuún-né soldadu xi-ne nì dàndáñuhú-tè nèhivì mà, te nì sahmi-tè ñuu-nè.

⁸ Dandu nì cachi rey mà xì peón xi-ne: “Sà-íá listu vicò-xí, doco nèhivì nì cachì quixi primeru, cóni nátù-ne ñihitáhvì-né.

⁹ Ñàyùcàndùá, vichi cuahán-ndá ndè ichì nahnú, te quida-ndá invitar nsidanicuú nèhivì ndácùhun stnaha-xi-ndá, te cachì-ndá xì-né ñà-nì quixí-né vicò xí”.

¹⁰ Ñàyùcàndùá, nì caquee peón mà inga xichi nì nacàhin-tè calle ñuu mà nì dànatáca-te nsidanicuú ana nì ndacùhun stnaha-xi-té, vaha-ne ò malu-nè, te ducán nì chitu vehe rey mà nèhivì.

¹¹ Daaní, nì quihvi rey mà ndé iá vicò, te nì xini-nè jaàn iá iin tiàa có-ndixí vícò nacua ndiá ìcà-ndà na ndoo-nda vicò nándàhà.

¹² Ñàyùcàndùá, nì cachi-nè xì nècuàchì mà: “Amigo, ¿índù chuun nì yàha-ní vicò yohó, te có-ndixí-ní sìcoto nacua ndiá ìcà-ní?” Doco nècuàchì mà, mànicùí naxiconihí-né nùu rey mà.

¹³ Dandu nì cachi rey mà xì peón xi-ne: “Chicuhnì-ndá ndahàsàhà nècuàchì jaàn, te dacana-ndánè fuera ndé iín tnúú; (ndahví-nè), vàchi yucán nduú lugar ndé yàha ga cuacu nèhivì, te càna stná nùhu-ne”, nì cachi rey mà.

¹⁴ Pues sàhà (ejemplu yohó vátùni cundaà ini-nsià) ñà-cuáhà nèhivì càna (cundoo nùu Dios), doco sacu-nè cunduu ana nacàxin-ya.

Ñà-ndùá nì cachi Jesús sàhà renta xi ñuu-ndà

¹⁵ Daaní, nì caquee nècuàchì fariseu nì ndatnuhu tnahá-né nansa cui quida-ne, te dadaná-né mii-yá na cáhàn-yà (xì nèhivì).

¹⁶ Ñàyùcàndùá, nì techuún-né itnii nèhivì nchícùn xì-né nùu-yá, te cutnàhà stná iin ùì nècuàchì partidu xi Herodes, te dohó nì cacachi-nè xì-yá:

—Maestro, ináhà-nsí nduu-ní iin nèhivì ndàcuisì inì-xi, te chináhà vii-ní nansa ndisa iá ichì váha Dios. Có-quihín casu-ní nansa cachí nèhivì, te ni có-yúhî stná-ní ni-iin-ne.

¹⁷ Ñàyùcàndùá, cuní-nsì cachì-ní xì-nsí nansa tuxí inì-ní, ¿a vátùni sàha Dios lugar chiyàhvi-nda renta nùu rey cahnú César, á cóó?

¹⁸ Doco Jesús, sàni cundaà ini-yà có-xìcàn tnùhu sahnú ndisa-ne nùu-yá. Ñàyùcàndùá nì cachi-yà xì-né:

—(Ndahví-nsià, vàchi) dananí uun-nsia vaha guá-nsià. ¿Índù chuun cuní-nsià quida-nsia maña nùí?

¹⁹ Dacuní-nsià yùhù iin dihùn xí-nsiá chíyàhvi-nsia sàhà renta, cundehí.

Dandu nì sàha-neyà dihùn plata mà.

²⁰ Te na ní indehè-yáñà, dandu nì cachi-yà:

—¿Ana dìnúù-xí, te ana dìquívi-xí itúú ìcà dihùn yohó?

²¹ —Divi rey cahnú César —nì cachi-nè.

Dandu nì cachi-yà xì-né:

—Nú ducán nduá, dandu nacuaàha-nsia César ñà-nduá icúmí-nsiâ cuàha-nsiàte, te cuàha stná-nsià Dios ñà-nduá ndiá ìcà-nsiá cuàha-nsiayà —nì cachi Jesús.

²² Dandu nèhivì mà, nì ndulocó-nè sàhà palabra jaàn, te nì nacoò-neyà cuàhàn-nè.

Nansa nì cachi Jesús iá nansa natiacu-ndà

²³ Daaní, quivì yucán nì tnàtuu itnii nècuàchì saduceu nùù-yá, nì càhàn-nè xì-yá. Nècuàchì yucán, có-xiníndísâ-né ñà-ìcúmí-ndá natiacu-ndà. Ñàyùcànduá, dohó nì cachi-nè xì-yá:

²⁴ —Maestro, ñà-yòhó nduá nì tiaa Moisés quida-nda: nú sàni xihì iin tiàa, te còò déhe-ne nì ndóo (xì ñahàdihí-nè), dandu icúmí ñani nsìi ma nandàhà-né xì ñahàcuàán nì ndòo ma, áma cóo iin dèhe-ne; dandu quida-nda cuenta na ian dèhe nsìi ma nduú mée mà.

²⁵ 'Pues cunaha-ní, nì sandoo ùsà ñàní ñuu-ndà yohó, te nì nandàhà nècuàchì primeru, doco nì xihì-nè, te còò déhe-ne. Ñàyùcànduá, nì ndòo ñahàdihí-nè nùù ñani-nè nchícùn gà.

²⁶ Daaní, divi ducán nì cuu stná xì nècuàchì ùì, nì xihì stná-nè, te còò stná dèhe-ne, te nì ndòo ñahàdihí-nè nùù inga ñani nchícùn gà; te iin-ni nì quida-ne seguir ducán dècuèndè (nì xihì stná) nècuàchì ùsà.

²⁷ Dandu por último nì xihì stná nècuàchì ñahà.

²⁸ Ñàyùcànduá, na sàà quivì (cachí-nsià) natiacu nsìi, ¿índù tiàa ma nacuaaca xi nècuàchì ñahà mà? vàchi antes nsì-úsà-nè nìsa ìa xi-ñá.

²⁹ Dandu nì cachi Jesús xì-né:

—Còò; có-càchí vìi-nsiá, vàchi có-cùndáa inì-nsia nansa cachí tutu ìì xí Dios, nì có-cùndáa stná inì-nsia ñà-càhnù-guá poder xi-ya.

³⁰ Cunaha-nsiá, na sàà quivì natiacu nèhivì, mà nándàhà gá-nè, vàchi nahi ángel ndoó ansivi (xinúcuáchí) nùù Dios, ducán icúmí nanduu nècuàchì nsìi.

³¹ Pues vichi cuàhìn càhìn xì-nsiá sàhà nansa iá ndisa natiacu nsìi. Ádi sàni cahvi-nsia nansa nì cachi Dios xì-nsiá palabra yohó:

³² “Yùhù nduí Dios cahvi nsì-Abraham, xì nsì-Isaac, xì nsì-Jacob”, cachí-yà. (Ñàyùcànduá, itiácú ìì nècuàchì nsìi ma), vàchi nècuàchì sàni xihì dahuun ndisa, mà cúí cahvi gá-nè Dios; cuisì ana itiácú càhvì xì-yá

³³ —nì cachi Jesús. Te na ní inini nèhivì cuàhà mà ñà-nduá nì cachi-yà, dandu yáha ga nì ndulocó-nè.

Nansa nì cachi Jesús índù ley xi Dios nduú ley chicá ndiaá

³⁴ Dandu nì xinitnùhu nècuàchì fariseu ñà-sàni cundee-yá nùù nècuàchì saduceu, mànicúí nanihì tnùnì ini-nè nansa naxiconihí-né nùù-yá. Ñàyùcànduá nì nataca nècuàchì fariseu mà;

³⁵ te iin-ne nduú nècuàchì ley xi veheñùhu, te nì tnàtuu-ne nùù-yá nì ndàcàtnùhù-né iñàha nùù-yá, a ver nansa naxiconihí-yá. Te dohó nì cachi-nè xì-yá:

³⁶ —Maestro, nùù nsidaa ñà-nduá nì dándàcú Dios nùù ley xi-ya, ¿índù-ñá chicá ndiaá?

³⁷ Dandu nì cachi-yà xì-né:

—Ícúmí-ndá cuu ini-ndà sàhà Stoho-ndà Dios xì nsidanicuú anima-ndà, xì nsidanicuú voluntad xi-nda, xì nsidanicuú stná sàxínítnùnì-ndà.

³⁸ Ñà-jaàn nduá chicá ndiaá dandacú-yá, te chicá chuun cahnú nduú stná.

³⁹ Daaní, nacua cachí ley primeru mà, ducán cachí stná ley ùi nì dandacú-yá, (vàchi dohó cachá): “Nacua cuú ini-ndà sàhà mii-nda, ducán icúmí stná-ndà cuu ini-ndà sàhà ñanìtnaha-nda”.

⁴⁰ Cunaha-nsiá divi ley jaàn nduú yohò nsidanicuú ley xi Moisés xì nsidaa gá stná palabra nì cachi profeta nìsa cahàn cuenta xi-ya.

¿Ana divi nduú yohòtéhé Cristu?

⁴¹ Ndoó ìi nècuàchì fariseu yucán, te nì cachi Jesús xì-né:

⁴² —¿Nansa cachí mii-nsiá sàhà ana nduú Cristu? ¿Índù descendencia nduú-yá (cahan-nsiá)?

Te nì cachi-nè xì-yá:

—Divi David nduú yohòtéhé-yá.

⁴³ Dandu nì cachi-yà xì-né:

—Pues, nú ducán, dandu ¿índù chuun nì cachi David ñà-stoho-nè nduú-yá na ní cahàn-nè sàhà-yá tìxi poder xi Espíritu Ìi xí Dios? Vàchi dohó nì cachi nècuàchì mà nùu tutu ìi:

⁴⁴ Nì cahàn Yua-nda Dios xì Stohì, (divi Cristu), te nì cachi-yà: “Yohó coo-ní ladu cuahí ndè cachi sàà cundeí nùu nsidaa ana xiní ùhì xì-ní, dandu cusahnú fuerte-ní nùu-né”.

⁴⁵ Cundehe-nsiá, nì cachi David ñà-Stoho-nè nduú Cristu, doco nú ducán nduú-yá, dandu ¿índù modo cunduu stná-yà iin descendencia xi-ne? (Doco ñà-ndàà nduá.) —nì cachi Jesús.

⁴⁶ Doco còò ni-iin nèhivì nì nánìhì tnùnì gá ini-nè naxiconihí-né nùu-yá ni-iin palabra. Ñàyùcànduá, quivì nùu-xí cóni sàha ga-nè valor dadavátnáhâ-né xì-yá.

23

Ñà-nduá nì cachi Jesús sàhà nècuàchì fariseu xì sàhà nècuàchì ley xi veheñùhu

¹ Dandu nì cahàn tu-ya xì nèhivì cuahà yucán, xínduu-ne nècuàchì dacuahá-yá, xì stná nècuàchì inínì úún.

² Te dohó nì cachi-yà xì-né:

—Nècuàchì fariseu xi nècuàchì ley xi veheñùhu, iá derechu xi-ne chinaha-nè ley ìi xí Moisés.

³ Ñàyùcànduá, nsidaa ñà-nduá cachí-nè, chivàha-nsiañà. Doco màsà quidá-nsiá nacua quidá mii-né, còò, vàchi diín iñàha chináhà-nè, te diín iñàha quidá-né. Nùu mii-né, mà ùhì cachi-nè xì nèhivì ñà-chivàha-ne cuahà iñàha, doco mii-né, có-chivàha-neà.

⁴ Doco nèhivì, mà cundéé ini-nè chivàha nsihi-ne ñà-nduá cachí nècuàchì mà, vàchi na iin carga vèe nduá nùu-né, te mate ùhì cunsida-neà, doco ndacú nùu-né. Doco nècuàchì ley mà, còò; ni-iyuhu mà ndánihí-néà, ni có-dúcùn ni-iin dìnìndàhá-nèà.

⁵ Cunaha-nsiá, nsidaa ñà-nduá quidá nècuàchì mà, cuisì sàhà-ñá cundehe nèhivì-né nduá. Ndahà-né te tnaa-nè nuhnì itni ndé ñuhú tutu ìi, doco puru itni nahnú cunì-nè cundua (na ian vaha guá-nè). Te divi sàhà ñà-yùcán nduá nsidá naní stná-nè ñà-vico iá nùu sàhà sìcoto xi-ne.

⁶ Te na sàhàn-nè vicò, ò veheñùhu, dandu nandúcú-nè lugar ndé chicá ndiaha cundoo-ne.

⁷ Te cudì stná ini-nè ñà-càsàhú tnùñuhu nèhivì xì-né yàhvi, te cachí nèhivì xì-né maestro.

⁸ Doco mii-nsiá, màsà nándúcú-nsiá ñà-cachi nèhivì xì-nsiá maestro, vàchi imindaa maestru icúmí-nsiá, divi nduú yuhù Cristu, te iin-nì ñanì nduú nsidaa-nsiá.

⁹ Ni màsà cáhì-nsiá “padre” xì ni-iin nèhivì ñuhivì yohó, vàchi imindaa ana nduú yua ndisa-nsia, divi nduú mii-yá iá ansivi.

10 Ni màsà cáchí stnàhá stná-nsiá “jefe”, vâchi imindaa jefe icúmí-nsiâ, divi nduú yùhù Cristu.

11 Te nècuàchì cuní cunduu ana chicá idónuu, divi icúmí cunduu ana xinúcuáchí.

12 Vâchi nsidaa ana datiaá chicá ndiaá, icúmí-nê sàà-nè nducahan-ne. Doco nsidaa ana ndaníhí ndáhvî xì mii-xí, divi nduú ana chicá icúmí nihì xì tñùñuhu.

13 'jNdahví mii-nsiá nècuàchì ley xi veheñùhu! Te jndahví stná mii-nsiá nècuàchì fariseu! Vâchi datiaá uun-nsia vâha-nsia. Cutu estorbu quidá-nsiá nùù nèhivì cuní quìhvi ñuhiví ìì xí Dios: ni có-quìhvi mii-nsiá, te nèhivì cuní quìhvi, sadí-nsiá nùù-né.

14 'jNdahví mii-nsiá nècuàchì ley xi veheñùhu, xì stná mii-nsiá nècuàchì fariseu! Datiaá uun-nsia vâha-nsia. Vâchi túha-nsia (tnii diqui uun-nsia ley, te) xidándiáá-nsiá vehe nècuàchì nì xihì ìì-xí, te después sácuíta-nsia nacuatú cuáhà-nsiá na ian vâha guá-nsiá. Sàháyùcàndùá, iin castigu chicá fuerte icúmí-nsiâ nihì-nsiá.

15 'jNdahví mii-nsiá nècuàchì ley xi veheñùhu, xì stná mii-nsiá nècuàchì fariseu! Vâchi datiaá uun-nsia vâha-nsia. Ndè inicutu ñuhiví nácàhin-nsia, te yâha stná-nsiá mar nducu-nsiá ana dayâha-nsia nùù religiòn xi-nsia. Te nú sàni yâha-ne, dandu sàhà (ley) xi-nsia sàà stná-nè nanduu-ne ana malu, ndè ùì tantu gà más malu nanduu-ne nùù mii-nsiá, te sàhájàn chicá yàchì sàà-nè andea.

16 'jNdahví-nsiâ! vâchi mate nahi nècuàchì cuaá nduú-nsiá, doco cuní-nsiá dacúndéhe-nsiá nèhivì índù iá ichì. Vâchi cachí-nsiâ xì-né ñà-màdì obligaciòn nduá nú ni caquín-ndà compromisu, te chináhá-ndá veheñùhu. Doco ñà-nduú compromisu ndisa nduú ñà-chinaha-nda oro iá veheñùhu, cachí-nsiâ.

17 (jNdahví-nsiâ!) ¿Índù chuun có-sâà-nsiâ cundaà ini-nsiâ, te quidámáxini-nsiâ? ¿A có-ínáhá-nsiâ ñà-chicá ndiaá veheñùhu nùù oro mà? vâchi cuisì sàhà-ñá iá ini veheñùhu, ñàyùcàndùá nduá oro ìì.

18 Daaní, cachí stná-nsiâ ñà-màdì obligaciòn ndisa nduá nú ni caquín-ndà iin compromisu, te chináhá-ndá mesa ìì xí Dios. Doco ñà-nduú compromisu ndisa nduú ñà-chinaha-nda promesa iá nùù mesa mà, cachí-nsiâ.

19 Pues ¿índù chuun có-sâà-nsiâ cundaà ini-nsia, te quidámáxini guâ-nsia? ¿A có-ínáhá-nsiâ chicá ndiaá mesa ìì mà nùù nsidaa promesa? Vâchi divi sàhà mesa-mà níhì stná promesa mà ndu-iiá.

20 Ñàyùcàndùá, nsidaa nècuàchì saquín compromisu, te chináhá-nê mesa ìì, pues davani queámà na ian chináhá stná-nè promesa iá nùù mesa mà.

21 Daaní, stná iin nècuàchì saquín compromisu, te chináhá-nê veheñùhu, pues iin-ni nduú stná na ian chináhá stná-nè mii-yá iá ini veheñùhu ma.

22 Te nècuàchì saquín compromisu, te chináhá-nê ansivi, davani queé stná mà na ian chináhá stná-nè silla ìì xí Dios, xì stná mii-yá iá nùù silla mà.

23 'jNdahví mii-nsiá nècuàchì ley xi veheñùhu, xì stná mii-nsiá nècuàchì fariseu! Vâchi datiaá uun-nsia vâha-nsia, mate túha-nsia cuàha-nsia diezmu xi (yùcù cuatilúhá nahi) ndua ndòò, xì anís, xì cominu. Doco ñà-nduú ley ìì chicá ndiaá, ni có-quìhín casu-nsiâñà, mate nacániamà sàhà nansa cunihnu ndàcuisì ini-ndà, te cundehè ndàhví stnahá stná-ndà, xì stná ñà-cunihnu vâha ini-ndà mii-yá. Pues ñà-jaàn ndisa ndiá ìcà-nsiá quida-nsia cumplir, te ni có-xiñùhù naco stná-nsiâ diezmu mà.

24 Doco nahi nècuàchì cuaá cuní dacúndéhe xi inga nèhivì índù iá ichì, ducán nduú-nsiá. Mate daxixin-nsia nsidaa ndutè xihí-nsiá sàhà-ñá màsà cócó-nsiâ ni-iin quisì tìì, doco iin chuun ndiaá ndisa, ni có-ndùlócô-nsiâ sàhá mà. Ñàyùcàndùá, ducán queámà na ian sàni coco-nsiá (iin quisì cahnú) na iin camellu.

25 'jNdahví mii-nsiá nècuàchì ley xi veheñùhu, xì stná mii-nsiá nècuàchì fariseu! Pues nàhà xicà datiaá uun-nsia vâha-nsia, vâchi dohó iá estilu xi-nsia na ian nacaté-ndá iin pocillu, ò iin còhò, te cuisì yàtà-ñá nacaté-ndá, doco (inià, quini iá). Te divi ducán iá stná) anima-nsiâ, chitu stná cuàchi ñà-xího-nsiâ cuáhà iñàha, te quidá ndévâha-nsia.

²⁶ ¡Ndahví mii-nsiá nècuàchì fariseu! Cutu quidámáxìní-nsiá. Vàchi (nú icúmí-ndá) iin pocillu ò iin cóhò, amádi primeru inià ndundoo, dandu vètuni coo ndoo (inià xì) stná yàtà-ñá. (Pues ducání xiñuhu ndoo stná anima-nsiá.)

²⁷ ¡Ndahví mii-nsiá nècuàchì ley xi veheñuhu, xì stná mii-nsiá nècuàchì fariseu! Vàchi datiaá uun-nsia vaha-nsia, doco còó. Nahi monumentu (ndé índuxin nsii), ducán nduú-nsiá; vachi cuaha-ni íamá nú sàni ndanuu cuxán, doco inì-xi ñuhú chitu íquì nsii xì cuàhà ñà-siquini.

²⁸ Ducán íá stná mii-nsiá, indéhe nèhivì mii-nsiá na ian nèhivì vaha nduú-nsiá, doco danani uun-nsia, vachi anima-nsiá, chituá ñà-có-ndiáá.

²⁹ ¡Ndahví mii-nsiá nècuàchì ley xi veheñuhu, xì stná mii-nsiá nècuàchì fariseu! vachi datiaá uun-nsia vaha-nsia. Pues mii-nsiá nduú ana quidávaha monumentu nùu ñaña xì nècuàchì profeta nìsa cahàn cuenta xi Dios sàhana, te nsidácútú stná-nsiá lugar ndé xì-índuxin nsii nì sanduu nèhivì vaha.

³⁰ Dandu cachí-nsiá: “Nú nì cúndóó nsiihù tiempu sàhana ni cuí, dandu mà cáhni-nsii nèhivì cáhàn cuenta xi Dios nacua nì quida xii-ndà”.

³¹ Pues cunaha-nsiá, sàhà palabra jaàn claru cachí-nsiá ñà-mii-nsiá nduú-nsiá meru descendencia xi nècuàchì nì casahnì xì nèhivì xí-yá sàhana.

³² Ñàyùcànduá, nú yohòtéhè-nsiá nduú nècuàchì mà, dandu mà úhì quida stná-nsiá divi nacua nì quida mii-né.

³³ ¡Mii-nsiá, nahi anima còò nduú anima-nsiá, nacua xii-nsiá sàhana ma, te ducán stná mii-nsiá vichi! Còò ni-iyuhu modo nansa càcu-nsia nùu andea, vachi icúmí-nsiá ndoho-nsia.

³⁴ Sàháyùcànduá, icúmí techuín nèhivì cáhàn xì-nsiá, divi nècuàchì profeta, xì stná nècuàchì nchichí, xì cuàhà stná maestru. Doco ináhí mii-nsiá, ñà-icúmí-nsiá quida quini-nsia xì-né. Dava-ne cahni-nsiá; te dava-ne chituu-nsia nchìca cruz, te dava ga-nè cahni cuí-nsiá ini veheñuhu xi-nsia, te dava ga-nè taxi-nsiá ñuu te ñuu.

³⁵ Ñàyùcànduá, fuerza icúmí mii-nsiá nacuida-nsia cuàchi sàhà nsidanicuú nècuàchì vaha sàni sahnì nèhivì ñuhivì yohó. Dihna Abel nì xihì nùu nsidaa gá nècuàchì vaha, dandu iin-ni vaxi-nda duha dècuèndè nì xihì stná dèhe Berequías nani Zacarías, vachi divi (nèhivì nihnú inì-xi nahi) mii-nsiá nì sahnì xì nècuàchì mà na iín-né mahì veheñuhu cahnú xì mesa ì ndé sahmí-né ñà-cámànì-ndà Dios.

³⁶ Ñàyùcànduá, yùhù cachí xì nsidaa mii-nsiá nèhivì tiempu vichi, fuerza icúmí-nsiá cunsida-nsia cuàchi sàhà nsidanicuú nsii ma.

Nansa nì sacu Jesús sàhà nèhivì ñuu Jerusalén

³⁷ ¡Ndahví mii-nsiá nècuàchì ñuu Jerusalén! vachi tùha-nsia cahni-nsiá nècuàchì cáhàn cuenta xi Dios, vachi na techúún-yàné sàà-nè nùu-nsiá, dandu caníyúú-nsiá nè ñà-cui-nè. Na cuahà guá xichi nì cunì danátáquì mii-nsiá nùu, na ian danátáca sùn pílu xi-sì ñà-nàcùñuhu quisi mà tixi ndìxìn-sì; doco còó, cónì cùnì-nsiá.

³⁸ Ñàyùcànduá, icúmí lugar xi-nsia yohó ndòo nihnia.

³⁹ Te cachí stnáì xì-nsiá, mà cùnì gá-nsiá yùhù ndè cachi sàà quivì cachi-nsiá xì: “Ndiaha gá mii-ní, vachi divi ana vaxi cuenta xi Stoho-ndà Señor nduu-ní”.

24

Ñà-nduá nì cachitnùhu Jesús icúmí cuu xi veheñuhu cahnú nìsa ìa ñuu Jerusalén tiempu yucán

¹ Daaní, nì quee Jesús veheñuhu cahnu-ma cuàhàn-yá. Te nì catnàtuu nècuàchì dacuahá-yá nùu-yá, cunì-nè dacunì-nèyà nansa ndáa vehe nahnú ndoo yatni yucán.

² Doco nì cachi-yá xì-né:

—¿A xini-nsiá nsidaa vehe yohó? Yùhù cachí xì-nsiá, vaxi iin quivì, dandu mà códotnahá gá ni-iin yùu yohó. Vachi icúmí caà nsihá quida nèhivì.

Ñà-nduá icúmí cuu ñà-cundaà ini-ndà sà-ítúú xìnu tiempu yohó

³ Daaní, cuàhàn cuaán-yá xì-né ndè yucù Olivo, te nì catnàtuu nècuàchì dacuahá-yá, cachí-nè xì-yá:

—Cachí-ní xì-nsí ¿índù quivì cuu nsidaa ñà-nì cachí-ní jaàn? ¿Índù milagru coo ñà-cundaà ini-nsì ñà-sà-ítúú naxicocuîin-ní, te xìnu tiempu yohó?

⁴ Dandu nì cachi-yà xì-né:

—Cuidadu cundoo-nsia ñà-màsà dándáhvì ni-iin nèhivì mii-nsiá.

⁵ Vàchi cuàhà ana icúmí quixi dananí uun-tè nduú-te yùhù, te cachi iin iin-tè xì nèhivì ñà-Cristu nduú-te. Te sàhájàn cuàhà nèhivì nihì-té dandahví-te.

⁶ Daaní, icúmí cunitnùhu stná-nsià iá cuàhà guerra yohó te yucán. Doco màsà yúhì-nsià, vachi fuerza icúmí coo ducán. Doco tañáha ga sàà xìnu tiempu yohó cundua: iá gà ñà-vàxi cuu.

⁷ Vachi ñuu xì ñuu icúmíà nàá stnahá. Te cuàhà rey icúmí-tê dandacú-te ñà-coo guerra xì inga ñuu. Te icúmí coo stná tnama, te caca cuàhà stná cuèhè dana. Te yohó te yucán ñuhivì icúmí tnaa stná.

⁸ Doco ñà-jaàn làcà cuàhàn quesaha tnùndoho nduá.

⁹ 'Daaní, tiempu yucán icúmí nèhivì tnii-ne mii-nsiá, te quida quini-ne xì-nsiá. Te dava-nsia icúmí-nè cahni-né. Vachi sàhà yùhù icúmí nsidaa nèhivì cuni ùhì-nè mii-nsiá.

¹⁰ Te cuàhà-né cuàhàn stná-nè nacuaà-né Dios. Ni mà cuíñúhú gà stná-nè ñanìtnaha-ne; mà úhì cahin-nè ñanìtnaha-ne nùù tè-xídandacú.

¹¹ Daaní, icúmí ndecoyo cuàhà stná tètñuhù. Cuenta xi Dios cáhàn-te, cachì-te, te mà úhì nihì-té dandahví-te cuàhà nèhivì.

¹² Te ñà-cuàhà guá cuàchi icúmí coo ñuhivì, ñàyùcànduá mà cúú stnahá gà ini nèhivì sàhà-né.

¹³ Doco nèhivì iin-ni cunihnu vaha inì-xi dècuèndè xìnu tiempu, icúmí-nè càcu-ne.

¹⁴ Te tiempu ma icúmí cuitài stná razón ndiaha sàhà ñuhivì ì xì Dios; inicutu ñuhivì icúmíà cuitài, te cunitnùhu nèhivì ndoó nsidaa ñuu. Dandísá, ñà-sàni sàà quivì xìnu tiempu yohó cundua.

¹⁵ 'Sànaha nì cachitnùhu Daniel iin palabra xi Dios sàhà nansa icúmí coo iin figura dana có-xiñùhù dahuun-ya. Cunaha-nsiá, quivì cuni-nsià sàni sàcuìn figura mà ini lugar chicá ì, (dandu seña cundua). Te vichi xiñuhu cundaà ini nsidaa ana cáhvi-xì tutu yohó.

¹⁶ Te na sàà quivì yucán, dandu ni cunúdhé nsidaa nèhivì ndoó ladu Judea yohó, te cùhùn-nè yucù.

¹⁷ Te nú ndoó nèhivì quetátú dìnìvèhé-xi, dandu yàchì ni nuú-né, te cunudèhé stná-nè; doco màsà (nànsìhvi-ne) vehe nsiquihin-ne ñà-nduá icúmí-nè. Còó.

¹⁸ Te nú ndoó-né nùù ítú, dandu màsà nándúcú-nè ni cotón-nè.

¹⁹ Te ñndahví stná nècuàchì ñahà cuhí cuàhàn tùinuù mèe-xì quivì yucán! Te ñndahví stná nècuàchì icúmí xì mèe chichi!

²⁰ Te càcàn tàhvì stná-nsià nùù Dios ñà-màsà cúvixin tiempu cunudèhé-nsià mà, te màsà cùndúú stná iin quivì descansu.

²¹ Vachi quivì yucán yáha ga icúmí nèhivì ndoho-ne. Còò gà tnùndoho chicá cahnú ni ía ndè quivì nì cuyucun ñuhivì xì ndé` quivì coamà; te ni quivì después, mà sàà coo ga tnùndoho ndudava xi ñà-jaàn.

²² Te nú màsà cùndéhe ndahví Dios, te dacúxíó yàchì-yà tnùndoho ma, dandu ndutu nsihí nèhivì ñuhivì nì cùí. Doco sàhà nèhivì xì-yá sàni nacàxin-ya, ñàyùcànduá chicá yàchì icúmí-yà dacúxíó-yà tnùndoho ma.

²³ 'Quivì yucán màsà cúníndísâ-nsiá yuhù nèhivì cachí xì-nsiá: “Cundehè-nsiá, yohó iá ana nduú Cristu”, te ò nú cachí-nè: “Cundehè-nsiá, yucán iá-yà”.

²⁴ Vachi icúmí quixi cuàhà tètñuhù, te iin iin-tè cachì-te ñà-divi Cristu nduú-te. Te tiempu-mà quixi stná cuàhà ana dananí uun cáhàn cuenta xi Dios. Ndè quida stná-te

cuàhà milagru fuerte ñà-ndulocó nèhivì, áma níhì-te dandahví-te nèhivì nì nacàxin-ya cahan-té; doco mà cúí.

²⁵ Cunaha-nsiá, sàni cachitnùhi xì-nsiá nsidaa ñà-nduá icúmí cuu.

²⁶ Ñàyùcànduá, nú cachí nèhivì xì-nsiá: “Yucán iá-yà yucù”, màsà cùhùn-nsià yucán. Te ò nú ni cachí stnâ-nè: “Ini vehe yohó iá-yà”, màsà cúníndísâ-nsiá.

²⁷ Vàchi na ian tása, te xínì nèhivì natnúù fuerte ndè iin ladu ansivi xi ndé inga laduá, ducán icúmí (natùì vate) stná yùhù ana nduú Tnaha Nèhivì Ñuhiví quivì naxicocuïn.

²⁸ (Doco nèhivì malu, ducán icúmí cuu xi-né nahi dichu cachí:) “Ndé indúhu ñà-nduá nì xihì, yucán icúmí nataca stná longo”.

Nansa icúmí coo quivì naxicocuïn Jesús

²⁹ 'Nú sàni yàha tiempu tnùndoho ma, dandu mà cúnchí gá ni orá ni yoo. Te sìnsiví itándiaa ansivi, icúmí-sí còyo nihni-sì nùù ñuhiví. Te sìtnúù nahnú, icúmí stnâ-si ndacùchí ndee-sí.

³⁰ Dandu después icúmí natùì seña ansivi (ñà-cundaà ini-nsià sà-ìá naxicocuïn) yùhù ana nduú Tnaha Nèhivì Ñuhiví. Dandu nèhivì nsidaa ñuu, icúmí-nè cuacu-ne na cundehè-né mànuì mahì vïcò xì poder cahnú xí, te ndiaha gá coo inicutu ndé mànuì.

³¹ Dandu icúmí sivi stná corneta, te techuín ángel xì cùhùn-nè inicutu ñuhiví ñà-danátácá-nè ana nduú nèhivì sàni nacàxin, mate lugar chicá xica ñuhiví ni cúndóó-né.

³² 'Vichi cuàhìn nacani iin ejemplu sàhà nù-higu sàhà-ñá cundaà ini-nsià. Nú sàni ndunsidi-nú, te nì quesaha naná ditù yuté-nu, dandu ñà-yùcàn cùndàà ini-ndà sà-ìtúú tiempu ihni.

³³ Te divi ducánì stná xì ñà-nduá icúmí cuu; quivì cuni-nsià cuú ñà-nduá sàni cachì xì-nsiá, dandu vátùni cundaà stná inì-nsia ñà-sà-ìtúú tiempu naxicocuïn nduá; sà-ìtúú nihni.

³⁴ Cunaha-nsiá, mà sàà cui nsihi nèhivì itiácú vichi dècuèndè cachi sàni cuu ndisa nsidaa ñà-nduá sàni cachì xì-nsiá.

³⁵ Cunaha-nsiá, icúmí sàà ansivi xi ñuhiví ndañuhá, doco palabra nì cachi yùhù, còò, mà nunca sàà ndañuhá.

³⁶⁻³⁷ 'Doco ni quivì, te ni hora naxicocuïn, ni-iin nèhivì có-ìnáhá-nè. Ni ángel ndoó ansivi, có-ìnáhá stnâ-nè; ni yùhù ana nduú Dèhemanì Dios, có-ìnáhá stnâì, cuisì Yuamánì Dios ináhá. Vàchi nacua nì cuu tiempu xi Noé, ducán icúmí cuu stná na sàà meru quivì naxicocuïn yùhù ana nduú Tnaha Nèhivì Ñuhiví.

³⁸ Vàchi na táñaha ga cuun dàvì dàhvi ñuhiví, dandu (ndoó cuéyàà nèhivì ñuhiví), xixí-né, xihí-né, nándàhà-né; te ducán nìsa quida-ne dècuèndè nì sàà quivì nì quìhvi Noé ini barcu cahnú.

³⁹ Te ni cóni sàà mànihì tnùnì ini nèhivì mà dècuèndè nì quixi dàvì, te nì càhà nsihi-ne. Te divi ducán icúmí coo stná tiempu naxicocuïn yùhù.

⁴⁰ Ndé ndoó ùì nèhivì nùù ìtú, icúmí iin-ne cuxio-ne, te iin-ne ndòò.

⁴¹ Te ndé ndoó ùì nècuàchì ñahà cutnàhá nchicó, iin-ne cuxio, te inga-nè ndòò.

⁴² 'Ñàyùcànduá, cundoo tùha-nsia, vàchi có-ìnáhá-nsiâ índù quivì icúmí naxicocuïn yùhù ana nduú Stoho-nsià Señor.

⁴³ Doco nsinuu inì-nsia nansa quidá iin stoho vehe: nú sàni xinitnùhu-ne índù hora quixi tècuìhnà ñuú, dandu cundiatu tùha-ne; mà cuáha-ne quìhvi-tè nì cúí.

⁴⁴ Ñàyùcànduá, stná mii-nsiá, nicanicuahàn cundoo tùha-nsia, vàchi iin quivì có-nìhnú ini-nsià, divi quivì jaàn icúmí naxicocuïn.

Ejemplu sàhà peón xíndiaa xì vehe lamú cuàhàn xicà

⁴⁵ '¿Ana tuxí inì-nsia nduú nahi peón nùù ejemplu yohó? Nì ìa iin peón tùha quida vù; nicanicuahàn quidá sahnú-te. Ñàyùcànduá, nì nihì-té chuun nùù lamú xi-tè ñà-dandacú-te nùù peón dava ga, te dasàn stná-te ñà-cutiacu nsidaa gá peón mà quivì xiñuhá. Dandu cuàhàn xicà lamú mà.

46 Pues nansicáhán peón dandacu-ma nú iin-ni ni quidá víi-té dècuèndè nsiaa lamú xi-tè.

47 Vàchi cunaha-nsiá, icúmí nècuàchì mà cuàha-nète chuun chicá ndiaá ñà-dandacú-te sàhà nsidanicuú ñà-cuicà-né.

48 Doco nú peón malu nduú-te, dandu quesaha-té nacání chicuéhè inì-te, te cachì-te: “Còó, cucueè-va lamú xi, dandu nsiaa-nè”.

49 Dandu quesaha-té cahni cuí-te peón dava ga mà, te cuisì-ní ñà-cuxi-tè, coho-tè, xini-tè cuni-te.

50 Pues nú ducán ni quidá-te, dandu iin quivì có-nìhnú inì-te nsiaa lamú.

51 Dandu nihì-té iin castigu cahnú sàstnùhù, te sàhámà cuacu ndee-té, te càna fuerte nùhu-tè, vàchi ducán icúmí ndoho nsidaa nèhivì dananí úún vàha inì-xi.

25

Ejemplu sàhà ùxìn ñahà cuàchì nduú nahi madrina

1’Ducán iá ley xi ñuhivì ì xí Dios na ian nì cuu xi ùxìn ñahà cuàchì cuàhàn ndé cundiatuà quesaa noviu (xì novia), te iin iàn nihá lámpara xi-ñà.

2-4 Ùhùn-ña, listu-ña, nihí-ña sìquì ndutè xixìn cuàhàn xì lámpara. Doco inga ùhùn-ña, cóni nácání inà, ñàyùcàndùá còò ndúte xixìn nìsá nihí-ña cùhùn.

5 Daaní, sàhà-ñá nì cuee guá ana nándàhà, ñàyùcàndùá nì tnii vàhná nsì-ùxìn-ña nì quidà.

6 Te nahi dava ñuu, dandu nì tiacu ndáhì iin nèhivì, cachì-nè: “¡Cunaha-nsiá, sàmàndixi noviu! ¡Naha-nsià casàhú-nsià xì-né!”

7 Ñàyùcàndùá, nì ndacuìta nsidaa ñahà cuàchì mà nì nacucùn-ñá lámpara xi-ñà.

8 Dandu ñahà cuàchì mà-túha nacani inì-xi, nì cachà xi ñahà cuàchì listu mà: “Taxi toó sacu-nsià chii ndutè xixìn xi-nsia nùù-nsí, vàchi meru cuàhàn ndàhvà lámpara xi-nsí”.

9 Doco nì cachi compañeru-ña ma: “Còó, vàchi vihini mà sàà-té sàhà nsidaa-nda; chicá vàha cuahán-nsià cuiin-nsiàte ndé cùyàhvi-tè, dandu cucumi-nsiàte”.

10 (Ñàyùcàndùá, cuàhàn-ña cuiin-ñà.) Te na sàni yàha-ñà cuàhàn-ña, dandu nì nsiaa noviu, te nì cayàha nècuàchì ndiatu-ma ndé iá vicò, te nì nandiadi yehè.

11 Daaní, después nì nsiaa tu ùhùn ñahà cuàchì nì sàhàn mà, te nì càhàn-ña yehè, cachì-ña: “¡Señor! ¡Señor! ¡Nacuna sacù-ní yehè!”

12 Doco nì naxiconihí nècuàchì nduú noviu mà, cachì-nè: “Yùhù, de plano, có-ínahí ana nduú-nsiá”.

13 (Ducán nì cuu xi ñahà cuàchì mà. Ñàyùcàndùá cachì stnái xì mii-nsiá:) nì cúnìhnú vàha ini-nsià, vàchi có-ínahá-nsià índù quivì, te ni índù hora naxicocuín yùhù ana nduú Tnaha Nèhivì Ñuhivì.

Ejemplu sàhà lamú nì dasàn tòó xì dihùn nùù peón-xi, áma nihì-té nsida cuahà-téá

14’Ducán iá stná ley xi ñuhivì ì xí Dios nacua nì quida iin lamú na cuàhàn-nè quee-ne cùhùn-nè inga ñuu; nì cana-ne nsidaa peón xi-ne, te nì dasàn tòó-né ñà-cuicà-né nùù-tè.

15 Iin-tè nì nihì ùhùn mil dihùn plata; ingà-te nì nihì ù mil, te inga stná-te nì nihì iin mil-ni, según nansa tiacu ini iin iin-tè, ducán nì nihì-té. Dandu nì quihin lamú mà ichì cuàhàn-nè.

16’Daaní, peón nì nihì ùhùn mil mà, nì quesaha-té nì quida-tè negociu xì dihùn mà, te nì nihì-té nì nandua inga ùhùn mil.

17 Te ducán nì quida stná peón nì nihì ù mil, nì sàà nì nàcùnduu stná inga ù mil.

18 Doco tè-nì nihì iin mil-ni, nì sate-tè tixi ñuhù, te nì sùxin-téá.

19 Daaní, na sàni yàha caní tiempo, dandu nì nsiaa lamú mà, te nì natnii-ne cuenta ñà-cundaà ini-nè nansa nì quida iin iin peón xi-ne.

20 Te nì tnàtuu peón nì nìhì ùhùn mil, nì nacuàha-tènéà xì stná inga ùhùn mil, te nì cachì-te: “Señor, ùhùn mil nì nacoó-ní nùí, te vichi yohó iá gà stná inga ùhùn mil nì quide ganar”.

21 Ñàyùcàndùá, nì cachi lamú mà xì peón mà: “Vàtùni nì quida-ní. Peón vàha nduu-ní. Sàni quida viì-ní mate chuun cuatilúhá nì sandua. Ñàyùcàndùá, icúmî cuàhi mii-ní ñà-dandacu-ní nùù cuàhà chuun nahnú. Yàha-ní yohó, cundoo-nda cudì ini-ndà”.

22 'Daaní, nì tnàtuu peón nì nìhì ùì mil, te nì nacuàha-tènéà xì stná inga ùì mil, te nì cachì-te: “Señor, ùì mil nì nacoó-ní nùí, doco cunaha-ní, yohó iá gà stná inga ùì mil nì quide ganar”.

23 Dandu nì cachi lamú mà: “Vàtùni nì quida stná mii-ní. Peón vàha nduú stná-ní. Sàni quida viì-ní mate chuun cuatilúhá nì sandua. Ñàyùcàndùá, icúmî cuàhi mii-ní ñà-dandacu-ní nùù cuàhà chuun nahnú. Yàha-ní yohó, cundoo-nda cudì ini-ndà”.

24 'Dandu nì tnàtuu stná peón nì nìhì iin mil-ni ma, te nì cachì-te xi lamú mà: “Yùhù ináhí mii-ní ñà-dana gà-ní; mà úhì quihin-ní cosecha ndé có-xitù-ní, te mà úhì quindiaà-ní iñàha mate cóni quidà-níà.

25 Ñàyùcàndùá, nì yùhî, te nì sùxin dìhùn xí-ní tìxi ñuhù. Yohó iá; naquihin-níà”.

26 Dandu nì cachi lamú mà xi-té: “¡Peón malu nduu-yó! ¡Dusan-yó! Nú sà-ináhú ñà-quindiaì cosecha ndé có-xitúí, te xidándiaì iñàha ndé cò-quidáchúín,

27 pues, nú ducán, dandu ndiá ìcò cuàhu nècuàchì bancu dìhùn xí, dandu quivì nsiaì vàtùni nìhì stnáì diquá nì cùí”, nì cachi lamú mà.

28 Dandu (nì càhàn stná-nè) xì peón itá yucán, cachì-nè: “Quindiaa-nsia mil dìhùn jaàn nùù tè-yòhó, te cuàha-nsia nècuàchì sà-icúmí ùxin mil.

29 Vàchi nècuàchì sà-icúmí algu vichi, icúmí-nè nìhì gà-nè más, dandu vihi gá cucumi-né; doco ana có-icúmí vichi, icúmí cuxio nsihi nsidaa iyuhu gá ñà-icúmí-nè.

30 Cunaha-nsiá, còò chuun peón yohó. Ñàyùcàndùá, dandiachi-nsiáte fuera ndé iín tnúú ndúchí, te yucán icúmí-tè cuacu ndee-té, te càna fuerte stná nùhu-tè”.

Nansa coo juiciu xi nsidaa ñuu ñuhiví

31 'Ndiaha gá coo quivì naxicocuín yùhù ana nduú Tnaha Nèhiví Ñuhiví. Quivì naxicocuín icúmî cutnahá stnáì xì nsidaa ángel ìì xí quixi. Dandu nàcòì nùù silla ndiaha xí (ndé cùsáhnúí),

32 te (canì) nèhivì nsidanicuú ñuu ñà-nataca-nè nùí. Dandu icúmî tavà cuàin nèhivì (vàha nùù nèhivì malu) na quidá pastor na nácàxin-ne quisì xí-né, ìladu ndoó rìì, te inga ladu ndoó sìmbèe.

33 Ladu cuahí icúmí màcuìta (nèhivì vàha na ian nduú-né) rìì, te ladu ìtní icúmí màcuìta (nèhivì malu na ian nduú-né) sìmbèe.

34 Dandu (yùhù) ana cusáhnú, icúmî cachì xì nèhivì ladu cuahí: “Naha-nsiá, cundoo-nsia ñuhiví ìì xí Yuamánì, vàchi dècuèndè tiempu nì cuyucun ñuhiví sàni chitnùnì ini-yà cundiatú anima-nsiá ducán.

35 Vàchi na ní xihì güé` doco, nì dàcùxí-nsiá yùhù; te na ní xihì stnáì tècuíí, nì dàcútàhvì-nsiá yùhù chii-té. Daaní, na ní xicanuu ndahví stnáì, dandu nì dàyáha-nsia yùhù vehe-nsia.

36 Còò dúhnúí, doco nì taxi-nsia ñà-nì sàcùndixi. Nì cuhi stnáì, te nì nàcòtò-nsiá yùhù. Te na ní sandiadì vehecàa, nì sàà stná-nsiá visita yucán”.

37 Dandu nsidaa nèhivì vàha yucán, icúmí-nè cachì-nè xì: “Stoho-nsì Señor, (cónì cùndáà ini-nsì nì chindee-nsí mii-ní ducán). ¿Índù nì xini-nsì mii-ní ñà-xihì-ní doco, te nì dàcùxí-nsí mii-ní, te ò xihì-ní tècuíí, te nì taxi-nsì tècuíí nì xihì-ní?

38 ¿Índù nì xini-nsì xicánúú ndahví-ní, te nì dàyáha-nsi mii-ní vehe? Ni-iin xichi cóni xini-nsì ñà-còò dúhnù-ní, te nì sàha-nsi mii-ní ñà-nì sàcùndixi-ní.

39 Ni có-ináhá stná-nsì nì cuhì-ní, ò ní sandiadì-ní, te nì sàà-nsì visita ndé iá-ní”.

⁴⁰ Dandu yùhù ana cusáhnû, icúmî cachì xì nècuàchìmà: “Cunaha-nsiá, nahi ñani xínduu nèhivì itá yohó. Ñàyùcàndùá na cada nì quida-nsia favor sàhà iin-ne, mate nduú-né iin ana chicá cahíchi ini nèhivì, doco davani queámà na ian nì quida stná-nsià favor xì yùhù”.

⁴¹ Daaní icúmî càhàn stnâi xì nèhivì itá ladu itnî, te cachì xì-né: “¡Cuxio-nsia nùí! Còò cá nansa càcu-nsia. Cuahán-nsià ndé iá ñuhu xíxìn nicanicuahàn, divi lugar nì quidayucun Dios ñà-coo ñà-malu xì nsidaa ángel (malu) xi-sì.

⁴² Vâchi yùhù, na ní xihì doco, nì xidahan-nsiá ñà-cuxi. Nì xihì stnâi tècuí, te ni-iyuhu-té cóni sáha-nsia yùhù cohi.

⁴³ Xicánúú ndahví stnâi, doco cóni dàyáha-nsia yùhù vehe-nsia; còò dúhnúí, doco còò ni-iin sìcoto nì sáha-nsia yùhù. Nì cuhi vâhi, te nì sandiadi stnâi, doco cóni sàà-nsià nàcòtò-nsia yùhù”.

⁴⁴ Dandu nèhivì mà, icúmî-nê cachi-nè xì: “Señor, mà nunca nì xíní-nsì mii-ní na xihì-ní doco, ò xihì-ní tècuí, ò xicánúú ndahví-ní, ò còò sìcoto vâha xi-ní, ò cùhí-ní, ò ndiàdí-ní. ¿Índù nì xini-ní nsiùhù nì xidahan-nsí nsidaámà nùù-ní?”

⁴⁵ Dandu yùhù, icúmî cachì xì-né: “Cunaha-nsiá, ñà-cóni chíndéé-nsiâ nèhivì ndahví yohó, ñàyùcàndùá davani queámà na ian sàni cahíchi stná inì-nsia yùhù”. (Ñà-jaàn nduá icúmî cachì xì nècuàchì malu mà.)

⁴⁶ Ñàyùcàndùá icúmî nsidaa-né yàha-ne ndé ndoho-ne nicanicuahàn. Doco nèhivì vâha, còò. Vida ndiaha nicanicuahàn icúmî-nê nìhítáhvì-né —nì cachi Jesús.

26

Nansa nì ndatnuhu tnahá nèhivì, nandúcu-nê nansa tnii-ne Jesús

¹ Daaní, nì nsihi nì nacani Jesús nsidaa ñà-jaàn xì nècuàchì dacuahá-yá, dandu nì cachi-yà xì-né:

² —Sà-ínahá-nsiâ ñà-tixi ùi quivì icúmî nacava vicò pascua, dandu yùhù ana nduú Tnahá Nèhivì Ñuhivì, icúmî yâhi ndahà nèhivì, te cahni-né yùhù nchìca cruz.

³ Daaní, nì nataca dùtù xícusahnú, xì nècuàchì ley xi veheñùhu, xì stná nècuàchì sahnú dandacú ñuu yucán, nì sàà nsidaa-né patiu vehe cahnú dùtù chicá cusáhnû nani Caifás.

⁴ Te nì ndatnuhu tnahá-né nansa tnii dèhé-nè Jesús, te cahni-néyà.

⁵ Te nì cachi stná-nè:

—Chicá vâha màdì mahì vicò tnii-nda nècuàchìmà, vâchi nú ducán, dandu vihini nacuidà nèhivì.

Nansa nì sòdò iin nècuàchì ñahà ndutè tnàmì itnu dìni Jesús

⁶ Iá-yà vehe iin nècuàchì ñuu Betania nani Simón. Nècuàchìmà nduú iin nèhivì nì sandoho cuèhè lepra antes.

⁷ Te yucán nì sàà stná iin nècuàchì ñahà, nihí-né iin quidi iá dùcùn-xí. Yùù nì cuyucàn, te ñuhú ndutè tnàmì ndiaá sàstnùhù. Te divi ndutè mà nì sòdò-nè itnu dìni Jesús na iá-yà xixí-yá.

⁸ Doco na ní xini nècuàchì dacuahá-yá, nì cuduchi ini-nè, cachí-nè (iin-ne xì inga-nè):

—¿Índù chuun nì sate uun-ne ndutè jaàn?

⁹ Chicá vâha dicò-néte ni cuí, dandu tùi cuàhà dìhùn dasàn-ndà nùù nècuàchì ndahví.

¹⁰ Doco Jesús, inahá-yâ nansa cachí-nè, ñàyùcàndùá nì cachi-yà xì-né:

—¿Índù chuun cánahá-nsià xì nècuàchì jaàn? Vâchi iin ñà-vâha nduá quidá-né xì’.

¹¹ Vâchi nècuàchì ndahví, nicanicuahàn ndoó-né xì-nsiá; doco yùhù, còò, sacù-ni quivì ié` xì-nsiá.

¹² Cunaha-nsiá, ñà-nì sòdò nècuàchì yohó ndutè tnàmì dìni, divi sàhà-ñá cutatna cuerpu yùhù na ndúxan nduá.

13 Te ñà-ndáa nduá yohó cachítnùhi xì-nsiá: nsidanicuú ñuu ndé icúmí sàà razón ndiaha xí Dios inicutu ñuhiví, yucán icúmí sàà stná palabra sàhà ñà-vàha nì quida nècuàchì ñahà yohó, te ducán mà nunca sàà nèhiví ñuhiví nandòdó-né nècuàchìmà.

Nansa nì saquin Judas compromisu cahin-nè Jesús nùù nècuàchì xídandacú

14 Nùù ùxìn ùì compañeru Jesús, iin-ne nani Judas Iscariote. Pues divi nècuàchìmà nì sàhàn nùù dùtù xícusahnú,

15 te nì cachi-nè xì nècuàchìmà:

—¿Nadaa cuàha-nsia yùhù, te guide Jesús entregar nùù-nsiá?

Dandu nì sàha dùtù mà-né òcò ùxìn dìhùn plata.

16 Ñàyùcànduá, dècuèndè quivì yucán nì quesaha Judas mà nandúcú-né índù tiempu chicá mà úhì dayáha-ne Jesús nùù ndahà nècuàchìmà.

Nansa nì cutnahá Jesús xì compañeru-yà nì xixi-ya Cena ùì

17 Daaní, nì sàà tu quivì primeru xi vicò xixí-né pan có-ndùtáchí. Te nì tnàtuu nèhivì dacuahá-yà nùù-yà, cachí-nè:

—¿Índù divi cuní-ní cùhùn-nsì quidayucun-nsì ñà-cuxi-nda comida vicò pascua?

18 Te nì cachi-yà xì-né:

—Cuahán-nsià ini ñuu ndè vehe iin tal nèhivì, te cachi-nsià xì-né ñà-cachí maestru sà-itúú meru quivì xí-yá, ñàyùcànduá vehe mii-ní icúmí-yâ chivàha-ya vicò pascua, mii-yá xì nsidaa nècuàchì dacuahá-yà. Ducán cachi-nsià xì-né —nì cachi Jesús.

19 Ñàyùcànduá, ducán nì quida nècuàchì dacuahá-yà nacua nì sàcùnaha-né nùù-yà, nì nsidayucun-nè comida pascua.

20-21 Daaní, na ní cuaà, dandu (nì sàà stná) mii-yá yucán, te nì sàcòo-ya nùù mesa xì nsì-ùxìn ùì nècuàchì dacuahá-yà. Te na iá-yà xixí-yá, dandu nì cachi-yà (xì-né):

—Cunaha-nsiá, iá iin-nsia cuàhàn cahin xí.

22 Dandu nsidaa nècuàchìmà, nì nàcùndoo-ne tnùnsí ini, te nì cachi iin iin-ne xì-yá:

—¿A víhíní yùhù, Señor mío?

23 Te nì cachi-yà xì-né:

—Iin mii-nsiá nècuàchì iin-ni xixi-xi-nda nùù còhò yohó nduú ana icúmí cahin xí.

24 Vàchi ñà-ndáa nduá, icúmí cuu ndisa ñà-nduá nì cachitnùhu nùù tutu ùì ñà-icúmí cui yùhù ana nduú Tnahá Nèhiví Ñuhiví. Doco tiàa cuàhàn cahin xí, ¡ndahví-nè! Chicá vaha màsà túinuù-né ñuhiví nì cui —nì cachi-yà.

25 Dandu nì càhàn Judas, divi tiàa cuàhàn quida xi-yà entregar, te nì cachi-nè:

—Maestro, ¿a víhíní yùhù nduí?

Te nì cachi-yà xì-né:

—Ducán nduá nacua nì cachí-ní.

26 Na meru xixí nsidaa-né, nì tnii-ya iin pan, te nì naquimanì-yà Dios sàhà-ñá. Dandu nì dàcuàchì-yáñà, te nì dasàn-yà nùù nècuàchì dacuahá-yà yucán, te nì cachi-yà:

—Cuxi-nsia, vàchi pan yohó, nahi iquicúñú yùhù nduá.

27 Dandu nì tnii stná-yà pocillu, nì naquimanì-yà Dios sàhà-ñá, te nì sàha-yanè, cachí-yà:

—Nsidaa-nsiá coho-nsia chichii ndutè yòhò.

28 Vàchi nahi nì mii nduú-te. Te cunaha-nsiá, sàhà nì icúmí nacoì iin ichì sàà cunchicùn nèhivì, vàchi nú sàni xitià nì, dandu sàhàjàn icúmí ndutu cuàchi cuàhà-né.

29 Te vichi, mà cóhò gué` ndutè sì-uva yohó ndè cachi sàà coho saa-tùì-te xi-nsiá quivì cusahnú Yuamání inicutu ñuhiví yohó.

Nansa nì cachi Jesús sà-ínahá-yâ icúmí Pedro nacuaà-néyà

30 Daaní, na ní nsihì nì xito nsidaa-né iin alabanza, dandu nì quee-ne cuàhàn-nè xì-yà ndè yucù Olivo.

31 Te nì cachi-yà xì-né:

—Ñuú vichi, icúmí nsidaa-nsiá nacoó nihni-nsia yùhù; vàchi ducán cachí nùù tutu ìì: “Cuàhìn dacúxióé pastor, dandu cuitià nihni rìì”, cachá’.

³² Doco nú sàni natiacuí, dandu icúmí codònuì nùù-nsiá nùhù ndè ladu Galilea.

³³ Dandu nì cachi Pedro xì-yá:

—Mate nì sàà nsidaa nèhivì nacoó nihni-ne mii-ní, doco yùhù, còó, mà nunca.

³⁴ Dandu nì cachi-yà xì-né:

—Cunaha-ní, divi ñuú vichi icúmí-ní nacuaà-ní yùhù. Tàñáha ga coto lehe sinduhá, te sàni nacuaà-ní yùhù ùni xichi.

³⁵ Doco nì cachi-nè xì-yá:

—Còó, mate nì cahní-nèndó, doco mà nunca sàni nacuaí mii-ní —nì cachi-nè. Te divi ducání nì cachi gà stná nsidaa nècuàchì dacuahá-yá.

Nansa nì sàà Jesús huerta nani Getsemaní, te nì xicàn tàhvi-yá nùù Yuamáni-yá

³⁶ Dandu nì sàà-yà xì-né ndè iin xaan nani Getsemaní. Te nì cachi-yà xì-né:

—Yohó ndòò-nsia, vàchi yùhù cuahìn chicá nùù-xí càcàn tàhvi nùù Dios.

³⁷ Dandu nì saca-ya Pedro xì ùi ñàní dèhe Zebedeo, cuahàn-yà xì-né. Te nì nàcòò cuahà-yá tnùnsí ini; nì quesaha-yá yáha ga nacání cuáhà ini-yà.

³⁸ Dandu nì cachi-yà xì-né:

—Yáha ga ié’ tnùnsí ini, na ian cuníà cahnì dáhúán yùhù. Ñàyùcànduá, yohó nì ndóò-nsia, te cunchito tùha-nsia.

³⁹ Dandu cuahàn-yà chicá nùù-xí, nì sàcùnduhù ndéé-yá, te nì xicàn tàhvi-yá nùù Yuamáni-yá, cachí-yà:

—Yuamáni’, xicàn tàhvi nùù-ní, áma dácúxió-ní (tnùndoho icúmí yàhi), vàchi nahi (ñà-úa ñuhú iin) taza nduá nùí. Doco màdì ñà-nduá cuní yùhù nì cùnduá; còó, ñà-nduá cuní mii-ní.

⁴⁰ Dandu nì naxicocuñn-yà vaxi-ya ndé nì ndòò nècuàchì dacuahá-yá, te nì xini-yà sàquídì-nè. Ñàyùcànduá, nì cachi-yà xì Pedro:

—¿Áma cúí cunchito stná-nsiá xì yùhù siquiera iin hora-ní?

⁴¹ Cundoo tùha-nsia, te càcàn tàhvi-nsiá nùù Dios sàhá màsà dándáhvì ñà-malu mii-nsiá, vàchi mate iá voluntad xi-nsia, doco iyuhu gá valor icúmí cuerpu-nsiá ñà-quadandee inì-nsia.

⁴² Daaní, tucu tu cuahàn-yà càcàn tàhvi-yá nùù Dios, te nì cachi-yà:

—Yuamáni’, nú icúmí yàhi tnùndoho fuerte, te mà cúí cuxioa, dandu ducanicoó nacua cuní mii-ní.

⁴³ Dandu vaxi tu-ya (ndé ndoó nècuàchì-mà), te nì xini-yà tucu tu quídì-nè, vàchi sádi vahná-nè.

⁴⁴ Dandu nì nacoó-yanè inga tu, te cuahàn-yà ñà-úni, te davani nì xicàn tàhvi-yá (nahi antes).

⁴⁵ Dandu nì naxicocuñn-yà, te nì cachi-yà xì-né:

—Cùdù cuéyàà-nsiá, te quetatu-nsiá vichi, vàchi sà-íá. Sàni sàà meru hora xi yùhù ana nduú Tnaha Nèhivì Ñuhiví, divi hora icúmí yàhi ndahà nèhivì cuáchi.

⁴⁶ Ndacuíta-nsia, cùhùn-ndà, vàchi sà-itúú quesaa ana cuahàn cahin xì’.

Nansa nì tnii-tè Jesús, te nì suhni-teyá

⁴⁷ Daaní, cáhàn ìi-yá xì nècuàchì-mà, te nì quesaa Judas, divi tiàa nìsa cutnaha-xi ùxìn iin ga nècuàchì dacuahá-yá, te ndacá stná-nè cuahà gá tiàa xinihi xi espada xì garroti. Cuenta xi dùtù xícusahnú vaxi-tè, xì cuenta xi stná nècuàchì xídandacú nùù ñuu mà.

⁴⁸ Te sàni ndatnuhu Judas xì nsidaa ana ndacá-némà ñà-coo iin seña ana tnii-tè, divi ana chítú-nè cunduu meru ana tnii cùhùn presu.

⁴⁹ Ñàyùcànduá, nì tnàtuu Judas ndé iín Jesús, te vichi vichi nì casàhú-nè xì-yá, cachí-nè:

—¡Cuñàvaha-ní, maestro!

Te nì chítú-nè nùù-yá.

⁵⁰ Dandu nì cachi-yà xì-né:

—Amigo, ¿índù chuun nihi-ní vàxi yohó?

Dandu nì tnàtuu tè-dava ga mà nì tnii-tèyá nì ndòo-ya ndahà-té.

⁵¹ Dandu iin nèhivì xí-yá, nì tavà-né espada xi-ne nì cani-ne iin tiàa quidáchúûn nùù dùtù cusáhnû, nì sahnde-nè iin tùtnù-té.

⁵² Doco nì cachi-yà xì-né:

—Nachinacaà-ní espada xi-ní dòá, vàchi nsidaa ana caní xì espada, divi espada icúmí-nè cui stná-nè.

⁵³ ¿A có-cúndáà ini-ní ñà-vàtùni càcàn tàhvì nùù Yuamáni, te vichi duha techuún-yá cuàhà mil ángel chindee xí?

⁵⁴ Doco nú nì cáquìn ducán, dandu mà cúí cuu ndisa ñà-nduá nì cachitnùhu tutu ì ñà-dúcán icúmí cuu.

⁵⁵ Daaní, nì cachi stná-yà xì nsidaa nèhivì cuàhà mà:

—A ducán nduú modo tnií-nsiá yùhù, vàxi-nsia nihí-nsiá espada xì garroti na ian tècuìhnà nduí, mate nsiquívì nisa ìe xì-nsiá veheñùhu cahnú dacuahí nèhivì, te cóni tnií-nsiá yùhù.

⁵⁶ Doco cunaha-nsiá, dohó quidá-nsiá vichi sàhà ñà-nì cuú ndisa ñà-nduá nì tiaa nèhivì xí Dios sàhana —nì cachi-yà.

Dandu nì nacoò nihni nsidaa nècuàchì dacuahá-yá mii-yá, nì xinudèhé-nè.

Ñà-nduá nì cachi Jesús na ní sàà-yà nùù Junta Cahnú

⁵⁷ Nèhivì nì tnii xi-yá, ndacá-nèyà cuàhàn nùù dùtù cusáhnû nani Caifás. Te divi vehe nècuàchì mà sàni nataca stná nècuàchì ley xi veheñùhu, xì stná nècuàchì sahnú xídandacú nùù ñuu mà.

⁵⁸ Te Pedro, nchícùn xìcà-níne mii-yá cuàhàn-nè. Te nì yàha stná-nè patiu iá vehe dùtù cusáhnúmá, te nì sàcò stná-nè xì policia ndoó yucán, ndiatú-né cundaà ini-nè índù fin cucumi-yá.

⁵⁹ Daaní, dùtù xícusahnú, xì nsidaa tè-xídandacú, xì nsidaa stná nècuàchì Junta Cahnú, nì nducu-né ana daquée cuàchi dìquì-yá sàhà-ñá cui-yà, mate té-tnùhù nduú-te.

⁶⁰ Doco còò iin ni túi (cunduu testigu nacua cuní-nè), mate cuàhà nèhivì nì càhàn tnùhù dìquì-yá. Doco por fin nì quixi ùi-te,

⁶¹ te nì cachì-te:

—Nì cachi Jesús yohó ñà-vàtùni dacaá-né veheñùhu xì Dios, dandu tìxi ùni quívì naquidavàha saa-nèa.

⁶² Dandu nì ndacuiin dùtù cusáhnû, te nì cachì-nè xì-yá:

—¿Áma náxícónihí-ní ni-íñàha? ¿Nansa iá ñà-càchì guá nècuàchì yohó sàhà-ní?

⁶³ Doco Jesús, dadí úun nì ndòo-ya. Dandu nì cachi dùtù mà:

—Fuerza icúmí-ní chinaha-ní Dios iá nicanicuahàn, te cachì-ní xì-nsí a dívì Dèhemanì-yá nani Cristu nduu-ní, ò á cóó.

⁶⁴ Dandu nì cachi Jesús xì nècuàchì mà:

—Nacua nì cachì-ní, ducán nduá. Te yùhù cachì stnàì xì-nsiá, icúmí-nsiá cuni-nsiá yùhù ana nduú Tnaha Nèhivì Ñuhivì na nui quixi mahì vècò nahnú ansivi, te coi ladu cuahá mii-yá ana cahnú poder xi.

⁶⁵ Dandu dùtù cusáhnúmá, (nì xidà ini-nè), ñàyùcànduá nì ndata canúú-nè iyuhu sìcoto ndixí-né, te nì cachì-nè xì nèhivì cuàhà mà:

—¿Cuní nècuàchì yohó ndudava-ne xì Dios! ¿Cò-xiñùhù gá-ndà ni-iin testigu quixi! Vàchi vichi sàni inini-nsia ñà-quini guá nì càhàn-nè.

⁶⁶ ¿Nansa quida-nda xi-né, cachì mii-nsiá?

Dandu nì cacachi nècuàchì Junta Cahnú-ma:

—Icúmí nècuàchì jàan cui-nè, vàchi iá cuàchi-ne.

⁶⁷ Dandu ni caquesaha nècuàchìmà ni sivi dií-nè nùù-yá, te ni cani-neyà sìcátú, te dava ga-nè, cahmá uun ni cani-ne nùù-yá,

⁶⁸ cachí-nè xì-yá:

—¡Cachi cuàá-ní ana ni cani xi-ní, vàchi ádi Cristu (ni quixi ansivi) nduu-ní!

Nansa ni quida Pedro ni nacuaà-né Jesús

⁶⁹ Te Pedro, patiu tùvèhé iá-nè. Te yucán ni tnàtuu iin ñahà chii, cachí-ña xi-né:

—Amádi mii-ní nisa cutnahá stná-ní xì Jesús de Galilea.

⁷⁰ Doco ni nacuaà-né mii-yá, iníní nsidaa nèhivì yucán, te ni cachi-nè xì ñahà chii mà:

—Có-ínáhí ñà-nduá cachí-ní.

⁷¹ Dandu cuàhàn-nè quee-ne yehè, doco ni xini inga ñahà chii-né, te ni cachà xi nèhivì dava ga itá yucán:

—Nècuàchì jaàn nisa cutnahá stná xì Jesús de Nazaret.

⁷² Dandu tucutu ni nacuaà-néyà, ni chinaha-né Dios ñà-tàcùnì-nè Jesús, cachí-nè.

⁷³ Daaní, inga ratu gà ni tnàtuu stná iin ùi nèhivì itá yatni yucán, te ni cachi-nè xì Pedro:

—Ndisa, iin compañeru Jesús nduu-ní, vàchi sàhà modo càhàn-ní, ducán cundáà ini-nsì.

⁷⁴ Dandu ni cachi Pedro xì-né:

—Yùhù chináhí Dios, có-ínáhí nècuàchìmà. Te nú tètñhù nduì, ni daquixí-yá castigu dìquí.

Dandu momentu mà ni xito lehe.

⁷⁵ Te ñà-yucán ni nsinuu ini-nè nansa ni cachi-yà xì-né daa ñà-tàñáha ga coto lehe, te sàni nacuaà-néyà ùni xichi. Ñàyùcànduá, ni quee-ne iladu patiu, iá-nè sacú cuàhà-né.

27

Nansa ni dàyáha-ne Jesús ndahà gobernador Pilatu

¹ Daaní, na ní tùinuù, dandu ni càhàn dùtù xícusahnú xì tè-dàndàcú nùù ñuu mà, ni candatnuhu tnahá-né nansa quida-ne, te cui Jesús.

² Dandu ni nachicuhni-nè ndahà-yá, te cuàhàn-nè xì-yá nùù gobernador Poncio Pilato, te yucán ni ndòo-ya ndahà témà.

Nansa ni xihì Judas

³ Daaní, Judas, divi ana ni cahin xì-yá, ni cundaà ini-nè ñà-ndisa icúmí Jesús cui-yà. Ñàyùcànduá, ni naxicocuñin ini-nè, ni sàhàn-nè ni naxiconihí-né òcò ùxin dihùn plata nùù dùtù xícusahnú, xì nùù stná nècuàchì sahnú xídandacú, cachí-nè xì nècuàchìmà:

⁴—Cuàchi nduá ni quide, vàchi còò falta xi nècuàchì ni dàyáhi ndahà-nsiá.

Doco ni naxiconihí nècuàchìmà, cachí-nè:

—Có-dàndòhàjàn nsiùhù; chuun xi mii-ní nduá.

⁵ Ñàyùcànduá, ni ducùn Judas nsidaa dihùn mà pisu veheñùhu, te ni quee-ne ni dàcuáhnà-nè mii-né xì yohò.

⁶ Daaní, después ni dàtácá dùtù mà dihùn mà, te ni cachi-nè:

—Có-sàha ley xi-nda permisú daquéé-nda dihùn yohó alcancía xi Dios, vàchi sàhà ñà-yòhó ni xihì iin nèhivì.

⁷ Ñàyùcànduá, ni ndatnuhu tnahá-né (nansa quida-ne xì) dihùn mà, te ni xiin-ne iin ñuhù nani Itu Alfareru ñà-cundua panteón ndé cundùxin nècuàchì inga ñuu.

⁸ Ñàyùcànduá disàhà-xì ni sàcùnani ñuhù mà Ñuhù Níi, te dècuèndè vichi ducán cachí-nè xán.

⁹ Pues divi ducán ni cuu nsidaámà sàhà ñà-ni cùú ndisa ñà-nduá ni cachitnùhu iin nècuàchì sàhana nani Jeremías, vàchi dohó ni tiaa-ne: “Cutu ócò ùxin dihùn plata ndiaá-yà, ni cachi nècuàchì raza Israel. Dandu después ni natnii-ne dihùn mà

¹⁰ ni xiin-ne Itu Alfareru, nacua ni cachi Stoho-ndà Señor xì”.

Nansa ni cachi Jesús na iín-yá nùù gobernador Pilatu

11 Pues (hora yucán sàni sàà-yà) nùu gobernador, te iín-yá nùu-té. Dandu nì ndàcàtnùhù-té nùu-yá, cachí-te:

—¿A ndísá rey xi nècuàchì raza Judea nduu-ní, á coó?

Dandu nì cachi-yà:

—Nacua cachí-ní, divi ducán nduá.

12 Dandu dùtù xícusahnú, xì nècuàchì xídandacú, nì càhàn tnùhù-né sàhà-yá, doco còò ni-iñàha ni cachí-yà.

13 Dandu nì cachi Pilatu xì-yá:

—¿A có-tiàcú-ní ñà-cuàhà guá càhàn tnùhù-né dìquì-ní?

14 Doco mii-yá, còò ni-iñàha ni nàxícónihí-yá. Ñàyùcànduá, nì ndulocó gobernador mà.

Nansa nì cachi stná Pilatu ñà-icúmí Jesús cui-yà

15 Cunaha-nsiá, cada nacává vicò pascua mà, tùha Pilatu dañà-té iin tè-ndiadí, ndéni-te nì cui ndiadí ni càyàn nèhivì.

16 Te quivì yucán ndiadí iin tiàa iá cuàhà fama-xi nani Barrabás.

17 Ñàyùcànduá, na sàni nataca nèhivì cuàhà mà nùu Pilatu, dandu nì xicàn tnùhù-té nùu-né, cachí-te:

—¿Ana cuní-nsià dàñà? ¿A divi Barrabás, te ò Jesús, ana cachí nduú Cristu?

18 Ducán nì cachí-te xi-né, vàchi sà-ináhà-té ñà-cuisì sàhà envidia xi dùtù sàni yàha Jesús ndahà-té.

19 Daaní, iá ì-té nùu silla ndé nsidándàà-te chuun, te nì quesaa iin razón xi ñahàdihí-te, cachí-nè: “Màsà quídá-ní ni-iñàha xi Jesús, vàchi nècuàchì vaha nduú-né. Cunaha-ní, cuàhà gá nì sàní ñuú ndùvèhè nì quida nècuàchimà, te nì nacani cuaá inì”, cachí razón mà.

20 Doco dùtù mà xì nècuàchì xídandacú, nì chiyuhù-né nèhivì cuàhà mà ñà-nì càyàn-nè dàñà Barrabás, te cui Jesús.

21 Ñàyùcànduá, nì càhàn gobernador xì nsidaa nèhivì mà, cachí-te:

—Nùu ùi nècuàchì yohó, ¿índù nècuàchì cuní-nsià dàñà?

Dandu nì cachi nèhivì mà:

—¡Divi Barrabás!

22 Dandu nì cachí-te xi-né:

—Pues, nú ducán, dandu ¿nansa quide xì Jesús, divi ana cachí nduú Cristu?

Te nì naxiconihí nsidaa-né, cachí-nè:

—¡Ni cuí-nè nchìca cruz!

23 Dandu cachí gobernador mà:

—¿Índù chuun cui-nè ñà-còò falta xi-ne iá?

Doco chicá ndee ní càna nèhivì cuàhà mà, cachí-nè:

—¡Ni cuí-nè nchìca cruz!

24 Dandu nì xini Pilatu còò ni-iñàha níhìndè-té, cuisì quesáhà nacuidà fuerte nèhivì mà. Ñàyùcànduá, nì xicàn-te tècuí, te nì ndaha-té, indéhe nsidaa nèhivì mà, te nì cachí-te xi-né:

—Yùhù, mà cúnsidá cuàchi nú ni cuí nècuàchì yohó, vàchi còò ni-iñàha iníhíca-nè. Chuun xi mii-nsiá nduá.

25 Dandu nì cachi nsidaa nèhivì mà:

—Nsiùhù xì dèhe-nsi ni cúnsidá cuàchi-nsi sàhà nècuàchì jaàn.

26 Dandu nì dàñà Pilatu Barrabás mà nùu nèhivì mà, doco Jesús, còò; nì dàndàcú-te ñà-nì ñáhnì cuí-yà, te después cùhùn-yà màcùtuu-yà nchìca cruz cui-yà.

Nansa nì sàcùndiaa soldadu Jesús

27 Dandu soldadu xi gobernador mà, nì saca-tèyá cuàhàn-te xi-yá vehechuún. Te nì cana-tè nsidaa compañeru-te ñà-tnàtuu-tè ndé iá-yà.

28 Dandu nì tavà-té sìcoto xi-yà, te nì chindixi-tèyá iin capa cuahá.

29 Te nì cava stná-te iin corona iñù nì chicaà-te dìnì-yá, te nì dàcùnindáha stná-teyá iin nù-iin ndahà cuahá-yà. Dandu nì sàcuìta sisi-té nùù-yá, sàcùndiaà-teyá, cachí-te:

—¡Viva! Vàchi ¡rey xi tè-raza Judea nduu-ní (vichi)!

30 Te nì casivi dií-teyá. Dandu nì dítá-te nù-iin ma ndahà-yá nì cani fuerte-te dìnì-yá.

31 Te na ní nsihì nì sàcùndiaà-teyá ducán, dandu nì tavà-té capa mà, te nì nachindixi-tèyá sìcoto xi mii-yá. Dandu nì saca-tèyá cuahàn-te chituu-tèyá nchìca cruz.

Nansa nì chituu-tè Jesús nchìca cruz

32 Na ní caquee-tè xì-yá nì ndacùhun tnahá-te xi iin tiàa ñuu Cirene nani Simón. Te divi nècuàchì mà nì catnii-tè nì dàcuídá-tené cruz xi-ya cuahàn.

33 Dandu nì casaà-te xi-yá iin xaan nani Gólgota. Quìvì jaàn cachí dàhàn yucán, Nùù Iquì Dìnì.

34 Dandu nì cunì-te dacohó-teyá vinu ia dácà tnahá xì ñà-ùà, doco na ní tuiyàá-yañà, cónì cùnì gá-yà coho-yañà.

35 Daaní, nì chituu-tèyá nchìca cruz. Te sìcoto xi-ya, nì dasàn-téâ segùn nansa nì nìhì iin iin-tè na ní idàdiquí-te sàhà-ñá. Pues ducán nì quida-tè sàhà ñà-nì cùù ndisa palabra nì cachitnùhu nèhivì xí Dios sàhana na ní cachi-nè: “Nì dasàn-té sìcoto xi entre mii-té, te nì idàdiquí-te sàhà-ñá”.

36 Daaní, nì sàcùndoo soldadu mà ñà-cundiaà-teyá.

37 Te dìquì-xí dìnì cruz xi-ya nì sàcùtuu iin ñà-càchítñùhu índù-ñá dísáhà-xí dandohó-teyá. Te dohó cachá: “Ana yohó nduú Jesús, rey xi tè-raza Judea”.

38 Cunaha-nsiá, yucán nì sàcuítandiaa stná ùi tècuìhnà nchìca cruz, iin-tè ladu cuahá-yà, te ingà-te ladu itní-yà.

39 Te nèhivì yáha yucán, nì canàhá stná-nè xì-yá, dacuico dìnì-né, cahíchì ini-nèyà, cachí-nè xì-yá:

40 —¡Ndahví-ní! vachi cuahàn-ní dacaá-ní veheñùhu cahnú, te tìxi ùnì quìvì nsidavàha saa-niá, cachí-ní. Nú ducán fuerte guá-ní, dandu dacácu-ní mii-ní, nú ndisa Dèhemanì Dios nduu-ní, te danuu-ní mii-ní nùù cruz jaàn cundehè-nsí —nì cachi-nè.

41 Te divi-ni ducán nì sàcùndiaa stná dùtù xícusahnú, te cutnàhá stná nècuàchì ley xi veheñùhu, xì stná nècuàchì xídandacú; nsidaa-né nì sàcùndiaa stná-nè, cachí-nè iin-ne xì inga-nè (sàhà-yá):

42 —Nècuàchì jaàn, nìsa dacácu-ne nècuàchì dava ga, doco mà cùì dacácu-ne mii-né. Nú ndisa rey xi nècuàchì raza-ndà Israel nduú-né, dandu ni danuú-né mii-né nùù cruz jaàn cundehè-ndà, dandu cunindisa-ndané.

43 Dios cundéé ìní-nè, (cachí-nè): pues nú ducán nduá, dandu ni dacácu-yanè vichi, nú cuní-yà, te nú ndisa Dèhemanì-yá nduú-né nacua cachí-nè —nì cachi tè-xícusahnu-ma.

44 Te dècuèndè stná tècuìhnà itándiaa stná nchìca cruz yucán, nì canàhá stná-te xi-yá.

Nansa nì xihì Jesús nì dànáà-yá sàhà cuàchi-nda

45 Daaní, dècuèndè càxíhúì xì ndé` càhúnì nì nàcuìlìn tnùù inicutu ñuu yucán.

46 Te nahì càhúnì nì ndàhì ndee-yá, cachí-yà:

—Elí, Elí, ¿lama sabactani? —te dohó cuní cachàmà: ¡Dios mío, Dios mío! ¿A ñá-sànì ndòo nihni nduá yohó?

47 Te dava nècuàchì itá yucán, nì tiacu-nè ndáhi-yà ducán, ñàyùcàndùá nì cachi-nè:

—Elías caná-né.

48 Ñàyùcàndùá, nì dàyáà iin-tè nì quihin-tè iin ñà-ñàhmá uun nani esponja, te nì chindaxin-téà xì vinu nì xìò, nì chihi-téà dìnì iin vara yutnù, te nì sàha-tèyá nì sihvi-yá.

49 Dandu nì cachi ingà-te:

—Nacoo-nínè, cundiatu-nda, áma quíxí Elías dacácu xi-né.

50 Dandu inga xichi nì ndàhì ndee-yá, te nì xihì-yà.

⁵¹ Daaní, yucán ini veheñuhu cahnú nì quedava ì cortina cahnú sadí nihni cuarto xan; iin-ni nì ndàtà-ñá ndè dìni-xí xì ndé' tìxi-xì. Te nì tnàa stná ñuhiví, te nì ndàtà cavà nahnú.

⁵²⁻⁵³ Dècuèndè nì nuna stná cuàhà lugar ndé índuxin nsii. Ñàyùcàndüá na sáni natiacu-yà después, dandu nì natiacu stná cuàhà nècuàchì sàhaha nduú nèhivì xí-yá, nì caquee-ne ndé índuxin-ne nì caquìhvi-ne ini ñuu ì (Jerusalén), te nì ndecoyo-ne nùu cuàhà nèhivì ndoó yucán.

⁵⁴ (Cunaha-nsia, frente ndé iín cruz xi Jesús,) yucán iín stná iin capitán xì compañeru-te, xíndiaà-teyá. Te na ní caxinì-te nansa nì cuu ñà-nì tnàa guá, dandu nì yuhí gà-te, cachí-te:

—Ñà-ndàà nduá, Dèhemanì Dios nì sanduu nècuàchì jaàn.

⁵⁵ Daaní, yucán itá xica stná cuàhà nècuàchì ñahà, indéhe-ne: nècuàchì ladu Galilea nduú-né, te cutnàhâ-né xí-yá nì quixi ndè ñuu mà ñà-chindee stná-nèyà.

⁵⁶ Iin-ne nduú María Magdalena, te inga-nè nduú María dihi Jacobo xì José, te inga-nè nduú ñahàdìhí Zebedeo.

Nansa nì chinacaa José iquicúñú Jesús inì cueva

⁵⁷ Daaní, na ní cuaà quivì yucán, dandu nì sàa stná iin nècuàchì ñuu tii Arimatea nani José. Iin nècuàchì cuicà nduú-né, te nchícùn stná-nè ichì-yá.

⁵⁸ Te divi-ne nì sàhàn nùu Pilatu, nì xicàn-nè cuerpu-yà. Dandu nì cachi Pilatu xì soldadu ñà-nì cuàha-tè nècuàchì mà iquicúñú-yà.

⁵⁹ Ñàyùcàndüá, nì sàhàn José nì naquihin-neyà, te nì chidúcùn-nèyà iin dahmà iá ndoo.

⁶⁰ Te sàhà ñà-làcà nì sate nèhivì xí-né iin cueva nùu cavà, ñàyùcàndüá, divi yucán nì chinacaa-nèyà. Dandu nì dàtùí nihni-ne iin cavà cahnú nì sàcùndiadi yuhù cueva mà, te cuàhàn-nè.

⁶¹ Doco yucán nì ndòo María Magdalena xì inga María mà, xíndoo-ne frente lugar ndé nì ndùxin-ya.

Nansa nì dandàcú Pilatu ñà-cuita soldadu cundiaa xì sepultura xi Jesús

⁶² Daaní, nì yàha quivì mà, divi quivì nduú vigilia xi quivì descansu. Dandu meru quivì (descansu) mà nì sàhàn itnii dùtù xì iin ùi stná nècuàchì fariseu, nì tnàtuu-ne nùu Pilatu,

⁶³ nì cachi-nè xì-té:

—Señor gobernador, nsiùhù nsinúú ini-nsì nansa nì cachi (Jesús) na xicánúú ì-né dandahví-nè nèhivì, nì cachi-nè ñà-tìxi ùnì quivì icúmí-nè natiacu-nè.

⁶⁴ Ñàyùcàndüá, cuní-nsì dandacu-ní ñà-cundiaa vaha soldadu sepultura dècuèndè nì xínu quivì ùnì, vachi nú cóo, vihini nataca nèhivì xí nècuàchì mà ñuu, te tavà-nané, dandu después cachi-nè xì nèhivì ñà-sàni natiacu nècuàchì mà nduá. Te nú ducán, dandu cundua iin tnùhu chicá cahnú nùu palabra nìsa cachi nècuàchì mà antes.

⁶⁵ Dandu nì cachi Pilatu xì-né:

—Vatùni iá cùhùn iin ùi soldadu, nacua xicàn-nsià. Te cuahán stná mii-nsiá nùu sepultura, te chicadi vaha-nsià ñà nacua cui quida-nsià.

⁶⁶ Ñàyùcàndüá, nì caquihin nècuàchì mà ichì cuàhàn-nè ndè sepultura, te chicá fuerte nì chicadi-nè lugar mà. Te nì candòo stná itnii soldadu xíndiaa.

28

Nansa nì natiacu Jesús

¹ Daaní, nì yàha quivì descansu mà. Te na sàcuàhàn tùinuù quivì primeru semana, dandu cuàhàn María Magdalena cundehè-né sepultura, te cutnàhâ stná-nè xì inga María mà.

² Datúha nì quesaha tnàa fuerte, vachi ndè ansivi nì nuu iin ángel xi Stoho-ndà Señor, nì dàcúxíó-né cavà cahnú ndiadí yuhù cueva mà, te nì sàcòo-ne d'iquá.

³ Tnúu nihni-ne na ian tása; te cuxín yaa sìcoto xi-ne nahi yùhà.

⁴ Te soldadu ndoó ndiaá yucán, nì cayùhí cuaá-te, te nì quesaha-té quidí fuerte-te, ndè nì xihì nihni-tè.

⁵ Doco nì cachi ángel mà xì nècuàchì ñahà mà:

—Màsà yúhî-nsià. Ináhî nandúcú-nsiâ Jesús, divi ana nì xihì nchìca cruz.

⁶ Doco cunaha-nsiá, còò cá-yà yohó; sàni natiacu-yà nacua nì cachitnùhu-ya antes. Naha-nsià cundehè-nsiá lugar ndé nì sanduhù-yá.

⁷ Te cuahán-nsià vichi duha ndé ndoó nècuàchì dacuahá-yá, te cachitnùhu-nsia xì-né ñà-sàni natiacu-yà, te icúmí-yâ codònù-yá nùù-nsiá nùhù-yà ndè ladu Galilea. Yucán icúmí-nsiâ cuni-nsiàyà. Pues vichi sàni cachitnùhi xì-nsiá —nì cachi ángel.

⁸ Dandu yàchì nì caquee nsihi nècuàchì ñahà mà cueva mà, te nì dàyàà-nè cuahàn-nè cachitnùhu-ne xì nècuàchì dacuahá-yá: chii yúhî-nè, te chii cudî stná ini-nè.

⁹ Doco ichì ndé cuahàn-nè yucán nì ndacùhun stnahá-né xì-yá, te nì casàhù-yà xì-né. Ñàyùcàndüá nì tutuyuhu-né ñuhù nùù sàhà-yá, te nì tñii-ne sàhà-yá nì cahvi-néyà.

¹⁰ Dandu nì cachi-yà xì-né:

—Màsà yúhî-nsià. Cuahán-nsià ndé ndoó nèhivì xínduu nahi ñani, te cachi-nsià xì-né ñà-nì nùhù-nè ndè ladu Galilea, vàchi yucán icúmí-nè cuni-nè yùhù.

Nansa nì dándàcú dùtù nùù soldadu nì sandiaa sepultura

¹¹ Daaní, na sámànùhù nècuàchì ñahà mà, dandu nì caquee stná dava soldadu nì sandiaa yucán, mànuhù stná-te ñuu Jerusalén. Te nì nacani-tè xì dùtù xícusahnú nansa nì cuu.

¹² Ñàyùcàndüá, nì nataca dùtù mà xì nècuàchì xídandacú nùù ñuu mà, te nì ndatnuhu tnahá-né nansa quida-ne. Dandu nì sàha-ne soldadu mà vihi dìhùn,

¹³ te nì cachi-nè xì-té:

—Dohó cachi-nsià xì nèhivì: na hora quídì naà-nsiá ñuu, dandu nì casaà nècuàchì dacuahá Jesús, nì xidacuihna-né cuerpu nsi ma, cachi-nsià.

¹⁴ Te nú ni cunítñùhu gobernador sàhà chuun yohó, dandu càhàn-nsi sàhà-nsiá nùù-té, te còò ni-iñàha cuu xi-nsiá —nì cachi-nè.

¹⁵ Ñàyùcàndüá, nì catnii soldadu mà dìhùn mà, te nì cachi-te xi nèhivì nacua nì sàcùnaha-té. Te divi sàhà ñà-jaàn nduá ducán xicá cuentu mà nùù nèhivì raza Judea dècuèndè quivì vichi.

Ñà-ndüá nì dándàcú Jesús nùù nèhivì xì-yá ñà-quida-ne na sámànùhù-yá

¹⁶ Daaní, nì quihin nsi-úxin iin nècuàchì dacuahá-yá ichì cuahàn-nè ndè iin xaan nì cachi-yà xì-né, divi nduú iin yucù iá ladu Galilea.

¹⁷ Te na ní xini-nè mii-yá nì tutuyuhu-né ñuhù nùù sàhà-yá, te nì cahvi-néyà. Doco dava-ne, ndoó-né xì duda.

¹⁸ Dandu chicá nì cuyatni-ya, te nì cachi-yà xì-né:

—Yùhù nì nihítàhví dandacuí sàhà nsidanicuú iñàha iá ñuhiví xì ansivi.

¹⁹ Ñàyùcàndüá, cuahán-nsià inicutu ñuhiví, te dacuahá-nsiá nèhivì nansa iá ichì váha, te quida iì stná-nsiànè, ndacùcahan-nsiá Yuamání, xì stná yùhù ana nduú Dèhemaní-yá, xì stná Espíritu Ìi xì-yá.

²⁰ Te chinaha stná-nsiànè nansa quida-ne chivàha-ne nsidanicuú ñà-ndüá sàni dándàcú nùù-nsiá. Te cunaha-nsiá, nicanicuahàn icúmí cutnahí xì-nsiá ndè cachi nsihi ñuhiví.

Yohó nì nsihi historia.

Ñà-ndùá Nì Tiaa San Marcos sàhà Jesucristu

¹ Ñà-yòhó nduá quesáhá nacání razón ndiaha xí Dios sàhà Dèhemanì-yá Jesucristu.

² Sàhaha nìsa cahàn Isaías cuenta xi Dios. Te nì tiaa stná-nè (palabra yohó nì cachi-yà): Cunaha-ní, cuàhìn techuín iin tiàa, te dihna-ne yàha-ne càhàn-nè xì nèhivì ñà-ndùú razón xi, te ducán (nsida vii-né anima-nè), na ian nduviì iin ichì, dandu después yàha stná mii-ní (Cristu).

³ Tiacú cáhàn fuerte ana cáhàn sàhù yucù, te (cachí-nè xì nèhivì ñà-nsida vii-né anima-nè) na ian nduví ichì ndé yàha Stoho-ndà Señor, nandua ichì ndáa ndé quixi-ya.

(Ducán cachí tutu mà.)

⁴ Ñàyùcàndùá, nì quixi nècuàchì mà. Juan Bautista nani-né, te yucù nì càhàn-nè sàhù xì nèhivì, nì cachitnùhu-ne nansa xiñuhu quida-ne ñà-naxicocuïn ini-nè sàhà-ñá cuicahnú ini Dios sàhà cuàchi-ne, dandu cuhì-né.

⁵ Ñàyùcàndùá cuàhà nèhivì ñuu Jerusalén xì nsidaa gá stná nèhivì ladu Judea, nì casaà-nè nù Juan mà, nì dàtúi-ne cuàchi-ne nù Dios, te nì cuhì stná-nè nù yùte Jordán nì quida nècuàchì mà.

⁶ Dòò idì sì-camellu nì sandixi nècuàchì mà. Te iin quisi nduú siuhma tìxi-ne. Te sìca xi ndudi ñùñù yucù nduá nìsa itiacu-nè.

⁷ Te nì càhàn-nè xì nèhivì, cachí-nè:

—Nú sàni yàha yùhù, dandu vaxi mii-yá ana chicá icúmí poder cahnú nù. Ni có-nâtù (cundi ni mozo xi-ya) ndaxin correa ndìsàn-yá.

⁸ Yùhù, tècuí quidá íí mii-nsiá. Doco mii-yá, còó; tìxi Espíritu ì xí Dios icúmí-yâ quida ì-yánsià.

Nansa nì cuhì Jesús

⁹ Quivì yucán nì quee-ya ñuu Nazaret iá Galilea, te nì quida ì Juan-yà nù yùte Jordán.

¹⁰ Te na ní quee-ya nù tècuí mà, dandu nì xini-yà nì nuna ansivi, te nì nuu Espíritu ì xí Dios dìquì-yá na iin loma.

¹¹ Te nì tiacu cáhàn iin ana cáhàn ansivi, cachí-yà:

—Mii-ní, Dèhemaní nduu-ní, te cudí cuàhà inì sàhà-ní.

Nansa nì cuni ñà-malu dacà-sí Jesús

¹² Daaní, nì nsihi nì cuhì-yá, dandu vichi vichi nihí Espíritu ì xí Dios-yà nì sàhàn ñà-coo-ya yucù dàná.

¹³ Te yucán nìsa ìa-ya ù dico quivì ndé ndoó quisi yucù. Te nì sà Satanás, nì cuni-si dacà-síyâ, (doco mànicùí). Daaní, después nì casaà stná ángel xi Dios nì chindee-néyà.

Nansa nì quesaha Jesús quidá-yá chuun ì ladu Galilea

¹⁴ Daaní, na ní sàcùndiadi Juan Bautista vehecàa, dandu mànuhù Jesús ladu Galilea. Te nì quesaha-yá cáhàn-yà xì nèhivì inicutu ñà-ndùú razón ndiaha sàhà ñuhivì ì xí Dios.

¹⁵ Te dohó nì cachi-yà xì-né:

—Sàni sàà hora, sà-ítúú tiempo cusahnú Dios ñuhivì yohó. Ñàyùcàndùá naxicocuïn inì-nsia sàhà cuàchi-nsia, te cunìndisá-nsiá ñà-ndùú razón ndiaha xí-yá.

Nansa nì cana Jesús cùmì nècuàchì tavá siaca

¹⁶ Xicá Jesús yuhù mar iá Galilea, te nì xini-yà Simón xì ñani-nè Andrés, dacaná-né ñunù xí-né mahì tècuí, vachi nècuàchì tavá siaca xínduu-ne.

¹⁷ Te nì cachi-yà xì-né:

—Cunchicùn-nsià yùhù, vàchi mà cúndúú gá-nsià nècuàchì tavá xi siaca; yùhù icúmí dacuahí mii-nsià ñà-cunduu-nsià nècuàchì tavá xi nèhivì (nùù ichì malu).

¹⁸ Dandu nècuàchìmà, vichi vichi nì naco-ne ñunù xí-né yucán, te nì tenchicùn-nè mii-yá cuàhàn.

¹⁹ Dandu nì sàà-yà chicá nùù-xí, te nì xini tu-ya ùi dèhe iin tiàa nani Zebedeo, Jacobo nani iin-ne, te Juan nani ñani-nè, ndoo-né nùù lancha xi-ne, nácàhmá-nè ñunù xí-né.

²⁰ Te nì cana stná-yà ndúi-nè. Ñàyùcàndúá nì naco-ne yua-né ini lancha mà xì tètátú, te nì catenchicùn stná-nèyà cuàhàn.

Nansa nì tavà Jesús iin ñà-malu inácaa ini iin tiàa

²¹ Dandu nì casaà-nè xì-yá iin ñuu nani Capernaum. Te na ní sàà quivì descansu, dandu cuàhàn-yà veheñùhu, te nì dàcuàhá-yá nèhivì yucán.

²² Te nì ndulocó-nè sàhà ñà-ndúá dàcuàhá-yànè, vàchi nì chinaha-yà nahi ana cusáhnû, màdiá nahi nècuàchì ley xi veheñùhu.

²³ Daaní, ini veheñùhu ma iá stná iin tiàa inácaa iin ñà-malu inì-xi. Te nì ndàhì-nè, cachí-nè:

²⁴ —Jesús de Nazaret, ¿ndiá cunduu-ní nsiùhù? ¿A váxi-ní dandáñúhú-ní nsiùhù? Yùhù ináhî mii-ní: ana ì nì quixi nùù Dios ndùù-ní —cachá`.

²⁵ Doco Jesús, ndee ní dândacú-yá núa, cachí-yà:

—¡Màsà cáhàn, te quee cuahán! ¡Naco tiàa jaàn!

²⁶ Dandu ñà-malu mà, nì dàquídí fuerteà nècuàchìmà, te nì ndàhì ndeá, dandu nì quea cuàhàn.

²⁷ Ñàyùcàndúá, nsidaa nèhivì yucán, nì ndulocó sàstnùhù-né sàhá yucán, te nì ndàcàtnùhù tnàhá-né nùù-né, cachí-nè:

—¿Ndiá nduá cuú jaàn? ¿Índù ley saa nduá? Vàchi na iin nècuàchì cusáhnû, ducán cáhàn nècuàchì jaàn. Mà úhì dândacú-né nùù ñà-malu, te iníníá-nè.

²⁸ Dandu nì xìtià fama xi-ya inicutu ladu Galilea yucán.

Nansa nì dándúvaha Jesús dido Simón Pedro

²⁹ Daaní, na sání caquee nsidaa-né veheñùhu yucán, dandu cuàhàn-yà xì Jacobo xì ñani-nè Juan, nì yàha-ne vehe Simón xì Andrés.

³⁰ Te yucán indúhu dido Simón, nècuàchì ñahà, quidá yócò xì-né. Te vichi vichi nì cachitnùhu nèhivì vehe ma xi-yá sàhà nècuàchì cuhí mà.

³¹ Ñàyùcàndúá, nì tnàtuu-ya ndé indúhu-né, te nì tnii-ya ndahà-né, nì dândácòo-yanè. Dandu vichi duha nì cuxio cuèhè yócò mà-né, te nì quesaha-né nì xinucuachi-né nùù-yá xì compañeru-yà.

Nansa nì dándúvaha Jesús cuàhà gá nècuàchì cuhí

³² Daaní, nì quècahnu orá, te nì cuñaà. Dandu nì casaca nèhivì nsidaa nècuàchì cuhí xi-ne, xì stná nècuàchì inácaa ñà-malu inì-xi nì quixi nùù-yá.

³³ Te nsidaa-né, nì nataca chitu-né yehè vehe ndé iá-yà.

³⁴ Te nì dándúvaha-ya nsidaa nècuàchì cuhí mà, nsidanuu cuèhè quidà-xì-né. Te nì tavà stná-yà cuàhà ñà-malu. Doco cóni sàha-ya cáhàn gà-si, vàchi ináhá-sí ana nduú-yá.

Nansa nì cáhàn Jesús sàhù inicutu ladu Galilea

³⁵ Daaní, itnúú gá dàtnàà nì ndacòo-ya, nì quee cuaán-yá cuàhàn-yà iin xaan ndé còò nèhivì, te yucán nì xìcàn tàhvì-yá nùù Yuamánì-yá.

³⁶ Daaní, después, nì caquee stná Simón xì compañeru-nè cuàhàn-nè nanducu-néyà.

³⁷ Te na ní ndacùhun-neyà, nì cachi-nè xì-yá:

—Cunaha-ní, nsidaa nèhivì, nanducu-né mii-ní.

³⁸ Doco nì cachi-yà xì-né:

—Ni cùhùn-ndà ndè ñuu chicá nùù-xí, cachitnùhu stnàì xì nèhivì yucán ñà-ndùú ndudu ìì, vèchi divi chuun jaàn vèxi —nì cachi-yà.

³⁹ Ñàyùcàndùá, ducán nì xicanuu-ya inicutu ladu Galilea yucán, nì cachitnùhu-ya ndudu ìì xí-yá xì nèhivì nsidaa veheñùhu yucán, te nì tavà stná-yà ñà-malu ñuhú ini nèhivì.

Nansa nì dándúvaha Jesús iin tiàa icúmí cuèhè lepra

⁴⁰ Dandu nì sàà stná iin tiàa icúmí cuèhè lepra, nì tnàtuu-ne nùù-yá, nì sàcuìn sísì-né nùù-yá xicàn tàhvi-né nùù-yá, cachí-nè:

—Nú cuní-ní, vètùni dándúvaha-ní yùhù.

⁴¹ Dandu nì cuhi ini Jesús nècuàchìmà, te nì chituu-ya ndahà-yá nùù-né, cachí-yà xì-né: —Juùn. Vichi duha ni ndúvaha-ní, cachí xì-ní.

⁴² Dandu na momentu nì cachi-yà ducán nì quee cuèhè quidà-xì-né, te nì nduvàha-ne.

⁴³ Dandu na cuáhàn-yà techuún-yánè nùhù-né, dandu cuàhà gá nì chinaha-yánè, cachí-yà xì-né:

⁴⁴ —Cunaha-ní, màsà cáchì-ní ni-íñàha xi nèhivì. Cuisì cuahán-ní nùù dùtù ñà-cundehè-né icà-ní (ñà-sàni nduvàha-ní), te nacuàha-ní promesa xi Dios, vèchi ducán cachí ley xi Moisés, dandu vètùni cundaà ini nèhivì ñà-sàni nduvàha-ní nduá —nì cachi-yà.

⁴⁵ Doco nècuàchìmà, nì quee-ne nì quesaha-né nacání-né xì cuàhà nèhivì, te sàhámà nì xitìà cuentu inicutu. Ñàyùcàndùá mànicùí gá quìhvi vate Jesús ini ni-iin ñuu. Puru campu xicánúú-yá. Doco nsidanicuú xaan nì caquee nèhivì nì nataca-nè nùù-yá.

2

Nansa nì dándúvaha Jesús iin tiàa nì dàñà ìì cuerpu xi

¹ Nì yàha itnii quivì, dandu mànuhù Jesús ñuu Capernaum. Te nì xinitnùhu nèhivì iá-yà vehe.

² Ñàyùcàndùá luegu nì nataca cuàhà-né, ni có-nuná gá índù cundoo-ne, ni siquiera nùù yehè. Te nì càhàn-yà xì-né ñà-ndùú palabra xi-ya.

³ Dandu yucán nì sàà stná itnii gá nèhivì, cùmì-né nsidà-xì iin nècuàchì cuhí nì dàñà ìì cuerpu xi.

⁴ Doco ñà-cuàhà guá nèhivì ndoó yucán, mànicùí quìhvi-ne dècuèndè ndé iá-yà. Ñàyùcàndùá nì nana-ne dìnivèhé nì nacani-nè iyuhu dìniá meru ndé indéhe ndáa iá-yà ini vehe. Te na sàni nacuna-nemà, dandu nì dandúú-né nècuàchì cuhí xi-ne nùù camilla.

⁵ Ñàyùcàndùá, na ní xini-yà ñà-cuàhà guá xíxinindisá-néyà, dandu nì cachi-yà xì nècuàchì cuhí:

—Hijo, xicáhnù inì sàhà cuàchi-ní.

⁶ Doco yucán ndoó stná itnii nècuàchì nduú nècuàchì ley xi veheñùhu, te nì nacani ini-nè:

⁷ “¿Índù chuun càhàn Jesús ducán? ¡Mà ndóo ini Dios sàhà ñà-nduá cachí-nè! Vèchi còò inga ana cui cuicahnú inì-xi sàhà-ndà, cuisì mii-yá”.

⁸ Doco Jesús, nì cundaà ini anima-yà ñà-nduá nacání guá ini nècuàchìmà. Ñàyùcàndùá nì cachi-yà xì-né:

—¿Índù chuun nacání inì-nsia ducán?

⁹ ¿Índù milagru nduú ñà-chicá ùhì quida-nda: a ñà-cachi uun-nda xi nècuàchì cuhí yohó ñà-xicáhnù ini-ndà sàhà cuàchi-ne, te ò ñà-cachi-ndà xì-né ni ndácuín-nè ndanihi-ne camilla xi-ne, te nacaca-ne?

¹⁰ Pues yùhù ana nduú Tnaha Nèhivì Ñuhiví, cuàhìn quide íñàha ñà-cundaà inì-nsia ñà-ndisa icúmí derechu cuicahnú inì sàhà cuàchi nèhivì ñuhiví.

Dandu nì cachi-yà xì nècuàchì cuhí mà:

11 —Mii-ní cachí xí, ndacuiin-ní, ndanihi-ní camilla xi-ní, te xuhun-ní vehe-ní.

12 Dandu nì ndacuiin nècuàchì cuhí mà, te vichi vichi nì ndanihi-ne camilla xi-ne, nì quee-ne, mànuhù-né vehe-ne, indéhe nsidaa nèhivì yucán. Ñàyùcànduá nsidaa-né, nì ndulocó-nè, te nì ndenihi vaha-ne Dios, cachí-nè:

—Ni-iin xichi, có-xiní-ndà cuu (ndiaha guá) nahi ñà-yòhó.

Nansa nì cana Jesús iin tè-dàchíyàhvi nani Leví

13 Daaní, nì quee-ya inga xichi cuàhàn-yà dècuèndè mar. Te nì nataca cuàhà gá nèhivì nùu-yá, te nì dàcuàhá-yánè.

14 Dandu nì yàha-ya (inga xaan), te nì xini-yà iin dèhe Alfeo nani Leví, iá-nè nùu mesa ndé dachíyàhvi-ne. Te nì cachi-yà xì-né:

—Nahà-ní, cunchicùn-ní yùhù.

Dandu nì ndacuiin nècuàchì mà cuàhàn stná-nè xì-yá.

15 Daaní, después dohó nì cuu na ní à-ya vehe Leví mà. Iá-yà xixí-yá, te ndoó stná cuàhà nècuàchì dachíyàhvi, xì cuàhà gá más nècuàchì cachí-nè iá cuàchi-xì, xixí-né xì Jesús xì nècuàchì dacuahá-yá, vachi cuàhà gá nèhivì nchícùn xì-yá.

16 Te nècuàchì ley xi veheñùhu, xì stná nècuàchì fariseu, nì xini-nè nansa quidá-yá xixí-yá xì nèhivì mà. Ñàyùcànduá nì cachi-nè xì nècuàchì dacuahá-yá:

—¿Índù chuun cutnáhá maestru xi-nsia xixí-né xì cuàhà tè-dàchíyàhvi, xì dava gá stná nèhivì cuàchi?

17 Na ní tiacu Jesús cachí-nè ducán, dandu nì cachi-yà xì-né:

—Màdì nècuàchì ndáa vaha xiñuhu xi ana quidatatna xi-né. Nècuàchì cuhí xiñuhu xi ana quidatatna xi-né. Te divi ducání stná yùhù, màdì nèhivì nihnú ndàcuìsì inì-xì vaxi càhàn xí. Còó, nèhivì cuàchi vaxi nanduquí, áma naxicocuìn ini-nè sàhà cuàchi-ne.

Ndià dìsàhà-xì cónisá ínhî dócò nècuàchì dacuahá Jesús na iá ì-yá ñuhiví yohó

18 Daaní, iin xichi na ínhî nècuàchì dacuahá Juan Bautista xì stná nècuàchì fariseu, dandu nì tnàtuu itnii nèhivì nùu Jesús, te nì ndàcàtnùhù-né nùu-yá cachí-nè:

—¿Índù chuun ínhî dócò nècuàchì dacuahá Juan xì stná nècuàchì xídacuahá ley xi tè-fariseu, doco nècuàchì dacuahá mii-ní, còó?

19 Dandu nì cachi Jesús xì-né:

—Nècuàchì ndoó vicò nándàhà, ¿a vátùni iá ñà-cunihii-né na hora ndoó-né cutnáhá-né xì noviu? Còó, vachi na ndoó-né xì noviu, mà cúí cunihii dócò-nè.

20 Doco vaxi iin quivì, dandu mà cóó gá noviu nùu-né, dandísá, tiempu yucán icúmí-nè cunihii dócò-nè.

Ndià dìsàhà-xì sàni dàma estilu sàna, te estilu saa nduá nì nacoó Jesús

21 'Sìcoto saa, màsà nàcàhmá-ndàñá nùu ñà-tùhú. Vachi nú ducán, dandu dandánsiá ndé nì nacàhmá, te chicá icúmí ndàtà sìcoto tuhú mà. Dandu ñà-sàni ndàtà dahuun sìcoto-mà cundua.

22 Stná vinu, nú vinu saa nduá, mà dáquêe stná nèhivì-ñá ini itni iin tuhú, vachi nú ducán, ndàtà-ñá, vachi cahnsiá quida vinu saa ma, te cuità-ñà, te cuchicuehe stná iin mà. Ñàyùcànduá, nú vinu saa nduá, dandu ini itni iin saa covàha.

Nansa nì xitnùhu nèhivì nècuàchì dacuahá-yá na ní sàhnù-nè sìcàyòcò trigu quivì descansu

23 Iin quivì descansu nì sandua, te yáha Jesús nùu iin itu ndé iá trigu, te cutnáhá stná-yà xì nècuàchì dacuahá-yá. Te nacia yáha-ne ducán sàhnù-nè sìcàyòcò trigu mà saxí-né.

24 Ñàyùcànduá, nì cachi nècuàchì fariseu xì-yá:

—Cundehè-ní nansa quidá nècuàchì dacuahá-ní, quidá-né iin chuun có-sàha ley xi-nda quida-nda quivì descansu.

25-26 Dandu nì cachi-yà xì-né:

—¿A cóni cãhví-nsiá (nùù tutu ì) ndé nacáníá nansa nì quida David sàhana na xicánúú ndahví-nè xì compañeru-nè tiempu xi jefe xi dùtù nani Abiatar, te xíhì-nè doco? Nì quíhvi-ne ini veheñùhu xi Dios, te nì xixi-ne dità vídì ì, mate còò permisú cuxi-neà, cuisì-ní dùtù iá permisú cuxi xi ñá-yúcán. Doco David, ndè stná compañeru-nè nì sàha-ne, nì caxixi stná nècuàchìmà.

²⁷ Dandu nì cachi stná-yà xì nèhivì yucán:

—Sàhà ñà-cunduu ñà-vàha xi nèhivì, ñàyùcàndùá nì sàcòò iin quivì descansu, màdiá nì cùyúcùn nèhivì sàhà-ñá (chicá nducahnú) quivì mà.

²⁸ Ñàyùcàndùá, yùhù ana nduú Tnaha Nèhivì Ñuhivì, dandacú stnáì sàhà nansa quida nèhivì quivì mà.

3

Nansa nì nduvàha iin tiàa nì ìchì dahuun iin ndahà-xí

¹ Dandu cuàhàn Jesús veheñùhu. Te na sání quíhvi-ya yucán, (nì xini-yà) jaàn iá iin tiàa nì ìchì dahuun iin ndahà-xí.

² Doco ndoó stná nècuàchì fariseu yucán, indéhe váha-neyà, áma dándùvàha-ya nècuàchì cuhí-mà cahan-né, te ducán nihìndèè-né daquéè cuàchi-ne dìquì-yá sàhà ñà-ndùá quivì descansu.

³ Dandu nì cachi-yà xì tiàa cuhí ndahà-xì mà:

—Ndacuiìn-ní, cuiìn-ní dava mahì nèhivì yohó.

⁴ Dandu nì cãhàn-yà xì nèhivì nánì xì-yá yucán, cachí-yà:

—¿Nansa ndiá ìcà-ndà quida-nda quivì descansu? ¿Amádi chicá iá vaha quida-nda ñà-íá viì, te màdiá ñà-có-ndiáá? ¿Amádi chicá iá vaha dacácu-nda nèhivì quivì mà, te màdiá cahnì stnàhà-ndà?

Doco nècuàchì yucán, còò ni-íñàha ni náxícónihì-né nùù-yá.

⁵ Ñàyùcàndùá, nì xiconúù-yá nùù nsidaa-né, te nì cuduchi ini-yà sàhà-né, vachi caxin sàstnùhù anima-nè. Dandu nì cachi-yà xì tiàa ma:

—Chitanini-ní ndahà-ní.

Dandu nì chitanini nècuàchìmà ndahà-né, te nì nduvàha dahuan.

⁶ Ñàyùcàndùá nì caquee nècuàchì fariseu mà nì cãhàn-nè xì nècuàchì partidu herodi-anu, nì ndatnuhu-né nansa cui dandáñúhú-nèyà.

Nansa nì nataca cuàhà nèhivì nùù mar

⁷⁻⁸ Daaní, cuàhàn-yà xì nècuàchì dacuahá-yá nùù mar, te cuàhà sàstnùhù nèhivì ladu Galilea nì catenchicùn stná xì-yá. Te na ní xitià cuentu ñà-ndiaha guá quidá-yá, dandu más nèhivì nì ndecoyo: nècuàchì ñuu Jerusalén, xì más gà nèhivì ladu Judea xì stná nèhivì ladu Idumea, xì nèhivì ladu duha yùte Jordán, xì nèhivì ladu ñuu Tiro xì ñuu Sidón, nsidaa-né vaxi-ne ndé iá-yà.

⁹ Ñàyùcàndùá, nì cachi-yà xì nècuàchì dacuahá-yá ñà-cundiatu tùha-ne xì iin lancha ndé coo-ya sàhá màsà ndútnúú guâ-yà mahì nèhivì cuàhà mà.

¹⁰ Vachi cuàhà-né nì dándùvàha-ya, ñàyùcàndùá nsidaa nècuàchì cuhí, nì nachitu-né nùù-yá, cuní-nè dacácùhun-ne ndahà-né ìcà-yá, te nduvàha-ne.

¹¹ Stná ñà-malu, na ní xinià-yà, nì sàcùitasisiá nùù-yá, cachá:

—Dèhemanì Dios nduu-ní.

¹² Doco mii-yá, vihi gá cuàhà nì dándàcú ndee-yá nùá ñà-màsà cáhà ana divi nduú-yá.

Nansa nì nacàxin Jesús ùxìn ùi tiàa ñà-cunduu-ne apóstol xi-ya

¹³ Dandu nì nana-ya yucù, te nì cana-ya nècuàchì tuxí-yá ñà-nì cáquixí-né nùù-yá.

¹⁴ Te nì nacàxin-ya ùxìn ùi-nè ñà-cunduu-ne nèhivì cutnahá xi-yá cacanu, dandu después techuún stná-yànè cùhùn-nè cãhàn-nè xì nèhivì palabra xi-ya.

¹⁵ Te nì sàhatahvì-yànè ñà-dándùvàha-ne nècuàchì cuhí, te tavà stná-nè ñà-malu ñuhú anima nèhivì.

16 Te divi nècuàchì yohó xínduu nècuàchì nì nacàxin-ya: iin-ne nani Simón, te divi-ne nì dānānì stnáyà Pedro;

17 daaní, iá stnà dèhe Zebedeo nani Jacobo xì ñani-nè Juan, ndúì nècuàchì mà nì dānānì stnáyà Boanerges, te cuní cachàmà na cāhàn dāvì cāhàn-nè.

18 Daaní iá stnà Andrés, xì Felipe, xì Bartolomé, xì Mateo, xì Tomás, xì dèhe Alfeo nani Jacobo, xì stnà Tadeo, xì Simón nì sanduu partidu cachí-nè nècuàchì Canaán;

19 te nì là stnà Judas Iscariote, divi nècuàchì icúmí cahin xì-yá.

Daaní, nì yàha-ya xì compañeru-yà ini iin vehe.

20 Te yucán nì nataca cuàhà gá tu nèhivì nùù-yá. Ñàyùcàndùá, cónì cúsáá gá-yà cuxi-ya, nì mii-yá nì nècuàchì dacuahá-yá.

21 Dandu nècuàchì xínduu nèhivì vehe-ya, nì xinitnùhu-ne nansa cachí nèhivì sàhà-yá ñà-sànì ndañuhu sàxìnitnùnì-yá, cachí-nè. Ñàyùcàndùá, cuàhàn-nè ndé iá-yà ñà-cùnì-nè cundaca-neyà nùhù.

Nansa nì dàquée cuàchi nèhivì dìquì Jesús, ñà-malu chindéé xì-yá, cachí-nè

22 Daaní, nècuàchì ley xi veheñùhu, nì caquee-ne ñuu Jerusalén, nì casaà-nè ndé iá-yá, te nì cāhàn cuàchi-ne dìquì-yá, cachí-nè xì nèhivì:

—Nècuàchì jaàn, icúmí-nè ñà-malu nani Beelzebú ini-nè, divi quisì cusáhnû. Ñàyùcàndùá, vātùni tavá-né dava ga ñà-malu anima nèhivì, vāchi quisì mà chindéé xì-nè —nì cachi-ne.

23 Ñàyùcàndùá nì cana Jesús nèhivì, te nì nacani-ya historia nduú ejemplu, cachí-yà xì-né:

—Ñà-malu, ¿nansa cui tavà stnahá nsidaa mián? Mà cúí.

24 Vāchi ducán iá xán na iá xì nèhivì dandacú nùù iin ñuu, nú ni táhndè dava-ne, te nāá stnahá-né, dandu mà cúí dandacú gá-nè nùù ñuu mà.

25 Te nèhivì ndoó iin vehe, nú xiní ùhì stnahá-né, dandu mà cúí cundoo tàcá gá-nè.

26 Stnà ñà-malu xi Satanás, nú ni táhndè dava, te cuni ùhì stnahá, dandu mà cuéà, te yàchì nsiha, nú ducán.

27 Vehe iin tiàa ndacuì, mà cúí quìhvi ndevàha nèhivì, te tavá-né ñà-icúmí-tè. Còò, vāchi dihna icúmí-nè chicuhní-nè, dandu vātùni quida-ne ducán.

28 Ñà-ndáà ndúá cachí xì-nsiá, mate nadaa ga cuàchi nèhivì iá nùù Dios, te ò nadaa ga xichi cāhàn ùhì-nè dìquì-yá, vātùni cuicahnú ini-yà sàhà-né.

29 Doco nú ni cāhàn ùhì-nè dìquì Espíritu Ìì xí Dios, dandísá, mà cúí cuicahnú ini-yà, sàhà-né, vāchi nicanicuahàn icúmí-nè cunsida-ne cuàchi ma.

30 Ducán nì cachi-yà xì nèhivì yucán sàhà nècuàchì cāhàn tnùhù dìquì-yá, vāchi cachí-nè ñà-ínacáá iin ñà-malu ini-yà.

Ñà-ndúá nì cachi Jesús sàhà dihi-yá xì sàhà ñani-yà na ní casaà-nè caná-néyà

31 Daaní, nì sàá stnà dihi-yá xì ñani-yà tùvèhé, te nì techuún-nè iin razón caná-néyà.

32 Ñàyùcàndùá, nèhivì ndoó nùù-yá, nì cachi-nè xì-yá:

—Cunaha-ní, tùvèhè cà íín dihi-ní xì stnà ñani-ní, caná-né mii-ní.

33 Dandu nì cachi-yà xì nèhivì mà:

—¿Ana divi nduú mamá xi cahan-nsiá? Te ò ¿ana divi xínduu ñani?

34 Dandu nì xiconúù-yá nì indehè-yá nsidaa nèhivì ndoó nùù-yá, te nì cachi-yà:

—Divi nècuàchì yohó xínduu nahi mamá xi, ò nahi ñani.

35 Vāchi nsidanicuú ana quidà-xì ñà-ndúá cuní Dios, divi xínduu nahi ñani, nahi cùhe, te nahi dihi stnái.

4

In ejemplu sàhà iin nècuàchì xitú

¹ Daaní, inga xichi nì quesaha Jesús dacuahá-yá nèhivì nùù mar. Te yucán nì nataca cuàhà gá-nè nùù-yá. Ñàyùcàndüá, nì nana-ya iin lancha iín yuhù mar mà, te nì sàcòo-ya inì-nu. Te nèhivì cuàhà mà, yuhù mar mà nì sàcùndoo-ne.

² Dandu nì dàcuàhá-yánè cuàhà iñàha, nì nacani-ya xì-né cuàhà historia nduú ejemplu. Te dohó nì cachi-yà:

³ —Cunini-nsia. Nisa là iin nècuàchì xitú, nì quee-ne cuàhàn-ne chihi-ne.

⁴ Te nì sate uun-ne tata mà. Te dava-ña, nì còya nùù ichì. Dandu nì quixi laa, nì saxì-siá.

⁵ Te dava stná mà, nì còya nùù cavà ndé còò cuàhà ñuhù. Te yàchì nì xitià, vàchi có-ndòò cucún ñuhù yucán.

⁶ Doco na ní dùcàn orá, nì ichà, vàchi cónì níhì yohá.

⁷ Daaní, dava stná tata mà, mahì iñù nì còya. Te na ní sahnu iñù mà, dandu nì dàdáhvia viu cuati ma, ñàyùcàndüá cónì cuàha.

⁸ Daaní, dava stná tata mà, nì còya nùù ñuhù vaha, te nì xitià, nì sahnua, te nì cuàha; dava-ña, òcò ùxìn gà tantu nì cuàha; te dava-ña, ùnì dico gà tantu, te dava-ña, ùhùn dico gà tantu nì cuàha.

⁹ Dandu nì cachi-yà xì-né:

—Nì cúninì vaha nsidaa-nsiá ñà-ndüá cachí.

Ñà-ndüá disáhà-xí nì nacani Jesús ejemplu, divi sàhá màsà cùndáà ini nècuàchì cahíchi inì-xì

¹⁰ Na ní ndòò mii Jesús xì ùxìn ùì nècuàchì dacuahá-yá xì stná nècuàchì ndoó yatni, dandu nì ndàcàtnùhù-né nùù-yá sàhá ejemplu mà.

¹¹ Ñàyùcàndüá, dohó nì cachi-yà xì-né:

—Mii-nsiá, sàni nìhitàhvi-nsiá cundaà inì-nsia nansa iá ñuhìví ìì xí Dios, mate nisa là dèhé palabra sàhámà antes. Doco nècuàchì dava ga, còó. Puru ejemplu icúmì nacani xì-né.

¹² Ducán iá sàhá-ñá màsà cúnitnùhu-ne, mate indéhe-né, te màsà cùndáà ini-nè, mate inínì-né. Pues ducán icúmì cuu xì-né sàhá-ñá màsà ndédúmá ini-nè, te cuicahnú ini Dios sàhá cuàchi-ne.

Ñà-ndüá cunì cachi ejemplu sàhá nècuàchì xitú

¹³ Dandu nì cachi stná-yà xì-né:

—¿A ñá-cò-cùndáà inì-nsia sàhá ejemplu jaàn nduá? Pues nú coó, dandu ¿nansa cui cundaà stná inì-nsia sàhá nsidaa ejemplu dava ga?

¹⁴ 'Pues cunaha-nsia, na ian quidá nècuàchì nì dandiàchì uun xi tata mà, ducán quidá stná nècuàchì chihì xì Palabra xì Dios inì anima nèhivì.

¹⁵ Tata nì còyo nùù ichì mà nduú nahi nèhivì inínì xí palabra xi Dios, doco yàchì vaxì ñà-malu dacúxió-si palabra nì ndòò ini anima-nè mà.

¹⁶ Daaní, nahi tata nì còyo nùù cavà nduú nèhivì inínì xí palabra ìì, te luegu cudû ini-nè sàhá-ñá.

¹⁷ Doco na ian cùù xì viu còò yohò-xí, ducán cuú stná xì-né. Iyuhu gá quidándéé ini-nè nchícùn viì-né. Daaní, nú nì yáha-ne iin tnùndoho, ò nú quidáquinì nèhivì xì-né ñà-nchícùn-nè palabra xi-ya, dandu luegu naxícócuûn ini-nè, te nacóó-néa.

¹⁸ 'Daaní, nahi tata nì còyo mahì iñù nduú nèhivì inínì xí palabra ìì,

¹⁹ doco cuàhà gá nacánì ini-nè sàhá vida xi-ne ñuhìví yohó. Te cudû stná ini-nè dacáyà-nè ñà-cuicà-né, vàchi xího sàstnùhù-né cucumi-né cuàhà iñàha. Ñàyùcán nduá sadí xì nùù palabra xi Dios ñà-mà cùì nìhìndéá chindeá-nè.

²⁰ Daaní, nahi tata nì còyo nùù ñuhù vaha nduú nèhivì inínì xí palabra ìì, te xiníndísá-néa. Ñàyùcàndüá, queámà ñà-ndüú-né na iin viu nì cana viì, a sea nduú-né nahi viu nì cana òcò ùxìn tantu, te ò ñá-nì cana ùnì dico tantu, te ò ñà-nì cana ùhùn dico tantu.

In ejemplu sàhá iin lámpara

21 Dandu nì cachi stná-yà xì-né:

—Nú xícàn-ndà quixi iin lámpara, dandu mà chícání dèhé-ndañá tìxi iin canasta, ò tìxi iin cama. Còó, cuiin vateá iin xaan ndé cutnuà inicutu.

22 Cunaha-nsiá, nsidaa ñà-nì ìa dèhé, icumíâ tùi vateá. Te nsidaa ñà-nduá quidá dèhé nèhivì, icúmíâ natùì clarúâ.

23 Nì cúníní vaha nsidaa-nsiá palabra jaàn.

24 Dandu nì cachi stná-yà xì-né:

—Cunini vaha-nsia na sáha xi-nsiá (ichì váha). Vàchi divi vara chitácùhá-nsià icúmí stná mii-nsiá nacuitacùhá-nsià. Doco nú iníní vaha-nsia, dandu chicá nihitáhvi-nsiá cundaà vaha inì-nsia.

25 Vàchi nècuàchì sàñùhú (ñà-vàha) inì-xi, chicá más icúmí-nê nihitáhvi-né; doco nèhivì có-ñùhú ndisa (ñà-vàha) inì-xi, ndè iyuhu (ñà-vàha) ñuhú ini-nè, icúmíâ cuxio nsiha.

In ejemplu sàhà tata sahnú nama

26 Dandu nì cachi stná Jesús:

—Na historia yohó, ducán iá stná ñuhiví ìì xí Dios. Nì chihi iin tiàa tata mahì itù-te.

27 Na túinuù, dandu ndácòo-tè (nácòtò-teá); daaní sàñàa quídì-te. Doco tata mà, xítia te sahnúâ, mate có-cundáà inì-te índù modo sahnúâ.

28 Vàchi iin itu, miá cuàha. Dihna viu xítia, dandu después caná sìcàyòcò-ñà, te nachitu nùniâ.

29 Te nú sàni sisa vaha, dandu yàchì icúmí ndanchito cosecha, vachi sà-ìá`.

Ejemplu sàhà tata yutnù mostaza

30 Dandu nì cachi stná Jesús:

—¿Índù iñàha cui cachì sàhà-ñà cundaà vaha inì-nsia nansa iá ñuhiví ìì xí Dios? ¿Índù ejemplu cui nacani sàhà ñà-cundaà inì-nsia nansa iá tiempu mà?

31-32 Pues, cunaha-nsiá, nahi tata yutnù mostaza, ducán iá tiempu mà. Vàchi tata mà, mate tata chicá cuati iá ñuhiví nduá, doco nú sàni chihi-ndañá, dandu sahnúâ. Queé nahnú ndahà-nú, te vihi gá nducáhnúâ nùù nsidaa gá ñà-tátá. Dècuèndè laa ndavá ansivi vaxi sácuitàndòó casi mahì ndahà-nú —nì cachi-yà.

33 Cunaha-nsiá, cuàhà gá ejemplu nahi ñà-jaàn nì nacani-ya xì nèhivì na dacuahá-yànè, según nansa nì sàà-nè cundaà ini-nè.

34 Puru historia nduú nahi ejemplu nì nacani-ya xì-né, doco na ní ndòò mii-yá xì nècuàchì dacuahá-yá, dandu nì dàtúì nsihi-ya sàhámà nùù-né.

Nansa nì dàcúcuìñ Jesús tàchì, te nì nàcùñuhu dadí tècuí mar

35 Na ní cuñàa quìvì yucán, nì cachi-yà xì nècuàchì dacuahá-yá:

—Cúhùn-ndà yàha-nda ladu mar.

36 Dandu nì dãnácúitià compañeru-yà nèhivì cuáhà mà. Te mii-yá, nacua iá-yà ini lancha, ducán nì saca-neyà cuàhàn-nè yàha-ne mar. Te cuàhàn stná iin ùì gà lancha ndoó stná yucán.

37 Doco después nì dàñà iin tàchì dãná, te nì nacuahnu todò tècuí, nì xìnu-tè ndè ini lancha mà, sàdaaní chitu-nú.

38 Doco mii-yá, indúhu-yá quídì-yà cahà-nú, ihí almohada dìni-yá. Dandu nì dànsícúihnu ini-nèyà, cachì-nè xì-yá:

—¡Ay! ¡Maestro! ¿A có-ndùlòcò-nì ñà-vihini cui-ndà?

39 Dandu nì ndacuiin-yà, nì càhàn-yà nì sadi-yà nùù tàchì mà, te nì cachi-yà xì tècuí mar:

—Ihì-nì ni coó, te ni ndúdádí.

Dandu luegu nì cucuiin tàchì, te nì nàcùñuhu dadí tècuí.

40 Dandu nì cachi-yà xì nècuàchì yucán:

—¿Índù chuun yúhì guâ-nsià? ¿A có-càhvì-nsiá xì Dios?

41 Dandu nì yúhì sàstnùhù nècuàchì mà, te nì cachi-nè iin-ne xì inga-nè (sàhà-yá):

—¿Índù clase nèhivì nduú nècuàchì yohó, te dècuèndè tàchì xì mar iníní xí-nê?

5

Nansa nì tavà Jesús ñà-malu ñuhú ini iin nècuàchì ñuu Gadara

¹ Daaní, nì sàà-nè xì-yá inga ladu mar nùù ñuu nècuàchì Gadareno.

² Te na ní quee-ya nùù lancha, luegu nì ndacùhun tnahá-yá xì iin tiàa ñuhú ñà-malu inì-xi, vaxi-ne dècuèndè mahì cueva ndé xí-indùxin nsì.

³ Vàchi de por sí, yucán iá dahuun-ne. Te còò ni-iin cui chicuhni xì-né, mate cadena ni cúndúá.

⁴ Cuàhà xichi nì sàcùnuhni-nè xì manilla càa, xì stná cadena. Doco siempre sahdé-nèa, te dacuachí stná-nè manilla mà. Còò ni-iin cui nsida vè xì sàxínitnùnì-nè.

⁵ Nicanicuahàn ndui te ñuú ndáhì loco-nè, xicánúú-né yucù xì mahì cueva mà, danácuèhè-nè mii-né xì yùù.

⁶ Doco na ní xini xicà-né Jesús, nì dàyáa-nè nì sàà-nè nùù-yá, te nì sàcuìn sísì-né nùù-yá,

⁷ ndáhì ndee-né quidá ñà-malu, te nì cachi-nè:

—Jesús, ¿ndíà cunduu-ní yùhù? (Yùhù ináhì mii-ní), Dèhemanì Dios iá dìquì-xí ansivi nduu-ní. Sàhà Dios sacúndáhvì nùù-ní, ¡màsà dándóhó-ní yùhù!

⁸ Pues ducán nì cachi nècuàchì mà, vàchi làcà nì cachi-yà xì-ñá:

—¡Cuxio yohó ñà-malu nùù tiàa yohó!

⁹ Dandu nì ndàcàtnùhù stná-yà nùá:

—¿Nansa nanu?

Te nì cachà:

—Ejército naní, vàchi cuàhà nduú-nsí.

¹⁰ Dandu cuàhà gá nì sacundahví tiàa ma nùù-yá ñà-màsà téchúûn-yáñà cùhàn inga ñuu.

¹¹ Te yatni yucù yucán nì sandoo cuàhà cochi, xixáhan-sì.

¹² Ñàyùcàndúá, nì sacundahvíà nùù-yá, cachá:

—Dayáha-ní nsiùhù ni cùhùn-nsì màcùñuhu-nsi ini cochi yucán.

¹³ Dandu nì dándáa-yáñà. Ñàyùcàndúá nì caquea nùù tiàa ma cuàhàn, nì sàcùñuha ini cochi yucán. Nahi ùì mil nì sanduu-sì. Daaní, carrera nì nuu nsidaa-sí candiaa yucán, te nì còyo-sì ini mar nì càhà-sì.

¹⁴ Daaní, tè-xíndíaa xì cochi mà, nì yùhí-te; carrera mànuhù-té nì cachitnùhu-tè xì nècuàchì ini ñuu mà xì stná nècuàchì ndoó ranchu. Dandu nèhivì ndoó yucán, vaxi-ne cundehè-né ñà-ndúá nì cuu.

¹⁵ Nì quesaa nsidaa-né ndé iá-yà, te nì caxini-nè nècuàchì nìsa ñuhu cuàhà ñá-malu inì-xi, iá-nè, ndixí-né sìcoto, sàni nàcòò nsihi sàxínitnùnì-nè. Dandu nèhivì yucán, nì cayùhí-nè.

¹⁶ Te nècuàchì nì caxini nansa nì cuu, nì nacani-ne xì nsidaa nèhivì mà sàhà cochi xì sàhà stná tiàa ma.

¹⁷ Dandu nèhivì cuàhà mà, nì quesaha-né nì sacundahví-nè nùù-yá ñà-nì quèé dahuun-ya ñuu-nè.

¹⁸ Daaní, na sàni nana tu-ya lancha yucán, dandu nì càhàn nècuàchì nìsa ñuhu ñà-malu inì-xi, nì xicàn-nè áma cui cutnahá stná-nè xì-yá cùhùn.

¹⁹ Doco cóni sáha-ya cùhùn-nè:

—Còó —cachí-yà—, xuhun-ní vehe-ni, te cachitnùhu-ní xì tnaha-ní ñà-cuàhà guá nì quida Stohò-ní Dios xì-ní, te nì cuhi ini-yà mii-ní.

²⁰ Ñàyùcàndúá, nì quee tiàa ma cuàhàn-nè inicutu ladu mà nani Decápolis, nì cachitnùhu-ne ñà-ndiaha guá nì quida Jesús xì-né. Te nsidaa nèhivì yucán, nì ndulocó-nè.

Nansa nì dànátiácú Jesús dèhe Jairo, te nì dàndúvaha stná-yà iin nècuàchì ñahà

²¹ Dandu nì nayàha-ya ini lancha cuàhàn-yà inga ladu mar. Te yucán yuhù mar mà nì nataca cuàhà sàstnùhù nèhivì nùu-yá.

²² Dandu yucán nì sàà stná iin nècuàchì cusáhnù nùu iin veheñùhu, Jairo nani-né. Te nì tnàtuu-ne nùu-yá, nì tutuyuhu-né ñuhù nùu sàhà-yá,

²³ te nì sacundahví cuàhà-né nùu-yá, cachí-nè:

—Meru cucáhvì dèheyoquí. Cùhùn-ndà, chindàndòò-ní ndahà-ní dìquì-ñá sàhà-ñá nduvàha-ñá, te màsà cúì-ñá.

²⁴ Ñàyùcàndùá, cuàhàn-yà xì-né. Te cuàhà gá stná nèhivì cutnàhâ xí-yâ nchícùn stná-nè cuàhàn, dècuèndè tnuu cuàhàn-nè xì-yá ñà-cuàhà guá-nè.

²⁵ Te cunaha-nsiá, mahì nèhivì mà cuàhàn stná iin nècuàchì ñahà cuhí. Ûxìn ùì cuà sàcuàhàn-nè ndohó-né cuèhè nì.

²⁶ Te cuàhà gá sàni ndoho-ne nì quida nècuàchì quidátátná, doco cónì níhì nècuàchì mà chindee-ñánè. Còò, chicá nì quida yaa cuèhè xi-ne, dècuèndè sàni dànsihí-né dihùn xí-né sàhá.

²⁷ Doco na ní xinitnùhu-ne sàhà Jesús, nì quixi-ne ladu yàtà-yá mahì nèhivì cuàhà mà, te nì dàcùhùn ndahà-né nùu sìcoto xi-ya,

²⁸ vàchi nì nacani ini-nè: “Nú nì dúcùn ndahí mate sìcoto-ni xi-ya, vètùni nduvàhi”.

²⁹ Te (ñà-ndáà nduá), luegu nì cucuìn nì-né, te nì cuu ini-nè sàni nduvàha-ne cuèhè dana ma.

³⁰ Daaní, momentu mà nì cundaà stná ini-yà sàni dándúvaha iin nèhivì xì poder xi-ya. Ñàyùcàndùá, nì naxicocuìn duma-yá yàtà-xí mahì nèhivì cuàhà mà, te nì cachi-yà:

—¿Ana divì nì dúcùn ndahà-xí ìcà sìcoto xi?

³¹ Dandu nècuàchì dacuahá-yá, nì cachi-nè xì-yá:

—¿A có-xiní-ní ñà-cuàhà guá nèhivì ndoó yohó, te yáha ga tnuu cuàhàn-ndà? Te nú ducán, dandu ¿índù chuun cachí-ní: “¿Ana nì dúcùn ndahà-xí ìcà sìcoto xi?”?

³² Dandu nì xiconúu-yá nì indehè-yá, áma nátùì nècuàchì nì quida mà.

³³ Te nècuàchì ñahà mà, ndé quidí cuisì-né ñà-yúhî-nè, vàchi ináhà-nè ñà-nduá nì cuu xi ini-nè. Dandu nì tnàtuu-ne, nì sàcuìn sísì-né nùu-yá, te nì cachi ndàà-nè xì-yá nsidaa ñà-nduá nì cuu xi-né.

³⁴ Dandu nì cachi-yà xì-né:

—Hija, sàni nduvàha-ní ñà-ní xinindisa-ní. Vètùni nùhù-ní contentu vichi. Iin-ni ní cúxíó cuèhè dana nìsa quida xi-ní.

³⁵ Na meru cachí-yà ducán, dandu nì caquesaa nèhivì vaxi vehe presidente xi veheñùhu ma, te nì cacachi-nè xì nècuàchì mà:

—Sàni xìhì dèhe yoco-ní. Có-xìñùhù cuàhachuún gà-ní maestru.

³⁶ Doco Jesús, cónì ndúlócô-yà sàhà ñà-nduá nì cachi-nè, cuisì-ní nì cachi-yà xì presidente mà:

—Màsà yúhî-ní. Cuisì cunihnu vaha inì-ní.

³⁷ Dandu nì cachi-yà ñà-màsà cútnàhâ gá nèhivì xì-yá, cuisì-ní Pedro, xì Jacobo, xì ñani Jacobo nani Juan.

³⁸ Te nì sàà-yà xì-né ndè vehe presidente mà, te nì xini-yà ndoó chitu nèhivì, yáha ga quidácuàhà-né, sacú ndee-né, te cána fuerte-nè.

³⁹ Dandu nì nsihvi-ya vehe, te nì cachi-yà:

—¿Índù chuun cána guá-nsia, te sacú guá-nsià? vàchi cónì xìhì ñahà chii yohó. Quidì uun ni-ñà.

⁴⁰ Doco nècuàchì mà, nì sàcùndiaa uun-neyà. Ñàyùcàndùá, nì tavà nsihí-yànè fuera, te nì sàca-ya yuadíhâ xì nècuàchì cutnàhâ xí-yá, nì yàha-ne ndé indúhu ñahà chii ma.

⁴¹ Dandu nì tnii-ya ndahà-ñá, cachí-yà:

—Talita cumi —te cuní cachà mà dàhàn ñuu yucán: Yohó cachí xì, ndacuiin xá.

⁴² Dandu vichi vichi nì ndacuiin-ñà nì nacacanu-ñà, vàchi nahi ùxìn ùì cuà xicá-ñà. Te nècuàchì cutnàhâ xí-yà, nì candulocó sàstnùhù-né sàhà ñà-nduá nì cuu.

⁴³ Doco mii-yá, nì chinaha-yánè ñà-màsà cáchí-nè xì nèhivì ñà-nduá nì xini-nè. Dandu nì cachi-yà xì-né nì dácúxí-nèña.

6

Ñà-nduá nì quida nèhivì ñuu Nazaret na ní nùhù Jesús ñuu-yà mà

¹ Dandu nì quee Jesús yucán mànuhù-yá ñuu-yà, te nchícùn stná nècuàchì dacuahá-yá, ndacá tnáhâ-né xì-yá cuàhàn.

² Te na ní sàà quivì descansu ñuu yucán, nì sàhàn-yà veheñùhu, te nì quesaha-yá dacuahá-yá nèhivì. Te na ní inini-ne ñà-nduá nì cachi-yà, nì ndulocó-nè, cachí-nè:

—¿Índù nì xini-ndà nì nìhítàhvì guá nècuàchì yòhó? Te ¿índù nì xini-ndà nì cunchichí guâ-nè? ¿Te nansa iá stná milagru quidá-né?

³ Vàchi iin ana tùha yàcùn yutnù nduú-né. Te dihi-né nani María, te ñani-nè nduú Jacobo, xì José, xì Judas, xì Simón. Te ñahàcúha-ne, ¿a có-ndòó stná-nè yohó ndé ndòò-ndà?

Ducání nì cachi-nè ñà-nì cuduchi ini-nè sàhà-yá.

⁴ Doco nì cachi-yà xì-né:

—Íin ana cáhàn cuenta xi Dios, nú inga ñuu ni cáhàn-nè, dandu siempre quidáñúhú nèhivì ñuu mà-né, doco nèhivì ñuu mii-né, ò tnahane, ò nèhivì vehe-ne, còó, có-quidáñúhú-ñáné —nì cachi-yà.

⁵ Ñàyùcànduá, mànicùí quida-ya milagru ñuu-yà mà, cuisì iin ùì nècuàchì cuhí, nì chitàndòó-yá ndahà-yá dìquì-né, te nì nduvàha-ne.

⁶ Te nì ndulocó-yà ñà-cò-cunì nècuàchì ñuu mà cunindisá-né.

Nansa nì techuín Jesús nècuàchì dacuahá-yá ñà-dacuítià-nè palabra ùì

Dandu nì nacàhin-ya vuelta cuàhà ñuu cuati, nì dàcuàhà-yá nècuàchì ñuu yucán.

⁷ Dandu nì cana-ya ùxìn ùì nècuàchì dàcuàhà-yá, te nì dandàcú-yá ñà-cutnahá ùì ùì-nè cùhùn. Te nì sàhatahvì-yánè ñà-tavà-né ñà-malu.

⁸ Te nì cachi stná-yà xì-né ñà-còò ni-ìñàha cunihi-ne cùhùn ichì mà, cuisì-ní bastón xi-ne; còò morral, còò pan, còò dihùn cunihi-ne ini siuhmatìxi-ne,

⁹ te ndìsàn uun ni cúnái-né. Te cuisì imindaa dùhnù cundixi-ne cùhùn.

¹⁰ Te nì cachi stná-yà xì-né:

—Nú cuàhàn-nsià cundoo-nsia iin vehe, dandu iin-ni cundoo-nsia yucán ndè cachi sàà quivì quee-nsia ñuu mà.

¹¹ Te nú có-cunì nèhivì quihin casú-nè cunini-ne, dandu quee-nsia ñuu-nèmà, te catù-nsiá sàhà-nsiá ñà-còyo yàcá ñuu mà. Vàchi ñà-jaàn cunduu testigu dìquì-né quivì coo juicio xi-ne. Te yùhù cachí xì-nsiá, na sàà quivì ndàcàn Dios cuenta sàhà cuàchi, dandu chicá cuàhà castigu icúmí nècuàchì mà nìhì-né nùù nècuàchì (malu) nì sandoo ñuu Sodoma xì ñuu Gomorra sàhaha.

¹² Dandu nècuàchì dacuahá-yà mà, nì caquihin-ne ichì cuàhàn-nè, nì càhàn-nè xì nèhivì ñà-ndiá ìcà-né naxicocuín ini-nè sàhà cuàchi-ne.

¹³ Te nì tavà stná-nè cuàhà ñà-malu ñuhú ini nèhivì, te nì saquin stná-nè seña xì aceite dìni cuàhà nècuàchi cuhí, te nì dandúvaha-ñané.

Nansa nì xihì Juan Bautista

¹⁴ Ñà-cuàhà guá nì xitià fama xi Jesús, ñàyùcànduá, nì xinitnùhu stná rey nani Herodes. Te sàhàmà nì cachi tèmà:

—Sànì natiacu Juan Bautista, te ñàyùcànduá quidá-né milagru.

¹⁵ Ducán nì cachi tèmà. Doco dava ga nèhivì, nì cacachi-nè sàhà-yà ñà-divi Elías nìsà ìa sàhaha nduú-yá. Te dava ga-nè, nì cachi-nè ñà-iin nècuàchì cáhàn cuenta xi Dios nduú-yá, nahi nècuàchì profeta sàhaha.

¹⁶ Doco Herodes mà, dohó nì cachì-te na ní xinitnùhu-tè sàhà-yá:

—Còó, divi Juan nduú-né, vachi sàni natiacu-nè, mate ní quendodò dìni-né nì quide.

17 Ducán nì cachi tèmà, vàchi antes nì chicadi-te Juan, nì dandàcú-te nùù soldadu xi-tè, te nì tnii tèmàné. Ñàyùcànduá nì sàcùnuhni-nè cadena, te nì sàcùndiadi-nè vehecàa. Pues nsidaa ñà-jaàn nì quida Herodes mà sàhà-ñá cuní-te ndòo vaha-tè nùù iin ñahà nani Herodías. Vàchi sàni nandàhà-té xí-ñá mate ñahàdìhí ñani-te Felipe nduú-ña.

18 Ñàyùcànduá nì cachi Juan xì-té:

—Có-sàha Dios lugar coo-ní xì ñahàdìhí ñani-ní.

19 Pues divi sàhà ñà-jaàn nì xini ùhì Herodías mà Juan, te cuní-ña cahnì-ñánê, doco mànicuí.

20 Vàchi Herodes mà, ináhá-tê Juan ñà-nduú-né iin nècuàchì nihnú ndàà inì-xi, te ì stná ini-nè. Ñàyùcànduá, yúhì-tené. Te divi sàhájàn nì xidahan stná-te nècuàchì mà nùù ñahà mà. Te cudí stná inì-te cunini-tè ñà-nduá cachí nècuàchì mà, mate cóni sàa-te cundaà vaha inì-te.

21 Doco nì sàa iin quivì nì cuu ofrecer nansa dandáñúhú ñahà màné, vàchi nì naxìnu rey mà cuià, te nì quida-tè iin vicò cahnú nì casaà cuàhà tè-cùsáhnú ñuu mà, xì cuàhà stná comandante capitán, xì stná cuàhà tècuicà ndoó ladu Galilea yucán.

22 Dandu nì quìhvi dèheyoco Herodías mà ndé iá vicò, te nì itasaha sàstnùhù-ñá, nì dàcúdì inì-ña rey mà xì stná tè-xínduu visita xi-tè. Ñàyùcànduá, nì cachi-te xi-ñá:

—Ndéni iñàha nì cui cunú, càcùn-ñá nùí, te nihùn-ñá.

23 Te nì chinaha-té Dios ñà-ndéni iñàha nì cui nì càcàn-ña, cuàha-tèñá, mate ni cundúá iin davatahvi ñuu ndé cusáhnú-te, cuàha-tèñá.

24 Ñàyùcànduá nì quee-ña cuàhàn-ña ndàcàtnùhù-ñá nùù dihi-ñá:

—¿Ndìà nduá càquìn?

Te nì cachi dihi-ñá:

—Dìni Juan Bautista càcùn —nì cacha.

25 Ñàyùcànduá, yàchì nì nansihvi ñahà chii mà ndé iá rey mà, te nì xicàn-ña, cachí-ña:

—Dìni Juan Bautista taxi-ní luegu, cunacaà ini iin charola cahnú —cachá.

26 Dandu rey mà, cuàhà gá nì cuhuun inì-te, doco sàhà-ñá sàni dandàa-te, te sàhà stná visita ndoó yucán, ñàyùcànduá có-cuní-te dama-tè ñà-nduá nì cachi-te xi-ñá.

27 Sàhájàn vichi vichi nì techuún-te iin tè-cùhùn cahnì xì Juan, te cunihi tèmà dìnì-né ndixi.

28 Ñàyùcànduá, nì sàhàn tèmà vehecàa, nì quendodò-té dìnì-né, te nihí-teá ini iin charola nì nansihvi nì sàha-tè ñahà chii mà, dandu mii-ñá, nì sàha-ñá dihi-ñá.

29 Daaní, na ní caxinitnùhu nècuàchì nìsa dacuahá Juan, dandu nì casahàn itnii-né nì naquihin-ne iquicúñú nsì ma nì sùxin-ne nì chicaa-nèà ndé nduú cueva xi nsì.

Nansa nì dàcùxí Jesús ùhùn mil nèhivì

30 Daaní, nì cansiaa nècuàchì nì techuún Jesús cacanu, te nì canataca-nè nùù-yá, nì nacani-ne xì-yá nsidaa ñà-nduá nì quida-ne xì ñá-nduá nì chinaha-nè.

31 Dandu nì cachi-yà xì-né:

—Naha-nsià cùhùn cuaán-nda iin xaan ndé có-ndòó nèhivì, quetatu chii-nsiá.

Ducán nì cachi-yà, vàchi nì có-cùsáá gá-nè cuxi-ne, ñà-cuàhà guá nèhivì queé nsíhvi nùù-né.

32 Ñàyùcànduá nì nana-ya xì-né ini iin lancha ñà-cùhùn cuaán-yá xì-né iin xaan ndé còò iin.

33 Doco nì xini nèhivì cuàhàn-yà, te cuàhà-né nì nacuni-nèyà, ñàyùcànduá nì caquee-ne nsidaa ñuu nì dàyáa-nè, te dihna-ne nì sàa-nè nùù-yá.

34 Ñàyùcànduá, na ní quee-ya nùù lancha mà, nì xini-yà cuàhà gá-nè ndoó, te nì cuhi ini-yànè, vàchi nahi riì còò stohò-xi, ducán nduú-né. Ñàyùcànduá, nì dàcuàhá-yànè cuàhà iñàha.

35 Daaní, na ní cuaà nì catnàtuu nèhivì siempre nchícùn xì-yá nùù-yá, cachí-nè:

—Vichi sàcuàhàn nì cuaà, te lugar yohó, còò ni-iin vehe.

³⁶ Ñàyùcàndüá, ndaquìndèè-ní xì nèhivì yohó ñà-nì cuítìà-nè cùhùn-nè ndè ranchu ò ñuu cuati ndoó yatni, te cuiin-ne ñà-cutiacu-nè, vàchi còò ñá-cuxi-ne lugar yohó.

³⁷ Dandu nì cachi-yà xì-né:

—Mii-nsiá dacuxí-nsiánè.

Te nì cachi-nè xì-yá:

—¿A cùhùn-nsì xì ùì cientu dìhùn plata, te cuiin-nsi pan dacuxí-nsínè?

³⁸ Dandu nì cachi-yà xì-né:

—¿Nadaa pan icúmí-nsiâ? Cuahán-nsià cundehè-nsiá.

Ñàyùcàndüá, (nì ndàcàtnùhù-né), te na ní cundaà ini-nè, nì cachi-nè:

—Ûhàn, xì ùì siaca.

³⁹ Dandu nì dàndàcú-yá ni mácùndoo nsidaa nèhivì mà, cuaán cuaán iin iin grupu-nè nùù yùcù cuií.

⁴⁰ Te ducán nì quida-ne nì sàcùndoo yucùn-né, cientu cientu-ne, te dava cientu dava cientu-nè nùù iin iin grupu-nè.

⁴¹ Dandu nì tniì-ya ùhùn pan mà xì ùì siaca ma, nì ndacoto ndiaá-yà dìquì-xí, te nì naquimani-yá Dios sàhà-ñá. Dandu nì dàcuàchí-yá pan mà nì sàha-ya nècuàchì dacuahá-yá, te mii-né, nì dasàn-néa nùù nèhivì cuáhà mà; daaní, divi-ni ducán nì quida stná-yà xì ùì siaca, nì dàcuàchí stná-yàsi nùù-né.

⁴² Te nì xixi nsidaa-né nì ndenuu ini-nè.

⁴³ Dandu nì chivàha-ne ñà-nì cuyodò gá, pedazu siaca xì stná pedazu pan, te nì chitu ùxìn ùì ìcà-ñá.

⁴⁴ Te cunaha-nsiá, ùhùn mil tiàa nì sanduu nèhivì nì xixi xi pan mà.

Nansa nì xica ndodò Jesús nùù tècuíí mar

⁴⁵ Daaní, vichi duha nì cachi-yà xì nècuàchì dacuahá-yá ñà-nì mácùñuhu-ne ini lancha, te codò nùù cueé-nè nùù-yá cùhùn-nè inga ladu mar dècuèndè ñuu Betsaida. Doco mii-yá, cuàhàn-yà danácuítìà-yà nèhivì cuáhà mà.

⁴⁶ Te nì nsihi nì ndaquìndèè-yá xì-né, dandu nì nana-ya iin yucù nì xicàn tàhvi-yá nùù Dios.

⁴⁷ Daaní, na ní cuñaà, xicá ìi lancha mà mahì mar. Doco mii-yá, mindaa-yá iá-yà ñuhù íchí.

⁴⁸ Dandu nì xini xicà-yánè ñà-ùhì gà dacacá-nènu xi yutnù iá nahi pala, vàchi caná tàchì ladu nùù-né. Ñàyùcàndüá, sinduhá nì sàà-yà nùù-né, xicándódo-yá nùù tècuíí mar, te nihnú ini-yà yàha-ya iin ladu.

⁴⁹ Doco na ní caxini-nè nansa xicá-yá nùù tècuíí ducán, dandu nì càna ndee-né, vàchi дума nduá càhàn-né.

⁵⁰ Vàchi nsidaa-né, nì xini-nèyà, te nì ndulocó-nè, yúhí cuàhà-né. Doco nì càhàn-yà xì-né, cachí-yà:

—Nacuàhandee inì-nsia, vàchi yùhù nduí; màsà yúhí-nsià.

⁵¹ Dandu nì quècahnu-ya ini lancha ndé ndoó-né, te nì cucuìin tàchì mà. Ñàyùcàndüá, cuàhà sàstnùhù nì ndulocó gà-nè.

⁵² Vàchi cónì sánìhì váha ini-nè sàhà milagru nì nducuahà pan mà, vàchi ùhì mànihì ini-nè.

Nansa nì dàndúvaha Jesús cuàhà nècuàchì cuhí ñuu Genesaret

⁵³ Daaní, na sàni yàha-ya xì-né mar mà, dandu nì sàà-yà ñuhù íchí iin ñuu nani Genesaret.

⁵⁴ Te na ní quecoyo-ne xì-yá nùù barcu mà, dandu vichi vichi nì nacuni nèhivì ñuu mà-yá.

⁵⁵ Ñàyùcàndüá, nì cadayáà-nè cuàhàn-nè inicutu ladu yucán, nì sàquíhin-ne nècuàchì cuhí xi-ne, te nihí-né nècuàchì mà vaxi nùù-yá itánduhù-né nùù camilla. Te ndéni nì cui nì xinitnùhu-ne iá-yà, divi yucán nì sàà-nè xì nècuàchì mà.

⁵⁶ Te na yáha-ya ñuu cuati, ò ñuu nahnú, te ò iin ranchu, o ndéni nì cui, yucán nì cachitánduhù-né nècuàchì cuhí xi-ne ichì, te nì xicàn-nè ñà-siquiera nùù sàhà sìcoto xi-ya nì dúcùn ndahà nècuàchì cuhí mà. Te nsidaa ana nì dúcùn ndahà-xí ducán, nì nduvàha-ne.

7

Ñà-nduá dacuidá cuàchi ndisa xi anima-ndà

¹ Daaní, ñuu Jerusalén nì caquee dava nècuàchì fariseu xì stná nècuàchì ley xi veheñuhu vaxi-ne, nì quesaa-nè nùù Jesús.

² Te nì caxini-nè nansa quidá nècuàchì dacuahá-yá, xixí-né comida xi-ne, te cóni ndahá-né. Ñàyùcànduá, nì caxitnùhu-ne nècuàchìmà. Vàchi modo jaàn nduhù ndahà-ndà (càhàn-né).

³ Vàchi nècuàchì fariseu mà, xì nsidaa gá nècuàchì raza Judea, nú màsà ndáhá-né, mà cúxí-né, vachi ducán iá estilu xi xii-né chivàha-ne.

⁴ Te nú nì sàhàn-nè yàhvi, dècuèndè ndaha-ne, dandu cuxi-ne. Te cuàhà sàstrnùhù gá estilu icúmí-nè chivàha-ne, vachi icúmí-nè nacate stná-nè taza, quidi, yoo, càa, cama.

⁵ Ñàyùcànduá, nècuàchì fariseu mà, xì stná nècuàchì ley xi veheñuhu, nì xicàn tnùhù-né nùù Jesús, cachí-nè:

—Nècuàchì dacuaaha-ní, ¿índù chuun có-nchìcùn-nè estilu xi xii-ndà? vachi có-nduhù ndahà-né na xixí-né.

⁶ Dandu nì cachi-yà xì-né:

—Ñà-ndàà nduá nì cachitnùhu Isaías sàhà mii-nsiá sàhana, vachi dananí uun-nsia vaha-nsia. Pues ñà-yòhó nduá nì cachi Dios, te nì tiaa Isaías yucán:

Nèhivì yohó, cuisì-ní yuhù-né quidáñuhù-nè yuhù, màdì ini anima-nè, vachi xica ié cahan-né.

⁷ Cahvi-né yuhù tuxí-né, doco có-ndiàà, vachi nèhivì ùún nduú ana nì quidavàha xi ley chináhá-nè nèhivì, cachí Dios.

⁸ Vachi mii-nsiá, mà úhì nacóo nihni-nsia ñà-nduá nì dándàcú Dios, doco ñà-nduú ley xi nèhivì ùún, ñà-jaàn ndisa quidá-nsiá cumplir. Costumbre xi-nsia nduú ñà-nàcáté-nsiá quidi, xì taza, te cuàhà gá costumbre icúmí stná-nsià nahi ñà-jaàn.

⁹ Dandu nì cachi gà-yà xi-né:

—Mii-nsiá, tuxí inì-nsia vātùni nacoo-nsia ñà-nduá nì dándàcú Dios, te cuisì estilu xi mii-nsiá chivàha-nsia.

¹⁰ (Cundehè-nsiá casu yohó): sàhana nì cachi Moisés ñà-icúmí coo tnùñuhu xi-nda nùù yuadíhí-ndá, te nú nì càhàn ùhì iin nèhivì dìquì iin yuadíhí-nè, dandu icúmí-nè cui-nè. (Ducán nì cachi Dios.)

¹¹ Doco tucu cachí mii-nsiá, vachi cachí-nsià vātùni cachi iin nèhivì xì yuadíhí (ndahví-nè): “Mà cúí chindeí mii-nsiá xì ñà-nduá icúmí, vachi sàni cachì sàhà nsidaamá ñà-nduá dihùn ì; vachi sàni cachì: Corbán nduá, te cuní cachàmà, dihùn xí Dios nduá”.

¹² Te nú ducán nì cachí nècuàchìmà, dandu có-sàha ga-nsià chindee gá-nè yuadíhí-nè (xì dihùn mà).

¹³ Ñàyùcànduá, sàhà estilu xi-nsiamà, iladu sàni ndòo ley ì mà, te cuisì estilu nì ndòo nùù-nsiá chivàha-nsia. Te cuàhà gá estilu tnaha ñà-yùcán icúmí stná-nsià —nì cachi Jesús.

¹⁴ Dandu nì cana-ya nèhivì cuàhà mà ñà-tnàtuu-ne nùù-yá, te nì cachi-yà xì-né:

—Cunini nsidaa-nsiá, te cundaà vaha inì-nsia:

¹⁵ mà cúnsídá cuàchi ni-iin nèhivì sàhà ñà-nduá xixí-né. Còó. Ñà-nìhnú ini anima-nè, te quidá-néa, divi ñà-jaàn nduá dacuidá cuàchi xì anima-nè.

¹⁶ Ni cúníní vaha nsidaa-nsiá.

¹⁷ Dandu nì yàha-ya ini vehe, te nì ndòo nèhivì cuàhà mà tùvèhé. Dandu nì ndàcàtnùhù nècuàchì dacuahá-yà nùù-yá ndià nduá cuní cachi ejemplu mà.

18 Te nì cachi-yà xì-né:

—¿A có-sânihì stná ini mii-nsiá? Cunaha-nsiá, ñà-íá fuera iquicúñú-ndà, nú ni queá yuhù-ndà, mà cúí dacuidá cuàcha-ndó nùù Dios.

19 Vàchi màdì ini anima-ndà quíhvia. Còó, tìxi-nda cuáhàn, dandu después queá.

Ducán nì cachi-yà sàhà-ñá cundaà ini-ndà comida vii nduú nsidaa clase ñà-cutiacu-ndà, màdì cuáchi nduá cuxi-ndañá.

20 Dandu nì cachi stná-yà:

—Ñà-nduá nihnú ini nèhivì, te queá anima-nè, divi nduá dacuidá cuàchi xi-né.

21 Vàchi anima nèhivì ñuhú cuàchi-ne, te sàhà ñà-ñùhámà ini-nè, ñà-yùcànduá quidá stná-nè cuàhà ñà-có-ndiáá; vàchi nacání quini ini-nè, te ò cáhàn-nè xì nècuàchì cóni nándàhà xì-né, te ò dava-ne, uun-ni ndoó-né xì ndé ni nèhivì ní cui; te dava-ne, sahní stnahá-né,

22 ò xidá cuíhná-nè; te xího stná-nè ñà-ìcúmí ñanìtnaha-ne; quini quidá stná-nè xì ñanìtnaha-ne, te dandahví stnahá stná-nè; tùha quini stná-nè, te có-cùcáhàn núù-né; te cuàhà-né, cúmbidia stnahá stná ini-nè, te cáhàn quini-ne dìquì ñanìtnaha-ne; cuadú stná-nè, te nacání ndévàha ini-nè.

23 Pues ducán quidá-né, vàchi ñuhú nsidaájàn ini anima-nè, te na quidá-nèa, dandu dacuidá cuàcha-nè —nì cachi-yà.

Nansa nì xinindisá iin nècuàchì ñahà inga ñuu icúmí xí inga religión

24 Dandu nì quee Jesús ladu yucán cuáhàn-yà ladu ñuu Tiro xì ñuu Sidón. Te yucán nì sàa-yà visita iin vehe, doco có-cuní-yà cundaà ini nèhivì ñà-íá-yà yucán; doco mànicúì coo dèhé-yà.

25-26 Vàchi vichi vichi nì xinitnùhu iin nècuàchì ñahà inácaa iin ñà-malu ini dèheyoco-xí. Iin nècuàchì inga ñuu nduú-né, iin ñuu nani Sirofenicia. Te na ní sàa-nè ndé íá-yà, nì sàcuiìn sìsì-né nùù-yá, nì sacundahví-nè nùù-yá áma táva-yá ñà-malu anima dèhe-ne.

27 Doco nì cachi-yà xì-né:

—Dihna icúmí cutahví dèhe (ñuu nsiùhù, dandu después nèhivì inga ñuu), vàchi ducán íá na ian xixí ñà-cuati. Dihna cuxi mii-vé, te ndenuu ini-vè, dandu después cuxi sìhina cuati. Vàchi mà váha cuxio dità-vé, te cuxi-siá.

28 Doco nì cachi tu nècuàchì mà xì-yá:

—Ñà-ndàa nduá, Señor. Doco cunaha-ní, dècuèndè stná sìhina xicánúú tìxi mesa, níhì stná-si iyuhu xèhè dità cóyo ndé xixí dèhe-nda. (Ñàyùcànduá, chindee sacu stná-ní yùhù.)

29 Dandu nì cachi-yà xì-né:

—Vàtùni cachí-ní. Ñàyùcànduá, xuhun-ní vehe-ní, vàchi sàni quee ñà-malu nùù dèhe-ní.

30 Daaní, mànuhù nècuàchì mà vehe-ne, te nì xini-nè indúhu víi dèhe-ne cama, vàchi sàni cuxio ñà-malu nìsa dandoho-xi-ñá.

Nansa nì nduvàha iin nècuàchì dòhò, te ihin stná-nè

31 Dandu nì quee Jesús ñuu Tiro mà, nì yàha-ya ñuu Sidón, xì stná ladu Decápolis, te nì nasaa-yà mar íá Galilea.

32 Te nèhivì yucán, nì saca-ne iin nècuàchì dòhò có-cáhàn vii stná, te nì casaà-nè nùù-yá, nì sacundahví-nè ñà-nì chindánúú-yá ndahà-yá dìni nècuàchì mà, te nduvàha-ne.

33 Dandu nì tavà cuaán-yá nècuàchì mà, te nì dàquíhvi-ya dìnìndàhá-yà ini tùtnù-né. Te nì dàcóyo-ya tédìi-yà dìnìndàhá-yà nì chituu-ya nùù yàá-nè.

34 Dandu nì ndacoto ndiáá-yà dìquì-xí, te nì sàcàn ini-yà, cachí-yà xì tiàa mà dàhàn ñuu mà:

—¡Efata! —ñà-nduá cuní cachà: Ni nuná tùtnù-ní.

35 Dandu nì nuna tùtnù-né, te nì nduvàha stná yàá-nè, vàtùni càhàn vii-né.

36 Te nì cachi-yà xì nsidaa nèhivì ndoó yucán ñà-màsà cachí-nè ni-íñàha xi nèhivì, doco entre más cachí-yà xì-né ducán, vihi gá cuàhà nì sate tnùhu-ne sàhà-yá.

³⁷ Te yáha ga nì ndulocó nsidaa nèhivì, cachí-nè:

—Viì gá quidá-yá nsidanicuú iñaha. Dècuèndè tédòhò natiácú quidá-yá, xì stná tè-ìhìn dànácâhàn-yà.

8

Nansa nì dàcùxí Jesús cùmì mil nèhivì

¹ Quivì yucán nì nataca tu cuàhà sàstnùhù nèhivì, doco còò ni-iñaha cuxi-ne. Ñàyùcàndúá, nì cana Jesús nècuàchì dacuahá-yá, te nì cachi-yà xì-né:

² —Yùhù cuhí inì nèhivì yohó, vàchi sàcuàhàn-ndà ùnì quivì ndoó-né cutnâhâ-né xì-ndà yohó, te còò cá ñà-cuxi-ne.

³ Te nú nì dánacùitiè-nè nùhù-nè vehe-ne, vihini cuitá-nè ichì, vàchi có-xixí-né, te xica ní caquixi dava-ne.

⁴ Dandu nì naxiconihí nècuàchì dacuahá-yá nùù-yá:

—Doco ¿índù nihì-ndà ñà-dacuxi-ndané? vàchi yucù nduá yohó.

⁵ Dandu nì xicàn tnùhù-yá nùù-né:

—¿Nadaa pan nihí-nsiá?

—Ûsà-ñà iá —nì cachi-nè.

⁶ Dandu nì dàndàcú-yá nì mácùndoo viì nsidaa nèhivì mà ñuhù. Te nì tnii-ya ùsà pan mà, nì naquimanì-yá Dios sàhá, te nì dàcuàchì-yáñà. Dandu nì sàha-ya nècuàchì dacuahá-yá, te mii-né, nì dasàn-nèá nùù nèhivì cuàhà mà.

⁷ Te nì ìa stná iin ùì siaca cuati; ñàyùcàndúá nì naquimanì stná-yá Dios sàhà-sí, te nì cachi-yà xì nècuàchì mà ñà-dasàn stná-nèsi nùù nèhivì.

⁸ Dandu nèhivì cuàhà mà, nì caxixi nsidaa-né, te nì ndenuu ini-nè. Te después, nì datàcá-nè ñà-nduá nì cuyodò gá, te nì chitu ùsà canasta-ñà.

⁹ Te nèhivì nì caxixi ma, nahi cùmì mil nì sanduu-ne. Daaní, na sàni dànàcùitià-yá nsidaa nèhivì mà,

¹⁰ dandu nì nana tu-ya iin lancha xì nècuàchì dacuahá-yá cuàhàn-yà xì-né ndè ladu ñuu Dalmanuta.

Nansa nì xicàn nècuàchì fariseu ñà-quida Jesús iin milagru cundehè-né

¹¹ Daaní, nì casaà nècuàchì fariseu nùù-yá, te nì quesaha-né cuàà-nè xì-yá, dasaá-nèyà xicàn-nè ñà-quida-ya iin milagru xi Dios cundehè-né.

¹² Dandu nì sàcàn cuàhà ini-yà, te nì cachi-yà xì-né:

—Mii-nsiá xì dava ga nècuàchì ñuu yohó, ¿índù chuun xicàn guá-nsià quide iin milagru cundehè-nsiá? Yùhù cachí xì-nsiá, mà sàà coo ni-iin milagru cundehè-nsiá.

¹³ Dandu nì nacoò uun-yanè, nì ndècahnu-ya ini lancha inga xichi, te nì quihin-ya ichì cuàhàn-yà inga ladu mar.

Nansa nì dànsínúú ini Jesús nècuàchì dacuahá-yá milagru sàhà pan ñà-màsà nácání gá ini-nè sàhà nansa nihì-né ñà-cutiacu-nè

¹⁴ Cunaha-nsiá, sàni nandòdó nècuàchì dacuahá-yá cunihì ga-nè pan cùhùn ini lancha mà. Cuisì iin-nia nihí-né cuàhàn.

¹⁵ Dandu nì cachi-yà xì-né:

—Cundehè-nsiá, cuidadu gá ni cùndóó-nsiá sàhà tàtnà nsidátáchí xí pan xi nècuàchì fariseu xì stná Herodes.

¹⁶ Dandu nì quesaha-né nì ndatnuhu-né, cachí-nè:

—Ádi ñà-còò pan nihì-nda vaxi, ñàyùcàndúá cachí-yà xì-ndà ducán —cachí-nè.

¹⁷ Sàhájàn na ní cundaà ini-yà ñà-nduá ndatnúhù-nè, dandu nì cachi-yà xì-né:

—Có-xiñùhù ndatnuhu-nsiá sàhà-ñà còò pan nihí-nsiá vaxi. ¿A có-nsínúú ini-nsia (ñà-nduá nì xini-nsià)? Yùhù xiní tàñáha ga cundaà inì-nsia. ¿Na cueé guá sànihì inì-nsia!

¹⁸ Iá nduchínúù-nsiá, ñàyùcàndúá xiñuhu cundehè-nsiá. Te iá stná tùtnù-nsiá; xiñuhu cunini-nsia. ¿A có-nsínúú inì-nsia nansa nì cuu daa?

19 Na ní dasín ùhùn pan, te nì xixi ùhùn mil tiàa, ¿nadaa ga ìcà pedazu pan nì ndòo nì dàtàcá-nsià?

— Ûxìn ùià — cachí-nè.

20 Dandu nì cachi tu-ya:

— Na ní dasín ùsà pan nì caxixi cùmì mil nèhivì, ¿nadaa ìcà pedazu pan nì dàtàcá-nsià?

— Ùsà — cachí-nè.

21 Dandu nì cachi tu-ya xì-né:

— ¿A táñâha ga mànhì inì-nsia?

Nansa nì dándúvâha Jesús iin nècuàchì cuaá ñuu Betsaida

22 Dandu nì sàà-yà xì-né ñuu Betsaida, te nèhivì ndoó yucán, ndacá-né iin nècuàchì cuaá nì quesaa nùù-yá, sacúndáhvî-nè ñà-nì chítúú-yá ndahà-yá nùù-né, te nì ndúvâha-ne.

23 Ñàyùcàndùá, nì tniì-ya ndahà nècuàchìmà, te nì tavà-yánè fuera ñuu tii ma. Dandu nì dàcùchí-yà tèdií-yà nduchìnúù-né, te nì chituu-ya ndahà-yá ndé cuhí nùù-né. Dandu nì ndàcàtnùhù-yá nùù-né, a sàni natùinuù-né, á coó.

24 Dandu nì ndacoto-ne, te nì cachi-nè:

— Vâtùni indéhi nèhivì, xicánúú-né, doco na iá yutnù, ducán ndáa-ne.

25 Dandu, nì nachituu-ya ndahà-yá nduchìnúù-né, te nì indehè nsíí-né. Te momentu yucán nì nduvâha nduchìnúù-né, te nì natùì nina.

26 Dandu nì cachi-yà xì nècuàchìmà ñà-nì nùhù-nè vehe-ne, doco màsà yáha-ne ñuu tii ma, ni màsà cáchí-nè xì nèhivì ndoó yucán.

Nansa nì cachi Pedro ñà-xìníndísâ-né divi Cristu nduú Jesús

27 Daaní, cuàhàn-yà xì nècuàchì dacuahá-yá ndè ñuu cuati ndoó yatni ñuu Cesarea de Filipo. Te na cuàhàn-nè ichì, dandu nì xicàn tnùhù-yá nùù-né, cachí-yà:

— ¿Ana nduú yùhù, cachí nèhivì?

28 Te nì cachi-nè xì-yá:

— Dava-ne cachí-nè Juan Bautista nduu-ní. Te dava-ne cachí-nè Elías nduu-ní, te dava ga-nè cachí-nè ñà-ndùù-ní nahi profeta sàhana.

29 Dandu nì cachi-yà xì-né:

— Doco mii-nsiá, ¿ana nduí cachí-nsià?

Dandu nì cachi Pedro:

— Divi Cristu (nì quixi dìquì-xí) nduu-ní.

30 Dandu nì sàcùnaha nsidaa nècuàchì dacuahá-yá mà ñà-màsà cáchí-nè xì nèhivì dava ga ni-iin palabra mà.

Nansa nì cachitnùhu Jesús icúmí-yâ cui-yà

31 Dandu nì dátúí-ya nùù-né nansa icúmí cuu xi-yá después. Nì cachi-yà xì-né ñà-mii-yá ana nduú Tnaha Nèhivì Ñuhívì, icúmí-yâ ndoho cuahà-yá. Vàchi tè-sàhnú xídandacú, xì stná dùtù xícusahnú, xì stná nècuàchì ley xi veheñùhu, nsidaa-né icúmí-né cahíchì ini-nèyà, dandu (càcàn-nè) cahni nèhivì-yá. Doco tìxi ùnì quivì icúmí-yâ nati-acu-yà,

32 nì cachi-yà, cáhàn vate-yà xì-né ducán. Ñàyùcàndùá, nì tavà cuaán Pedro-yà, nì cachi-nè xì-yà ñà-màsà cáchí-yà ducán.

33 Doco nì nacuico-yá ladu yàtà-yá, nì indehè-yá dava ga nècuàchì dacuahá-yá, te nì càhàn duchi ini-yà xì Pedro, cachí-yà:

— Cuxio-ní nùí, vachi nahi ñà-malu Satanás nduu-ní. Có-nìhnú vâha inì-ní Dios. Cuisì chuun xi nèhivì ñuhívì nihnú inì-ní.

34 Dandu nì cana-ya nècuàchì dacuahá-yá xì dava ga nèhivì ndoó yucán, te nì cachi-yà xì-né:

—Nsidaa ana cuní cunchicùn xí, xiñuhu nacoo-ne ñà-nduá cuní inì-ni mii-né quida-ne, te cunchicùn-nè yùhù, quida-ne cuenta na ian nsidá stná-nè cruz xi-ne ñà-cui stná-nè xí.

³⁵ Vàchi nú cuní iin nèhivì dacácu-ne vida xi-ne, cutu ñà-dandáñúhú-nêàmà cundua. Doco nú ni cuí-nè sàhà yùhù ò sàhà razón ndiaha xí, dandu ñà-sàni càcu ndisa vida xi-ne nduá.

³⁶ Vàchi mate ni níhì iin nèhivì nsidaa ñà-íá ñuhiví, doco ni mà sàà-mà cundua ñà-vàha xi-ne nú màsà sàà stná anima-nè càcua nùu Dios. Còó, mà cúí.

³⁷ Te ò nú ni cuní stná iin nèhivì nacuiin-ne anima-nè, còó, mà cúí.

³⁸ Vàchi nèhivì tiempu vichi, nacóó-né Dios, te xidá cuàchi-ne. Ñàyùcànduá, iin nècuàchì íá mahì nèhivì malu ndoó vichi, te cucáhán nùu-né yàha-ne ladu xi, te ò cucáhán nùu-né cunini-ne palabra xi, ndahví-nè, vachi nú ducán, dandu yùhù ana nduú Tnaha Nèhivì Ñuhiví, icúmí stnáì nacuaì mii-né quivì naxicocuïn. Vàchi icúmí naxicocuïn ñuhiví yohó, cutnahí xì ángel ì-xí quixi, te ndiaha gá icúmí nanchiì quida Yuamáni.

9

¹ Dandu nì cachi stná-yà xì-né:

—Palabra ndàcuìsì nduá yohó cachítnùhi xì-nsiá, ñà-dava mii-nsiá nècuàchì itá yohó, antes cui-nsiá icúmí-nsiá cuni-nsiá cusahnú fuerte Dios xì poder xi-ya —nì cachi-yà.

Nansa nì nadama Jesús mii-yá nì natnuù nihni ndiaha-yá

² Daaní, nì yàha ñhù quivì, dandu nì saca-ya Pedro, xì Jacobo, xì Juan, cuàhàn cuaán-yá xì-né ndè dìni iin yucù ducún, te yucán nì nadama-ya mii-yá; tucu nì nàcùnahà-yà nì xini nècuàchì mà.

³ Nì nducuxín yaa sìcoto xi-ya, te nì nanchiì yéhà. Na cuxín yaa ñà-nduú yùhà (dìni yucù), ducán nì nducuxán. Còò nì-iin nèhivì ñuhiví cui nsida cuxín xán ducán.

⁴ Daaní, yucán nì ndecoyo stná nèhivì (sànaha) nani Elías xì Moisés, ndatnúhú-nê xì-yá.

⁵ Dandu nì cachi Pedro xì-yá:

—Maestro, ñansicáhán-ndá ndoo-nda yohó! Chicá vaha quida vaha-nsi ùni siahva, ian coo mii-ní, te inga coo Moisés yohó, te inga coo stná Elías yohó —nì cachi-nè.

⁶ Doco ñà-yáha guá yúhì nsidaa-né, ñàyùcànduá ni cóni cundáà ini Pedro nansa cachi-nè.

⁷ Daaní, nì nuu iin vico yucán, te nì dàhvi nsidaa-né vico mà. Dandu nì tiacu-nè cáhàn iin ana cáhàn mahiá, cachí-yà:

—Dèhemaní nduú ana yohó. Cunini-nsia ñà-nduá cachí-yà.

⁸ Daaní, nì ndacoto nècuàchì dacuahá-yá, doco na iin cachí còó cá iin ni xini-nè, ndé làcà mii-yá íá yucán.

⁹ Daaní, nì naquihin-ya ichì mànuu-ya xì-né yucù yucán. Te ichì mà nì dandàcú-yá nùu-né, cachí-yà:

—Màsà nácání-nsiá xì nèhivì ñà-nduá nì xini-nsia dècuèndè nú sàni natiacu yùhù ana nduú Tnaha Nèhivì Ñuhiví.

¹⁰ Ñàyùcànduá, nì chivàha nècuàchì mà chuun jaàn ini anima-nè, doco nacání cuáhà ini-nè nansa coo ñà-natiacu-yà.

¹¹ Dandu nì xicàn tnùhù-né nùu-yá, cachí-nè:

—¿Índù chuun cachí nècuàchì ley xi veheñùhu ñà-dihna icúmí Elías naxicocuïn-nè?

¹² Dandu nì cachi-yà xì-né:

—Ñà-ndáà nduá, dihna icúmí Elías naxicocuïn-nè, te nsida vii-né nsidaa chuun có-íá vii. Doco ¿nansa cachí stná tutu ì sàhà yùhù? Pues nacáníamà nansa icúmí ndohi xì nansa icúmí nèhivì cahíchi ini-nè yùhù.

¹³ Doco cunaha-nsiá, sàni quixi Elías mà. Doco nèhivì, nì quida ndevàha-ne xì nècuàchì mà nacua nì cudì ini-nè, vachi ducán sàni cachitnùhu tutu ì.

Nansa ni tavà Jesús iin ñà-malu inácaa ini iin tèchii

¹⁴ Dandu ni nasaa-yà xì compañeru-yà ndé ni ndòo dava ga nècuàchì dacuahá-yá. Te yucán ni xini-yà ndoó cuàhà nèhivì sàni nataca nùu nècuàchìmà. Te ndoó stná nècuàchì ley xi veheñùhu, náâ tnahá-né xì nèhivì xí-yá mà.

¹⁵ Te na ní xini nèhivì cuàhà mà mii-yá, luegu ni ndulocó nsidaa-né, te ni cadayàa-nè vaxi-ne, ni casàhú-nè xì-yá.

¹⁶ Dandu ni ndàcàtnùhù-yá nùu-né:

—¿Ndíà ndatnúhú guâ-nsià xì nècuàchì yohó?

¹⁷ Dandu ni càhàn iin ana iín mahì nèhivì cuàhà mà, cachí-nè:

—Maestro, yohó ndaquí dèhi vaxi nùu-ní, vachi inácaa iin ñà-malu inì-te, te sadià nùu-té, mà cùì càhàn-te.

¹⁸ Te ndéni ni cui iá-te, vaxa sahní ihá-te, ducán-te, dandu queé chihìñù yuhù-té, saxíndiaá tnahá nùhu-tè, te nduyútnú tehe-té. Te sàni xicàn tàhví nùu nècuàchì dacuaha-ní ñà-tavà-néà, doco mànicùí.

¹⁹ Dandu ni cachi Jesús:

—Mii-nsiá, mà túha-nsia cunindisá-nsiá. ¿Nadaa ga quivì icúmí coi xì-nsiá, te quidandee gá stná inì sàhà-nsiá? Pues cundaca-nsiáte quixi nùí.

²⁰ Dandu ni saca-ne tèchii ma vaxi nùu-yá. Doco na ní xini ñà-malu mà mii-yá, luegu ni sahní ihá-te, ñàyùcàndùá ni sàcasàn-té, natùì nìhní-te, te caná chihìñù yuhù-té.

²¹ Dandu ni xicàn tnùhù-yá nùu yua-té, cachí-yà:

—¿Nadaa tiempo sàcuàhàn-ndà ndohó-te ducán?

Dandu cachí yua-té:

—Ndè tii-té.

²² Te cuàhà xichi nduá-te mahì ñuhu quidá ñà-malu. Ndè stná ini yùte sàcasàn-té, vachi cunià cahniá-te. Ñàyùcàndùá, nú vátùni chindee-ní nsiùhù, dandu cundehè ndahví-ní nsiùhù, te quida manì-ní xì-nsí.

²³ Dandu ni cachi Jesús xì-né:

—Cuisì cunià cunindisa-ní, te vátùni. Vachi iin nècuàchì xiníndísâ, vátùni nìhitàhvi-né nsidaa ñà-vàha xicàn-nè.

²⁴ Dandu luegu ni sacu yua-té, te ni càhàn fuerte-nè, cachí-nè:

—Yùhù, xiníndísê vichi; te nú cô-sâi cunindisá vahi, dandu chindee-ní yùhù ñà-ní cúníndísâ gué`.

²⁵ Dandu ni xini Jesús ñà-vihi gá cuàhà nèhivì natáca. Ñàyùcàndùá, ni dándàcú-yá ni sadi-yà nùu ñà-malu mà, cachí-yà:

—Yohó ñà-malu quidá quini xi téchii yohó ñà-mà cùì càhàn-te, te có-tiàcú-te, nacoo dahuun-tè, te màsà naxícócuñn gò nansihvu inì-te.

²⁶ Dandu yáha ga ndee ní ndàhà, ni dándàcùchá-te, te ni quea cuàhàn. Doco nahi ana ni xihì ni ndòo-tè. Ñàyùcàndùá, cuàhà nèhivì ni cachi-nè:

—Sàni xihì dahuun-tè.

²⁷ Doco ni tnií-ya ndahà-té ni ditá-yà, te ni dándàcuíin-yàte.

²⁸ Daaní, ni quihvi cuaán-yá xì nècuàchì dacuahá-yá ini iin vehe, te yucán ni xicàn tnùhù-né nùu-yá, cachí-nè:

—¿Índù chuun mànicùí tavà nsiùhù ñà-malu mà (nùu-te)?

²⁹ Dandu ni cachi-yà xì-né:

—Mànicùí, vachi ñà-malu tnahà quisì mà, có-queá nansa ni ni cui, cuisì nú ni cacán tàhvi-nsiá nùu Dios, te cunihì stná-nsià cundoo dòcò-nsià.

Nansa ni cachitnùhu Jesús inga xichi ñà-icúmí-yâ cui-yà

³⁰ Dandu ndacá-yá nècuàchì dacuahá-yá cuàhàn-yà xì-né ndè ladu Galilea. Doco cuàhàn dèhé-yà, vachi có-cùní-yà cundaà ini nèhivì índù xicánúú-yá.

31 Te tiempu mà chináhá stná-yà nècuàchì dacuahá-yá mà (sàhà nansa icúmí-yá cui-yà), te dohó nì cachi-yà xì-né:

—Yùhù ana nduú Tnaha Nèhivì Ñuhívì, icúmí yàhi ndahà nèhivì (malu), vèchi iá iin tiàa icúmí quida xí entregar ñà-cahni nèhivì yùhù; doco tìxi ùnì quivì icúmí natiacuì.

32 Pues divi nduá nì cachi-yà, doco cónì sàa nècuàchì mà mànhì ini-nè ñà-nduá cunì cachàmà. Te yúhì stná-nè ndàcàtnùhù-nè nùu-yá sàhà-ñá.

Nansa nì cachi Jesús ana chicá ndiaá

33 Dandu nì sàa-yà xì-né ndè ñuu Capernaum. Te na iá-yà ini iin vehe yucán, dandu nì xicàn tnùhù-yá nùu-né, cachí-yà:

—¿Ndia nduá ndàcàtnùhù tnahá guâ-nsià ichì vèxi-nda?

34 Doco dadí úun nì ndòo-ne, vèchi ichì mà nì cuàa-nè ndàcàtnùhù tnahá-né índu nècuàchì chicá ndiaá.

35 Ñàyùcànduá, nì sàcòo-ya, te nì cana-ya nsì-úxin ùi-nè, te nì cachi-yà xì-né:

—Iin ana cunì cunduu ana chicá ndiaá, xiñuhu cunihnu ini-nè nduú-né ana chicá có-dàndàcú, te cunucuachì stná-nè nùu nsidaa nècuàchì dava ga.

36 Dandu nì cana-ya iin tètii nì chicanì-ya mahì nsidaa-né, te nì numi nihni-yàte, cachí-yà xì-né:

37 —Nú sàhà yùhù quidáñúhú nèhivì iin tètii nahi tè-yòhó, dandu davani queá na ian yùhù quidáñúhú-nè. Te nú yùhù quidáñúhú-nè, dandu iin-ni quee stná ñà-quidáñúhú stná-nè ana nì techuun-xí vèxi.

Nècuàchì có-xinì ùhì xì-ndà, favor xi-nda iá-nè

38 Dandu nì cachi Juan xì-yá:

—Maestro, nì xini-nsì iin tiàa tavá xi ñà-malu nùu nèhivì, te ndàcùcahan-né quivì mii-ní. Doco có-nduú-né iin ana cutnàhâ xí-ndá xicánúú. Ñàyùcànduá, nì sadi-nsì nùu-né ñà-màsà quidá gá-nè ducán.

39 Doco nì cachì Jesús xì-né:

—Còó, màsà cádí-nsià nùu-né, vèchi iin nècuàchì ndàcùcahan xi quivì, te quidá-né milagru ducán, ùhì càhàn quini stná-nè dìquí.

40 Vèchi nsidaa ana có-xinì ùhì xì-ndà, favor xi-nda iá-nè.

41 Te nú ináhá nèhivì nduú-nsiá nèhivì xí, te sàhàmà quidá víi-né xì-nsiá, dandu seguru icúmí-nè nihì-né ñà-vàha xi-ne nùu Dios, mate iyuhu tècuí-ni nduá nì sàha-nensià nì xihì-nsia.

Cuidadu cundoo-nda ñà-màsà quidá-ndá cuàchi

42 Dandu nì cachi tu Jesús:

—Iin ñà-cuati xiníndísá-xí, nú nì dátúcù nèhivì-ñá, dandu ¡ndahví-nè! Vèchi chicá vaha màcùndiacu iin yùu yódò dùcùn-né, te ndiachi-né mahì mar sàhà-ñá màsà dátúcù gá-nè ñà-cuati.

43 Te nú sàhà ndahà-nsiá xidá cuàchi-nsia, dandu chicá vaha ni táhndèa. Vèchi chicá nsiaha (sàa-nsià nùu Dios) xì iin-ni ndahà-nsiá, te cutiacu-nsià nicanicuahàn, te màdiá coo ndúà, te ndiachi-nsiá andea, vèchi yucán, mà cúí ndàhvà ñuhu.

44 Te sìcùdì ñuhú yucán, mà nunca cuì-sì, te ñuhu yucán, mà sàa ndàhvà.

45 Te nú sàhà sàhà-nsiá xidá cuàchi-nsia, dandu chicá vaha ni táhndè stná, vèchi chicá nsiaha (sàa-nsià nùu Dios) xì iin-ni sàhà-nsiá, te cutiacu-nsià nicanicuahàn, te màdiá coo ndúà, te ndiachi-nsiá andea, vèchi yucán, mà cúí ndàhvà ñuhu.

46 Te sìcùdì ñuhú yucán, mà nunca cuì-sì, te ñuhu yucán, mà sàa ndàhvà.

47 Te nú sàhà nduchìnúu-nsiá xidá cuàchi-nsia, dandu chicá vaha ni tavá-nsiáñà. Vèchi chicá nsiaha sàa-nsià xì imindaa nùu-nsiá, te màdiá coo ndúà, te ndiachi-nsiá andea.

48 Vèchi sìcùdì ñuhú yucán, mà nunca cuì-sì, te ñuhu yucán, mà sàa ndàhvà.

49 'Nsidanicuú nèhivì, icúmí-nè (yàha-ne tnùndoho) na ian nsí yadi-né yoho te yucán; (doco bien xi-ne cundua mà, na ian nduhàdì comida) ñà-quéa ìn.

⁵⁰ Vàha ga ìin, vèchi nsidá ádiá ñà-xìxì-ndà; doco nú sàni ndañuhu ñà-ádì xán, dandu mà cúí gá nduhadiá. Te na ian quidá ìin (iá vaha), ducán xiñuhu quida stná mii-nsiá xì anima-nsiá, te cundoo màni stná-nsiá.

10

Màsà caté stnàhà-ndà xì nècuàchì vehe-nda

¹ Dandu nì quee Jesús ñuu yucán, cuàhàn-yà ladu Judea, divi iin ladu Judea iá ndè inga ladu yùte Jordán. Te yucán nì nataca tu cuàhà gá nèhivì nùù-yá. Te nì quesaha-yá dacuahá-yànè nacua quidá-yá siempre.

² Te yucán nì casaà stná nècuàchì fariseu, te nì càhàn-nè xì-yá áma níhìndèè-né coo nansa daquéé cuàchi-ne dìquì-yá. Te dohó nì cachi-nè xì-yá:

—¿A vátùni iá ñà-cate stnàhà-ndà xì ñahàdìhì-ndà?

³ Dandu nì cachi-yà xì-né:

—¿Ndíà nduá nì dándàcú Moisés quida-nsia?

⁴ Te nì cacachi nècuàchì yucán:

—Nì sàha Moisés lugar ñà-cuyucun iin tutu nùù juez, dandu vátùni cate stnàhà-ndà.

⁵ Dandu nì cachi-yà xì-né:

—Cunaha-nsiá, cuisì sàhà ñà-cò-cùnì-nsiá cunini viì-nsiá, ñàyùcànduá nì tiaa Moisés ley jaàn.

⁶ Doco na ní sàcòò ñuhivì, còó. Vèchi na ní quidayucun Dios ñuhivì, dandu nì quidayucun stná-yà nèhivì, iin-ne nì sàcùnduu tiàa, te inga-nè ñahà.

⁷ Ñà-jaàn nduá disàhà-xì nándàhà iin nècuàchì tiàa xì iin nècuàchì ñahà, te quecuáân-né nùù yuadìhì-nè.

⁸ Ñàyùcànduá, mate diín diín nì sanduu-ne antes, doco na imindaa nèhivì sàni nanduu-ne vitni. Te sàhàmà, có-nduú gá-nè diín diín nèhivì; quida-nda cuenta na ian iin-ni nèhivì nduú-né.

⁹ Ñàyùcànduá, nú ducán sàni dàcuàcá stnahá Dios-nè, dandu ni-iin nèhivì màsà caté stnàhá-né —nì cachi Jesús.

¹⁰ Daaní, na sàni nansihvi-ya ini vehe, dandu nì ndàcàtnùhù gá nècuàchì dacuahá-yá nùù-yá sàhà chuun jaàn.

¹¹ Te nì cachi-yà xì-né:

—Nú ni caté iin tiàa ñahàdìhì-nè, te coo-ne xì inga nècuàchì ñahà, dandu cuàchi ndisa nduá nùù Dios, te cuàchi nduú stná nùù ñahàdìhì-nè primeru.

¹² Stná nècuàchì ñahà, nú ni caté-nè ì-né, te nandàhà tú-né xì inga tiàa, cuàchi nduú stná.

Nansa nì chitàndòó Jesús ndahà-yá dìni ñà-cuati sàhà-ñà cundiatú anima-vè

¹³ Daaní, ndacá nèhivì ñà-cuati xì-né vaxi nùù-yá ñà-chitàndòó-yá ndahà-yá dìniá. Doco nècuàchì dacuahá-yá, nì sadi-nè nùù nècuàchìmà.

¹⁴ Te na ní xini-yà ñà-nduá quidá-né, nì cuduchi ini-yà, cachí-yà:

—Nacoo-nsia ñà-cuati ni quixá nùù. Màsà cadí-nsiá nùá, vèchi ana nihnú inì-xi nahi ñà-cuati, divi cunduu ana sàà ñuhivì ì xì Dios.

¹⁵ Te yùhù cachí xì-nsiá, nú màsà cóó (vítá ini nèhivì) nahi ñà-cuati, te ducán quihvi-ne ichì ñuhivì ì xì mii-yá, dandu mà nunca sàà-nè yucán —nì cachi-yà.

¹⁶ Dandu nì numi nihni-yaña, nì chitàndòó-yá ndahà-yá dìniá, te nì xicàn tàhvi-yá ñà-ndiaha nùù Dios sàhà-ñà.

Nansa nì cachi Jesús xì iin tèchii cuica

¹⁷ Daaní, na lácà nì quihin Jesús ichì cuàhàn-yà, dandu nì xini-yà yucán vaxi iin tèchii carrera. Te na ní quesàa-te nùù-yá, nì sàcuìn sàsì-té, cachí-te:

—Maestro, vaha ndisa-ní. Cachì-ní xí ndià nduá quide, te nìhítáhví vida ndiaha nicanicuahàn.

¹⁸ Dandu nì cachi-yà xì-né:

—¿Ndià nduá disáhà-xí cachí-ní xí: “Mii-ní vaha-ní”? Vàchi còò ni-iin nèhivì ùún vaha ndisa, cuisì nú nduí Dios, dandu vaha ndise.

¹⁹ Pues vichi, ináhà-ní nansa nì dándacú-yá quida-nda: màsà cáhni stnaha-nda, ni màsà cáhàn-ndà xí inga ana có-nduú nècuàchì vehe-nda, te màsà quidá cuihna-nda, ni màsà cachí-ndà ni-iin tnùhu sàhà ñanìtnaha-nda; te màsà dándáhvì stnàhà-ndà. Te icúmí stnà-ndà quidañuhu-nda yuadíhí-ndá.

²⁰ Dandu nì cachi tu tèmà xì-yá:

—Maestro, nsidaájàn sàni chivàhià dècuèndè na tií.

²¹ Dandu màni màni nì indehè-yáte, vachi cuú ini-yà sàhà-té, te nì cachi-yà:

—Cumàni gá inga iñàha quida-ní. Dicò nsihì-ní ñà-nduá icúmí-ní, te dasàn-ní dihùn mà nùù nècuàchì ndahví, dandísá, nìhítáhvì-ní sàà-ní ansivi, te yucán cucumi ndisa-ní cuahà ñà-cuicà. Dandu quixi stnà-ní, cunchicùn-ní yùhù; te dispuestu coo-ní cui-ní sàhí, mate ni cuí-ní nchìca cruz.

²² Doco tèchii ma, na ní inini-tè ñà-nduá nì cachi-yà, nì ndulocó-te, te nì cuhuun cuahà inì-te, vachi yáha ga cuicà-té. Ñàyùcànduá, nì quihin-tè ichì cuahàn-te.

²³ Dandu Jesús, nì xiconúù-yá nùù nècuàchì dacuahá-yá, te nì cachi-yà xì-né:

—¡Na ùhì guá sàà iin tècuicà ndè ñuhiví ìì xí Dios!

²⁴ Doco na ní inini nècuàchì mà, yáha ga nì ndulocó-nè. Ñàyùcànduá, inga xichi nì càhàn-yà xì-né, cachí-yà:

—Hijos, na ùhì guá nìhítáhvì iin nècuàchì càhvì xì ñà-cuicà-xí yàha-ne ñuhiví ìì xí Dios.

²⁵ Ñà-ndáà nduá, ùhì dayáha-nda iin camellu nùù chichòhò nduhù iquì; doco chicá ùhì yàha iin tècuicà ndè ñuhiví ìì xí Dios.

²⁶ Na ní inini nècuàchì dacuahá-yá ñà-jaàn, dandu yáha ga nì ndulocó-nè, te nì cachi-nè iin-ne xì inga-nè:

—Pues nú ducán, ¿nansa cui càcu anima iin nèhivì?

²⁷ Dandu nì indehè váha-yanè, te nì cachi-yà:

—Nèhivì ñuhiví, mà cúí quida-neàmà. Doco Dios, vátùni, vachi nsidaa iñàha, mà ùhì quida-yañà.

²⁸ Dandu nì cachi Pedro xì-yá:

—Nsiùhù, sàni nacoo-nsi nsidaa ñà-icúmí-nsí, te vaxi-nsi nchícùn-nsi mii-ní, Stoho-nsi Senór.

²⁹⁻³⁰ Dandu nì cachi Jesús xì-né:

—Yùhù cachí xì-nsiá, nú sàhà yùhù icúmí iin nèhivì nacoo-ne iñàha, dandu iin cientu gà tantu icúmí-nè nìhítáhvì-né. Mate icúmí-nè nacoo-ne vehe-ne, ò ñani-nè, ò cúha-ne, ò yua-né, ò dihi-né, ò ñahàdihí-nè, ò déhe-ne, ò ñuhù xí-né sàhà yùhù, ò sàhà razón ndiaha, có-quidá, vachi iin cientu gà tantu ñà-jaàn nìhítáhvì-né mientras iá-nè ñuhiví yohó, mate icúmí-nè ndoho stnà-nè quida nèhivì ñuhiví. Doco na sàà-nè inga ñuhiví vaxi xi-nda, dandu nìhì stnà-nè vida ndiaha nicanicuahàn.

³¹ Doco cuahà nèhivì idónuu vichi, icúmí-nè sàà-nè natenchicùn-nè cahà-xí quivì yucán; te cuahà ana nchícùn cahà-xí vichi, icúmí-nè sàà-nè nàcòdònùù-né.

Nansa nì cachi tu Jesús inga xichi ñà-icúmí-yà cui-yà

³² Daaní, ndacá Jesús nècuàchì dacuahá-yá cuahàn-yà xì-né ichì mànana ndè ñuu Jerusalén, te idónuu-yá nùù-né. Doco mii-né, yáha ga nacání ini-nè, te yúhì-nè. Dandu nì tavà cuàán-yá nsì-úxìn ùi-nè, te nì nacani-ya xì-né ñà-nduá sà-ítúú cuu xi-yá,

³³ cachí-yà xì-né:

—Cunaha-nsiá, icúmí-ndá sàà-ndà ñuu Jerusalén. Te yùhù ana nduú Tnaha Nèhivì Ñuhiví, icúmí yàhi ndahà dùtù xícusahnú yucán, xì ndahà stnà nècuàchì ley xi veheñuhu.

Te icúmí nècuàchìmà cachi-nè ñà-fuerza icúmí cui. Dandu dayáha-ne yùhù ndahà tè-inga raza.

³⁴ Te mii-té, cuàcùndiaà-te yùhù, te cahni cuií-te yùhù; te sivi dií-te nùí, dandu después cahni-té yùhù. Doco tìxi ùnì quivì icúmí natiacuí —nì cachi-yà.

Ñà-nduá nì xicàn Jacobo xì Juan nùù Jesús

³⁵ Daaní, nì tnàtuu dèhe Zebedeo nani Jacobo xì Juan nùù-yá, cachí-nè xì-yá:
—Maestro, cuní-nsì quidamanì-ní xì-nsì iin favor ñà-nduá xicàn-nsì.

³⁶ Dandu nì cachi-yà:

—¿Índù ñàha cuní-nsià quide?

³⁷ Te nì cachi-nè xì-yá:

—Na sàà tiempu ndiaha na cusáhnú-ní, cuàha-ní lugar ñà-cundoo iin iin-nsi iin iin ladu-ní; iin-nsi coo ladu cuàhá-ní, te inga-nsi coo ladu itní-ní.

³⁸ Dandu nì cachi-yà xì-né:

—Mii-nsiá, có-sánhì ini-nsià ñà-nduá xicàn tàhvì-nsiá nùí. ¿A vátùni cundee ini-nsià ndoho-nsia nacua icúmí ndohi, te yàha stná-nsià tnùndoho nacua icúmí yàhi?

³⁹ —Jaan —nì cachi-nè—, vátùni stná nsiùhù.

Dandu nì cachi-yà xì-né:

—Ndisa, icúmí-nsià ndoho-nsia nahi yùhù; te icúmí stná-nsià yàha-nsia tnùndoho nahi yùhù.

⁴⁰ Doco ñà-daníhítáhvì mii-nsiá cundoo iin iin-nsia iin iin laduì, mà cúí, vàchi có-quidá yùhù tocar quide ñà-jaàn. Nècuàchì nihítáhvì cundoo laduì, cuisì nèhivì señaladu cunduu-ne, vàchi divi sàhà mii-né icúmí lugar mà cuyucàn.

⁴¹ Daaní, na ní xinitnùhu ùxìn gà nècuàchì dacuahá-yá, dandu nì cuduchi gá ini-nè sàhà Jacobo xì Juan mà.

⁴² Doco Jesús, nì cana-ya nsidaa-né ñà-nì nátácá-nè nùù-yá, te nì cachi-yà xì-né:

—Ináhá-nsià sàhà tè-cùsàhnú inga ñuu, xínduu-tè autoridad cahan nèhivì, te fuerte cusáhnú-te nùù-né. Vàchi nsidaa tè-nihí chuun ñuu yucán, ndee dandacú-te nùù nèhivì yucán.

⁴³ Doco mii-nsiá, màsà quidá-nsiá ducán. Còó, vàchi nú iá ana cuní cunduu ana dandacú nùù-nsiá, dandu icúmí-nè cunduu-ne ana xinúcuáchí nùù nsidaa-nsiá.

⁴⁴ Vàchi nècuàchì cuní codònuù nùù-nsiá, icúmí-nè cunduu-ne nahi peón chindéé xí nèhivì dava ga.

⁴⁵ Dècuèndè stná yùhù ana nduú Tnaha Nèhivì Ñuhivì, cóni quésài ñuhivì yohó ñà-cunucuachi nèhivì nùí. Còó, sàhà-ñá cunucuachi mií nùù-né nì quesài, dandu después cuàhi vida xi cui cuenta xi-ne, te ducán nàcùndoo cuàhà-né libre —nì cachi-yà.

Nansa nì quida Jesús milagru, te nì natùinuù iin nècuàchì cuaá nani Bartimeo

⁴⁶ Daaní, nì sàà-yà xì compañeru-yà iin ñuu nani Jericó. Te na xicá-yá ichì queé-yá ñuu mà, dandu nchícùn stná cuàhà gá nèhivì. Te yuhù ichí yucán iá iin nècuàchì cuaá xicàn caridad. Bartimeo nani-né, vàchi dèhe Timeo nduú-né.

⁴⁷ Te nì tiacu-nè sà-cùyátní Jesús de Nazaret. Ñàyùcànduá nì quesaha-né ndàhì-nè, cachí-nè:

—¡Jesús! ¡Mii-ní descendencia ì xí David! ¡Cuihì inì-ní yùhù!

⁴⁸ Doco cuàhà nèhivì cuàhàn yucán, nì canàhá-nè xì nècuàchìmà:

—Màsà ndàhì gà-ní —cachí-nè.

Doco nècuàchì cuaá mà, chicá ndee ní ndàhì-nè, cachí-nè:

—¡Jesús! ¡Mii-ní descendencia ì xí David! ¡Cuihì inì-ní yùhù!

⁴⁹ Dandu nì cucuiin-yà, te nì cachi-yà xì compañeru-yà:

—Cana-nsianè nì quixí-né.

Dandu nì cana-ne nècuàchì cuaá mà, cachí-nè xì nècuàchìmà:

—Màsà cùhúún inì-ní; ndacuiìn-ní, vàchi caná-yá mii-ní.

⁵⁰ Ñàyùcàndüá, nì tavà-né dòò-né, nì dàndiàchi-né iladú. Te yàchì nì ndacuiìn-nè cuàhàn-nè ndé iá-yà.

⁵¹ Dandu nì xicàn tnùhù-yá nùù-né, cachí-yà:

—¿Ndíà nduá cuní-nî quide?

Te nì cachi-nè xì-yá:

—Cuní natùinuí, maestro.

⁵² Dandu nì cachi-yà xì-né:

—Cuahán cuéyàà-ní, vàchi sàni nduvàha-ní ñà-nì xinindisa-ní.

Dandu luegu nì natùinuù-né, te nì tenchicùn stná-nèyà ichì cuàhàn-yà.

11

Nansa nì cuu na ní sàà Jesús ñuu Jerusalén

¹ Daaní, nì sàà-yà xì-né yatni ñuu Jerusalén ndé nduú ñuu cuati nani Betfagé xì Betania, yatni ònì yucù Olivo. Dandu nì càhàn-yà xì ùì nècuàchì dacuahá-yá ñà-cùhùn cuèé-nè nùù-xí.

² Te dohó nì cachi-yà xì-né:

—Cuahán-nsià ñuu tii chicá nùù-xí; te yucán icúmí-nsiâ cuni-nsià ndé iín iin burru nuhní. Quisì tàñáha ga cuida nduú-si. Quisì yucán ndaxin-nsiá cundaca-nsiási quixi.

³ Te nú ndácàtnùhù nèhivì nùù-nsiá índù chuun ndaxin-nsiási, dandu cachi-nsià xì-né ñà-Stoho-ndà Señor xiñuhu xì-sí, doco luegu naxicocuñ-si —nì cachi-yà.

⁴ Daaní, luegu nì quihin ùì nècuàchì mà ichì cuàhàn-nè, te nì xini-nè yucán iín burru nì cachi-yà, nuhní-si yuhù ichí yatni yehè iin vehe. Ñàyùcàndüá nì ndaxin-nési.

⁵ Doco dava nècuàchì itá yucán, nì cachi-nè:

—¿Índù chuun ndaxin-nsiá burru jaàn?

⁶ Dandu nì naxiconihí nècuàchì mà nacua nì cachi-yà xì-né. Dandu nì sàha nèhivì mà permisu ñà-cundaca-nèsi cùhùn.

⁷ Ñàyùcàndüá luegu nì saca-nèsi cuàhàn-nè ndé iá-yà, te nì chitàndòò-né sìcoto xi-ne dìquì-sí. Dandu nì sàcùnùú-yási.

⁸ Te cuàhà nècuàchì yucán, nì chitànduhù-né dòò-né ichì nacua cuàhàn yàha-ya. Te dava-ne, nì sahnde-nè ndahà yutnù nì chindoo stná-nè ichì.

⁹ Te nèhivì idónuu, xì stná nècuàchì nchicùn cahà-xí, cánandee-né, cachí-nè:

—¡Viva ana sahnú yohó! ¡Ndíaha gá ndeníhí vaha-ndané, vàchi cuenta xi Stoho-ndà Señor vaxi-ne!

¹⁰ Ndíaha gá coo, vàchi vaxi-ne cunduu-ne rey, cusahnú-né na ian nisa cusahnú xii-ndà David. ¡Ansivéhé mii-yá iá ansivi! —nì cachi-nè.

¹¹ Cunaha-nsiá, ducán nì sàà Jesús ñuu Jerusalén. Dandu cuàhàn-yà veheñùhu cahnú, te nì xini-yà nansa iá nsidaa iñàha yucán. Dandu nì quee-ya ñuu mà cuàhàn-yà xì úxìn ùì compañeru-yà ndè ñuu tii Betania, vàchi sàni cuaà.

Nansa nì sadi Jesús nùù nùù-higu cóni càná quisì vídì-nu

¹² Dandu dàtnàà inga quivì nì quee-ya xì-né ñuu Betania mà vaxi-ya. Te xíhì-yà doco.

¹³ Te nì xini xicà-yá iín iin yutnù nani nù-higu, te iá ndahà cuií-nu. Ñàyùcàndüá, cuàhàn-yà cundehè-yá a có-càà sì-higu caxì-yá. Doco na ní tnàtuu-ya nì xini-yà micuísì ndahà-nú iá. Còò quisì vídì, vàchi tàñáha ga sàà tiempu cana-sì.

¹⁴ Dandu nì cachi-yà xì yutnù mà:

—Màsà nunca cana ga quisì vídì-yó caxì nèhivì.

Te nì inini stná nècuàchì dacuahá-yá nì cachi-yà ducán.

Nansa nì tavà Jesús tè-dicó xi tè-xiín fuera patiu veheñùhu

¹⁵ Nì nsihi ñà-yùcán, dandu nì sàà-yà xì nècuàchìmà ñuu Jerusalén. Dandu cuàhàn-yà veheñùhu cahnú, te nì taxi nsihí-yá tè-dìcò xi tè-xiín yucán. Nì naxiconihí-yá mesa xi tiàa dama-xi díhùn inga ñuu, te nì ducùn stná-yà silla xi tè-dìcò xi loma.

¹⁶ Te cóni sáha stná-yà lugar nacuico ni-iin nèhivì carga xi-ne yàha-ne patiu veheñùhu cahnu-ma.

¹⁷ Te nì càhàn fuerte-yà xì nèhivì yucán, cachí-yà:

—Dohó cachí Dios nùù tutu ì: “Veheñùhu xi cunduu iin vehe ndé nataca nèhivì vaxi nsidanicuú ñuu càcàn tàhvi-né nùí”, cachí-yà. Doco sàhà mii-nsiá sàni nandua na iin lugar ndé ndoó cuàhà tècuìhnà.

¹⁸ Doco dùtù xícusahnú, xì nècuàchì ley xi veheñùhu, iníni stná-nè ñà-nduá nì cachi-yà. Te vichi yúhî-nèyà, vachi ináhá-nè ndulócò nsidaa nèhivì sàhà ñà-nduá dacuahá-yà. Ñàyùcànduá nì quesaha-né nandúcú-nè nansa cui cahni-néyà.

¹⁹ Daaní, na ní cusinsiquin, dandu nì quee-ya ñuu mà mànuhù-yà (ñuu tii Betania).

Nansa nì ìchì dahuun nù-higu mà

²⁰ Daaní, dàtnàà inga quivì vaxi tu-ya xì nècuàchì dacuahá-yà, te nì nayàha-ne xì-yá (ndé iín yutnù mà), te nì xini-nè sàni ìchì dahuun-nù ndè yohò-nú.

²¹ Dandu nì nsinuu ini Pedro, te nì cachi-nè xì-yá:

—Cundehè-ní, Maestro, yutnù nì càhàn xì-ní, te nì sadì-ní nùù-xí icu, ¡sàni ìchì-nu!

²² Dandu nì cachi Jesús xì-né:

—Xiñuhu cunindisá vaha-nsia Dios.

²³ Vachi palabra seguru nduá cachí xì-nsiá yohó: nsidaa nèhivì có-íá xì duda, dècuèndè vátùni dandacú stná-nè nùù yucù jaàn ñà-cuxioa, te quècahnua ini mar, te divi ducán ndisa icúmí cuu, nú nihnú ndisa ini-nè cuu nacua nì cachi-nè.

²⁴ Ñàyùcànduá, yùhù cachí xì-nsiá, nsidaa iñàha ni càcàn tàhvi-nsiá nùù Dios, nú xiníndisá-nsiá ñà-sà-íá ñà-nduá nì xicàn-nsiá, dandu nìhì-nsiáñà.

²⁵ Doco dava xichi xicàn tàhvi-nsiá nùù-yá, te xiní ùhì-nsiá iin ñanìtnaha-nsia. Nú ducán nduá, dandu díhna icúmí-nsiá cuicahnú stnahá ini-nsiá, dandu vátùni cuicahnú stná ini Yuandiáhá-nsiá íá ansivi sàhà cuàchi-nsia.

²⁶ Vachi nú có-xicáhnù ini-nsiá sàhà ñanìtnaha-nsia, dandu mà cuicáhnù stná ini mii-yá sàhà cuàchi-nsia.

Nansa nì cachi tè-xídandacú còò derechu xi Jesús quida-ya ñà-nduá quidá-yá

²⁷ Daaní, nì sàà tu-ya xì-né ñuu Jerusalén. Te na xicánúú-yá ini veheñùhu cahnú yucán, dandu yucán nì casaà stná dùtù xícusahnú, xì nècuàchì ley xi veheñùhu, xì stná nècuàchì xídandacú nùù ñuu mà, nì tnàtuu-ne nùù-yá,

²⁸ cachí-nè:

—¿Índù nì nìhì-ní derechu quida-ní ñà-nduá quidà-ní? ¿Ana divi nì dándacú nùù-ní ñà-quida-ní ducán?

²⁹ Te nì cachi-yà xì-né:

—Yùhù cuní stnáì ndàcàtnùhí nùù mii-nsiá, te nú ni naxícónihî-nsiá nùí, dandu cachitnùhu stnáì xì-nsiá ana divi nì dándacù-xì nùí.

³⁰ Cachi-nsiá xí ana divi nì dándacù-xì nùù Juan (Bautista) ñà-quida ì-né nèhivì. ¿A Dios nì cachi xì-né, te ò nèhivì ñuhiví? Naxiconihí-nsiá nùí.

³¹ Dandu nècuàchìmà, nì candatnuhu tnahá nsidaa ní míí-nè, cachí-nè:

—Nú ni cachí-ndà Dios nì dándacù-xì nùù Juan, dandu cachi Jesús xì-ndà ¿índù chuun cóni xiníndisá-ndá nècuàchìmà?

³² Te nú ni cachí-ndà divi nèhivì ùún nì cachi xì-né, (dandu ni mà quéé víi stná mà).

Ducán nì cacachi nècuàchìmà, vachi yúhî-nè ndiá nduá cachi nèhivì xì-né, vachi nsidaa nèhivì, quidá-né cuenta iin nècuàchì yuhù nùù Dios nì sanduu Juan.

³³ Ñàyùcànduá, nì cacachi nècuàchìmà xì-yá:

—Cò-cundáà ini-nsi ana divi nì dándacù-xì nùù Juan.

Dandu nì cachi Jesús xì-né:

—Nì yùhù, mà cáchí stnáì xì-nsiá ana divi nì dàndàcù-xì nùí ñà-quide ñà-nduá quidé.

12

Ejemplu sàhà medieru malu

¹ Daaní, nì quesaha Jesús nacání-yá xì-né puru ejemplu. Te dohó nì cachi-yà xì-né:

—Nì ìa iin lamú, nì dándàndèe-ne nducu yòhò sì-uva nùù ñuhù xí-né. Te nì quida-ne corra-ña, xì stná iin pila cahnú ndé cuñuhu ndudi quisì mà; te nì quidavàha stná-nè iin torre ndé cundiaa peón inii itu-nè. Dandu nì tatu-nè itnii medieru, te cuàhàn-nè inga ñuu xicà.

² Daaní, na sání sàà tiempu cùchi quisì vídì mà, dandu nì techuún-né iin peón xi-ne nùhù naquihin chii fruta mà nùù medieru xi-ne.

³ Doco na ní sàà peón mà, nì catnii medieru mà-né, nì sahnì cuí-tené, te nì taxi-ténê, còò ni-ìñàha nihí-né nì násáá.

⁴ Daaní, inga tu nì techuún lamú mà inga peón xi-ne, doco divi-ni nì cacani yuu-ténê, ndè nì dándàcuèhè-te dìni-né, te nì canàhá-te xi-né.

⁵ Daaní, tucutu nì techuún lamú mà inga peón nùù-té. Doco tèmà, nì sahnì dahuun-ténê. Dandu cuàhà gá xichi nì techuún lamú mà más gá peón nùù-té. Doco divi ducán-ní nì cuu, vàchi dava-ne nì sahnì cuí-tené, te dava ga-nè nì sahnì dahuun-té.

⁶ Ndé làcà mindaa dèhemani lamú mà ndóo ga. Ñàyùcànduá último nì techuún stná-nè dèhe-ne cuàhàn, vàchi ádi quidañuhu-té dèhe-ne, nì cahan-né.

⁷ Doco medieru mà, nì candatnuhu tnahá-te, cachí-te: “Tè-yòhó nduú tè-ìcúmí ndu-tahvì xì nsidaa ñuhù yohó. Vichi cahnì-ndàté chicá vaha, dandu mii-nda nanduu-nda stohà”, nì cachi-te.

⁸ Ñàyùcànduá nì catnii-tè dèhe lamú mà, nì sahnì-ténê, te nì dàcàná-te nsii ma yàtà corra.

⁹ Pues vichi, ¿ndiá nduá icúmí lamú mà quida-ne xì medieru mà? Icúmí-nè nùhù-nè yucán, te cahnì nsihí-nète, dandu nanducu saa-né inga ana quidachuún ñuhù xí-né.

¹⁰ Dandu nì cachi gà-yà xì nèhivì mà:

—A táñaha ga cahvi-nsia nùù tutu ìì xí Dios ndé cachá`palabra yohó:

Nì ìa iin cavà, te nì cahíchì ini albañil-ña. Doco vichi sàni sàà mà nì sàcùndua yùù vòcò esquina vehe.

¹¹ Divi Stoho-ndà Señor nduú ana nì quida ducán. Te ndulócô-ndà ñà-ndiaha guá nì quida-ya.

(Ducán nacání nùù tutu ìì, nì cachi Jesús.)

¹² Daaní, nècuàchì xícusahnú sàhà religión ñuu mà, nì cundaà ini-nè divi mii-né cáhàn-yà sàhà-xí na ní nacani-ya ejemplu mà. Ñàyùcànduá, nì cuni-nè tnii-neyà, te chicadi-neyà. Doco ñà-yúhì-nè nèhivì cuàhà yucán, ñàyùcànduá, nì naco-neyà, cuàhàn-nè.

Nansa nì cachi Jesús sàhà renta xi ñuu-ndà

¹³ Dandu nì techuún-né iin ùù nècuàchì fariseu quixi xi iin ùù nècuàchì partidu xi rey Herodes, cuní-nè dadaná-neyà na cáhàn-yà.

¹⁴ Ñàyùcànduá, nì tnàtuu-ne nùù-yá, cachí-nè xì-yá:

—Maestro, ináhà-nsì mii-ní, ana ndàà cuisì inì-xi nduu-ní. Có-quihín casu-ní nansa cachí nèhivì, ni có-yúhì stná-ní ni-iin nèhivì, vàchi chináhà ví-ní ñà-nduú ichì váha Dios. Cachí-ní xì-nsí: ¿A vátùni sáha Dios lugar ñà-chiyàhvi-nda renta nùù rey cahnú César, á coó? ¿A ndiá ìcà-ndà chiyàhvi-nda, á coó?

¹⁵ Doco Jesús, sàni cundaà ini-yà có-xìcàn tnùhù sahnú ndisa-ne nùù-yá; ñàyùcànduá, nì cachi-yà:

—¿Índù chuun cuní-nsià quida-nsia maña nùí? Cunihi-nsia iin dihùn quixi, cundehiá nansa iá`.

¹⁶ Dandu na ní quesaa dihùn plata mà, nì indehè-yáña, te nì cachi-yà xì-né:

—¿Bueno, ana ònùú-xí, te ana òquívi-xì itúú ìcà dihùn yohó?

Te nì cachi-nè:

—Divi rey cahnú César.

¹⁷ Dandu nì cachi-yà xì-né:

—Nú ducán nduá, dandu nacuaaha-nsia César ñà-ndùá icúmí-nsiâ cuaha-nsiàte, te cuaha stná-nsià Dios ñà-ndùá ndiá ìcà-nsiá cuaha-nsiayà —nì cachi-yà.

Dandu nèhivì inínì, nì ndulocó-nè ñà-nchìchí guâ nì naxiconihí-yá nùù nècuàchìmà.

Nansa nì cachi Jesús iá nansa natiacu-ndà

¹⁸ Dandu nì catnàtuu itnii nècuàchì saduceu nùù-yá nì càhàn-nè xì-yá. Nècuàchì yucán, có-xiníndísâ-né icúmí natiacu nsii. Ñàyùcàndùá, dohó nì cachi-nè xì-yá:

¹⁹ —Maestro, ñà-yohó nduá nì tiaa Moisés quida-nda: “Nú sàni xihì iin tiàa, te còò déhe-ne nì ndóo xi ñahàdihí-nè, dandu icúmí ñani nsii ma nandàhà-né xì ñahà mà, áma cóo iin déhe-ne; dandu quida-nda cuenta na ian déhe nsii-ma cunduu méè mà”.

²⁰ Cunaha-ní, nì sandoo ùsà ñaní. Te nècuàchì chicá sahnú, nì nandàhà-né xì iin nècuàchì ñahà, doco nì xihì-nè, te còò déhe-ne.

²¹ Dandu ñani-nè chicá nchícùn gà, nì nandàhà stná-nè xì ñahà cuaán ma, doco nì xihì stná nècuàchì ùì mà, te còò stná déhe-ne. Te divi ducán nì cuu stná xì nècuàchì ùnì.

²² Dècuèndè nì sàà nsì-ùsà-nè nì nandàhà iin iin-ne xì ñahà mà, (te iin iin-ne nì xihì-nè), doco còò ni-iin déhe-ne nì ía (xi ñahà mà). Daaní, último nì xihì stná nècuàchìmà.

²³ Ñàyùcàndùá, na sàà quìvì (cachí-nsià) natiacu nsii, ¿índù tiàa ma nacuaaca xi nècuàchì ñahà mà? vàchi antes nsì-ùsà-nè nìsa ìa xi-ñá —nì cachi-nè.

²⁴ Dandu nì cachi Jesús xì-né:

—Còó, có-cachí viì-nsiá, vàchi có-cundáà inì-nsia nansa cachí tutu ìì xì Dios, nì có-cundáà stná inì-nsia ñà-càhnù-guâ poder xi-ya.

²⁵ Cunaha-nsiá, na sàà quìvì natiacu nèhivì, mà nándàhà gá-nè, vàchi nahi ángel ndoó ansivi icúmí-nè nanduu-ne.

²⁶ Te vichi cuàhìn càhìn xì-nsiá sàhà nansa iá ñà-natiacu nsii. Ádi sàni cahvi-nsia nùù tutu nì tiaa Moisés ndé cachá` sàhà yutnù tii (xìxìn), te ía Dios mahì-nú, te nì cachi-yà xì Moisés: “Yùhù nduí Dios càhvì nsì-Abraham, xì nsì-Isaac, xì nsì-Jacob”, cachí-yà.

²⁷ (Ñàyùcàndùá, itiácú ìì nècuàchì sàhana ma), vàchi nècuàchì ní xihì dahuun ndisa, mà cúí cahvi-né Dios, cuisì nèhivì itiácú càhvì xì-yá. Ñàyùcàndùá, ni-iyuhu có-íá viì ñà-ndùá cachí mii-nsiá —nì cachi Jesús.

Nansa nì cachi Jesús índù ley xi Dios chicá ndiaá

²⁸ Daaní, iin nècuàchì ley xi veheñùhu, nì inini-ne nansa nì ndatnuhu stnahá-né, te nì cundàà ini-nè yáha ga nì naxiconihí víi Jesús nùù nècuàchì yucán. Ñàyùcàndùá, chicá nì tnàtuu-ne, te nì ndàcàtnùhù-né nùù-yá, cachí-nè:

—Nùù nsidaa ñà-ndùá nì dándàcú Dios, ¿índù ñà-chicá ndiaá?

²⁹ Dandu nì cachi-yà xì-né:

—Ñà-dándàcú Dios chicá ndiaá nduá yohó: “Cunini vaha-nsia, nèhivì Israel, vàchi Stoho-ndà Dios, imindaa-yá.

³⁰ Te icúmí-ndá cuu ini-ndà sàhà-yá xì nsidanicuú anima-ndà, xì nsidanicuú voluntad xi-nda, xì nsidanicuú sàxínìtnùnì-ndà, te nsidanicuú stná valor xi-nda”. Ñà-jaàn nduá dandacú Dios chicá ndiaá chivàha nèhivì.

³¹ Daaní, nacua cachí ley primeru mà, ducán cachí stná ley ùì dándàcú-yá: “Nacua cuú ini-ndà sàhà mii-nda, ducán icúmí stná-ndà cuu ini-ndà sàhà ñanìtnaha-nda”. Còò cá ñà-nì dándàcú Dios chicá ndiaá nùù ùì ñà-jaàn.

³² Dandu nì cachi nècuàchì ley xi veheñùhu ma:

—Cachí vaha ndisa-ní, maestro; ñà-ndáa nduá, vachi imindaa Dios íá, còò cá ana nduú Dios, cuisì mii-yá.

³³ Te icúmí-ndá cuu ini-ndà sàhà-yá xì nsidanicuú anima-ndà, xì nsidanicuú sàxínìtnùnì-ndà, xì nsidaa voluntad xi-nda, xì nsidaa stná valor xi-nda; te icúmí stná-ndà cuu ini-ndà sàhà ñanìtnaha-nda nacua cuú ini-ndà sàhà mii-nda. Vachi ñà-jaàn chicá ndiaá nùù nsidanicuú promesa cuàha-ndayá, a sea nduá iin quisì coco nùù-yá; te ò ndéni promesa nì cùí —nì cachi-nè.

³⁴ Dandu Jesús, nì xini-yà nì naxiconihí víi nècuàchì mà nùù-yá; ñàyùcànduá nì cachi-yà xì-né:

—Làcà iyuhu-ni cumáni, te sàà-ní cunduu-ní iin nèhivì ñuhivì ì xí Dios.

Daaní, (na ní nsihì nì cachi-yà ñà-jaàn), dandu ni-iin nèhivì, cónì sàha ndee gá ini-nè dadavátnáhâ-né xì-yá.

Ana divi nduú yohòtéhè Cristu

³⁵ Daaní, iin quivì íá-yà veheñùhu cahnú, dacuahá-yá nèhivì, te nì cachi-yà xì-né:

—Cachí nècuàchì ley xi veheñùhu: “Descendencia xi xii-ndà David nduú Cristu”. Ducán cachí nècuàchì mà, doco ¿índuvì cunì cachàmà?

³⁶ Vachi divi xii-ndà David nì tiaa stná-nè sàhà Cristu tìxi poder xi Espíritu Ì xí Dios, te dohó nì cachi-nè:

Nì càhàn Yua-nda Dios xì Stohì (divi Cristu), nì cachi-yà: “Yohó coo-ní ladu cuàhì ndè cachì sàà cundeí nùù nsidaa tè-xìní ùhì xì-ní, dandu cusahnú fuerte-ní nùù-né”, nì cachi Dios.

³⁷ Cundehe-nsiá, nì cachi David ñà-Stoho-nè nduú Cristu. Doco nú ducán nduú-yá, dandu ¿índù modo cui cunduu stná-yà iin descendencia xi-ne? (Doco ñà-ndáa nduá) —nì cachi Jesús.

Te nsidaa nèhivì cuàhà yucán, cudù ini-nè xì ñà-nduá cachí-yà.

Ñà-nduá nì cachi Jesús sàhà nècuàchì ley xi veheñùhu ñà-có-quidá-né cumplir, cachí-yà

³⁸ Dandu nì dàcuahá gá-yà nèhivì, cachí-yà:

—Còtó quida-nsia na xíquida nècuàchì ley xi veheñùhu. Vachi ñà-diì xí-né nduá cacanu-ne cundixi-ne sìcoto quihín vico, te casàhú tnùñuhu nsidaa nèhivì xì-né yàhvi.

³⁹ Te na sàhàn-nè veheñùhu, ò ndoó-né iin vicò, dandu nandúcú-nè lugar ndé chicá ndiaha cundoo-ne.

⁴⁰ Te tùha stná-nè (tnii diqui-né ley, te) xidándiáá stná-nè vehe nècuàchì nì xihì ì-xí, dandu después sàcuíta-ne nacuatú cuàhà-né na ian ndisa guá vaha-ne. Sàháyùcànduá, iin castigo chicá fuerte icúmí-nè nihì-né —nì cachi Jesús.

Nansa nì nacuni Jesús cuàhà gá ndiaá promesa tii nì sàha ñahàcuàán ndahví

⁴¹ Iin xichi íá-yà veheñùhu cahnú yatni ndé itá alcancía xi Dios, te indéhe-yá nèhivì daquée-ne dihùn ini alcancía mà. Tècuicà, cuàhà gá dihùn nì dàquée-tè.

⁴² Dandu nì quixi stná iin nècuàchì ñahà ndahví nì xihì ì-xí; te nì dàquée-ne ùì dihùn cuàtì ndiaá nahi ùxìn centavu.

⁴³ Ñàyùcànduá, nì cana Jesús nècuàchì dacuahá-yá nataca-nè nùù-yá, te nì cachi-yà xì-né:

—Cunaha-nsiá, chicá más nduá nì sàha nècuàchì viuda ndahví yohó nùù ñà-nì sàha nsidaa gá nèhivì yucán.

⁴⁴ Vachi nsidaa gá-nè, cuisì ñà-cùyódo nùù-né nduá nì sàha-ne. Doco nècuàchì ñahà yohó, mate ndahví dahuun-ne, doco nì sàha-ne nsidanicuú dihùn sàhà ñà-cuiin-ne ñà-cutiacu-nè.

13

Ñà-nduá nì cachitnùhu Jesús cuu xi veheñùhu cahnú íá ñuu Jerusalén tiempu xi-ya

¹ Daaní, na ní quee-ya veheñùhu cahnú, dandu nì cachi iin nècuàchì dacuahá-yà xì-yá:

—Cundehè-ní, Maestro. ¡Na vico guá iá yùu nahnú nì cuàha veheñùhu yohó, te na cuaha guá ndáa stná vehe yohó!

² Doco nì naxiconihí Jesús nùu-né:

—¿A xini-nsià vehe nahnú yohó? Cunaha-nsiá, vaxi iin quivì, dandu ni mà códotnahá gá ni-iin yùu yohó, vachi icúmíâ caà nsihá quida nèhivì.

Ñà-nduá icúmí cuu ñà-cundaà ini-ndà sà-itúú xinu tiempu yohó

³ Daaní, cuàhàn cuaán-yá xì-né ndè yucù Olivo iá frente veheñùhu cahnú, te yucán nì sàcòo-ya. Te na ndoó-né xì-yá yucán, dandu nì càhàn ùni-nè xì-yá, divi Pedro, xì Jacobo, xì Juan, nì ndacàtnùhù-né nùu-yá, cachí-nè:

⁴ —Cachì-ní xì-nsí índù quivì cuu nsidaa ñà-nì cachì-ní jaàn. ¿Índù milagru coo ñà-cundaà ini-nsi ñà-sà-itúú quivì cuu nsidaájàn?

⁵ Dandu nì cachi-yà xì-né:

—Cuidadu cundoo-nsia ñà-màsà dándáhvì ni-iin nèhivì mii-nsiá.

⁶ Vachi cuàhà ana icúmí quixi danani úun-né nduú-né yùhù, te cachi iin iin-ne xì nèhivì ñà-Cristu nduú-né. Te sàhájàn cuàhà nèhivì nihì-né dandahví-nè.

⁷ 'Doco mii-nsiá, na cunitnùhu-nsia iá cuàhà guerra yoho te yucán, màsà yúhî-nsiá, vachi fuerza icúmí coo ducán. Doco tàñáha ga xinu tiempu yohó nduájàn, iá gá ñà-vaxi cuu.

⁸ Daaní, ñuu xì ñuu, icúmíâ nàá stnahá. Vachi cuàhà rey, icúmí-tê dandacú-te coo guerra xì inga ñuu. Te icúmí tnàa stná yoho te yucán ñuhivì, te coo stná tnama. Doco ñà-làcà cuàhàn quesaha tnùndoho cunduumà.

⁹ 'Doco mii-nsiá, cundoo tùha-nsia, vachi icúmí nèhivì tnii-ne mii-nsiá cundaca-nensià cùhùn nùu tè-xícusahnú. Te icúmí-nsiá ñàhni cuií-nsià ini veheñùhu. Te sàhà-ñà càhvì-nsiá yùhù, ñàyùcànduá, icúmí-nè datnátuu stná-nè mii-nsiá nùu gobernador xì nùu rey (ñà-càhàn tnùhù-né dìquì-nsiá). Dandu ñà-jaàn cunduu tiempu vaha cachi vate-nsiá ñà-nduá xiníndísâ-nsiá cunini-temà.

¹⁰ Te dècuèndè inicutu ñuhivì icúmí cuitià stná razón ndiaha xí Dios, dandu después xinu (tiempu yohó).

¹¹ Doco icúmí nèhivì canicuàchi-ne sàhà-nsiá, te cundaca-nensià cùhùn nùu tè-xícusahnú. Doco màsà nácání ini-nsià ni-iyuhu índù palabra naxiconihí-nsiá nùu-té. Còó, cuisì nacua dachítnùní ini Dios mii-nsiá hora yucán, divi cachi-nsià xì-té. Vachi màdì mii-nsiá cunduu ana càhàn; còó, divi Espíritu Ìì xí Dios icúmí dacàhàn xì-nsiá.

¹² 'Doco dava nèhivì, dècuèndè ñani-nè icúmí-nè cahin-nè nùu autoridad ñà-cui nècuàchimà. Te dava stná-nè, dècuèndè dèhe-ne cahin stná-nè ñà-cuià. Te dava stná-nè, dècuèndè yuadíhí-nè cuni ùhì-nè, te canicuàchi stnahá-né ñà-cui-nè.

¹³ Te mii-nsiá, sàhà yùhù icúmí nsidaa nèhivì cuni ùhì-nènsià. Doco nú iin-ni cunihnu vaha ini-nsia dècuèndè sàà xinu tiempu, dandu càcu-nsia nùu Dios.

¹⁴ 'Sàhà nì cachitnùhu Daniel iin palabra xi Dios sàhà nansa icúmí coo iin figura dana có-xiñùhù dahuun-ya. Cunaha-nsiá, quivì cuni-nsià sàni sàcuìin figura mà iin xaan ndé còò permisú cuian, (dandu seña cundua). Te vichi xiñuhu cundaà ini nsidaa ana càhvì-xì tutu yohó. Pues na sàà quivì yucán, dandu ni cunúdhé nsidaa nèhivì ndoó ladu Judea yohó cùhùn-nè yucù.

¹⁵ Te nú dìnìvèhé ndoó-né (quetátú-nè), dandu (yàchì ni nuú-né cunudèhé stná-nè), doco màsà nànsìhvi ga-nè vehe nsiquihin-ne ñà-nduá icúmí-nè.

¹⁶ Te nú ndoó-né nùu itú, dandu màsà nándúcú-né ni cotón-nè.

¹⁷ Te ¡ndahví nècuàchì ñahà cuhí cuàhàn tùinuù mée-xì quivì yucán! Te ¡ndahví stná nècuàchì icúmí xí mée chìchì!

¹⁸ Te càcàn tàhvì stná-nsià nùu Dios ñà-màsà cùvixin na sàà tiempu cunudèhé-nsià mà.

¹⁹ Vachi yáha ga icúmí nèhivì ndoho-ne quivì yucán. Còò cá tnùndoho chicá cahnú ni ía ndè quivì nì cuyucun ñuhivì xì ndé quivì coamà. Ni quivì después, mà sàà gá coo tnùndoho ndudava xán.

²⁰ Te nú màsà cùndéhe ndahví Dios, dacúxíó yàchì-yà tnùndoho ma, dandu ndùtù nsihí nèhivì ñuhiví nì cùí. Doco sàhà nèhivì sàni nacàxin-ya, ñàyùcànduá sàni chitnùní ini-ya ñà-chicá yàchì dacúxíó-yá tnùndoho.

²¹ 'Quivì yucán màsà cùnindísâ-nsiá yuhù nèhivì cachí xì-nsiá: “Cundehè-nsiá, yohó iá ana nduú Cristu”, te ò: “Yucán iá-yà”.

²² Vàchi icúmí quixi cuàhà tètñhù, te iin iin-tè cachì-te ñà-divi Cristu nduú-te. Te icúmí quixi cuàhà stná ana danani úun càhàn cuenta xi Dios. Ndè quida stná-te cuàhà milagru sàhà-ñá ndulocó nèhivì, áma níhì stná-te dandahví-te nèhivì nì nacàxin-ya cahan-té, doco mà cùí.

²³ Ñàyùcànduá, mii-nsiá, cundoo tùha-nsia, vachi sàni cachitnùhi xì-nsiá nsidaa ñà-nduá icúmí cuu.

Nansa icúmí cuu quivì naxicocuñ Jesús

²⁴ 'Nú sàni yàha tiempu tnùndoho quivì yucán, dandu mà cùnchí gá ni orá ni yoo.

²⁵ Te sìnsivì itándiáá ansivi, icúmí-sí còyo nihni-sì nù ñuhiví. Te sìtnúu nahnú, icúmí stná-si ndacùchí ndee-sí.

²⁶ Dandu natùì yùhù ana nduú Tnaha Nèhivì Ñuhiví, cundehè nèhivì ñuhiví yùhù sàmànui mahì vicò xì poder cahnú xí. Te ndiaha gá coo inicutu ndé mànuì.

²⁷ Dandu luegu icúmí techuín ángel xi cùhùn-nè inicutu ñuhiví ñà-danátácá-nè ana nduú nèhivì sàni nacàxin, mate ndoó-né iin xaan ndé vihi gá xica ñuhiví xì ansivi, doco icúmí-né nataca-nè quixi-ne quida ángel xi.

²⁸ 'Vichi cuàhìn nacani xì-nsiá iin ejemplu sàhà nù-higu sàhà ñà-cundaà inì-nsia iñàha. Nú sàni ndunsidi-nú nì quesaha naná dítu yuté-nu, dandu ñà-yucán cundaà ini-ndà sà-itúú tiempu ihni.

²⁹ Pues ducání stná xì mii-nsiá; quivì cuni-nsià cuú ñà-nduá sàni cachì xì-nsiá, dandu vátùnì cundaà stná inì-nsia ñà-sàni cuyatni tiempu naxicocuñ nduá; sà-itúú nihni.

³⁰ Te mà sàà cui nsihì nèhivì itiácú vichi dècuèndè cachi sàni cuu ndisa nsidaa ñà-nduá sàni cachì xì-nsiá vichi.

³¹ Cunaha-nsiá, icúmí sàà ansivi xì ñuhiví ndañuhá, doco palabra xi, còó, mà nunca sàà ndañuhá.

³² 'Doco ni quivì, te ni hora naxicocuñ, ni-iin nèhivì có-ínáhá-né, ni ángel ndoó ansivi, có-ínáhá stná-nè. Ni stná yùhù ana nduú Dèhemaní Dios, có-ínáhá stnâ; cuisì Yuamáni nduú ana ináhá.

³³ Ñàyùcànduá, cundoo tùha-nsia, te cunihnu vaha ini-nsià, vachi có-ínáhá-nsiâ índu hora divi cuu nsidaájàn.

³⁴ Ducán iá na ian quidá iin lamú na cuyúcùn-nè cùhùn xicà-né, dandacú-né nù mozo xi-ne sàhà biene xi-ne. Iin iin mozo mà, nihí-te chuun quida-tè. Te mozo ndiaá yehè, ndacú nú stná-te ñà-cundiaa tùha-tè yucán.

³⁵ Pues divi ducán stná mii-nsiá, xiñuhu cundoo tùha-nsia, vachi có-ínáhá-nsiâ índu hora divi naxicocuñ yùhù ana nduú Lamú xi-nsia, sea cuñàà, ò dava ñùu, ò sinduhá cundua, te ò naha.

³⁶ Vachi nanàá icúmí naxicocuñ, ñàyùcànduá còtó (nandòdó-nsiá ñà-jaàn), te na ian quidì-nsià cundua.

³⁷ Ñàyùcànduá, yùhù cachí xì-nsiá nacua cachí xì nsidaa nèhivì xí, ni cùndóó tùha-nsia —nì cachi Jesús.

14

Nansa nì ndatnuhu tnahá nèhivì ñà-nàndúcú-né nansa tnii-ne Jesús

¹ Daaní, cumàni gá ùi quivì cunduu vicò pascua xì stná vicò xixí-né pan có-ndùtáchí. Te dítu xícusahnú, xì nècuàchì ley xi veheñuhu, nì nanducu-né nansa tnii dèhé-nè Jesús ñà-cui-yà.

² Doco nì cachi-nè:

—Còó, màdì mahì vicò (quida-nda ducán), vèchi te nú còó, vihini nacuidà nèhivì.

Nansa nì sòdò iin nècuàchì ñahà ndutè tnàmì itnu dìni Jesús

³ Iá-yà vehe iin nècuàchì ñuu Betania nani Simón, iin nèhivì nì sandoho cuèhè lepra antes. Te iá-yà xixí-yá, te yucán nì sàà stná iin nècuàchì ñahà, nihí-né iin quidi iá ducùn-xí. Yùù nì cuyucàn mà, te ñuhá ndutè tnàmì finu nani nardo; te ndiaá sàstnùhù-té. Dandu nì sàhnù nècuàchìmà ducùn quidi ma nì sòdò-nète itnu dìni-yá.

⁴ Doco dava nècuàchì xixí yucán, nì cuduchi gá ini-nè, cachí-nè iin-ne xì inga-nè:

—¿Índù chuun nì sate uun-ne ndutè jaàn, te ndiaá guá-te?

⁵ Chicá vaha dicò-nète ni cuí, te mà úhì quee iin ùnì cientu dikhùn plata dasàn-ndà nùù nècuàchì ndahví.

Ducán cachí-nè, cánahá-nè xì nècuàchìmà.

⁶ Doco nì cachi Jesús xì nèhivì mà:

—Nacoo-nsia nècuàchì jaàn. ¿Índù chuun cánahá-nsià xì-né? Vèchi iin ñà-vaha nduá sàni quida-ne xí.

⁷ Vèchi nècuàchì ndahví, nicanicuahàn ndoó-né xì-nsiá, te mà úhì chindee-nsiánè nú cahan-nsiá. Doco yùhù, còó, sacù-ni quivì ié' xì-nsiá.

⁸ Ñàyùcànduá, nècuàchì ñahà yohó, ñà-nduá sàà-nè quida-ne, divi nduá sàni quida-ne sàhí, na ian sàni quidatna-né cuerpu xi sàhà-ñá cundùxan, ducán nduá.

⁹ Te yùhù cachítnùhi xì-nsiá, nsidanicuú ñuu ndé sàà razón ndiaha xí Dios inicutu ñuhiví, yucán icúmí sàà stná palabra sàhà ñà-vaha nì quida nècuàchì ñahà yohó, te ducán mà nunca sàà nèhivì nandòdó-né nècuàchìmà.

Nansa nì saquin Judas compromisu cahin-nè Jesús nùù nècuàchì xídandacú

¹⁰ Nùù ùxìn ùì compañeru Jesús, iin-ne nani Judas Iscariote. Nècuàchì yohó, nì sàhàn-nè nùù dùtù xícusahnú, nì ndatnuhu-né xì nècuàchìmà ñà-cahin-nèyà.

¹¹ Te nì cacudiì ini nècuàchìmà na ní cundaà ini-nè. Te nì saquin-nè compromisu chiyàhvi-ne. Ñàyùcànduá, nì quesaha Judas mà nandúcú-nè índù modo dayáha-neyà ndahà nècuàchì yucán.

Nansa nì cutnahá Jesús xì compañeru-yà nì xixi-ya Cena ùì

¹² Daaní, nì sàà tu quivì primeru xi vicò xixí-né pan có-ndùtáchí. Te quivì yucán xíhì stná lelù nduú promesa siempre sàha-ne vicò pascua mà. Ñàyùcànduá, nì cachi nècuàchì dacuahá-yá xì-yá:

—¿Índù divi cuní-ní cùhùn-nsì quidayucun-nsì ñà-cuxi-ní comida vicò pascua?

¹³ Dandu nì dandacú-yá nùù ùì compañeru-yà, cachí-yà:

—Cuahán-nsià ini ñuu. Te yucán icúmí-nsiá ndacùhun tnahá-nsiá xì iin tiàa idádocó xì iin yoo tècuí. Nècuàchì yucán cunchicùn-nsià cùhùn.

¹⁴ Te divi vehe ndé quìhvi-ne, yucán càhàn-nsià xì nècuàchì divéhé-xímá, cachi-nsià xì-né ñà-dòhó cachí maestru: ¿Índù iá quartu cahnú ndé cuxi-ya comida pascua xì nècuàchì dacuahá-yá?

¹⁵ Dandu icúmí nècuàchìmà dacuní-nè mii-nsiá índù iá iin vehe cahnú pisu dìquì-xí ndé sà-íá nsidaa ñà-nduá xiñuhu. Yucán quidayucun-nsià ñà-cudiní-nda.

¹⁶ Dandu nì quihin ùì nècuàchìmà ichì cuahàn-nè. Te nì sàà-nè ini ñuu mà, te nacua nì cachi-yà, ducán ndisa nì cuu. Ñàyùcànduá divi yucán nì quidayucun-nè comida pascua.

¹⁷ Daaní, na ní cuñaà, dandu nì sàà stná-yà xì nsì-ùxìn ùì nècuàchì dacuahá-yá.

¹⁸ Te na ndoó-né xixí-né, dandu nì cachi-yà xì-né:

—Cunaha-nsiá, iá iin-nsia cuahàn cahin xí. Te yohó iá-nè xixí-né xì-ndà.

¹⁹ Dandu nì nàcùndoo nsidaa nècuàchìmà tnùnsí ini, te nì cachi iin iin-ne xì-yá:

—¿A víhíní yùhù?

—¿Te ò yùhù? —cachí inga-nè.

²⁰ Dandu nì cachi-yà xì-né:

—Nùu nsi-úxìn ùi-nsià, iin-nsia cuàhàn cahin xì', mate iin-ni xixí-né xì-ndà, te tavá stná-nè pan nùu cazuela yohó.

²¹ Ñà-ndáà nduá, icúmí cuu ndisa ñà-nduà' nì cachitnùhu nùu tutu ì ñà-ìcúmí cui yùhù ana nduu Tnaha Nèhivì Ñuhiví. Doco tiàa cuàhàn cahin xì', ìndahví-nè! Chicá vaha màsà túinuù-né ñuhiví nì cui —nì cachi-yà.

²² Na meru xixí nsidaa-né, nì tnii-ya iin pan, te nì naquimanì-yá Dios sàhà-ñá, te nì dàcuàchí-yáñà, nì dasàn-yá nùu nècuàchì dacuahá-yá mà, cachí-yà:

—Tnii iin iin-nsia pan yohó, vàchi nahi iquicúñú yùhù nduá.

²³ Dandu nì tnii stná-yà pocillu, nì naquimanì stná-yá Dios sàhà ñà-ñùhú, te nì sàha-ya nì caxihi nsidaa-né.

²⁴ Dandu nì cachi-yà:

—Ndutè sì-uva yohó, nahi nùu nduú-te, vàchi divi sàhà nùu icúmí nacoì iin ichì sàà cunchicùn nèhivì nú sàni xìtià-ñà sàhà cuàhà-né.

²⁵ Doco cunaha-nsiá, mà cóhó gué' ndutè sì-uva yohó dècuèndè cachi sàà nacoì saa tui-te quivì sàà cusahnú Dios inicutu ñuhiví yohó.

Nansa nì cachi Jesús xì Pedro ñà-ínáhá-yá icúmí-nè nacuaà-néyà

²⁶ Daaní, nì xito nsidaa-né alabanza, te nì quee-ne cuàhàn-nè xì-yá ndè yucù Olivo.

²⁷ Dandu nì cachi-yà xì-né:

—Ñuú vichi icúmí nsidaa-nsiá nacoò nihni-nsia yùhù, vàchi ducán cachí tutu ì: “Cuàhìn dacúxióé pastor, dandu icúmí riì cuitià nihni-sì”, cachá.

²⁸ Doco nú sàni natiacuì, dandu icúmí codonùu nùu-nsiá cùhùn ndè ladu Galilea.

²⁹ Dandu nì cachi Pedro xì-yá:

—Mate ni sàà nsidaa nèhivì nacoò nihni-ne mii-ní, doco yùhù, cóó, mà nunca.

³⁰ Dandu nì cachi-yà xì-né:

—Cunaha-ní, divi ñuú vichi icúmí-ní nacuaà-ní yùhù. Tàñáha ga coto lehe ùi xichi sinduhá, te sàni nacuaà-ní yùhù ùni xichi.

³¹ Doco Pedro, yáha ga ndee ní càhàn-nè, cachí-nè:

—Còó. Mate ni cahní-nèndó, doco mà nunca sàì nacuaí mii-ní —nì cachi-nè.

Te divi ducánì nì cachi gà stná nsidaa nècuàchì dacuahá-yá mà.

Nansa nì sàhàn Jesús huertu nani Getsemaní, te nì xicàn tàhvi-yá nùu Yuamánì-yá

³² Dandu nì sàà-yà xì-né iin xaan nani Getsemaní. Te nì cachi-yà xì-né:

—Mii-nsiá, yohó ndòo-nsia. Te yùhù, cùhìn chicá nùu-xí càcàn tàhvi nùu Dios.

³³ Dandu nì saca-ya Pedro xì Jacobo xì Juan, cuàhàn-yà xì-né. Te nì sàcòo-ya na ian yúhí-yà, te nì quesaha-yá yáha ga nacánì cuàhà ini-yà.

³⁴ Te nì cachi-yà xì-né:

—Yáha ga ié' tnùnsí ini, na ian cuníà cahnì dahuan yùhù. Ñàyùcànduá, yohó ni ndòo-nsia, te cunchito tùha-nsia.

³⁵ Dandu cuàhàn-yà chicá nùu-xí, te nì sàcùnduhù ndéé-yá nì xicàn tàhvi-yá nùu Dios, áma cui cuxio tnùndoho icúmí-yá yàha-ya.

³⁶ Te dohó nì cachi-yà:

—Yuamánì', nsidaa iñàha vátùni quida-ní. Ñàyùcànduá, xicàn tàhvi nùu-ní áma cúxió tnùndoho icúmí yàhi, vàchi na iin (ñà-úà ñuhú iin) taza nduá nùu, te ùhì cohíà. Doco màdì ñà-nduá cuní yùhù ni cùnduá, cuisì ñà-nduá cuní mii-ní.

³⁷ Dandu vaxi tu-ya ndé nì ndòo nècuàchì dacuahá-yá, te nì xini-yà xíquidì-nè. Ñàyùcànduá, nì cachi-yà xì Pedro:

—Simón, ¿índù chuun quidì-ní? ¿Áma cui cunchito-ní ducán iin hora ni?

38 Cundoo tùha-nsia, te càcàn tàhvi-nsiá nùu Dios sàhá màsà dándáhví ñà-malu mii-nsiá, vàchi mate iá voluntad xi-nsia, doco iyuhu gá valor icúmí cuerpu-nsiá ñà-quidandee ìni-nsia.

39 Dandu nì sàhàn-yà inga xichi, te divi ducán-ní nì cachi tu-ya xì Yua-yá Dios.

40 Dandu vaxi tu-ya, te nì xini-yà tucutu quídì-nè, vàchi sádì vahná-nè. Ni có-nàníhì tnùnì ini-nè nansa naxiconihí-né nùu-yá.

41 Dandu tucu tu nì sàhàn-yà ñà-únì, te nì nsiaa tu-ya nùu-né, cachí-yà:

—Cùdù cuéyàà-nsiá, te quetatu-nsiá vichi, vàchi sà-íá, sàni sàà hora xi yùhù ana nduú Tnaha Nèhivì Ñuhivì, divi hora icúmì yàhi ndahà nèhivì cuáchi.

42 Ndacuìta-nsia, cùhùn-ndà, vàchi sà-ítúú quesaa ana nì cahin xì.

Nansa nì tnii nèhivì Jesús, te nì suhni-nèyà

43 Daaní, na cáhàn ìi-yá xì nècuàchì mà, dandu nì quesaa Judas, divi iin nècuàchì nùu ùxìn ùi nècuàchì dacuahá-yá. Te ndacá stná-nè cuàhà gá tiàa xínihi xi espada xì garroti. Cuenta xi dùtù xícusahnú vaxi-tè, xì cuenta xi stná nècuàchì ley xi veheñùhu, xì stná nècuàchì xídandacú nùu ñuu mà.

44 Te sàni ndatnuhu Judas xì nsidaa tiàa xícutnahá xi-né ñà-coo iin seña ana tnii-tè. Divi ana chítú-nè cunduu meru ana tnii cùhùn presu.

45 Dandu na sàni quesaa-nè, dandu vichì vichì nì tnàtuu-ne nùu Jesús, cachí-nè:

—¡Maestro, maestro!

Dandu nì chítú-nè nùu-yá.

46 Dandu compañeru-nè mà, nì tnii-tè Jesús, nì ndòo-ya ndahà-té.

47 Doco iin nèhivì xí-yá, nì tavà-né espada xi-ne, nì cani-ne iin tiàa quidáchúûn nùu dùtù cusáhnû, nì sahnde-nè iin tùtnù-té.

48 Dandu nì cachi-yà xì nsidaa nèhivì cuàhà mà:

—A ducán nduú modo tnií-nsiá yùhù, vaxi-nsia nihí-nsiá espada xì garroti ñà-tnii-nsia yùhù, na ian tècuìhnà nduí,

49 mate nsiquívì nìsa ìe xì-nsiá veheñùhu cahnú dacuahí nèhivì, doco cóni tnií-nsiá yùhù. Doco cunaha-nsiá, dohó quidá-nsiá xì vichi sàhà-ñá cuu ndisa ñà-nduá cachí nùu tutu ìi —nì cachi Jesús.

50 Dandu nì nacoò nihni nsidaa nècuàchì dacuahá-yá mii-yá, nì xinudèhé-nè.

Iin tèchii nì xinudèhé stná

51 Daaní, nchícùn stná iin tèchii ndixi-xi iin dahmà. Te nì tnii stná-te.

52 Doco nì ndòo sìcoto xi-tè, te nì xinu-tè cuàhàn-te iá chaa-té.

Ñà-nduá nì cachi Jesús na ní sàà-yà nùu Junta Cahnú

53 Daaní, ndacá tiàa ma-yá nì sàà dècuèndè ndé iá dùtù chicá cusáhnû. Te yucán sàni nataca nsidaa gá dùtù xícusahnú, xì stná nècuàchì sahnú xídandacú nùu ñuu mà, xì stná nècuàchì ley xi veheñùhu.

54 Te Pedro, nchícùn xicà ní-né mii-yá cuàhàn-nè. Te nì yàha stná-nè patiu xi vehe dùtù cusáhnúmá, te nì sàcòo stná-nè xì policia ndoó nadáà nùu ñuhu.

55 Daaní, dùtù xícusahnú, xì nsidaa Junta Càhnùmà, nì nducu-né ana daquée cuàchi dìquì Jesús, (te cundua iin cuàchi pesadu) sàhà-ñá cui-yà. Doco còo iin ní túi càhàn ducán.

56 Vàchi cuàhà tètñùhù nì càhàn tñùhù dìquì-yá, doco cóni ndúdává ñà-nduá nì cachi iin iin-tè.

57 Vàchi dava-tè, nì ndacuìta-tè nì càhàn tñùhù-té dìquì-yá, cachí-te:

58 —Nècuàchì yohó, nì inini-nsi nì cachi-nè cuàhàn-nè dacaá-né veheñùhu nì quidavàha nèhivì (ñuu-ndà). Dandu tixi ùni quívì cuàhàn-nè quidavàha saa-né inga-ñà, doco màdì xì ndahà nèhivì cuyucán, cachí-nè —nì cachi tètñùhù mà.

59 Doco ní ñà-jaàn, cóni ndúdává xí ñà-nduá nì cachi ingà-te.

60 Dandu nì ndacuiin dùtù cusáhnû, cachí-nè xì-yá:

—¿Áma náxícóníhí-ní ni-iñàha? ¿Nansa iá ñà-càchí guâ nècuàchì yohó sàhà-ní?

⁶¹ Doco mii-yá, dadí uun iín-yá; còò ni-iñàha ni cachí-yà. Dandu tucutu ni càhàn dùtù mà, cachí-nè:

—¿A divi Cristu Dèhemanì Yua-nda Dios ndùù-ní càhàn-ní?

⁶² Dandu ni cachi-yà xì nècuàchìmà:

—Jaan, divi nduí. Te icúmí-nsiâ cuni-nsià yùhù ana nduú Tnaha Nèhivì Ñuhivì na naxicocuín, ié' ladu cuahá mii-yá cahnú poder-xi mànuì mahì vècò cahnú ansivi.

⁶³ Dandu dùtù cusáhnú má, (ni xidà ini-nè, ñàyucàndüá) ni ndata canúú-nè iyuhu sìcoto ndixí-né, te ni cachi-nè xì nèhivì cuàhà mà:

—¿Cò-xiñhù gá-ndà ni-iin ana quixi cunduu testigu!

⁶⁴ Vàchi vichi sàni inini-nsia ñà-quini guá ni càhàn nècuàchì yohó. ¿Nansa quida-nda xi-né, cachí mii-nsiá?

Dandu nsidaa-né, ni cachi-nè ñà-icúmí-yâ cui-yà.

⁶⁵ Dandu ni caquesaha dava tiàa ma ni sivi dií-teyá, te ni chidàhvi stná-te nùù-yá, sahní cuí-teyá xì sìcàtú, cachí-te:

—¿Cachi cuàá-ní ana ni cani xi-ní!

Daaní, stná policia yucán, ndee ní cani-ne nùù-yá.

Nansa ni quida Pedro ni nacuaà-né Jesús

⁶⁶ Doco Pedro, tixi-xi iá-nè patiu. Dandu ni quixi iin ñahà chii quidáchúùn vehe dùtù mà.

⁶⁷ Te na ní xinìa Pedro iín-né nadáa stná-nè nùù ñuhu, dandu ni indehè váha-ñà nùù-né, te ni cacha xi-né:

—¿Amádi mii-ní nisa cutnahá stná-ní xì Jesús de Nazaret?

⁶⁸ Doco ni nacuaà-né mii-yá, cachí-nè:

—Còó, tàcùní nècuàchìmà, ni có-cundáa ini ñà-ndüá cachú.

Dandu ni quee-ne cuàhàn-nè corredor yucán. Te daa ní xito iin lehe.

⁶⁹ Te ñahà chii mà, ni indehè tú-ñané, te ni cachi-ña xi nècuàchì itá yucán:

—Compañeru Jesús nduú stná nècuàchì jaàn.

⁷⁰ Doco divi-ni ni nacuaà tú Pedro-yà.

Daaní, tixi inga ratu gá, tucutu ni càhàn nècuàchì itá yucán xi-né, cachí-nè:

—Ndisa, iin compañeru nècuàchìmà nduu-ní, vàchi nècuàchì ladu Galilea nduu-ní, te nacua càhàn nèhivì ladu yucán, ducán càhàn stná-ní.

⁷¹ Dandu ni cachi-nè:

—Nú tètñhù nduí, ni quixí castigu xi nùù Dios. Yùhù, chináhí Dios, tàcùní nècuàchì cachí-nsiàmà.

⁷² Dandu momentu yucán ni xito lehe ñà-ù; te ni nsinuu ini Pedro nansa ni cachi Jesús xi-né daa, ñà-tañáha ga coto lehe ùi xichi, te ùni xichi sàni nacuaà-né mii-yá. Pues divi palabra mà (ní nsinuu ini-nè), te na ní nacani ini-nè sàhàmà, ni quesaha-né ni sacu-ne.

15

Nansa ni dàyáha-ne Jesús ndahà gobernador Pilatu

¹ Na ní tùinuù, dandu ni ndatnuhu dùtù xicusahnú xì tè-cùsáhnù nùù ñuu mà, xì stná nècuàchì ley xi veheñuhu, xì nsidaa gá stná Junta Cahnú. Ñàyucàndüá, ni nacuhni-nè ndahà Jesús, cuàhàn-nè xì-yá nùù gobernador nani Pilatu, te yucán ni ndòo-ya ndahà témà.

² Dandu ni xicàn tnùhù-té nùù-yá, cachí-te:

—¿A ndísá rey xi nècuàchì raza Judea nduu-ní, á coó?

—Nacua cachí-ní, divi ducán nduá —cachí-yà.

³ Dandu dùtù xicusahnú, cuàhà ní càhàn tnùhù-né sàhà-yá.

⁴ Dandu ni ndàcàtnùhù Pilatu nùù-yá inga xichi, cachí-te:

—¿Áma náxícónihí-ní sàhà ñà-cuàhà guá cáhàn-nè dìquì-ní?

⁵ Doco Jesús, còò ni-iñàha ni náxícónihí-yá. Ñàyùcàndùá, nì ndulocó Pilatu.

Nansa nì cachi stná Pilatu icúmí Jesús cui-yà

⁶ Cunaha-nsiá, cada nacává vicò pascua mà, tùha gobernador mà dañà-té iin tè-ndiadí, ndéni-te nì cui ndiadí cudíi ini nèhivì cuáhà.

⁷ Te quìvì yucán ndoó itnii tiàa vehecàa. Vàchi nì casahàn-te revolución dìquì gobiernu, te nì sahnì stnàhá-te. Te iin tèmà nani Barrabás.

⁸ Ñàyùcàndùá nì caquixi tu nèhivì cuáhà mà nì quesaha-né nì xicàn-nè nùù Pilatu ñà-nì quidá tú-te ñà-ndùú costumbre xi-tè cada vicò mà.

⁹ Te nì naxiconihí-te nùù-né, cachí-te:

—¿A vátùni dañí Jesús yohó, divi nècuàchì cachí nduú rey xi nècuàchì raza-nsià Judea?

¹⁰ Ducán nì cachí-te xi-né, vàchi ináhà-té ñà-sàhà mbidiá xi dùtù xícusahnú, ñàyùcàndùá nì dáyáha-ne Jesús ndahà-té.

¹¹ Doco dùtù mà, nì chiyuhù-né nèhivì cuáhà mà ñà-nì cécàn-nè dàñà Barrabás mà, te màdiá Jesús.

¹² Dandu nì càhàn tu Pilatu xì nèhivì mà, cachí-te:

—¿Ndíà nduá cuní-nsià quide xì nècuàchì yohó? Vàchi rey xi mii-nsià nècuàchì raza Judea nduú-né, cachí-nsià.

¹³ Dandu ndee ní càna nsidaa nèhivì yucán, cachí-nè:

—¡Ni cuí-nè nchìca cruz!

¹⁴ Dandu nì cachi tu Pilatu:

—¿Índù chuun cui-nè ñà-còò falta xi-ne iá?

Doco chicá ndee ní càna nèhivì mà, cachí-nè:

—¡Ni cuí-nè nchìca cruz!

¹⁵ Te sàhà ñà-cùnì Pilatu ndòò vaha-tè xì nèhivì mà, ñàyùcàndùá nì dañà-té Barrabás. Te nì dándàcú-te ñàhni cuií Jesús xì chirrión. Dandu nì dándàcú stná-te nùù soldadu xi-tè ñà-cundaca-temàyá cùhùn chituu-tèyá nchìca cruz.

¹⁶ Doco primeru, nì casaca-tèyá ndè patiu vehechuún, te nì cana-tè nsidaa compañeru-te ñà-tnàtuu-tè.

¹⁷ Dandu nì chindixi-tèyá iin sìcoto moradu. Te nì cavà-té iin corona iñù nì chicaà-te dìni-yá.

¹⁸ Dandu nì sàcùndiaà-teyá, càna-tè, cachí-te:

—¡Viva! ¡Ádi rey xi tè-raza Judea nduu-ní!

¹⁹ Te nì caní fuerte-te dìni-yá xì iin nù-yòò. Dandu nì casivi dìi-teyá, te nì sàcùltasisi-tè nùù-yá, na ian quidáñúhú-tèyá.

²⁰ Daaní, na ní nsihi nì sàcùndiaà-teyá ducán, dandu nì tavà-té sìcoto moradu mà, te nì nachindixi-tèyá sìcoto xi mii-yá. Dandu nì saca-tèyá cuàhàn-te ñà-chituu-tèyá nchìca cruz.

Nansa nì chituu-tè Jesús nchìca cruz

²¹ Ichì yucán nì ndacùhun tnahá-te xì iin tiàa nani Simón, màndixi-ne nì sàhàn-nè nùù itú. Iin nècuàchì ñuu Cirene nduú-né, te yua Alejandro xì Rufo nduú stná-nè. Te divi nècuàchì mà nì tnii soldadu, te nì dàcuidá-tené cruz xi Jesús cuàhàn-nè.

²² Dandu nì casaà-te xi-yá iin xaan nani Gólgota. Quìvì jaàn cachí dàhàn yucán, Nùù Iquidìni.

²³ Dandu nì cunì-te dacohó-teyá vinu dácà xì iin dùsa tatna nani mirra, doco cónì cùnì-yá.

²⁴ Daaní, nì chituu-tèyá nchìca cruz. Te nì dasàn-té sìcoto xi-ya según nansa nì nìhì iin iin-tè na ní idíquì-te sàhà-ñá.

²⁵ Nahi cà-îin dàtnàà nduá nì chituu-tèyá nchìca cruz mà.

²⁶ Te yucán nì cachituu stná-te iin ñà-càchítñuhu índù-ñá disáhà-xí dandohó-teyá. Te dohó cachá: “Rey xi tè-raza Judea”.

²⁷ Cunaha-nsiá, yucán nì sàcùtundiaa stná ùi tècuìhnà nchìca cruz, iin-tè ladu cuàhá-yà, te ingà-te ladu itní-yà.

²⁸ Te ducán nì cuu ndisa ñà-nduá nì cachitñuhu tutu ìi ndé cachá: “Nì quida nèhivì cuenta na ian tiàa malu nduú-yá”.

²⁹ Dandu nèhivì yáha yucán, nì canàhá-nè xì-yá, dacuico dínì-né, cahíchì ini-nèyà, te ndacótó dana-ne nùu-yá, cachí-nè:

—¡Ndahví-ní! ¡Cuàhàn-ní daciaa-ní veheñùhu cahnú, te tìxi ùni quivì naquidavàha saa-ní inga-ñà cahan-ní!

³⁰ Pues nú ducán fuerte guá-ní, dandu dacácu-ní mii-ní. Danuu-ní mii-ní nùu cruz cundehè-nsí —nì cachi-nè.

³¹ Ndè stná dùtù xícusahnú, xì nècuàchì ley xi veheñùhu, divi-ni ducán nì sàcùndiaa stná-nèyà, cachí-nè iin-ne xì inga-nè:

—Nècuàchì jaàn, nìsa dacácu-ne nècuàchì dava ga, doco mà cùì dacácu-ne mii-né.

³² Doco nú ndisa Cristu rey xi nècuàchì raza-ndà Israel nduú-né, dandu ni dánúû-né mii-né nùu cruz jaàn cundehè-ndà, dandísá cunindisa-ndané.

Ducán nì cachi-nè. Te dècuèndè stná tiàa itándiáá stná nchìca cruz yucán, nì canàhá stná-te xì-yá.

Nansa nì xihì Jesús, nì dãnáà-yá sàhà cuàchi-nda

³³ Daaní, càxíhùì xì ndé càhúni, nì nàcuìin tnùu inicutu ñuhivì.

³⁴ Dandu càhúni nì ndàhì ndee-yá, cachí-yà:

—Eloi, Eloi, ¿lama sabactani? —te dohó cuní cachàmà: Dios mío, Dios mío, ¿a ñá-sàni ndòo nihni nduá yohó?

³⁵ Te dava nècuàchì itá yucán, nì tiacu-nè ndàhì-yà ducán, ñàyùcànduá nì cachi-nè:

—Cunini-nsia, caná-né Elías.

³⁶ Dandu nì dàyáà iin-tè nì quihin-tè iin ñà-ñàhmá uun nani esponja, te nì chin-daxin-tèá xì vinu nì xìò, nì chihi-tèá dìnì iin vara yutnù, te nì sàha-tèyá nì sihvi-yá, cachí-te:

—Vichi nacoò-ndané cundiatu-nda, áma quíxí Elías nanihi xì-né.

³⁷ Dandu nì ndàhì ndee-yá, te nì xihì-yà.

³⁸ Daaní, yucán ini veheñùhu cahnú (ñuu mà) nì quedava ìi cortina cahnú (sadí nihni cuarto xan). Iin-ni nì ndàtà-ñá ndè dìnì-xì xì ndé tìxi-xì.

³⁹ Te iín iin capitán nùu-yá, te nì xini-te nansa nì ndàhì-yà, te nì xihì-yà. Ñàyùcànduá nì cachi-te:

—Ñà-ndáà nduá, Dèhemanì Dios nì sanduu nècuàchì yohó.

⁴⁰ Daaní, yucán itá xica stná itnii nècuàchì ñahà, indéhe stná-nè (nansa cuú). Iin-ne nduú María Magdalena, te inga-nè nduú María dihi José xì Jacobo chii. Te inga-nè nduú Salomé.

⁴¹ Nècuàchì ladu Galilea xínduu nsidaa nècuàchì mà, te na ní xìcanuu-ya ladu yucán, nì cutnahá stná-nè xì-yá nì chindee-nèyà. Te vichi itá xica-né, (indéhe-ne), cutnàhâ-né xì cuàhà gá stná nècuàchì ñahà nì quixi stná xì-yá ndè ñuu Jerusalén.

Nansa nì ndùxin Jesús ini cueva

⁴² Te sàdaaní quècahnu orá quivì yucán. Te quivì mà nduú stná quivì icúmí-nè nsidayucun-nè sàhà quivì descansu cunduu inga quivì mà.

⁴³ Ñàyùcànduá nì sàà stná iin nècuàchì ñuu tii Arimatea nani José, nì xìcàn-nè cuerpu xi Jesús. Iin nècuàchì dandacú nùu Junta Cahnú nduú-né, te nihnú stná ini-nè sàà tiempu cusahnú Dios ñuhivì yohó. Divi-ne nì sàhàn nùu Pilatu; cóni yúhî-nè, nì xìcàn-nè cuerpu xi-ya.

⁴⁴ Te nì ndulocó-te, a ndísá yàchì gà sàni xihì-yà, á coó. Ñàyùcànduá, nì cana-tè iin capitán, nì xicàn tnùhù-té nùù témà a ndísá sàni xihì-yà, á coó.

⁴⁵ —Jaan —nì cachi capitán mà.

Ñàyùcànduá, nì sàha Pilatu lugar naquihin José mà cuerpu xi-ya.

⁴⁶ Sàháyùcànduá, nì xiin nècuàchì mà iin dahmà finu, te nihí-néa cuàhàn nì nanihi-ne cuerpu xi-ya, nì chidúcùn-néyà, te nì chinacaa-néyà ini cueva xi nsi sàni càan canúú ìcà cavà. Dandu nì dàtùí-né iin cavà cahnú yuhù cueva mà nì sàcùndiadià.

⁴⁷ Te María Magdalena, xì María dihi José, nì caxini stná-nè lugar ndé nì sàcùnacaa-yà.

16

Nansa nì natiacu Jesús

¹ Daaní, na sàni cuñaà quivì descansu, dandu nì sàhàn María Magdalena, xì Salomé, xì María dihi Jacobo, nì xiin-ne tàtnà tnàmì ñà-cunihi-ne cùhùn dacuchí-né cuerpu xi Jesús.

² Dandu naha quivì primeru semana nì quihin-ne ichì cuàhàn-nè cueva ndé iá-yà. Te nì xinu orá.

³ Te cachí-nè, iin-ne xì inga-nè:

—¿Ana chindee xi-nda dacúxíó xí cavà cahnú ndiadí yuhù cueva mà?

⁴ Doco nì candacoto-ne, te nì xini-nè sàni cuxio cavà mà, mate cahnú sàstnùhá.

⁵ Dandu nì quihvi-ne ini cueva mà, te nì xini-nè iá iin ana nduú na iin nècuàchì chii, iá-nè ladu cuàhá cueva mà, ndixí-né iin sicoto quihín cuxín yaa. Ñàyùcànduá nì candulocó gà nècuàchì ñahà mà.

⁶ Doco nì càhàn nècuàchì iá yucán, cachí-nè xì nècuàchì mà:

—Màsà yúhí-nsià; Jesús de Nazaret nandúcú-nsià, divi ana nì xihì nchìca cruz. Doco cunaha-nsià, sàni natiacu-yà. Còò cá-yà yohó. Cundehè-nsià lugar ndé nì sanduhù-yà.

⁷ Ñàyùcànduá, cuahán-nsià cachitnùhu-nsia xì Pedro xì nècuàchì dava ga nìsa dacuahá-yà, te cachi-nsià xì-né ñà-ìcúmí-yà codònuù-yà nùù-nsià nùhù-yà ladu Galilea. Yucán icúmí-nsià cuni-nsiayà, vachi ducán nì cachi-yà xì-nsià —nì cachi ángel.

⁸ Daaní, nì caquee nècuàchì mà cueva mà, nì dàyáà-nè cuàhàn-nè. Vachi nì quesaha-né quidí-né, te ndulócò gà-nè. Doco sàhà ñà-nì yuhí guâ-nè, cóni càchí-nè ni-ñàha xì nèhivì.

Nansa nì xini María Magdalena Jesús

⁹ Ducán nì natiacu Jesús naha quivì primeru semana. Te María Magdalena nduú nècuàchì primeru nì ndecunu-ya nùù-xí. Nècuàchì mà, ùsà ñà-malu nì sañuhu ini-nè antes, doco nì tavà-yà nsidaámà anima-nè.

¹⁰ Pues divi nècuàchì mà nì xini xì-yá primeru, dandu nì sàhàn-nè nì cachitnùhu-ne xì compañeru-yà, divi nècuàchì nìsa xicanuu xì-yá antes. Vachi ndoó-né tnùnsí ini, te sacú-né.

¹¹ Dandu nì nacani María mà xì-né ñà-sàni natiacu-yà, te nì ndecunu-ya nùù-né. Doco cóni xìníndísâ nècuàchì mà.

Nansa nì ndecunu Jesús nùù ùi nècuàchì dacuahá-yá

¹² Daaní, después cuàhàn ùi nèhivì xí-yá nùù campu, te yucán nì ndecunu tu-ya nùù-né, doco tucu nì nàcùnahà-yà.

¹³ Dandu nì naxicocuín nècuàchì mà nì cachitnùhu-ne xì compañeru-nè. Doco cóni xìníndísâ stná nècuàchì dava ga mà yuhù-né.

Ñà-nduá nì dàndàcú Jesús nùù nècuàchì dacuahá-yá quida-ne nú sàmànùhù-yá

¹⁴ Chicá después nì ndecunu tu-ya nì natùì-ya nùù nsihúxìn iin nècuàchì dacuahá-yá na meru ndoó-né xixí-né. Te nì càhàn duchì ini-yà xì-né sàhà ñà-caxin guá anima-nè, vachi cóni xìníndísâ-né yuhù nècuàchì nì xini xì-yá primeru ñà-sàni natiacu-yà.

¹⁵ Dandu nì cachi-yà xì-né:

—Cuahán-nsiá inicutu ñuhíví, te cachitnùhu vate-nsiá razón ndiaha xí ñà-cunini nsidanicuú nèhivì.

¹⁶ Nècuàchì cunindisa-xán, te cuhii-né, icúmí-nê càcu-ne nùù Dios. Doco nècuàchì mà cúníndísá-xân, nicanicuahàn icúmí-nê cunsida-ne cuàchi-ne.

¹⁷ Te nú sàni xinindisá nèhivì, dandu icúmí stnâ-nè quida-ne milagru. Sàhà yùhù icúmí-nê tavà-né ñà-malu ñuhú anima nèhivì, te càhàn stná-nè dàhàn sàà.

¹⁸ Te nú ni tnií-né iin còò dàná, te ò nú ni cohó-né ndutè dàná, dandu còò ni-iñàha cuu xi-né. Te icúmí stnâ-nè chitandòó-né ndahà-né dìni nècuàchì cuhí, te nduvàha nècuàchìmà —nì cachi-yà.

Nansa mànuhù Jesús ansivi cuàhàn-yà

¹⁹ Daaní, na ní nsihi nì càhàn-yà xì nècuàchì dacuahá-yá ducán, dandu mànana cuisì-yá ansivi cuàhàn-yà, te nì sàcòo-ya ladu cuàhá Dios.

²⁰ Dandu nècuàchìmà, nì caquihin-ne ichì cuàhàn-nè, nì cachitnùhu vate-né inicutu ñà-ndùú razón ndiaha xí-yá. Te Stoho-ndà Señor, nì chindee stná-yànè nì sàha-ya milagru ñà-cucumi-nda seguru divi palabra ndàcuisì nduá cachí-nè.

Yohó nì nsihi historia.

Ñà-nduá Nì Tiaa San Lucas sàhà Jesucristu

Nansa nì nacani ini San Lucas nì tiaa-ne tutu yohó ñà-cahvi iin amigo xi-ne nani Teófilo

¹⁻² Cuàhà nèhivì sàni quida lucha tiaa-ne iin tutu ndé nachutnahá víi-né historia nacání xí ñà-nduá nì xini nèhivì xí-nsí nì cuu, nì tiaa-ne nacua nì cachitnùhu nècuàchì nì xininùù mà, vàchi ináhá nècuàchì mà nansa nì cuu dècuèndè quivì primeru, dandu nì dàcuítia stná-nè palabra mà, te ducán nì xinitnùhu stná nsiùhù.

³⁻⁴ Ñàyùcànduá, stná yùhù nì nacani stná inì tiai iin tutu ñà-nàcání víi xi-ní sàhà nsidaa ñà-nduá nì là. Vàchi yùhù, sàni sàni nì cundaà vaha inì sàhà nsidaa chuun yohó dècuèndè quivì primeru na ní quesaha-ñá. (Ñàyùcànduá, tiaí tutu yohó) nùù mii-ní don Teófilo, sàhà-ñá vátùni cundaà vaha inì-ní divì ñà-ndaà nduá sàni nacani nèhivì xí-ní sàhà-ñá.

Nansa nì cachitnùhu iin ángel ñà-icúmí tùinuù Juan Bautista ñuhivì

⁵ Tiempu dandacú rey Herodes nùù ñuu Judea nì sandua, te ñuu yucán nìsa là stná iin dùtù nani Zacarías. Turnu nì saquidachuún-né chuun xi dùtù. Te mii-né xì dùtù compañeru-nè, nsidaa-né nani-né turnu xi Abías. Te ñahàdihí-nè nani Elisabet. Descendencia xi dùtù Aarón sàhana xínduu ndùù nècuàchì mà.

⁶ Te nihnú ndàcuisì ini-nè Yua-nda Dios; chívaha ndisa-ne nsidaa ñà-nduá dandacú-yá, nsidaa ñà-nduá cachí-yà.

⁷ Doco còò déhe-ne, vàchi de por sí, còò mée xi Elisabet, te vichi ndùù-nè sàni sahnu cuahà-né.

⁸⁻⁹ Daaní, iin quivì nì sàà nì quida tocar Zacarías mà turnu xi-ne ñà-quida-ne chuun xi dùtù nùù Dios. Te estilu nìsa icumi dùtù mà nduá ñà-quidá-né iin sorteu (índù chuun divì quida cada iin iin-ne). Te Zacarías nì quida tocar ñà-quihvi-ne veheñùhu cahnú ñà-chiñùhmá-nè inciensu.

¹⁰ Te nsidaa nèhivì dava ga sàhàn veheñùhu yucán, ndoó-né tùvèhé nacuatú-né na hora chíñùhmá dùtù mà inciensu.

¹¹ Dandu ini veheñùhu ma nì ndecunu iin ángel xi Stoho-ndà Señor, te nì xini Zacarías-nè, iin-né ladu cuahá mesa ndiaha ndé sàhmì-xì inciensu.

¹² Te nì yuhí Zacarías mà, yáha ga nacání ini-nè.

¹³ Dandu nì càhàn ángel mà xì-né, cachí-nè:

—Màsà yúhí-ní, Zacarías, vàchi cunaha-ní, sàni tiacu Dios ñà-nduá nì xicàn tàhvi-ní nùù-yá; ñàyùcànduá, cuàhàn coo iin dèhe-ní, vàchi cuàhàn coo iin mée xi nècuàchì vehe-ní Elisabet; mée tiàa cunduu-ve, te Juan dacúnání-nsiâvè.

¹⁴ Cuàhà gá icúmí-nsiâ cudì inì-nsia, te naquimanì stná-nsià mii-yá; te cuàhà gá stná nèhivì icúmí cudì inì-xi na quesaa-vè.

¹⁵ Te na cuahnu-ve, icúmí-vé nihí-vé iin chuun cahnú nùù Yua-nda Dios. Te ni vinu te ni ndutè ihni, mà nunca sàà-nè coho-ne ndutè mà. Mate táñaha ga tùinuù-né ñuhivì, doco sàchitu anima-nè Espíritu ìì xí Dios.

¹⁶ Te sàhà palabra cachi-nè icúmí cuàhà nècuàchì raza-ní Israel naxicocuïn ini-nè, te natenchicùn-nè Stoho-ndà Dios.

¹⁷ Dihna dèhe-ní icúmí codònuù quesaa, dandu mii-yá. Icúmí-nè quida-ne nacua nìsa quida Elías sàhana, iin-ni cunihnu ini-nè Dios nacua nìsa quida nècuàchì yucán, te iin-ni chindee stná Dios-nè. Te icúmí-nè càhàn stná-nè xì ana xínduu nècuàchì sahnú ñuu-ní, dandu nsinuu ini nècuàchì mà dèhe-ne, te nàcùndoo vù nsidaa-né. Te càhàn stná dèhe-ní xì cuàhà nèhivì có-ndùlócò xì Dios sàhà-ñá nihì nècuàchì mà nàcùnihnu vaha stná ini-nè, dandu nsidavii-né anima-nè, te cundoo tùha-ne na quesaa Stoho-ndà Señor —nì cachì ángel mà.

¹⁸ Dandu nì cachi Zacarías xì ángel:

—¿Índù iin milagru coo sàhà-ñá cundaà ndisa inì ñà-ndáà nduá cachí-ní? Vàchi yùhù, sàsàhnú cuáhí, te ducán stná ñahàdihí, sàsàhnú stná-nè.

¹⁹ Te nì cachí ángel mà:

—Yùhù nduí Gabriel, te nùù Dios iin tùhe nicanicuahàn. Te divi-ya nì techuún-yá yùhù vaxi cachitnùhi xì-ní ñà-nduá sàni cachì xì-ní.

²⁰ Doco vichi icúmí-ní nduhihin-ní, mà cúí gá càhàn-ní ni-iin palabra dècuèndè quivì cuu ndisa ñà-nduá nì cachì xì-ní, vachi có-xiníndísá-ní. Doco seguru icúmí cuu ñà-nduá nì cachì xì-ní —nì cachì ángel.

²¹ Daaní, nècuàchì xíndiatu tùvèhèmà, nacání gá ini-nè, ¿índù chuun nì cuee guá Zacarías ini veheñùhu?

²² Dandu nì quee nècuàchìmà, doco mà cùì gá càhàn-nè. Ñàyùcànduá, nì cundaà ini nèhivì mà sàni dàcùnì Dios nècuàchìmà iñàha na iá-nè veheñùhu, vachi sàni nduhihin-nè, te vichi cuisì-ní ndahà-né cuú quidá-né seña.

Nansa nì cuu ndisa ñà-nduá nì cachitnùhu ángel

²³ Daaní, después nì cuee Zacarías nì ìa-ne ñuu yucán dècuèndè nì xínu quivì xinúcuáchí-nè yucán, dandu nì naquihin-ne ichì mànuhù-né vehe-ne.

²⁴⁻²⁵ Te nì yàha iin tiempu, dandu nì cundaà ini-nè sàñùhú mée xi ñahàdihí-nè Elisabet. Ñàyùcànduá, ùhùn yòò nì ndòo Elisabet mà vehe-ne, cudî ini-nè, cachí-nè: “(Ansivéhé) Dios, sàni chindee-yá yùhù, vachi ináhá-yá sácùndiaa nèhivì yùhù; ñàyùcànduá nì indehè ndahví-yá yùhù, te vichi mà cáhìchì gá ini-nè yùhù”.

Nansa nì cachitnùhu iin ángel icúmí tùinuù Jesús ñuhiví

²⁶ Daaní, nì sàà ìñù yòò, te nì techuún Dios ángel Gabriel mà inga xichi vaxi-ne iin ñuu tii nani Nazaret iá ladu Galilea,

²⁷ vaxi-ne cachitnùhu-ne xì iin nècuàchì ñahà chii nani María. Señorita nduú nècuàchìmà; te sàni ndiadi tnùhu xi-ne ñà-cuàhàn-nè nandàhà-né xì iin tiàa nani José, iin nècuàchì descendencia xi rey David.

²⁸ Te nì sàà ángel mà ndé iá María mà, nì yàha-ne ini vehe, te nì cachì-nè:

—Cuaàváha-ní. Cunaha-ní, sàni ñhì cuáhà-ní gracia nùù Stoho-ndà Dios, te cutnáhà-yá xì-ní. Chicá ndiaha sàni ñhìtáhvì-ní nùù nsidanicuú gá nècuàchì ñahà.

²⁹ Dandu María, indéhe-né ángel mà, te nì ndulocó-nè: ¿índù chuun cásàhú nècuàchìmà xì-né ducán? càhàn-né.

³⁰ Dandu cachí ángel mà:

—Màsà yúhì-ní, María, vachi ndiaha gá sàni ñhìtáhvì-ní nùù Dios ñà-quida-ya gracia sàhà-ní.

³¹ Cunaha-ní, icúmí coo iin mée xi-ní, tùinuù-vé ñuhiví; mée tiàa cunduu-ve, te Jesús cunani-vé quida-ní.

³² Cahnú chuun icúmí-yá ñhì-yá, vachi Dèhemanì Stoho-ndà Dios iá ansivi cunduu-ya. Te chuun cucumi-yá nùù Yuamánì-yá cunduu ñà-dandacú-yá nacua nisa dandacú yohòtéhè-yá David.

³³ Te nicanicuahàn icúmí-yá cusahnú-yá nùù nsidaa nèhivì raza-ní Israel, te mà nunca sàà iin quivì mà dándacú gá-yà.

³⁴ Dandu nì cachì María xì ángel mà:

—Doco ¿índù modo cuu xí ducán, como tàyóo ì yúhù?

³⁵ Dandu nì cachì tu ángel mà xì-né:

—Fuerte icúmí quixi Espíritu ìì xí Dios ini anima-ní xì poder ìì xí-yá; vachi iin milagru cundua quida Yua-nda Dios iá ansivi. Ñàyùcànduá, ìì sástrnùhù icúmí coo mée xi-ní, vachi Dèhemanì Dios cunduu-ve.

³⁶⁻³⁷ Cunaha-ní, tnahà stná-ní Elisabet, cuàhàn coo stná iin mée xi-ne, mate sàsàhnú cuáhà-né. Te vichi sàcuàhàn-ndà ìñù yòò ñuhú mée xi-ne, mate antes nisa cachì nèhivì mà

cúí coo ni-iin dèhe-ne. Ducán nì nìhítáhvì-né nùù Dios, vàchi mà úhì quida-ya nsidanicuú iñàha.

³⁸ Dandu nì cachi María:

—Còó, vátùni; yùhù icúmí quide ñà-nduá cachí mii-yá. Vátùni ni quidá-yá xí nacua cachí-ní —nì cachi-nè.

Dandu nì quee ángel mà cuàhàn-nè.

Nansa nì cachi María na ní sàhàn-nè visita vehe Elisabet

³⁹⁻⁴⁰ Quivì yucán nì quihin María ichì cuàhàn ndee-né iin ñuu iá ladu Judea ndé iá puru yucù cuàchì. Te na ní sàà-nè ñuu yucán, nì sàhàn-nè vehe Zacarías, nì casàhú-nè xì Elisabet.

⁴¹ Na ní tiacu nècuàchìmà casàhú María xì-né, dandu nì cundaà ini-nè nì ndacùchí fuerte méè xi-ne tixi-ne. Dandu fuerte nì quixi Espíritu Ì xí Dios ini anima-nè.

⁴² Te ndee ní càhàn-nè, cachí-nè xì María:

—Ndiaha gá sàni quida Yua-nda Dios xì mii-ní nùù nsidaa gá nècuàchì ñahà, te ndiaha gá coo stná méè xi-ní.

⁴³ 'Mii-ní, dihi Stoho-ndà Señor nduu-ní, doco vichi sàni quesaa-ní ndé ié', mate có-nâtùì (quixi-ní vehi).

⁴⁴ Vàchi cunaha-ní, na ní tiacuì casàhú-nì xí, dandu nì ndacùchí fuerte méè-xi tixi ñà-cùdù guá ini-vè.

⁴⁵ Vàchi, ndiaha gá sàni cundiatú anima-ní, ñà-nì xinindisa-ní; te vichi seguru icúmí cuu ndisa razón xi Dios nì inini-ní.

⁴⁶ Dandu nì cachi María:

Yùhù, cuàhà gá naquímání Stoho-ndà Señor vichi,

⁴⁷ te cuàhà gá cudùì ini anímè sàhà-yá, divi mii-yá nì dàcácu xí.

⁴⁸ Vàchi sàni xinimàni-yá yùhù, mate nècuàchì ndahví nduí. Ináhí, dècuèndè vichi xì ndé nicanicuahàn icúmí nèhivì cundaà ini-nè ndiaha gá nì quida Dios xí.

⁴⁹ Fuerte sàstnùhù-yá, te cuàhà gá obra sàni quida-ya xí; ì ndisa-ya sàni cundaà ini.

⁵⁰ Nicanicuahàn icúmí-yá cundehè ndahví-yá nèhivì càhvì xì-yá.

⁵¹⁻⁵² Te ndiaha gá obra nahnú quidá-yá, ñàyùcànduá nsidaa nècuàchì cuadú, sàni cundee dahuun-ya nùù-né, xì nsidaa stná tè-xídandacú, sàni dàcúxíó stná-yàte nùù chuun xi-tè, te nì chidònùù-yá nècuàchì ndahví.

⁵³ Stná nècuàchì xíhì guá doco, sàni sàha-yanè ñà-vàha xi-ne, te nì ndòò vaha ini-nè. Doco nècuàchì cuicà, còò ni-iñàha ni níhì-né nùù-yá, te cuàhàn-nè.

⁵⁴⁻⁵⁵ Sàhana nì càhàn-yá xì xii-ndà Abraham, te nì quida-ya comprometer ñà-nicanicuahàn icúmí-yá chindee-yá mii-né xì descendencia xi-ne. Ñàyùcànduá, vichi sàni quida-yañà-mà cumplir, sàni chindee-yá raza-ndà Israel, vàchi cóni nándodó-yá ñà-nduá nì cachi-yá daa, nì cachi María.

⁵⁶ Daaní, ùni yòò nìsa ìa gá nècuàchìmà xì Elisabet, dandu mànuhù-né vehe-ne.

Nansa nì cuu quivì nì tùinuù Juan Bautista ñuhivì

⁵⁷ Daaní, nì sàà quivì quesaa méè xi Elisabet, te nì tùinuù-vé, méè tiàa nduú-vé.

⁵⁸ Te nsidaa vecinu xi-ne, xì nsidaa stná tnaha-ne, nì xinitnùhu-ne nansa nì indehè ndahví Stoho-ndà Señor nècuàchìmà. Ñàyùcànduá, nì cudùì gá ini nsidaa-né.

⁵⁹ Te na ní xinu ùnà quivì, nì casaà nsidaa nèhivì mà (vehe Elisabet), vàchi cuàhàn màcùtuu seña xi Dios ìcà-vé; te cuní nèhivì mà dacúnání-nèvè Zacarías, nacua nani yua-vé.

⁶⁰ Doco nì cachi dihi-vé:

—Còó, Juan cunduu quivì-vé.

⁶¹ Te nì cacachi nècuàchìmà:

—¿Índù chuun? vàchi còò ni-iin tnaha-nda nani Juan.

⁶² Dandu nì caquida nècuàchìmà seña nì ndàcàtnùhù-né nùu yua-vé, a ver nansa cuní mii-né cunani-vé.

⁶³ Nàyùcànduá, nì xicàn nècuàchìmà iin tabla tii nì tiaa-ne ñà-Juan cunduu quivì-vé. Dandu nsidaa nècuàchì yucán, nì candulocó-nè.

⁶⁴ Te divi momentu mà nì quesaha nì nacahàn fuerte Zacarías, vátùni nì nacahàn vii-né vichi. Te nì ndenihi vàha-ne Dios.

⁶⁵ Daaní, nsidaa nèhivì ndoó yucù ladu Judea mà, nì ndatnuhu cuahà-né sàhà ñà-nduá nì cuu ma.

⁶⁶ Te nsidaa ana nì xinitnùhu sàhà-ñá, nì chivàha nsihi-neà ini anima-nè, cachí-nè:

—¿Índù iin clase nèhivì cunduu méè yohó?

Ducán nì cachi-nè, vàchi cuahà gá nì chindee Dios-vè.

Ñà-nduá nì cachi Zacarías na ní càhàn ndiaha-né nì cachitnùhu-ne nansa cuahàn quida dèhe-ne Juan

⁶⁷ Daaní, yua-vé Zacarías, fuerte nì quixi Espíritu ìlì xí Dios ini anima-nè, te ndiaha gá nì càhàn-nè nì quida-ya, cachí-nè:

⁶⁸ Cuahà gá naquímànì-ndà Stoho-ndà Dios, divi mii-yá ana càhvì nsidaa raza-ndà Israel, vàchi sàni indehè ndàhvì-yà ndohó nècuàchì nduú nèhivì xí-yá, te sàni dàcácu-yàndó.

⁶⁹ Sàni techuún-yá iin ana chicá fuerte dacácu xi-nda, divi iin descendencia xi nèhivì xí-yá nani David.

⁷⁰ Vàchi dècuèndè chicá sàhana sàni quida-ya comprometer ñà-quixi ana dacácu xi-nda, vàchi ducán nì cachi-yà xì nèhivì xí-yá (sàhana), te nì cachitnùhu nècuàchì ìlì mà

⁷¹ ñà-icúmí-yà dacácu-yàndó nùu nsidaa ana xiní ùhì xì-ndà, xì nùu stná ana dava ga có-xiñùhù xì-ndà,

⁷² te cundehè ndàhvì-yà nsidaa yohòtéhè-ndà. Mà nándodó-yà tratu ìlì nì saquin-yà xì xì-ndà.

⁷³⁻⁷⁵ Vàchi fuerte nì càhàn-yà ñà-seguru quida-ya ñà-nduá nì cachi-yà xì xì-ndà Abraham, icúmí-yà cuidahan-yàndô nùu ndahà nsidaa tè-xiní ùhì xì-ndà, te mà yúhì gà-ndà. Dandu vátùni cunucuachi víi-nda nùu-yá nicanicuahàn, cunduu-nda nèhivì ìlì xí-yá, nèhivì nihnú ndàcuìsì inì-xì.

⁷⁶ Te miun xu, icúmú cunduu ana càhàn sàhà Yua-nda Dios iá dìquì-xí ansivi, vàchi dihna miun icúmú càhùn xì nèhivì sàhà-ñá natenchicùn-nè ichì váha, dandu na quivì quesaa Stoho-ndà Señor, sàndòò tùha-ne.

⁷⁷ Vàchi icúmú cachitnùhu xì nèhivì xí-yá nansa cui càcu anima-nè, te nandutu cuàchi-ne.

⁷⁸ Vàchi vichi, sàni cuhi ini Dios ndohó. Ndè dìquì-xí ansivi nì quee-ya nì quesaa-yà ñà-datnúù-yà sàxinítnùnì-ndà,

⁷⁹ xì stná sàxinítnùnì nèhivì có-sàà cundaà inì-xì, divi nèhivì sà-ítúú ndañuhu anima-xì. Te vichi vátùni cundaca-yàndó iin ichì víi ndé cundoo vii-ndà nùu-yá, te cudì gá ini-ndà, nì cachi Zacarías.

⁸⁰ Daaní, nì sahnú méè Juan mà, te nì sàcòo fuerte anima-nè. Te iin-ni nì ìa-ne yucù dècuèndè nì sàà quivì nì quesaha-né cacanu-ne càhàn-nè sàhù sàhà mii-yá xì nèhivì raza-nè Israel.

2

Nansa nì cuu quivì nì tùinuù Jesús ñuhivì

¹ Daaní, quivì yucán nì dándàcú tè-cùsáhnù César Augusto ñà-icúmí nandiahvi nsidaa nèhivì cusáhnù-te nùu-xí.

² Nà-yucán nì sanduu censu primeru nì quida-tè na tiempo dandacú Cirenio nùu ladu Siria.

³ Nàyùcànduá, nsidanicuú nèhivì, mànuhù-né ñuu-nè ñà-nayàha-ne nùu lista,

⁴ xì stná José, nì quee stná-nè ñuu Nazaret iá ladu Galilea mànuhù-né ladu Judea ndé nduú ñuu-nè nani Belén, vàchi descendencia xi David nduú stná-nè, ñàyùcàndùá, mànuhù-né ñuu tii ma ndé nìsa là David sàhana,

⁵ cuàhàn-nè dayáha-ne quivì-né nùu lista mà. Te cutnàhá stná-nè xì María nècuàchì cuàhàn nandàhà xì-né, te ñuhú mée xi nècuàchìmà.

⁶ Daaní, ndoó î-né ñuu yucán, te nì sàà quivì tùinuù mée mà.

⁷ Ñàyùcàndùá, yucán nì quesaa-vè ñuhiví; mée nuu xì-né nduú-vé, te nì chidúcùn-névè sìcoto ndahví, te nì chinduhù-névè ini iin canoa, vàchi có-sàà gà vehe ndé quídì nècuàchì xicá ichì.

Nansa nì ndecunu ángel ndé ndoó nècuàchì xíndiaa xì rii

⁸ Cunaha-ní, yatni ñuu yucán ndoó stná nèhivì quídì ndiaá xì rii xí.

⁹ Te na íín cachí nì ndecunu iin ángel xi Stoho-ndà Señor, nì sàcùin-nè nùu nècuàchìmà, te ndiaha gá nì natnuù inicutu ndé ndoó-né nì quida Stoho-ndà Señor. Ñàyùcàndùá, nì cayùhí cuaá-nè.

¹⁰ Dandu nì cachí ángel mà xì-né:

—Màsà yúhî-nsià, vàchi cunaha-nsiá, yohó vàxi nihí iin razón vaha cunini-nsia, iin razón cudì ini nsidaa nèhivì ñuhivì nduá.

¹¹ Vàchi vichi ndè ñuu xii-nsiá David sàni tùinuù iin ana dacácu xi-nsiá, divi Stoho-ndà Cristu.

¹² Te na sàà-nsià yucán, icúmí-nsiâ cuni-nsiàyà, idáducùn-yá sìcoto, indúhu-yá ini iin canoa. Ñà-jaàn cunduu seña cundaà vaha ini-nsià divi ñà-ndáà nduá cachí xì-nsiá —nì cachí ángel.

¹³ Daaní, na íín cachí nì ndecoyo cuàhà gá ángel nì caquixi ansivi, cutnàhá-né xì ángel nì quesaa primeru mà. Te ndeníhí vaha nsidaa-né Dios, cachí-nè:

¹⁴ Diquì-xí ansivi ni queé cuàhà tñùñuhu xí Yua-nda Dios, te ñuhiví yohó ni cúndóó víi nsidaa nèhivì cudì ini-yà sàhà-xí.

¹⁵ Daaní, nì ndanchito nsidaa ángel mà mànuhù-né gloria. Dandu nì cachí nècuàchì xíndiaa xì rii mà:

—Cúhùn-ndà vichi duha ñuu tii Belén, cundehè-ndà ñà-ndùá nì cuu nì cachitnùhu Stoho-ndà Señor xì-ndà.

¹⁶ Ñàyùcàndùá, ndee ní quihin-ne ichì cuàhàn-nè, te nì casaà-nè yucán, nì xini-nè yucán iá María xì José xì stná mée, indúhu-vé ini canoa.

¹⁷ Dandu nì nsihì nì xini-nè mée mà, dandu nì cachitnùhu-ne xì nèhivì ñà-ndùá nì cachí ángel xì-né sàhà-vé.

¹⁸ Te nsidaa nèhivì nì inini xi ñà-ndùá nacání pastor mà, nì ndulocó-nè.

¹⁹ Te María, cóni nándòdó stná-nè ñà-ndùá nì cachí ángel xì-né, iin-nì nacání ini-nè sàhámà.

²⁰ Daaní, nì caquihin pastor mà ichì mànuhù-né, ndeníhí vaha-ne Dios, naquímánì cuàhà-né mii-yá sàhà nsidaa ñà-ndùá nì xinitnùhu-ne, xì ñà-ndùá nì xini-nè, vàchi nacua nì cachitnùhu ángel mà xì-né, divi ducán nì cuu.

Nansa nì quida José xì María na ní quida-ne Jesús presentar nùu Yua-nda Dios ini veheñùhu cahnú

²¹ Na ní yàha ùnà quivì, dandu nì sàcùtuu seña xi Dios làcà mée Jesús mà, te nì nihì stná-yà quivì-yá; nì sàcùnani-yá Jesús, vàchi ñà-jaàn cunduu quivì-yá nì cachí ángel na táñaha ga nacùhun ndiaha-yá tìxi dihi-yá.

²² Daaní, nì yàha quivì cuhí quihmi María, vàchi nì quida-ne cumplir nacua iá ley xi Moisés sàhà nadaa quivì coo quihmi-né. Dandu mii-né xì José, nihí-névè cuàhàn ñuu Jerusalén ñà-chitanini-nevè nùu Yua-nda Dios,

²³ vàchi dohó cachí tutu ìi nduú ley xi Dios: “Tiàa primeru quesaa ñuhiví, nsidaa-vé cunduu-ve mée ndiaha xí Dios”.

24 Te cachí stná ley mà ñà-icúmí-nê cuàha-ne ùì lungu, te nú coó, ùì loma cuachi. Ñàyùcànduá, nì sàhàn-nè nì sàha stná-nè quisì mà ñà-cuì-si cunduu-sì promesa nùù Dios.

25 Cunaha-ní, ñuu Jerusalén yucán nìsa ìa iin tiàa nani Simeón. Nècuàchì nihnú ndàcuìsì ini xì Dios nduú stná-nè, vàchi cahvi víi-néyà, te nihnú vaha ini-nè ñà-quixi ana cuàhàn chindee xi raza-nè Israel, te icúmí stná-nè Espíritu Ìì xí-yá.

26 Te divi Espíritu Ìì mà sàni cachitnùhu-ya xì-né antes ñà-mà cúí-nè dècuèndè cachi cuninùù-né ana nduú Cristu nì quixi nùù Stoho-ndà Señor.

27 Ñàyùcànduá, quivì yucán nì càhàn Espíritu Ìì xì-né, te nì sàà-nè veheñùhu cahnú na meru quíhvi stná yuadíhí-vê nihí-névè vaxi quida-ne nacua cachí ley ìì.

28 Dandu nècuàchì sàhnù-mà, nì sàcùnìndiaa-névè, te nì naquimanì-né Dios, cachí-nè:

29-30 Sà-íá vichi, Señor mío, vátùni nacuaca-ní yùhù vichi, vàchi contentu ié, vàchi nacua nì cachì-ní xí, divi ducán nì cuu ndisa, sàni xinì ana nì techuun-ní ñà-dacácu xi-nsí.

31 Mii-ní, nì chitnùnì inì-ní quesaa-yà, dandu nihì nèhivì nsidanicuú ñuu cundaà ini-nè nansa cui càcu anima-nè quida-ya.

32 Vàchi icúmí-yâ datnùù-yà sàxìnítnùnì nsidaa nèhivì mà; te divi ducánì stná nècuàchì raza-nsí Israel, cuàhà gá tnùñúhú ndiaha icúmí-nsí nihì-nsí sàhà-yá, nì cachi Simeón.

33 Ñàyùcànduá, cuàhà gá nì ndulocó José xì María sàhà ñà-nduá nì cachi nècuàchì mà sàhà mée mà.

34 Dandu nì xìcàn tàhvi Simeón gracia xi Dios sàhà yuadíhí-vê, te nì cachi stná-nè xì dihi-vé:

—Cunaha-ní, sàhà mée yohó icúmí cundiatú anima cuàhà gá nècuàchì ñuu-nda Israel. Doco dava ga stná-nè, quixi tnùndoho cahnú dìquì-né, según nansa indéhe-né mii-yá nduú mée yohó. Te icúmí-yâ cachitnùhu-ya sàhà ichì Yua-nda Dios, doco cuàhà stná nèhivì cahíhì ini xì-yá.

35 Te sàhàmà icúmí cundaà inì-xi ñà-nduá nihnú ini-nè ini anima-nè. Daaní, mii-ní, icúmí stná-ní (cunì-ní tnùndoho), na ian xída iin càa anima-ní —nì cachi Simeón.

36-37 Daaní, yucán nìsa ìa stná iin nècuàchì ñahà nani Ana, te sàni nihítàhvi-né càhàn-nè cuenta xi Dios. Dèhe iin tiàa nani Fanuel nduú-né, te Aser nani yohòtéhè-né. Sàsàhnú cuàhà-né vichi. Nì nandàhà-né na chii-né, te ùsà cuà nì ìa-ne xì ìì-né, dandu nì xihì nècuàchì mà. Te vichi sàcuàhàn-nda 84 cuà ìá mii-né. Te có-quèé-né veheñùhu cahnú, vàchi ndui te ñuu ìá-nè yucán, xinúcuáchì-nè nùù Dios, iníhì-né, te xìcàn tàhvi-né nùù-yá.

38 Ñàyùcànduá, divi momentu mà nì tnàtuu nècuàchì mà (ndé iín María xì José), te nì naquimanì stná-nè Dios (sàhà mée Jesús), dandu nì quesaha-né nì càhàn-nè xì nèhivì ñuu Jerusalén sàhà-vé, nì cachitnùhu-ne xì nèhivì xíndiatu ñà-quesaa mii-yá quida-xi obra, te càcu-nda.

39 Daaní, José xì María, nì nsihì nì quida-ne nsidaa ñà-nduá dandacú ley xi Dios, dandu nì naquihin-ne ichì mànuhù-né ladu Galilea, nì nasaa-nè ñuu-nè Nazaret ndé ndoó-né.

40 Te mée nduú mii-yá, nì sàhnu-ya, nì cufuerté anima-yà, te chicá nì cunchichí-yà, cuàhà gá gracia xi Dios icúmí-yâ.

Nansa nì quida Jesús na chii-yá, te nì sàhàn-yà iin vicò ñuu Jerusalén

41 Cunaha-ní, cuà cuà nì sasahàn yuadíhí-yâ ñuu Jerusalén quivì nacávà vicò pascua.

42 (Te nì cuu iin xichi) na sàxìcá-yá ùxìn ùì cuà, dandu cuàhàn tu-ya xì-né vicò ñuu mà, vàchi ñà-jaàn nì sanduu estilu xi-ne.

43 Daaní, nì nsihì vicò mà, te nì naquihin-ne ichì mànuhù-né; doco nì ndòo Jesús ñuu Jerusalén mà, te cónì xìnì José xì María,

44 vàchi ádi vaxi-ya cutnàhâ-yá xì nèhivì dava ga càhàn-né. Ñàyùcànduá, iin quivì sàxìcá-né mànuhù-né, dandu nì quesaha-né xicánúú-né nandúcú-nèyà, ndàcàtnùhù-né nùù tñaha-ne xì stná amigo xi-ne.

⁴⁵⁻⁴⁶ Doco còó, cóni nátùì-ya. Ñàyùcàndùá, nì naxicocuñin-nè ñuu Jerusalén, áma ndácùhun-neyà càhàn-né. Te tixi ùni quivì nì natùì-ya, veheñuhu cahnú íá-yà, dava mahì maestru xi ley ìi, iníní-yá ñà-ndùá cachí nècuàchì mà, te ndácàtnùhù stná-yà nùù-né.

⁴⁷ Te nsidaa ana iníní má, nì ndulocó-nè ñà-nchìchí guâ-yà, te naxícóníhì nchichí-yà nùù-né.

⁴⁸ Te na ní xini José xì María íá-yà yucán, dandu nì ndulocó-nè, te nì cachi dihi-yá:
—Hijo, ¿índù chuun nì quido xi-nsí ducán? vâchi yùhù xì yuo, cuàhà gá nì xìcanuu-nsi nandúcú-nsí yohó, nacání cuàhà ini-nsí.

⁴⁹ Dandu nì cachi-yà xì-né:
—Còó, có-ndùá fuerza nanducu-nsiá yùhù, vâchi xiñuhu ñà-cundaà inì-nsia íá chuun nì nihí nùù Yua mií, te icúmí guideà.

⁵⁰ Doco José xì María, cóni sánìhì ini-nè ñà-ndùá nì cachi-yà xì-né.

⁵¹⁻⁵² Dandu nì nacuaca-neyà mànuhù-né xì-yá ñuu Nazaret. Te nsidaa ñà-ndùá nì cuu ma, nì chivàha María-ñà ini anima-nè. Te mii-yá, nisa inini-ya nsidaa ñà-ndùá nì cachi yuadíhí-yâ. Te chicá nì cunchichí-yà, te chicá nì sahnú-ya, te nicanicuahàn ndeé vâha-ya nùù Dios, te nsidaa stná nèhivì, nì cudìi stná ini-nè sàhà-yá.

3

Nansa nì quida Juan Bautista nì càhàn-nè sàhù yucù

¹ Daaní, nì yàha tiempu, te nì sàà sàhùn cuà cusáhnú rey cahnú Tiberio. Mismo cuà yucán dandacú stná Poncio Pilatu nùù ladu Judea, nduú-te gobernador. Te ladu Galilea dandacú rey Herodes. Te ñanì-te Felipe dandacú ndé nduú ladu Iturea xì ladu Traconite. Daaní, ndè ladu Abilinia dandacú iin gobernador nani Lisantias.

² Te dùtù chicá xícusahnú xínduu Anás xì Caifás. Te divi tiempu yucán nì quesaha Dios datnúù-yà ini sàxínítnùní Juan (Bautista) ndé íá-nè yucù.

³ Ñàyùcàndùá nì quee-ne cuàhàn-nè inicutu ladu yatni yùte Jordán, te yucán nì càhàn-nè sàhù xì nèhivì ñà-ìcúmí-nè cuu-ne arrepentir sàhà ñà-cuicahnú ini Dios sàhà cuàchi-ne, dandu cuhì-né.

⁴ Vâchi ducán cachí stná nùù tutu ìi nì tiaa profeta Isaías, divi nècuàchì nì sacahàn cuenta xi Dios; dohó nì tiaa-ne:
Tiacú càhàn fuerte ana càhàn yucù, te cachí-nè xì-ndà ñà-nsida viì-ndà (anima-ndà) na ian nduviì ichì ndé yàha Stoho-ndà Señor, te ichì ndàà cundua.

⁵ Te ducán íá stná na ian cuàhàn chitu stná nsidaa yui, te ndundaà stná nsidaa yucù, xì nsidaa lùnsì, xì nsidaa stná ichì cávâ, icúmíâ ndundaà, te ndé íá ichì chicuéhè, nduviì stná yucán. (Ducán icúmí nduviì stná anima nèhivì),

⁶ dandu nsidanicuú-né, icúmí-nè sàà-nè cuni-nè nansa sáhatahvì Dios salvación xi-ya. (Ducán nì cachitnùhu tiàa ma nùù libru mà.)

⁷ Ñàyùcàndùá nì caquee cuàhà nèhivì inii ladu yucán, cuàhàn-nè nùù Juan, vâchi cuní-nè cuhì stná-nè. Dandu nì cachi Juan xì-né:

—Mii-nsiá, na quidá còó, ducán quidá-nsiá, vâxi-nsia yohó xinúdèhé-nsià nùù castigu cahnú icúmí quixì. ¿Ana divi nì cachi xì-nsiá quida-nsia ducán?

⁸ Pues, ñà-ndùá xiñuhu nduá quida ndisa-nsia cumplir nacua ndiá ìcà-ndà nú sàni cuu ndisa-nda arrepentir. Ni màsà càchì-nsia: “Divi Abraham nduú yohòtéhè-ndà, còó ni-íñàha cuu xi-nda”. Vâchi cunaha-nsiá, dècuèndè stná yùù ndoó yohó, vâtùni nanduu stná nahi nèhivì raza-ndà Abraham nú cuní mii-yá.

⁹ Te vichi sà-íá cuàhàn cachi-yà índù nèhivì nihì xì castigu, te ducán íá na ian nácàxin-nda yutnù có-càná fruta, te sà-iníndáhá-ndá hacha tãhndè-nu coco-nù. Pues ducán icúmí cuu stná xì nèhivì có-quidá víi —nì cachi Juan.

¹⁰ Dandu nì cachi nèhivì cuàhà yucán:

—Nú ducán íá, ¿nansa ndiá ìcà-nsí quida-nsi, maestro?

11 Dandu nì cachi Juan xì-né:

—Nú ndoó nècuàchì còò dùhnù-xí, dandu ni dácû tâhvì-ndàné ian, nú icúmí-ndá uìà. Te nècuàchì xìhì doco, ni dácúxì stná-ndàné nú iá ñà-cutiacu-ndà.

12 Daaní, yucán nì casaà stná nècuàchì dachíyàhvi, te nì cuhii stná-nè. Dandu nì xicàn tnùhù stná-nè nùù Juan, cachí-nè:

—Te nsiùhù, ¿nansa ndiá ìcà-nsí quida stná-nsì, maestro?

13 Dandu nì cachi Juan xì-né:

—Nacua cachí ley, divi ducán dachíyàhvi-nsia nèhivì, màdiá chicá más.

14 Daaní, stná soldadu, nì caxicàn tnùhù stná-nè nùù nècuàchimà, cachí-nè:

—Nsiùhù, ¿nansa ndiá ìcà-nsí quida stná-nsì?

Dandu nì cachi Juan:

—Màsà dáyûhî-nsià ni-iin nèhivì, te tavà-nsiá dihùn nùù-né; ni màsà quídáyúcún uun stná-nsià tnùhu. Te cundoo stná-nsià conforme xì ñà-ndùá quíyàhvi-nsia —nì cachi Juan.

15 Ñâyùcàndùá, nsidaa nèhivì, nacání ini-nè sàhà Juan mà, a Cristu (icúmí quixi nùù Dios) nduú-né cahan-né.

16 Dandú nì càhàn Juan xì nsidaa nèhivì yucán, cachí-nè:

—Yùhù, tècuí quidá ìí' mii-nsiá, doco nchícùn gà vaxi mii-yá ana chicá cahnú poder xi nùù yùhù. Ni có-nâtùì cundui iin mozo xi-ya ñà-taví ndìsàn-yá. Te icúmí-yà quida ìi-yá anima-nsià tìxi Espíritu Ìì xí Dios, te na ian quidá ñuhu, ducán quida stná-yà xì-nsiá (dandáñúhú stná-yà ñà-có-ndiáá).

17 Vàchi vichi sà-ìá cuàhàn-yà quida-ya na quida-nda xi trigu, yutnù chipála dandi-achi-ndañá, dècuèndè ndiachì nsihí trigu ndoó ñuhù, dandu chivàha-nda nùnì mà, doco mihi-ñá, icúmíá coca. Pues ducan icúmí stná-yà quida-ya (xì nèhivì, nèhivì xí mii-yá dacácu-ya, doco nèhivì dava ga), còò, nicanicuahàn icúmí-nè coco-ne.

18 Ducán nì cachi Juan na ní càhàn-nè sàhù, te cuàhà gà stná ñà-vàha nì cachi-nè xì nèhivì yucán, áma nánsidá viì-né modo xi-ne.

19 Daaní, rey Herodes, nì càhàn stná Juan mà xì-té sàhà cuñada xi-tè nani Herodías, vachi iá-te xi ñahà mà, te ñahàdihí ñani-te Felipe nduú-ña. Te nì càhàn stná-nè xì-té sàhà nsidaa gà ñà-có-ìá viì quidá-te.

20 Doco tèmà, chicá más nì quida chicuéhè-te, dècuèndè nì sadi stná-te Juan vehecàa.

Nansa nì quida ì Juan Jesús na táñaha ga cundiadi-nè

21 Na ní nsihi nì cuhii nsidaa nèhivì dava ga, dandu nì cuhii stná Jesús. Te iín-yá yucán xicàn tâhvì-yá, dandu ní nuna ansivi,

22 te nì nuu Espíritu Ìì xí Dios dìquì-yá; na iá loma, ducán iá-yà mànuu-ya. Te nì tiacu stná tàchì Dios càhàn-yà ansivi, cachí-yà (xì Jesús):

—Mii-ní, Dèhemaní nduu-ní. Te cudí cuáhà inì sàhà-ní.

Ana xínduu yohòtéhè Jesucristu

23 Cunaha-ní, xicá Jesús nahi òcò ùxìn cuìà na ní quesaha-yá (quidá-yá chuun ndiaha xí-yá), te tuxí ini nèhivì dèhe José nduú-yá. Te iin tiàa nani Elí nì sanduu velú xi-ya.

24 Te yua Elí mà ní sanduu Matat; te yua Matat nì sanduu Leví; te yua Leví nì sanduu Melqui; te yua Melqui nì sanduu Jana; te yua Jana nì sanduu inga José;

25 te yua José mà ní sanduu Matatías; te yua Matatías nì sanduu Amós; te yua Amós nì sanduu Nahum; te yua Nahum nì sanduu Esli; te yua Esli nì sanduu Nagai;

26 te yua Nagai nì sanduu Maat; te yua Maat nì sanduu inga Matatías; te yua Matatías mà nì sanduu Semei; te yua Semei nì sanduu inga José; te yua José mà ní sanduu Judá;

27 te yua Judá nì sanduu Joana; te yua Joana nì sanduu Resa; te yua Resa nì sanduu Zorobabel; te yua Zorobabel nì sanduu Salatiel; te yua Salatiel nì sanduu Neri;

28 te yua Neri nì sanduu inga Melqui; te yua Melqui mà ní sanduu Adi; te yua Adi nì sanduu Cosam; te yua Cosam nì sanduu Elmodam; te yua Elmodam nì sanduu Er;

²⁹ te yua Er nì sanduu Josué; te yua Josué nì sanduu Eliezer; te yua Eliezer nì sanduu Jorim; te yua Jorim nì sanduu inga Matat;

³⁰ te yua Matat mà ní sanduu inga Leví; te yua Leví mà ní sanduu Simeón; te yua Simeón nì sanduu inga Judá; te yua inga Judá mà ní sanduu inga José; te yua inga José mà ní sanduu Jonán; te yua Jonán nì sanduu Eliaquim;

³¹ te yua Eliaquim nì sanduu Melea; te yua Melea nì sanuu Mainán; te yua Mainán nì sanduu Matata; te yua Matata nì sanduu Natán;

³² te yua Natán nì sanduu David; te yua David nì sanduu Isaí; te yua Isaí nì sanduu Obed; te yua Obed nì sanduu Booz; te yua Booz nì sanduu Salmón; te yua Salmón nì sanduu Naasón;

³³ te yua Naasón nì sanduu Aminadab; te yua Aminadab nì sanduu Aram; te yua Aram nì sanduu Esrom; te yua Esrom nì sanduu Fares; te yua Fares nì sanduu inga Judá;

³⁴ te yua Judá mà ní sanduu Jacob; te yua Jacob nì sanduu Isaac; te yua Isaac nì sanduu Abraham; te yua Abraham nì sanduu Taré; te yua Taré nì sanduu Nacor;

³⁵ te yua Nacor nì sanduu Serug; te yua Serug nì sanduu Ragau; te yua Ragau nì sanduu Peleg; te yua Peleg nì sanduu Heber; te yua Heber nì sanduu Sala;

³⁶ te yua Sala nì sanduu Cainán; te yua Cainán nì sanduu Arfaxad; te yua Arfaxad nì sanduu Sem; te yua Sem nì sanduu Noé; te yua Noé nì sanduu Lamec;

³⁷ te yua Lamec nì sanduu Matusalén; te yua Matusalén nì sanduu Enoc; te yua Enoc nì sanduu Jared; te yua Jared nì sanduu Mahalaleel; te yua Mahalaleel nì sanduu inga Cainán;

³⁸ te yua Cainan mà ní sanduu Enós; te yua Enós nì sanduu Set; te yua Set nì sanduu Adán; te yua Adán nduú Dios.

4

Nansa nì cuni ñà-malu dacà-sí Jesús ñà-quida-ya iin cuàchi

¹ Daaní, (nì nsihi nì cuhìi Jesús) nì quee-ya ladu yùte Jordán, chitu anima-yà Espiritu Ìì xí Dios. Dandu nihí Espiritu Ìì mà-yá nì sàhàn ñà-coo-ya yucù dàná.

² Ùì dico quivì nisa ìa-ya yucán, te nì cuni ñà-malu dacà-síyâ, (doco cóni cúndéé-sí). Te inii tiempu mà nì ìa dòcò-yà.

Daaní, na ní yàha quivì mà, dandú nì xihì-yà doco.

³ Te nì cachi ñà-malu xì-yá:

—Nú ndisa Dèhemanì Dios nduu-ní, dandu cachì-ní xì yùù yohó ni nándúá pan cuxi-ní.

⁴ Dandú nì cachi Jesús xì-sí:

—Còó, vàchi dohó cachí nùù tutu ìì: “Màdì cuisì pan cutiacu nèhivì; còó, vàchi xiñuhu cucumi stná-nè nsidaa palabra ìì cachí Dios”.

⁵ Daaní, nì saca-siyá cuàhàn-si xì-yá dìnì iin yucù ducún, te nì dácùnì-siyá nsidanicuú ñuu íá ñuhivì; iin ratu tii, te sàni dácùnì-siyá nsidaamá.

⁶ Dandu cachí-si xì-yá:

—Vàtùni dacútâhvì mii-ní nsidaa ñuu yucán ñà-dandacu-ní nùá, te nìhì stná-ní nsidaa ñà-vico icúmîâ, vàchi ndahí sà-ìá nsidaájàn, te dandacuí nùá, te anà-ni nì cui cudî inì dacútâhvì ñà-dandacú-né nùá.

⁷ Nàyùcàndùá nú ni mácuìln sísì-ní nùí, te cahvi-ní yùhù, dandu dacútâhvì mii-ní nsidaájàn.

⁸ Dandu nì cachi Jesús xì-sí:

—Còó, vàchi dohó cachí nùù tutu ìì: “Cuisì mii Stoho-ndà Dios ndiá ìcà-ndà cahvi-nda, te cunucuachi-nda nùù-xí”.

⁹ Daaní, nì saca-siyá cuàhàn-si xì-yá ndè ñuu Jerusalén. Yucán nì chicoo-siyá ndè dìnì veheñuhu cahnú, te nì cachì-si xì-yá:

—Nú ndisa Dèhemanì Dios nduu-ní, dandu dandiachi-ní mii-ní,

¹⁰ Vàchi ducán cachí nùù tutu ìì:
Icúmí Dios dandacú-yá nùù ángel xi-ya ñà-cundiaa-nè mii-ní.

¹¹ Te cachí stná tutu mà:
Icúmí ángel mà natnii ndahà-né mii-ní ñà-màsà máquìhi sahà-ní ni-iin yùù.

¹² Dandu nì cachi Jesús xì-sí:

—Cachí stná tutu ìì: “Màsà quídá canúú-ndá ñà-có-cùnì Stoho-ndà Señor”.

¹³ Dandu na ní nsihi ñà-nì cunì-si dacà-síyâ, dandu nì nacoò chii-síyâ cuàhàn-si.

Nansa nì quesaha Jesús quídá-yá chuun ndiaha xí-yá ladu Galilea

¹⁴ Daaní, mànuhù-yá ladu Galilea, chitu-yá poder xi Espíritu ìì xí Dios. Te nì xinitnùhu nèhivì sahà-yá inicutu ladu yucán.

¹⁵ Te nì xicanuu-ya nì nacàhin-ya nsidaa veheñùhu ñuu ladu yucán, dacuahá-yá nèhivì. Te nsidaa-né, nì ndenihi vaha-neyà.

Nansa nì quida nèhivì na ní nùhù Jesús ñuu-yà Nazaret

¹⁶⁻¹⁷ Dandu nì nasaa-yà ñuu Nazaret ndé nì sahnu-ya. Te na ní sàà quivì descansu, dandu nì sahàn-yà veheñùhu yucán, vàchi ducán nduú estilu xi-ya. Te nì ndacuiin-yà ini veheñùhu ma cuàhàn-yà cahvi-ya (tutu ìì) cunini nèhivì mà. Te nì sàha iin nèhivì-yá tutu nì tiaa profeta Isaías nì sacahàn cuenta xi Dios sàhana. Dandu nì nacuna-ya tutu mà nì nanducu-yá iin lugar, te dohó cachí ndé nì ndacùhun-ya:

¹⁸ Fuerte inácaa Espíritu ìì xí Dios ini anímè, vàchi sàni sàha-ya yùhù chuun ìì cachitnùhi ñà-vàha ndiaha xi nècuàchì ndahví, daaní, vàxi stnái ñà-càhin xì ana xíndoo tnùnsí ini, dandu cahnde ini-nè sàhámà. Te vàxi stnái cachitnùhi xì ana có-ndóó libre ñà-vàtùni caquee-ne libre quide; te nècuàchì cuaá, vàtùni natùì stná nùù-né quide, xì nècuàchì yáha tnùndoho, vàtùni càcu ndisa-ne nùámà quide.

¹⁹ Te vàxi stnái cachì xì nsidaa nèhivì (ñà-vitni nduú) meru tiempu nàcùndoo vaha-ne xì Stoho-ndà Señor.

²⁰ Daaní, nì nacadi Jesús tutu mà, te nì naxiconihí-yañà nùù tiàa xinúcuáchí yucán. Dandu nì sàcòo-ya, te nsidaa nèhivì ndoó veheñùhu yucán, indéhe vaha-neyà.

²¹ Dandu nì cachi-yà xì nsidaa-né:

—Vichi na meru nì inini-nsia palabra nì cahvi nùù-nsiá jaàn, ñà-sàni cuu ndisa nduá, (te quidé nacua cachá’).

²² Te nsidaa nèhivì yucán, nì ndenihi vaha-neyà, te nì ndulocó-nè, vàchi yáha ga ndiaha cáhàn-yà. Doco cachí stná-nè iin-ne xì inga-nè:

—¿Amádi dèhe José nduú nècuàchì yohó?

²³ Dandu nì cachi-yà xì-né:

—Ádi cuàhàn-nsià cachi-nsià xì nacua cachí dichu: “Nú cuhí-nì, te nduu-ní doctor, dandu ¿índù chuun có-dàndùvaha-ní mii-ní?” Vàchi sàni xinitnùhu-nsia nansa nì quide milagru ñuu Capernaum, ñàyùcànduá ádi cuàhàn-nsià cachi-nsià xì ñà-xiñùhù quida stnái milagru mà ñuu-ndà yohó nacua nì quide yucán.

²⁴ Dandu nì cachi tu-ya:

—Ñà-ndáa nduá, ni-iin tiàa nì nihì chuun cáhàn cuenta xi Dios, có-quidáñúhù nècuàchì ñuu-nè mii-né.

²⁵ Doco cunini-nsia palabra ndàcuisì yohó: na ní sanduu tiempu xi Elías sàhana, te cóni cùnùn dàvì ùnì cuà dàva, dandu fuerte nì quixi tnama inicutu ñuu-ndà Israel yohó, te ndoó cuàhà nècuàchì ñahà nì xihì ìì-xí ladu xi-nda,

²⁶⁻²⁷ doco ni-iin-ne cóni níhitáhvi-né sàà Elías vehe-ne. Còó, iin nècuàchì cuaán inga ñuu nani Sarepta yatni ñuu Sidón, divi nì nihitáhvi sàà nècuàchimà vehe-xi. Daaní, stná tiempu xi profeta Eliseo, mate ndoó cuàhà ana cuhí cuèhè lepra ñuu-ndà Israel yohó, doco ni-iin-ne cóni dándùvaha Eliseo-nè, cuisì iin nècuàchì inga ñuu Siria nani Naamán —nì cachi Jesús.

²⁸ Daaní, nsidaa nèhivì ndoó veheñùhu yucán, yáha ga nì caxidà ini-nè ñà-nì cachi-yà ducán.

²⁹ Ñàyùcàndùá, nì ndacuìta nsihi-ne, nì tavà-néyà iladu ñuu mà. Te sàhà-ñá dìni yucù indúhá, ñàyùcàndùá nihí-néyà nì casaà ndé iá tahvì, cuàhàn-nè dandiachi-néyà nì cùí.

³⁰ Doco nì yàha uun-ya mahì nsidaa-né cuàhàn-yà.

Nansa nì tavà Jesús iin ñà-malu inácaa ini iin tiàa

³¹ Dandú nì sàà-yà ñuu Capernaum iá ladu Galilea, te yucán nì dàcuahá-yá nèhivì sáhàn veheñùhu quivì descansu.

³² Te nècuàchìmà, nì ndulocó-nè sàhà ñà-ndùá dacuahá-yánè, vàchi chináhá-yà nahi ana cusáhnù.

³³ Te mahì nèhivì ndoó ini veheñùhu yucán nìsa là iin tiàa inácaa iin ñà-malu anima-xi. Te fuerte nì ndàhì ndee-né,

³⁴ cachí-nè:

—¡Nacoo-ní nsiùhù! ¿Ndíà cunduu-ní nsiùhù, Jesús de Nazaret? ¿A váxi-ní dandáñhú-ní nsiùhù nduá? ¡Yùhù ináhí mii-ní! ¡Ana ìì nì quixi nùù Dios nduu-ní!

³⁵ Dandu ní sadi Jesús nùá, cachí-yà:

—¡Màsà cáhùn, te quee cuahán! ¡Nacoo tiàa yohó!

Dandu indéhe nsidaa nèhivì yucán, te nì nàcasàn tiàa ma nì quida ñà-malu, te nì quee-sì cuàhàn-sì, cóni dánàcuèhè-siné.

³⁶ Ñàyùcàndùá nì ndulocó sàstnùhù nèhivì ndoó yucán, cachí-nè iin-ne xì inga-nè:

—¡Yáha ga fuerte palabra xi nècuàchì yohó! Vàchi na dandacú iin ana nì nihì chuun cahnù, ducán dandacú-né nùù ñà-malu, te fuerza queá cuàhàn.

³⁷ Ñàyùcàndùá, nì xitià razón sàhà-yá inicutu ladu yucán.

Nansa nì dandúvaha Jesús dido Simón Pedro

³⁸ Daaní, na sàni quee-ya veheñùhu yucán, dandu cuàhàn-yà vehe Simón. Te yucán indúhu dido-ne ñahà; cuhí vaha-ne, fuerte quidá yòcò xì-né. Dandu nì sacundahví nèhivì yucán ñà-nì quidá-yá favor chindee-yá nècuàchìmà.

³⁹ Ñàyùcàndùá nì nacahnù ndee-ya ladu dìni-né, te nì dandacú-yá nùù yòcò mà ñà-nì cúcuààn luegu. Te divi ducán nì cuu. Vichi vichi nì ndacuiin nècuàchìmà nì quesaha-né nì xinucuachi-né nùù mii-yá xì compañeru-yà.

Nansa nì dandúvaha Jesús cuàhà gá nècuàchì cuhí

⁴⁰ Daaní, na ní quècahnu orá, dandu nì casaca cuàhà nèhivì nècuàchì cuhí xi-ne, nihí-né nècuàchìmà nì sàà nùù-yá, nsidanuu cuèhè ndohó-né, ñàyùcàndùá nì chitandóó-yá ndahà-yá dìni iin iin-ne, te ducán nì canduvaha-ne.

⁴¹ Nùù cuàhà nècuàchì cuhí nì caquee stná ñà-malu, cána-sì, cachí-sì xi-yá:

—Dèhemanì Dios nduu-ní.

Dandu nì sadi-yà nùù-sì, cóni sàha-ya càhàn gà-sì, vàchi ináhá-sì Cristu nì quixi nùù Dios nduú-yá.

Nansa nì càhàn Jesús sàhù inicutu ladu Galilea

⁴² Daaní, na ní tùinuù (inga quivì), nì quee cuaán-yá cuàhàn-yà iin xaan ndé còò nèhivì. Te nandúcu nèhivì-yá nì casaà-nè ndé iá-yà, te nì xicàn-nè ñà-màsà nácóó-yánè, te cùhùn-yà.

⁴³ Doco nì cachi-yà xì-né:

—Ndè cuàhà stná inga ñuu icúmî cùhìn cachitnùhi xì nèhivì razón ndiaha sàhà ñuhivì ìì xí Dios, vàchi sàhà chuun jaàn nì techuún Yuamání yùhù vàxi —nì cachi-yà.

⁴⁴ Ñàyùcàndùá, ducán nì xicanuu-ya ladu Galilea nì nacàhin-ya iin iin veheñùhu, te nì càhàn-yà sàhù (xì nèhivì xínataca yucán).

5

Nansa ni cuu iin milagru ni tavà nêhivì xî Jesús cuàhà siaca

¹ Iin xichi nì nataca cuàhà sàstnùhù nêhivì (nùù-yá), te yáha ga ndutnúú-yá quidá-né, vâchi cuní-nè cunini-ne palabra xi Dios. Yuhù mar de Genesaret iin-yá;

² te nì xini-yà yucán itá ùi lancha (mahì tècuíi mà), doco sàni caquee stohò-nu, nacáté-né ñunù xí-né, vâchi tè-tává siaca xínduu-ne.

³ Ñâyùcàndùá, nì nana-ya nì quècahnu stná-yà ini iin lancha yucán, Simón nani stohò-nu. Dandu nì càhàn-yà xì nècuàchìmà áma dácúxícá tii gá-nènu cùhùn mahì tècuíi, te ducán nì quida-ne. Dandu nì sàcòo-ya ini lancha mà, te nì quesaha-yá nì dàcuàhá-yá nêhivì cuàhà mà.

⁴ Daaní, nì nsihì nì dàcuàhá-yánè, dandu nì cachi-yà xì Simón:

—Vichi dacaca-ní lancha xi-ní dècuèndè ndé chicá cunú ñuhú tècuíi, te danuú-nsiá ñunù xí-nsiá, te tniì-nsia siaca.

⁵ Doco nì cachi Simón xì-yá:

—Niùyacà sàni quidachuún-nsí, te còo ni-iin-sì nì níhì-nsí, Maestro. Doco vichi vátùni danuú tú-nsí ñunù xí-nsí nacua cachí-ní.

⁶ Daaní, na ní dànúú tú-né ñunù xí-né, nì tui cuàhà siaca, dècuèndè nì quesaha ndátà ñunù xí-né ñà-cuàhà guá-si.

⁷ Ñâyùcàndùá nì quida-ne seña nùù compañeru-nè ndoó inga lancha ñà-nì tnátuu stná nècuàchìmà chindee stná-nè. Doco na ní caquesaa-nè, nì chitu ndùì lancha mà puru siaca, sàmérù càhà-nu ni cuí.

⁸ Na ní xini Simón Pedro nì cuu ducán, dandu nì sàcuìin sísì-né nùù-yá, cachí-nè:

—Nacoo-ní yùhù, por favor, vâchi iin nêhivì cuáchi nduí, Señor mío —nì cachi-nè.

⁹ Vâchi mii-né xì nsidaa nècuàchì cutnâhá xí-nè, yáha ga nì ndulocó-nè sàhà ñà-cuàhà guá siaca nì catavà-né.

¹⁰ Te ducán stná dèhe Zebedeo nani Jacobo xì Juan, cuàhà gá nì ndulocó stná-nè, vâchi iin-ni compañeru xínduu-ne xì Simón nùù chuun xi-ne. Dandu nì cachi Jesús xì Simón:

—Màsà yúhí-ní, vâchi quivì nùù-xí màdì gá siaca tavà-ní; nêhivì icúmí-ní tavà-ní ñà-quee-ne (ichì malu).

¹¹ Ñâyùcàndùá, nì dàtnátuu-ne lancha xi-ne nùù ñuhù íchí, te nsidaa-né nì nacoo ì-né ñà-ndúá icúmí-nè, te nì tenchicùn-nè mii-yá.

Nansa ni cuu nì dándúvâha Jesús iin nêhivì ndoho-xi cuèhè lepra

¹² Daaní, nì cuu iin xichi iá-yà iin ñuu, te yucán iá stná iin tiàa ndoho-xi cuèhè lepra. Te nècuàchìmà, nì xini-nè yucán iin Jesús, ñâyùcàndùá nì sàcuìin sísì-né nùù-yá nì tutuyuhu-né nùù sàhà-yá, te nì xicàn tàhvì-né nùù-yá, cachí-nè:

—Señor mío, nú cuní-ní, vátùni dándúvâha-ní yùhù.

¹³ Dandu nì dácúhùn Jesús ndahà-yá dìnì-né, te nì cachi-yà:

—Juùn. Vichi duha ní ndúvâha-ní, cachí xì-ní.

Dandu na momentu nì cachi-yà ducán, nì quee cuèhè quida-xi-né.

¹⁴ Dandú nì sàcùnaha-né nùù-yá ñà-màsà cáhí-nè xì nêhivì, cuisì-ní ni cùhùn-nè nùù dùtù dacuní-nè nècuàchìmà icà-né (ñà-sàni nduvâha-ne), dandu nacuaâha-ne promesa nùù Dios, vâchi ducán cachí ley xi Moisés, te ducán cundaà stná ini nêhivì ñà-sàni nduvâha-ne.

¹⁵ Doco còo, vihi gá más nì xitià palabra sàhà-yá, te cuàhà gá nêhivì nì nachitu nùù-yá, cuní-nè cunini-ne càhàn-yà, te cuní stná-nè nduvâha-ne sàhà cuèhè quida-xi-né.

¹⁶ Doco mii-ya, nìsa quecuaán-yá iladu ndé còo nêhivì, te yucán nì xicàn tàhvì-yá.

Nansa ni dándúvâha Jesús iin tiàa nì dàñà ùi cuerpu xi

¹⁷ Daaní, iin quivì iá-yà dacuaâhá-yá nêhivì. Te yucán ndoó stná nècuàchì fariseu xì stná nècuàchì ley xi veheñuhu; nduú-né nêhivì nì caquixi cuàhà ñuu ladu Galilea, xì stná ñuu

cuachi ladu Judea xì stná ñuu Jerusalén. Te fuerte nì chindee Dios nì dándúvaha Jesús cuàhà nèhivì.

¹⁸ Daaní, yucán nì casaà gà stná itnii nèhivì nsida-xi iin camilla indúhu iin nècuàchì nì dàñà ñi cuerpu-xi. Te nandúcu nècuàchìmà nansa dayáha-ne nècuàchì cuhí xi-ne ini vehe, te chinduhù-né nècuàchìmà nùù-yá.

¹⁹ Doco cóni níhì-né nansa quida-ne ducán ñà-chitu guá nèhivì ndoó. Ñàyùcàndùá, nì canana-ne dìnivèhé, nì nacani-nè teja, te nì dànùù-né camilla mà dècuèndè ndé iin Jesús mahì nèhivì mà.

²⁰ Te na ní xini-yà ñà-cuàhà guá xíxinindisá nècuàchìmà mii-yá, dandu nì cachi-yà xì nècuàchì cuhí mà:

—Mii-ní nècuàchì tiàa jaàn, xicáhnù inì sàhà cuàchi-ní.

²¹ Dandu nècuàchì ley xi veheñùhu, xì stná nècuàchì fariseu, nì quesaha-né nacánì ini-nè, te cachí-nè entre mii-né: “¿Índù chuun cachí guá tè-yòhó ducán? Mà ndóo ini Dios sàhà palabra cachí-te, vàchi còò inga ana cui cuicahnú inì-xi sàhà-ndà, cuisì Dios”.

²²⁻²³ Doco Jesús, nì cundaà ini anima-yà ñà-ndùá nacánì guá ini cada iin iin nècuàchìmà, ñàyùcàndùá nì cachi-yà xì-né:

—¿Índù chuun nacánì ini-nsià ducán? Vichi cachi-nsià xì índù milagru nduú ñà-chicá ùhì quida-nda: a ñà-cachi uun-nda xì nècuàchì cuhí ñà-xicáhnù ini-ndà sàhà cuàchi-ne, te ò ñà-cachi-ndà xì-né ni ndácuíin-nè, te nacaca-ne.

²⁴ Pues yùhù ana nduú Tnaha Nèhivì Ñuhiví, cuàhìn guide iñàha ñà-cundaà ini-nsià ñà-ìcúmì ndise derechu cuicahnú inì sàhà cuàchi nèhivì ñuhiví.

Dandu nì cachi-yà xì nècuàchì cuhí mà:

—Vichi cachí xì-ní, ndacuiin-ní ndanihi-ní camilla xi-ní, te xuhun-ní vehe-ní.

²⁵ Vichi vichi nì ndacuiin nècuàchì cuhí mà, indéhe nsidaa nèhivì yucán; te nì ndanihi-ne camilla xi-ne, mànuhù-né vehe-ne ndeníhí vaha-ne Dios.

²⁶ Dandu yáha ga nì ndulocó nsidaa nèhivì mà, te nì ndenihi vaha stná-nè mii-yá, te yúhì stná-nè, cachí-nè:

—Mà cándisá ini-ndà ñà-ndùá nì xini-ndà vichi.

Nansa nì cana Jesús iin nècuàchì dachiyàhvi nani Mateo Leví ñà-cunchicùn-nè mii-yá

²⁷ Daaní, nì quee-ya cuàhàn-yà, te nì xini-yà iin nècuàchì dachiyàhvi renta nani Leví, iá-nè lugar ndé naquihín-né renta. Te nì cachi-yà xì-né:

—Nahà-ní cunchicùn-ní yùhù.

²⁸ Dandu nì ndacuiin-nè nì nacoó nsihi-ne nsidaámà, te cuàhàn stná-nè xì-yá.

²⁹ Daaní, después nì quida-ne iin vicò cahnú vehe-ne ñà-cañùhu-né Jesús. Te yucán nì casaà stná cuàhà nècuàchì dachiyàhvi, xì cuàhà stná nèhivì ùún, te ndoó nsidaa-né (xixí-né) yucán.

³⁰ Doco nècuàchì ley xi veheñùhu xì stná nècuàchì fariseu, nì xitnùhu-ne nècuàchì dacuahá-yá, cachí-nè:

—¿Índù chuun cutnáhâ-nsiá xì nècuàchì dachiyàhvi jaàn xì stná dava ga nècuàchì cuàchi, te ndoó-nsiá xixí tàcá-nsiá xì-né?

³¹ Dandu nì naxiconihí Jesús nùù nècuàchìmà, cachí-yà:

—Màdì nècuàchì ndáa vaha xiñuhu xi ana quidatatna xi-né. Còó; divi nècuàchì cuhí xiñuhu xi ana quidatatna xi-né.

³² Yùhù, màdì nèhivì nihnú ndàcuisì inì-xi vaxi càhàn xí. Còó; nèhivì cuàchi vaxi nanduquí, áma naxicocuiin ini-nè sàhà cuàchi-ne.

Ndià dìsàhà-xí cónisá ínhî nècuàchì dacuahá Jesús na iá ù-yá ñuhiví yohó

³³ Daaní, nì cachi nèhivì xì-yá:

—Nècuàchì dacuahá Juan xì stná nècuàchì xídacuahá tè-fariseu, xì-inihì nsidaa-né ndoó dòcò-nè, te nacuatú cuàhà-né, doco nècuàchì dacuahá mii-ní, còó. Có-nàcòó-né ñà-itàcú-nè.

³⁴ Dandu nì cachi Jesús xì-né:

—Nècuàchì ndoó vicò nandàhà, ¿a cúí cunihii-né cundoo dòcò-nè nú ndoó-né cutnàhá-né xì noviu? Còó.

³⁵ Doco vaxi iin quivì mà cóó gá noviu nù-né, dandísá, tiempu yucán icúmí-nè cunihii-né cundoo dòcò-nè.

In ejemplu nì nacani Jesús sàhà-ñá cundaà ini-ndà ùhì dácàstnàhá ley saa xì estilu sànahà

³⁶ Dandu nì nacani stná-yà xì-né inga ejemplu, cachí-yà:

—Sìcoto saa, mà ndátá-ndáñá quee iin pedazu tii ñà-nacàhmá-ndà ñà-tùhú. Nú ducán nì quida-nda, ñà-sàni ndàtà sìcoto saa nduá, te ni mà ndúdává stná pedazu saa ma xi sìcoto tùhú, vachi nàhà-ñà.

³⁷ Stná vinu, nú vinu saa nduá, dandu mà dáquêe nèhivì-ñá ini itni iin tuhú, vachi nú ducán, cahnsià quida vinu saa ma, te ndàtà-ñá, dandu cuitià vinu mà, te cuchicuéhè stná itni iin mà.

³⁸ Ñàyùcànduá, nú vinu saa nduá, dandu itni iin sàà chívàhà nèhivì-ñá, te còò ni-iñàhà cuu xán, te ni stná itni mà.

³⁹ Iin tiàa tùhà coho vinu tuhú, có-cùnì-te vinu saa, vachi cachí-te: “Ñà-tùhú chicá vaha”.

6

Nansa nì xitnùhu nèhivì Jesús iin quivì descansu

¹ Daaní, iin quivì descansu nì yàhà Jesús mahì iin itu. Te nì quesaha nècuàchì dacuahá-yá sáhnù-nè sìcàyòcò trigu mà, te dacóyo-ne nùniá ini ndahà-né, te saxí-neà.

² Doco nì cacachi nècuàchì fariseu xì-yá:

—¿Índù chuun quidá-nsiá iin chuun có-sàhà ley xi-nda quida-nda quivì descansu?

³ Dandu nì naxiconihí Jesús nù-né, cachí-yà:

—¿A cónì càhvì-nsiá (nùu tutu ì) ndé cachá nansa nì quida David sànahà quivì nì xihì cuàhà-né doco, mii-né xì stná compañeru-nè?

⁴ Ndè ini veheñùhu xi Dios nì quihvi-ne, nì tnii-ne dìtà vídì ì iá nùu Dios, te nì xixi-neà, dècuèndè compañeru-nè nì sàhà stná-nè, mate còò permisù cuxi-nda dìtà mà, cuisì dùtù xixi xi ñà-yúcán.

⁵ Te nì cachi stná-yà xì-né:

—Yùhù ana nduú Tnaha Nèhivì Ñuhivì, dandacú stnàì sàhà nansa quida nèhivì quivì descansu.

Nansa nì nduvàhà iin nèhivì nì ìchì iin ndahà-xí

⁶ Daaní, inga quivì descansu nì quihvi-ya ini veheñùhu, te nì dàcuàhá-yá nèhivì; te yucán iá stná iin tiàa sàni ìchì ndahà cuàhá-xi.

⁷ Te yucán xíndoo stná nècuàchì fariseu xì stná nècuàchì ley xi veheñùhu, xínàní-nè mii-yá, a cuàhàn-yà dandúvaha-ya tiàa ma, mate quivì descansu nduá, vachi nú ducán, dandu nihì ndèè-né daquée cuàchi-ne dìquì-yá cahan-né.

⁸ Doco mii-yá, inàhá-yà nansa nacání ini-nè. Ñàyùcànduá, nì cachi-yà xì tiàa nì ìchì iin ndahà-ximà:

—Ndacuiin-ní, cuiin-ní mahì nèhivì yohó.

Te ducán nì quida nècuàchimà.

⁹ Dandu nì cachi Jesús xì nsidaa-né:

—Yùhù cuní cachi-nsiá xì nansa ndiá ìcà-ndà quida-nda quivì descansu. ¿Amádi chicá iá vaha quida-nda ñà-íá vii, te màdiá ñà-có-íá vaha? ¿Amádi chicá nsiha dacácu-nda nèhivì quivì mà, te màdiá cahni stnàhà-ndà?

¹⁰ Dandu nì xiconúu-yá nùu nsidaa-né, te nì cachi-yà xì tiàa ma:

Chitanini-ní ndahà-ní.

Te ducán nì quida-ne, te nì nduvàhà dahuan.

11 Dandu nècuàchì nì xitnùhu yucán, yáha ga nì caxidà ini-nè, te nì candatnuhu-né índù modo cadi-nè nùù Jesús.

Nansa nani ùxìn ùì nèhivì nì cana Jesús ñà-dacuahá-yánè

12 Daaní, quivì yucán nì quecuaán-yá cuàhàn-yà yucù, te niùyacà nì ìa-ya yucán cáhàn-yà xì Dios.

13 Na ní tùinuù nì cana-ya nèhivì dacuahá-yá, te nì nacàxin-ya ùxìn ùì-nè; nècuàchì apóstol cucumi chuun nùù-yá cunduu-ne nì cachi-yà xì-né.

14 Iin nècuàchìmà nani Simón, doco Pedro nì dàcúnání-yânè; daaní, inga-nè nani Andrés, divi ñani Pedro; te iá stná Jacobo, xì Juan, xì Felipe, xì Bartolomé,

15 xì Mateo, xì Tomás, xì Jacobo nduú dèhe Alfeo, xì stná inga Simón. El Celador cachí stná-nè xì Simón mà.

16 Daaní, iá stná ñani Jacobo nani Judas, xì stná Judas Iscariote, divi tiàa icúmí cahin xì-yá.

Nansa nì chinaha Jesús cuàhà nèhivì; te nì dándúvaha stná-yà nècuàchì cuhí xi-ne

17 Daaní, nì nuu-ya dècuèndè iin xaan ndé chicá ndàà, te nì nataca nsidaa nècuàchì dacuahá-yá nùù-yá, mii-né xì cuàhà gá stná nèhivì, xínduu-ne nèhivì ladu Judea, xì nèhivì ñuu Jerusalén, xì nèhivì ñuu Tiro xì ñuu Sidón ndoó yuhù mar. Pues nsidaa nèhivì mà, nì casaà-nè yucán, cuní-nè cunini-ne cáhàn-yà, te cuní stná-nè nduvàha nècuàchì cuhí xi-ne.

18 Stná nèhivì xíndoho quidá ñà-malu, nì canduvàha stná nsidaa-né nì quida-ya.

19 Te nsidaa nèhivì cuáhà mà, cuní-nè dùcùn ndahà-né ìcà-yá, te nduvàha-ne, vàchi fuerte iá milagru xi-ya, vètùni dándúvaha nsihi-yanè.

Nansa quida-nda, te cundoo-nda contentu ñuhiví

20 Daaní, nì indehè-yá nsidaa nèhivì xínchicùn xì-yá ndoó yucán, te nì cachi-yà:

—Nansicáhán mii-nsiá nècuàchì ndahví, vàchi sàni ñhítáhvi-nsiá ñuhiví ìì xí Dios.

21 'Nansicáhán mii-nsiá nècuàchì xíhì doco vichi, vàchi icúmí-nsiá sàà-nsiá ndenuu ini-nsiá.

'Nansicáhán mii-nsiá nècuàchì sacú, (te ndoó-nsiá tnùnsí ini) vichi, vàchi icúmí-nsiá sàà-nsiá cudíi cuáhà ini-nsiá.

22 'Nansicáhán stná-nsiá na cahíchì ini nèhivì-nsiá, te nacóo dahuun-ne mii-nsiá, te ò cánahá-nè daquéè cuàchi-ne dìquì-nsiá sàhà yuhù ana nduú Tnaha Nèhivì Ñuhiví.

23 Quivì cuu xi-nsiá ducán, dandu contentu nì cúndoo-nsiá, te cudíi ini-nsiá, vàchi iin ñà-vàha cahnú cucumi-nsiá ndè gloria. Te nú quidá quini nèhivì xì-nsiá vichi, dandu nsinuu inì-nsiá ñà-divi ducán nìsa quida stná xì-né xì nècuàchì nìsa cahàn cuenta xi Dios sàhana.

24 'Doco mii-nsiá nècuàchì cuicà, ¡ndahví-nsiá! vàchi mate iin vida vaha icúmí-nsiá vichi, doco después mà níhì gá-nsiá ni-ìñàha.

25 'Te ¡ndahví stná mii-nsiá nècuàchì xixí tnaha guá vichi! vàchi icúmí sàà iin quivì tnaha inì-nsiá. Te mii-nsiá nècuàchì cudíi guá inì-xi sàhà vida-xi vichi, icúmí-nsiá cundoo-nsiá tnùnsí ini, te cuhuun ga inì-nsiá.

26 'Te ¡ndahví stná mii-nsiá nú ndeníhí vaha nsidanicuú nèhivì mii-nsiá! vàchi divi ducán nìsa quida stná yohòtéhè nèhivì vichi, nìsa ndeníhi vaha stná nsidaa-né tètñùhù cachí cáhàn cuenta xi Dios.

Ndiá ìcà-ndà cuu stnahá ini-ndà sàhà-ndà

27 'Yuhù cachí xì nsidaa mii-nsiá nècuàchì iníní vichi, xiñuhu-ñá cuu inì-nsiá sàhà nèhivì xiní ùhì xì-nsiá, te obra vaha quida stná-nsiá sàhà ana cahíchì ini xì-nsiá.

28 Te cáhàn vèi stná-nsiá xì nèhivì xícàn chihán dìquì-nsiá; te càcàn tàhvi stná-nsiá nùù Dios sàhà nèhivì quidá quini xi-nsiá.

²⁹ Te nú ni caní iin tiàa iin ladu nùù-nsiá, dandu danácuíco stná-nsià inga ladu nùù-nsiá; te nú candiáá iin tiàa sacú ndixí-nsiá, te cuní stná-te candiaa-tè dùhnù-nsiá, dandu màsà cuídáhán-nsiãñà nùù-té.

³⁰ Nsidaa ana xícàn iñàha nùù-nsiá, cuàha-nsia nècuàchìmà, te nú ni cándiáá-né iñàha xi-nsia, màsà nándácàn gà-nsiãñà.

³¹ Nacua cuní mii-nsiá quida nèhivì xì-nsiá, divi ducán xiñuhu quida stná mii-nsiá xì-né.

³² Vàchi nú cuisì nèhivì cuú inì-xi sàhà-ndà cuú stná ini-ndà sàhà-xí, dandu mà cuáha Dios premiu sàhájàn, vachi ducán quidá stná ndéni nèhivì cuáchi nì cui, cuú ini-nè sàhà nècuàchì cuú inì-xi sàhà mii-né.

³³ Te nú cuisì quida-nda obra xì nèhivì quidá stná obra xì-ndà, dandu mà cuáha Dios premiu sàhájàn, vachi divi ducán xíquida stná ndéni nècuàchì cuáchi nì cui.

³⁴ Te nú cuisì sàha too-nda dìhùn nùù nèhivì ndiatu-nda danáà xì nùù-ndà, dandu mà cuáha Dios premiu sàhájàn, vachi ndè stná nèhivì cuáchi, ducán xíquida stná-nè, sàha toó stnahá stná-nè dìhùn, te naquihín tú-néà.

³⁵ Ñàyùcàndùá, (cachí xì-nsiá), xiñuhu-ñá cuu ini-nsià sàhà nèhivì xiní ùhì xì-nsiá, te quida stná-nsià obra xì-né, te cuàha toó stná-nsiànè iñàha, te màsà cúníhnú ini-nsià naquihín-nsia dìhùn mà, dandu cahnú coo premiu xi-nsia, te cunduu ndisa-nsia dèhe Yua-nda Dios iá dìquì-xí ansivi, vachi mii-yá, quidá stná-yà favor xì nèhivì mà túha naquimanì xì-yá, xì stná nèhivì malu.

³⁶ Ñàyùcàndùá, nacua cuhí ini Yuandiaha-nsiá nsidaa nèhivì, divi ducán ndiá ìcà stná mii-nsiá quida-nsia, cuhi stná ini-nsià nsidaa nèhivì.

³⁷ Màsà dácuídâ cuàchi tnahá-nsiá, dandú mà dácuídâ cuàchi stná Dios mii-nsiá. Màsà dáquêe cuàchi stnahá-nsiá dìquì-nsiá, dandu mà dáquêe cuàchi stná Dios dìquì mii-nsiá. Te cuicahnú stnahá stná ini-nsià sàhà-nsiá, dandu cuicahnú stná ini mii-yá sàhà-nsiá.

³⁸ Nú dacútâhvì stnahá-nsiá iñàha, dandu icúmí stná-nsià nìhítâhvì-nsiá (nùù mii-yá), te ñà-ndùá cuàha-yansià cundua na ian xiin-nda nùnì, te itácùha viì medida mà, ndè quidíníhní-teá ñà-quêe tnuà, te sádi vâha-tèá, dècuèndè chiyódo gá stná-teá nùù-ndà. Pues, ducán iá stná na níhítâhvì-nsiá nùù mii-yá. Vachi divi vara chitácùhá-nsià icúmí stná-nsià nacuitacùhá-nsià.

³⁹ Dandu nì nacani-ya xì-né iin ejemplu, te dohó nì cachi-yà:

—Nècuàchì cuaá, ¿a vátùni dacúndéhe stnahá-né ichì? ¿Amádi dácôyo nihni stnahá-né ini xìchi?

⁴⁰ Cunaha-nsiá, ni-iin tiàa làcà dàcuàhá nùù iin maestru, màdiá chicá ndiáá-nè nùù maestru xi-ne mà. Còo. Doco nú sàni nsihi nì cutùha vâha-ne, dandísá, nahi maestru-mà cunduu stná-nè.

⁴¹ Màsà (cuítnùhu tnahá-nsiá), vachi nú jaan, dandu queámà na ian nandúcú iin tiàa iin xèhè tii inácaa nduchínúù ñanìtnaha-ne. Doco ini nduchínúù mii-né inácaa stná iin ñà-chicá cahnú na iin sì-ndùhú yutnù, te có-quihín casu-nè.

⁴² Màsà (cuítnùhu tnahá-nsiá, cachí), vachi ducán queámà na ian cachí iin-nsia xì iin ñanìtnaha-nsia: “Nacoo-ní yùhù taví xèhè tii inácaa dacúcuín nduchínúù-ní”. Doco nècuàchì cachí ducán, dananí uun-ne ndiáá ndisa-ne, vachi inácaa stná iin ñà-cahnú nduchínúù mii-né, te có-quihín casu-nè. Dihna xiñuhu tavà-né ñà-jaan nùù mii-né, dandu vátùni cutù viì nùù-né ñà-tavà-né xèhè tii inácaa nduchínúù ñanìtnaha-nemà.

Nansa nacuni-ndà ana nduú nèhivì vâha, te ana nduú nèhivì malu

⁴³ Nú iá vâha iin yutnù fruta, mà cuáha-nù fruta chicuéhè. Te iin yutnù iá cuèhè-xi, mà cuáha stná-nu fruta vâha.

⁴⁴ Vachi sàhà fruta-numa cundáà ini-ndà, a yútnu vâha nduú-nu, ò á coó. Na iin yutnù iñù, de por sí, có-cànà sì-higu nùù-nú. Stná sì-uva, mà cuídá-ndá quisì mà nùù iin nducu yòhò iñù.

⁴⁵ (Te ducán iá stná xì mii-nsiá.) Iin nècuàchì vâha, cuàhà ñà-vâha ñuhú ini anima-nè; te ñàyùcàndùá, divi palabra vâha ma nduá cachí-nè. Doco iin nècuàchì malu, cuàhà

ñà-chìcuéhè ñuhú ini anima-nè, ñàyùcàndùá ñà-chìcuéhè nduá cachí stná-nè. Vàchi ñà-ñùhú chitu ini anima-ndà, divi nduá cáhàn-ndà sàhà-xí.

Ejemplu sàhà ùi vehe

⁴⁶ 'Mii-nsiá, "Stoho-nsì Señor" cachí-nsiá xí, doco ¿índù chuun có-càhvì-nsiá ñà-nduá cachí xì-nsiá?

⁴⁷⁻⁴⁸ Vichi cuàhìn nacani xì-nsiá sàhà nèhivì quíhvi ichì yùhù, te iníní víi-né palabra xi, quidá-néà cumplir. Nècuàchì xíquida ducán, queámà na ian nì quida iin tiàa na ní quidayucun-nè vehe-ne, cunú nì sate-ne ndè nì natùì cavà, dandu nì chicao-nè cimientu xan. Daaní, después nì quixi tènùhu cuáhà, nì xìnu-tè nì dùcùn-te ndè ìcà vehe ma, doco cóni nduá, vachi nùù cavà indúhá.

⁴⁹ 'Doco nèhivì iníní uun xì ñà-nduá cachí, te có-quíhín casu-nè sàhà-ñá, ducán cuu stná xì-né na ian nì quida inga tiàa, nì quidayucun-nè vehe-ne nùù ñuhù ùún, còò cimientu xan. Dandu nì xìnu stná tènùhu nì dùcùn-te ndè ìcà vehe ma, te vichi vichi nì ndua iá; nì chàhmà dahuan —nì cachi Jesús.

7

Nansa nì dándúvaha Jesús iin tiàa quidáchúûn nùù iin capitán

¹ Daaní, nì nsihi nì cáhàn-yà nì inini nsidaa nèhivì yucán, dandu cuàhàn-yà ñuu Capernaum.

² Te yucan iá iin tiàa nduú capitán dandacú, te icúmí-nê iin mozo màni cuáhà nùù-né, doco sàni quicuehè nècuàchìmà, meru cucáhvì-nè.

³ Ñàyùcàndùá, na ní xinitnùhu capitán mà sàhà-yá, dandu nì cana-ne itnii nècuàchì sahnú dandacú nùù nècuàchì raza Judea, te nì techuún-né nècuàchìmà ñà-cùhùn-nè cuacundahví-nè nùù-yá ñà-quixi-ya dándúvaha-ya mozo mà.

⁴ Ñàyùcàndùá, nì casaà nècuàchì sàhnùmà nùù-yá, te nì casacundahví-nè nùù-yá, cachí-nè:

—Quida sacù-ní favor xì capitán mà, vachi vaha ndisa ini-nè.

⁵ Cuú ini-nè sàhà nèhivì raza-ndà. Te nì chindee stná-nè nì cuyucun iin veheñùhu xi-nsi.

⁶ Daaní, nì sacatnahá-yá xì nècuàchìmà cuàhàn-yà. Te na sá-ítúú-yá sàà-yà vehe capitán mà, dandu vaxi iin ùì amigo xi-ne, nihí-né razón xi nècuàchìmà vaxi nùù-yá, te dohó cachá:

—Señor mío, màsà dándóhò gà-ní mii-ní sàhí, vachi có-nâtùì yàha-ní vehi.

⁷ Ni có-nâtùì stnáì tnatui ndé iá mii-ní. Cuisì icúmí-ní cachí-ní, dandu nduvàha mozo xi.

⁸ (Ináhî), vachi iá inga nèhivì dandacú nùù yùhù, te yùhù dandacú stnáì nùù tè-xínduu soldadu xi; te nú cachí xì iin-tè: "¡Cuahán!" dandu cùhùn-te; te ò nú cachí xì ingà-te: "¡Naha!" dandu quidá stná-teá; te ò nú cachí xì mozo xi: "Dohó quido", dandu quidá stná-teá. Ducán cachí razón xi capitán mà.

⁹ Na ní nsihi nì inini Jesús razón mà, dandu nì ndulocó-yà sàhà nècuàchìmà, te nì nacuico-yá yàtà-yá nì indehè-yá nècuàchì nchícùn mà, te nì cachi-yà xì-né:

—Cunaha-nsiá, có-xìní ni-iin nèhivì raza-ndà Israel xiníndísà vaha guá nahi capitán yohó.

¹⁰ Dandu amigo xi capitán mà, mànuhù-né vehe nècuàchìmà, te nì xini-nè sàni nduvàha mozo cuhí mà.

Nansa nì dánatíacú Jesús dèhe iin nècuàchì cuaán

¹¹ Daaní, nì yàha iin tiempo, te cuàhàn-yà inga ñuu nani Naín, te cuàhà nècuàchì dacuahá-yá xínchicùn xì-yá, te cuàhà stná nèhivì dava ga.

12 Te sà-ítúú-yá sàà-yà yehè cahnú ndé quíhvi-nda ñuu mà, te nì xini-yà yucán vaxi nèhivì xínsida xì iin nsìi. Vaxi stná dihi nsìi ma, cutnâhâ-né xì cuàhà nèhivì. Sàni xihì stná ì nècuàchì ñahà mà, te mindaa dèhe-ne nduú nsìi cuàhàn cundùxin vichi.

13 Doco na ní xini Stoho-ndà Señor nècuàchìmà, nì cuhi ini-yànè, te nì cachi-yà xì-né:
—Màsà cuácú gà-ní.

14 Dandu nì tnàtuu-ya nùù caja mà, te nì chituu-ya dìnìndàhá-yà icà-nú. Ñàyùcàndùá, nì cucuìta tiàa xínsida xì-nú. Dandu nì cachi-yà xì nsìi ma:

—Ndacuiìn-ní, cachí xì-ní, xu.

15 Dandu nsìi ma, nì ndacòo-ne nì quesaha-né nì nacahàn-nè. Dandu nì cachi Jesús xì dihi-né:

—Yohó iá dèhe-ní.

16 Dandu nì cayùhí nsidaa nèhivì mà, te nì candenihi vâha-ne Dios, cachí-nè:

—Vichi ndisa, yohó sàni ndecunu ana vaxi cáhàn razón ndiaha xí Dios, te cuàhà sàstnùhù ñà-ndùá quidá-yá.

Te dava ga-nè xí cachi stná-nè:

—Sàni indehè ndahví Dios ndohó tè-nduú nèhivì xí-yá.

17 Ñàyùcàndùá, nì xitià palabra sàhà Jesús inicutu ladu Judea yucán, xì inicutu stná ñuu chicá xica.

Nansa nì naxiconihí Jesús nùù nèhivì nì techuún Juan Bautista nì quixi nùù-yá

18 Daaní, nècuàchì dacuahá Juan, nì nacani-ne xì nècuàchìmà nsidaa ñà-ndùá quidá Jesús.

19 Ñàyùcàndùá, nì cana Juan mà ù tiàa dacuahá-né, te nì techuún-né nècuàchìmà ñà-cùhùn-nè nùù-yá ndàcàtnùhù-né nùù-yá a ndísá mii-yá nduú ana ndiaha icúmí quesaa, te ò inga ana vaxi cundiatu-ne.

20 Ñàyùcàndùá, cuàhàn nècuàchìmà ndé iá-yà, te nì cachi-nè xì-yá:

—Juan Bautista nì techuun-xi-nsí vaxi-nsi yohó ñà-ndàcàtnùhù-nsí nùù-ní, ¿a divi mii-ni nduú ndisa ana ndiaha icúmí quesaa, te ò inga ana vaxi cundiatu-nsi?

21 Daaní, divi hora xíndoo nècuàchìmà yucán nì dándúvâha-ya cuàhà nècuàchì cuhí. Te nì nduvâha stná cuàhà nècuàchì ñuhú ñà-malu ini-xi, xì cuàhà stná nècuàchì cuaá nì dânatùu-ya nùù-xí.

22 Dandu nì cachi-yà xì tiàa nì caquesaa mà:

—Cuahàn-nsià cachitnùhu-nsia xì Juan sàhà ñà-ndùá nì xini-nsia yohó, xì ñà-ndùá nì inini-nsia, te cachi-nsià xì-né nansa nì cuu nì natùinuù nècuàchì cuaá, te nì nacaca stná nècuàchì xicácuéhê, te nì nduvâha stná nècuàchì ndohó cuèhè lepra, te nì nihì stná nècuàchì dòhò nì natiacu tùtnù-né; stná nèhivì nì xihì, nì natiacu stná-nè. Te nècuàchì ndahví, sàni nihítáhvi stná-nè cunini-ne razón ndiaha xí Dios.

23 Ñàyùcàndùá, nú cudí ini nèhivì modo xì, dandu contentu ni cúndóó-né —nì cachi-yà.

24 Daaní, na sàmànùhù nèhivì nì caquixi nùù Juan mà, dandu nì càhàn-yà xì nèhivì cuàhà ndoo yucán; dohó nì cachi-yà xì-né sàhà Juan:

—Na ní caquee-nsia ñuu-nsià cuàhàn-nsià yucù cundehè-nsiá Juan, ¿a cuàhàn-nsià cundehè-nsiá iin nèhivì (tùha dàma dìmì-xí) na iin yutnù ndóyo quidá tàchì? (Còó.)

25 Te nú coó, dandu ¿nansa iá-nè cahan-nsiá? ¿A iin nèhivì ndixí vico nduú-né cahan-nsiá? Còó, vâchi nèhivì ndixí vico, te xíndoo-ne vicò nsiquívì, puru vehe rey xíndoo-ne.

26 Pues nú màdi ducán, dandu ¿nansa iá nècuàchì cuàhàn-nsià cundehè-nsiá? ¿A iin profeta cáhàn cuenta xì Dios nduú-né? Pues jaan. Doco màdi cuisì profeta nduú-né, chicá más ndiaá-nè,

27 vâchi divi nècuàchìmà cáhàn tutu ì sàhà-xí ndé cachí Dios:

Cuàhàn techuún iin tiàa cùhùn, te dihna-ne yâha-ne càhàn-nè xì nèhivì ñà-ndùú razón xì, te ducán nsida vii nècuàchìmà anima-nè, na ian nduvii iin ichì, dandu después yâha stná mii-ní (Cristu), cachí Dios nùù tutu ì mà.

28 Te yùhù, cachí xì-nsiá, nùù nsidaa nèhivì nì tùinuù ñuhiví, còò inga profeta chicá nì quida ndiaha nùù Juan Bautista. Còò ana inga ndudává xí-nê. Doco cachí stnàì xì-nsiá, chicá ndiaha coo xi ana cuàhàn cuni tiempu cusahnú Dios ñuhiví yohó, mate nèhivì ùún nduú-né —nì cachi Jesús.

29 Daaní, nècuàchì dachiyàhvi, xì nsidaa stná nèhivì, nì naquimanì-né Dios sàhà ñà-nduá nì cachi-yà, vàchi cuàhà-né sàni quida iì Juan-nè.

30 Doco nècuàchì fariseu xì nècuàchì ley xi veheñùhu, nì cahíchì ini-nè palabra nì cachi Dios sàhà-né, vàchi cóni sàha-ne cuhiì-né quida Juan.

31-32 Daaní, nì cachi tu Stoho-ndà Señor:

—Cuàhìn cachì xì-nsiá nansa quidá nèhivì tiempu vichi. Dohó quidá-né na quidá ñà-cuati ndoó idádiquí ini iin ñuu, dava caná xì tnaha, cachá: “Siví-nsí, doco nsiohó, có-itásáhá-ndâ; daaní, xitó tàsì-nsí, doco nsiohó, có-sàcù-ndá”.

33 (Te ducán iá sàhà Juan Bautista xì yùhù), vàchi nì quixi Juan mà, nìsa ìa-ne yohó, cóni sáxíxí-né comida vàha, nì cóni sáxíhí stná-nè (vinu); ñàyùcànduá, nì cachì-nsia sàhà-né: “(Tè-loco nduú-te), ádi sàni cundee ñà-malu nùù-té”.

34 Daaní, nì quesaa stná yùhù ana nduú Tnaha Nèhivì Ñuhiví, te tùha stnàì cuxi comida vàha, te xihí stnàì (vinu), doco cachí-nsiá sàhí ñà-yáha ga ndadí, te cachí stná-nsiá ñà-tùhe coho cuahí, dècuèndè iá vàha stnàì xì nècuàchì dachiyàhvi, xì stná nsidaa gá nèhivì cuáchi, cachí-nsiá.

35 Doco cunaha-nsiá, nú ndisa ñà-nchìchí ndiaha nduá quidé, te xiní stná inga ana quidá stná ducán, dandu quidáñúhú stná-nè yùhù.

Nansa nì quida Jesús na iá-yà vehe iin nècuàchì fariseu nani Simón

36 Daaní, nì cànà-yá cùhùn-yà vehe iin nècuàchì fariseu ñà-cutnahá-yá xì-né cuxi-ne xì-yá. (Ñàyùcànduá, cuàhàn-yà yucán), te nì yàha-ya ini vehe nì sàcòo-ya.

37 Te ñuu yucán iá iin nècuàchì ñahà có-quidá sahnú. Te nì xinitnùhu nècuàchì mà sà-cuàhàn Jesús vehe nècuàchì fariseu-mà cuxi-ya. Ñàyùcànduá nì tnii-ne iin quidi tii nì cuyucun yùù finu nani alabastro; ñuhú tàtnà tnàmì quidi ma,

38 te nihí-néà cuàhàn ndé iá-yà. Te nì sàcuìn-nè yàtà-yá yatni nùù sàhà-yá, te sacú cuàhà-né. Te ndutènúù-némà nì dàndàxín-né sàhà-yá, dandu nì nsida ìchí-nèà xì idìdìni-né. Nì tutuyuhu stná-nè sàhà-yá, te nì dàcánúú-né ñà-tnami ma ìcà sàhà-yá.

39 Doco nècuàchì fariseu nì cana xi-yá mà, inì-ni mii-né nì nacani ini-nè, cachí-nè: “Nú ndisa iin nèhivì vaxi cuenta xi Dios nduú Jesús, dandu mà úhì cundaà ini-nè sàhà nècuàchì ñahà tnií xi (sàhà-né) ñà-nduú nècuàchì mà iin nèhivì cuáchi”. Ducán nì nacani ini nècuàchì fariseu mà.

40 Doco Jesús, nì cachi-yà xì-né:

—Iá ñà-nduá cuní cachì xì-ní, Simón.

—Juùn, Maestro, cachì-ní xì —nì cachi Simón mà.

41 Dandu nì cachi-yà:

—Nì sandoo ùì tiàa, te nduì-nè, xì-inihica-né dìhùn nùù inga iin tiàa. Iin nècuàchì mà, iníhíca-nè ùhùn cientu pesu, te inga-nè, cutu ùì dico ùxìn pesu iníhíca-nè.

42 Doco ni-iin-ne, còò ni-ñàha icúmí-nè ñà-danáa-né. Ñàyùcànduá, tiàa iníhíca-nè nùù-ximà, nì dàndùtù-né cuenta xi nduú nècuàchì mà. Ñàyùcànduá, vichi cachì-ní xì, ¿ìndù tiàa ma chicá cuàhàn cuu inì-xi sàhà nècuàchì mà cahan-ní?

43 Dandu nì cachi Simón mà:

—Yùhù tuxí inì, nècuàchì chicá nì sanihica cuàhà mà, divi cunduu ana chicá cuú inì-xi sàhà nècuàchì mà.

Dandu cachí Jesús xì-né:

—Sàni cachi vàha-ní.

44 Dandu nì ndacoto-ya yàtà-yá ndé iá nècuàchì ñahà mà, te nì cachi-yà xì Simón mà:

—¿A xiní-nî nècuàchì ñahà yohó? Na ní quesai, te nî quihvi vehe-ní, còò tècuí nî chindánuu-ní ñà-ndoo sàhí; doco nècuàchì yohó, ndutènúù-né nî dándàxín-né sàhí, te nî nsida ichí-nèà xì ididíni-né.

⁴⁵ Te mii-ní, cóni tütúyúhú-nî yùhù na ní casàhú-nî xí, doco nècuàchì yohó, dècuèndè hora nî quesai, có-nàcòó-né ñà-tütúyúhú-né sàhí.

⁴⁶ Te mii-ní, cóni (quidáñúhú-nî yùhù) ñà-dacánúú-nî aceite díní. Doco nècuàchì yohó, tàtnà tnàmì sàni dácánúú-né sàhí.

⁴⁷ Ñàyúcàndüá, mate cuàhà cuàchi-ne iá, doco ñà-sàni nihì-né perdón sàhámà nduá, (náhà xicà), vàchi cuàhà gá cuú ini-né (sàhí). Doco nú iyuhu cuàchi iá sàni nihì nèhivì perdón sàhà-xí, dandu chicá iyuhu cuú ini-né (sàhí).

⁴⁸ Dandu nî cachi-yà xì nècuàchì ñahà mà:

—Sàni xicahnú ini sàhà cuàchi-ní.

⁴⁹ Doco nèhivì dava ga ndoo xixí xi-yá yucán, nî nacani ini-né, cachí-né (entre mii-né):

—¡Cò-ndüá ducán cachi Jesús ñà-jaàn, vàchi mà cúí cuicahnú ini-né sàhà cuàchi-nda!

⁵⁰ Doco Jesús, nî cachi-yà xì nècuàchì ñahà mà:

—Sàni càcu-ní ñà-nî xinindisa-ní. Vätüni cùhùn-ní, te contentu ni coo-ní.

8

Nansa nani itnii nècuàchì ñahà nî chindee xi Jesús

¹ Daaní, nî quihin-ya ichì cuàhàn-ya nî nacàhin-ya ñuu nahnú te ñuu cuati, cáhàn-ya sàhù, cachítnùhu-ya xì nèhivì ñà-ndüú razón ndiaha sàhà ñuhivì ìì xí Dios. Te cutnàhà stná-ya xì nsi-úxin ùi nècuàchì dacuahá-yá,

² xì dava stná nècuàchì ñahà nî dándúvaha-ya. Dava-ne, nisa ñuhu ñà-malu ini-né, te dava ga-né, cuèhè nî sandoho-ne, doco nî dándúvaha-ya nsidaa-né. Iin nècuàchì ñahà mà nani María Magdalena. Ûsà ñà-malu nî tavà-yá nùù-né.

³ Te inga-né nani Juana, ñahàdihí Chuza, iin nècuàchì dandacú nùù biene xi rey Herodes. Te inga nècuàchì ñahà mà nani Susana, te cuàhà gá stná nècuàchì ñahà dava ga cutnàhà xí-yá cuàhàn-né, chindéé-nèya, te quidá stná-né cooperar.

Ejemplu sàhà iin nècuàchì xitú

⁴ Daaní, nî quesaa cuàhà nèhivì nî caquixi iin iin ñuu, nî nataca-né nùù-yá. Te nî càhàn-ya xì-né, nî nacani-ya xì-né iin historia nduú ejemplu. Te dohó nî cachi-yà:

⁵ —Nì ìa iin tiàa, te cuàhàn-né chihi-ne. Te nî sate uun-ne tata mà. Ducán nî quida-ne, te dava-ña nî còya mahì ichì. Te yucán nî sànihni nèhivì-ñá; stná laa ndavá ansivi, nî saxì-sía.

⁶ Te dava stná tata mà, nî còya nùù cavà. Te yucán nî xitìa, doco nî ìchà, vàchi còò ndèhì.

⁷ Te dava stná tata mà, nî còya mahì iñù, te iin-ni nî sahnua xì-ñá mà. Doco nî dàdáhviàmà-ñá.

⁸ Doco dava stná tata mà, nùù ñuhù vaha nî còya, te nî xitìa viiá; ndè ùhùn dico tantu nî cana —nî cachi Jesús.

Dandu fuerte nî cachi-yà:

—¡Ni cúníní vaha nsidaa-nsiá ñà-ndüá cachí!

Ñà-ndüá disàhà-xí nî nacani Jesús cuàhà ejemplu

⁹ Después nî xicàn tnùhù nècuàchì dacuahá-yá nùù-yá, cachí-né:

—¿Ndíà ndüá cuní cachi ejemplu nî nacani-ní mà?

¹⁰ Dandu nî cachi-yà:

—Sàni sàhatahvì Dios mii-nsiá ñà-cundaà ini-nsiá sàhà ñuhivì ìì xí-yá, mate antes nisa ìa dèhámà. Doco nècuàchì dava ga, còò. Puru ejemplu nacání xì-né sàhà-ñá màsà cúnítnùhu-ne, mate indéhe-né, te màsà cundáà ini-né, mate iníní-né.

Ñà-ndüá cuní cachi ejemplu sàhà nècuàchì xitú

11 'Cunaha-nsiá, ñà-yòhó nduá cuní cachi ejemplu mà: Tata mà nduú nahi Palabra xi Dios.

12 Te tata nì còyo mahì ichì mà nduú nahi nèhivì iníní palabra (xi-ya), dandu vaxi ñà-malu, te dacúxió-si palabra mà ini anima-nè sàhá màsà cúníndísâ-né, te càcu anima-nè.

13 Daaní, tata nì còyo nùù cavà mà nduú nèhivì iníní xí palabra ì, te luegu cudî ini-nè sàhá mà. Doco nahi viù còò yohò-xí nduú-né, iin ratu tii xiníndísâ-né, dandu na yáha-ne tnùndoho, luegu nacóó-né palabra mà.

14 Daaní, tata nì còyo mahì iñù mà nduú nèhivì iníní xí palabra xi-ya, doco cuàhà gá nacání ini-nè sàhá vida xi-ne ñuhiví yohó; cuú cuàhà ini-nè sàhá biene xi-ne, te cuàhà gá diversión có-íá viù nandúcú-né. Ñàyùcànduá, ducán queá xì-né na ian nì cuu xi viù mà, nì dàhvia nì quida iñù, vachi có-sàà-nè quida-ne ñà-vàha nacua cuní Dios.

15 Daaní, tata nì còyo nùù ñuhù vaha nduú nèhivì nihnú ndàcuisì inì-xi; vaha anima-nè, iníní-né palabra vaha ma, te quidá ndisa-neà cumplir, iin-ni nchícùn-nèà, te sàhá mà nduú-né nahi viù nì cana viù.

Ejemplu sàhá ñuhu itnúù

16 'Nú sàni nacahmi-nda iin lámpara, mà chícání-ndáñâ tixi iin cazuela, ò tíxi iin cama. Còò, icúmíâ cuian ndé ducún ñà-cutnuà nùù nèhivì yáha ini vehe.

17 Cunaha-nsiá, nsidaa ñà-íá dèhé, icúmíâ tui vateá. Vachi nsidaa ñà-nduá quidádèhé nèhivì, icúmíâ natùì claruà, te cunitnúhu nèhivì sàhá-ñá.

18 'Cunini vaha-nsia na sàha xi-nsiá ichì váha, vachi nècuàchì ñuhú (ñà-vàha) inì-xi, chicá más icúmí-né nihítàhvi-né; doco nèhivì có-ñuhú ndisa (ñà-vàha) inì-xi, mate tuxí ini-nè íá iyuhá, doco nsidaájàn, icúmíâ cuxio nsiha.

Ñà-nduá nì cachi Jesús sàhá dihi-yá xì sàhá ñani-yà na ní casa-nè caná-néyà

19 Daaní, nì sàà dihi-yá xì ñani-yà, doco mànicúì quihvi-ne ndé íá-yà sàhá-ñá cuàhà guà nèhivì ndoó yucán.

20 Dandu nì cachi nèhivì xì-yá:

—Cunaha-ní, tùvèhè cà' iín dihi-ní xì stná ñani-ní; cuní-nè càhàn-nè xì-ní.

21 Dandu nì cachi-yà xì-né:

—Nsidaa ana iníní xi Palabra xi Dios, te quidá ndisa-neà, divi-ne nduú nahi dihi, nahi ñani, te nahi cùhe.

Nansa nì quida Jesús nì cucuìn tàchì, te nì nacuñuhu dadí tècuí mar

22 Iin quivì nì nana-ya ini iin lancha, mii-yá xì nècuàchì dacuahá-yá, te nì cachi-yà xì-né:

—Cùhùn-ndà yàha-nda inga ladu mar.

Ñàyùcànduá, nì quihin lancha mà ichì cuàhàn-nu.

23 Te na xicá-nu cuàhàn-nu mahì mar, dandu nì quidì-yà. Daaní, nì quesaha nì cana iin tàchì fuerte vaxi ndè ñuhù íchì, te nì quesaha cuàhàn chitu lancha mà tècuí, yáha ga íá peligrú xì nsidaa-né.

24 Dandu nì catnàtuu-ne ndé indúhu-yá quidì-yà, te nì dándácò-neyà, cachí-nè xì-yá:

—¡Maestro! ¡Maestro! ¡Cuàhàn-ndà càhà-ndà!

Ñàyùcànduá, nì ndacuiin-yà nì càhàn-yà nì sadi-yà nùù tàchì mà xì nùù ñà-nàcuáhnú tódo tècuí. Dandu nì cucuìn ì nsidaámà, nì nàcuìn dadí uun.

25 Te nì cachi-yà xì-né:

—¿Índù chuun có-nihnú vaha ndisa inì-nsia Dios?

Ñàyùcànduá, nì yuhí-nè, te nì ndulocó-nè, cachí-nè iin-ne xì inga-nè sàhá-yá:

—¿Índù clase tiàa nduú ana yohó? Vachi ndè tàchì xì ndè stná mar dandacú-né nùù-xí, te iníníá-nè.

Nansa nì tavà Jesús cuàhà ñà-malu ñuhú ini iin tiàa ñuu Gadara

²⁶ Daaní, cuàhàn lancha mà, te nì sàà-nu ndè ñuu nècuàchì gadarenu. Frente ladu Galilea indúhu ñuu mà.

²⁷ Te nì nuu Jesús lancha mà nùù ñuhù íchí. Dandu yucán vaxi iin tiàa ñuu mà, ñuhù cuàhà ñà-malu anima-nè. Sàcàní tiempu ñuhá anima-nè. Có-ndìxí-né sìcoto, ni còò stná vehe-ne, cuisì mahì cueva ndé xí-indùxin nsii íá-nè.

²⁸ Doco na ní xini-nè Jesús, nì ndàhì ndee-né nì sàcuìn sisi-né nùù-yá, te fuerte nì cachi-nè xì-yá:

—Jesús, ¿ndià cunduu-ní yùhù? (Yùhù ináhí), Dèhemanì mii-yá dandacú ndé chicá ansivi nduu-ní. Sacúndahví nùù-ní ñmàsà dándóhó-ní yùhù!

²⁹ Ducán nì cachi nècuàchì-mà, vachi sàcàchí Jesús xì ñà-malu mà ñà-nì quèá ini-nè. Vachi antes cuàhà xichi nì dándòhá-nè, ñàyùcàndùá nì sàcùnuhni-nè xì cadena xì stná manilla càa, te ducán nìsa ìa-ne, ndiaá nèhivì-né. Doco siempre sahdé uun-ne ñà-nùhní-nè, te xinúdèhé-nè yucù sàhàn-nè quidá ñà-malu mà.

³⁰ Dandu Jesús, nì xicàn tñùhù-yá nùá, cachí-yà:

—¿Nansa nanu?

Te nì cachà:

—Ejército naní —cachá, vachi cuàhà sàstnùhù ñà-malu ñuhù anima-nè.

³¹ Te nì sacundahvíà nùù-yá ñà-màsà dándácù-yá cùhàn cuñuha yavi cunú sàstnùhù.

³² Te yatni yucán íá iin yucù ndé ndoó cuàhà cochi xixáhan-sì. Ñàyùcàndùá, nì xicàn tàhviá nùù-yá áma cuàha-ya permisù cùhàn caquìhvia ini cochi yucán. Te nì sàha-ya permisù.

³³ Dandu nì canacoyo nsidaa-ñá ini tiàa ma cuàhàn, te nì caquìhvia ini cochi mà. Dandu nsidaa quisi mà, (nì culocó-sì); carrera nì canuu-sì candiaa mà nì còyo-sì mar, te nì càhà-sì.

³⁴ Daaní, tè-xíndiaa xì cochi mà, na ní caxini-te nì cuu ducán, dandu carrera mànuhù-té nì nacani-tè xì nèhivì ñuu yucán xì stná nèhivì rancho.

³⁵ Dandu ní caquee nsidaa-né vaxi-ne cundaà ini-nè ndià nduá nì cuu. Te nì casaà-nè ndé íá Jesús, nì xini-nè, yucán íá tiàa nì caquee ñà-malu anima-xi, íá-nè nùù-yá, sàndìxí-nè sìcoto vichi. Sàni nàcòò nsihi sàxínitnùnì-nè. Ñàyùcàndùá, yáha ga nì cayùhí nèhivì mà.

³⁶ Dandu tiàa nì caxini nansa nì cuu nì dándúvaha-ya tiàa ma, nì nacani-ne xì nèhivì nì caquesaa mà.

³⁷ Dandu nsidaa nècuàchì ladu Gadara mà, nì sacundahví-nè nùù-yá ñà-nì quèé-yá nùù ladu mà, vachi yúhí cuaá-nè. Ñàyùcàndùá, nì nana tu-ya lancha ñà-cùhùn-yà.

³⁸ Dandu tiàa nì caquee ñà-malu nùù-ximà, nì sacundahví-nè nùù-yá cuní-nè cutnahá-né xì-yá cùhùn. Doco nì techuún-yánè nùhù-nè, cachí-yà:

³⁹ —Xuhun-ní vehe-ní, te nacani nchihì-ní nsidaa favor nì quida Dios xì-ní —nì cachi-yà.

Ñàyùcàndùá, mànuhù nècuàchì mà ñuu-nè yucán, te inii ní xicanuu-ne nacání-né xì nèhivì nansa (nì nduvàha-ne) nì quida Jesús.

Nansa nì dándúvaha Jesús dèhe Jairo, te nì dándúvaha stná-yà iin nècuàchì ñahà

⁴⁰ Daaní, na ní nasaa-yà, nì cacudiì ini nèhivì ndoó yucán, vachi xíndiatu nsidaa-né ñà-nsiaa-yà.

⁴¹ Daaní, nì sàà iin nècuàchì nani Jairo nùù-yá; iin nècuàchì cusáhnù nùù iin veheñùhu nduú-né. Te nì tutuyuhu-né ñuhù nùù sàhà-yá nì sacundahví-nè nùù-yá ñà-cùhùn-yà vehe-ne.

⁴² Vachi mindaa dèheyoco-né íá, nahi ùxin ùi cuià xicá-ña, doco vichi sàcùcáhvì-ña. Ñàyùcàndùá nì quihin Jesús ichì cuàhàn-yà. Doco cuàhà stná nèhivì cutnàhà xí-yà, dècuèndè yáha ga tnuu cuàhàn-nè xì-yá ñà-cuàhà guá-nè.

⁴³ Te mahì nèhivì mà cuàhàn stná iin nècuàchì ñahà, ùxìn ùi cuià sàcuàhàn-nè ndohó-né cuèhè nì, te sàni nsihi dìhùn xí-né cuàhàn nùu cuàhà nècuàchì nì quidatatna xi-né, doco ni-iin nècuàchìmà, cóni níhì-né dandúvaha-ñané.

⁴⁴ Te vichi divi ñahà mà nì quixi ladu yàtà Jesús, nì dàcùhùn-nè ndahà-né nùu ìcà sìcoto xi-ya. Te hora nchito ma nì cucuiin nì-né.

⁴⁵ Dandu ní cachi Jesús:

—¿Ana divi nì dùcùn ndahà-xí yùhù?

—Ni-iin-nsi —cachí nsidaa-né.

Te Pedro xì compañeru-nè, nì cachi-nè xì-yá:

—Yáha ga ndutnúú, Maestro; tnuu ga vaxi-nda mahì nèhivì. ¿Índù chuun ndácàtnùhù-ní ana nì dùcùn ndahà-xí ìcà sìcoto xi-ní?

⁴⁶ Doco nì cachi-yà:

—Ináhí íá ana nì quida xí ducán, vachi nì cundaà inì nì quide iin milagru.

⁴⁷ Dandu nècuàchì ñahà mà, nì cundaà stná ini-nè ñà-sà-ínahá Jesús ñà-nduá nì quida-ne. Ñàyùcànduá, vaxi-ne, ndé quidí cuisì-né nì sàcuìin sísì-né nùu-yá. Te itá nsidaa nèhivì yucán, iníní-né, te nì nacani nècuàchìmà xì-yá índù ñà-dìsáhà-xí nì dàcàcùhun-ne ndahà-né ìcà-yá, te nì nduvàha-ne vichi duha.

⁴⁸ Dandu nì cachi-yà xì-né:

—Hija, sàni nduvàha-ní ñà-nì xinindisa-ní. Vàtùni nùhù-ní vichi, te contenu ni coo-ní.

⁴⁹ Na meru cachí-yà ducan, dandu nì quesaa iin tiàa nì quixi vehe presidente xi veheñùhu ma, te nì càhàn-te xi nècuàchìmà, cachí-te:

—Sàni xìhì dèheyoco-ní. Có-xìñùhù cuàhachuún gà-ní Maestro.

⁵⁰ Doco nì tiacu Jesús ñà-nduá nì cachi-te, ñàyùcànduá nì cachi-yà xì nècuàchì dándàcù-mà:

—Màsà yúhí-ní. Cuisì cunihnu vaha inì-ní, te càcu-ñà.

⁵¹ Daaní, (nì sàa-yà xì-né), te nì quìhvi-ya xì-né ini vehe. Doco cóni sáha-ya quìhvi inga nèhivì (ndé indúhu nsii ma), cuisì Pedro xì Jacobo xì Juan xì stná yuadíhí-ñâ.

⁵² Vachi ndoó cuàhà nèhivì, te sacú ndee-né, cána-ne ñà-sàni xìhì-ñâ. Dandu nì cachi-yà xì-né:

—Màsà cuácú-nsiá, vachi cóni xìhì-ñâ; quidí uun ni-ñâ.

⁵³ Dandu nècuàchìmà, nì sàcùndiaa-nèyá, vachi ináhá-né ñà-sàni xìhì-ñâ nduá.

⁵⁴ Doco mii-yá, nì cachi-yà ni cáquéé nsihi-ne fuera. Dandu nì tnii-yà ndahà-ñâ, te nì càhàn fuerte-yà, cachí-yà:

—¡Ndacuiin xá!

⁵⁵ Daaní, nì nsiaa tu espíritu xi-ñâ, te yàchì nì ndacuiin-ñâ. Te nì dándàcú-yá daquixí-né ñà-cutiacù-ñâ.

⁵⁶ Te yuadíhí-ñâ, yáha ga nì ndulocó-nè. Dandu nì cachi-yà xì-né ñà-màsà nácání-né xì ni-iin nèhivì.

9

Nansa nì techuún Jesús ùxìn ùi nèhivì dacuahá-yá ñà-dacuítia-nè palabra ùi

¹ Daaní, nì cana Jesús ùxìn ùi nècuàchì dacuahá-yá, te nì sàhatahvì-yánè ñà-vàtùni tavà-né nsidanuu clase ñà-malu ñuhú ini nèhivì, te vátùni dandúvaha stná-nè nèhivì cuhí.

² Te nì sàcùnaha-né ñà-cùhùn-nè cachitnùhu-ne xì nèhivì palabra sàhà ñuhívì ìì xí Dios, te dandúvaha stná-nè nècuàchì cuhí.

³ Dohó nì cachi-yà xì-né:

—Ni-iñàha màsà cúnihí-nsiá cùhùn, ni bastón, ni morral, ni dità, ni dìhùn, ni inga dùhnù-nsiá ñà-nadama-nsia màsà cúnihí-nsiá cùhùn.

⁴ Te nú nì sàa-nsiá iin vehe ndé cundoo-nsia, iin-ni cundoo-nsia yucán dècuèndè cachi sàa quivì quee-nsia ñuu mà.

⁵ Doco nú có-cùní nèhivì dayáha-ne mii-nsiá, dandu quee-nsia yucán, te nacatù-nsiá sàhà-nsiá còyo yàcá ñuu mà, cunduamà seña cóni quidá víi nècuàchìmà (xì-nsiá) —nì cachi-yà.

⁶ Daaní, nècuàchì dacuahá-yámà, nì caquihin-ne ichì cuàhàn-nè, nì nacàhin-ne cuàhà ñuu cuati nì càhàn-nè xì nèhivì nansa iá razón vaha xi Dios, te nì dándúvaha stná-nè nècuàchì cuhí nsidanicuú lugar.

Nansa nì nacani cuàhà ini rey Herodes

⁷ Daaní, rey Herodes, nì xinitnùhu-tè ñà-cuàhà guá milagru quidá-yá, te nì ndulocó-te, vachi cachí dava nèhivì ñà-sàni natiacu Juan (Bautista) nduájàn.

⁸ Doco dava ga-nè, nì cachi-nè divi Elías sàni ndecunu, te ò iin nècuàchì yuhù núu Dios sàni natiacu.

⁹ Doco Herodes, (nì ndulocó-te), te nì cachi-te:

—Yùhù nì sàhi orden tãhdè dìni Juan (Bautista). Doco inga nècuàchì càhàn guá nèhivì sàhà-ximà, ¿ana divi nduú-né, te cuàhà guá ñà-quidà stná-nè? —nì cachi-te. Ñàyùcàndùá cuní-te cundehè-té Jesús.

Nansa nì dàcútiácú Jesús cuàhà mil nèhivì

¹⁰ Daaní, sàmàndixi nsidaa nècuàchì dacuahá-yá nì cansiaa-nè, te nì nacani-ne xì-yá nsidaa ñà-ndùá nì quida-ne ndé nì sàhàn-nè. Dandu nì nacuaça-ya nsidaa-né cuàhàn cuaán-yá xì-né iin xaan yatni ñuu Betsaida ndé còò nèhivì.

¹¹ Doco cuàhà nèhivì nì tenchicùn xì-yá, vachi nì xinitnùhu-ne cuàhàn-yà. Ñàyùcàndùá, nì casàhú-yà xì-né, te nì càhàn-yà xì-né sàhà ichì dandacú Yua-nda Dios. Te nì dándúvaha stná-yà nècuàchì cuhí xì-ne.

¹² Dandu nì cuaà quivì yucán. Te ùxìn ùi nècuàchì dacuahá-yá, nì tnàtuu-ne nùu-yá, cachí-nè xì-yá:

—Ndaqindèè-ní xì nèhivì, dandu cùhùn-nè ñuu cuati, te ò ranchu yatni, te nihì-né ndé cuxi-ne, te cùdù-nè, vachi yohó ndé ndoo-nda, còò vehe.

¹³ Doco nì cachi-yà xì-né:

—Mii-nsiá dacuxí-nsiánè.

Te nì cachi-nè:

—Cuisì ùhùn pan nihí-nsí, xì ùi siaca. ¿A cuní-ní cùhùn-nsì cuiin-nsi ñà-cuxi nsidaa nècuàchì yohó? —nì cachi-nè.

¹⁴ Vachi nècuàchì tiàa ndoó yucán, ùhùn mil nduú nsidaa-né.

Dandu nì cachi-yà xì nècuàchì dacuahá-yá:

—Cachi-nsià xì nèhivì ñà-nì mácùndoo-ne ñuhù, iin iin grupu-nè ùi dico ùxìn, ùi dico ùxìn nì cùndúú-né.

¹⁵ Ñàyùcàndùá, ducán nì caquida nècuàchì dacuahá-yá, nì càhàn-nè xì nèhivì, te nì sàcùndoo nsihì-ne.

¹⁶ Dandu nì tniì-ya ùhùn pan mà xì ùi siaca ma, te nì ndacoto ndiaá-yà dìquì-xí, nì naquimanì-yá Dios sàhámà. Dandu nì dàcuàchì-yáñà, te nì sàha-ya nècuàchì dacuahá-yá, te nì dasàn-néà nùu nèhivì.

¹⁷ Te nsidaa-né, nì xixi-ne nì ndenuu ini-nè. Dandu nì chivàha-ne ñà-nì cuyodò, te nì chitu ùxìn ùi icà pedazu pan mà.

Nansa nì cachi Pedro ñà-xiníndísâ-né ñà-divi Cristu dacácu xi-nda nduú Jesús

¹⁸ Daaní, nì ia iin xichi nì quecuaán-yá xì nècuàchì dacuahá-yá, te nì xicàn tãhvì-yá nùu Dios. Dandu después nì ndàcàtnùhù-yá nùu nècuàchìmà, cachí-yà:

—¿Ana nduú yùhù, cachí nèhivì?

¹⁹ Te nì cachi-nè xì-yá:

—Dava-ne cachí-nè ñà-Juan Bautista nduu-ní. Te dava-ne cachí-nè Elías nduu-ní. Te dava ga-nè cachí-nè iin nècuàchì profeta sàhana nduu-ní, te sàni natiacù-ní vichì cahan-né.

²⁰ Dandu nì cachi-yà xì-né:

—Doco mii-nsiá, ¿ana nduí, cachí-nsià?

Dandu nì cachi Pedro xì-yá:

—Divi Cristu nì quixi nùù Dios nduu-ní.

²¹ Dandu nì dândacú-yá nùù-né ñà-màsà nácání-né xì nèhivì nduú-yá Cristu.

Nansa nì cachitnùhu Jesús icúmí-yâ cui-yà

²² Dandu nì cachi stná-yà xì-né:

—Yùhù ana nduú Tnaha Nèhivì Ñuhiví, cuàhà gá icúmí ndohi. Vâchi tè-sàhnú xídandacú, xì stná dùtù xícusahnú, xì stná nècuàchì ley xi veheñùhu, nsidaa-né icúmí-nê cahíchì ini-nè yùhù, dandu cacahnì nèhivì yùhù. Doco tìxi ùnì quivì icúmí natiacuì.

²³ Te nì cachi stná-yà xì nsidaa-né;

—Nsidaa ana cuní cunchicùn xí, xiñuhu naco-ne ñà-nduá cuní inì-ni mii-né quida-ne, te nsiquivì quida-ne cuenta na ian nsidá stná-nè cruz xi-ne cutnâhâ-né xí (ñà-cui stná-nè).

²⁴ Vâchi nsidaa ana cuní dacácu xi vida xi vichi, ñà-dândañúhú-nê mii-né nduá. Doco nú ni cuí-nè sâhí, dandu ñà-sàni càcu ndisa vida xi-ne cundua.

²⁵ Vâchi nú ni níhi iin nèhivì nsidaa ñà-íá ñuhiví, ni ñà-jaàn, mà cúnduá iin bien xi-ne nú màsà sâà anima-nè cundiatú stná, te càcua.

²⁶ Iin nèhivì, nú cucáhán nùù-né coo-ne ladu xi, o nú cucáhán nùù-né cunini-ne palabra xi, (ndahví-nè), vâchi icúmí stnâi nacuaí mii-né quivì naxicocuín yùhù ana nduú Tnaha Nèhivì Ñuhiví. Te ndiaha gá coo quivì mà sâhà yùhù, xì sâhà Yuamání, xì sâhà ángel ìi cacutnahá xí quixi.

²⁷ Doco ñà-ndáa nduá cachí xì-nsiá, dava mii-nsiá nècuàchì itá yohó, tàñáha ga cui-nsiá, te cuni-nsiá nansa íá ñuhiví ìi xí Dios —nì cachi-yà.

Nansa nì nadama Jesús mii-yá nì natnuù nihni ndiaha-yá

²⁸ Daaní, nì nsihi nì cachi-yà ducán, dandu nì yâha nahi ùnà gâ quivì, te nì saca-ya Pedro xì Juan, xì Jacobo, cuàhàn-yà xì-né iin yucù ndé cuàhàn-yà càhàn-yà xì Dios.

²⁹ (Dananí, na íá-yà yucán) xícàn tàhvi-yá nùù Dios, dandu ní xini nècuàchì mà tucu nì nàcùnahà-yà. Nì nducuxín yaa sicoto xi-ya, te tnúù nihni ndiaha-ñá.

³⁰⁻³¹ Dandu nì xini stná-nè, yucán nì canatùì stná ùì nècuàchì (sànaha) iin-ne nani Moisés, te inga-nè nani Elías. Te itá stná ndómà ndatnúhú-ndá xí-yâ. Te tnúù nihni stná-ndà, càhàn-ndà xì-yá sâhà nansa icúmí-yâ cui-yà ñuu Jerusalén.

³² Te Pedro xì compañeru-nè, sâdì gâ vàhnâ-nè. Doco na ní nsicuihnú viì ini-nè, dandu nì caxini-nè ndiaha gá tnúù nihni-ya, te mimí nì caxini-nè itá stná ùì ndósàhnù-mâ.

³³ Daaní, na meru cuàhàn cuxica-nda, dandu ní cachi Pedro xì-yá:

—¡Maestro, nansicáhán-ndá ndoo-nda yohó! Chicá vâha quidavâha-nsi ùnì siahva, ian coo mii-ní, inga stná coo Moisés yohó, te ingà coo stná Elías yohó.

Ducán nì cachi Pedro, vâchi cóni cúndáa ini-nè nansa cachí-nè.

³⁴ Daaní, sâ-càhàn-nè xì-yá ducán, dandu nì nuu iin vîcò, te nì dàhvi nsidaa-né mahiá. Te nì cayùhí cuaá-nè na ní xini-nè nì cuu ducán.

³⁵ Dandu nì tiacu-nè càhàn iin ana càhàn mahì vîcò mà, te dohó cachí-yà:

—Dèhemaní nduú ana yohó. Cunini-nsia ñà-nduá cachí-yà.

³⁶ Daaní, nì ndacoto nècuàchì dacuahá-yâmâ, te nì xini-nè ndé cuisì mindaa mii-yá íá yucán. Doco después còò ni-íñâha ni cachí-nè xì ni-iin nèhivì sâhà nsidaa ñà-nduá nì xini-nè yucán.

Nansa nì tavà Jesús iin ñà-malu inácáa nùù iin tèchii

³⁷ Daaní, inga quivì nì nuu-ya xì-né yucù mà vâxi-ya. Dandu nì ndacùhun stnahá-yá xì cuàhà nèhivì sâni nataca.

³⁸ Te iin nècuàchì mà nì càhàn-nè xì-yá, sacúndáhví fuerte-nè nùù-yá, cachí-nè:

—Maestro, sacúndáhvî nùù-ní, cundehè ndahví-nî tèchii xí, vâchi mindaa-té nduú dèhi.

³⁹ Cunaha-ní, iin ñà-malu dandoho-xi-té, dandáhià-te, te xíhi ìhí-te quidá, queé chihìñù yuhù-té: quini ga quidá xì-té, có-cùnià nacoà-te.

⁴⁰ Ñàyùcàndùá nì sacundahví nùù nècuàchì dacuaha-ní ñà-tavà-néà, doco mànicùí.

⁴¹ Dandu nì cachi Jesús xì-né:

—Ndahví-nsià, vâchi mà túha-nsia cunindisá-nsiá, ni có-sâà-nsià cundaà inì-nsia. ¿Nadaa ga quivì icúmî coo guè xì-nsiá, te quidandee gá stná inì sàhà-nsiá? Pues cundaca-ní dèhe-ní quixi —nì cachi-yà.

⁴² Daaní, sàvâxi-ne xì-té, te nì ducùn ñà-malu-te ñuhù ní sahnì ihá-te. Ñàyùcàndùá, nì sadi-yà nùá, te nì dándúvâha-yàte. Dandu nì quida-yàte entregar nùù yua-té.

⁴³ Te nsidaa nèhivì ndoó yucán, nì ndulocó cuàhà-né ñà-ndiaha guá nì quida Dios.

Daaní, na ndulócô guá-né sàhà nsidaa obra nì quida-ya, dandu nì cachi-yà xì nècuàchì dacuahá-yá:

⁴⁴ —Cunini vâha-nsia palabra cuàhìn cachì xì-nsiá. Yùhù ana nduú Tnaha Nèhivì Ñuhivì, icúmî yàhi coi ndahà nèhivì (malu), vâchi iá iin tiàa cuàhàn quida xí entregar —nì cachi-yà.

⁴⁵ Doco nècuàchìmà, cóni cúndáà ini-nè ñà-ndùá nì cachi-yà, vâchi nì là dèhé chuun ma nùù-né; ñàyùcàndùá, cóni sànhì ini-nè. Te yúhì stná-nè ndàcàtnùhù-né nùù-yá sàhámà.

Nansa nì cachi Jesús ana chicá ndiaá

⁴⁶ Daaní, nì quesaha-né nì cuàà-nè ndàcàtnùhù stnahá-né nùù-né ana chicá ndiaá.

⁴⁷ Dandu nì cundaà ini-yà nansa xínacani ini-nè, te ñàyùcàndùá nì nacuaca-ya iin tètii nì chicani-yàte iladú-yà,

⁴⁸ te nì cachi-yà xì nècuàchìmà:

—Nú sàhà yùhù quidáñúhú iin nèhivì tètii yohó, dandu dava-ni queá na ian yùhù quidáñúhú-nè. Te nú yùhù quidáñúhú-nè, dandu iin-ni queá ñà-quidáñúhú stná-nè ana nì techuun-xí vâxi. Vâchi nècuàchì chicá nihnú ndáhvì inì-xi, divi nduú ana chicá ndiaá ndisa.

Nècuàchì có-xiní ùhì xì-ndà, favor xi-nda iá-nè

⁴⁹ Dandu nì cachi Juan xì-yá:

—Maestro, nì xinì-nsi iin tiàa tavá xi ñà-malu nùù nèhivì, te quivì mii-ní ndàcùcahan-né. Doco có-ndùú-né iin ana cutnáhâ xì-ndá xicánúú. Ñàyùcàndùá, nì sadi-nsi nùù-né ñà-màsà quidá gá-nè ducán.

⁵⁰ Dandu nì cachi Jesús xì-né:

—Còò, màsà cádí-nsià nùù-né, vâchi nsidaa ana có-xiní ùhì xì-ndà, favor xi-nda iá-nè.

Nansa nì cachi Jesús na ní cuni Jacobo xì Juan càcàn-nè quixi castigu nùù ana cóni quidáñúhú xì-yâ

⁵¹ Daaní, na sá-ítúú tiempu nana-ya ansivi nùhù-yà, dandu nì quihin-ya ichì cuàhàn-yà ñuu Jerusalén, iin-ni nihnú ini-yà sàà-yà yucán.

⁵² Te nì techuún-yá itnii tiàa codònuù nùù-yá ñà-cachitnùhu-ne icúmí-yâ yàha-ya ichì yucán. Ñàyùcàndùá, nì casaà tiàa ma iin ñuu tii nècuàchì raza samaritanu, cuàhàn-nè nanducu-né ndé coo-ya nì cùí.

⁵³ Doco nècuàchì ñuu mà, ni loho cóni cándísâ-né coo chii-yá ñuu-nè, vâchi sàni xinitnùhu-ne ñà-ichì Jerusalén nduá cuàhàn-yà.

⁵⁴ Ñàyùcàndùá, ù nècuàchì dacuahá-yá nani Jacobo xi Juan, na ní tiacu-nè ñà-dúcán nì cachi nècuàchì ñuu mà, dandu nì cachi-nè xì-yá:

—Stoho-nsi Señor, ¿a có-cùní-nî dandacú-nsí còyo ñuhu ansivi, te coco nsihi nèhivì ñuu yohó, vâchi ducán nì quida stná Elías sàhaha?

⁵⁵ Doco nì dà-íhì Jesús nècuàchìmà, cachí-yà:

—Mii-nsiá, có-cùndàà inì-nsia nansa ndiá ìcà-nsiá cunihnu vaha inì-nsia.

⁵⁶ Vàchi yùhù ana nduú Tnaha Nèhivì Ñuhivì, ¿indù divi chuun nì quesai ñuhivì yohó? Pues divi sàhà ñà-dacácuì nèhivì, te màdiá dandáñúhì-nè —nì cachi-yà.

Dandu cuàhàn-yà xì-né inga ñuu chicá nùù-xì.

Ñà-nduá nì cachi Jesús xì nèhivì cuní cunchicùn xì-yá

⁵⁷ Daaní, na xicá-yá xì-né ichì, nì càhàn iin tiàa xì-yá, cachí-nè:

—Yùhù, dispuestu ié` cunchicuìn mii-ní ndéni nì cui nì cùhùn-ní, Señor mío.

⁵⁸ Dandu nì cachi Jesús xì-né:

—Lusu, iá nchihò-sí, te laa ndavá ansivi, iá stná tacà-si; doco yùhù ana nduú Tnaha Nèhivì Ñuhivì, còò ni-iin lugar ndé cunduhí cùdì.

⁵⁹ Daaní, nì cachi-yà xì inga nèhivì:

—Cunchicùn-ní yùhù.

Te nì cachi nècuàchì-mà:

—Señor mío, dihna nì núhì ñà-coo chii gué` vehi dècuèndè (ni cui) yué, te nì ndùxin-ne.

⁶⁰ Dandu nì cachi Jesús xì-né:

—Nècuàchì có-ìá vida anima-xi, divi nì cúxin xi nsì-xi. Doco mii-ní, cuahán-ní cachitnùhu-ní razón sàhà ñuhivì ìì xí Dios.

⁶¹ Dandu inga nèhivì, nì cachi-nè xì-yá:

—Yùhù, cunchicuìn mii-ní, Señor mío. Doco dihna nì núhì (coo chií) ndaquindèi xì nèhivì vehi.

⁶² Dandu nì cachi Jesús xì-né:

—Iin nèhivì sà-ìtní-xí yàtà, nú cuisì yàtà-né indéhe-né, dandu mà quée víamà. Te ducán iá stná xì iin nèhivì (mà iin-ni nihnú ini xì yùhù), mà cùì sàà-nè cunduu-ne nèhivì xì ñuhivì ìì xí Dios.

10

Nansa nì techuún Stoho-ndà Señor 70 nèhivì xì-yá ñà-cùhùn-nè càhàn-nè palabra xi-ya

¹ Daaní, na ní nsihi nì cuu ducán, dandu nì nacàxin Stoho-ndà Señor ùnì dico ùxin (70) tiàa, te nì techuún-yànè cùhùn-nè ùì ùì-nè codònuù-né nùù-yá nacàhin-ne nsidaa ñuu xì nsidaa xaan ndé icúmí-yà yàha stná-yà.

² Ñàyùcànduá, nì cachi-yà xì-né:

—Ñà-ndàà nduá, cuàhà nèhivì (tàñáha ga cunindisá). Te na iin cosecha cahnú ndanihi-nda nduú-né, doco sacu nèhivì nduú ana (chindée xí-ndá) ndanchitoa. Ñàyùcànduá, càcàn tàhvi-nsiá nùù Lamú dandacú sàhà chuun yohó ñà-nì téchúùn gá-yà nèhivì cùhùn quida xi chuun (ìì xì-yá), vachi na ian ndanchító iin cosecha ndiaha nduá.

³ Vàtùni cùhùn-nsià vichi. Yùhù techuún mii-nsiá cùhùn-nsià cacanu-nsia mahì nèhivì dáná, cunduu-nsia nahi lelù xicánúú mahì lobu.

⁴ Doco màsà cúnihí-nsiá ni-iin itni cuñuhu dihùn, ni stná morral xi-nsia, ni inga ndisàn-nsiá. Te ni-iin nèhivì màsà cásàhú xì-nsiá ichì.

⁵ Te nú sàni sàà-nsià iin vehe ndé cundoo-nsia, dandu cachi-nsià xì stoho vehe ma: “Ni cundóó mánì mii-nsiá nèhivì vehe yohó”.

⁶ Dandu nú ndisa ndoó nèhivì tùha cundoo ndiaha vehe ma, dandu vátùni. Doco nú coó, ni cúnàhá ñà-nduá nì cachi-nsià.

⁷ Cuisì iin-ni vehe cundoo-nsia, te cuxi-nsia te coho-nsia ñà-nduá sáha nècuàchì divéhé-xímá mii-nsiá. Vachi nsidaa ana quidáchúûn, xiñuhu cuàha xì-né iin algu. Màdi vehe yohó vehe yucán cundoo-nsia, còò; iin-ni ni cundóó-nsiá cuisì iin-ni vehe.

⁸ Te nú ni sàà-nsià iin ñuu, te candísà nèhivì cundoo-nsia yucán, dandu ñà-nduá sáha-nensià, divi ñà-jaàn nduá cuxi-nsia.

⁹ Te dandúvaha stná-nsià nècuàchì cuhí ndoó yucán, te dohó cachi-nsià xì nèhivì yucán: “Vichi sàni quesaa razón sàhà ñuhivì ìì xí Dios ndé ndoó-nsiá”, cachi-nsià.

¹⁰ Doco nú nì sàà-nsia iin ñuu, te có-xiníndísâ nêhivì yucán mii-nsiá, dandu màcuíta-nsia mahì ichì cahnú ñuu mà, te cachì-nsia xì-né:

¹¹ “Dècuèndè yàcá ñuu-nsiá nì tñì sàhà-nsí, icúmí-nsí catù váha-nsiñà còya, (vàchi ndahví gá modo xi-nsia). Doco cunaha váha-nsia, yohó ndé ndoó-nsiá sàni quesaa stná razón sàhà ñuhivì ìì xí Dios (mate cóni ndúlócô-nsiá)”. Ducán cachi-nsiá (xì nêhivì ñuu mà).

¹² Te yùhù cachì xì-nsiá na sàà quivì juiciu, dandu chicá cuàhà castigu icúmí nêhivì ñuu mà nihì-né nùù nêhivì (malu) ñuu Sodoma.

¹³ ¡Ndahví nêhivì ñuu Corazín! ¡Ndahví stná nècuàchì ñuu Betsaida! Vàchi cuàhà milagru fuerte nì xini-nè, (te cóni ndúlócô-nè). Doco cunaha-nsiá, nú ducani ni coó stná milagru mà ñuu Tiro, ò ñuu Sidón nì cùí, dandísá, yàchì naxicocuín ini nècuàchì ñuu mà sàhà cuàchi-ne, te nàcùndixi ndahví-nè nàcùndoo-ne mahì yàà tutnù, (te cunduamà seña ñà-ndisa cuhí ini-nè mii-né sàhà cuàchi-ne).

¹⁴ Te quivì cuu juiciu, chicá iyuhu castigu icúmí nihì nêhivì ñuu Tiro mà, xì nêhivì ñuu Sidón mà, te chicá fuerte coo castigu xi ñuu Corazín xì ñuu Betsaida mà.

¹⁵ Stná nècuàchì ñuu Capernaum, mate tuxí ini-nè nana ducún-nè ndè gloria, doco còò, ndè andea icúmí-nè nuu-ne.

¹⁶ Cunaha-nsiá, nú ni quihín casu nêhivì sàhà ñà-nduá cachì mii-nsiá, dandu iin-ni queamá na ian quihín casu stná-nè yùhù. Te nú ni cáhichì ini-nè mii-nsiá, icúmí quee stná mà na ian cahíchì stná ini-nè yùhù. Te nú yùhù ni cáhichì ini-nè, dandu iin-ni quee stná mà na ian sàni cahíchì stná ini-nè mii-yá ana díchúún-xí vaxi.

Ñà-nduá nì cachi Jesús xì 70 nêhivì nì dàcuítia xì palabra xi-ya

¹⁷ Daaní, nì naxicocuín ùni dico ùxin (70) nècuàchì dacuahá-yá, te cudì ini-nè, cachì-nè xì-yá:

—Cunaha-ní, Stoho-nsi Señor, dècuèndè stná ñà-malu nì cundee-nsí nùù-xí ñà-nì ndacùcahan-nsí quivì-ní.

¹⁸ Dandu nì cachi-yá xì-né:

—Nì xini stná ñà-malu cusáhnù, nì quea ndè gloria vaxan, nì nacava na ian nì tàsa.

¹⁹ Cunaha-nsiá, vichi sàni dáníhítáhvì stná mii-nsiá ñà-nú ni cuánihni-nsia còò ò sìduhma, dandu (còò ni-íñàha cuu xi-nsiá); te vátuni cundee stná-nsiá nùù nsidaa ñà-malu, mate yáha ga xini ùhìandó, te yáha ga nacúndéâ, doco còò ni-íñàha cuu xi-nsiá.

²⁰ Xiñuhu cudì ini-nsiá vichi, doco màdi sàhà-ñà vátuni nì cundee-nsiá nùù ñà-malu. Còò, cuisì xiñuhu cudì inì-nsia sàhà ñà-sàni sàcùitandiaa quivì-nsiá nùù (tutu iá) ansivi.

Ñà-nduá disáhà-xí nì cudì ini Jesús na ní nsiaa nècuàchì dacuahá-yá

²¹ Divi hora yucán nì cudì ini Jesús nì quida Espíritu ìì xí Dios, te nì cachi-yá (xì Yuamáni-yá):

—Ndeníhì vahi mii-ní, Yuamáni Dios; vàchi mii-ní nduu-ní Stoho ansivi xì ñuhivì. (Te palabra ìì xí-ní), sàni chitnùní inì-ní ndòò dèhá nùù nècuàchì nchichí; doco nùù nècuàchì nihnú ndahvi inì-xi nahi ñà-cuati, sàni dàtnùù-ní sàxinítñùnì-nè. Ducán iá, vàchi ñà-jaàn nduá nì chitnùní inì-ní quida-ní, te nì cudì inì-ní coo ducán —nì cachi-yá xì Yuamáni-yá.

²² Dandu nì cachi stná-yá:

—Nùù Yuamáni sàni nihítáhvì dandacuí nùù nsidanicuú iñàha; te còò ni-iin nêhivì ináhà ana nduú yùhù, cuisì mii-yá; te cuisì yùhù ináhà stná mii-yá, cuisì yùhù xì stná nêhivì cuní cundaà inì-xi sàhà-yá —nì cachi-yá.

²³ Dandu nì nacuíco-yá nùù nècuàchì dacuahá-yá, te nì cachi-yá xì-né:

—Nansicáhán mii-nsiá, vàchi ndiaha gá iá ñà-nduá sàni xininùù-nsiá.

²⁴ Cunaha-nsiá, cuàhà profeta sàhana, xì cuàhà stná rey, nisa cuni-nè cundehè-nè ñà-nduá sàni xini mii-nsiá, doco cóni níhítáhvì-nè cuni-nè. Te nisa cuni stná-nè cunini-ne ñà-nduá sàni inini mii-nsiá, doco cóni sàà-nè nihítáhvì-nè cunini-neà.

Nècuàchì samaritanu vàha inì-xi

²⁵ Daaní, nì ndacuiin iin nècuàchì ley xi veheñùhu, cuní-nè cundaà ini-nè nansa naxiconihí Jesús nùù-né. Te dohó nì cachi-nè xì-yá:

—Maestro, ¿ndiá nduá quide, te nihítáhví vida ndiaha nicanicuahàn?

²⁶ Dandu nì cachi-yà xì-né:

—¿Nansa cachí tutu nduú ley xi Dios? Sàni cahvi-nià. Pues ¿nansa cachá?

²⁷ Dandu nì cachi nècuàchìmà:

—Dohó cachá: “Ícúmí-ndá cuu ini-ndà sàhà Stoho-ndà Dios xì nsidanicuú anima-ndà, xì nsidanicuú ini-ndà, xì nsidanicuú valor xi-nda, xì nsidanicuú stná sàxìnítùnì-ndà. Te nacua cuú ini-ndà sàhà mii-nda, ducán icúmí stná-ndà cuu ini-ndà sàhà ñanìtnaha-nda”.

²⁸ Dandu nì cachi Jesús xì-né:

—Cachí vaha-ní. Ducán quida-ní, dandu nihì-ní vida ndiaha nicanicuahàn.

²⁹ Doco nècuàchìmà, có-cùnì-nè cachi nèhivì xì-né tonto iá-nè, ñàyùcànduá, nì cachi-nè xì-yá:

—Doco ¿índù clase nèhivì cachí xì-ndà nduú ñanìtnaha-nda?

³⁰ Dandu nì cachi-yà xì-né:

—(Cunini-ní historia.) Nìsa là iin tiàa ñuu Jerusalén, te nì quee-ne cuàhàn-nè inga ñuu nani Jericó. Doco (ichì mà) nì ndacùhun tnahá-né xì itnii tècuìhnà. Te nì sadì-te nùù-né, nì xidacuihna-té nsidaa sìcoto xi-ne, nì sahnì cuí-tené, grave nì dànácuèhè-tené, te cuàhàn-te.

³¹ Daaní, nì cuu nì yàha iin dùtù ichì mà. Te nì xini-nè indúhu nècuàchì nì nacuéhè mà, doco iladú nì yàha-ne.

³² Daaní, yucán nì yàha stná iin tiàa levita (quidáchúùn veheñùhu), te nì xini stná-nè nècuàchìmà. Te divini iladú nì yàha stná-nè.

³³ Daaní, ichì yucán nì yàha stná iin nècuàchì ñuu Samaria, te na ní sàà-nè ndé indúhu nècuàchìmà, nì xini-nè nècuàchìmà, te nì cuhi inì-ñané.

³⁴ Nì tnàtuu-ne nì quidatatna-né ndé nì nacuéhè xi nècuàchìmà, nì dàquée-ne aceite xì vinu, te nì chidúcùn-nèa. Dandu nì chindànùú-ñané quisì ndacá-né. te cuàhàn-nè xì nècuàchìmà dècuèndè iin vehe ndé quetátú nècuàchì xicá ichì caní. Yucán nì là-ne nì sandiaa-nè nècuàchìmà.

³⁵ Dandu inga quivì na ní quihin-ne ichì cuàhàn-nè, nì tavà-né ùi dihùn, nì sàha-ne nècuàchì divéhé-xímá, cachí-nè: “Cundiaa sacù-ní nècuàchì ndahví yohó, te nú chicá cuàhà cuàhàn-ní quida-ní gastu, dandu icúmí danáí na náyahí”, nì cachi-nè.

³⁶ Pues, vichi cachi-ní xí: nùù nsì-únì tiàa (nì yàha yucán), ¿índù nècuàchì meru nì sanduu ndisa ñanìtnaha nècuàchì nì ndacùhun tnahá xi tècuìhnà mà cahan-ní? —nì cachi Jesús.

³⁷ Dandu nì cachi nècuàchì ley xi veheñùhu ma:

—Pues, divi tiàa nì indehè ndahví xì nècuàchìmà.

Dandu nì cachi-yà xì-né:

—Pues, cuahán-ní, te divi ducán quida stná mii-ní.

Nansa nì cachi Jesús xì ùi cùhì nani Marta xì María

³⁸ Daaní, nì yàha-ya xì compañeru-yà ndè chicá nùù-xí ndé iá iin ñuu tii. Te yucán iá iin nècuàchì ñahà nani Marta, te divi-ne nì quida xi-yá invitar ñà-coo-ya vehe.

³⁹ Te yucán iá stná iin cùhì nècuàchìmà nani María. Te María mà, cudì ini-nè coo-ne ñuhù núú Jesús cunini-ne ñà-nduá cachí-yà.

⁴⁰ Doco Marta, cuàhà gá chuun yuhùnùhú icúmí-né, te ndé cutóntô-nè sàhà chuun ma. Ñàyùcànduá, vaxi-ne ndé iá-yà, cachí-nè xì-yá:

—Señor mío, ¿a có-dàndóhà mii-ní ñà-sàni nacoò cùhì yùhù quidachuún mindaí. Cachi-ní xì-né ñà-nì chíndéé stná-nè yùhù.

⁴¹ Doco nì cachi-yà xì-né:

—¿Ndahví-ní, Marta! Cuàhà gá nacání inì-ní. Cuàhà gá chuun sahní-ní mii-ní sàhà-xí.

⁴² Doco cuisì imindaa chuun nduú ñà-íá ndisa necesidad quida-nda. Te divi chuun vàha ma nduá cudû ini María quida-ne vichi, te yùhù, mà cuáhi cuxio chuun vàha ma nùù-né.

11

Nansa quida-nda nú cuní-ndà càcàn tàhvi-ndà nùù Yua-nda Dios

¹ Daaní, nì cuu iin xichi íá-yà iin xaan xícàn tàhvi-yá nùù Dios. Te nì nsihi nì càhàn-yà xì Dios ducán, dandu nì cachi iin nècuàchì dacuahá-yá:

—Señor mío, dacuaha-ní nsiùhù càcàn tàhvi stná-nsì nacua nìsa dacuahá Juan (Bautista) ana nchícùn xì mii-né.

² Dandu nì cachi-yà xì-né:

—Na xícàn tàhvi-nsiá nùù Dios, dohó cachì-nsia: Yua-nsí Dios íá ansivi, ni ndácùcahan tnùñuhu nèhivì quivì-ní; te yàchì nì sàà stná tiempu cusahnu-ní ñuhiví yohó, xícàn tàhvi-nsí. Te nacua quidá ana ndoó ansivi ñà-nduá dandacu-ní, divi ducán ni quidá stná nèhivì ñuhiví yohó.

³ Pan xi-nsi iin quivì, iin quivì taxi tahvi-níá nùù-nsí.

⁴ Te cuicahnú inì-ní sàhà cuàchi iníhíca-nsí, vàchi nsiùhù, xicáhnù stná ini-nsì sàhà nsidaa ana iníhíca nùù-nsí. Te chindee-ní nsiùhù ñà-màsà dáca nèhivì nsiùhù, te dacácu stná-ní nsiùhù nùù ñà-malu nicanicuahàn. (Amén.)

⁵ Te nì cachi stná-yà xì-né:

—Ni cachí-ndà nú íá iin amigo xi-nda, te dava ñùu sàà-ndà vehe-ne, te cachí-ndà xì-né: “Amigo, taxi ica-ní ùnì pan nùì,

⁶ vàchi sàni quesaa iin amigo xi vehi, ichì caní nì quixi-ne. Te còò ni-íñàha cuàhi-nè cuxi-ne”.

⁷ Dandu amigo xi-nda ini vehe ma, vihini tiacu-nè, te cachi-nè xì-ndà: “Còó, màsà dáñáná-ní yùhù, vàchi ndiadí vàha yehí, te itánduhù-nsí xì dèhe-nsi. Mà cùì ndácòì cuàhi mii-ní ñà-nduá xícàn-ní”, cachi-nè vihini.

⁸ Cunaha-nsiá, mate amigo xi-nda nduú-né, doco ni sàhà ñà-jaàn mà cándísâ-né ndacòò-ne cuàha-nèndó ñà-nduá xiñuhu-nda. Còó, doco sàhà-ñá nì cunaha iin-nda càhàn-ndà yehè-né, ñàyùcànduá icúmí-nê ndacòò-ne cuàha-nèndó íñàha.

⁹ Te yùhù cachí stnái xì-nsiá, càcàn tàhvi-nsiá, te nìhítàhvi-nsiá. Nanducu-nsiá (ñà-vàha nùù-yá), te tùia. Càhàn-nsiá (yehè-yá), te nuna.

¹⁰ Vàchi nsidaa ana xícàn tàhvi, icúmí-nê nìhítàhvi ndisa-neà; te nsidaa ana nandúcú xí ñà-vàha, icúmí tui ndisamà nùù-né; te nsidaa ana xícàn tàhvi nùù yehè-yá, icúmí-yâ nacuna-yañà nùù-né.

¹¹ Nú ni càcàn iin dèhe-nsia iin pan cuxi-tè, amádi pan cuàha-nsiàte, te màdì iin yùù. Te nú cuñu siaca xícàn-te, màdì iin còò cuàha-nsiàte.

¹² Te ò nú nsivì xícàn-te caxì-té, màdì iin sìduhma cuàha-nsiàte. Còò.

¹³ Mii-nsiá, mate nèhivì cuàchi nduú-nsiá, doco tùha-nsia cuàha-nsia dèhe-nsia ñà-íá viì. Ñàyùcànduá Yuamánì-ndà íá ansivi, chicá icúmí-yâ cuàhatahvi-yá mii-nsiá Espíritu Ìì xí-yá nú ni càcàn tàhvi-nsiá nùù-yá.

Nansa nì dàquéé cuàchi nèhivì dìquì Jesús, có-quidá víi-yá, cachí-nè

¹⁴ Daaní, iin xichi nì cuu nì tavà-yá iin ñà-malu ihìn (ní nsida ihin xi) iin nèhivì. Daaní, nì nsihi nì queamà, dandu vátùni nì nacahàn nècuàchìmà. Te nì ndulocó nèhivì cuàhà ndoó yucán.

¹⁵ Doco dava-ne, nì (xitnùhu-ne), cachí-nè:

—Ñà-malu cusáhnù nani Beelzebú, divi nduú ana chindéé, te ducán tavá Jesús ñà-malu —nì cachi-nè.

¹⁶ Te dava ga stná nèhivì yucán, nì xicàn-nè quida-ya iin milagru xi Dios cundehè-né, a ndísá cui quida-yañà, á cóó, cahan-né.

17 Doco mii-yá, ináhá-yá ñà-nduá nacání ini-nè. Ñàyùcànduá, nì cachi-yà xì-né:

—Nècuàchì xídandacú nùu iin ñuu, nú ni táhndè dava-ne, te náá stnahá-né, dandu còò gá modo cadandacú gá-nè nùu ñuu mà; te nèhivì ndoó iin vehe, nú xiní ùhì stnahá-né, dandu mà cúí cundoo tàcá gà-nè vehe ma.

18 Te ñà-malu Satanás, nú ni cuní ùhì-si tnahá-si, dandu mà cúí gá dandacú-si nùu quisì dava ga mà. Ducán cachí, vèchi cachí mii-nsiá sàhí ñà-chìndéé sù-Beelzebú yùhù, te ducán taví ñà-malu. Doco còò,

19 vèchi stná nèhivì xí mii-nsiá, tùha stná-nè tavà-né ñà-malu, te ¿ana dípòdêr-xi quidá-nèàmà? (Amádi poder xi Dios chindéé xí-nè), ñàyùcànduá, vátùnì cachí mii-né xì-nsiá ñà-cónì cachí vè-nsiá sàhà yùhù.

20 Doco Dios nduú ana chindéé xí taví-si, ñàyùcànduá náhà xicà ñà-vichi sàni sàà tiempu cunì-nsia nansa dandacú ndiaha Dios.

21 'Tìn tiàa ndacuì, nú nihí-te iin càa dana, te ndiaá-te vehe-tè, dandu còò ni-ñàha cuu xi ñà-ìcúmí-tè.

22 Doco nú ni quésáa iin ndósàhnú chicá fuerte, te cundee ndómà nùu-té, dandu dandiachi nsihì-nda arma nihí-te, divi arma tuxí-te cuàhàn chindee xi-té nì cúí. Daaní, icúmí ndósàhnùmà ñhì-ndà nsidaa ñà-ìcúmí-têmà, te quida-nda xán nacua cudì ini-ndà.

23 'Nsidaa ana có-íá favor xi, contra-xi nduú-né; te nsidaa ana có-chìndéé xí danátáqui (nèhivì xí), ducán queámà na ian tàxi-né nècuàchìmà.

Nansa cuu xi iin nèhivì nú sàni naxicocuìn iin ñà-malu nì quee nùu-né antes, doco cónì quíhvi ndisa-ne ichì Dios

24 'Nú sàni quee ñà-malu nùu ini iin nèhivì, dandu xicánúú-si, yáha-sì lugar ìchí, nandúcú-sí ndé coo dadí-si; te nú ni cundáa inì-si mà cùì, dandu cachí-si: “Còò, chicá vaha nùhì ini nèhivì ndé nisa ìe antes, vèchi vehi nduá”.

25 Ñàyùcànduá, mànuhù-sí anima nèhivì mà, te quidá-si cuenta na ian sàni ndundoa, te nì nducutá.

26 Ñàyùcànduá, cuàhàn-si nácuàca-si inga ùsà tnahá-si chicá tùha quini, te caquíhvi nsihì-sì ini anima nècuàchìmà ñà-cuñuhu-sì yucán. Sàhájàn chicá pesadu nàcòò tiàa ma nùu antes.

Nansa nihì-ndà cucumi-nda iin anima ndiaha

27 Na càhàn-yà ñà-jaàn xì nèhivì cuáhà mà, dandu nì cachi iin nècuàchì ñahà xì-yá:

—Nansicáhàn nècuàchì nì dàtúinuù xì-ní ñuhiví, te nì dàchìchì-né mii-ní.

28 Dandu nì cachi-yà xì-né:

—Jaan. Doco chicá vaha cachi-ndà nansicáhàn nèhivì iníní xí Palabra ìì xí Dios, te quidá ndisa-neà cumplir.

Nansa nì cachi Jesús na ní xicàn nèhivì quida-ya iin milagru cundehè-né

29 Daaní, chicá nì nachitu nèhivì cuáhà nùu-yá. Te nì càhàn-yà xì-né, cachí-yà:

—Nèhivì tiempu vichi, malu-nè. Xicàn-nè coo iin milagru cundehè-né, a ndísá icúmí poder cahan-né. Doco mà níhì-né cundehè-né inga milagru, cuisì ñà-nduá (nì xinì nèhivì sàhana) na ní cuu iin milagru xì Jonás, iin nècuàchì nisa càhàn cuenta xi Dios.

30 Vèchi milagru xì Jonás mà, ñà-yucán nì sanduu iin seña nùu nèhivì ñuu Nínive. Doco divi ducán icúmí cuu xi stná yùhù ana nduú Tnahá Nèhivì Ñuhiví, icúmí cuu stná iin milagru xì, te cunduu stná mà iin seña nùu nèhivì tiempu vichi.

31 Na quivì cuu juicio, te màcuìta nsidaa nèhivì tiempu vichi (nùu Dios), dandu yucán icúmí nàcuìin stná iin nècuàchì ñahà nì sanduu reina dandacú nùu ladu sur sàhana. Te daquéé cuàchi-ne dìqui nèhivì tiempu vichi, vèchi dècuèndè iin ñuu chicá xica nì quixi-ne ñà-cunini-ne càhàn nchichí guá rey Salomón. Doco cunaha-nsiá, vichi sàni quesaa inga ana chicá nchichí nùu Salomón mà, doco (có-ndùlócò nèhivì).

32 Te quivì coo juicio mà, yucán màcuìta stná nèhivì ñuu sàhana nani Nínive, te daquéé cuàchi stná-nè dìqui nèhivì tiempu vichi, vèchi nèhivì yucán, nì naxicocuìn ini-nè sàhà

cuàchi-ne na ní càhàn Jonás xì-né. Doco nèhivì tiempu vichi, còo, có-nàxícócuìn ini-nè mate sàni quesaa ana chicá ndiaha nùu Jonás mà.

Nansa ndiá icà-ndà cundiaa-ndà anima-ndà sàhà-ñá vātùnì datnúu Dios sàxìnítnùnì-ndà

³³ 'Iin lámpara, có-nàcuícun-ndañá sàhà-ñá cuiin dèhá; ni mà cuián tìxi iin icà; còo, icúmíá cuián ndé ducún, dandu cutnuà cutùì nùu nèhivì yáha ini vehe.

³⁴ Nduchìnúu-ndà nduú ñà-tùínúu iquícúñú-ndà. Ñàyùcànduá, nú iá vaha ma, dandu vātùnì cutùì nuu-ndà ñà-quida-nda nsidanicuú iñaha. Doco nú cuhí nduchìnúu-ndà, dandu nàcuítñùu nùu-ndà.

³⁵ Te ducán stná xì anima-ndà. Ñàyùcànduá, cuidadu cundoo-nsia, còtó cuiin tnuu ini anima-nsià ndé cuàhàn datnúu mii-yá nì cùí.

³⁶ Doco nú ndisa, inicutu sàxìnítnùnì-nsià datnúu-yà, dandu mà cóo ni-iin lugar ndé iin tnúu, vachi cunduamà na ian nchií ndiaha inicutu sàxìnítnùnì-nsià, te quee stná mà na ian tnúu fuerte iin lámpara nùu-ndà.

Nansa nì cachi Jesús ñà-có-quidá vii nècuàchì fariseu, te có-quidá vii stná nècuàchì ley xi veheñùhu

³⁷ Daaní, na ní nsihi nì càhàn-yà, dandu nì quida iin nècuàchì fariseu mii-yá invitar cùhùn-yà cuxi-ya xì-né. Ñàyùcànduá cuàhàn-yà, te nì yaha-ya ini vehe nècuàchìmà, te nì sàcòo-ya.

³⁸ Doco nècuàchìmà, nì ndulocó-nè ñà-cónì ndàhá-yá nacua nduú estilu xi-ne na cuàhàn-nè cuxi-ne.

³⁹ Dandu nì cachi Stoho-ndà Señor xì nècuàchìmà:

—(Ndahví estilu chívàha) mii-nsiá nècuàchì fariseu, vachi ducán queámà na ian nacaté-ndá iin pocillu, ò iin còhò, te cuisì yàtà-ñá ndoó, doco (inià, quini iá. Pues ducán iá stná) ini anima mii-nsiá, vachi sàni xida cuàchi-nsia ñà-xího guá-nsià cuàhà iñaha, te nihnú quini ini-nsià.

⁴⁰ ¡Ndahví-nsià! vachi mà túha-nsia cundaà inì-nsia. ¿A có-ínáhá-nsiá ñà-iin-ni mii-yá nì quida vaha xi stná anima-nsià, màdiá cuisì iquícúñú-nsià?

⁴¹ Doco nú nihnú vaha inì-nsia, te cutùha-nsia dacútàhvì stnahá-nsiá, dandu vātùnì cundaà inì-nsia iá vii nsidaa ñà-nduá (nì quidayucun Dios).

⁴² ¡Ndahví mii-nsiá nècuàchì fariseu! vachi mate túha ndisa-nsia cuàha-nsia diezmu, (iá gà ndé có-quidá vii-nsiá). Mate sàha-nsia diezmu xi yùcù cuatiluha caxì-ndà nahi ndua ndòò, ò yùcù cuati nani ruda, doco nú nduá (iin chuun cahnú), có-ndùlócò-nsià sàhámà, vachi có-nihnú ndàcuisì ini-nsià, ni mà túha stná-nsià cuu ini-nsià sàhà Dios. Pues divi ñà-jaàn ndisa ndiá icà-nsiá quida-nsia cumplir, te ni có-xiñùhù nacoò stná-nsià diezmu mà.

⁴³ ¡Ndahví mii-nsiá nècuàchì fariseu! vachi na sàhàn-nsià veheñùhu, cuisì lugar ndé cundoo vii-nsiá nandúcú-nsiá; te na sàhàn-nsià yàhvi, cuní stná-nsià casàhú tnùñuhu cuàhà nèhivì xì-nsiá.

⁴⁴ ¡Ndahví mii-nsiá nècuàchì ley xi veheñùhu, xì mii stná-nsiá nècuàchì fariseu! Datiaá uun-nsia vaha-nsia. Vachi na iin yavi xi nsì, ducán iá mii-nsiá, te ò na iin ñaña có-nàhà gà, te vihini cuànihni nèhivì nùá ñà-có-sàha-ne cuenta nduá yavi. Ducán iá stná mii-nsiá.

⁴⁵ Dandu iin maestro xi ley ì mà, nì cachi-nè xì-yá:

—Maestro, nú ducán cachí-nì sàhà nècuàchìmà, dandu queámà na ian dìquì stná nsiùhù càhàn-nì.

⁴⁶ Dandu nì cachi-yà xì nècuàchìmà:

—¡Ndahví stná mii-nsiá nècuàchì ley xi veheñùhu! vachi túha-nsia quidayucun-nsià cuàhà ley ñà-chivàha nèhivì, mate mà cùndéé ini-nè quida-neà. Doco mii-nsiá, có-dùcùn ni-iin dìndàhá-nsiá-ñà.

⁴⁷ ¡Ndahví-nsià! vachi túha-nsia quidavàha-nsia monumentu nùu ñaña xi nècuàchì nìsa càhàn cuenta xi Dios sàhana, doco divi xì-nsiá nduú ana nì sahnì xì nècuàchìmà.

48 Ñàyùcàndùá, ducán queá na ian cudî inì-nsia sàhà cuàchi nì quida xii-nsiámà, vâchi dihna mii-né nì sahnì xì nècuàchìmà, dandu vichi (daxínu mii-nsiá chuun xi-ne), quidávàha-nsia monumentu xi nsì ma.

49 Ñàyùcàndùá, dohó cachí Dios ñà-nchìchí guâ-yà: “Cuàhà profeta icúmî techuín, te càhàn-nè xì nèhivì ñà-ndùú razón xi. Te cuàhà stná nècuàchì apóstol icúmî techuín nùù-né. Doco nèhivì malu mà, cahni-né nèhivì xí, te nú coó, siquiera taxi-né nècuàchìmà”, cachí Dios.

50 Doco cunaha-nsiá, icúmî nèhivì tiempu vichi cunsida-ne cuàchi sàhà nsidaa profeta nì casahnì nèhivì dècuèndè tiempu nì cuàha ñuhiví.

51 Ñà-ndàá nduá cachí xì-nsiá, icúmî nèhivì tiempu vichi cunsida-ne cuàchi sàhà nsidaa profeta nì xihì mà dècuèndè tiempu nì xihì Abel xì dècuèndè tiempu nì xihì stná Zacarías, divi Zacarías nì sahnì-né mahì veheñùhu cahnú xì mesa ì ndé sahmí-né ñà-càmánì-ndà Dios.

52 Ñandahví mii-nsiá nècuàchì ley xi veheñùhu! vâchi ducán iá na ian dandacú-nsiá sàhà (vehe ndé dacuahá) nèhivì cundaà ini-nè (sàhà Dios), doco nì chidèhé-nsiá ndahàcáa nuna yehè vehe ma. Ni cónì quihví mii-nsiá ñà-cundaà ini-nsiá sàhà-yá, te nì sadi stná-nsiá nùù nèhivì cuní quihví dacuahá —nì cachi Jesús.

53 Daaní, nì nsihi nì cachi-yà nsidaájàn, dandu nì xidà ini nècuàchì ley xi veheñùhu ma, xì stná nècuàchì fariseu, te nì caquesaha-né nì càhàn ndee-né xì-yá, cuní-nè càhàn-yà, te cachi-yà sàhà cuàhà iñàha,

54 áma cáchí-yà iñàha ñà-cui daquéé cuàchi-ne dìquì-yá.

12

Icúmî cundaà inì-xi sàhà nsidaa nèhivì danani úún nduú nèhivì vâha

1 Vichi sàni nataca chitu cuàhà mil nèhivì, dècuèndè sánihni tnahá-né. Dandu nì càhàn Jesús xì nèhivì mà. Primeru nì càhàn-yà xì nècuàchì dacuahá-yá, cachí-yà:

—Cuidadu cundoo-nsia, còtó quida-nsia na quidá nècuàchì fariseu. Vâchi nacua (còò permisú cuichuún-nsiá) levadura (vicò xí-nsiá), divi ducán còò stná permisú quida-nsia na quidá nècuàchìmà, danani úún-né nduú-né nèhivì vâha.

2 Cunaha-nsiá còò ni-iñàha coo dèhé nicanicuahàn. Icúmîâ tùia, te cunitnùhu nèhivì sàhá.

3 Dècuèndè stná ñà-ndùá nì cachi nèhivì na ndoó dèhé-nè ndé iín tnúú, icúmî palabra mà natùù vate stná ndé nchíí orá. Te mate caya nì càhàn iin tiàa sàhà tùtnù compañeru-nè ndé ndoó-né vehe chicá ndiadí, doco icúmî palabra mà (cuètià), vâchi nana ducún nèhivì, te cachitnùhu ndee-né nsidaámà.

Chicá vâha yùhí-ndà mii-yá dandacú sàhà vida xi-nda inga ñuhiví

4 Amigos, cachí xì-nsiá: màsà yùhí-nsiá ana cui cahni xì cuisì iquicúñú-nsiá; còò, vâchi nú sàni xihì-nsiá, dandu còò cá ni-iñàha cui quida ga-nè.

5 Doco yùhù cachí xì-nsiá ana ndiá icà-nsiá yùhí-nsiá. Xiñuhu yùhí ndisa-nsia mii-yá ana icúmî derechu dandiachi xi anima-nsiá andea nú sàni xihì-nsiá. Mii-yá, ndisa xiñuhu yùhí-nsiá.

6 Sàhà cuisì ùi tuní dicó-né ùhùn chòlihì. Doco ni-iin quisì mà, có-nândòdó Dios-si.

7 Dècuèndè ináhà stná-yà nadaa ididínì itá dìnì iin iin nèhivì. Ñàyùcàndùá, màsà nácánì inì-nsia, vâchi chicá ndiaá-nsiá nùù iin chòlihì tìi, te ò nùù cuàhà stná-si.

8 Yùhù cachí xì-nsiá, nú cachí vate iin nèhivì ñà-ndùú-né nèhivì xí, dandu yùhù ana nduú Tnahà Nèhivì Ñuhiví, icúmî stnáì cachì nùù ángel xi Dios ñà-divi nèhivì xí nduú stná nècuàchìmà.

9 Doco nú ni chidèhé-nè ñà-ndùú-né nèhivì xí, dandu yùhù stná, icúmî nacuaà stnáì mii-né nùù ángel xi Dios.

10 'Mate ni cáhàn ùhí iin nèhivì dìquì yùhù ana nduú Tnaha Nèhivì Ñuhiví, doco vátùni nihì-né cuicahnú ini Dios sàhà-né. Doco nú dìquì Espíritu Ìi sàni cáhàn ùhí-nè, dandu mà nunca sàà-yà cuicahnú ini-yà sàhà nècuàchìmà.

11 'Daaní, nú ni dátñâtuu nèhivì mii-nsiá nùu nècuàchì dandacú nùu veheñùhu, ò nùu juez, te ò nùu tè-nihí chuun, màsà nácání ini-nsià nansa naxiconihí-nsiá nùu-té,

12 vâchi momentu yucán icúmí Espíritu Ìi xí Dios chindee-yá mii-nsiá ñà-cundaà ini-nsià índù-ñá chicá ndiaha cachi-nsià —nì cachi Jesús.

Cuàhà peligru ndacá ñà-cunduu-nda nècuàchì cuicà

13 Daaní, iin tiàa iín mahì nèhivì cuàhà yucán, nì cachi-nè xì Jesús:

—Maestro, cáhàn-ní xì ñani ñà-nì cándísâ-né dacuachí-né interés nì ndutahví-nsí (nùu yua-nsí).

14 Dandu nì cachi-yà xì nècuàchìmà:

—Senór, còò chuun ni níhí cundui juez nsidandà sàhà chuun xi mii-nsiá, ni có-nduú stnái iin ana dacuachi-xi biene xi-nsiá.

15 Te nì cachi stná-yà xì nèhivì cuàhà mà:

—Cuidadu cundoo-nsia, màdí xihò-nsiá cuàhà iñàha, vâchi mate ni coó cuàhà gá biene xi-nda, có-cùnì cachàmà ñà-sàni nihì ndisa-nda vida ndiaha. Còò.

16 Dandu nì nacani-ya xì-né iin ejemplu, cachí-yà:

—Ñisa ìa iin tècuicà; te iin cosecha cahnú nì cuàha itù-te.

17 Ñàyùcàndùá, nì nacani inì-te, cachí-te: “¿Nansa quide? Vâchi có-cuàhà gá ndé covàha cosecha xi”.

18 Dandu nì cachí-te: “Chicá vâha dohó quide; cuàhìn duquín vehe cuachi yohó, te quidavàha saí vehe chicá nahnú sàhà-ñá vátùni sàà nàcòvâha cosecha xi, xì nsidaa gá stná ñà-cuiqué.

19 Dandu cachí inì-ni mií: Vichi sà-íá cuàhà iñàha íá vâha. Vátùni sàà ñà-jaàn cutiacuì cuàhà cuicà; vátùni quetatuì vichi, vâchi íá ñà-cuxi, te cohi. Contentu cuàhìn coi”, nì cachí-te.

20 Doco nì cáhàn Dios xì-té, cachí-yà: “¡Loco íó! vâchi ñuú vichi icúmí naquihin animo, dandu nsidaa biene sàni chivàhu, ¿ana ndòò xán?”, nì cachi-yà.

21 Te ducán icúmí coo xì nèhivì dacáyà xì cuàhà ñà-cuicà sàhà mii-xí, te nú còò ni-iñàha nduú ñà-cuicà ndisa-ne nùu Dios —nì cachi Jesús.

Nansa ndiaá Dios nècuàchì xínduu dèhe-ya

22 Daaní, después nì cachi stná-yà xì nècuàchì dacuahá-yá:

—Yùhù, cachí xì-nsiá, màsà nácání ini-nsiá sàhà vida xi-nsia nansa nihì-nsiá ñà-cutiacu-nsiá, ni sàhà cuerpu xi-nsia, nansa tui ñà-cundixi-nsia. Còò,

23 vâchi màdí cuisì ñà-cuxi-nda nduá xiñuhu sàhà-ñá cucumi ndisa-nda vida ndiaha; te cuerpu xi-nda ¿amádi chicá ndiaámà nùu sìcoto ndìxì-ndà?

24 Cundehè-nsiá càlù, có-xitú-sì, có-ndàníhí-sì cosecha xi-sì, ni còò vehe icúmí-sì, ni còò stná ni-iin lugar ndé chívàha-sì iñàha; doco Dios, dacútiácú-yàsi. Te mii-nsiá, ¿amádi chicá ndiaá-nsiá nùu laa mà?

25 Cunaha-nsiá, mate yáha ga sahní-nsiá dìnì-nsiá, te nacání inì-nsia, uun-ni nduámà, mà níhì-nsiá cuahnu ga-nsiá ni-iin dava metro.

26 Ñàyùcàndùá, nú mà cùì quida-nsia chuun tii jaàn, dandu chicá vâha màsà cáhni gá-nsiá dìnì-nsiá sàhà chuun dava ga.

27 'Cundehè-nsiá nansa sahnú ita nani lirio; có-quidáchúûn-yá, ni có-quidávàha stná-yà sìcoto, doco chicá ndiaha ita mà nùu rey Salomón (nìsa ìa sànahà), mate yáha ga vico nì sandixi-ne.

28 Iin ita, yùcù-ni nduá, (có-ndiaá ndisa); quivì vitni íá` campu, te tnaa sàni ìchà, vihini quèa xitnù coca. Mate ducán nduá, doco ndiaha gá nì quidavàha Dios ita mà. Ñàyùcàndùá,

vihi gá icúmí-yâ cuàhatahvì stná-yà ndohó iin ñà-cundixi-nda. Doco mii-nsiá, iyuhu gá xiníndísâ-nsiá Dios.

²⁹ Màsà cacánúú-nsiá cahni-nsiá dìni-nsiá nansa tùi ñà-cuxi-nsia, coho-nsia.

³⁰ Vàchi nsidaa nèhivì ndoo ñuhiví, divi ñà-jaàn nduá nandúcú-nè. Doco ndohó, iá Yuamàni-nda Dios, te ináhá-yâ xiñuhu nsidaamá nù-nda.

³¹ Ñâyùcànduá, dihna xiñuhu nanducu-nsiá nansa chivàha vii-nsiá ley xi ñuhiví ì xí-yá, dandísá nihì stná-nsiá nsidaa ñà-nduá cumàni gá nù-nsiá.

Ndè Gloria xiñuhu dacáyà-nda ñà-cuicà-nda

³² Mii-nsiá, nahi rii-xí nduú-nsiá, te cachí xì-nsiá, màsà yúhî-nsiá, mate mà túu-nsiá, vâchi sàni chitnùni ini Yuandiaha-nsiá ñà-cundiatú anima-nsiá ndè ñuhiví ì xí-yá.

³³ Dicò-nsiá biene xi-nsia, te dacútâhvì-nsiá nècuàchì ndahví. Dandu queámà na ian sàni chivàha-nsia ñà-cuicà-nsiá ndè gloria. Te queé stná na ian iá vâha mà ini iin itni mà sâà tèhì, vâchi ndè gloria yucán, mà sâà ndañuhá, vâchi mà quíhín tècuìhnà-ñá, ni mà cúsíquídí stná.

³⁴ Vâchi ndé quida-nda cuenta iá vâha ñà-cuicà-nda, divi lugar yucán cuàhàn-nda cunihnu cuàhà ini anima-nda —ni cachi Jesús.

Ndiá icà-nda cundoo tùha-nda, vâchi sà-ítúú-yá naxicocuíñ-yà

³⁵⁻³⁶ Dandu nì cachi-yà:

—Cundoo tùha-nsia na ian quidá peón xíndiatu na nsiáá lamú xi-tè na cuàhàn nècuàchì mà vicò nandàhà; nacuícun-té lámpara, te yâha ga ndiatú-te. Daaní, nú sàni nsiaa nècuàchì mà, te nì càhàn-nè yehè, dandu vichi vichi cuàhàn-te nacuna-tè nù-né.

³⁷ Nansicáhàn-tê nú ndiatú tùha-tè na nsiaa-nè, vâchi seguru icúmí-nè quidayucun-nè, te dayâha-ne peón mà ndé cundoo-tè cuxi-tè.

³⁸ Te nú ndè dava ñùu, ò ndé` sinduhá ni nsiaá lamú mà, te xíndiatu ì peón mà, pues nansicáhàn-tê nì sandiatu-tè.

³⁹ (Inga ejemplu), nú ináhá-nda ndévì hora quixi tècuìhnà quìhvi-tè vehe-nda, dandu cundiatu tùha-nda, mà cuâha-nda quìhvi-tè.

⁴⁰ Divi ducán stná mii-nsiá, cundoo tùha stná-nsiá, vâchi iin quivì có-nìhnú ini-nsia naxicocuíñ yùhù ana nduú Tnaha Nèhivì Ñuhiví —ni cachi-yà.

Ejemplu sàhà peón xíndiaa xì vehe lamú cuàhàn xicà

⁴¹ Dandu nì cachi Pedro xí-yá:

—Señor mío, ¿a ní nacani-ní ejemplu jaàn ñà-cutùha miini nsiùhù, te ò cuní stná-ní quihìn casu nsidaa nèhivì dava ga?

⁴² Dandu nì cachi Stoho-nda Señor xì-né:

—¿Ana tuxí ini-nsiá nduú nahi peón nùu ejemplu yohó? Nì ìa iin peón; tùha-tè quida vii-té, quidá sahnú-te. Te nì nihì-té chuun nùu lamú xi-tè ñà-dandacú-te nùu peón dava ga, te dasàn stná-te ñà-cutiacu nsidaa nècuàchì mà quivì cuiñuhá. Daaní, cuàhàn lamú mà.

⁴³ Pues nansicáhàn peón nì ndòo dandacu-ma nú iin-ni quidá víi-té dècuèndè nsiaa tu lamú xi-tè.

⁴⁴ Cunaha-nsiá, icúmí nècuàchì mà cuàha-ne peón mà chuun ñà-dandacú-te sàhà nsidanicuú ñà-cuicà-né.

⁴⁵ Doco nú nacani chicuèhè ini peón mà, te cachí-te: “Cucuee va lamú xi, dandu nsiaa-nè”, te quesáhà-tê cahni cuií-te peón dava ga mà, tiàa-ne te ñahà-né, te cuisì-ní ñà-cuxi-tè, te coho-tè cucahan-té, te cutnâhâ stná-te xi tè-xini xihí-te.

⁴⁶ Pues nú quidá-te ducán, dandu icúmí lamú xi-tè nsiaa-nè iin quivì có-nìhnú ini-te, cundua iin tiempu có-ináhà-tè, dandísá nihì-té iin castigu cahnú sàstnùhù, iin-ni ndoho-tè ñà-nduá icúmí ndoho nsidaa gá ana có-xiníndísâ xí-yâ.

⁴⁷ Iin peón, nú ináhà vâha-tè ñà-nduá cuní lamú xi-tè quida-tè, te có-quidá-teá, có-iníni-te ñà-nduá cachí-nè, dandu cuàhà gá icúmí-tè ñàhni-té.

⁴⁸ Doco nú có-cundáa vaha ini peón mà, te quidá-te iin falta, dandu chicá iyuhu ñàhni-te. Vàchi ducán queá na ian nacóo-ndá cuàhà ñà-icúmí-ndá nùu ndahà inga nèhivì (ñà-cundiaa-nèà). Pues nú ducán, dandu cuàhà stná iñaha icúmí-ndá naquihin-nda nùu nècuàchìmà. Vàchi nú ni ndóo cuàhà iñaha ndahà iin nèhivì, dandu divi-ni ducán cuàhà iñaha icúmí stná-ndà nandacàn-ndà nùu-né.

Mà ndóo ini dava nèhivì sàhà ichì Jesús; mà úhì tàhndè dava-ne sàhà

⁴⁹ 'Cunaha-nsiá, yùhù vaxi cundui nahi ñuhu quiñuhu ñuhivì, (vachi sàhà yùhù icúmí nèhivì tàhndè dava-ne). Te ja sácú vaha ñà-sàni quiñuhu ñuhu mà ni cundúá!

⁵⁰ Vachi iá iin tnundoho icúmí yahi, te cuàhà gá nacání inì ndè cachi sàà hora yàhamà.

⁵¹ ¿A tuxí ini-nsia vaxi ñuhivì yohó ñà-cucumi nèhivì paz? Còó, vachi sàhà yùhù icúmí tàhndè dava nsidaa-né.

⁵² Ndè vichì xi ndé` quivì nùu-xì icúmí tàhndè dava-ne. Por ejemplu, nú iá iin vehe, te ndoó ùhùn nèhivì, ùnì-nè cuni ùhì xì nècuàchì ùi mà. Te nú coó, ùi-nè cuni ùhì xì nècuàchì ùnì mà.

⁵³ Te ò iin tiàa, cuàhàn-nè cuni ùhì-nè dèhe-ne, te nú coó, dèhe-ne cuàhàn cuni ùhì xì mii-né; te ò iin nècuàchì ñahà, cuni ùhì-nè dèheyoco-né; ò nú coó, dèheyoco-nemà cuni ùhì xì mii-né; te ò dìdo iin nècuàchì ñahà cuni ùhì xì sànu-ne; ò nú coó, sànu-nemà cuni ùhì xì mii-né.

Ndiá icà-ndà nacuni-ndà índuvì tiempu nuná ñuhivì, te sáhatahvì Dios gracia xi-ya, vachi icúmí tiempu mà nsiha

⁵⁴ Dandu nì cachi-yà xì nèhivì cuàhà ndoó yucán:

—Mii-nsiá (nècuàchì ñuu yohó), nú nì xinì-nsia itá vico ladu quécahnu orá, dandu cachí-nsiá: “Vaxi dàvì”, te ducán iá.

⁵⁵ Te nú caná tàchì ladu sur, dandu cachí-nsiá: “Cuàhàn coo ihni”, te divi ducán coo.

⁵⁶ ¡Ndahví-nsiá! Danani uun-nsia nchichì ndisa-nsia, vachi mate túha-nsia nacuni-nsiá seña iá ñuhivì xì ansivi, doco ¿índù chuun mà cùì nacuni stná-nsiá índù tiempu nduá vichì?

⁵⁷ Có-chìndéé sàxínitnùnì-nsiá mii-nsiá sàhà-ñá cui mànihì inì-nsia índù chuun nduá chuun vaha.

⁵⁸ 'Nú sàni sanicuàchi iin tiàa sàhà iin-nsia, te ndacá-tensiá cuàhàn nùu tè-nihì chuun, dandu chicá vaha nanducu-nsiá ñà-nacahan stnahá-nsiá Dios sàhà-nsiá na meru xicá-nsiá ichì cuàhàn-nsiá, te màdiá cundaca-tènsiá sàà nùu juez, vachi juez mà, dayáha-tènsiá ndahà comandante xi-tè, te chicadi temà-nsiá vehecàa.

⁵⁹ Te ñà-ndàà nduá cachí xì-nsiá, nú ni cuu-xi-nsiá ducán, dandu mà quéé gá-nsiá dècuèndè nú sàni dànáà nsìhì-nsiá nsidanicuú ñà-nduá nihíca-nsiá —nì cachi Jesús.

13

Chuun cahnú nduú ñà-cuu-nda arrepentir sàhà cuàchi-nda

¹ Daaní, tiempu yucán nì cachitnùhu nèhivì xì-yá nansa nì cuu xi nècuàchì ladu Galilea, nì dandàcú Pilatu, te nì sahnì soldadu-nè na meru sáhatahvì-né quisì nduú promesa xi-ne nùu Dios; meru xihì quisì mà, te nì sahnì-ténê.

² Dandu nì naxiconihì-yá nùu nècuàchì nì nacani ma, te dohó nì cachi-yà:

—Nècuàchì Galilea mà, ¿a tuxí ini-nsiá ñà-chicá nì sanduu-ne nèhivì cuàchi nùu nsidaa nècuàchì ñuu-nè, te sàhàmà nì xihì-nè ducán?

³ Còó, cachí, vachi divi ducání ndañuhu stná mii-nsiá nú màsà cúu-nsiá arrepentir sàhà cuàchi-nsiá.

⁴ Te ináhà stná-nsiá nansa nì cuu yatni Siloé yucán na ní ndua iin torre, te nì chàhmà sàhùn ùnì nèhivì. Pues ¿a tuxí ini-nsiá chicá nìsa là cuàchi nècuàchìmà nùu nsidaa gá nèhivì ñuu-nè Jerusalén?

⁵ Còó, cachí; vachi dècuèndè mii stná-nsiá, divi ducání icúmí stná-nsiá ndañuhu-nsiá nú màsà nàxícócuìn inì-nsia sàhà cuàchi-nsia.

Ejemplu sàhà yutnù cóni cuáha quisì vídi-xi

⁶ Dandu nì nacani-ya ejemplu yohó:

—Nisa ìa iin tiàa icúmí xí iin ñuhù íá ñà-tàtá, te yucán iín stná iin nù-higu. Te nì sàà tiàa ma iin xichi yucán, cuàhàn-nè cuida-ne fruta-nu ni cuí, doco còò ni-iin sìhigu-nu ni ndácùhun-ne.

⁷ Ñàyùcàndüá, nì cachi-nè xì tëndiáá xì yutnù tatá mà: “Cunaha-ní, sàcuàhàn ùni cuìa quixí indéhi, áma níhì sìhigu yutnù yohó cahín, doco còò-sí. Ni táhndè-nu chicá vaha; có-cùnî cuiin uun gà-nu yohó”.

⁸ Doco peón mà, nì cachi-te: “Senór, nacoò gà-nínu dècuèndè inga cuìa, vachi cuní dadayî ñuhù sàhà-nú, te daquéi majada,

⁹ áma cuáha-nüsü; te nú coó, dandísá, tàhndè-nu”, nì cachi peón mà.

Nansa nì quida Jesús iin quivì descansu, nì dàndúvaha-ya iin nècuàchì ñahà xicá todo

¹⁰ Daaní, iin quivì sábadò íá-yà iin veheñùhu dacuahá-yá nèhivì.

¹¹ Te yucán nì quihvi stná iin nècuàchì ñahà, sàhùn ùni cuìa dandohó iin ñà-malu-nè, nì cuità yaa-ne quidá-sí, ñàyùcàndüá xicá todo-ne, mà cùì nácuìin ndàà-nè.

¹² Doco na ní xini Jesús-nè, nì cana-yanè ñà-tnàtuu-ne. Dandu ní cachi-yà xì-né:

—Mii-ní nècuàchì ñahà jaàn, sàni quee cuèhè malu quidá quini xi-ní.

¹³ Dandu nì chitàndòò-yá ndahà-yá dìni-né. Te vichì vichi nì ndundaà cuerpu xi-ne, te nì nihì-né nì nàcuìin ndàà-nè. Ñàyùcàndüá, cuàhà gá nì naquimanì-né Dios.

¹⁴ Doco nècuàchì dandacú nùù veheñùhu yucán, nì cuduchi ini-nè, vachi quivì descansu nduá na ní dàndúvaha-ya nècuàchì mà. Ñàyùcàndüá, nì cachi nècuàchì dandacu-ma xi nsidaa nèhivì yucán:

—Íñù quivì ùnù íá quidachuun-nda; ñàyùcàndüá, quivì jaàn quixi-nsia nduvàha-nsia, màdià quivì descansu.

¹⁵ Dandu nì naxiconihí Stoho-ndà Señor nùù nècuàchì mà, cachí-yà:

—¡Ndahví-ní! ¡Cachí uun-ní vaha-ní! vachi nsidaa-nsiá, cada quivì descansu ndàxìn-nsiá buey xi-nsia, ò burru xi-nsia, te sàhàn-nsia xì-sí ñà-coho-sì tècuí.

¹⁶ Te nècuàchì ñahà yohó, descendencia xi xì-ndà Abraham nduú stná-nè, ñàyùcàndüá, amádi ndiá ìcà stná-nè dàña stná-nè nùù cuèhè itnìí xí-né, mate quivì descansu nduá, vachi sàcuàhàn-ndà sàhùn ùni cuìa nuhní iquicúñú-nè quidá ñà-malu —nì cachi-yà.

¹⁷ Daaní, nsidaa nècuàchì xiní ùhì xì-yá, nì nducahan-ne; doco nèhivì cuàhà mà, nì cudii ini-nè sàhà nsidaa obra ndiaha quidá-yá.

Iin ejemplu nì nacani Jesús ñà-cundaà ini-ndà nansa coo tiempu na xitià palabra xi-ya

¹⁸ Daaní, nì cachi gà-yà xì-né:

—¿Índù ñàhà cui cachi sàhà-ñà cundaà vii inì-nsia nansa íá ñuhivì ìì xí Dios? ¿Índù ejemplu cui nacani xì-nsiá, te sàà-nsiá cundaà ini-nsiá nansa íá tiempu mà?

¹⁹ Pues cunaha-nsiá, nahi tata yutnù mostaza, ducán íá tiempu mà, na ian nì cuu na ní chihi iin tiàa tata mà itu-nè, te nì sahnua; iin yutnù cahnú nì nanduu-nù. Dècuèndè laa ndavá ansivì, vaxi stná-si quidávaha-sì tacà-si mahì-nú.

Ejemplu sàhà tàtnà nsidátáchí xí yusàn pan, divi nduú levadura

²⁰ Daaní, tucutu nì cachi-yà:

—¿Índù ejemplu cui nacani xì-nsiá sàhà ñuhivì ìì xí Dios?

²¹ Na iin tàtnà nsidátáchí xí yusàn pan, ducán nduá, vachi divia nì quihin iin nècuàchì ñahà nì dàquée-ne mahì ùni maquila yusàn harina, te nì ndutachi nsihá —nì cachi Jesús.

Yehè Sìtníhì

²² Daaní, na xicá-yá ichì Jerusalén, nì nacàhin-ya ñuu nahnú te ñuu cuati, dacuahá-yá nèhivì ndoó yucán.

²³ Te nì cachi iin nèhivì mà xì-yá:

—Señor mío, ¿a iyuhu nèhivì cunduu nècuàchì càcu anima-xi?

Dandu nì cachi-yà xì nsidaa nèhivì mà:

²⁴ —Quida-nsia lucha fuerte quìhvi-nsia yehè sìtníhì gloria, vèchi ñà-yòhó cachí xì-nsiá: nùu nsidaa nèhivì cucuni quìhvi yucán, cuàhà-né, mà níhì-né yàha-ne.

²⁵ Vèchi quida-nda cuenta na ian iá iin vehe, te cuní-nsiá quìhvi-nsia, doco sàni nacadi nècuàchì divéhé-xímá yehè-né. Ñàyùcàndùá sàa-nsiá, te cáhàn-nsiá yehè, cachí-nsiá: “Stoho-nsi Señor, nacuna sacù-ní nùu-nsí”. Dandu nècuàchìmà, icúmí-nê cachi-nè: “Còó, tàcùní mii-nsiá, (ni có-ìnáhì) índù nì quixi-nsia”.

²⁶ Dandu mii-nsiá, cuàhàn-nsiá cachi-nsiá: “Nsiùhù, nìsa cutnahá-nsí xì-ní nì sandoo-nda nìsa xixi-nda nìsa xixi-nda (tècuí); te mii-ní, nìsa dacuaha-ní nèhivì ñuu-nsi, calle ñuu-nsi”.

²⁷ Dandu nècuàchì sahnú yucán, icúmí-nê cachi-nè: “Yùhù cachí xì-nsiá, tàcùní mii-nsiá, ni có-ìnáhì índù nì quixi-nsia. Ñàyùcàndùá, cuahán-nsiá iladu, vèchi nècuàchì chicuéhè xínduu-nsia”, cachi nècuàchì sahnú-ma.

²⁸ Pues (ducán stná mii-nsiá), icúmí-nsiá cuní-nsiá na yáha xì-ndà Abraham ndè ñuhivì ì xì Dios, mii-né xì stná Isaac, xì Jacobo, xì nsidaa stná nècuàchì profeta nìsa cahàn cuenta xi-ya sàna. Nsidaa-né icúmí-nê màcùndoo-ne nùu Dios ñuhivì ì xì-yá. Doco mii-nsiá, còó; fuera icúmí-nsiá ndòo-nsia. Dandu yáha ga cuàhàn-nsia cuacu-nsia, ndé càna nùhu-nsia (ñà-ndòhó guâ-nsiá).

²⁹ Vèchi nsidanicuú ladu icúmí quee nèhivì sàa-nè ñuhivì ì xì-yá, cunduu-ne nèhivì vèxi ladu caná hora, xì nèhivì ladu quécahnu stná, xì nèhivì ladu norte, xì nèhivì ladu sur, nsidaa-né icúmí-nê casaà-nè màcùndoo-ne (ndé iá vicò) ñuhivì ì xì-yá.

³⁰ Vèchi nèhivì nchícùn cahà-xí vichi, icúmí-nê sàa-nè nàcòdò nùu-né nùu-xí (quìvì yucán), te nècuàchì idónuu vichi, icúmí-nê sàa-nè natenchicùn-nè ndé cahà-xí.

Nansa nì sacu Jesús sàhà nèhivì ñuu Jerusalén

³¹ Divì quìvì yucán nì casaà dava nècuàchì fariseu nùu-yá, te nì cachi-nè xì-yá:

—Cuahán-ní quecuaán-ní yohó, vèchi cuní Herodes cahni-té mii-ní.

³² Dandu nì cachi-yà xì nècuàchìmà:

—Cuahán-nsiá, te dohó cachi-nsiá xì tè-icúmí guá maña mà: “Cunaha-ní, vichi xi tnaa cuàhìn taví ñà-malu ñuhú anima nèhivì, te dandúvaha stnáì nècuàchì cuhí, dandu quìvì ùnì cuàhìn dansihí chuun xi”.

³³ Doco sà-íá ñà-caquí vichi, te tnaa, te idá, vèchi ndè ñuu Jerusalén nduú lugar ndé tùha ndisa nèhivì cahni-né iin ana cáhàn cuenta xi Dios.

³⁴ ¡Ndahví mii-nsiá nècuàchì ñuu Jerusalén! vèchi tùha-nsia cahni-nsiá nècuàchì cáhàn palabra xi Dios, vèchi na techúùn-yánè sàa-nè nùu-nsiá dandu caníyúú-nsiânè ñà-cui-nè. Na cuahà guá xichi nì cunì danátáquí mii-nsiá nùu na ian danátáca sùn pilu xi-sì ñà-nàcùñuhu quisì mà tìxi ndìxì-sí; doco còó, cóni cuní-nsiá.

³⁵ Ñàyùcàndùá icúmí lugar xi-nsia yohó ndòo nihnia. Te cachí stnáì xì-nsiá, mà cuní gà-nsiá yùhù ndé cachi sàa quìvì cachi-nsiá xì: “Ndiaha gá mii-ní, vèchi divì ana vèxi cuenta xi Stoho-ndà Señor nduu-ní”.

14

Nansa nì dandúvaha Jesús iin nècuàchì ndohó cuèhè cuiun

¹⁻² Daaní, iin quìvì descansu cuàhàn-yà vehe iin nècuàchì idónuu nùu nècuàchì fariseu, cuàhàn-yà cuxi-ya yucán. Te vehe nècuàchìmà iá stná iin nècuàchì cuhí cuèhè cuiun, te iín-né nùu-yá. Ñàyùcàndùá, dava ga nècuàchì fariseu ndoó yucán, indéhe váha-neyà, nansa quida-ya.

³ Ñàyùcàndùá, nì cachi-yà xì nècuàchì fariseu mà xì stná nècuàchì ley xi veheñùhu ndoó yucán:

—¿A sáha ley ì xì-ndà dandúvaha-nda nèhivì nú quivì descansu nduá? (Cachi-nsià xí.)

⁴ Doco nècuàchìmà, dadí úún nì ndòo-ne. Ñàyùcàndùá, nì tnii-ya ndahà nècuàchì cuhí mà, te nì dandúvaha-yanè. Dandu nì cachi-yà xì-né:

—Vàtùni cùhùn-ní vichi.

⁵ Dandu nì cachi stná-yà xì nècuàchì ndoó yucán:

—Nú iá iin burru, ò iin buey xi-nsia, te nì nacava-sì ini iin xìchi, ¿áma cùhùn-nsià carrera tavà-nsiási, mate quivì descansu nduá? —nì cachi-yà.

⁶ Te mii-né, mànicùì nanihì tnùnì ini-nè nansa naxiconihí-né nù-yá.

Mà váha ndanihi-nda mii-nda nduu-nda ana chicá ndiaá

⁷ Daaní, nì xini Jesús nansa quidá nècuàchì nì quesaa vicò mà, nandúcú-nê lugar cundoo-ne ndé chicá quee tnùñuhu xí-né. Ñàyùcàndùá, nì nacani-ya xì-né iin ejemplu, cachí-yà:

⁸ —Nú cánà iin nèhivì cùhùn-nè iin vicò nandàhà, màsà cóó-né ndé nduú lugar chicá iá tnùñuhu-xí, vachi vihini sàà stná inga ana chicá quidáñúhú nècuàchì divéhé-xí.

⁹ Nú ducán, dandu icúmí nècuàchì divéhé-xímá tnàtuu-ne ndé iá nècuàchì nì sàà primeru mà, te cachi-nè xì nècuàchìmà: “Cuxio-ní, te ni cóó nècuàchì sahnú yohó lugar xi-ní”. Dandu nècuàchìmà, ndacuiin-nè, te cùhùn-nè coo-ne inga lugar ndè cahà-xí, te ndòo cahan-ne.

¹⁰ Cunaha-nsiá, nú cánà-ndà cùhùn-ndà iin vicò, dandu nanducu-nda lugar chicá cahà-xí coo-nda, dandu na tnàtuu nècuàchì divéhé-xímá, icúmí-nè cachi-nè xì-ndà: “Amigo, nahà-ní, coo-ní ndé nduú lugar chicá iá tnùñuhu-xí”. Pues nú ni quidá-né ducán, dandu chicá quee tnùñuhu xi-nda nù nècuàchì cutnàhá xí-ndá ndoo-nda xixi-nda yucán.

¹¹ Vachi nsidaa ana datiaá chicá ndiaá, icúmí-nè sàà-nè ndòo cahan-ne. Doco nsidaa ana ndanihí ndahví xì mii-xí, divì nduú ana chicá icúmí nihì xì tnùñuhu —nì cachi Jesús.

¹² Daaní, nì càhàn-yà xì nècuàchì nì cana xi-yá ñà-cuxi-ya, cachí-yà xì-né:

—Nú cuàhàn-ní quida-ní iin vicò vehe-ní, dàtnàà ò sàcuaà, dandu màsà cáná-nî amigo xi-ní, ò ñani-ní, ò tnaha-ní, ò nècuàchì cuicà ndoó yatni, còtó cana stná-nè mii-ní vehe-ne, te ducán danàà-né favor nì quida-ní.

¹³ Còó, vachi nú cuní-nî quida-ní iin vicò, dandu cana-ní nècuàchì ndahví, xì nècuàchì nì nacuéhè, xì nècuàchì xicá cuéhè, xì nècuàchì cuaá;

¹⁴ dandu ndiaha gá coo xi-ní, vachi nsidaa nècuàchì yucán, mà cúí danàà-né nù-ní. Daaní (ndè inga vida) na natiacù-ní xì nsidaa gá nèhivì nihnú ndàcuisì inì-xì, icúmí-ní nihì-ní ñà-vàha xi-ní sàhámà —nì cachi Jesús.

Ejemplu sàhà vicò cahnú

¹⁵ Daaní, iin nècuàchì cutnàhá xí-yà na xixí-yá yucán, nì tiacu-nè ñà-nduá nì cachi-yà, te nì cachi-nè xì-yá:

—Ndiaha gá coo tiempu cundoo-nda ñuhivì ì xí Dios, te cuxi-nda pan yucán.

¹⁶ Dandu nì cachi Jesús xì nècuàchìmà:

—Nisa ìa iin tiàa nì quida iin vicò cahnú. Cuàhà gá nèhivì nì cana-ne.

¹⁷ Dandu na hora cuàhàn-nè cacuxi-ne, nì techuún-né iin peón xi-ne (ñà-caca-tè) cachitnùhu-tè xì nsidaa nècuàchì nì canà mà ñà-sà-ìá hora yàha-ne, vachi sà-ìá listu nsidaá.

¹⁸ 'Doco iin-ni nì cacachi nsidaa-né ñà-nì cuicáhnú ini nècuàchì quidà-xì vicò mà sàhà-né. Nècuàchì primeru, nì cachi-nè: “Còó, làcà nì xiin iin ñuhù xí, te icúmí cùhìn cundehià. Ni cuicáhnú ini-nè sàhí”, cachí-nè.

¹⁹ 'Daaní, inga-nè, nì cachi-nè: “Còó, vachi làcà nì xiin ùhùn yunta buey, te icúmí cùhìn cundaà inì sàhà-sí, a quidá víi-sí, á cóó. Ni cuicáhnú ini nècuàchìmà sàhí”, nì cachi tiàa ma.

²⁰ Daaní, inga-nè, nì cachi-nè: “Còó, vèchi làcà nì nandàhí, te ñàyùcàndùá, mà cúí cùhìn”.

²¹ Ñàyùcàndùá, mànuhù peón mà, te nì nacani-tè xì lamú xi-tè nansa nì cacachi iin iin nèhivì mà. Ñàyùcàndùá, nì xidà ini nècuàchìmà, te nì cachi-nè xì peón mà: “Cuahán-ní vichi duha cacanu-ní inii calle ñuu-ndà yohó, calle nahnú te calle cuati, te danátácà-ní nècuàchì ndahví, nècuàchì nì nacuehè, xì stná nècuàchì xicá cuéhê, xì nècuàchì cuaá ñà-nì quixí-né vicò xí”.

²² Ñàyùcàndùá, (ducán nì quida peón mà); dandu nì cachi-te: “Sàni quide ñà-ndùá nì cachi-ní xí, señor, te vátùni cundoo más gà nèhivì”.

²³ Dandu nì cachi tu lamú mà xì peón mà: “Vichi cuahán tu-ní nsidaa ichì xì nsidaa callejón, te datnátuu-ní nèhivì sàhà-ñá chitu vehi nèhivì.

²⁴ Vèchi ñà-yòhó cachí xì-nsiá, ni-iin nèhivì nì quide invitar daa, mà níhì-né ni-iyuhu ñà-cuxi-ne vehi”.

Nansa nì cachi Jesús xì-ndà ñà-iin-ni ni nacání ini-ndà cunchicùn-ndàyá

²⁵ Cunaha-ní, cuahà gà nèhivì xínchicùn xì-yá cuahàn stná-nè. Ñàyùcàndùá nì naxic-ocuíñ-yà yàtà-yá, te nì cachi-yà xì-né:

²⁶ —Nú vèxi iin nèhivì nùí, te cuní-nè cunchicùn-nè yùhù, dandu (màsà ndúlócò gà-nè ñà-ndùá cachí) yua-né, ò dihi-né, ò dèhe-ne, ò ñani-nè, ò cùha-ne, mate (ni cá-cútúxí ini nècuàchìmà) sàni xini ùhì tnaha-nemà mii-né. Ni màsà cúú gà stná ini-nè sàhà vida xi-ne, vèchi nú coó, mà cúí sàà-nè cunduu-ne iin ana nchícùn xí’.

²⁷ Te xiñuhu stná (ñà-coo-ne dispuestu cui-nè sàhí), quida-ne cuenta na ian nsidá-né iin cruz cuahàn-nè cui-nè. Vèchi nú có-nìhnú ini-nè ducán, te có-nchícùn stná-nè yùhù ducán, dandu mà cúí sàà-nè cunduu-ne iin nèhivì xí’.

²⁸ Vèchi nú cuní-ndà quidavàha-nda iin vehe ducún, amádi dihna coo-nda quida-nda cuenta xi-nda a vátùni sàà dìhùn xì-ndà,

²⁹ còtó mà cúí daxínu-ndañá, cuisì cimientu xan daquésáhá-ndá, te sà-íá ni. Dandu nècuàchì indéhe, cuahàn-nè cuacùndiaa-nèndó,

³⁰ cachi-nè: “Cuahàn tè-jaàn quidavàha-tè iin vehe ni cúí, doco cóni níhì-té daxínu-teá”, cachi-nè (cuacùndiaa-nèndó).

³¹ Daaní, stná iin rey, nú cuní-te cùhùn-te guerra nàá tnàhá-te xì inga rey vèxi xì soldadu-xi, amádi dihna coo-tè nacani vaha inì-te, a vátùni sàà ùxìn mil soldadu xi-tè ñà-cundee-té nùò òcò mil soldadu xi inga rey mà, á coó.

³² Te nú mà sàà soldadu xi-tè, dandu na táñha ga cuyatni inga rey mà, dandu techuún-te nèhivì xí-te cùhùn-nè ndatnuhu-né xì tèmà nansa nsihi pleitu xi-tè.

³³ Te ducán stná mii-nsiá, xiñuhu nandòdó-nsiá nsidanicuú iñàha icúmí-nsiá, vèchi nú coó, dandu mà cúí sàà-nsiá cunduu-nsia ana nchícùn xí’.

Ejemplu nacání sàhà iin nì cuchicuehe, te ducán stná ndohó, màdí cuchicuehe anima-ndà

³⁴ Vaha ga iin, (vèchi nsidá ádíá ñà-xixì-ndà); doco nú sàni ndañuhu ñà-ádi xán, dandu mà cúí gà ndu-ádi gá’.

³⁵ Vèchi còó cá chuan, mà cundúá ñuhù chihi-nda, ni mà váha daquéé stná-ndà nùò itu-ndà. Chicá vaha cate-ndañá. Ni cúníní vaha nsidaa-nsiá palabra jaàn.

15

Ejemplu nacání sàhà rii nì tucù

¹ Daaní, nì catnátuu cuahà tè-dàchíyàhvi, xì cuahà gà stná nèhivì iá cuàchi-xi, vèchi cuní-nè cunini-ne ñà-ndùá cachí-yà.

² Dandu nècuàchì fariseu, xì stná nècuàchì ley xi veheñuhu, nì xitnùhu-neyà, cachí-nè: —Nècuàchì jaàn, cudí ini-nè cutnahá-né xì nècuàchì cuàchi; dècuèndè xixí tàcá stná-né xì nècuàchìmà.

³ Dandu nì nacani-ya xì-né iin ejemplu, te dohó nì cachi-yà:

4 —Nú ndoó iin cientu riì xì-ndà, te nì quecuaán iin-sì ¿ndià nduá quida-nda? ¿Amádi naco-nda 99 quisì dava ga mà iin yodò, te cùhùn-ndà nanducu-nda inga quisì mà ndè cachi nanihì-ndàsì?

5 Daaní, nú sàni ndacùhun-ndasí, cudî ini-ndà

6 mànuhù-ndà vehe-nda idádocó-ndà quisì mà. Dandu cana-nda amigo xi-nda xì stná nècuàchì ndoó yatni, te cachí-ndà xì-né: “¡Nahà-nsia cundoo-nda cudî ini-ndà, vâchi sàni natù riì xí nì ndañuhu ni cuí!”

7 Te yùhù cachí stnáì xì-nsiá, nú nì sàà iin nèhivì iá cuàchi xi cuu-ne arrepentir, dandu yáha ga xícudî ini ana ndoó gloria. Ndè chicá cudî ini-nè sàhà nècuàchì mà nùù 99 nèhivì nihnú vâha inì-xi, vâchi mii-né, có-xiñhù gá cuu-ne arrepentir.

Ejemplu nacání sàhà dìhùn nì ndañuhu, te nì natùia

8 Te ò (inga ejemplu. Ni cachí-ndà iá) iin nècuàchì ñahà icúmí xí ùxìn dìhùn plata. Pues nú nì ndañúhú ian, amádi nacuicùn-né iin isì, te nasihvi-né vehe-ne ñà-nanducu-néà ndè cachi natùia.

9 Daaní, nú sàni nanihì-néà, dandu cana-ne amigo xi-ne xì stná nècuàchì ñahà xíndoo yatni, te cachi-nè xì nècuàchì mà: “Naha-nsià cundoo-nda cudî ini-ndà, vâchi sàni natù dìhùn xí nì ndañuhu ni cuí”, cachí-nè.

10 Te cachí stnáì xì-nsiá, ducán cudî stná ini nsidaa ángel xi Dios nú nì sàà iin nècuàchì iá cuàchi-xi cuu-ne arrepentir.

Ejemplu nacání sàhà dèhe nì sàhàn xìcà

11 Dandu nì cachi stná-yà:

—Nisa là iin tiàa ndoó ù dèhe-xi.

12 Te nì cachi tèchicá chii xi yua-té: “Papá, taxi-ní ñà-ndùú tàhvì nihì-nsí nùù-ní”. Ñàyùcàndùá, nì sàha-ne iin iin-tè ñà-ndùú tàhvì-té.

13 Cóni yáha cuàhà quivì, te nì datàcá tèchicá chii ma nsidaa ñà-icúmí-tê, te cuàhàn xìcà-té inga ñuu. Yucán nì quida ndevàha-tè gastu dìhùn xí-te, nì quihvi-tè cuàhà viciu.

14 Daaní, na ní nsihì dìhùn mà, nì quixi fuerte tnama ñuu yucán, te nì quesaha-té nì ndundahví-te.

15 Ñàyùcàndùá, cuàhàn-te nùù iin lamú ñuu yucán, te nì nihì-té chuun nùù nècuàchì mà, nì techuún-nète cuàhàn-te campu dacáxâhan-tè cochi.

16 (Ñàyùcàndùá, yucán iá-te campu mà), dècuèndè nchichi yùcù saxí cochi-mà cahan stná-te caxì-té, doco còò ni-iin nèhivì sàha xi-té ni-iñàha.

17 Dandu nì nàcùnihu sahnú inì-te, te nì cachì-te: “Cuàhà gá peón ndoó vehe yué, te iá cuàhà ñà-cutiacu-nè, dècuèndè cuyódo gá-ñà nùù-né. Doco yùhù, yohó ié` ndè cuní cuí quidá doco.

18 Chicá vâha naquihin ichì nùhì ndé iá papá xi, te cachì xì-né: Papá, nsidá cuàchi nùù Dios, te nsidá cuàchi stnáì nùù mii-ní.

19 Ni mà nátùì cunduu guè nahi dèhe-ní; nahi peón xi-ní cundui quida-ní cuenta”. Ducán nacání inì-te entre mii-té.

20 Ñàyùcàndùá, nì naquihin-tè ichì mànuhù-té ndé iá yua-té.

Te xica î vâxi-tè ndé iá nècuàchì mà, te nì xini-nète. Dandu nì cuhi ini-nète, te nì dàyáà-nè cuàhàn-nè nì numi nihni-nète. Nì tutuyuhu tnahá-né nùù-né.

21 Dandu nì cachi dèhe-nemà xì-né: “Papá, nsidá cuàchi nùù mii-yá iá ansivi, te nsidá cuàchi stnáì nùù mii-ní. Mà nátùì cunduu guè nahi dèhe-ní”, nì cachì-te.

22 Doco yua-té, nì cachi-nè xì peón xi-ne: “Tavà-nsiá sìcoto chicá finu, te chindixi-nsiàte; te nì cúnacáá stná iin anillu dìnìndàhá-te; nì nácuàin stná-te iin ndisàn.

23 Te cundaca stná-nsia chelù ndatnù quixi cui-si quida-nda vicò.

24 Vâchi sàni xihì dèhi yohó cahín, doco vichi (sàni nsià-te) na iin tiàa nì natiacu. Sàni ndañuhu-té ni cuí, doco vichi sàni natùì-tè”, nì cachi yua-té. Te nsidaa nècuàchì ndoó yucán, nì quesaha-né nì quida cahnú-né vicò mà.

²⁵ 'Daaní, dèhe sahnú nècuàchìmà, iá-te nùù itú. Te nì naquihin-tè ichì màndixi-tè. Te na ní cuyatni-tè vehe, nì tiacù-te quidándáá nèhivì, te itásáhá stná-nè.

²⁶ Ñàyùcàndùá, nì cana-tè iin peón; nì xicàn tnùhù-té nùù nècuàchìmà, cachí-te: “¿Ndíá ndúá cùu-guá vehi?”

²⁷ Dandu nì cachi peón mà xì-té: “Sàni nsiaa ñani-ní, ñàyùcàndùá nì cachi yua-ní ñà-nì càhní-nsí chelù ndatnù, vèchi sàni natùì dèhe-ne, te còò nì-iñàha nì cuu xì-té”.

²⁸ Ñàyùcàndùá, nì xidà ini ñani sahnùmà, có-cùnì-te nansihvi-tè vehe. Dandu nì quee yua-té nì càhàn vii-né xì-té.

²⁹ Doco nì cachì-te xì-né: “Cunaha-ní, sàcàní cuà ié` nùù-ní quidáchúîn, te iníní nsidanicuú ñà-ndúá cachí-ní xì; doco tãñáha ga dacútâhvi-ní yùhù nì-iin litú quida stnái vicò xì amigo xi.

³⁰ Doco vichi sàhà ñà-nì nsiaa tè-ndùú dèhe-ní yohó, (ñàyùcàndùá quidà-ní iin vicò cahnú), dècuèndè nì xihì stná chelù ndatnù xi-nda sàhà-té, mate nduú-te iin ana nì quida uun gastu xì biene xi-ní sàhà ñahà xì-te”, nì cachi dèhe sahnuma.

³¹ Dandu nì cachi yua-té: “Yohó, dèhi nduú stnáu. Siempre ió xì. Te nsidaa ñà-ndùú biene xi, stoho stná` nduú stnáu.

³² Doco vitni ndíá icà-ndà quida-nda vicò, te cudì ini-ndà, vèchi tè-ñanù yohó, nì xihì-te cahín, doco vichi yohó iá-te na ian nì natiacù-te; sàni ndañuhu dahuun-tè nì cahín, doco còò, sàni nsiaà-te vichi”.

16

Ejemplu nacání sàhà mayordomu conì quidá ví

¹ Dandu nì cachi Jesús xì nècuàchì dacuahá-yá:

—Iin nècuàchì cuicà, nì ià iin mayordomu xi-ne, te nì cachitnùhu nèhivì xì-né: “Cò-quidá ví mayordomu xi-ní xì biene xi-ní”.

² Ñàyùcàndùá, nì cana-ne témà, cachí-nè xì-té: “¿Nansa iá ñà-ndúá quidà-ní? vèchi càhàn tnùhù nèhivì sàhà-ní nùì. Pues vichi icúmí-ní quida nsihì-ní entregar cuenta xi-ní nùì, vèchi cuàhìn taví mii-ní nùù chuun xi-ní ñà-ndùù-ní mayordomu”, nì cachi-nè.

³ Ñàyùcàndùá, nì quesaha-témà nacání inì-te, cachí-te inì-ni mii-té: “¿Nansa quide vichi? vèchi cuàhàn lamú xi dacúxió-né yùhù nùù chuun xi. Ndahví, vèchi còò valor xi quidachuín xì pala. Vihini càcàn stnái caridad, doco cucáhán nùì.

⁴ ¡À! Vichi sàni cundaà inì nansa quide, te cundoo ana cuàha lugar coi vehe-xi na quei nùù chuun xi”, nì cachì-te.

⁵ Ñàyùcàndùá, nì cana-tè iin iin nèhivì iníhíca nùù lamú xi-tè. Te nì ndàcàtnùhù-té nùù nècuàchì primeru mà: “¿Nadaa iníhíca-ní nùù lamú xi?”

⁶ Te nì cachi nècuàchìmà: “Iin cientu tonel aceite iníhíquê”. Dandu nì cachi mayordomu mà: “Tnii-ní cuenta xi-ní, coo-ní yohó, te yàchì natiaa-ní cuenta xi-ní ñà-cundua cuisì ùì dico ùxìn (50) tonel vichi”.

⁷ Dandu nì cachì-te xì inga-nè: “Te mii-ní, ¿nadaa iníhíca-ní?” Te nì cachi nècuàchìmà: “Iin cientu carga nùù trigu iníhíquê”. Dandu nì cachì-te: “Tnii-ní cuenta xi-ní, te natiaa-ní cùmì dicó (80) carga-ní”.

⁸ Daaní, lamú xi-tè, nì cundaà ini-nè ñà-ndúá quidá-te. Ñàyùcàndùá, nì cachi-nè xì-té sàhà-ñá conì quidá ví-té: “¡Na nchichí guá nì quida-ní!” nì cachi-nè. Vèchi cunaha-nsiá, nèhivì nihnú inì-xi cuisì ñuhiví yohó, chicá cuehé-nè nùù chuun xi-ne entre nsidaa mii-né, te chicá mà cuehé nèhivì datnùù Dios sàxìnítùnì-xi.

⁹ Te yùhù cachí xì-nsiá: mate dava-tè, có-quidá ví-té xì dihùn xì-te, doco mii-nsiá, xiñuhu cuichuún ví-nsiá ñà-cuicà-nsiá sàhà-ñá naquimanì nèhivì-nsiá, dandu na quívì nsihì dihùn xì-nsiá mà, vètùnì cuàha Dios sàà-nsiá nùù-yá vehe ndiaha-yá nicanicuàhàn.

10 'Nú sàni nìhì iin nèhivì iin chuun tii, te quidá ví-nèa, dandu ñà-jaàn cundaà ini-nda vátuni quida viì stná-nè iin chuun chicá cahnú. Te ò nú có-quidá ví-né chuun tii ma, dandu ni mà quidá ví stná-nè iin chuun cahnú.

11 Ñàyùcàndùá, nú icúmí-nda ñà-cuicà ñuhivì cuàchi yohó, te có-quidá ví-nda xán, dandu còò iin cuàha xi-nda ñà-ndùú ñà-cuicà ndiaha ndisa.

12 Te nú có-quidá ví-nda chuun ñà-cundiaa-nda biene xi inga ñanìtnaha-nda, dandu còò iin cuàha xi-nda ñà-cunduu biene xi mii-nda.

13 'Iin tè-quidáchúûn, mà cúí coo ùi patrón xi-tè, vàchi nú ducán, dandu icúmí-tè cuni ùhì-te iin-ne, te inga-nè cuu inì-te sàhà-xí. Te ò ni cachí-nda, iin-ne coo vaha xi-té, te inga-nè cahíchi inì-te. Te ducán stná mii-nsiá, nú cuú ini-nsiá sàhà dìhùn, dandu mà cúí cunucuachi stná-nsiá nùù Dios —nì cachi Jesús.

14 Daaní, nècuàchì fariseu, itá stná-nè yucán, iníní-né nsidaa ñà-ndùá cachí-yà, te nì sàcùndiaa-nèyà, vàchi cuàhà gá cuú ini-nè sàhà dìhùn.

15 Ñàyùcàndùá, nì cachi-yà xì-né:

—Mii-nsiá, nùù nèhivì cuní-nsiá ndee vaha-nsia, na ian ni cundúú-nsiá nèhivì váha guá. Doco Dios, ináhá-yà ñà-ñuhú ini anima-nsiá. Vàchi ñà-ndùá chicá xího nècuàchì ñuhivì yohó, có-nâtùia nùù mii-yá, vàchi ñà-chicá có-íá vaha nduá nùù-yá.

In palabra nì cachi Jesús sàhà ley xi Moisés xì sàhà ñuhivì ùi xí Dios

16 'Inii tiempu antes quesaa Juan (Bautista) nì sandiaa ley (xi Moisés) xì stná palabra nì cachi profeta nisa cahàn cuenta xi Dios. Doco tiempu xi Juan vaxi duha nì quesaha xítia cuentu sàhà ñuhivì ùi xí Dios, te vichi nsidaa nèhivì, quidá-né lucha sàà-nè ñuhivì ùi mà.

17 'Doco ley (sànaha) ma, nicanicuahàn cundua iin ley vaha; vàchi ni-iin seña tii xí iin letra xan, mà nunca sàà ndañuhá. Chicá mà úhì ndañuhu ansivi xì ñuhivì, doco ley mà, nicanicuahàn coa.

Nansa nì cachi Jesús ñà-mà váha cate tnàhà-nda

18 'Nú ni caté stnahá iin tiàa xi ñahàdìhì-nè, te coo-ne xì inga nècuàchì ñahà, cuàchi ndisa cundua. Te nú ni nándàhà stná iin nècuàchì tiàa xi iin nècuàchì ñahà ní sate stnahá, divini cuàchi cunduu stná mà.

Nansa nì cuu xi iin tècuicà xì stná iin nècuàchì ndahví nani Lázaro

19 'Nisa ìa iin tècuicà, ndixí-te sìcoto cuxín finu, xì cuàhà gá sìcoto chicá viì. Te nsiquívì nisa quida-tè vicò cahnú vehe-tè.

20 Te nisa ìa stná iin nècuàchì satú nani Lázaro, indúhu-né yehè cahnú tècuicà mà, te itándiaa chitu nsìhi uhì ìcà-né.

21 Te cuní-nè nìhì-né pedazu cuati comida cóyo nùù mesa xi tècuicà mà cuxi-ne. Dècuèndè stná sìhina, vaxi-sì ndé iá-nè, te nacuahá yàá-si nsìhi uhì ìcà-némà.

22 Daaní, nì sàà quívì nì xìhì-nè, te nì caquixi ángel nì nacua-ne anima nècuàchì mà cuàhàn-nè ndé iá xii-nda Abraham. Daaní, después nì xìhì stná tècuicà mà, te nì ndùxin-tè.

23 Dandu (nì sàà-te) ndé ndoó anima nècuàchì xínduu nsii. Te yucán nì quesaha-té ndohó cuàhà-té. Dandu nì ndacoto-tè nì xini xicà-té yucán iá Abraham, te yatni uun iá stná Lázaro.

24 Ñàyùcàndùá, nì ndàhì ndee-té, cachí-te: “¡Abraham! ¡Xì-nsí nduu-ní! Cundehe ndahví-ní yùhù; techuun-ní Lázaro quixi-ne dandaxín-né dìnìndàhà-nè tècuí, te danchíco-ne yáí, vàchi yáha ga ndohí ié` mahì ñuhu yohó”.

25 Doco nì cachi Abraham: “Nsinuu inì-ní, hijo, vàchi na nisa itiacù-ní ñuhivì, vaha vida nisa icumi-ní. Doco Lázaro yohó, còò; yáha ga ndahví nisa yàha-ne. Doco vichi sàni nìhìtáhì-né cudìi cuàhà ini-nè, mientras mii-ní, icúmí-ní ndoho-ní.

²⁶ Te iá stná inga iñàha, vèchi mahì nsiùhù yohó xì mii-nsiá jaàn iá iin yui cahnú cunú sàstnùhù. Ñàyùcànduá, mate ni cúcáhán-nsí yàha-nsi ndé iá-ní, doco mà cúí; te stná mii-nsiá, mà cúí yàha stná-nsià ndé ndoó nsiùhù yohó”.

²⁷ Dandu nì cachi tèmà: “Pues, nú ma cúí, dandu sacúndáhvî nùu-ní, tío Abraham; techuún sacù-ní Lázaro nùhù-nè vehe papá xì.

²⁸ Vèchi yucán ndoó ùhùn ñani, te cuní càhàn Lázaro xì-té ñà-màsà quíxí stná-te lugar yohó ndé ndòhò guá-nsì”.

²⁹ Dandu ní cachi Abraham xì-té: “Sà-icúmí-tê libru ìi nì tiaa Moisés, xì stná libru nì tiaa nècuàchì profeta. Ni cúníní-te ñà-nduá cachí nùu tutu mà”.

³⁰ Dandu nì cachi-te: “Còó, tío Abraham, vèchi nú ni nátiácú iin nsi, te sàà-nè càhàn-nè xì-té, dandísá, icúmí-tê cuu-tè arrepentir”.

³¹ Doco nì cachi Abraham xì-té: “Nú có-cuní-te cunini-tè ñà-nduá nì cachi Moisés, te ni ñà-nduá nì cachi profeta, dandu mà sàà-te naxicocuïn inì-te mate ni nátiácú iin nsi (càhàn xì-té)”.

17

Cuàhà gá ni coo-nda cuidadu, còtó quida-nda iin cuàchi

¹ Dandu nì cachi Jesús xì nècuàchì dacuahá-yá:

—Ñà-ndáà nduá, icúmí dava nèhivì tùcù-nè ichì có-ndiàá quida ñanìtnaha-ne. Doco ndahví nècuàchì datúcù tnàhà-ximà.

² Vèchi chicá vaha nì mácùndiacu iin yùu yódò dùcùn-né, te ndiachi-né mahì mar sàhà-ñà màsà dátúcù-nè ni-iin ñà-cuati yohó.

³ Ñàyùcànduá, cuidadu cundoo-nsia sàhà ñà-nduá quidá-nsiá.

’Nú quidá iin ñanìtnaha-nsia cuàchi nùu-nsiá, dandu càhàn-nsià xì-né sàhámà. Te nú ni náxicocuïn ini-nè sàhà ñà-nduá nì quida-ne, dandu cuicahnú inì-nsia sàhà-né.

⁴ Mate ùsà xichi iin quivì nì quidá-né iin cuàchi nùu-nsiá, có-quidá, vachi nú cada iin iin xichi vaxi-ne cachí-nè ñà-cùu-né arrepentir, dandu icúmí-nsiâ cuicahnú inì-nsia sàhà-né —nì cachi Jesús.

Vàtùni quida stná-ndà milagru nú nihnú vaha ini-ndà mii-yá

⁵ Dandu nècuàchì nì nihì chuun nùu Stoho-ndà Señor, nì xicàn tàhvì-né nùu-yá, cachí-nè:

—Chindee-ní nsiùhù ñà-nì sàà-nsi cunindisá víi gá-nsì.

⁶ Dandu nì cachi-yà xì-né:

—Cuati lihngu tata yutnù nani nù-mostaza. Te ñà-yòhò cachí xì-nsiá: nú xiníndisâ ndisa-nsia, mate (iyuhu nduá) nahi tata mà, dandu dècuèndè vātùni dandacú-nsiá nùu yutnù nahi yutnù fruta jaàn ñà-nì ndánchító-nu yohó, te cùhùn-nu ndiachi-nú mahì mar, dandu seguru ducán icúmí coo.

Ejemplu sàhà peón quidáchúùn nùu-ndà

⁷ ’Nì cachí-ndà iá iin peón xi-nda, te quidachuún saín-te nùu-ndà. Te vihini xitú-te, o ndiáá-te quisì xi-nda. Doco nú nì nsiaà-te vehe, ¿a cachí-ndà xì-té ñà-nì cùhùn-te cudamá-te?

⁸ Còó, dohó cuàhàn-ndà cachi-ndà xì-té: “Quidayucùn-ní ñà-cudamí, dandu nsidavì-ní mii-ní, te taxi-ní ñà-cuxi, te cohi. Doco mii-ní, dècuèndè después icúmí-ní cuxi-ní”, cachi-ndà xì-té.

⁹ Pues, ¿a náquímànì-ndà peón mà nú sàni quida-tè nsidaa ñà-nduá nì ndacu nuu-té? Ádi coó.

¹⁰ Pues divi ducán stná xì mii-nsiá, vèchi nú sàni nsihi nì quida-nsia nsidaa ñà-nduá nì ndacu nuu-nsiá, dandu icúmí-nsiâ, cachi-nsiâ: “Còó ni-iñàha ni quidá-nsí, cuisì ñà-nduá ndiá icà-nsí nì quida-nsi”, —nì cachi Jesús.

Nansa ni dandúvaha Jesús ùxin tiàa ndohó cuèhè lepra

¹¹ Nchícùn Jesús ichì Jerusalén cuàhàn, te ni yàha-ya ladu Galilea xì stná ladu Samaria.

¹² Te na ní sàà-yà iin ñuu tii ni xini-yà yucán vaxi ùxin tiàa ndohó cuèhè lepra. Itá xica-né,

¹³ cána ndee-né, cachí-nè:

—¡Stoho-nsì Jesús! ¡Cundehè ndahví-nî nsiùhù!

¹⁴ Daaní, na ní xini Jesús nècuàchìmà, ni cachi-yà xì-né:

—Cuahán-nsià dacuní-nsià dùtù icà-nsiá.

Ñàyùcàndùá ni caquihin-ne ichì cuàhàn-nè. Te meru xicá-né ichì mà, dandu ni nduvàha nsidaa-né.

¹⁵ Te iin-ne, na ní xini-nè sàni nduvàha-ne, ni naxicocuïñ-nè, ni ndenihi vaha cuahà-né Dios, ndee cáhàn-nè.

¹⁶ Te ni sàcuïñ sisì-né nùù-yá, naquímànì-néyà. Te nduú-né iin nècuàchì ñuu Samaria.

¹⁷ Dandu ni cachi-yà xì-né:

—¿Amadí ùxin tiàa ni nduvàha? Doco 9 nècuàchì dava ga mà, còò-né ni naxícócuïñ.

¹⁸ Cuisì mindaa nècuàchì tùcù yohó ni naxicocuïñ naquímànì xì Dios.

¹⁹ Dandu ni cachi-yà xì tiàa ni naxicocuïñ mà:

—Ndacuiñ-ní xuhun-ní vehe-ní. Vàtùni ni xinindisa-ní, te ñàyùcàndùá ni nihì-ní ni nduvàha-ní.

Nansa icúmí cuu quivì naxicocuïñ Jesús ñà-cusahnú-yá nùù ñuhiví yohó

²⁰ Daaní, ni ndàcàtnùhù nècuàchì fariseu nùù-yá índù tiempu sàà quivì cusahnú Dios ñuhiví yohó. Te ni cachi-yà xì-né:

—Màdiá nduchinúù-nsiá cuni-nsià ñuhiví ìì xí Dios.

²¹ Mà cundúámà ñà-cachitnùhu nèhivì xì-nsiá, cachi-nè yohó iá ñuhiví ìì mà, te ò yucán iá. Còó, vachi yohó mahì mii-nsiá iá ñuhiví ìì mà.

²² Dandu ni cachi-yà xì nècuàchì dacuahá-yá:

—Vaxi iin tiempu na yáha ga cunì-nsiá cundua tiempu ndiaha (naxicocuïñ) yùhù ana nduú Tnaha Nèhivì Ñuhiví, doco tañáha ga sàà cundua tiempu mà.

²³ Te nú cachí nèhivì xì-nsiá ñà-yòhó sàni naxicocuïñ, te ò yucán ié, màsà cùhùn-nsiá xì-né, màsà cùchícùn-nsiànè.

²⁴ Vachi na ian tása, te natnúù fuerte inicutu ansivi ndè iin ladu xì ndè inga ladu, ducán icúmí cuu stná xì yùhù na sàà quivì xí, (te cundehè nsidaa nèhivì yùhù).

²⁵ Doco antes, cuàhà iñàha icúmí ndohi; vachi icúmí nèhivì tiempu vichi cahíchì ini-nè yùhù.

²⁶ Te nacua ni cuu tiempu xi Noé sàhana, ducán icúmí cuu stná na sàà meru quivì xí yùhù ana nduú Tnaha Nèhivì Ñuhiví.

²⁷ Vachi tiempu xi Noé mà nisa (ndoo cuéyàà nèhivì ñuhiví), xixí-né, xihí-né, te nándàhà-né. Te ducán nisa quida-ne dècuèndè ni sàà quivì ni quihvi Noé barcu cahnú, dandu ni quixi dàvi ni sahnì xì nsidaa nèhivì mà.

²⁸ Daaní, ducaní stná nèhivì ñuu Sodoma tiempu xi Lot sàhana, xixí-né, xihí-né, xiín-né, te dicó-né; xitú stná-nè, te quidávàha stná-nè vehe;

²⁹ doco divi quivì ni quee Lot ñuu mà, dandu ndè ansivi ni còyo ñuhu xì tàtnà cuaán sahan quini, te ni caxihì nsidaa nèhivì ñuu mà.

³⁰ Ducán icúmí cuu stná na quivì naxicocuïñ, te cuni nèhivì yùhù.

³¹ 'Quivì mà, nú ndoo nèhivì dìnivèhé-né (quetátù-nè), te ini vehe ñuhú ñà-icúmí-nè, dandu màsà ndúlócô-nè sàhámà. Cuisì-nì ni cùnù dèhé-nè chicá vaha. Te ò nú ndoo-né nùù itú, dandu màsà naxícócuïñ-nè vehe-ne.

³² Màsà nándòdó-nsiá nansa ni cuu xi ñahàdihí Lot.

³³ Nsidaa ana cuní dacácu xi vida-xi, cutu-ñá dandáñuhú-nèàmà quea; doco nsidaa ana có-dàcácu xi vida xi, divi cunduu nècuàchì càcu.

³⁴ Yùhù cachí xì-nsiá, na sàa ñuú naxicocuïn, dandu ndé quidì ùi nèhivì, icúmí cuxio iin-ne, te iin-ne ndòo.

³⁵ Te ndé ndoó ùi nècuàchì ñahà cutnàhâ nchicó, iin-ne icúmí cuxio, te inga-nè ndòo.

³⁶ Te ndé ndoó stná ùi tiàa nùu itú, iin-ne cuxio, te inga-nè ndòo.

³⁷ Dandu nì ndàcàtnùhù-né nùu-yá, cachí-nè:

—Stoho-nsì Señor, ¿índù cuàhàn cuu ñà-jaàn?

Te nì cachi-yà:

—Cunaha-nsiá, (ducán iá nahi dichu cachí): “Ndé indúhu ñà-nì xihì, yucán icúmí nataca stná longo”.

18

Ejemplu nacání sàhà iin nècuàchì ndahví nì sàhàn nùu iin juez cuehé

¹ Dandu nì nacani Jesús xì-né iin ejemplu ñà-cundaà ini-nè ñà-iin-ni icúmí-ndá càcàn tàhvi-ndà nùu Dios, te màdiá cuhuun ini-ndà.

² Dohó nì cachi-yà:

—Ñisa là iin juez iin ñuu; doco ni cóni sácáhví-tê Dios, ni stná nèhivì.

³ Te divi ñuu yucán ñisa là stná iin nècuàchì ñahà nì xihì ì-xí. Te sàhàn nècuàchì mà nùu juez mà, cachí-nè: “Nsidandaà-ní chuun xi, vàchi iá iin nècuàchì xiní ùhì xí”.

⁴⁻⁵ Doco cóni cùnì-te. Daaní, después nì nacani inì-te, cachí-te inì-ni mii-té: “Yáha ga sáhachuún ñahàcuàán yohó yùhù. Ñàyùcàndùá mate có-càhví Dios, ni có-càhví stnài ni-iin nèhivì, doco cuàhìn nsidandaì chuun xi nècuàchì yohó, vàchi cuñáñi ñà-tutoo quixi-guá-nè nùu”.

⁶ Dandu nì cachi Stoho-ndà Señor:

—Cundehè-nsiá nansa nì cachi juez mà, mate malu-nè, (doco icúmí-nè chindee-né nècuàchì mà).

⁷⁻⁸ Ñàyùcàndùá, Dios, ¿áama nsidandaà stná-yà sàhà nèhivì nì nacàxin-ya nú ndui te ñuú xicàn tàhvi-né, te sacúndáhví-nè nùu-yá? Te ¿a caní tiempo cueé-yà, te sàa quivì nsidandaà-yà ducán? Còó, yàchì icúmí-yâ nachitacùhá-yà sàhà-né, cachí xì-nsiá. Doco quivì naxicocuïn yùhù ana nduú Tnaha Nèhivì Ñuhivì, ¿a ndísá cunindisá cuàhà nèhivì yùhù cahan-nsiá? —nì cachi Jesús.

Ejemplu nacání sàhà iin nècuàchì fariseu cuadú, xì sàhà stná iin nècuàchì dachíyàhvi nì naxicocuïn inì-xi

⁹ Daaní, nì nacani-ya iin ejemplu sàhà nèhivì ndaníhí vaha guá xì mii-xí, te cachíchì ini-nè nècuàchì dava ga. Dohó nì cachi-yà:

¹⁰ —Ùi tiàa, cuàhàn-nè veheñùhu cahnú ñà-càcàntàhvi-né nùu Dios. Iin-ne nduú nècuàchì fariseu, te inga-nè nduú nècuàchì dachíyàhvi.

¹¹ Te nècuàchì fariseu mà, nì sàcuìn-nè yucán, te nì naquimani-né Dios sàhà mii-né, cachí-nè: “Ansivéhé-ní Yua-nsí Dios, vàchi yùhù, có-quidá ndevàhi nacua quidá nècuàchì dava ga mà, te có-quidá cuihna stnài ni-iñàha, vàchi có-quidé ni-iin ñà-có-ndiá ìqué quide, có-càhìn xì inga nècuàchì ñahà, ni có-quidá stnài na quidá tè-dachíyàhvi jaàn.

¹² Còó; nùu cada ùnà quivì iníhí iá dòquí ùi quivì, te nùu cada ùxìn pesu quidé ganar, chivàha cuáin ian ñà-cunduu diezmu xan”, nì cachi nècuàchì mà.

¹³ ‘Doco nècuàchì dachíyàhvi ma, xica iín-né, cucáhán nùu-né ndacoto-ne ansivi. Ñàyùcàndùá, iín-ne, caní-né nchìca-ne (ñà-cùu guá-nè sentir sàhà cuàchi-ne), te cachí-nè: “Yua-nsí Dios, cundehè ndahví-ní yùhù, vàchi nècuàchì cuáchi nduú”, nì cachi-nè,

¹⁴ dandu mànuhù-né. Ñàyùcàndùá, yùhù cachí xì-nsiá, divi nècuàchì yucán nduú ana nì ndee vaha ndisa nùu Dios, te màdiá nècuàchì primeru mà. Vàchi nsidaa ana datiaá uun nduú nèhivì vaha guá, icúmí-nè nducahan-ne; te nsidaa ana ndaníhí ndahví xì mii-xí, chicá icúmí-nè nìhì-né tñùñuhu.

Nansa ni cachi Jesús ñà-màsà cádí-ndà nuù ñà-cuati ñà-cunchicuàn mii-yá

¹⁵ Daaní, ndacá nêhiví ñà-cuati xí-né vâxi nuù-yá ñà-chitândòó-yá ndahà-yá dìni-vé. Doco na ní caxini nêcuàchì dacuahá-yá, nì sadi-nè nuù nêcuàchìmà.

¹⁶ Ñâyùcàndùá, nì cana Jesús ñà-cuati ma ni tnátua, te nì cachi-yà:

—Nacoo-nsia ñà-cuati ni quixá nuù. Màsà cádí-nsià nuá, vâchi cuisì nêcuàchì nihnú inì-xì nahi miá cunduu ana sàà ñuhiví ìì xí Dios.

¹⁷ Ñà-ndàà nduá cachí xì-nsiá, nú ni coó (vità ini) nêhiví nahi ñà-cuati, dandu nihì-né quìhvi-ne ñuhiví ìì xí-yá, doco nú coó, mà sàà-nè yucán —nì cachi-yà.

Nansa ni cachi Jesús xì iin tèchii cuica

¹⁸ Daaní, nì càhàn iin tè-nìhí chuun, nì xicàn tnùhù-té nuù-yá, cachí-te:

—Maestro, mii-ní vâha ndisa-ní. Cachì-ní xì ndià quide, te nihitàhvi' vida ndiaha nicanicuahàn.

¹⁹ Dandu nì cachi Jesús xì-té:

—¿Ndíà disáhà-xí cachí-ní xì: “Mii-ní vâha-ní”? Vâchi còò ni-iin nêhiví ùún vâha ndisa, cuisì nú nduí Dios, dandu vâha ndisa inì.

²⁰ Pues vichi, sà-ínahá-ní nansa nì dândàcú-yá ñà-màsà cáhàn-ndà xì inga ana có-nduù nêcuàchì vehe-nda; te màsà cáhni stnaha-nda, ni màsà quídá cuíhná-ndá, ni màsà cáhí-ndà iin tnùhu sàhà ñanìtnaha-nda, te ni coó stná tnùñuhu xi-nda nuù yuadíhí-ndá.

²¹ Dandu nì cachi tu-tè xì-yá:

—Cunaha-ní, nsidaájàn sàni chivâhi dècuèndè na tíi.

²² Na ní inini Jesús ñà-nduá nì cachi-te, dandu nì cachi-yà:

—Cumáni gá inga ñàha quida-ní. Dicò nsihì-ní ñà-nduá icúmí-ní, te dasàn-ní dihùn mà nuù nêcuàchì ndahví; dandísá nihitàhvi-ní sàà-ní ansivi, te yucán cucumi ndisa-ní cuàhà ñà-cuicà. Te quixi-ní cunchicùn stná-ní yùhù —nì cachi-yà.

²³ Doco tèmà, na ní inini-tè nì cachi-yà ducán, dandu yáha ga nì cuhuun inì-te, vâchi cuica cuáhà-té.

²⁴ Te na ní xini Jesús ñà-nì cuhuun guá inì-te, dandu nì cachi-yà:

—¡Na uhì guá sàà iin tècuicà ñuhiví ìì xí Dios!

²⁵ ùhì gá stná dayáha-nda iin camellu nuù chicòhò ndúhu iquì; doco chicá ùhì yàha iin tècuicà ndè ñuhiví ìì xí Dios.

²⁶ Dandu nêcuàchì xí-inini yucán, nì cachi-nè:

—Nú ducán nduá, dandu ¿nansa cui càcu anima iin nêhiví?

²⁷ Dandu nì cachi-yà:

—Ñà-nduá có-sàà nêhiví quida-ne, vâtùni quida Dios-ña.

²⁸ Dandu nì cachi Pedro xì-yá:

—Nsiùhù, sàni nacoo ìi-nsí nsidaa ñà-nduá icúmí-nsí, te vâxi-nsi nchícùn-nsi mii-ní, Stoho-nsi Señor.

²⁹ Dandu nì cachi-yà xì nsidaa-né:

—Ñà-ndàà nduá cachí xì-nsiá yohó, nú nchícùn iin nêhiví ñuhiví ìì xí Dios, te sàhámà icúmí-nè nacoo-ne ñàha, (màsà ndúlócô-nè), mate ni nácóó-né vehe-ne, ò yuadíhí-nè, ò ñani-nè, ò cùha-ne, ò ñahàdihí-nè, ò dèhe-ne, (có-quídámà),

³⁰ vâchi después yáha ga cuàhà gá más icúmí-nè nihitàhvi-né vida xi-ne ñuhiví yoho. Daaní, na sàà-nè inga ñuhiví vâxi xi-nda, dandu nihitàhvi stná-nè vida ndiaha nicanicuahàn.

Nansa ni cachi tu Jesús inga xichi ñà-icúmí-yâ cui-yà, dandu natiacu-yà

³¹ Daaní, nì tavà cuaán-yá ùxin ùì nêcuàchì dacuahá-yá, te nì cachi-yà xì-né:

—Cunaha-nsiá, ichì ñuu Jerusalén nchícùn-ndà vichi, te ñuu yucán icúmí cuu ndisa nsidaa ñà-nduá nì tiaa nêhiví xí Dios sàhana sàhà yùhù ana nduú Tnaha Nêhiví Ñuhiví.

³² Vâchi icúmí nêhiví dayáha-ne yùhù ndahà tè-inga raza ñà-cuàcùndiàà-te yùhù, te canàhá stná-te xì. Te icúmí stná-te sivi diì-te nuù, te cahni cuì-te yùhù.

³³ Dandu después cahnì-té yùhù. Doco tìxi ùnì quivì icúmî natiacuì —nì cachi-yà.

³⁴ Doco nècuàchì dacuahá-yá, cónì cúndàà ini-nè sàhámà. Cónì sàà-nè mànihì ini-nè, vàchi nahi palabra dèhé nì sandua nùù-né.

Nansa nì quida Jesús milagru ñuu Jericó, nì dānātūi-ya nùù iin nècuàchì cuaá

³⁵ Yatni iá-yà ñuu Jericó vāxi-ya, te yuhù íchî yucán iá iin nècuàchì cuaá xícàn xì caridad.

³⁶ Te na ní tiacu-nè yáha cuàhà nèhivì, dandu nì ndàcàtnùhù-né ndià nduá cuú.

³⁷ Te nì cachi nèhivì ñà-divi Jesús de Nazaret cuàhàn yàha.

³⁸ Ñàyùcàndüá, nì ndàhì-nè, cachí-nè:

—¡Jesús! ¡Mii-ní descendencia ì xí David! ¡Cuihì inì-ní yùhù!

³⁹ Doco nèhivì idónuu (nùù nèhivì cuàhà mà), nì canàhá-nè xì nècuàchì cuaá mà, nì cadí-nè yuhù-né cachí nècuàchì mà xì-né. Doco mii-né, chicá ndee ní ndàhì-nè, cachí-nè:

—¡Mii-ní descendencia ì xí David, cuihì inì-ní yùhù!

⁴⁰ Dandu nì cucuiin Jesús, nì dāndācú-yá ñà-nì cūndācā nèhivì nècuàchì mà quixi. Te na ní tnātuu-ne, nì xícàn tnùhù-yá nùù-né,

⁴¹ cachí-yà:

—¿Ndià nduá cuní-ní quide?

Dandu nì cachi-nè xì-yá:

—Señor mío, cuní natùinuí.

⁴² Dandu nì cachi-yà xì-né:

—¡Ni ndúvaha nduchinúù-ní, cachí xì-ní! Vàchi ñà-sànì xinindisa-ní, ñàyùcàndüá sàni nduvàha-ní.

⁴³ Dandu luegu nì natùinuù-né, te nì tenchicùn stnà-nèyà, naquímànì-né Dios. Te nsidaa nèhivì nì xini ñà-ndüá nì cuu, nì ndenihi ndiaha stnà-nèyà sàhámà.

19

Nansa nì xinindisá iin nècuàchì cuicà nani Zaqueo, te nì nanduu-ne iin nèhivì xí Jesús

¹ Na ní sàà-yà ñuu Jericó, nì yàha uun-ya inii ñuu mà.

² Te cunaha-nsiá, ñuu mà iá stnà iin nècuàchì cuicà nani Zaqueo. Te chuun xì nècuàchì mà nduá dandacú-né nùù dava ga tè-dàchíyàhvi.

³ Te cuní stnà-nè cundehè-né Jesús ana nduú-yá. Doco mànicúì ñà-cuàhà guá nèhivì itá yucán, vàchi iin nècuàchì cuisí nduú-né.

⁴ Ñàyùcàndüá, nì dāyāà-nè chicá nùù-xí, te nì nana-ne dòcò iin yutnù fruta tnuu, vàchi yucán icúmí Jesús yàha-ya.

⁵ Dandu na ní sàà-yà lugar mà, nì ndacoto-ya dìquì-xí, te nì xini-yà nècuàchì mà, dandu nì cachi-yà xì-né:

—Zaqueo, dansíhi-ní nuu-ní, vàchi vichi icúmí sài vehe-ní.

⁶ Ñàyùcàndüá, vichi vichi nì nuu yàchì nècuàchì mà, te ndacá-nèyà mànuhù vehe-ne, cudí ini-nè.

⁷ Doco nèhivì cuàhà mà, na ní xini-nè cuàhàn-yà xì nècuàchì mà, dandu nì xitnùhu-neyà, índù chuun cuàhàn-yà vehe iin nècuàchì iá cuàhà cuàchi-xi, nì cachi-nè.

⁸ Daaní, (na iá-yà vehe Zaqueo mà), nì ndacuiin nècuàchì mà, cachí-nè xì-yá:

—Señor mío, ñà-ndüú davatahvi biene xì cuàhìn dasín nùù nèhivì ndahví. Te nècuàchì nì dāndāhví nì quihin dīhùn-xí, cūmì tantu gā cuàhìn nacuàhi-nè.

⁹ Dandu nì cachi Jesús (xì nèhivì yucán):

—Vichi sà-íá salvación xì nècuàchì divéhe-xí yohó, vàchi nacua nì quida yohótéhè-ndà Abraham, ducán nì quida stnà-nè, (te sàhámà nì càcu-ne),

¹⁰ vàchi yùhù ana nduú Tnaha Nèhivì Ñuhiví, nì quesai ñuhiví yohó ñà-nanduquí ana nì tucù inga ichì, te dacácuì anima-nè —nì cachi-yà.

Ejemplu nacání sàhà ùxìn dīhùn oro

11 Daaní, nsidaa nèhivì yucán, ndoó-né iníní-né ñà-nduá cachí-yà. Dandu nì nacani tu-ya xì-né inga ejemplu, vèchi sà-ítúú-yá sàà-yà ñuu Jerusalén, te tuxí ini-nè ñà-mà cuéé gà, te sàà tiempu ndiaha cusahnú Dios (ñuhivì yohó).

12 Ñàyùcànduá, nì cachi-yà xì-né:

—Nisa là iin dèhe rey, cuní-nè cùhùn xicà-né inga ñuu ñà-nìhì stná-nè chuun dandacú stná-nè, dandu después ndixi-ne (cusahnú-né).

13 Ñàyùcànduá, (na táñaha ga quihin-ne ichì, dandu) nì cana-ne ùxìn peón xi-ne, te nì sàha-ne iin iin-tè iin iin dìhùn oro, te nì cachi-nè xì-té: “Inii tiempu dècuèndè quivì naxicocuïn icúmí-nsiá quida-nsia lucha nducuahà dìhùn yohó”, (nì cachi-nè xì-té, dandu cuàhàn-nè).

14 Doco nècuàchì ñuu-nè, sàhà-ñá có-xiñùhù-né nècuàchìmà, ñàyùcànduá, nì techuún-né itnii nèhivì xì-né nihi-xi razón cuàhàn, te dohó cachí razón mà: “Có-cuní-nsi cusahnú nècuàchì jaàn nùù-nsí”, cachá.

15 Doco nècuàchìmà, vètùnì nì nìhì-né chuun cusahnú-né, te nì naxicocuïn-nè ñuu-nè mà. Dandu nì dandacú-né cànà nsidaa peón nì sàha-ne iin iin dìhùn mà, vèchi cuní-nè cundaà ini-nè nadaa nì nandua.

16 Dandu nì tnàtuu tè-primeru, cachí-te: “Señor, imindaa dìhùn oro nì taxi-ní, doco vichi sàni nandua ùxìn dìhùn”.

17 Dandu nì cachi nècuàchìmà xì-té: “¡Vètùnì iá! Peón vaha nduu-ní. Ñàyùcànduá icúmí-nì dandacu-ní nùù ùxìn ñuu nahnú, vèchi viì gá nì quida-ní xì iin chuun tii”.

18 Dandu nì tnàtuu peón ùì, cachí-te: “Señor, nì taxi-ní imindaa dìhùn oro, doco vichi sàni nandua ùhùn”.

19 Ñàyùcànduá, nì cachi-nè xì témà: “Mii-ní, icúmí-nì dandacu-ní nùù ùhùn ñuu nahnú”.

20 Dandu nì tnàtuu inga peón, cachí-te: “Señor, yohó naquihin-ní dìhùn xì-nì, vèchi nì chivàhià nùù iin sìcoto.

21 Vèchi yúhì mii-ní. Ináhì nansa iá-nì, dana-ní, dècuèndè tùha stná-ní candiaà-ní iñàha mate cóni quidáchúún-nì, te tùha stná-ní quihin-ní cosecha ndé cóni xitù-ní”.

22 Dandu nì cachi nècuàchì dandacù-mà xì peón mà: “¡Peón malu nduu-yó! Ináhú dana yùhù, te candiaí iñàha ndé cóni quidáchúún, te ndaníhì cosecha ndé cóni xitúí.

23 Te nú ináhú ducán quidé, dandu ¿índù chuun cóni dàcùhùn dìhùn xì nùù iin vehe ndé quidachuún-né xán, dandu na quivì nsiaì, vètùnì nìhì stnáì dìquía nì cuí?”

24 Dandu nì cachi-nè xì peón itá yatni ma: “Candiaà-nsia dìhùn nùù tè-yohó, te cuàha-nsia nècuàchì icúmí ùxìn dìhùn oro jaàn”.

25 Dandu nì cacachi peón mà xì-né: “Doco Señor, sà-icúmí nècuàchìmà ùxìn-ñà vitni”.

26 Doco nì cachi nècuàchì cusahnú-má: “Cunaha-nsiá, ana sà-icúmí algu vichi, icúmí-nè nìhì gá-nè más, te ana icúmí cuisì iyuhu iñàha, icúmí cuxio nsidaa ñà-nduá icúmí-nè.

27 Doco nèhivì xinì ùhì xì, te có-cuní-nè cusahnú nùù-né, cundaca-nsianè quixi nùì, te cahni-nsiánè yohó”, nì cachi rey mà.

Nansa nì cuu na ní sàà Jesús ñuu Jerusalén

28 Daaní, nì nsihi nì nacani-ya ejemplu mà, nì quihin tu-ya ichì cuàhàn-yà Jerusalén, idónuu-yá nùù compañeru-yà cuàhàn-yà.

29 Te sà-ítúú-yá sàà-yà ñuu cuati Betfagé xì Betania, frente yucù Olivo. Dandu nì càhàn-yà xì ùì nècuàchì dacuahá-yá ñà-nì cùhùn cueé-nè chicá nùù-xì.

30 Te dohó nì cachi-yà xì-né:

—Cuahán-nsià ñuu tii yatni yucán. Te na sàà-nsià yucán, dandu icúmí-nsiá cuni-nsià ndé nuhní iin burru chii. Burru tàñaha ga cuida nduú-si. Quisì yucán ndaxin-nsiá cundaca-nsia quixi.

31 Te nú ndacàtnùhù nèhivì nùù-nsiá índù chuun ndaxin-nsiási, dandu cachi-nsià xì-né ñà-Stoho-ndà Señor xiñuhu xi-sí —nì cachi-yà.

³² Dandu luegu nì caquihin ùi nècuàchìmà ichì cuàhàn-nè chuun ma, te nì xini-nè ñà-divi nacua nì cachi-yà xì-né, ducán ndisa nì ìa.

³³ Te na meru ndaxin-nési, dandu nì càhàn stohò-si xi-né, cachí-nè:

—¿Índù chuun ndaxin-nsiá burru yohó?

³⁴ Dandu nì cachi-nè:

—Stoho-ndà Señor xiñuhu xi-sí.

³⁵ Dandu nì saca-nési cuàhàn-nè ndé iá-yà; te nì chindàndòó-né sìcoto xi-ne dìquì-sí, te nì sàcùnùú-yàsi

³⁶ nì quihin-ya ichì cuàhàn-yà (ñuu Jerusalén). Te ichì yucán ndé yàha-ya nì chitànduhù nèhivì dòò-né.

³⁷ Te na sá-itúú-yá nacatacaa-ya yucù Olivo yucán, dandu nsidaa nèhivì nchícùn xì-yá, nì quesaha-né cána fuerte-ne, naquímánì-né Dios sàhà ñà-cuàhà guá milagru nì quida-ya nì xini-nè;

³⁸ te palabra yohó nduá nì cachi-nè:

—¡Ndiaha gá rey yohó vaxi cuenta xi Stoho-ndà Señor! ¡Ndiaha gá iá paz ansivi! ¡Ndiaha gá quidá mii-yá iá dìquì-xí! —nì cachi-nè.

³⁹ Dandu dava nècuàchì fariseu cuàhàn mahì nèhivì cuáhà mà, nì cachi-nè:

—Maestro, càhàn-ní xì nèhivì xí-ní (ñà-màsà cachí-nè ducán).

⁴⁰ Dandu nì cachi-yà xì-né:

—Cunaha-nsiá, nú ni cúdádí nècuàchì cána guá yohó, dandu fuerza icúmí càna stná nsidaa yùù ndoó yohó.

⁴¹ Daaní, nì sàà-yà yatni ñuu Jerusalén. Te nì indehè-yá ñuu cahnu-ma. Te nì sacu-ya sàhà nèhivì ndoó yucán,

⁴² cachí-yà:

—¡Ndahví-nsià! Vàchi meru quivì vaha xi-nsia nduá vitni. ¡A sácú vaha nú ni sàà-nsià cundaà inì-nsia nansa coo ndisa paz ñuù-nsia ni cuí! Doco cóni cundáà inì-nsia. Ñàyùcànduá, vichi sàni ndòò dèhámà nùù-nsiá, te mà níhi gá-nsià cundaà inì-nsia.

⁴³ Cunaha-nsiá, vaxi iin quivì caquixi contra xi-nsia, te natnahà-te ñuu-nsià, dandu caquidavàha-tè nama orilla ñuù-nsia ñà-cadì-te nùù-nsiá. Dandu nàá stnahá-te xi-nsiá nsidanicuú ladu.

⁴⁴ Te dacaá nsihì-tè vehe-nsia, te cahnì nsihí stná-te mii-nsiá. Mà ndóo ga ni-iin yùù idótnahá ví yohó. Nsidaájàn icúmí cuu xi-nsiá sàhà ñà-cóni nácúnì-nsià ana dacácu xi-nsiá ni cuí.

Nansa nì tavà Jesús tè-dìcò xì tè-xiín fuera patiu veheñùhu

⁴⁵ Daaní, cuàhàn-yà veheñùhu cahnú, te nì taxi nsihí-yá tè-dìcò xì tè-xiín ndoó yucán,

⁴⁶ cachí-yà xì-té:

—Dohó cachí Dios nùù tutu ìi: “Veheñùhu xi, icúmíâ cundua iin vehe ndé natácá nèhivì càcàn tàhvì nùù”. Doco sàhà mii-nsiá sàni nandua na iin lugar ndé ndoó cuàhà tècuìhnà —nì cachi-yà.

⁴⁷ Daaní, nsiquivì sáhàn-yà veheñùhu cahnu-ma, te dacuahá-yá nèhivì. Doco dùtù xícusahnú, xì nècuàchì ley xi veheñùhu, xì stná nècuàchì nihí chuun ñuu mà, nandúcu-nè nansa cui dandáñuhú-nêyà.

⁴⁸ Doco mànicùì nihì-né nansa quida-neà, vaxi nsidaa nèhivì cuáhà mà, iníni vaha-ne ñà-nduá dacuahá-yá.

20

Nansa nì cachi tè-xidandacú ñà-còò derechu xi Jesús quida-ya ñà-nduá quidá-yá

¹ Daaní, nì cuu iin quivì mà iá-yà dacuahá-yá nèhivì veheñùhu cahnu-ma. Te na meru càhàn-yà razón vaha xi Dios, dandu nì casaà stná dùtù xícusahnú, cutnáhâ-né xì nècuàchì ley xi veheñùhu, xì stná nècuàchì xidandacú nùù ñuu mà,

² cachí-nè xì-yá:

—Cachí-ní xì-nsí índù nì nìhì-ní derechu quida-ní ñà-nduá quida-guá-ní. ¿Ana divi nì dándàcù núu-ní ñà-quida-ní ducán?

³ Dandu nì cachi-yà xì-né:

—Yùhù ndácàtnùhù stnái núu mii-nsiá iñàha, te cachi-nsiá xì’.

⁴ ¿Ana divi nì dándàcù-xì núu Juan Bautista ñà-quida ì-né nèhivì? ¿A Dios nì cachi xì-né, te ò nèhivì ñuhivì?

⁵ Dandu nècuàchìmà, nì candatnuhu tnahá nsidaa-ní mii-né, cachí-nè:

—¿Ndíà cachi-ndà? Vàchi nú nì cachí-ndà divi Dios nì dándàcù-xì núu Juan, dandu cachi Jesús xì-ndà: “¿Índù chuun cóni xíníndísâ-nsiá nècuàchìmà, nú ducán?”

⁶ Doco nú nì cachí-ndà divi nèhivì ùún nì cachi xì nècuàchìmà, dandu cahni nèhivì-ndó xì yùu, vachi nsidaa-né ndeníhí-né Juan mà ñà-nì sanduu ndisa-ne iin ana nìsa cahàn cuenta xi Dios —nì cachi-nè.

⁷ Ñàyùcànduá, nì naxiconihí-né núu Jesús ñà-có-cùndáà ini-nè ana divi (nì dándàcù-xì núu Juan mà).

⁸ Dandu nì cachi-yà xì-né:

—Ni yùhù, mà cáchí stnái xì-nsiá ana divi nì dándàcù-xì núu quide ñà-nduá quidé.

Ejemplu sàhà medieru malu

⁹ Dandu nì nacani-ya xì nèhivì iin ejemplu, te dohó nì cachi-yà:

—Nisa ìa iin lamú, te nì dándàndè-ne nducu yòhò sì-úvà núu ñuhù xí-né. Dandu nì tatu-nè itnii medieru cundiaa xán, te cuàhàn xìcà-né caní tiempu.

¹⁰ Daaní, después, na sání sàà tiempu cùchi quisì vídì mà, dandu nì techuún-né iin peón xi-ne nùhù naquihin xi chii fruta mà núu medieru mà. Doco na ní sàà peón mà, nì casahni cuí-tené, te nì taxi-ténê, còò ni-iñàha nihí-né nì násáá.

¹¹ Daaní, inga tu nì techuún lamú mà inga peón. Doco medieru mà, tucutu nì casahni cuí-tené, nì quida quini-tè xì-né, te nì taxi tú-tené, còò ni-iñàha nihí-né nì násáá tu.

¹² Daaní, ñà-úni nì techuún tu lamú mà inga nèhivì, doco divini ducán nì cuu xi-né, dècuèndè nì dándàcuèhè tèmà-né, te fuerza nì tavà-ténê núu ñuhù ndé íá ñà-tàtá mà.

¹³ Ñàyùcànduá, nì cachi lamú mà: “¿Ndíà quide vichi? Ádi chicá vaha techuín dèhemaní nùhù-te, vachi vihini quidañuhu-té dèhi”, cachí-nè.

¹⁴ Doco medieru mà, na ní xini-te vaxi dèhe lamú xi-tè, dandu nì candatnuhu tnahá-te, cachí-te: “Tè-yòhó nduú tè-icúmí ndutahvì xì ñuhù yohó. Vichi cahni-ndaté chicá vaha, dandu mii-nda nanduu-nda stoho ñuhù yohó”, nì cacachí-te.

¹⁵ Ñàyùcànduá, nì tavà-té nècuàchìmà iladu núu ñuhù mà, te nì casahni-ténê.

’Pues vichi, ¿ñdíà nduá icúmí lamú mà quida-ne xì medieru mà?

¹⁶ Icúmí-nè nùhù-nè cahni nsihí-nète, dandu nanducu saa-né inga ana quidachuún ñuhù xí-né —nì cachi-yà.

Dandu nì cachi nèhivì xí-inini ma:

—¡Ay! ¡Ndiaha ini Dios, màsà cúú ducán!

¹⁷ Dandu nì indehè-yánè, te nì cachi-yà:

—Nacua cachí núu tutu ì xì Dios, ñà-jaàn nduá icúmí cuu, vachi dohó cachá’:

Nì ìa iin cavà nì cahíchì ini albañil. Doco vichi sàni sàà mà nì sàcùndua yùu vico esquina vehe.

¹⁸ Te nsidaa ana caquìhi sàhà-xì cavà mà, icúmí-nè nacuèhè-nè. Te nsidaa ana nacava cavà mà dìquì-xì, tàdì nchìhì-nè quida-mà —nì cachi Jesús.

Nansa nì cachi Jesús sàhà renta xi ñuu-ndà

¹⁹ Dandu dùtù xí-cusahnú, xì nècuàchì ley xi veheñùhu ma, nì cuni-nè tnii-neyà hora mà, vachi nì cundaà ini-nè ñà-sàhà mii-né nì nacani-ya ejemplu mà, doco mànicùì tnii-neyà, vachi yúhì-nè nèhivì cuàhà mà.

²⁰ Ñàyùcàndùá, nì techuún-né nèhivì cùhùn quida maña, datiaá uun-ne nduú-né nèhivì vaha, te cunini vaha-ne nansa cachí-yà, áma níhìndèè-né càhàn tnùhu-ne sàhà ñà-nduá cachí-yà, te ducán tnii-neyà dayáha-neyà ndahà gobernador.

²¹ Ñàyùcàndùá, cuàhàn nècuàchìmà nùù-yá, te nì ndàcàtnùhù-né, cachí-nè:

—Maestro, ináhá-nsî mii-ní, ana ndàà cuisì inì-xi nduu-ní, te cuisì ñà-ìá viì dacuaha-ní nèhivì. Ni có-yûhî stná-ní ni-iin nèhivì; còó, vàchi chináhá víi-ní ñà-nduú ichì váha Dios.

²² Ñàyùcàndùá, cuní-nsì cachì-ní xì-nsí, ¿a vátùni sáha Dios lugar ñà-chiyàhvi-nda renta nùù rey cahnú César, á coó?

²³ Doco Jesús, sàni cundaà ini-yà ñà-có-xìcàn tnùhù sahnú ndisa-ne nùù-yá nduá. Ñàyùcàndùá, nì cachi-yà xì-né;

—¿Índù chuun cuní-nsià quida-nsia maña nùí?

²⁴ Dacuní-nsià yùhù iin dìhùn cundehí. Bueno, vichi cachì-nsia xí ana dìnúù-xí, te ana dìquívi-xí itúú icà dìhùn yohó.

Te nì cachi-nè:

—Divi rey cahnú César.

²⁵ Dandu nì cachi-yà xì-né:

—Nú ducán nduá, dandu nacuàha-nsia César ñà-nduá icúmí-nsiâ cuàha-nsiàte, te cuàha stná-nsiâ Dios ñà-nduá ndiá icà-nsiâ cuàha-nsiayà —nì cachi-yà.

²⁶ Ñàyùcàndùá, (nì cundaà ini nèhivì nì ndàcàtnùhù mà) ñà-mà cùì dadaná-neyà na càhàn-yà nùù nèhivì cuáhà mà. Ñàyùcàndùá, nì ndulocó-nè, te dadí uun nì candòo-ne.

Nansa nì cachi Jesús iá nansa natiacu-ndà

²⁷ Daaní, nì casaà itnii nècuàchì saduceu nùù-yá. Te nècuàchìmà, có-xìníndísâ-né ñà-icúmí-ndà natiacu-ndà. Ñàyùcàndùá, nì xìcàn tnùhù-né nùù-yá,

²⁸ cachí-nè:

—Maestro, ñà-yòhó nduá nì tiaa Moisés quida-nda: nú sàni xìhì iin tiàa, doco còò déhe-ne nì ndóo (xi ñahàdihí-nè), dandu icúmí ñani nsì ma nandàhà-né xì ñahàcuàán mà áma cóó iin dèhe-ne; dandu quida-nda cuenta na ian dèhe nsì ma nduú mée mà.

²⁹ Pues cunaha-ní, nì sandoo ùsà ñàní. Te nècuàchì chicá sahnua-ma, nì nandàhà-né xì iin nècuàchì ñahà, doco nì xìhì-nè, te còò déhe-ne.

³⁰ Dandu ñani-nè chicá nchícùn gà mà, nì nandàhà stná-nè xì nècuàchìmà, doco nì xìhì stná nècuàchì ùì mà, te còò stná dèhe-ne.

³¹ Daaní, nì nandàhà nècuàchì ùnì xì ñahà mà, doco nì xìhì stná-nè; te divi ducán nì cuu xì nsì-úsà ñàní mà; doco divini, còò ni-iin dèhe nsidaa-né.

³² Daaní, último nì xìhì stná nècuàchì ñahà.

³³ Ñàyùcàndùá, na sàà quìvì (cachí-nsià) natiacu nsì, ¿índù tiàa ma nacuaca xì nècuàchì ñahà mà ñà-nsì-úsà-nè nìsa ìa xi-ñá? —nì cachi-nè.

³⁴ Dandu nì cachi Jesús xì-né:

—Ñà-ndàà nduá, tùha nèhivì ñuhiví yohó nandàhà-né.

³⁵ Doco nèhivì natùì natiacu cundoo inga ñuhiví, mà nándàhà gá-nè.

³⁶ Ni mà cúí gà-nè, vàchi cuàhàn-nè ndudava-ne xì ángel, cunduu-ne dèhe ndisa Dios, vàchi ñà-sàni natiacu-nè cundua.

³⁷ Doco sàhà chuun ñà-natiacu-ndà, claru nì cachi Moisés sàhana sàhà ñà-jaàn na ní nacani-ne sàhà yutnù tìì (xìxìn); nì cachi-nè ñà-divi Stoho-ndà Señor nduú Dios càhvi nsì-Abraham, xì nsì-Isaac, xì nsì-Jacob.

³⁸ (Ñàyùcàndùá, itiácú ìì nsì ma), vàchi nècuàchì nì xìhì dahuun ndisa, mà cúí cahvi-né Dios; còó, cuisì nèhivì itiácú càhvi xi-yá. Vàchi nùù mii-yá, itiácú nsidaa ana nduú nèhivì —nì cachi Jesús.

³⁹ Dandu nì naxiconihí dava nècuàchì ley xi veheñùhu, cachí-nè:

—Vátùni cachí-ní, Maestro

⁴⁰ Daaní, nì nsihi nì càhàn-yà xì-né ducán, còò gá iin ni sáhandee inì-xi ndàcàtnùhù gá xì nùù-yá sàhà ni-ìñàha.

¿Ana divi nduú yohòtéhè Cristu?

⁴¹ Dandu nì cachi Jesús xì nèhivì cuáhà mà:

—Cachí nèhivì, yohòtéhè xì-ndà David cunduu (rey ndiaha nani) Cristu. Doco ¿nansa iájàn?

⁴²⁻⁴³ Vàchi mii David mà, nì tiaa-ne nùù libru ìi nani Salmos, te dohó nì cachi-nè: Nì càhàn Yua-nda Dios xì Stohi (divi Cristu), nì cachi-yà: “Yohó coo-ní ladu cuahí ndè cachi sàà cundeí nùù nsidaa ana xìnì ùhì xì-ní, dandu cusahnú fuerte-ní nùù-né”, nì cachi Dios.

⁴⁴ Cundehè-nsiá, nì cachi David ñà-Stoho-nè nduú Cristu. Doco nú ducán nduú-yá, dandu ¿índù modo cunduu stná-yà iin descendencia xi-ne? (Doco ñà-ndàà nduá.) —nì cachi Jesús.

Ñà-nduá nì cachi Jesús sàhà nècuàchì ley xi veheñùhu, ñà-có-quidá-né cumplir; cachí-yà

⁴⁵ Daaní, nì cachi-yà palabra yohó xì nècuàchì dacuahá-yá, inínì nsidaa nèhivì yucán:

⁴⁶ —Còtó quida-nsia na xíquida nècuàchì ley xi veheñùhu, vachi ñà-diì xì-né nduá cacanu-ne cundixi-ne sicoto quihín vico, te casàhú tñùñuhu nèhivì xì-né yàhvi. Te na sàhàn-nè veheñùhu, ò ndoó-né iin vicò, dandu nandúcú-nè lugar ndé chicá ndiaha cundoo-ne.

⁴⁷ Te tùha stná-nè (tnii diqui-né ley, te) xidándiáá-nè vehe nècuàchì nì xihì ìi-xí, dandu después sàcuíta-ne nacuatú cuáhà-né na ian ndisa vaha guá-nè. Sàháyucànduá, iin castigo chicá fuerte icúmí-nè nìhì-né —nì cachi Jesús.

21

Nansa nì nacuni Jesús cuáhà gá ndiaá promesa tii nì sàha nècuàchì ñahà ndahví

¹ Iá-yà veheñùhu cahnú, te nì ndacoto-ya nì xini-yà daquée tècuicà promesa xi-tè ini alcancia xi Dios.

² Te nì xini stná-yà iá iin nècuàchì ñahà ndahví nì xihì ìi-xí, te nì dàquée-ne ùi ñà-ùhùn centavu.

³ Dandu nì cachi-yà:

—Ñà-ndàà nduá cachí xì-nsiá, chicá más nduá nì sàha ñahà ndahví jaàn nùù ñà-nì sàha nsidaa gá nèhivì yucán.

⁴ Vachi nsidaa gá-nè, cuisì ñà-cùyódo nùù-né nduá nì sàha-ne. Doco nècuàchì ñahà yohó, mate ndahví dahuun-ne, doco nì sàha-ne nsidanicuú òhùn sàhà ñà-cuiin-ne ñà-cutiacu-nè.

Ñà-nduá nì cachitnùhu Jesús icúmí cuu xi veheñùhu cahnú iá ñuu Jerusalén tiempu xi-ya

⁵ Daaní, nì quesaha dava-ne nì càhàn-nè sàhà veheñùhu cahnú, na cuaha guá iá yùù nahnú nì cuyucàn, te na cuaha guá iá promesa nì sàhatahvì nèhivì nì nducutá, cachí-nè. Ñàyucànduá nì cachi-yà xì-né:

⁶ —Cunaha-nsiá, vaxi iin quivì icúmí nèhivì ducùn-né nsidaa ñà-nduá indéhe-nsiá yohó, ni mà códotnahá gá ni-iin yùù yohó.

Ñà-nduá cuáhàn cuu quivì vaxi xi-nda

⁷ Dandu nì ndàcàtnùhù-né nùù-yá, cachí-nè:

—Maestro, ¿índù quivì cuu ñà-nduá nì cachí-ní jaàn? ¿Índù milagru coo ñà-cundàà ini-nsi sà-ítuú quivì mà?

⁸ Dandu nì cachi-yà xì-né:

—Cuidadu cundoo-nsia màsà dándáhvì ni-iin nèhivì-nsiá. Vachi cuáhà ana icúmí quixi danani uun nduú-né yùhù, te cachi iin iin-ne xì nèhivì ñà-Cristu nduú-né. Te ò cachí-nè: “Vichi ndisa sàni sàà quivì (xí-yá)”. Doco mii-nsiá, màsà cunchícùn-nsiá nècuàchì mà.

⁹ Te nú cunitnùhu-nsia iá cuàhà guerra, ò iá revolución, màsà yúhî-nsià, vâchi fuerza icúmí cuu ducán primeru. Doco tàñâha ga nsihi tiempu yohó nduámà, iá gà ñà-vàxi cuu.

¹⁰ Dandu nì cachi stná-yà xì-né:

—Cunaha-nsiá, ñuu xì ñuu icúmíâ nàà stnahá. Te cuàhà rey, icúmí-tê dandacú-te coo guerra xì inga ñuu.

¹¹ Te icúmí tnâa fuerte, te quixi stná tnama yohó te yucán, te coo cuàhà stná cuèhè cuàhà ñuu; te ndè ansivi icúmí coo cuàhà seña nahnú dayúhî xì nèhivì.

¹² 'Doco na táñâha ga cuu nsidaájàn, dandu icúmí nèhivì tnii-ne mii-nsiá, te quida quini-ne xì-nsiá, cundaca-ne mii-nsiá cùhùn nùù tè-xídandacú veheñùhu, te chicadi stná-nè mii-nsiá vehecàa. Te icúmí stná-nè datnátuu-ne mii-nsiá nùù rey xì nùù gobernador (ñà-daquéè cuàchi-ne dìquì-nsiá). Nsidaájàn icúmí-nè quida-ne xì-nsiá sàhà ñà-nchícùn-nsià yùhù.

¹³ Dandu cundua quivì quida tocar mii-nsiá datúi stná-nsià nùù nsidaa-né ñà-nduá xiníndísâ-nsiá.

¹⁴ Doco iin-ni cunihnu ini-nsià; màsà nácání ini-nsià nansa nachutnahá víi-nsiá palabra naxiconihí-nsiá nùù nècuàchì gobiernu mà,

¹⁵ vâchi mií, icúmí chindeí sàxínítnùnì-nsià ñà-vàtùni càhàn nchichí-nsià, te naxiconihí víi-nsiá nùù-né. Te mii-né, ni mà nánìhì tnùnì ini-nè nansa naxiconihí-né nùù-nsiá. Còò, mà níhì-né nacahnù-nè mii-nsiá.

¹⁶ 'Daaní, ndè stná yuadìhí-nsiâ, ò ñani-nsià, ò tnaha ga-nsià, ò amigo xi-nsia, icúmí-nè cahìn stná-nè mii-nsiá nùù tè-xídandacuma; te dava-nsia icúmí-nè càcàn-nè ñà-cui-nsià.

¹⁷ Te sàhà yùhù icúmí nsidaa nèhivì cuni ùhì-nè mii-nsiá.

¹⁸ Doco mà sàà-nsià ndañuhu-nsiá (nùù); ni-iin idìdìni-nsiá mà ndañúhù.

¹⁹ Te nú iin-ni ni cúníndísâ-nsiá, dandu nìhì-nsiá cutiacu ndisa anima-nsià.

²⁰ 'Doco quivì cuni-nsià inicutu sàni natnaha soldadu ñuu Jerusalén yohó, dandu ñà-jaàn cundaà inì-nsia sà-ítúú quivì cuàhàn-te dandañúhù-tê ñuu yohó.

²¹ Ñàyùcànduá, na sàà quivì mà, ni cunúdehé nsidaa nèhivì ndoó ladu Judea yohó, te cundoo dehé-nè yucù. Te nècuàchì ndoó ini ñuu yohó, ni cáquéè-né fuera, te nècuàchì ndoó fuera, màsà nánshvi ga-nè ñuu.

²² Vâchi quivì yucán cunduu quivì nìhì (cuàhà nèhivì) castigu, te cuu ndisa nsidaa ñà-nduá nì cachitnùhu tutu ìì xí Dios sànaaha.

²³ ¡Ndahví nècuàchì ñahà cuhí cuàhàn tùinuù mèè-xi! Te ¡ndahví stná nècuàchì icúmí xí mèè chichi! Vâchi quivì yucán cuàhà gà tnùndoho icúmí coo inicutu ñuu yohó; cuàhà castigu icúmí nèhivì yohó nìhì-né.

²⁴ Te cuàhà gà-nè cui nùù guerra, te cuàhà gà stná-nè cundaca-tè fuerza cùhùn ñuu xicà (ñà-quadachuún-né). Te icúmí nècuàchì inga raza dandacú-né nùù ñuu Jerusalén yohó dècuèndè nsihi tiempu iá permisú quida-ne ducán.

Nansa icúmí cuu quivì naxicocúin Jesús

²⁵ 'Quivì yucán icúmí coo cuàhà seña nùù orá, xì nùù yoo, xì stná nùù sìtnùù; te yáha ga icúmí ndulocó nèhivì ñuhivì yohó, te nacani cuaá ini-nè na tiácú-nè ñà-fuerte guá cahá ndee tècuí mar; te nacuahnú ducún-te.

²⁶ Dècuèndè cuñaà-né ñà-yúhî guá-nè ndoó-né ndiatú-né cuu ñà-nduá cuàhàn cuu ñuhivì. Ndè stná sìtnùù nahnú itándiaa ansivi, icúmí-sì ndacùchì ndee-sí.

²⁷ Dandu natùì yùhù ana nduú Tnaha Nèhivì Ñuhivì, cundehè nèhivì yùhù sàmànui mahì vicò nahnú. Cahnú poder cucumí, te yáha ga ndiaha coo inicutu ndé ié`.

²⁸ Daaní, quivì quesaha cuu nsidaájàn, dandu contentu ni cúndóó-nsiá; ndacoto ndiaá-nsià dìquì-xí, vâchi sà-ítúú hora càcu-nsia —nì cachi-yà.

²⁹ Dandu nì nacani-ya xì-né inga ejemplu, te dohó nì cachi-yà:

—Cundehè-nsiá nù-higuera jaàn, ò ndéni yutnù ní cui;

³⁰ nú indéhe-nda sàni ndunsidi-nú, dandu ñà-yúcán cundaà ini-ndà sà-ítúú tiempu ihni.

³¹ Pues ducán stná mii-nsiá, quìvi cuni-nsià cuú ñà-ndùá sàni cachì xì-nsiá, dandu vātùni cundaà inì-nsia ñà-sà-ítúú tiempu cusahnú Dios ñuhiví nduá.

³² Ñà-ndaà nduá cachí, mà sàà cui nsihi nēhivì itiácú vichi dēcuēndè cachi sàni cuu ndisa nsidaa ñà-ndùá sàni cachì xì-nsiá vichi.

³³ Cunaha-nsiá, icúmí sàà ansivi xì ñuhiví ndañuhá, doco palabra cachí yùhù, còó, mà nunca sàà ndañuhá.

³⁴ 'Cuidadu cundoo-nsia, còtó nandòdó-nsiá ichì váha, vāchi nú quidá cuáhà-nsiá vicò, te xini-nsia, te ò nacání cuáhà inì-nsia sàhà vida xi-nsia ñuhiví yohó, pues vihini nandòdó-nsiá ichì mà, dandu nanàà sàà quìvi coo tnùndoho, te có-nìhnú inì-nsia.

³⁵ Vāchi na ian (nanàà tní iin quisì ini) iin trampa, ducán icúmí quixi tnùndoho dìqui nēhivì inicutu ñuhiví.

³⁶ Ñàyùcànduá, cunihnu tūha inì-nsia, te càcàn tàhvi-nsiá nicanicuahàn sàhà-ñá vātùni càcu-nsia nùù nsidaa tnùndoho vāxi ma, te nihitáhvi-nsiá natùì-nsia màcùndoo-nsia nùù yùhù ana nduú Tnaha Nēhivì Ñuhiví —nì cachi Jesús.

³⁷ Quìvi yucán, veheñuhu cahnú iá-yà ndui, dacuahá-yá nēhivì, te ñuú núhù-yà (iin ñuu tii iá) Yucù Olivo.

³⁸ Dandu nsiquívì dàtnàà vāxi tu-ya veheñuhu. Ñàyùcànduá, nēhivì cuáhà mà, naha vāxi stná-nè veheñuhu, vāchi cuní-nè cunini-ne nansa cachí-yà.

22

Nansa nì ndatnuhu tnahá nēhivì nandúcú-nē nansa tnii-ne Jesús

¹⁻² Vicò pascua nisa nani iin vicò nisa xixi-ne pan có-ndùtáchí. Te sà-ítúú vicò mà vāxan, te nì ndatnuhu tnahá dùtù xícusahnú xì nēcuàchì ley xi veheñuhu, nandúcú-nē nansa nìhì-né cahnì-né Jesús, vāchi yúhì-nè (cunitnùhu) nēhivì cuáhà sàhàmà.

³ Daaní, nì quìhvi ñà-malu ini anima iin tiàa dacuahá Jesús nani Judas Iscariote.

⁴ Ñàyùcànduá, nì sàhàn-nè nùù dùtù xícusahnú. Te nì càhàn-nè xì nēcuàchìmà, xì stná tè-xídandacú nùù policia, nì ndatnuhu-né xì nēcuàchìmà nansa cui quida-ne, te dayáha-ne mii-yá ndahà nēcuàchìmà.

⁵ Te nēcuàchìmà, nì cacudiì ini-nè, te nì ndòò sahnú-né chiyàhvi-ne.

⁶ Ñàyùcànduá nì cachi Judas vātùni iámà, te nì quesaha-né nì nanducu-né nansa nìhì-né dayáha-neyà ndahà nēcuàchìmà, doco nì cúnduá na có-ndòò cuáhà nēhivì indéhe.

Nansa nì cutnahá Jesús xì compañeru-yà nì xixi-ya Cena ù

⁷ Daaní, nì sàà vicò xixí-né pan có-ndùtáchí, te quìvi yucán xihì stná iin lelù nduú promesa siempre sàha-ne vicò pascua mà.

⁸ Ñàyùcànduá nì techuún Jesús Pedro xì Juan, cachí-yà xì-né:
—Cuahán-nsià quidayucun-nsià ndé cuxi-nda vicò pascua.

⁹ Te nì cachi-nè xì-yá:

—¿Índù divi cuní-ní cùhùn-nsì quidayucun-nsì?

¹⁰ Dandu nì cachi-yà xì-né:

—Na sàà-nsià ñuu mà, icúmí-nsià ndacùhun tnahá-nsiá xì iin tiàa idádocó xi iin yoo tēcuí. Divi nēcuàchìmà cunchicùn-nsià cùhùn dēcuēndè vehe ndé quìhvi-ne.

¹¹ Dandu càhàn-nsià xì nēcuàchì divéhé-xí má cachi-nsià xì-né ñà-dòhó cachí maestru xì-né: “¿ndévi iá vehe cahnú ndé cuxi-ya comida pascua xì nēcuàchì dacuahá-yá?”

¹² Dandu nēcuàchì divéhé-xí má, icúmí-nè dacuní-nè mii-nsiá índù iá iin vehe cahnú pisu dìqui-xí ndé sà-itá víi yutnù. Yucán nsidayucun-nsià ñà-cudiní-ndà.

¹³ Dandu nì caquihin nēcuàchìmà ichì cuáhàn-nè. Te nacua nì cachi-yà xì-né, ducán ndisa nì cuu. Ñàyùcànduá yucán nì quidayucun-nè comida pascua.

14 Daaní, na ní sàà hora mà, dandu nì sàà-yà yucán, te nì sàcòo-ya xì nsì-ùxìn ùì nècuàchì nì nìhì chuun nùù-yá.

15 Te nì cachi-yà xì-né:

—Yùhù, ñuhú cuísi inì cutnahí xì-nsiá cuxi-nda vicò pascua yohó, dandu después icúmí ndohi.

16 Vàchi cachí xì-nsiá, mà cúxí guè comida vicò pascua ndè cachi sàà tiempu cusahnú Dios ñuhívì yohó; vàchi vicò yohó, ejemplu nduá, doco na sàà quívì cusahnú-yá, dandu cunduumà ñà-sànì cuu ndisa ñà-nduá cuní cachi vicò yohó —nì cachi-yà.

17 Dandu nì tñii-ya pocillu, te nì naquimanì-yá Dios (sàhà ndutè sì-úvà ñuhu-ma), te nì cachi-yà:

—Tñii-nsia pocillu yohó, te coho nsidaa-nsiá chichí-tê.

18 Vàchi cachí xì-nsiá, mà cóhó guè ndutè sì-úvà ndè cachi sàà tiempu cusahnú Dios ñuhívì yohó.

19 Dandu nì tñii stná-yà iin pan, nì naquimanì-yá Dios sàhá, te nì dàcuàchì-yáñà; dandu nì dasàn-yáñà nùù nsidaa-né, te nì cachi-yà xì-né:

—Pan yohó, nahi iquícúñuì nduá, vàchi cuàhìn cuàhatahvì vida xi (cuì) sàhà nsidaa-nsiá. (Cuxi-nsia vichi, dandu después), nacua nì quida-nda vichi, ducán quida stná-nsiá (quívì nùù-xì) sàhà-ñà nsinuu inì-nsia yùhù —nì cachi-yà.

20 Daaní, divini ducán nì quida stná-yà xì pocillu mà: na ní nsihì nì xixi-ne, dandu (nì tñii-yáñà), te nì cachi-yà:

—Ñà-ñuhú pocillu yohó nduú seña xi ichì saa nacóí cunchicùn nèhivì, vàchi nahi nì nduá, te icúmí nì cuìtià sàhà-ñà nìhítàhvì ndiaha-nsiá.

21-22 'Doco cunaha-nsiá, tiàa cuàhàn cahin xì yùhù ana nduú Tnaha Nèhivì Ñuhívì, iá-nè yohó xixí tàcá-ndà xì-né nùù mesa yohó. Te mate ñà-ndáà nduá, icúmí cuì, vàchi ducán nì chitnùní inì Dios, doco tiàa cuàhàn cahin xì, ¡ndahví-nè! —nì cachi Jesús.

23 Ñàyùcànduá, nì quesaha nèhivì ndoó yucán nì xicàn tñuhù stnahá-né nùù-né ana nduú tiàa cuàhàn quida ducán cahan-né.

Nansa nì cuàà nècuàchì dacuahá-yá, iin iin-ne cuní-nè cunduu-ne ana chicá ndiaá

24 Nì cuàà stná-nè sàhà-ñà ana cunduu nècuàchì chicá ndiaá.

25 Ñàyùcànduá, nì cachi-yà xì-né:

—Tè-cùsàhnú inga ñuu, fuerte cusáhnû-te nùù nèhivì ñuù-te. Yua ñuu dandacú víi cachí tè-xícusahnuma sàhà mii-té.

26 Doco mii-nsiá, màsà quídá-nsiá na quidá tè-yucán. Vàchi nsidaa ana nìhì chuun dandacú nùù-nsiá, icúmí-né cunihnu (ndahví inì-nè) na iin nèhivì chicá chii; vàchi iin nècuàchì chicá idónuu, xiñuhu cunduu-ne nahi ana xinúcuáchí.

27 Vàchi nì cachí-ndà iá iin lamú iá xixí, te iá stná iin nècuàchì xinúcuáchí (nùù chuun yuhùnùhú), pues ¿ana chicá idónuu cahan-nsiá? ¿Amádi lamú mà nduú ana chicá idónuu? Doco cundehè-nsiá yùhù, nansa quidé xì mii-nsiá: na ian quidá iin peón xinúcuáchí, ducán nduú modo xi quidé xì-nsiá.

28 'Mii-nsiá nduú nècuàchì iin-nì sàni tenchicùn xì, te nì yàha stná-nsiá nsidaa tñùndoho nì yàhi.

29 Ñàyùcànduá, nacua nì sàha Yué yùhù chuun cusahnúí, ducán nìhítàhvì stná mii-nsiá quide, nìhì stná-nsiá chuun dandacú-nsiá.

30 Vàchi na sàà quívì cusahnúí, dandu icúmí stná mii-nsiá cutnahá-nsiá xì cundoo-nda cuxi-nda nùù mesa xi, te nìhítàhvì stná-nsiá cundoo iin iin-nsia silla ndiaha, dandacú-nsiá nùù ùxìn ùì ñuu-ndà ndé cundoo nèhivì raza-ndà Israel.

Nansa nì cachi Jesús xì Pedro ñà-ináhá-yâ icúmí-nè nacuaà-néyà

31 Dandu nì cachi Stoho-ndà Señor xì Simón (Pedro):

—¡Ay, Simón! Nì xicàn ñà-malu permisú quida ndevàha-sì xì anima-ní na ian quidà-ndà na dandiáchí-ndá nùù.

³² Doco yùhù, nì xicàn tàhvi sàhà-ní ñà-màsà nándòdó-ní yùhù, Simón. Dandu mii-ní, quivì sàni sàà-ní naxicocuïn inì-ní, dandu nacuaàhandee inì-ní ñanìtnaha-ní.

³³ Dandu nì cachi Simón xì-yá:

—Señor mío, iin-ni ié` dispuestu cunchicuïn mii-ní mate ni chícádí-nèndó, te ò ni cahní-nèndó.

³⁴ Doco nì cachi-yà xì-né:

—Cachí xì-ní, Pedro: ñuú vichi na táñaha ga coto lehe sindùhá, te sàni nacuaà-ní yùhù ùni xichi.

Nansa nì cachi Jesús na sá-ítúú hora tnii nèhivì-yá

³⁵ Dandu nì cachi stná-yà xì nsidaa-né:

—Na ní techuín mii-nsiá nì xicanuu-nsia daa, nì dándàcuí nùù-nsiá ñà-ní ndóo cartera xi-nsia, xì stná morral xi-nsia, te ni màsà cúnhí stná-nsià inga ndisàn-nsiá cùhùn. Pues, (vichi cachi-nsià xì), ¿a ní quidamanì iñaha nùù-nsiá quivì yucán?

Dandu nì cachi-nè xì-yá:

—Còó.

³⁶ Dandu nì cachi-yà xì-né:

—Pues, tucu iá vichi, vachi xiñuhu-ñá cunihi-nsia cartera xi-nsia na cùhùn-nsià, te cunihi stná-nsià morral xi-nsia cùhùn. Te nècuàchì có-icúmí espada, chicá vaha ni dicó-né dùhnù-né, te cuiin-ne ian.

³⁷ Vachi dohó cachá` sàhí nùù tutu ìi: “Nì quida nèhivì cuenta na ian nduú-yá iin tiàa malu”. Ñàyùcàndùá, yùhù cachí` (xì-nsiá), fuerza icúmí cuu ducán xí, vachi nsidaa ñà-nduá cachá` sàhí, icúmíâ cuu ndisa.

³⁸ Dandu nì cachi-nè xì-yá:

—Stoho-nsi Señor, cundehè-ní yohó: Ùi espada nihí-nsí.

Dandu nì cachi-yà xì-né:

—¡Daaní xì palabra jaàn!

Nansa nì sàhàn Jesús huertu nani Getsemaní, te nì xicàn tàhvi-yá nùù Yuamáni-yá Dios

³⁹ Daaní, nì quee-ya vehe, te nacua nduú estilu xi-ya cuàhàn-yà Yucù Olivo, te nchícùn stná nècuàchì dacuahá-yá.

⁴⁰ Te na ní sàà-yà lugar cuní-yà, dandu nì cachi-yà xì-né:

—Càcàn tàhvi-nsiá nùù Dios sàhà-ñá màsà dándáhvì ñà-malu mii-nsiá.

⁴¹ Dandu nì cuxica tii-yá chicá nùù-xí, nacua sáà dacana-nda iin yùù. Te yucán nì sàcuïn sísì-yá nì xicàn tàhvi-yá nùù Dios,

⁴² cachí-yà:

—Yuamáni`, xicàn tàhvi nùù-ní. Nú cuní-ní, dandu dacúxió-ní tnùndoho icúmí yàhi, vachi nahi (ñà-úà ñuhú iin) taza, ducán nduá nùí. Doco màdi ñà-nduá cuní yùhù ni cúnduá; còó, ñà-nduá cuní mii-ní —nì cachi-yà.

⁴³ Dandu nì ndecunu iin ángel nì quixi ansivi, te nì chindee-né mii-yá ñà-nìhì gá-yà valor xi-ya.

⁴⁴ Vachi yáha ga nacání ini-yà. Ñàyùcàndùá chicá fuerte nì càhàn-yà xì Dios. Te nì cana cuàhà tètñi-yá, doco tètñi mà, na ian cóyo gota nahnú nì, ducán nì cóyo-tè ñuhù.

⁴⁵ Daaní, nì ndacuiin-yà vaxi-ya ndé itánduhù nècuàchì dacuahá-yá, te nì xini-yà xíquidi-nè ñà-cuàhà guá ndoó-né tnùnsí ini.

⁴⁶ Ñàyùcàndùá, nì cachi-yà xì-né:

—¿A ñà-sàni quidì-nsia nduá? Chicá vaha ndacuìta-nsia, te càcàn tàhvi-nsiá nùù Dios sàhà màsà dándáhvì ñà-malu mii-nsiá.

Nansa nì tnii nèhivì Jesús, te nì suhni-nèyà

47 Na cáhàn ìi-yá xì nècuàchìmà, dandu nì quesaa cuàhà nèhivì. Te iin tiàa nì sanchicùn xì-yá nduú ana ndàcà-xì-né vaxi, divi Judas, vachi iin ana nìsa cutnahá xì nsì-úxìn iin ga nècuàchì dacuahá-yá nduú-né. Te divi-ne nì tnàtuu-ne nùu-yá, nì chítú-nè nùu-yá.

48 Dandu nì cachi-yà xì-né:

—Judas, ñà-nì chítú-nì nùí, ¿a ducán nduú modo cahín-nì yùhù ana nduú Tnaha Nèhivì Ñuhiví?

49 Dandu compañeru-yà, nì cundaà ini-nè nansa cuàhàn cuu, ñàyùcànduá nì cachi-nè xì-yá:

—Stoho-nsì Señor, ¿a cáni-nsí mii-né xì espada vichi?

50 Dandu iin compañeru-yà, nì cani-ne espada xi-ne iin tiàa quidáchúûn nùu dùtù cusáhnû, te nì tàhndè tùtnù-té ladu cuahá-te.

51 Doco nì cachi-yà:

—¡Daaní xì ñà-jaàn!

Te nì chituu-ya òinìndàhá-yà tùtnù témà, te nì nduvàha dahuan.

52 Dandu nì cáhàn-yà xì nsidaa nèhivì nì caquesaa tnii xi-yá, divi dùtù xícusahnú, xì tè-dàndàcú xíndiaa veheñùhu, xì dava ga stná nècuàchì nihí chuun, te nì cachi-yà xì nsidaa-né:

—A ducán nduú modo (tnií-nsiá yùhù), vaxi-nsia nihí-nsiá espada xì garroti na ian tècùhnà nduí,

53 mate nsiquívì nìsa ìe xì-nsiá veheñùhu cahnú, te cónì tnii-nsiá yùhù. Doco vichi, meru tiempu xi mii-nsiá nduá, divi tiempu quida quini guá mii-sí dandacú nùu ichì ñáa.

Nansa nì nacuaà Pedro Jesús

54 Dandu nì tnii-tèyá nì saca-tèyá cuàhàn-te ndè ini vehe dùtù cusáhnû. Te Pedro, nchícùn xica ní-né mii-yá cuàhàn-nè, (te nì yàha stná-nè) ini patiu vehe ma.

55 Dandu nèhivì ndoó yucán, nì xicùn-né iin ñuhu mahì patiu mà, te nì sàcùndoo-ne; te nì sàcò stná Pedro mahì nsidaa-né.

56 Doco iin ñahà chii quidáchúûn yucán, nì xinì-ña Pedro na iá stná-nè ndé tnúu ñuhu mà, te nì indehè váha-ñané, cachí-ña:

—Nècuàchì yohó, compañeru Jesús nduú stná-nè.

57 Doco Pedro, nì nacuaà-néyà, cachí-nè:

—Yùhù, có-ínáhî Jesús, señorita.

58 Daaní, después, indéhe stná inga nèhivì-né, te nì cachi-nè:

—¿Amádi iin nèhivì xí Jesús nduú stná mii-ní?

Doco nì cachi Pedro:

—Còó, mà ndisá, señor.

59 Daaní, nì yàha inga hora, te fuerte nì cachi inga nèhivì (xì compañeru-nè):

—Ñà-ndáa nduá, nècuàchì yohó nduú iin nèhivì nì cutnahá stná xì Jesús, vachi nècuàchì ladu Galilea nduú stná-nè.

60 Doco Pedro, nì cachi-nè:

—Señor, nì có-cùndáa inì ñà-nduá cáhàn-ní sàhà-xí.

Te cáhàn ìi Pedro palabra mà, te momentu mà nì xito lehe.

61 Dandu Stoho-ndà Señor, nì nacuíco-yá yàtà-yá, nì ndacoto-yanè. Te sàhà ñà-yùcán nduá nì nsinuu ini-nè nansa nì cachi-yà xì-né daa ñà-tañáha ga coto lehe, te ùnì xichì sàni nacuaà-néyà.

62 Ñàyùcànduá, nì quee-ya iladu patiu mà nì sacu cuahà-né.

Nansa nì quida quini policía xì Jesús, te nì sàcùndiaà-teyá

63 Daaní, tiàa xíndaca xi-yá, nì sàcùndiaà-teyá, te nì cani-tèyá.

64 Nì chidàhvi-tè nùu-yá, te nì cani-tèyá, cachí-te xi-yá:

—¡Cachi cuàá-nì ana nì cani xi-ní!

65 Te cuàhà gá stná iñàha nì cacachì-te nì cahíchì uun inì-teyá.

Ñà-nduá nì cachi Jesús na ní sàà-yà nùù Junta Cahnú

⁶⁶ Daaní, na ní tùinuù, nì nataca nsidaa nècuàchì nduú Junta Cahnú; nì càna nècuàchì sahnú dandacú nùù ñuu yucán, xì stná dùtù xícusahnú, xì stná nècuàchì ley xi veheñùhu. Dandu nì dàtnátuu-ne Jesús nùù nsidaa-né, te nì cachi-nè xì-yá:

⁶⁷ —Nú divi Cristu ndiaha nduu-ní, dandu cachi ndàà-ní xì-nsí.

Dandu nì cachi-yà xì-né:

—Nú ni cachí xì-nsiá, mà nunca cunindisá-nsiá.

⁶⁸ Te ò nú ni ndàcàtnùhí nùù mii-nsiá iñàha, nì mà nàxícóníhí stná-nsiá nùì, te ni mà dáñá-nsiá yùhù.

⁶⁹ Doco yùhù ana nduú Tnaha Nèhivì Ñuhivì, dècuèndè vichi cuàhàn duha icúmî coi ndahà cuahá mii-yá ana chicá cusáhnù, divi Dios.

⁷⁰ Ñàyùcànduá, nsidaa nècuàchì Junta mà, nì xicàn tnùhù-né nùù-yá, cachí-nè:

—¿A ndísá Dèhemanì Dios nduu-ní cahan-ní?

—Jaan —cachí-yà— nacua nì cachi-nsiá, divi ducán nduá.

⁷¹ Ñàyùcànduá, nì cachi nèhivì Junta mà:

—Cò-xiñùhù gá-ndà ni-iin testigu quixi, vèchi divi mii-né sàni cachi-nèà, te nì inini-nda —nì cachi-nè.

23

Nansa nì dàyáha-ne Jesús ndahà gobernador Pilatu

¹ Dandu nsidaa nècuàchì Junta yucán, nì ndacuìta-ne, nì saca-neyà cuàhàn-nè xì-yá nùù Pilatu.

² Te cuàhà nì càhàn tnùhu-ne sàhà-yá nùù témà, cachí-nè:

—Nècuàchì yohó, sàni xini-nsi, dacá-né dìni nèhivì ñuu-nsi yohó, vèchi cachí-nè mà váha chiyàhvi-nsi renta xì nación nùù rey cahnú César, vèchi cachí-nè mii-né nduú-né rey Cristu.

³ Dandu nì ndàcàtnùhù Pilatu nùù-yá, cachí-te:

—Mii-ní, ¿a ndísá rey xi nècuàchì raza Judea nduu-ní, á coó?

Dandu cachí Jesús:

—Nacua cachí-ní, divi ducán nduá.

⁴ Dandu nì cachi Pilatu xì dùtù xícusahnú, xì stná nèhivì cuàhà yucán:

—Sàni càhìn xì nècuàchì yohó, te còò ni-iin falta ni quidá-né tuxí.

⁵ Doco nècuàchì càhàn tnùhu sàhà-yá mà, vihi gá dana nì càhàn-nè, cachí-nè:

—Nècuàchì yohó, cuàhà nèhivì raza-nsi dacuahá-né, te danácuídà-nè nècuàchì mà dècuèndè ladu Galilea xì ndé stná ladu yohó, nsidanicuú ladu ndé ndoó-nsí —nì cacachi-nè.

⁶ Na ní inini Pilatu ñà-jaàn, dandu nì ndàcàtnùhù-té, ¿a nècuàchì Galilea nduú Jesús, á coó?

⁷ Te divi (ñà-ndàà nduá). Ñàyùcànduá, nì cundaà inì-te ñà-divi rey Herodes nduú ana ndiá icà nsidandaà sàhà chuun ma. Sàháyùcànduá, nì dàyáha-tèyá ndahà rey mà, vèchi iá stná témà ñuu Jerusalén quivì yucán.

⁸ Daaní, na ní xini rey mà-yá, nì cudìi gá inì-te, vèchi sàcàní tiempu cuní-te cundehe-tèyá. Vèchi cuàhà gá ñà-nduá cachí nèhivì sàhà-yá, te cuní stná-te cundehe-té quida-ya iin milagru.

⁹ Ñàyùcànduá, cuàhà ní ndàcàtnùhù-té nùù-yá, doco còò ni-iñàha ni nàxícóníhí-yá nùù-té.

¹⁰ Te yucán nì casaà stná dùtù xícusahnú, xì nècuàchì ley xi veheñùhu, nì sàcuìta stná-nè, te yáha ga dana nì càhàn tnùhu-ne dìquì-yá.

¹¹ Doco Herodes xì soldadu xi-tè, cuisì-ní nì dàvadiquì uun-tèyá, te nì sàcùndiàà-teyá. Dandu nì chindixi-tèyá sìcoto vico, te nì dànúhù-teyá nùù Pilatu.

¹² Te cunaha-ní, divi quivì yucán nì nàcòovàha stnahá Herodes xì Pilatu, vàchi nìsa xini ùhì stnahá-te.

Nansa nì cachi stná Pilatu icúmí Jesús cui-yà

¹³ Dandu Pilatu, nì nacana-tè dùtù xícusahnú, xì nsidaa tè-nìhí chuun, xì nsidaa gá nèhivì. Te nì nsihì nì catnàtuu nsidaa-né nùù-té,

¹⁴ dandu nì cachì-te xi-né:

—Ndacá-nsiá nècuàchì yohó vaxi, vàchi cahan-nsiá dacá-né dìni nèhivì ñuù-nsia yohó. Doco sàni xicàn tnùhù vahi nùù-né indéhe nsidaa-nsiá, te sàni cundaà inì, còò ni-iin cuàchi-ne nacua cachì-nsiá.

¹⁵ Daaní, después nì dáyáhi-nè ndahà Herodes, te nì sàhàn stná-nsia nùù nècuàchì mà, doco ni mii stná-nè, cóni càchí stná-nè sàhà ñà-cui Jesús, vàchi còò ni-iñàha iníhí cá-né.

¹⁶ Ñàyùcàndùá, cuàhìn dandacuí ñàhni cuii-nè, dandu dàñà-né.

¹⁷ (Ducán nì cachi Pilatu), vàchi fuerza icúmí-tè daña-té iin nècuàchì ndiadí cada nacává vicò mà.

¹⁸ Doco nèhivì cuáhà itá yucán, iin-ni cána fuerte sàstnùhù-né, cachì-nè:

—¡Ni cuí Jesús! ¡Barrabás ni dáñà cuní-nsì! —nì cachì-nè,

¹⁹ vàchi Barrabás mà nduú iin tiàa nì quida revolución ñuu yucán, te nì sahnì stnahá-te, ñàyùcàndùá, ndiadí-te vehecàa.

²⁰ Daaní, tucutu nì càhàn Pilatu xì nèhivì cuáhà mà, fuerte nì càhàn-te, vàchi dispuestu iá-te daña-té Jesús.

²¹ Doco nèhivì mà, tucutu cána ndee-né, cachì-nè:

—¡Ni cuí Jesús nchìca cruz! ¡Ni cuí-nè, cuní-nsì!

²² Dandu ñà-ùni nì càhàn-te xi-né, cachì-te:

—¿Índù chuun cui-nè ñà-còò ni-iin falta xi-ne iá? Sàni ndàcàtnùhí nùù-né, te còò ni-iñàha dísàhà-xí cui-nè. Ñàyùcàndùá, icúmí-nè ñàhni cuii ni-ne, te dàñà-né —nì cachì-te.

²³⁻²⁴ Doco nèhivì cuáhà yucán xì stná dùtù cutnáhâ xí-nè, vihi gá fuerte nì càna ndee-né, xicàn-nè ñà-cui Jesús nchìca cruz. Te ñà-fuerte guá nì càna-ne, sàhámà nì cundee-né (nì dàxínù ini-nè Pilatu) ñà-quida-tè nacua nì cuni mii-né.

²⁵ Ñàyùcàndùá, nì daña-té Barrabás nùù-né, vàchi divi-tè nì xicàn-nè dàñà, mate iin ana nì quida revolución nduú-te, te nì sahnì stnahá-te, ñàyùcàndùá nì sàcùndiadì-te. Doco Jesús, còò. Nì dáyáha Pilatu mii-yá (ndahà soldadu) ñà-quida temà xì-yá ñà-ndùá nì xicàn nèhivì cuáhà mà.

Nansa nì chituu-tè Jesús nchìca cruz

²⁶ Dandu nì saca-tèyá cuàhàn-te xi-yá. Te ichì yucán nì xini-te vaxi iin nècuàchì ñuu Cirene nani Simón, màndixi-ne nì sàhàn-nè nùù itú. Te divi nècuàchì mà ní tnii soldadu, te nì dàcuídá-tené cruz xi-ya; ñàyùcàndùá, nsidá-né cruz cuàhàn-nè nchìcùn-nèyà.

²⁷ Cunaha-ní, cuáhà gá nècuàchì ñahà nchìcùn stná xì-yá cuàhàn, te cuáhà stná nèhivì dava ga. Te nècuàchì ñahà mà, yáha ga xísacu-ne, ndoó-né tnùnsí ini sàhà-yá.

²⁸ Dandu nì nacuico-yá yàtà-yá, cachì-yà xi-né:

—Cunini vaha mii-nsiá nècuàchì ñahà ñuu Jerusalén. Màsà cuácú-nsiá sàhà yùhù. Chicá vaha ni cuácú-nsiá sàhà mii-nsiá xì sàhà dèhe-nsia.

²⁹ Vàchi vaxi iin tiempu (ùhì) quivì nùù-xí, dandu icúmí nèhivì cachì-nè: “Nansicáhàn nèhivì còò mée-xi. Chicá nsiha màsà cácu ni-iin dèhe-nda ni cuí, te màsà cúcúmí-ndá ni-iin mée dachichi-nda chicá vaha”.

³⁰ Te icúmí stná-nè cachì-nè: “¡A sácú vaha ni caá yucù ò lúnsì dìquì-ndà, te dàhvi dahuun-nda!” cachì-nè.

³¹ Vàchi (ducán iá nahi ejemplu sàhà tutnù): nú dècuèndè yutnù vida cuní nèhivì (cahmi-ne), dandu vihi gá mà ùhì coco stná tutnù ìchí. (Te ducán stná yùhù: nú dècuèndè yùhù cuní nèhivì dandohó-né, dandu vihi gá más icúmí nèhivì malu ndoho stná-nè) —nì cachì-yà.

³² Cunaha-nsiá, ndacá stná soldadu mà ù tiàa nì quida falta, cutnâhá stná-te xi-yá cuàhàn ndé cui stná-te.

³³ Dandu nì casaà nsidaa-né iin xaan ndé cachí-nè Nùu Iquì Dìnì. Te yucán nì chituu soldadu mà-yá nchìca cruz, mii-yá xì stná ù tèn-nì quida cuàchi ma, iin-tè ladu cuahá-yà, te ingà-te ladu itní-yà.

³⁴ Dandu nì cachi-yà:

—Padre mío, cuicahnú inì-ní sàhà nèhivì yohó, vâchi có-ínáhá-nê ñà-nduá quidá-né.

Daaní, tè-xínduu soldadu mà, nì dasàn-té sìcoto xi-ya según nì nihì iin iin-tè na ní idàdiquí-te sàhà-ñá.

³⁵ Te indéhe váha nsidaa nèhivì cuàhà mà. Te itá stná nècuàchì nihí chuun, sácùndiaa-nèyà, cachí-nè:

—Nècuàchì yohó, nisa dacácu-ne nècuàchì dava ga; pues vichi xiñuhu dacácu stná-nè mii-né, nú ndisa Dios nì techuun-xi-né vâxi, te nú mii-yá nani Cristu nduú-né cahan-né —nì cachi-nè.

³⁶ Daaní, stná soldadu mà, nì sácùndiaa stná-teyá, nì catnâtuu-tè nùu-yá chitáníní-te vinu ia ñà-coho-ya,

³⁷ cachí-te:

—Nú ndisa rey xi nècuàchì raza Judea nduu-ní, dandu dacácu-ní mii-ní —cachí-te.

³⁸ Te itúú stná iñàha dìnì cruz ndé itándiaa palabra dàhàn griegu, xì dàhàn latín, xì stná dàhàn hebreu, te dohó cachá: “Ana yohó nduú rey xi tè-raza Judea”.

³⁹ Daaní, nì càhàn stná iin tè-itúú stná nchìca cruz yucán, divi iin tè-nì quida falta mà; te nì canàhá stná-te xi-yá, cachí-te:

—Nú ndisa rey Cristu nduu-ní, dandu dacácu-ní mii-ní, te dacácu stná-ní nsiùhù.

⁴⁰ Doco inga tè-itúú stná yucán, nì càhàn duchi inì-te xi compañeru-tema, cachí-te:

—¿A có-yúhí stná-ní Dios ñà-iin-ni castigu sàni nihì nsidaa-nda?

⁴¹ Te ndohó, ndiá ìcà-ndà ndoho-nda, vâchi iá ndisa cuàchi-nda, ñàyùcànduá iá castigu xi-nda. Doco Jesús yohó, còó; còò nì-iñàha iníhíca-yâ.

⁴² Dandu nì cachi-te xi Jesús:

—Nsinuu inì-ní yùhù na quivì naxicocuñ-ní cusahnu-ní ñuhivì yohó.

⁴³ Dandu nì cachi-yà xì-té:

—Ñà-ndàà nduá cachí xì-ní, quivì vichi icúmí-nì cutnaha-ní xì' cundoo-nda ñuhivì ndiaha xì Dios —nì cachi-yà.

Nansa nì xihì Jesús nì dànáà-yá sàhà cuàchi-nda

⁴⁴⁻⁴⁵ Daaní, nahi càxíhùì nì dàhvi orá, te nì nàcuñn tnùu inicutu ñuhivì, te iin-ni nì ndòo ducán dècuèndè càhùni nì cuaà. Te ini veheñuhu cahnú nì quedava cortina cahnú (sadí nihni cuarto yucán).

⁴⁶ Dandu Jesús, fuerte nì ndàhì ndee-yá, cachí-yà:

—Padre mío, nùu ndahà mii-ní quidé entregar anímè —nì cachi-yà. Dandu nì xihì-yà.

⁴⁷ Daaní, capitán (iín yucán), nì xini-te nsidaa ñà-nduá nì cuu, te nì ndenihi vâha-tè Dios, cachí-te:

—Ñà-ndàà nduá, nèhivì ndàcuìsì inì-xi nì sanduu nècuàchì yohó.

⁴⁸ Te nsidaa gá nèhivì nì sàà yucán, nì xini-nè nansa nì cuu, dandu nì naquihin-ne ichì mànuhù-né vehe-ne, caní ndáha-né nchìca-ne.

⁴⁹ Te yucán ndoó stná cuàhà nècuàchì ñahà nì quixi ñuu Galilea cutnâhá-né xi-yá nì quesaa ñuu Jerusalén. Te mii-né xì stná nècuàchì dava ga ináhá xi-yâ, xica itá-né, indéhe váha-ne ñà-nduá nì cuu.

Nansa nì ndùxin Jesús ini cueva

⁵⁰⁻⁵¹ Daaní, (ñuu mà) nisa ìa stná iin tiàa nani José. Iin nècuàchì vâha nduú-né, vâchi ndàcuìsì ini-nè. Te meru ñuu-nè nduú iin ñuu tii nani Arimatea ndé ndoó puru nècuàchì raza-nè Judea. Iin nècuàchì Junta Cahnú nduú stná-nè, doco mii-né, cóni ndóo ini-nè xì

ñà-nduá nì dándàcú compañeru-nè ñà-cui Jesús, vàchi nihnú ini-nè (Dios, te xiníndísâ-né) ñà-icúmí-yâ cusahnú-yâ ñuhiví yohó.

⁵² Pues divi nècuàchì mà nì sàhàn nùu Pilatu, nì xicàn-nè iquicúñú Jesús.

⁵³ Dandu nì sàhàn-nè nì nanihi-neyà, nì chidúcùn-nèyà iin dahmà, te nì chinacaa-nèyà ini cueva xi nsii nì sate nèhivì nùu cavà. Te cueva mà, ni-iin nsii tàñáha ga cundùxin inià.

⁵⁴ Cunaha-ní, quivì yucán nì sanduu víspera xi vicò pascua, te sà-ítúú cunduu stná quivì descansu.

⁵⁵ Ñàyùcànduá, nècuàchì ñahà nì quixi Galilea mà, nì catenchicùn stná-nè nì sàhàn ndé nì sàcùndùxin-ya, te nì xini-nè lugar mà, xì nansa nì sàcùnacaa cuerpu-yà.

⁵⁶ Dandu mànuhù-né, nì quidayucun-nè tàtnà tnàmì xì pomada sahán tnami. Daaní, quivì descansu mà nì quetatu-nè nacua cachí ley (xi-ne).

24

Nansa nì natiacu Jesús

¹ Naha va quivì primeru semana nì quihin nècuàchì ñahà mà ichì cuàhàn-nè ndé nì ndùxin-ya, nihí-né tàtnà tnàmì nì quidayucun-nè, te cutnàhà stná-nè xì itnii gá nècuàchì ñahà. Te na ní casaà-nè yucán

² nì xini-nè sàni cuxio cavà cahnú nì sandiadi yuhù cueva mà.

³ Dandu nì caquihvi-ne ini-xi, doco còò cá Stoho-ndà Jesús nì xiní-nè.

⁴ Ñàyùcànduá, cuàhà gá nì ndulocó-nè. Dandu nì xini-nè yatni uun yucán nì sàcuíta ùi ana ndixín sìcoto cuxín yéhè.

⁵ Te nì cayùhí cuaá-nè, te nì nàcùnihni ndee-ne. Dandu nì cachi ángel mà xì-né:

—Còò necesidad nanducu-nsiá mii-yá yohó ndé nduú lugar xi nsii, vàchi sà-itiácú-yà.

⁶ Còò cá-yà yohó, vàchi sàni natiacu-yà. ¿A có-nsinúú ini-nsia ñà-nduá nì cachi-yà na iá va-ya xì-nsiá ladu Galilea?

⁷ Vàchi dohó nì cachi-yà: “Yuhù ana nduú Tnaha Nèhivì Ñuhiví, icúmí yàhi ndahà tè-malu, dandu cachituu-tè yuhù nchìca cruz; doco tìxi ùni quivì icúmí natiacuì”, nì cachi-yà.

⁸ Dandu nècuàchì ñahà mà, nì nsinuu ini-nè ñà-dùcán ndisa nì cachi-yà xì-né daa.

⁹ Dandu nì caquee-ne cueva mà mànuhù-né ndé ndoó-né, te nì nacani-ne nsidaámà xì ùxin iin nèhivì xí-yá, xì stná nècuàchì dava ga.

¹⁰ Cunaha-ní, nècuàchì ñahà mànuhù cachitnùhu xi nèhivì mà nduú María Magdalena, xì Juana, xì María dihi Jacobo, xì itnii gá stná nècuàchì ñahà dava ga.

¹¹ Doco nècuàchì tiàa (nì inini ma), nì tuxi ini-nè ádi cuentu uun nduá nì nacani nècuàchì ñahà mà. Ñàyùcànduá, cónì xiníndísâ-né.

¹² Doco Pedro, después nì ndacuiin-nè nì dàyàà-nè cuàhàn-nè sepultura mà. Te (na ní sàà-nè) nì xito nihni-ne inià nì xini-nè mii dahmà nì ndòò itánduhù iladú. Dandu mànuhù-né vehe-ne, nacání cuàhà ini-nè ndià nduá nì cuu cahan-né.

Nansa nì ndecunu Jesús nùu ùi nèhivì xicá ichì ñuu tii Emaús

¹³ Daaní, divi quivì yucán cuàhàn ùi nèhivì xí-yá ichì ñuu Emaús. Nahi ùi hora nduá caca-nda ndé ñuu Jerusalén xì ndé ñuu tii yucán.

¹⁴ Te ùi nècuàchì mà, ndatnúhú-nè cuàhàn-nè, cáhàn-nè sàhà nsidaa ñà-nduá làcà ní cuu.

¹⁵ Te meru ndatnúhú-nè ducán, te nì cuyatni Jesús vaxi-ya; nì tnàtuu-ya nì sacat-nahá-yá xì-né cuàhàn.

¹⁶ Doco cónì nácóó-yá mii-né nacuni-nèyà.

¹⁷ Dandu nì cachi-yà xì-né:

—¿Ndià nduá ndatnúhú guá-nsià cuàhàn-nsià, te ndoó-nsià tnùnsí ini?

¹⁸ Dandu nì naxiconihí iin nècuàchì mà nani Cleofas, nì cachi-nè xì-yá:

—Nsidaa gá nêhivì ndoó ñuu Jerusalén, ináhá-nê ñà-nduá nì cuu yucán quivì vichi. Ádi cuisì mii-ní nduú ana tàcùnítñuhu sàhámà.

¹⁹ Dandu nì cachi-yà:

—¿Ndíà nduá nì cuu yucán?

Te nì cachi-nè:

—Cáhàn-nsi sàhà Jesús de Nazaret, vàchi cunaha-ní, iin ana cáhàn ndisa cuenta xi Dios nì sanduu-ya. Cuàhà milagru fuerte nì quida-ya, te cuàhà palabra ndiaha nì chinaha-yà. Chuun ndiaha xí Dios nìsa quida-ya nì cundaà ini nsidaa nêhivì ñuu-ndà.

²⁰ Doco dùtù xícusahnú, xì stná tè-nìhí chuun ga, nì dàyáha-neyà ndahà ana nì sahnì xì-yá, te nì chituu-tèyá nchìca cruz.

²¹ Doco cunaha-ní, mii-yá nduú ana cuàhàn dacácu xi ñuu-ndà Israel nì cahan-nsí. Te vichi sàcuàhàn-ndà ùnì quivì nì cuu xì-yá ducán.

²²⁻²³ Te quivì vichi nì sàà itnii nècuàchì ñahà iin-ni xiníndísâ stná xì-yá, te nì ndulocó-nsì nì quida-ne, vàchi naha nì sàhàn-nè sepultura (xi-ya), te còò gá iquìcúñú-yà nì xìnì-nè, cachí-nè. Te nì ndecoyo stná ángel nùù-né, te cachí ángel mà sàni natiacu-yà.

²⁴ Daaní, nì sàhàn stná dava compañeru-nsì sepultura mà, te nacua nì nacani nècuàchì ñahà mà, divi ducán nì xini stná-nè ñà-còò gá iquìcúñú-yà yucán.

²⁵ Dandu nì cachi-yà xì nècuàchìmà:

—¡Ndahví-nsiá! Mà túha-nsia mànihì inì-nsia; cueé sàstnùhù-nsiá cunindisá-nsiá nsidaa ñà-nduá nì tiaa nècuàchì nì cáhàn cuenta xi Dios sàhana.

²⁶ Vàchi (claru nì cachitnùhu-ne sàhà) ana nduú Cristu, xì nansa icúmí-yâ ndoho-ya, dandu después nanihì-yá tñùñuhu ndiaha xí-yá —nì cachi-yà.

²⁷ Dandu nì quesaha-yá nì dàtúí-ya nùù-né nansa cachí tutu ì sàhà mii-yá, divi tutu nì tiaa Moisés, xì stná tutu nì tiaa nsidaa gá nècuàchì profeta.

²⁸ Doco vichi, sà-ítúú sàà-nè xì-yá ñuu tii ndé cuàhàn-nè. Dandu nì cundaà ini-nè cuní-yà cùhùn-yà chicá nùù-xí.

²⁹ Ñàyùcànduá, nì sacundahví-nè nùù-yá, cachí-nè:

—Yohó ndòò-ní, chicá vaha, vàchi sàni cuaà, te cuàhàn cuñaà.

Dandu nì yàha nsidaa-né ini iin vehe ñà-cutnahá chii gá-yà xì-né.

³⁰ Te nì sàcòò-ya nùù iin mesa ñà-cuxi-ya xì-né. Te nì tñii-ya pan, nì naquimanì-yá Dios sàhá, te nì dàcuàchì-yáñà; dandu nì dasàn-yáñà nùù-né.

³¹ Te momentu jaàn nì nìhì-né nì nacuni-nèyà ana nduú-yá. Doco na íín cachí nì ndañuhu-yá nùù-né.

³² Dandu nì cachi-nè iin-ne xì inga-nè:

—¡Na ndiaha guá nihnú ini-ndà na ní cáhàn-yà xì-ndà vaxi-nda ichì mà, te nì dàtúí-ya nùù-ndà nansa cuní cachí tutu ì!

³³ Dandu vichì duha nì ndacuítà-ne mànuhù-né ñuu Jerusalén, nì nasaa-nè vehe ndé sàni nataca ùxìn iin nècuàchì dacuahá-yá xì stná compañeru gà-nè.

³⁴ Te nsidaa nècuàchìmà, nì cachitnùhu-ne xì nècuàchì làcà nì cansiaa mà, cachí-nè:

—Ñà-ndàà nduá, sàni natiacu Stoho-ndà Señor, vàchi sàni xini Simón-yà.

³⁵ Dandu nècuàchì nì cansiaa mà, nì nacani stná-nè xì nècuàchì yucán nansa nì cuu xì-né na cuàhàn-nè ichì yucán, te después nì nacuni-nèyà na ní dàcuàchì-yá pan (cuàhàn-nè cuxi-ne).

Nansa nì ndecunu Jesús nùù ùxìn iin nèhivì dacuahá-yá

³⁶ Daaní, nacání vá nècuàchìmà ñà-jaàn, te nanàá nì sàcuìin Jesús dava mahì-xí. Te nì cachi-yà xì-né:

—¡Ni ndóò vaha ini nsidaa-nsiá!

³⁷ Doco mii-né, nì cayuhí cuaá-nè; yáha ga nì ndulocó-nè, vàchi ádi duma nduá nì cahan-né.

³⁸ Ñàyùcànduá, nì cachi-yà xì-né:

—¿Índù chuun yúhî guá-nsiá? ¿Índù chuun nacání guá inì-nsiá?

³⁹ Cundehè-nsiá ndahí xì sàhí, dandu cundaà inì-nsiá divi yùhù nduí. Tnii ndahà-nsiá yùhù, te cundaà inì-nsiá màdì ihna nduí, vàchi ihna, còò iquìcúñúà, doco yùhù, iá iquìcúñúì sà-ìndéhe-nsiá

⁴⁰ —nì cachi-yà.

Dandu nì dácùnì-yànè ndahà-yá, xì sàhà-yá.

⁴¹ Doco có-xiníndísâ ndisa-ne ñà-cuàhà guá cudí ini-nè, te ndulócô-nè. Ñàyùcàndùá, nì cachi-yà xì-né:

—¿Á coo iyuhu ñà-cuxi-nda yohó?

⁴² Dandu nì sàha-neyà iyuhu cuñu siaca nì chòhò, xì stná iin dahnde ñùñù.

⁴³ Ñàyùcàndùá, nì tnii-yañà nì xixi-ya nì sandehè nsidaa-né.

⁴⁴ Dandu, nì cachi-yà xì-né:

—Ñà-yòhó nduá nì cachì xì-nsiá na nisa ìe xì-nsiá antes, te nì cachì xì-nsiá ñà-fuerza icúmí cuu ndisa nsidaa ñà-nduá cachá` sàhí nùù ley xi Moisés xì nùù tutu nduú alabanza, xì nùù stná tutu nì tiaa nècuàchì profeta; nsidaámà, fuerza nì cuu ndisa, —nì cachi-yà.

⁴⁵ Dandu nì dātúì-ya nùù nsidaa-né nansa cuní cachi tutu ìì, te nì sàà-nè nì cundaà ini-nè nì quida-ya.

⁴⁶ Dandu nì cachi stná-yà xì-né:

—Nacua nì cachì xì-nsiá, ducán nisa ìa destinadu cuu xi (yùhù ana nduú) Cristu, vàchi ducán nì cachitnùhu tutu ìì ñà-ìcúmì ndohi, te cuì, dandu tixi ùnì quivì natiacuì.

⁴⁷ Te nì cachitnùhu stná tutu mà ñà-después cuitià razón ndiaha ma inicutu ñuhiví, vàchi icúmì-nsiá cùhùn-nsiá càhàn-nsiá sàhí xì nsidaa nèhivì ñà-ndiá ìcà-né naxicocuìn ini-nè sàhà cuàchi-ne, dandu cuicahnú ini xì sàhà-né. Te ñuu primeru ndé càhàn-nsiá razón mà nduú ñuu Jerusalén yohó.

⁴⁸ Te vichi sàni xìnì-nsiá nsidaa ñà-nduá nì cuu (tiempu vichi), ñàyùcàndùá testigu xínduu-nsiá.

⁴⁹ Cunaha-nsiá, sàni quida Yuamánì comprometer quixi iin ana (chindee) xi-nsiá. Te yùhù cuàhìn techuín yàmà quixi coo-ya ini anima-nsiá. Ñàyùcàndùá, yohó nì cúndóó-nsiá ñuu Jerusalén dècuèndè cachì sàni cundiatú-nsiá ndudu ìì vaxi ansivi —nì cachi-yà.

Nansa mànuhù Jesús gloria

⁵⁰ Daaní, nì saca-yanè cuàhàn-yà xì-né (fuera) ñuu Jerusalén dècuèndè ñuu tii Beta-
nia. Dandu nì chitanini ducún-yà ndahà-yá, te nì xicàn-yà nì quidá Dios gracia sàhà
nsidaa-né.

⁵¹ Te meru xicàn tàhvì-yá nùù Dios ducán, dandu nì ndanchito-ya mànana-ya
mànuhù-yá gloria.

⁵² Ñàyùcàndùá nì sàcuìta sisi nsidaa-né nì naquimanì ndiaha-néyà. Dandu nì quihin
tu-ne ichì mànuhù-né ñuu Jerusalén, cudí gá ini-nè.

⁵³ Te nsiquívì nisa sahàn-nè veheñùhu cahnú, ndoó-né ndeníhí vaha cuahà-né Dios, te
naquímànì stná-nèyà. Sà-ìá.

Ñà-nduá Nì Tiaa San Juan sàhà Jesucristu

Jesús nduú ana datúi nansa íá Dios, vèchi nì nanduu-ya nèhivì

¹ Na táyôo ñuhiví, sà-íá mii-yá ana datúi nansa nihnú ini Dios. Nùu Yua-nda Dios íá-yà, te mii stná-yà nduú stná-yà Dios.

² Te divi-ya íá nùu Yua-nda Dios na táyôo ñuhiví.

³ Mii-yá nì quidayucun-yà nsidanicuú iñàha íá ñuhiví. Te nú màsà cóo-yá, ni-iñàha mà cóo stná ñuhiví.

⁴ Sàhà mii-yá xí-itiacu nsidaa ana itiacú. Te sàhà ñà-itiácú ndiaha-yá, ñà-jaàn sàni sàa-yà datnúu ini-yà nèhivì ñuhiví.

⁵ Cunaha-nsiá, ichì ñáa nduá ñuhiví yohó, doco iin-ni datnúu ndiaha-yá ini anima-ndà; te nsidaa ñà-íá ichì ñáa ma, cóni cù cundeá nùu-yá.

⁶ Nisa ía iin tiaa nì nihì chuun nùu Dios; Juan nani-né.

⁷ Te nì quixi-ne nì cachi-nè ñà-ndácuisì xì nèhivì nansa íá mii-yá ana datnúu xì sàxínitnùní-ndà sàhà-ñá vètuni cunindisá nsidaa-néyà.

⁸ Màdi Juan yucán nì sándúu ana datnúu ndiaha xi ini-ndà, cóo; cuisì nì quixi-ne ñà-cachitnùhu uun-ne nansa íá mii-yá quidà-xì ñà-jaàn,

⁹ vèchi ndisa sàvaxi mii-yá ana datnúu ndiaha xi ini anima nsidaa nèhivì, te mà dándáhvì-yándó.

¹⁰ Nì ía-ya ñuhiví, divi ñuhiví nì quidayucun-yà, doco cóni nácúnì nèhivì-yá.

¹¹ Stoho ñuhiví nduú-yá, te nì quixi-ya yohó, doco nèhivì ñuhiví xi-ya, nì cahíchi ini-nèyà.

¹² Doco nsidaa ana nì dàyáha xi-yá ini anima-xi, nì nihítáhvì-né cunduu-ne dèhe ndisa-ya, te divi nduú nsidaa ndohó nècuàchì xiníndísá-xí-yá, te ndácùcahan xi quivì-yá.

¹³ Te ¿nansa nì nihì-ndà nì sàcùnduu ndisa-nda dèhe-ya? Pues màdi sàhà-ñá nduu-nda descendencia xi iin nèhivì (chica ndiaá), ni màdi sàhà yua-nda, ni sàhà stná ñà-dúcán cuní iin nèhivì coo. Cóo, sàhà cuisì-ña ducán cuní Dios.

¹⁴ Ndè ñuhiví yohó nì quixi mii-yá ana datúi nansa íá Dios, te nì nduvàha-ya iin nèhivì íá iquicúñu-xi. Te nisa ía chii-yá yohó ndé ndoo-nda. Te nsiùhù, nì xini-nsì ñà-ndiaha guá íá-yà. Ndiaha gá-yà, cachí, vèchi mindaa Dèhemanì Yua-nda Dios nduú-yá, te chitu-yá gracia xì stná palabra ndàcuisì.

Ñà-nduá nì cachi Juan Bautista sàhà Jesús

¹⁵ Daaní, nì càhàn Juan mà sàhà Jesús, nì ndàhì-nè, cachí-nè (xì nèhivì):

—Divi mii-yá nduú ana òsàhà-xì nì càhìn xì-nsiá daa, te nì cachì, dihna yàha yùhù, dandu después vèxi mii-yá ana chicá ndiaá nùí, vèchi na táyôo yùhù, sà-íá mii-yá.

¹⁶ Chitu-yá cuàhà gá ñà-ndiaha ì ñuhú ini-yà, ñàyùcànduá nùu mii-yá sàni nihítáhvì stná-ndà cuàhà ñà-jaàn, cuàhà sàstnùhù gracia.

¹⁷ Vèchi ley sàna nduá nì datúi Moisés antes, doco vichi sàni datúi-ya ñà-nduú gracia ndiaha xí-yá xì stná palabra ndàcuisì xí-yá.

¹⁸ Cóo nì-iin nèhivì nì xini xì Yua-nda Dios nì-iin xichi. Doco mindaa Dèhemanì-yá íá nùu-yá, sàni datúi yà-yucán nansa íá Yuamánì-yá sàhà-ñá cundaà ini-ndà.

Ñà-nduá nì cachi Juan Bautista sàhà mii-né

¹⁹ Daaní, nècuàchì raza Judea ndoó ñuu Jerusalén, nì techuún-né iin ùi dùtù xi-ne nùu Juan, te cutnàhà stná-nè xì dava nècuàchì (xinúcuáchi veheñùhu nani) Levita. Te nì xicàn tnùhù-né nùu nècuàchì mà ana divi nduú-né.

²⁰ Nàyùcànduá, ñà-yòhó nduá nì cachi Juan; cóni càhì-nè á cóo; nì cachi ndàà-nè:

—Yùhù, có-nduú mii-yá nani Cristu.

21 Dandu nì cacachi nècuàchìmà:
—(Pues nú coó), ¿ana divi nduu-ní? ¿A nsì-Elías nduu-ní?

Te nì cachi Juan:

—Còó.

Te nì cacachi tu nècuàchìmà:

—Entonces, ¿a divi nduu-ní mii-yá ana icúmí quixi canúú càhàn cuenta xi Dios?

—Còó —cachí Juan.

22 Ñàyùcànduá, nì cachi nècuàchìmà:

—Pues, ¿ana divi nduu-ní? vèchi icúmí-nsí cachitnùhu-nsi xì nèhivì nì catechuun-xi-nsí vèxi-nsi. ¿Ndíà cachí-nì sàhà mii-ní?

23 Dandu nì cachi Juan:

—Yùhù nduí ana càhàn fuerte sàhù yucù, (te cachí xì nèhivì ñà-nsidaviì-né anima-nè) na ian ndundaà iin ichì ndé yàha Stoho-ndà Señor nacua nì cachitnùhu Isaías sàhana na ní càhàn-nè cuenta xi Dios —nì cachi Juan.

24 Cunaha-nsiá, nècuàchì nì casaà nùu Juan mà, nècuàchì fariseu xínduu-ne.

25 Dandu nì xicàn tnùhù gá-nè, cachí-nè:

—Vichi, ¿índu chuun quidá ì-ní nèhivì nú có-ndùu-ní mii-yá nani Cristu, te có-ndùu stná-ní nsì-Elías, te nì có-ndùu stná-ní mii-yá icúmí quixi càhàn cuenta xi Dios?

26 Dandu nì cachi Juan xì-né:

—Yùhù, ndisa, quidá ì' nèhivì xì tècuí. Doco mahì mii-nsiá iá iin ana có-nàcúní-nsiá.

27 Te mii-yá, nchícùn gá vèxi-ya nùí, te chicá ndiaá stná-yà nùí. Ni mà nátùì (cundui iin mozo xi-ya) ñà-tavà xì ndìsàn-yá —nì cachi Juan.

28 Cunaha-nsiá, ndé iá ñuu tii Betábara ladu duha yùte Jordán, yucán nì cuu nsidaa ñà-yòhó.

Nì quixi Jesús ñuhiví yohó ñà-cui-yà na ian xíhì iin lelù nduú promesa

29 Daaní, nì yàha inga quivì, dandu nì xini Juan vèxi Jesús, te nì cachi-nè:

—Cundehè-nsiá, jaàn vèxi mii-yá ana nduú nahi Lelù Ì nì sàhatahvì Dios (ñà-cui-yà) dacúxió-yá cuàchi nèhivì ñuhiví.

30 Sàhà mii-yá nì càhìn daa na ní cachì: nchícùn gá vèxi-ya nùí, vèchi na táyôo yùhù ñuhiví, sà-íá-yà, vèchi nicanicuahàn iá-yà.

31 Te cónì nàcúnì mii-yá antes, doco sàhà-ñá cundaà ini raza-ndà Israel ana divi nduú-yá, sàhàjàn nì nihí chuun quida ì' nèhivì xì tècuí —nì cachi Juan.

32 Daaní, nì cachi tu-ne inga palabra yohó:

—Yùhù, nì xinì nì nuu Espíritu Ì xí Dios; nahi loma náhà-yà mànuu-ya ansivi nì sàcòo-ya dìnì Jesús, te nì ndòo-ya yucán.

33 Yùhù, cónì nàcúnì mii-yá antes. Doco na ní sàha Yua-nda Dios yùhù chuun quida ì' nèhivì, dandu nì cachi stná-yà xí: “Na cúnì-ní nuu Espíritu Ì màcòo-ya dìnì iin (ana cuhì), dandu ñà-jaàn cundaà inì-ní divi nduú mii-yá cuàhàn nsida ì xì anima nèhivì tìxi Espíritu Ì”.

34 Ñàyùcànduá, yùhù, sà nì xinì, te datúì nùu-nsiá ñà-divi Dèhemanì Dios nduú Jesús —nì cachi Juan.

Nècuàchì primeru nì catenchicùn xì Jesús

35 Daaní, nì yàha inga quivì, te yucán iin Juan, cutnáhâ-né xì ùì tiàa dacuahá-né.

36 Te nì xini-nè yatni yàha Jesús, ñàyùcànduá nì cachi-nè:

—Cundehè-nsiá, jaàn cuàhàn mii-yá ana nduú Lelù Ì vèxi nùu Dios.

37 Te ùì tiàa dacuaaha-ma, nì tiacu-nè nì càhàn Juan ducán, te nì tenchicùn-nè Jesús cuàhàn-nè.

38 Dandu nì ndacoto-ya, te nì xini-yà xínchicùn nècuàchìmà. Ñàyùcànduá nì cachi-yà xì-né:

—¿Ndíà nduá nandúcú-nsiâ?

Dandu nì cachi-nè xì-yá:

—Maestro, ¿índù íá-ní?

³⁹ —Nahà-nsia, cundehè-nsiá —nì cachi-yà xì-né.

Ñâyùcàndùá, cuàhàn-nè xì-yá, te nì xini-nè índù íá-yà. Te nì ndòo-ne xì-yá sàcuaà yucán, vàchi nahi càcúmì nì cuaà nduá.

⁴⁰⁻⁴¹ Iin tiàa nani Andrés nduú iin ana nì inini na ní càhàn Juan daa, te nì tenchicùn stná-nè Jesús. Dandu vichi duha nì sàhàn stná-nè nì nanducu-né ñani-nè nani Simón Pedro, te nì cachi-nè xì nècuàchìmà:

—Sàni ndacùhun stnahá-nsí xì mii-yá nduú Mesías.

Quivì Mesías nì cachi Andrés dàhàn mii-né, vàchi cuní cachàmà Cristu (nì quixi dìquì-xí).

⁴² Dandu nì saca-ne ñani-nè nì casaà-nè ndé íá-yà. Te na ní xini-yà Simón mà, dandu nì cachi-yà xì-né:

—Dèhe Jonás nduu-ní, te nani-ní Simón, doco yùhù cuàhìn cachi xì-ní Cefas —nì cachi-yà. Te quivì Cefas mà, Pedro cuní cachà.

Nansa nì cana Jesús iin tiàa nani Felipe xì inga-nè nani Natanael

⁴³ Daaní, nì yàha inga quivì, te cuní Jesús nùhù-yà ladu Galilea. Te nì ndacùhun tnahá-yá xì iin tiàa nani Felipe, te nì cachi-yà xì-né:

—Cunchicùn-ní yùhù nùhù-ndà.

⁴⁴ Cunaha-nsiá, ñuu Felipe mà nduú ñuu Betsaida, divi ñuu Andrés xì Pedro.

⁴⁵ Ñâyùcàndùá nì nanducu Felipe iin tiàa nani Natanael, te nì cachi-nè xì nècuàchìmà:

—Cunaha-ní, sàni ndacùhun tnahá-nsí xì mii-yá nì tìaa Moisés sàhà-xí nùù ley ìì, te divi sàhà stná-yà nì tìaa stná cuàhà profeta nì càhàn cuenta xi Dios sàhana. Jesús de Nazaret nani-yá, te yua-yá nani José.

⁴⁶ Dandu nì cachi Natanael:

—¿A ndísá? ¿A íá iin nèhivì vàha ñuu Nazaret?

Dandu nì cachi Felipe:

—Nahà-ní cundehè-ní.

(Dandu cuàhàn-nè xì nècuàchìmà.)

⁴⁷ Te na ní xini Jesús vàxi Natanael, dandu nì cachi-yà sàhà-né:

—Yohó vàxi iin tiàa quidá ndisa nacua ndiá ìcà quida nècuàchì raza-ndà Israel, te nì-iyuhu mà túha-ne dandahví-nè.

⁴⁸ Dandu nì cachi Natanael xì-yá:

—¿Nansa ináhá-ní yùhù?

Te nì cachi Jesús xì-né:

—Na táñâha ga cana Felipe mii-ní, te íá-ní sàhà iin nù-higu, dandu nì xinitùí mii-ní.

⁴⁹ Dandu nì cachi Natanael xì-yá:

—Dèhemanì Dios nduu-ní, Maestro, divi rey icúmí cusáhnù nùù ñuu-ndà Israel nduu-ní.

⁵⁰ Dandu nì cachi Jesús xì-né:

—Mà úhì guá nì xinindisa-ní na ní cachi nì xinitùí mii-ní sàhà yutnù yucán. Cunaha-ní, icúmí-ní cunì-ní milagru chicá ndiaha.

⁵¹ Ñà-ndácuisì nduá cachí xì-ní, icúmí-ní cunì-ní nuna ansivi, dandu quecoyo ángel xi Dios mànana mànuu cucuu-ne dìquì-xí ndé iín yùhù ana nduú Tnaha Nèhivì Ñuhiví.

2

Nansa nì quida Jesús milagru iin vicò nandàhà nì ìa ñuu Caná

¹ Daaní, quivì ùnì nì ìa iin vicò nandàhà ñuu tii Caná íá ladu Galilea. Te yucán nì sàà stná dihi Jesús.

² Te nì cànà stná mii-yá xì nècuàchì dacuahá-yá.

³ Te nì cuu nì nsihi tècuí vidi sì-uva coho-ne. Ñàyùcànduá, nì càhàn dihi-yá xì-yá, cachí-nè:

—Sànì nsihi tècuí vidi sì-uva.

⁴ Dandu nì cachi-yà xì-né:

—Chicá vaha nacoó-ní ñà-jaàn nùu yùhù, vachi tàñáha ga sàà meru hora xi.

⁵ Dandu nì càhàn dihi-yá xì tiàa xinúcuáchí yucán, cachí-nè:

—Quida-nsia nacua cachí dèhi xì-nsiá.

⁶ Cunaha-nsiá, yucán itá ñù barril yùu, iin ian vátùni cuñuhu cùmi ò úhùn yoo tècuí. Tècuí mà xichúùn nècuàchì raza Judea ñà-nsidandoo-ne mii-né según estilu nduú ley xi-ne.

⁷ Te nì cachi Jesús xì tiàa yucán:

—Dachitu-nsiá barril jaàn tècuí.

Ñàyùcànduá, ducán nì caquida-tè, dècuèndè yuhá nì chitu.

⁸ Dandu nì cachi-yà xì-té:

—Vichi chitacuhá-nsiá chii-té cunihi-nsia cùhùn nùu nècuàchì iín sáhnù nùu vicò.

Ñàyùcànduá, ducán nì caquida-tè.

⁹ Te nì xihì nècuàchì mà iyuhu tècuí mà, doco sàni nanduu-tè tècuí vidi sì-uva. Te cóni sáha-ne cuenta índù nì quixi ndutè mà, doco tè-xinúcuáchí nì catavà xì-té, ináhá-tè. Daaní, na ní cundaà ini-nè nansa xihí ndutè mà, dandu nì cana-ne noviu nándàhà,

¹⁰ te nì cachi-nè xì nècuàchì mà:

—Nsidaa nèhivì, na sáha-ne tècuí vidi sì-uva coho-nda, dihna sáha-ne ndutè chicá vaha, dandu nú sàni xihì cuahà-ndaté, dandu tavá-né ndutè chicá ndahví. Doco mii-ní, còò, làcà vichi nì tavà-ní ndutè chicá finu —nì cachi-nè.

¹¹ Ñà-jaàn nduú milagru primeru nì quida Jesús. Te ñuu Caná iá ladu Galilea nduú lugar ndé nì quida-yañà. Ducán nduú nì dàcùnì-yà nèhivì ñà-ndiaha guá quidá-yá, te nì xinindisá stná nècuàchì dacuahá-yá mii-yá.

¹² Daaní, nì sàhàn Jesús ñuu Capernaum, mii-yá xì dihi-yá xì ñani-yà, xì stná nècuàchì dacuahá-yá. Te yucán nì cuee-yà iin ùi quivì.

Nansa nì tavà Jesús nèhivì dicó ini patiu veheñuhu cahnú

¹³ Dandu nì quihin tu-ya ichì cuahàn-yà ñuu cahnú Jerusalén, vachi sà-ítúú vicò pascua, iin vicò nsidacáhnù nècuàchì raza Judea yucán.

¹⁴ (Ñàyùcànduá, nì sàà-yà ñuu mà), te nì xini-yà yucán yehè veheñuhu cahnú itá nèhivì dicó; dicó-né buey, dicó-né riì, dicó-né loma, te ndoó stná nèhivì nadámá tnahá xi dihùn (vàxi inga ñuu).

¹⁵ Dandu nì cava-yà itnii yohò nì quidayucun-yà iin chirrión, te nì taxi nsihí-yánè yehè veheñuhuma, mii-né xì riì xí-né xì stná buey xi-ne. Te nì dàndiàchì-yà dihùn damá-né, te nì ducùn nsihí-yá mesa xi-ne.

¹⁶ Te nì cachi stná-yà xì nècuàchì dicó xi loma mà:

—¡Tavà-nsiá quisì yohó fuera! vachi màdì yàhvi nduú vehe ì Yuamánì —nì cachi-yà.

¹⁷ Dandu nì nsinuu ini nècuàchì dacuahá-yá nansa cachí nùu tutu ì ndé cachá: “Yáha ga cuahà nacání ìnì sàhà veheñuhu ì xí-ní ñà-màsà dándañúhú nèhivì ñà-ì icúmíá”.

¹⁸ Dandu nècuàchì raza-yà Judea yucán, nì cachi-nè xì-yá:

—Quida-ní iin milagru cunduu seña ñà-cundaà ini-nsi a icúmí-ní derechu quida-ní ñà-nduá nì quida-ní, á coó.

¹⁹ Dandu nì cachi-yà xì-né:

—Vátùni. Ducùn-nsiá veheñuhu yohó, te tìxi ùnì quivì nsida saí-ñà.

²⁰ Dandu nì cachi nècuàchì yucán:

—Ùi dico ñù cuà nì quidachuún nèhivì nì dàxínu-ne veheñuhu yohó. Te mii-ní, ¿a ndísá daxínu-niá tìxi ùnì quivì? —nì cachi-nè.

²¹ Doco màdì veheñùhu ndisa nduá cáhàn-yà sàhà-xí; còó, vèchi ejemplu-ni nduámà; divi cuerpu mii-yá cáhàn-yà sàhà-xí.

²² Ñàyùcàndùá, después, na quívì sàni natiacu-yà, dandu nì nsinuu ini nècuàchì nchícùn xì-yá ñà-dùcán nì cachi-yà xì-né daa, te nì sàà-nè nì xinindisá-né ñà-ndùá cachí nùu tutu ì, te nì xinindisá stná-nè ñà-ndùá nì cachi mii-yá daa.

Ináhá Jesús nansa iá anima nsidanicuú nèhivì

²³ Cuàhà nèhivì nì xinindisa-xi-yá na ní xini-nè milagru nì quida-ya na iá-yà ñuu Jerusalén quívì vicò pascua ma.

²⁴ Doco mii-yá, cónì ícúmí-yâ nècuàchì mà seguru, vèchi ináhá-yâ ñà-ñùhú ini anima nsidanicuú-né.

²⁵ Còò necesidad ícúmí-yâ cachi iin nèhivì xì-yá nansa iá anima ñanìtnaha-ne, vèchi ináhá-yâ nsidaa ñà-ndùá ñuhú ini anima nèhivì.

3

Nansa nì cáhàn iin tiàa nani Nicodemo xì Jesús

¹ Nìsa ìa iin nècuàchì fariseu nani Nicodemo. Iin nècuàchì xídandacú nùu ladu Judea mà nduú stná-nè.

² Te divi-ne nì sàhàn ndé iá Jesús iin sàñaà, te nì cachi-nè xì-yá:

—Maestro, ináhá-nsì divi mandu xi Dios vèxi-ní, vèchi nú màsà chíndéé Dios, dandu ni-iin nèhivì, mà níhì-né quida-ne milagru nacua quidá mii-ní.

³ Dandu nì cachi Jesús xì-né:

—Palabra ndàcuisì nduá yohó cachí xì-ní: nú màsà nácacú sáá nèhivì, dandu mà cúí sàà-nè cuni-nè ñuhivì ì xí Dios.

⁴ Dandu nì cachi Nicodemo xì-yá:

—¿Nansa cui nacacu-nda nú sàni sahnu-nda? ¿A cúí nàcùñuhu saa-nda ini dihimánì-ndà, te nacacu-nda?

⁵ Dandu nì cachi Jesús xì-né:

—Ñà-ndàcuisì nduú palabra yohó cachí xì-ní: nú màsà nácacú sáá iin nèhivì quida tècuì xì stná Espíritu ì, dandu mà níhì-né yàha-ne ñuhivì ì ndé cusáhnú Dios.

⁶ Vèchi nú sàni cacu-nda nùu yuadíhì-ndá, dandu iquícúñú ícúmí-ndá. Doco nú sàni cacu anima-ndà quida Espíritu ì xí Dios, dandu espíritu (saa) cucumi stná-ndà.

⁷ Màsà ndúlócô-ní ñà-nì cachi xì-ní ícúmí-ní nacacu saa-ní.

⁸ Vèchi ducán quidá stná tàchì, caná te caná yohó yucán, doco có-ínáhá-nsiâ índù lugar vèxa, ni índù lugar cuàhàn. Ducán iá stná xì anima nsidaa nèhivì nì nacacu nì quida Espíritu ì.

⁹ Dandu nì cachi Nicodemo xì-yá:

—Pues, ¿índù modo cunduu nsidaa ñà-càchì-ní jaàn?

¹⁰ Dandu nì cachi Jesús xì-né:

—Iin maestru ñuu-ndà Israel nduu-ní, te có-sànìhì inì-ní sàhájàn nacua ndiá ìcà-ní.

¹¹ Ñà-ndàcuisì nduá yohó cachí xì-ní: ñà-ndùá ináhá-nsì, divi ñà-jaàn cachí-nsì xì-nsiá. Te datúí stná-nsì nùu-nsiá ñà-ndùá sàni xini-nsì, doco có-xiníndisâ-nsiá.

¹² Mate cuisì sàhà ñà-íá ñuhivì yohó-ní nduá cáhàn xì-nsiá, doco có-xiníndisâ-nsiá; ñàyùcàndùá, ùhì cunindisá stná-nsiá nú nì cáhàn xì-nsiá sàhà gloria (xi Dios).

¹³ 'Ni-iin nèhivì tàñáha ga nana-ne gloria. Doco yùhù ana nduú Tnaha Nèhivì Ñuhivì, ansivi nduú vehi, te nì nui nì quesai (ñuhivì yohó).

¹⁴ Te nacua nì quida Moisés (sànahà) na nìsa ìa-ne yucù, nì chituu ducún-nè iin còò (càa), pues ducán stná yùhù, ícúmí nèhivì chituu ducún stná-nè yùhù.

¹⁵ Dandu nsidaa nèhivì cunindisa-xí, mà nunca sàà-nè ndañuhu-né; còó, nicanicuahàn cutiacu-nè.

16 Vàchi ñà-cuàhà guá cuú ini Yua-nda Dios sàhà nèhivì ñuhiví, nì sàhatahvì-yá mindaa Dèhemanì-yá (ñà-cuì-yà), dandu nsidaa nèhivì xiníndísá-xí-yâ, mà sàà-nè ndañuhu-né, còó, nicanicuahàn icúmí-nè cutiacu-nè.

17 Vàchi màdì sàhà-ñá dandohó-yá nèhivì cuáchi nduá disáhà-xí nì ndacu nuù Dèhemanì-yá quixi-ya ñuhiví yohó, còó; divi sàhà-ñá càcu-ne nduá.

18 'Nú xiníndísâ iin nèhivì Dèhemanì Dios, dandu ñà-sàni càcu-ne nuù castigu sàhà cuàchi-ne nduá; doco nèhivì có-xiníndísâ, sà-íá vaxi castigu xi-ne nuù-yá, vachi có-xiníndísâ-né ñà-nduá cachí mindaa Dèhemanì-yá.

19 Te ¿ndiá nduú meru ñà-disáhà-xí vaxi castigu mà dìquì-né? Divi sàhà-ñá sàni quesaa palabra ndàcuisì ñuhiví yohó ñà-datnúà sàxinítnùnì nèhivì, doco chicá nì cudì ini-nè caca-ne ichì ñáa, màdì ichì ndé datnúù Dios, vachi quini íá ñà-nduá quidá-né.

20 Te nsidaa nècuàchìmà, có-cùnì dahuun-ne cunini-ne palabra datnúù xì sàxinítnùnì-nè, nì có-tnàtuu stná-nè ndé cáhàn xì palabra mà sàhà-ñá màsà túi ñà-quini guá quidá-né.

21 Doco iin nèhivì quidá víi nacua cachí palabra ndàcuisì, cudì ini-nè tnàtuu-ne ndé íá palabra datnúù xì sàxinítnùnì-nè, vachi cunì-nè cundaà ini nsidaa nèhivì ñà-quidá víi-né nchícùn-nè ichì Dios —nì cachi Jesús.

Ñà-nduá nì cachi gà Juan Bautista sàhà Jesús

22 Daaní, nì quihin tu Jesús ichì cuàhàn-yà ladu Judea, mii-yá xì nècuàchì xínchicùn xì-yá. Te yucán nì ndòò chii-yá xì-né, dandu nì cuhii nèhivì cuàhà gá nì sàà yucán.

23 Stná Juan Bautista, yucán quidá î stná-nè nuù iin xaan nani Enón yatni lugar nani Salim, vachi ñuhú cuàhà tècuí yucán. Ñàyùcànduá, divi lugar mà sáhàn cuàhà nèhivì ñà-cuhii-né,

24 vachi tàñáha ga cundiadi Juan.

25 Tiempu mà nì cuu nì quesaha nì cuàà nèhivì nchícùn xì Juan xì itnii gá nècuàchì raza-nè Judea, vachi tucu tucu cachí iin iin-ne sàhà modo nduhii-ndà.

26 Dandu nsidaa-né nì quixi-ne nuù Juan nì cacachi-nè xì nècuàchìmà:

—Maestro, ináhá-nî ana nisa ía xi-ní ladu duha yùte Jordán, te nì càhàn-ní sàhà-né, ndiaha gá-nè nì cachì-ní; pues vichi mii stná-nè quidá î stná-nè nèhivì, te cuàhà gá nèhivì sáhàn nuù-né.

27 Dandu nì cachi Juan xì-né:

—Ni-iin nèhivì, mà cúí nihì-né iin chuun ndiaha nú màsà cuáha Dios-nè.

28 Ináhá-nsiâ nansa nì cachì: “Yùhù, có-nduì (rey ndiaha nani) Cristu, cuisì iin ana nì techuún Dios nduì, te dihna vaxi nuù mii-yá”.

29 Cunaha-nsiá, na íá vicò nandàhà, íá iin noviu, te íá stná novia cutnáhâ xí-nè. Doco íá stná padrinu iladú, iníní-né, te cudì ini-nè na cáhàn noviu. Pues, ducán íá stná yùhù, nahi padrinu nduì, te yáha ga cudì inì sàhà mii-yá.

30 Mii-yá, cueé-nì cueé-nì chicá icúmí-yâ nihì gá-yà tnùñuhu xí-yá, doco yùhù, còó. Cueé-nì cueé-nì icúmí nèhivì nandòó-né yùhù.

Jesús nduú ana nì nuu ansivi

31 Mii-yá, dècuèndè dìquì-xí nì quee-ya, ñàyùcànduá chicá ndiaá-yà nuù nsidaa-nda. Iin nèhivì ñuhiví yohó, nèhivì ùún nduú-né, te cuisì sàhà ñuhiví yohó cáhàn-nè. Doco mii-yá, ansivi nì quixi-ya, te chicá ndiaá-yà.

32 Te ñà-nduá sàni xini-yà, xì ñà-nduá nì inini-ya, ñà-jaàn nduá cachí-yà xì nèhivì, doco có-xiníndísâ-né ñà-nduá cachí-yà.

33 Doco nú xiníndísâ iin nèhivì-yá, dandu náhà claru sàni cundaà ini nècuàchìmà ñà-mii palabra ndàcuisì nduá cachí Dios.

³⁴ Vàchi Jesús, mandu xi (Yua-nda) Dios vaxi-ya, te divi palabra ndiaha xí Yuamánì-yá cáhàn-yà, vachi màdi iyuhu-ní Espíritu Ìi sàni nìhìtáhvi-yá, còó. Sàni nìhì nsihí-yá Espíritu Ìi.

³⁵ Te cuú ini Yuamánì-yá sàhà-yá. Ndahà-yá sàni dáyáha Yuamánì-yá nsidanicuú ìñàha.

³⁶ Cunaha-nsiá, nsidaa ana xiníndísá-xí Dèhemanì Dios, nicanicuahàn cucumi-né vida ndiaha. Doco nèhivì có-xiníndísâ, mà-nìhì-né vida ndiaha ma. Còó, iin castigu cahnú icúmí-né nìhì-né nùù-yá, te sà-ítuá vaxan.

4

Nansa nì yàha iin nècuàchì ñahà ñuu Samaria ladu xi Jesús

¹⁻² Quivì yucán nì nducuahà gá nèhivì nchícùn xì Jesús. Te nì cuhì stná-nè. Doco màdi mii Jesús nì quidá ìi xì-né, cuisì nècuàchì dacuahá-yá nì quida ìi xì-né. Dècuèndè más gá nèhivì xí-yá nì cuhì nùù nèhivì nì quida ìi Juan Bautista. Dandu nì xinitnùhu stná nècuàchì fariseu ñà-cuàhà guá nèhivì nchícùn xì-yá. Ñàyùcànduá, na ní cundaà ini-yà ñà-sà-ìnhá nècuàchì mà ñà-jaàn,

³ dandu nì quee-ya ladu Judea mànuhù-yá ladu Galilea, (mii-yá xì nècuàchì dacuahá-yá).

⁴ Te ichì mà icúmí-yá yàha-ya ladu Samaria.

⁵ Te xicá-yá nì nasaa-yà yatni iin ñuu tii nani Sicar. Te divi yucán nduú stná ñuhù ndé nìsa itnii José sàhaha, vachi ñuhù nì ndutahvì-né nùù yua-né Jacob nduá.

⁶ Te yucán iá stná pozo nìsa xichuún Jacob mà sàhaha. Pues divi yuhù pozo mà nì sàcòo chii-yá, vachi canì ichì nì xica-ya, te xávì-yà. Nahi càxíhù nduá,

⁷⁻⁸ te sàcuàhàn nsidaa nècuàchì dacuahá-yá ñuu mà ñà-cuiin-ne ñà-cutiacu-nè. Dandu (nùù pozo mà) nì tnàtuu stná iin nècuàchì ñahà ladu Samaria mà ñà-tavà-né tècuí. Te nì cachi-yà xì-né:

—Taxi tahvì-ní iyuhu tècuí cohi.

⁹ Te nì cachi nècuàchì mà xì-yá:

—Doco mii-ní, iin nècuàchì raza Judea nduu-ní. ¿Índù chuun xicàn-ní tècuí coho-ní nùù yùhù? vachi nsidaa nècuàchì ñuu-ní, indéhe úhì-nè nsiùhù tè-nduú nècuàchì Samaria yohó.

¹⁰ Dandu nì cachi Jesús xì-né:

—Ndhví-nì, vachi có-cùndàà inì-ní nansa quidá Dios, dacútâhvi-yá tnùmanì xí-yá nùù nèhivì; nì có-ìnhá stná-ní ana divi nduú yùhù ana xicàn xì tècuí nùù-ní. Vachi nú ni cùndàà inì-ní, dandu càcàn tãhvi-ní nú, te dacútâhví mii-ní tècuí cutiacu ndiaha-ní.

¹¹ Dandu nì cachi-nè xì-yá:

—Señor, còò ni-ìñàha nihi-ní tavà-ní tècuí yohó, vachi cunú ñuhù-te. ¿Nansa cui tavà-ní tècuí cutiacu ndiahí?

¹² Cunaha-ní, pozo yohó nduú ndé nìsa xihi xii-ndà Jacob, mii-né xì nsidaa dèhe-ne xì quisi xí-né, dandu nì naco-neà nùù nsiùhù. ¿Te mii-ní, a chicá ndiaá-ní nùù xii-ndà mà cahan-ní?

¹³ Dandu nì cachi Jesús xì-né:

—Nú ni cohó nèhivì tècuí pozo yohó, dandu tucutu icúmí-né cui-nè tècuí después.

¹⁴ Doco nú ni cohó-né tècuí dacútâhvi yùhù-nè, dandu mà nunca cui gá-nète nicanicuahàn. Vachi ducàn quea na ian ñuhù tècuí ini-nè, te ndèa ndiaha-té dècuèndè nìhìtáhvi-né vida ndiaha nicanicuahàn.

¹⁵ Dandu nì cachi nècuàchì ñahà mà:

—Señor, taxi-ní tècuí mà cohi ñà-màsà cúí guè tècuí, te màsà quíxí guè yohó taví-te.

¹⁶ Dandu nì cachi Jesús xì-né:

—Cuahán-nì cana-ní ìi-ní quixi-nsia.

17 Dandu nì cachi nècuàchìmà:

—Còò ìi yùhù.

Dandu nì cachi Jesús xì-né:

—Ñà-ndáà nduá cachí-ní còò ìi-ní,

18 vàchi ùhùn xichi sàni nandàhà-ní, te nì sate tnahá-nsiá. Te tiàa iá xì-ní vichi, màdi ìi-ní nduú-né. Ñà-jaàn ndisa nì cachi ndàà-ní.

19 Dandu nì cachi nècuàchìmà:

—Vichi sàni cundaà inì, na iin nèhivì cáhàn cuenta xi Dios nduu-ní, señor.

20 Doco estilu xi xì-nsí nduá cahvi-nsí Dios dìni yucù jaàn; doco mii-nsiá, còó. Ñuu-nsià Jerusalén nduú lugar ndé ndiá icà-ndà cahvi-nda Dios, cachí mii-nsiá.

21 Dandu nì cachi Jesús xì-né:

—Señora, cunindisa-ní yùhù: vaxi iin quivì, dandu màdi cuisì dìni yucù jaàn, ni màdi cuisì ñuu Jerusalén cùhùn-nsià cahvi-nsiá Yua-nda Dios.

22 Mii-nsiá, có-ináhá ndisá-nsiá ana divi cahvi-nsiá. Doco nsiùhù, ináhá vâha-nsi ana cahvi-nsí, vâchi cuisì nsiùhù tè-nduú nècuàchì raza Judea icúmí xí palabra nansa càcu anima nèhivì.

23 Cunaha-ní, vaxi iin quivì, dandu nèhivì cuní cahvi ndisa xi Dios, inì-ni anima-nè icúmí-nè cahvi-néyà, te cahvi stná-néyà nacua cachí palabra ndàcuisì xí-yá, vâchi ducán cuní-yà quida-ne na cahvi-néyà. Te vichi sàni sàà stná quivì quida-ne ducán.

24 Vâchi mii espíritu ndiaha nduú Dios. Ñâyùcàndùá, nú cuàhàn-ndà cahvi-ndayá, dandu inì-ni anima-ndà icúmí-ndá cahvi-ndayá; te icúmí-ndá cahvi stná-ndàyá cuisì nacua cachí palabra ndàcuisì xí-yá —nì cachi Jesús.

25 Dandu nì cachi nècuàchì ñahà mà:

—Yùhù ináhî quixi mii-yá ana nduú Mesías, divi mii-yá nani Cristu. Te nú sàni quesaa-yà, dandu cachitnùhu-ya xì nèhivì nsidaa ñà-nduú ñà-ndáà.

26 Dandu nì cachi Jesús xì-né:

—Yùhù ana cáhàn xì-ní vichi, divi nduú mii-yá.

27 Daaní, cáhàn va-ya xì nècuàchì yucán, te nì cansiaa tu nècuàchì dacuahá-yá. Te nì ndulocó-nè, cóni cùndáà ini-nè índù chuun ndatnúhú-yâ xì nècuàchì ñahà mà. Doco cóni xicàn tnùhù-né nùù-yá índù chuun cáhàn-yà xì-né, ni cóni ndácàtnùhù-né nùù-yá índù palabra cachí-yà xì-né.

28 Dandu nècuàchì ñahà mà, nì naco-ne yoo xi-ne mànuhù-né ini ñuu mà, te nì càhàn-nè xì nèhivì, cachí-nè:

29 —Naha-nsià cùhùn-ndà cundehè-nsiá iin tiàa iá yucán, vâchi nì nacani-ne xí nsidaa ñà-nduá nì quide vida xi. ¿Amádi mii-yá nduú Cristu (ndiatu-nda)?

30 Ñâyùcàndùá, nì ndecoyo cuàhà nèhivì ñuu yucán vâxi-ne ndé iá Jesús,

31 vâchi iá ìi-yá xì nècuàchì dacuahá-yá. Te nì sacundahví nècuàchì dàcuahá-yá mà nùù-yá, cachí-nè:

—Maestro, cuxi-ní iyuhu.

32 Doco nì cachi-yà xì-né:

—Sà-icúmí ñà-cutiacuì mate có-cùndáà inì-nsia índù iñàha nduá.

33 Dandu nì ndatnuhu nècuàchì dacuahá-yá iin-ne xì inga-nè, cachí-nè:

—¿A vihi-ni nì quixi iin nèhivì nihí xi ñà-nduá cuxi-ya cahan-nsiá?

34 Ñâyùcàndùá nì cachi-yà xì-né:

—Còó. Ñà-itiácú yùhù nduú ñà-quide cumplir nacua nì cachi mii-yá nì techuun-xí vâxi. Cuní dansihí chuun ndiaha nì sàha-ya yùhù. Te ñà-jaàn nduá itiácú.

35-36 (Ináhî) cachí-nsià cumáni gá cùmì yòò, dandu ndanchito cosecha. Doco yùhù cachí xì-nsiá, cundehè-nsiá (nadaa nèhivì ndoó ñuhivì), vâchi nahi cosecha xínduu stná-nè, te sà-íà ndanchitoa. Te na quidá nèhivì chuun ndiaha xí cosecha mà, pues

ñà-nìhì ñanìtnaha-ne vida ndiaha nicanicuahàn nduá. Dandu después, icúmí-nê nìhì-né ñà-vàha xi-ne, te cudìì gá ini-nè, mii-né xì stná nèhivì nì chihi stná xì (palabra primeru).

³⁷ Te ñà-jaàn nduú nahi dichu cachì: “Díin nèhivì chihí, te díin nèhivì ndaníhì xì cosecha”.

³⁸ Yùhù nì techuín mii-nsiá ñà-quida-nsia iin chuun (ndiaha ñà-chindee-nsiá nèhivì nìhì-né vida ndiaha, na ian) ndanihi-nsia cosecha. Doco màdì mii-nsiá nduú ana nì dàquésáhá xì chuun ma; còó, díin nèhivì nduú ana nì caquidachuún primeru, dandu después nì quìhvi stná mii-nsiá —nì cachi Jesús.

³⁹ Cunaha-nsiá, cuàhà nèhivì ñuu tii ladu Samaria mà nì xinindisa-xi-yá, vèchi nì xinindisá-né palabra nì cachi nècuàchì ñahà mà ñà-nì nacani-ya xì-né nsidaa ñà-nduá nì quida-ne vida xi-ne.

⁴⁰ Ñàyùcànduá na ní quesaa nsidaa-né ndé iá-yà, dandu nì sacundahví-nè nùù-yá ñà-nì còó chii gá-yà ñuu-nè; te sàhájàn nì là ga-yà ùì gá quìvì.

⁴¹ Dandu cuàhà gá stná nèhivì nì xinindisa-xi-yá, vèchi nì inini-ne nì càhàn mii-yá.

⁴² Ñàyùcànduá, nì cacachi-nè xì nècuàchì ñahà mà:

—Vichi màdì cuisì sàhà ñà-nduá nì cachì-nì nì xiníndísâ-nsí; còó, vèchi vichi sàni inini stná-nsì mii-yá na càhàn-yà palabra xi-ya, ñàyùcànduá sàni cundaà ini-nsì ñà-divi mii-yá nduú ana dacácu xi nèhivì ñuhivì; meru Cristu nduú-yá —nì cachi-nè.

Nansa nì dándúvaha Jesús dèhe iin nècuàchì dandacú

⁴³ Daaní, nì nsìhi nì là Jesús ñuu yucán ùì quìvì, dandu nì naquihin-ya ichì mànuhù-yá ladu Galilea.

⁴⁴ Te mii-yá nduú ana nì cachi ñà-có-quidáñúhú nèhivì iin tiàa càhàn cuenta xi Dios nú nduú-né iin nècuàchì ñuu-nè.

⁴⁵ Daaní, na ní nasaa-yà ladu Galilea mà, nì cudìì ini nècuàchì ladu yucán sàhà-yá, vèchi nì sàhàn stná-nè ñuu Jerusalén quìvì nì là vicò, te nì xini stná-nè nsidaa milagru nì quida-ya yucán.

⁴⁶ Daaní, nì nasaa stná-yà ñuu tii Caná iá ladu mà, divi ñuu ndé nì quida-ya milagru xì tècuí uun nì nanduu-tè ndutè vídì sì-uva. Te yucán nì quesaa stná iin nèhivì xì gobiernu nì quixi ñuu Capernaum, vèchi iá iin dèhe-ne cuhí.

⁴⁷ Te nì xinitnùhu-ne sàni nsiaa tu Jesús nì sàhàn-yà ladu Judea. Ñàyùcànduá vèxi-ne nchícùn-nèyà, te nì sacundahví-nè nùù-yá áma cùhùn-yà xì-né ñuu-nè, te dándúvaha-ya dèhe-ne, vèchi sàcùcàhvì-te.

⁴⁸ Doco nì cachi Jesús xì-né:

—Mii-nsiá, nú màsà quidé iin milagru fuerte cundehè-nsiá, mà sàà-nsià cunindisá-nsiá.

⁴⁹ Doco nì cachi nècuàchì mà xì-yá:

—Señor, cùhùn-ndà vehi por favor, còtó cui dèhi.

⁵⁰ Dandu nì cachi Jesús xì-né:

—Vàtùni nùhù-ní, vèchi cuàhàn nduvàha dèhe-ní.

Dandu nì xinindisá nècuàchì mà palabra nì cachi-yà xì-né, ñàyùcànduá mànuhù-né vehe-ne.

⁵¹ Te na sá-ítúú-né nasaa-nè, nì ndacùhun tnahá-né xì itnii peón xi-ne nihi-xi razón vèxi, te nì cachì-te:

—Sàcuàhàn nduvàha dèhe-ní.

⁵² Dandu nì xicàn tnùhù-né índù hora nì quesaha nì nchìco cuèhè. Te nì cachì-te:

—Icu, nahi càhiin nì nchìco ini-vè.

⁵³ Ñàyùcànduá, nì cundaà ini-nè, divi hora nì càhàn-nè xì Jesús nì sanduamà, divi hora nì cachi-yà xì-né ñà-cuàhàn nduvàha dèhe-ne. Ñàyùcànduá, nì xinindisá-nèyà, mii-né xì nsidaa stná nèhivì vehe-ne.

⁵⁴ Cunaha-nsiá, milagru yohó nduú milagru ùì nì quida-ya na ní nasaa-yà ladu Galilea nì sàhàn-yà ñuu Judea.

5

Nansa ni dándúvaha Jesús iin tiàa ni dàñà tnahá ù iquicúñù-xi

¹ Daaní, quivì yucán nacává iin vicò xí nècuàchì raza Judea, ñàyùcàndùá, nì quihin tu-ya ichì cuàhàn-yà ñuu Jerusalén.

² Te ini ñuu mà iá iin pila cahnú tècuí. Te yucán itánduhù stná ùhùn vehe nahi corredor. Te lugar mà, Betesda naniá, te yatni iá mà ndé iá iin yehè ñuu mà nani Yehè Riì.

³ Pues divi vehe ma itánduhù cuàhà nècuàchì cuhí, nècuàchì cuaá, nècuàchì xicá cuéhè, nècuàchì yáha ga nì ichì, xíndiatu nsidaa-né ndacùchí tècuí mà.

⁴ Vàchi (cachí-nè) cada yáha iin tiempu, dandu nuú iin ángel xi Dios dandácùchí xì-té. Dandu nèhivì primeru quihvi mahì-té, icúmí-nê nduvàha-ne nùù cuèhè quida xi-né, ndéni cuèhè nì cui nì cundúá, icúmíâ cuxioa.

⁵ Te yucán iá stná iin tiàa indúhu yuhù tècuí mà, 38 cuà icúmí-nê cuèhè quida xi-né.

⁶ Dandu, nì xini Jesús jaàn indúhu-né, te ináhá stná-yà ñà-càní cuà iá-nè xì cuèhè mà, ñàyùcàndùá, nì cachi-yà xì-né:

—Mii-ní, ¿a cuní-nî nduvàha-ní?

⁷ Dandu nì cachi-nè xì-yá:

—Señor, còò iin chindee xí na hora ndácùchí tècuí, te quihvi stnàì mahì-té. Vàchi na meru sái, dihna inga-nè nì sàà-nè nùí, te nuú-né ndé ñuhú tècuí.

⁸ Dandu nì cachi Jesús xì-né:

—Ndacuiìn-ní, ndanihi-ní camilla xi-ní, te caca-ní.

⁹ Dandu vichi vichi nì nduvàha nècuàchì mà nì ndanihi-ne camilla xi-ne, nì nacaca-ne cuàhàn-nè. Te quivì yucán, quivì descansu nduá.

¹⁰ Ñàyùcàndùá, nì cachi dava nècuàchì ñuu mà xì nècuàchì nì nduvàha ma:

—Quivì descansu nduá vichi. Còò ley xi-nda cunsida-ní camilla xi-ní.

¹¹ Dandu nì cachi tiàa ma xi-né:

—Nècuàchì nì dándúvaha xí, nì cachi-nè xì: “Ndanihi-ní camilla xi-ní, te caca-ní”.

¹² Dandu nì ndacàtnùhù nèhivì mà nùù tiàa ma, cachí-nè:

—¿Ana divi nì cachi xì-ní ducán?

¹³ Doco nècuàchì mà, có-ináhá-nê nansa nani ana nì dándúvaha xi-né, vàchi sàcuàhàn Jesús, te cuàhà gá nèhivì ndoó lugar yucán.

¹⁴ Daaní, después nì ndacùhun tnahá-yà xì-né na xicánúú-né patiu veheñuhu, te nì cachi-yà xì-né:

—Vichi sàni nduvàha-ní. Màsà naxícócuìn-ní quida-ní cuàchi, còtó quixi iin tnùndoho chicá fuerte dìquì-ní.

¹⁵ Dandu tiàa ma, nì sàhàn-nè nì cachitnùhu-ne xì nècuàchì raza-nè mà ñà-divi Jesús nduú ana nì dándúvaha xi-né.

¹⁶ Ñàyùcàndùá nì caxini ùhì nècuàchì yucán mii-yá, te nì quesaha-né ndatnúhú-nê nansa cahni-néyà ñà-nì quida-ya milagru mà iin quivì descansu.

¹⁷ Dandu nì cachi-yà xì nsidaa nècuàchì yucán:

—Yuamání, iin-ni quidáchúûn-yà nsiquívì, ñàyùcàndùá ducán quidá stná yùhù.

¹⁸ Ñàyùcàndùá chicá más nì cuni nècuàchì ladu Judea mà cahni-néyà, vàchi màdì cuisì-ní có-chívàha vii-yà quivì descansu (cahan-né), sino que nì cachi stná-yà Dios nduú Yua-yá, te ducán ndudává stnahá-yà xì mii Dios.

Nansa icúmí Jesús derechu dandacú-yá

¹⁹ Dandu nì naxiconihí-yà nùù nècuàchì mà, cachí-yà:

—Cunini-nsia palabra yohó cachí. Mii mà cúí quide ni-iñàha, cuisì ñà-nduá sàni xini quidá stná Yuamání Dios, vàchi nacua quidá mii-yá, divi ducán icúmí quida stnàì.

²⁰ Cunaha-nsiá, cuú ini-yà sàhí, te nsidaa obra ndiaha quidá mii-yá, ñà-jaàn dacuní stná-yà yùhù quide. Te vichi sàni xini-nsià iin ùì milagru, doco cuàhà obra chicá ndiaha icúmí-yâ dacuní-yà yùhù, dandu más ga icúmí-nsiâ ndulocó-nsià.

21 Vàchi nacua danátíacú-yà nècuàchì nsìi, te nacuàha-yanè vida, divi ducán quidá stná yùhù. Ñàyùcànduá, vátùni danátíacú stnáì ndéni nèhivì ní cui cudí inì.

22 Te có-nsidándáa-yà sàhà cuàchi nèhivì, vàchi ndahà yùhù sàni dáyáha-ya chuun jaàn.

23 Ducán, dandu quidañuhu stná nèhivì yùhù nacua quidañúhú-nè mii-yá. Vàchi nú màsà quidañúhú-nè yùhù ana nduú Dèhemanì-yá, dandu queámà na ian có-quidañúhú stná-nè mii-yá ana nì techuun-xí vàxi.

24 'Ñà-ndácuisì nduá cachí xì-nsiá: nú iníni iin nèhivì ñà-nduá cachí, te xiníndísâ-né mii-yá nì techuun-xí vàxi, dandu cutiacu-nè nicanicuahàn. Mà sàa-nè cuni-nè juiciu, vàchi sàni yàha-ne ndahà mii-yá ana sàha xi vida ndiaha. Mà cóo gá-nè ladu ndé xihì anima-nè.

25 'Ñà-ndàa nduá yohó cachí xì-nsiá: vàxi iin tiempu, dandu icúmí yùhù ana nduú Dèhemanì Dios ndàhì fuertí, te canì nsidaa nècuàchì sàni xihì, dandu nsidaa ana cunini xí, nihì-né vida ndiaha. Te cunaha-nsiá, vichì nduú stná tiempu mà.

26 'Yuamání, nicanicuahàn ñuhú vida saín ini-yà. Te sàni chitnùnì stná ini-yà ñà-nicanicuahàn cucumi stná yùhù vida saín mà, vàchi Dèhemanì-yá nduí.

27 Te sàni sàha stná-yà yùhù chuun nsidandaì sàhà cuàchi nèhivì, vàchi tnaha nèhivì ñuhiví nduú stnáì.

28 Te có-nduá ñà-ndulocó-nsiá sàhà palabra jaàn, vàchi vàxi iin quivì, dandu nsidaa ana ñuhú tìxi ñuhù, icúmí-né tiacu-nè na canì mii-né.

29 Dandu quecoyo nsihì-ne. Nècuàchì nìsa quida vii, nihì-né natiacu-nè sàhà ñà-cutiacu ndiaha-né nicanicuahàn. Doco nècuàchì cóni quidá víi, cuisì natiacu-nè sàhà ñà-nihì-né castigu sàhà cuàchi-ne.

Nansa nì cachi Jesús ñà-mandu xi Yuamánì-yá nì quesaa-yà ñuhiví yohó

30 'Cuenta xi míi, mà cúí quide ni-iñàha. Cuisì nacua nì sàcùnahí, divi ducán nsidándái sàhà cuàchi nèhivì. Te nú nsidándái sàhà-né ducán, dandu meru nacua ndiá ìcà cundua, vàchi divi Yuamání nduú ana nì techuun-xí nì quesai ñuhiví, te ñà-nduá cunì mii-yá coo, divi nduá quidé, màdiá nandúquí ñà-quide ñà-cunì míi.

31 'Nú cuisì yùhù nì cundúú ana cachítñuhu xi-nsiá sàhà ana nduí, dandu mà có-ndiàa mà.

32 Doco iá inga nèhivì cachítñuhu sàhí, te ináhí cachí ndàa-nè.

33 Pues divi nduú Juan (Bautista). Te nì techuún-nsiá compañeru-nsiá ndàcàtnùhù-né nùù nècuàchì mà, te ñà-ndàa nduú palabra ni naxiconihí-né.

34 Doco yùhù, cóo necesidad icúmí càhàn iin nèhivì ùùn sàhí. Te ñà-nduá cachí xì-nsiá, ñà-jaàn cachí sàhà-ñà nihì-nsiá càcu anima-nsiá.

35 Iin ratu tii nì cudí inì-nsiá sàhà ñà-nduá quidá Juan (Bautista), vàchi iin ana datnúú xì sàxínitnùnì-nsiá (sàhà ichì Dios) nì sanduu ndisa-ne.

36 Doco iá inga iñàha chicá fuerte nùù palabra nì cachi Juan sàhí. Vàchi cuàhà chuun ndiaha nì sàhatahvì Yuamání yùhù ñà-quide, te divi sàhà chuun ndiaha ma vátùni cundaà inì-nsiá ñà-divi mandu xi mii-yá vàxi.

37 Daaní, stná mii-yá sàni dàtúi-ya ana divi nduú yùhù. Doco mii-nsiá, tàcùnì-nsiá nansa càhàn-yà; te tàcùnì stná-nsiá nansa indéhe-yá.

38 Ni có-nìhnú stná inì-nsiá ñà-nduá cachí-yà, vàchi có-xiníndísâ-nsiá yùhù ana vàxi cuenta xi-ya.

39 'Cuàhà gá dacuahá stná-nsiá tutu ìi, vàchi ducán nihì-nsiá vida ndiaha nicanicuahàn, cachí-nsiá. Doco cunaha-nsiá, divi sàhà yùhù càhàn stná tutu ìi mà.

40 Doco có-cunì-nsiá cunindisá-nsiá yùhù, te nihì-nsiá vida ndiaha.

41 'Yùhù, có-xìcánuí nandúquí nansa quidañuhu nèhivì yùhù.

42 Doco ináhí nansa nihnú ini mii-nsiá; ináhí có-cùú ini-nsiá sàhà Dios.

43 'Mate cuenta xi Yuamání vàxi, có-xiníndísâ-nsiá yùhù. Doco nú ni quixí inga ana càhàn cuisì sàhà mii-xí, dandu divi cuàhàn-nsiá cunindisá-nsiá.

⁴⁴ 'Tùha-nsia nanducu-nsiá quidañuhu nèhivì mii-nsiá, doco ñà-ndee vaha-nsia nùu ana nduú mindaa Dios, còó, có-nàndúcú-nsiá ñà-jaàn. Ñàyùcàndüá, sadíamà nùu-nsiá ñà-mà cùì cunindisá-nsiá yùhù.

⁴⁵ 'Màsà tuxí inì-nsia yùhù cuàhìn daquée cuàchi dìquì-nsiá nùu Yua-nda Dios. Còó, diín nduú ana icúmí canicuàchi sàhà-nsiá, divi nduú Moisés, mate tuxí ini-nsiá ley xí nècuàchìmà nduá cuàhàn dacácu xi-nsiá.

⁴⁶ Vàchi nú nì xìnindisá-nsiá ñà-ndüá nì tiaa Moisés nì cùì, dandu cunindisá stná-nsiá yùhù, vachi divi sàhà yùhù nì tiaa nècuàchìmà.

⁴⁷ Doco nú có-xìnindisá-nsiá palabra nì tiaa-nemà, dandu mà sàà stná-nsiá cunindisá-nsiá ñà-ndüá cachí yùhù —nì cachi Jesús.

6

Nansa nì dàcùxí Jesús ùhùn mìl tiàa

¹ Daaní, nì quihin tu-ya ichì cuàhàn-yà inga ladu tècuí cuàhà nani mar de Galilea. Te mar de Tiberio nani stná mà.

² Te cutnáhâ stná-yà xì cuàhà gá nèhivì, vachi sàni xini-nè nansa nì quida-ya milagru nì dàndùvaha-ya cuàhà nècuàchì cuhí.

³ Dandu nì nana-ya iin yucù yucán, te nì sàcòo-ya, mii-yá xì stná nècuàchì dacuahá-yá.

⁴ Te quivì yucán nduú quivì sà-ítúú nacava vicò pascua, iin vicò cahnú xí nècuàchì raza Judea.

⁵ Te nì indehè-yá, nì xini-yà ñà-cuàhà guá nèhivì vaxi nùu-yá, ñàyùcàndüá, nì cachi-yà xì Felipe:

—¿Índù cui cùhùn-ndà cuiin-nda ñà-cutiacu nsidaa nèhivì yohó cahan-ní?

⁶ Ducán nì cachi-yà xì nècuàchìmà, doco sà-ínahá-yâ nansa cuàhàn-yà quida-ya; nì cachi uun-ya xì-né a ver nansa cachi-nè.

⁷ Ñàyùcàndüá, nì cachi-nè xì-yá:

—Còó, ni mà sàà ùì cientu dìhùn plata ñà-cuiin-nda pan cuxi-ne, vachi ni ñà-jaàn mà sàà nihì iin iin-ne iyuhu iyuhá —nì cachi-nè.

⁸ Dandu nì càhàn iin nècuàchì dacuahá-yá nani Andrés, divi ñani Simón Pedro, te nì cachi-nè xì-yá:

⁹ —Yohó iá iin tèchii nihì-xi ùhùn pan tnuu xì ùì siaca cuati. Doco iyuhu nduájàn; mà sàà cuxi nsidaa nèhivì ñà-cuàhà guá-nè.

¹⁰ Dandu nì cachi Jesús:

—Càhàn-nsiá xì nèhivì ni mácùndoo-ne ñuhù.

Ñàyùcàndüá nì sàcùndoo nsidaa nèhivì nùu yùcù cuií, vachi iá cuàhà yùcù yucán. Te cunaha-nsiá, cuisì nècuàchì xínduu tiàa, ùhùn mìl nì sanduu-ne.

¹¹ Dandu nì tnii-ya nsì-ùhùn pan mà, nì naquimanì-yá Dios sàhà-ñá, te nì dasàn-yáñà nùu nècuàchì dacuahá-yá. Dandu mii-né, nì dàcuàchì-néà nì sàha-ne nèhivì ndoó yucán. Te divi ducán nì quida stná-nè xì siaca. Te nsidaa nèhivì, nì nihì-né nacua cudí ini-nè cuxi-ne.

¹² Daaní, na sàni chitu tixi nsidaa-né, dandu nì cachi-yà xì nècuàchì dacuahá-yá:

—Datacá-nsiá ñà-nì cusobrá sàhá màsà ndáñúhú ni-iyuhá.

¹³ Ñàyùcàndüá, nì dàtácá-nè ñà-nì ndòo ma na ní nsihi nì xixi nsidaa-né. Te nùu ùhùn pan mà nì cuyodò gá ùxìn ùì ìcà sàcàté chitu pedazu-ñà.

¹⁴ Dandu nì cundaà ini nèhivì yucán iin milagru nduá nì quida-ya, ñàyùcàndüá nì cachi-nè:

—Ñà-ndáà nduá, Jesús yohó nduú ana xíndiatu-nda quesaa ñuhivì, divi nècuàchì icúmí càhàn cuenta xi Dios.

¹⁵ Doco Jesús, ináhá-yâ nansa xínihu ini-nè quida-ne, divi ñà-cùnì-nè tñii-neyà fuerza, te cunduu-ya rey dandacú nù-né. Ñàyùcàndùá, nì quecuaán-yá inga xichi, cuàhàn mindaa-yá ndé nduú yucù.

Nansa nì xicandodò Jesús nùù tècuìí mar

¹⁶ Daaní, nì cuaà quìvì yucán, te nì nuu nècuàchì dacuahá-yá dècuèndè yuhù tècuìí cuáhà mà.

¹⁷ Nì sàcùñuhu-ne ini lancha, te nì quihin-ne ichì cuàhàn-nè inga ladu mar tii ma, cunì-nè cùhùn-nè ñuu Capernaum. Te nì cuñaà, te tàñáha ga quesaa Jesús.

¹⁸ Dandu nì quesaha caná fuerte tàchì, ñàyùcàndùá, ducún nì nacuahnu todò tècuìí.

¹⁹ Te na sàcuàhàn-nè ini lancha mà nahi ùhùn ò ìñù kilómetro, dandu nì xini-nè jaàn vaxi-ya, xicándodo-yá nùù tècuìí, te sà-itúú-yá quesaa-yá ndé cuàhàn lancha. Doco mii-né, nì yùhí-nè.

²⁰ Dandu nì cachi-yà xì-né:

—Yùhù nduí; màsà yùhí-nsià.

²¹ Ñàyùcàndùá, nì dàyáha-neyà ini lancha, cudì ini-nè. Te vichi vichi na iin cachí sàni sàa lancha mà dècuèndè ñuu ndé nchícùn-nè cuàhàn-nè.

Nansa nì yàha stná nèhivì mar nandúcú-né Jesús, te nì cachi-yà xì-né nansa sáhatahvì-yá vida ndiaha

²² Daaní, inga quìvì, te nì nataca cuáhà tú nèhivì yuhù mar (ndé nì quee lancha), te ináhá-nè imindaa-nú nisa ìa yucán, te vichi cuàhàn nsihi nècuàchì dacuahá-yá ini-nu. Doco ináhá stná-nè ñà-có-cùtnáhâ-yá xì nècuàchì mà cuàhàn, vachi micuìsi-né cuàhàn-nè.

²³ Doco después nì caquesaa tu itnii gá lancha nì quixi dècuèndè ñuu Tiberias nì quesaa-nu ndé ndoó nèhivì cuáhà mà, divi lugar ndé nì caxixi-ne pan na ní naquimanì-yá sàhà-ñá.

²⁴⁻²⁵ Ñàyùcàndùá, na ní cundaà ini nèhivì yucán, ni còò-yá, te ni còò stná nècuàchì dacuahá-yá, dandu nì quècoyo stná-nè ini lancha, nì quihin-ne ichì cuàhàn-nè mahì mar, te nì casaà stná-nè ñuu Capernaum, nandúcú-nèyà inga ladu mar mà. Te na ní ndacùhun-neyà, nì cachi-nè xì-yá:

—Maestro, ¿índù hora nì quesaa-ní yohó?

²⁶ Te nì cachi-yà xì-né:

—Cunini-nsia palabra yohó: yùhù ináhí índù chuun nandúcú-nsià yùhù. Màdì sàhà ñà-nì xini-nsià milagru nduá; còó. Sàhà ñà-nì xixi vaha-nsia, te nì chitu tìxi-nsia nduá.

²⁷ Doco màsà nácánì inì-nsia sàhà nansa nìhì-nsiá ñà-cutiacu-nsià ñuhivì yohó, vachi sacù-ni tiempu cundiaà mà. Chicá nsiha nanducu-nsiá ñà-ndiaha ì cutiacù-nsia nicanicuàhàn. Te divi ñà-jaàn nduá sáhatahvì yùhù ana nduú Tnaha Nèhivì Ñuhivì, vachi nùù Yua-nda Dios sàni nìhìtáhvì ñà-quide chuun ì xì-yá.

²⁸ Dandu nì cachi nèhivì mà xì-yá:

—Cachì-ní xì-nsí nansa quida-nsi sàhà-ñá cundua obra vaha nacua cunì Dios quida-nda.

²⁹ Dandu cachí-yà xì-né:

—Ñà-cunindisá-nsiá yùhù ana nì techuún-yá nì quesaa, divi ñà-jaàn nduú chuun vaha cunì Dios quida-nsia.

³⁰ Dandu cachí-nè xì-yá:

—Pues nú ducán, dandu ¿índù seña quida-ní cundehè-nsí, te cunindisá-nsí? ¿Índù milagru quida-ní?

³¹ Vachi xì-ndà, na ní saxìca-ne yucù dàná, nisa còyo ñà-ndiaha nani maná nisa xixi-ne, vachi ducán cachí nùù tutu ì: “Nùù ansivi nì dàcòyo Yua-nda Dios pan nisa xixi-ne”.

³² Dandu nì cachi Jesús xì-né:

—Ñà-ndácuisì nduá cachí xì-nsiá: pan nì nìhì xì-nsiá nùù Moisés sàhana ma, cónì sándúú ndisa pan ndiaha vaxi ansivi. Còó. Yuamánì nduú ana sáhatahvì xì pan ndisa ndiaha ma.

³³ Vachi pan sáhatahvì mii-yá nduú yùhù ana nì techuún-yá nì quixi ndè gloria sàhà ñà-cutiacu nèhivì ñuhivì.

³⁴ Ñàyùcànduá, nì cachi nèhivì yucán:

—Señor, nicanicuahàn taxi tahvì-ní nsiùhù pan mà cuxi-nsi.

³⁵ Dandu nì cachi-yà xì-né:

—Yùhù nduí nahi pan xi-nsia cuxi-nsia nsiquívì, te cutiacu-nsià. Vachi nsidaa ana sàa cunindisa-xí, (ndiaha gá cundiatú anima-nè), na ian mà nunca cui-nè doco, te nì mà nunca cui stná-nè tècuíí.

³⁶ Doco nacua nì cachì xì-nsiá, sàni xini-nsià nansa quidé, te có-xiníndísá-nsiá.

³⁷ Doco sàni chitnùnì ini Yuamánì ñà-cundoo ana nduú nèhivì xí, te nsidanicuú nècuàchìmà, icúmí-nè (sàa-nè cunchicùn-nè yùhù). Te mà nunca taxi ni-iin ana cuní nàtuu nùí.

³⁸ Vachi divi sàhà-ñá quide ñà-nduá cuní mii-yá nì techuun-xí, ñàyùcànduá nì quei gloria nì quesai. Mà vaxi quide ñà-nduá cuní míí.

³⁹ Te ¿ndiá nduá cuní mii-yá nì techuun-xí? Pues, cuní-yà (ñà-iin-ni cundoo vii) nsidaa nèhivì nì sáhatahvì-yá yùhù; có-cùnì-yà ndañuhu ni-iin-ne. Dandu na sàa xinu tiempu, icúmí-nè natiacu nsihi-ne quide.

⁴⁰ Ñàyùcànduá, ndéni nèhivì ni cunítnùhu sàhà yùhù ana nduú Dèhemanì-yá, te cunindísá-né yùhù, vida ndiaha nicanicuahàn cucumi-né, vachi ducán nì chitnùnì ini Yuamánì. Dandu quívì xinu tiempu, icúmí-nè natiacu-nè quide —nì cachi Jesús.

⁴¹ Ñàyùcànduá, nì cuàà nècuàchì raza-yà Judea sàhà-yá ñà-nì cachi-yà nduú-yá pan ndiaha nì quixi gloria.

⁴² Te dohó nì cachi-nè, iin-ne xì inga-nè:

—Amádi dèhe José nduú Jesús yohó. Ináhá-ndá ana nduú yuadíhì-nè. ¿Índù chuun cachí-nè ndè gloria nì quixi-ne?

⁴³ Ñàyùcànduá, nì cachi Jesús xì nècuàchì yucán:

—¿Índù chuun cuàà-nsià ducán?

⁴⁴ Mà níhì ni-iin nèhivì nàcùnihu ini-nè yùhù nú cónì níhítáhvì-né ducán nùù Yuamánì nì techuun-xí; doco nú ni níhítáhvì-né ducán, dandu na quívì xinu tiempu, icúmí danátíacuí-nè.

⁴⁵ Sàhana nì tiaa nècuàchì profeta nùù tutu ìi, te dohó nì cachi-nè: “Cunaha-nsiá, icúmí Dios chinaha-yà nsidaa-né”, nì cachi-nè. Ñàyùcànduá, nsidaa nèhivì inínì xí Yua-nda Dios, te cundaà vaha ini-nè, divi nduú nècuàchì icúmí cunchicùn xì yùhù.

⁴⁶ Còó ni-iin ni xiní xì Yua-nda Dios. Cuisì mindaa ana nì quixi nùù-yá nì xinínùù xì-yá, (divi yùhù).

⁴⁷ Ñà-ndàà nduá cachí xì-nsiá, nsidaa ana xiníndísá-xí yùhù, vida ndiaha nicanicuahàn sàni níhítáhvì-né.

⁴⁸ Yùhù nduí nahi pan (cuxi nèhivì), te cutiacu-nè nicanicuahàn.

⁴⁹ Xì-nsiá nìsa xica yucù dàná, nìsa xixi-ne nùnì ansivi nani maná, doco nì xìhì nsihi-ne.

⁵⁰ Doco pan cáhàn yùhù sàhà-xí, còó. Nùù gloria nì quea vaxan, te nú sàni xixi iin nèhivì-ñá, dandu mà cúí gá-nè.

⁵¹ Pues cunaha-nsiá, yùhù nduí pan mà. Nùù gloria nì nui vaxi, te nú ni cunchicùn iin nèhivì yùhù, dandu nicanicuahàn cutiacu-nè, (na ian) sàni xixi-ne yùhù, te ducán cutiacu-nè. Te ¿índù iñàha cundua cuàhi ñà-cunduu nahi pan mà? Pues divi cuerpu xi cunduu pan mà, vachi icúmí cuàhi vida xi cuenta xi nèhivì ñuhivì sàhà-ñá nìhì-né cutiacu-nè —nì cachi Jesús.

⁵² Ñàyùcànduá, nì quesaha nècuàchì raza-yà Judea mà cuàà-nè entre mii-né, cachí-nè:

—¿Índù modo cuàha nècuàchì yohó iquicúñú-nè ñà-caxì-ndañá?

⁵³ Dandu nì cachi-yà xì-né:

—Palabra ndàcuisì nduá cachì xì-nsiá yohó: nú màsà cáxi-nsiá cuñu yùhù ana nduú Tnaha Nèhivì Ñuhiví, te nú màsà cóhó-nsiá nìí, dandu còò vida ndiaha nùù-nsiá.

⁵⁴ Nsidaa ana saxí xi cuñuì, te xihí-né nìí, vida ndiaha nicanicuahàn icúmí-nè, te icúmí-nè natiacu-nè na xìnu tiempu.

⁵⁵ Vàchi cuñuì, ñà-cutiacu-nda nduá, te nìí, ñà-coho-nda nduú stná.

⁵⁶ Nsidaa ana saxí xi cuñuì, te xihí-né nìí, sàni ndèe anima-nè ini anima yùhù, te iá stná ini anima mii-né.

⁵⁷ Yùhù itiácúì sàhà mii-yá ana nì techuun-xí vaxi, divi sàhà Yua-nda Dios iá nicanicuahàn. Te divi ducání stná xì nsidaa ana saxí xi yùhù, sàhà yùhù cutiacu-nè.

⁵⁸ Pues, ducán nduú pan nì quixi gloria. Doco tucu iá pan nìsa xixi xii-nsiá sàhana, vàchi siempre nì xihí-nè. Cunaha-nsiá, nsidaa ana xixi-xì pan cachì xì-nsiá vichi, nicanicuahàn cutiacu-nè.

⁵⁹ Ñà-jaàn nduá nì cachi Jesús na iá-yà veheñuhu ñuu Capernaum dacuahá-yà nèhivì.

Sàhà palabra xi Jesús nihì-nda vida ndiaha nicanicuahàn

⁶⁰ Na sàni inini nècuàchì dacuahá-yà ñà-nduá nì cachi-yà, dandu nì cachi dava-ne:

—Ùhì cunindisa-nda ñà-jaàn. Mà cándísà nèhivì palabra jaàn.

⁶¹ Doco Jesús, ducání ináhá-yà nansa xicachi-nè cáhàn ndiaa-nèyà ducán. Ñàyùcànduá, nì cachi-yà xì-né:

—¿A có-ndòo ini-nsiá sàhà ñà-nduá nì cachi?

⁶² Pues nú cóó, (dandu ¿nansa cachi gà-nsiá sàhà) yùhù ana nduú Tnaha Nèhivì Ñuhiví na cuni-nsiá yùhù mànaní ansivi nùhì?

⁶³ Cunaha-nsiá, cuisì sàhà anima-nda nihì-nda cutiacu ndiaha-nda, màdì sàhà iquicúñú-nda, vàchi còò ni-iñàha nihì-nda nùájàn. Cuisì palabra sàni cachì xì-nsiá nduá dacútiácú xì anima-nsiá.

⁶⁴ Doco ináhí mii-nsiá ñà-dava-nsia có-xiníndísà ndisa-nsia —nì cachi-yà.

Vàchi dècuèndè antes sà-ináhá-yà ana xínduu nèhivì có-xiníndísà, te ináhá stná-yà índù tiàa cuàhàn cahin xì-yá.

⁶⁵ Ñàyùcànduá, nì cachi-yà xì nsidaa-né:

—Nacua nì cachì xì-nsiá daa, ducán nduá: mà cúí cunchicùn iin nèhivì yùhù nú màsà nìhìtáhvi-né ducán nùù Yuamání.

⁶⁶ Daaní, divi quivì yucán nì quecuaán cuàhà nècuàchì dacuahá-yà, nì naxicocuñ inì-nè, cóni cútnáhà gà-nè xì-yà cacanu-ne.

⁶⁷ Ñàyùcànduá nì càhàn-yà xì ùxìn ùì nècuàchì dacuahá-yà (còni quécuáân):

—Mii-nsiá, ¿a nacoo stná-nsiá yùhù?

⁶⁸ Dandu nì cachi Simón Pedro xì-yá:

—Señor mío, còò inga gà ana cùhùn-nsì nùù-xí, vàchi cuisì sàhà palabra xi mii-ní nìhìtáhvi-nsí vida ndiaha nicanicuahàn.

⁶⁹ Te xiníndísà-nsí mii-ní ñà-nduú-ní Cristu, divi Dèhemanì mii-yá iá nicanicuahàn. Ináhá vâha-nsi ñà-jaàn.

⁷⁰ Dandu nì cachi Jesús xì-né:

—Ùxìn ùì mii-nsiá sàni nacàxin, doco iin-nsia nduú nahi ñà-malu.

⁷¹ Pues divi palabra mà nì cachi-yà sàhà dèhe Simón, nècuàchì nani Judas Iscariote, vàchi divi-ne nduú tiàa cuàhàn cahin xì-yá, te nduú stná-nè iin nècuàchì dacuahá.

7

Ñà-nduá nì cachi ñani Jesús xì-yà ñà-có-xiníndísà-né mii-yá

¹ Daaní, después, cuisì ladu Galilea nì quesaha xicánúú Jesús. Có-cùnì gà-yà cacanu-ya ladu Judea, vàchi nècuàchì raza-yà ndoó ladu mà, cunì-nè cahni-néyà.

² Doco vichi sà-ítúú iin vicò nsidácáhnû-né ladu Judea, divi vicò ndoó-né siahva.

³ Ñàyùcàndüá, nì càhàn ñani Jesús xì-yá, cachí-nè:

—Vichi chicá vaha quee-ní ladu yohó cuahán-nî ladu Judea, dandu cuni nsidaa nècuàchì dacuaha-ní mii-ní, te cundehè stná-nè milagru quida-ní.

⁴ Vàchi nú cuní-ndà cuitià fama xi-nda nù nèhivì, dandu mà quidá dèhé-ndà ñà-ndüá quida-nda. Ñàyùcàndüá, nú cuàhà guá ñà-ndüá quida-ní, dandu quida vate-nià cundehè nsidaa nèhivì —nì cachi-nè xì-yá,

⁵ vachi cunaha-nsiá, nì ñani-yà có-xiníndísá-xí-yâ.

⁶ Ñàyùcàndüá, nì cachi Jesús xì-né:

—Tañáha ga sàà quivì xí. Doco mii-nsiá, ndéni tiempu nì cui, vètùni quida-nsia ñà-ndüá cudí inì-nsia.

⁷ Te mà cúní ùhì nèhivì ñuhivì mii-nsiá. Doco yùhù, xiní ùhì-nè yùhù, vachi cachí xì-né chuun quini ndüá quidá-né.

⁸ Cuahán-nsià vicò mà; vachi yùhù, tàñáha ga cùhìn, vachi tàsàà quivì xí.

⁹ Ñà-jaàn ndüá nì cachi-yà xì-né, te nì ndòò iì-yá ladu Galilea yucán.

Nansa nì quida Jesús na ní sàhàn-yà vicò ndoó-né siahva

¹⁰ Daaní, nì nsihì nì caquihin ñani-yà ichì, dandu nì quihin stná-yà ichì cuàhàn-yà vicò mà. Doco cuàhàn dèhé-yà, mà cuàhàn vate-yá.

¹¹ Te yucán ndé iá vicò mà nì nanducu nècuàchì ladu Judea mii-yá, cachí-nè:

—¿Índù iá Jesús?

¹² Te cuàhà gá nì ndatnuhu stná-nè sàhà-yá. Vaha ga-yà, cachí dava-ne, doco dava ga-nè, còò, mà váha-ya, vachi dandahví uun-ya nèhivì, cachí-nè.

¹³ Doco ni-iin nèhivì, cónì càhàn vate-né sàhà-yá, vachi yúhì-nè nècuàchì ladu Judea mà.

¹⁴ Daaní, sàni cudava vicò, dandu nì sàà-yà yehè veheñùhu cahnú, te nì quesaha-yá dacuahá-yá nèhivì ndoó yucán.

¹⁵ Ñàyùcàndüá, nì ndulocó nècuàchì ñuu mà, cachí-nè:

—¡Na nchichí guá càhàn nècuàchì yohó, te cónì xicá-né escuela (xi-nda)!

¹⁶ Dandu nì cachi Jesús xì-né:

—Cunaha-nsiá, màdì dìni yùhù tavi ñà-ndüá dacuahí nèhivì. Vachi divi mii-yá nì techuun-xí vaxi nduú ana nì chitnùnì inì-xi nansa coo ñà-ndüá chináhi.

¹⁷ Te ndéni nèhivì nì cui, nú iá voluntad xi-ne quida ndisa-ne ñà-ndüá cuní Dios, vètùni sàà-nè cundaà ini-nè sàhà palabra chináhi, a divi dìni mií queá, te ò Dios chindéé xí.

¹⁸ Vachi nú inì-nì mii-nda chitnùnì ini-ndà índù palabra chinaha-ndà, dandu náhà claru cuisì cuní-ndà tavà-ndà tnùñuhu xí mii-nda. Doco nú nandúcú-ndá nansa quee tnùñuhu xí ana nì techuun-xi-nda vaxi, dandu vètùni cundaà inì-xi, ñà-ndáà ndüá cachí-ndà, màdiá dandahví-ndà nèhivì ndüá.

¹⁹ 'Moisés nì sàha xi-nsiá ley sàhaha. Doco ni-iin-nsia có-quidá ndisa-nsia ñà-ndüá cachí ley mà. ¿Índù chuun cuní-nsià cahnì-nsiá yùhù?

²⁰ Dandu nì cachi nèhivì cuàhà yucán:

—Ndisa sàni culocó-nî nì quida ñà-malu. ¿Ana cuní cahnì xì-ní cahan-ní?

²¹ Dandu nì cachi Jesús xì-né:

—Sàni ndulocó nsidaa-nsiá sàhà imindaa milagru nì guide.

²² (Ináhà-ndá), sàhaha nì saquin Moisés iin ley ñà-màcòo seña xi Dios icà-ndà. Doco màdì mii Moisés nduú ana nì chitnùnì inì-xi ñà-coo estilu mà, vachi xii-ndà chicá antes nduú ana nì dàquésáhá xân. Ñàyùcàndüá, ducan quida-nda vichi, mate iin quivì descansu ndüá, doco fuerza màcòo seña mà icà iin mée.

²³ Cundehè-nsiá, dècuèndè stná iin quivì descansu saquín stná-nsià seña mà icà-vé, (danácuèhè-nsiàvè) sàhà ñà-cùnì-nsià chivàha vii-nsiá ley mà. Te yùhù, divi stná quivì

descansu mà nì sandua na ní dándúvahi iin tiàa, te nì ndòo vaha-ne; doco sàhájàn xídà inì-nsia. ¿Nansa nduájàn?

²⁴ (Yùhù cachí xì-nsiá), màsà cuítnùhu ndevàha-nsia nacua tuxí uun ini-nsià. Nú cuàhàn-nsià càhàn tnùhù-nsiá sàhà iin nèhivì, dandu ñà-ndácuisì xiñuhu cundua cachi-nsià —nì cachi-yà.

Nansa nì cachi Jesús xì nèhivì tuxí inì-xì nduú-yá iin nèhivì ñuhivì yohó

²⁵ Ñàyùcàndüá, dava nècuàchì ñuu Jerusalén yucán, nì cachi-nè iin-ne xì inga-nè:

—¿Amádi nècuàchì jaàn nduú tiàa cuní-nè cahnì-né?

²⁶ Doco cundehè-nsiá, jaàn iín-né mahì nèhivì, chináhá-nè, te còà cachí nècuàchì cunì dandáñúhú xí-nè. ¿A vihi-ni sàni nacuni tè-xídandacú nù-ndà ñà-divi Cristu (nì quixi nù Dios) nduú-né?

²⁷ Doco nsiùhù, còo, vachi sà-ínáhá-nsí índù nì quixi nècuàchì jaàn. Vachi na quívì quixi mii-yá ana nduú ndisa Cristu, mà cúndàà inì-xì índù nì quixi-ya —nì cachi-nè.

²⁸ Ñàyùcàndüá, ndee ní càhàn Jesús xì nèhivì dacuahá-yá yehè veheñuhu, cachí-yá:

—¿A ináhá-nsiá yùhù (tuxí inì-nsia)? ¿A ndisa ináhá-nsiá ndévì nì quixi? Pues yùhù, màdiá inì-ni mií nì ndàcú inì quixi; còo. Iá ana nì techuun-xí vaxi, te vátùni cahvi-nda xi-yá. Doco mii-nsiá, có-ínáhá-nsiâyà.

²⁹ Yùhù, ndisa, ináhí mii-yá, vachi divi-ya nduú ana nì techuun-xí, te ñàyùcàndüá nù mii-yá nì quixi —nì cachi Jesús.

³⁰ Ñàyùcàndüá, nì nanducu nècuàchì mà nansa tnii-neyà, doco cóni níhì-né quida-neà, vachi tàñáha ga sàà quívì cuu xi-yá ducán.

³¹ Doco cunaha-nsiá, cuàhà gá nèhivì itá yucán nì xinindisá stná-nè mii-yá, te nì cachi-nè:

—Cuàhà gá milagru quidá Jesús yohó. Ádi có-xiñùhù gá cundehè gá-ndà milagru sàhà-ñá cundàà ini-ndà divi rey ndiaha nì quixi nù Dios nduú-yá.

Nansa nì quixi policia cuenta xì nècuàchì fariseu ñà-catnii-tè Jesús

³² Dandu nì caxinitnùhu nècuàchì fariseu ñà-ndüá cachí nèhivì sàhà-yá. Ñàyùcàndüá, mii-né xì dùtù xícusahnú, nì càhàn-nè xì policia ñà-cùhùn-te catnii-tèyá.

³³ Dandu nì càhàn-yà xì nèhivì inga xichi, cachí-yá:

—Sacù-ni tiempu coo guè xì-nsiá yohó, dandu icúmí nùhì nù ana nì techuun-xí vaxi.

³⁴ Te mate ni nándúcú-nsiá yùhù, doco mà ndacùhun-nsia yùhù, vachi ndé cùhìn, mà cúí sàà-nsiá.

³⁵ Dandu nècuàchì raza-yà Judea yucán, nì ndatnuhu-né entre mii-né, cachí-nè:

—¿Índù cùhùn nècuàchì yohó, te (cachí-nè) mà cúí ndacùhun-ndané? ¿A cùhùn xicà-né ñuu griegu ndé ndoó stná nècuàchì raza-ndà, te dacuahá-né nècuàchì griegu mà?

³⁶ Có-sànìhì ini-ndà ñà-càchí-nè ñà-mà cúí ndacùhun-ndané, mate ni nándúcú-ndáné, te mà cúí sàà stná-ndà lugar ndé cùhùn-nè —nì cachi nèhivì mà.

Na ian queé fuerte tèñuhu iin yùte limpiu, ducán fuerte icúmí Dios cuàhatahvì-yá vida ndiaha xí-yá ini anima-ndà

³⁷ Daaní, nì sàà quívì nì xìnu vicò mà, divi quívì chicá nducáhnù. Dandu nì ndacuiin Jesús mahì nèhivì, te nì càhàn ndee-yá, cachí-yà xì-né:

—Nú iá ana xíhì tècuí, dandu ni quixí-né nù, te coho vaha-ne.

³⁸ Vachi nú xiníndísà iin nèhivì xí, ducán queá nù-né na ian caná fuerte tècuí ini anima-nè, te xítia-te, nduú-te nahi tècuí coho-nda cutiacu-ndà nicanicuàhàn, divi nacua cachitnùhu nù tutu ì —nì cachi-yà.

³⁹ Doco tècuí nì cachi-yà mà nduú (ejemplu, vachi cunaha-nsiá), Espíritu ì nduú tècuí mà, te nsidaa ana xiníndísá-xí-yá, icúmí-nè nìhítáhvì-né Espíritu ì mà. Doco tàñáha ga cuàhatahvì Dios Yà-ì mà, vachi tàñáha ga nanihì Jesús tnùñuhu ndiaha xí-yá.

Nansa ni ndatnuhu nêhivì cuáhà sàhà Jesús

⁴⁰ Daaní, na ní inini dava nècuàchì itá yucán ñà-nduá ni cachi-yà, dandu ni cachi-nè:

—Ndisa, nècuàchì ndiatu-nda quesaa càhàn cuenta xi Dios nduú ana yohó.

⁴¹ Te dava ga-nè, cachí-nè:

—Divi rey ndiaha Cristu nduú nècuàchì yohó.

Doco dava ga-nè, ni cachi-nè:

—¿A tuxí inì-nsia rey ndiaha Cristu cunduu iin nècuàchì ni quixi ladu Galilea (nahi Jesús)?

⁴² Amádi cachítnùhu tutu ì sàhà rey mà ñà-divi yohòtéhè-yá nduú David, te ñuu nècuàchì mà nani Belén cunduu ñuu-yà, cachá`.

⁴³ Ñàyùcànduá, ni tàhndè dava nêhivì sàhà-yá.

⁴⁴ Te mate cuní dava-ne tnii-neyà, doco ni-iin-ne có-sâhandee ini-nè quida-neà.

Nansa ni cachi nècuàchì xídandacú ñà-có-càndísâ-né Jesús

⁴⁵ Daaní, na sámànùhù tè-xínduu policia ndé ndoó dùtù xícusahnú xi nècuàchì fariseu, te ni cachi nècuàchì mà xì-té:

—¿Índù chuun cóni sándacá-nsiá Jesús quixi?

⁴⁶ Te ni naxiconihí policia, cachí-te:

—Còò inga ana càhàn ndiaha guá na càhàn nècuàchì yucán.

⁴⁷ Dandu ni cachi nècuàchì fariseu mà:

—¿A ndé` stná mii-nsiá sàni dàndàhví Jesús?

⁴⁸ Cundehè-nsiá nsiùhù tè-xídandacú, ¿a sàni xinindisá-nsí? Còò, ni-iin-nsi. Te ¿ò dává gá nècuàchì fariseu? Còó. Ni-iin-ne, có-xiníndísâ-né.

⁴⁹ Doco dava ga nêhivì ndahví yucán, ni có-ínáhá-nê nansa cachí ley ì, sàháyùcànduá icúmí-nê nìhì-né castigu xi-ne —ni cachi nècuàchì mà.

⁵⁰ Cunaha-nsiá, yucán iá stná Nicodemo, divi nècuàchì ni sàhàn nùu Jesús daa, vâchi iin nècuàchì xídandacú nduú stná-nè. Te vichi ni càhàn stná-nè xi nsidaa compañeru-nè mà, cachí-nè:

⁵¹ —(Ñáni), ndéni nêhivì ní cui, nú cuní-ndà nsidandaà-ndà sàhà-né, dihna icúmí-ndá cunini-nda nansa cachí mii-né, dandísá, vâtùni cundaà ini-ndà sàhà chuun xi-ne. Amádi ñà-jaàn nduú stná ley xi-nda.

⁵² Doco ni naxiconihí compañeru-nè mà cachí-nè:

—¿A ndé` stná mii-ní nduú stná-ní iin nècuàchì ladu Galilea? Nanducu váha-ní (nùu tutu ì), dandu cundaà inì-ní, còò ni-iin nècuàchì càhàn cuenta xi Dios quixi ladu Galilea —ni cachi-nè.

⁵³ Dandu nsidaa-né ni nacuitià-nè mànuhù-né vehe-ne.

8

Ñà-nduá ni cachi Jesús xi iin nècuàchì ñahà cóni quidá ví

¹ Daaní, ni quee Jesús cuáhàn-yà yucù Olivo.

² Dandu inga quivì na ní tùinuù, vâxi tu-ya veheñùhu cahnú. Te ni nataca cuáhà gá nêhivì nùu-yá; te ni sàcòo-ya ni chinaha-yànè.

³ Dandu yucán ni sàà stná itnii maestru ináhá ley sànaaha, xi stná dava nècuàchì fariseu, xíndaca-ne iin nècuàchì ñahà ni sàà, te ni chicani-ne nècuàchì mà nùu-yá, vâchi ñahà mà, ni càhàn-nè xi iin nècuàchì có-nduú nècuàchì vehe-ne.

⁴ Ñàyùcànduá ni cacachi nècuàchì tiàa ma xi-yá:

—Maestro, ni tnii-nsi ñahà yohó na quidá-né iin cuàchi.

⁵ Te cachí ley xi Moisés ñà-icúmí-né cui-nè xi yùu nú quidá-né ducán. Doco mii-ní, ¿nansa cachí-ní quida-nda?

⁶ Ducán nì cachi nècuàchìmà, áma cáchí-yà iin ñà-có-ndiá ìcà-yá cahan-né, te ducán nìhìndèè-né daquée cuàchi-ne dìquì-yá. Doco mii-yá, nì nàcòo ndee ni-ya, tiaá-yá nù ñuhù xì dìnìndàhá-yà.

⁷ Dandu chicá cuàhà nì ndàcàtnùhù-né nù-yá, ñàyùcàndùá, nì nàcòo ndaà-yà, te nì cachi-yà xì-né:

—Nú iá ndisa iin-nsia còò ni-iin falta-xi, dandu divi ni cùndúú primeru caniyuu-xi nècuàchì yohó.

⁸ Dandu ingà tu nì nàcòo ndee-ya, tiaá tú-yá nù ñuhù.

⁹⁻¹⁰ Doco nsidaa nècuàchì itá yucán, ináhá-nê iá stná cuàchi-ne. Ñàyùcàndùá, dihna nècuàchì chicá sahnú nì caquee cuàhàn, dandu después nì caquee stná iin iin nècuàchì dava ga mà cuàhàn-nè, ndé mii Jesús nì ndòo, xì stná nècuàchì ñahà mà. Dandu nì nàcòo ndaà-yà, te nì xini-yà ndélà mindaa nècuàchìmà iin. Ñàyùcàndùá, nì cachi-yà xì-né:

—Señora, ¿a sàcuàhàn nsidaa nèhivì daquée cuàchi dìquì-ní? ¿Á coo cá ana cuní cahnì xì-ní?

¹¹ Dandu nì cachi nècuàchìmà:

—Còó, Señor; còò cá iin.

Dandu nì cachi Jesús xì-né:

—Pues ni yùhù, có-cùnì stnàì cui-ní. Cuahán-nî, te màsà nàxícócuìn-ní quida gà-ní cuàchi ma —nì cachi-yà.

Jesús nduú ana datnúù xì sàxìnítnùnì nèhivì ñuhivì

¹² Daaní, nì càhàn gà Jesús xì nèhivì yucán, cachí-yà:

—Yùhù nduí ana datnúù xì sàxìnítnùnì nèhivì ñuhivì. Ñàyùcàndùá, nsidaa ana nchícùn xì, icúmí cutnuù ndiaha nù ìchì nchícùn-nè, te ducán nìhìtáhvì stná-nè vida ndiaha, vàchi mà nunca cunduamà ìchì ñáa.

¹³ Dandu nì cachi nècuàchì fariseu xì-yá:

—Còó, mà ndisá, vàchi cuisì mii-ní ndeníhí vaha-ní mii-ní.

¹⁴ Dandu nì cachi-yà xì-né:

—Mate mí cáhìn sàhà-xí, doco vátùnì cundiaa mà, vàchi ináhí ìndù nì quei vàxi, te ináhí ìndù icúmí nùhì. Doco mii-nsiá, có-ináhá-nsiâ ìndù nì quei vàxi, nì có-ináhá stná-nsiâ ìndù icúmí nùhì.

¹⁵ Indéhe uun-nsia nansa quidá nèhivì, te ñà-jaàn cachí-nsiâ sàhà-né, a quidá víi-né, ò á coó. Doco yùhù, có-càchí nú quidá víi-né, ò á coó.

¹⁶ Doco nú ndisa indéhí sàhà-né, dandu ñà-ndácuìsì nduámà, vàchi màdì cuisì yùhù nduú ana cachí ducán, vàchi cutnáhâ stná Yuamánì xì, divi mii-yá ana nì techuun-xí vàxi.

¹⁷ Cachí ley xi-nsia: xì ùì testigu vátùnì cunindisa-nda ñà-ndàà nduá cachí-nè.

¹⁸ Pues, cunaha-nsiá, yùhù nduú iin ana càhàn favor xi. Daaní, iá stná mii-yá nì techuun-xí, divi Yuamánì, te càhàn stná-yà favor xi.

¹⁹ Dandu nì cacachi nècuàchìmà xì-yá:

—¿Índù iá yua-ní?

Te nì cachi-yà xì-né:

—Mii-nsiá, nì có-ináhá-nsiâ yùhù, nì có-ináhá stná-nsiâ Yuamánì. Vàchi nú ni cúnáhá ndisa-nsia yùhù nì cui, dandu ñà-jaàn nìhì stná-nsiâ cunaha stná-nsiâ mii-yá.

²⁰ Ñà-jaàn nduá nì cachi Jesús na ní dàcuàhá-yá nèhivì ndoó yehè veheñuhu cahnú yatni ndé itá alcancia xi Dios. Doco còò iin ni tnii-xi-yá, vàchi tañáha ga sàà quivì cuu xi-yá ducán.

Nansa nì cachi Jesús icúmí-yâ cùhùn xìcà-yá, te mà cúí cunchicùn stná nèhivì có-xìníndísâ

²¹ Daaní, nì cachi tu Jesús xì nècuàchì yucán:

—Yùhù icúmí cùhùn xìqué, te mii-nsiá, icúmí-nsiâ nanducu-nsiá yùhù, doco na quivì cui-nsiâ, icúmí-nsiâ cui-nsiâ xì cuàchi-nsia. Te lugar ndé cùhìn, mà cúí cùhùn stná-nsiâ.

²² Ñàyùcàndùá, nì cachi nècuàchì raza-yà Judea mà entre mii-né:

—¿A vihini cahni nècuàchì jaàn mii-né, ñàyùcàndùá nì cachi-nè lugar ndé cùhùn-nè mà cúí sàà stná-ndà?

²³ Dandu nì cachi-yà xì-né:

—Nèhivì ñuhiví yohó xínduu-nsia, doco yùhù, dìquì-xí ansivi nì quixi, có-ndùí nèhivì ñuhiví yohó.

²⁴ Ñàyùcàndùá nì cachi xì-nsiá daa ñà-ìcúmí-nsiâ cui-nsià xì cuàchi-nsia. Vàchi nú có-xiníndísá-nsiá yùhù ñà-ndùí ana nì cachi xì-nsiá, dandu quivì cui-nsià cunsida ì-nsiá cuàchi-nsia.

²⁵ Ñàyùcàndùá, nì cachi-nè xì-yá:

—Pues, mii-ní ¿ana divi nduu-ní?

Te nì cachi-yà xì-né:

—Ndè primeru sàni cachi xì-nsiá ana nduí.

²⁶ Te cuàhà gá icúmí guê` cundehí, te cachi sàhà-nsiá. Cunaha-nsiá, palabra ndàcuisì nduá cachí mii-yá ana dìchúún-xí vaxi. Nùù mii-yá nì sàcùnahí cachi nsidaa ñà-nduá cachí xì mii-nsiá nèhivì ñuhiví yohó —nì cachi Jesús.

²⁷ Doco nèhivì yucán, cóni sànihì ini-nè ñà-divi Yua-nda Dios cáhàn-yà sàhà-xí.

²⁸ Ñàyùcàndùá nì cachi tu-ya xì-né:

—Nú sàni sàà-nsià nì chituu ducún-nsià yùhù ana nduú Tnaha Nèhivì Ñuhiví, dandu cundaà ini-nsià ñà-divi yùhù nduí ana cachí xì-nsiá, te màdì dìnì mií chítnùnì inì quide ñà-nduá quidé. Cuisì quidé ñà-nduá nì dàndàcú Yuamánì nùí, te divi ñà-jaàn nduá cachí xì-nsiá.

²⁹ Cunaha-nsiá, divi Yuamánì nì techuun-xí vaxi, te nicanicuahàn iá-yà cutnáhâ stná-yà xì; mà nunca nacóó-yá yùhù, vàchi nicanicuahàn quidé ñà-nduá cudí ini-yà.

³⁰ Ducán nì cachi Jesús, te sàhà palabra jaàn nì sàà nì xinindísá cuàhà gá nèhivì-yá.

Ndoó nèhivì iníní xí Dios, te ndoó nèhivì iníní xí cuàchi

³¹ Daaní, nì càhàn Jesús xì nèhivì xiníndísá-xí-yâ, cachí-yâ:

—Nú iin-ni cunindísá vàha-nsia, dandu cunduu ndisa-nsia nèhivì xí,

³² te sàà stná-nsià mànihì ini-nsià ñà-nduú palabra ndàcuisì. Te divi sàhà palabra mà icúmí-nsiâ caquee-nsia libre.

³³ Dandu nì cachi nèhivì xì-yá:

—Nsidaa-nsí, yohòtéhè-nsí nduú Abraham, te ni-iin xichi cóni ía ni-iin lamú dan-dacu-xi nùù-nsí. Ñàyùcàndùá, ¿índù chuun cachí-ní ñà-ìcúmí-nsí quee-nsi libre?

³⁴ Dandu nì cachi-yà xì-né:

—Palabra ndàcuisì nduá yòhó cachí xì-nsiá: nsidaa ana tùha quida xi cuàchi, divi cuàchi ma nduá dàndàcù-xì nùù-né vida xi-ne, na ian peón xi cuàchi ma nduú-né.

³⁵ Te iin peón, màdì nicanicuahàn coo-tè vehe lamú xi-tè. Tucu ía xì dèhe iin lamú, nicanicuahàn icúmí-né coo-ne nùù nècuàchìmà.

³⁶ Ñàyùcàndùá, nú sàni dácácu Dèhemanì (Dios) mii-nsiá, te sàni quee-nsia libre, dandísá, libre dahuun icúmí-nsiâ cundoo-nsia.

³⁷ Yùhù ináhí Abraham nduú yohòtéhè-nsiá. Doco vichi cuní-nsià cahni-nsiá yùhù, vàchi có-ndôo inì-nsia xì ñà-nduá cachí xì-nsiá.

³⁸ Cuisì ñà-nduá sàni xinì nùù Yuamánì nduá cachí xì-nsiá, te ducán stná mii-nsiá, ñà-nduá nì inini-nsia nùù yua-nsiá, divi nduá quidá stná-nsiá.

³⁹⁻⁴⁰ Dandu nì cacachi nècuàchìmà xì-yá:

—Nsiùhù, Abraham nì sanduu primeru yua-nsí.

Te nì cachi Jesús xì-né:

—Nú ndisa Abraham ni cúndúú yohòtéhè-nsiá nì cùí, dandu icúmí-nsiâ quida vii-nsiá nacua nìsa quida nècuàchìmà sàhana. Doco vichi cuní-nsià cahni-nsiá yùhù, mate palabra

ndàcuisì nduá cachí xì-nsiá, te nduú stná mà palabra nì inini nù Dios. Cunaha-nsiá ni-iin xichi cóni cùní Abraham quida-ne nacua cuní mii-nsiá quida-nsia xí.

⁴¹ Doco mii-nsiá, nacua quidá yua-nsiá, divi ducán quidá stná-nsiá.

Dandu nì cachi nêhivì mà xì-yá:

—Nsiùhù, có-ndùú-nsí dèhe ndahví. Mindaa Yua-nsí iá, te divi nduú Dios.

⁴² Dandu nì cachi-yà xì-né:

—Nú Dios ni cundúú yua-nsiá nì cui, dandu icúmí-nsiá cuu ini-nsiá sàhí, vâchi nù mii-yá nì quei vâxi. Màdi yùhù nì nácání mií inì quixi, còó. Divi mii-yá nì techuun-xí vâxi.

⁴³ Te ¿índù chuun mà cùì mànhì inì-nsia ñà-nduá cachí xì-nsiá? Pues divi sàhà-ñá mà cundéé inì-nsia cunindisá-nsiá palabra xi.

⁴⁴ Vâchi divi ñà-malu nduú yua-nsiá, te nacua cudî ini quisì mà quida quini-sì, divi ducán stná mii-nsiá, cudî stná inì-nsia quida-nsia ducán. Dècuèndè tiempu chicá antes cudî inì-si dacahní stnahá-si nêhivì. Mà nunca tûha-sì quida-sì ni-íñaha nduú ñà-ndáa, vâchi còò ni-iin palabra vâha nihnú inì-si. Te na cáhàn tnùhù-sí, (màsà ndúlócô-ndà), vâchi ducání tnuhu ini anima-si. Tnuhu-sí, te yua ñá-tnùhù nduú-si.

⁴⁵ Te yùhù, sàhà-ñá cachí xì-nsiá ñà-nduú ñà-ndácuìsì, ñàyùcànduá có-xiníndísâ-nsiá yùhù.

⁴⁶ Te nú iá cuàchi nì quide cahan-nsiá, dandu ¿índù chuun có-càchí claru-nsiáñà? Doco te nú ñà-ndáa nduá cachí xì-nsiá, dandu xiñuhu cunindisá-nsiá yùhù.

⁴⁷ Nsidaa ana nduú nêhivì xí Dios, cudî ini-nè cunini-ne palabra vâxi nù-yá. Doco sàhà-ñá có-ndùú-nsiá nêhivì xí-yá, ñàyùcànduá có-íní-nsiá palabra xi-ya —nì cachi Jesús.

Sà-ía Jesús na táyô nêhivì sàhana

⁴⁸ Dandu nì cáhàn tu nêhivì raza-yà Judea xì-yá, cachí-nè:

—Ádi ñá-ndáa nduá cachí-nsi, iin nècuàchì samaritanu (siquini) nduu-ní, te iá stná iin ñà-malu anima-ní.

⁴⁹ Dandu nì cachi-yà xì-né:

—Còò ñà-malu anímè. (Na cáhìn xì-nsiá), cuisì cuní quee tnùñuhu xí Yuamání. Doco mii-nsiá, cahíchi inì-nsia yùhù.

⁵⁰ Có-nàndúquí nansa tavà nêhivì tnùñuhu xí mií, vâchi iá iin ana quida-xi ñà-jaàn, te mii-yá nduú stná ana icúmí nsidandaà viì sàhà nsidaa chuun.

⁵¹ Palabra ndàcuisì nduá cachí xì-nsiá yohó: nú ni chívàha iin nêhivì ñà-nduá chináhi, dandu mà nunca sàà-nè cui-nè nicanicuahàn.

⁵² Dandu nì cachi nècuàchì raza-yà Judea yucán:

—Vichi sàni cundaà ndisa ini-nsí iá ñà-malu anima-ní, vâchi sàhana nì xihì Abraham yucán, te nì xihì stná nsidaa profeta nisa cáhàn cuenta xi Dios. Doco mii-ní cachí-ní mà nunca sàà cui nêhivì chívàha xi ñà-nduá cachí-ní.

⁵³ ¿A tuxí inì-ní chicá ndiaá-ní nù xì-ndà Abraham? Vâchi còò gá ndómà, xì stná profeta nisa cáhàn cuenta xi Dios, sàni caxihì nsihì-ne. ¿Ana divi nduu-ní cahan-ní?

⁵⁴ Dandu nì cachi Jesús xì-né:

—Nú mií ni cachí ñà-chicá ndiaí, dandu, mà cundíáa mà. Vâchi divi Yuamání nduú ana icúmí tavà xì tnùñuhu xí yùhù, mate mii-yá nduú ana cáhvi stná-nsiá, cachí-nsiá.

⁵⁵ Doco mii-nsiá, có-ínáhá-nsiâyà; cuisì yùhù, ndisa, ináhí-yà. Te nú ni cachí có-ínáhí-yà, dandu cunduu stnáì tē-tnùhù nahi mii-nsiá. Doco yùhù, ináhí mii-yá, te chívàhi ñà-nduá cachí-yà.

⁵⁶ Xì-ndà Abraham mà, nì cudî ini-nè ñà-nihítahví-né cuni-nè tiempu (quesai ñuhiví yohó). Ñàyùcànduá, contentu nì ndòo-ne na ní cuu ndisa ñà-jaàn.

⁵⁷ Dandu nì cachi nêhivì mà xì-yá:

—¡Mii-ní, ni có-xicà-ní ù dico ùxìn cuià, te ináhá-ní Abraham cahan-ní!

⁵⁸ Dandu ni cachi Jesús xì-né:

—Cunaha-nsiá, tàyoó Abraham, doco yùhù sà-ié`.

⁵⁹ Ñàyùcàndùá ni dàtácá nècuàchìmà yùù cuàhàn-nè cahni-néyà ni cùí, doco ni quee dèhé-yà veheñùhu ma ni chindaà-yà mahi-né cuàhàn-yà.

9

Nansa ni dàndùvaha Jesús iin nècuàchì cuaá dècuèndè quivì ni cacu-ne

¹ Dandu ni yàha Jesús chicá nùù-xí, te ni xini-yà yucán iá iin nècuàchì cuaá, dècuèndè ni cacu-ne cuaá-nè.

² Te ni xicàn tnùhù nècuàchì dacuahá-yà nùù-yá, cachí-nè:

—Maestro, ¿ana cuàchi-xi nduá, te cuaá nècuàchì yohó ni cacu-ne? ¿A yuadíhí-nè iá cuàchi-xi, ò mii-né?

³ Dandu ni cachi Jesús xì-né:

—Ni còò cuàchi ni quidá nècuàchì yohó, ni stná yuadíhí-nè. Cunaha-nsiá, sàhà-ñá ni sàà nèhivì cundaà ini-nè ñà-ndiaha guá quidá Dios, ñàyùcàndùá ni cuu xi nècuàchì yohó ducán.

⁴ Yùhù, na iá va quivì, icúmí quide obra ndiaha ni sàcùnahí nùù mii-yá ana ni techuun-xí vaxi; vachi (vaxi iin tiempu ùhì) nàcuiìn tnùù, dandu mà cùí gá quida ni-iin nèhivì chuun xi mii-yá.

⁵ Yùhù, na iá ve ñuhivì yohó, chuun xi nduá datnúì sàxínítnùnì nèhivì.

⁶ Dandu ni nsihi ni cachi-yà ducán, ni dàcòyo-ya tèdìí-yà ñuhù, te ni quidavàha-ya iyuhu ndèhì ni dàcánúú-yà nùù nècuàchì cuaá mà.

⁷ Te ni cachi-yà xì-né:

—Vichi cuahán-nì quisi-ní ndé ñuhú tècuí pila nani Siloé.

Pues cunaha-nsiá, quivì Siloé mà cuní cachá` dàhàn ñuu yucán ñà-sàni techuún nèhivì-ndó. Ñàyùcàndùá, ni sàhàn tiàa ma ni quisi-ne, te na mándixi-ne sàtùínúú-né.

⁸ Dandu nsidaa nècuàchì ndoó yatni ndé iá-nè, xì stná dava ga nècuàchì ináhá xí-nè antes cuaá-nè, ni cachi-nè:

—¿Amádi nècuàchì tiàa jaàn nduú ana nisa là xicàn xì caridad?

⁹ Te dava-ne, cachí-nè:

—Divi nduú-né.

Te dava ga-nè, cachí-nè:

—Còó, cuisì na indéhe nècuàchì cuaá mà, ducán indéhe stná nècuàchì yohó.

Doco nècuàchì ni sanduu nècuàchì cuaá mà, ni cachi-nè:

—Divi nduí.

¹⁰ Dandu ni cacachi nècuàchì yucán xì nècuàchìmà:

—¿Nansa ni cuu ni natùinuù-ní?

¹¹ Te ni cachi nècuàchìmà:

—Iin tiàa nani Jesús, ni quidavàha-ne iyuhu ndèhì ni dàcánúú-né nùí, te ni cachi-nè xì: “Cuahán-nì ndè pila Siloé, te quisi-ní”. Ñàyùcàndùá, ducán ni quide, te ni natùinuí.

¹² Dandu ni cachi nèhivì mà xì-né:

—Pues vichi, ¿índù iá tiàa ma?

Te ni cachi nècuàchìmà:

—Có-cùndáa inì.

¹³ Dandu nèhivì yucán, ndacá-né nècuàchìmà cuàhàn nùù nècuàchì fariseu.

¹⁴ Vachi cunaha-nsiá, quivì descansu nduá na ní quidavàha Jesús ndèhì ni dànatùì-ya nùù nècuàchìmà.

¹⁵ Ñàyùcàndùá, ni xicàn tnùhù stná nècuàchì fariseu nùù nècuàchìmà nansa ni cuu ni natùinuù-né. Dandu ni cachi-nè:

—Ni quidavàha nècuàchìmà ndèhì, te ni dàcánúú-nè nùí; dandu ni sàhìn ni quisi, te vichi duha ni natùinuí.

¹⁶ Dandu dava nècuàchì fariseu mà, ni cacachi-nè:

—Tiàa nì quida ducan xi nècuàchì yohó, có-ìá-nè ladu xi Dios, vèchi có-chìvaha-ne quivì descansu.

Doco dava ga nècuàchìmà, nì cacachi-nè:

—Còó, vèchi nú nècuàchì cuàchi ni cúndúú nècuàchìmà, dandu mà cúí quida-ne iin milagru nahi ñà-yohó.

Ñàyùcàndùá, nì tàhndè dava nècuàchì fariseu mà.

¹⁷ Dandu nì cachi tu-ne xì tiàa nì sanduu nècuàchì cuaá mà:

—Te mii-ní tu, ¿nansa cachí-ní sàhà nècuàchìmà ñà-sàni dānātùì-ne nù-ú-ní?

Dandu nì cachi nècuàchìmà:

—Iin profeta càhàn cuenta xi Dios nduú-né.

¹⁸ Doco nècuàchì xídandacú nùù tè-raza Judea, cóni xìnídísâ-né ñà-cuaá ndisa nècuàchìmà na ní cacu-ne. Ñàyùcàndùá, nì cana-ne yuadíhí nècuàchìmà,

¹⁹ te nì xìcàn tnùhù-né nùù nècuàchì sahumà, cachí-nè:

—¿A dèhe-nsia nduú nècuàchì yohó, te a ndísá cuaá-nè na ní cacu-ne, cachí-nsià? Te nú ducán, ¿nansa nì cuu nì natùinuù-né vichi?

²⁰ Dandu nì cachi yuadíhí nècuàchìmà:

—Ináhá-nsí dèhe-nsi nduú tè-yohó, te ñà-ndáà nduá cuaá-te na ní cacu-tè.

²¹ Doco có-cúndáà ini-nsi nansa nì cuu nì natùinuù-té, nì có-ínáhá stnà-nsi ana nduú nècuàchì nì dāndúvaha xi-té. Cunaha-nsiá, tè-sàhnú sàndúú-te; nùù mii-té ndàcātnùhù-nsiá. Vātùni nacani-tè nansa nì cuu xi-té.

²² Ñà-jaàn nduá nì cachi yuadíhí nècuàchìmà, vèchi yúhî-nè nècuàchì dava ga raza-nè Judea, vèchi sàni ndatnuhu váha nècuàchì (dandacú) sàhà nsidaa ana cachi vate sàhà Jesús ñà-ndúú-yá Cristu (nì quixi nùù Dios); te vichi sàni tavà-né orden ñà-mà cóó gá permisú cùhùn nècuàchìmà veheñuhu.

²³ Ñàyùcàndùá, nì cachi yuadíhí tiàa ma ñà-sàsàhnú dèhe-nemà, chicá vaha ndàcātnùhù xì nùù mii-né.

²⁴ Daaní, nì cana tu nècuàchì dandacu-ma tiàa nì nduvaha ma ñà-tnātuu-ne, te nì cachi-nè xì nècuàchìmà:

—Tavà-ní tnùñuhu xí Dios; vèchi nsiùhù, ináhá-nsí nècuàchì cuàchi nduú nècuàchì nì càhàn xì-ní.

²⁵ Dandu nì cachi tiàa ma xi nsidaa-né:

—Yùhù, có-cúndáà inì, a nècuàchì cuàchi nduú-né, á cóó. Cuisì imindaa iñaha ináhí: divi ñà-antes nisa là cuaá dahuin, doco vichi sàni natùinuú.

²⁶ Dandu nì cachi nècuàchìmà:

—¿Nansa nì quida-ne xì-ní? ¿Ndíà nduá nì quida-ne, te nì nanihì-ní vista xi-ní?

²⁷ Dandu nì cachi tiàa ma xi-né:

—Pues sàni cachì xì-nsiá nsidaámà, te có-xìnídísâ-nsiá. ¿Índù chuun cuní-nsià nacani guè xì-nsiá ingà tu? ¿A cuní stnà-nsià yàha-nsia ladu xi Jesús?

²⁸ Dandu nì quesaha nècuàchìmà cānāhá-nè, cachí-nè:

—Mii-ní, ladu xi nècuàchìmà íá-ní, doco nsiùhù, ladu xi (xì-ndà) Moisés íá-nsi.

²⁹ Ináhá-nsí nì càhàn Dios xì Moisés, doco nècuàchì jaàn, nì có-ínáhá-nsí índù ladu nì quixi-ne.

³⁰ Dandu nì cachi tiàa ma xi nsidaa-né:

—Pues ndiaha mánì nduájàn. Nì có-ínáhá-ndá índù nì quixi-ne, doco sàni dāndúvaha-ne nduchínúí.

³¹ Pues ináhá-ndá ñà-có-íníní Dios na xìcàn tàhvì iin nèhivì có-quidá víi. Doco nú nihnú vaha ini-ndàyá, te quida-nda ñà-ndúá cachí-yà, dandu quihín casu-yà na xìcàn tàhvì-ndà nùù-yá.

³² Te nì dècuèndè sàhana có-xínítnùhu-nda coo ana danātùì xi nùù iin nèhivì cuaá dècuèndè quivì nì cacu-ne.

³³ Ñàyùcàndùá, sàni cundaà inì, ladu xi Dios íá Jesús, vèchi nú cóó, mà cúí quida-ya ni-iin milagru.

³⁴ Dandu nì cachi nsidaa nècuàchìmà xì tiàa ma:

—Mii-ní, dècuèndè nì quesaa-ní ñuhiví sà-íá cuàhà cuàchi-ní, te ¿a tuxí inì-ní cuàhàn-ní chinahà-ní nsiùhù?

Ducán nì cachi-nè, te nì taxi-né nècuàchìmà tùvèhé.

³⁵ Dandu nì xinitnùhu Jesús nansa nì cuu xi nècuàchìmà ñà-nì taxi-ñánê. Ñàyùcàndùá, na ní ndacùhun stnahá-yá xì-né, nì cachi-yà xì-né:

—¿A xiníndísá-ní mii-yá ana nduú Dèhemanì Dios?

³⁶ Dandu nì cachi nècuàchìmà xì-yá:

—Señor, cachì-ní xí ana divi nduú-yá, dandu cunindisé.

³⁷ Te nì cachi Jesús xì-né:

—Sànì xinì-ní mii-yá, vàchi divi nduú yùhù ana cáhàn xì-ní vichi.

³⁸ Dandu nì cachi tiàa ma:

—Yùhù xiníndísê, Señor mío.

Te nì cahví-néyà.

³⁹ Dandu nì cachi-yà:

—¿Índù chuun nì quesai ñuhiví yohó? Divi sàhà-ñá cunahà claru ana quidá víi ndisa; dandu nèhivì cuaá ini anima-xi, vátùni nìhì-né (cundaà ini-nè, na ian nì) natùinuù-né. Doco nèhivì tuxí inì-xi sàcùndáà vaha inì-xi, mii-né nduú ana icúmí cuaá anima-xi, (mà cùndáà gà ini-nè) —nì cachi-yà.

⁴⁰ Doco dava nècuàchì fariseu cutnàhá xí-yá yucán, nì inini-ne ñà-ndùá nì cachi-yà, te nì cacachi-nè xì-yá:

—Te nsiùhù tu, ¿a cuaá stná ini anima-nsì cahan-ní?

⁴¹ Dandu nì cachi-yà xì-né:

—Nú sàni nacuni-nsià cuaá ini anima-nsià nì cùí, dandu mà cóó gá cuàchi-nsia; doco vichi cachí-nsià (ñà-cùndáà vaha ini-nsià), te claru ináhá-nsiâ nsidaa iñàha. Ñàyùcàndùá, iá ìì cuàchi-nsia.

10

Nansa nì nacani Jesús iin ejemplu sàhà rii

¹ Palabra ndàcuisì nduá yohó: nú quíhvi dèhé nèhivì ìcà corra ndé có-nduú yehè, dandu ináhá-ndá nècuàchì vaxi quidacuihna xi rii xì-ndà nduú-né.

² Doco nècuàchì quíhvi yehè corra, cóó, nècuàchì ñíí-xí nduú-né.

³ Te iá stná peón xi-ne ndiaá xì yehè mà. Te cuisì nùù nècuàchì ñíí-xí nacúná-te. Te na cáhàn nècuàchìmà xì rii xí-né, nacúnì-siné. Te caná-nèsi quivì iin iin-sì, dandu queé-si xì-né.

⁴⁻⁵ Te na tavá-nèsi ducán, dandu sàcòdònùù-né nùù-sí cuàhàn-nè; te viví-ni xínchicùn-siné, vàchi ináhá-sí tàchì stohò-si. Doco inga nèhivì tùcù, cóó, mà cúnchicùn-siné. Xinúdèhé-si nùù-né, vàchi có-nàcúnì-si tàchì nèhivì tùcù.

⁶ Ñà-jaàn nduú iin ejemplu nì nacani Jesús xì nèhivì yucán, doco cóni cùndáà ini-nè ndiá nduá cuní cachàmà.

Pastor ndiaha nduú Jesús

⁷ Dandu nì cáhàn tu Jesús xì nèhivì yucán, cachí-yà:

—Palabra ndàcuisì nduá yohó: na iin yehè ndé quíhvi rii, ducán nduú yùhù.

⁸ Nsidaa ana nì quixi antes, tècuìhnà xínduu-tè, te cutu cuní-te quidacuihna-té rii xí. Doco nèhivì nduú nahi rii xí, cóni ndúlócò-nè.

⁹ Te (nacua nì cachi) ñà-nahi yehè nduí, ñàyùcàndùá, sàhà yùhù vátùni quíhvi nèhivì, te nìhì-né salvación xi-ne, dandu después cucumi-né vida ndiaha xí-né, na iin rii sàhàn ndé iá cuàhà pastu, dandu màndixi tu-sì corra-si.

10 'Tin tècuìhnà, cutu quixí-te ñà-quidacuihna-té ñà-nduá icúmí-ndá, te ò cahni-téndô, te ò quida quini-tè xì-ndà. Doco yùhù, còó, sàhà ñà-cui nihitáhvi nèhivì cutiacu ndiaha-né nicanicuahàn, ñàyùcànduá nì quesàì (ñuhivì yohó).

11 Yùhù nduú ndise pastor vaha. Te sáhi vida xi sàhà-ñá nihì nèhivì nduú nahi riì xí cutiacu-nè.

12 Doco dava tè-ndiáá xì riì, peón-ni nduú-te, te mà úhì nacoò-tèsí, vachi có-nduú ndisa-tè pastor xi-sì; có-nduú-te meru stohò-si. Ñàyùcànduá nú nì xinì-te vaxi nsivòhú, dandu nacóó nihni-tèsí, te xinúdèhé-te; dandu tnií quisì mà-sí, te xítia nihni nsihi-sì.

13 Te ¿índù chuun xinúdèhé tèmà? Pues divi sàhà-ñá nduú-te peón-ni, te có-ndulócô-te sàhà-sí.

14 'Doco yùhù, pastor vaha ndisa nduí, te ináhá vahi nèhivì xí. Te mii-né, ináhá stná-nè yùhù.

15 Na ináhá Yuamání' yùhù, ducán ináhá stnáì mii-yá. Te yùhù, vida xi sáhi sàhà-ñá càcu nèhivì xí, vachi nahi riì xí xínduu-ne.

16 Te ndoó gá más nèhivì nduú nahi riì xí. Te mate diín xaan ndoó-né vichi, doco icúmí cùhìn cundaqui-nè ndixi; dandu cunchicùn-nè yùhù, te iin-ni nacuatnahá-né xì nsidaa gá ana nduú riì xí; te mindaa yùhù cundiaì-nè.

17 'Yùhù icúmí cuàhi vida xi, te nú sàni nsihi nì cuu ducán, dandu icúmí naquihin tuià. Sahájàn cuú ini Yuamání' sàhí.

18 Cunaha-nsiá, còò ni-iin cui quindiaa xì vida xi. Voluntad xi mií cuàhià. Vátùni cuàhià, te vátùni danátíacùì mií, vachi ducán nì nihitáhvi' nùù Yuamání'; divi ducán nì cachi-yà xí' —nì cachi Jesús.

19 Daaní, nècuàchì ladu Judea mà, nì tàhndè dava-ne sàhà ñà-nduá nì cachi-yà.

20 Cuàhà-né nì (cahíchì ini-nèyà), cachí-nè:

—Iin ñà-malu inácaá ini tè-jaàn. Tè-loco nduú-te. ¿Índù chuun ndulócô-nsià sàhà-té?

21 Doco dava ga-nè nì cachi-nè:

—Còó, màdì iin nècuàchì inácaá ñà-malu nduú nècuàchì cáhàn ducán. ¿A tuxí ini-nsià cui dandúvaha ñà-malu iin nècuàchì cuaá?

Nansa nì cuni tu nècuàchì raza Judea cahni-né Jesús

22-23 Daaní, nì sàà quivì nducahnú ñà-nì xínu veheñùhu cahnú. Tiempu vixin nì sandua, te iá tu Jesús ñuu Jerusalén, xicánúú-yá patiu veheñùhu ma ndé nani Portal de Salomón.

24 Te yucán nì sàà stná itnii nècuàchì raza-yà Judea, cachí-nè xì-yá:

—¿Nadaa ga tiempu cuàhàn-ní chidèhé gá-ní ana nduu-ní? Nú ndisa mii-yá nani Cristu nduu-ní, cachi ndàà-ní xì-nsí.

25 Dandu nì cachi Jesús:

—Sàni cachi xì-nsiá, doco có-xiníndísâ-nsiá. Nì ndacùcahín quivì Yuamání', te nì guide cuàhà milagru. Xì ñà-jaàn vátùni cundaà ini-nsià ana divi nduí.

26 Doco mii-nsiá, có-xiníndísâ-nsiá, vachi có-nduú-nsiá ana nduú riì xí, nacua nì cachi xì-nsiá.

27 Vachi nèhivì nduú nahi riì xí, iníní-né na cáhìn xì-né. Te ináhí-nè, te nchícùn-nè yùhù.

28 Te sáhi-nè vida ndiaha nicanicuahàn, te mà nunca sàà ndañuhu anima-nè, ni còò iin tavà xì-né nùù ndahí'.

29 Vachi nùù Yuamání' nì nihí nèhivì nduú nahi riì xí, te còò cá ana chicá fuerte nùù mii-yá; còò iin cui dandáñúhú-xí-nè nùù ndahà-yá.

30 Te yùhù xì Yuamání', iin-ni xínduu-nsi —nì cachi Jesús.

31 Ñàyùcànduá, nècuàchì raza-yà yucán, nì dàtàcá tu-ne yùù ñà-caniyuu-nèyà, te cahni-nèyà.

32 Dandu nì cachi-yà xì-né:

—Cuàhà gá obra vaha sàni guide nì xini-nsià. Te nsidaa obra mà nduá nì nihitáhvi' nùù Yuamání'. Pues ¿índù obra xí (có-ndiáá), te sàhàmà cuní-nsià cahni-nsiá yùhù?

³³ Dandu nì cachi nècuàchìmà xì-yá:

—Còó, màdì sàhà ñà-nì quidà-ní obra cuní-nsì cahni-nsí mii-ní; còó. Sàhà ñá-nì cachì-ní iin cuàchi, ñàyùcàndùá ndiá ìcà-nsí caniyuu-nsí mii-ní, vàchi cuní-nî ndudava-ní xì Dios, te nèhivì ùún nduu-ní.

³⁴ Dandu nì cachi Jesús xì-né:

—Pues, ¿nansa divi cachí nùù tutu nduú ley xi-nsia? Dohó cachá': "Nahi dios xínduu-nsia, cachí'".

³⁵ Pues, ducán cachá' sàhà nèhivì sàhana ma, mate cuisì nèhivì ùún nì inini razón xi Dios nduú-né, doco nahi dios nduú-né, cachá', te ináhá-ndá, siempre ñà-ndácuisi nduá cachí tutu ìì.

³⁶ Doco yùhù, mate ní nihí iin chuun ì nùù Yuamánì', te nì techuún-yá yùhù nì quesai ñuhivì yohó, doco cachí-nsià iin cuàchi nduá ñà-càchí' nduí Dèhemanì-yá.

³⁷ Cuisì cundehè-nsià obra quidé, te nú có-nduá nahi obra quidá stná Yuamánì', dandu màsà cúníndísâ-nsiá yùhù.

³⁸ Doco nú dava-nì iá obra quidé xì obra quidá stná mii-yá, dandu xiñuhu cunindisá-nsiá. Te mate có-xiníndísâ-nsiá yùhù, doco siquiera cunindisá-nsiá milagru quidé, dandu vátùni sàà-nsià cundaà ini-nsià, te cunindisá stná-nsià ñuhú saín vida xi Yuamánì' anímè, te ñuhú saín stná vida xi yùhù ini mii-yá —nì cachi Jesús.

³⁹ Dandu nsidaa nècuàchì yucán, tucutu nì cuni-nè tñii-neyà, doco nì càcu-ya nùù-né.

⁴⁰ Daaní, inga xichi cuàhàn-yà inga ladu yùte Jordán ndè lugar ndé nì saquida ìì Juan (Bautista) nèhivì. Te nì cuee chii-yá yucán.

⁴¹ Ñàyùcàndùá, cuàhà nèhivì nì casaà stná nùù-yá yucán, vàchi dohó cachí-nè:

—Còò milagru nìsà quidá Juan (Bautista), doco nsidaa ñà-nduá nì cachitnùhu-ne sàhà Jesús, divi ñà-ndáà nduá, (sàni xini-nsì) —nì cachi nècuàchìmà.

⁴² Te tiempu iá-yà lugar yucán nì xinindisá cuàhà nèhivì mii-yá.

11

Nansa nì xihì Lázaro, te nì natiacu-nè

¹⁻² Daaní, después nì quicuehè iin nècuàchì ñuu tii Betania nani Lázaro. Te divi ñuu yucán ndoó stná ùì cùha-ne, iin-ne nani María, te inga-nè nani Marta. Te María mà nduú nècuàchì (nì sàà nùù Jesús después), te nì dàcùchì-né tàtnà tñàmì sàhà-yá, dandu nì nsida ìchì-nèà xì ididínì-né.

³ Pues divi cùha Lázaro mà nduú ana nì catechuún iin razón nùù Jesús, cachí-nè xì-yá:

—Stoho-nsì Señor, cuhí vàha nècuàchì màni guá nùù-ní.

⁴ Ñàyùcàndùá, (nì sàà razón mà ndé iá-yà); doco na ní tiacu-yà palabra mà, dandu nì cachi-yà:

—Cuèhè jaàn, có-nduá cuèhè ñà-cui-ndà, cuisì iin cuèhè ñà-naquimanì cuàhà-ndà Dios nduá, te quee cuàhà stná tñùñuhu xì Dèhemanì-yá —nì cachi-yà.

⁵ Cunaha-nsiá, màni cuàhà Marta xì cùhì-nè xì cùha-ne nùù-yá.

⁶ Doco na ní xinitnùhu-ya cuhí nècuàchìmà, nì cuee chii gá-yà ùì quivì lugar yucán.

⁷ Dandu nì cachi-yà xì nècuàchì dacuahá-yá:

—Vichi cùhùn tu-nda ladu Judea.

⁸ Te nì cacachi nècuàchìmà xì-yá:

—Maestro, ¿a cuní tu-ní cùhùn-ní yucán? vàchi nècuàchì ladu mà, cuàhàn-nè cahni-né mii-ní xì yùù nì cùì, te tàyáha cuàhà quivì.

⁹ Dandu nì cachi-yà xì-né:

—Ùxin ùì hora nchíí orá nùù-ndà, ñàyùcàndùá mà úhì cacanu-nda ndui, te mà cáquihì sàhà-ndà, vàchi tñùù nùù-ndà ñuhivì yohó. Te ducán iá stná xì nsidaa ana datnúù ndiaha (Dios) anima-xi, (mà yúhì-nè).

¹⁰ Doco tucu iá nú xica-nda ñuú, mà úhì nàcasàn-ndà. Te divi ducán iá stná xì nèhivì có-dàtnúù Dios ini anima-xì.

¹¹ Na ní nsihi nì cachi-yà ducán, dandu nì cachi gà-yà xì-né:

—Quídi amigo xi-nda Lázaro. Ñàyùcàndùá, cùhìn dansícuìhnu inì-nè.

¹² Dandu nì cachi nècuàchì dacuahá-yá:

—Vàtùni Stoho-ndà Señor, vachi nú quídi uun-ne vichi, ádi vátùni nduvàha-ne.

¹³ Ducán nì cachi-nè, vachi tuxí ini-nè cáhàn-yà sàhà ñà-quídi-ndà na quetátú-ndà; doco cóo, sàhà ñà-xìhì-ndà cáhàn-yà.

¹⁴ Ñàyùcàndùá, chicá claru nì cáhàn-yà xì-né, cachí-yà:

—Cunaha-nsiá, sàni xìhì Lázaro.

¹⁵ Te mate có-ié` xì-né (na ní xìhì-nè), doco vátùni, vachi chindeámà ñà-sàà-nsià cunindisá ndisa-nsià. Pues vichi cùhùn-ndà ndé iá nsii ma —nì cachi-yà.

¹⁶ Te yucán iá stná iin nècuàchì dacuahá-yà nani Tomás. Cuatí cachí nèhivì xì-né. Te vichi nì cachi-nè xì nsidaa gá compañeru-nè:

—Cùhùn stná-ndà xì-yá, te cui-ndà.

¹⁷ Daaní, (nì quihin nsidaa-né ichì cuáhàn-nè xì-yá), te nì sàà-nè ñuu tii Betania ndé iá nsii ma, te nì xinitnùhu-ne sàcuàhàn-ndà cùmì quìvì inácaa-ndà cueva ndé índuxin-nda.

¹⁸ Cunaha-nsiá, yatni iá stná ñuu cahnú Jerusalén ndé nduú ñuu tii ma, nahi dava hora caca-nda,

¹⁹ (te yucán ndoó cuáhà) nècuàchì raza Judea. Ñàyùcàndùá, nì casaà stná cuáhà nècuàchì mà ndé iá Marta xì María, cunì-nè nacuahandee ini-nè nècuàchì mà sàhà nsì-cùha-ne.

²⁰ Daaní, na ní xinitnùhu Marta sàni quesaa Jesús, dandu cuáhàn-nè nànchicùn-nèyà. Doco María, nì ndòo-ne vehe.

²¹ Te na ní sàà Marta ndé iin-yá, dandu nì cachi-nè xì-yá:

—Señor mío, nú ni ía-ní yohó nì cùí, dandu mà cùí cùhe.

²² Doco yùhù ináhî, nsidaa ñà-ndùá ni cacán tàhvì-ní nùù Dios vichi, seguru cuàhatahvì-yá mii-ní.

²³ Dandu nì cachi Jesús xì-né:

—Icúmì cùha-ní natiacu-nè.

²⁴ Dandu nì cachi Marta xì-yá:

—Yùhù ináhî, icúmì-nè natiacu-nè na sàà xìnu tiempu, te natiacu nsidaa nèhivì.

²⁵ Dandu nì cachi Jesús xì-né:

—Yùhù nduú ana danátíacú xì nèhivì, te sáhatahvì stnài vida ndiaha. Ana càhvì xì, mate sàni xìhì-nè, doco icúmì-nè natiacu-nè.

²⁶ Te nsidaa ana itíacú, te xiníndísâ-né yùhù, mà nunca sàà-nè cui ndisa-ne. ¿A xiníndísâ-ní ñà-jaàn?

²⁷ Dandu nì cachi-nè xì-yá:

—Jaan, Señor mío; yùhù xiníndísê ñà-mii-ní nduu-ní Cristu Dèhemanì Dios, te ndé inga ñuhivì nì quee-ní nì quesaa-ní.

²⁸ Ducán nì cachi-nè, dandu mànuhù-né vehe-ne, te nì cana dèhé-nè cùhì-nè, cachí-nè xì nècuàchì mà:

—Sàni quesaa maestru Jesús, te caná-yá mii-ní.

²⁹ Ñàyùcàndùá, na ní tiacu María ñà-jaàn, dandu luegu nì ndacuiin-nè cuáhàn-nè ndé iá-yà,

³⁰ vachi tàñáha ga sàà-yà meru ini ñuu mà, iá va-ya ndé nì ndacùhun tnahá-yá xì Marta.

³¹ Daaní, nècuàchì raza Judea ndoó nacuahandee xi ini María vehe-ne, nì xini-nè na ní ndacuiin yàchì nècuàchì mà cuáhàn-nè, ñàyùcàndùá, nì tenchicùn stná-nè cuáhàn-nè, cachí-nè:

—Ádi cuáhàn nècuàchì jaàn ndé índuxin nsii ñà-coo-ne cuacu-ne.

³² Dandu nì sàà María ndé iá Jesús. Te nì sàcuìin sìsì-né nùù-yá, cachí-nè:

—Señor mío, nú ni ía-ní yohó nì cùí, dandu mà cúí cùhe.

³³ Daaní, na ní xini Jesús sacú María, te sacú stná nèhivì cutnâhâ xí-nê, dandu nì sàcàn fuerte ini-yà, te nì cutâsi ini-yà.

³⁴ Dandu nì cachi-yà xì nèhivì yucán:

—¿Índù índùxin nsì?

Te nì cachi-nè xì-yá:

—Cùhùn-ndà cundehè-ní, Stoho-nsì Señor.

³⁵ Dandu nì sacú stná-yà.

³⁶ Te sâháyùcândüá nì cacachi nècuàchì raza-yà (nì quixi Jerusalén):

—Cundehè-nsiá na cuahà guá cuú ini-yà sâhà nsì ma.

³⁷ Doco dava nèhivì yucán, nì (xitnùhu-ne), cachí-nè:

—Dècuèndè iin nècuàchì cuaá nì dânatùì Jesús yohó nùù-xí. ¿Índù chuun mànicúí dandùvâha-ne nècuàchì nsì yohó sâhà ñà-màsà cúí-nè nì cùí? —nì cachi-nè.

³⁸ Daaní, cuahàn-yà xì-né te nì sàà nsidaa-né dècuèndè ndé índùxin nsì ma. Cueva nduá, te ndiadí iin cavà cahnú yehá. Te mii-yá, sàcàn ndee ini-yà nì sàà-yà.

³⁹ Dandu nì cachi-yà xì nèhivì yucán:

—Dità-nsiá cavà jaàn.

Doco nì càhàn Marta, cùha nsì-Lázaro, cachí-nè:

—Señor mío, sàcuahàn-ndà cùmì quivì vichi; ádi sàsàhán quini nsì jaàn.

⁴⁰ Dandu nì cachi-yà xì-né:

—Sànì cachi xì-ní cuisì xiñuhu cunindisá vâha-ní, dandu cunì-ní ñà-ndiaha guá quidá Dios.

⁴¹ Ñâyùcândüá, nì ditá nèhivì mà cavà ndiadí yehè cueva mà. Dandu nì ndacoto ndiaá-yà dìquì-xí, te nì cachi-yà:

—Ansivéhé-ní, Yuamání, vâchi nì inini-ní ñà-ndüá nì xicàn tàhví nùù-ní.

⁴² Te ináhî, ducanì ininí-ní yùhù na xicàn tàhví nùù-ní, doco ducán cachí-xì-ní vichi sâhà-ñá nì cúniní nèhivì itá yohó, te cunindisá-né mii-ní ñà-ndüù-ní ana nì techuun-xí vâxi

⁴³ —nì cachi-yà.

Dandu nì ndàhì ndee-yá, cachí-yà:

—¡Lázaro! ¡Quee-ní, nahà-ní!

⁴⁴ Dandu nì natiacu nècuàchì nsì ma nì quee-ne cueva, idáducún î-né sìcoto. Te nuhní stná ndahàsâhâ-né, te nùù-né, ídâhvi stná iin sìcoto. Dandu nì dândâcú-yá nùù nèhivì itá yucán, cachí-yà:

—Nacanì-nsiànè, te ni cacá-né —nì cachi-yà.

Nansa nì ndatnuhu tnahá nèhivì ñà-tnii-ne Jesús, te cahni-néyà

⁴⁵ Ñâyùcândüá, cuahà nècuàchì raza Judea yucán, nì xinindisá stná-nèyà na ní xini-nè nansa nì quida-ya. Divi nèhivì nì sâhàn vehe María nâcòtò xì nècuàchì mà xínduu-ne.

⁴⁶ Doco dava ga nèhivì yucán, mànuhù-né, te nì cachitnùhu-ne xì nècuàchì fariseu nansa nì quida-ya.

⁴⁷ Ñâyùcândüá, nì nataca nècuàchì mà xì dùtù xícusahnú, te nì ndatnuhu tnahá-né, cachí-nè:

—¿Ndíá quida-nda? vâchi cuahà gá milagru quidá Jesús.

⁴⁸ Te nú ni nâcòó uun-ndané, dandu icúmí nsidaa nèhivì cunindisá-né nècuàchì mà. Te nú ducán, dandu caquixi tè-romanu, dacaá-te veheñuhu xi-nda, te dandutu stná-te nsidaa-nda ñuu-ndà yohó —nì cachi-nè.

⁴⁹ Dandu nì càhàn iin tiàa nani Caifás, divi nècuàchì nduú dùtù cusâhnú cuà yucán. Te dohó nì cachi-nè:

—Mii-nsiá, có-cùndâà ini-nsiá.

⁵⁰ Có-sânihì inì-nsia ñà-nùù ndohó chicá vaha quea nú ni cuí imindaa nêhivì sàhà ñuu-ndà yohó, te màdiá ndañuhu nsidaa-nda —nì cachi-nè.

⁵¹ Doco Caifás mà, màdi inì-ni mii-né nì chitnùnì ini-nè cachi-nè ducán; còó, vâchi sàhà-ñá nduú-né dùtù cusáhnù cuìa yucán, ñàyùcàndùá Dios nì dàchítñùnì ini-yànè cachi-nè ducán sàhà Jesús ñà-ìcúmí-yâ cui-yà sàhà nêhivì ñuu-yà.

⁵² Te màdi cuisì sàhà nêhivì ñuu-yà. Còó, vâchi icúmí stná-yà cundaca-ya nsidaa nêhivì nduú dèhe ndisa Dios, te danátácá-yànè ñà-cundoo-ne iin-ni cahnú-ní, mate vichi xíndoo-ne inicutu ñuhivì.

⁵³ Cunaha-nsiá, ndè quivì yucán nì quesaha tè-xídandacú ñuu mà ndatnuhu stnahá-te nansa quida-tè ñà-cahni-téyâ.

⁵⁴ Ñàyùcàndùá, cóni xícanuu vate gá-yà mahì nêhivì raza-yà yucán, còó. Nì quee-ya cuàhàn-yà inga ñuu nani Efraín, iin ñuu indúhu yatni ndé nduú puru yucù. Te yucán nì ìa chii-yà xì nècuàchì dacuahá-yâ.

⁵⁵ Daaní, quivì yucán sà-ítúú nacava iin vicò nani vicò pascua, nduámà iin vicò siempre nsidácáhnù nècuàchì raza Judea yucán. Ñàyùcàndùá, cuàhà nêhivì nì quee ñuu cuatì vâxi ñuu Jerusalén sàhà ñà-nduhii-né antes sàà vicò mà.

⁵⁶ Te itá nècuàchìmà veheñùhu cahnú ndatnúhú-nê, ndácàtnùhù stnahá-né nùù-né a quixi stná Jesús vicò mà, á coó, cachí-nè iin-ne xì inga-nè:

—¿Nansa tuxí inì-nsia? ¿A quixi-ne, á coó? Ádi mà quíxí-né cahan-nsí.

⁵⁷ Cunaha-nsiá, sàni quee iin orden nùù dùtù xícusahnú, xì nùù nècuàchì fariseu, cachí-nè xì nsidaa nêhivì ñà-ìcúmí-nè cachitnùhu-ne índù iá-yà, nú ináhá-nê, sàhà-ñá cùhùn nècuàchìmà tnii-neyà.

12

Nansa nì quida iin nècuàchì ñahà, nì dàcùchí-né sàhà Jesús xì tàtnà tnàmi

¹ Daaní, cumánì gá iñù quivì cunduu vicò pascua, dandu nì sàà Jesús ñuu tii Betania, divi ñuu ndé iá nècuàchì nì dànátíacú-yà nani Lázaro.

² Te ñuu mà nì quida stná nêhivì iin vicò tì sàhà-ñá cundoo-ne cuxi-ne xì-yâ. Te vicò mà nì chindee stná Marta, nì quida-ne chuun yuhùnùhú. Te iá stná Lázaro yucán mahì nêhivì cutnáhâ xí-yâ xixí-yâ.

³ Daaní, nì sàà stná María yucán, nihí-né dava litro ñà-tnami nani nardo, finu cuàhà-té, te yàhvi gà-te. Te nì dàcùchí-nète sàhà-yâ, dandu ni nacuaaha-nète xi ididínì-né. Te inicutu vehe nì nacutu dico tnami-té.

⁴ Doco yucán iá stná iin nècuàchì dacuahá-yâ nani Judas Iscariote, divi dèhe Simón, te nduú stná-nè tiàa icúmí dicò xì-yâ después. Te dohó nì cachi-nè:

⁵ —¿Índù chuun cóni cùyàhvi ñà-tnami jaàn chicá vaha ni cuí? Vâchi vâtùni tùi ùnì cientu òhùn plata sàhà ñà-jaàn, te dasàn-ndàñá nùù nècuàchì ndahví.

⁶ Ducán nì cachi nècuàchìmà, doco màdi ndisa nècuàchì ndahví cuhí ini-nè; (mii-né cuhí ini-nè), vâchi iin nècuàchì cuìhnà nduú-né. Te ndahà-né iá itni òhùn xí nsidaa nècuàchìmà, te tùha stná-nè cuida cuìhna-né òhùn ñuhuma.

⁷ Ñàyùcàndùá, nì cachi Jesús xì-né:

—Nacoo-ní nècuàchì ñahà yohó, vâchi sàhà-ñá sà-ítúú quivì cundùxin, ñàyùcàndùá nì chivàha-ne ñà-tnami yohó, te vichi nì xichuún-néa.

⁸ Nècuàchì ndahví, nicanicuahàn ndoó-né yohó, doco yùhù, còó, sacù-ni quivì ié' xì-nsiá —nì cachi-yà.

Nansa nì ndatnuhu tnahá nêhivì ñà-cahni stná-nè Lázaro

⁹ Daaní, cuàhà gá stná nècuàchì raza Judea, nì sàà stná-nè ñuu tii Betania mà na ní xinitnùhu-ne yucán iá-yâ. Doco màdi cuisì mii-yâ cuní-nè cundehè-né, còó. Stná Lázaro cuní-nè cundehè-né, vâchi sàni natiacu nècuàchìmà.

¹⁰ Ñàyucàndüá, dècuèndè stná nècuàchìmà cuní stná dùtù xícusahnú cahni-né, te sàhámà nì quesaha-né ndatnúhú tnahá-né (nansa quida-ne).

¹¹ Vàchi sàhà Lázaro cuàhà nèhivì ladu Judea mà cuní-nè yàha-ne ladu xi Jesús ñà-cunindisá stná-nèyà.

Nansa nì sàà Jesús ñuu Jerusalén

¹² Daaní, nì yàha inga quivì. Te nèhivì cuàhà sàni quesaa ñuu Jerusalén chivàha xi vicò mà, nì xinitnúhu-ne ñà-icúmí Jesús quesaa stná-yà.

¹³ Ñàyucàndüá, nì sahnde-nè ndahà nù-ñúù, te nihí-nènu nì quee-ne cuàhàn-nè dècuèndè ndé vaxi-ya, cána ndee nsidaa-né, cachí-nè:

—¡Viva! ¡Ndiaha gá nècuàchì yohó, vàchi cuenta xi Stoho-ndà Señor vaxi-ne! ¡Ndiaha gá-nè, vàchi cuàhàn-nè cusahnú-né nùù ñuu-ndà Israel!

¹⁴ Dandu nì tùi iin burru chii, te nì sàcùnùú-yá yàtà-sí. Ducán nì quida-ya, vàchi dohó cachí nùù tutu ì:

¹⁵ Mii-nsiá nèhivì ñuu Sión yohó, màsà yúhí-nsiá, vàchi icúmí quesaa mii-yá ana cusahnú nùù-nsiá, cuindànùú-yá iin burru chii —cachí tutu mà.

¹⁶ Doco nècuàchì dacuahá-yá, có-ínahá-né ñà-sàhà mii-yá cachí tutu ì ducán. Cuisì dècuèndè después na sàni nanihí-yá tnùñuhu ndiaha xí-yá, dandu nì nsinuu ini-nè, ndisa, ducán cachí tutu mà, te divi ducán nì chindee stná-nèyà, (te nì quida ndisa-ya) nsidaámà.

¹⁷⁻¹⁸ Pues vichi sàni ndecoyo cuàhà nèhivì (ñuu mà) nánchìcùn xì-yá, vàchi sàni xinitnúhu-ne sàhà milagru cahnú nì quida-ya na ní cana-ya Lázaro nì quee-ne sepultura nì natiacu-nè. Vàchi nèhivì nì xini xì milagru mà, sàni dàcuítia-nè cuentu inicutu.

¹⁹ Daaní nì xini nècuàchì fariseu ñà-cuàhà guá nèhivì nì ndecoyo, te nì ndatnuhu tnahá-né entre mii-né, cachí-nè:

—¡Jaàn xiní-nsiá ni-iyuhu có-quidà-ndà ganar! Cundehè-nsiá, nsidanicuú nèhivì nchìcùn xì Jesús vichi.

Nansa nì quixi nècuàchì raza Grecia nandúcu-né Jesús

²⁰ Daaní, vicò mà nì sàà stná itnii nècuàchì ñuu Grecia ñà-cahvi-né Dios vicò mà.

²¹ Te nì tnàtuu-ne nùù Felipe, iin nècuàchì ñuu Betsaida iá ladu Galilea, te nì cachi-nè xì nècuàchìmà:

—Señor, cuní-nsì càhàn-nsì xì Jesús.

²² Dandu nì sàhàn Felipe nì cachitnúhu-ne xì Andrés, dandu ndúì-nè cuàhàn-nè nùù mii-yá, te nì cachi-nè xì-yá sàhà nècuàchì ñuu Grecia mà.

²³ Dandu nì naxiconihí-yá nùù-né, cachí-yà:

—Vichi sàni sàà quivì nanihí' tnùñuhu ndiaha xí, divi yùhù ana nduú Tnaha Nèhivì Ñuhiví.

²⁴ Cunini-nsia palabra ndàcuisì yohó: nú (cuhí ini-ndà) iin nùnì, te sàhámà có-chìhì-ndañá, dandu imindaa nùnì cundua nicanicuahàn. Doco nú sàni chihi-ndañá, dandísá icúmíâ nducuahá'.

²⁵ Pues ducán iá stná xì vida xi nèhivì. Nú cuhí gá ini-nè vida xi-ne ñuhiví yohó, dandu icúmíâ ndañuhu dahuan. Doco nú có-cùhí ini-nèà, dandu nicanicuahàn cucumi-né vida ndiaha.

²⁶ Te nú nduú ndisa-ne iin ana xinúcuáchí nùì, dandu ni cúnchìcùn-nè yùhù, te ndéni nì cui ni sái, yucán icúmí sàà stná nècuàchìmà cutnahá-né xí. Te nsidaa ana xinúcuáchí nùì, icúmí Yuamání' quidañuhu-yánè.

²⁷ Vichi yàha ga nacání cuàhà inì. Doco ¿a cuàhìn càquìn nùù Yuamání' ñà-nì dácâcu-ya yùhù nùù ñà-ndüá icúmí cuu xí vichi? Còó, vàchi divi sàhà ñà-nì cùù-xí ducán nduá nì quesai ñuhiví.

²⁸ Te vichi dohó cachí xì Yuamání': "Tavà-ní tnùñuhu xí-ní cundehè nèhivì".

Dandu nì tiacu tàchì ana càhàn ansivi, cachí-yà:

—Sàni taví tnùñuhu xí, doco más gà-ñà icúmí quee nùù nèhivì quivì nùù-xí.

29 Ñàyùcàndùá, nèhivì itá yucán, na ní tiacu-nè tàchì-yá, nì cachi-nè:

—Dàvì ní càhàn.

Te dava ga-nè nì cachi-nè:

—Ádi ángel nì càhàn xì Jesús.

30 Dandu nì cachi-yà xì-né:

—Màdì sàhà yùhù nì càhàn Dios ndè ansivi nì tiacu-nsià; sàhà mii-nsiá nduá nì càhàn-yà.

31 Cunaha-nsiá, sà-itúú ndundaà sàhà nsidaa ñà-có-ndiáá ñuhiví yohó. Te vichi icúmí Dios tavà-yá quisi dandacú núù ñuhiví yohó.

32 Daaní, nú sàni chituu ducún nèhivì yùhù, dandu icúmí danátâquì cuàhà nèhivì núí.

33 Palabra mà nì cachi-yà nahi ejemplu sàhà-ñá cundaà ini-ndà índù modo icúmí nèhivì cahni-néyà (nchìca cruz).

34 Dandu nì cachi nèhivì cuàhà mà xì-yá:

—Nsiùhù, sàni inini-nsi nì cahvi-ne núù ley ì ndé cachá: “Nicanicuahàn icúmí coo mii-yá nani Cristu”. Doco mii-ní, cachí-ní ñà-ìcúmí nèhivì dananá ducún-nè mii-ní, (te cui-ní). Te cachí stná-ní ñà-ndùù-ní Tnaha Nèhivì Ñuhiví. Pues ¿nansa iá (chuun quidá) iin ana nduú Tnaha Nèhivì Ñuhiví?

35 Dandu nì cachi Jesús xì-né:

—Iyuhu nduú tiempu cuàhàn cutnuù ndiaha luz (xi Dios) mahi-nsiá. Ñàyùcàndùá, nacua datnúù ndiaha-yá núù-nsiá, ducán quida ndisa-nsia cumplir vichi, vàchi (vàxi iin quivì) vihini cuxio nsidaámà, te ndé cuisì ichì ñáa ndòò núù-nsiá. Cunaha-nsiá, nú ni cacá iin nèhivì ichì ñáa, mà có-cùndáá tnùnì ini-nè índù núù-xí sàà-nè.

36 Doco vichi nduú meru hora datnúù ndiaha-yá luz (xi-ya) núù-nsiá, ñàyùcàndùá cunindisá-nsiá sàhà-ñá sàà-nsiá cunduu-nsia dèhe mii-yá ana datnúù ndiaha xi-nsiá —nì cachi-yà.

Dandu nì quecuaán-yá iin xaan ndé mà ndácùhun nècuàchì-mà-yá.

Nansa nì cahìchì ini nècuàchì ñuu Jesús mii-yá

37 Mate cuàhà milagru nahnú nì quida-ya nì xini nèhivì, doco cóni sàà-nè cunindisá-néyà.

38-39 Te ducán nì cuu ndisa ñà-nduá nì tiaa profeta sàhana nani Isaías, vàchi dohó nì cachitnúhu ndómà:

Stoho-nsì Señor, sacu nèhivì nì xinindisá ñà-nduá nì cachi-nsi xì-né, mate cuàhà gá sàni quida-ní milagru fuerte, nì cachi ndómà.

Ñàyùcàndùá, mànicùí gá cunindisá nèhivì (raza-yà), vàchi dohó nì tiaa stná Isaías mà (ñà-nduá nì cachi Dios) sàhà-né:

40 Sàni dàcuái anima-nè, te quidámáxiní-nè quidé. Ñàyùcàndùá, có-cùnì-nè cundehè-nè ichì yùhù, ni có-cùnì stná-nè mànhì ini-nè, ni có-cùnì stná-nè natnahnù-nè (ichì váha), te ducán nsida vii' anima-nè, nì cachi-yà.

41 Ñà-jaàn nduá nì tiaa Isaías sàhana na ní xini ndómà seña xi Dios ñà-ndiaha guá cuàhàn quida Jesús, te nì cachitnúhu-nda sàhámà.

42 Doco cunaha-nsiá, cuàhà gá stná nèhivì raza-yà nì xinindisá stná-néyà, dècuèndè stná cuàhà nècuàchì dandacú. Doco cóni càchì vate-né ñà-jaàn, vàchi nì yùhì-nè (cuìdà ini) nècuàchì fariseu-nè, te mà cóo gá permisù cùhùn-nè veheñùhu.

43 Vàchi chicá nì cudì ini-nè ndee vaha-ne núù nèhivì ñuhiví, te màdì núù Dios.

Nansa icúmí palabra nì cachi Jesús nsidandaà sàhà cuàchì nèhivì ñuhiví

44 Daaní, nì ndàhì ndee Jesús, cachí-yá:

—Nú xiníndísà nèhivì yùhù, màdì cuisì yùhù xiníndísà-né; cóo. Stná mii-yá ana nì techuun-xí vaxi xiníndísà stná-nè.

45 Te nú indéhe-né yùhù, dandu indéhe stná-nè ana nì techuun-xí vaxi.

⁴⁶ Cunaha-nsiá, sàhà-ñá datnúi nùu nèhivì ichì cùhùn-nè, ñàyùcànduá nì quesai ñuhiví yohó, dandu nsidaa ana xiníndísá xí, mà cáca gá-nè ichì ñáa.

⁴⁷⁻⁴⁸ Te nú cundáa ini iin nèhivì ñà-nduá cachí, te có-chívàha-neà, dandu icúmí ndundaà sàhà cuàchi-ne, te nihì-né castigu. Doco màdì yùhù icúmí nsidandaà xì sàhà-né. Còó, vàchi màdì sàhà-ñá dandohí nèhivì nì quesai ñuhiví yohó. Còó; sàhà-ñá càcu-ne nì quesai. Divi palabra sàni cachì icúmí nsidandaà sàhà cuàchi nèhivì cahíchi inì-xi, te có-càndísá-né ñà-nduá cachí. Icúmí palabra mà cachà nansa nihì-né castigu na sàa xìnu tiempu.

⁴⁹ 'Nsidaa ñà-nduá sàni cachì xì-nsiá, màdì dìni mií nì quèa; còó, divi Yuamáni' nduú ana nì sàcùnahí nùu-xí; divi mii-yá nì cachi-yà xì ñà-nduá cuní-yà cachì xì-nsiá.

⁵⁰ Te ináhí, nú nì cúníndísá-nsiá ñà-nduá dandacú-yá, dandu vida ndiaha cucumi-nsiá nicanicuahàn. Ñàyùcànduá, nacula sàni cachi-yà xì, divi ñà-jaàn nduá cachí xì-nsiá —nì cachi Jesús.

13

Nansa nì nacate Jesús sàhà nècuàchì dacuahá-yá

¹ Daaní, nì sàa vigilia vicò pascua, te ináhá Jesús sà-itúú stná quivì icúmí-yâ quee-ya ñuhiví yohó nùhù-yà ndé iá Yuamáni-yá. Te cunaha-nsiá, cuú cuáhà ini-yà sàhà nèhivì xí-yá ndoo ñuhiví yohó, ñàyùcànduá nì (quida-ya iñàha ñà-cundaà ini-ndà) yáha ga cuú cuáhà ini-yà sàhà-ndà.

² (Vàchi divi ñuú vigilia mà) iá-yà cudíní-yà xì (nèhivì xí-yá). Doco iin nècuàchì mà nani Judas Iscariote, divi dèhe Simón, sànihnú ini-nè cahin-nèyà (nùu tè-xídandacú), vàchi ducán nì dānācānī ini ñà-malu-nè quida-ne.

³ Te mii-yá, ináhá stná-yà sàni chitnùnì ini Yuamáni-yá ñà-dandacú-yà nùu nsidan-icuú iñàha, te ináhá stná-yà ñà-nùu Yuamáni-yá nì quixi-ya, te después nùhù-yà.

⁴ Ñàyùcànduá, nì nacooyà ñà-xixí-yá, te nì ndacuiin-yà, nì tavà-yà dùhnù quihín-yà, te nì chicuhni nihni-ya iin sìcoto caní tixi-ya.

⁵ Daaní, nì tñii-ya iin tina, te nì dàchitù-yáñà tècuí, dandu nì quesaha-yá nacaté-yá sàhà nècuàchì dacuahá-yá, te después nì nsida ichí-yáñà xì sìcoto cani-ma.

⁶ Te na ní sàa-yà ndé iá Simón Pedro, dandu nì cachi-nè xì-yá:

—¿A ndisa cuní-ní nacate-ní sàhí, Señor mío?

⁷ Te nì cachi-yà xì-né:

—Vichi có-sànìhì inì-ní índù iñàha nduá cuàhìn quide xì-ní, doco vaxi iin quivì, dandu sàa-ní cundaà vaha inì-ní.

⁸ Dandu nì cachi-nè xì-yá:

—¡Còó! ¡Mà nunca cuàhi nacate-ní sàhí!

Te nì cachi tu-ya xì-né:

—Nú màsà nácátí sàhà-ní, mà cúí cunduu-ní nèhivì xí.

⁹ Te nì cachi tu-ne xì-yá:

—Señor mío, nú ducán nduá, dandu nacate stná-ní ndahí xì dìní, te màdiá cuisì sàhí.

¹⁰ Dandu nì cachi-yà xì-né:

—Cunaha-ní, nú làcà nì xichi iin nèhivì, còò necesidad cuchi tu-ne, vàchi sà-lá ndoo inicutu icà-né, cuisì sàhà-né (cúdi), te ñà-jaàn xiñuhu ndoo. Te ducán iá stná xì mii-nsiá vichi, sàni ndoo vaha dahuun anima-nsiá. Doco màdì nsidaa-nsiá iá ndoo-nsia.

¹¹ Ducán nì cachi-yà, vàchi ináhá-yâ ana cuàhàn dicò xì-yá, ñàyùcànduá nì cachi-yà: “Màdì nsidaa-nsiá iá ndoo-nsia”.

¹² Daaní, nì nsihì nì nacate-ya sàhà-né, dandu nì nàcùndixi-ya dùhnù quihín-yà, te nì sàcòo-ya. Te nì cachi-yà xì-né:

—¿A cundáa inì-nsia índù chuun nì quide xì-nsiá ducán?

13 Pues Maestro cachí-nsià xí, te Stoho-nsi Señor cachí stná-nsià xí. Te vátùni iámà, vächi divi nduí.

14 Doco cunaha-nsiá, mate maestru xi-nsia nduí, te stoho-nsià nduí, doco nì nacati sàhà-nsiá. Ñàyùcàndüá, stná mii-nsiá ndiá ìcà-nsiá nacate stnahá stná-nsià sàhà-nsiá.

15 Vächi nacua nì quide xì mii-nsiá, divi ducán xiñuhu quida stná-nsià.

16 Ñà-ndáà nduá cachí xì-nsiá yohó: màsà cútúxí ini iin peón ñà-chicá ndiaá-te nùù lamú xi-tè. Stná iin tè-nìhì-xì iin razón, màsà cútúxí inì-te ñà-chicá ndiaá-te nùù ana nì techuun-xi-té xì razón mà.

17 Ñàyùcàndüá, nú sàni cundaà vaha inì-nsia ñà-ndáà nduá sàni cachì xì-nsiá, te quidá ndisa-nsia cumplir, dandu ndiaha gá cundoo-nsia.

18 'Doco có-câhìn sàhà nsidaa-nsiá. Yùhù ináhí índù nèhivì sàni nacàxin. Te nacua nì cachitnùhu nùù tutu ìì, ducán ndisa sàni cuu xí, vächi dohó cachá: "Ìin tiàa cutnàhâ xí na xixí, divi nduú ana sàni nanduu ana xiní ùhì xí".

19 Yùhù, tàñáha ga yàhi tnùndoho icúmí cuu xí, doco sàni cachitnùhi xì-nsiá sàhà-ñá, dandu na sàa cuu ducán, icúmí-nsiá cunindisá-nsiá ñà-divi yùhù nduú mii-yá.

20 Ñà-ndácuisì nduá yohó cachí xì-nsiá: nú xiníndisâ nèhivì iin ana nì techuín, dandu queámà na ian sàni xinindisá stná-nè yùhù. Te nú ducán xiníndisâ-né yùhù, dandu cuní cachàmà xiníndisâ stná-nè mii-yá nì techuun-xí vâxi

21 —nì cachi-yà.

Nansa nì cachi Jesús ñà-divi Judas icúmí quida xi-yá entregar

Dandu nì quesaha-yá cuhúún cuáhà ini-yà, te nì cachitnùhu-ya xì nèhivì xí-yá yucán: —Cunaha-nsiá, iá iin-nsia cuàhàn cahin xí.

22 Ñàyùcàndüá nì quesaha nsidaa nècuàchìmà indéhe stnahá-né nùù-né, nacánì ini-nè ana divi cáhàn-yà sàhà-xí cahan-né.

23 Te yatni uun diìn-yá iá iin nècuàchì màni guá nùù-yá.

24 Ñàyùcàndüá, nì quida Pedro iin seña nùù nècuàchìmà ñà-nì ndácàtnùhù-né nùù-yá ana divi cáhàn-yà sàhà-xí.

25 Dandu nècuàchìmà, chicá nì cuyatni-ne nùù-yá, te nì cachi-nè xì-yá:

—Señor mío, ¿ana divi nduú tiàa cachí-ní?

26 Dandu nì cachi-yà xì-né:

—Cuàhìn dandaxín iyuhu pan, te ana cuàhi, divi nècuàchì jaàn nduú-né.

Dandu nì dàndàxín-yá pan mà, te nì sàha-ya Judas Iscariote, divi dèhe Simón.

27 Te na ní tnii nècuàchìmà pan mà, dandu nì quìhvi ñà-malu Satanás ini anima-nè. Dandu nì cachi-yà xì-né:

—Ñà-nduá cuàhàn-ní quida-ní, yàchì quida-nià.

28 Doco nèhivì dava ga cutnàhâ xí-yâ yucán, cónì cundáà ini-nè índù chuun nì cachi-yà palabra mà xì nècuàchìmà.

29 Dava-ne, nì tuxi ini-nè nì cachi-yà ducán sàhà ñà-nduú nècuàchìmà ana ndiaá xì dihùn xí nsidaa-né, te ádi iá iñàha cùhùn-nè cuiin-ne ñà-nducahnú vicò, te ò cùhùn-nè dasàn-né dihùn nùù nècuàchì ndahví cahan-né, (doco còó).

30 Daaní, na ní nsihì nì tnii Judas mà pan mà, dandu vichi vichi nì quee-ne cuàhàn-nè; te ñuú nduá.

Ñà-nduú palabra saa nì dàndàcú Jesús nùù-ndà

31 Na sàcuàhàn Judas, dandu nì cachi Jesús:

—Yùhù ana nduú Tnaha Nèhivì Ñuhivì, vichi sàni nìhì ndise tnùñuhu xí, te sàhà stná yùhù icúmí quee ga stná tnùñuhu xí (Yuamáni) Dios.

32 Ñàyùcàndüá, nú sàhà yùhù chicá coo tnùñuhu xí-yá, dandu stná yùhù nìhì gá stnái más tnùñuhu quida-ya; te yàchì icúmí-yâ quida-ya ducán.

³³ Hijos, làcà iyuhu-ní coo guè xì-nsiá yohó. Vàchi nacua nì cachì xì nècuàchì raza-ndà Judea daa, ñà-jaàn nduá cachí stnàì xì mii-nsiá vichi, icúmí-nsiá nanducu-nsiá yùhù, doco lugar ndé cùhìn mà-cuí sàà-nsiá.

³⁴ Te vichi dandacuí iin ley saa chivàha-nsia, divi ñà-cuu stnahá ini-nsià sàhà-nsiá, ñà-jaàn nduá dandacuí; nacua cuú cuáhà inì sàhà mii-nsiá, divi ducán xiñuhu cuu stnahá stná ini-nsià sàhà-nsiá.

³⁵ Vàchi nú ni cuú stnahá ini-nsià sàhà-nsiá, dandu sàhájàn vètùni cundaà ini nsidaa nèhivì ñà-divi nèhivì xí yùhù nduú-nsiá.

Nansa nì cachitnùhu Jesús ñà-icúmí Pedro nacuaà-néyà

³⁶ Dandu nì cachi Simón Pedro xì-yá:

—Señor mío, ¿índùvì cùhùn-ní?

Dandu nì cachi-yà xì-né:

—Vichi mà cúí cutnaha-ní xí cùhùn índù icúmí cùhìn. Doco después, dandu icúmí stná-ní sàà-ní yucán.

³⁷ Dandu nì cachi-nè xì-yá:

—Señor mío, ¿índù chuun mà cúí cutnahá stnàì xì-ní cùhùn vichi? Vàchi cunaha-ní, dispuestu ié` cuì sàhà-ní.

³⁸ Dandu nì cachi-yà xì-né:

—¿A ndisa dispuestu iá-ní cuì-ní sàhí cahan-ní? Yùhù cachí xì-ní, te ñà-ndàà nduá, tañáha ga coto lehe, te sàni nacuaà-ní yùhù ùni xichi.

14

Ñà-nduá nì cachi Jesús xì nèhivì xí-yá ñà-mii-yá nduú-yá ichì sàà-ndà nùu Yua-nda Dios

¹ Màsà nácání gá ini-nsià; cuisì cunihnu ini-nsià Dios, te cunihnu stná ini-nsià yùhù.

² Ini vehe cahnú Yuamání iá cuáhà gá lugar ndé cundoo-nda. Te nú màdì ñà-ndàà nduájàn, dandu sàni cachì xì-nsiá nì cúí. Doco icúmí codònuí nùu-nsiá cùhìn sàhà ñà-quida vií ndé cundoo stná-nsià xí.

³ Daaní, na nsihi quideàmà, dandu icúmí naxicocuñ nàcuàqui mii-nsiá nùhù-ndà sàhà-ñá cutnaha-nda cundoo-nda yucán.

⁴ Te lugar yucán, sàcùndàà inì-nsia índù iá, te sàcùndàà stná inì-nsia índù ichì sàà yucán.

⁵ Dandu nì cachi Tomás xì-yá:

—Señor mío, có-ínahá-nsí ichì mà, vàchi có-cùndàà ini-nsià índù cùhùn-ní.

⁶ Dandu nì cachi Jesús xì-né:

—Yùhù nduí ichì mà, te nduú stnàì ñà-ndácuìsì, te nduú stnàì ana (sáha xi) vida ndiaha. Nú màdì sàhà yùhù, còò íin sàà nùu Yuamání.

⁷ Doco nú inahá-nsiá yùhù, dandu inahá stná-nsià mii-yá. Ñàyùcànduá, vichi sàni xini-nsiàyà, te sà-ínahá stná-nsiàyà.

⁸ Dandu nì cachi Felipe xì-yá:

—Señor mío, cuní-nsià cundehè-nsí Yua-nda Dios, dandu ndòò vàha ini-nsià.

⁹ Dandu nì cachi-yà xì-né:

—Sàcuáhà gá tiempu ié` cutnàhí xì-nsiá, te ¿a táñáha ga nacunì-ní yùhù, Felipe? Cunaha-ní, nú sàni xini-nsià yùhù, dandu ñà-sàni xini stná-nsià Yuamání nduá, te còò cá necesidad cachì-ní ñà-cùnì-nsià cundehè-nsiáyà.

¹⁰ Ádi sá-xiníndísá-ní ñà-ñùhú saín vida xi ini Yuamání, te ñuhú stná vida xi-ya ini yùhù. (Pues divi ducán nduá, te sàhámà) nsidaa ñà-nduá cachí xì-nsiá, màdiá inì-ni mií ndacú ínià, vàchi ini anímè iá Yuamání, te divi-ya nduú ana quidà-xì obra ndiaha xí-yá (xiní-nsià).

11 Cunindisá-nsiá ñà-ñùhú vida xi ini mii-yá, te iá stna vida xi-ya ini yùhù. Te nú có-xíníndísâ-nsiá mate sàni cachì xì-nsiá ducán, doco siquiera cunindisá-nsiá ñà-sàni xini-nsiá milagru ndiaha nì quide.

12 Ñà-ndàà nduá cachì xì-nsiá yohó: nú xiníndísâ ndisa iin nèhivì yùhù, dandu vátùni quida stná-nè milagru nahi ñà-nduá quidé. Dècuèndè milagru chicá fuerte vátùni quida stná-nè, vàchi icúmì nùhì ndé iá Yuamánì'.

13 Te nsidaa ñà-nduá nì càyàn tàhvì-nsiá, te ndacùcahan-nsiá quivì, icúmì quideà, dandu chicá más nihì Yuamánì' tñùñuhu xí-yá sàhà yùhù ana nduú Dèhemani-yá.

14 Ndéni iñàha nì cui nì càyàn tàhvì-nsiá, te ndacùcahan-nsiá quivì, quideà.

Nansa nì quida Jesús comprometer techuún-yá Espíritu Ìi xí-yá quixi

15 'Nú cuú ndisa ini-nsiá sàhì, dandu icúmì-nsiá chivàha-nsia ñà-nduá dandacuì nùù-nsiá.

16 Icúmì càyàn tàhvì stnài nùù Yuamánì', dandu techuún-yá inga ana quixi chindee xi-nsiá, te Yà-ìcúmì quixi ma, nicanicuahàn icúmì-yá coo-ya cutnahá-yá xì-nsiá.

17 Divi Espíritu Ìi xí Dios nduú-yá, te cuisì ñà-ndácuisì cachì-yá. Nèhivì dava ga ñuhivì yohó, mà cúí nihì-né Yà-ì mà, vàchi có-tùí-yá nùù-né, te nì có-ínahá stná-nèyà. Doco mii-nsiá, sà-ínahá-nsiâyà, vàchi sà-ìá-yá cutnàhâ-yá xì-nsiá, te después, icúmì-yá yàha-ya ini anima-nsiá coo-ya nicanicuahàn.

18 Yùhù, mà cuáhi ndòo penchì-nsiá, vàchi icúmì naxicocuñ ñà-coi xì-nsiá.

19 'Làcà sacu tiempu, dandu mà cúnì gá nèhivì ñuhivì yùhù. Doco mii-nsiá, jaan. Vátùni cuni-nsiá yùhù. Iin-ni itiácuì, te sàhà ñà-ìtiácuì, ñàyùcànduá iin-ni cutiacu stná mii-nsiá.

20 Na sàà quivì yucán, dandu cundaà vaha inì-nsia ñà-iin-ni nduì xì Yuamánì', te cundaà stná inì-nsia ñà-sà-ìá stná mii-nsiá ini anímè, te yùhù, ini anima mii-nsiá iá stnài.

21 'Ana inahá xí ñà-nduá dandacuì, te quidá-néà cumplir, divi nècuàchì mà nduú ana cuú ndisa inì-xi sàhì. Daaní, nú cuú ini-nè sàhì, icúmì Yuamánì' cuu stná ini-yá sàhà-né, te stná yùhù, cuu stná inì sàhà mii-né, te datúì nansa nduú modo xi nùù-né.

22 Daaní, nì càyàn Judas xì-yá, (doco inga Judas), màdì Judas Iscariote, te dohó nì cachì-nè xì-yá:

—Señor mío, ¿índù chuun cuisì nùù nsiùhù icúmì-nì datúì-nì nansa nduú modo xi-nì? ¿Índù chuun mà quidá-nì ducán xì dava ga nèhivì ñuhivì?

23 Dandu nì cachì Jesús xì-né:

—Nèhivì cuú inì-xi sàhì, tùha-ne chivàha-ne ñà-nduá cachì xì-né. Dandu Yuamánì', icúmì stná-yá cuu ini-yá sàhà-né, te sàà-nsì nùù-né ñà-cundoo-nsi ini anima iin iin-ne.

24 Doco nècuàchì có-cuú inì-xi sàhì, có-chìvaha-ne ñà-nduá cachì. Te ñà-nduá cachì xì-nsiá, màdì inì-nì mií ndacú inì cachì ñà-jaàn. Còó, Yuamánì' nduú ana chítñunì inì-xi ñà-nduá cachì xì-nsiá.

25 'Cunaha-nsiá, nsidaa ñà-jaàn sàni cachì xì-nsiá mientras iá ve xì-nsiá yohó.

26 Doco iá inga ana cuàhàn chindee xi-nsiá, divi nduú Espíritu Ìi icúmì Yuamánì' techuún quixi cuenta xi. Te Yà-ì mà, icúmì-yá chinaha-yá mii-nsiá nsidaa iñàha, te dansínúú ini-yá mii-nsiá nsidaa ñà-nduá sàni cachì xì-nsiá.

27 'Mate cùhìn, doco sàhà yùhù vátùni cundoo-nsia contentu, divi nacua ié` contentu, ducán sáhatahvì stnài mii-nsiá ñà-cundoo stná-nsiá contentu. Mà quidé na quidá nèhivì ñuhivì yohó, díin modo ndoó díi-né. Còó, màsà nácánì ini-nsiá sàhà ni-iñàha, ni màsà yúhì-nsiá.

28 Vichi sàni inini-nsia nì cachì ñà-ìcúmì nùhù xiqué, dandu naxicocuñ. Te nú nì cuú vaha ini-nsiá sàhì nì cui, dandísá cudì gá inì-nsia ñà-nì cachì icúmì nùhì ndé iá Yuamánì', vàchi chicá dandacú mii-yá.

29 Cunaha-nsiá, sàni cachitnùhi xì-nsiá palabra yohó sàhà ñà-nduá cuàhàn cuu después, dandu quivì cuu ndisa nacua sàni cachì xì-nsiá, vátùni cunindisá ví-gá-nsiá.

³⁰ 'Pues vichi, mà cáhàn cuàhà gué` xì-nsiá, vàchi sà-vàxi mii-sí dandacu-xi nùù nèhivì ñuhiví yohó, te còò ni-iñàha nduú-si xi yùhù.

³¹ Doco ñà-nduá cuàhìn quide, cuàhìn quideà sàhà ñà-cundaà ini nèhivì ñuhiví ñà-cùú ndisa ini sàhà Yuamání', te cuní quidandise ñà-nduá nì dandacú-yá nùí. Ñàyùcànduá, ndacuìta-nsia cùhùn-ndà.

15

Ejemplu sàhà nducuyòhò sì-uva

¹ 'Ñà-ndaà nduá, ducán ié` xì nèhivì-xí na ian nducuyòhò ndèè nduú. (Te mii-né, nahi rama-nu nduú-né.) Te Yuamaní', nahi nècuàchì ndiaá xì-nú nduú-yá.

² Vàchi nsidaa ndahà nducuyòhò, nu có-càná quisì vídià, tàhndèà. Te nú cuàha-sì nùù ndahà-nú, dandu táhndè ndodò iin ian ndundoa sàhà-ñá chicá más quisì vídi cana. Ducán nduú modo quidá stná Yuamání' xì nsidaa nèhivì nihnú vaha ini xí'.

³ Ñàyùcànduá, stná mii-nsiá, sàni ndundoo stná anima-nsià ñà-sàni càhìn xì-nsiá palabra ndiaha.

⁴ Te vichi, iin-ni ni cúníhnú vaha ini-nsià yùhù, dandu icúmí coo stná vida-xi ini anima-nsià, vàchi ducán iá' na iin ndahà nducuyòhò, nú có-ítúú gá` ìcà nducuyòhò ndèè mà, dandu mà cuàha ga quisì vídi. Te ducán iá stná xì mii-nsiá, nú có-níhnú vaha ga inì-nsia yùhù, dandu mà cúí quida ga-nsià ni-iin ñà-vàha.

⁵ 'Ñàyùcànduá, yùhù nduú nahi nducuyòhò ndèè mà, te mii-nsiá nduú-nsiá nahi rama-nu. Nú iin-ni nihnú vaha ini-nsià yùhù, te iá stná vida xi ini anima-nsià, dandu vátùni quida stná-nsià cuàhà gá ñà-vàha. Doco nú màsà chíndéi mii-nsiá, mà cúí quida-nsia ni-iñàha.

⁶ Doco iin nèhivì, nú có-cùnì-nè cunihnu ini-nè yùhù, dandu ducán cuu xi-né na iin ndahà yutnú sàni tàhndè, vàchi dítà-nèà iladu ñà-ìchà, te nú sàni ìchà, dandu danátácá-nèà quèa ñuhu coca.

⁷ 'Doco nú ndisa, nihnú vaha ini-nsià yùhù, te iin-ni nsinúú ini-nsià ñà-nduá cachí xì-nsiá, dandísá, vátùni càcàn tàhvi-nsiá nùù Dios ndéni iñàha nì cui, te nihì-nsiáñà.

⁸ Te nú cuàhà gá ñà-vàha nihì-nsiá quida-nsia, dandu chicá más tñùñuhu xí Yuamání' quee, te sàà stná-nsià cunduu ndisa-nsia nèhivì nchícùn viì xí'.

⁹ 'Cunaha-nsiá, divi nacua cuú ini Yuamání' sàhí, divi ducán cuú stná inì sàhà mii-nsiá. Ñàyùcànduá, iin-ni ni cùndóó mánì-nsiá nùí.

¹⁰ Cunaha-nsiá, nú ni chívàha-nsia ñà-nduá dandacuí, dandísá, iin-ni cundoo manì-nsiá nùí. Vàchi yùhù, chívàha stnáì ñà-nduá cachí Yuamání', ñàyùcànduá mánì gué` nùù-yá.

¹¹ 'Nsidaa ñà-jaàn sàni cachì xì-nsiá sàhà-ñá ni cùdí stná ini-nsià nacua cudí ini yùhù, vàchi cuní cundoo-nsia contentu nicanicuahàn.

¹² 'Ñà-yòhó nduá dandacuí nùù-nsiá, ñà-nì cùú stnahá ini-nsià sàhà-nsiá, nacua quidá yùhù xì mii-nsiá, ducán cuní quida stná-nsià.

¹³ 'Nú ni cúí iin nèhivì sàhà iin ana iá vaha xi-né, dandu cundaà ini-ndà, yáha ga cuú ndisa ini-nè sàhà nècuàchìmà.

¹⁴ 'Pues cunaha-nsiá, nècuàchì xíndoo vaha-xí nduú stná-nsià nú ni quidá ndisa-nsia ñà-nduá dandacuí.

¹⁵ 'Vichi mà cáchí gué` xì-nsiá ñà-nduú-nsiá ana xinúcuáchí uun nùí; còó, amigo-xi cachí xì-nsiá, vàchi iin ana xinúcuáchí uun nùù lamú-xi, có-cùndáà ini-nè nansa nacání ini lamú mà quida-ne. Doco yùhù, claru sàni cachì xì-nsiá nsidaa ñà-nduá nì cachì Yuamání' xí', ñàyùcànduá, náhà xicà, amigo-xi sànduú-nsiá.

¹⁶ 'Cunaha-nsiá, màdì mii-nsiá nì nácàxin-nsia yùhù. Còó, yùhù nì nacàxin mii-nsiá, te nì chitnùnì inì ñà-cùhùn-nsià, quida-nsia cuàhà ñà-vàha. Te obra quida-nsiamà, mà

ndútâ. Dandu nsidaa ñà-nduá ni cácan tàhvi-nsiá nù Yuamáni', te ndácùcahan-nsiá quívi, seguru ñhì-nsiáña.

17 'Ñà-yòhó nduá dandacuí nù-nsiá, ñà-nì cùú stnahá ini-nsiá sàhà-nsiá.

Nansa ni cachitnùhu Jesús ñà-mà cuíñùhú dava nèhivì ñuhivì ndohó tè-nduú nèhivì xí-yá, vâchi ni cóni xiñùhù stná-nè mii-yá

18 'Na xiní-nsiá xiní ùhì nèhivì ñuhivì mii-nsiá, dandu xiñuhu nsinuu ini-nsiá ñà-dihna yùhù nì xini ùhì stná-nè.

19 Doco nú iin-ni ni cúníhnú stná ini-nsiá na nihnú ini mii-né, dandísá cuu ini-nè sàhà-nsiá nì cùí. Doco yùhù, sàni nacâxin mii-nsiá nù nsidaa-né, te ñâyùcànduá xiní ùhì-nènsiá, vâchi có-níhnú gá ini-nsiá nahi mii-né.

20 Doco xiñuhu nsinuu inì-nsiá nansa ni cachì xì-nsiá daa, ñà-màsà cútúxí ini iin peón ñà-chicá ndiaá-te nù lamú xi-tè. Vâchi nú sàni quida quini nèhivì xì yùhù, dandu stná mii-nsiá icúmí-nè quida quini xi-né. Te nú ni chívàha-ne ñà-nduá nì cachì yùhù nì cùí, dandísá chivàha stná-nè ñà-nduá cachì mii-nsiá.

21 Cunaha-nsiá, ducán icúmí nèhivì cuni ùhì-nè mii-nsiá sàhà-ñá nduú-nsiá nèhivì xí, te sàhà stná ñà-có-ínáhá-nè mii-yá ana nì techuun-xí vâxi.

22 'Nú màsà quésái ñuhivì yohó càhìn xì-né, dandu mà cúnídá cuàchi-ne nì cùí. Doco vichi có-nàníhì gá ini-nè nansa cachì-nè sàhà cuàchi nì quida-ne.

23 Nú có-xiñùhù nèhivì yùhù, dandu náhà claru ñà-có-xiñùhù stná-nè Yuamáni' nduú stná.

24 Cuàhà milagru sàni quide nì xini-nè. Mate ndoó gá nèhivì nì quida ga stná milagru, doco có-ndùdávamá xì ñà-nduá sàni quida yùhù. Te nú màsà quidé milagru mà, dandu mà cúnídá cuàchi stná-nè nì cùí. Doco vichi sàni xini-nè yùhù xì stná Yuamáni', te ñâyùcànduá xiní ùhì-nè yùhù xì stná mii-yá.

25 Doco ducán nì quida-ne sàhà-ñá nì cuú ndisa ñà-nduá cachì nù tutu ì xí-né ndé cachá: "Nì xini ùhì-nè yùhù, mate còò ni-íñàha dísàhà-xí nduá".

26 'Cunaha-nsiá, nú sàni nasai nù Yuamáni', dandu icúmí techuín mii-yá ana nduú Espíritu ì ñà-quixi-ya chindee-yá mii-nsiá. Te mii-yá, puru ñà-ndácuisì nihnú ini-yà. Nù Yuamáni' icúmí-yâ quee-ya quixi-ya ñà-datnúú ini-yà mii-nsiá sàhì.

27 Dandu icúmí stná-nsiá càhàn-nsiá xì nèhivì sàhì, vâchi ndé quívi primeru xicánúú-nsiá xí.

16

1 'Cuàhà gá sàni càhìn xì-nsiá sàhà-ñá màsà nâxícócuñin ini-nsiá.

2 Vâchi nèhivì dava ga, icúmí-nè taxi-né mii-nsiá nù veheñùhu xi-ne. Te vâxi stná iin tiempu na cutuxi ini-nè ñà-cùdî gá ini Dios nú ni cahní-né mii-nsiá.

3 Doco sàhà-ñá có-ínáhá-nè Yuamáni', te ni có-ínáhá stná-nè yùhù, ñâyùcànduá icúmí-nè quida-ne ducán.

4 Doco vichi sàni cachitnùhi xì-nsiá sàhà nsidaájàn, te sàhàmà quívi cuu xì-nsiá ducán, vâtùni nsinuu ini-nsiá ñà-divi ducán nì cachì xì-nsiá.

Chuun ndiaha icúmí Espíritu ì xí Dios quida-ya

'Cóni càchítñùhi xì-nsiá palabra yohó antes, vâchi yohó ié' cutnáhì xì-nsiá.

5 Doco vichi icúmí nùhì nù mii-yá ana nì techuun-xí vâxi. Te ni-iin-nsiá có-ndâcàtnùhù-nsiá nùí índù cùhìn.

6 Doco ñà-nì cachì xì-nsiá ñà-nduá nì cachì, ñâyùcànduá yáha ga ndoó-nsiá tnùnsí ini vichi.

7 Doco cunaha-nsiá, ñà-ndáà nduá, chicá ndiaha icúmí quea nù-nsiá nú sàcuàhìn, vâchi nú màsà cùhìn, dandu mà quíxí mii-yá ana icúmí chindee xì-nsiá. Doco nú sàcuàhìn, dandu icúmí techuín mii-yá quixi-ya.

⁸ Te nú sàni quesaa-yà, dandu dacúndáa ini-yà nèhivì ñuhiví sàhà cuàchi-ne, xì sàhà stná ichì váha, xì sàhà stná nansa icúmí ndundaà sàhà-né.

⁹ Claru icúmí-yâ dacúndáa ini-yà nècuàchìmà ñà-ia ndisa cuàchi-ne ñà-có-xiníndísâ-né yùhù.

¹⁰ Te icúmí-yâ cachi stná-yà xì-né nansa iá ichì váha, vâchi yùhù, mànuhí' nùu Yuamání' (iá ansivi), te mà cúní gà-né yùhù.

¹¹ Daaní, icúmí-yâ cachi stná-yà xì-né nansa icúmí ndundaà sàhà-né, vâchi cunaha-nsiá, sàni cachi Dios sàhà ñà-malu dandacú ñuhiví yohó ñà-icúmí-sí cunsida-sì cuàchi-sì nicanicuahàn.

¹² Cuàhà gá iñàha cumáni gá cachì xì-nsiá, doco vichi mà cúí, vâchi tàñáha ga cui mànihi inì-nsia.

¹³ Doco después icúmí quesaa Espíritu Ìì, te mii-yá, puru ñà-ndácuisì nihnú ini-yà. Te icúmí-yâ chindee stná-yà mii-nsiá sàhà-ñã vâtùni cundaà ini-nsiá nsidaa ñà-ndùu ndisa palabra ndácuisì. Vâchi màdì inì-ni mii-yá ndacu ini-yà ñà-ndùá cuàhàn-yà cachi-yà. Còó, cuisì cachi-yà ñà-ndùá iníni-yá cachí (Yuamání'). Te icúmí-yâ cachitnùhu stná-yà xì-nsiá nansa icúmí coo quivì vâxi xi-nda.

¹⁴ Te tavà gá stná-yà más tnùñuhu xí; vâchi nùu yùhù icúmí-yâ ñihì-yá ñà-ndiaha ì xí, te datnùu-yà sàxinítnùnì-nsiá.

¹⁵ Cunaha-nsiá, nsidaa ñà-ndùá icúmí Yuamání', divi stoho stná nduí. Ñàyùcàndùá cachí xì-nsiá ñà-icúmí Espíritu Ìì mà ñihì-yá nsidaa ñà-ndùu ñà-ndiaha ì xí, dandu datnùu stná-yà sàxinítnùnì mii-nsiá.

Icúmí nèhivì xí Jesús cuhuun ini-nè iin tiempu tii, doco yàchì icúmí-nê ndudìi ini-nè inga tu na natiacu-yà, nì cachi-yà

¹⁶ 'Lacà sacu tiempu, dandu mà cúní gà-nsiá yùhù. Vâchi mànuhí' nùu Yuamání'. Doco sacù-ni quivì cundumà, te cuni tu-nsia yùhù —nì cachi-yà.

¹⁷ Ñàyùcàndùá, nì ndàcàtnùhù tnahá dava nècuàchì dacuahá-yá-mà nùu-né, cachí-nè: —Ndíà ndùá cuní cachi-yà ñà-sacu gà tiempu, te mà cúní gà-ndàyá, te inga sacu quivì, dandu sà-cuni tu-ndayá, nì cachi-yà; te cachí stná-yà mànuhù-yá nùu Yuamání-yá.

¹⁸ Pues ¿ndíà ndùá cuní cachi palabra nì cachi-yà mà ñà-sacu gà tiempu coo ga-yà yohó? Có-cùndáa ini-ndà nansa cuní cachi ñà-jaàn —nì cachi-nè.

¹⁹ Daaní, Jesús, ñà-sà-ìnahá-yâ cuní-nè ndàcàtnùhù-né nùu-yá sàhámà, ñàyùcàndùá nì cachi-yà xì-né:

—¿A cuní-nsiá ndàcàtnùhù-nsiá nùu sàhà ñà-ndùá nì cachì xì-nsiá ñà-lacà iyuhu tiempu, te mà cúní gà-nsiá yùhù, te inga sacu quivì, dandu sa-cuni tu-nsia yùhù?

²⁰ Ñà-yohó cachítnùhi xì-nsiá: icúmí-nsiâ cuacu-nsia, te cundoo-nsia tnùnsí ini (iin tiempu tii), doco nèhivì dava ga ndoó ñuhiví, còó. Icúmí-nê cudìi ini-nè. Doco mii-nsiá, mate ducán nì cùndóó-nsiá tnùnsí ini, doco después icúmí cuxio nsidaámà nùu-nsiá, te ndudìi tú ini-nsiá.

²¹ Iin nècuàchì ñahà, nú sàni sàà hora tùinuù mèè xi-ne ñuhiví, dandu yáha ga cuhúún ini-nè, vâchi sàni sàà quivì ndoho-ne quidamà. Doco nú sàni tùinuù-vé, dandu nándodó-né sàhà dolor, vâchi cudú gá ini-nè ñà-sàni quesaa inga luchì tii.

²² Te ducán icúmí coo stná xì mii-nsiá. Mate cuàhà gá cuhúún inì-nsia vichi, doco yùhù icúmí cuni tui mii-nsiá después, dandu cuàhà gá ndudìi tú ini-nsiá. Te nì-iin nèhivì, mà cúí cadì-nè nùu ñà-jaàn.

Nansa icúmí Jesús cundee-yá

²³ 'Quivì yucán, mà ndàcàtnùhù gá-nsiá ni-ñàha nùu, vâchi cuisì icúmí-nsiâ ndacùcahan-nsiá quivì na xicàn tàhvi-nsiá nùu Yuamání', dandu ñihì-nsiá nsidaa ñà-ndùá xicàn-nsiá. Palabra ndácuisì nduájàn.

²⁴ Tãñáha ga ndacùcahan-nsiá quívì na xícàn tàhvì-nsiá iñàha. Doco vichi ni cácan tàhvì-nsiá ducán, te nihì-nsiáña, dandu chicá cudì ini-nsiá.

²⁵ Ndè vichi cuisì puru ejemplu-ni nduá nì nacani xì-nsiá. Doco vaxi iin quívì, dandu mà nácánì guè` ejemplu xì-nsiá, vachi claru icúmì cachì xì-nsiá sàhà Yuamánì'.

²⁶ Daanì, tiempu yucán màdì yùhù càcàn guè nùù-yá sàhà-nsiá, cachì. Còó, cuisì quívì yùhù icúmì-nsiá ndacùcahan-nsiá (na cácan tàhvì-nsiá).

²⁷ Vachi cuú ini-yá sàhà-nsiá sàhà-ñá cuú stná ini-nsiá sàhì, te xiníndísá stná-nsiá ñà-nùù mii-yá nì quixì.

²⁸ Vachi (ñà-ndáà nduá), nùù mii-yá nì quixì nì quesà ñuhìví yohó; te vichi icúmì nacoì ñuhìví yohó, te nùhì nùù-yá.

²⁹ Dandu nì cachi nècuàchì dacuahá-yá xì-yá:

—Vichi ndisa, claru cáhàn-ní. Màdì ejemplu uun nduá cachì-nì vichi.

³⁰ Vitni sàni sàà-nsì nì cundaà ini-nsì ñà-ínáhá-nì nsidanicuú iñàha. Te mate tãñáha ga ndacàtnùhù-nsì nùù-ní sàhà iñàha, (doco vátùni cachì-ní xì-nsì). Nàyùcàndùá vichi xiníndísá vaha-nsi, ñà-ndáà nduá, nùù Yua-nda Dios nì quixì-ní.

³¹ Dandu nì cachi Jesús xì-né:

—¿A ndísá xiníndísá vaha-nsia vichi?

³² Cunaha-nsiá, vaxi iin tiempu, dandu cuitià nihni-nsia vehe-nsia, te làcà mindaì nacoò-nsia. Te vichi sàni sàà stná tiempu mà. Doco màdì ndisa ndòò mií; còó, vachi cutnàhà stnáì xì Yuamánì'.

³³ Nsidaa ñà-jaàn sàni cachì xì-nsiá sàhà-ñá nì cúndóó-nsiá contentu ñà-nìhnú vaha ini-nsiá yùhù. Te mate quídá quínì nèhivì xì-nsiá na ndoó î-nsiá ñuhìví yohó, doco màsà cùhúún ini-nsiá sàhàjàn, vachi yùhù, sàni cundeì nùù nèhivì malu ñuhìví yohó.

17

Nansa nì xicàn tàhvì Jesús sàhà nèhivì xì-yá

¹ Na ní nsihi nì cachi Jesús nsidaàjàn, dandu nì ndacoto ndiaá-yá ansivi, te nì cachi-yá xì Yuamánì-yá:

—Cáhìn xì-ní Yuamánì'. Vichi ndisa, sàni sàà hora. Te yùhù ana nduú Dèhemanì-ní, xíquèn ñà-nì tàvá-ní tnùñuhu xì nùù nèhivì ñuhìví, dandu vátùni quee stná tnùñuhu xì mii-ní quide.

² Vachi sàni chitnùnì inì-ní ñà-ndahà yùhù cundoo nsidanicuú nèhivì. Dandu nèhivì nì chitnùnì inì-ní cunduu nèhivì xì, nihì-né vida ndiaha nicanicuahàn nùì.

³ Te ¿índù modo nihì-né vida ndiaha ma? Cuisì sàhà ñà-cunaha-né mii-ní xì stná yùhù Jesucristu, vachi mii-ní, ñà-ndácuì mindaa Dios nduu-ní, te yùhù nduì ana nì techuun-ní vaxi ñuhìví.

⁴ Vichi sàni dàxínui chuun nì dandàcù-ní nùì quide, te sàhà ñà-jaàn sàni quee cuàhà tnùñuhu xì-ní.

⁵ Nàyùcàndùá, vichi xíquèn nùù mii-ní Yuamánì' ñà-coi cutnahì xì-ní, te ducán quee màs gà tnùñuhu xì; xíquèn ñà-coi nùù-ní xì tnùñuhu xì nacua nìsa ìe antes na táyô ñuhìví.

⁶ Mii-ní, nì nacàxin-ní dava nèhivì ñuhìví yohó, te nì chitnùnì inì-ní ñà-cunduu-ne nèhivì xì. Te yùhù, sàni dàtúi nùù-né nansa iá-ní. Nèhivì xì mii-ní nì sanduu-ne, dandu nì chitnùnì inì-ní ñà-cunduu-ne nèhivì xì yùhù. Te vichi sàni chivàha-ne palabra xì-ní.

⁷ Te sàni cundaà stná ini-nè sàhà nsidaa iñàha nì sàhatahvì-ní yùhù, sà-ínáhá-nè ñà-nùù mii-ní nì ñhì-ñà.

⁸ Te palabra ndiaha nì cachì-ní xì, sàni cachi stná-ñà xì-né, te mii-né, cudì inì-nè xì palabra mà, te cundáà vaha ini-nè ñà-nùù mii-ní nì quei vaxi, vachi xiníndísá-né ñà-divì mii-ní nì techuun-xì nì quesà ñuhìví.

⁹ Vichi xicàn tàhvì nùù-ní sàhà-né, màdì sàhà dava ga nèhivì ñuhìví, còó, cuisì sàhà nèhivì nì chitnùnì inì-ní cunduu nèhivì xì; vachi nèhivì xì mii-ní xínduu stná-nè.

10 Nsidaa nèhivì-xí, nèhivì xí mii-ní nduú stná-nè. Te nèhivì xí mii-ní, nèhivì xí yùhù nduú stná-nè, te sàhà mii-né sàni quee más gà tnùñuhu xí.

11 'Pues vichi, mà cóo gué ñuhiví yohó. Icúmî nasai nùu mii-ní ana nduu Yua Ì Ndiahí. Doco nèhivì nì sàhatahvì-ní yùhù, yohó icúmî-nè candòo-ne. Ñàyùcàndùá, sàhà poder xi-ní cundiaà-ní nsidaa-né sàhà-ñá iin-ni cunduu nsidaa-né nahi mii-ní xì yùhù, iin-ni xínduu-nda.

12 Na iá ve xì-né ñuhiví yohó, nì sandiaì-nè xì poder xi-ní. Te nsidaa ana nì dàyáha-ní nùí, iin-ni ndiaá vahi-nè, cóni ndáñúhú ni-iin-ne, cuisì imindaa tè-de por sí icúmî ndañuhu, vachi ducán icúmí coo sàhà-ñá ni cuú ndisa ñà-ndùá cachí nùu tutu ì sàhà-té.

13 'Te vichi sàmànasai nùu-ní. Doco ñà-yòhó nduá cachí na iá ve ñuhiví yohó sàhà-ñá nì cúndóo nèhivì-xí contentu nacua iá stná yùhù contentu.

14 Sàni cachitnùhi xì-né palabra xi-ní. Doco nèhivì dava ga, xiní ùhì-ñané sàhà ñà-có-nìhnú gá ini-nè nahi nècuàchìmà. Te ducán stná yùhù, có-nìhnú stná inì nahi nèhivì ñuhiví.

15 Te có-xíquèn ñà-tavà-nínè ñuhiví yohó. Cuisì xíquèn-ñà cundiaà-nínè ñà-màsà dáca ñà-malu-nè.

16 Yuhu, có-nìhnú inì nahi nèhivì ñuhiví yohó, ñàyùcàndùá, stná nèhivì-xí, có-nìhnú gà stná ini-nè nahi nècuàchì dava ga mà.

17 'Daaní, xicàn tàhvì stnáì ñà-nì chínáhà-nínè ñà-ndùú palabra ndàcuisì, te ducán sàà-nè cunduu-ne nèhivì nihnú ì inì-xi. Te palabra sàni cachì-ní, divi ñà-jaàn nduú ñà-ndàcuisì.

18 Nacua nì techuun-ní yùhù nì quesai ñuhiví yohó, ducán quidá stnáì, techuín mii-né ñà-cùhùn-nè (càhàn-nè xì) nèhivì ñuhiví.

19 Te sàhà ñà-vàha xi mii-né ié' dispuestu quide nsidaa chuun ì (iá gà quide), dandu vátùni sàà stná-nè cunihnu ì ini-nè nú sàni chivàha-ne ñà-ndùú palabra ndàcuisì.

20 'Doco màdì cuisì sàhà nèhivì yohó xicàn tàhvì. Còó, vachi icúmí mii-né càhàn stná-nè xì nèhivì dava ga, dandu cunindisá stná nècuàchìmà yùhù. Ñàyùcàndùá, sàhà nècuàchì yucán xicàn tàhvì stnáì.

21 'Daaní, xicàn tàhvì ñà-nahi iin-ni nèhivì nì cúndúú nsidaa nècuàchìmà, te iin-ni nì cúndúú stná anima mii-né xì anima ndohó, nahi mii-ní xì yùhù, iin-ni xínduu-nda: iá-ní ini anímè, te yùhù, iá stnáì ini anima mii-ní. Ñàyùcàndùá xicàn tàhvì ñà-iin-ni anima nì cúcúmí nsidaa-né, dandu vátùni cunindisá nèhivì ñuhiví ñà-divi mii-ní nì techuun-xí nì quesai ñuhiví.

22 Te nacua nì chitnùnì inì-ní ñà-coo tnùñuhu xí yùhù, ducán sàni nihítàhvì stná mii-né cucumi-né tnùñuhu ma, dandu iin-ni cahnú cunduu nsidaa-né, nahi iin-ni xínduu stná ndohó.

23 Mii-ní, iá-ní ini anímè, te yùhù, ini anima mii-né coi; dandu iin-ni cahnú cunduu ndisa nsidaa-né xì ndohó. Te ducán icúmí nèhivì dava ga ñuhiví cundaà stná ini-nè ñà-divi mii-ní nì techuun-xí vaxi, te cundaà stná ini-nè ñà-cùú stná inì-ní sàhà nèhivì-xí nacua cuú inì-ní sàhà yùhù.

24 'Mii-ní nduu-ní Yuamánì', te nì chitnùnì inì-ní cundoo ana cunduu nèhivì xí. Ñàyùcàndùá, yùhù cunì sàà stná nsidaa nècuàchìmà cundoo-ne ndé cuàhìn coi sàhà-ñá iin-ni cutnahá-né xì, te cundehè-né nansa iá tnùñuhu ndiaha nì sàhatahvì-ní yùhù, vachi ndè antes na táyôo ñuhiví, iin-ni cuú inì-ní sàhí.

25 Mii-ní, ndàcuisì nihnú inì-ní. Doco nèhivì ñuhiví, tàcùnì-nè mii-ní. Doco yùhù, ndisa, ináhì mii-ní. Te nèhivì cutnahá xì yohó, sàni cundaà stná ini-nè ñà-divi mii-ní nì techuun-xí.

26 Te yùhù, sàni dàtúì nùu-né nansa iá-ní nacua cuàhìn quide quivì nùu-xí. Ducán dandu nihì-né cuu stnahá stná ini-nè sàhà-né nacua cuú ini mii-ní sàhà yùhù. Te ducán nihì stná yùhù coi ini anima nsidaa-né —nì cachi Jesús.

18

Nansa nì tnii-tè Jesús

¹ Nì nsihi nì cachi-yà ducán, dandu nì quee-ya cuàhàn-yà nì yàha-ya inga ladu yui Cedrón, cutnâhâ-yá xì nècuàchì dacuahá-yá. Te nì yàha-ya xì-né mahì iin huertu iá yucán.

² Doco tiâa cuàhàn cahin xì-yá, divi Judas, ináhá stná-nè índù iá huertu mà, vâchi cuàhà xichi sâhàn-yà xì nècuàchì dacuahá-yá yucán.

³ Ñâyùcàndüá, nì saca nècuàchìmà itnii soldadu, te nì nihì stná-nè itnii policia nùu dùtù xícusahnú xì nùu stná tè-xínduu fariseu, te cuàhàn-nè xì nsidaa tèmà ndé nduú huertu mà. Te nsidaa-té, iníndáhâ-tè lámpara xì nù-ñùhú xixìn, xì stná cãa dana nduú arma xì-tè.

⁴ Daaní, Jesús, como ináhâ-yâ nsidaa ñà-ndüá cuàhàn cuu xì-yá, nì quee-ya nì sâchìcùn-yà tèmà, te nì cachi-yà xì-té:

—¿Ana divi nandúcú-nsiâ?

⁵ Te nì cachì-te xì-yá:

—Divi Jesús de Nazaret.

Dandu nì cachi-yà xì-té:

—Yùhù nduí.

Te yucán iin stná Judas, cutnâhâ-né xì nsidaa tèmà. Te divi Judas mà nduú ana nì dicò xì-yá.

⁶ Daaní, na ní nsihi nì cachi-yà: “Yùhù nduí”, dandu yâchì nì naxiconihí duma candüà-te.

⁷ Dandu inga xichi nì cachi-yà xì-té:

—¿Ana divi nandúcú-nsiâ?

Te nì cacachì-te:

—Divi Jesús de Nazaret.

⁸ Dandu nì cachi-yà:

—Sànì cachì xì-nsiâ, yùhù nduí. Ñâyùcàndüá, nú yùhù nchìcùn-nsiâ, nacoo-nsia nèhivì xí yohó nì núhù-nè.

⁹ Ducán nì cachi-yà xì-té sâhâ-ñã ni cuú ndisa ñà-ndüá nì cachi-yà ñà-còò ni-iin nèhivì xì-yá nì ndánúhú, ni-iin nèhivì nì chitnùnì ini Dios cunduu nèhivì xì-yá, cónì ndáñúhú-nè.

¹⁰ Daaní, nì tavà Simón Pedro espada xì-ne, te nì cani-ne iin mozo xì dùtù cusáhnú, nì sahnde ì-né tùtnù nècuàchìmà ladu cuahá-nè. Te Malco nani mozo mà.

¹¹ Doco nì cachì Jesús xì Pedro:

—Nachinacaà-ní espada xì-ní, vâchi yùhù, icúmì yâhi ñà-ndüá nì chitnùnì ini Yuamánì cuu xí.

Nansa ndacá-te Jesús nì sàà nùu dùtù cusáhnú

¹² Dandu capitán yucán, xì soldadu xì-tè, xì stná policia yucán, nì catnii-tèyá nì chicuhni-teyá.

¹³ Te nì saca-tèyá cuàhàn-te xì-yá nùu nècuàchì nani Anás, vâchi dido dùtù cusáhnú cuàa yucán nduú-né. Te Caifás nani dùtù cusahnu-ma.

¹⁴ Te divi-ne nduú ana nì càhàn xì nècuàchì raza-nè Judea daa na ní cachi-nè ñà-xiñùhù cui iin tiâa sâhà nsidaa nèhivì ñuu-nèmà.

Nansa nì nacuaà Pedro Jesús

¹⁵ Daaní, chicá cahâ-xí ndé cuàhàn Jesús vâxi stná Simón Pedro xì inga stná nècuàchì dacuahá-yá. Te compañeru-nèmà, ináhâ-nè dùtù cusáhnú. Ñâyùcàndüá, na ní dàyâha soldadu-yà ini patiu vehe dùtù mà, dandu nì quìhvi stná inga-nèmà.

¹⁶ Doco Pedro, nì ndòo-ne nùu yehè patiu-ni ma. Ñâyùcàndüá, vâxi tu compañeru-nè ináhâ xí dùtù mà, te nì càhàn-nè xì ñahâ chì ndiaá yehè mà áma dáyâha stná-ña Pedro.

¹⁷ Dandu nì cachì-ña xì Pedro:

—¿Amádi mii stná-ní nduu-ní iin nècuàchì nchìcùn xì Jesús?

Te nì cachi-nè:

—Còó.

¹⁸ Daaní, divi yucán itá stná mozo (xi dùtù mà) xì stná policía. Te nì xicùn-té iin ñuhu tnùù ñà-nadaa-té, vâchi cúvixin ga. Te yucán nì tnàtuu stná Pedro, iín-né nadaa stná-nè.

Nansa nì ndàcàtnùhù dùtù cusáhnû nùù Jesús sàhà ñà-nduá quidá-yá

¹⁹ Daaní, dùtù cusáhnû, nì ndàcàtnùhù-né nùù-yá sàhà nèhivì dacuahá-yá xì sàhà stná palabra chináhá-yànè.

²⁰ Ñàyùcànduá, nì cachi-yà xì-né:

—Yùhù, vate ní càhìn xì nsidaa nèhivì ini veheñùhu cuachi, te ini stná veheñùhu cahnú ndé siempre natácá nèhivì raza-ndà Judea. Divi yucán nduú lugar ndé siempre nìsa dacuahí nèhivì. Còò ni-ìñàha nì chináhá dèhí.

²¹ Chicá vâha màsà ndàcàtnùhù-ní nùù mii; nùù nèhivì nì inini xi ñà-nduá nì cachì chicá vâha, vâchi mii-né ináhá-nè ñà-nduá nì cachì.

²² Daaní, yatni ndé iín Jesús iín stná iin policía, te na ní cachi Jesús ducán, dandu nì canì-tè nùù-yá, cachì-te:

—¿Índù chuun cáhàn-ní xì dùtù ì ducán?

²³ Dandu nì cachi Jesús xì-té:

—Nú cónì cáhàn vií tuxi-ní, dandu cachì-ní xì índù palabra cónì càchì vií. Doco nú còò ni-ìñàha nì cáhàn quini, dandu có-icúmí-nì canì-ní yùhù.

Nansa nì nacuaà Pedro Jesús ùi gà xichi

²⁴ Dandu nì dàyáha Anás mà-yá cuàhàn-yà ndahà dùtù cusáhnû nani Caifás. Te nuhní tnuu-ya cuàhàn-yà.

²⁵ Doco Simón Pedro, iín stná-nè nadaa-né. Dandu nèhivì itá yucán, nì ndàcàtnùhù-né nùù nècuàchìmà, cachì-nè:

—¿Amádi mii stná-ní nduu-ní nèhivì xí Jesús?

Dandu nì nacuaà nècuàchìmà mii-yá, cachì-nè:

—Còó, màdì yùhù.

²⁶ Daaní, nì càhàn inga mozo xi dùtù yucán, divi tnaha tiàa nì tàhndè tùtnù-xí; te nì cachì-te xi Pedro:

—¿Amádi mii-ní nì xinì iá xì Jesús huertu yucán?

²⁷ Doco inga tu nì cachi-nè:

—Còó.

Daaní, divi momentu mà nì xito lehe.

Nansa nì dàyáha-tè Jesús nùù Pilatu

²⁸ Daaní, nì saca-tèyá nì caquee-tè xì-yá nùù Caifás, cuàhàn-te xi-yá ndè vehe gobernador, te yucán nì dàyáha-tèyá ini vehe. Iín vâa gá nduá. Doco tè-xínduu raza Judea mà, cónì cá-quíhvi-tè vehe yucán, vâchi nú nì quíhvi-tè, dandu mà cóó ndoo ga-nè (nacua cachì ley xi-ne), te mà cóó gá permisú cuxi-tè ñà-nduá xixí-te na nduá vicò pascua mà.

²⁹ Dandu Pilatu, nì quee-tè fuera vâxi-tè ndé itá ana nì casaà mà, te nì cachì-te:

—¿Ndíà nduá nì quida tiàa yohó, te sanícuàchi-nsia sàhà-né?

³⁰ Dandu nì cacachì-te xi Pilatu:

—Nú nì cundúú-né iin nècuàchì cónì quidá cuàchi ni cuí, dandísá, mà cundácá-nsínè quixi nùù-ní.

³¹ Dandu nì cachi Pilatu:

—Cundaca-nsianè cuahán, te mii-nsiá nsidandaà-nsià sàhà-né nacua cachì ley xi mii-nsiá.

Doco nì cacachi tè-raza Judea mà:

—Ley (xi mii-nsiá), có-sâha ñà-cahni-nsí iin ana iá falta xi.

³² Ducán nì cacachì-te sàhà-ñá nì cuú ndisa ñà-nduá nì cachitnùhu Jesús na ní cachi-yà nansa icúmí-yâ cui-yà.

³³ Daaní, nì nansìhvi Pilatu vehe-tè, te nì cana-tè Jesús, nì cachì-te xi-yá:

—Mii-ní, ¿a ndísá rey xi nècuàchì raza Judea nduu-ní cahan-ní?

³⁴ Dandu nì cachi Jesús xì-té:

—¿A mii-ní nì nacani inì-ní ndàcàtnùhù-ní nuí ducán, te ò inga nèhivì nì cachi xì-ní ducán?

³⁵ Dandu nì cachi Pilatu xì-yá:

—Yùhù, có-nduì iin tè-raza-ní Judea. Divi nècuàchì ñuu-ní xì dùtù xícusahnú nduú ana nì dáyáha xi-ní ndahí. ¿Índù cuàchi nì quida-ní?

³⁶ Dandu nì cachi Jesús xì-té:

—Cunaha-ní, ñuu ndé cusáhnúí, có-nduá ñuhiví yohó, vàchi nú ñuhiví yohó ni cúnduá, dandísá icúmí nèhivì-xí cuidahan-né yùhù nùù ana xiní ùhì xí sàhà-ñá màsà yáhi ndahà nècuàchì raza Judea ni cuí. Doco ñuu ndé cusáhnúí, tucu iá, mà ndúdává xí ñuhiví yohó.

³⁷ Ñàyùcànduá, nì cachi tu Pilatu xì-yá:

—¿Àsù nduú stná-ní iin rey cusáhnú?

Dandu nì cachi Jesús xì-té:

—Nacua cachí-ní, divi ducán nduá, divi rey nduí. Te divi sàhà-ñá cachitnùhi xì nèhivì ñà-nduú palabra ndàcuisì, ñàyùcànduá nì quesai ñuhiví yohó. Te vichi nsidaa ana cudí ini xì palabra ndàcuisì mà, divi nduú stná ana cudí ini xì ñà-nduá cachí.

³⁸ Dandu nì cachi Pilatu xì-yá:

—¿Índù ñà-ndisa nduú palabra ndàcuisì?

Nansa nì dándàà Pilatu ñà-cui Jesús

Daaní, nì nsihi nì cachi Pilatu ducán, dandu nì quee-tè inga xichi nì càhàn-te xi tè-xínduu raza Judea, cachí-te xi tèmà:

—Sàni càhìn xì nècuàchì yohó, te còò ni-iin falta ndàcùhin-nè.

³⁹ Doco estilu xi-nsia nduá ñà-dàñà iin tè-ndiàdí cada nacává vicò pascua yohó. Ñàyùcànduá, vichi ¿a cuní-nsià dàñà nècuàchì yohó cachí nduú rey xi tè-raza-nsià Judea?

⁴⁰ Daaní, tucu tu nì càna fuerte nsidaa-témà, cachí-te:

—Còó, màdì nècuàchì jaàn cuní-nsi dàñà. Barrabás chicá vaha ni dáñà —nì cacachì-te. Doco cunaha-nsiá, iin tècuìhnà nduú Barrabás mà.

19

¹ Daaní, nì dándàcú Pilatu nùù soldadu, te nì tavà-téyâ iladú, nì sahnì cuí-teyá xì iin chirrión.

² Dandu nì quidavàha-tè iin sicàté iñù, te nì chinacaà-teá dìnì-yá. Te nì chindixi stná-teyá iin capa moradu.

³ Dandu nì catnàtuu-tè nùù-yá, (nì sàcùndiaà-teyá), cachí-te:

—¡Tùinuùváha-ní, señor! ¡Vichi ndisa, sàni sàcùnduu-ní rey xi tè-raza Judea!

Dandu nì cacani-tè nùù-yá.

⁴ Daaní, tucutu nì quee Pilatu nùù nèhivì ndiatú yucán, cachí-te xi-né:

—Cunaha-nsiá, cuàhìn taví Jesús cundehè-nsiá, te cundaà inì-nsia ñà-còò ni-iin falta xi-ne nì ndàcùhin.

⁵ Ñàyùcànduá, nì quee Jesús (vehe ma), ñuhú dínì-yá sicàté iñù mà, te ndixí stná-yá capa moradu mà. Dandu nì cachi Pilatu xì nsidaa nèhivì ndoó yucán:

—Cundehè-nsiánè, yohó iín-né.

⁶ Daaní, dùtù xícusahnú, xì stná policía, na ní xini-nèyà, dandu nì càna ndee-né, cachí-nè:

—¡Nchìca cruz ni cuí nècuàchì jaàn! ¡Cahnì-nínè!

Dandu nì cachi Pilatu xì nsidaa-né:

—Mii-nsiá cundaca-nsianè cùhùn, te cahni-nsiánè, doco yùhù, còó, vàchi còò cuàchi-ne ni ndàcùhin.

⁷ Dandu nì cacachi nècuàchì raza Judea mà:

—Nsiùhù, icúmí-nsî iin ley, te según cachí ley mà icúmí nècuàchì jaàn cui-nè sàhà ñà-nì cachi-nè nduú-né Dèhemanì Dios.

⁸ Dandu Pilatu, na ní inini-tè ñà-nì cacachi nècuàchì mà ducán, chicá nì yùhí-te,

⁹ te nì nansìhvi-tè ini vehe cahnú-te nì càhàn tu-tè xì-yá, cachí-te:

—¿Índù ndisa nì quixi mii-ní?

Doco Jesús, cónì càhàn gà-yà.

¹⁰ Dandu cachí tu Pilatu xì-yá:

—¿Índù chuun có-càhàn-ní xì? ¿A có-ínáhá-ní ñà-yùhù icúmí poder: vátùni cahní mii-ní, te ò vátùni dacácuì mii-ní?

¹¹ Dandu nì cachi-yà xì-té:

—Ni còò ni-iyuhu poder cucumi-ní nú màsà chítnùnì ini mii-yá iá ansivi ducán. Sàhámà tiàa nì dándàcú quixi nù-ní, chicá nsidá cuàchi-tè (nù mii-ní) —nì cachi-yà.

¹² Daaní, dècuèndè hora yucán nì nanducu Pilatu nansa dañá-téyâ, doco chicá fuerte nì càna nsidaa tè-raza Judea mà, cachí-te:

—Nú ni dañá-ní Jesús jaàn, dandu náhà claru có-ndù-ní amigo ndisa xi rey cahnú César. Vàchi nsidaa ana cachí nduú stná rey, xiní ùhì stná-nè rey cahnú César.

¹³ Daaní, na ní inini Pilatu ñà-jaàn, dandu nì tavà tú-teyá inga xichi, te nì sàcòò-tè silla ndé siempre iá-te nsidándáa-te chuun. Te silla mà, iín-nu dìquì yùù chipála itánduhù ñuhù, te Gabata nani lugar mà dàhàn hebreu.

¹⁴ Te sàni cahin quivì yucán, divi quivì nduú vigilia vicò pascua mà, dandu nì càhàn-te xì nsidaa nèhivì yucán, cachí-te:

—Cundehè-nsiá, yohó iín nècuàchì nduú rey xi-nsia.

¹⁵ Doco ndee ní càna nsidaa nèhivì mà:

—¡CÒÓ! ¡Ni cui-nè cuní-nsì! ¡Cahnì-nínè! ¡Ni mácùtuu-ne nchìca cruz!

Dandu cachí Pilatu xì nsidaa-né:

—¿A ndísá cuní-nsià cui rey xi-nsia nchìca cruz?

Te nì cacachi dùtù xícusahnuma:

—Cuisì imindaa rey xi-nsi iá, divi nduú César.

¹⁶ Ñàyùcàndùá, nì candisá Pilatu ñà-ndùá xicàn nècuàchì mà; nì dándàcú-te ni cui Jesús nchìca cruz. Dandu nì saca soldadu-yà cuàhàn-te xì-yá.

Nansa nì sàcùtuu Jesús nchìca cruz

¹⁷ Daaní, nì sàcùnsida-ya cruz xi-ya cuàhàn-yà, te nì sàà-yà nù iin xaan nani lunsì Calvariù. Te Gólgota nani stná lugar yucán nù dàhàn hebreu.

¹⁸ Te yucán nì cachituu-tèyá nchìca cruz, mii-yá xì inga ùi stná tiàa, iin iin-tè iin iin ladu-yà, te mii-yá mahì-xì.

¹⁹ Daaní, nì dándàcú stná Pilatu ñà-nì mácùtuu dìni cruz xi-ya iin ñà-càchì: “Jesús de Nazaret, rey xi tè-raza Judea”.

²⁰ Dandu nì cahvi cuàhà nècuàchì ñuu mà nansa cachá, vàchi lugar ndé nì chituu-tèyá nchìca cruz, yatni uun ñuu mà nduá. Te ùnì dàhàn nì tìaa palabra mà: dàhàn hebreu, xì dàhàn griegu, xì dàhàn latín.

²¹ Dandu dùtù xícusahnu-ma, nì càhàn-nè xì Pilatu, cachí-nè:

—Màsà cáchì palabra mà “Rey xi tè-raza Judea”. Còò, chicá vàha tìaa-ní ñà-nì cachi uun-ne nduú-né rey xi nèhivì raza-nsì.

²² Dandu nì cachi Pilatu xì nècuàchì yucán:

—Còò. Ñà-ndùá sàni tìaa, ducanicoá

²³ Daaní, nì nsìhì nì chituu soldadu-yà nchìca cruz, dandu nì dàcuàchì-te sìcoto xi-ya nù nsìcúmì-té. Chii chiá nì nihì iin iin-tè. Doco cuaán nduú dùhnù quihín-yà, vàchi iin-nì cahnú nì cuàhà; còò ni-iin xaan xi-ña ndé nì nsìcu.

²⁴ Ñàyùcàndùá, nì cacachi soldadu mà:

—Màsà dácuaquí-ndáñâ. Chicá vâha cuidàdiquí-ndà suerte sâhâ-ñâ cundaà ini-ndà ana nihì xân.

Pues ducán nì cuu sâhâ-ñâ nì cuú ndisa ñâ-nduá nì cachitnùhu nùu tutu ì ndé cachí palabra yohó: “Nì cadasàn-té sìcoto xi entre mii-té, te nì idàdiquí-te suerte, a ver índù-té nihì xì ñâ-nduá ndìxí”. Ñâyùcànduá, ducán nì caquida soldadu mà.

²⁵ Daaní, sâhâ cruz xi-ya iín stná dihi-yá xì cùhì-nè nani stná María, divi ñahàdihí Cleofas; te yucán iín stná María Magdalena.

²⁶ Te nì xini-yà dihi-yá, te nì xini stná-yà yucán iín stná iin nècuàchì dacuahá-yá cuú cuáhâ ini-yà sâhâ-xí. Ñâyùcànduá, nì cachi-yà xì dihi-yá:

—Cundehè-ní mamá, jaàn iín dèhe-ní.

²⁷ Dandu nì cachi-yà xì nècuàchì dàcuahàmà:

—Cundehè-ní, jaàn iín mamá xi-ní.

Te divi hora yucán nì nàcùndiaa nècuàchìmà dihi-yá.

Nansa nì xihì Jesús

²⁸ Daaní, ináhâ-yâ ñâ-sàni cuu ndisa nsidaa ñâ-nduá nì cachi tutu ì, ñâyùcànduá, nì cachi-yà:

—Xihì tècuíí.

²⁹ Te yatni uun yucán iín iin quèdi chitu vinu nì xìò. Ñâyùcànduá, nì quihin soldadu iin ñâ-ñâhmâ nani esponja, nì chihi-tèà dìnì iin vara nù-hisopo. Dandu nì chindaxin-tèà vinu mà, te nì dàcùhùn-teá nùu yuhù-yá

³⁰ nì sihvi-yá chiá. Dandu nì cachi-yà:

—Vichi ndisa sâ-ìá.

Te nì nàcùndee dìnì-yá, te nì xihì-yà.

Nansa nì dàquìhvi iin soldadu lanza xi-tè diin tìxì Jesús

³¹ Dandu nècuàchì raza Judea, cónì cùnì-nè ndòo nsidaa nsii ma nchìca cruz, vâchi vigilia xi quivì descansu nduá. Te divi quivì descansu mà nì nacava stná iin vicò cahnú xí-né. Ñâyùcànduá, nì ca-xicàn-nè favor nùu Pilatu ñâ-nì cátnáhnù iquì naní sâhâ iin iin ana itándiaa nchìca cruz (sâhâ ñâ-nì cùí yàchì-nè), dandu cuxio-ne nùu cruz.

³² Ñâyùcànduá, nì casaà tu soldadu (ndé itá cruz), te nì casahnù-te iquìsâhâ iin tiàa itúú nchìca cruz iin ladu Jesús, dandu después ingà-te.

³³ Doco na ní tnàtuu-tè ndé itúú mii-yá, nì cundaà inì-te sàni xihì-yà; ñâyùcànduá, cónì sâhnù gà-te iquìsâhâ-yá.

³⁴ Doco iin soldadu mà, nì dàquìhvi-tè lanza xi-tè diin tìxì-yá, te nì dàñâ nì-yá xì tècuíí.

³⁵ Yùhù nì xini nsidaájàn, teayùcànduá nacánì xì-nsiá sâhâ. Te ñâ-ndácuìsì nduá cachí. Yùhù ináhí, te cachitnùhu ndaì xì-nsiá sâhâ-ñâ nì cúníndísâ stná-nsiá.

³⁶ Cunaha-nsiá, nsidaa ñâ-jaàn nì cuu xi-yá sâhâ-ñâ nì cuú ndisa nacua nì cachitnùhu nùu tutu ì ndé cachá: “Ni-iin iquì-yá mà-tnáhnù”.

³⁷ Daaní, cachí stná inga xaan nùu tutu mà, ndé cachá: “Icúmí nèhivì cuni-nè mii-yá ana nì dàquìhvi-tè (càa) ìcà-xí”.

Nansa nì ndùxin Jesús ini iin cueva

³⁸ Daaní, nì nsiamà, dandu nì sâhàn iin tiàa nani José nùu Pilatu. Iin nècuàchì ñuu Arimatea nduú nècuàchìmà, te nduú stná-nè iin nèhivì xí Jesús, doco chídèhé-nè, vâchi yúhì-nè tè-dava ga raza-nè Judea. Pues divi mii-né nì sâhàn nì xicàn permisù nùu Pilatu nanihi-ne iquìcùñú-yà. Te juùn nì cachi Pilatu. Ñâyùcànduá, nì sâhàn-nè nì nanihi-ne iquìcùñú-yà.

³⁹ Daaní, nì sâà stná Nicodemo yucán, divi nècuàchì nì sâhàn ñuuú visita ndé iá-yà. Te vichi nihí-né ñâ-tnami nani mirra nì sâà, te dácà stnahá stná mà xì inga ñâ-tnami nani áloe. Nsidaájàn cùvèa nahi òcò ùxìn kilo.

⁴⁰ Ñàyùcàndüá, José xì Nicodemo mà, nì nanihi-ne iquìcúñú-yà nùù cruz, te nì chidúcún-nèyà sìcoto finu cuxín, te nì dàquéé stná-nè ñà-tnami ma, vàchi ducán nduú estilu xi nèhivì raza Judea na sácùndùxin-ne.

⁴¹ Cunaha-nsiá, yatni ndé nì sa-ituu Jesús nchìca cruz, yucán itá stná itnii yutnù tàtá. Te mahì yutnù mà iá stná iin cueva làcà ní sate, doco tàñáha ga cundùxin ni-iin nsii-ña.

⁴² Te sàhà-ñá sà-ítúú quìvì descansu xi nècuàchì ñuu mà, ñàyùcàndüá, ini cueva yucán-ní nì chindùxin-neyà, vàchi yatni nduá.

20

Nansa nì natiacu Jesús

¹ Daaní, quìvì primeru semana, (divi quìvì domingu) vaxi María Magdalena cueva ndé índùxin Jesús. Naha nduá, te iin tnuu va nduá. Dandu nì xini-nè, sàni cuxio cavà cahnú ndiadí yuhù cueva.

² Ñàyùcàndüá, nì dàyáà-nè cuàhàn-nè ndé iá Simón Pedro xì inga nècuàchì dacuahá-yá, divi nècuàchì màni guá nùù-yá, te nì cachi-nè xì nècuàchìmà:

—Sàni tavà-té Stoho-ndà Señor ndé nì sácùndùxin-ya. Te có-cùndáà ini-nsi índù cuàhàn-te xi-yá.

³ Ñàyùcàndüá, nì quee Pedro xì compañeru-nè, cuàhàn stná-nè cueva yucán.

⁴ Te cutnáhâ-né nì dàyáà-nè cuàhàn-nè, doco chicá ndee ní dàyáà compañeru Pedro mà, teayùcàndüá, dihna nècuàchìmà nì sàà-nè nùù cueva.

⁵ Te nì nacàhnu ndee-ne nì xito nihni-ne ini cueva, te nì xini-nè ndé sìcoto xi-ya itánduhù, doco cóni quìhvi-ne inì-xi.

⁶ Daani, nchícùn Simón Pedro nì sàà stná-nè, doco mii-né ndisa, nì quìhvi-ne inì-xi, te nì xini stná-nè itánduhù sìcoto xi-ya,

⁷ xì stná pañuelu nìsa idàhvi nùù-yá, doco có-ìndúhá xì sìcoto dava ga; iladú indúhá, te sàni natnahnù viá.

⁸ Dandu nì quìhvi stná compañeru Pedro nì sàà primeru, te nì xini stná-nè nansa iámà, te nì xinindisá-né.

⁹ Doco ni mii-né ni stná Pedro, tàñáha ga cundaà ini-nè nansa cachí nùù tutu ì ndé cachí icúmí-yâ natiacu-yà.

¹⁰ Daaní, ndùì-nè mànuhù-né vehe-ne.

Nansa nì ndecunu Jesús nùù María Magdalena

¹¹ Doco yucán ndé iá cueva mà (nì sàà) stná María. Te vichi iin-né fuera sacú-né. Te nì nacàhnu ndee-ne, nì xito nihni stná-nè ini cueva.

¹² Te yucán nì xini-nè ndoó ùì ángel xi Dios lugar ndé nìsa induhù Jesús, iin-ne ndé nì sanduu dìni-yá, te inga-nè ndé nì sanduu sàhà-yá.

¹³ Te nì cachi ángel mà xì María:

—Señorita, ¿índù chuun sacu-ní?

Dandu cachí-nè xì nècuàchìmà:

—Vàchi sànihí-te Stoho-nsi Señor cuàhàn, te có-cùndáà inì índù cuàhàn-te xi-yá.

¹⁴ Dandu nì ndecoto María ladu yàtà-né, te nì xini-nè yucán iin mii-yá, doco cóni nácúni-nèyà nduú-yá Jesús.

¹⁵ Te nì cachi-yà xì-né:

—Señorita, ¿índù chuun sacu-ní? ¿Ana divi nandúcú-ní?

Doco María, nì tuxi ini-nè ádi té-ndiáá yutnù tàtá iá yucán nduú ana cáhàn; ñàyùcàndüá nì cachi-nè:

—Señor, nú mii-ní nì tavà-niyá, dandu cachi sacú-ní xì índù nì sànihi-niyá, te cùhin naquihin-yà.

¹⁶ Dandu nì cachi-yà xì-né:

—¡María!

Dandu nì naxicocuîin-nè ladu yàtà-né, te nì cachi-nè dàhàn mii-né:

—¡Raboni! —ñà-nduá cuní cachà Maestro.

17 Dandu nì cachi-yà xì-né:

—Màsà dúcùn ndahà-ní yùhù, vàchi tàñáha ga nani nùu Yuamání. Còó. Cuahán-ní, cachitnùhu-ní xì nèhivì xí, vàchi nahi ñani xínduu-ne. Te cachi-ní xì-né ñà-ìcúmí nani nùhì nùu Yuamání. Te cunaha-nsiá, Yuamání mii-nsiá nduú stná-yà. Te ana càhvì yùhù nduú-yà, nacua nduú stná-yà ana càhvì mii-nsiá —nì cachi Jesús.

18 Ñàyùcànduá, nì sàhàn María Magdalena mà nì cachitnùhu-ne xì dava ga nècuàchì dacuahá-yá, nì nacani-ne nansa nì xini-nè Stoho-ndà Señor, te dohó te dohó nì cachi-yà xì-né.

Nansa nì ndecunu Jesús nùu nècuàchì dacuahá-yá

19 Daaní, na ní cuñaà quivì domingu mà nì nataca nsidaa nècuàchì dacuahá-yá. Te nì nacadi vaha-ne yehè, vàchi yúhî-nè nèhivì dava ga raza-nè Judea. Dandu (na iin cachí) nì sàcuîin Jesús dava mahì-né, te nì cachi-yà xì-né:

—Contentu ni cúndóó-nsiá.

20 Na ní nsihi nì cachi-yà ducán, dandu nì dàcùnì-yànè ndahà-yá xì diìn tìxì-yá. Ñàyùcànduá, cuahà gá nì cudìi ini-nè ñà-sànì xini-nè divi Stoho-ndà Señor nduú-yá.

21 Dandu inga xichi nì cachi-yà xì-né:

—Contentu ni cúndóó-nsiá. Nacua nì techuún Yuamání yùhù nì quesai, ducán techúûn stnài mii-nsiá cùhùn-nsiá.

22 Daaní, nì sivi tàchì-yá nùu nsidaa-né, te nì cachi-yà:

—¡Ni nándèe Espíritu Ìì ini anima-nsiá, cachí!

23 Nú nì cuícáhnû inì-nsia sàhà cuàchi nèhivì, dandu ñà-sànì ndutu ndisa-ña cundua; te nú màsà cuícáhnû inì-nsia sàhà-né, dandu iá ìì cuàchi-ne —nì cachi-yà.

Nansa nì sàà Tomás nì xinindisá-né ñà-nì natiacu Jesús

24 Doco nùu ùxìn ùì nècuàchì dacuahá-yá, iin-ne cóni ía-ne xì compañeru-nè na ní ndecunu Jesús nùu-né. Divi Tomás nduú nècuàchìimà, te Cuatí cachí stná nèhivì xì-né.

25 Ñàyùcànduá, nì cachi compañeru-nè xì-né:

—Cunaha-ní, ¡sànì xini-nsì Stoho-ndà Señor!

Doco mii-né, nì cachi-nè:

—Dècuèndè cundehí yantà ndahà-yá ndé nì ìhi clavu, te daquívhi dìnìndàhí ndé nì xida mà, te daquívhi stnài ndahí ndé (nì nacuehè) diìn tìxì-yá, te nú coó, mà cúníndísê —nì cachi-nè.

26 Daaní, na ní xinu inga ùnà quivì, nì nataca tu nècuàchì dacuahá-yá ini vehe. Doco daa ndisa iá stná Tomás xì nècuàchì ndòò-mà. Te ndiadí vaha tu yehè. Te nì sàà Jesús inga xichi nì sàcuîin-yà mahì-né, te nì cachi-yà:

—Contentu ni cúndóó-nsiá.

27 Dandu nì cachi-yà xì Tomás:

—Yohó daquívhi-ní dìnìndàhá-ní, te cundehè-ní ndahí; dandu daquívhi-ní ndahà-ní diìn tìxí. Te cunindisá vaha-ní. Màsà cáchì gá-ní có-xiníndísá-ní.

28 Dandu nì cachi Tomás xì-yá:

—Stohì Señor nduu-ní, vàchi Dios nduu-ní.

29 Dandu nì cachi-yà xì-né:

—Tomás, sàhà-ña nì xininùu-ní yùhù, ñàyùcànduá nì xinindisa-ní. Vihi gá ndiaha cundua nú ni cúníndísâ-nsiá mate tàñáha ga cuninùu-nsiá yùhù —nì cachi-yà.

Ñà-nduá disáhà-xí nì tiaa Juan tutu yohó

30 Cunaha-nsiá, cuahà gá stná milagru nì quida Jesús nì indehè nècuàchì dacuahá-yá, doco cóni tiáá nsiha nùu tutu yohó.

³¹ Doco ñà-nduá cachí nùu tutu yohó, nì tiaa-ña sàhà-ñá nì sáa-nsiá cunindisá-nsiá divi Cristu Dèhemanì Dios nduú Jesús. Vàchi nú sàni xinindisá-nsiá ñà-jaàn, te ndácùcahan-nsiá quìvì-yá, dandu vida ndiaha sàni nìhì stná-nsiá.

21

Nansa nì ndecunu Jesús nùu ùsà nècuàchì dacuahá-yá

¹ Daaní, nì nsihajàn, dandu nì ndecunu tu Jesús nùu nècuàchì dacuahá-yá na ndoó-né iin xaan yuhù mar nani mar Tiberias. Cuàhìn nacani xì-nsiá nansa nì cuu na ní ndecunu-ya nùu-né yucán.

² Cunaha-nsiá, cutnáhâ Simón Pedro xì Tomás nècuàchì nani Cuatí, te cutnáhâ stná Natanael nècuàchì dìñùu-xi nani Caná iá ladu Galilea. Te ndoó stná (ù) dèhe Zebedeo, xì stná inga ù nècuàchì dacuahá-yá.

³ Te nì cachi Simón Pedro xì nsidaa-né:

—Cuàhìn taví siaca.

Dandu nì cachi compañeru-nè:

—Ni cùhùn nsidaa-nda.

Ñàyùcànduá, nì sàcùñuhu nsidaa-né ini iin lancha cuàhàn-nè; doco ni-iin siaca cóni níhì-né niù yacà.

⁴ Daaní, na sàcuàhàn nì tùinuù, yucán nì sàa stná Jesús, iin-yá yuhù mar (yatni ndé ndoó-né) mà. Doco cóni nácúnì-nèyà.

⁵ Ñàyùcànduá, nì cachi-yà xì-né:

—Hijos, ¿a sàni nìhì-nsiá ñà-caxì-ndà?

—Còó, còò ni-iin-sì —nì cachi nècuàchì mà.

⁶ Dandu nì cachi-yà xì-né:

—Ladu cuahá lancha, jaàn dacaná-nsiá ñunù xì-nsiá, dandu nìhì-nsiási —nì cachi-yà.

Dandu ducán nì quida-ne, te ni mà cùì gá tavà-né ñunù xì-né ñà-chitu guá` cuàhà siaca nì nìhì-né.

⁷ Dandu iin nècuàchì dacuahá-yá, divi nècuàchì màni guá nùu-yá, nì cachi-nè xì Pedro:

—¡Divi Stoho-ndà Señor nduú Yà-yòhó!

Nì nsihi nì inini Simón Pedro ñà-divi Stoho-ndà Señor nduú-yá, dandu nì nàcùndixi-ne sacú-nè, vàchi cuisì sìcoto inì-xi ndixì-né. Dandu ní ndàvà-nè mahì tècuíì cuàhàn-nè.

⁸ Te después cuàhàn stná dava ga nècuàchì dacuahá-ma, doco ini lancha cuàhàn-nè, vàchi yatni iin-nu nùu ñuhù íchì, nahi 100 metro. Te cahà-nú itácaá ñunù chitu siaca.

⁹ Dandu nì nuu nècuàchì yucán ñuhù íchì, te nì xini-nè yucán ndoó tnùu sàxìxìn, te sà-itádoó stná siaca chòhò. Te iá stná pan.

¹⁰ Dandu nì cachi Jesús xì-né:

—Cuahán-nsiá quihin-nsia itnii siaca nì tavà-nsiá.

¹¹ Ñàyùcànduá, nì nana tu Simón Pedro lancha, te nì dítá-nè ñunù mà nì naxìnua ndè nùu ñuhù íchì. Chitu dini ñunù mà siaca, vàchi ñuhù 153 siaca nahnú. Mate cuàhà gá-si ñuhù, doco cóni sàchì ñunù mà.

¹² Dandu nì cachi Jesús xì nsidaa-né:

—Naha-nsiá, cadì inì-nsia.

Te ni-iin nècuàchì dacuahá-ma, cóni sàha ndee ini-nè ndàcàtnùhù-né nùu-yá ana nduú-yá, vàchi ináhà-nè divi Stoho-ndà Señor nduú-yá.

¹³ Dandu nì tnàtuu Jesús nì tnii-ya pan, te nì dasàn-yáñà nùu-né. Te nì dasàn stná-yá siaca (nì chòhò mà) nùu-né.

¹⁴ Ñà-jaàn nì sanduu ùnì xichi nì ndecunu Jesús nùu nècuàchì dacuahá-yá na sàni natiacu-yà.

¹⁵ Daaní, na ní nsihi nì sadi ini nsidaa-né, dandu nì cachi-yà xì Simón Pedro:

—Simón, dèhe Jonás, ¿a ñá-ndàà chicá cuú ndisa inì-ní sàhì nùu nècuàchì dava ga yohó?

—Jaan, Señor mío. Sà-ináhà-ní cuú inì sàhà-ní —nì cachi-nè.

Dandu cachí tu-ya xì-né:

—Nú ndisa, dandu cundiaà-ní nèhivì xí na ian ndiaá pastor lelù xí-né.

¹⁶ Daaní, ñà-ùì nì cachi-yà xì-né:

—Simón, dèhe Jonás, ¿a cuú ndisa inì-ní sàhí?

Te nì cachi tu-ne xì-yá:

—Jaan, Señor mío. Sà-ínáhá-nì cuú inì sàhà-ní.

Dandu cachí Jesús xì-né:

—Dacúndéhe-ní (nèhivì-xí ichì váha), na ian ndiaá-ndà riì.

¹⁷ Daaní, ñà-ùì nì cachi tu-ya xì-né:

—Simón, dèhe Jonás, ¿a ñá-ndâà nduá, cuú ndisa inì-ní sàhí?

Pues vichi nì cuhuun ini-nè ñà-sà-ùì xichi ndácàtnùhù-yá a ndísá cuú ini-nè sàhà-yá, á coó. Ñàyùcàndùá nì cachi-nè xì-yá:

—Señor mío, nsidanicuú iñàha ináhá-ní. Ñàyùcàndùá, ináhá stná-ní, yùhù cuú ndisa inì sàhà-ní.

Dandu nì cachi-yà xì-né:

—Pues nú ducán, dandu cundiaà-ní nèhivì xí, na ian ndiaá-ndà riì xì-ndà.

¹⁸ Cunaha-ní, ñà-ndâà nduá cuàhìn cachitnùhi xì-ní yohó: na cuachi-ní, (nìsà nàcùndixi-ní sìcoto xi-ní), nì sansidatnuu-ní cinturón xi-ní, te cuàhàn-ní ndéni nì cui cudî inì-ní. Doco nú sàni sahnu-ní, dandu icúmí-ní ndanihi-ní ndahà-ní, te inga-nè icúmí-nè nsidatnuu-ne cinturón xi-ní, te cunihi-ne mii-ní cùhùn ndé có-cùdî inì-ní cùhùn-ní.

¹⁹ Ñà-jaàn nduá nì cachi Jesús cachitnùhu-ya nansa quida nèhivì xì Pedro na quívi cui-nè, te ducán chicá quee tnùñuhu xí Dios.

Nansa icúmí cuu xi Juan

Daaní, nì nsihi nì cachi-yà ñà-jaàn, dandu nì cachi tu-ya xì Pedro:

—Cunchicùn-ní yùhù.

²⁰ Daaní, nì nacuico Pedro yàtà-né, te nì xini-nè nchícùn stná nècuàchì dacuahá cuú guá ini-yà sàhà-xí. Te divi nècuàchìmà nduú nècuàchì nì ìa yatni diìn Jesús na ní sandoo-ne nì xixi-ne xì-yá daa, te nì xicàn tnùhù-né nùù-yá nì cachi-nè: “Señor mío, ¿ana divi nduú tiàa icúmí cahìn xì-ní?”

²¹ Pues, divi nècuàchìmà nì xini Pedro nchícùn vaxi, te nì cachi-nè xì-yá:

—Te nècuàchì jaàn tú, ¿nansa icúmí cuu xi-né, Señor mío?

²² Dandu nì cachi-yà xì-né:

—Pues nú cudî inì cutiacu-nè ndè cachi sàà quívì naxicocuîñ, doco mii-ní, màsà nácánì inì-ní sahájàn. (Chuun xi-ní nduá) ñà-cunchicùn-ní yùhù —nì cachi-yà.

²³ Ñàyùcàndùá, nì xitià cuentu nùù nèhivì xí-yá, ñà-mà nunca cui nècuàchì dacuahama, cachí cuentu. Doco cóni càchí-yà mà cúí-nè. Còó, cuisì ní cachi-yà nú cuní-yà cutiacu-nè ndè cachi sàà quívì naxicocuîñ-yà, màsà nácánì íní Pedro sàhámà.

²⁴ Cunaha-ní, divi nècuàchìmà nduú yùhù, te divi yùhù nì tiaa nsidaa palabra yohó. Te ñà-ndácuisì nduá cachí, vachi ináhî cachí ndài xì-nsiá.

²⁵ Cunaha-nsiá, cuàhà gá stná iñàha íá nì quida Jesús (ñuhiví yohó). Doco nú cuní-ndà tiaa nsihi-nda nsidaámà, dandu cuàhà sàstnùhù libru cundua. Te mà cuàhà-ñá ni inicitu ñuhiví, cachí yùhù. Sà-íá.

Chuun Nsiha Nì Caquida Nècuàchì Nì Nìhì Chuun Ì nùù Jesús

Nansa nì quida Jesús comprometer icúmí quixi Espíritu Ì xí Dios

¹⁻² Cásàhùì xì mii-ní señor Teófilo. Cunaha-ní, tutu nì tiai primeru, nacáníámà sàhà ñà-nduá nì quida Jesús xì ñà-nduá nì chinaha-yà ndè quivì nì quesaha-yá xì ndé` quivì nì nana-ya mànuhù-yá ansivi. Doco na táñâha ga nùhù-yà, dandu nì càhàn-yà xì apóstol ana nì sàhatahvì-yá chuun xi-ya; sàhà poder xi Espíritu Ì xí Dios nì càhàn-yà xì-né nì dàndàcù-yá nùù-né nansa quida-ne.

³ Vàchi antes, na ní nsihì nì ndoho-ya, te nì xihì-yà, dandu vivu nì ndecunu-ya, te nì xini-nèyà ñà-sàni natiacu-yà, ùì dico quivì nì ndòo ga-yà ñuhivì, te cuàhà xichi nì ndecunu-ya nùù-né, te cuàhà gá stná ñà-nduá nì quida-ya sàhà-ñá cundaà ndisa ini-nè divi nduú-yá. Te nì càhàn stná-yà xì-né sàhà chuun xi ñuhivì Ì xí Dios.

⁴ Daaní, na iá va-ya xì-né, nì cachi-yà xì-né ñà-màsà quée yáchi-nè ñuu Jerusalén: —Còo —cachì-yà— yohó cundiatu-nsia dècuèndè nìhìtáhvì-nsiá cuu xi-nsiá nacua sàni quida Yuamánì comprometer, divi ñà-nduá nì cachi stnáì xì-nsiá antes.

⁵ Vàchi ñà-ndáà nduá, tècuì nìsa quida Ì Juan nèhivì. Doco mii-nsiá, tìxi Espíritu Ì xí Dios icúmí anima-nsià nduhìá tìxi sacu quivì —nì cachi-yà.

Nansa mànana Jesús mànuhù-yá gloria

⁶ Daaní, nì nataca tu nsidaa nècuàchì dacuahá-yà-mà nùù-yá, te nì xicàn tnùhù-né, cachì-nè:

—Stoho-nsì Señor, ¿a vichi nacání inì-ní quee libre ñuu-ndà Israel quida-ní?

⁷ Dandu nì cachi-yà xì-né:

—Cò-sàhatahvì Dios mii-nsiá ñà-cunaha-nsiá índù iin quivì, ò índù iin tiempu cuu iñàha. Còo, vachi cuisì Yuamánì iá ansivi chítnùnì inì-xi sàhà nsidaájàn.

⁸ Doco mii-nsiá, icúmí-nsiá nìhìtáhvì-nsiá quivì quixi fuerte Espíritu Ì ini anima-nsiá, dandu inicutu icúmí-nsiá càhàn-nsiá sàhì. Primeru ñuu Jerusalén yohó càhàn-nsiá, te ducán stná inii ladu Judea, xì stná ndè ladu Samaria xì dècuèndè stná inicutu ñuhivì

⁹ —nì cachi-yà.

Daaní, indéhe-né nì ndanchito-ya mànana cuisì-yá ansivi, te nì dàhvi-ya nùù-né mahì iin vico mànuhù-yá.

¹⁰ Te na indéhe váha-ne ansivi ndé mànana-ya, dandu yucán ndé itá-né nì sàcuìta stná ùì ana ndixín cuxín.

¹¹ Te nì cachi nècuàchì mà xì nècuàchì xí-indehè mà:

—Mii-nsiá nècuàchì ñuu Galilea, có-nduá cundehè gá-nsiá ansivi, vachi divi Jesús nì xini-nsiá mànuhù yucán, icúmí-yâ naxicocuín-yà. Vachi nacua iá-yà mànana-ya mànuhù-yá, divi ducán icúmí-yâ naxicocuín-yà nuu-ya.

Nansa nì quee Matías nombradu cundehè-né chuun xi Judas

¹²⁻¹³ Dandu nsidaa nècuàchì apóstol mà, nì nuu-ne yucù Olivo yucán, mànuhù-né ñuu Jerusalén, vachi yatni iá ñuu mà nùù yucù yucán, nahi dava hora caca-nda. Te na ní nasaa-nè, nì yàha-ne ndè iin vehe idótnahá, nì canana-ne dìquì-xí ndé ndoó-né. Te nèhivì ndoó yucán, dohó nani-né: Pedro, xì Jacobo, xì Juan, stná Andrés, xì Felipe, xì Tomás, xì Bartolomé, xì Mateo, xì stná dèhe Alfeo nani stná Jacobo, xì stná Simón Zelote, xì ñani Jacobo mà nani Judas.

¹⁴ Nsidaa nècuàchì mà, iin-nì nihnú ini-nè, te iin-nì xicàn tàhvì-né nùù Dios, mii-né xì stná ñani Jesús, xì dihi-yá María, xì más gá stná nècuàchì ñahà.

15-16 Daaní, quivì yucán nì nataca nsidaa nèhivì nchícùn ichì-yá. Na iin cientu òcò xínduu-ne. Te nì ndacuiin Pedro mahì nsidaa-né, cachí-nè:

—Ñáni, sàhana nì chindee Espíritu ìi xí Dios xii-ndà David, te nì tiaa-ne nì cachitnùhu-ne sàhà Judas, divi tiàa nì sacatnahá xi nècuàchì nì tniì xi Jesús. Te ducán nì cuu, vàchi ñà-ndùá nì cachi Dios sàhana ma, fuerza nì cuu ndisa-ña.

17 Vàchi Judas mà, nìsa cutnahá-né xii-ndà, iin-ni chuun nìsa quida-nda xi-né antes.

18 Doco nì quida-ne iin cuàchi, nì tniì-ne dìhùn, te sàhà dìhùn mà nì xiin-ne iin ñuhù. Dandu nì nacava candéé-né yucán, nì cahnsi ìi-né nì quecoyo ìi sisi-nè.

19 Te nsidaa nèhivì ñuu Jerusalén yohó, nì xinitnùhu stná-nè sàhàmà. Ñàyùcàndùá nì sàcùnani ñuhù mà Acéldama, te cuní cachí quivì mà: “Tin ñuhù ndé nì xitià nì”.

20 Vàchi ducán nì cachitnùhu libru ndé itándiaa alabanza ìi ndé cachá: “Ni ndóo nihni vehe-ne. Màsà cúndóo gá nèhivì yucán”. Te cachí stná tutu mà: “Ni ndóo chuun xi-ne nù inga nèhivì”.

21-22 Ñàyùcàndùá, xiñuhu nanducu-nda inga tiàa chindee tnaha-xi-nda cachitnùhu-nda xi nèhivì ñà-sàni natiacu Stoho-ndà Jesús. Doco icúmí-né cunduu-ne iin ana sàni cutnahá xi-nda inii tiempu nìsa xicanuu-ya mahì-ndà dècuèndè tiempu nìsa quida ìi Juan xii ndè quivì nì nana-ya ansivi cuàhàn-yà —nì cachi Pedro.

23 Ñàyùcàndùá, nì catavà-né ùi nèhivì. Iin-ne nani José Barsabás, te Justo nduú inga quivì-né. Daaní, inga nèmà nani Matías.

24-25 Dandu nì xicàn tàvhì nsidaa-né nù Dios, cachí-nè:

—Stoho-nsì Señor, ináhá-nì nansa iá anima nsidaa nèhivì. Ñàyùcàndùá, nù ùi tiàa yohó cuàha-ní nsiùhù iin seña índù nècuàchì cundehè chuun xi-ní cuenta xi Judas, vàchi nècuàchì mà, sàhà cuàchi-ne, ñàyùcàndùá nì ndòo chuun xi-ne, te cuàhàn-nè ndé nì nchihò ini-nè cùhùn-nè —nì cachi-nè.

26 Dandu nì caquida-ne iin sorteu, te nècuàchì nani Matías mà nì quee nombradu ñà-cutnahá stná-nè xii ùxìn iin ga nècuàchì apóstol.

2

Nansa nì nuu Espíritu ìi xí Dios

1 Daaní, meru quivì nducáhnù vicò Pentecostés, dandu iin-ni xaan nì nataca nsihì nècuàchì nchícùn ichì mii-yá.

2 Ndoó-né, te nanáá nì tiacu-nè ndè dìquì-xí ansivi na ian cahá fuerte guá tàchì, te nì tiacu inii ini vehe ndé ndoó-né.

3 Dandu nì xini-nè nchii ñuhu cuati nahi yáá-ndà, te nì xitià nihnia, iin ian nì ndòo dìni iin iin nèhivì yucán.

4 Te nsidaa-né, nì chitu anima-nè Espíritu ìi xí Dios, te nì quesaha-né cáhàn-nè dàhàn sàà según nansa nì dàtnùú Espíritu ìi sàxínítnùnì iin iin-ne.

5 Cunaha-ní, ñuu Jerusalén yucán ndoó cuàhà nècuàchì raza Judea nì caquee nùú nsidaa ñuu inicutu ñuhiví. Nèhivì càhvì víi xi Dios nduú-né.

6 Te na ní tiacu-nè cáhàn guá nèhivì yucán, dandu nì nataca cuàhà-né, te yáha ga nì ndulocó-nè, vàchi iníní-né cáhàn nècuàchì mà dàhàn cada iin iin ñuu nècuàchì nì nataca iníní má.

7 Ñàyùcàndùá, nì ndulocó nsidaa-né, nacánì ini-nè, cachí-nè iin-ne xii inga-nè:

—Amádi puru nècuàchì ñuu Galilea xínduu nècuàchì cáhàn guá yohó.

8 Doco vichi iníní-ndá cáhàn-nè dàhàn nì sahnu cada iin iin ndohó. ¿Nansa cui quida-neàmà?

9 Vàchi mii-nda, cuàhà ñuu nì quixi-nda: ñuu Partia, xii ñuu Media, xii ñuu Elam, xii ñuu Mesopotamia, xii ladu Judea yohó, xii ñuu Capadocia, xii ñuu Ponto, xii ladu Asia,

¹⁰ xì ladu Frigia, xì ladu Panfilia, xì ñuu Egipto, xì stná ladu Africa iá nùu-xí ñuu Cirene, te yohó ndoó stná nècuàchì Roma, nduú-né nècuàchì raza Judea, te nduú stná-nè nècuàchì nì yàha ndè religiòn xi raza mà.

¹¹ Daaní, ndoó stná nècuàchì ñuu Creta, xì stná nècuàchì ladu Arabia. Doco nsidaa-nda iníni-ndá cáhàn nècuàchì yohó dàhàn iin iin-nda, ndeníhí vaha-ne Dios sàhà obra ndiaha quidá-yá —nì cacachi-nè.

¹² Ñàyùcàndùá nsidaa nècuàchì iníni yucán, nì ndulocó cuàhà-né, nacání cuàhà ini-nè, ndácàtnùhù tnàhá-né nùu-né, cachí-nè:

—¿Ndíà nduá cuní cachi ñà-yòhó?

¹³ Doco dava ga nèhivì, nì sàcùndiaa uun-ne, cachí-nè:

—Ádi xíni nsidaa nècuàchì jaàn nì quida vinu fuerte —cachí-nè.

Ñà-nduá nì cachi Pedro xì nèhivì cuàhà

¹⁴ Dandu Pedro, iin-né cutnáhâ-né xì ùxìn iin nècuàchì icúmí stná chuun nùu Jesús, te ndee nì càhàn-nè xì nsidaa nècuàchì sàni nataca yucán, cachí-nè:

—Mii-nsiá tè-nduú ñanìtnaha raza-ndà Judea, xì nsidaa mii-nsiá nècuàchì ndoó ñuu Jerusalén yohó, cunini-nsia cuàhìn càhìn.

¹⁵ Xíni-nsi tuxí inì-nsia, doco còó. Có-nduá ñà-xíni-nsi, vachi làcà ní cahin vitni.

¹⁶ Còó, ñà-nduá cáhàn nècuàchì yohó, divi nduú ñà-nduá nì cachi Joel sànhaha na ní cachitnùhu-ne iin razón ndiaha xí Dios.

¹⁷ Te dohó cachí-yà, nì cachi Joel mà:

Quivì xínu tiempu, cuàhà icúmí cuàhatahvì nsidaa nèhivì Espíritu Ìi xí. Ndè dèhe ii-nsiá xì dèhe yoco-nsiá, icúmíâ càhàn ñà-nduú razón ndiaha xí. Te tiàa cuachi, icúmí dacuní nùu-nè cuàhà ñà-ndiaha; xì stná nècuàchì sahnú, icúmí quixi stná sani nùu-né.

¹⁸ Te quivì yucán, cuàhà icúmí cuàhatahvì nècuàchì xinúcuáchí nùu, tiàa-ne te ñahà-né, cuàhà gá icúmí-né nihitáhvì-né Espíritu Ìi xí, dandu càhàn-nè ñà-nduú razón xi.

¹⁹ Te dìquì-xí ansivi icúmí cuu cuàhà stná milagru fuerte quide, xì stná ñuhivì yohó, icúmí stná-nsià cuni-nsià milagru ndiaha xí. Vachi icúmí cucuu nì, te cucuu ñuhu, te cucuu ñùhmà nahi ñùhmànsivì.

²⁰ Doco dihna icúmí ndàhvà orá, xì stná yoo, icúmí-sì nducuahá-si nahi nì, dandu sàà quivì xí yùhù ana nduú Stoho-nsià Señor.

²¹ Te nsidaa ana ndacùcahan xi quivì, icúmí-né càcu-ne, nì cachi-yà.

²² 'Nsidaa-nsiá nècuàchì ñanìtnaha raza Israel, cunini vaha-nsia ñà-nduá cuàhìn cachì: nì quixi Jesús de Nazaret nì xicanuu-ya mahì nsidaa-nda, te ndiaha gá nì quida-ya nacua cuní Yua-nda Dios, vachi sàhà poder ndiaha xí Dios nì quida-ya cuàhà milagru fuerte, cuàhà milagru ndiaha. Ináhà vaha-nsia sàhà ñà-jaàn.

²³ Doco Dios, nì chitnùnì ini-yà ñà-tnii-nsia Jesús, te coo-ya ndahà-nsiá. Te divi ducán nì cuu, vachi ináhà Dios nansa cuàhàn cuu xi (Dèhemanì-yá) Jesús. Ñàyùcàndùá, nì tnii-nsiayà, te nì sahnì-nsiáyà, vachi iin-nì nì ndatnùhu-nsiá xì tiàa malu, te nì cachi-tuu-tèyá nchìca cruz.

²⁴ Doco nì dãnátíacú Yua-nda Dios-yà, nì tavà-ñáyâ nùu tnùndoho ñà-nì xihì-yà, vachi có-nduá ducán ndòo-ya tìxi ñuhù.

²⁵ Te divi ducán nduá nì cachitnùhu stná David sànhaha sàhà-yá, vachi dohó nì cachi-nè: Dios nì quide cuenta cutnáhà-xí nicanicuahàn, vachi yatni iá-yà ladu cuahì sàhà-ñá màsà dáyûhì nèhivì yùhù, te quidi yùhù.

²⁶ Ñàyùcàndùá, cuàhà gá nì cudìi ini anímè, te nì naquimaní (mii-yá), vachi mate ni ndúxin iquicúñùu, doco ináhì iá tnùndé ini xi.

²⁷ Vachi dohó sàni cachì xì Dios: “Ináhì, mà nácóó-nì anímè ñà-ndòa ndé ndoó vaha anima nècuàchì nsii; còó, yùhù tè-nduú dèhemanì-ní, mà cuàhà-ní tnani iquicúñùu ñuhù.

²⁸ Sàhà mii-ní sàni sài nì cundaà inì nansa iá ichì cutiacu ndiahí; icúmí-ní dacúdî inì-ní yùhù, vâchi seguru icúmî naxicocuîñ cundehí nùù-ní”, nì cachi David.

²⁹ 'Doco ináhá-ndá nì sàà xii-ndàmà nì xihì-nè, ñánì, dandu nì ndùxin-ne, (ináhá-ndá), vâchi ñuu yohó nduú ndé indùxin-ne, te ndè vichi nàhà lugar mà.

³⁰ Doco iin ana tùha cachitnùhu razón xi Dios nì sanduu stná nècuàchìmà, ñàyùcàndùá ináhá stná-nè ñà-sàni quida Dios comprometer ñà-divi Cristu cunduu iin descendencia xi-ne, te seguru cusahnú stná-yà nacua nìsa cusahnú mii-né.

³¹ Ñàyùcàndùá, nì dâcùnì Dios-nè iñàha, te nì xini-nè nansa cuàhàn cuu xi Cristu ñà-icúmí-yâ natiacu-yâ, mà ndóo anima-yâ ndé ndoó vâha anima nsii, nì mà tnání stná iquicúñú-yâ ñuhù.

³² Te divi ducán nì cuu, nì natiacu-yâ nì quida Yua-nda Dios. Ináhá-nsî, vâchi testigu nduú-nsî.

³³ Dandu después dècuèndè gloria mànana ducún-yâ nì quida ndahà cuàhá Yua-nda Dios, te divi nduú ana nì quida comprometer cuàhatahvì stná-yà Espíritu Ìì xí-yá. Ñàyùcàndùá sàni dàquixí fuerte Jesús Espíritu Ìì, te ñà-jaàn nduá disáhà-xí cuú ñà-nduá xiní-nsià te iníní-nsiá vichi.

³⁴ Doco nsì-David (sànahà ma), tàñàha ga nana ducún-nè ndè ansivi; còò, vâchi palabra yohó nduá nì cachi-nè:

Nì cachi Dios xì Stoho yùhù: “Yohó coo-ní ladu cuàhí

³⁵ ndè cachi sàà cundèi nùù nsidaa ana xiní ùhì xì-ní, dandu cusahnú fuerte-ní nùù-né”.

³⁶ 'Ñàyùcàndùá, mii-nsiá xì dava ga stná nècuàchì Israel, nì cúnáhá vâha-nsia ñà-yòhó: mate nchìca cruz nì chituu-nsia Jesús, doco nì chitnùnì ini Dios ñà-divi mii-yá cunduu Stoho-ndà, te cunduu stná-yà rey ndiaha Cristu —nì cachi Pedro.

³⁷ Daaní, nì nsihi nì inini nèhivì cuàhá mà ñà-jaàn, nì nâcùndoo-ne tnùnsì ini. Cuàhá gá nì nacani ini-nè, te nì cachi-nè xì Pedro xì dava ga nècuàchì apóstol:

—¿Nansa chicá vâha quida-nsi vichi, ñánì?

³⁸ Dandu nì cachi Pedro xì-né:

—Icúmí iin iin-nsia naxicocuîñ inì-nsia sàhà cuàchi-nsia, te cuhii-nsiá, ndacùcahan-nsiá quivì Jesucristu sàha ñà-dùcán ndoo cuàchi anima-nsià, te nihitáhvi-nsiá nandèe Espíritu Ìì xí-yá anima-nsià;

³⁹ vâchi sàni quida Stoho-ndà Dios comprometer ñà-icúmí-ndá nihitáhvi-ndà Espíritu Ìì xí-yá nú nì cúníndísá-ndá na caná-yàndó. Vâtùni nihitáhvi-ndà, mii-nda, xì stná dèhe-nda, xì stná anà-nì nì cui mate xica gá xíndoo-ne.

⁴⁰ Ducán nì cachi Pedro xì nsidaa nècuàchìmà, vâchi cuàhá gá nì càhàn-nè nì dàtúi-ne ichì-yá nùù nècuàchìmà; te dohó nì cachi stná-nè:

—Nèhivì tiempu vichi, icúmí-nè ndañuhu-né, vâchi malu-nè. Ñàyùcàndùá, na-coo-nsianè, te càcu-nsia —nì cachi Pedro.

⁴¹ Daaní, cuàhá gá nècuàchì yucán, nì cudii ini-nè palabra nì inini-ne mà; nahi ùnì mil nèhivì nduú-né, te nì yàha-ne ladu xi nècuàchì xiníndísâ. Te divi quivì yucán nì cuhii nsidanicuú-né.

⁴² Daaní, iin-ni nì quesaha-né nchícùn-nè palabra dacuahá nècuàchì apóstol. Màni màni ndoó-né, xixí tàcá-nè, te iin-ni xicàn tàhvì stná-nè nùù Dios.

Nansa nìsa quida nècuàchì primeru cahvi xi Jesús

⁴³ Daaní, nsidaa nèhivì dava ga, yàha ga nì ndulocó-nè, vâchi (nì chindee Dios) nècuàchì apóstol, te nì caquida-ne cuàhá milagru fuerte, cuàhá milagru ndiaha.

⁴⁴ Te nsidaa nècuàchì xiníndísâ xí-yâ, iin-ni nihnú ini-nè, te nsidaa ñà-nduá icúmí-nè, nìsa xichuún tàcá-nè.

⁴⁵ Te nú iá iin ñuhù xí-né, ò inga iñàha xi-ne, nì dicò-nèa, nì tùi dihùn, te nì dasàn-né dihùn mà segùn iá necesidad nùù iin iin-ne.

⁴⁶ Te nsìquívì nìsa nataca-nè veheñùhu cahnú, te vehe vehe iin iin-ne nìsa xixi tàcá stná-nè, cudí ini-nè, te ndóo vaha ini-nè,

⁴⁷ te ndeníhí vaha stná-nè Dios. Te nsidaa nèhivì dava ga, cudí stná ini-nè sàhà nècuàchì xiníndísámá, te quidáñúhú stná-nè nècuàchìmà. Te quívì quívì más gà nèhivì nì càna nùù Stoho-ndà Jesús ñà-càcu anima-nè, te nì nacuastnahá stná-nè xì nèhivì xí-yá.

3

Nansa ni nduvàha iin tiàa mà cùì caca

¹ Iin quívì cutnàhâ Pedro xì Juan cuàhàn-nè veheñùhu cahnú. Cahunì nì cuàa cuàhàn-nè yucán, vachi divi hora yucán nìsa xicàn tàhvi nèhivì nùù Dios.

² Te iin yehè cahnú veheñùhu ma nìsa nani Yehè Ndiaha. Te nsìquívì nìsa saà nèhivì yehè mà nsidá-né iin tiàa mà cùì caca. De por sí ducán nì tùinuù-né ñuhivì. Ñàyùcàndüá, yucán nìsa chicoo nècuàchìmà-né sàhà-ñá càcàn-nè caridad nùù nècuàchì quíhvi yehè mà.

³ Pues vichi nì xini-nè Pedro xì Juan ñà-cuàhàn-nè quíhvi stná-nè, te sàhámà nì xicàn-nè iin caridad nùù nècuàchìmà.

⁴ Ñàyùcàndüá nì candacoto nècuàchìmà ndé iá-nè, te nì cachi Pedro xì-né:

—Cundehè-ní yohó.

⁵ Dandu nì ndacoto-ne nùù Pedro xì Juan, cuàhàn-nè nihì-né iñàha cahan-né.

⁶ Doco nì cachi Pedro xì-né:

—Nì còò plata nihí, te nì còò stná oro. Doco ñà-ndüá sái guide. Ndácùcahín quívì Jesucristu de Nazaret, te cachí xì-ní ndacuiin-ní caca-ní.

⁷ Dandu nì tnii-ne ndahàcuàhá tiàa ma, nì ndacani-ne nècuàchìmà. Te vichi duha nì ndufuerté sàhà-né,

⁸ yàchì nì ndanchito-ne, nì ndacuiin-nè, te luegu nì quesaha-né xicá-né; nì quíhvi stná-nè veheñùhu, cutnàhâ-né xì Pedro xì Juan, nandávà nihni-ne, xicánúú-né naquímánì cuàhà-né Dios.

⁹ Te nsidaa nècuàchì itá yucán, nì xini-nè xicánúú nècuàchìmà, ndeníhí vaha-ne Dios,

¹⁰ te nì nacuni-nè nècuàchìmà ñà-ndüú-né tiàa nìsa ìa Yehè Ndiaha veheñùhu cahnú xicàn caridad. Ñàyùcàndüá, cuàhà gá nì ndulocó nèhivì mà, nacání ini-nè sàhà ñà-ndüá nì cuu xì tiàa ma, te nì nduvàha-ne.

Nansa ni càhàn Pedro sàhù na iá-nè Portal de Salomón

¹¹ Lugar yucán nduú corredor nani Portal de Salomón. Te tiàa nì nduvàha ma, itníf ndáha stnahá vaha-ne xì Pedro xì Juan. Dandu nsidaa nèhivì veheñùhu yucán, nì nataca-nè ndé iá Pedro xì Juan, yáha ga ndulócô-nè.

¹² Ñàyùcàndüá na ní xini Pedro natácà-guá nèhivì, dandu nì càhàn-nè xì nsidaa-né, cachí-nè:

—Nècuàchì ñuu-ndà Israel, ¿índù chuun ndulócô-nsià sàhà ñà-yòhó? ¿Índù chuun indéhe váha-nsia nsiùhù na ian nsiùhù nì dándúvaha xì nècuàchì yohó cahan-nsiá? Còó, màdì sàhà fuerza xì nsiùhù nì níhì nècuàchì yohó caca-ne, te nì màdì sàhà ñà-ì guá stná-nsì. Còó.

¹³⁻¹⁴ Xì-ndà Abraham, xì Isaac, xì Jacob, nsidaa-né nìsa cahvi-né Dios ndiaha xi-nda, te divi mii-yá nduú ana nì chitnùnì inì-xi ñà-cucumi Dèhemanì-yá Jesús tñùñuhu ndiaha xí-yá. Doco mii-nsiá, nì dàyáha-nsiayà ndahà Pilatu, te nì nacuaà-nsiáyà na ní cuni tèmà dañà-téyâ. Ana ì ndisa nduú-yá, te ndàa cuisì ini-yà, doco (cónì ndulócô-nsià), iin tè-sàhni nì xicàn-nsià dañà.

¹⁵ Dandu nì sahnì-nsiáyà, mate divi sàhà mii-yá itiacú-ndà. Doco (Yua-nda) Dios, nì dånatiácú-yà Jesús. Ináhá-nsí, vachi testigu nduú-nsí.

¹⁶ Te cunaha-nsiá, divi sàhà ñà-nihnú vaha ini-nsi mii-yá, te ndácùcahan-nsí quívì-yá, ñàyùcàndüá nì ndufuerté tiàa yohó. Indéhe-nsiánè, ináhá-nsiânè. Náhà xicà sàni nduvàha vaha-ne ñà-nì xinindisá stná-nè mii-yá.

17 Te vichi sàni sànihì inì ñà-cóni cúndàa inì-nsia nduá, ñáni. Stná nècuàchì cusáhnû nùù ñuu-ndà, ni cóni cúndàa stná ini-nè, ñàyùcàndùá nì quida-nsia ducán.

18 Doco ñà-nduá nì cachitnùhu Dios sàhana, divi ñà-jaàn nduá nì cuu ndisa nì quida-ya. Vàchi ñà-icúmí Cristu ndoho-ya, divi nduá nisa cachi nsidaa nècuàchì profeta sàhana. Te ducán nì cuu ndisa.

19 Ñàyùcàndùá, naxicocuín inì-nsia sàhà cuàchi-nsia vichi, te natenchicùn-nsià ichì mii-yá sàhà-ñá ndutu cuàchi-nsia, dandu quixi tiempu cundoo ndiaha-nsiá quida-ya,

20 te techuún-yá Jesucristu ndixi-ya, vachi divi-ya nduú ana nì chitnùnì ini Dios cunduu rey ndiaha xi-nda.

21 Doco vichi iá-yà gloria, te yucán icúmí-yâ coo-ya ndè cachi sàa tiempu nsida vii-yá nsidaa iñàha. Vachi ducán nì cachitnùhu nèhivì xí Dios sàhana na ní càhàn-nè nì quida-ya.

22 Vachi ñà-ndácuìsì nduá nì cachitnùhu Moisés xì xii-ndà sàhana na ní cachi-nè palabra yohó: “Icúmí Stoho-ndà Dios nacàxin-ya iin descendencia xi-nda cunduu ana càhàn cuenta xi-ya. Te divi nacua nì quida yùhù, ducán icúmí quida stná ana quixi ma. Dandu mii-nsiá, icúmí-nsiá cunini-nsia nsidaa ñà-nduá cachi-yà xì-nsiá.

23 Te nú ni coó iin nècuàchì có-cùnì cunini xi-yá, dandu icúmí nècuàchì mà ndañuhu-né ñuu-nè”, nì cachi Moisés.

24 Cunaha-nsiá, nsidaa nècuàchì sàhana nisa càhàn cuenta xi-ya, inii décuèndè tiempu nisa càhàn Samuel te vaxi duha, nsidaa-né nì càhàn-nè sàhà tiempu vitni.

25 Te vichi, mii-nda nduu-nda dèhe nècuàchì nisa càhàn razón mà. Ñàyùcàndùá icúmí-ndá nihitáhvi-ndà ñà-ndiaha î nì quida Dios comprometer xì xii-ndà na ní saquin-yà tratu xì Abraham, te nì cachi-yà palabra yohó: “Sàhà iin descendencia xi-ní icúmí quixi ñà-ndiaha î cundiatú anima nsidanicuú nèhivì ñuhivì”, nì cachi-yà.

26 Ñàyùcàndùá, dihna ndohó nècuàchì (ñuu yohó) nì nihitáhvi-ndà, vachi divi chuun jaàn ní sàhatahvi Dios Dèhemanì-yá (Jesús), nì quixi-ya ndé ndoo-nda ñà-cundiatú anima nsidaa-nda nú ni naxícocuín ini-ndà, te nacoò-nda ichì malu nchícùn-nda —nì cachi Pedro.

4

Ñà-nduá nì cuu na ní càhà Pedro xì Juan nùù Junta Cahnú

1 Daaní, na meru càhàn-nè xì nèhivì yucán, dandu nì caquesaa nècuàchì nduú dùtù ndé itá-né, cutnáhá nècuàchì mà xì comandante ndiaá veheñùhu cahnu-ma, te cutnáhá stná-nè xì nècuàchì saduceu,

2 có-ndôo ini-nè ñà-chináhá Pedro xì Juan sàhà nansa natiacu-ndà quida Jesús.

3 Ñàyùcàndùá, nì tnii-ne nècuàchì mà nì chicadi-ñané vehecàa, te sàhà ñà-sàni cuaà, ñàyùcàndùá nì candòo-ne yucán ndè inga quivì.

4 Doco nècuàchì nì inini nì càhàn Pedro xì Juan palabra xi Dios, cuàhà-né nì xinindisá-né, ndè ùhùn mil sàni nanduu nècuàchì tiàa xiníndisá.

5 Daaní, inga quivì nì nataca nècuàchì cusáhnû, xì nècuàchì sahnú nchichí, xì nècuàchì ley xi veheñùhu, nsidaa-né nì nataca-nè

6 ñuu Jerusalén yucán. Te nì sàa stná dùtù cusáhnû nani Anás, xì stná Caifás, xì Juan, xì Alejandro, xì nsidaa dava ga tnaha dùtù cusáhnúmá.

7 Dandu nì tavà-né Pedro xì Juan ñà-cundaca tnahá-né quixi, te nì sàcuíta nècuàchì mà dava mahì-xí. Dandu nì candacàtnùhù nècuàchì Junta mà nùù-né, cachí-nè:

—¿Ana dìvalor-xi nì càhàn-nsià sàhà-xí nì quida-nsia ñà-nduá nì quida-nsia? ¿Ana dìquívì-xí nì ndacùcahan-nsiá?

8 Dandu fuerte nì quixi Espíritu Ìlì xí Dios ini anima Pedro, te nì naxiconihí-né nùù nècuàchì mà, cachí-nè:

—Mii-nsiá nècuàchì xícusahnú ñuu-ndà yohó, xì mii stná-nsià nècuàchì sahnú nchichí raza-ndà Israel, cunini vaha-nsia.

⁹ Vichi xícàn tnùhù-nsiá nùù-nsí nansa nì quida-nsi iin obra xì nècuàchì ndahví yohó, nansa nì nduvàha-ne.

¹⁰ Pues nì cúnáhá mii-nsiá xì nsidaa stná nècuàchì Israel ñà-divi Jesucristu de Nazaret nduú ana dìquívì-xí nì ndacùcahan-nsí, te nì nduvàha-ne. Te yohó iin stná-nè dava mahì-nsiá, indéhe-nsiánè. Te mate ní chituu-nsia Jesucristu nchìca cruz, te nì xihì-yà, doco nì natiacu-yà nì quida Yua-nda Dios.

¹¹ Te mate ní cahíchì íní-nsiàyà, doco vichi sàni cuu xi-yá na ian nì cuu xi iin cavà nì cahíchì ini albañil, te después nì sàà nì sàcùndua yùù vïcò indúhu esquina vehe.

¹² Te còò inga gà ana sáha xi salvación, cuisì mii-yá. Vàchi inicutu ñuhívì còò inga gà ana dìquívì-xí ndacùcahan-nda, te càcu-nda nùù-xí. Còò inga gà ana nì techuún Dios ñuhívì yohó ñà-dacácu xi-nda, cuisì mii-yá —nì cachi Pedro.

¹³ Dandu nècuàchì dandacuma, nì xini-nè, có-yûhí Pedro cáhàn-nè, te có-yûhí stná Juan. Te ni có-nduú stná ñà-nì dàcuàhá cuáhà-né, còò, vachi cóni xíca cuahà-né escuela. Ñàyùcànduá, na ní quida nècuàchì Junta mà cuenta ducán, nì ndulocó-nè, te nì cundaà ini-nè, divi Jesús nìsa cutnahá xi nècuàchìmà.

¹⁴ Te tiàa nì nduvàha ma, yucán iin stná-nè xì nècuàchìmà. Ñàyùcànduá, mà nì cùì nìhìndèè nècuàchì Junta mà canicuàchi-ne sàhà Pedro xì Juan.

¹⁵ Ñàyùcànduá, nì dàndàcú-né ni cáquéè nècuàchìmà iladu, te nì ndatnuhu nsidaa-ní mii-né,

¹⁶ cachí-nè:

—¿Nansa quida-nda xi nècuàchì caá? Vachi iin milagru cahnú ndisa nduá nì quida-ne, ináhá nsidaa nèhivì ñuu-ndà Jerusalén yohó, te ùhì cachi-nsí nduá tnùhu.

¹⁷ Doco sàhà-ñá màsà cuítìà gà palabra yohó, chicá vaha dayúhì-ndàné ñà-màsà cáhàn gà-nè sàhà Jesús xì ni-iin nèhivì —nì cachi-nè.

¹⁸ Dandu nì cana-ne Pedro xì Juan, te fuerte nì chinaha-né nècuàchìmà ñà-màsà cáhàn gà-nè xì nèhivì sàhà Jesús, ni màsà dácúáhà gà-nè ni-iin nèhivì sàhà-yá.

¹⁹ Doco Pedro xì Juan, nì cachi-nè:

—¿Índù ñà-tùxí ini mii-nsiá, a chicá vaha cunini-nsi ñà-nduá cachí mii-nsiá, te ò ñá-nduá cachí Dios?

²⁰ Pues cunaha-nsiá, có-nduá ducán cuhìhin-nsí. Vachi ndiá ìcà-nsí càhàn-nsi xì nèhivì ñà-nduá sàni xinìnùù-nsí xì ñà-nduá sàni tiacu tùtnù-nsí —nì cachi-nè.

²¹ Dandu nècuàchìmà, chicá nì càhàn dana-ne xì Pedro xì Juan, dandu después nì dañà-ñané, vachi cóni túi ni-iin falta ñà-ndoho-ne. Te yúhí stná nècuàchì dandacu-ma ñà-vihini nacuidà nèhivì cuáhà ñuu-nè, vachi nsidaa nècuàchìmà, naquímànì-né Dios sàhà ñà-nduá nì cuu.

²² Vachi tiàa nì nduvàha sàhà milagru mà, sàni yàha-ne ùì dico cuà xicá-né.

Nansa nì xicàn tàhvi nèhivì xí Dios nùù-yá, cuní-nè nacùàhandee ini-yàné

²³ Daaní, na ní quee Pedro xì Juan libre, dandu mànuhù-né ndé ndoó compañeru-nè, te nì cachitnùhu-ne nsidaa ñà-nduá nì cachi dùtù xícusahnú, xì ñà-nduá nì cachi nècuàchì sahnú xídandacú.

²⁴ Te nì nsihi nì cachitnùhu-ne, dandu nsidaa-né, iin-ni nì xicàn tàhvi-né nùù Dios, cachí-nè:

—Stoho-nsi Señor, na mii-ní nduu-ní Dios; cuisì mii-ní nduú ana nì quidavàha xi ansivi, ñuhù íchí, mar, xì nsidaa stná iñàha iá inicutu ñuhívì xì ansivi.

²⁵ Te mii-ní nduú ana nì dácáhàn xì iin nècuàchì sàhana cahvi xi-ní, divi xì-nsí David, te dohó nì cachi nècuàchìmà:

Nèhivì ñuhívì, ¿índù chuun cuadú guâ-nè, te cánahá guâ-nè dìquì Dios? ¿Índù chuun nacání guâ ini cuáhà raza nèhivì quida-ne ñà-có-ndiáá?

²⁶ Vachi cuáhà rey xícusahnú ñuhívì yohó, nì sàcuìta listu-te xi dava ga tè-xídandacú; nì nataca nsidaa-té ñà-cuni ùhì-te Yua-nda Dios xì Dèhemanì-yá Cristu, nì cachi David.

²⁷ Te divi ñà-ndáa nduá, vâchi ducán nì cuu, divi ñuu yohó nì nataca rey Herodes, xì Poncio Pilatu, xì stná nècuàchì ñuu Israel yohó, xì stná cuàhà nèhivì inga nación, vâchi cuní-nè quida quini-ne xì Dèhemani-ní Jesús, mate divi-ya nduú ana nì chitnùnì inì-ní cusahnú.

²⁸ Doco na ní quida nècuàchì mà ducán, cuisì ñà-nduá nì nacani inì-ní dihna nì sandua, te nì sâha-ní lugar nì quida-ne ducán; vâchi mii-ní, nì chitnùnì inì-ní coo ducán,

²⁹ Stoho-nsì Señor. Te vichi (xìcàn tàhvi-nsì) ñà-cunini-ní ñà-nduá cachì nècuàchì mà, ndee gá càhàn-nè, cuní-nè dayúhì-nè nsiùhù. Doco nacuaàhandee inì-ní nsiùhù nècuàchì cahvi xi-ní, te ducán vâtùni cachitnùhu-nsi palabra ì xí-nî, te mà yúhì-nsì.

³⁰ Xìcàn tàhvi-nsì nùù-ní ñà-nì dándûvâha-ní nècuàchì cuhí sàhà poder ì xí-nî. Te nsiùhù, icúmí-nsì ndacùcahan-nsì Dèhe ndiaha-ní Jesús, dandu mii-ní quida-ní nsidaa clase milagru (cundehè nèhivì) —nì cacachi nècuàchì mà.

³¹ Daaní, nì nsihì nì xìcàn tàhvi-né nùù Dios ducán, dandu nì ndacùchì vehe ndé ndoó-né, te fuerte nì quixi Espíritu ì xí-yá ini anima nsidaa-né, te ndee ní càhàn-nè palabra ì xí-yá, cóni yúhì-nè.

Nansa nisa quida nècuàchì xiníndísâ, iin-ni cahnú nisa ìa biene xi nsidaa-né

³² Cunaha-ní, iin-ni sàxínitnùnì nisa icumi nsidanicuú nècuàchì xiníndísâ. Còò ni-ñàhà nísá xídáhàn-né nùù ñanìtnaha-ne, vâchi iin-ni cahnú-ní nisa ìa nsidaa ñà-nduá icúmí-nè.

³³ Te poder cahnú xí Dios, cuàhà gá nì chindeá nècuàchì apóstol, vâchi fuerte nì càhàn-nè sàhù sàhà nansa nì xinìnùù-né Stoho-ndà Jesús na sání natiacu-yà. Te cuàhà stná gracia xi-ya iá nùù nsidaa nèhivì xí-yá.

³⁴⁻³⁵ Ñàyùcànduá, cóni quídámànì ni-ñàhà nùù ni-iin-ne, vâchi nècuàchì nisa ìa ñuhù-xí, ò vehe-xi, nì dicò-nèà, te nihí-né dihùn mà nì sàhàn nì nacoò-neà nùù nècuàchì apóstol, dandu mii-né, nì dasàn-nèà nùù nèhivì icúmí necesidad.

³⁶ Te iin nècuàchì nì dicò mà nani José; doco Bernabé nisa cachi nècuàchì apóstol xi-né, vâchi quivì mà, iin ana nácuàhandee ini xì-ndà cuní cachàmà. Ñuu Chipre nduú ñuu-nè, te Leví nduú yohòtéhè-né.

³⁷ Pues divi-ne nisa icumi stná xì iin ñuhù, te nì dicò-nèà. Dandu nihí-né dihùn yàhvia nì sàhàn nì sàha-ne nècuàchì apóstol, te nì ndòà ndahà nècuàchì mà.

5

Nansa nì quida Ananías xì Safira, nì xida cuàchi-ne

¹ Daaní, nisa ìa iin tiàa nani Ananías xì ñahàdihí-nè Safira, te nì dicò stná-nè iin ñuhù.

² Doco nì chivàha cuaán-né chii dihùn sàhámà. Dandu dihùn nì cusobrá mà nduá nì tnii nècuàchì tiàa ma, te nihí-nèà nì sàhàn nì sàha-ne nècuàchì apóstol, (na ian iá nsiha). Te ináhà stná ñahàdihí-nè nansa nì quida-ne.

³ Doco Pedro, nì cachi-nè:

—Ananías, ¿índù chuun nì sàha-ní nì dacà ñà-malu dìni-ní? Dècuèndè cuní-ní dandahví stná-ní Espíritu ì xí Dios, vâchi nì chidèhé-ní sàhà ñuhù mà.

⁴ ¿Amádi ñuhù xí mii-ní nì sandua daa, te vâtùni quida-ní disponer sàhá? Daaní, na sání dicò-níà, ¿amádi dihùn xí mii-ní nì sanduu stná? ¿Índù chuun nì nacani quini inì-ní, te nì quida-ní dohó? Cunaha-ní, màdì nùù nèhivì nì càhàn tnùhù-ní. Còó, nùù Dios nì càhàn tnùhù-ní —nì cachi Pedro.

⁵ Daaní, na ní nsihì nì inini Ananías ducán, dandu nì natnahnù-nè, te nì xìhì-nè. Te nsidaa ana nì xinitnùhu ma, nì yúhì cuaá-nè.

⁶ Dandu nì caquixi tiàa cuachì gá, nì chidùcún-te nsì ma, te nì xida-tèndó cuàhàn-ndà cundùxin-nda.

⁷ Daaní, na ní yàha ùnì hora, nì quesaa stná ñahàdihí ndómà, doco tàñáha ga cunitnùhu-ne nansa nì cuu.

⁸ Dandu nì ndacàtnùhù Pedro nùù-né, cachì-nè:

—Cachì-ní xí, ¿a ndísá tantu dohó nì dicò-nsiá ñuhù xí-nsiá?

Te cachí nècuàchìmà:

—Jaan, divi ducán nì sandua.

⁹ Dandu nì cachi Pedro xì-né:

—¿Índù chuun nì ndatnuhu ndúi-nsià quida-nsia ducán, a ndísá cuidà ini Espíritu Ìi xí Stoho-ndà Señor, cahan-nsiá? Cunaha-ní, tiacú sàni nsiaa ana nì casahàn nì sùxin xí ìi-ní, te vichi icúmí-tê cunsida stná-te mii-ní cùhùn —nì cachi Pedro.

¹⁰ Te vichi duha nì natnahnù stná nècuàchìmà nùu sàhà Pedro, te nì xihì-nè. Te na ní nansihvi tècuachima, sàni xihì-nè nì xini-te, ñàyùcàndùá, nì tavà stná-te nsii ma nì sàhàn-te nì sùxin stná-te ndómà divi ndé nì sàcùndùxin nsi-ìi-ndà.

¹¹ Ñàyùcàndùá, cuahà gá nì yuhí nsidaa nècuàchì xiníndísá ichì-yá, mii-né xì nsidaa stná nècuàchì dava ga nì xinitnùhu ma.

Nansa nì cuu cuahà milagru ndiaha

¹² Daaní, nècuàchì apóstol, ndiaha gá nì caquida-ne cuahà milagru nì indehè nèhivì. Te nsidaa nècuàchì xiníndísámá, nsiquívì nìsa nataca-nè nùu Portal de Salomón (iá yehè veheñùhu). Te iin-ni sàxínitnùnì nìsa icumi nsidaa-né.

¹³ Doco nèhivì dava ga, ni-iin-ne cónì sáhandee ini-nè cutnahá-né xì nècuàchì natácá mà, mate ndeníhí vaha cuahà-né nècuàchìmà.

¹⁴ Te nì sàà nì xinindisá cuahà gá nèhivì, tiàa te ñahà-né, nì xinindisá-né Stoho-ndà Señor.

¹⁵ Dècuèndè nìsa tavà stná nèhivì nècuàchì cuhí xi-ne, nì chitanduhù-né nècuàchìmà yuhù ichí, dava-ne nùu cama, te dava-ne nùu yuì, ndiatú-né yàha Pedro, áma dúcùn-nè casì nècuàchìmà, te nduvàha-ne.

¹⁶ Stná ñuu cuati ndoó yatni nì caquee cuahà stná nèhivì vaxi ñuu Jerusalén ndacá-né cuahà nècuàchì ndohó quidá cuèhè, xì stná nècuàchì dandohó ñà-malu. Te nsidaa-né, nì nduvàha-ne.

Nansa nì catnii-ne nsidaa nècuàchì apóstol

¹⁷ Dandu dùtù xícusahnu-ma, yàha ga nì cumbìdia ini-nè, mii-né xì compañeru-nè tè-ndùú nècuàchì saduceu.

¹⁸ Ñàyùcàndùá, nì tnii-ne nècuàchì icúmí chuun nùu Jesús, te nì chicadi-nè nècuàchìmà vehecàa.

¹⁹ Doco iin ángel xi Stoho-ndà Señor, ñuu nì sàà-nè vehecàa yucán, te nì nacuna-ne yehè nì tavà-né nècuàchìmà, te nì cachi-nè:

²⁰ —Cuahán-nsià cuita-nsia veheñùhu cahnú, te nacani-nsia xì nèhivì nansa nihitáhvi-né cutiacu ndiaha anima-nè.

²¹ Ducán nì dándacú-né nùu nècuàchìmà quida-ne. Ñàyùcàndùá, na ní tùinuù, dandu nì quihvi-ne veheñùhu cahnú, te nì quesaha-né dacuahá-né nèhivì.

Daaní, dùtù cusáhnû, xì compañeru-nè, nì cana-ne nècuàchì Junta ñà-nataca nsidaa-né, te quixi stná nsidaa nècuàchì sahnú nchichí ñuu Israel yucán. Dandu nì techuún-né policía cuahàn-te vehecàa ñà-cundaca-tè nècuàchì ndiadí quixi.

²² Doco na ní casaà-te yucán, còò cá iin ni ndácùhun-tè. Ñàyùcàndùá, nì naxicocuín-te nì cachitnùhu-tè,

²³ cachí-te:

—Ñà-ndáa nduá, ndiadí vaha yehè vehecàa ma, te itá stná soldadu ndiaá xán, doco na ní nacuna-nsi, còò cá nècuàchì ndiadí mà.

²⁴ Dandu dùtù cusáhnû, xì comandante ndiaá veheñùhu, xì stná dùtù nihí gá chuun nahnú, nì ndulocó-nè na ní xinitnùhu-ne ducán. ¿Índù fin cucumi chuun yohó? cahan-né.

²⁵ Daaní, divi momentu mà nì quesaa inga tiàa nì cachitnùhu xi-né:

—Cunaha-nsiá, nècuàchì nì chicadi-nsià vehecàa, yucán sàndòó-né veheñùhu cahnú, dacuahá-né nèhivì —nì cachì-te.

²⁶ Dandu comandante mà, cuàhàn-te xi policia xi-tè, te vivì-ni nì saca-tè nècuàchìmà vaxi-ne, vachi yúhì-te nèhivì cuàhà mà ñà-vihini cacani yuu-néte cahan-té.

²⁷ Ñàyùcànduá, ndacá-te nècuàchìmà nì quesaa, te nì sàcuìta-ne nùù nsidaa nècuàchì Junta mà. Dandu nì cachi dùtù cusáhnû:

²⁸ —¿Amádi sání dándàcú-nsí nùù-nsiá ñà-màsà chináhá gà-nsiá nèhivì sàhà Jesús? Doco vichi, nsidanicuú lugar ñuu yohó sání càhàn-nsiá sàhù ñà-nduú dàñùhù xi-nsia, te cuní-nsiá ñà-nsiùhù nacuida-nsi cuàchi sàhà nècuàchì nì xihì mà.

²⁹ Dandu Pedro xì dava ga nècuàchì apóstol, nì naxiconihí-né nùù nècuàchìmà, cachí-nè:

—Nsiùhù, icúmí-nsí cunchicùn-nsi ñà-nduá cachí Dios, te màdì ñà-nduá cachí nèhivì ùùn.

³⁰ Mii-nsiá nì chituu-nsia Jesús nchìca cruz. Doco mate modo ducán nì sahnì-nsiáyà, doco vichi sání natiacu-yà nì quida Dios, divi mindaa Dios nisa cahvi xii-ndà.

³¹ Te vichi sání saquin-yà Jesús ndahà cuàhá-yà ñà-cunduu-ya ana cusáhnû, te cunduu stná-yà ana dacácu xi-nda. Te ducán nì cuu sàhà-ñá nì cuu-nda arrepentir, nsidaa ndohó nècuàchì ñuu Israel yohó, te ducán nihì-yá nansa cuicahnú ini-yà sàhà cuàchi-nda.

³² Te nsiùhù, testigu xínduu-nsi, vachi nì xinínùù-nsí ducán nì cuu. Te testigu nduú stná Espiritu ìì xí-yá ñuhú ini anima-nsi, vachi nsidaa ana cunini xi-yá, nihítáhvì-né ndèè Espiritu ìì xí-yá ini anima-nè quida-ya —nì cachi Pedro.

³³ Doco nècuàchì dandacu-ma, na ní inini-ne ñà-jaàn, yáha ga nì caxidà ini-nè, te nì quesaha-né nì ndatnuhu tnahá-né nansa dandáñùhù-nè nècuàchìmà.

³⁴ Doco nùù nèhivì Junta mà, iá iin maestru nani Gamaliel, iin nècuàchì fariseu chináhá xì ley xi Dios. Nècuàchì vaha nduú-né cachí nsidaa nècuàchì ñuu yucán. Te divi-ne nì ndacuiin-nè nì dándàcú-né quee cuaán chii nècuàchì apóstol mà.

³⁵ Dandu nì cachi-nè xì nsidaa compañeru-nè yucán:

—Nsidaa mii-nsiá nècuàchì raza-ndà Israel, cuidadu ni cúndóó-ndá sàhà ñà-nduá quida-nda xi nècuàchì càá.

³⁶ Vachi ¿a có-nsínuu inì-nsia nansa nì cuu tiempu na ní ìa iin tiàa nani Teudas? Tè-cáhnú ícà-xí nduú-te nisa cachì-te. Te nahì cùmì cientu nèhivì nì quihvi tnahá xi-té nì sanchicùn-nète. Doco por fin nì sahnì nèhivì-té, te nì xitià nihni nsidaa nècuàchì nchícùn xì-té, te ducán nì nsihì chuun ma.

³⁷ Daaní, después nì yàha inga casu na tiempu nì cuu-nda empadronar. Iin tiàa ladu Galilea nani Judas, nì nihì-té nì dàyáha-tè cuàhà nèhivì ladu xi-tè. Doco nì xihì stná-te, te nì xitià nihni stná nsidaa nèhivì nì chiyuhù-té.

³⁸ Ñàyùcànduá, yùhù cachí xì-nsiá vichi, ni cúnàhá nècuàchì sání tnii-nda jaàn. Chicá vaha nacoò-ndané, vachi nú inì-ni mii-né nì nacani ini-nè quida-ne ñà-nduá quidá-né, dandu icúmíâ ndòo uan.

³⁹ Doco nú Dios nì dándàcù-xì nùù-né, dandu mà nunca nihì-ndà cadi-ndà nùù-né, te cachí, còtó Dios nàá stnàhà-xì-ndà —nì cachi Gamaliel mà.

⁴⁰ Dandu nsidaa compañeru nècuàchìmà, nì dàjuùn-nè nècuàchìmà, te nì cana-ne nècuàchì apóstol nì nansihvi tu-ne. Dandu nì sahnì cuií-nè nècuàchìmà, te nì chinaha-ñáné ñà-màsà càhàn gà-nè xì nèhivì sàhà Jesús. Dandu nì dañà Junta Cahnu-mané,

⁴¹ te nì caquee-ne libre, cudí ini-nè ñà-nì natùì stná-nè ndoho-ne sàhà chuun xì mii-yá.

⁴² Daaní, nsìquívì vehe vehe nisa xicanuu-ne dacuahá-né nèhivì. Sàhàn stná-nè veheñùhu cahnú, te chináhá stná-nè nèhivì yucán, càhàn-nè sàhù sàhà Jesucristu, ni-iyuhu cónì nácóó-nèamà.

6

Nansa nì cuu nombrar ùsà tiàa dasàn ñà-cutiacu nècuàchì ndahví

¹ Quivì yucán vihi gá nì nducuahà nècuàchì nchícùn ichì mii-yá; dava-ne cáhàn-nè dàhàn hebreu, te dava ga-nè cáhàn-nè dàhàn griegu. Dandu nì quesaha nècuàchì griegu mà nì xitnùhu-ne compañeru-nè cáhàn hebreu, vàchi ñahàcuàán xí-icumi nècuàchì griegu mà, có-nìhì váha-ne ñà-cutiacu-nè na dásàn-ñà quivì quivì.

² Ñàyùcàndùá nì cana nsì-úxin ùi apóstol nsidaa nècuàchì xiníndísâ, te nì cachi-nè xì nècuàchì mà:

—Nsiùhù, có-ndùá ñà-nacoo nihni-nsi chuun xi palabra xi Dios, te cacanuu-nsi dasàn-nsí ñà-cutiacu nèhivì.

³ Ñàyùcàndùá, mii-nsiá nanducu-nsiá ùsà tiàa nchichí dandacú sàhà chuun yohó, ñàni. Nècuàchì tnùñuhu nì cúndúú-né, te nì coó chitu stná anima-nè Espíritu Ìi xí Dios.

⁴ Doco nsiùhù, iin-ni cuàhàn-nsi quida-nsi seguir càcàn tàhvi-nsí nùù-yá, te dacuahá-nsí nèhivì palabra xi-ya —nì cachi-nè.

⁵ Daaní, nsidaa nèhivì mà, nì cudii ini-nè ñà-ndùá nì cachi nècuàchì apóstol mà. Ñàyùcàndùá, nì caquee nombradu ùsà tiàa. Iin-ne nani Esteban. Iin nècuàchì nihnú vaha inì-xi nduú-né, te chitu stná anima-nè Espíritu Ìi xí Dios. Te nì caquee stná nombradu nècuàchì nchícùn yohó: Felipe, Prócoro, Nicanor, Timón, Parmenas, xì Nicolás. Nècuàchì inga raza nì quixi ñuu Antioquía nduú Nicolás mà, doco nì yàha-ne religión xi nècuàchì raza Judea.

⁶ Daa-ní, nsidaa nèhivì mà, nì saca-ne nècuàchì nombradu mà nùù nècuàchì apóstol; dandu apóstol mà, nì xicàn tàhvi-né nùù Dios, te nì chindóó-né ndahà-né dìni nècuàchì mà.

⁷ Daaní, después, chicá más nì cucuahà palabra xi Dios, vàchi cuàhà gá nèhivì ñuu Jerusalén nì sàà nì xinindisá, te cuàhà gá stná nècuàchì dùtù nì sàà-nè nì xinindisá stná-nè palabra mà.

Nansa nì tnù Esteban

⁸ Daaní, nì xicanuu Esteban mahì nèhivì, te nì quida-ne cuàhà milagru ndiaha, vàchi cuàhà gá icúmí-nè gracia xi Dios, te fuerte iá palabra cachí-nè.

⁹ Doco dava nèhivì, nì quesaha-né náâ tnahá-né xì nècuàchì mà. Nèhivì sàhàn veheñùhu nani Veheñùhu xi Nèhivì Libre xínduu-ne, te nì caquixi-ne inga ñuu, divi ñuu Cirene, xì ñuu Alejandría, xì ladu Cilicia, xì ladu Asia.

¹⁰ Doco mànicúi nihìndèè-né màcòdonùù-né nùù Esteban, vàchi chindéé Espíritu Ìi xí Dios-nè cáhàn nchichí-nè.

¹¹ Ñàyùcàndùá, nècuàchì náâ xì-némà, nì nducu-né iin ùi tètñùhù, te nì chiyàhvi-nè te ñà-càhàn tnùhù-té dìquì Esteban. Sàhà ñà-jaàn, dohó nì cachi tè mà:

—Nì inini-nsi nì cachi quini Esteban dìquì (yua-nda) Moisés xì dìquì stná Dios.

¹² Ñàyùcàndùá, ducán nì nihì nècuàchì malu mà nì dànácuìdà-nè nèhivì ñuu mà, mii-né xì stná nècuàchì sahnú dandacú, xì stná nècuàchì ley xi veheñùhu, te nì quida cuahà-né sàhà Esteban; yàchì nì sàà-nè ndé iá nècuàchì mà, te nì tnii-ñané, te ndacá-ñané nì casaà nùù nècuàchì Junta.

¹³ Yucán nì cana-ne tètñùhù mà nì tnàtuu-tè, te nì sanicuàchi-tè sàhà Esteban, cachí-te: —De por sí, tùha quini tè-jaàn, vàchi quini cáhàn-te dìquì veheñùhu ìi xì-ndà, xì dìquì stná ley ìi xì-ndà.

¹⁴ Te nì inini stná-nsi nì cachì-te ñà-ìcúmí quixi Jesús de Nazaret, te dacaá-né veheñùhu xi-nda. Dandu fuerza icúmí dàma estilu xi-nda, divi estilu nì nacoo xì-ndà Moisés —nì cachi tè mà.

¹⁵ Dandu nsidaa nèhivì ndoó Junta mà, nì indehè-né nùù Esteban, te nì xini-nè, na indéhe ángel indéhe nècuàchì mà vichi.

7

Ñà-ndùá nì cachi Esteban na ní càhàn-nè sàhà mii-né

¹ Dandu dùtù cusáhnù, nì cachi-nè xì Esteban:

—¿A dívi ñà-ndàà nduá (xícachi nècuàchì jaàn), á coó?

² Dandu nì naxiconihí Esteban, cachí-nè:

—Mii-nsiá, nècuàchì sahnú nchichí, cunini chii-nsiá, ñáni, vàchi (cuàhìn nacani) nansa nì quida Dios ndiaha xi-nda sànaaha dècuèndè na íá ì xì-ndà Abraham ñuu nani Mesopotamia. Tàñáha ga nadàma-ne ndè ñuu Harán, dandu nì dàcùnì Dios-nè mii-yá,

³ te dohó nì cachi-yà xì-né: “Nacoo-ní ñuù-ní yohó, te nacoo-ní tnaha-ní, quihin-ní ichi cuahán-ní inga ñuu ícúmí dacuní mii-ní”.

⁴ Ñàyùcàndùá, nì quee-ne ladu Caldea yucán, te nì sàà-nè ñuu Harán. Te ñuu mà nì ndòo-ne dècuèndè nì xihì yua-né. Dandu inga xichi nì càhàn tu Dios xì-né, ñàyùcàndùá nì quihin-ne ichi nì quesaa-nè ñuu yohó ndé ndoo-nda vichi.

⁵ Doco cónì sáha-yanè ni-iin ñuhù cunduu ñuhù xí mii-né, ni siquiera iin ñuhù tì. Doco nì cachi-yà xì-né ñà-después cuàhàn-yà dacútâhvi-yánè inii ñuu yohó, te cucumi-néa, mii-né xì dèhe-ne. Ducán nì cachi-yà xì-né, mate táyôo ni-iin dèhe-ne.

⁶ Te nì cachi stná-yà ñà-ìcúmí descendencia xi-ne sàà-nè cundoo-ne inga ñuu xicà ndé cuichuún uun-ni nècuàchì-mà-né, nì cachi-yà; te cuàhà ìcúmí-né ndoho-ne quida nècuàchì-mà, te cùmì cientu cuà cundua.

⁷ Doco dohó nì cachi stná-yà (xì Abraham mà): “Después ícúmí dandohó stnái nèhivì cuichuun-xi tnaha-ní ñuu xicà mà, dandu caquee-ne libre, ndixi-ne cahvi-né yùhù lugar yohó”, nì cachi-yà.

⁸ Dandu nì quida stná-yà iin tratu xì Abraham, nì cachi-yà ñà-ìcúmí tàhndè iin seña ìcà nsidaa dèhe ii-né. Ñàyùcàndùá, na ní tùinuù dèhe ii-né nani Isaac, dandu tixi ùnà quivì nì sàcùnìhi seña ìcà-vé. Daaní dèhe Isaac mà nani Jacob, nì sàcùtuu stná seña mà ìcà-vé. Te divi-ni ducán nì quida stná Jacob mà xì nsihúxìn ùi dèhe ii-né, divi nècuàchì nduú xì-ndà.

⁹ Te xì-ndà mà, nì cumbìdia ini-nè sàhà ñani chii-né nani José. Te ñàyùcàndùá nì dicò-né nècuàchì-mà nùù nèhivì cuàhàn ñuu Egipto. Doco Dios, nì cutnahá stná-yà xì nècuàchì-mà íá-nè ñuu yucán,

¹⁰ nì dáyáha-yanè nùù nsidaa tnùndoho nì xini-nè. Dandu nì cunchichí-nè nì quida-yà, te nì ndòo manì-né nùù rey Faraón ñuu Egipto yucán, vàchi mii-yá nì chindee-yánè. Te nì quida rey mà nombrar José ñà-cunduu-ne nècuàchì cu-ù nùù-té ñuu mà, dècuèndè nì cachi-te ñà-dandacú stná-nè nùù nsidaa nècuàchì quidachuún vehe-tè.

¹¹ Daaní, nì quixi iin tnama inicutu ñuu mà, xì stná inii ñuu Canaán; iin tnùndoho cahnú nì sandua. Te xì-ndàmà, có-nìhì gá-nè ñà-cutiacu-nè.

¹² Dandu nì xinitnùhu yua-né Jacob ñà-ìá trigu ndè ñuu Egipto. Ñàyùcàndùá, nì techuún-né dèhe-ne cuàhàn-nè ñuu mà. Te primeru viaji nì sanduamà.

¹³ Daaní, viaji ùi nduá na ní dàtúi José mii-né nùù ñani-nèmà. Dandu nì cundaà ini rey Faraón índù raza nèhivì nduu José.

¹⁴ Te nì dàquixí stná José iin razón ñà-cùhùn stná yua-né Jacob xì nsidaa stná tnaha-ne. Te nsidaa nsidaa-né ùnì dico sàhùn (75) nduú-né.

¹⁵ Ñàyùcàndùá, nì sàà Jacob ñuu Egipto mà, te yucán nì ndòo-ne dècuèndè nì xihì-nè, mii-né xì nsidaa stná dèhe-ne.

¹⁶ Doco después nì natavà xì-ndà iquì nsìi ma, te nihí-néa màndixi-ne ñuu-nè yohó dècuèndè ndè íá ñuu tii Siquem, te yucán nì ndùxan ini iin cueva, divi cueva nì xiin xì-ndà Abraham nùù dèhe iin tiàa nani Hamor.

¹⁷ Daaní, nì cuyatni tiempu cuu ndisa ñà-nduá nì cachi Dios na ní càhàn-yà xì Abraham daa. Te yáha ga nì nducuahà descendencia xi nècuàchì-mà ndoó ñuu Egipto yucán; cuàhà sàstnùhù nì nanduu-ne.

¹⁸ Dandu nì quihvi inga rey dandacú nùù ñuu yucán. Te rey mà, cónì cundáà inì-te nansa (nì chindee) José antes.

¹⁹ Ñàyùcàndùá, nì dándàhvi-te xì-ndà mà, nì quida quini-tè xì-né, nì dándàcú-te nùù-né ñà-nacoo nihni-ne mée cuati xí-né sàhà-ñá cui-vè.

20 Te divi tiempu mà nì tùinuù Moisés ñuhívì, te cudû ini Dios sàhà-ve. Cutu únì yòò nì ìa-ve xì yuadíhí-vê,

21 Te nì sàà hora icúmí-nê nacoò nihni-nevè, doco (nì càcu-ve), vàchi nì ndacùhun iin dèheyoco rey mà-ve. Te nì dàcuàhnú-ñavé na iin dèhe-ñà.

22 Dandu después nì dàcuàhá vaha-ne nsidaa palabra nchichí ñuu Egipto yucán. Nì cutùha vaha-ne càhàn-nè sàhù, te nì ìa stná fama-nè sàhà chuun nahnú nìsa quida-ne.

23 'Daaní, na cuàhàn-nè xinu-ne ùi dico cuà, nì nacani ini-nè nùhù-nè nàcòtò-nè tnaha-ne, divi nècuàchì xínduu (descendencia xi xii-né) Israel.

24 Te yucán nì xini-nè iin tè-Egipto dandohó-te iin tnaha-ne. Ñàyùcàndùá, nì nacuidahan-né nècuàchìmà nùù tèmà, te nì nachitacùhá-nè sàhà tnaha-nemà, nì sahnì-né tèmà.

25 Vàchi nì tuxi ini-nè cuàhàn nsidaa tnaha-ne cundaà ini-nè ñà-sàhà mii-né icúmí Dios dacácu-ya nsidanicuú-né. Doco còó, cónì cécúndàà ini nècuàchìmà.

26 'Daaní, inga quívì-mà tucu tu xicánúú-né yucán, te nì xini-nè itá ùi tnaha-ne náâ stnahá. Ñàyùcàndùá, nì cuni-nè nachindovii-né nècuàchìmà, te nì cachi-nè xì nècuàchìmà: “Señores, ¿índù chuun caní stnahá-nsiá? ¿Amádi iin-ni ñanì xínduu-nda?”

27 Dandu tiàa caní stnahama, nì chindaha níhni-te Moisés, cachí-te: “¿Ana nì cachi xì-ní ñà-dàndàcù-ní nùù-nsí? Còó, còò permisù nsidandaà-ní chuun xi nsiùhù.

28 ¿A cuní-ní cahnì stná-ní yùhù nacua nì sahnì-ní tè-Egipto icu?” nì cachi-te.

29 Dandu na ní inini Moisés ñà-jaàn, nì xinudèhé-nè cuàhàn-nè ñuu Madián. Te yucán nì ndòo-ne, te nì sàcùndoo stná ùi dèhe ii-né.

30 'Daaní, nì yàha ùi dico cuà iá-nè yucán, dandu iin quívì xicánúú-né ìcà yucù nani Sinaí, te nì xini-nè xíxìn iin yutnù tìi. Te mahì ñuhu mà nì natù iin àngel.

31 Ñàyùcàndùá, nì ndulocó-nè sàhà ñà-ndùá nì xini-nè. Te na ní cuyatni-ne ña-cuàhàn-nè cundehè váha-ne, dandu nì tiacu-nè càhàn Stoho-ndà Dios xì-né, cachí-yà:

32 “Yùhù nduí Dios. Cuisì yùhù nìsa cahvi xii-ní Abraham, xì Isaac xì Jacob”, nì cachi-yà. Ñàyùcàndùá, nì quesaha Moisés quidí-né, te yúhì-nè cundehè gá-nè.

33 Dandu nì cachi tu Stoho-ndà Señor xì-né: “Tavà-ní ndisàn-ní, vàchi ñuhù ndé iin-ní yohó, ñuhù ìi nduá.

34 Cunaha-ní, sàni xini nansa ndohó nèhivì-xí ndoó ñuu Egipto. Sàni tiacù xítnana-ne, te ndoho-guá-nè. Ñàyùcàndùá, sàni nui yohó ñà-vàxi nacuaqui-nè caquee-ne ñuu mà. Pues vichi cùhùn-ndà, vàchi cuàhìn techuín mii-ní nùhù-ní ñuu Egipto”, nì cachi Dios.

35 'Ñàyùcàndùá, divi Moisés nduú ana nì techuún-yá nùhù dandacu-xi nùù tnaha-nda, te dacácu-ne nècuàchìmà, vàchi divi ducán nì ndacu nuù-né nùù mii-yá nì tui mahì yutnù tìi mà, te indéhe-yá nahi àngel. Pues divi-ne nduú ana nì cahíchì ini tnaha-nda daa na ní cachi-nè: “¿Ana nì cachi xì-ní dandacu-ní nùù-nsí? Còò permisù nsidandaà-ní chuun xi-nsi”.

36 Doco divi Moisés mà nduú ana nì tavà xì nècuàchìmà ñuu Egipto yucán, te nì quida stná-nè cuàhà milagru fuerte ñuu mà, cuàhà milagru ndiaha. Dandu nùù Mar Cuahá, yucán nì cuu ga más milagru fuerte. Te inii ùi dico cuà nì cuu ga stná milagru nùù yucù dàná (ndé nì xicanuu-ne).

37 'Dandu después nì cachitnùhu Moisés inga palabra xì xii-ndà nècuàchì Israel mà, te dohó nì cachi-nè: “Vàxi iin quívì na icúmí Stoho-ndà Dios cuàha-ya iin tnaha-nda chuun ndiaha càhàn cuenta xi-ya ñuu-ndà. Te nacua quidá yùhù, ducán icúmí quida stná ana icúmí quixi ma. Te icúmí-nsiâ cahvi-nsiâ ñà-ndùá cachi-yà”, nì cachi Moisés.

38 '(Ináhá-nsiâ), divi Moisés nduú ana nìsa ìa yucù dàná yucán, cutnàhâ-né xì nèhivì cuàhà nduú xii-ndà mà, te cutnàhâ stná-nè xì mii-yá nì càhàn xì-né yucù Sinaí mà, divi mii-yá indéhe nahi àngel. Te (ináhá-nsiá, divi nùù mii-yá) nì nihì stná-nè palabra xi vida ndiaha icúmí-ndà chivàha-nda.

39 'Doco xii-ndà mà, còó, cónì cùnì-nè cunini-ne Moisés. Nì cahíchì ini-nè nècuàchìmà, vàchi cuisì cunì-nè nùhù dahuun-ne ñuu Egipto.

40 Te nì cacachi stná-nè xì Aarón: “Quidayucùn-ní iin ñà-cunduu stoho-ndà cundaca-nda codònùù nùù-ndà, vàchi sàcuàhàn Moisés, te cutu ní tavà úún-nèndó ñuu Egipto, te vichi có-cùndáà ini-nsi ndià nì cuu xi-né”, nì cachi nècuàchìmà.

41 Te divi quivì yucán nì quidavàha-ne iin chelù. Dandu nì sahnì stná-nè quisì cunduu promesa nùù chelù mà, te cudûi gá ini-nè, vàchi sàni quidavàha-ne (iin ñà-cahvi-né).

42 Ñàyùcàndùá, nì naxicocuûn ini Dios sàhà-né, te nì nacoò uun-yanè ñà-quida-ne ñà-nduú gustu xi-ne cahvi-né orá, xì yoo, xì sìtnúù. Ináhà-ndá nì cuu ducán, vàchi dohó cachí-yà nùù libru nì tiaa profeta sàhana ndé cachí-yà:

¿Nsiohó nècuàchì Israel, ùi dico cuià nì xìca-ndá yucù, te nì sàha-ndá yùhù ofrenda xi promesa, divi quisì nì sahnì-ndá sàhì? Doco ¿a ndísá nì cahvi ndisa-ndá yùhù na ní quida-ndá ducán?

43 Còó, mà ndísá; yùù yócò (nduá nìsa cahvi-ndá, vàchi divia) nìsa nihi-ndá xicánúú, divi yùù yócò nani Moloc inácaá ini vèha, xì stná stohò-ndá nani Renfán nàhà nahi sìtnúù cahnú. Vàchi figura-ñà mà nì quidayucùn-ndá, te nì cahvi-ndá. Pues (divi sàhà nsidaámà) icúmí taxi xiqué nsiohó ndé nùù-xì ñuu Babilonia, nì cachi Dios.

44 (Dandu nì cachi gá stná Esteban palabra yohó):

—Na ní sandoo xii-ndà mà yucù, nìsa icumi-né iin vehe sìcoto ndé nìsa cahvi-né Dios. Vàchi nì dandacú-yá nùù Moisés ñà-quidavàha-ne vehe ì mà, te ndudava xì ñà-nduá nì dácùnì-yànè antes. Ñàyùcàndùá, nì cuyucun vehe ma.

45 Daaní, después nì ndòà nùù dèhe xii-ndà mà. Te nècuàchìmà, nsidá-néà nì quesaa-nè xì Josué ladu nación yohó ndé nì sandoo nèhivì cuàhà inga raza. Doco nì cacuxio nèhivì mà nùù ñuu-nè yohó, te nì nandua ñuu xii-ndà, vàchi nì chindee Dios xii-ndàmà ní taxi-né nècuàchìmà. Ñàyùcàndùá, ñuu yohó nì ndòò vehe ì mà inii tiempu dècuèndè tiempu xi David.

46 Te David mà, nì xini màni Dios-nè. Ñàyùcàndùá, nì xicàn tàhvi-né nùù-yá, áma cuáha-ya lugar quidayucun-nè iin veheñùhu cahnú xí-yá, vàchi divi-ya nduú ana cahvi nsidaa descendencia xi xii-né Jacob.

47 Doco (màdì mii-né, sino que dèhe-ne) Salomón nduú ana nì nihítàhvi nì quidayucun xì veheñùhu cahnú-ma.

48 'Doco cunaha-nsiá, cahnú Dios icúmí-ndá, màdì cuisì veheñùhu ñuhivì yohó iá-yà. Còó, vàchi ducán nì cachi stná iin nècuàchì nì càhàn cuenta xi-ya sàhana, nì tiaa-ne palabra yohó ndé cachí-yà:

49 Na iin silla cahnú ndé ié` dandacuí, ducán nduú ansivi. Te nahi bancu tii ndé quetátú sàhì, ducán nduú ñuhivì. Ñàyùcàndùá, mà sàà nèhivì quidavàha-ne iin vehe cahnú ndé coi, vàchi màdì iin xaan-ni ié` quetátú.

50 Còó, yùhù nduú ana nì quida vaha xi ansivi xi ñuhivì; nsidaa ñá-jaàn nì quidavàhi xì ndahì, nì cachi Dios.

51 (Dandu nì cachi gá Esteban):

—Ndisa, ndee íni mii-nsiá. Có-nìhnú inì-nsia Dios, vàchi nahi tè-siùmí xínduu-nsia, ñàyùcàndùá mà túha-nsia cunini-nsia. De por sí, xini ùhì-nsià Espíritu ìi xì Dios; vàchi divi nacua nìsa quida xii-ndà sàhana, ducán quidá stná mii-nsiá vichi.

52 Vàchi nècuàchì yucán, quini ga nì quida-ne xì nsidaa nècuàchì nìsa càhàn cuenta xi Dios, nì sahnì-né nècuàchìmà, mate nduú nècuàchìmà ana nì cachitnùhu ñà-icúmí quixi mii-yá ana ndàà cuisì inì-xi. (Daaní, na ní quesaa-yà), divi mii-nsiá nì cahin xì-yá, te nì sahnì-nsiáyà.

53 De por sí, có-cùnì dahuun-nsia chivàha-nsia ley xi Dios, mate ángel ndiaha nì sàha xi-nda ley mà.

54 —Ducán nì cachi Esteban xì nèhivì yucán.

Nansa nì sahnì nèhivì Esteban xì yùù

Dandu nèhivì iníní má, yáha ga nì caxidà ini-nè, nì saxìndiàá stnahá nùhu-ne.

⁵⁵ Doco Esteban, chitu anima-nè Espíritu Ìì xí Dios. Dandu nì indehè-né dìquì-xí ansivi, te nì xini-nè tnúù ndiaha ndé iá Yua-nda Dios, te yucán iín Jesús ladu cuahá-yà.

⁵⁶ Dandu nì cachi-nè:

—Cundehè-nsiá, nuná ansivi indéhi, te yucán ladu cuahá Yua-nda Dios iín mii-yá ana nduú Tnaha Ndiaha Nèhivì Ñuhiví.

⁵⁷ Doco nèhivì yucán, ndee cána dana-ne, te sadí ndahà-né tùtnù-né, cuàhàn nsidaa-né carrera ndé iá nècuàchìmà.

⁵⁸ Nì tavà-ñané ñuu mà ñà-cahni-ñánê xì yùù. Te tiàa nì càhàn tnùhù sàhà-né, nì tavà-né dùhnù-né, nì ndòa nùù iin tiàa chiì nani Saulo.

⁵⁹ Dandu nì quesaha-né nì cani-ne cuàhà yùù dìquì nècuàchìmà ñà-cui-nè. Doco mii-né, nì ndacùcahan-né Jesús, cachí-nè:

—Stoho-nsì Jesús, jsà-íá natnii-ní anímè!

⁶⁰ Dandu nì sàcuììn sìsì-né, te nì ndàhì ndee-né, cachí-nè:

—Stoho-nsì Señor, xícàn tàhví nùù-ní ñà-màsà quíhín cuenta-ní sàhà cuàchi quidá nèhivì yohó xí.

Te na ní nsihì nì cachi-nè ducán, dandu nì ndàhvà-ne ñuhiví, na ian nì quidì-nè.

8

Nansa nì sanchicùn Saulo nèhivì cahvi xi Jesús ñà-dandohó-né nècuàchìmà

¹ Te Saulo mà, cudì stná ini-nè ñà-nì xihì Esteban ducán. Daaní, divi quivì yucán nì quesaha nì cucuahà gá sàhà nècuàchì nchícùn ichì Jesús. Nì quesaha nèhivì dava ga dandohó-né nsidaa nèhivì xí-yá ndoó ñuu Jerusalén. Ñàyùcàndüá, nì xinudèhé nècuàchìmà, cuàhàn-nè inicutu ladu Judea xi ladu Samaria. Doco nècuàchì apóstol, còó, cónì xitià-nè.

² Daani, (nì nsihì nì sahnì nèhivì Esteban), dandu nì casaà dava nècuàchì nihnú vaha ini xì Dios, nì (nsiquihin-ne ndómà), te nì sùxin-nèndó. Te cuàhà gá nì casacu-ne sàhà-ndà.

³ Doco Saulo, yáha ga nì quida quini-ne xì nsidaa nècuàchì nchícùn ichì Jesús, vachi vehe vehe nì xicanuu-ne, nì quíhvi-ne nì tavà-né nècuàchìmà, tiàa-ne te ñahà-né, te ñuhú-né nècuàchìmà nì sàhàn nì chicadi vaha-ne.

Nansa nì xitià nihni razón ndiaha ndé ladu ñuu Samaria

⁴ Doco nècuàchì nì xitià mà, inicutu nì sàhàn-nè nì dàcuítia-nè razón ndiaha xí Dios.

⁵ Iin nècuàchìmà nani Felipe, te divi-ne nì sàhàn iin ñuu iá ladu Samaria. Te yucán nì càhàn-nè sàhù sàhà Cristu.

⁶ Te nì nataca cuàhà nèhivì ñuu mà, nì inini vaha nsidaa-né ñà-ndüá nì cachi Felipe, vachi nì xini stná-nè milagru nì quida nècuàchìmà,

⁷ vachi nì dánduvàha stná-nè cuàhà nèhivì ñuhú ñà-malu inì-xi. Caná fuertèa nì caquea ini-nè. Te nì nduvàha stná cuàhà nècuàchì nì dàñà ìi cuerpu xi, xì cuàhà gá stná nècuàchì xicá cuéhê.

⁸ Ñàyùcàndüá, nì cudì sàstnùhù ini nècuàchì ñuu mà.

⁹ Doco yucán iá stná iin tiàa nani Simón. Sà-íá cuà iá-te ñuu mà. Tètàtnà tàdí nduú-te, te dandahví uun-tè nèhivì ladu yucán, vachi cachí-te xi-né ñà-chuun cahnú ndüá nì nihitàhvi-té.

¹⁰ Ñàyùcàndüá, nsidaa nèhivì ñuu mà, xiníndísâ-né yuhù-té, nècuàchì ndahví te nècuàchì cuicà, nsidaa-né tuxí ini-nè ndudu ndiaha xí Dios icúmí-té.

¹¹ Ñàyùcàndüá, cahvi váha-nète, vachi caní tiempu dandahví-tené xì tàtnà xí-te.

¹² Doco na ní sàa Felipe yucán, te nì dàtúi-ne razón ndiaha sàhà ñuhivì ìì xí Dios xì sàhà ichì Jesucristu, dandu nì xinindisá cuàhà nècuàchìmà, te nì cuhì stná-nè, tiàa-ne te ñahà-né.

¹³ Dècuèndè stná Simón mà, nì xinindisá stná-te, te nì cuhì stná-te. Dandu iin-ni nì tenchicùn stná-te Felipe, ndulócô cuàhà-té, vàchi nì xinì-te cuú cuàhà milagru ndiaha, cuàhà milagru fuerte.

¹⁴ Daaní, nècuàchì apóstol ndoó ñuu Jerusalén, nì xinitnùhu-ne ñà-nduá nì cuu ladu Samaria yucán, ñà-sàni xinindisá cuàhà stná nècuàchì ladu yucán ñà-nduú palabra ì xí Dios. Ñàyùcànduá, nì techuún-né compañeru-nè Pedro xì Juan

¹⁵ ñà-cùhùn-nè ñuu mà, te càcàn tàhvì-né nùu Dios sàhà-ñá nandèe stná Espíritu ì xí-yá ini anima nsidaa nècuàchì yucán.

¹⁶ Vàchi tàñáha ga nìhítàhvì nècuàchìmà Espíritu ì, cuisì-ñá nì cuhì-né na ní xinindisá-né Stoho-ndà Jesús.

¹⁷ Ñàyùcànduá, nì sàa Pedro xì Juan yucán, te nì chitàndòó-né ndahà-né dìni nècuàchìmà, te nì nandèe Espíritu ì xí Dios ini anima-nè.

¹⁸ Doco Simón ma, na ní xinì-te nansa nì nìhítàhvì nècuàchìmà Espíritu ì xí Dios ñà-nì sàcùtandoó ndahà apóstol dìni-né, dandu nì cahìn-te dìhùn nùu nècuàchìmà,

¹⁹ cachì-te:

—Cuàhatahvì stná-nsià yùhù ndudu ì mà, vàchi cuní stnài chitàndòí ndahí dìni nèhivì, te nìhì stná-nè Espíritu ì xí Dios —nì cachì-te.

²⁰ Doco nì cachi Pedro xì-té:

—Nì sàa-ní ndañuhu dahuun-ní xì dìhùn xí-ní ñà-tùxí inì-ní vètùni cuyàhvì tàhvì ndiaha-nda nùu Dios.

²¹ Có-nduá ducán cucuu-ní xì chuun yohó, vàchi anima chicuéhè icúmí-ní nùu mii-yá.

²² Te vichi xiñuhu cuu-ní arrepentir sàhà cuàchi nì quida-ní, te càcàn tàhvì-ní nùu-yá, áma cuícáhnù ini-yà sàhà-ní ñà-nì nacani quini guá inì-ní.

²³ Vàchi sàni cundaà inì, cuàhà gá cúmbidia inì-ní, te ñuhú inì-ní, vàchi sadí cuàchi-ní nùu-ní —nì cachi Pedro.

²⁴ Dandu nì cachi Simón mà:

—Càcàn tàhvì-nsià nùu Stoho-ndà Señor sàhí ñà-màsà cúú xí ni-iñàha nacula nì cachi-nsià jaàn.

²⁵ Daaní, Pedro xì Juan, chicá nì càhàn gà-nè (xì nècuàchì ñuu mà) palabra ì xí-yá sàhà ichì ndiaha Stoho-ndà Señor.

Dandu mànuhù cuéyàà-nè ñuu Jerusalén, nì yàha-ne cuàhà ñuu cuati ndé ndoó nècuàchì samaritanu, te yucán nì càhàn stná-nè xì nèhivì mà ñà-nduú razón ndiaha xí mii-yá.

Nansa nì xinindisá iin nècuàchì ñuu Etiopía

²⁶ Dandu nì quixi iin ángel xì Stoho-ndà Señor, nì càhàn-nè xì Felipe, cachì-nè:

—Quihin-ní ichì cuahán-ní ladu sur ndè cachi sàa-ní ichì cuàhàn ñuu Jerusalén xì ñuu Gaza; te ichì yucán, yucù nduá.

²⁷⁻²⁸ Ñàyùcànduá, nì quihin nècuàchìmà ichì cuàhàn-nè. Te cunaha-ní, yucán yáha stná iin tìaa ñuu Etiopía. Iin nècuàchì eunuco nduú-né, te chuun cahnú nihí-né nùu Candace, divi ñahà dandacú nùu ñuu Etiopía yucán, vàchi ana ndiaá xì ñà-cuicà ñahà mà nduú-né. Te vichi sàmànùhù-né ñà-nì sàhàn-nè ñuu Jerusalén nì cahvi-né Dios. Te xicá-né carreta xi-ne, cahví-né tutu ì nì tìaa profeta nani Isaías.

²⁹ Dandu Espíritu ì xí Dios, nì càhàn-yà xì Felipe, cachì-yà:

—Cuahán ndé cuàhàn carreta yucán, cutnahu xì nècuàchìmà cùhùn.

³⁰ Ñàyùcànduá nì dàyáa Felipe nì sànihi-né carreta mà, te nì tiacu-nè cahví nècuàchìmà tutu nì tìaa Isaías. Ñàyùcànduá, nì xicàn tnùhù-né nùu nècuàchìmà:

—¿A sànihi inì-ní ñà-nduá cahvi-ní, á cóó?

³¹ Dandu nì cachi nècuàchìmà:

—Còó, mà cúí, vàchi còò iin cachi xí nansa cuní cachà sàhà-ñá ducán mànihi inì.

Dandu nì sàcùndàhvì nècuàchìmà nùu Felipe ñà-nì nàná stná-nè nùu carreta, te cutnahá-né cundoo-ne mà.

³² Te tutu ì cahví nècuàchìmà, dohó cachí meru ndé cahví-né:
Na ian ndaca-nda iin riì cuàhàn-si ndé cui-si, ducán nì saca stná-te ndómà cuàhàn ndé
cui-ndà, te divi na ian cuhíhín iin riì tì na dátê-si, ducán nì quida stná ndómà, cóni
cáhàn-ndà.

³³ Doco nèhivì, nì cahíchì ini-nèndó. Ndahví nì quida-ne, nì dàtnátuu-nèndó nùu juez, te
nì dàcuídá cuàchi uun-nèndó, mate còò cuàchi-nda, dandu nì sahnì-nèndó. Te vichi mà
cóó gá ni-iin descendencia xi-nda cahan nèhivì, (cachí tutu mà).

³⁴ Dandu nì cachi nècuàchìmà xì Felipe:

—Quida sacù-ní favor, cachì-ní xì; ¿Índù nèhivì cáhàn tutu yohó sàhà-xì? Isaías nì tiaa
xán, doco ¿a divi mii-né cáhàn sàhà-xì, te ò sàhà inga-nè?

³⁵ Dandu nì quesaha Felipe nì nacani-ne ñà-nduá cuní cachi palabra meru ndé cahví
nècuàchìmà, te nì cachitnùhu nsihi-ne nansa iá ichì Jesús.

³⁶ Daaní, nì casaà-nè iin xaan ndé ñuhú tècuí. Te nì cachi tiàa ma:

—Cundehè-ní, yucán ñuhú tècuí. ¿A iá ñà-cùmání quide? vachi cuní cuhì stnàì vichi.

³⁷ Dandu nì cachi Felipe:

—Nú ndisa, iin-ni nihnú vaha inì-ní, vètùni.

Dandu cachí nècuàchìmà:

—Yùhù xiníndísé Dèhemani Dios nduú Jesús.

³⁸ Ñàyùcànduá, nì dandàcú nècuàchìmà ñà-cucuiin carreta xi-ne, te nduì-nè nì nuu-ne
cuàhàn-nè ndé ñuhú tècuí mà. Te nì quida ì Felipe nècuàchìmà.

³⁹ Dandu nì caquee-ne nùu tècuí mà mànana-ne. Te na iin cachí nì ndiachi Felipe
nì quida Espíritu Ì xì Stoho-ndà Señor cuàhàn-nè, nì ndañuhu-né nùu vista xi inga
nècuàchìmà. Ñàyùcànduá nì quihin tu nècuàchìmà ichì mànuhù-né, cudí gá stná ini-nè.

⁴⁰ Daaní, Felipe, ndé ñuu Azoto nì natù-ne, te ñuu ñuu nì yàha-ne, dacuítia-nè razón
ndiaha xì Dios dècuèndè nì sàà-nè ñuu Cesarea.

9

Nansa nì quihvi Saulo ichì Jesús

¹ Daaní, Saulo, iin-ni xidà sàstnùhù ini-nè sàhà nècuàchì nchícùn ichì Stoho-ndà Señor.
Dana cáhàn-nè, cuàhàn-nè cahnì nsihí-né nècuàchìmà, cachí-nè. Ñàyùcànduá nì sàhàn-nè
nùu dùtù cusáhnù,

² nì xicàn-nè tutu cunihi-ne cùhùn ñuu Damasco (cahvi nècuàchì dandacú) nùu
veheñuhu xi nèhivì raza-nè yucan sàhà-ñá ducán nihì-né permisù nanducu-né nèhivì
nchícùn ichì Jesús, te màcùnuhni nècuàchìmà quixi-ne presu ñuu Jerusalén, tiàa o ñáha
nì cùndúú-né.

³ Ñàyùcànduá, nì quihin Saulo ichì cuàhàn-nè ñuu Damasco mà. Te sà-ítuú-né sàà-nè
ñuu mà, dandu na iin cachí ndé dìquì-xì ansivi nì tnùu fuerte iin luz.

⁴ Te nì sàcasàn-né ñuhù nì quidamà, te nì tiacu-nè cáhàn iin ana cáhàn cachí xì-né:

—¡Saulo, Saulo! ¿Índù chuun nchícùn-ní yùhù quida quini-ní xì?

⁵ Dandu nì cachi Saulo:

—¿Ana nduu-ní, Señor mío?

Te nì cachi tu-ya:

—Yùhù nduú Jesús, divi ana dandoho-ní. Doco mii-ní quidá quíni-ní xì mii-ní, na ian
quidá quisì caní sàhà nùu garrocha —nì cachi-yà.

⁶ Dandu Saulo, ndé quidí cuisì-né ñà-yúhî guâ-nè, te nì cachi-nè:

—¿Ndíà nduá cuní-ní quide, Señor mío?

Dandu cachí tu Stoho-ndà Señor xì-né:

—Ndacuiin-ní, cuahán-ní ñuu Damasco, te yucán ndacu nuè-ní nansa quida-ní —nì
cachi-yà.

⁷ Doco tiàa xícutnaha-xi-né cuàhàn ichì mà, nì yùhí cuaá-te, vachi nì inini-tè iá ana nì
càhàn, doco còò iin tuí.

⁸ Dandu nì ndacuiin Saulo, te nì nacuna-ne nduchìnúù-né, doco mànicùí gá cundehe-né, (vàchi sàni cuaà nduchìnúù-né). Ñàyùcàndùá íditá ndahà tnahá-né nì sàà-nè ñuu Damasco.

⁹ Te yucán nì ìa-ne ùni quivì, có-tùínúù-né, có-xixí-né, ni có-xihí stná-nè tècuíí.

¹⁰ Te ñuu mà íá stná iin nècuàchì nchícùn xì Stoho-ndà Jesús nani Ananías. Te nì dàcùnì Jesús-nè mii-yá, cachí-yà xì-né:

—¡Ananías!

Te nì naxiconihí-né nùù-yá, cachí-nè:

—Yohó íé, Señor mío.

¹¹ Dandu nì cachi Stoho-ndà Señor xì-né:

—Quihin-ní ichì cuahán-ní calle nani Calle Ndàà, te yucán nanducu-ní iin tiàa nani Saulo. Iin nècuàchì ñuu Tarso nduú-né, te íá-nè vehe iin nèhivì nani Judas. Te vichi íá-nè xícàn tàhvì-né nùí.

¹² Te quivì vitni nì xini-nè iin seña na ian sání-nè, te nì xini-nè mii-ní nì quìhvi-ní ndé íá-nè, te nì chitándòò-ní ndahà-ní òdì-né, te nì nihì-né nì natùinuù-né.

¹³ Doco nì cachi Ananías mà:

—Señor mío, cuàhà nèhivì sàni cachi-nè xì nansa quidá nècuàchì mà, ñà-cuàhà guá sàni dàndòhó-né nèhivì xì-ní ndoó ñuu Jerusalén.

¹⁴ Te vichi yohó sàni quesaa stná-nè nihí-né orden nùù dùtù xícusahnú ñà-tnii-ne nsidaa ana ndácùcahan xì quivì-ní.

¹⁵ Doco nì cachi Stoho-ndà Señor xì-né:

—Cuahán-ní, vachi sàni nacàxin nècuàchì mà sàhà ñà-quida stná-nè chuun xi, cùhùn-nè càhàn-nè sàhù sàhí nùù nèhivì ndoó cuàhà inga ñuu, xì nùù stná tè-xídandacú yucán, xì nùù stná nècuàchì Israel.

¹⁶ Te icúmì cachitnùhu stnàì xì-né ñà-cuàhà guá icúmì-nè ndoho-ne sàhí —nì cachi Jesús.

¹⁷ Ñàyùcàndùá, nì quee Ananías mà cuàhàn-nè vehe yucán, te nì yàha-ne ndé íá Saulo, nì chitándòò-né ndahà-né òdì nècuàchì mà, cachí-nè:

—Ñani Saulo, ichì vaxi-ní nì xini-ní Stoho-ndà Jesús. Pues divi-ya nì techuun-xí vaxi ndé íá-ní ñà-natùinuù-ní, te chitu stná anima-ní Espíritu Ìì xì-yá— nì cachi Ananías.

¹⁸ Daaní, vichi duha nì còyo ñà-sàdí nihni nduchìnúù Saulo, nahi chididà òdì nì sandua, te nì natùì dahuun nduchìnúù-né. Dandu nì ndacuiin-nè, te nì cuhii-né.

¹⁹ Te na ní nacuxi-ne, dandu nì ndundee ini-nè. Te divi ñuu Damasco mà nì ndòo-ne itnii gá quivì, nìsa ìa-ne xì nèhivì xì Jesús ndoó yucán.

Nansa nì càhàn Saulo palabra xi Dios ñuu Damasco

²⁰ Daaní, vichi duha nì sàhàn-nè iin iin veheñùhu xi nècuàchì raza-nè Judea, nì càhàn-nè sàhù sàhà Jesús ñà-divi Dèhemanì Dios nduú-yá.

²¹ Ñàyùcàndùá, cuàhà gá nì ndulocó nsidaa ana iní nì càhàn-nè, te nì ndàcàtnùhù tnahá-né nùù-nè, cachí-nè:

—¿Amádi nècuàchì yohó nduú tiàa nìsa ìa ñuu Jerusalén nìsa dandáñúhù guá xì nèhivì ndácùcahan xi quivì Jesús? Te ¿acónì quésáá stná-nè ñuu-ndà yohó ñà-tnii-ne nècuàchì mà, te cundaca-ñané presu nùhù ñuu Jerusalén ñà-cundoo-ne ndahà dùtù xícusahnú? —Ducán nì cachi nèhivì mà.

²² Doco Saulo, chicá ndee ní càhàn-nè xì nècuàchì raza-nè Judea ñuu Damasco mà, te nècuàchì mà, cóni nánihì tñuní gá ini-nè nansa naxiconihí-né, vachi claru nì dàtúì Saulo sàhà Jesús, ñà-divi rey ndiaha xì raza-nè nduú-yá.

Nansa nì càcu Saulo nùù nèhivì raza-nè Judea

²³⁻²⁴ Daaní, nì yàha caní quivì, dandu nì nataca dava tè-raza Judea mà, te iin-ni nì candatnuhu-té ñà-cahni-té Saulo. Ñàyùcàndùá, ndui te ñuú ndiatú-te yehè nahnú ñuu mà, áma níhì-té cahni-ténê. Doco nì xinitnùhu-ne nansa cuní tèmà quida-tè xì-né.

²⁵ Ñàyùcàndùá, ñuú nì saca nèhivì xí Jesús-nè, cuàhàn-nè dìquì nama ndiadí nùù ñuu mà, te yucán nì dànùú-ñánê yàtà nama mà, inácaa-nè ini iin icà sìcàté.

²⁶ Dandu mànuhù-né ñuu Jerusalén.

Ñà-nduá nì quida Saulo na ní nasaa-nè ñuu Jerusalén

Ñuu yucán nì cuni-nè nacuatnahá-né xì dava ga nèhivì xí Jesús, doco nsidaa nècuàchìmà, nì yùhí-nè, vàchi có-xiníndísá-né ñà-ndàà nduá nchícùn ndisa Saulo ichì mii-yá.

²⁷ Ñàyùcàndùá, nì saca Bernabé nècuàchìmà, te ndacá tnahá-né nì sàà nùù nècuàchì apóstol, nì nacani-ne xì nècuàchìmà nansa nì cuu na ní xini Saulo Stoho-ndà Señor, te nì càhàn-yà xì-né. Te nì nacani stná-nè nansa nì quida Saulo ñuu Damasco, nì càhàn vate cuàhà-né sàhà Jesús ñuu yucán.

²⁸ Ñàyùcàndùá, yucán nì ndò Saulo ñuu Jerusalén, xicánúú-né xì nèhivì xí Jesús.

²⁹ Te cuàhà gá nì càhàn-nè sàhà-yá, cóni yúhí-nè. Dècuèndè stná nècuàchì raza-nè càhàn dàhàn griegu nì càhàn stná xì-né, cuàhà gá nì ndatnuhu-né xì nècuàchìmà. Doco nècuàchìmà, cuisì xícuni-nè cahni-ñánê.

³⁰ Doco dava nèhivì cahvi stná xì Jesús, nì xinitnùhu-ne sàhà peligrù mà. Ñàyùcàndùá, nì saca-ne Saulo mà cuàhàn-nè ndè ñuu Cesarea, dandu mànuhù nècuàchìmà ñuu Tarso.

³¹ Daaní, inicutu ladu Judea mà, xì ladu Samaria, xì stná ladu Galilea, nì ndudadí uun; vátùni nataca cuéyàà nèhivì xí Jesús. Ñàyùcàndùá nì nacuaàhandee gá ini-nè, te chicá nì cahvi víi-né Stoho-ndà Señor, vàchi nì chindee stná Espíritu ìì xí-yá mii-né, te sàhámà chicá nì nducuahà-né.

Nansa nì nduvàha iin tiàa nani Eneas

³² Daaní, xicánúú Pedro visita inicutu ladu yucán, te nì sàà-nè iin ñuu tii nani Lida ñà-coo-ne visita xì nèhivì xí Jesús ndoó yucán.

³³ Te ñuu mà nì xini-nè iá iin tiàa nani Eneas; unà cuà indúhu-né cama, vàchi sàni dàña ìì cuerpu xi-ne.

³⁴ Ñàyùcàndùá, nì cachi Pedro xì-né:

—Cunaha-ní, Eneas: momentu yohó cuàhàn Jesucristu dandúvaha-ya mii-ní. Ñàyùcàndùá ndacuiin-ní, nsida vii-ní cama xi-ní.

Dandu momentu mà nì ndacuiin-nè.

³⁵ Te (nì xicanuu-ne) ñuu Lida mà, xì stná yodò nani Sarón, te nì xini nèhivì-né. Ñàyùcàndùá cuàhà nècuàchìmà nì tenchicùn stná-nè ichì Stoho-ndà Señor.

Nansa nì natiacu iin nècuàchì ñahà nani Dorcas

³⁶ Daaní, tiempu yucán nìsa ìa iin nèhivì xí Jesús ñuu Jope nani Tabita. Te Dorcas nduú quivì-né dàhàn griegu. Te cuàhà gá obra nìsa quida-ne; cuàhà gá nìsa chindee-nè nècuàchì ndahví.

³⁷ Doco quivì yucán nì quicuehè-nè, te nì xihì-nè. Ñàyùcàndùá, nì dàcùchí nèhivì nsì ma tècuí, te nì chinduhù-néndò iin quartu dìquì-xí pìsu ùì.

³⁸ Dandu nèhivì xí Jesús (ndoó ñuu mà), nì xinitnùhu-ne ñà-yatni uun iá Pedro ñuu Lida. Ñàyùcàndùá, nì techuún-né ùì tiàa nì sàhàn nì sacundahví xì nùù nècuàchìmà ñà-quixi-ne vichì duha.

³⁹ Ñàyùcàndùá, nì quihin Pedro ichì vaxi-ne cutnàhâ-né xì tiàa ma, te nì caquesaa-nè vehe nsii ma. Dandu nì saca nèhivì mà-né nì nana-ne ndè vehe dìquì-xí. Te yucán nì tnàtuu nsidaa nècuàchì ñahà cuàán, itá-né sacú-né, dacuní-nè Pedro vestidu-nè xì dùhnù-né, vàchi na nìsa itiacu nsì-Dorcas mà, nì sansicu-nda sìcoto xì nècuàchìmà.

⁴⁰ Dandu nì cachi Pedro xì nsidaa nèhivì mà ñà-nì cáquéé-né fuera. Te na sàni caquee-ne, dandu nì sàcuìin sísì Pedro, nì xicàn tàhvi-né nùù Dios. Te nì nacuíco-né, nì indehè-né ndé indúhu nsii ma, te nì cachi-nè xì ndómà:

—Ndacuiin-ní, Tabita.

Dandu nì nacuna nècuàchìmà nduchìnùù-né, te na ní xini-nè Pedro, nì ndacòo-ne.

⁴¹ Te nì chitanini Pedro ndahà-né nì ndacani-ne nècuàchìmà. Daaní, nì cana-ne nsidaa nècuàchì dava ga ñà-nansihvi-ne, divi ñahàcuàán mà, xi dava ga stná nèhivì xí Jesús. Te nì cachi-nè xì nècuàchìmà:

—Yohó iá Tabita xi-nsia; sàni natiacu-nè.

⁴² Ñàyùcàndüá, nì xitià cuentu mà inicutu ñuu Jope nansa nì cuu xi nsii ma, te cuàhà gá nèhivì nì xinindisa-xi Stoho-ndà Señor.

⁴³ Dandu después, caní quivì nì ndòo ga Pedro ñuu mà, iá-nè vehe iin tiàa nani Simón, iin nècuàchì tùha dachì iin.

10

Nansa nì sàcùnaha iin soldadu nani Cornelio ñà-cana-ne Pedro quixi-ne vehe-ne

¹ Ñuu Cesarea nì sandoo cuàhà soldadu. “Tè-italianu” nìsa cachi nèhivì ñuu mà xì soldadu ndoó yucán. Te iin capitán xi soldadu mà nani Cornelio.

² Mii-ne xì nsidaa stná nèhivì ndoó vehe-ne, xínduu-ne nèhivì tnùñuhu cahvi ndisa xi Dios, te chívaha ndisa-ne tnùñuhu xí-yá. Te dasán stná-nè cuàhà dihùn ñà-chindee xi nècuàchì ndahví, te nacuatú cuàhà stná-nè.

³ Te nì cuu iin quivì nahi càhùnì nì cuaà nì dàcùnì Dios-nè tuí ndáí vaxi iin ángel quíhvi-ne vehe ndé iá-nèmà, te nì cachi ángel mà xì-né:

—¡Cornelio!

⁴ Dandu nì indehè váha-ne ángel ma, te yúhì cuàhà-né; dandu nì cachi-nè:

—¿Ndíá iá, señor?

Te nì cachi ángel mà xì-né:

—Sàni inini Dios ñà-ndüá xícàn tàhvi-ní nùù-yá, te sàni natùì stná obra xi-ní nùù-yá.

⁵ Ñàyùcàndüá, vichi duha techuun-ní nèhivì cùhùn ñuu Jope, te cana-ní iin tiàa nani Simón Pedro quixi-ne.

⁶ Cunaha-ní, iá-nè vehe iin nècuàchì dachì xì iin quisi, te yuhù mar indúhu vehe nècuàchìmà. Pues divi Pedro mà icúmì cachi xì-ní nansa ndíá ìcà-ní quida-ní —nì cachi ángel mà,

⁷ te cuàhàn-nè.

Daaní, luegu nì cana Cornelio ùì mozo xi-ne tnàtuu-ne, te nì cana stná-nè iin soldadu xinúcuáchì nùù-né, vachi iin nècuàchì cahvi víi xi Dios nduú stná nècuàchìmà.

⁸ Dandu nì nacani nsihi-ne xì nècuàchìmà nansa nì cuu, te nì techuún-ñané cùhùn-nè ñuu Jope.

⁹ Daaní, nahi càxíhúi inga quivì na sá-itúú-né casaà-nè ñuu mà, dandu divi hora mà nì nana Pedro ònìvèhé ndé iá-nè, cuàhàn-nè càcàn tàhvi-né nùù Dios.

¹⁰ Dandu nì quesaha-né nì xihì cuàhà-né doco, te cunì-nè cuxi-ne. Ñàyùcàndüá, cuàhàn cuyucun ñà-cudamá-nè. Doco na táñâha ga coo listuàmà, dandu nì dàcùnì Dios-nè iin seña na ian sánî-nè.

¹¹ Nì xini-nè nì nuna ansivi, te yucán iá iin sìcoto na iin dahmà cácuñun nsì-cúmì punta-ñà dìquì-xí, mànuà dècuèndè ndé iá-nè.

¹² Te nì xini-nè ini dahmà mà ñuhú nsidanuu clase quisi; quisi nahnú, quisi cuàti, xì quisi nduú laa.

¹³ Dandu nì tiacu-nè cáhàn iin ana cáhàn xì-né, cachí-yà:

—Ndacuiin-ní cahni-ní quisi jaàn caxì-ní, Pedro.

¹⁴ Doco nì cachi Pedro:

—Còó, Señor mío, mà túhe caxí ñà-quini. Mà túhe caxí ñà-có-ndíá ìqué caxí.

¹⁵ Dandu cachí tu ana cáhàn xì-némà:

—Màsà cáhì-ní quini iá-sì, vachi Dios nduú yuhù, te sàni cachì, iá viì quisi jaàn —nì cachi-yà.

¹⁶ Ùnì xichi nì càhàn-yà ducán, dandu nì nana dahmà mà ansivi mànuhá.

17 Ñàyùcànduá, cuàhà gá nì nacani ini Pedro; ¿ndià nduá cuní cachàmà? cahan-né. Te divi hora daa sàni caquesaa tiàa nì techuún Cornelio, itá-né yehè, vàchi sàni ndàcàtnùhù-né nùu nècuàchì ñuu mà ndévi iá vehe Simón mà.

18 Ñàyùcànduá, meru cahan-nè yehè, xicàn tnùhù-né a divi vehe ma iá Simón Pedro, á coó.

19 Daaní, Pedro, iá-nè nacání vá ini-nè (ndià cuní cachi) ñà-nduá nì dàcùnì Dios-nè, te nì cachi Espíritu Ìì xì-né:

—Cunaha-ní, sàni quesaa ùnì tiàa cuní cahan xì-ní.

20 Ndacuiìn-ní, nuu-ní, te cuahán-ní xì-né. Màsà nácání inì-ní, vàchi yùhù nduú ana nì cana xì-né.

21 Ñàyùcànduá, nì nuu Pedro dècuèndè ndé itá tiàa vaxi nùu Cornelio mà, te nì cachi-nè xì nècuàchìmà:

—Amádi yùhù cuní-nsià cahan xì-nsiá. ¿Índù iin chuun nihí-nsiá vaxi?

22 Dandu nì cacachi nècuàchìmà:

—Nùu capitán Cornelio vaxi-nsi. Nècuàchì ndàa cuisì inì-xi nduú nècuàchìmà. Chívàha vii-né tnùñuhu xí Dios, te cuú ini nsidaa nècuàchì raza-ní Judea sàhà-né. Te iin ángel Ìì xí Dios nì cachi xì-né ñà-nì caná-né mii-ní cùhùn-ní vehe-ne cahan-ní xì-né cunini-ne —nì cacachi tiàa ma.

23 Dandu nì dàyáha Pedro tiàa ma ini vehe-ne, te yucán nì caquidì nècuàchìmà iin ñuu. Dandu inga quivì nì naquihin-ne ichì ndacá tnáhâ-né xì Pedro mànuhù. Te iin ùì nècuàchì ñuu Jope cahvi stná xì Dios, cutnáhâ stná-nè xì Pedro cuàhàn.

24 Dandu quivì ùì nì casaà-nè ñuu Cesarea. Te yucán ndiatú Cornelio vehe-ne, mii-né xì tnaha-ne, xì nsidaa stná nècuàchì chicá cutnáhâ vaha xì-né, vàchi sàni cana-ne nècuàchìmà ñà-quixi-ne vehe-ne.

25 Dandu nì sàa Pedro meru vehe ma, te nì quee Cornelio, nì casàhù-nè xì nècuàchìmà, nì sàcuìn sìsì-né nì cahvi-né nècuàchìmà.

26 Doco Pedro, nì ndacani-ne nècuàchìmà, cachí-nè:

—Ndacuiìn-ní, vàchi na tiàa nduú mii-ní, ducán tiàa nduú yùhù.

27 Dandu nì quesaha-né ndatnúhù-nè xì nècuàchìmà, te ducán nì cayàha-ne ini vehe, te nì xini Pedro cuàhà gá nèhivì sàni nataca ndòò-mà.

28 Dandu nì cachi-nè xì nsidaa nècuàchìmà:

—Mii-nsiá, sà-ináhâ-nsiá nansa iá ley xí nsiuhù tè-nduú raza Judea, ñà-có-sàha ley xi-nsi nacuatnahá-nsí xì nèhivì inga ñuu (nahi mii-nsiá). Ni còò stná permisú yàha-nsí vehe-ne. Doco vichi sàni sàni nì cundaà inì nì quida Dios ñà-mà váha cachi-ndà xì nèhivì inga ñuu ñà-có-xiñùhù Dios-nè, te ò nècuàchì sìquini nduú-né. Còó.

29 Ñàyùcànduá, na ní cana-nsia yùhù quixi, cóni cachi á coó. Vichi duha nì quihin ichì váxi. Ñàyùcànduá, cuní cundaà inì ndià nduá dísáhâ-xí nì cana-nsia yùhù.

30 Dandu nì cachi Cornelio:

—Cunaha-ní, sàcuàhàn-ndà cùmì quivì, divi hora yohó nahi cahunì nì cuaà nì sandua. Te iníhí' iá dòquí, te xicàn tàhvi nùu Dios. Dandu yucán nì ndecunu iin tiàa nì xini, ndiaha gá nchií sìcoto xi-ne.

31 Te nì cachi-nè xì: “Cornelio, sàni tiacu Dios xicàn tàhvi-ní nùu-yá, te sàni natùì stná obra xi-ní nùu-yá.

32 Ñàyùcànduá, techuun-ní nèhivì cùhùn ñuu Jope, te cana-ní iin tiàa nani Simón Pedro; iá-nè vehe inga Simón, iin nècuàchì dacáhi xì iin. Yuhù mar nduú vehe-ne. Te nú sàni quesaa-nè yohó, dandu icúmí-nè cahan-nè xì-ní”.

33 Ñàyùcànduá, vichi vichi nì dásàl razón ñà-quixi-ní. Te vátùni nì quida-ní nì que-saà-ní. Te vichi, yohó ndoó nsidaa-nsí nùu Dios ndiatú-nsí cunini-nsi nsidaa ñà-nduá sàni cachi Dios xì-ní —nì cachi Cornelio.

Ñà-nduá nì cachi Pedro na iá-nè vehe Cornelio

34 Dandu nì cahan Pedro xì nsidaa nècuàchìmà, cachí-nè:

—Vichi sàni cundaà inì, ñà-ndàà nduá, có-càhíhì ini Dios ni-iin nèhivì.

³⁵ Vàchi có-quidá mà, nú cuisì cahvi víi iin nèhivì mii-yá, te quidá víi-né, dandu icúmí-né ndee vaha-ne nùu-yá, mate nèhivì ndéni ñuu nì cui nì cúndúú-né.

³⁶⁻³⁷ Te mii-nsiá, sà-ináhá-nsiá ñà-nduá nì cachitnùhu Dios xì raza-nsì Israel, nì dàquésáá-yà iin razón ndiaha nansa nàcùndoo vaha-nda nùu-yá quida Jesucristu. Te Jesucristu, Stoho nsidanicuú nèhivì ñuhiví nduú-yá.

Pues ináhá vaha-nsia ñà-nduá nì cuu, ñà-dihna Juan nì quixi nì càhàn xì nèhivì, te nì quida ìi stná-nè nècuàchìmà. Daaní, ndè ñuu Galilea nì quesaha chuun xi Jesús de Nazaret, te dècuèndè inicutu ladu Judea nì xitià stná palabra sàhà chuun ma.

³⁸ Te ináhá stná-nsiá nansa nì quida-ya, nì nihì fuerte-yà Espíritu Ìi xí Dios. Ñàyùcànduá, nì xicanuu-ya nì quida-ya milagru ndiaha, nì dándúvaha-ya nsidaa ana ndohó quidá ñà-malu, vachi Yuamáni-yá Dios íá xì-yá.

³⁹ Te nsiùhù, testigu xínduu-nsi, vachi nì xininùu-nsí nsidaa ñà-nduá nì quida-ya ladu Judea xì stná ñuu Jerusalén. Dandu nì sahnì nèhivì-yá. Nchìca cruz nì chituu-neyà.

⁴⁰⁻⁴¹ Doco tixi ùnì quivì nì natiacu-yà nì quida Yua-yá Dios. Dandu cuàhà xichi nì ndecunu-ya nùu nèhivì, doco màdì núu nsidaa-né. Còó, cuisì nùu nsiùhù nècuàchì nì chitnùnì ini Dios ndecunu-ya nùu-xí, vachi divi nsiùhù nì nacàxin-ya cunduu ana cuninùu xì-yá na ní natiacu-yà, dècuèndè nì cutnahá stná-yà xì-nsí nì xixi-nsi (nùu mesa).

⁴² Dandu nì sàcùnaha-nsí nùu-yá ñà-dacúitià-nsi palabra sàhà-yà nùu nèhivì, cachi-nsi xì-né ñà-divi mii-yá nì chitnùnì ini Dios nsidandaà sàhà cuàchi nsidanicuú nèhivì, nèhivì itiácú, xì nèhivì sàni xihì.

⁴³ Te cunaha-nsiá, divi sàhà mii-yá nì cachitnùhu stná nsidaa nècuàchì nìsa càhàn cuenta xi Dios sàhana, nì cachi-nè ñà-sàhà mii-yá vètuni ndoo cuàchi nsidaa ana cunindisa-xi-yá, te ndacùcahan xi quivì-yá —nì cachi Pedro.

Nansa nì ndè Espíritu Ìi xí Dios ini anima nèhivì inga raza ndoo vehe Cornelio

⁴⁴ Daaní, meru càhàn Pedro, dandu fuerte nì quixi Espíritu Ìi xí Dios ini anima nsidaa nècuàchì (inga raza) iníní má.

⁴⁵⁻⁴⁶ Te nì quesaha ní càhàn-nè dàhàn sàà, ndeníhì vaha-ne Dios. Ñàyùcànduá nì ndulocó nècuàchì raza Judea nì quixi xi Pedro, vachi nì xini-nè dècuèndè stná nècuàchì inga raza sàni nihítàhvì Espíritu Ìi xí Dios.

⁴⁷ Ñàyùcànduá nì cachi Pedro xì nècuàchì raza-nè xiníndísá-má:

—Sàni xini-nsiá nansa nì nihítàhvì stná nècuàchì yohó cucumi-né Espíritu Ìi xí Dios nahi nsiùhù. Ádi còó iin cuní cadi xì nùu-né ñà-cuhì-né vichi.

⁴⁸ Dandu nì cachi Pedro xì compañeru-nèmà ñà-nì ndacùcahan-né quivì Jesucristu, te quida ìi-né nècuàchì sàà mà. Ñàyùcànduá, na ní nsihi nì cuhì nsidaa nècuàchìmà, dandu nì sacundahví-nè nùu Pedro ñà-nì còó chii gá-nè iin ùi gá quivì xì-né.

11

Ñà-nduá nì cachi Pedro na ní càhà-né nùu nècuàchì xiníndísà ndoo ñuu Jerusalén

¹ Daaní, nì xitià cuentu nansa nì cuu nì xinindisá stná nècuàchì inga raza mà. Dècuèndè stná ladu Judea nì sàà razón mà, te ñàyùcànduá nì xinitnùhu stná nècuàchì apóstol xì dava ga nècuàchì xiníndísà.

² Sàhájàn na ní nasaa tu Pedro ñuu Jerusalén, dandu nì tnàtuu cuàhà nècuàchì raza-nè nùu-né, te nì quesaha-né xítñuhu-ñané,

³ cachí-nè:

—¿Índù chuun nì quihitnaha-ní xì nècuàchì có-nchícùn ley xi-nda, te nì yàha-ní vehe-ne nì xixi-nsia?

⁴ Dandu nì nacani nsihi Pedro xì nècuàchìmà nansa nì cuu, te dohó nì cachi-nè:

5 —Ñuu Jope ié' xícàn tàhví nùù Dios, te nì dàcùnì-yà yùhù iñàha. Nì xini iin ñà-ndùù nahi dahmà cahnú cəcùhun nsi-cúmì punta-ñà dìquì-xí, te ndè ansivi nì nua vaxan ndé ié'.

6 Indéhe váhi, te nacánì inì, ¿ndià nduá ñuhuma? Te yucán ñuhú nsidanuu clase quisi: quisi nahnú, quisi yùcù, quisi cuàtì, xì stná laa.

7 Dandu nì tiacùi cáhàn iin ana cáhàn, cachí-yà xì: “Ndacuiìn-ní cahnì-nísi caxì-ní, Pedro”.

8 Doco nì cachì xì-yá: “Còó, Señor mío, mà túhe caxí ni-iin ñà-quini, ni-iin ñà-có-ndiá iqué caxí”.

9 Dandu, inga xichi nì cáhàn-yà ansivi, cachí-yà xì: “Màsà cachì-ní quini iá-si, vèchi Dios nduú yùhù, te sàni cachì, iá vii-sí”, nì cachì-yà.

10 Ùni xichi nì cáhàn-yà xì ducán, dandu nì nana dahmà xì quisi mà mànuhá ansivi.

11 Daaní, divi hora yucán sàni quesaa ùni tiàa, itá-né tùvèhé ndé ié'. Ndè ñuu Cesarea nì quixi-ne nandúcú-né yùhù.

12 Dandu nì cachì Espíritu Ì xì: “Cuahán-nì, cutnaha-ní xì nècuàchìmà cùhùn, doco màdí cachì-ní a ndísá, á coó”. Dandu ní saqui iñù compañerú iin-ni cahvi stná xì Jesús, divi nècuàchì itá yohó, te ndacá tnahá-nsí cuàhàn-nsì (ñuu yucán. Te na ní sàa-nsì), nì quìhvi-nsi ini vehe tiàa nì cana xí.

13 Dandu nì nacani-ne xì-nsí nansa nì cuu nì xini-nè iin iin ángel xi Dios ini vehe-ne, te nì cachì ángel mà xì-né: “Techuun-ní tiàa cùhùn ñuu Jope cana-ní Simón Pedro quixi-ne,

14 vèchi icúmì Pedro mà cachitnùhu-ne xì-ní iin razón ndiaha nansa càcu anima-ní nùù Dios, mii-ní xì nsidaa stná nèhivì vehe-ní”, nì cachì ángel mà.

15 Daaní, làcà ní quesahí cáhàn xì nèhivì ndoó yucán, te fuerte nì quixi Espíritu Ì xì Dios dìquì-né, nacua nì quida-ya xì ndohó daa.

16 Dandu ní nsinuu inì nansa nì cachitnùhu Stoho-ndà Señor xì-ndà na ní cachì-yà: “Ñà-ndàà nduá, tècuìl nisa quida ì Juan nèhivì, doco mii-nsiá, tixi Espíritu Ì xì Dios icúmì-nsiá nduhì-nsiá”, nì cachì-yà.

17 Pues divi ducán ndisa nì cuu stná xì nècuàchì inga raza mà, nì nìhítáhvì stná-nè Espíritu Ì xì Dios nacua nì nìhítáhvì ndohó na ní xinindisa-nda Stoho-ndà Jesucristu. Ñàyùcànduá, (nì cundaà inì), divi Dios nduú ana nì quida xi ñà-jaàn, te sàhámà nì nacani inì chicá vaha màsà càdì nùù-yá —nì cachì Pedro.

18 Dandu na ní nsihi nì inini nècuàchì Jerusalén mà palabra jaàn, dandu nì ndòo vaha ini-nè, te nì naquimanì-né Dios, cachì-nè:

—Pues ñà-ndàà nduá, dècuèndè stná nècuàchì inga raza sàni nìhítáhvì ñà-cuu-ne ar-repentir sàhà cuàchi-ne, te ducán cundiatú-nè vida ndiaha nicanicuahàn —nì cachì-nè.

Nansa nì xinindisá stná nèhivì ñuu Antioquía

19 Cunaha-ní, divi tiempu nì casahnì nèhivì Esteban nì quesaha stná-nè quida quini-ne xì nsidaa gá nèhivì xì Jesús. Ñàyùcànduá, cuàhà nècuàchìmà nì xitià nihni cuàhàn cuàhà ñuu. Dècuèndè stná ñuu Fenecia nì casaà dava-ne, xì ndè stná ñuu Chipre, xì ñuu Antioquía. Te yucán nì cáhàn stná-nè palabra xi Dios, doco xi cuisì nècuàchì raza-nè Judea.

20 Daaní, dava nècuàchì ñuu Chipre xì dava stná nècuàchì ladu Cirene, nì casaà stná-nè ñuu Antioquía mà, te mii-né, ndisa, nì cáhàn-nè xì nèhivì ñuu mà có-nduú raza Judea, nì cachitnùhu-ne ñà-nduú razón ndiaha sàhà Stoho-ndà Jesucristu.

21 Te cuàhà gá nì chindee-yánè, vèchi cuàhà nècuàchì ñuu mà nì xinindisá, te nì tenchicùn stná-nè ichì-yá.

22 Daaní, nì xinitnùhu stná nèhivì xì Jesús ndoó ñuu Jerusalén nsidaájàn. Ñàyùcànduá, nì techuún-né Bernabé cuàhàn-nè Antioquía.

²³ Te na ní sàà-nè yucán, yáha ga nì cudì ini-nè na ní xini-nè ñà-cuàhà guá gracia sàni sàhatahvì Dios nèhivì yucán. Ñàyùcàndùá, nì càhàn-nè xì nècuàchìmà ñà-siempre Stoho-ndà Señor nì cahvi xi-né.

²⁴ Vàchi Bernabé mà, vaha ndisa ini-nè, vachi chitu anima-nè Espíritu Ìi xí Dios, te xiníndísá fuerte-nèyà. Te cuàhà gá stná nèhivì ñuu mà nì tenchicùn xì ichì-yá.

²⁵ Dandu nì quihin Bernabé mà ichì cuàhàn-nè ñuu Tarso nandúcú-nè Saulo. Te na ní ndacùhun tnahá-né, nì nacuatnahá-né màndixi-ne ñuu Antioquía.

²⁶ Daaní, inii iin cuà totoo nì nataca-nè xì cuàhà nèhivì xí Jesús, nì dàcuàhá tnahá-né. Te cunaha-ní, divi ñuu Antioquía mà nduú ndé nì quesaha nèhivì cachí-nè cristianu xì nècuàchì nchícùn ichì Jesús.

²⁷⁻²⁸ Daaní, quìvì yucán nì casaà stná itnii nècuàchì profeta ñuu mà. Ñuu Jerusalén nì quixi-ne. Te iin-ne nani Agabo; te divi nècuàchìmà nì sàcuìn-nè mahì nèhivì natácá mà, te nì dàcàhàn Espíritu Ìi xí Dios-nè, nì cachitnùhu-ne ñà-vàxi tnama inicutu ñuhivì. Te ñà-ndáà nduá, vachi ducán nì cuu ndisa tiempu xì rey cahnú nani Claudio.

²⁹ Ñàyùcàndùá, (na ní tiacu) nèhivì (ñà-vàxi tnama), dandu nì nacani ini-nè chicá vaha chindee-né nècuàchì hermanu (ndahví) ndoó ladu Judea, vátùni cuàha iin iin-ne iyuhu según ñà-nduá sàà-nè cuàha-ne.

³⁰ Ñàyùcàndùá, nì nacuatnahá dihùn, te nì quida-neà entregar nùu ndahà Bernabé xì Saulo. Dandu nècuàchìmà, nihí-néà nì sàà (ladu Judea), te nì ndòà ndahà nècuàchì sahnú idónuu.

12

Nansa nì xihì Jacobo, te nì tniì stná Pedro

¹ Daaní, divi tiempu yucán nì dandàcú rey Herodes tniì dava nècuàchì natácá cahvi xi Jesús, ñà-dandohó-tené.

² Te iin nècuàchì nì ndoho ma nduú ñani Juan nani Jacobo, vachi nì dandàcú rey mà, te nì sahnì-té nècuàchìmà xì espada.

³ Dandu nì xini rey mà cudí ini nècuàchì ñuu mà ñà-nì xihì ndómà, ñàyùcàndùá nì nacani ini-te chicá vaha tniì stná-te Pedro. Meru quìvì iá vicò xixí-né pan có-ndütáchí nì sanduamà.

⁴ Ñàyùcàndùá nì tniì stná Pedro, te nì sàcùndiadi-nè, nì ndòo-ne ndahà soldadu, cùmì cùmì-té nì sandiaa xì-né, te cùmì turnu iá nsiquívì. Te rey mà, cuisì ndiatú-te yàha inga vicò, divi vicò pascua, dandu tavà-té nècuàchìmà ñà-cundehè nèhivì-né, (te cui-nè).

⁵ Ñàyùcàndùá, yucán iá Pedro, ndiadí-nè vehecàa. Doco nècuàchì natácá cahvi xi Jesús, cuàhà gá nì xicàn tàhvì-né nùu Dios sàhà nècuàchìmà.

Nansa nì quee Pedro vehecàa nì quida Dios

⁶ Daaní, nì sàà iin ñuu antes quìvì cuàhàn rey mà tavà-té Pedro cundehè nèhivì-né. Te indúhu-né ini vehecàa ma, quídì naà-né. Te itánduhù stná soldadu iin iin ladu-nè, itnii-te cadena nuhní-nè, te xí-ita stná soldadu ndiaá yehè.

⁷ Dandu na iin cachí yucán nì ndecunu iin ángel xi Stoho-ndà Señor, te nì natnuù iin luz ini vehecàa ma. Te nì tuxìn ndáha ángel mà diìn tìxi Pedro, nì dandàcòo-ñané, te nì cachi-nè:

—Ndacuiìn-ní vichi duha.

Daaní, cadena nuhní ndahà Pedro, nì dàñàtnahá miá.

⁸ Te nì cachi tu ángel:

—Nacuhni-ní siuhmatixi-ní, te nacuaìn-ní ndisàn-ní.

Te na ní nsihi nì quida Pedro ducán, dandu nì cachi tu ángel mà xì-né:

—Cundixi-ní dòo-ní, te cunchicùn-ní yùhù cùhùn-ndà.

⁹ Ñàyùcànduá, nì tenchicùn Pedro ángel mà cuàhàn-nè, doco cóni cúndáà ini-nè a ndísá ñà-ndáà nduá cuú xi-né, á coó, vâchi na ian sâñi-nè quidá Dios nduá cahan-né.

¹⁰ Dandu nì cayàha-ne ndé iín iin soldadu ndiaá, te después nì yàha stná-nè nùu ingà-te, dandu nì sàà-nè ndè yehè cáa cahnú quee-nda calle ñuu mà. Te nì nuna miá, dandu nì caquee-ne fuera cuàhàn-nè. Te nì sàà-nè ndé nacáhndé-nè inga calle, te yucán nì nacoó ángel mà-né cuàhàn-nè.

¹¹ Dandu nì sàà Pedro nì cundaà vâha ini-nè, te nì cachi-nè:

—Vichi sâni cundaà inì, ñà-ndáà nduá, nì techuún Stoho-ndà Señor ángel xi-ya, nì sàà-nè nì tavà-né yùhù ndahà Herodes. Te vitni còò gá iñàha cuu xí nacia nì cuni tè-raza Judea cuu xí.

¹² Daaní, na ní nsihi nì nacani ini-nè sâhámà, dandu cuàhàn-nè vehe María nduú dihi Juan Marcos. Te yucán ndoó cuàhà nèhivì sâni nataca, xicàn tàhvi-né nùu Dios.

¹³ Dandu nì dâcâsan Pedro tranca mà, cásàhú-nè. Te nì quee iin ñahà chii nani Rode vâxi-ñà cunini-ñà ana cáhàn.

¹⁴ Te nì nacuni-ñà tàchi Pedro. Doco ñà-cuàhà guá cudû inì-ñà, cóni nácúná-ñà yehè; nì dâyáà-ñà nì nansihvià vehe, nì cachitnùha xì nèhivì mà ñà-divi Pedro nduú nècuàchi cáhàn yehè mà.

¹⁵ Doco nèhivì yucán, cóni xiníndísâ-né, ñàyùcànduá nì cachi-nè xì-ñá:

—Ádi sâni culocú.

Doco mii-ñá, iin-ni cachí-ñà divi ñà-ndáà nduá.

—Còò —cachí-nè—, ádi ángel (ndiaá) xì-né nduú ana cáhàn.

¹⁶ Doco iníní-né casan yehè, cásàhú ì Pedro. Ñàyùcànduá nì (caquee-ne nì) nacuna-ne yehè, te nì xini-nè ;divi Pedro nduú-né! Ñàyùcànduá nì ndulocó sâstnùhù-né.

¹⁷ Dandu nì cuu ndahà Pedro ñà-nì cúníní nècuàchì mà ñà-nduá cuàhàn-nè cachi-nè, te nì nacani-ne nansa nì nihì-né nì quee-ne vehècàa mà nì quida Stoho-ndà Señor. Te nì cachi stná-nè xì nècuàchì mà (nì cùhùn-nè) cachitnùhu stná-nè xì Jacobo xì dava ga compañeru-nè xiníndísâ. Dandu nì quee-ne cuàhàn-nè inga xaan.

¹⁸ Daaní, na ní tùinuù quivì yucán, cuàhà gá nì ndulocó soldadu, ¿índù cuàhàn Pedro? cahan-té.

¹⁹ Te rey Herodes, nì dândâcú-te ñà-nanducù-né cuàhà xaan. Doco cóni nátù-ne. Ñàyùcànduá, nì sanicuàchi rey mà sàhà soldadu mà, te nì sahnì-ñáté. Dandu nì quee rey mà ladu Judea cuàhàn-te ñuu Cesarea, te yucán nì ndòo-tè.

Nansa nì xihì rey Herodes

²⁰ Cunaha-ní, xiní ùhì rey mà nèhivì ñuu Tiro xì nèhivì ñuu Sidón. Doco mii-né, cuní-nè nâcùndoo vâha-ne xì-té, vâchi ndè ñuu-te quixí ñà-itàcú-nè ñuu-nèmà. Ñàyùcànduá, nì nihì-né nì nâcùndoo vâha-ne xì iin ana xinúcuáchi nùu-té vehe-tè, divi iin tiàa nani Blasto. Dandu iin-ni nì ndatnùhu nsidaa-né, te nì catnâtuu-ne nùu rey mà tixi Blasto mà, (áma níhì-né nâcùndoo vâha-ne xì-té).

²¹ Te nì saquìn-te iin quivì (quixi tu nsidaa-né). Ñàyùcànduá, divi quivì mà nì sâcòo-tè silla cahnú xí-te, ndixí-te sìcoto viì xí-te, te nì càhàn-te sâhù xì nsidaa nècuàchì mà.

²² Dandu yâha ga nì càna fuerte-nè, cachí-nè:

—;Mâdi nèhivì ùún cáhàn! ;Iin dios nduú ana cáhàn! —cachí-nè, càna-ne.

²³ Dandu vichi duha nì ducùn rey mà iin castigu nì quida ángel xi Stoho-ndà Señor, vâchi cóni tàvâ-te tnùñuhu xí-yá. Ñàyùcànduá, nì saxì sìndacu inì-te, te nì xihì-te.

²⁴ Doco razón ndiaha xí Stoho-ndà Señor, chicá nì xitià inicutu, te chicá cuàhà nèhivì nì tenchicùn xì palabra mà.

²⁵ Daaní, na ní nsihi nì xinu chuun nì quida Bernabé xì Saulo ñuu Jerusalén yucán, dandu nì saca-ne Juan Marcos, te ndacá stnahá-né nì quee-ne ñuu mà mànuhù-né.

13

Nansa ni quihin Bernabé xi Saulo iin ichi caní cuàhàn-nè chuun xi Jesús

¹ Ñuu Antioquía mà nì sandoo cuàhà nècuàchì natácá cahvi xi-yá. Te dava-ne nduú nècuàchì chináhá, te dava-ne nduú profeta cachítnùhu razón xi Dios. Te nècuàchì chicá xíquida ducán nì sanduu Bernabé, xi Simón el Negro, xi stná Lucio nì quixi ñuu Cirene, xi stná Saulo, xi stná Manaén, iin nècuàchì dava-ni nì sahnu xi gobernador Herodes.

² Daaní, nì cuu iin quivì na cahvi nsidaa-né Stoho-ndà Señor, te iníhí stná-nè nùu-yá ndoó dòcò-nè, dandu nì cachi Espíritu Ìi xì-né:

—Cunaha-nsiá, cuaán cunduu chuun xi Bernabé xi Saulo vichi, vachi sàni nacàxin mii-né. Ñàyùcàndüá, nacoo-nsianè ni cùhùn-nè quida-ne inga chuun xi —nì cachi-yà.

³ Ñàyùcàndüá chicá nì inihí-né, te nì xicàn tàhvi stná-nè nùu-yá. Dandu nì chitandòó-né ndahà-né dìni Bernabé xi Saulo (ñà-cundujàn seña ñà-sàni nihì nècuàchimà chuun ndiaha). Dandu nì ndaquindèè-né xi nècuàchimà cuàhàn-nè.

Nansa ni quida Bernabé xi Saulo na ní sàà-nè ñuu Chipre

⁴ Ñàyùcàndüá, nì quihin nècuàchimà ichi cuàhàn-nè, vachi sàni techuún Espíritu Ìi-né cùhùn-nè. Te nì sàà-nè ñuu Seleucia. Te yucán nì nana-ne iin barcu cuàhàn-nè ndè iin ñuu cahnú nani Chipre.

⁵ Te meru ñuu ndé nì nuu-ne barcu mà nani Salamina. Dandu cuàhàn-nè veheñùhu xi nècuàchì raza-nè Judea iá yucán, te nì càhàn-nè palabra xi Dios. Te cutnáhà stná Juan xì-né, xinúcuáchí nècuàchimà nùu-né.

⁶⁻⁸ Dandu nì nacàhin-ne inii ñuu mà dècuèndè nì sàà-nè inga orilla mar ndé iá ñuu Pafos. Te yucán nì ndacùhun tnahá-né xi iin tètàtnà nani Barjesús. Te Elimas nani stná-te, vachi ducán cachí-nè xi tètàtnà dàhàn yucán. Iin tè-raza Judea nduú stná-te, te càhàn-te razón xi Dios, cachí-te, doco dandahví uun-tè. Pues divi-tè iá nùu iin nècuàchì nchichí cusáhnù ladu yucán nani Sergio Paulo. Te nècuàchimà, nì cana-ne Bernabé xi Saulo, vachi cuní-nè cunini-ne palabra xi Dios. Doco tètàtnà mà, nì càhàn-te dìquì Bernabé xi Saulo, daquítnùhu-tè nùu nècuàchì cusáhnù-má ñà-màsà cúníndísá stná-nè ichi Jesús.

⁹ Dandu Saulo, ò nì càchí stná-ndà Pablo, fuerte nì quixi Espíritu Ìi xí Dios ini anima-nè, ñàyùcàndüá nì indehè váha-ne tètàtnà mà,

¹⁰ cachí-nè xì-té:

—Ndahví-ní, vachi dandahví uun-ní nèhivì ñà-cuàhà gá maña quida-ní, te ni-iin ñà-vàha có-cuú inì-ní sàhà-xí, vachi dèhe ñà-malu nduu-ní. ¿Índü chuun tùha guá-ní datúcù-ní nèhivì ñà-màsà cunchícùn-nè ichi ndácuìsì Stoho-ndà Señor?

¹¹ Doco cunaha-ní, sàhà-ñá quida-ní ducán, ñàyùcàndüá icúmí-ní nihì-ní iin castigu xi Dios vichi. Icúmí-ní cuaà dahuun-ní iin ratu; ni nduà orá mà cútui ga nùu-ní —nì cachi Pablo.

Dandu vichi duha nì cuaà nùu témà, te nì nàcuìn tnùu dahuan. Ñàyùcàndüá, nì quee-tè cuàhàn-te nanducu-té ana cudità xì-té cacanu.

¹² Te na ní xini nècuàchì cusáhnù-má ñà-ndüá nì cuu, dandu nì xinindisá stná-nè palabra xi Dios, vachi nì ndulocó-nè sàhà ñà-ndüá chináhá Pablo sàhà Stoho-ndà Señor.

Ñà-ndüá nì quida Pablo xi Bernabé na ní sàà-nè ñuu Antioquía iá ladu Pisidia

¹³ Dandu Pablo xi compañeru-nè, nì nana-ne iin barcu, te nì yàha-ne mar, nì sàà-nè ñuu Perga iá ladu Panfilia. Te yucán nì naco Juan-nè mànuhù-né Jerusalén.

¹⁴ Dandu nècuàchimà, nì quee-ne ñuu Perga mà nì sàà-nè ndè ñuu Antioquía iá ladu Pisidia. Te quivì descansu cuàhàn-nè visita veheñùhu xi nècuàchì raza-nè Judea, te nì sàcùndoo-ne yucán.

¹⁵ Dandu nì cahvi nècuàchì xícusahnù veheñùhu ma tutu nduú ley xi Dios, xi stná tutu ìi nì tiaa nècuàchì profeta sàhana. Dandu nì techuún-né razón nùu Pablo xi Bernabé, cachí-nè:

—Nú iá iin conseju vaha cuàha-nsia nsiùhù, vètùni càhàn-nsià vichi, ñàni.

¹⁶ Dandu nì ndacuiin Pablo, te nì dànhà ndahà-né ñà-nì cúndóo dádí nsidaa-né, te nì cachi-nè:

—Mii-nsiá nècuàchì raza xi Israel, xì nsidaa gá mii-nsiá nècuàchì cahvi stná xì Dios, cunini vaha-nsia.

¹⁷ Divi Yua-nda Dios nduú ana càhvì nsidaa nèhivì raza-ndà, vàchi sàhana nì nacàxin-ya xii-ndà ñà-cunduu-ne nèhivì xí-yá. Te na ndoó xícá ñi-né ñuu Egipto, dandu ndiaha gá nì chindee-yánè, nì quida-ya cuàhà milagru nahnú, te nì tavà nsihí-yánè nùù ñuu mà nì caquee-ne libre.

¹⁸ Daaní, ùi dico cuà nì xicanuu-ne yucù dàná. Te mate ndahví modo xi-ne, doco nì quidandee ini-yà sàhà-né inii cuà mà.

¹⁹ Daaní, después na ní sàà-nè ladu Canaán, dandu nì dàndáñúhú ñi-yá nèhivì ndoó ùsà ñuu nahnú yucán, te nì sàhatahvì-yánè ñuu mà.

²⁰ Daaní, nì yàha 450 cuà, te inii tiempu yucán puru juez nìsa dandacu-xi nùù xii-ndà mà, vàchi ducán nì cachi mii-yá. Te ducán nìsa ìa dècuèndè tiempu nì quesaha Samuel càhàn-nè cuenta xi-ya.

²¹ Dandu nì xicàn xii-ndàmà coo iin rey dandacú nùù-né, (te màdì gá juez). Ñàyùcànduá, nì cachi Dios ñà-iin tiàa nani Saúl cunduu rey xi-ne, iin descendencia xi xii-nda Benjamín, te yua-né nì sanani Cis. Pues divi nècuàchìmà nì dàndacú ùi dico cuà nùù ñuu-ndà.

²² Daaní, después nì dàcúxíó Dios nècuàchìmà, te nì sàha-ya David chuun dandacuma, vàchi dohó nì cachi-yà sàhà-né: “Sàni xini, vaha ga modo xi dèhe Isaí nani David, te cudù gá inì sàhà-né. (Vàchi ináhì) icúmí-né quida-ne cumplir nsidaa ñà-nduá cuní coo”, nì cachi Dios.

²³ Dandu nì quida stná-yà comprometer ñà-cunduu iin descendencia ndiaha xí nècuàchìmà ana dacácu xi raza-ndà Israel. Ñàyùcànduá, cunaha-nsiá, divi Jesús nduú ana ndiaha ma nì chitnùnì ini Dios dacácu xi-nda.

²⁴ Doco na táñaha ga quesaha Jesús (càhàn-yà palabra xi-ya), dandu dihna Juan nì quixi nì càhàn sàhù xì nsidaa nècuàchì raza-ndà Israel sàhà-ñá nì cùú-né arrepentir, te cuhì-né.

²⁵ Dandu después na sádaa-ní nsihi vida xi Juan ñuhiví yohó, dandu nì càhàn-nè xì nèhivì, cachí-né: “¿Ana nduú yùhù, cahan-nsiá? Pues cunaha-nsiá, màdì mii-yá nduí. Doco después na sàni yàhi, dandísá vaxi ana nduú mii-yá. Vàchi yùhù, nì có-nâtùì cundui mozo xi-ya ñà-tavì ndisàn-yá”, nì cachi Juan.

²⁶ Ni cúninì vaha nsidaa mii-nsiá nècuàchì nduú descendencia xi xii-ndà Abraham, xì nsidaa stná mii-nsiá nècuàchì dava ga cahvi stná xì Dios, vàchi nùù mii-nsiá sàvaxi razón yohó nansa càcu anima-ndà, ñàni.

²⁷ Vàchi nècuàchì ndoó ñuu Jerusalén, xì stná tè-xícusahnú nùù-né yucán, cónì cùndàà ini-nè ana nduú Jesús, ni cónì cùndàà stná ini-nè ñà-nduá cuní cachi tutu ìi, mate divi nduá cahví-né cada quivì descansu, te divi nduú stná tutu ndé nì cachitnùhu profeta sàhana ñà-icúmí nèhivì cahni-néyà. Te divi ducán ndisa nì cuu, vàchi tè-xícusahnú ñuu-ndàmà, nì dáyáha-tèyá ndahà nèhivì cahni xii-yá.

²⁸ Mate còò ni-iin falta xi-ya, doco nì xicàn-te nùù Pilatu ñà-cui-yà.

²⁹ Ñàyùcànduá, divi ducán nì cuu nacia nì cachitnùhu tutu ìi icúmì cuu xi-yá, nì dàndòhó-teyá, (te nì xihì-yà). Dandu nì nanihi nèhivì cuerpu xi-ya nùù cruz, te nì chinduhù-néyà ini cueva.

³⁰ Doco después nì natiacu-yà nì quida Yua-nda Dios.

³¹ Te cuàhà xichi nì ndecunu-ya nùù nècuàchì ladu Galilea nì quixi xi-yá ndè ñuu Jerusalén. Caní quivì nì ndecunu-ya ducán, te nèhivì nì xini xii-yá, testigu xinduu-ne, nacánì-né xì nèhivì sàhà-yá.

32-33 Ñàyùcàndùá, nsiùhù, cachítnùhu-nsi xì-nsiá iin razón ndiaha, vàchi nacua nì quida Dios xì xii-ndà comprometer ñà-icúmí-yâ danátíacú-yâ Jesús, pues divi ducán sàni quida ndisa-ya vichi tiempu xi ndohó nècuàchì nduú descendencia xi xii-ndà mà. Vàchi dohó cachí Dios nùu alabanza ìì, divi alabanza ùì ndé cachí-yâ: “Mii-ní, Dèhemaní nduu-ní. Sà-ìtiácù-ní vichi nì quide”.

34 Daaní, iá gà más ñà-ndùá nì cachi Dios sàhà-ñá cundaà ini-ndà cuàhàn-yâ danátíacú-yâ Jesús, te mà cúì gà-yâ, ni mà téhì cuerpu xi-ya, vàchi dohó nì cachi stná Yuamání-yâ xì-yâ: “Nacua nì cachì xì David ñà-seguru icúmí cundehè ndahví mii-né, pues divi ducán icúmí quida stnái xì mii-ní”, nì cachi-yâ sàhana.

35 Ñàyùcàndùá, nùu inga alabanza ìì iá ndé nì càhàn David xì Dios, te dohó nì cachi-nè: “Mà cuàha-ní téhì ana ìì xí-ní ini yavi”.

36 Pues (inaha-nda), ñà-ndáà nduá, nì quida viì David mà xì nèhivì ñuu-ndà tiempu xi-ne, nacua nì cachi Dios xì-né, doco nì xihì-nè, te nì ndùxin-ne ndé nì ndùxin xii-né, dandu nì tnànì iquìcúñú-nè ñuhù.

37 Doco Jesús, còò. Cónì tnànì iquìcúñú-yâ, vàchi nì natiacu-yâ nì quida Yua-nda Dios.

38 Ñàyùcàndùá, ni cúnahá nsidaa-nsiá ñà-divi sàhà Jesús vètùnì ndutu cuàchi-nda, ñáni.

39 Mate tíxi ley sahnú xí Moisés còò nansa ndoo ndisa cuàchi-nda, doco vichi nú nì cúníndísá-ndá Jesús, dandísá, vètùnì, vàchi nsidaa ana xiníndísá xí-yâ, seguru ndoo nsihì cuàchi-ne.

40 Ñàyùcàndùá, cuidadu cundoo-nsia ñà-màsà cúú xí-nsiâ nacua nì cachi nècuàchì sàhana ndé nì cachi-nè:

41 Cundehè váha-nsia, mii-nsiá tè-càhíchì inì-xi, vàchi cuàhìn quide iin milagru cahnú tiempu xi-nsia. Doco mà cúníndísâ-nsiá, mate claru nì cachítnùhu nèhivì xì-nsiá, te sàhámà cuisì icúmí-nsiâ ndulocó cuàhà-nsiá, te sàà-nsiâ ndañuhu dahuun-nsia. Ducán nì cachi Dios —cachí Pablo.

Nansa nì càhàn Pablo xì cuàhà gá más nèhivì ñuu Antioquía iá ladu Pisidia

42 Daaní, na ní quee-ne xì compañeru-nè veheñùhu ma, dandu nì sacundahví nèhivì cuàhà mà nùu-né áma nácánì gá-nè xì nècuàchì mà palabra yucán inga quivì descansu.

43 Ñàyùcàndùá, na ní nsihì nì nacuitià nsidaa nècuàchì mà veheñùhu ma, dandu nì tenchicùn cuàhà-né Pablo xì Bernabé, xínduu-ne nècuàchì raza Judea, te xínduu stná-nè nècuàchì inga raza nì yàha ndè religión Judea mà ñà-cahvi stná-nè Dios. Dandu Pablo xì Bernabé, nì càhàn-nè xì nsidaa nècuàchì mà ñà-iin-ni nì cúnchícùn-nè ichì-yâ ndé nihì ndisa-nda gracia.

44 Daaní, nì yàha ùnà quivì, dandu nì nataca tu nèhivì, te làcà iyuhu-né nì cumanì cunduu nsidanicuú nèhivì ñuu mà nì nataca ñà-cunini-ne palabra ìì xí Dios.

45 Doco dava nècuàchì raza Judea mà, na ní xini-nè ñà-cuàhà guá nècuàchì inga raza sàni nataca, dandu nì cumbidia ini-nè, te nì càhàn ùhì-nè dìquì ñà-ndùá nì cachi Pablo; quini gá nì càhàn-nè sàhà (palabra ìì mà).

46 Doco Pablo xì Bernabé, cónì yúhì-nè; nì naxiconihí-né nùu nècuàchì mà, cachí-nè:

—Primeru mii-nsiá nì nihítahví-nsiá cunini-nsia palabra ìì xí Dios, doco vichi sàni cahíchì inì-nsia palabra mà, na ian có-cúnì-nsiá natùì-nsia cucumi-nsiá vida ndiaha nicanicuahàn. Ñàyùcàndùá icúmí-nsì càhàn-nsì razón mà xì nèhivì inga raza yohó.

47 Vàchi ducán nì sàcùnaha-nsì nùu Stoho-ndà Dios quida-nsi, vàchi dohó nì cachi-yâ (xì Jesús):

Sàni sàhì mii-ní chuun ñà-danátñù-ní ini anima nèhivì nsidanicuú raza. Sàhà mii-ní icúmí càcu anima nèhivì ndoó dècuèndè ñuu chicá xica ñuhivì, nì cachi Dios.

Ducán nì cachi Pablo.

⁴⁸ Te na ní nsihi nì inini nsidaa nècuàchì inga raza mà, dandu yáha ga nì cudì ini-nè; palabra vaha ndisa nduá yohó, nì cachi-nè. Dandu nì xinindisá cuàhà nèhivì mà palabra xi-ya, divi nècuàchì nì chitnùnì ini Dios cundiatú anima-xi cutiacu nicanicuahàn.

⁴⁹ Te ducán nì xitià palabra xi Stoho-ndà Jesús inicutu ladu yucán.

⁵⁰ Doco nècuàchì raza Judea (cò-xiníndísámá), nì dàquítnùhu-ne nùù ñahà cuicà sàhàn veheñùhu ma, xì nùù stná nècuàchì idónuu nùù ñuu mà, te nì nìhì-né nì ndulocó nsidaa nècuàchì mà nì quida-ne. Ñàyùcàndùá, nì cucuahà sàhà Pablo xì Bernabé, dècuèndè fuerza nì catavà-ñáné ñuu mà cuàhàn-nè.

⁵¹ Dandu nì catù-né sàhà-né ñà-nì cóyo yacá nì tnà ñuu mà, te (seña nduámà ñà-ìcúmì nècuàchì ñuu-mà cunsida-ne cuàchi-ne). Daaní, nì quihin Pablo xì Bernabé ichì cuàhàn-nè inga ñuu nani ñuu Iconio.

⁵² Doco nècuàchì xiníndísá nì candò ñuu Antioquía mà, cuàhà gá nì cudì ini-nè (sàhà fe xi-ne), te nì chitu stná anima-nè Espíritu Ìì xí Dios.

14

Ñà-nduá nì caquida Pablo xì Bernabé ñuu Iconio

¹ Daaní, nì sàà Pablo xì Bernabé ñuu Iconio, te nì quihvi-ne veheñùhu xi nècuàchì raza-nè Judea nì càhàn-nè sàhù. Ñàyùcàndùá, cuàhà nèhivì raza-nè ndoó yucán nì xinindisá stná-nè, xì cuàhà stná nècuàchì raza ñuu mà.

² Doco dava nècuàchì raza Judea cónì xiníndísámá, nì dacà-né ònì nècuàchì ñuu-nè mà. Ñàyùcàndùá, cónì cùù gá ini nècuàchì ñuu mà sàhà compañeru-nè xiníndísá.

³ Doco Pablo xì Bernabé, caní quivì nì sandoo-ne yucán, te cuàhà gá nì càhàn vate-né xì nèhivì; cónì yúhì-nè, vàchi nì cundee ini-nè Stoho-ndà Señor sàhà gracia xi-ya. Te mii-yá, nì chindee-yànè, te nì quida-ne milagru ndiaha sàhà-ñá cundaà ini nèhivì divi ñà-ndàà nduú palabra chináhà-nè mà.

⁴ Doco nì tàhndè dava nècuàchì ñuu mà. Dava-ne nì ndò-ne ladu xi nècuàchì raza Judea, te dava-ne nì ndò-ne ladu xi nècuàchì apóstol.

⁵ Dandu nì nacuatnahá nècuàchì raza Judea mà xì dava ga nècuàchì ñuu mà, xì stná tè-xíandacú, te vaxi nsidaa-né carrera ñà-cùnì-nè quida quini-ne xì Pablo xì Bernabé, cunì-nè cahnì-né nècuàchì mà xì yùù.

⁶⁻⁷ Doco nècuàchì mà, nì xinitnùhu-ne ñà-vaxi nsidaa nèhivì mà, te nì xinudèhé-nè cuàhàn-nè ladu Licaonia ndé iá ñuu Listra xì ñuu Derbe xì ranchu cuati xí ñuu mà. Te inicutu ma ní nacàhin-ne nì càhàn-nè xì nèhivì ñà-nduú razón ndiaha.

Nansa nì caquida nèhivì siùmí ñuu Listra, nì cani yuu-né Pablo ñà-cui nècuàchì mà

⁸ Cunaha-nsiá, ñuu Listra mà nisa ia iin tiàa cuhí sàhà-xí, vàchi ducán nì quesaa-nè ñuhivì. Te sàhámà nicanicuahàn iá-nè; mà cùù caca-ne.

⁹ Doco (iin quivì) na càhàn Pablo, dandu nì inini stná nècuàchì mà. Te na ní indehè váha Pablo-nè, nì cundaà ini-nè xiníndísá vaha nècuàchì mà, te sàhámà mà úhì nduvàha-ne.

¹⁰ Ñàyùcàndùá, nì càhàn ndee Pablo xì-né, cachí-nè:

—Ndacuiin-ní, cuiin ndaà-ní.

Dandu vichi duha nì ndacuiin nècuàchì mà, te nì quesaha-né xicánúú-né.

¹¹ Te na ní xini nèhivì cuàhà yucán ñà-nduá nì quida Pablo, nì càna ndee-né, cachí-nè: —¡Ádi stoho-ndà xínduu nècuàchì yohó, te nì nuu-ne ñuhivì yohó nì nanduu-ne tiàa! —nì cachi nècuàchì mà, càhàn-nè dàhàn mii-né ladu Licaonia yucán.

¹² (Cunaha-nsiá, iin stoho nècuàchì siùmí mà nduú yùù yócò nani) Júpiter, ñàyùcàndùá ducán nì cachi-nè xì Bernabé. (Te inga stoho-nè nani Mercurio.) Ñàyùcàndùá, divi ducán nì cachi-nè xi Pablo, vàchi chicá càhàn Pablo nùù Bernabé.

¹³ Te ñuu mà nisa ia stná iin tiàa dacuxi-xi Júpiter mà ndé iá vèha orilla ñuu mà. Ñàyùcàndùá, vèha cuàhàn tè mà xì cuàhà nèhivì, te ndacá stná-te idunsiquì nì nducutu xi ita, cuàhàn-te cahnì-tésì cunduu-sì promesa nùù Pablo xì Bernabé nì cùì.

14 Doco na ní xinitnùhu nècuàchìmà sàhájàn, dandu ni dàcuàchí-né orilla sìcoto xi-ne (ñà-nì cuduchi guá ini-nè), te ni dàyàà-nè ni quìhvi-ne mahì nèhivì cuáhà yucán, te ni càna ndee-né xì nècuàchìmà, cachí-nè:

15 —¡Ay, señores! Màsà quídá-nsiá xì-nsí ducán, vèchi iin-ni xínduu stná-nsì nèhivì ùún nahi mii-nsiá. Te divi vèxi-nsi cachitnùhu-nsi xì-nsiá ñà-ndiá ìcà-nsiá naco-nsia yùù yócò yohó, vèchi còò ni-ìñàha quídá, te cunchicùn-nsiá Dios iá nicanicuahàn, vèchi cuisì mii-yá ni quidavàha xi ansivi xi ñuhù íchí, xì mar, xì nsidaa gá ñà-ìá ñuhiví.

16 Te tiempu ni yàha xi-nda ni sàha-ya nèhivì lugar cundoo-ne ñuhiví modo xi mii-né,

17 mate siempre sàha-yàndó ñà-cundaà ini-ndà nansa iá-yà, vèchi màni gá quídá-yá xì-ndà, dacuún-yá dàvì sàhà-ñá cana ñà-cuxi-nda, te ndenuu ini-ndà, dandu cudìi cuáhà ini-ndà —ni cachi Pablo.

18 Doco mate ducán ni cachi-nè xì nèhivì cuáhà mà, ùhì ni sadi-nè nùù nècuàchìmà ñà-màsà càhni-né idunsìquì-mà cunduu-sì promesa nùù-né.

19 Daaní, dava nècuàchì raza Judea ndoó ñuu Antioquía xì ñuu Iconio, ni quixi stná-nè ñuu Listra mà, te ni dàquítnùhu-ne nùù nèhivì ñuu mà. Ñàyùcànduá, ni cacani yuu nècuàchìmà Pablo, ni sahnì-ñánè ni cahan-né. Dandu ñuhú nihni-ne nècuàchìmà cuàhàn-nè iladu ñuu mà, te yucán ni naco-ñané.

20 Doco después na sàni nataca nècuàchì xiníndísâ ndé indúhu-né, dandu ni ndacuiin-nè mànuhù-né ñuu mà inga tu. Daaní, inga quìvì cutnàhâ-né xì Bernabé ni quihin-ne ichì cuàhàn-nè chicá nùù-xí ndè ñuu Derbe.

21 Te yucán ni càhàn stná-nè xì nèhivì ñà-nduú razón ndiaha xí Dios. Ñàyùcànduá, cuáhà nècuàchìmà ni xinindisá stná, te ni dàcuàhá-né palabra xi-ya.

Daaní, ni quihin tu Pablo xì Bernabé ichì mànuhù-né, ni nayàha-ne ñuu Listra xì ñuu Iconio, te ni nasaa-nè ñuu Antioquía.

22 Te iin iin ñuu ndé ni nayàha-nemà ni nacuahandee ini-nè nèhivì xiníndísâ, cachí-nè xì nècuàchìmà ñà-iin-ni ni cúníndísâ vaha-ne, te quidandee stná ini-nè, vèchi cuáhà vida icúmí yàha nsidaa nèhivì cuní sàà ñuhiví ùù xí Dios.

23 Te iin iin ñuu mà ni quida stná-nè nombrar iin ùù nècuàchì sahnú cunduu ana codònuù nùù nèhivì xí Jesús ndoó yucán. Te na ní cuu nècuàchìmà nombrar ni xicàn tàhvi cuáhà-né nùù Dios, te ni inihì stná-nè. Dandu Pablo xì Bernabé, ni cachi-nè xì nsidaa nècuàchì xiníndísâ-má:

—Yohó ni ndóo-nsia ndahà Stoho-ndà Señor, vèchi divi-ya nduú ana sàxiníndísâ-nsiá vichi —ni cachi-nè.

Nansa mànuhù Pablo xì Bernabé ñuu Antioquía iá ladu Siria

24 Daaní, ni nayàha-ne ladu Pisidia, xì ladu Panfilia,

25 te ni nasaa-nè ndè ñuu Perge. Te na ndoó-né yucán ni càhàn stná-nè xì nèhivì ñà-nduú razón ndiaha xí Dios. Dandu ni yàha-ne chicá nìnuù dècuèndè ñuu Atalia;

26 te yucán ni quècoyo-ne iin barcu, ni yàha-ne mar, mànuhù-né ñuu Antioquía, vèchi divi yucán nduú ñuu ndé ni cachi nèhivì xì-né ñà-nì cùhùn-ne chuun xì Dios, te ni cúcúmí-nè cuáhà gracia xi-ya. Te vichi ndisa, sàni xìnu vèi chuun xi-ne mà.

27 Daaní, ñuu Antioquía mà ni dånátácá tnahá-né xì nsidaa nècuàchì xiníndísâ, te ni nacani nsihi-ne xì nècuàchìmà nansa ni chindee Dios-nè, te ni sàhatahvi-yá ni xinindisá stná nècuàchì ñuu xìcà.

28 Dandu caní quìvì ni ndòo Pablo xì Bernabé ñuu Antioquía mà, cutnàhâ-né xì dava ga nècuàchì nhicùn ichì-yá.

15

Ñà-nduá ni ndatnuhu nèhivì xí Jesús na ní nataca-nè ñuu Jerusalén

¹ Daaní, ñuu Antioquía yucán ni casaà stná dava nècuàchì ñuu Judea. Te ni quesaha-né dacuahá-né nèhivì xiníndísâ, te dohó ni cachi-nè:

—Fuerza màcòo seña xi Dios ìcà-nsiá, vàchi nú coó, còò salvación xi-nsia, vàchi ñà-jaàn nduú estilu nì nacoo xii-ndà Moisés.

² Dandu Pablo xi Bernabé, cuàhà gá nì cuàà-nè xì nècuàchìmà, te nì cucahnú chuun ma. Ñàyùcàndùá, ndúì-nè nì caquee-ne nombradu xì itnii gá nèhivì ñà-cùhùn-nè ñuu Jerusalén nataca-nè xì nècuàchì apóstol xì stná nècuàchì sahnú idónuu yucán, te ndatnuhu víi nsidaa-né sàhà chuun ma.

³ Ñàyùcàndùá, nèhivì xí Jesús ñuu Antioquía yucán, nì sàndaca ichi tnahá-né, te cuàhàn nècuàchì nombradu mà. Nì yàha-ne ñuu Fenicia, xì ñuu Samaria, te yucán nì càhàn stná-nè xì nèhivì xí Jesús, nì nacani-ne nansa nì quìhvi cuàhà nècuàchì ñuu xicà ichì mii-yá. Ñàyùcàndùá, cuàhà gá nì cudii ini nècuàchì iníní má.

⁴ Daaní, na ní sàà nècuàchì nombradu mà ñuu Jerusalén, dandu nì casàhú stnahá-né xì nècuàchì apóstol xì nècuàchì sahnú idónuu, xì nsidaa gá stná nèhivì xí Jesús. Te nì nacani-ne nsidaa ñà-ndùá nì quida-ne, xì nansa nì chindee Dios-nè sàhà chuun nì sàhàn-nè.

⁵ Doco dava nècuàchì fariseu xiníndísá stná ichì-yá, nì ndacuita-ne, te nì cachi-nè:

—Nsidaa tiàa inga raza mà, xiñuhu màcùtuu stná seña xi Dios ìcà-né, te màcùnaha stná-nè ñà-nì chivàha-ne ley sànahà xí Moisés —nì cachi-nè.

⁶ Ñàyùcàndùá, nì nataca cànúú nsidaa nècuàchì apóstol, xì nsidaa gá stná nècuàchì sahnú idónuu, te nì ndatnuhu-né sàhà chuun ma.

⁷ Cuàhà gá nì càhàn-nè; dandu nì ndacuiin Pedro, te nì cachi-nè:

—Sà-ìnáhá-nsiá nansa nì quida Dios sàcuàhàn-ndà itnii cuià, ñàni. Nùù tàcá-ndà nì cachi-yà ñà-yùhù cunduu ana càhàn xì nècuàchì inga raza sàhà-ñá cunini stná-ne razón ndiaha xí-yá, te cunindisá-né.

⁸ Te sàhà ñà-ìnáhá-yà nansa iá anima nsidanicuú nèhivì, ñàyùcàndùá nì quida-ya xì nècuàchìmà nacua nì quida stná-yà xì ndohó daa, nì sàhatahvi stná-yànè Espiritu Ì. Dandu nì cundaà ini-ndà, stná nècuàchìmà sàni ndee vaha nùù-yá.

⁹ Te sàhà-ñá iin-ni ndeníhí vaha-ya ndohó xì stná mii-né, ñàyùcàndùá nì nsida ndoo stná-yà cuàchi anima-nè na ní xinindisá-né.

¹⁰ Doco vichi ¿índù chuun có-ndôo ini-nsiá xì ñà-ndùá nì quida Dios, te cachí-nsiá xì nècuàchì inga raza mà ñà-fuerza chivàha stná-nè estilu sànahà ma, vàchi nahi yugu vèe nduá? Ni mii-nda, te ni xii-ndà, cóni cúndéé ini-ndà chivàha-ndañá.

¹¹ Còó, (ni mà càcu stná-ndà sàhà ley mà), vàchi xiníndísá-ndá ñà-sàhà cuisì gracia xi Stoho-ndà Jesucristu icúmí càcu anima-ndà, te divi ducán stná xì nècuàchì inga raza mà, sàhà cuisì gracia xi-ya càcu stná-nè —nì cachi Pedro.

¹² Daaní, dadí uun nì nàcùndoo nèhivì cuàhà mà, dandu nì nacani stná Bernabé xi Pablo ñà-ndiaha guá nì quida Dios na ní xicanuu-ne mahì nèhivì inga raza, te nì chindee-yànè nì quida-ya cuàhà milagru ndiaha yucán, cuàhà milagru fuerte.

¹³ Daaní, nì nsihi nì cacahàn nècuàchìmà, dandu nì càhàn stná Jacobo, cachí-nè:

—Cunini vaha-nsiá ñà-ndùá cuàhàn cachì, ñàni.

¹⁴ Sàni nacani Simón (Pedro) xi-ndà nansa nì quida Dios (sà-ìá tiempu), nì indehè ndahví-yà nècuàchì inga raza, te nì quesaha-yá nì nacàxin stná-yànè ñà-cunduu stná-nè nèhivì xí-yá.

¹⁵ Te divi ducán cachí stná libru nì tiàa nècuàchì profeta sànahà, vàchi dohó cachí iin tutu mà:

¹⁶ (Càhàn Dios, cachí-yà): “Icúmî naxicocuíin después, te nachindee saa-túí nècuàchì descendencia xi David, vàchi cuàhà tñundoho sàni yàha-ne; doco ndiaha mánì icúmí-nè nàcùndovii-né quide. Na ian nduyucun saa iin vehe sàni chàhmà, ducán icúmí raza David mà nanihitàhvi sàà-né quide.

¹⁷ Te nú ducán, dandu nsidaa stná nècuàchì raza dava ga inga ñuu, icúmí stná-nè nanducu-né yùhù ana nduú Stoho ñuhivì, vàchi nèhivì-xí xínduu stná-nè”.

¹⁸ Ducán nì cachi Stoho-ndà Señor, vèchi dècuèndè chicá sàhaha sàni cachitnùhu-ya ñà-dùcán icúmí cuu.

¹⁹ Ñàyùcàndüá, yùhù cachí xì-nsiá sàhà nècuàchì inga raza sàni caquìhvi ichì Dios: chicá vaha màsà cuáhachuún gá-ndàné xì ley sàhaha ma.

²⁰ Chicá vaha tiaa-nda iin tutu dacùhùn-ndà nùù-né, te cachi-ndà xì-né ñà-mà váha caxì-ndà comida nì sàcùndoo nùù yùù yócò, vèchi sàni ndòo quinia. Ni màsà cáhàn-ndà xì ni-iin nèhivì cóni nándàhà xì-ndà. Ni màsà cáxi-nda cuñu quisì dacuáhnà uun nèhivì. Te màsà cúxí stná-ndà nì.

²¹ (Cuisì ñà-jaàn-ní xiñuhu chivàha-ne), vèchi ley xi Moisés mà, dècuèndè sàhaha ndoo cuàhà tiàa iin iin ñuu chináhà xán, te cada quivì descansu cahví-nèà ndé natácá-nè veheñùhu —nì cachi Jacobo.

²²⁻²³ Daaní, chicá nì ndatnuhu nècuàchì apóstol, xì nècuàchì sahnú idónuu, xì nsidaa gá stná nèhivì xí Jesús, te nì nacàxin-ne ùi nècuàchì idónuu ma ñà-cutnahá-né xì Pablo xì Bernabé cùhùn-nè ñuu Antioquía, cunihi-ne carta-mà cùhùn. Te nècuàchì nì caquee nombradu mà, iin-ne nani Judas Barsabás, te inga-nè nani Silas. Te dohó cachí tutu mà: “Nsiùhù tè-icúmí chuun nùù Jesús, xì stná nècuàchì sahnú idónuu, xì nsidaa gá stná nèhivì xí mii-yá, cásàhù-nsi xì mii-nsiá nècuàchì ñani-nsi inga raza ndoo ñuu Antioquía xì ladu Siria xì ladu Cilicia.

²⁴ Cunaha-nsiá, sàni xinitnùhu-nsi nì sàhàn dava compañeru-nsi yucán ndé ndoo-nsiá, te nì dànacání ini-nè mii-nsiá ñà-nì cachi-nè ñà-fuerza màcòo seña xi Dios icà-nsiá, te fuerza chivàha stná-nsiá ley sàhaha, nì cachi-nè. Ñàyùcàndüá nì ndulocó-nsiá nì quida-ne. Doco màdì nùù nsiùhù nì ndàcú núù-né ñà-dàcuàhá-né ducán, còo.

²⁵ Sàhà ñà-jaàn ndüá iin-ni nì ndatnuhu váha nsidaa-nsí, te nì cachi-nsi chicá vaha nacàxin-nsi iin ùi nèhivì cutnahá xi ñani màni-ndà Bernabé xì Pablo sàà ndé ndoo-nsiá.

²⁶ Vèchi sà-ínáhà-nsiá nècuàchìmà, (ñà-cuàhà guá vida) sàni yàha-ne sàhà Stoho-ndà Jesucristu, dècuèndè cuàhàn-nè cui-nè nì cúí.

²⁷ Pues divi-ne sàni techuún-nsí, te cutnàhá stná-nè xì Judas xì Silas casaà ndé ndoo-nsiá ñà-cachitnùhu nsidaa-né nansa iá ñà-ndüá nì ndatnuhu-nsí.

²⁸ Vèchi cachí Espíritu Ìi xí Dios, te cachí stná nsiùhù, chicá vaha màsà dándácû-nsí ñà-chivàha-nsia cuàhà iñàha, cuisì iin ùi ley nduá chicá xiñuhu, divi ñà-yòhó:

²⁹ ñà-màsà cáxi-nda ñà-ndüá nì sàcùndoo nùù yùù yócò, te màsà cúxí-ndá nì; ni màsà cáxi-nda cuñu quisì nì sàhnà uun; te ni-iin nèhivì, màsà cáhàn-nè xì ana cóni nándàhà xì-né. Cunaha-nsiá, nú ni chivàha ndisa-nsia ñà-jaàn, dandu ñà-sàni quida vii-nsiá cundua. Ni cúcuéê ni-nsia”. Ducán cachí tutu mà.

³⁰ Ñàyùcàndüá, nì techuún nècuàchì Jerusalén mà nsidaa nècuàchì nombradu mà cuàhàn-nè ñuu Antioquía. Te na ní casaà-nè yucán, nì dànatácá tnahá-né xì nsidaa nècuàchì xiníndísá-xí-yá, te nì quida-ne entregar tutu mà.

³¹ Te na ní nsihi nì cahvi nècuàchìmà tutu mà, dandu cuàhà gá nì cudii ini-nè, vèchi cuàhà gá nì chindee razón mà mii-né.

³² Dandu, Judas xì Silas, nì cáhàn stná-nè nì nacuàhandee ini-nè nsidaa nèhivì xí Jesús ndoo yucán, vèchi nduú stná-nè profeta cachitnùhu razón xi Dios. Ñàyùcàndüá chicá nì sàà nècuàchìmà nì sàcùnihnu vaha ndisa ini-nè mii-yá.

³³ Daaní, yucán nì candò Judas xì Silas itnii gá quivì, dandu nì ndaquìndèè stnahá-né, te nì naquimanì váha stnahá-né, cuàhàn-nè quihin-ne ichì nùhù-nè.

³⁴⁻³⁵ Doco Silas, nì nacani ini-nè ñà-ndòo chii gá-nè yucán. Stná Pablo xì Bernabé, nì candò stná-nè yucán. Ñàyùcàndüá, mii-né xì cuàhà gá stná-nè, iin-ni nì chinaha stnahá-né ñà-ndüú palabra xi Stoho-ndà Señor, te nì cáhàn-nè xì nèhivì ñà-ndüú razón ndiaha nansa càcu-ne.

Nansa nì quihin Pablo ichì cuàhàn-nè ñà-ùì cacanuu-ne xì Palabra xi Dios

³⁶ Daaní, nì yaha chii tiempu, dandu nì cachi tu Pablo xì Bernabé:

—Cúhùn tu-nda naxicocuñin-ndà nsidaa ñuu ndé nì sàhàn-ndà nì càhàn-ndà palabra xi Stoho-ndà Señor, te nàcòtò-ndà ñanìtnaha-nda cahvi xi-yá ñuu yucán sàhà ñà-cundaà ini-ndà nansa nihí-né cuàhàn —nì cachi Pablo.

³⁷ Doco Bernabé, nì nacani ini-nè cundaca stnahá stná-nè xi Juan Marcos cùhùn.

³⁸ Doco Pablo, cóni cùnì-nè, vàchi tuxí íní-nè, mà váha cundaca-ne nècuàchìmà cùhùn, vàchi na ní sàhàn-nè ñuu Panfilia daa, nì nacoò nihni nècuàchìmà-né màndixi-ne, cóni sàhàn gà-nè chíi gá nùu-xí quida-ne chuun ma.

³⁹ Ñàyùcàndüá, nì cuàà Pablo xi Bernabé sàhà chuun ma; mànicùì cundoo-ne de acuerdo; dècuèndè nì sàà-nè nì tàhndè dava-ne. Sàhámà nì saca Bernabé Marcos mà, nì canana-ne barcu cuàhàn-nè ñuu Chipre.

⁴⁰ Daaní Pablo, nì saca-ne Silas ñà-cutnahá-né cùhùn. Dandu nècuàchì hermanu ndoó yucán, nì xicàn tàhvi-né nùu Dios sàhà nècuàchìmà ñà-nì chíndéé gracia xi-ya mii-né ichì cùhùn-nè. Ñàyùcàndüá, nì quihin-ne ichì cuàhàn-nè,

⁴¹ nì nacàhin-ne ladu Siria xi ladu Cilicia, te iin iin ñuu ladu yucán nì càhàn-nè xi nèhivì cahvi xi Jesús nì nacuahandee ini-nè nècuàchìmà.

16

Nansa nì quesaha Timoteo xicánúú-né cutnáhâ-né xi Pablo xi Silas

¹ Daaní, nì nasaà Pablo xi Silas ñuu Derbe xi ñuu Listra. Te yucán iá iin nècuàchì chíi nchícùn stná ichì Jesús nani Timoteo. Dèhe iin nècuàchì ñahà raza Judea nduú-né. Te cahvi stná dihi-némà mii-yá. Doco yua-né, iin nècuàchì raza griegu nduú-né.

² Te Timoteo mà, quidá víi ndisa-ne, cachí nsidaa nèhivì xí Dios ñuu Listra xi ñuu Iconio yucán.

³ Pues divi nècuàchìmà cuní Pablo cutnahá stná xi-né cùhùn. Ñàyùcàndüá, nì saca-ne nècuàchìmà nì chicoo-ne seña xi raza-nè Judea icà-né sàhá màsà cúdúchí ini nècuàchì raza-nè ndoó ladu yucán, vàchi nsidaa nècuàchìmà, ináhâ-né ñà-iin nèhivì raza griegu nduú yua Timoteo mà.

⁴ Daaní, Pablo xi compañeru-nè mà, nì quihin-ne ichì cuàhàn-nè, te ñuu ñuu nì nacàhin-ne, nì càhàn-nè xi nèhivì xí Jesús, nì cachitnùhu-ne ñà-ndüá icúmí-né chivàha-ne nacua nì sàcùnaha-né nùu nècuàchì apóstol xi dava ga nècuàchì sahnú ñuu Jerusalén.

⁵ Ñàyùcàndüá, nì nacuahandee ini nsidaa nècuàchì cahvi xi Jesús ndoó nsidaa ñuu mà, te quivì quivì nì nducuahà gá stná-nè.

Nansa nì dàcùnì Dios Pablo seña xi-ya, te nì xini-nè iin iin nècuàchì ladu Macedonia cana-xi-né

⁶ Daaní, Pablo xi compañeru-nè, nì dandàcú Espíritu ìì xí Dios nùu-né ñà-màsà cùhùn-nè xi razón ndiaha ndè ladu Asia. Ñàyùcàndüá, nì yàha-ne ndè chicá nùu-xí cuàhàn-nè, te nì nacàhin-ne ladu Frigia xi ladu Galacia.

⁷ Dandu nì sàà-nè raya ladu Misia, te yucán nì cuni-nè nàcahnde-nè sàà-nè ndè ladu Bitinia. Doco cóni sàha Espíritu ìì xí Jesús quida-ne ducán.

⁸ Ñàyùcàndüá, nì yàha ndaà-nè inii ladu Misia, te nì sàà-nè dècuèndè ñuu Troas.

⁹ Dandu ñuu nì dàcùnì Dios Pablo iin seña, nì xini-nè ndè ladu Macedonia, te yucán iin iin tiàa ñuu mà, cachí-nè: “Nahà-ní ladu Macedonia yohó, te chindee-ní nsiùhù”, cachí-nè.

¹⁰ Daaní, ñà-nì sàní Pablo ducán, ñàyùcàndüá vichi duha nì nsidayucun-nè ñà-cùhùn-nè yucán, mii-né xi compañeru-nè xi stná yùhù, vàchi sàni cundaà ini-nsì, Dios nduú ana techúún-xi-nsì cùhùn-nsì cachitnùhu-nsì xi nèhivì ladu mà ñà-ndüú razón ndiaha xi-yá.

Nansa nì tàvâ Dios Pablo xi Silas vehecàa iá ñuu Filipos

11 Daaní, nì nana-nsi iin barcu ñuu Troas mà, te nì quihin-nù ichì cuàhàn-nu ñà-yàha-nù mar. Te nì yàha ndaà-nsi dècuèndè ñuu Samotracia, dandu inga quivì nì sàà-nsi ñuu Neápolis. Yucán nì nuu-nsi barcu mà,

12 te cuàhàn-nsi chicá nùu-xí dècuèndè ñuu Filipos. Te divi ñuu mà nduú ndé iá chuun chicá nahnú ladu Macedonia yucán, te ndoó cuàhà stná nècuàchì Roma yucán. Pues divi ñuu yucán nì sàà-nsi nì sandoo chii-nsí itnii quivì.

13 Daaní, na ní sàà iin quivì descansu, dandu nì quee-nsi ñuu mà cuàhàn-nsi yuhù yúte ndé siempre natácá itnii nèhivì xícàn tàhvi nùu Dios. Ñàyùcàndùá, nì sàà-nsi yucán, nì sàcùndoo-nsi, te nì càhàn-nsi palabra xi Dios nì inini nècuàchì ñahà nì casaà stná yucán.

14 Te iin nècuàchìmà nani Lidia. Ñuu Tiatira nduú ñuu-nè, te chuun quidá-né nduá dicó-né sìcoto finu moradu. Te cahvi stná-nè Dios. Ñàyùcàndùá na ní càhàn Pablo palabra ì, ndiaha gá nì chindee Dios-nè ñà-nì inini vaha-ne ini anima-nè, te nì xinindisá stná-nè palabra mà.

15 Dandu nì cuhii stná-nè, mii-né xì nèhivì vehe-ne. Te después nì càhàn-nè xì-nsí nì sacundahví-nè nùu-nsí, cachí-nè:

—Nú sàni cundaà inì-nsia ñà-iin nècuàchì nihnú vaha ndisa ini xì Jesús nduí, dandu yàha-nsia vehi cundoo chii-nsiá —nì cachi-nè.

Te vátuni nì cundee-né nì candisá-nsí cundoo-nsi yucán.

16 Daaní, iin quivì cuàhàn-nsi ndé xícàn tàhvi-nsí nùu Dios, dandu nì ndacùhun tnahá-nsí xì iin ñahà chii ináccá iin ñà-malu inì-xi, te sàhà ñà-malu-mà tùha-ñà cachì-ña suerte xi-nda. Ñàyùcàndùá, tiàa xídandacu-xi sàhà-ñá, vihi dìhùn níhì-té ñà-tùha-ñà cachì-ña suerte xi nèhivì.

17 Pues divi ñahà chii mà nì quesaha-ñá nì tenchicùn-ña nsiùhù, ndáhì-ña palabra (sàhà-nsí), cachí-ña:

—Tiàa yohó, nècuàchì xinúcuáchí nùu mii-yá dandacú ndé chicá ansivi xínduu-ne, te cachítnùhu-ne xì-ndà nansa iá ichì ndé càcu anima-ndà —nì cachi-ña.

18 Pues nsiquivì nì quida-ñà ducán, dècuèndè màni cundéé gá ini Pablo. Ñàyùcàndùá, nì nacuíco-né yàtà-né nì càhàn-nè xì ñà-malu iá inì-ña, cachí-nè:

—Ndácùcahín quivì Jesucristu, te dandacú nùu yohó ni yúxin-yó ini ñahà chii jaàn, te cuáhàn.

Dandu vichi duha nì quee ñà-malu cuàhàn.

19 Doco tiàa xínduu patrón xi-ñà, nì cundaà inì-te ñà-mà níhì gá-te dìhùn sàhà-ñá. Ñàyùcàndùá, nì catnii-tè Pablo xì Silas, te nì dìtá-tené cuàhàn-te xi-né dècuèndè inì-xi ndé ndoó nècuàchì dandacú.

20 Te yucán nì dàtnátuu-téné nùu nècuàchì nsidándáà sàhà chuun, te nì cachì-te xi nècuàchìmà:

—Tiàa yohó, tè-raza Judea xínduu-tè, te cuàhà gá quidá tóntô-te nècuàchì ñuu-ndà.

21 Díin estilu chináhà-te, mate có-sàha ley xi-nda candisá-nda estilu mà. Còò permisú chivàha-ndañá, vachi nècuàchì romanu nduu-nda.

22 Dandu nèhivì cuáhà itá yatni yucán, nì xidà stná ini-nè, ñàyùcàndùá nì dándacú juez mà ñà-tavà-té sìcoto xi ndúi-nè, te cani-téné xì vara.

23 Te na ní nsihi nì sahnì cuì-tené xì vara, dandu nì dàquécoyo-téné vehecàa, te nì chinaha-té nècuàchì ndiáá yucán ñà-nì cúndiádí vaha nècuàchìmà.

24 Ñàyùcàndùá, nì dáyáha-ne nècuàchìmà ndé chicá inì-xi vehecàa ma, te nì dàquécoyo-ne sàhà nècuàchìmà mahì iin yutnù cahnú.

25 Daaní, nahi dava ñuu ndoó-né (vehecàa ma) xícàn tàhvi-né nùu Dios, te nacuatú-né alabanza xi-ya. Te iníní stná tè-xíndiadi gà mà.

26 Dandu nanáá nì tnàa fuerte sàstnùhù, te nì ndòyo nihni inii vehecàa ma, dècuèndè cimientu xan nì xichí stná. Ñàyùcàndùá nì nuna nsihi yehè, te nì dàñà tnahá nsihi cadena nuhní tè-ndiádí mà.

²⁷ Dandu nì nsicuìhnú ini nècuàchì ndiaá mà, te nì xini-nè nuná yehè vehecàa. Ñàyùcàndüá nì tavà-né espada xi-ne, cuàhàn-nè cahni-né mii-né ni cuí, vàchi nì tuxi ini-nè sàni caquee nsihi tè-ndiàdí mà.

²⁸ Doco nì ndàhì ndee Pablo, cachí-nè:

—¡Màsà quídá quíní-ní xì mii-ní, vàchi ndoó nsihi-nsi!

²⁹ Dandu nècuàchì mà, nì xicàn-nè ñà-tnùù nùù-né, te nì quìhvi-ne ndè ini vehecàa ma, ndé quídí cuisì-né, te nì sàcuìln sísì-né nùù Pablo xì nùù Silas.

³⁰ Dandu nì tavà-ñánê fuera, te nì cachi-nè:

—Señores, cachi-nsià xí, ¿ndià nduá quide, te càcu anímè?

³¹ Dandu nì naxiconihí Pablo xì Silas nùù-né, cachí-nè:

—Cuisì cunindisa-ní Stoho-ndà Jesucristu, te càcu-ní xì stná nèhivì vehe-ní.

³² Dandu nì càhàn-nè xì nècuàchì mà ñà-ndùú palabra xi Stoho-ndà Señor, te nì inini vaha-ne, mii-né, xì nsidaa stná nèhivì vehe-ne.

³³ Daaní, divi hora ñuú mà nì saca-ñané cuàhàn-nè xì nècuàchì mà nì nacate-ne mandù icà nècuàchì mà ndé nì dùcùn. Daaní, vichi duha nì cuhii-né xì stná nèhivì vehe-ne.

³⁴ Dandu nì saca-ñané nì nana-ne nì nansihvi-ne vehe-ne, nì sàha-ñané ñà-nì xixi-ne, cudí ini-nè, vàchi sàni xinindisá-né Dios vichi. Te cudí stná ini nsidaa nèhivì ndoó vehe-nemà.

³⁵ Daaní, na ní tùinuù inga quívì, dandu nì techuún juez itnii policía cuàhàn-te cachitnùhu-tè ñà-vàtùni dàña Pablo xì Silas.

³⁶ Ñàyùcàndüá, nècuàchì ndiaá xì vehecàa ma, ducán nì cachitnùhu-ne xì Pablo, cachí-nè:

—Sàni dandàcú juez dàña-nsiá: sà-íá caquee-nsia libre, cachí-nè. Ñàyùcàndüá, màsà nácání gá inì-nsia, vàchi vátùni quee-nsia cùhùn-nsià —nì cachi-nè.

³⁷ Doco Pablo, nì cachi-nè xì policía yucán:

—Nsiùhù, nècuàchì romanu nduú stná-nsi. Doco nì ñàhni cuí-nsi nùù nsidaa nèhivì, te nì còò stná justicia nì ía sàhà-nsí na ní sàcùndiadi-nsi yohó. Sàháyùcàndüá, mà cándísâ-nsí quee dèhé-nsi. Cuní-nsi ni cáquixí mii juez tavà-né nsiùhù —nì cachi Pablo.

³⁸ Dandu nì sàhàn policía mà nì cachitnùhu-tè xì juez ñà-ndüá nì cachi Pablo. Ñàyùcàndüá, nì yùhí nècuàchì mà na ní cundaà ini-nè nècuàchì romanu nduú stná Pablo xì Silas, (te ía stná derechu xi-ne).

³⁹ Dandu nì quixi juez mà, te viví-ni nì càhàn-nè xì nècuàchì mà, nì tavà-ñánê, te nì sacundahví-nè nùù nècuàchì mà ñà-nì quèé-né ñuu mà.

⁴⁰ Ñàyùcàndüá, na sàni quee-ne vehecàa ma, dandu cuàhàn-nè vehe Lidia, nì nàcòtò-nè nsidaa nèhivì iin-ni cahvi xi Jesús, nì nacuàhandee ini-nè nècuàchì mà. Dandu nì quihin-ne ichì cuàhàn-nè.

17

Nansa nì cucuahà sàhà Pablo ñuu Tesalónica

¹ Daaní, nì yàha-ne ñuu Anfípolis xì ñuu Apolonia, te nì sàà-nè ñuu Tesalónica. Te yucán ía iin veheñùhu xi nècuàchì raza-nè Judea.

²⁻³ Te Pablo, de por sí sàhàn-nè visita veheñùhu xi nècuàchì mà (na sàà-nè iin iin ñuu). Ñàyùcàndüá ùni semana cada quívì descansu nì sàhàn-nè veheñùhu yucán, nì càhàn-nè sàhù xì nècuàchì natácá yucán, nacání-né xì nècuàchì mà nansa cachitnùhu tutu ì sàhà rey ndiaha ndiatú-né ndé cachá ñà-ícúmí rey mà ndoho-ya, dandu después natiacu-yà. Ducání nì dàcuahá-né nècuàchì mà, nacání-né sàhà Jesús ñà-divi mii-yá nduú rey ndiaha ma.

⁴ Ñàyùcàndüá, nì xinindisá dava nècuàchì mà, te nì tenchicùn stná-nè Pablo xì Silas. Cuàhà-né xínduu nècuàchì raza griegu ináhá stná ía Dios, te cuàhà stná-nè nduú nècuàchì ñahà xí-idònuù ladu yucán.

⁵ Doco dava tè-raza Judea yucán, cóni xínindísâ-te palabra mà, vâchi nì cacumbìdia inì-te sàhà Pablo. Ñàyùcàndùá, nì saca-tè itnii tiàa tùha quini xicánúú xíxín, te nì nacana gà-te nèhivì cuáhà, te nì quida cuahà-té sàhà Pablo ñuu yucán; nì sàà-te ndè vehe Jasón, nì caquihvi-tè fuerza ini vehe-ne, nandúcú-té Pablo xì Silas, vâchi cuní-te tavà-téné fuerza, te quida-téné entregar ndahà nèhivì cuáhà mà.

⁶ Doco cóni ndácùhun-téné. Ñàyùcàndùá, nì tavà-té Jasón xì iin ùi gà stná nècuàchì xínindísá-xí-yâ. Te ñuhú níhní-tené nì sàà-te nùù tè-xícusahnú nùù ñuu mà, cána fuerte nsidaa-té, cachí-te:

—Ndè stná ñuu-ndà yohó sàni quesaa nècuàchì quidá tóntô xì nèhivì inicutu ñuhiví.

⁷ Te Jasón yohó, nì dàyáha stná-nè nècuàchìmà ini vehe-ne, mate ni-iin nècuàchìmà có-ndùlócô-nè sàhà ñà-ndùá dandacú rey cahnú César xi-nda, vâchi cachí-nè iá inga rey chicá cusáhnû nani Jesús.

⁸ Ducan nì cachi têmà xì nècuàchì ñuu mà. Ñàyùcàndùá cuáhà gá nì ndulocó tè-xícusahnu-ma sàhà palabra mà,

⁹ te nì dandacú-te ñà-fuerza nì dàquihvi Jasón xì compañeru-nè dìhùn nduú fianza, dandu nì cadaña-né.

Ñà-ndùá nì quida Pablo xì Silas ñuu Berea

¹⁰ Daaní, nèhivì xì Jesús ndoó yucán, ñuú nì tavà déhê-nè Pablo xì Silas nì sàndaca ichi-ñané ñà-cùhùn-nè ñuu Berea. Te na ní casaà-nè yucán, nì sàhàn stná-nè veheñùhu xì nècuàchì raza Judea.

¹¹ Te nèhivì veheñùhu yucán, chicá nì nacani vii ini-nè nùù nècuàchì ñuu Tesalónica, vâchi xì nsidaa voluntad xi-ne nì inini vâha-ne palabra ìi xì Dios. Nsiquívi nì nanducu váha-ne nùù tutu ìi ñà-cuní-nè cundaà ini-nè a ndísá ñà-ndáà nduá cachí Pablo, á cóó.

¹² Ñàyùcàndùá, cuáhà nècuàchì raza Judea nì xinindísá, te cuáhà stná nècuàchì ñahà raza griegu xì-idònnù, xì cuáhà stná nècuàchì tiàa ñuu mà.

¹³ Doco tè-raza Judea ndoó ñuu Tesalónica, nì xinitnùhu-tè ñà-ndè stná ñuu Berea dacuítia Pablo razón ndiaha xì Dios. Ñàyùcàndùá, nì sàà stná-te ñuu Berea mà, te nì dacá stná-te dìnì nèhivì ñuu mà, nì dãnácúidà-tené (sàhà Pablo).

¹⁴ Ñàyùcàndùá, nècuàchì cahvi xì Jesús, vichi vichi nì dàyáha-ne nècuàchìmà cuàhàn-nè ndè yuhù mar. Doco Silas xì Timoteo, cóni quèé-né ñuu mà.

¹⁵ Daaní, nècuàchì ndaca-xi Pablo cuàhàn, cutnáhâ-né nì sàà ndè ñuu Atenas. Dandu na cuàhàn-nè naquihin-ne ichì mànuhù-né, nì sàcùnaha-né cachi-nè xì Silas xì Timoteo ñà-luego ni quixí stná nècuàchìmà ndé iá Pablo.

Ñà-ndùá nì cachi Pablo na ní càhàn-nè xì nècuàchì xícusahnú ñuu Atenas

¹⁶⁻¹⁷ Daaní, ndiatú Pablo quesaa compañeru-nè ñuu Atenas yucán, te nì xini-nè itá chitu figura cahvi nèhivì ñuu mà. Te nì cuduchi cuáhà ini-nè sàhàmà, ñàyùcàndùá, itnii xichi nì sàhàn-nè veheñùhu xì nècuàchì raza-nè Judea yucán, te nì càhàn-nè xì nècuàchìmà, xì stná nècuàchì inga raza sàhàn yucán. Te nsiquívi nìsa sàhàn stná-nè yàhvi, nì càhàn-nè xì nsidaa nècuàchì ndácùhun tñaha-xi-né.

¹⁸ Te dava tiàa nchícùn ley xì tè-epicúreo, xì dava stná tè-ley estoico, nì ndacùhun stnahá-te xi-né, te nì xicàn tnùhù stnahá-te nùù-né. Ñàyùcàndùá cachí dava-tè xì compañeru-te:

—¿Ndíà nduá cachí guá tè-jaàn xì-ndà?

Te nì cachi dava gà-te:

—Ádi stoho nècuàchì inga ñuu càhàn-te sàhà-xí.

Ducán nì cachi-te, vâchi iníní-te càhàn Pablo sàhà Jesús, xì sàhà nansa natiacu-ndà.

¹⁹ Dandu nì saca-tè Pablo, cuàhàn-te xi-né iin xaan nani Areópago ndé natácá tè-xícusahnú nùù ñuu mà. Te yucán nì ndàcàtnùhù têmà nùù-né, cachí-te:

—¿Nansa iá dàñùhù sàà dacuaaha-guá-nì nèhivì?

²⁰ Vàchi sàni xinitnùhu-nsi cáhàn-ní sàhà iñàha tàcùnì-nsì, te ñàyùcàndùá cuní-nsì cundaà ini-nsì sàhà ñà-ndùá cáhàn guá-ní jaàn —nì cachi-te.

²¹ Vàchi nsidaa nècuàchì ñuu Atenas yucán, xì stná nècuàchì inga ñuu ndoó yucán, chicá cudî ini-nè cunitnùhu-ne, te ò cachi-nè sàhà iin ñà-saa.

²² Ñàyùcàndùá, nì sàcuìin Pablo nùu nècuàchì sàni nataca lugar nani Areópago mà, te nì cachi-nè:

—Mii-nsiá nècuàchì ñuu Atenas yohó, sàni cundaà inì, cuàhà gá cahvi-nsiá stoho-nsiá.

²³ Vàchi na xicánúí yohó nì xinì itá cuàhà ñà-ndùá cahvi-nsiá; te nì xini stnái yucán iin iin altar ndé itándiaa palabra yohó: “Dohó quidáñuhú-ndá iin Dios tàcùnì-ndà”, cachá. Pues cunaha-nsiá, mate có-ínahá-nsiá Dios mà, te quidáñuhú-nsiâyà, doco yùhù cuàhìn cachitnùhi xì-nsiá sàhà-yá.

²⁴ Mii-yá nduú ana dandacu-xi nùu ansivi xi sàhà ñuhiví, vachi mii-yá nì quidayucun xán xì nsidaa stná ñà-íá nùá. Ñàyùcàndùá, có-xiñuhù-yá quidayucun nèhivì ni-iin vehe ndé coo-ya.

²⁵ Vàchi itiácú mii-yá; còò ni-iin ana dacútiácú xì-yá, vachi còò ni-iñàha quidámánì nùu-yá; còò. Mii-yá taxí-yá vida xi-nda, tàchì-ndà, xì nsidaa iñàha.

²⁶ Te iin-ni yohòtéhè-ndà nì quidayucun-yàndó, ñàyùcàndùá vichi xíndoo-nda inicutu ñuhiví, te cuàhà raza nduu-nda. Te mii-yá nduú ana nì chitnùnì inì-xi índù tiempu cundoo iin iin raza ñuhiví, xì índùvì nùu-xì cunduu iin iin ñuu cada raza,

²⁷ áma nanducu-né mii-yá, te cunitnàhá-né xì-yá na ian nandúcú ndáha cuaá-nèyà. Doco, cunaha-nsiá, yatni uun íá-yà ndé ndoó iin iin-nda.

²⁸ Vàchi sàhà mii-yá itiácú-ndà; divi sàhà mii-yá xicánúú-ndá, te ndoo-nda ñuhiví. Te dava stná tè-tùha nachutnahá palabra ñuu-nsiá yohó, sàni cachi-te: “Divi mii-yá nduú yohòtéhè-ndà”.

²⁹ Ñàyùcàndùá, nú ndisa, descendencia xi Dios nduu-nda, dandu màsà cútúxí ini-ndà Dios nduú iin figura nì nacani ini nèhivì, te nì quidavàha-neà xì oro ò plata ò yùu.

³⁰ Cunaha-nsiá, tiempu nì yàha xi-nda, cóni ítníí Dios cuenta sàhà modo xi nèhivì, vachi cónisá cúndáa ini-nè. Doco vichi, nùu nsidanicuú nèhivì inicutu ñuhiví dandacú-yá ñà-naxicocuìin ini-ndà sàhà cuàchì-nda.

³¹ Vàchi sàni saquin-yà iin quivì cuàhàn-yà ndàcàn-yà cuenta sàhà cuàchì nèhivì ñuhiví, te nihì-né nacua ndiá ìcà. Te sàni cachi stná-yà ana cunduu juez nsidandaà cuenta xi-ya; divi nduú iin ana (nì xihì, te) nì natiacu nì quida-ya. Pues sàhàmà vètùnì cucumi ndisa-nda seguru ñà-ìcúmí coo ndisa juicio —nì cachi Pablo.

³² Daaní, na ní inini nècuàchìmà ñà-càchí Pablo íá nansa natiacu-ndà, dandu nì sàcùndiaa uun-ñané. Doco dava-ne, còò; dohó nì cachi-nè:

—Nsiùhù, cuní-nsi cunini ga-nsì cáhàn-ní xì-nsí inga quivì sàhà chuun jaàn.

³³ Dandu nì quee Pablo cuàhàn-nè.

³⁴ Doco dava tiàa nì inini ma, nì xinindisá-né, te nì tenchicùn-nè nècuàchìmà. Iin-ne nduú iin juez quidáchúûn lugar nani Areópago mà, te quivì-né nduú Dionisio. Te inga-nè nduú iin ñahà nani Dámaris; te ndoó gá stná iin ùi ana nì xinindisá.

18

Ñà-ndùá nì quida Pablo ñuu Corinto

¹ Nì nsihi (nì cáhàn Pablo xì nècuàchìmà), dandu nì quee-ne ñuu Atenas cuàhàn-nè ñuu Corinto.

² Te yucán nì ndacùhun tnahá-né xì iin nècuàchì raza-nè Judea nani Aquila. Mii-né xì ñahàdihí-nè Priscila, xínduu-ne nècuàchì iin ñuu íá ladu Ponto, doco vichi làcà ní quixi-ne ñuu Roma íá ladu Italia, vachi nì dandácú rey cahnú Claudio ñà-fuerza caquee nsihi nèhivì raza Judea ñuu mà cùhùn-nè. Ñàyùcàndùá, ñuu Corinto yucán sàni caquesaa nècuàchìmà. Dandu nì sàa stná Pablo visita vehe-ne,

³ te yucán nì ndòo-ne cutnâhâ-né xì nècuàchìmà quidáchúûn-né, vâchi iin-ni oficiu icúmí nsidaa-né, divi ñâ-quidavâha-ne vehe sìcoto ndee.

⁴ Te cada iin iin quivì descansu sâhân-nè veheñùhu xi nècuàchì raza-nè, te nì càhàn Pablo xì nèhivì yucán, vâchi cuní-nè cunindisá stná nècuàchìmà, a sea nduú-né nècuàchì raza-nè, te ò nèhivì inga raza.

⁵ Daaní, nì quee Silas xì Timoteo ladu Macedonia, nì quesaa-nè ndé iá Pablo. Dandu Pablo, ndé cuisì chuun càhân-nè palabra xi Dios nì quesaha-né quidá-né, te cuàhà gá nì dàcuàhá-né nècuàchì raza-nè yucán, cachí-nè ñâ-divì rey ndiaha nani Cristu nduú Jesús.

⁶ Doco nècuàchì yucán, nì caquesaha-né nì cahíchi ini-nè palabra mà, te nì càhàn ùhí-nè dìquía. Ñâyùcàndùá, nì naquidi Pablo sìcoto xi-ne, (te seña nduámà ñâ-cuàhân-nè nacoo dahuun-ne nècuàchìmà). Te nì cachi-nè:

—Yùhù, mà cúnsídá cuàchi nú ni sâà anima-nsià ndañuhá. Mii-nsiá cunsida cuàchi-nsia sâhâ-nsiá. Ñâyùcàndùá, vichi, nèhivì inga raza icúmí-nsì càhàn xì-nsì —nì cachi-nè.

⁷ Dandu nì quee-ne veheñùhu ma cuàhân-nè vehe iin tiàa nani Justo. Iin nècuàchì nihnú vâha stná ini xì Dios nduú nècuàchìmà, te yatni inítnâhâ stná vehe-ne xì veheñùhu yucán.

⁸ Doco nì ìa iin nècuàchì inúù xì veheñùhu ma nani Crispo, te nì xinindisá stná nècuàchìmà ichì Jesús, mii-né xì nsidaa nèhivì vehe-ne. Daaní, cuàhà gá stná nècuàchì ñuu mà, nì inini stná-nè palabra xi-ya, te nì xinindisá stná-nè, dandu nì cuhiì-né.

⁹ Daaní, iin ñuu nì dâsâni Dios Pablo nì cachi-yà xì-né:

—Màsà yúhî-nî, te màsà cú-íhín-nî xì ni-iin nèhivì. Iin-ni quida-ní seguir càhân-ní xì-né.

¹⁰ Vâchi yùhù ié` cutnâhî xì-ní, te còò iin quida quini xi-ní, vâchi cuàhà nèhivì ñuu yohó icúmí cunduu nèhivì xí —nì cachi-yà.

¹¹ Ñâyùcàndùá, iin cuà dàva nì ìa Pablo ñuu yucán, nì dàcuàhá-né nèhivì ndoó yucán ñâ-nduú dàñùhù xi Dios.

¹² Daaní, ladu Acaya yucán iá stná iin tè-dândâcú nani Galión. Te tiempu xi-tè nì nataca cuàhà tè-raza Judea, nì catnii-tè Pablo, nì saca-tèné cuàhân-te xi-né nùù tè-dândâcù-mà, sanícuàchi-tè sâhâ-né,

¹³ cachí-te:

—Tiàa yohó, diín nduú modo chinâhá-nè cahvi-nda Dios, vâchi cunaha-ní, có-sâha ley xi-nda cahvi-nda Dios nacua cachí mii-né.

¹⁴ Dandu meru cuàhân càhân stná Pablo nì cùí, te nì cachi Galión mà:

—Mii-nsiá tè-raza Judea, nú ndisa quidá quíni tiàa yohó, te ò iin falta cahnú nduá nì quida-ne nì cùí, dandísá, vâtùni candisé ñâ-sânicuàchi-nsia sâhâ-né núí.

¹⁵ Doco còò, vâchi cuisì sâhà dàñùhù xi mii-nsiá càhân-nsiá, xì sâhà stná nècuàchì nchichí xi-nsia, xì sâhà stná ley xi mii-nsiá. Ñâyùcàndùá, mii-nsiá cundehè-nsiá sâhà chuun yohó, vâchi yùhù, mà nsídândâi-ñâ —nì cachì-te.

¹⁶ Dandu nì dândâcù-te cuxio nsihi-ne nùù-té.

¹⁷ Daaní, dàva nècuàchì raza griegu ñuu mà, nì catnii-ne iin nècuàchì cusâhnù nùù veheñùhu xi nècuàchì raza Judea mà. Sóstenes nani nècuàchìmà, te nì sahnì cuí-ñané nùù Galión mà. Doco cóni ndúlócô-te.

Nansa nì naxicocuûn Pablo ndè ñuu Antioquía, dandu nì quihin tu-ne ichì inga xichi cuàhân-nè chuun xi Jesús

¹⁸ Daaní, cuàhà gá quivì nì ìa Pablo ñuu yucán. Dandu nì ndaquindèè-né xì nècuàchì hermanu ndoó ñuu mà, te cuàhân-nè ñuu Cencrea. Te yucán nì dàté tehe-né, vâchi seña (nì sanduamà) ñâ-sâni saquin-nè iin compromisu nùù Dios. Daaní, ñâ-cuní-nè nùhù-nè ladu Siria, ñâyùcàndùá, nì nana-ne iin barcu, mii-né xì Aquila xì ñahâdìhí nècuàchìmà nani Priscila, te nsidaa-né cuàhân-nè barcu mà

¹⁹ Nì sàà-nè ñuu Éfeso, vâchi divi ñuu yucán icúmí ndò Priscila xì Aquila. Dandu nì sàhàn (nsidaa-né) veheñùhu xì nècuàchì raza-nè ñuu mà, te nì càhàn Pablo xì nèhivì natácá yucán.

²⁰ Te nècuàchìmà, nì cuni-nè cucuee chii gá Pablo xì-né inga ratu gà. Doco cóni cándísâ-né,

²¹ vâchi nì cachi-nè:

—Ícúmí nùhì ñuu Jerusalén ñà-coi yucán quivì nacava vicò sà-ítúú. Doco primeru Dios icúmí naxicocuñin yohó inga xichi —nì cachi-nè, dandu nì ndaquìndèè-né xì nècuàchìmà. Te nì nana tu-ne iin barcu iá ñuu mà cuàhàn-nè.

²² Dandu nì sàà barcu mà ñuu Cesarea, (te yucán nì nuu-ne), mànuhù-né ñuu Jerusalén, nì casàhù-nè xì nèhivì xì Jesús ndoó yucán, dandu nì quee tu-ne cuàhàn-nè ñuu Antioquía.

²³ Te yucán nìsa ìa-ne iin ratu, dandu nì quihin tu-ne ichì cuàhàn-nè ladu Galacia xì ladu Frigia. Te ñuu ñuu nì nacàhin-ne nì càhàn-nè xì nècuàchì nchícùn ichì Jesús, nì nacuahandee ini-nè nècuàchìmà.

Ñà-nduá nì cuu na ní sàà Apolos ñuu Éfeso, te nì càhàn-nè palabra ì xì Dios

²⁴ Daaní, ñuu Éfeso mà nì sàà stná iin nècuàchì raza Judea nani Apolos. Alejandría nduú meru ñuu-nè, te tùha vâha-ne càhàn-nè sàhù. Te ináhá váha stná-nè nansa nacání tutu ì,

²⁵ vâchi cuàhà gá sàni dàcuàhá-né ichì Stoho-ndà Dios. Te dùi gá stná ini-nè càhàn-nè sàhù. Ñàyùcànduá, claru chináhá-nè sàhà ichì-yá. Doco cuisì ley xì Juan Bautista nduá ináhá-nè.

²⁶ Pues divi nècuàchìmà nì quesaha-né càhàn ndee-né xì nèhivì sàhàn veheñùhu xì raza-nè ñuu Éfeso mà. Te nì inini stná Priscila xì Aquila. Ñàyùcànduá nì tavà cuàán-ñané nì nacani vii-né xì nècuàchìmà nansa meru iá ichì Dios.

²⁷ Daaní, después, nì cuni nècuàchìmà yàha-ne nùu-xì ndé nduú ladu Acaya. Te nsidaa hermanu (ñuu Éfeso mà), nì cachi-nè:

—Ndiaha gá nú nì cùhùn-ní yucán.

Te nì tiaa stná-nè iin tutu cùhùn nuu nèhivì xì Jesús ndoó ladu Acaya mà ñà-cundua nùu nècuàchìmà. Daaní, después na sàni sàà nècuàchìmà yucán, cuàhà gá nì nacuahandee ini-nè nsidaa nèhivì sàni nìhítàhvì cunindisá ichì-yá.

²⁸ Vâchi nì càhàn stná-nè xì cuàhà tè-raza-nè Judea, nì cahvi-ne libru ì iníní-te, te ducán claru nì quida-ne comprobar ana nduú Jesús, ñà-divi rey ndiaha nani Cristu nduú-yá, te ducán nì cundee-né nùu témà, iníní nsidaa nèhivì.

19

Ñà-nduá nì quida Pablo na ní ìa-ne ñuu Éfeso

¹ Daaní, na iá ì Apolos ñuu Corinto, dandu nì quihin Pablo ichì nínu, nì yàha-ne ladu yucù mà, te nì sàà-nè ñuu Éfeso. Yucán nì ndacùhun tnahá-né xì itnii nècuàchì dacuahá ichì Dios.

² Te nì cachi-nè xì nècuàchìmà:

—Na ní xinindisá-nsiá palabra xì Dios, ¿a ní nìhítàhvì stná-nsiá cucumi-nsiá Espíritu ì xì-yá?

—Còó —cachí nècuàchìmà— tàñáha ga cundaà ini-nsi a ñà-ìá Espíritu ì, ò ñà-còò-yá.

³ Dandu nì cachi Pablo xì-né:

—¿Ana dìquívì-xì nì ndacùcahan-né na ní cuhii-nsiá?

—Dàñhù xì Juan Bautista nduá nì cuhii-nsí —nì cachi nècuàchìmà.

⁴ Dandu nì cachi Pablo:

—Ñà-ndáà nduá, nìsa quida ì Juan mà nèhivì na ní cuu-ne arrepentir. Doco nì cachi stná-nè ñà-después icúmí quixi ana cunihnu vâha ndisa ini-ndà, divi nduú Jesucristu.

⁵ Ñàyùcànduá, na ní cundaà ini nècuàchìmà nansa cachí Pablo, dandu nì canduhii sàà-né, doco vichi quivì Stoho-ndà Jesús nì ndacùcahan-né.

⁶ Dandu nì chitandòo Pablo ndahà-né dìni nècuàchìmà, te nì quixi fuerte Espíritu Ìì xí Dios ini anima nsidaa-né, te nì dàcàhàn-yànè dàhàn sàà, te nì càhàn stnà-nè razón ndiaha nì quixi nùù Dios.

⁷ Te nsidaa nèhivì mà, ùxìn ùì tiàa nduú-né.

⁸ Dandu ùni yòò nì ìa ga Pablo ñuu mà, sàhàn-nè veheñùhu xi nècuàchì raza-nè, te càhàn-nè xì nèhivì yucán, nacání-né nansa iá ichì ndé dandacú Dios, te dacàhàn-nè nècuàchìmà ñà-nì cúnchícùn viì-né ichì-yá.

⁹ Doco dava-ne, cóni cúdî ini-nè ley mà; cóni cúní-nè cunindisá-neà, ñàyùcàndüá, quini ga nì càhàn-nè xì nèhivì dìquì ichì-yá. Sàhà ñà-jaàn nì nacoo Pablo nècuàchìmà, te nì tavà cuàán-né nsidaa nècuàchì nchícùn ichì-yá cuàhàn-nè vehe iin tiàa nani Tiranno ndé nduú escuela. Te divi lugar mà nì dàcuahá-né nècuàchìmà nsiquívì.

¹⁰ Te ùì cuià nì chinaha-nè nèhivì ducán. Ñàyùcàndüá, nsidanicuú nèhivì ndoó ladu Asia yucán, nì xinitnùhu-ne nansa iá razón ndiaha xí Stoho-ndà Jesús, nècuàchì raza Judea, xì stnà nècuàchì dava ga, nsidaa-né nì xinitnùhu-ne.

¹¹ Te cuahà gá milagru fuerte nì sàhatahvì Dios nì quida Pablo.

¹² Dècuèndè pañuelu xi-ne, ò ndé` sìcoto itándiaa ìcà-né sàhàn nùù nècuàchì cuhí, te ndúvaha-ne, te yúxìn stnà ñà-malu ñuhú ini-nè.

¹³⁻¹⁴ Doco yucán nì sandoo stnà dava tè-raza Judea xicánúú tavá xi ñà-malu. Ùsà ñàni dèhe iin dùtù cusáhnù nani Esceva nduú-te. Te nì quesaha-té xicánúú-te ndácùcahan stnà-te quívì Jesús tavá-te ñà-malu. Te dohó cachí-te xán: “Yùhù ndácùcahín quívì Jesús, divi ana càhàn Pablo sàhà-xí, te dandacuí nùù-ndá ñà-quee-ndá, te cuahán-ndá”, cachí-te.

¹⁵ Doco (iin xichi) na ní quida-tè ducán, dandu nì naxiconihí ñà-malu nùù-té, cachá`:

—Yùhù ináhì Jesús, te ináhá stnàì ana nduú Pablo. Doco nsiohó, còò cuenta quihín nsiohó —cachá`.

¹⁶ Dandu tiàa inacáá-ñà anima-xi, nì ndàvà-te nì ducùn ndahà tnahá-te xi témà, te nì cundee-té nùù nsì-úsà témà, dècuèndè nì dànácùèhè stnà-te témà, te nì dandiàchì ì-té sìcoto xi temà. Ñàyùcàndüá, nì canacoyo nsihi-tè vehe ma cuàhàn-te.

¹⁷ Ñà-jaàn nduá nì cuu, te nì xinitnùhu stnà nsidaa nèhivì ñuu Éfeso yucán, nècuàchì raza Judea, xì stnà nècuàchì dava ga. Ñàyùcàndüá, yáha ga nì yuhí-nè, te chicá nì ndenihi vaha stnà-nè Stoho-ndà Jesús.

¹⁸ Te cuahà gá stnà nècuàchì xiníndísá-xí-yâ, nì quixi-ne nì nàhmà vate-né, nì dàtúi-ne falta nì quida-ne.

¹⁹ Te cuahà nècuàchì nì sanduu nècuàchì tàtnà, nì catnii-ne tutu itúì ndé itándiaa ñà-tàtnà xí-né vaxi-ne, te nì sahmi nsihi-neà nùù nsidaa nèhivì. Te nì tavà stnà-nè cuenta nadaa xíndiaa nsidaa tutu ma, te nì cundaà ini-nè nahi ùì dico ùxìn mil (50,000) dìhùn plata ndiaá`.

²⁰ Ducán fuerte nì chindee Stoho-ndà Señor nì xitià nihni palabra xi-ya, te nì cuahà-ñá.

²¹ Daaní, na ní nsihi nì cuu ducan, dandu nì nacani ini Pablo cùhùn tu-ne ladu Macedonia xì ladu Acaya, dandu nùhù-nè ñuu Jerusalén. Te nì cachi stnà-nè:

—Nú sàni ìa chíi ñuu Jerusalén yucán, dandu xiñuhu cùhùn stnàì ñuu Roma.

²² Dandu nì càhàn-nè xì ùì nècuàchì xinúcuáchí nùù-né nani Timoteo xì Erasto, te nì techuún-né nècuàchìmà ñà-màcòdònùù-né. Ñàyùcàndüá, nì quee nècuàchìmà cuàhàn-nè ladu Macedonia, doco Pablo, nì ndòò chíi gá-nè nì ìa-ne ladu Asia.

Nansa nì cuu cuahà sàhà ichì Jesús ñuu Éfeso

²³ Quívì yucán yáha ga nì cuu cuahà sàhà ichì-yá.

²⁴ Iin tiàa nani Demetrio nì dàquésáhá xân. Chuun xi nècuàchìmà nduú ñà-quidachuún-né xì plata, quidávaha-ne vehe cuati tnaha vehe cahnú yùù yócò Diana

(iá ñuu yucán). Te divi sàhà Demetrio mà cuàhà gá chuun nìsa nihì maestru quidáchúûn stná xì plata mà.

²⁵ Ñàyùcàndùá iin quivì nì cana Demetrio mà nsidaa maestru mà xì dava ga stná tiàa tùha quidachuún nahi oficiu xi stná mà, te nì cachi-nè xì nsidaa-té:

—Mii-nsiá, sà-ínahá-nsiá ñà-sàhà chuun xi-nda yohó icúmí-ndá ñà-cuicà-ndà, ñánì.

²⁶ Doco sàni xini-nsia, te ò sàni xinitnùhu-nsia nansa quidá iin tiàa nani Pablo, cáhàn-nè xì nèhivì, cachí-nè ñà-màdi dios ndisa nduú ñà-quidáyúcún ndahà nèhivì ñuhivì, cachí-nè, te ducán sàni dacà-né cuàhà nèhivì ñuu-ndà yohó, xì cuàhà stná nèhivì, inicutu ladu Asia yohó.

²⁷ Ñàyùcàndùá, vihini sàa stná nèhivì cahíchì ini-nèndó sàhà chuun quida-nda. Te màdi cuisì ñà-jaàn, vàchi vihini sàa stná-nè cahíchì ini-nè veheñùhu xi dios xi-nda Diana, te dandáñúhú stná-nè tnùñuhu xí-ña, mate mii-ñá nduú ana cahvi nsidanicuú nèhivì ladu Asia yohó, xì nsidaa stná nèhivì inicutu ñuhivì. —Ducán nì cachi Demetrio mà.

²⁸ Ñàyùcàndùá, na ní nsihi nì inini nècuàchìmà ñà-jaàn, dandu yáha ga nì caxidà ini-nè, te nì càna ndee-né, cachí-nè:

—¡Ndiaha gá stoho-ndà Diana iá ñuu Éfeso yohó!

²⁹ Ñàyùcàndùá, nì candulocó nèhivì inicutu ñuu mà, te cuàhà gá nì cuu cuahà sàhàmà dècuèndè nì tnii-ne ùi compañeru Pablo nani Gayo xì Aristarco. Nècuàchì ladu Macedonia cutnàhà xi Pablo nì quixi-ne ichì nduú nècuàchìmà. Dandu nsidaa nèhivì cuàhà yucán, ñuhú-né nècuàchìmà carrera cuàhàn-nè, nì caquìhvi-ne ini lugar cahnú ndé natáca nèhivì ñuu mà.

³⁰ Te Pablo, nì cuni stná-nè quìhvi-ne cáhàn-nè xì nèhivì mà, doco compañeru-nè nchícùn stná xì ichì Jesús, cóni sáha-ne lugar.

³¹ Te dava stná tè-xíandacú ladu Asia mà, ndoó vaha stná-te xi Pablo, ñàyùcàndùá nì dàsàa-te iin razón nùù-né, sacúndáhvi-te ñà-màsà quìhvi-ne lugar yucán. (Sàhà ñà-jaàn nduá cóni quìhvi-ne.)

³² Doco ini lugar mà, iin-ni càna ndee nèhivì cuàhà mà, mate tucu tucu xícatchi iin iin-ne, te ñà-yáha guá sàni nacuidà nsidaa-né, ñàyùcàndùá chicá cuàhà-né nì cóni sáha tnùnì ini-nè índù chuun nì nataca-nè yucán.

³³ Daaní, dava tè-raza Judea, nì chindaha-té iin tnaha-tè nani Alejandro ñà-nì mácuìn-nè nùù nsidaa nèhivì cuàhà mà. Te nì ndàhì dava nèhivì mà xì Alejandro mà ñà-nì cáhàn-nè xì nsidaa-né. Ñàyùcàndùá, nì dánhà ndahà-né áma mácuñdoo dadí nècuàchìmà, vàchi cuní-nè cáhàn-nè sàhà mii-né xì sàhà compañeru-nè nì cùì.

³⁴ Doco nèhivì cuàhà mà, na ní xinitnùhu-ne ñà-iin nècuàchì raza Judea nduú nècuàchìmà, dandu iin-ni nì càna ndee nsidaa-né, cachí-nè:

—¡Ndiaha gá stoho-ndà Diana iá ñuu Éfeso yohó! —cachí-nè. Te iin-ni nì càna fuerte nsidaa-né ducán nahi ùi hora.

³⁵ Daaní, por fin nì nihì tè-nduú secretariu ñuu mà nì nachindoo dadí-te nèhivì cuàhà mà. Dandu nì cachi-te xi-né:

—Mii-nsiá nècuàchì ñuu-ndà Éfeso yohó, ¿amádi sà-ínahá-nsiá ñà-nsidanicuú nèhivì sàni xinitnùhu nansa quida-nda ñuu yohó, ndiaá-ndà vehe stoho cahnu-nda, divi mii-ñá ní quee ndè ansivi nì nacava-ñà ndé yohó?

³⁶ Pues (ínahá-nè), te mà cùì cachí-nè có-nduá ñà-ndáa. Ñàyùcàndùá, ndiá icà-nsiá cundoo sahnú-nsiá, te màdiá quida cuahà-nsiá ducán.

³⁷ Vàchi nècuàchì nì tnii-nsia ndacá-nsiá vaxi yohó, cóni quidá quini-ne xì veheñùhu xi-nda, nì cóni cáhàn quini-ne dìquì dios xi-nda.

³⁸ Ñàyùcàndùá, nú cuní Demetrio xì compañeru-nè canicuàchi-ne sàhà iin nèhivì, dandu nì cùhùn-nè nùù juez ndoó ñuu yohó, te yucán nì canícuàchi stnahá-né sàhà-né.

³⁹ Te nú iá gá chuun xi-nsia vichi, dandu xiñuhu nataca-ndà ndatnuhu víi-nda ñà-nduú ichì ley.

⁴⁰ Vàchi vichi sàndòò-ndà tìxi peligru canicuàchi gobiernu sàhà nsidaa-nda, vàchi vihini cutuxi ini-nè ñà-cuàhàn-ndà daquésáhá-ndá iin revolución nduá, te mà náníhi tnùnì gá ini-ndà nansa cachi-ndà xì-né ndiá disáhà-xí nì cuu cuahà guá vichi.

⁴¹ Ducán nì cachi tè-nduú secretariu mà, dandu nì dãnácũitià nsihi-tè nèhivì mà.

20

Nansa nì sàhàn Pablo ladu Macedonia xì ladu Grecia

¹ Daaní, na ní nsihi nì cuu cuahà mà, dandu nì cana Pablo nsidaa nèhivì xí Jesús ndoó yucán, te nì nacuahandee ini-nè nècuàchìmà. Dandu nì ndaquìndèè stnahá-né, te nì quihin-ne ichì cuàhàn-nè ladu Macedonia.

² Te yucán nì nacàhin-ne cuàhà ñuu, te nì càhàn cuàhà-né xì nècuàchì hermanu ndoó yucán sàhà-ñá chicá nì cúníhnú vaha ini-nè mii-yá. Dandu nì quee-ne cuàhàn-nè chicá nùu-xí ndè ladu Grecia.

³⁻⁴ Te yucán nì ìa-ne ùnì yòò.

Doco na meru cuàhàn-nè quihin-ne barcu nùhù-nè ladu Siria nì cùí, dandu nì xinitnùhu-ne ñà-sànì ndatnuhu tè-raza Judea, cuní-te cahni-ténê. Ñàyùcànduá, nì naxicocuín ini-nè, nì quihin-ne ichì cuàhàn-nè nayàha-ne ladu Macedonia, dandu nùhù-nè ladu Asia. Te ichì mà cutnàhà stná-nè xì iin nècuàchì ñuu Berea nani Sópater, xì stná ùì nècuàchì ñuu Tesalónica nani Aristarco xì Segundo. Te cuàhàn stná iin nècuàchì ñuu Derbe nani Gayo, xì stná Timoteo, xì stná ùì nècuàchì ladu Asia nani Tíquico xì Trófimo.

⁵ Pues nsidaa compañeru Pablo mà, idónuu-né nì sàà-nè ñuu Troas. Te yucán nì cucuìta-ne ndiatú-né sàà stná Pablo xì yùhù.

⁶ Daaní nsiùhù tu, na sàni yàha vicò xixí-né pan có-ndùtáchí, dandu nì nana-nsi barcu ñuu Filipos. Te ùhùn quivì nì xica-nù mar dècuèndè nì sàà-nu ñuu Troas. Yucán nì nacuatnahá-nsí xì nècuàchì cuàhàn cueé mà. Te ùsà quivì nì cuee-nsi nì sandoo-nsi yucán.

Nansa nì natiacu iin tèchii ñuu Troas na ní nacava-tè nùu iin vehe idótnahá

⁷ Quivì primeru semana nì nataca nsidaa nècuàchì nchícùn ichì Jesús, te nì cudiní-né. Dandu nì càhàn Pablo xì-né ñà-nduú palabra xi Dios, dècuèndè dava ñuu nì càhàn-nè, vàchi dàtnàà inga quivì icúmí-nè quihin tu-ne ichì.

⁸ Te cuàhà ñuhu tnùu nihni ndé ndoó-nsí quartu dìquì-xì mà.

⁹ Te nùu iin ventana xan ma iá stná iin tèchii nani Eutico. Doco sádì vàhná-te ñà-nì cucaní guá hora càhàn Pablo. Sàhà ñà-yucán nì quidì naà-té, te nì naxiconihí-te nì nacava-tè dècuèndè pìsu ùnì. (Ñàyùcànduá, nì nuu nèhivì mà) nì ndanihi-nète, doco sàni xihì-te.

¹⁰ Dandu nì nuu stná Pablo ndé indúhu-té, te nì numi nihni-nète, te nì cachi-nè:

—Màsà yúhì-nsià, vàchi itiacù-te.

¹¹ Dandu nì nana tu nsidaa-né, te nì caxixi-ne. Te caní tiempu nì ndatnuhu gá Pablo xì-né dècuèndè nì tùinuù, dandu ní quihin Pablo ichì cuàhàn-nè.

¹² Doco tèchii ma, ndacá nèhivì mà-té mànuhù, vàchi sàni natiacù-te, te ñàyùcànduá nì cudì gá ini nsidaa-né.

Nansa nì yàha Pablo ndè ñuu Mileto

¹³ Daaní, nsiùhù, nì sàcòdònùu-nsí nùu Pablo, nì quihin-nsi barcu cuàhàn-nsi ñuu Asón, vàchi sàni ndatnuhu sahnú-nsí xì Pablo ñà-nacuaca-nsinè yucán, vàchi cuní-nè cacasahà-né cùhùn-nè ichì mà.

¹⁴ Sàháyùcànduá, ñuu Asón mà nì nacuatnahá-nsí xì-né. Dandu divi barcu mà nì sàhàn ndàà-nsi chicá nùu-xí ndè ñuu Mitilene.

¹⁵⁻¹⁶ Daaní, inga quivì nì quihin tu barcu mà ichì cuàhàn-nu xi-nsí ndè yatni ñuu Quío. Dandu inga quivì nì sàà-nsi ladu Samos, te después nì sàà stná-nsi ñuu Trogilio. Yucán nì

quetatu chii-nsí. Dandu inga quivì nì yàha uun-nsi ñuu Éfeso, nì sàà-nsì ñuu Mileto. Vàchi ducán nì nacani ini Pablo quida-nsi ñà-có-cùnì-nè cucuee-nè ladu Asia mà, vàchi yàha ga cunì-nè nasaa-nè ñuu Jerusalén antes nacava vicò Pentecostés.

Ñà-nduá nì cachi Pablo xì nècuàchì inùu chuun xi Jesús ñuu Éfeso

¹⁷ Daaní, na ndoó-nsí ñuu Mileto, dandu nì techuún Pablo iin razón cuàhàn ñuu Éfeso, caná-né nècuàchì sahnú inùu chuun xi Jesús ñà-quixi-ne.

¹⁸ Te na ní caquesaa-nè, dandu nì cachi Pablo xì-né:

—Mii-nsiá, sà-ináhá-nsiâ modo xi, nansa quidé dècuèndè quivì primeru nì quesai ladu Asia yohó; te ináhá stná-nsiâ nansa nisa quide inicutu tiempu nisa ìe cutnáhî xì-nsiá,

¹⁹ xinúcuáchî nùu Stoho-ndà Señor. Vàchi cónisá ìa cuadúì. Dècuèndè nisa sacu stnái cuàhà xichi sàhà-nsiá. Te cuàhà gá vida nì yàhi nì quida tè-raza Judea na ní candatnuhu-té ñà-dandáñúhú-tê yùhù.

²⁰ Te ináhá stná-nsiâ ñà-cónì chídèhî ni-ñàha cunduu ñà-vàha xi anima-nsiâ. Còó, vàchi nsidaámà nì cachitnùhi xì-nsiá. Cuàhà gá nì chinahì mii-nsiá na ní nataca-ndà iin-ni xaan, te na xicánúú stnái dacuahí-nsiâ dècuèndè vehe-nsia.

²¹ Nsidanicuú nèhivì nì càhàn xí, a ducán xínduu-ne nècuàchì raza Judea, te ò nècuàchì inga raza, doco claru nì cachì xì-né ñà-ndiá ìcà-né cuu-ne arrepentir nùu Yua-nda Dios, te cunihnu vàha ini-nè Stoho-ndà Jesucristu.

²² 'Pues vichi, yàha ga dansíhi anímè ñà-nùhù-tui ñuu Jerusalén, mate có-cùndáà inì nansa cuu xí yucán.

²³ Cuisì ináhî ñà-yòhó: cada sài iin ñuu, dandu cachí Espíritu ìì xí Dios ini anímè ñà-ìcúmî cundiadi, te ò ndohi yucán.

²⁴ Doco có-nacání inì sàhámà, vàchi có-ndùlócô guè sàhà vida xi, mate ni cahní-te yùhù. Cuisì cuní daxínu vií chuun icúmî, dandu cudii inì. Vàchi cuní quide cumplir chuun nì nihí nùu Stoho-ndà Jesús ñà-càhìn xì nèhivì ñà-nduú razón ndiaha sàhà gracia xi Dios.

²⁵ 'Cunaha-nsiá, mahì mii-nsiá nì xicanui càhìn palabra sàhà ñuhivì ìì xí Dios. Doco vichi, ináhî mà cúnístnàhà gá-ndà.

²⁶ Ñàyùcànduá, dohó cachí xì-nsiá vichi: nú ni sàà ndañuhu anima iin-nsia, yùhù mà cúnsidá cuàchi guè,

²⁷ vàchi sàni dàcuàhí mii-nsiá nsidaa ñà-nduá nì cachi Dios quida-nda, cóni chídèhî ni-iyuhu razón mà.

²⁸ Sàháyùcànduá, cundiaa vàha-nsia mii-nsiá, te cundiaa vàha stná-nsiâ nsidaa gá nèhivì xí Dios, vàchi nahi iá chuun ndiaá-ndà riì, ducán iá stná chuun icúmî-nsiâ nùu Espíritu ìì xí Dios. Ñàyùcànduá, cunuù víi-nsiá nèhivì xí-yá, vàchi xì nùu-yá sàni dànáà-yá sàhà nsidaa-nda sàhà ñà-cunduu-nda nèhivì xí-yá.

²⁹ 'Yùhù ináhî, nú sàcuàhìn, dandu icúmî ndecoyo tiàa dana cuni dacà xì dìnì-nsiá. Na quidá quisì ìhì, có-dàcàcu-sì riì, ducán quida stná nècuàchì mà xì-nsiá.

³⁰ Te nùu nsidaa stná mii-nsiá icúmî dava nèhivì quesaha stná-nè chináhà stnahá-né iin ñà-tnùhù áma cúnchícùn stná-nsiâ ichì mii-né.

³¹ Ñàyùcànduá, cuàhà gá cundoo tùha-nsia, te nsinuu ini-nsiâ nansa nì quide, vàchi ùni cuà nì ìe xì-nsiá, te nicanicuàhàn nisa chinahì mii-nsiá; ndui te ñuú nisa càhìn xì-nsiá, ndè nisa sacu stnái sàhà-nsiá.

³² 'Pues vichi ni ndóo-nsia xì Dios, te ni cúndiáá-yànsiâ, ñàni. Te ni cúnchícùn-nsiâ palabra sàhà gracia xi-ya, vàchi nú ni cúndéhe-nsiá palabra mà, dandu sàà-nsiâ cunindisá víi-nsiá, te ducán cundiatú stná anima-nsiâ ñà-vàha ndiaha xí-yá, te nihitáhvi stná-nsiâ cutnahá-nsiá xì nsidaa gá ana sàni ndoo anima-xi nì quida-ya.

³³ 'Yùhù, ni-iin biene xi ni-iin nèhivì cóni xíhoé, ni plata xi-ne, ni oro xi-ne, ni sìcoto xi-ne.

³⁴ Còó, vàchi ináhá-nsiâ, xì ndahí nisa quidachuín, te ducán nisa tùi ñà-nduá nisa itiacu-nsì.

³⁵ Sàni xini-nsià nsidaa ñà-nduá nisa guide, te sàhámà vátùni cundaà inì-nsia ndiá ìcà nsidaa-nda quidachuun-nda, dandu nihì-ndà nansa chindee stná-ndà ana iá necesidad xi. Te xiñuhu nsinuu stná inì-nsia palabra nì cachi Stoho-ndà Jesús na ní cachi-yà: “Chicá cundiatú anima-ndà ñà-dacútâhvi-ndà iñàha, te màdiá cutahvi mii-ndañá”.

³⁶ Daaní, nì nsihi nì cachi Pablo ñà-jaàn, dandu nì sàcùitasisi nsidaa-né, te nì xicàn tàhvi Pablo nùu Dios.

³⁷ Dandu cuàhà gá nì casacu nsidaa-né, te nì numi nihni stnahá-né, te nì tutuyuhu stnahá-né nùu-né,

³⁸ vâchi yâha ga nì nàcùndoo nsidaa-né tnùnsí ini ñà-nì cachi Pablo mà cúní stnahá gá-nè. Dandu nì sàndaca ichi-ñánê dècuèndè nùu barcu.

21

Nansa mànuhù Pablo ñuu Jerusalén

¹ Nì nsihi nì ndaquìndèè-nsí xì nèhivì yucán, dandu nì quihin barcu mà ichì cuàhàn-nu. Primeru nì yâha ndaà-nu ndè ñuu Cos. Dandu inga quivì nì sàà-nsì ñuu Rodas, te después nì sàà-nsì ñuu Pátara.

² Yucán nì xini-nsì iin barcu icúmí cùhùn ladu Fenicia. Ñàyùcànduá, yutnù yucán nì nana-nsì cuàhàn-nsì.

³ Te na ní xini xicà-nsí ñuu cahnú mahì mar nani Chipre, dandu nì yâha-nsi iin ladu, te ladu itní-nsì nì ndòo ñuu mà. Dandu nì sàà-nsì ladu Siria. Meru ñuu ndé nì sàà barcu mà nùu ñuhù nani ñuu Tiro, te divì lugar mà cuàhàn nuu carga xi-nù.

⁴ Te yucán nì ndacùhun tnahá stná-nsì xì nèhivì xí Jesús; ñàyùcànduá, ùsà quivì nì sandoo-nsi xì-né mà. Dandu nì dàcàhàn Espíritu Ìì xí Dios dava nècuàchìmà, te nì cachi-nè xì Pablo ñà-màsà cùhùn-nè ñuu Jerusalén.

⁵⁻⁶ Doco na ní nsihi ùsà quivì mà, dandu nì quihin tu-nsi ichì cuàhàn-nsì, te nì sàndaca ichi nsidaa nècuàchìmà nsiùhù, tiàa xi ñahà xì stná dèhe-ne, nsidaa-nsí nì sàhàn-nsì orilla ñuu mà dècuèndè yuhù mar. Te yucán nì sàcùitasisi-nsí nì xicàn tàhvi-nsí nùu Dios, dandu nì ndaquìndèè tnàhá-nsí, te nì numi nihni stnahá-nsí. Dandu nì nana nsiùhù barcu mà, te mànuhù nècuàchìmà vehe-ne.

⁷ Daaní, nì quee barcu mà ñuu Tiro, te nì xica-nù mahì mar ndè ñuu Tolemaida. Yucán nì nuu-nsi, te nì casàhù-nsì xì nècuàchì hermanu ñuu mà. Te iin quivì-ní nì cuee-nsì yucán.

⁸ Dandu inga quivì nì quihin tu-nsi ichì cuàhàn-nsì, Pablo xì nsiùhù nècuàchì cutnàhá xí-nè, te nì sàà-nsì ñuu Cesarea. Te yucán cuàhàn-nsì vehe Felipe cundoo-nsi. Te Felipe mà nduú iin nècuàchì nùu ùsà tiàa (nisa dasàn xì ración), doco vichi xicánúú stná-nè cáhàn-nè xì nèhivì ñà-nduú palabra sàhà Jesús.

⁹ Te cùmì dèhe yoco-né ndoó xínduu señorita, te sàni nìhítâhvi stná nsìcúmíá cachitnùha razón xi Dios.

¹⁰ Pues divì vehe nècuàchìmà nì sandoo-nsi itnii quivì. Dandu yucán nì sàà stná iin tiàa nì quixi ladu Judea nani Agabo. Te tùha stná-nè cachitnùhu-ne razón xi Dios.

¹¹ Te nì tnàtuu-ne nùu-nsí, nì ndaxin-né siuhmatixi Pablo, dandu nì suhni-nèà sàhà-né xì ndahà-né, te nì cachi-nè:

—Dohó cachitnùhu Espíritu Ìì xí Dios: “Tiàa dìsiúhmátixi-xi yohó, icúmí stná-nè cunuhni-nè quida tè-raza Judea ñuu Jerusalén, dandu yâha-ne ndahà tè-inga ñuu”.

¹² Ñàyùcànduá, na ní cachi-nè ducán, dandu nsiùhù xì stná nècuàchì ñuu Cesarea mà, nì sacundahví-nsì nùu Pablo ñà-màsà cùhùn-nè ñuu Jerusalén.

¹³ Doco nì cachi-nè xì-nsí:

—Màsà cuácú gá-nsià, vâchi yâha ga cuí sentir ñà-quidá-nsiá ducán, vâchi dispuestu ié màcùnuhni ñuu Jerusalén, mate dècuèndè nì cùí stnâi yucán sàhà Stoho-ndà Jesús —nì cachi-nè.

¹⁴ Pues sàhà-ñá mànicùí cadi-nsì nùu-né, còò ni-iñàha ni cachí gá-nsì, cuisì ní cachi-nsì:

—Dios cachi-yà.

¹⁵ Daaní, nì nsidayucun-nsi carga xi-nsi cuàhàn-nsi ñuu Jerusalén.

¹⁶ Te nì cutnahá stná-nsi xì iin ùi nècuàchì xiníndísâ ndoó ñuu Cesarea mà cuàhàn-nsi, te (nì sàà-nsi ñuu Jerusalén) ndè vehe iin nècuàchì nì quixi ñuu Chipre nani Mnasón. Mii-né, sàcàní quivì nchícùn stná-nè ichi Jesús, te divi vehe-ne nduú ndé cundoo-nsi.

Nansa nì sàhàn Pablo nì ndatnuhu-né xì Jacobo

¹⁷ Daaní, na ní sàà-nsi ñuu mà, dandu nì casàhú-nsi xì nècuàchì hermanu ndoó yucán, te nì cudii ini-nè ñà-sàni sàà-nsi.

¹⁸ Daaní, inga quivì cuàhàn-nsi xì Pablo dècuèndè ndé iá Jacobo. Te yucán sàni nataca stná nsidaa nècuàchì sahnú inúu xì nèhivì xí Dios.

¹⁹ Dandu nì casàhú Pablo xì nècuàchìmà, te nì nacani nsihi-ne nansa nì cuu na ní sàhàn-nè ñuu xicà, te (nì quida-ne chuun ìi xí Dios), te ndiaha gá nì chindee-yánè yucán.

²⁰ Daaní, na ní nsihi nì inini nècuàchìmà, dandu nì naquimanì-néyà, te nì cachi-nè xì Pablo:

—Ñání, sàxínì-ní ndoó cuàhà mil nècuàchì raza-ndà xiníndísâ ichi-yá. Te nsidaa-né, nchícùn vii-né ley xi Moisés.

²¹ Doco cachí cuentu sàhà mii-ní ñà-chínáhà-ní nècuàchì raza-ndà ndoó inga ñuu ñà-màsà quihín casu gà-nè sàhà ley mà, ni có-xiñùhù gá màcùtuu seña xi Dios icà dèhe-ne, ni có-ndiá icà stná-nè chivàha ga-nè estilu xi raza-ndà.

²² Ñàyùcànduá ¿ndiá quida-nda? vachi icúmí nèhivì nataca-nè nú sàni xinitnùhu-ne iá-ní yohó.

²³⁻²⁴ Chicá vaha dohó quida-ní. Cundaca-ní cùmì tiàa ndoó yohó sàni saquin xì iin compromisu nùu Dios, te cùhùn-nsià nduhì-nsiá (nacua cachí ley xi-nda), te quida-ní chii gastu sàhà-né. Dandu después daté tehe dìni-né. Vachi nú ducán ni quida-ní, dandu vátuni cundaà ini nèhivì cuentu uun nduá ndatnúhú-nè sàhà-ní, vachi (cuninùu-né) quidá víi-ní, te chivàha vii-ní ley xi-nda.

²⁵ 'Doco nsidaa nècuàchì inga raza yucán, còó; sàni dàsáa-ndà iin carta nùu-né ndé cachí-ndà ñà-còò necesidad chivàha-ne ley mà, cuisì ñà-màsà cáxi-né ñà-nì sàcùndoo nùu yùu yócò, te màsà cúxí stná-nè nì, nì màsà cáxi-né cuñu quisì nì sàhná uun, nì màsà cóó-né xì nècuàchì cóni nándàhà xì-né —nì cachi Jacobo.

Nansa nì catnii-tè Pablo na iá-nè veheñùhu cahnú

²⁶ Daaní, nì saca Pablo nsi-cùmì tiàa ma, te nì quee-ne inga quivì nì casahàn-nè ñà-nsidandoo nsidaa-né mii-né nacua cachí ley xi-ne. Dandu nì quihvi-ne veheñùhu cahnú, nì cachitnùhu-ne nadaa ga quivì cunihii-né, dandu después cuàha iin iin-ne quisì cunduu promesa xi-ne.

²⁷ Ùsà quivì nduú tiempu (cunihii-né). Te sàdaaní xinu quivì mà, dandu dava tè-raza Judea nì caquixi ladu Asia, nì xinì-te Pablo na iá-nè veheñùhu ma. Ñàyùcànduá nì quesaha-té nì nsida tontó-te nèhivì cuàhà yucán. Nì catnii-tè Pablo,

²⁸ te nì càna ndee-té, cachí-te:

—Mii-nsiá tè-raza-ndà Israel, chindee-nsiá nsiùhù, vachi divi tàyòhó nduú tiàa cáhàn guá dìquì-ndà ñà-có-ndiáá raza-ndà, cachí-te, ni có-ndiáá stná ley xi-nda, te nì có-ndiáá gà stná veheñùhu yohó, cachí-te. Te ducán chináhà-te nèhivì inicutu. Te màdì sàhà cuisì ñà-jaàn nduá; còó, vachi nì saca stná-te iin tè-raza sìquini nì quihvi-tè xì témà veheñùhu yohó. Ñàyùcànduá, sàni cuchicuehe ñà-ìi icúmí vehe ìi yohó.

²⁹ Ducán nì cachí témà, vachi antes nì caxinì-te xicánúu Pablo ñuu mà cutnàhâ-né xì iin nècuàchì ñuu Éfeso nani Trófimo, (iin nècuàchì inga raza). Te nì catuxi inì-te ndacá stná Pablo tiàa ma nì sàhàn ini veheñùhu cahnú-ma.

³⁰ Ñàyùcànduá nì nacuidà nsidaa nèhivì inicutu ñuu mà, nì dàyáa-nè vaxi-ne nì nachitu-né. Te ñuhú nihni-ne Pablo nì tavà-né nècuàchìmà fuera veheñùhu cahnú-ma, te vichi duha nì nacadi nsihi-ne yehè patiu mà.

³¹ Meru nandúcú-nê modo nansa cahni-né Pablo, dandu ni sàà razón nùu comandante coronel ñà-sàni nacuidà sàstnùhù nsidaa nêhivì ñuu Jerusalén mà.

³² Dandu ni nacuaca comandante mà cuàhà soldadu xi stná capitán xi-ne, te ni dàyáa-nè xi-té cuàhàn-nè ndé quidá cuàhà guá nêhivì. Te na ní xini nêhivì mà vaxi comandante xi soldadu mà, dandu ni cucuítà iì-né, cóni càní gá-nè Pablo.

³³ Dandu ni tnàtuu comandante ni dandàcú-né nùu soldadu xi-ne ñà-ni tnií-te Pablo, te màcùnuhni-nè xi ùi cadena. Dandu ni ndacàtnùhù-né nùu nêhivì cuàhà mà:

—¿Ana nduú tiàa yohó, te ndià ni quida-tè?

³⁴ Doco nêhivì cuàhà yucán, cána ndee-né; tucu tucu cachí iin iin-ne, mànicúì cundaà ini comandante nansa ndisa iá chuun ma ñà-cána guá nècuàchìmà. Ñàyùcàndùá, ni dandàcú-né nùu soldadu xi-ne ñà-ni cundácá-te Pablo nùhù ini vehe cahnú-te.

³⁵ Sàhámà, ndacá témànè ni nasaa vehe-tè, cuàhàn-te nana-tè cuaì. Doco ñà-dana guá ndoó nêhivì cuàhà mà, ñàyùcàndùá fuerza ni sàcùnsida-tè Pablo ni nana,

³⁶ vachì nchícùn chitu nsidaa-né, cána-ne, cachí-nè:

—Cahni-ndà tè-jaàn chicá vaha.

Nansa ni càhàn Pablo sàhà mii-né nùu nêhivì cuàhà

³⁷ Daaní, na meru cuàhàn soldadu mà dayáha-tè Pablo ini vehe cahnú-te, dandu ni cachi-nè xi comandante coronel yucán:

—¿A iá permisú càhàn tií xi-ní?

Dandu ni cachi-nè xi Pablo:

—¿A túha stná-ní càhàn-ní dàhàn griegu?

³⁸ ¿A có-nduú-ní tè-ñuu Egipto ni quida revolución daa, te ni idònuú-ní nùu cùmì mil tè-tèhì ni saca-níte cuàhàn-nsia yucù?

³⁹ —Còo —cachí Pablo—, yùhù, tè-raza Judea nduí. Meru ñui nduú ñuu Tarso iá ladu Cilicia. Tiàa iá derechu-xi nduí; te ñui mà, có-nduú stná iin ñuu tii. Ñàyùcàndùá sacúndáhvì nùu-ní áma táxí-ní permisú càhàn xi nêhivì cuàhà yohó —ni cachi-nè.

⁴⁰ Dandu ni sàha comandante mà lugar càhàn-nè. Ñàyùcàndùá, ni ndacuiin-nè nùu cuaì mà, te ni dànáhà ndahà-né ñà-ni cúdádí nsidaa nêhivì mà. Te na ní ndudadí nsihì nècuàchìmà, dandu ni càhàn-nè. Doco puru dàhàn (nêhivì ñuu mà) ni càhàn-nè, divi dàhàn hebreu, te dohó ni cachi-nè:

22

¹ —Mii-nsiá nècuàchì sahnú, xi nsidaa gá stná ñani dava ga, cunini-nsia cuàhàn càhàn sàhà mií —ni cachi Pablo.

² Dandu nêhivì cuàhà yucan, na ní cundaà ini-nè ñà-divi dàhàn mii-né càhàn stna nècuàchìmà, dandu chicá ni cudadí-né. Te ni cachi gá Pablo:

³ —Yùhù, iin nècuàchì raza Judea nduí. Ñuu Tarso iá ladu Cilicia nduú lugar ndé ni tùinuí ñuhiví, doco ñuu yohó ni sahnui. Te maestro Gamaliel nduú ana nisa dacuaha-xí. Ñàyùcàndùá, ni dàcuàhá vahi nsidaa ñà-ndùá cachí ley xi xii-ndà, vachì yáha ga nisa cunì chivàha vií ley xi Dios, divi nacua cuní stná mii-nsiá vichi.

⁴ 'Daaní, ni quesahí dandohó stnáì nècuàchì nchícùn ichì Jesús. Tiàa te ñahà nisa chicuhni, te nisa chicadi-nè; dècuèndè cui stná-nè nisa cunì.

⁵ Ináhá dùtù cusáhnù ndoó vichi, xi stná nsidaa nècuàchì sahnú dandacú, vètùnì cachi stná-nè nansa nisa quide nú ni cúcáhàn-nè, vachì ináhá-nè (vida xi). Te divi nùu mii-né ni nihí tutu nduú orden ñà-cunihì cùhùn nùu nècuàchì raza-ndà ñuu Damasco. Ñàyùcàndùá, ni quihin ichì ñuu mà cuàhàn tniì nsihì nêhivì xí Jesús (ndoó yucán), te chicuhni-nè cundaqui-nè ndixi ñuu-ndà yohó sàhà ñà-ndoho stná-nè ni cahín.

⁶ Ñàyùcàndùá, xiqué cuàhàn (ichì mà). Te nahi càxíhùì ni sandua na sà-ítuú sàì ñuu Damasco mà, dandu nanàá ni natnuù nihni inicutu ndé cuàhàn; dècuèndè dìquì-xí ansivi ni quixi nduà luz mà.

⁷ Te hora mà nì nàcasín, te nì tiacùi cáhàn iin ana cáhàn xì', cachí-yà: “¡Saulo, Saulo! ¿Índù chuun nchícùn-ní yùhù quida quini-ní xì?”

⁸ Dandu yùhù, nì cachì xì-yá: “¿Ana nduú mii-ní, Señor mío?” Te nì cachi tu-ya: “Jesús de Nazaret nduí, divi ana dandoho-ní”, nì cachi-yà.

⁹ Doco compañeruì, mate ní xini-nè ñà-tnùù luz mà, te nì cayùhí cuàhà-né, doco cóni tiacú-nè ñà-nduá nì cachi-yà xì'.

¹⁰ Dandu nì cachì xì-yá: “¿Ndíà nduá cuní-ní quide, Señor mío?” Dandu nì cachì-tu-ya xì': “Ndacuiìn-ní, cuahán-ní ñuu Damasco, te yucán icúmí-ní ndacu nuù-ní ñà-nduá sàni chitnùnì inì quida-ní”, nì cachi-yà.

¹¹ Doco cunaha-nsiá, ñà-fuerte guá nì tnùù ndiaha nì xinì mà, ñàyùcànduá nì ndañuhu vista xi. Te sàhà-ñá có-tùínúí', ñàyùcànduá nì sàcùtnii ndahà tnahí xì compañeruì, te nì saca-ne yùhù cuàhàn-nsi ndè cachi nì sàà-nsi ñuu Damasco mà.

¹² Te divi ñuu mà iá iin tiàa nani Ananías. Iin nècuàchì cahvi xì Dios nduú-né, te chívàha viì-né ley xi-ya. Ñàyùcànduá, nsidaa nècuàchì raza-ndà ndoó yucán, ndeníhí vaha stná-nè nècuàchì mà.

¹³ Pues divi nècuàchì mà nì sàà nì sàcuiìn nùí, te nì cachi-nè xì': “Ñàni Saulo, ndacoto-ní, natùinuù-ní vichi, cachì xì-ní”, nì cachi-nè. Dandu luegu nì natùinuì', te vètùni nì xinì mii-né.

¹⁴ Dandu nì cachi-nè xì': “Mii-yá nisa cahvi xii-ndà, dècuèndè sànahà nì chitnùnì ini-yà ñà-cundaà inì-ní sàhà-yá, te nìhítàhvi stná-ní cuninùù-ní mii-yá único ana ndàcuisì inì-xi, divi Jesús, te cunini stná-ní cáhàn-yà.

¹⁵ Ñàyùcànduá, vichi icúmí-ní cáhàn-ní sàhà-yá xì cuàhà nèhivì, te nacani-ní xì-né ñà-nduá nì xinì-ní, te nì tiacù-ní.

¹⁶ Pues vichi, sà-íá, ndacuiìn-ní, te cuahán-ní cuhii-ní, ndacùcahan-ní quivì Stoho-ndà Señor, dandu ndoo cuàchi anima-ní”, nì cachi Ananías mà xì'.

¹⁷ Daaní, después nì nsiaì ñuu Jerusalén yohó, te nì sàhìn veheñuhu cahnú. Te na ié' yucán xicàn tàhvi nùù Dios, dandu nì dàcùnì-yà yùhù iin seña xi-ya.

¹⁸ Nì xinì mii-yá, te cachí-yà xì': “Dansíhi-ní, te quee yàchì-ní ñuu Jerusalén yohó, vàchi nècuàchì ñuù-ní yohó, mà cúníndísà-né ñà-nduá cachì-ní xì-né sàhí”.

¹⁹ Dandu nì naxiconihí nùù-yá, cachí': “Señor mío, nsidaa nèhivì, sà-ínáhà-nè nansa nisa quide antes, nisa nacàhin veheñuhu tniì nècuàchì xiníndísà-xí-ní, te sadí-nè vehecàa, te nì sahnì cuí stnáì-nè.

²⁰ Stná nèhivì xì-ní nani Esteban, testigu nì sanduu stnáì na ní sahnì nèhivì-né, te nì xità nì-né. Ni cuí-nè, nì cachi stnáì. Dècuèndè nì sandiaì sìcoto xi nèhivì nì sahnì xì-né mà”.

²¹ Dandu mii-yá, nì cachi-yà xì': “Quee-ní yohó, vàchi icúmí techuín mii-ní cùhùn xicà-ní dècuèndè ndé ndoó nèhivì inga raza”, nì cachi-yà. —(Ducán nì cachi Pablo, cáhàn-nè xì nèhivì cuàhà mà.)

²² Doco jaàn-ní nduú nùù-xí nì inini nècuàchì mà, vàchi nì quesaha tú-né nì càna ndee-né, cachí-nè:

—¡Ni cuí dahuun tējaàn! ¡Có-xiñùhù coo gà-te ñuhivì!

²³ Ducán nì cachi-nè, càna-ne, dandiachi-né dùhnù-né, te quidá canúú-nè yàcá.

²⁴ Ñàyùcànduá, nì dàndàcú comandante coronel mà nùù soldadu xi-ne ñà-daquíhvi-tè Pablo ini vehe cahnú-te, te dandohó-tené xì chirrión sàhà-ñá nàhmà-né, te cundaà inì-xi ndíà dìsàhà-xí càna guá nèhivì sàhà-né ducán.

²⁵ Doco na ní nsihi nì chicuhni vaha soldadu-nè, dandu nì cachi-nè xì iin capitán iin yucán:

—¿A sàha ley xi gobiernu quida-ní xì dohó, ñà-cahnì cuí-ní yùhù? vàchi nècuàchì romanu nduí, (iá derechu xi), te tàñáha ga coo justicia sàhí —nì cachi-nè.

²⁶ Ñàyùcànduá, na ní cundaà ini capitán mà ñà-jaàn, dandu nì sàhàn-te nì ca-chitnùhu-tè xì comandante mà:

—Cuidadu coo-ní xì nècuàchì jaàn, vàchi nècuàchì romanu nduú-né —nì cachì-te.

²⁷ Dandu nì quixi comandante mà ndé iá Pablo, te nì cachi-nè xì nècuàchìmà:

—Cachì-ní xí, ¿a ndísá nècuàchì romanu nduu-ní, á cóo?

—Jaan —nì cachi-nè.

²⁸ Dandu cachí tu comandante mà:

—Yùhù, yáha ga cuàhà dìhùn nì dàquìhvi, te nì nìhì stnái nì sàcùndui nècuàchì romanu.

Dandu nì cachi Pablo:

—Doco yùhù, cóo, vàchi dècuèndè nì quesai ñuhiví nduí nècuàchì libre.

²⁹ Dandu tiàa cuàhàn cahni cuí xì-né nì cuí, luegu nì nacoò-tèné cuàhàn-te. Dècuèndè stnà comandante coronel mà, nì yùhì-nè sàhà ñà-nì dándàcú-né nì sàcùnuhni nècuàchìmà, te nduú-né iin nècuàchì romanu, iin nècuàchì libre.

Ñà-nduá nì cachi Pablo xì nècuàchì Junta

³⁰ Daaní, nì tùinuù inga quivì, dandu cuní comandante-mà cundaà ndisa ini-nè ndiá disáhà-xí cáhàn tnùhù guá tè-raza Judea mà dìquì Pablo. Ñàyùcànduá, nì ndaxin-né cadena nuhní nècuàchìmà, te nì dándàcú-né nataca dùtù xícusahnú, xì nsidaa stnà nècuàchì sahnú idónuu. Dandu nì tavà-né Pablo cuàhàn-nè xì nècuàchìmà vehe ndé natáca nècuàchì sahnùmà, te nì chicani-ñané mahi nsidaa nècuàchìmà.

23

¹ Dandu nì indehè váha Pablo nùù nsidaa nècuàchì Junta mà, te nì cachi-nè:

—Ñánì, ndahà Dios ié ñuhiví yohó, te quivì vichi, còò ni-ñàha dandohó gá xì anímè.

² Doco dùtù cusáhnû yucán nani Ananías, nì dándàcú-né nùù tiàa itá yatni ndé iin Pablo ñà-nì càní-te yuhù-né.

³ Dandu nì cachi Pablo xì dùtù mà:

—Cunaha-ní, icúmí stnà Dios cani-ya mii-ní iin castigu, ñà-dànàní uun-ní nduu-ní nèhivì váha. ¿Amádi iá-ní jaàn ñà-cuàhàn-ní nsidandaà-ní chuun-xi sàhà ley xi-nda? Pues nú ducán, dandu ¿índù chuun nì dándàcú-ní nùù-té ñà-nì càní-te yuhù? vàchi có-sàha ley xi-nda (cani stnaha-nda) —nì cachi Pablo.

⁴ Dandu nècuàchì xí-ita yatni yucán, nì cachi-nè xì Pablo:

—¿Índù chuun cánahá-ní xì ndómà, vàchi dùtù cusáhnû iá nùù Dios ndùù-ndà?

⁵ Dandu nì cachi Pablo:

—Ñánì, cónì cundáa ini nduú ndómà dùtù cusáhnû. Vàchi cachí libru ìì: “Màsà cánahá-ndà dìquì nècuàchì nihí chuun ñuu-ndà” —nì cachi-nè.

⁶ Dandu nì indehè Pablo nùù nècuàchì Junta mà, te nì xini-nè, dava-ne, nècuàchì saduceu nduú-né, te dava ga-nè, nècuàchì fariseu nduú-né. Ñàyùcànduá, ndee ní càhàn Pablo, nì cachi-nè xì nsidaa nècuàchìmà:

—Ñánì, nècuàchì fariseu nduú stnà yùhù; vàchi yué, divi fariseu nì sanduu stnà-nè. Te divi sàhà-ñá xiníndísê iá tnùndé ini natiacu-ndà nú nì xihì-ndà, ñàyùcànduá sanícuàchi nèhivì sàhí vichi.

⁷ Na ní nsihi nì cachi-nè ducán, dandu nì quesaha nècuàchì fariseu mà nì nàa stnahá-né xì nècuàchì saduceu mà. Dècuèndè nì tàhndè dava-ne, vàchi tucu tucu xínacani ini-nè.

⁸ Vàchi nsidaa nècuàchì saduceu mà, có-xiníndísâ-né ñà-icúmí-ndá natiacu-ndà, ni còò ángel, ni còò stnà anima-ndà, cachí-nè. Doco nècuàchì fariseu, ndisa, xiníndísâ-né nsidaámà.

⁹ Ñàyùcànduá, yáha ga nì cucuahà sàhámà, te fuerte nì càna nsidaa-né. Dava maestru nduú fariseu, nì ndacuìta stnà-nè, càhàn fuerte-nè, cachí-nè:

—Còò, nuá nùù nsiuhù, còò falta xì nècuàchì yohó. Vihini ñà-ndáa nduá iin ángel nì cachi xì-né iñàha, te ò iin espíritu xì Dios nì càhàn xì-né. Ñàyùcànduá (cuidadu ni cundóo-ndá) còtó Dios nàa stnahà xì-ndà —nì cachi-nè.

¹⁰ Dandu yáha ga nì cucuahà gá náâ stnahá nèhivì mà, ndè yúhî comandante mà vihini cuàhàn-nè danácuèhè dahuun-ne Pablo. Ñàyùcànduá, nì dandàcú-né ni tnátuu soldadu, te fuerza nì tavà-té Pablo nù nècuàchì yucán, nì nacuaca-tèné mànuhù-té xí-né ndè vehe cahnú-te.

¹¹ Daaní, nì cuñaà quivì yucán. Dandu nì dàcùnì Stoho-ndà Señor Pablo mii-yá. Yatni iín-yá, cáhàn-yà xì-né, cachí-yà:

—Màsà cùhúun inì-ní, Pablo, vàchi nacua sàni cáhàn-ní sàhí ñuu Jerusalén yohó, ducán icúmí-ní cáhàn stná-ní sàhí ndè ñuu Roma.

Nansa nì candatnuhu tè-có-xiníndísâ ñà-cahni-té Pablo

¹² Na ní tùinuù inga quivì, dandu dava tè-raza Judea mà, nì candatnuhu-té nì chihaha-té Dios, cachí-te:

—Mà cúxí-ndá, ni mà cóhó-ndá tècuí ndè cachi cahnì-ndà Pablo, te nú coó, ni sáa Dios cahnì-yándô.

¹³ Cunaha-ní, tiàa nì candatnuhu ducán, yáha ùi dico nì sanduu-tè.

¹⁴ Ñàyùcànduá, nì caquee-tè cuàhàn-te nù dùtù xícusahnú ndoó cutnáhâ xí nècuàchì sahnú xídandacú, te nì cacachì-te xì-né:

—Nsiùhù, sàni chinaha-nsí Dios ñà-mà cúxí gá-nsì ndè cachi cahnì-nsí Pablo, te nú coó, ni cuí-nsì quida-ya.

¹⁵ Ñàyùcànduá, mii-nsiá xì nsidaa dava ga nècuàchì dandacú, càcàn-nsià favor nù comandante coronel, cachi-nsiá xì-né ñà-cùnì-nsiá ndàcàtnùhù gá-nsià nù Pablo, te sàhájàn nduá cuní-nsià quixi-ne tnaa, cundaca-ne Pablo quixi nù-nsiá. Dandu nsiùhù, cuàhàn-nsi cuita tùha-nsi ichì cahnì-nsínè —nì cachi tè-raza Judea mà.

¹⁶ Doco yucán nìsa là iin sobrinu xi Pablo, iin dèhe cùha-ne, te nì xinitnùhu stná-te nansa cuàhàn tiàa cuahà mà quida-tè, cundiatu dèhé-tené. Ñàyùcànduá, nì sàhàn tèchii ma vehe cahnú soldadu, te nì quìhvi-tè nì cachitnùhu-tè xì Pablo.

¹⁷ Dandu nècuàchì mà, nì cana-ne iin capitán, cachí-nè xì témà:

—Cundaca-ní tèchii yohó cùhùn nù comandante coronel, vàchi nihí-te iin razón cuní cundaa ini-nè.

¹⁸ Ñàyùcànduá, nì saca capitán mà tèchii ma cuàhàn-te nù comandante coronel, te nì cachì-te xì nècuàchì mà:

—Nècuàchì ndiadí nani Pablo, nì cana-ne yùhù nì xicàn-nè favor cundaqui tèchii yohó quixi nù-ní, vàchi nihí-te iin razón vàxi.

¹⁹ Dandu nì tnii comandante mà ndahà tèchii ma nì tavà cuàán-nète nì xicàn tnùhù-né nù-té:

—¿Índù iñàha cuní-ní cachì-ní xì?

²⁰ Te nì cachi tèchii ma:

—Cunaha-ní, iin-ni sàni ndatnuhu váha dava tè-raza Judea ñà-cuàhàn-te càcàn-te favor nù-ní ñà-cundaca-ní tiu xi Pablo cùhùn nù nsidaa nècuàchì xídandacú, vàchi cuàhàn-nè quida-ne na ian cuní-nè ndàcàtnùhù gá-nè nù tiu-xi.

²¹ Doco, mii-ní, màsà cúníndísá-ní quida-ne, vàchi cuàhà tiàa cuàhàn cundiatu dèhé, más ùi dico xínduu-tè, te sàni chinaha-té Dios ñà-cuàhàn-te cahnì-té tiu xi. Ni mà cúxí gà-te, ni mà cóhó gà-te tècuí ndè cachi cui-nè, xícachì-te. Te vichi, sà-itá tùha-tè ndiatú-te dandàa-ní —nì cachi tèchii ma.

²² Dandu nì chinaha comandante témà, cachí-nè:

—Sà-íà nùhù-ní vitni, doco màsà cáhì-ní xì ni-iin nèhivì ñà-nduá nì cachitnùhu-ní xì.

Nansa nì dàsàa comandante Pablo nù gobernador Félix

²³ Dandu nì cana comandante mà ùi capitán, te nì cachí-nè xì-té:

—Quidayucun-nsià ñà-caquihin-nsia ichì cundaca-nsia ùi cientu soldadu cùhùn ñuu Cesarea, te nì cácuùn stná ùni dico ùxìn (70) soldadu xì idu, xì stná ùi cientu tè-nihí lanza. Nsidaa-nsiá cundoo tùha-nsia caquee-nsia cà-íin sàñaà —nì cachí-nè.

²⁴ Dandu nì cachi stná-nè nì cuità iin ùi idu cunúú stná Pablo, te nì cúndácá víi-téné sàà nùù gobernador Félix.

²⁵ Daaní, nì tiaa stná comandante mà iin tutu cùhùn, te dohó cachá`:

²⁶ “Yùhù nani Claudio Lisias, te cásàhú tñùñuhí xì mii-ní nècuàchì gobernador Félix.

²⁷ Tiàa nani Pablo, nì catnii tè-raza Judea-nè, cuàhàn-te cahni-téné nì cùí, dandu nì sàà yùhù ndacá stnahí xì soldadu, te nì nacuidahín-nè nùù témà, vàchi sàni cundaà inì nduú-né iin nècuàchì romanu.

²⁸ Daaní, cuní cundaà inì ndià dìsàhà-xì dacuidá cuàchi guá-tené, ñàyùcàndüá nì saquìn-nè nùù nsidaa tè-xídandacú nùù raza-nè.

²⁹ Te yucán nì xinì, còò ni-iin cuàchi icúmí-né ñà-cui-nè, ni ñà-cundiadi stná-nè, cuisì-ní sàhà dàñùhù xì mii-té cáhàn tñùhù-té sàhà-né.

³⁰ Daaní, después nì xinitnùhu stnáí nansa ndatnúhú dava-tè, cuní-te dandáñúhú-téné. Ñàyùcàndüá, vichi duha nì dandàcú sàà-nè nùù mii-ní; te nì dandàcú stnáí nùù tiàa xícahàn tñùhù mà ñà-nì sàà stná-te nùù-ní. Ni cúcuéé ni-ní”. (Ñà-jaàn ndüá nì tiaa comandante mà.)

³¹ Daaní, soldadu mà, ducán nì caquida-tè cumplir, divi ñuuú mà nì saca-tè Pablo nì sàà-te xi-né ndè ñuu Antípatris.

³²⁻³³ Dandu inga quivì nì naxicocuñin tè-xicásàhà mà mànuhù-té ndé ndoó-te, doco tè-xínihi xi idu, nì ndòo-tè xì Pablo. Dandu nì quihin tu-tè ichì cuàhàn-te xi-né nì sàà ñuu Cesarea. Yucán nì nacoò-tè carta nihí-te nùù gobernador, te nì nacoò stná-te Pablo ndahà témà.

³⁴⁻³⁵ Dandu nì nsihi nì cahvi témà tutu mà, dandu nì xicàn tñùhù-té nùù Pablo índù ladu nduú ñuu-nè. Te na ní cundaà inì-te divi ladu Cilicia nduú ñuu-nè, dandu nì cachi-te:

—Na quésáá stná nècuàchì cáhàn tñùhù sàhà-ní, dandísá ndundaà dahuun chuun xi-ní —nì cachi-te.

Dandu nì dandàcú-te cundiadi Pablo vehechuún cahnú nì quidavàha nsì-Herodes.

24

Ñà-ndüá nì cachi Pablo xì Félix na ní cáhàn-nè sàhà mii-né

¹ Tixi ùhùn quivì nì quesaa dùtù cusáhnù nani Ananías xì stná dava nècuàchì sahnú dandacú. Te nì quesaa stná iin tiàa nduú abogadu nani Tértulo, ñà-cunduu-ne yuhù nècuàchìmà. Te nì tñàtuu nsidaa-né nùù gobernador ñà-canicuàchi-ne sàhà Pablo.

² Dandú nì càna stná Pablo quixi-ne. Te na ní quesaa-nè, dandu nì quesaha Tértulo mà nì cáhàn tñùhù-né sàhà nècuàchìmà, cachí-nè:

—Señor gobernador, sàhà mii-ní ndoó dádí nsidaa-nsí caní tiempu ñuu-nsì yohó, te cuàhà iñàha sàni nacani inì-ní nì quida-ní sàhà ñà-vàha xi ñuu-nsì.

³ Ñàyùcàndüá, nicanicuahàn naquímànì-nsí mii-ní ndéni nì cui ni cúndóó-nsí ñà-nì quida-ní xì-nsí cuàhà favor.

⁴ Doco vichi sàhà-ñá màsà cuàha chuún gá-nsì mii-ní, ñàyùcàndüá sacúndáhvì-nsì ñà-quida-ní favor cunini chii-ní cáhàn-nsì.

⁵ Cunaha-ní, iin tè-chicuéhè nduú Pablo jaàn, vàchi yáha ga datáhnè dava-tè nèhivì raza-nsì inicutu ñuhiví. Idónuu-té nùù nècuàchì nchícùn ley tucu xi iin nècuàchì ñuu Nazaret.

⁶ Te nì cuni stná-te quidachicuéhè-tè ñà-ì icúmí veheñùhu xi-nsì. Ñàyùcàndüá, nì tñii-nsite, te mii-nsí cuàhàn-nsì nsidandaà-nsì sàhà chuun ma modo xi-nsì nì cùí,

⁷ doco yucán ní sàà comandante coronel nani Lisias, te nì candiaa-nè tiàa jaàn fuerza nùù-nsí.

⁸ Dandu nì dandàcú-né nùù-nsí ñà-quixi-nsì yohó nùù mii-ní nú cuní-nsì canicuàchi-nsì sàhà-té, nì cachi-nè. Te vichi vátùni cundaà ndisa inì-ní ndià dìsàhà-xì sanícuàchi-nsì sàhà-té, cuisì-ní ndàcàtnùhù-ní nùù mii-té —nì cachi Tértulo mà.

9 Dandu nì càhàn stná nsidaa gá tè-raza Judea itá yucán, divi ñà-ndácuisì nduú nsidaájàn, nì cacachì-te.

10 Dandu nì quida gobernador mà seña nù Pablo ñà-vàtùni càhàn stná-nè vichi. Ñàyùcànduá, nì càhàn-nè, cachí-nè:

—Yùhù ináhí cuàhà cuà iá-ní icúmí-ní chuun nsidandaà-ní ñuu-nsì yohó. Ñàyùcànduá, cudí inì ñà-vàtùni càhàn sàhí nù-ní.

11 Cunaha-ní, mà úhì ndàcàtnùhù-ní, te cundaà vaha inì-ní ñà-làcà ùxìn ùi quivì cuàhàn-ndà nì nasai ñuu Jerusalén cuàhàn cahví Dios.

12 Doco ni-iin xichi cóni nái` xì ni-iin nèhivì veheñùhu yucán, te ni-iin xichi cóni dánâcuídè-nè, ni nèhivì sàhàn veheñùhu, ni stná nèhivì xicánúú calle.

13 Mate sanícuàchi nècuàchì yohó sàhí, doco còò ni-iñàha cui quida-ne comprobar.

14 'Doco yùhù cachí ndài xì-ní, iin ichì ndiaha nduá nchícuìn, te ducán cahví Dios, divi mii-yá nìsa cahvi stná xii-nsí, mate cachí nècuàchì yohó iin ichì tnùhù nduá. Doco yùhù xiníndísê nsidaa ñà-ítúú nù tutu nduú ley xi-nsi, te xiníndísâ stnài nsidaa ñà-nduá nì tiaa profeta nìsa càhàn cuenta xi-ya.

15 Nacua nì cachi mii-né, ducán cachí stná yùhù, ñà-íá ndisa tnùndé ini ndiatu-nda nù-yá, vachi icúmí nsidaa-nda natiacu-ndà, nèhivì vaha te nèhivì malu.

16 Ñàyùcànduá, yùhù, nicanicuàhàn quidé lucha ñà-màsà cóo ni-iin cuàchi dandoho-xi animè, vachi ni-iin cuàchi có-cùnì` quide nù Dios, te ni nù nèhivì.

17 'Cunaha-ní, caní cuà có-ìé` ñuì, dandu nì nasai yucán, nihí cuàhà ñà-nduá cutahví nèhivì ndahví ndoó yucán, te nihí stnài promesa xi.

18 Pues chuun jaàn nduá dísàhà-xì nì nasai yucán, te nì nsidandoo stnài mií (nacua cachí ley xi raza-nsì). Te xicánúú sahnúu patiu veheñùhu cahnú yucán, cóni dánâcuídè nèhivì, nì cóni quidá stnài ni-iin escándalo. Doco dava nècuàchì raza-nsì nì quixi ladu Asia, nì xini-nè yùhù yucán.

19 Te nú ndisa cuní nècuàchì mà càhàn tnùhù-né sàhí, dandu ndiá ìcà-né màcuíta stná-nè nù-ní yohó, te canicuàchi mii-né sàhí.

20 Te ò nècuàchì itá yohó, nú nì xini-nè iá iin falta nì quide na ní ìe nù nsidaa tè-xídandacú, dandu nì cachí-nè vichi duha, cuní.

21 Cuisì vihini tuxí ini-nè iin falta nduá na ní càhàn fuertí` xì nsidaa nècuàchì mà nì cachí ñà-xiníndísê icúmí-ndá natiacu-ndà —nì cachi Pablo.

22 Daaní, na ní inini Félix ñà-jaàn, nì cucani-tè chuun xi Pablo, cachí-te xi nsidaa-né:

—Ni quésáá gá comandante coronel Lisias, dandu ndàcàtnùhù gué` sàhà-ñá cundaà vaha inì nansa iá chuun xi-nsia.

Ducán nì cachi Félix, vachi algu ináhá stná-te sàhà ichì Jesús.

23 Dandu nì dándacú-te nù iin capítan ñà-nì cúndiáa-te Pablo, doco màsà cúndiádí dahuun-ne, te ni màsà cadí stná-te nù ni-iin ana iá vaha xi-né nú cuní nècuàchì mà quixi-ne dacútiácú-ñàné, te ò nácótò stnahá-né.

24 (Daaní, mànuhù Félix mà.) Te nì yàha itnii quivì, dandu nì quixi tu-tè xì ñahàdihí-te nani Drusila; iin nècuàchì ñahà raza Judea nduú-né. Dandu nì cana-tè Pablo ñà-tnàtuu-ne, vachi cuní-te cunini-tè nansa iá ichì cunihnu vaha ini-ndà Jesucristu.

25 Ñàyùcànduá, nì càhàn Pablo xì nduì-nè, dansítnù ini-nè nècuàchì mà nansa cuní Dios quida viì-ndà sàhà-ñá màsà quidá ndevàha-nda nansa ni nì cui, vachi icúmí coo iin quivì juiciu. Dandu Félix mà, cuàhà gá nì yùhí-te, cachí-te xi Pablo:

—Còó, xuhun-ní (cuartu xi-ní) vichi. Te después, nú cusái, dandu cana-tui mii-ní.

26 Ducán nì cachì-te, vachi tuxí stná inì-te vihini daquíhvi Pablo dihùn sàhà-ñá dañà-ténê. Ñàyùcànduá, cuàhà xichi nì cana-tèné nì ndatnuhu-té xí-nè.

27 Doco na ní yàha ùi cuà, dandu nì quee-tè nù mesa, te nì quìhvi inga tiàa nani Porcio Festo lugar xi-tè. Doco cóni tàvá-te Pablo libre, vachi cuní-te ndòò vaha-tè xì nèhivì raza Judea.

25

Nansa ni càhàn Pablo sàhà mii-né nùu gobernador saa nani Festo

¹ Daaní, ni quesaa Festo mà ladu yucán. Doco tìxi ùnì quivì ni quee-tè ñuu Cesarea cuàhàn-te ñuu Jerusalén.

²⁻³ Te yucán ni tnàtuu dùtù cusáhnû, xì stná nècuàchì chicá idónuu, ni càhàn-nè xì Festo sàhà Pablo, càhàn tnùhù-né sàhà nècuàchìmà. Te ni xicàn-nè cana-tè nècuàchìmà quixi-ne ndè Jerusalén, vàchi cuàhà tiàa cuàhàn cundiatu dèhé ñà-cahni-téné ichì mà.

⁴ Doco ni naxiconihí Festo nùu nècuàchìmà, cachí-te:

—Còó, ñuu Cesarea mà icúmí Pablo ndòo-ne. Yucán ndiaá soldadu-nè. Te yùhù, tìxi iin ùi quivì icúmí stnàì naxicocuïn yucán.

⁵ Ñàyùcàndüá, yucán ni cùhùn stná nsidaa mii-nsiá nècuàchì idónuu, cutnáhâ-nsiá xì cùhùn-ndà. Dandísá, nú iá cuàchi nècuàchìmà, dandu vátùni canicuàchi-nsia —ni cachí-te.

⁶ Daaní, ni cuee gà-te ùnà ò úxìn gà quivì ñuu yucán, dandu mànuhù-té ñuu Cesarea, (te cuàhàn stná tè-xidandacu-ma). Dandu inga quivì ni yàha Festo ndé ndundaà sàhà nèhivì, te ni sàcòo-tè. Dandu ni dandàcú-te ni queé Pablo.

⁷ Te na ní quesaa nècuàchìmà, dandu ni sàcuíta stná nècuàchì raza Judea ni quixi Jerusalén mà, ni càhàn tnùhù-né sàhà nècuàchìmà. Cuàhà gá chuun pesadu ni cachí-nè dìquì nècuàchìmà. Doco puru ñà-mànicuí nìhìndèè-né ni sandua.

⁸ Daaní Pablo, ni naxiconihí-né nùu nècuàchìmà, cachí-nè:

—Yùhù, còò ni-iin falta ni quidé dìquì ley xi nècuàchì raza xi, ni còò stná falta ni quidé dìquì veheñuhu xi-nsi, ni dìquì stná rey cahnú César.

⁹ Doco Festo, cuní-te ndòò vàha-tè xi nècuàchì raza Judea mà, ñàyùcàndüá, ni cachí-te xi Pablo:

—¿A cándísá-nì cùhùn-ní ñuu Jerusalén, te yucán nsidandaì sàhà ñà-ndüá cachí nècuàchì yohó?

¹⁰ Dandu ni cachi Pablo xì-té:

—(Còò.) Divi lugar yohó nduú ndé cachí rey César xiñuhu ndundaà sàhà nèhivì. Ñàyùcàndüá yohó ié. Te mii-ní, sàvaha ináhá-ní còò falta ni quidé dìquì nècuàchì raza xi.

¹¹ Doco cunaha-ní, nú ndisa iá pesadu cuàchi, te ò nú ndisa cuàhà gá iníhiquê, te xiñuhu cuì, pues vátùni; cahni-nsiá yùhù, mà cáchì á coó. Doco nú coó, nú tnùhu ndüá cachí nècuàchì yohó, dandu còò permisú danáyàha ni-iin juez yùhù ndahà-né. Pues vichi xíquèn ñà-dayáha-ní yùhù ndahà rey cahnú César —ni cachi Pablo.

¹² Daaní, Festo, ni ndatnuhu-té xí nècuàchì sàha razón xì-té nansa quida-tè, dandu ni cachí-te xi Pablo:

—Mii-ní, sàni xicàn-ní ndundaà chuun xi-ní nùu César. Pues vátùni iá; divi nùu César icúmí-nì cùhùn-ní.

Nansa ni xicàn rey Agripa càhàn Pablo nùu-né

¹³ Na ní yàha itnii quivì, dandu ni sàa stná rey Agripa xì Berenice ñuu Cesarea mà ñà-casàhù-nè xì Festo.

¹⁴ Te como caní quivì ni ndòo-ne yucán, ñàyùcàndüá ni càhàn Festo xì rey mà sàhà Pablo, cachí-te:

—Na ní quee Félix nùu mesa, ni ndòò iin nècuàchì ndiadí yohó (nani Pablo).

¹⁵ Ñàyùcàndüá na ní sàhìn ñuu Jerusalén, dandu ni catnàtuu dùtù xicusahnú xì stná nècuàchì dandacú nùu ñuu mà, ni xicàn-nè dandacuí ñà-cui nècuàchì ndiadí mà.

¹⁶ Doco ni naxiconihí nùu-né: “Nsiùhù tè-ndüú nècuàchì romanu, còò estilu icúmí-nsí cahni-nsí ni-iin nèhivì nansa ni ni cui. Còò, vàchi dihna icúmí-té cuita-tè nùu nècuàchì sanícuàchi sàhà-ñá ducán vátùni cucumi-té lugar càhàn stná-te sàhà mii-té nansa iá ñà-ndüá càhàn tnùhù-né sàhà-té”.

17 Ñàyùcàndùá, nì caquixi nècuàchì ñuu Jerusalén mà dècuèndè yohó, te vichi duha inga quìvì nì sàhìn vehechuún, nì sàcòì silla xi, te nì dándàcuí nì tavá-te Pablo mà.

18 Dandu nì sàcuíta stná nècuàchì càhàn tñùhù, te nì sanícuàchi-ne sàhà nècuàchìmà. Chuun pesadu cundua nì cahín. Doco còó, cónì sándúá ducán.

19 Cuisì sàhà creencia xi-ne nì càhàn-nè, xì sàhà stná iin ana nì xìhì nani Jesús. Doco Pablo, tucu cachí-nè: itiácú Jesús, cachí-nè.

20 Doco yùhù, cónì cúndaá vaha inì nansa chicá vaha guide xì chuun jaàn. Ñàyùcàndùá, nì càhìn xì Pablo, áma cándísâ-nè cùhùn-nè ñuu Jerusalén, te yucán ndundaà sàhà chuun xi-ne.

21 Doco còó, lugar yohó nì xìcàn-nè cundiadi-nè ndè cachi (cùhùn-nè) ndundaà sàhà-nè nùù rey cahnú César. Ñàyùcàndùá, nì dándàcuí coo vaha-ne ndè cachi techuín-nè cùhùn-nè nùù rey mà —nì cachi Festo.

22 Dandu nì cachi rey Agripa mà xì Festo:

—Yùhù, cudí stná inì cunini ñà-ndúá cachí nècuàchìmà.

—Vàtùni, tnaa cunini-ní —nì cachi Festo.

23 Daaní, inga quìvì vaxi tu Agripa xì Berenice ndè salón cahnú ndé ndundaà sàhà nsidaa chuun. Nì quìhvi-ne yucán, vico sàstnùhù ndáa-ne. Te yucán sàni caquesaa stná comandante coronel xì cuàhà stná nècuàchì chicá idónuu ñuu yucán. Dandu nì dándàcú Festo ñà-nì tavá-te Pablo. (Te na ní quesaa-nè),

24 dandu nì cachi Festo mà:

—Mii-ní rey Agripa, xì nsidaa stná mii-nsiá nècuàchì nì quesaa, yohó indéhe-nsiá nècuàchì (cachí xì-nsiá). Cunaha-nsiá, na ní sàhìn ñuu Jerusalén, cuàhà gá nècuàchì raza Judea nì xìcàn favor nùù, dècuèndè nì càna fuerte-nè, cuní-nè cui nècuàchì yohó. Stná ñuu Cesarea yohó, divi ni ducán xìcàn stná-ne.

25 Doco nùù yùhù, còò ni-iin falta xi-ne nì túi. Dandu mii-né, nì xìcàn stná-nè ndundaà sàhà-nè nùù rey cahnú, ñàyùcàndùá, sàni nacani inì, te icúmí techuín-nè cùhùn-nè yucán.

26 Doco cuisì ñà-còò ni-iñàha cui cachi ndise na tiai nùù señor rey cahnú sàhà-né. Ñàyùcàndùá sàni tavà cànú-nè nùù mii-ní rey Agripa, xì nùù stná nsidaa mii-nsiá nècuàchì dava ga, vachi cuní nanducu-nsiá índù iñàha cui tiai nùù tutu cùhùn xì-né.

27 Vachi có-ndúá ñà-techuun-nda iin nècuàchì presu cùhùn nùù rey mà nú còò ni-iñàha cachítnùhu ñà-ndúú falta xi-ne —nì cachi Festo.

26

Ñà-ndúá nì cachi Pablo na ní càhàn-nè sàhà mii-né nùù rey Agripa

1 Daaní, Agripa mà, nì cachi-nè xì Pablo:

—Vàtùni càhàn-ní sàhà-ní vichi.

Dandu nì cuu ndahà Pablo, te nì quesaha-né nì càhàn-nè, cachí-nè:

2 —Nansicáhìn vichi, vachi nùù mii-ní cuàhìn càhìn. Pues cuàhà gá ñà-ndúá nì càhàn tñùhù nècuàchì raza-ndà sàhí, rey Agripa.

3 Doco cudí inì vichi, vachi ináhá-ní nansa ndisa iá nsidaa estilu xi raza-ndà, te cundáa stná inì-ní sàhà nsidaa chuun ndatnúhú cuàhà-ndà. Ñàyùcàndùá, sacúndáhvî nùù-ní ñà-nì còó calma xi-ní cunini-ní ñà-ndúá cuàhìn càhìn.

4 Nsidaa nècuàchì ñuu Judea, ináhá-né nansa nisa guide na ní sandui tèchii. Dihna nisa ìe ñuì, dandu nì sàhìn nisa ìe ñuu Jerusalén.

5 Te nècuàchì raza-ndà ndoó yucán, dècuèndè sàhana ináhá-né yùhù. Te nú cuní-nè cachítnùhu ndaà-nè, vátùni cachi-nè nansa nisa guide na ní sanchicuìn ley xi nècuàchì fariseu. Nsidaa nècuàchì ley mà, chicá fuerte chívàha-ne religión xi raza-ndà.

6 Doco vichi yohó íé, sanícuàchi-ne sàhí. Te ¿índù falta xi iá? Cuisì ñà-xìníndísê palabra nì quida Dios comprometer xì xì-ndà, divi ñà-cuàhàn-yà danátíácú-yà nsii.

⁷ Pues sàhà ñà-nì cachi-yà ducán, ñàyùcàndùá, nsidaa nèhivì nduú nsi-úxìn ùì descen-
dencia xi raza-ndà, xinúcuáchí vî-né nùù Dios ndui te ñuú, xiníndísâ-né, te ndiatú-né
cuu ndisa ñà-ndùá nì quida-ya comprometer mà. Cunaha-ní rey Agripa, yùhù xiníndísâ
stnái, te ñà-jaàn nduá òsàhà-xí sanícuàchi nèhivì raza-ndà sàhí.

⁸ 'Mii-nsiá, ¿a ndísá có-xiníndísâ stná-nsià ñà-vàtùni danátíacú Dios nsi? (Pues
ináhá-ndá, vátùni.)

⁹ 'Yùhù, ndisa, nìsa tuxi inì ñà-ndiá ìqué quida quini xì nèhivì ndácùcahan xi Jesús de
Nazaret.

¹⁰ Te divi ñà-jaàn nduá nìsa quide ñuu Jerusalén, vàchi ndè nùù dùtù cusáhnù nì tavi
permisu, te cuàhà nèhivì xí Jesús nìsa sadì vehecàa. Dandu quivì cuàhàn-te cacahnì-té
nècuàchìmà, stná yùhù nì sadandáa stnái.

¹¹ Te nìsa nacàhin stnái nsidaa veheñùhu cuachi nìsa nanduquí nèhivì xí Jesús
ñà-dandohí-nè áma níhìndèí nacuaà-né mii-yá. Te ñà-cuàhà guá nìsa xidà inì sàhà-né,
dècuèndè nìsa sahàn stnái ñuu xicà nì sanchicuìn-nè.

¹² 'Pues sàhà chuun jaàn nduá cuàhìn ichì ñuu Damasco, nihí orden nì quee nùù dùtù
xícusahnú. Ñàyùcàndùá, iá permisu-xi cuàhìn sàhà chuun ma.

¹³ Te nahi càxíhuì nì sandua, señor rey, dandu ichì cuàhìn mà nì xinì yáha ga fuerte nì
natnuù nihni iin luz ndé xiqué cuàhìn xì compañeruì, ndè dìquì-xí ansivi vâxa, te chicá
ndiaha nì natnuà nùù orá.

¹⁴ Ñàyùcàndùá, nì nacasàn nsidaa-nsí ñuhù, te nì tiacuì nì càhàn iin ana càhàn dàhàn
hebreu, cachí-yà xì: “¡Saulo, Saulo! ¿Índù chuun nchícùn-ní yùhù quidá quíní-ní xì?
Cuisì mii-ní quidá quíní-ní xì mii-ní, vàchi na quidá quisì caní sàhà nùù garrocha, ducán
quidá stná-ní”.

¹⁵ 'Dandu yùhù, nì cachì: “¿Ana nduú mii-ní, Señor mío?” Dandu nì cachi-yà xì: “Yùhù
nduí Jesús, divi ana dandoho-ní.

¹⁶ Doco vichi ndacuìin-ní, vàchi sàhà-ñá nì xinì-ní yùhù, ñàyùcàndùá icúmí-ní cun-
duu-ní ana cunucuachi nùì, cunduu-ní testigu sàhà ñà-ndùá nì xinì-ní vichi, xì sàhà
ñà-ndùá cuni gà-ní na dacuní guè mii-ní mí quivì vaxi xi-nda.

¹⁷ Te vichi cunaha-ní, cuàhìn techuín mii-ní ñà-cùhùn-ní càhàn-ní xì nècuàchì nsidaa
inga raza. Te nú cuní-nè quida quini-ne xì-ní, dandu cuidahín mii-ní nùù-né, nùù mii-né
xì nùù stná nècuàchì raza-ní Judea.

¹⁸ Doco icúmí-ní càhàn-ní xì-né sàhà-ñá datnúù Dios sàxínítnùnì-nè, te quee-ne ichì
ñáa, quihin-ne ichì ndiaha-yá. Vàchi nú nì càhàn-ní xì-né, dandu vátùni dàhà-né
nùù ndàhá ñà-malu, te candòo-ne ndahà Dios. Nduu stná cuàchi-ne, te cunduu-ne
nèhivì ìì xí, dandu cutnahá-né xì nsidaa gá ana xiníndísá-xí, te nihítàhvi stná-nè cuàhà
ñà-ndiaha”, nì cachi Jesús xì’.

¹⁹ Ñàyùcàndùá, nì quida ndise cumplir nsidaa ñà-ndùá nì cachi-yà xì na ní xinì mii-yá
ansivi, señor rey.

²⁰ Vàchi primeru nì càhìn xì nècuàchì ñuu Damasco, dandu nì ndixi stnái ñuu Jerusalén,
te nì càhìn xì nèhivì yucán xì stná inicutu ladu Judea, xì cuàhà stná ñuu inga raza. Te
nsidaa lugar mà nì cachì xì-né ñà-xiñùhù cuu-ne arrepentir, te yàha-ne ladu xi Dios,
dandu quida vî-né nacua ndiá icà-né nú ndisa sàni naxicocuìn ini-nè sàhà cuàchi-ne,
nì cachì xì-né.

²¹ 'Pues cunaha-ní, nsidaájàn nduá òsàhà-xí nì tniì nècuàchì raza-ndà yùhù patiu
veheñùhu cahnú, cuàhàn-nè cahnì-né yùhù nì cúì.

²² Doco Dios nduú ana chindéé xí, ñàyùcàndùá, iin-ni nchícùn ndài (ichì váha-ya)
dècuèndè quivì vichi, iin-ni càhìn xì nèhivì sàhà-yá, a xínduu-ne nècuàchì ndahví, te ò
nècuàchì chicá idónuu, nsidaa-né càhàn xì, cachí xì-né ñà-ndùá nì cachitnùhu Moisés,
xì ñà-ndùá nì cachì stná nècuàchì profeta,

²³ ñà-ìcúmí Cristu ndoho-ya, (te cui-yà), dandu cunduu-ya ana primeru natiacu, te después danátnùu-yà ichì ndiaha-yá nùu nèhivì, na nèhivì ñuu-ndà, te ducán stná nèhivì inga ñuu —nì cachi Pablo.

²⁴ Cáhàn va Pablo ducán, dandu nì ndàhì Festo, cachí-te:

—Pablo, sàni culocó sàxìnítùnì-nì ñà-cuàhà guá dacuaha-ní.

²⁵ Doco nì cachi Pablo xì-né:

—Señor gobernador Festo, cuicahnú inì-ní, doco màdiá nì culoquí nduá, vèchi ñà-ndácuisì nduá cachí xì-ní. Cáhàn sahnúí.

²⁶ Te cunaha-ní, yohó iá stná rey Agripa, te có-cùcáhán núí cáhìn nùu mii-né, vèchi ináhá-nê sàhà chuun yohó. Seguru icúmí ñà-sàni cundaà vaha ini-nè, vèchi chuun yohó, cóni sándúá iin chuun iá dèhé.

²⁷ Mii-ní rey Agripa, ádi xiníndísá stná-ní ñà-nduá nì tiaa nècuàchì profeta sàna. Pues yùhù ináhì, ducán xiníndísá-ní.

²⁸ Dandu nì cachi Agripa xì-né:

—Cuisì iyuhu gá palabra cachí-ní, te vihini yàha stnáì cunchicuìn Jesucristu.

²⁹ Dandu nì cachi Pablo xì-né:

—A sea iyuhu-ní, te ò cuàhà gá cumànì, doco cahnú gá Dios iin-ni ni quidá stná-ní nacua nì quida yùhù, (nì xiníndisé mii-yá. A sácú vaha nì cúníndísá stná-ní), mii-ní xì nsidaa gá stná nècuàchì iníni yohó. Cuisì-ní có-cuní cunuhni stná-nsià cadena nahi mii

³⁰ —nì cachi Pablo.

Dandu nì ndacuita nsidaa nècuàchì ndoó yucán, divi rey Agripa xì gobernador, xì Berenice, xì nècuàchì dava ga ndoó stná xì-né yucán.

³¹ Te nì cuxio-ne iladu, ndatnúhú-nê, cachí-nè:

—Ni cóo falta xi nècuàchì jaàn dìsàhà-xí cui-nè, ni ñà-cundiadi-nè.

³² Te nì cachi rey mà xì Festo:

—Nú màsà cacán-nè yàha-ne nùu rey cahnú César, dandu mà úhì dàñà-né vichi duha nì cùí.

27

Nansa nì dáyáha-tè Pablo cùhùn-nè ñuu Roma

¹ Daaní, Pablo xì itnii gá tè-ndiàdí, nì yàha-ne ndahà iin capitán nani Julio, iin soldadu siempre cutnáhà xí soldadu xi meru rey César Augusto, vèchi sàni cachí tè-xídandacu-ma ñà-ìcúmí-nsí quihin-nsi barcu cùhùn-nsi ladu Italia.

² Te nisa ia stná iin tiàa nani Aristarco cutnahá stná xì-nsí cùhùn. Iin nècuàchì ladu Macedonia nduú-né, te meru ñuu-nè nduú ñuu Tesalónica. Ñàyùcànduá, nì nana nsidaa-nsí iin barcu nì quixi ñuu Adramitio, vèchi sàdaaní cuàhàn-nu quihin-nù ichì nùhù-nu, te icúmí-nù yàha-nù ladu Asia. Dandu nì ditá-nu nì quihin-nù ichì cuàhàn-nu xi-nsí.

³ Dandu nì yàha iin quivì, te nì sàa-nsí ñuu Sidón. Te yucán nì quidamanì capitán mà nì sàha-ne permisu (ñà-nuu Pablo barcu), ñàyùcànduá nì sàhàn nècuàchì mà iní ñuu yucán ndé ndoó amigo xi-ne, te nì nìhì-né ñà-nduá xiñuhu.

⁴ Dandu nì ditá tu barcu mà ichì cuàhàn-nu, te nì yàha-nsi iin ñuu cahnú nani Chipre indúhu mahì mar. Ladu ndé có-dùcùn guá tàchì nì yàha-nsi, vèchi ladu nùu-xí caná tàchì mà.

⁵ Daaní, nì yàha-nsi chicá nùu-xí mahì mar iá frente ladu Cilicia xì ladu Panfilia, te nì sàa-nsí ñuu nani Mira iá ladu Licia.

⁶ Yucán nì xini capitán mà inga barcu nì quixi ñuu Alejandría, te icúmí-nù cùhùn stná-nu ladu Italia. Ñàyùcànduá, divi barcu mà nì dandàcú-né nana-nsi, te cuàhàn-nsi.

⁷⁻⁸ Daaní, cuàhà quivì nì xica cueé-nu, vèchi ùhì xicá-nu, làcà ní cuyatni-nù nùu ñuu Gnido, te cóni sàha ga tàchì caca gà-nu. Ñàyùcànduá, nì sàha-nù vuelta nì yàha-nsi yatni iin esquina ñuu Creta ndé nani Salmón. Dandu yuhù mar diin ñuu Creta mà nì yàha-nsi,

doco ùhì stná caca barcu yucán. Dandu nì sàà-nsì nùù ñuhù íchî iin xaan nani Buenos Puertos, yatni ndé iá ñuu Lasea.

⁹ Doco vichi sàni cuee sàstnùhù-nsí, dècuèndè sàni yàha vicò iníhî-ndà, te vihini quida quini mar xì barcu (nú ni cùhùn-nu). Ñàyùcàndùá, nì càhàn Pablo (xì nèhivì ndoó barcu mà),

¹⁰ cachí-nè:

—Señores, sàni sàni nì cundaà inì cuàhàn coo cuàhà tnùndoho xi-nda nú ni cùhùn gà-ndà nùù-xí. Mà úhì ndañuhu carga, xì mii stná barcu, ndè stná mii-nda vihini ndañuhu-nda.

¹¹ Doco capitán mà, chicá nì xinindisá-né ñà-ndùá cachí tiàa dacaca-xi barcu mà, xì ñà-ndùá cachí stná stohò-nu, te màdì ñà-ndùá cachí Pablo.

¹² Ñàyùcàndùá, cuàhà nècuàchì yucán, chicá nì cuni-nè caquee-ne lugar mà, vàchi có-ndùá iin lugar vàha yàha-nda tiempu vixin. Ñàyùcàndùá, nì cachi-nè chicá vàha cùhùn-nè nùù-xí ndè ñuu Fenice, dandu vètùni cundoo-ne yucán tiempu vixin. Ñuu Fenice mà nduú iin ñuu inga orilla ñuu Creta, te cuisì dúcùn tàchì iin dián ndé quècahnu hora.

Nansa nì dàñà fuerte dàvitàchì mar

¹³ Daaní, nì quesaha caná yadi tàchì ladu, te nì tuxi ini nècuàchì barcu ñà-vètùni cùhùn-nsì. Ñàyùcàndùá, nì quihin tu-nsi ichì cuàhàn-nsì orilla mar iladu ñuu Creta mà.

¹⁴ Doco tixi inga iin ratu nì quesaha nì cana iin tàchì dàná, ladu ñuu mà vàxan, tàchì yódo ladu nìnu cachí-nè xán.

¹⁵ Te nì cacùhan barcu xi-nsi, mànicùí gá nìhìndèè-nsí caca ndaà-nu ladu vàxan, ñàyùcàndùá nì sahnde ini-nsi, vàchi ndé ndiàchì úún-nu cuàhàn-nu.

¹⁶ Dandu nì yàha-nsi iladu ñuu tii nani Claudia indúhu mahì mar. Te yucán có-caná cuàhà guá tàchì. Cunaha-ní, barcu cahnú xí-nsí mà, íditá stná-nu iin lancha tii. Te ndee ní quidachuún-nsí, dandu nì nìhì-nsí nì tavà-nsínu.

¹⁷ Dandu nì dàcùnùndùù-te iin cable ndee icà barcu cahnú sàhà-ñá màsà nduà-nu. Te nì yùhì stná-te sàà-nu ndé yadi iá ñusi, te cacùhun-nù. Ñàyùcàndùá, nì dànùù-te sìcoto ndee dítà tàchì-nù, te ndiachi úún-nu cuàhàn-nu quidá tàchì mà.

¹⁸ Daaní, inga quivì, yàha ga caná ìi tàchì dàná mà. Ñàyùcàndùá nì quesaha-té nì dàndiàchì-té carga xi-nù ini mar.

¹⁹ Te quivì ùnì nì dàndiàchì ndahà stná-nsì nsidaa gá ñà-ndùá nihí-nu.

²⁰ Dandu nì yàha cuàhà gá quivì, te có-tuí orá, có-tuí sìtnùù, te yàha ga dúcùn dàvitàchì daná mà nsiùhù. Ñàyùcàndùá, còò gá tnùndé ini càcu-nsi nì cahan-nsí.

²¹ Daaní, na sàni yàha cuàhà quivì ndoó dòcò-nsì có-xixí-nsí, dandu nì sàcuìn Pablo mahì nsidaa-nsí, te nì cachi-nè xì-nsí:

—Compañeros, chica vàha nú nì inini-nsia yùhù nì cùí ñà-màsà quée-ndá ñuu Creta quixi-nda, dandísá mà cacùhun-nda tnùndoho yohó.

²² Doco vichi, cachí xì-nsiá, màsà cùhúún inì-nsia, vàchi ni-iin-nda mà cúí-ndá, cuisì barcu xi-nda cuàhàn ndañuhu.

²³⁻²⁴ Doco cunaha-nsiá, ñuú ndùvehè nì xini yatni ndé (indúhì) nì sàcuìn iin ángel xi Dios núí. Vàchi mii-yá nduú-yá Stohì, divi ana xinúcuáchì nùù-xí. Pues divi ángel mà nì cachi-nè xì: “Màsà yùhì-ní, Pablo, vàchi icúmí-ní sàà-ní nàcuìn-ní nùù rey cahnú César. Te cunaha-ní, sàni indehè ndàhvì Dios mii-nsiá, vàchi dohó cachí-yà xì-ní: mà sàà ni-iin nèhivì cutnáhà xí-ní cui-nè, ni-iin nèhivì barcu yohó”, nì cachi ángel mà.

²⁵ Ñàyùcàndùá contentu nì nácùndoo-nsia, compañeros, vàchi nacua sàni cachi Dios xì, divi ducán icúmí coo, te seguru icúmìa.

²⁶ Doco antes icúmí-ndá ndiachi-nda orilla iin ñuu tii mahì mar —nì cachi Pablo.

²⁷ Daaní, nì yàha ùxìn cùmì gá quivì, te vichi xicá barcu iladu mar ndé cachí-nè nduú mar Adria. Nahí dava ñuu nduá, te ndiachi ndiachi barcu xi-nsi quidá tàchì. Dandu peón xíquidachuún barcu mà, nì tuxi inì-te ádi sàni cuyatni-nù nùù ñuhù íchî càhàn-té.

²⁸ Ñàyùcàndùá, nì chitacùhá-te nadaa tantu cunú ñuhú tècuí yucán, te nì cundaà inì-te òcò sàhùn iin (36) metro cunú-te. Dandu iyuhu gá nùù-xí, tucu tu nì chitacùhá-te, te òcò ùsà (27) metro cunú-te chicá yucán.

²⁹ Ñàyùcàndùá, nì yùhí-te dùcùn barcu cavà nahnú ñuhú ini mar. Sàhámà nì dànùú-te cùmì càa nahnú xí barcu ndè cahà mar sàhà-ñá màsà cáca gà-nu. Dandu ndiatú cuísi-té tùinuù.

³⁰ Daaní, peón xi barcu, nì cunì-te cunu-tè. Ñàyùcàndùá, nì sàcuìta-tè nùù barcu mà, quidá-te na ian cuàhàn-te danuú gà-te inga càa nahnú ndè cahà mar, doco dandáhvî-te, vàchi lancha tii ma nduá nì dànùú-te.

³¹ Dandu nì cachi Pablo xì capitán xì stná soldadu ndoó yucán:

—Nú màsà ndóo peón jaàn barcu yohó, mà cácu-nsia.

³² Ñàyùcàndùá, nì sàhàn soldadu mà nì sahdè-te cable itácaá lancha mà, te nì ndiachi-nú mahì mar.

³³⁻³⁴ Daaní, na sàcuàhàn túinuù, dandu nì càhàn Pablo xì nsidaa compañeru-nè, cachí-nè:

—Chicá vaha cuxi-nsia iñaha, vàchi sàcuàhàn-ndà ùxìn cùmì quivì có-xixí-nsiá, nchitó-nsiá, nacání ini-nsiá. Ñàyùcàndùá sacúndáhvî nùù-nsiá ñà-cuxi-nsia, vàchi ducán xiñuhu quida-nda, dandu càcu vaha-nda, vàchi cunaha-nsiá, còò ni-iñaha cuu xi ni-iin-nda.

³⁵ —nì cachi Pablo.

Dandu nì tnii-ne iin pan, te nì naquimanì-né Dios nì indehè nsidaa-né. Dandu nì dàcuàchí-néà, te nì quesaha-né xixí-né.

³⁶⁻³⁷ Ñàyùcàndùá, nsidaa gá nèhivì yucán, contenu nì ndòo-ne, te nì xixi stná-nè. Te nsidaa nsidaa nsiùhù nècuàchì ñuhú barcu ma, ùi cientu ùni dico sàhùn iin (276) nèhivì nì sanduu-nsi.

Nansa nì cuu xi barcu, nì tùxì-nú nì sachi-nù nùù mar

³⁸⁻³⁹ Daaní, na ní nsihi nì xixi nèhivì mà nì ndenuu ini-nè, dandu nì sate nsihi-ne trigu (nduú carga xi-nù) ñà-cùnì-nè nduñama chii gá-nu. Dandu na ní tùinuù claru, (nì xini xicà-té yucán iá) iin ñuu mahì mar. Doco cóni nácùnì-te índù ñuu nduá. Doco nì xini stná-te yucán iá iin ndahà mar ndé iá ndàà ñusì orilla-ñà, te vaha lugar mà daxínu-tè barcu cahan-té.

⁴⁰ Ñàyùcàndùá, nì sahdè-te cable xi càa itnìí xí-nù mahì mar, te nì ndòo. Dandu nì dàñà stná cable nuhní yutnù chipála dacaca-xi-nú. Te nì nana stná sìcoto ndee itáníní ladu nùù-nú (ñà-dítâ tàchì-nú). Ñàyùcàndùá nì quesaha-nú nì nacaca-nù, te cueéni cueéni nì cuyatni-nù ndé iá ñuhù íchì mà.

⁴¹ Doco nì sàa-nu iin xaan ndé vaxi ùi ichì tècuí, te yucán nì cacùhun-nù cahà mar. Nì ndùxin tnuu nùù-nú, doco cahà-nú, nì quesaha nì sachi ì-ñá nì quida tècuí dùcùn ndee guá ìcà-nú.

⁴² Dandu soldadu yucán, nì cacunì-te cahni nsihí-te nècuàchì ndiadí ndiaá-te, vàchi vihini dutè-né mar mà, te cunu-ne cahan-té.

⁴³ Doco capitán yucán, cóni cùnì-nè cui Pablo. Ñàyùcàndùá, cóni sáha-ne cahni soldadu mà nècuàchì ndiadí. Dandu nì dandácú stná-nè nùù nècuàchì tùha dutè ñà-dihna mii-né nì quécoyo-ne mahì tècuí dècuèndè nì xínu-ne ñuhù íchì.

⁴⁴ Dandu nècuàchì mà túha, cunchicùn-nè cùhùn-nè cundòo candee-né dìquì yutnù nduú tabla, ò inga yutnù xí barcu nì sachi. Ñàyùcàndùá, ducán nì nihì nsihí-nsí nì quee-nsi ndè ñuhù íchì, te nì càcu-nsi.

28

Ñà-nduá nì quida Pablo na ní ìa-ne ñuu tii Malta mahì mar

¹ Na ní nsihi nì càcu-nsi nùù mar mà, dandu nì xinitnùhu-nsi Malta nani ñuu yucán.

² Te nêhivì ndoó yucán, nì quida manì-né xì-nsí nì chiñuhu-nè iin ñuhu, te nì cachi-nè xì-nsí ñà-nì tnátuu-nsi nadaà-nsí, vâchi cuún dàvì, te vixin ga.

³ Ñàyùcàndùá nì nducu stná Pablo chii tutnù ìchí. Doco na meru daquéé-nènu mahì ñuhu mà, dandu nì quecunu iin còò dàná xínu-sì nùù ñuhu, te nì tñinùhu tnuu-sì ndahà-né.

⁴ Ñàyùcàndùá, na ní caxini nècuàchì ñuu mà itá cáá còò mà ndahà Pablo, nì cachi-nè iin-ne xì inga-nè:

—Ádi té-nì sahnì nduú tè-jaàn, ñàyùcàndùá vichi icúmí-tê danáà-te sàhà-té. Mate sání càcu-tè nùù mar, doco mà níhì-té cutiacu gà-te —nì cachi-nè.

⁵⁻⁶ Doco nì quidi Pablo ndahà-né, te nì ndiachi còò mà mahì ñuhu. Ñàyùcàndùá, nsidaa nêhivì yucán, ndé ndiátú úún-né, vâchi tuxí ini-nè cuàhàn xìun ndahà Pablo, ò nú coó, nanáà nâcasàn-né cui-nè. Doco caní tiempu ndiatú-né indéhe-né, te còò ni-iñàha ni cuu-xi nècuàchìmà. Iin-ni iá-nè. Ñàyùcàndùá, tucu nì nacani ini nêhivì mà, cachí-nè:

—Ádi iin dios nduú nècuàchì jaàn.

Nansa nì dàndúvâha Pablo yua nècuàchì dandacú nani Publio

⁷ Yatni yucán nduú ñuhù xí nècuàchì dandacú nùù ñuu mà; Publio nani-né. Te nècuàchìmà, nì dâyâha-ne nsiùhù vehe-ne. Ùnì quivì nì sandoo-nsi yucán. Te cuàhà gá nì cunsihi ini-nè nsiùhù.

⁸ Te yucán iá stná yua-né, indúhu-né, sâhayocá-nè, vâchi cuhí-nè cuèhè daxìn. Dandu nì quihvi Pablo ndé indúhu nècuàchìmà, te nì xicàn tàhvì-né nùù Dios, nì chitândòó-né ndahà-né dìquì nècuàchìmà, te ducán nì nduvâha-ne.

⁹⁻¹¹ Dandu después dava ga nècuàchì cuhí ndoó ñuu mà, nì caquixi stná-nè, te nì nduvâha stná-nè. Ñàyùcàndùá, cuàhà gá nì cañúhu nècuàchì ñuu mà nsiùhù. Te na ní xínu ùnì yòò ndoó-nsí yucan, dandu nì nana-nsi iin barcu cuàhàn-nsi quihin tu-nsi ichì nacaca-nù xì-nsí. Te nêhivì ñuu mà, nì sâhatahvì stná-nè nsiùhù nsidaa ñà-ndúá xiñuhu nùù-nsí. Te barcu mà, iin yutnù nì ìa yucán ini tiempu vixin nduú-nu. Ñuu Alejandría nduú meru ñuu-nu; te nùù-nú itá muñecu nani Cástor xì Pólux. Pues divi barcu mà nduú yutnù nì nana-nsi, te cuàhàn-nsi.

¹²⁻¹³ Daaní, primeru nì sàà-nsi ñuu Siracusa, te ùnì quivì nì sandoo-nsi yucán. Dandu nì caquee tu-nsi, te duha duha nì càvâ barcu xicá-nu cuàhàn-nu, te ducán nì sàà-nu xi-nsí ndé ñuu Regio. Dandu inga quivì, te nì quesaha tú tàchì ladu. Ñàyùcàndùá, nì caquee tu-nsi cuàhàn-nsi. Te tixi ùnì quivì nì sàà-nsi iin ñuu nani Poteolos.

¹⁴ Ñuu yucán nì ndacùhun tnahá-nsí xì nècuàchì iin-ni nchícùn stná xì Jesús, te nì xicàn-nè ñà-ndòo-nsi xì-né iin usà quivì. Dandu después nì quihin tu-nsi ichì cuàhàn-nsi carretera cuàhàn ñuu Roma.

¹⁵ Daaní, ñuu Roma mà nì quee ga stná nêhivì xì Jesús vâxi-ne, vâchi sàni xinitnùhu stná-nè sàvâxi-nsi. Dava-ne, dècuèndè ñuu nani Yâhvi xi Apio nì quesaa-nè, te dava ga-nè cuisì ndé ñuu tii nani ùnì Changaru nì quesaa-nè (ñà-ndacùhun tnahá-né xì-nsí.) Te na ní xini Pablo nècuàchìmà, nì naquimanì-né Dios, te nì ndòo-ne contenu.

¹⁶ Daaní, nì sàà nsidaa-nsí ñuu Roma. Te capitán cutnâhâ xì-nsí, nì quida-ne entregar tiâa ndiaá-nè, nì ndòo nècuàchìmà ndahà iin comandante. Doco Pablo, nì nihì-né permisù coo cuaán-né, mii-né xì stná iin soldadu cundiaa xì-né.

Nansa nì càhàn Pablo xì nècuàchì raza-nè ndoó ñuu Roma

¹⁷ Daaní, nì yâha ùnì quivì, te nì nacana Pablo nècuàchì raza-nè chicá idónuu nì sàà vehe-ne. Te na sàni nataca nsidaa-né, dandu nì cachi Pablo xì-né:

—Ñáni, còò ni-iñàha ni quidé dìquì nècuàchì ñuu-ndà, te ni-iin xichi cóni càhíchì stná ini estilu xi xii-ndà. Doco nì tñii nècuàchì raza-ndà yùhù na ié ñuu Jerusalén, te nì dâyâha-ne yùhù ndahà tè-romanu.

18-19 Te tè-yùcán, nì xicàn tnùhù váha-tè nùí, dandu cuàhàn-te dañá-té yùhù nì cùí, vèchi còò ni-ĩñàha disáhà-xí cuí. Doco nècuàchì raza-ndà ndoó yucán, cóni cùnì-nè dàñí. Ñàyùcànduá, fuerza nì xiquèn dayáha-tè yùhù nùù rey cahnú César ñà-nsidandaà tèmà sàhí. Doco ni-iyuhu có-nduámà ñá-cùnì daquéè cuàchi dìquì nèhivì raza-ndà; còó.

20 'Pues cunaha-nsiá, iá ñà-dìsáhà-xí nì quide mii-nsiá invitar cundehí-nsià, te càhìn xì-nsiá yohó, vèchi vichi ndisa sà-ia iin tnùndé ini ndiaha xí nècuàchì raza-ndà Israel. Doco divi sàhà-ñá (xiníndísé tnùndé ini ndiaha ma), ñàyùcànduá nì sàì nì sàcùnuhni cadena yohó —nì cachi Pablo.

21 Dandu nì cacachi nècuàchì mà xì Pablo:

—Còó; còò ni-iin carta nì quixí ladu Judea càhàn sàhà-ní, ni còò ni-iin stná nècuàchì raza-ndà nì quésáa daquéè cuàchi-xi dìquì-ní.

22 Doco cachí-ní xì-nsí nansa iá ichì sàà, tuxí inì-ní. Vèchi nsiùhù cunì-nsì cundaà ini-nsì, vèchi nsidanicuú lugar càhàn ùhì nèhivì dìquì ichì mà —nì cachi-nè.

23 Daaní, nì saquin Pablo iin quivì quixi tu nsidaa-né. Te na ní sàà quivì mà, cuàhà gá nèhivì nì casaà vehe Pablo. Ñàyùcànduá, ndè dàtnàà, xì ndè nì cuaà dahuun nì ndòo-ne yucán, càhàn Pablo xì-né, datúí-ne nansa iá ichì ndé dandacú Dios, te dansínuu ini-nè nècuàchì mà nansa cachí ley xi Dios nì tiaa Moisés, xì nansa cunì cachi stná palabra nì tiaa nècuàchì profeta sàhana. Ducán nì quida-ne, vèchi cunì-nè dacúníndísâ-né nècuàchì mà, te cahvi-ne xì Jesús.

24 Daaní, na ní nsihamá, dandu dava nècuàchì iníni má, nì xinindisá-né, te dava-ne, còó.

25 Màdì iin-ni ni xiníndísâ nsidaa-né. Daaní después cunì-nè nùhù-nè. Doco na táñaha ga caquee-ne, nì cachi Pablo xì-né:

—Ndisa, ñà-ndáà nduá nì cachi Espíritu Ìì xí Dios xì xì-ndà sàhana na ní dàcàhàn-yà profeta nani Isaías, vèchi dohó nì cachi-yà xì nècuàchì mà:

26 Cuahán-ní, càhàn-ní xì nècuàchì raza-ní yohó, te dohó cachì-ní xì-né: “Mii-nsiá, cuàhà gá icúmí-nsià cunini-nsia, doco mà sàà-nsià mànhì ini-nsià. Te cuàhà gá icúmí-nsià cundehè-nsiá, doco mà cundáà ndisa inì-nsia”. (Ducán cachì-ní xì nècuàchì raza-ní.)

27 Vèchi nsidaa nèhivì mà, quidámáxìnì-nè, na ian ùhì tiacu-nè. Te quidá-né na ian dànacuáni-nè nùù-né, vèchi có-cùnì-nè cundehè-né (ichì váha), ni có-cùnì stná-nè cunini-ne, ni có-cùnì stná-nè mànhì ini-nè, ni có-cùnì stná-nè natnahnù-nè ichì yùhù, te ducán nsida víí anima-nè, nì cachi Dios.

28 Pues vichi cunaha-nsiá, sàni nìhítàhvì nèhivì nsidaa gá raza cunini stná-nè razón ndiaha nansa càcu-ne nùù-yá. Te mii-né, ndisa, icúmí-nè cunsihi ini-ne cunini-ne

29 —nì cachi Pablo.

Dandu nècuàchì raza Judea mà, nì caquee nsihi-ne, te nì quesaha-né ndatnúhú fuerte-nè sàhà palabra mà.

Nansa nì quida Pablo na ndiadí-nè vehe-ne ñuu Roma

30 Daaní, inii ùì cuà nìsa à Pablo iin vehe renta (ñuu mà), te dayáha-ne nsidaa nèhivì sàà nùù-né,

31 cachítñuhu-ne xì nècuàchì mà sàhà ichì ñuhivì Ìì xí Dios, vèchi libre iá-nè càhàn-nè xì nsidaa nèhivì mà. Ñàyùcànduá, cuàhà gá nì dàcuàhá-né nècuàchì mà sàhà Stoho-ndà Jesucristu, còò iin ni sadí xì nùù-né.

Tutu Nì Tiaa San Pablo nù Nèhivì xí Dios Ndoó Ñuu Roma

¹ Yùhù nduí Pablo, iin nècuàchì xinúcuáchì nù Jesucristu. Divi mii-yá nì cachi-yà xì ñà-cùhìn chuun xi-ya; mii-yá nì nacàxin-ya yùhù ñà-cachitnùhi razón ndiaha xí Dios inicutu.

² Te divi razón mà nduú stná palabra nì cachitnùhu-ya sàhana na ní dàtnùu-yà ini nècuàchì nì sacahàn cuenta xi-ya, te nì tiaa-ne ñà-yúcán nù tutu ì.

³⁻⁴ Cunaha-nsiá, cáhàn palabra mà sàhà Dèhemanì-yá, te cachá` ñà-nduú-yá iin descendencia xi rey David, vèchi iin nècuàchì ñuhivì yohó nì sanduu xii-yá, cachá`. Doco (diín lugar nì quixi) anima ì-yá, vèchi Dèhemanì Dios nduú-yá, te icúmí-yá poder, ináhà vâha-nda ñà-jaàn, vèchi mate ní xihì-yà, doco nì natiacu-yà.

⁵ Te divi nù mii-yá sàni ñihitáhvi nsiùhù cacanu-nsi chuun xi-ya ñà-càhàn-nsi xì nèhivì nsidanicuú ñuu, áma sáà stná-nè cunini-ne ley xi-ya, te cunindisá-néyà, dandu más gà tñùñuhu xí-yá quee.

⁶ Te mii-nsiá, ducán nì xinindisá stná-nsià, vèchi nì cana stná Jesucristu mii-nsiá (ñà-cunchicùn-nsiàyà).

⁷ Te vichi tiaí tutu yohó nù nsidaa mii-nsiá nècuàchì ndoó ñuu Roma. Cunaha-nsiá, ñà-màni guá-nsià nù Yua-nda Dios, ñàyùcànduá nì cana-yansià sàhà-ñá cunduu stná-nsià nèhivì ì xí-yá.

Te vichi xicàn tàhvi sàhà-nsiá nù mii-yá xì nù Stoho-nda Jesucristu ñà-nì cuàha-yansià gracia, te contentu nì cúndóó-nsiá quida-ya.

Nansa nì cachi Pablo ñà-cuní-nè cùhùn-nè ñuu Roma nàcòtò-nè nèhivì xí Dios ndoó yucán

⁸ Primeru cuàhìn cachi ñà-yòhò: yùhù ndácùcahín Jesucristu, te naquímání (Yua-nda) Dios sàhà nsidaa-nsiá ñà-ndiaha guá xiníndísâ-nsiá mii-yá. Te vichi dècuèndè inicutu ñuhivì sàni xinitnùhu-ne sàhàjàn.

⁹ Yùhù, xì nsidaa anímè xinúcuáchì nù-yá, cachitnùhi razón ndiaha sàhà Dèhemanì-yá. Te mii-yá, ináhà-yà ñà-ndáà nduá nsinúú cuàhà inì mii-nsiá, te xicàn tàhvi sàhà-nsiá nù-yá.

¹⁰ Te xicàn tàhvi stnáì áma cóo iin quivì ñihí tiempu sà nàcòtì mii-nsiá, nú ducán cuní stná mii-yá.

¹¹ Vèchi cuàhà gá cuní sà sàhà-ñá ñihitáhvi gá-nsià más ñà-nduá cui chindee xi anima-nsiá, dandù chicá nacuahandee inì-nsiá.

¹² Te ò nì cachí-ndà, ñà-cuní-ndà chindee stnaha-nda ñà-chicá cunindisá ví-ndayá, vèchi nsidaa-nda, iin-ni xiníndísá-ndáyâ.

¹³ Ñánì, cuní cundaà ini-nsià ñà-cuàhà gá xichi nacánì inì sà ndé ndoó-nsiá, doco siempre íá ñà-sadí nù. Doco vichi ndisa, (vihini sà), vèchi stná ndé ndoó-nsiá cuní quida stnáì chuun ì xí Dios, nacua sàni quide dava ga ñuu, sàhà-ñá ducán quee stná cuàhà ñà-vàha xi mii-nsiá.

¹⁴ Vèchi ndiá ìqué (cachitnùhi razón ndiaha xí-yá) xì nsidanicuú nèhivì, a xínduu-ne nècuàchì ñuu ndé cáhàn-nè dàhàn griegu, te ò ndéni ñuu nì cui, doco icúmí càhìn xì nsidaa-né, a nchichí-nè, te ò mà nchichí-nè.

¹⁵ Ñàyùcànduá, nù yùhù, dispuestu ié` sà cachitnùhu stnáì xì mii-nsiá nècuàchì Roma ñà-nduú razón ndiaha.

Cahnú poder xi razón ndiaha xí Dios

¹⁶ Yùhù, có-cùcàhàn nù cachitnùhi razón ndiaha xí Cristu, vèchi cunaha-nsiá, sàhà palabra jaàn vètùnì càcu anima-nda quida poder xi-ya, nú sàni xinindisa-ndayá, mate

nècuàchì ndéni ñuu nì cui ni cúndúú-ndá. Doco dihna xiñuhu (cunitnùhu) nècuàchì raza Judea, dandu stná nèhivì dava ga ñuu ñuhivì.

¹⁷ Vàchi divi sàhà razón ndiaha ma datúi Dios nansa cui ndee vaha-nda nùù-yá nú ni cúníndísá vaha-ndayá, vachi cuisì-ní ñà-jaàn nduá ndiaá, nacua cachí stná tutu ì: “Nú sàni ndee vaha-nda nùù-yá ñà-xíníndísá-ndáyá, dandu vida ndiaha nihítàhvì stná-ndà”.

Nsidaa nèhivì, iá cuàchi-ne, cachí Pablo

¹⁸ Sàni cundaà ini-ndà fuerte icúmí quixi castigu xi Dios dìquì nsidaa nèhivì có-quidá víi, vachi quini quidá-né, te cuehé gà-nè, có-sâha-ne cuitià palabra ndàcuisì xí-yá,

¹⁹ mate sá-ínáhá vaha-ne sàhà ñà-nduá cui cundaà ini-ndà sàhà-yá, vachi sàni dàtúi-yaña nùù-ndà.

²⁰ Vachi dècuèndè nì sàcòo ñuhivì náhà claru ñà-nduá cui cundaà ini-ndà sàhà-yá; mà úhì cundehè-ndà nsidaa ñà-nduá nì quidavàha-ya, te cundaà ini-ndà. Náhà xicà icúmí-yâ poder ndisa nicanicuahàn, te claru cundáà stná ini-ndà ñà-mii-yá nduú-yá Dios. Ñàyùcànduá, còo ni-iin ñà-dìsàhà-xí (nacuaà nèhivì-yá).

²¹ Vachi na nisa inaha-neyà antes, cóni càhvì ndisa-neyà nacua ndiá icà-né, ni cóni náquímànì stná-nèyà. Cuisì inì-ni mii-né nì chitnùnì ndevàha ini-nè nansa quida-ne, mànicùì gá mànihì tnúnì ini-nè nansa quida viì-né.

²² Ñà-nchìchì guá-nè càhàn-né, ñà-yùcán nì tui-ne nduú-né nècuàchì neciu.

²³ (Te ñà-neciu guá-nè), nì nandòdó-né ñà-ndiaha guá iá-yà, te cahan-né iin figura iá nahi nèhivì nduú Dios, mate nèhivì, xihì-nè, doco mii-yá, itiácú-yà nicanicuahàn. Te nì quidavàha stná-nè figura laa, xì stná quisì nahnú, xì quisì cuàti, (te nì cahvi-néñà).

²⁴ Ñàyùcànduá, nì cuhuun ini Dios sàhà-né, te nì cachi-yà ni cùhùn-nè ichì sìquini nì nchihò ini-nè. Te ducán ndisa nì quida-ne, (yáha ga quini) nì quida-ne xì iquicúñú-nè, cóni chívàha ga-nè tnùñuhu xí-né.

²⁵ Nì nacuaà dahuun-ne palabra ndàcuisì xí-yá, te ñà-nduú tnùhu nì candisá-né. Màdì mii-yá ana nì quidavàha xi ñuhivì nì càhvì-né; còo, cuisì-ní ñà-nduá nì quidavàha-ya ñuhivì yohó nì cahvi-né; cuisì ñà-jaàn nduá nì xinucuachi-né nùù-xí, màdì nùù mii-yá ndiaha itiácú nicanicuahàn, amén.

²⁶ Ñàyùcànduá, nì nacoò dahuun-yanè. Dandu chicá quini nì quida ndevàha-ne xì mii-né. Dècuèndè stná nècuàchì ñahà, cóni nándàhà gá-ña xì nècuàchì tiàa nacua quidá nècuàchì ñahà. Còo, entre mii-ñá nisa quida-ña cuàchi.

²⁷ Te ducánì stná tiàa, dava ga stná-te, cóni nándàhà gá stná-te xi ñahà. (Ndahví-te), vachi entre mii-té nì naxihò stnahá-te, te nì quida-tè cuàchi. Doco sàhà ñà-yùcán nì nihì stná icà-té (cuèhè), vachi ñà-yùcán nduú castigu xi-tè nacua xiñuhu coo xi-té ñà-nì quee-tè ichì váha.

²⁸ Te-ñà cóni cúdùì gá ini-nè cunihnu ini-nè mii-yá, ñàyùcànduá, nì nacoò dahuun stná-yànè, te sàhámà nì cuchicuehe dahuun sàxínìtnùnì-nè. Cuisì ñà-có-ndiá icà-né quida-ne nduá nchìcùn-nè vichi.

²⁹ Vachi chitu anima-nè nsidanuu ñà-chìcuéhè. Ñàyùcànduá quidá ndevàha-ne cuàchi xi nècuàchì ñahà. Yáha ga có-quidá víi-né. Xího-né cuàhà iñàha, te cúmbìdia stná ini-nè. Te tùha stná-nè cahni stnahá-né, vachi nàâ stnahá-né ñà-malu guá-nè, te dana ga stná-nè; dandahví stnahá stná-nè, te càhàn ndiaa stnahá-né,

³⁰ vachi quini ga càhàn-nè dìquì ñanìtnaha-ne. Có-xiñùhù-né Dios, vachi cuadú gà-nè, mii-né nduú-né mii-né cahan-né. Ndiaha gá-nè cahan-né, doco maña gà-nè. Có-ínì-né ñà-nduá cachí yuadíhì-nè.

³¹ Nì có-sàà-nè cundaà vaha ini-nè, te có-quidá stná-nè cumplir nú sàni cachi-nè iñàha. Mà túha-ne cuhi stnahá ini-nè. Nicanicuahàn chuhún ini-ne sàhà iin ñanìtnaha-ne, te mà túha-ne cundehè ndahví stnahá-né.

³² Te mate ináhá vâha-ne ñà-ìcúmí Dios nsidandaà-yà sàhà cuàchi quidá-némà, doco có-ndùlócô-nè, mate ináhá-nè ñà-xiñhùhù cui-nè sàhà falta mà, doco iin-ni quidá-nèà, ndè cudí gá stná ini-nè nú quidá stná nèhivì dava ga ducán.

2

Palabra xiñuhu cachi-ndà xì ana tuxí inì-xi chicá vâha-ne nùù ñanìtnaha-ne

¹ Ñàyùcàndùá, (nú iá iin nèhivì), ndéni nèhivì ni cùndúú-né, te xítñuhu-ne ñanìtnaha-ne, dandu vátùni cachi stná-ndà dohó xì-né: “Mii-ní, iá stná cuàchi-ní; ñàyùcàndùá có-xiñhùhù cuitñuhu-ní ducán; iá-ní xítñuhu-ní ñanìtnaha-ní, doco cunaha-ní, xidá cuàchi stná mii-ní quida-ní, vâchi nacua quidá mii-né, ducán quidá stná mii-ní.

² Te sà-ìnáhá-ndá, palabra ndàcuisì cundua na nsidandaà Dios sàhà cuàchi nèhivì có-quidá víi.

³ Ñàyùcàndùá, ¿a tuxí inì-ní cui càcu-ní nùù castigu mà? (Mà cúí), vâchi mate xítñuhu-ní nècuàchì quidá xi cuàchi ma, doco ducán quidá stná mii-ní.

⁴ Cunaha-ní, màni gá quidá Dios xì-ndà, vâchi ndee cahnú ini-yà sàhà-ndà. Te ¿a cahíchì inì-ní ñà-quidá-yá ducán? ¿A có-cùndáà inì-ní ñà-ndùá disáhà-xí quidá ndiaha guá-yà ducán? Pues divi sàhà-ñá ni sáà-ndà naxicocuñ inì-ndà sàhà cuàchi-nda nduá.

⁵ Doco (mii-ní, còó), ndee gá inì-ní, có-cùù-ní arrepentir, ñàyùcàndùá cáyà, te cáyà castigu nihì-ní quivì juiciu, dandu quivì mà icúmí nèhivì cundaà ini-nè cuisì nsidándáà Dios nacua ndiá ìcà-yá quida-ya,

⁶ te cuàha-yàndó (castigu, ò cuàha-yàndó iin ñà-vâha), según nansa nì quida iin iin-nda.

⁷ Dandu nèhivì iin-ni quida-xi chuun viì, nihì-né vida ndiaha nicanicuahàn, vâchi sàhà ñà-ndùá quidá-némà nandúcú-nè nansa quee tñùñuhu ndiaha xí-né (nùù-yá), vâchi cuní-nè ndee vâha-ne nùù-yá, te cundoo stná-nè nùù-yá nicanicuahàn.

⁸ Doco nèhivì có-nchìcùn palabra ndàcuisì, iin castigu fuerte nihì-né ñà-cùdúchì guâ ini-yà sàhà-né, vâchi cuisì-ní nì nacani ini-nè quida-ne ñà-ndùù gustu xi mii-né.

⁹ Cuàhà tñùndoho fuerte cucumi nsidaa nècuàchì có-quidá víi ma, te yáha ga nacani cuaá ini-nè sàhájàn. Dihna nècuàchì raza Judea ndundaà sàhà-xí, dandu después nsidaa gá nèhivì inga raza.

¹⁰ Doco nèhivì quidá víi ma, nihì-né cundoo ndiaha-né, vâchi nihì-né natùì-ne nùù Dios, dandu màni gá cundoo-ne. Dihna nècuàchì raza Judea nihìtáhvì ducán, dandu después nèhivì raza dava ga”.

¹¹ Pues ducán nduá, vâchi cunaha-nsiá, iin-ni indéhe Dios nsidanicuú nèhivì ñuhivì.

¹² Nèhivì tàcùnì ley xi-ya, nú quida-ne cuàchi, dandu icúmí-nè ndañuhu-né, te quivì cuu xi-né ducán, mà chindéé ley mà-né. Daaní stná nèhivì ináhá vâha ley xi-ya, divi nacua cachí ley mà, ducán icúmí cuu xi-né quivì ndundaà sàhà-né.

¹³ Vâchi nú ni quidá ndisa nèhivì cumplir ley xi-ya, dandu vátùni ndee vâha-ne nùù-yá. Doco nú cuisì iníni uun-neà, dandu mà cùndiámà.

¹⁴ Vâchi dava nèhivì, tàcùnì-nè ley xi-ya, doco tûha-ne quida-ne cumplir ñà-ndùá cachá, vâchi inì-ni mii-né nacání ini-nè quida-ne ducán. Ñàyùcàndùá, divi ñà-jaàn cunduu na iin ley xi-ne.

¹⁵ Vâchi cuisì ñà-cundehè-ndané nansa quidá-né, te cundaà ini-ndà ñà-ini anima-nè sànihì ini-nè nansa iá ley xi-ya. Ináhá vâha-ne iá iin ley chivâha-nda. Te stná sàxínítnùnì-nè, ducání cachí stná` xì-né. Vâchi dava xichi dandohó sàxínítnùnì-ndà ndohó, te dava xichi cachá` xì-ndà ñà-còò cuàchi-nda.

¹⁶ (Pues cunaha-nsiá, nsidaa ñà-jaàn, claru icúmíâ tùia) quivì nsidandaà Yua-nda Dios sàhà nsidaa ñà-ìá dèhé ini anima nèhivì. Te divi ndahà Jesucristu icúmí-yâ nacooyà juiciu mà, nacua cachí razón ndiaha cachítnùhi xì nèhivì.

Nansa nì quida nècuàchì raza Judea, cóni chivâha stná-nè ley xi-ya

17 (Vichi cuàhìn càhìn sàhà) nèhivì raza-nsì. Nècuàchì raza Judea nduá danani nèhivì raza-nsì. Te cuàhà nèhivì raza mà, yáha ga nihnú ndéé ini-nè ñà-ìcúmí-nê ley ì xì Dios; ñàyùcànduá chicá ndiaá-nè cahan-né, vàchi mii-yá càhvì-né,

18 te ináhá-nê ñà-nduá dandacú-yá quida-nda. Te sàhà-ñá dàcuahá cuáhà-né ley ì mà, ñàyùcànduá cundáà ini-nè índù ñàha nduú chuun viì, te índù ñá-còó.

19 Sàhámà quidá-né cuenta ñà-mii-né icúmí nacani xi nsidaa nèhivì nansa iá ichì váha cahan-né; xiñuhu danátnùu ini-nè nsidaa nècuàchì xicá ichì ñáa, tuxí ini-nè.

20 Cuisì mii-né cui dacúndéhe xi tè-neciu iin ichì víi, vàchi maestru nduú-né cahan-né. Nahi méè có-ínáhá xínduu nècuàchì dava ga, cahan-né, te ñàyùcànduá, cuní-nè chìnaha-nè nècuàchì mà, vàchi tuxí ini-nè ñà-sàhà ley dacuahá-né mà vátùni mànihì ini-nè nsidanicuú ñàha, te cundaà stná ini-nè sàhà nsidaa ñà-nduú ñà-ndáà.

21 Pues vichi, nú ducán cudí guá ini-nè dacuahá-né nèhivì dava ga, ¿a có-xiñùhù dacuahá stná-nè mii-né? Vàchi cachí-nè xì nèhivì ñà-màsà quidá cuíhná-né, doco ¿a ndísá có-xidá cuíhná stná mii-né?

22 Te cachí stná-nè xì nèhivì ñà-màsà cáhàn-nè xì inga nèhivì cónì nándàhà xì-né, doco ¿a ndísá có-quidá stná-nè ducán? Cahíchì ini-nè ñà-nduú yùu yócò, doco ¿a có-xidá cuíhná stná-nè ñà-cuicà iá veheñùhu?

23 Ndee cáhàn-nè sàhà-ñá sà-ìcúmí-nê ley ì xì Dios, doco có-chívàha ndisa-neà, te cuní cachámà na ian cahíchì ini-nè mii-yá nduá.

24 Pues, divi ducán cachí stná tutu ì ndé cachá: “Sàhà modo ndahví xi nècuàchì raza-ndà, ñàyùcànduá sácùndiaa quini tè-inga raza Dios xi-nda”.

25 Cunaha-nsiá, ñà-ítúú seña xi-ya ìcà-ndà, vátùni cundiaa mà nú chívàha ndisa-nda ley xi-ya; doco nú còó, dandu davani queámà na ian còò ni-iin seña mà ìcà-ndà.

26 Ñàyùcànduá, nècuàchì (inga raza) còò seña ìcà-xí, nú ni chívàha-ne ley xi-ya, dandu vátùni quida stná-ndà cuenta na ian itúú ndisa seña mà ìcà-né.

27 Cunaha-nsiá, mate còò seña mà ìcà-né, te chívàha stná-nè ley mà, ñà-jaàn datúí claru ñà-có-quidá víi nècuàchì raza-nsì Judea, vàchi có-chívàha-ne ley mà, mate icúmí-nê tutu ì, te itúú stná seña mà ìcà-né.

28 Ñàyùcànduá, ¿ana cachi-ndà nduú ndisa nècuàchì raza Judea? ¿A sàhà descendencia xi-ne nduá? Còó. Te ñà-ítúú seña xi Dios, ¿a cuisì sàhà ìcà-ndà nduájàn? Còó.

29 Chuun xi anima-ndà nduá, te ini anima-ndà nduú ndisa-nda nècuàchì raza Judea. Te ducání stná ñà-dúcùn-ndà seña xi-ya, cuisì ini anima-ndà nduú ñà-ndiàá. Iin ñà-nìhnú vaha ini-ndà nduá, màdì iin ley nì tiaa nùu tutu. Te nú iá (viì ndisa) anima-ndà ducán, dandu icúmí-ndá ndee vaha-nda, doco nùu Dios, màdì nùu nèhivì.

3

1 Nú ducán nduá, dandu ¿índù chuun cachí-ndà ndiaha gá iá ñà-nduú-ndà nèhivì raza Judea, te itúú seña xi Dios ìcà-ndà?

2 Pues cuàhà gá ventaja nduá, te cuàhà modo chindéâ. Primeru, cuàhà gá nduá ñà-nì nìhítàhvì nèhivì raza mà cucumi-né tutu ì cachítnùhu palabra xi-ya.

3 Vàchi mate có-xiníndísâ dava-ne, doco có-cuní cachámà ñà-nacuaà Dios ñà-nduá nì cachi-yà.

4 Còó, vàchi mate nsidaa nèhivì, tnuhu-né, doco mii-yá, icúmí-yâ quida ndisa-ya cumplir ñà-nduá nì cachi-yà. Te ducán cachí stná nùu tutu ì (ndé cáhàn nèhivì xì-yá, cachí-nè): “Claru icúmí tui ñà-cuisì mii-ní cachí xì ñà-nduú ñà-ndáà, te nú daquéé cuàchi nèhivì dìquì-ní, dandu divi mii-ní icúmí-nì cundee-ní nùu-né”.

5-6 Mate chicá nàhà claru ndiaha gá iá Dios (na xiní-ndà ñà-quini guá quidá nèhivì cuàchi), doco ¿a sàhámà cui cachi stná-ndà ñà-có-quidá víi-yá na sàha-yàndó castigu sàhà cuàchi-nda? Còó, màsà nunca cachi-ndà ducán. Cuisì nì cachì palabra jaàn sàhà-ñá divi ducán (tuxí ini dava) nèhivì. Doco còó, mà cúí cachi ndisa-nda ducán, vàchi nú ducán nì cundúá, mà cúí nihì Dios nansa nsidandaà-yà sàhà cuàchi-nda nì cúí.

⁷ Doco cachí dava nêhivì ñà-chicá quee tnũñuhu xí Dios nú ni cachí-nè iin tnũhu, vâchi tuxí ini-nè ñà-sáhàjàn chicá nsinuu ini-ndà ndàà cuisì ini Dios. Doco nú ducan ni cúndúá ñà-quee tnũñuhu xí-yá sàhà cuàchi-nda, dandu có-ndiá icà-yá nsidandaà-yà sàhà cuàchi-nda ni cuí.

⁸ Te nú ducán nduú stná, ¿amádi chicá ndiaha ñà-quida cuahà-ndà ñà-có-ndiá, dandu chicá quee viá ni cuí? (Doco còó, màsà cáchí-ndà ducán, mate) cachí dava nêhivì ñà-divi ducán chináhá nsiùhù, daquéé cuàchi-ne dìquì-nsí. Doco nècuàchìmà, icúmí-nê ndoho-ne sàhà (ñà-dàquéé cuàchi-ne ducán), vâchi divi nduá xiñuhu coo xi-né.

Nsidanicuú nêhivì, iá cuàchi-ne

⁹ Pues, ¿índù ñà-cachi-ndà vichi? ¿A ndísá chicá ndiaha nècuàchì (raza Judea)? Còó, vâchi sàni cundaà vâha ini-ndà, nêhivì cuàchi nduú nsidanicuu-nda, nahi nêhivì inga raza, te ducán stná nècuàchì raza-nsi Judea.

¹⁰ Vâchi ducán cachí stná nù tutu ì:

Còò ni-iin ana nihnú ndàcuisì inì-xi;

¹¹ còò ni-iin ana sàà cundaà inì-xi, còò ni-iin nandúcu ndisa nansa iá ichì Dios.

¹² Nsidaa nêhivì, sàni tùcù-nè ichì malu; nsidaa-né sàni cuchicuehe anima-nè. Ni-iin-ne có-quidá ví-né.

¹³ Te (ñà-quini guá) cáhàn-nè, ducán nduá nahi dico ndé ni nuna yavi xi nsii. Te tûha ga stná-nè dandahví stnahá-né. Ducán iá palabra xi-ne nahi venenu xi iin còò dàná.

¹⁴ Cuàhà gá xicàn tàhvì chihán-nè dìquì ñanìtnaha-ne, te cáhàn ndiaa stná-nè dìquì nècuàchìmà.

¹⁵ Yàchì gà nacání ini-nè cahnì stnahá-né.

¹⁶ Te ndéni ni cui ni yáha-ne, yucán xiní nêhivì tnũndoho.

¹⁷ Vâchi mà túha-ne cunchicùn-nè ichì ndé cundoo manì-ndà.

¹⁸ Te có-yûhí stná-nè Dios, vâchi có-nìhnú ini-nèyà.

¹⁹ Pues ináhá-ndá, nsidaa ñà-nduá cachí ley sàhaha ma, sàhà-ñá cunini nêhivì ndoó tìxi ley mà nduá, te ducán (nducahan-ne), te cadì-nè yuhù-né, vâchi iá stná cuàchi-ne, nacua iá cuàchi nsidanicuú nêhivì ñuhiví.

²⁰ Ñàyùcàndúá, ni-iin-nda mà sàà-ndà ndee vâha-nda nù Dios sàhà cuisì ñà-chivàha-nda ley sàhaha ma, vâchi chuun quidá ley mà, cuisì nduá ñà-cundaà ini-ndà iá ndisa cuàchi-nda.

Nú xiníndísá-ndá mii-yá, icúmí càcu anima-ndà

²¹ Doco vichi cunaha-nsiá, iá ndisa nansa ndee vâha-nda nù-yá, te còò ni-iin ley chivàha-nda sàhàmà. Mà úhì cundaà stná ini-ndà ñà-jaàn nú ni cahvi-nda tutu nduú ley xi-ya, xì stná tutu nì tiaa nècuàchì profeta.

²²⁻²³ Vâchi nú sàni xinindisa-nda Jesucristu, dandu icúmí-ndá ndee vâha-nda nù-yá, nsidanicuú ndohó nècuàchì nchícùn xì-yá. Vâchi iin-ni indéhe Dios nsidaa nêhivì sàhà ñà-iin-ni iá cuàchi nsidaa-né, te iin-ni có-sàà stná-nè tavà-né tnũñuhu xí-yá.

²⁴ Doco sàhà-ñá nì dànáà Jesucristu sàhà-ndà, ñàyùcàndúá uun-ni sáhatahvì-yándô gracia xi-ya, te sàhàjàn vâtùni ndee vâha-nda nù-yá, te càcu dahuun anima-ndà.

²⁵ Vâchi nì chitnùnì ini Yua-nda Dios ñà-cunduu Jesucristu ana icúmí cui, te cuitià nù-yá, dandu nsidaa ana cahvi xi ñà-nduá nì quida-ya, mà nsínúú gá ini (Yua-nda) Dios sàhà cuàchi-ne. Te sàhàjàn cundaà stná ini nêhivì ñà-vâtùni nì quida-ya xì nêhivì sàhaha na ní dàyáha uun-ya cuàchi-ne, te nì quidandee gá ini-yà sàhà-né.

²⁶ Daaní, inga ñà-dìsàhà-xí nì xihì-yà nduú stná ñà-cundaà ini nêhivì ñà-ndiaha gá quidá stná-yà tiempu vichi. Te mate ñá-ndàà cuisì cundua na nsidandaà-yà sàhà-ndà, doco nú cahvi-nda xi Jesús, dandu vâtùni ndenihi-yándó na ian nduu-nda nêhivì còò falta xi.

²⁷ Daaní, nú ducán nduá, dandu ¿nansa cachi-ndà sàhà nèhivì ndeníhí vaha guá xì mii-xí? Pues, có-nduá ñà-cachi gà-nè ducán. ¿Índù chuun? ¿A sàhà-ñá cóni chivàha vii-né ley ì? Còó, divi sàhà-ñá mà cundiáá gà ni-iñàha nùù-yá, cuisì ñà-cunihnu vaha ini-ndàyá.

²⁸ Ñàyùcànduá, vichi sàni cundaà ini-ndà nansa quida-nda, te ndee vaha-nda nùù-yá. Divi ñà-cunihnu vaha ini-ndà mii-yá nduá xiñuhu, màdi ñá-chivàha-nda ley (sànaha ma).

²⁹ ¿A cuisì Dios xi nèhivì raza Judea nduú-yá? (Còó.) ¿A có-nduú stná-yà Dios xi nsidaa gà nèhivì ñuhiví? Jaan, vachi Dios xi stná mii-né nduú-yá.

³⁰ Vachi imindaa Dios iá, te vátùni ndee vaha nsidaa nèhivì nùù-yá nú ni cúníndísâ-néyà, có-quidá a nduú-né nècuàchì raza Judea, te ò nèhivì inga raza.

³¹ Doco nú cachí-ndà cuisì cundiaa ñà-cunihnu vaha ini-ndàyá, dandu ¿a ducán queá na ian có-ndiáá gà ley nì sàha-ya? Còó, màdi ducán nduá. Dècuèndè chicá más icúmí cundiaa ley mà, nú ducán.

4

Nansa nì quida Abraham sàhana

¹ Doco ¿nansa cachi-ndà sàhà xii-ndà Abraham sàhana? ¿Nansa iá ñà-nduá nì nihítáhvì-né?

² Pues nú sàhà obra xi mii-né nì nihì-né ndee vaha-ne nùù Dios nì cùí, dandu vihini ndenihi ndiaha-né mii-né sàhájàn, doco nùù mii-yá, còó, mà cùí.

³ Doco ¿nansa cachí tutu ì sàhà-né? Dohó cachá: “Ñà-nì xinindisá Abraham Dios, ñàyùcànduá nì nihì-né nì ndee vaha-ne nùù-yá”, cachá.

⁴ Pues, ni cachí-ndà iá iin ana quidáchúùn nùù-ndà. ¿A cutáhvì-né ñà-nduú raya xi-ne? Còó, vachi ñà-ìnhíicá-ndá nùù-né nduá.

⁵ Doco (tucu iá xì ichì Dios), vachi mate còò obra ni quida-nda, doco nú xiníndísá-ndá mii-yá, dandu vátùni quida-ya cuenta vaha ndisa-nda. Vachi nùù mii-yá iá nansa ndenihi vaha-yàndó, mate nèhivì cuáchi nduu-nda.

⁶ Daaní, ducán stná David sàhana, nì cachi-nè ñà-ndiaha guá iá xì nèhivì nihítáhvì ndee vaha nùù-yá mate còò obra xi-ne.

⁷ Ñà-yòhó nduá nì cachi David mà:

Nansicáhán nèhivì nú sàni xicahnú ini Stoho-ndà Dios sàhà falta xi-ne, te sàni cuxio cuáchi-ne.

⁸ Nansicáhán-nè nú cò-ìtníí gà-yà cuenta sàhà cuáchi-ne.

⁹ Pues vichi, nú ducán nduá, ¿a vátùni nihítáhvì stná nècuàchì nsidanicuú raza, te ò cuisì nèhivì iá seña xi-ya ìcà-xí? Pues iin casu mà nduú stná Abraham yucán. Sàni cachi-ndà nì ndee vaha-ne nùù-yá sàhà cuisì-ñá nì xinindisá-né mii-yá.

¹⁰ Doco ¿índù ñà-disáhà-xí nì ndee vaha-ne nùù-yá? ¿A sàhà ñà-ítuú seña mà ìcà-né? Còó, vachi tàyóo ñà-jaàn (na ní ndee vaha-ne nùù-yá).

¹¹ Dècuèndè después, dandu nì sàcùnaha-né ñà-màcùtuu seña mà, te cunduamà iin ñà-cundaà ini-ndà sàni ndee vaha ndisa-ne nùù-yá sàhà-ñá nì xinindisá-né mii-yá. Vachi tañáha ga màcùtuu seña mà ìcà-né, te sàxíníndísâ-néyà. Te sàhà-ñá nì quida-ne ducán, ñàyùcànduá ndohó, quidá stná-ndà cuenta na ian nduú stná-nè yua nsidaa nècuàchì xiníndísá-xí-yá, mate còò ni-iin seña mà ìcà-né, doco xiníndísâ-né, te ducán ndeé vaha stná-nè nùù-yá.

¹² Daaní, stná nècuàchì iá seña mà ìcà-xí, yua stná mii-né nduú stná nècuàchì mà. Doco màdi cuisì sàhà seña mà nduú nècuàchì mà yua-né. Còó; sàhà-ñá nì xinindisá stná-nè mii-yá nduú stná mà, vachi davani nì quida stná-nè nacua nì quida nècuàchì mà na tàyóo seña mà ìcà-né.

Cuàhà ñà-ndiaha ù nì quida Dios comprometer, doco cuisì-ní nèhivì xiníndísâ nihítáhvì xán

¹³ Sàhaha nì quida stná Dios comprometer xì Abraham mà ñà-nìhìtáhvì-né cucumi-né ñuhívì yohó, mii-né xì descendencia xi-ne. Doco ñà-yùcán nì sanduu sàhà-ñá nì xinindisá-né mii-yá, te ducán nì ndee vaha-ne nù-yá, màdì sàhà iin estilu nì chivàha-ne.

¹⁴ Vàchi nú cuisì ana chivàha xi estilu sàhaha nìhìtáhvì, dandu mà cúndiáá gà ñà-xinindisá-ndáyâ, ni mà nìhìtáhvì gá stná-ndà ñà-ndiaha ì nì quida-ya comprometer.

¹⁵ Vàchi nú sàhà ley sàhaha ni cúndúá, dandu cuisì ñà-ndoho-nda cunduu stná. Doco nú còò ni-iin ley, dandu còò stná necesidad cutnii-ya cuenta sàhà cuàchi-nda.

¹⁶ Sàhà ñà-jaàn cuisì ñà-cunihnu vaha ini-ndà mii-yá nduú ñà-ndiáá, vachi modo jaàn vátuni dacútáhvì stná-yàndó gracia xi-ya, te ducán nìhìtáhvì stná nsidanicuú ana nduú descendencia xi Abraham, nahi nèhivì nchícùn ley sàhaha, te ducán stná ndohó ana xinindisá nahi Abraham mà. Vachi ducán cui quida stná-ndà cuenta ñà-nduú stná nècuàchìmà xì nsidanicuu-nda.

¹⁷ Pues ducán nì cachi stná Dios nù tutu ì (na ní càhàn-yà xì-né), cachí-yà: “Cuàhà gá descendencia xi-ní cundoo; cuàhà ñuu cunduu-ne”. Ñàyùcàndúá, xì-ndà nduú stná Abraham mà nù Dios. Vachi nì xinindisá vaha-ne mii-yá, divi mii-yá tùha danátíacú xì nsì, te cuisì càhàn-yà, te màcòò ndéni iñàha nì cui, mate antes tàyóo ni-ian.

¹⁸ Te Abraham mà, mate còò tnùndé ini xi-ne (cahan-nda), doco iin-ni nì xinindisá-né mii-yá, nihnú ini-nè iá ndisa tnùndé ini coo iin dèhe-ne, te nducuahà descendencia xi-ne, te sàhà-nè cunduu-ne cuàhà raza, nacua nì cachi Dios xì-né.

¹⁹ Iin-ni nì xinindisá-né ducán, mate ináhá-nê yáha ga sàsàhnú-né. Vachi sà-ítúú xìnu-ne 100 cuà, te ináhá stná-nè ñà-mà cúí gá coo dèhe (ñahàdihí-nè) Sara.

²⁰ Doco nì xinindisá vaha-ne ñà-ndúá nì cachi Dios xì-né, cóni ía-ne xì duda, vachi iin-ni nihnú ndàcuisì ini-nè mii-yá; te nì naquimanì stná-nèyà,

²¹ vachi nì xinindisá-né ñà-vátuni quida ndisa-ya cumplir ñà-ndúá nì cachi-yà xì-né.

²²⁻²³ Te sàhà ñà-nìhnú ini-nè ducán, ñàyùcàndúá nì ndee vaha-ne nù-yá.

Divi ñà-jaàn nduá cachí stná tutu ì, doco màdì cuísi sàhà Abraham càhàn palabra mà.

²⁴ Còó, sàhà stná ndohó càhàn, vachi stná ndohó, vátuni ndee vaha stná-ndà nù-yá nú nì cúníhnú vaha stná ini-ndà mii-yá ana nì dànátíacú xì Stoho-ndà Jesús, (divi Yua-nda Dios).

²⁵ Vachi mii-yá nduú ana nì chitnùnì inì-xi ñà-cui Jesús sàhà cuàchi-nda, te después natiacu-yà sàhà-ñá nìhì-ndà nanduu-nda nèhivì vaha nù-yá.

5

Nansa íá ñà-ndiaha ì nìhìtáhvì-ndà nú sàni ndee vaha-nda nù Dios

¹ Vichi ndisa sàni ndee vaha-nda nù-yá ñà-sàni xinindisa-ndayá. Ñàyùcàndúá, ndiaha gá sàndòò-ndà nù-yá nì quida Stoho-ndà Jesucristu.

² Te sàhà ñà-nìhnú ini-ndà mii-yá ducán, ñà-jaàn nì cundiatú cuàhà anima-ndà, vachi (nsìquívi) nìhì-ndà gracia xi-ya, te cudí gá stná ini-ndà ndiatu-nda sà quívì cundoo-nda xi-yá gloria xi-ya.

³ Doco màdì sàhà cuisì ñà-jaàn cudí ini-ndà. Còó, vachi cudí stná ini-ndà nú icúmí-ndà yàha-nda tnùndoho, vachi sàhàjàn cutùha-nda quidandee ini-ndà.

⁴ Daaní, nú sàvátuni quidandee ini-ndà, dandu ñà-cudí ini Dios sàhà-ndà queamà; daaní, nú ducán, dandu chicá sà-ndà cunaha-nda íá ndisa consuelu xi-nda nù-yá.

⁵ Te nú ducán nihnú ndisa ini-ndà, dandu seguru nìhì-ndà consuelu mà, mà dándáhvì-yàndó. Vachi sàni sàhatahvì-yàndô Espíritu ì xí-yá, te divi Espíritu ì nduú ana chináhá xì-ndà ñà-cuàhà guá cuú ini Dios sàhà-ndà.

⁶ Vachi ndohó, na táñàha ga cucumi-nda ni-iñàha chindee xi-nda, dandu meru hora vaha ma nì xìhì Cristu sàhà-ndà, mate nècuàchì có-quidá ví nduu-nda.

⁷ Vàchi iin nêhivì ñuhiví, ùhì candisá-né cui-nè sàhà iin ñanìtnaha-ne, mate nêhivì vâha ni cúndúú nècuàchìmà. Doco vihini coo iin tiàa cuàhandee inì-xi cui sàhà inga nêhivì nú vâha ndisa ini nècuàchìmà.

⁸ Doco Cristu, mate iá va cuàhà cuàchi-nda, nì sàha-ya nì xihì-yà cuenta xi-nda. Sàhà ñà-jaàn vâtùni cundaà ini-ndà cuú ndisa ini Dios sàhà-ndà.

⁹ Te vichi sàni ndee vâha-nda nùu-yá ñà-nì xihì-yà ducán, te nì xitià nìi-yá. Ñàyùcàndúá, vichi, chicá más icúmí-yâ dacácu-ya anima-nda nùu castigu xi-nda, vâchi ñà-sàni ndòo vâha-nda nùu-yá nduá.

¹⁰ Vâchi antes, na ian xiní ùhì-ndàyá nì sandua, doco sàhà ñà-nì xihì Dêhemani-yá sàhà-ndà, ñàyùcàndúá nì nàcùndoo vâha-nda nùu-yá. Te nú ducán nduá vichi, dandu chicá mà ùhì càcu dahuun-nda nùu-yá, vâchi sàni natiacu Dêhemani-yá, te itiacú-yà.

¹¹ Te yâha ga cudî stná ini-ndà sàhà-yá vichi, vâchi sacahvi-ndayá ñà-nì chindee Stoho-ndà Jesucristu ndohó, te nì nihì anima-nda nì nàcùndoo vâha xi-yá.

Nansa nì quida Adán, xì nansa nì quida Cristu

¹² Cunaha-nsiá, sàhà ñà-nì quida imindaa tiàa Adán, ñà-jaàn nduá nì sàcòo cuàchi ñuhiví. Daaní, sàhà stná cuàchi nì quida-ne mà, ñàyùcàndúá nì xihì-nè, te nì quesaha xihì stná nsidaa gá nêhivì nchícùn gâ, vâchi nì quida stná-nè falta.

¹³ Vâchi (tiempu yucán), mate táyôo ley xi Dios nùu nêhivì ñuhiví, doco divi cuàchi nduá nìsa quida-ne. Ñà-ndàà nduá, có-itnîí Dios cuenta sàhà cuàchi-nda nú còo ni-iin ley.

¹⁴ Doco dècuèndè tiempu xi Adán xì dècuèndè tiempu xi Moisés, iin-nì nì xihì stná nsidaa nêhivì, mate có-ndùdává cuàchi nì quidá-né xì cuàchi nì quida Adán mà.

Te Adán mà, mate iyuhu ndudává chuun nì quida-ne xì chuun nì quida Jesús na ní quesaa-yà ñuhiví,

¹⁵ doco có-ndùdává cuáhà-ñá. Vâchi tnùmanì níhì-ndà nùu mii-yá, tucu iá nùu ñà-nduá nì quida Adán, vâchi sàhà cuàchi nì quida imindaa nècuàchìmà, cuáhà sàstnùhù nêhivì nì quesaha xihì. Doco iá stná imindaa ana nì nanduu tiàa nì quida chicá ndiaha, divi nduú Jesucristu, vâchi sàhà gracia xi-ya nì sàhatahvì-yá cuáhà nêhivì tnùmanì ndiaha xí-yá, te cáyà cáyà gracia mà nùu-ndà.

¹⁶ Te ñà-nduá nì cuu na ní quida mindaa tiàa ma cuàchi, có-ndùdává stná xì ñà-nduá nì cuu na ní sàhatahvì Dios ndohó, vâchi cuisì imindaa cuàchi nì sandua, doco icúmí nêhivì ndoho-ne. Te vichi, mate cuáhà cuàchi-nda iá, doco ndiaha gá sàni nihìtâhvì-nda nùu-yá, te ndeé vâha-nda nùu-yá.

¹⁷ Doco (tiempu xi Adán mà) nì quesaha xihì nêhivì; fuerza nìsa xihì-nè sàhà ñà-nduá nì quida mindaa nècuàchìmà. Doco nú sàhà imindaa-né nì cuu xi nêhivì ducán, dandu nâhà xicà chicá ndiaá ñà-nduá nì quida imindaa Jesucristu, vâchi sàhà mii-yá vâtùni nihì-ndà vihi gracia; nihì-ndà tnùmanì xì-ndà ñà-ndee vâha-nda nùu-yá, te ducán seguru cundee-nda (nùu ñà-có-ndiàá), te cutiacu ndiaha-nda quida-ya.

¹⁸ Ñàyùcàndúá, nacua nì ìa imindaa ana nì quida xi iin falta sàhana, te ducán nì quixi tnùndoho nùu nsidaa nêhivì, pues ducán iá stná xì obra vâha nì quida imindaa mii-yá; sàhà obra mà vâtùni nihì nsidaa nêhivì ndee vâha-ne nùu-yá, dandu cutiacu ndiaha-né.

¹⁹ Imindaa nêhivì sàhana cóni íníní xí-yâ, ñàyùcàndúá, nì nanduu nsidaa descendencia xi-ne nêhivì cuàchi. Te ducání stná (Jesús), imindaa mii-yá nì sanini vii xì (ñà-nduá cachí Dios), te ducán nì nihì cuáhà stná-nda nanduu-nda nêhivì nihnú ndàcuisì inì-xi.

²⁰ Nì sàha Dios ley xi-ya sàhà (ñà-cunahà claru) cuáhà cuàchi quidá nêhivì. Te ndisa, cuáhà gá nì cucuahà cuàchi-ne, doco cunaha-nsiá, divi sàhámà chicá más sàni sàhatahvì Dios vihi gá gracia xi-ya.

²¹ Ducán quidá-yá sàhà-ñá cui cundee gracia mà, vâchi antes na ian nì cundee cuàchi nùu nêhivì, te nì xihì-nè. Doco vichi icúmí cundee stná gracia xi-ya, dandu nanduu-nda nêhivì nihnú ndàcuisì inì-xi, te cutiacu-nda nicanicuahàn. Te Stoho-ndà Jesucristu nduú ana quidà-xì nsidaàjàn.

6

Nansa cundee-nda nùu cuàchi-nda, te nihì-ndà quida vii-ndà nacua cuní Jesucristu

¹ Nú ducán nduá, dandu ¿nansa cachi-ndà? ¿A chicá vaha quida ga-ndà más cuàchi sàhà-ñá nihì gá-ndà más gracia?

² Còó, mà váha, vàchi ¿nansa cui quida ga-ndà ducán, nú na ian sàni xihì-ndà nùájàn nduá? Còó ni-iin ñà-dìsàhà-xí quida ga-ndà ducán.

³ Amádi sá-ínahá-nsiâ nansa nì cuu na ní cuhì-ndà, nì sacatnahá anima-ndà xì anima Cristu. Pues nú ducan, dandu sàhà ñà-jaàn xiñuhu quida stná-ndà cuenta na ian nì xihì stná-ndà na ní xihì mii-yá,

⁴ te na ian nì cutnahá stná-ndà xì-yá na ní ndùxin-ya. Ñàyùcàndùá, ducán queá na ian nì xihì stná-ndà. Daaní, ñà-nì natiacu-yà nì quida poder ndiaha xí Yuamàni-yá, divi ducán stná ndohó, sàni nihì stná-ndà iin vida saa nùu-yá.

⁵ Cunaha-nsiá, nú (ducán quida-nda cuenta) na ian iin-ni nì xihì stná-ndà xì mii-yá, dandu seguru icúmí sàà stná-ndà natiacu-ndà nahi mii-yá.

⁶ Te inahá stná-ndà, nú nihnú ini-ndà nì xihì-ndà xì-yá nchìca cruz, dandu sàni cuxio stná sàxínitnùnì nì sa-icumi-nda antes. Ducan quida-nda sàhà-ñá màsà níhì gá cuàchi-nda cundeá nùu-ndà, ni màsà dándácú gá stná-mà nùu-ndà.

⁷ Vàchi nú na ian sàni xihì-ndà nduá, dandu mà cúí dandacú gá cuàchi-nda nùu-ndà ñà-quida-ndañá.

⁸ Ñàyùcàndùá, nú (quida-nda cuenta) sàni xihì stná-ndà xì mii-yá, dandu xiníndisá stná-ndà icúmí-ndá cutiacu-ndà cundoo-nda xi-yá.

⁹ Inahá-ndá nì xihì-yà, doco vichi sàni natiacu-yà. Te mà nunca sàà gá-yà cui-yà. Còó gá nansa cui-yà.

¹⁰ Te na ní xihì-yà, iin xichi-ni nì xihì-yà sàhà cuàchi-nda. Doco vichi ñà-sàni natiacu-yà nduá, te itiacú (ndiaha-yá), iá-yà nùu Yua-nda Dios nicanicuahàn.

¹¹ Te ducán stná ndohó, xiñuhu cunihnu ini-ndà na ian sàni xihì stná-ndà sàhà-ñá màsà quidá gá-ndà cuàchi. Te ni cúnihnú stná ini-ndà itiacú ndisa-nda nùu Dios quidá Stoho-ndà Jesucristu.

¹² Ñàyùcàndùá, mientras itiacú-ndà xì iquicúñú-ndà ñuhiví yohó, màsà cuáha-nda cundee cuàchi-nda nùu-ndà ñà-quida-nda ndéni cuàchi quini nì cui.

¹³ Màsà cuáha-nda quida-nda ni-iin cuàchi, ni ndahà-ndà, ni sàhà-ndà, ni-iin xaan xi-nda. Còó, vàchi có-queé víamà. Xiñuhu quida-nda cuenta na ian sàni natiacu-ndà, te vichi ni dáyâha-nda mii-nda ndahà Dios. Cuisì mii-ní-yá ni cuáha-nda cuichuun-xi-nda, dandu cuisì ñà-vàha cunduu ñà-quida-nda.

¹⁴ Vàchi mà dándácú gá cuàchi-nda nùu-ndà, vàchi màdì ley sànahà nduá nchícùn-ndà vichi, cuisì gracia xi-ya nduá nihnú ini-ndà.

In ejemplu nacání nansa nìsa ìa xi-nda na táñâha ga cunucuachi-nda nùu Dios

¹⁵ Doco nú cuisì gracia xi-ya nduá nihnú ini-ndà, ¿a libre iá-ndà quida ndevàha-nda cuàchi sàhà-ñá còó gá ley sànahà ma nùu-ndà? Còó, mà nunca.

¹⁶ Vàchi sà-ínahá-nsiâ nansa iá na sàà-ndà ndahà iin lamú, pues divi peón xi temà icúmí-ndá cunduu-nda, te cunucuachi-nda nùu-té. Te ducán iá stná xì anima-ndà, vàchi nú ni quida-nda cuàchi, dandu ndahà ñà-jaàn iá-ndà, te ducán icúmí-ndá sàà-ndà cui-ndà. Doco nú Dios xinúcuáchí-ndá nùu-xí, dandu sàà-ndà cunihnu ndàcuisì ini-ndà.

¹⁷ Antes lamú xi-nsia nì sanduu cuàchi-nsia, doco ansivéhé Dios, xì nsidaa voluntad xi-nsia nì xiníndisá-nsiá dàñuhù nì sàcùnaha-nsiá.

¹⁸ Te vichi sàni quee-nsia libre nùu cuàchi-nsia; cuisì ñà-ìá vii xinúcuáchí-nsiâ nùu-xí.

¹⁹ Pues ejemplu mà nacání xì-nsiá sàhà (peón quidáchúñ) ñuhiví yohó, vàchi cuàhà xichi ùhì cundaà ini-ndà. Ñàyùcàndùá, dohó cachí xì-nsiá: nacua nìsa cudì guá inì-nsia cunchicùn-nsiá ñà-ìá sìquini, te yáha ga nìsa quida ndevàha-nsia, pues vichi xiñuhu cudì

stná inì-nsia cunchicùn-nsià cuisì chuun iá viì, dandu nìhì-nsiá cunduu-nsia nèhivì ìì xí-yá.

²⁰ Vàchi cunaha-nsiá, na nisa ndoo-nsia nùù ndahà cuàchi-nsia, cóni sá-íníní-nsiá ley xi ichì víi.

²¹ Doco còò ni-ĩnàha ni níhì-nsiá nùù inga ichì mà, vachi cuisì-ní ñà-dandáñúhú-xí-ndá nduámà. Te dècuèndè vichi nducáhán vá-nsiá sàhà ñà-nduá nisa quida-nsia antes mà.

²² Ndahà cuàchi-nsia nì sandoo-nsia, doco vichi sàni cuxio-nsia nùájàn, te xinúcuáchí-nsiá nùù Dios; sàni dàhí stná-yà sàxìnítùnì-nsiá, te fin xi-nsia cunduu ñà-cutiacu-nsiá nicanicuahàn.

²³ Vachi nú cuàchi-nda nduá xinúcuáchí-ndá nùù-xí, dandu cuisì ñà-ndañuhu-nda cundua nìhì-nda. Doco ñà-nduá cutáhvi uun-nda nùù Dios nduú ñà-cutiacu ndiaha-nda nicanicuahàn quida Stoho-ndà Jesucristu.

7

Inga ejemplu ñà-cundaà ini-ndà nansa nisa ìa xi-nda na táñàha ga cunucuachi-nda nùù Dios

¹ Ñàni, dava-nsia sà-ínáhá-nsiá nansa cachí ley xi Dios. Pues nú ducán, dandu mà úhì cundaà stná ini-nsiá palabra cuàhìn cachì yohó. Sà-ínáhá-nsiá (ñà-cuisì-ní) dècuèndè quivì cui-ndà dandacú ley mà nùù-ndà.

² Vachi nú sàni nandàhà iin nècuàchì ñahà, dandu iin-ni icúmí-né coo-ne xì ìi-né mientras itiácù-va nècuàchimà, cachí ley mà; doco nú sàni xihì nècuàchimà, dandu mà cúndiáá gà ley xi-ne.

³ Doco mientras itiácù-va-ne, còò permisù coo nècuàchì ñahà mà xì inga tiàa, vachi nú ducán, dandu cuàchi nduá. Doco nú sàni xihì ìi-némà, dandu libre iá-nè nandàhà-né xì inga nècuàchì tiàa, te mà cúnduá cuàchi, cachí ley mà.

⁴ (Pues ejemplu nduú stná nsidaájàn), ñàni, vachi sàhà ñà-quidà-ndà cuenta nì xihì stná-ndà xì Cristu, ñàyùcànduá, (ínáhá-ndá) có-dàndacú gà ley sànahà ma nùù-ndà. Libre iá-ndà vichi, vètùnì cundoo-nda xi inga stoho-ndà, divi Stoho-ndà Señor nì natiacu, te ducán chindee-yándò quida-nda cuàhà ñà-vàha, te cudìi ini-yà.

⁵ Antes puru ñà-cùdìi ini mii-nda nisa xihò-ndà quida-nda; doco na ní cundaà stná ini-ndà nansa cachí ley (xi Dios ñà-màsà quidá-ndá ducán), dandu chicá más nì cuni-ndà quida ndevàha-nda cuàchi, te sàhájàn cuàhàn-ndà cui-ndà nì cùí, (te ndañuhu-nda).

⁶ Doco vichi sàni cuxio-nda nùù ley sànahà ma, vachi quida-nda cuenta na ian sàni xihì-ndà, te có-dàndacú gà ley mà nùù-ndà, vètùnì cunucuachi-nda (nùù Dios) vichi, vètùnì cunihnu ini-ndà iin-ni ichì sàà ndé (cahvi-nda mii-yá) ini anima-ndà, màdìá cunchicùn cuisì gà-ndà nacua cachí tutu (nduú ley sànahà ma).

Nansa iá cuàchi ñuhú ini anima-ndà, te quidá quinia xì-ndà

⁷ Pues, nú ducán nduá, dandu ¿a cuàchi nduú ñà-càchì ley mà? Còò, màsà nunca cachì-ndà ducán. Vachi còò nansa cundaà ini-ndà índu ìnàha có-ìá viì nú màsà càchítñuhu ley mà. Por ejemplu, nú màsà càchì ley mà ñà-mà váha xihò-ndà (ñà-icúmì ñanìtnaha-nda), dandu yùhù mà cúndàà inì (cuàchi nduá) ñà-xihò-ndà nì cùí.

⁸ Doco na ní inini nansa cachí ley mà, dandu cuàchi (iá ini anímè), más gà nì dàxíhoá yùhù, te sàhà ley mà vihi gà nì cucuahà deseù xi ñà-xíhoé. Vachi nú có-cùndàà ini-ndà sàhà ley mà, dandu (chicá dadí iá) cuàchi-nda na ian sàni xihà.

⁹ Antes nì ìa iin tiempu nisa cudìi gà inì ié ñuhivì, te còò ni-ĩnàha ni sándúú ley mà nùí. Doco nì sàà iin quivì nì cundaà inì sàhà-ñá, dandu na ian nì natiacu cuàchi iá ini anímè. Te (nì cuhuun inì) na ian nì xihì.

¹⁰ Te (nì cundaà inì) sàhà ley mà ñà-mate ní sàcòa sàhà-ñá chindeá-ndó cutiacu ndiaha-nda nì cùí, doco vichi divi sàhájàn cuàhìn ndañuhí nì cùí.

11 Vàchi cuàchi (iá ini anímè), sàhà-ñá ináhî nansa cachí ley mà, ñàyùcàndùá nì dándàhvíà yùhù, te (nì cundeá nùí), na ian nì sahníà yùhù.

12 Ñàyùcàndùá, (ináhá-ndá), ì ndisa ley xi-ya, te ì ndisa stná ñà-ndùá dandacuá, vàchi ndiaha gá cachá; vaha ndisa-ña.

13 Pues nú ducán nduá, dandu ¿a tuxí ini-ndà ñà-sàhà ley vaha ma (nì cuchicuehe) anímè, na ian nì xihà? Còó, màsà cáchí-ndà ducán. Divi cuàchi nduá nì quida quini xi anímè, (màdi ley mà). Te ducán nì cuu sàhà-ñá cunahà claru divi cuàchi nduá quidá quini, vàchi mate ley vaha ndisa nduú ley xi-ya, doco sàhà divi ley mà nì ndudana cuàchi (ini anímè), te vihi gá nì nàcùnihu quini inì. Ñàyùcàndùá, sàhà ñà-nì ndudana cuàchi ducán sàhà iin ley vaha, chicá sàni nàcùnahà claru ñà-yáha ga quini iá ñà-quida-nda cuàchi.

14 Ináhá-ndá, ndudu ì nì cachi Espíritu ì xí Dios nduú ley xi-ya; doco yùhù, còó; ducaní nduí iin tiàa chicuéhè, màdi libre ié quide ñà-íá viì, cutu cuáchi nduá quidé.

15 Vàchi nì có-cùndàà vaha inì nansa iá ñà-ndùá quidé, vàchi ñà-cudî inì sàhà-xí, có-quidéà. Te ñà-có-cuní quide, ñà-yùcán nduá quidé.

16 Te nú ducán nduá quidé, dandu nàhà xicà, ley vaha ndisa nduú ley mà.

17 Ñàyùcàndùá, màdi ndisa yùhù quidà xì cuàchi ma, còó. Ñà-nduú ñà-chìcuéhè ñuhù ini anímè, divi nduá quidà xì ñà-jaàn.

18 Yùhù ináhî, inii mií nacua nduí nèhivì, còó ni-iin ñà-vaha. Mate cudî inì quide ñà-íá viì, doco có-nàníhì nansa quida ndiseà.

19 Vàchi chuun viì cuní quide, có-quidéà; te chuun quini có-cuní quide, ñà-yùcán nduá quidé.

20 Ñàyùcàndùá, nú có-cuní quidé ñà-ndùá quide, dandu màdi yùhù ndisa nduú ana quidà xì (ñà-có-ndiàámà). Divi cuàchi iá ini anímè quidà xán.

21 Ñàyùcàndùá, sàni cundaà inì, ducán iá xì; na quivì cuní quide iin chuun viì, dandu sadí ñà-chìcuéhè iá ini anímè nùí.

22 Ñà-ndàà nduá, ini anímè cudî inì sàhà ley xi Dios.

23 Doco ñà-íá stná inga ley (chicuéhè) ini ndahàsáhì, ñà-yùcán nduá sadí xì nùù ñà-vaha nacání inì quide, te cundéàmà nùí ñà-quide cuàchi cuní cuerpu xi quide.

24 ¡Ndahví ndise! ¿Ana dacácu xí nùù iquicúñú malu icúmî? Vàchi sàhà ñà-yòhó cuàhàn ndañuhu dahuin nì cùí.

25 Doco ¡ansivéhé Dios, vàchi sàhà Stoho-ndà Jesucristu (vátùni càcui)! Ñàyùcàndùá, ini anímè xinúcuáchì nùù mii-yá nacua cachí ley xi-ya, doco iquicúñù, còó, cutu ñà-nduú cuàchi (cuníà) quide.

8

Nansa cutiacu-ndà vida ndiaha quida Espíritu ì xí Dios

1 Vichi sàhà nsidaa ñà-jaàn, mà cóó gá ni-iin castigu xi-nda nú nduú ndisa-nda nèhivì xí Jesucristu. Te có-ndùlócò gà-ndà sàhà ñà-ndùá xího-nda, cuisì-nì nihnú ini-ndà sàhà ñà-ndùá cachí Espíritu ì xí Dios.

2 Vàchi ñà-íá-ndà ndahà Yà-ì mà, ñàyùcàndùá sàhà Jesucristu níhítàhvì-ndà vida ndiaha. Te ducán sàni quee dahuin stná-ndà libre nùù ndahà cuàchi-nda; mà cúí gá cahniándô.

3 Doco ley sàhana ma, mànicúí (chindeándô), vàchi mà sàà nèhivì chivàha viì-néà, ñàyùcàndùá, mii Dios (nì chindee-yándô), nì dàquixí-yá Dèhemanì-yá, nì nanduu-ya iin tiàa nahi nsidaa ndohó nèhivì cuáchi, (dandu nì dānāà-yá) sàhà cuàchi-nda sàhà-ñá màsà dándácù gá mà nùù-ndà ñuhivì yohó.

4 Ducán, dandu vátùni quida ndisa-nda nsidaa ñà-vàha cachí ley xi-ya, vèchi có-ndùlócò gà-ndà sàhà ñà-sìquini xího nèhivì ñuhiví, cuisì-ní ñà-nduá cachí Espíritu Ìì xí Dios nduá nihnú ini-ndà.

5 Vèchi nèhivì tùha cunchicùn ñà-nduá cudî ini mii-né, cuisì-ní ñà-jaàn nduá nihnú ini sàxínitnùnì-nè. Doco nèhivì nchícùn xì ñà-cudî ini Espíritu Ìì xí Dios, cuisì-ní chuun xi Yà-ì mà nduá nihnú ini-nè.

6 Vèchi nú cuisì-ní ñà-xího-nda nduá nihnú ini-ndà, dandu icúmí-ndá sàà-ndà cui dahuun-nda. Doco nú ndudu ìì xí Espíritu xí Dios nduá nihnú ini-ndà, dandu cutiacu ndiaha ndisa-nda, te contentu cundoo-nda quida-ya.

7 Cunaha-nsiá, nú cuisì ñà-cudî ini mii-ni-nda nduá nihnú ini-ndà, dandu na ian xiní ùhì-ndà Dios nduá, vèchi nú ducán, dandu có-ìá gà-ndà sujetu nùù ley xi-ya, te ni mà cúí cunchicùn viì-ndà ley mà.

8 Ñàyùcànduá, nèhivì nihnú inì-xi cuisì ñà-nduú gustu xi mii-né, mà cúí natùì-ne nùù Dios.

9 Doco mii-nsiá, có-nìhnú gà inì-nsia ñà-nduú gustu xi mii-nsiá, nú ndisa inácáá Espíritu Ìì xí Dios anima-nsià; cóò. Ñà-nduá cachí Espíritu Ìì nduá nihnú ini-nsià. Doco cunaha-nsiá, nú iá iin nèhivì cóò Espíritu Ìì xí Cristu anima-xi, có-nduú ndisa-ne iin nèhivì xí mii-yá.

10 Doco nú iá Cristu ini anima-ndà, dandu ñà-sàni ndee vaha-nda nùù-yá nduá, te ducán itiácú ndisa anima-ndà nùù-yá, mate quida-nda cuenta na ian sàni xihì iquicúnú-ndà sàhà cuàchi nì quida-nda.

11 Cunaha-nsiá, Yua-nda Dios nduú ana nì dånátíácú xì Jesucristu, te ñà-ìá Espíritu Ìì xí-yá ini-ndà, ñàyùcànduá mate ni cuí-ndà, doco icúmí stná-ndà natiacu-ndà quida-ya, vèchi inácáá Yà-ì mà ini-ndà.

12 Ñà-jaàn nduá dísàhà-xí có-xiñùhù quida gà-ndà nansa ni nì cui nacua cudî ini mii-nda quida-nda. Còó, ñáni. Màsà cundóó-ndá quida-nda ducán.

13 Vèchi nú ni quida-nda cuisì ñà-nduá cudî ini mii-nda, dandu icúmí-ndá ndañuhu-nda. Ñàyùcànduá, ni cuàha-nda chindee Espíritu Ìì ndohó, dandu nìhì-ndà dandáñúhú dahuun-nda chuun (sìquini) cuní-ndà quida-nda, te nú ni nìhì-ndà ducán, dandu vida ndiaha nìhítàhvì-ndà.

14 Vèchi nsidaa ana nihnú ini xì Espíritu Ìì xí Dios ñà-dacúndéhe-yánè ichì cunchicùn-nè, divi xínduu dèhe ndisa-ya.

15 Nùù mii-yá sàni nìhì-ndà Espíritu Ìì xí-yá, doco Yà-ì mà, có-nduú-yá iin ana dandacú ndéé nùù-ndà, te ò dayúhì xì-ndà. Còó, siempre chindéé-yândô ñà-cunihnu ini-ndà nduú ndisa-nda dèhe Dios, te ducán cui cachi-ndà xì-yá: “¡Yuamánì!” vèchi yua-nda nduú-yá.

16 Te divi ducán cachí stná Yà-ì mà xì-ndà ini anima-ndà, ñà-nduú ndisa-nda dèhe-ya; te stná anima-ndà, ducán cachí stná xì-ndà.

17 Te nú dèhe-ya xínduu-nda, dandu icúmí stná-ndà ndutahvì-ndà ñà-cuicà-yá nùù-yá, vèchi icúmí-ndá cutnaha-nda xi Cristu nìhítàhvì stná-ndà nahi mii-yá, nú ni ndohó stná-ndà sàhà-yá. Vèchi nú ni ndoho-nda sàhà-yá, dandu icúmí stná-ndà sàà-ndà cundoo ndiaha-nda nùù-yá.

18 Vèchi iyuhu nduá icúmí-ndá ndoho-nda tiempu vichi, cachí yùhù, daaní, después, yáha ga chicá ndiaha cunduu ñà-nduá nìhítàhvì-ndà.

19 Te nsidanicuú ñà-nduá nì quidavàha Dios, ducán iá na ian ndiatú stná, vèchi cuàhà gá cuníà sàà tiempu cunahà claru ana xínduu ndisa dèhe-ya.

20 Vèchi nsidaa ñà-nduá nì quidavàha-ya ñuhiví yohó, nì sàà nì cuchicueha. Doco màdì sàhà ñà-cuní miá nì cùú ducán, cóò; sàhà-ñà ducán nì chitnùnì ini mii-yá. Te vichi (sàni sàha-yàndó iin) tnùndé ini,

²¹ divi ñà-quee libre stná ñuhíví yohó, mà cúndúú gá` iin lugar nì cuchicuehe; vâchi icúmí cununa ndisa ñuhíví, dandu cundoo ndiaha nsidaa ana nduú dèhe-ya.

²² Te ináhá-ndá, ndè vichi ndohó ñuhíví yohó na ian ndohá sàhà ñà-vâxi inga ñuhíví saa.

²³ Te màdì cuísi ñuhíví nduá quidá ducán; còó, ndè mii stná-ndà, na ian nsíhi ini-ndà ndiatu-nda cuu ducán. Doco vichi iá iin ñà-ndiaha sàni ñihítáhvi-ndà, divi ñà-cucumi-nda Espíritu Ìì xí-yá, vâchi divi-ya nduú tnùmanì primeru xi-nda nùù-yá. Ñàyùcàndùá ndiatú cuísi-nda ndè cachi sàà tiempu cachi vate-yá xì nsidaa nèhivì ñà-divi dèhe-ya xínduu-nda, dandu quee ndisa-nda libre, (mà quidá gá-ndà cuàchi).

²⁴⁻²⁵ Vâchi na ní càcu anima-ndà, divi tnùndé ini jaàn nduá nì ñihì-ndà. Ñàyùcàndùá, cuéyàà-nì nì cúndiátú-ndá dècuèndè cachi cuni-ndàñá, vâchi nú tnùndé ini ndisa nduá, dandu ñà-tàñáha ga ñihì-ndà nduá, vâchi nú sàni ñihì-ndà iñàha, dandu mà cáchí gá-ndà xán nduá tnùndé ini.

²⁶ (Ináhá-ndá), mà fuerte anima-ndà, doco Espíritu Ìì xí Dios, chindéé-yâ ndohó, vâchi có-cúndáà ini-ndà nansa càcàn tàhvi-ndà nùù Yuandiaha-nda modo ndiá icà-ndà, doco Yà-ì mà, càhàn nihni-ya sàhà-ndà nùù Yua-nda Dios, mate ndohó, cuísi-nì sácàn ini-ndà quidá-yá, te nì có-sàà-ndà cachi claru-ndà ni-iin palabra.

²⁷ Doco mii-yá, indèhe váha-ya nansa iá anima iin iin nèhivì, te ináhá stná-yà nansa nihnú ini Espíritu Ìì xí-yá, vâchi Yà-ì mà, cuísi ñà-nduá cuní Yuandiaha-nda nduá xícàn tàhvi-yá sàhà-ndà.

Na xínu tiempu icúmí-ndá cundee-nda nùù nsidaa tnùndoho

²⁸ Ináhá stná-ndá ñà-yòhó: nsidanicuú iñàha cuú xi-nda, ñà-chindee xi-nda sàhà ñà-vàha xi-nda nduá, nú cuú ini-ndà sàhà Dios, te nduu-nda ana nì chitnùnì ini-yà cana-ya ladu xi-ya.

²⁹ Vâchi nsidaa nèhivì sà-ìnhá-yâ dècuèndè antes, divi nì chitnùnì ini-yà sàà-nè cunduu-ne nahi Dèhemani-yá (Jesús), te ducán cundoo cuàhà gá dèhe-ya, te Jesús cunduu dèhe-ya primeru.

³⁰ Daaní, nsidaa ana nì chitnùnì ini-yà cunduu nèhivì xí-yá ducán, divi nduú ana nì cana-ya. Te nèhivì nì cana-ya, divi nì ñihì stná nì ndee vâha nùù-yá. Te nsidaa ana nì ndee vâha nùù-yá ducán, divi nì ñihítáhvi stná tnùñuhu ndiaha xí-yá.

³¹ Pues nú ducán nduá, dandu ¿nansa cachi-ndà vichi? (Dohó cachi-ndà): nú Dios iá sàhà-nda, dandu còò ni-iñàha cundee nùù-ndà.

³² Vâchi cunaha-nsiá, nì Dèhemani-yá cónì cùhí ini-yà; nì sàhatahvi-yándô nì xihì-yàmà sàhà nsidaa-nda. Ñàyùcàndùá seguru icúmí-yâ cuàha stná-yándó nsidaa ñà-nduá xiñuhu gá-ndà.

³³ Te vichi, ¿a iá ana cui dacuidá cuàchi dìquì-ndà nú sàni nacàxin-yándó? (Còó, mà cúí), vâchi sàndèníhí vâha-yándó.

³⁴ Te ¿a iá stná ana cui dacúnsidá cuàchi xi-nda? Còó, vâchi divi Cristu nì xihì cuenta xi-nda, te nì natiacu-yà, dandu nì sàcòo-ya ladu cuàhá Yuamáni-yá Dios, te ndè càhàn nihni stná-yà sàhà-ndà.

³⁵ Daaní, ¿a iá stná ana cui dacúxíó xí-ndá nùù Cristu ñà-màsà cúú gá ini-yà sàhà-ndà? Còó, mà níhìndè-né ducán, mate cuàhà tnùndoho ni coó, te ò cuàhà vida ni yàha-nda, te ò ni quidá quínì nèhivì xì-ndà. Doco còó, mà níhì-né ducán, mate ni coó tnama, ò ni yàha ndahví-ndà, ò nùù cuàhà peligru iá-ndà, te cuní nèhivì cahni-néndô, doco iin-nì cuú ini Dios sàhà-ndà.

³⁶ Vâchi, ducán cachí stná tutu ìì (ndé càhàn nèhivì xì-yá, cachí-nè): Sàhà ñà-nduú-nsí nèhivì xí mii-ní, ñàyùcàndùá ndui te ñuú nchícùn nèhivì nsiùhù ñà-cahni-né nsiùhù, quidá-né cuenta na ian riì nduú-nsí cundaca-ne nsiùhù cùhùn ndé cui-nsì. Ducán cachá`.

³⁷ Doco cunaha-nsiá, nsidaa tnùndoho ma, sàni cundee dahuun-nda nùá, vàchi cuú ini-yà sàhà-ndà, te chindéé-yândô.

³⁸⁻³⁹ Te yùhù, ináhá vâhi iin-ni icúmí-yâ cuu ini-yà sàhà-ndà mate ni cuní-ndà cuàhà vida, te ò ni sàà-ndà cui-ndà, te ò ndéni iñàha nì cui ni quidá iin ángel, ò iin ana dandacú, ò iin ñà-malu, doco iin-ni icúmí-ndá cundoo-nda nùù-yá; mate ni coó cuàhà tnùndoho quivì vichi, ò tnaa idá, doco cunaha-nsiá, còò ni-iin ana ndoó ansivi, ò andea, ò ndéni nì cui, mà cúí dacúxiòandó nùù ndahà-yá, vàchi cuú ini-yà sàhà-ndà, te sàhà Stoho-ndà Jesucristu (sàni indehè ndàhví-yàndó).

9

Icúmí Dios chindee-yá nêhivì raza Israel

¹ Nêhivì xí Cristu nduí, te ináhá-yâ ñà-ndáà nduá (cuàhìn cachì xì-nsiá); te icúmí cachì ndàì xì-nsiá, vàchi inácaá stná Espíritu Ìi xí Dios inì, ñàyùcànduá, ináhí ini anímè ñà-ndáà nduá cuàhìn cachì yohó.

² Cunaha-nsiá, cuàhà gá tnùnsí ini ié', te nicanicuahàn iá ñà-nduá dandoho-xí,

³ vàchi (nacání inì) sàhà ñanìtnahi, divi nêhivì raza xi. Dispuestu ié' nìhìchìhén, te ndañuhí nùù Cristu nì cùì (sàhà-ñá ni sàà tnahi càcu-ne nùù-yá).

⁴ Vàchi divi descendencia xi xì-nsí Israel nduú stná-nè, te quidá stná-yà cuenta na ian dèhe-ya nduú stná-nè; mahì mii-né nìsa itnuù ndiaha-yá. Dècuèndè nì ndatnuhu sahnú stná-yà xì-né, te nì saquin-yà iin tratu, nì sàha-yanè ley ìi xí-yá. Te nì cachitnùhu stná-yà nansa cunucuachi-né nùù-yá na cahvi-néyà. Te cuàhà gá ñà-ndiaha ìi nì quida-ya comprometer xì-né.

⁵ Te yohòtéhè primeru-nè, divi yohòtéhè xì-nsí, (cuàhà gá fama-nè) nì sàcòò; te iin nêhivì ñuu-nsí nì sanduu stná dihi Cristu. Te Cristu, nicanicuahàn naquimani-ndà mii-yá, vàchi Dios nduú-yá, te dandacú-yá nùù nsidanicuú iñàha, amén.

⁶ Doco nsidaa ñà-nduá nì cachì Dios (sàhà raza-nsì mà), màsà cúníhnú ini-ndà sàni yàha uan. Vàchi màdì nsidaa descendencia xi xì-nsí Israel nduú ndisa nêhivì ìi xí raza mà.

⁷ Mate descendencia xi Abraham nduú-né, doco có-cuní cachàmà ñà-nduú ndisa stná-nè cuenta xi Abraham, vàchi nì cachì Dios xì nècuàchì sahnù-mà ñà-cuisì descendencia xi dèhe-ne Isaac cunduu nècuàchì nìhìtáhvì.

⁸ Te palabra jaàn cuní cachì ñà-còò ni-iin nêhivì cunduu dèhe ndisa Dios sàhà cuisì raza-nè. Còò, dèhe-ya nduú nsidaa ana nì saquin-yà iin compromisu sàhà-xí.

⁹ Vàchi (ducán nduú modó nì quesaa dèhe Abraham); vàchi nì ìa iin palabra nì cachì sahnù-yá xì nècuàchì mà, divi ñà-yòhó: “Iin quivì señaladu icúmí quixi, te daa sá-íá dèhe (ñahàdìhí-nì nani) Sara”.

¹⁰ Doco cunaha-nsiá, màdì cuísi ñà-jaàn nduá iá, vàchi iá stná ñà-nduá nì cuu xi Rebeca, ñahàdìhí xì-nsí Isaac. Na ñuhú dèhe-ne nduú cuatí,

¹¹⁻¹² nì cachì Dios xì-né: “Dèhe-ní cacu primeru icúmí cunucuachi nùù luchì nchícùn gà”. Doco (na ní cachì-yà ducán), tàñáha ga tùinuù mée mà, tàñáha ga quida-tè ni-iñàha, ni-iin ñà-vàha, te ni-iin stná ñà-có-íá vàha. Doco ñà-jaàn nì cachì-yà sàhà-ñá cunahà claru có-nâcâxin-ya ni-iin nêhivì sàhà obra quidá-né, cuisì sàhà-ñá ducán chítnùnì ini-yà quida-ya.

¹³ Te ducán nì cachì stná-yà nùù tutu ìi: “Jacob cuú inì sàhà-xí, doco Esaú, còò, có-xìñùhí-te”, nì cachì-yà.

¹⁴ Doco nú ducán nduá, ¿a ñà-cô-quidá víi Dios nduámà? Còò, ¡màsà nunca cachì-ndà ducán!

¹⁵ Vàchi dohó nì cachì stná-yà xì Moisés: “Cuisì yùhù icúmí cachì ana cundehè ndahví, te ana cuàhìn cuhi inì”.

¹⁶ Nàyùcànduá, màdì ñà-nduá cuní nêhivì quida-ne nduú ñà-cundiaa, ni màdì stná ñà-nduá sàhandee íni-nè quida-ne; còò, cuisì cundiaa ñà-cundehè ndahví-yànè.

17 Vàchi nùù tutu ìì itándiaa palabra yohó nì cachi Dios xì rey ñuu Egipto nani Faraón: “Yùhù, sàni chitnùnì inì cunduu-ní iin rey, doco ¿índù chuun? Cuisì sàhà-ñã cundeí nùù-ní xì poder cahnú xí, dandu cundaà ini nèhivì inicutu ñuhivì sàhí, nansa iá poder xì”, nì cachi-yà.

18 Ñàyùcàndüá, nú ducán cuní-yà, vátùni cundehè ndahví-yà iin nèhivì, te inga-nè nsidacaxin-yá anima-xi.

19 Doco (sàhà ñà-jaàn) vihini cachi stná iin nèhivì: “Nú ducán quidá Yua-nda Dios, dandu có-ndiá ìcà-yá cutnii-ya cuenta sàhà cuàchi-nda, vàchi mii-yá nduú-yá mii-yá, te ¿ndiá quida ndohó?”

20 Doco còò, màsà cachi-ndà ducán, vàchi có-ndùdává-ndá xí mii-yá, te ¿índù chuun cachi-ndà ducán xi-yá? Vàchi ni cachi-ndà iá iin quidi nì quidavàha iin nèhivì. ¿A vátùni nú ni cachá xì-né: “¿Índù chuun dohó nì quidavàha-ní yùhù?” Còò,

21 vàchi icúmí tiàa ma derechu quidavàha-neà nansa ni cúdù ini-nè. Vátùni tnii-ne chii barru, te tavà-né iin quidi finu, dandu quihin stná-nè inga iyuhá, te quidayucun stná-nè inga quidi chicá corriente.

22 Pues ducán stná xì mii-yá, mate cuní-yà dacuní-yà nèhivì (xicá ichì malu) ñà-fuerte guá castigu xi-ya, te ñà-càhnù-guá poder xi-ya, doco caní tiempu nì quidandee ini-yà sàhà-né mate ndiá ìcà-né nihì-né castigu, te xínduu-ne cuisì ana icúmí ndañuhu yàchì quida-ya, (nahi quidi corriente mà).

23 Doco ndohó, còò, (tucu iá), vàchi na iin quidi finu nduu-nda nùù-yá, te cuní-yà cundaà stná ini nèhivì ñà-ndiaha guá quidá-yá xì ana indéhe ndahví-yà. Te divi nècuàchì cundiátù mà nduú ndohó nècuàchì nì chitnùnì ini-yà nihitáhvi xì tnùñuhu ndiaha xi-yá.

24 Ñàyùcàndüá, nì cana-ya nsidanicuú ndohó, màdì cuisi nèhivì raza Judea.

25 Vàchi dohó cachi stná tutu nì tiaa Oseas sàhana ndé cachi Dios palabra yohó: Nèhivì yucán, mate sàni cachi xì-né có-nduú-né nèhivì xí, doco después icúmí cachi xì-né ñà-nduú-né nèhivì xí. Cóni sácúu inì sàhà-né antes, doco icúmí sà cachi ñà-mànì gá-nè nùì.

26 Vàchi nèhivì ñuu ndé nì cachi ñà-có-nduú-né nèhivì xí, pues divi-ne cunduu-ne dèhe ndisa yùhù ana nduú Dios vivu.

27 Doco nècuàchì Israel, dohó nì tiaa Isaías sàhà-né: “Mate cuáhà gá nècuàchì Israel ndoó nahi ñusi cuàti ndoó yuhù mar, doco sacu-nè icúmí càcu,

28 vàchi ñà-ndüá sàni cachi Stoho-ndà Señor quida-ya ñuhivì yohó, yàchì icúmí-yà daxínu dahuun-yañà”.

29 Daaní, ñà-yòhó nì cachi stná Isaías mà:

Ansivéhé Stoho-ndà Señor, vàchi dandacú-yá nùù nsidanicuú iñàha; te nú mà dácâcu-ya iin ù-ndà nì cùí, dandu (nsihi dahuun-nda) na ian nì cuu xi nèhivì ñuu Sodoma xì nèhivì ñuu Gomorra.

30 Nú ducán nduá, dandu ¿nansa cachi-ndà sàhà nècuàchì có-nduú raza Israel? (Pues dohó cachi-ndà): mate cóni sánándúcú-nè nansa cui ndee vaha-ne nùù-yá, doco vichì vátùni nihitáhvi-né ducán nú ni cúníndisâ-néyà.

31 Doco nècuàchì Israel, mate nchícùn-nè iin ley tuxí ini-nè ñà-ndee vaha-ne nùù-yá, doco còò, cóni nihì-né natùì-ne nùù-yá ducán.

32 Te ¿índù chuun? Pues divi sàhà-ñã cuní-nè nihitáhvi-né sàhà cuisì obra quidá-né, te màdì sàhà ñà-nihnú ini-nèyà. Vàchi (na ní cuduchi ini-nè sàhà Jesús), dandu nì cuu xi-né na iin nèhivì nì saquìhi sàhà-xí iin yùù, te nì sàcasàn-né.

33 Vàchi divi ducán nì cachi Dios nùù tutu ìì, (ndé cachi-yà):

Cuàhìn techuín iin ana sàa ñuu Sión, (divi nduú Jerusalén), te cunduu-ya na iin yùù cahnú caquìhi sàhà nèhivì, te ndua-nè, vàchi nèhivì ñuu mà, icúmí-nè cuduchi ini-nè sàhà-yá. Doco nèhivì cunindisa-xi-yá, mà sàa-nè naxicocuìn ini-nè.

10

Ndéni nêhivì ní cui, nú ni cúníndísâ-né Jesús, vátùni càcu-ne

¹ Ñàni, xì nsidaa anímè cunî càcu nêhivì raza xi Israel nùu Dios, te ñà-jaàn nduá siempre xícàn tàhví nùu-yá.

² Pues ñà-ndáa nduá, sáhandee ini-nè cahvi-néyà, doco tà cúndáa vaha ini-nè nansa ndiá ìcà-né quida-ne.

³ Cuní-nè ndee vaha-ne nùu-yá, doco sàni nacuaà-né modo nì cachi-yà quida-ne ducán, te modo xi mii-né cuní-nè quida-neàmà. Ñàyùcàndüá, ducán queá na ian sàni cahíchì ini-nè ichì mii-yá.

⁴ Vàchi cunaha-nsiá, nú ichì Cristu xiníndísá-ndá, te ducán sàni ndee vaha-nda nùu-yá, dandu còò cá necesidad cunchicùn gà-ndà ley sànahà.

⁵ Daaní, Moisés, nì tiaa stná-nè iin palabra sàhà nêhivì nchícùn ley mà, te sàhámà cuní-nè ndee vaha-ne nùu-yá nì cui. Dohó nì cachi Moisés: “(Cuisi) nú quida ndisa-nda cumplir nsidaa ñà-ndüá cachí ley mà, dandu ñhì-ndà cutiacu ndiaha-nda”.

⁶ Doco nú sàhà fe xi-nda cuní-ndà ndee vaha-nda nùu-yá, (dandu ni cúníní-nda palabra yohó) cachí stná ley mà: “Màsà cútúxí ini-ndà mii-nda icúmí-ndá nana-nda ndè gloria —na ian cuàhàn-ndà cundaca-nda Cristu nuu ndè ñuhiví yohó— còò;

⁷ ni màsà cútúxí stná ini-ndà ñà-icúmí-ndá nuu cunú-ndà ndè tìxi ñuhiví”, na ian cuàhàn-ndà danátíacú-ndà Cristu, te cundaca-ndayá naxinu yohó. Còò.

⁸ Pues ¿nansa ndisa cachí palabra mà (quida-nda)? Divi dohó cachá: “Yatni uun iá palabra xi-ya, mà úhì càhàn-ñià, mà úhì cunihnu vaha inì-ñià ini anima-ñí”. Te divi palabra mà nduá cachítñuhu-nsi xì nêhivì na cachí-nsi xì-né xiñuhu cunindisá-né mii-yá.

⁹ Vàchi nú cachí vate-nda ñà-mii Jesús nduú Stoho-ndà Señor, te ini anima-ndà xiníndísá-ndá ñà-nì natiacu-yà nì quida Dios, dandísá, càcu anima-nda nùu-yá.

¹⁰ Vàchi ini anima-nda nduú lugar ndé xiníndísá-ndáyâ, te ndee vaha-nda nùu-yá; te xì yuhù-ndà cachí vate-nda (ñà-nchícùn-ndà mii-yá), dandu xì ñà-jaàn ñhì-ndà salvación xi-nda. Palabra yohó nduá cachítñuhu-nsi xì nêhivì.

¹¹ Vàchi dohó cachí tutu ì: “Ni-iin nêhivì, mà sàà-nè naxicocuñ inì-nè ñà-nì xinindisá-né mii-yá”.

¹² Vàchi iin-ni ndiaá nsidaa-nda nùu-yá, nahi nêcuàchì raza Judea, te ducán stná nêhivì inga ñuu. Vàchi imindaa Stoho-ndà Señor iá-yà nùu nsidaa-nda, te ndiaha gà sàhatahvì-yándô gracia xi-ya na ndácùcahan-ndayá.

¹³ Vàchi nsidaa ana ndacùcahan xi quivì-yá, icúmí-nê càcu-ne.

¹⁴ Doco (nàhà xicà), nú tàñáha ga cunindisá nêhivì-yá, mà ndácùcahan-néyà. Te-ni còò stná nansa cunindisá-néyà nú tàñáha ga cunitñuhu-ne sàhà-yá. Te-ni còò stná nansa cunitñuhu-ne sàhà-yá nú còò ana cachitñuhu xi-né.

¹⁵ Te ni mà cacánúú stná ana cachítñuhu sàhà-yá nú còò ana techuun-xi-né. Ñàyùcàndüá, dohó cachí stná tutu ì: “Na ndiaha mánì iá nú sàni quesaa ana cachitñuhu xi-nda razón ndiaha xí mii-yá”.

¹⁶ Doco màdì nsidaa nêhivì raza Israel nì càhvì xì razón ndiaha ma. Vàchi (dohó) nì cachi stná Isaías (xì Dios): “Sacu nêhivì nì xinindisa-xi ñà-ndüá nì cachi-nsi xì-né (sàhà mii-ñí), Stoho-nsi Señor”.

¹⁷ Ñàyùcàndüá, sàni cundaà ini-ndà, dihna icúmí-ndá cunini-nda (palabra), dandu ñhì-ndà cunindisa-nda. Te ñà-ndüá cunini-nda, divi razón xi Cristu nduá.

¹⁸ Doco amádi sàni inini nêhivì raza Israel. Jaan. Ñà-ndáa nduá sàni inini-ne palabra mà, vachi (cachí tutu ì):

Inicutu sàni tiacutñuhu-ne palabra (sàhà-yá). Dècuèndè ndè chicá xica sàni xinitñuhu-ne.

¹⁹ Doco ¿a sàhà ñà-cónì cúndáa ini nêhivì Israel, ñàyùcàndüá (cónì xiníndísâ-né)? (Pues cunini-nsia palabra) nì tiaa Moisés, (ndé càhàn Dios xì nêhivì Israel, cachí-yà):

Mii-nsiá, có-nàcúni-nsià nêhivì inga ñuu ñà-ndùú-né ñuu ndisa, doco (ñà-cuàhà guá gracia) cuàhìn quide sàhà-né, icúmí-nsiá cumbìdia inì-nsia sàhà-né. Te mate ni có-sàà nêhivì ñuu mà cundaà vaha ini-nè vichi, (doco icúmí chindeí-nè), dandu cuidà ini mii-nsiá sàhà-né, nì cachi Dios.

²⁰ Daaní, después nì tiaa stná Isaiás inga palabra xi-ya. Ndee ní càhàn-yà, te dohó nì cachi-yà:

Nêhivì cóni nándúcú xî antes, sàni nìhitàhvi-né cahvi víi-né yùhù vichi. Mate antes cóni sándúlócô-nè sàhí, doco vichi sàni dàtnùì sàxìnítùnì-nè.

²¹ Doco sàhà nècuàchì raza Israel, dohó cachí-yà: “(¡Ndahví-nè!) vachi ndui te ñuú iin càhìn xì-né, te caná stnài-nè, doco có-ínìní-né, cutu càhàn-nè dìquì palabra xi”.

11

¹ Pues nú ducán nduá, dandu ¿nansa cachí-ndà? ¿A ñá-sàni nacoo nihni Dios nêhivì xí-yá (Israel) nduá vichi? Còó, màsà càchí-ndà ducán. Vachi cunaha-nsiá, yùhù nduú stnài iin nêhivì Israel. Yohòtéhè stnài nduú Abraham, te descendencia xi xii-nsí Benjamín nduú stnài.

² Vachi nêhivì raza-nsì Israel, dècuèndè chicá sànaha sàni cachi Dios ñà-nêhivì xí mii-yá nduú-né. Ñàyùcànduá, màdi-ñá sàni nacoo nihni-ya nêhivì xí-yá nduá.

Mà nunca sàà ndañuhu nêhivì raza Israel

Amádi sà-ínáhá-nsiá nansa cachí tutu ì ndé càhàn Elías, xicàn tàhvi-né nùù Dios, nacání-né xí-yá ñà-cuàhà guá cuàchi nêhivì Israel iá. Pues divi palabra yohó nì cachi-nè xí-yá:

³ “Nsiùhù nècuàchì càhàn cuenta xi-ní, sà-cuàhà-nsí sàni sahnì nêhivì, te sàni dándùtù stná-nè nsidaa lugar ndé cahvi-nsí mii-ní, Stoho-nsì Señor: làcà mindaí ndói, te nchícùn stná-nè ñà-cahni-né yùhù”.

⁴ Doco ¿ndiá nduá nì cachi Dios xì Elías mà? Dohó nì cachi-yà: “Còó, vachi sàni chitnùnì inì ñà-cundoo ùsà gà mìl nêhivì-xí mà càhví xí yùù yócò nani Baal, ni mà sàà stná-nè cuitasisi-né nùá”, nì cachi-yà.

⁵ Te ducání iá stná tiempu vichi. Sàhà gracia xi-ya ndoó stná dava nêhivì Israel xiníndísâ xí-yâ vichi, mate sacu xínduu-ne, doco sàni nacàxin-yanè.

⁶ Te nú cuisì sàhà gracia xi-ya nduá, dandu mà cúí cunduu stná sàhà obra nì quidá-né. Vachi nú nì cundiáá obra xi-ne nùù-yá nì cúí, dandu mà cundiáá gà stná gracia xi-ya.

⁷ Te nú ducán nduá, dandu ¿nansa cachí-ndà vichi? Pues dohó cachí-ndà: cuàhà gà nêhivì Israel cóni níhì-né (ñà-ndiaha ì) nìsa nanducu guá-nè; cuisì nêhivì nì nacàxin Dios nì nìhitàhvi xán. Dandu cuàhà gà dava nècuàchì Israel mà, nì yàha nì nducaxin anima-nè.

⁸ Te dohó cachí stná nùù tutu ì: “Sàni chitnùnì ini Dios cucumi nêhivì mà iin anima mà ndúlócô gà, na ian quídì-nè, quidámáxìní-nè, na ian cuaá-nè, te ò doho stná-nè, te dècuèndè quivì vichi, ducán iá xì-né”, cachí tutu mà.

⁹ Daaní stná David sànaha, dohó nì cachi stná-nè: Nì sàà nêhivì (malu mà) yàha-ne tnùndoho na meru ndoó-né quidá-né vicò xí-né, te yàchì nì cundúámà; te nì sàà stná-nè yàha-ne cuàhà vida, dandu nacuitacùhá sàhà cuàchi-ne.

¹⁰ Te màsà sàà stná-nè cundaà vaha ini-nè; còó. Nì sàà-nè cunsida-ne (castigu xi-ne) nicanicuàhàn, nì cachi David.

¹¹ Ñàyùcànduá, vichi ndisa iá falta xi nècuàchì Israel. Doco, ¿a sàni ndañuhu dahuun-ne ñà-nì quida-ne ducán? Còó, vachi cunaha-nsiá, sàhà-ñá nì quida-ne falta mà, ñà-jaàn nduá dísàhà-xí sàni nihì stná nsidaa nêhivì inga raza nansa càcu anima-nè. Daaní, después vihini naxicocuñ stná ini nècuàchì Israel na indéhe-né ñà-sàni càcu nêhivì inga raza mà.

¹² Cunaha-nsiá, sàhà-ñá nì quida nècuàchì Israel mà falta, ñàyùcànduá cuàhà gà ñà-ndiaha ì sàni ndòò nùù dava ga nêhivì ñuhivì. Doco nú sàhà falta xi nècuàchì mà

sàni nìhitàhvi nèhivi dava ga, dandu chicá más ndiaha nàcòo na sáa quìvi nàcùndoo vaha nècuàchì mà xì Dios.

Nansa nì nìhitàhvi nèhivi nsidanicuú raza coo nansa càcu-ne

¹³ Vìchi cuàhìn càhìn xì mii-nsiá nècuàchì có-nduú nèhivi Israel. Yùhù, nù Dios sàni nìhì chuun cacànui cachítñuhi palabra xi-ya xì mii-nsiá. Te ndisa iin chuun ndiaha nduá, cachí.

¹⁴ Te cuní quida vií chuun yohó sàhà-ñá cundehè stná nèhivi raza xi, áma ndúdî stná ini dava-ne (cunindisá stná-nè), te càcu-ne.

¹⁵ Vàchi nú (sàhà cuàchi-ne) nì cuxio-ne nù Dios, te sàhámà nì nìhì dava ga nèhivi ñuhiví nì nàcùndoo vaha-ne nù-yá, dandu (chicá más ndiaha) icúmí nàcòo nú sàni nandudì tu ini Dios sàhà-né. (Ndiaha gá ndisa) queamà na ian nì xìhì iin nèhivi, te nì natiacu-nè.

¹⁶ Cunaha-nsiá, cachí estilu sàhana sàhà pan primeru ñà-nduá pan ì dócò-ndà nù Dios. Te nú ducán nduá, dandu nàhà xicà ì stná dava ga yusàn nì cuàha pan mà. Te nahi seña jaàn nduú palabra yohó (sàhà nèhivi Israel, vàchi nú ì yohòtéhè-né sàhana, dandu ì stná nsidaa gá descendencia xi nècuàchì mà vichi). Te ducán iá stná nahi yohò iin yutnù; nú iá vaha yohò-nú, dandu nsidaa stná rama-nu iá vaha.

Nahi chiò yutnù nì natnì tnahá nduú nèhivi có-nduú raza Israel, cachí Pablo, vàchi sàni nìhitàhvi stná-nè ñà-ndiaha ì nisa icumì cuisì nècuàchì Israel antes

¹⁷ Vàchi nècuàchì raza-nsì Israel, na iin yutnù tàtá olivo, ducán nduú stná-nè, te nsidaa nèhivi inga raza, nahi chiò inga yutnù yùcù, ducán nduú-né. Daaní, nì cachí-ndà ní tàhndè iin ùi rama yutnù tàtá, te nì natnì tnahá xi iin ùi ndahà yutnù yùcù. Pues divi ducán nduá sàni quida Dios xì mii-nsiá nècuàchì inga raza; vàchi rama yutnù yùcù nì natnì tnahama, sà-itiácúà sàhà ñà-vaha dananá yohò yutnù tàtá mà; dítá fuertéa tècuí nù yohò-núma. (Te divi ducán iá stná xì mii-nsiá, sàni nìhitàhvi stná-nsià ñà-ndiaha ì xí nècuàchì Israel.)

¹⁸ Doco màsà cútúxí ini-nsia chicá ndiaá-nsià nù nèhivi Israel mà, vàchi divi sàhà nècuàchì mà sàni nìhitàhvi-nsiá ñà-ndiaha ì mà, nacua iá xì chiò cuàti yutnù nì natnì tnahama, divi sàhà yohò yutnù mà itiácúà, màdì-ñá sàhà chiò cuàtimà itiácú yohò-nú.

¹⁹⁻²⁰ Doco vihini cachi-nsià palabra yohó: “(Chicá ndiaá nsiùhù) nù nècuàchì Israel, vàchi (nì quindiaa Dios-nè nù lugar xi-ne sàhà-ñá quìhvi nsiùhù), na ian nì tàhndè chiò yutnù finu mà sàhà-ñá coo lugar quìhvi chiò yutnù yùcù”. Pues ñà-ndàa nduá nì cuxio dava nècuàchì (Israel nù Dios). Doco ¿indù chuun? Cuisì sàhà-ñá cóni sáníhnú gá ini-nè mii-yá. Ñàyùcànduá, mate nù mii-yá ndoó-nsiá vichi, doco cuisì sàhà-ñá iin-ni nihnú vaha ini-nsiàyà nduá. Màsà cútúxí ini-nsià chicá ndiaá-nsià. Còó, chicá xiñuhu ñà-caquin-nsià cuidadu.

²¹ Vàchi (nècuàchì Israel mà, cóni quidá víi-né, te sàhájàn) nì cuxio-ne nù-yá nacua nì cuu xi chiò yutnù tàtá nì tàhndè mà; ñàyùcànduá, ducán stná mii-nsiá ana nì quìhvi después, cuidadu cundoo-nsia còtó dacúxíó stná Dios mii-nsiá.

²² Sàhà nsidaa ñà-jaàn, vètùnì cundaà vaha ini-ndà nansa iá modo xi Dios; iá ndisa gracia xi-ya, doco iá stná nansa sàha-ya castigu. Vàchi nècuàchì raza nì tucù inga ichì mà, cóni dácàcu-yanè, doco mii-nsiá, còó; màni gá nì quida-ya xi-nsiá. Doco iin-ni xiñuhu quida-nsia seguir cunchicùn-nsià gracia xi-ya, vàchi nú coó, dacúxíó stná-yà mii-nsiá nù-yá.

²³ Daaní, nècuàchì nì cuxio antes mà, nú nì nácúníndísâ-né mii-yá, vètùnì (nàcùndoo vaha stná-nè xì-yá), te ducán queamà na ian nì natnì tnahá tú chiò yutnù nì tàhndè mà, vàchi Dios, icúmí-yà poder quida-ya ducán.

²⁴ Vàchi mii-nsiá, mate nècuàchì inga raza nduú-nsiá, doco sàni nìhitàhvi-nsiá cuàhà ñà-vaha xi nècuàchì Israel mà. Te ducán queamà na ian nì tàhndè chiò yutnù yùcù olivo, te nì natnì tnahá-nu xi iin yutnù tàtá. Pues nú sàni nìhitàhvi mii-nsiá ducán, dandu

chicá mà úhì nansìhvi tu nèhivì raza Israel mà lugar primeru xi-ne, vàchi queámà na ian danátni tnahà tu-nda chiò yutnú finu icà mismo mii yutnú ndé nì tãhndèa.

²⁵ Ñàni, cuní cundaà inì-nsia sàhà iin chuun nìsa là dèhé antes còtó cachi-nsià ñà-chicá nchichí-nsià. Vàchi cunaha-nsiá, cuàhà nècuàchì Israel, quidámáxìnì-nè vichi, te ducán icúmí coo ndè cachi sàa cuacatnahá nadaa ga nèhivì inga raza quìhvi ichì mii-yá.

²⁶ Daaní, icúmí càcu stná nsidaa nècuàchì raza Israel, nacua cachí Dios nùu tutu ì: Mahì nèhivì ñuu Siòn descendencia xi Jacob, yucán icúmí quee mii-yá ana dacácu xi-né, dandu dandáñuhú-yá nsidaa ñà-có-ndiáá nì quida-ne.

²⁷ Te nú sàni cuxio nsidaa cuàchi-nemà, dandu cundaà ini-nè sàni quida ndise cumplir palabra nì càhàn sàhnúí xì-né antes.

²⁸ Cunaha-nsiá, sàhà-ñá (cahìchì ini) nèhivì Israel razón ndiaha xí Dios vichi, ñàyùcànduá na ian xinì ùhì-nèyà nduá, doco ñà-vàha xi mii-nsiá sàni queamà. Doco nècuàchimà, màni cuàhà vá-né nùu-yá sàhà xì-né, vàchi nì cachi-yá xì xì-né icúmí-yá nacàxin-ya descendencia xi-ne.

²⁹ Te mà túha Dios naquihin-ya ñà-nduá sàni sàhatahvì-yándô; ni mà túha stná-yá naxicocuìn ini-yá nú sàni chitnùnì ini-yá cana-yándô.

³⁰ Antes cónisá ínínì-nsiá mii-yá, doco vichi sàhà-ñá cónì ínínì nècuàchì Israel, ñàyùcànduá mii-nsiá nì indehè ndàhvì-yá vichi.

³¹ Te ducánì iá stná xì mii-né, mate có-ínínì-nèyà vichi, doco ¿índù fin cucumiámà? Divi sàhà-ñá nacundehè ndàhvì-yànè nacua nì indehè ndàhvì stná-yá mii-nsiá.

³² Ñàyùcànduá, nùu mii-yá iin-ni xínduu nsidanicuu-nda nèhivì cuàchi có-ínínì xí-yá. Te divi sàhájàn vátùni iin-ni cundehè ndàhvì stná-yá nsidanicuu-nda.

Nchichí gà nì quida Dios nsidaa obra xi-ya

³³ ¡Na cuahà guá obra ndiaha sàni quida Dios! Te nchichí sàstnùhù stná-yá, ináhá-yá nsidanicuu ñàha. Te ináhá-yá ñà-nduá cachí-yá, xì ñà-nduá quidá-yá, mate nèhivì, có-sànìhì ini-nè.

³⁴ Vàchi còò ni-iin ana cundáa ndisa inì-xi nansa niñnú ini Stoho-ndà Señor. Te ni còò stná ana chicá nchichí, te ducán sàha-xi-yá conseju.

³⁵ Ni còò stná ana xícàn tòó-yá ñàha nùu-xì, te cunihica-yá nùu-né; còó.

³⁶ Vàchi mii-yá nì quidavàha xi nsidanicuu ñàha, te sàhà poder xi-ya iá ì nsidaa ñà-jaàn ñuhivì yohó. Te cuisì sàhà (ñà-nì quèé gà más tñùñuhu) xí-yá, ñàyùcànduá nì sàcòò nsidaámà, ansivéhé cahnú-yá nicanicuahàn. Amén.

12

Nansa cuní Dios quida-nda xi vida xi-nda

¹ Pues vichi, sàhà-ñá cuàhà guá sàni cuhi ini-yá ndohó, ñàyùcànduá, sacúndáhvì nùu-nsiá ñà-dayáha dahuun-nsia mii-nsiá ndahà-yá, ñàni. Vàchi nú ducán, dandu queamà na ian mii-nda nduu-nda promesa sàhatahvì-ndàyá, doco iin ñà-ìtiácú. Te ñà-jaàn nduú stná meru promesa ì cudî ini-yá sàhà-xì, vàchi divi nacua ndiá icà-ndà cahvi vii-ndàyá ini anima-ndà nduájàn.

² Doco modo chicuèhè niñnú ini nèhivì ñuhivì yohó, màsà cúnchícùn gà-ndàñá. Xiñuhu ndusaa dahuun sàxínìtnùnì-ndà sàhà-ñá dàma modo xi-nda, vàchi nú ni nácùnihu ndiaha ini-ndà, dandu sàà-ndà cundaà vaha ini-ndà nansa cuní-yá quida-nda, vàchi cuàhà obra vaha cudî ini-yá quida-nda, xì cuàhà ñà-lá vii.

³ Yùhù sàni nihítáhvì gracia nùu-yá (ñà-quide chuun ndiaha xí-yá). Ñàyùcànduá, cachí xì nsidaa-nsiá ñà-mà vaha ndanihi vaha-nda mii-nda más gà nùu ñà-nduá ndiá icà-ndà. Xiñuhu nacani sahnú ini-ndà sàhà mii-nda según nansa nì sàhatahvì-yá iin iin-nda cunindisa-ndayá, (te ducán cunucuachi-nda nùu-yá).

⁴ Na ian indèhe-nda iquicúñú-ndà, cuàhà ñà-nduá icúmíá, doco iin ian xì chuun quidá.

⁵ Pues ducání iá stná ndohó. Sàhà-ñá nchícùn-ndà Cristu, iin-ni iguicúñú xínduu nsidaa-nda, mate cuáhà-ndà, vàchi iin-ni chindéé stnaha-nda iin-nda xí inga-ndà nahi cuerpu-ndà.

⁶ Ñàyùcàndùá, iin iin-nda sàni nihítàhvì-ndà iin ñà-vàha cui quida-nda según nansa ni sàhatahvì-yándô gracia xi-ya. Ñàyùcàndùá, nú sàni nihítàhvì-ndà càhàn-ndà iin razón ndiaha quixí nùu-yá, dandu divi ñà-jaàn nduá ni cúnsìhi ini-ndà quida-nda nacua sàa-ndà xiníndísá-ndà.

⁷ Te ò nú sàni nihítàhvì-ndà cunucuachi-nda nùu ñanìtnaha-nda, dandu divi ñà-jaàn ni quidá stná-ndà. Daaní, nú ñà-chinaha-ndà ñanìtnaha-nda nduá ni nihítàhvì-ndà, dandu divi ducan ni quida-nda.

⁸ Daaní, nú ni nihítàhvì-ndà danácuàhandee stnahá ini-ndà, dandu divi ducan ni quidá ndisa stná-ndà. Te ò nú chuun ni nihítàhvì-ndà nduú ñà-dacútàhvì-ndà ñanìtnaha-nda iñàha, dandu divi ñà-jaàn ni quidá stná-ndà, doco màdi sàhà-ñá ndanihi vaha nèhivì-ndó. Còó. Te ò nú ni nihítàhvì-ndà ñà-cunuù-ndà (chuun xi Dios), dandu ñà-jaàn ni quidá stná-ndà, doco vivíi-ni ni quida-ndañá. Daaní, nú chuun ni nihítàhvì-ndà nduú ñà-cundehè ndàhvì stnaha-nda, dandu ni cúdíi ini-ndà quida-nda ducán.

Nansa ndiá icà-ndà quida-nda nú sàni quihin-nda ichi Jesús

⁹ Nsidaa-nda, icúmí-ndá cuu stnahá ini-ndà sàhà-ndà, doco màsà dánání uun-nda. Te ni loho màsà cúu ini-ndà sàhà ñà-có-íá vaha. Còó; cuisì ñà-íá vìi ni cúnchícùn-ndà.

¹⁰ Te xiñuhu stná ñà-cuni màni stnàhà-ndà, vàchi iin-ni ñaní xínduu-nda; te siempre xiñuhu quidañuhu stnaha-nda, te ni nácóó stná-ndà ñanìtnaha-nda ni queé tnùñuhu xí mii-né, (màdi ndohó).

¹¹ Màsà cúdúsán-ndá; còó. Ni cuàhandee ini-ndà quida-nda ñà-nduá quidà-ndà. Xí nsidaa anima-ndà ni cúnúcuáchí-ndá nùu Stoho-ndà Señor.

¹² Te iin-ni ni cúdíi stná ini-ndà sàhà tnùndé ini ndiatu-nda nùu-yá. Te nú yáha-nda tnùndoho, dandu iin-ni ni quidándéé stná ini-ndà, te nicanicuahàn ni càcàn tàhvì-ndà nùu-yá.

¹³ Te nú iá ñà-nduá xiñuhu iin nèhivì xí Dios, dandu ni chindéé-ndánê. Te siempre ni quidañúhú-ndá nècuàchì sàa visita vehe-nda.

¹⁴ Daaní, nèhivì quidá quíní xí-ndá, ni càcàn tàhvì-ndà sàhà-né, màdi-ñá càcàn chihán-ndà dìquì-né.

¹⁵ Ni cúndóó díi-nda xi nècuàchì cudîi inì-xi, te ò nú tnùnsí ini ndoó-né, dandu stná ndohó ni cúndóó stná-ndà tnùnsí ini.

¹⁶ Iin-ni ni cúndóó màni nsidaa-nda. Màsà cútúxí ini-ndà mii-nda nduu-nda mii-nda; còó. Xiñuhu ñà-cunihnu ndahvi ini-ndà. Màsà cúníhnú ini-ndà nchichí gà-ndà.

¹⁷ Te nú sàni quida quini nèhivì xì-ndà, màsà nácání ini-ndà naxicocuîin-ndà quida stná-ndà xì-né nacua ni quida mii-né xì-ndà. Siempre ni cuàhandee stná ini-ndà quida vìi-ndà xì nsidaa nèhivì.

¹⁸ Dècuèndè ñà-nduá sàa-ndà quida-nda, ducán xiñuhu cundoo manì-ndà xì nsidan-icuú-né.

¹⁹ Ñani màni, màsà náchítacùhá-ndà ñà-nduá quidá nèhivì xì-ndà. Nùu Dios ni ndóo nsidaájàn, vàchi dohó cachí-yà nùu tutu ìi: “Cuisì yùhù icúmí nachitacùhá xì sàhà nsidaa iñàha. Nsidaa ana iníhíca, icúmí-nê danáa-né quide, cachí Stoho-ndà Señor”.

²⁰ Daaní, dohó cachí stná tutu ìi: “Nú iá iin ana xiní ùhì xì-ndà, te xíhì-nè doco, ò xíhì-nè tècuíi, dandu ni dácúxí-ndánê, te ni cuáha stná-ndàné tècuíi coho-ne. Vàchi nú ducan ni quida-nda, dandu icúmí-nê nducahan-ne”.

²¹ Màsà cuáha-nda quida stná-ndà nacua quidá nèhivì malu xì-ndà; còó. Ni quidá víi-nda xi-né, vàchi sàhájàn ñà-sàni cundee-nda nùu-né nduá.

13

¹ Nsidaa-nda ni cúníní-ndá nècuàchì xídandacú, vèchi Dios nduú ana nì chitnùnì inì-xi cundoo ana dandacú nsidanicuú lugar. Nècuàchì icúmí cargu vichi, nùu mii-yá nì nihì-né chuun ma.

² Ñàyùcàndüá, iin nècuàchì cahíchi ini xì autoridad, divi ley xi mii-yá nduá cahíchi stná ini-nè. Te nsidaa ana có-ndùlócò (sàhà ley mà), tnùndoho nduá icúmí-nè nihì-né.

³ Vèchi chuun xi nècuàchì dandacú, có-ndüá ñà-dayúhì xì-ndà te nú quidá víi-nda. Còó. Cuisì nècuàchì có-quidá víi icúmí-nè dayúhì-nè. Te nú có-cùnì-ndà dayúhì-nèndó, dandu cuisì ñà-íá vii ni quida-nda, dandu icúmí nècuàchì mà cudii ini-nè sàhà-ndà.

⁴ Vèchi ducán queá na iin chuun xi Dios nduá quidá-né sàhà ñà-vàha xi-nda. Doco nú có-quidá víi-nda, chicá vaha ni yúhì-ndà, vèchi autoridad mà, icúmí-nè derechu dandohó-nèndó, te vètùnì quida-neà. Vèchi na ian nùu Dios xinúcuáchì-nè na dandohó-né ana có-quidá víi.

⁵ Ñàyùcàndüá, xiñuhu cunini-ndané, doco màdì cuisì sàhà-ñá yúhì-ndà nihì-ndà castigu, còó; sàhà stná ñà-màsà cúnsídá cuàchi-nda (nùu Dios).

⁶ Ñà-jaàn nduá dìsàhà-xì chíyàhvi stná-ndà renta nùu ñuu-ndà. Vèchi autoridad xi-nda, na ian nùu Dios xinúcuáchì-nè, te ñà-jaàn nduú chuun xi-ne.

⁷ Ñàyùcàndüá, xiñuhu danáa-ndà ñà-ndüá iníhíca-ndá nùu iin iin nèhivì. Nècuàchì xícàn dihùn sàhà ñuu-ndà, ni cuáha-ndané, xì stná nècuàchì xícàn renta. Te nsidaa ana xiñuhu quidañuhu-nda, ni coó tnùñuhu xi-nda nùu-né.

⁸ Ni-ñàha màsà cúnihíca-ndá nùu nèhivì. Doco ñà-ndüá iníhíca ndisa-nda nduú ñà-cuu ini-ndà sàhà-né. Te nú ni quida-nda ñà-jaàn, dandu ñà-sànì quida-nda cumplir nsidaa ñà-ndüá cachí ley ì nduá.

⁹ Vèchi dohó cachí ley mà: màsà cáhàn-ndà xì inga ana có-ndüú nècuàchì vehe-nda, te màsà cáhni stnaha-nda, ni màsà quídacuíhná-ndá; ni màsà cáhàn-ndà iin tnùhu sàhà ñanìtnaha-nda; ni màsà xího stná-ndà ñà-ndüá icúmí nècuàchì mà. Te íá gà más ñà-ndüá cachá, doco nsidaa palabra jaàn, iin cuisì palabra-ni nduá, vèchi ñà-ndüá cunì cachàmà nduú ñà-cuu stnahá ini-ndà sàhà-ndà nacua cuú ini-ndà sàhà mii-nda.

¹⁰ Te nú ducán quida-nda xi ñanìtnaha-nda, dandísá (ñà-quidá víi-nda xi-né nduá), vèchi còó dañu quidà-ndà xì-né. Ñàyùcàndüá, nú cuú stnahá ini-ndà sàhà-ndà, dandísá ñà-sànì quida vii-ndà cumplir ley ì nduú stná.

¹¹ Nsidaámà xiñuhu quida-nda, vèchi ináhá-ndá nansa vaxi tiempu vichi, meru tiempu (ñà-quida vii-ndà) nduá; ñàyùcàndüá màsà cúndóo-ndá quidámáxìní-ndà, vèchi vichi chicá sàcùyátní quivì càcu dahuun-nda, mà cuéé cuàhà gá na ian (nìsa nihnu ini-ndà) na quivì nì xinindisa-nda mii-yá.

¹² Te vichi sà-ítúú tiempu danátnùu (Dios ini anima cuàhà nèhivì) inicutu, vèchi tiempu vichi (na xicá-né ichì) ñáa, yàchì icúmíâ yàha. Ñàyùcàndüá, ni nácóó dahuun-nda nsidaa ñà-ndüú chuun xi ichì ñáa ma, te ni cútùha-nda quida-nda chuun vaha ñà-cui chindee xi-nda caca-nda ichì ndé datnúu-yàndó.

¹³ Xiñuhu cacanu vii-ndà nacua datnúu-yà ini-ndà. Te nacoo dahuun stná-ndà ñà-xìni-nda, xì-ñá quidà-ndà escándalo, te màsà cáhàn stná-ndà xì nèhivì cónì nándàhà xì-ndà. Ni màsà quidá ndevàha stná-ndà ñà-íá quini; ni màsà náá stnahá stná-ndà, te màsà cúmbidia stnahá ini-ndà sàhà-ndà.

¹⁴ Cuisì nacua nihnú ini Stoho-ndà Jesucristu, ducan ni cúníhnú stná ini-ndà, te ñà-jaàn nduá icúmí chindee xi-nda. Ni-iyuhu màsà cúníhnú ini-ndà ñà-ndüú ñà-chìcuéhè nihnú ini nèhivì ñuhivì, còtó sàa-ndà quida stná-ndà ñà-jaàn.

14

Màsà cuítnùhu-nda ñanìtnaha-nda

¹ Dava nèhivì, mate xiníndísâ stná-nè mii-yá, doco có-sâa-nè cundaà ini-ne (nansa iá nsidaa ley xi-ya). Doco ndohó, xiñuhu quidañuhu-ndané, te càhàn-ndà xì-né, doco màsà náâ-ndà xì-né sàhà ñà-có-quidá-né nacua quidá ndohó.

² Vàchi dava-nda, nsidanicuú comida xixi-nda; iá viá, cachí-ndà. Doco dava nèhivì, có-sâa-nè cundaà ini-nè, ñàyùcàndùá có-sàxí-né ni-iin cuñu, cuisì inga iñàha.

³ Pues nècuàchì xixí nsidanicuú iñàha, mà váha cahíchì ini-nè iin ñanìtnaha-ne có-sàxí cuñu. Te nècuàchì có-sàxí cuñu mà, màsà cuítnùhu-ne ñanìtnaha-ne saxí xi cuñu, vàchi iin-ni sàni ndee vàha stná nècuàchì mà nùu Dios.

⁴ Vàchi nú xítñuhu tñaha-nda ducán, dandu queámà na ian quida-nda na xítñuhu-nda ana quidáchúùn nùu inga nèhivì, te (ináhá-ndá) có-queé víámà. Cuisì lamú xi nècuàchì mà icúmí cachi a quidá víi peón xi-ne, á cóo. (Ñàyùcàndùá, màsà cuítnùhu-nda inga ana xinúcuáchì nùu Dios), vàchi ádi vátùni sàa-nè quida vìi-né, vàchi icúmí-yá chindee-yánè.

⁵ Dava nèhivì, quivì señaladu nduá nsidácáhnù-né, doco dava ga-nè, iin-ni nihnú ini-nè nsidaa quivì ndiaá. Pues cada iin iin-nda ni cúnáhá-ndá nansa cuní-ndà quida-nda.

⁶ Nècuàchì chívàha xi iin quivì señaladu, sàhà-ñá nihnú vàha ini-nè Stoho-ndà Señor nduá. Te ducání stná nècuàchì có-chívàha iin quivì señaladu, nicanicuahàn nihnú vàha stná ini-nè mii-yá. Te nècuàchì xixí nsidanicuú stná comida, nùu Stoho-ndà Señor xixí-néà, te naquímànì stná-nèyà sàhà-ñá. Daaní, nèhivì có-xixí ndéni comida nì cui, divi nùu stná mii-yá có-xixí-néà, doco naquímànì stná-nèyà (sàhà ñà-ndùá xixí-né).

⁷ Vàchi màdì micuísì-nda ndoo-nda ñuhiví yohó, te màdì inì-ni mii-nda cachí-ndà cui-ndà.

⁸ Vàchi nú itiácú-ndà ñuhiví yohó, divi nùu Stoho-ndà Señor ndoo-nda; te na sàa quivì cui-ndà, mii-yá dandacú-yá sàhà stná mà. Ñàyùcàndùá, a ducán itiácú-ndà te ò ní xihì-ndà, iin-ni nduu-nda nèhivì xí Stoho-ndà Señor.

⁹ Vàchi Cristu, divi sàhà ñà-ni sàa-yà cusahnú-yá nùu nsidaa nsìi, xì stná nècuàchì itiácú, sàhà ñà-jaàn nduá nì xihì-yà, te nì natiacu-yà nì ndanchito-ya.

¹⁰ Ñàyùcàndùá, mà váha cuitnùhu-nda ñanìtnaha-nda; mà váha cahíchì stnahá stná ini-ndà. Vàchi nsidanicu-nda, icúmí-ndá màcuìta stná-ndà nùu-yá, dandu cachi-yà xì-ndà a ní quida vìi-ndà, á cóo.

¹¹ Vàchi ducán cachí stná tutu ì ndé càhàn Stoho-ndà Señor, cachí-yà:

Nicanicuahàn itiàcuì, ñàyùcàndùá seguru nduá yohó cachí vichi: icúmí nsidanicuú nèhivì màcuítasisi-né nùu, te cachi-nè (divi Dios nduí).

¹² Ñàyùcàndùá, vátùni cundaà ini-ndà, iin iin-nda icúmí-ndá nacua-nda cuenta nùu-yá.

Cuidadu ni cúndóo-ndá sàhà ñà-ndùá quida-nda, còtó sàhà ndohó sàa iin ñanìtnaha-nda cuida cuàchi-ne

¹³ Ñàyùcàndùá, màsà cuítnùhu ga-ndà ñanìtnaha-nda. Doco iá ndisa ñà-ndùá xiñuhu quida-nda: xiñuhu cundoo-nda cuidadu ñà-màdí sàhà ndohó cuida cuàchi iin ñanìtnaha-nda.

¹⁴ Vàchi yùhù ináhî, còò ni-iñàha iá ñuhiví yohó nsidá cuàchi-xi inì-ni miá. Te ducán cachí stná palabra nì cachi Stoho-ndà Jesús xì-ndà. Doco nú mii-nda dacuidá cuàchi-nda iñàha, dandu na ian iá ndisa cuàcha nùu-ndà.

¹⁵ Ñàyùcàndùá, nú cudúchì ini iin ñanìtnaha-nda sàhà iin ñà-ndùá xixi-nda (ñà-tùxí ini-nè cuàchi nduá), dandu màsà cúxí gá-ndà ñà-jaàn, vàchi nú ducán, dandu có-quidá víi-nda, na ian có-cùú gà ini-ndà sàhà nècuàchì mà nduá. Ñàyùcàndùá, cuidadu ni cúndóo-ndá ñà-màsà sàa ndañuhu anima iin ñanìtnaha-nda sàhà ñà-cùdí guá ini-ndà cuxi-nda, vàchi sàhà stná nècuàchì mà nì xihì Cristu.

¹⁶ Vátùni iá nsidaa ñà-ndùá quida-nda cahan-nda, doco cuidadu ni cúndóo-ndá còtó cachi iin ñanìtnaha-nda quini iá ñà-ndùá quida-nda.

¹⁷ Vàchi ley xi rey xi-nda Dios, có-nduá iin ley sàhà ñà-xìxì-ndà ò ñà-xìhì-ndà. Còó, vachi nùu mii-yá ñà-ndiàá ndisa nduú ñà-quida vii-ndà, xì ñà-cundoo manì-ndà, xì ñà-cudìi stná ini-ndà quida Espíritu Ìi xí-yá.

¹⁸ Vachi nú ñà-jaàn quida-nda, dandu divi ñà-xìnúcuáchí-ndá nùu Cristu nduá, te cudìi stná ini Yua-nda Dios sàhà-ndà, dècuèndè nùu stná nèhivì icúmí-ndá ndee vaha stná-ndà.

¹⁹ Ñàyùcànduá, xiñuhu nacani cuàhà ini-ndà nansa cundoo manì-ndà xì ñànìtnaha-nda, te nanducu stná-ndà nansa nacuàhandee ini-ndàné.

²⁰ Te (cuidadu ni cúndóó stná-ndà) sàhà ñà-nduá xixi-nda, còtó sàhájàn dandáñhú-ndá obra xi Dios (ini anima inga nèhivì). Ináhî, iá permisú caxì-ndà, ò cuxi-nda ndéni iñàha nì cui. Doco mà váha caxì-ndàñá nú tuxí ini inga-nè nduá cuàchi, màdí sàhà ndohó cuàhandee ini-nè caxì stná-nè.

²¹ Chicá vaha màsà cáxi-nda iin cuñu, ò coho-nda iin vinu, ò ndéni iñàha nì cui nú tuxí ini iin ñànìtnaha-nda cuàchi nduá, te vihini quida stná-nè ducán ñà-mà fuerte anima-nè.

²² Mate ináhá-ndá iá vaha caxì-ndà ndéni iñàha nì cui, doco inì-ni mii-ní-ndá ni chívaha-nda ñà-jaàn, chicá vaha, dandu cuisì mii-nda xi Dios cunaha-nda sàhà-ñá.

Nú còó ni-iin duda, te ináhá-ndá màdì cuàchi nduá quida-nda, dandu nansicáhán-ndá.

²³ Doco nú iá-ndà xì duda, te có-ínáhá ndisa-nda a cuàchi nduá ñà-caxì-ndà iñàha, ò á coó, dandu iin falta cundua nú ni caxí-ndañá, vachi có-xìníndísâ ndisa-nda iin ñà-vaha nduá. Vachi cunaha-nsiá, nsidaa ñà-nduá quida-nda, te có-xìníndísá-ndá nduá iin chuun vii, dandu cuàchi cundua.

15

Màsà quídá-ndá cuisì ñà-cudìi inì-ni mii-nda, sino que ñà-cunduu ñà-vaha xi ñànìtnaha-nda

¹ Ñàyùcànduá, ndohó tè-sà-xìníndísâ fuerte, ndiá icà-ndà quidandee ini-ndà sàhà ñànìtnaha-nda nú tàñáha ga cunindísá vaha-ne. Te xiñuhu ñà-chindee stná-ndàné, màdì-ñá quida-nda cuisì ñà-cudìi inì-ni mii-nda.

² Vivì-ni ni quida-nda xi ñànìtnaha-nda sàhà-ñá cundua ñà-vaha xi-ne, te cundoo-ne contentu, vachi nú ducán, dandu chicá icúmí-nè nacuàhandee ini-nè.

³ Vachi ni stná Cristu, cóni quídá-yá cuisì ñà-nduá nì cudìi inì-ni mii-yá. Vachi dohó cachí stná nùu tutu ìi, (ndé cáhàn Cristu xì Yuamánì-yá), cachí-yà: “Ñà-nduá nì canàhà nèhivì dìquì mii-ní, yùhù nì nacuida xi nsidaájàn”.

⁴ Cunaha-nsiá, nsidaa palabra nì tiaa nècuàchì sàhaha nùu tutu ìi, sàhà-ñá dacuahá stná ndohó nduá, te ducán dandu chicá cutùha-nda cucumi-nda paciencia, te nacuàhandee stná ini-ndà, vachi nú ducán, dandu chicá nsinuu ini-ndà ñà-íá ndisa tnùndé ini ndiaha xi-nda.

⁵ Pues divi Dios nduú ana chindéé xí-ndá quidandee ini-ndà ducán, te nacuàhandee stná ini-yàndó. Ñàyùcànduá, nùu mii-yá xícàn tàhvì ñà-nì cúndóó mánì nsidaa-nsiá nacua cuní Jesucristu quida-nda.

⁶ Te xícàn tàhvì stná ñà-iin-ni ni cúníhnú vaha ini nsidaa-nsiá, te iin-ni ni náquímánì stná-nsiá mii-yá ana càhvì Stoho-ndà Jesucristu, divi Yuamánì-yá.

⁷ Te (ináhá stná-ndà) cóni cáhìchì ini-yà ni-iin-nda. Ñàyùcànduá, xiñuhu-ñá cahvi stnaha-nda iin-nda xi inga-ndà, dandu chicá quee tnùñuhu xí-yá.

Nansa nì chitnùnì ini Dios ñà-cunitnùhu nèhivì nsidanicuú ñuu razón ndiaha xí-yá

⁸ Nsidaa palabra jaàn, ñà-yòhó nduá cuní cachà: nì quixi Cristu (ñuhivì yohó) ñà-quida-ya chuun ndiaha xí-yá sàhà raza-nsì Israel sàhà-ñá cuu ndisa ñà-nduá nì cachì Dios xì xì-nsì sàhaha, te sàhà ñà-cundaà stná ini nèhivì ñà-mà túha-ya dandahví-yàndó.

⁹ Daaní, nsidaa stná nèhivì inga raza, nì indehè ndàhvì stná-yà mii-né, te vichi vètùnì naquimanì stná-nèyá sàhámà. Vachi dohó cachì tutu ìi:

Icúmî naquimaní mii-ní (Dios), te cunini stná nèhivì nsidanicuú ñuu; cuàhìn nacuatui alabanza xi-ní, te tavi tñũñuhu xí-ní.

10 Daaní, nùu inga xaan xí tutu ì mà dohó cachí stná:

Vàtùni cudìi stná ini mii-nsiá nèhivì nsidanicuú ñuu, nacua cudìi ini nèhivì meru ñuu nì nacàxin-ya.

11 Daaní, inga xaan dohó cachí stná:

Nsidaa mii-nsiá nècuàchì inga ñuu, te inga raza, ni náquímànì-nsiá Dios, te ndanihi cahnú stná-nsiàyà.

12 Daaní, stná Isaías, nì tiaa stná-nè iin palabra, te dohó cachá:

Icúmí quesaa iin descendencia xi Isaí, te chuun xi-ya cunduu ñà-cusahnú-yá nùu nèhivì nsidaa ñuu, te icúmí-nê cahvi-ne xì-yá, nì cachi Isaías.

13 Pues Dios nduú ana sáha xi-nda tñundé ini ndiaha xi-nda; ñàyùcàndùá xicàn tàhví sàhà nsidaa mii-nsiá nècuàchì xiníndísá-xí-yá ñà-nì cúndóó-nsiá contentu, te nì yáha vaha stná-nsiá quida-ya, dandu chicá más icúmí coo tñundé ini xi-nsia quida ndudu ì xí Espíritu ì xí-yá.

14 Ñàni, có-ìé xì duda sàhà-nsiá; ináhí, vaha ndisa ini-nsiá, te cundáà vaha stná inì-nsia (sàhà ichì-yá), vātùni dacuahá tnahá stná-nsiá ichì váha.

15 Doco nùu tutu yohó tiaí iin palabra nùu-nsiá, te mate ní càhàn ndeí xì-nsiá iyuhu, doco cuisì ñà-nì dànsínúú inì mii-nsiá (sàhà ichì-yá) nduájàn. Vachi (chuun quide ducán) nduá nì nìhítàhvì nùu-yá na ní quida-ya gracia sàhí

16 ñà-cundui iin ana cunucuachi nùu-yá, te cacanui mahì nèhivì nsidaa ñuu cachítñùhi xì-né ñà-nduú razón ndiaha xí Jesucristu. Vachi cuní sàà cuàhà-né nùu-yá na ian nì cúndúú-né promesa dóquì nùu-yá, dandu cudìi stná ini-yà sàhà-né ñà-sànì nduhì stná anima-nè nì quida Espíritu ì.

17 Vichi sàhà-ñà nì chindee Jesucristu yùhù, ñàyùcàndùá vātùni cudìi inì sàhà chuun xi-ya sàni quide.

18 Doco iin chuun nì quida inga nèhivì, còó, mà càhìn sàhámà, cuisì sàhà chuun nì chindee-yá yùhù, te nì cachitñùhi xì nèhivì sàhà-yá. Te cuàhà stná ñà-nduá nì quide, te ducán nì xinindísá cuàhà nèhivì inga ñuu.

19 Cuàhà milagru ndiaha nì quide, xì cuàhà seña fuerte, te cuàhà gá nì chindee stná ndudu ì xí Espíritu xi-ya. Ñàyùcàndùá, inicutu sàni cachitñùhi razón ndiaha xí Cristu ndè ñuu Jerusalén xì dècuèndè ladu Ilírico.

20 Vachi ñà-nduá siempre cuní nduá cùhìn ñuu ndé tàcùnì nèhivì palabra xi Cristu, te cachitñùhi xì-né ñà-nduú razón ndiaha. Có-cùnì cùhìn ndé sà-íá ana quidà xì chuun ì mà.

21 Còó, vachi cuní coo nacua cachí tutu ì:

Nècuàchì ñuu ndé tàñáha ga sàà razón sàhà-yá, icúmí-nê cunitñùhu-ne. Mate vichi tàñáha ga cunini-ne palabra mà, doco icúmí-nê sàà-nè cundaà ini-nè.

22 Cunaha-nsiá, divi sàhà chuun jaàn tàñáha ga sàà ndé ndoó-nsiá, mate ní cunì sàà cuàhà xichì nì cuí.

23 Doco vichi, còó cá chuun icúmí ladu yohó, te sàcànì cuàà cuàhà gá cuní sàà nàcòtì mii-nsiá.

24 Ñàyùcàndùá, quivì quide disponer cùhìn ladu España, dandu yàhi. Daaní, nú sàni sandoo chii-nda contentu, dandu iin ñà-vaha cundua nú nì chíndéé-nsiá yùhù ñà-naquihin tui ichì cùhìn ladu España.

25 Doco vichi cùhìn ñuu Jerusalén cunihì iyuhu ñà-chindee xi nèhivì xí Dios ndoó yucán.

26 Vachi nèhivì ladu Macedonia xì ladu Acaya, nì nacani ini-nè nì dàcuátnáhâ-né iin ñà-chindee xi nècuàchì mà, vachi dava nècuàchì mà, ndahví yáha-ne.

27 Ñàyùcàndùá, nì cudìi ini nècuàchì xicà mà nì dàcútàhvì tnahá-né, vachi ducán ndiá icà-né quida-ne, vachi divi nùu nèhivì ñuu Jerusalén mà nì quixi palabra vaha

xiníndísâ-né, nacua mii-né, (te ducán stná nsiùhù xì nsidaa stná mii-nsiá hermanu) ndoó inga ñuu. Ñàyùcàndüá, ndiá ìcà-ndà chindee-nda sàhà necesidad icúmí nècuàchì ñuu Jerusalén mà.

²⁸ Daaní, nú sàni dàxínui chuun nacoí ñà-ndüá nì cutahví nècuàchìmà, dandu quihin tui ichì cùhìn ladu España, te ichì mà icúmí yàha stnài ndé ndoó-nsiá.

²⁹ Te nú sàni sài, ináhí ñà-ìcúmí Cristu dachitu-yá anima nsidaa-nda ñà-ndiaha î icúmí palabra xi-ya.

³⁰ Ñàni, yùhù ináhí, iin-ni nchícùn nsidaa-nda Stoho-ndà Jesucristu, te cuú stnahá stná ini-ndà sàhà-ndà quidá Espíritu Ìi. Ñàyùcàndüá, sacúndáhvî nùù-nsiá ñà-iin-ni ni càcàn tàhvì-nsiá sàhí nùù Dios, nacua quidá yùhù, xícàn tàhvì stnài nùù-yá.

³¹ Càcàn tàhvì-nsiá sàhí ñà-nì cácuí nùù ndahà nèhivì có-xiníndísâ ndoó ñuu Judea. Daaní, sàhà chuun cùhìn ñuu Jerusalén ñà-nacoí ñà-chindee xi nèhivì xí Dios yucán, càcàn tàhvì stná-nsiá nùù-yá sàhà ñà-nì cúdî ini nècuàchìmà sàhà ñà-ndüá cunihi cùhùn.

³² Dandísá vätùni cudì stná inì na sài ndé ndoó-nsiá, nú cuní-yá sài, te después coo chíí xì-nsiá quetatui.

³³ Pues vichi ni cúndóó-nsiá xì Dios, te ni yàha vaha-nsia quida-ya. Amén.

16

Ñà-ndüá nì cachi Pablo na ní casàhú-nè xì nsidaa nèhivì ináhá-né ñuu Roma

¹ Yùhù quidé recomendar doña Febe, vàchi vaha ndisa-ne, na iin cùha-nda nduú-né, te nduú stná-nè iin ana xinúcuáchí nùù nèhivì xí Dios natácá ñuu-nè Cencrea.

² Ñàyùcàndüá, nacuna-nsia yehè-nsiá nùù-né nacua ndiá ìcà-ndà quida-nda xi nèhivì xí-yá, vàchi iin-ni nchícùn stná-nè Stoho-ndà Señor. Te nú iá necesidad icúmí-nè sàhà iin chuun xi-ne, dandu chindee-nsiánè, vàchi cuàhà gá sàni chindee stná-nè nèhivì dava ga, xì stná yùhù.

³ Cásàhúì xì Priscila xì Aquila; nècuàchì nìsa cutnahá stná xì quidá-nsí chuun xi Jesucristu nduú-né.

⁴ Dècuèndè cuàhàn-nè cui stná-nè sàhí nì cùí, ñàyùcàndüá yùhù naquímán' mii-né; te màdì cuísi yùhù, ndè stná nsidaa nèhivì cahvi xi Dios cuàhà gá ñuu, naquímànì stná-nè nècuàchìmà.

⁵ Te cásàhú stnài xì nsidaa gá nèhivì natácá vehe nècuàchìmà cahvi xi-yá.

Daaní, cásàhú stnài xì Epeneto, vàchi màni gá-nè nùí; nècuàchì primeru nì xinindisa-xi Cristu ladu Acaya nduú-né.

⁶ Te cásàhú stnài xì María. Ináhí, cuàhà gá quidá nècuàchìmà chuun (xi Dios) jaàn ndé ndoó-nsiá.

⁷ Te cásàhú stnài xì nècuàchì ñuì nani Andrónico xì Junias. Ndúì-nè iá fama-nè nùù nsidaa gá nècuàchì apóstol. Te cunaha-nsiá, tàñáha ga sài tenchicuìn ichì Cristu, doco sà-xiníndísâ-né mii-yá. Daaní, después iin-ni nì sandiadi stná-nsì vehecàa.

⁸ Daaní, cásàhú stnài xì Amplias, vàchi iin-ni iá stná-nè nùù Stoho-ndà Señor, te cuú ndisa inì sàhà-né.

⁹ Te cásàhú stnài xì Urbano, vàchi iin-ni nìsa cutnahá-nsí quidá-nsí chuun xi Cristu. Daaní, cásàhú stnài xì Estaquis, vàchi màni stná nècuàchìmà nùí.

¹⁰ Te cásàhú stnài xì Apeles. Iin nèhivì seguru xi Cristu nduú stná-nè. Te cásàhú stnài xì nsidaa nèhivì vehe Aristóbulo.

¹¹ Daaní, cásàhú stnài xì nècuàchì ñuì nani Herodión. Te cásàhú stnài xì nsidaa nèhivì vehe Narciso xiníndísâ stná xì Stoho-ndà Señor.

¹² Daaní, cásàhú stnài xì Trifena xì Trifosa. Divi chuun xi Stoho-ndà Señor xí quida stná nècuàchìmà. Te Pérsida, cuàhà gá obra xi mii-yá quidá stná-nè, te màni cuàhà stná-nè nùù nsidaa-nda, ñàyùcàndüá cásàhú stnài xì-né.

¹³ Daaní, cásàhú stnàì xì Rufo. Iin nèhivì vaha ndisa xi Stoho-ndà Señor nduú stná-nè. Stná dihi Rufo, cásàhú stnàì xì-né, vachi na iin dihi mií nduú stná nècuàchìmà, cunaha-nsiá.

¹⁴ Daaní, cásàhú stnàì xì Asíncrito, xì Flegonte, xì Hermas, xì Patrobas, xì Hermes, xì nsidaa stná ñani-ndà ndoó vehe-ne.

¹⁵ Daaní, stná Filólogo, xì Julia, xì Nereo, xì cùha-ne, cásàhú stnàì xì nsidaa-né, xì stná Olimpás xì nsidaa gá nèhivì xì Dios cutnàhâ xì-nè.

¹⁶ Te nsidaa-nsiá, nacasàhú tnahá víi-nsiá ñà-xínduu-nsia nèhivì ì xì mii-yá. Daaní, nsidaa nèhivì natácá cahvi xi Cristu (cuàhà ñuu ladu yohó), cásàhú stná-nè xì-nsiá.

¹⁷ Yùhù sacúndáhvî nùu-nsiá, ñáni: cuidadu ni cúndóo-nsiá sàhà nècuàchì cuní datáhdè dava xi-nsiá, te datúcù-nènsiá iin ichì cónì dàcuàhâ-nsiá. Nacoo dahuun-nsia nsidaa nècuàchìmà.

¹⁸ Vachi nèhivì quidá ducán, màdì nùu Stoho-ndà Jesucristu xinúcuáchí-nè, cuisì-ní gustu sìquini xì mii-né nduá quidá-né. Vii gá cáhàn-nè, te palabra vico xichúûn-né, ñàyùcànduá mà úhì dandahví-nè nèhivì mà-fuerte inì-xi.

¹⁹ Doco mii-nsiá, sà-quidá víi-nsiá, te cuàhà gá xaan sàni xitiá stná cuentu nansa tùha-nsia cunini vii-nsiá (palabra xi Dios). Te yùhù, yáha ga cudû inì sàhájàn, doco cuní ñà-más gá ni cúndàà vaha inì-nsia nansa quida vii-nsiá. Doco iin chuun malu, còó; ni-iyuhu có-cuní mànihì tnùnì ini-nsiá sàhájàn.

²⁰ Te Dios, yàchì icúmí-yâ (cundee-yá nùu) ñà-malu na ian cuànihni-ya dìnì-sí, te ndòo-sì tìxi-xi cundehè-nsiá, vachi mii-yá, tùha-ya cuàha-yàndó paz.

Vichi ni cúcúmí-nsiá cuàhà gracia xi Stoho-ndà Jesucristu.

²¹ Yohó iá stná Timoteo, iin nècuàchì cutnàhâ xì quidá-nsí chuun ì xì-yá, te cásàhú stná-nè xì-nsiá. Te cásàhú stná (ùnì) nècuàchì ñuì nani Lucio, xì Jasón, xì Sosípater.

²² Yùhù nani Tercio, te nduú ana nì tiaa xi (palabra xi Pablo) nùu carta yohó, te cásàhú stnàì xì nsidaa-nsiá, vachi iin-ni xiníndísâ stná-nsiá Stoho-ndà Señor. (Pues vichi tucutu cachi Pablo iin palabra.)

²³ Daaní, cásàhú stná Gayo xì-nsiá, nècuàchì divéhé-xí ndé ié. Te divi yohó nduú stná lugar ndé natácá nèhivì cahvi xi Dios. Daaní, cásàhú stná Erasto, nècuàchì nduú tesorero ñuu yohó; te cásàhú stná inga ñani-ndà nani Cuarto.

²⁴ Vichi ni cúcúmí nsidaa-nsiá cuàhà gracia xi Stoho-ndà Señor. Amén.

Ultimo palabra xi carta yohó ndé naquímànì Pablo mii-yá

²⁵ Vichi ni-ndánihí cahnu-nda mii-yá. Vátùnì nacuahandee ini-yàndó nacua cachí razón ndiaha cachítnùhi xì nèhivì, divi palabra nì xinitnùhu-nsia sàhà Jesucristu; te divi nduú stná palabra nisa là dèhé caní cuà dècuèndè sàhana.

²⁶ Doco vichi sàni tui vateá, vachi mii-yá ana itiácú nicanicuahàn, sàni dàtnúu-yà ini-ndà sàhà razón xi-ya nì tiaa nècuàchì profeta sàhana. Te vichi dandacú-yá ñà-nì cuítìà palabra mà inicutu sàhà-ñá cunitnùhu nèhivì nsidanicuú ñuu, dandu cunindisá stná-nèyà, te cunini-neyà.

²⁷ Mindaa-ní míi-yâ nduú Dios, te mindaa-ní míi-yâ nduú stná ana nchichí ndisa. Te vichi sàhà Jesucristu ni naquímànì-ndáyá nicanicuahàn. Amén.

Tutu Nuu Nì Tiaa Saṅ Pablo nù Nèhivì xí Dios Ndoó Ñuu Corinto

¹ Yùhù nduí Pablo, te nduú stnàì iin ana nì càna ñà-cucumí chuun ndiaha nù Jesucristu, vèchi ñà-jaàn nduá nì chitnùnì ini Dios quide. Te yohó cutnàhà stnàì xì ñani-ndà Sóstenes,

² tiaá-nsí tutu yohó nù nsidaa mii-nsiá nècuàchì natácá cahvi xi Dios ñuu Corinto jaàn. Nèhivì ì xí-yá xínduu stná-nsiá ñà-sàni yàha-nsia ladu xi Stoho-ndà Jesucristu, te nì càna stná-nsiá cunduu-nsia nèhivì cunihnu ì inì-xi, nahi nsidaa gá nèhivì ndácùcahan xi quivì-yá, vèchi Stoho nsidaa-nda nduú-yá, nahi ndohó, te ducán stná mii-né.

³ Vichi ni cùcúmí cuáhà-nsiá gracia nù Yua-nda Dios xì nù Stoho-ndà Jesucristu, te contentu ni cùndóó-nsiá quida-ya.

⁴ Yùhù, nicanicuahàn naquímán' Dios sàhà-nsiá, vèchi cuáhà gá sàni sàhatahvì-yá mii-nsiá sàhà-ñá xínduu-nsia nèhivì xí Jesucristu.

⁵ Nsidanicuú modo sàni nihitáhvì-nsiá nù-yá; tùha-nsia càhàn ndiaha-nsiá, te cundáà vaha stná inì-nsia (sàhà ichì-yá).

⁶ Ñàyùcànduá, na xiní nèhivì (ñà-ndiaha guá) quidá-nsiá vètùnì cundáà ini-nè ñà-ndáà nduá sàni cachì-nsì sàhà Cristu.

⁷ Vèchi có-cùmánì gá ni-inga modo nihitáhvì gá-nsiá tàhvì ndiaha nù-yá, te vichi ndiatú cuéyàà stná-nsiá naxicocuñ Stoho-ndà Jesucristu, te cuni-ndáyá.

⁸⁻⁹ Te iin-ni icúmí Yua-nda Dios nacuahandee ini-yá anima-nsiá, dandu mà cóó gá ni-iin falta xi-nsia nù-yá quivì naxicocuñ Dèhemanì-yá Stoho-ndà Jesucristu. Vèchi vètùnì cahvi-nda xi-yá, te mii-yá nduú ana sàni cana-yàndó ñà-cundoo-nda nù Dèhemanì-yá.

Màsà táhndè dava-nda

¹⁰ Sacúndáhvì nù-nsiá ñà-nì nsínúú inì-nsia Stoho-ndà Jesucristu, te màsà náà stnahá-nsiá, ñàni. Iin-ni iñàha ni cúnihnú vaha ini nsidaa-nsiá. Màsà táhndè dava-nsia. Iin-ni ni cùndóó mánì-nsiá, te iin-ni iñàha ni nácánì inì-nsia.

¹¹ Vèchi nacánì nèhivì vehe Cloé xí, cachì-nè ñà-sàni tàhndè dava-nsia, ñàni.

¹² Ñà-sàni tàhndè dava-nsia nduá cachì, vèchi diín diín iñàha cachì iin iin-nsia. Vèchi dava-nsia, cachì-nsiá nèhivì xí Pablo nduú-nsiá, te dava-nsia, cachì-nsiá nèhivì xí Apolos ò Pedro nduú-nsiá, te dava ga-nsiá, nèhivì xí Cristu nduú-nsiá, cachì-nsiá.

¹³ Doco, ¿a ndísá ndoó cuáhà partidu xi Cristu? Còó. Té ¿a ndísá nì xihì yùhù Pablo cuenta xi-nsia? Còó. Té ¿a ndísá nì ndacùcahan nèhivì quivì yùhù na ní cuhì-nsiá? Còó.

¹⁴⁻¹⁵ Yùhù, ni cónì quidá ì' cuáhà-nsiá, cuisì Crispo xì Gayo. Ansivéhé Dios, cuisì mii-né nì quida ì', còtó cachì nèhivì nì ndacùcahín mii na ní quida ì' nècuàchì mà.

¹⁶ Pues, ndisa, stná nèhivì vehe Estéfanas nì quida ì stnàì, doco có-ínahá guè` a ní quida ì guè` más gá nèhivì, á cóó.

¹⁷ Vèchi màdi-ñá quida ì' nèhivì nduá nì dándàcú Jesucristu nù, còó; cuisì ñà-nacani xì-né ñà-nduú razón ndiaha xí-yá, doco màdi ñà-càhàn nchichì uin xì-né cunduajàn, còó, còtó mà nàtù tnuñuhu xí Cristu nansa nì xihì-yà nchìca cruz.

Cuisì ndiaá Jesucristu, màdiá càhàn nchichì-ndà

¹⁸ Nèhivì nchìcùn ichì ndé ndañuhu-nda, sácùndiaa uun-ne na càhàn-ndà xì-né sàhà obra nì quida Jesús (na ní xihì-yà) nchìca cruz; doco ndohó nècuàchì dàcàcu-ya, còó, vèchi nù ndohó, cahnú poder icúmí palabra mà.

¹⁹ Cunaha-nsiá, dohó (cachì-yá) nù tutu ì:

Cuàhàn dandáñúhì nsidaa palabra xícahàn tè-nchichì, xì stná palabra xi nècuàchì tuxì inì-xi inahá guá, icúmì dandutí palabra mà, cachì-yá.

²⁰ Ñàyùcànduá, mà cúndiáá gá ñà-nduá cachí guâ tè-nchichí ñuhiví yohó, mate xínduu-tè maestru xi ley sàhana, te ò yáha ga tûha-tè càhàn-te sàhù. Vâchi sàhà obra xi Dios sàni cundaà ini-ndà có-ndiáá palabra tuxí ini ñehiví ñuhiví nduú palabra nchichí guâ.

²¹ Cuàhà gá nandúcu-nê nansa cunchichí-nè, doco Dios, nì chitnùnì ini-yà ñà-màdì sàhà ñà-jaàn ñihì-né cundaà ini-nè sàhà-yá. Ducán nì quida-ya disponer, vâchi nchichí ndisa-ya. Dandu nì chitnùnì stná ini-yà ñà-cuítìà palabra ìì xí-yá inicutu, te na xiníndisâ ñehiví, dandu vâtùnì càcu anima-nè, mate (cachí ñehiví) palabra loco nduá.

²² Nècuàchì raza Judea, xícàn-nè cuu iin milagru, (dandu cunindisá-né). Te nècuàchì raza Grecia, cuisì cuní-nè cunini-ne iin palabra chicá nchichí.

²³ Doco nsiùhù, palabra sàhà nansa nì xihì Cristu nchìca cruz nduá cachítñuhu-nsi, mate cudúchì ini nècuàchì raza Judea sàhájàn, te tuxí stná ini nècuàchì inga ñuu palabra diquí nduá.

²⁴ Doco ndohó ñehiví nì nacàxin-ya, sàni cundaà ini-ndà sàhà-yá, ináhà-ndá cahnú cuáhà poder xi-ya, te nchichí ndisa stná-yà. Ducán xiníndisá-ndá, a ducán nduu-nda ñehiví raza Judea, te ò ñehiví inga raza.

²⁵ Vâchi mate ni tuxí ini ñehiví nì càhàn Dios iin palabra diquí, doco cunaha-nsiá, chicá nchichí palabra mà nùù nsidaa ñà-nduá cui cachí ñehiví ñuhiví. Daaní, stná poder xi-ya, mate iyuhu ñà-nduá quidá-yá tuxí ini-nè, doco chicá fuertéamà nùù nsidanicuú poder xi mii-né.

²⁶ Te xiñuhu nsinuu stná ini-nsià nansa nì quida Dios na ní nacàxin-yándó ñà-cunduu-nda ñehiví xí-yá, ñánì. Sacu-ndà nduu-nda nècuàchì nchichí cachí ñehiví ñuhiví, te sacu stná-ndà nduu-nda nècuàchì dandacú, te ò nècuàchì cuicà.

²⁷ Doco Dios, nì nacàxin-yándó, mate mà nchichí-ndà. Te ¿índù chuun? Divi sàhà-ñá dandúcáhàn-yá ñehiví cachí xínduu ana nchichí guâ. Stná ñehiví còò poder-xi sàni nacàxin-ya sàhà-ñá nducahan ñehiví tuxí inì-xi chicá icúmì xí poder.

²⁸ Stná ñehiví chicá ndahví nì nacàxin stná-yà, xì stná ñehiví cahíchì ini nècuàchì dava ga, xì stná ñehiví chicá có-ndiáá, pues divi nduú ana sàni nacàxin-ya, te ducán cundee-yá nùù nècuàchì tuxí inì-xi ndiáá guâ.

²⁹ Daaní, quiví icúmì nsidaa ñehiví tnàtuu-ne nùù-yá, mà cúníhnú gá ini ni-iin-ne ñà-mii-né nduú-né mii-né.

³⁰ Doco ndohó, nùù mii-yá sàni ñihítàhvì-ndà ñà-cundoo-nda nùù Jesucristu, te datnúù-yà sàxinítnùnì-ndà, dandu níhi-ndà càhàn nchichí ndisa-nda. Te sàhà stná Dèhemanì-yámà sàni ndee vâha-nda nùù-yá, te nì ndoo stná cuàchi anima-ndà nì quida-ya, vâchi Dèhemanì-yá nduú ana nì dànáà xì sàhà-ndà, te nì càcu-nda.

³¹ Ñàyùcànduá, ducán iá nacula cachí nùù tutu ìì: “Nú cuní-ndà tavà-ndà tnùñuhu xí mii-nda, dandu ni cúnáhà-ndá ñà-cuisì Stoho-ndà Señor nduú tnùñuhu xi-nda”.

2

Cuisì sàhà Jesús càhàn Pablo xì ñehiví

¹ Yùhù, na ní sài ñuu-nsià, màdì palabra nchichí nduá nì càhìn xì-nsiá; còò. Ni màdì palabra finu guá nì nácánì xì-nsiá na ní cachitnùhi xì-nsiá ñà-nduú razón ndiaha xí Dios.

² Còò, vâchi nì nacani inì ñà-màsà càhìn sàhà inga iin chuun, cuisì-ní sàhà Jesucristu, xì sàhà nansa nì xihì-yà nchìca cruz.

³ Te nì xini-nsià ndè nì cuítè, te ndè nì quidi stnáì ñà-nàcánì guâ inì

⁴ na ní càhìn xì-nsiá ñà-nduú palabra ìì xí-yá. Màdì palabra vico uun xi maestru nchichí nduá nì càchì xì-nsiá daa; còò. Espíritu ìì xí Dios nduú ana nì chindee xí, mii-yá xì milagru xi-ya.

⁵ Vâchi nì nacani inì mà váha cunchicùn-nsià ñà-nduú iin palabra nchichí xi ñehiví ùún. Còò, micuísì ndudu ìì xí Dios nduá cunì cahvi xi-nsiá.

⁶ Doco cunaha-nsiá, palabra nchichí ndisa nduá xichúûn stná-nsi na cáhàn-nsi xì nêhivì sàxìníndísâ vâha xi-yá. Doco tucu iá palabra mà nùù ñà-nduá cáhàn nècuàchì nchichí ñuhivì yohó, te ò iin palabra cáhàn tè-xídandacú ñuhivì yohó. Vâchi mate ndee cáhàn-te, doco yâchì icúmí-tê ndañuhu-tê ñuhivì.

⁷ Doco nsiùhù, palabra nchichí xi Dios nduá cáhàn-nsi.

Datnúù Espíritu Ìi sàxìnítnùnì-ndà sàhà palabra nchichí xi Yua-nda Dios

Antes nisa ìa dèhé palabra mà, cónisá cundáa ini nêhivì. Doco cunaha-nsiá, dècuèndè na táyôo ñuhivì, dandu nì chitnùnì ini-yà ñà-ndohó sàà-ndà cundaà ini-ndà sàhà palabra mà, te ducán nìhítâhvi-ndà sàà-ndà gloria xi-ya.

⁸ Doco tè-xídandacú ñuhivì yohó, cóni sàà-te cundaà ini-te palabra nchichí ìi mà, vâchi nú ni cundáa ini-te ni cuí, mà cáhni-té Stoho ndiaha-nda nchìca cruz.

⁹ Doco cunaha-nsiá, dohó cachí nùù tutu ìi: Cuàhà ñà-vâha sàni nsidayucun Dios ñà-nìhítâhvi nècuàchì cuú ini-xi sàhà-yá. Doco ni-iin nêhivì, tàñáha ga cuninùù-né nansa iá mà; tàñáha ga cunitnùhu-ne sàhà ñà-nsiaha guá mà; ni-iin xichi cóni nìhnú ini-nè nansa coa.

¹⁰ (Pues mate ducán ndisa nduá), doco ndohó, sàni cundaà ini-ndà sàhà-ñá, sà-ínáhá-ndá nansa iá, vâchi ducán sàni quida Espíritu Ìi xí-yá. Vâchi Espíritu Ìi, ináhá-yâ nsidanicuú ìñàha; ndè ináhá stná-yâ nsidanicuú ñà-nduá nacánì ini Yua-nda Dios.

¹¹ Ni cachí-ndà iá iin nêhivì nacánì ini-xi sàhà ìñàha; pues còo inga nêhivì cundáa ini-xi sàhà ñà-nduá nìhnú ini nècuàchì mà, cuisì miinì-né ináhá-nê. Te ducán iá stná Dios, còo inga ana ináhá ñà-nduá nacánì ini-yà, cuisì-nì Espíritu Ìi xí-yá.

¹² Te ndohó, màdì iin espíritu xi ñuhivì yohó nduá nì níhì-ndà; còo. Divi Espíritu Ìi xí mii-yá nì nìhítâhvi-ndà, te sàhá yúcán nduá vâtùni mànìhì ini-ndà ñà-ndiaha guá sàni nìhítâhvi-ndà nùù-yá.

¹³ Te divi ñà-jaàn nduá datúì-nsi nùù nêhivì nìhnú vâha ini xì Espíritu Ìi xí-yá. Doco màdì palabra nchichí xi nêhivì ñuhivì nduá cáhàn-nsi na datúì-nsi ñà-jaàn; còo, cuisì palabra chináhá Espíritu Ìi nduá cáhàn-nsi.

¹⁴ Doco nêhivì nìhnú ini xì cuisì ñà-nduá cachí sàxìnítnùnì mii-né, mà cuí sàà-nè cundaà ini-nè sàhà chuun xi Espíritu Ìi xí Dios, vâchi nahi palabra loco nduá nùù-né. Ñâyùcànduá, mà cùì mànìhì ini-nè, vâchi cuisì nú ni chíndéé Espíritu Ìi nêhivì, dandu vâtùni sàà-nè mànìhì ini-nè.

¹⁵ Doco iin nêhivì datnúù Espíritu Ìi anima-xi, mà úhì sàà-nè cundaà vâha ini-nè sàhà nsidaa ìñàha. Doco nêhivì dava ga, mà cùì sàà-nè cundaà ini-nè nansa ndisa nìhnú ini nêhivì xí Dios mà.

¹⁶ (Vâchi ducán cachí nùù tutu ìi:) “Còo ni-iin ana cundáa ndisa ini-xi nansa nìhnú ini Stoho-ndà Señor. Te ni còo stná ana chicá nchichí, te ducán cuàha-xi-yá conseju”, cachá. Doco cunaha-nsiá, divi nacia nìhnú ini Cristu, ducán sàni nìhítâhvi-ndà cunihnu stná ini-ndà vichì.

3

¹ Ducán iá, ñánì; doco (na ní sa-ìe xì-nsiá daa), mànìcùì dacuahá vâhi mii-nsiá, vâchi tàñáha ga cunihnu vâha inì-nsia nacia cunì Espíritu Ìi xí Dios. Na nìhnú ini ndéni nêhivì ní cuí, ducán nìhnú inì-nsia, na ian nìhnú iquín ini-nsiá, có-sânhì víi ini-nsiá ichì Cristu.

² Na iin mée sàha-nda cuisì-nì tèndodo, te màdiá comida chicá fuerte, ducán nì quida stnáì xì-nsiá, (puru palabra mà úhì cundaà ini-ndà nduá nì dàcuàhì mii-nsiá, màdiá palabra chicá nchichí), vâchi cóni sàà-nsiá cundaà inì-nsia, te dècuèndè stná vichì, tàñáha ga sàà-nsiá mànìhì váha inì-nsia.

³ Vâchi nìhnú ìi inì-nsia nahi nsidaa nêhivì dava ga ñuhivì. Vâchi ñà-cúmbìdia inì-nsia, te náâ stnahá-nsiá, te táhndè dava-nsia, pues, ¿amádi divi ñà-jaàn nduú modo xíquida nêhivì ñuhivì? Te divi sàhà ñà-jaàn náhà claru nìhnú ìi inì-nsia nahi mii-né.

⁴ Vàchi dava-nsia, cachí-nsià nèhivì xí Pablo nduú-nsiá, te dava-nsia, cachí-nsià nèhivì xí Apolo nduú-nsiá. Doco ¿amádi divi ñà-jaàn nduá quidá stná nèhivì ñuhiví yohó?

Nsidaa-nda cutnáhá-ndá xinúcuáchí-ndá nùu Dios

⁵ Doco cunaha-nsiá, màdì nèhivì chicá ndiaá nduú Apolo, te ni màdì nèhivì chicá ndiaá nduú stná yùhù Pablo. Cuisì nèhivì xinúcuáchí nùu Dios nduú-nsí, te sàhà nsiùhù sàni xinindisá stná-nsià palabra ìi xí-yá. Ñàyucànduá, cada iin iin-nda xi chuun nì nihitáhvi-ndà nùu-yá.

⁶ Vàchi (ducán iá nahi chuun itu-ndà), iin-nda chihí, te inga-ndà cùhñù, doco Dios nduú ana dacuahnu-xi viu. Te ducani iá stná xì nsiùhù, primeru yùhù (nì cachitnùhi xì-nsiá palabra ìi). Daaní, después nì chindee stná Apolo. Doco cuisì sàhà Dios nì quee viì (obra mà).

⁷ Màdiá chicá ndiaá ana nì càhàn xì palabra primeru, te ni màdiá chicá ndiaá stná ana nì chindee después, cuisì mii Dios nduú ana chicá ndiaá, te cuisì sàhà mii-yá nducuahà palabra xi-ya.

⁸ Nècuàchì quidáchúûn primeru, xì stná nècuàchì nchícùn gà, iin-ni xíndiaa-nsi nùu-yá. Doco segùn chuun quidá iin iin-nda, ducán icúmí-ndá nihì-ndà tnùmanì xì-ndà nùu-yá.

⁹ Te vichi iin-ni xinúcuáchí nsidaa-nsí nùu-yá. Te mii-nsiá, na iin itu Dios (ndé quidáchúûn-nsí) nduú-nsiá. Te nahi stná iin vehe nì dándàcú-yá cuàha, ducán nduú stná-nsiá.

¹⁰ Te yùhù, na iin albañil tùha vaha, ducán nduí, te nì quidachuín (chuun xi Dios ndé ndoó-nsiá). Na iin cimientu nduú (chuun primeru) nì quide jaàn sàhà gracia xi-ya. Te vichi sà-íá inga ana quida-xi chuun ma, na ian dacuahnú-né nama. Doco cuidadu nì cúndóo nsidaa nèhivì quidá seguir xì chuun nì dàquésáhí mà.

¹¹ Màsà cáchí-nè iá inga (palabra chicá ndiaá); cóo. Cuisì ndiaá palabra sàhà Jesucristu (nì cachitnùhi xì-nsiá) primeru, vachi nahi cimientu nduá.

¹² Te nú cuní iin nèhivì (quida-ne seguir xì obra mà), dandu queámà na ian cuàhàn-nè dacuahnú-né nama dìquì cimientu mà. Te nú cuàhàn-nè quida vii-né obra mà, dandu ducán queá na ian xichúûn-né oro, ò plata, ò yùu yéhè. Doco nú có-quidá víi-né obra mà, dandu ducán queá na ian xichúûn-né yutnù, ò mihì, ò ñùu.

¹³ Dandu después icúmí sàà iin quivì cundaà inì-xi nansa iá obra nì quida iin iin-nda. Vachi na sàà quivì mà icúmí coo nahi ñuhu xíxìn, te sàhà ñuhu mà cundaà inì-xi a natùì obra xi-nda nùu Dios, á cóo.

¹⁴ Nú màsà cócó obra xi-nda, dandu icúmí-ndá nihì-ndà ñà-vaha xi-nda nùu-yá.

¹⁵ Doco nú ni cocá, dandu mà níhì-ndà ñà-vaha cuàhàn-ndà nihì-ndà nì cùì, doco anima-ndà, vètùnì càcu viá, mate cunduamà na ian (nì chindee-nda mii-nda nùu) ñuhu xíxìn.

¹⁶ Mii-nsiá, ¿a có-nsinúu inì-nsia ñà-ndùu-ndà na iin vehe ìi ndé iá Dios? Vachi iá Espíritu ìi xí-yá ini anima-ndà.

¹⁷ Ñàyucànduá, nú ni dándañuhú iin nèhivì ñà-ìi icúmí lugar xi-ya, dandu icúmí nècuàchì mà ndañuhu dahuun stná-nè quida-ya. Vachi ndé iá-yà, yáha ga ìi lugar mà, te cunaha-nsiá, divi nahi vehe ìi-yá nduu-nda.

¹⁸ Màdí dandahví-nsià mii-nsiá, vachi nú iá ana tuxí inì-xi nduú nècuàchì nchichí nùu nèhivì ñuhiví yohó, dandu xiñuhu dàma-ne, mate (cachí nèhivì) sàni culocó-nè, vachi nú ducán, dandu ñà-sàni ndunchichí ndisa-ne cundua.

¹⁹ Vachi ñà-nduá tuxí ini nèhivì nduú ñà-chicá nchichí, pues nùu Dios ñà-loco nduá. Te dohó cachí stná nùu tutu ìi: “Ícúmí Dios cundee-yá nùu tènchichí na meru xíquida cuahà-té maña dandáhvi-te”.

²⁰ Daaní, inga xaan cachí stná tutu mà: “Ináhá Dios, ñà-chìcuéhè uun nduá chítùnì guâ ini nècuàchì nchichí”.

²¹ Ñàyucànduá, màsà cútúxí ini ni-iin-nsia chicá ndiaá-nsià ñà-nchícùn-nsià iin tal nèhivì. Vàchi nsidanicuú nèhivì, xì nsidanicuú iñàha, divi cuenta xi mii-nsiá nduá.

²² A ducán yùhù Pablo, te ò Apolo, te ò Pedro, có-quidá, cuenta xi mii-nsiá nduú nsi-daa-nsí. Dècuèndè stná ñuhiví yohó, cuenta xi stná-ndà nduájàn, te mate ni cútíacú-ndà, te ò nì sàà-ndà cui-ndà, có-quidá, vàchi nsidaa ñà-nduá cùu xì-ndà quìvì vichi, ò quìvì vaxi xi-nda, sàhà bien xi-nda nduá.

²³ Te Cristu nduú Stoho-ndà. Te Stoho mii-yá nduú (Yua-nda) Dios.

4

Nansa iá vida nì yàha nècuàchì apóstol nì nìhì chuun nùu Jesús

¹ Sàhà ñà-nduá sàni cachì jaàn xiñuhu ndanihi nèhivì nsiùhù ñà-nduú-nsí ana xinúcuáchí nùu Cristu; xiñuhu cundaà ini-nè ñà-ndàà nduá nì nìhì ndisa-nsi chuun ñà-dacuahá-nsí nèhivì palabra ì nìsa ìa dèhé sàhana.

² Te nú ducán nduá, dandu ndiá ìcà-nsí quida vii-nsí chuun ma, vàchi divi ducán nduá xiñuhu quida nsidaa ana dandacú nùu chuun xi inga nèhivì.

³ Doco yùhù, có-ndùlóquî nú cachí-nsià ñà-quidá vííí, ò á coó. Nì có-nàcání stná inì nú cachí dava ga nèhivì ñà-có-quidá vííí, te caná-né yùhù nùu iin juez. Nì yùhù, có-càchí stnáì sàhà míí, a quidá vííí, á coó.

⁴ Te mate có-dàndòhó sàxìnítñunî míí, doco có-cùnì cachàmà ñà-còò falta xi, vàchi mii Stoho-ndà Señor icúmí cachì a ní quida viíí, á coó.

⁵ Ñàyucànduá, màsà cuítnùhu-nda ñanìtnaha-nda, vàchi tàsàà quìvì cundaà ndisa ini-ndà. Dècuèndè naxicocuîñ-yà, dandu natùì claru nansa ndisa iá nsidaa chuun iá dèhé vichi. Dandu mii-yá datúì-ya nansa nihnú ini cada iin iin-nda, te cachi-yà xì-ndà ndé tantu sàni quida vii iin iin-nda.

⁶ Cunaha-nsiá, sàhà ñà-vàha xi-nsia sàni cachì xì-nsiá nsidaájàn sàhà Apolo xì yùhù, ñàni, áma mánìhì ini-nsià ñà-mà váha dayáha-nda ñà-nduá cachí tutu ì, vàchi mà váha ndenihi cahnu-nda iin (ana nchícùn-ndà), mientras inga-nè cahíchì ini-ndà; cóó.

⁷ Vàchi iin-nì xínduu-nsia xì nsidanicuú gá nèhivì. Nsidaa ñà-nduá sàni nìhìtáhvì-nsiá, ñà-nduá nì dàcútáhvì Dios mii-nsiá nduá. Te nú sàni cutahvì uun-nda iñàha, dandu mà váha cutuxi ini-ndà chicá ndiaá-ndà sàhámà, vàchi ñà-nì cutahvì uun-nda nduá.

⁸ Doco vichi nihnú ini-nsia na ian sàni nducuíca-nsiá. Sàni ndanchito ducún-nsiá na iin rey cahan-nsiá, te menos nì ndòo nsiùhù nùu-nsiá. A sácú váha nú nì cundúú ndisa-nsia ana chicá dandacú, dandu nsiùhù, sàà stná-nsì cutnahá-nsí xì-nsiá dandacu-nda.

⁹ Doco nsiùhù nècuàchì apóstol, sàni sàha Dios nsiùhù iin lugar chicá cahà-xí tuxí inì, na ian nì cundúú-nsí nèhivì fuerza icúmí cui sàhà-ñá cundehè nèhivì (nansa ndohó-nsí. Doco cunaha-nsiá,) indéhe stná àngel mozo xi Dios.

¹⁰ Vàchi sàhà-ñá nchícùn-nsì Cristu, ndeníhì nèhivì nsiùhù nahi nècuàchì loco. Doco mii-nsiá, (mà loco-nsià); nchichí gá-nsià cahan-nsiá ñà-ndòó-nsiá ladu xi-ya. Nsiùhù, còò nì-iñàha níhìndèè-nsí cahan nèhivì; doco mii-nsiá, cuàhà gá poder xi-nsia iá (cahan-nsiá). Cahíchì stná ini nèhivì nsiùhù; doco mii-nsiá, iá tñùñuhu xí-nsiá nùu-né.

¹¹ Nsiùhù, dècuèndè vichi xíhì-nsì doco, xíhì-nsì tècuíí, còò ñá-cundixi vii-nsí. Sahnì cuií stná-nè nsiùhù, te xicánúú stná-nsì yoho yucán, vàchi còò nì-iin xaan ndé cundoo saín-nsí.

¹² Ndee quidáchúñ-nsí, te nú cánàhá-nè xì-nsí, dandu vivíí-nì naxícónihî-nsí nùu-né. Te nú quidá quíní-né xì-nsí, dandu quidándéé ini-nsí.

¹³ Te nú cànàn quini-ne xì-nsí, dandu calma-nì sàha-nsinè ichì váha. Doco mii-né, ndeníhì-né nsiùhù nahi mihì chicuéhè, te ò ana chicá còò chuun-xi.

¹⁴ Pues, ¿índù chuun cachí xì-nsiá ducán? ¿A sàhà-ñá cuní cucahan nùu-nsiá nduá? Còò, cuisì sàhà ñà-nì sàà-nsià cundaà váha ini-nsià, vàchi nahi dèhi nduú-nsiá, te màni-nsiá nùí.

¹⁵ Pues mate ni cúndóo ùxin mil ana dacuahá nchichí xì-nsiá ichì Cristu, doco imindaa ana nduú ndisa nahi yua-nsiá, divi yùhù. Vàchi yùhù nì cachitnùhi xì-nsiá razón ndiaha sàhà Jesucristu, ñàyùcàndüá divi nahi dèhi xínduu-nsia.

¹⁶ Sàhà ñà-jaàn sacúndáhvî nùù-nsiá ñà-iin-ni quida-nsia nacua quidá yùhù.

¹⁷ Ñà-jaàn nduá dísáhà-xí sàni techuín Timoteo sàà-nè ndé ndoó-nsiá, vàchi mii-né, nchícùn vii-né Stoho-ndà Señor. Na iin dèhi nduú stná-nè, te màni gá-nè nùí. Pues divi icúmí càhàn xì-nsiá, te dansínúú ini-nè mii-nsiá nansa iá modo-xi nchícùn Cristu nacua nduá chináhi nèhivì nsidanicuú lugar ndé natácá-nè cahvi-néyà.

¹⁸ Doco vichi, ináhî, ndee xícàhàn dava-nsia, vàchi tuxí inì-nsia mà sài ndé ndoó-nsiá.

¹⁹ Doco yàchì icúmí sài, nú cuní mii-yá, dandu cundaà inì sàhà nècuàchì càhàn ndee guá mà, a ndísá icúmí-nè ndudu ì, á coó.

²⁰ Vàchi ley xi ñuhivì ì xí Dios, màdì palabra uun nduá. Còó, poder xi mii-yá nduá icúmí stná.

²¹ Pues vichi cachi-nsiá xí nansa cuní-nsiá quide. ¿A cuní-nsiá sài, te càhàn ndeí xì-nsiá, te ò cuní-nsiá sài càhàn màni xì-nsiá, te cundoo vii-ndà?

5

Nansa nì cachi Pablo xiñuhu quida nèhivì ñuu Corinto xì iin tiàa cóni quidá ví xi iin nècuàchì ñahà

¹ Cachí nèhivì nacání-né xí ñà-lá iin-nsia nì là xi dihi (quíin-xi). Cunaha-nsiá, cahnú cuàchi nduájàn; dècuèndè nèhivì có-ínáhá sàhà Dios, ni có-quidá-né ducán.

² Doco mii-nsiá, (ndahví-nsiá), vàchi tuxí vá ini-nsiá ndiaha gá-nsiá. Doco ndiá ìcà-nsiá màcùndoo-nsia tnúnsí ini, te tavà cuàán-nsiá tiàa nì quida ducán ñà-màsà cóó gá-nè nùù-nsiá.

³ Te yùhù, mate xica ié, doco na ian jaàn iá anímè cutnáhî xì-nsiá, ducán nduá; te sàni nacani inì sàhà chuun jaàn, ñàyùcàndüá, cuàhìn cachì xì-nsiá nansa quida-nsia xì nècuàchì nì quida xi cuàchi ma.

⁴⁻⁵ Xiñuhu nataca nsidaa-nsiá, te coo stná ndudu ì xí Stoho-ndà Jesucristu, te na ian coo stná anímè xì-nsiá cundua. Dandu ndacùcahan-nsiá quivì-yá, te cachi-nsiá xì nècuàchì mà ñà-ìcúmí-ndá naco-ndané nùù ndahà ñà-malu, te ducán nihì iquicúñú-nè iin castigu sàhà-ñá después càcu anima-nè quivì (màcuíta-nda nùù) Stoho-ndà Jesús.

Ejemplu nì sanduu vicò pascua sàhana na nisa cuxio nsihi pan nihí levadura nsidátáchí xân

⁶ Mii-nsiá, tuxí ini-nsiá ñà-vii gá xí quida-nsia vichi, doco còó, có-lá vii ñà-ndüá quidá-nsiá. ¿A có-ínáhá-nsiá dichu cachí: “Mate iyuhu-ní tàtnà nsidátáchí xí pan queé, doco cuàhà gá ndutáchâ”? (Te ducán iá stná xì falta, mate iyuhu-ní-ñá ni coó, doco xítia inicutu.)

⁷ Ñàyùcàndüá, (xiñuhu cuxio nsidaa ñà-quini nisa là antes, dandu nanduu-nda nèhivì sàà xí Dios, cunduu-nda nahi) yusàn pan cóni queé ni iyuhu ñà-nsidátáchí xân. Vàchi mii-yá, sàndèníhí-yándó nduu-nda nèhivì sàà còó falta-xi ñà-sàni xihì Cristu cuenta xi-nda. Te ducán queámà na ian quidá-né vicò pascua (na xihì lelù nduú promesa), vàchi Cristu nduú nahi promesa xi-nda.

⁸ Te vicò pascua mà, puru pan có-ndütáchí xixí-né. (Te ejemplu nduámà.) Ñàyùcàndüá ndohó, puru ñà-ndüú ñà-ndáà cuisì ni cúnchícùn-ndà. Màsà dátiaâ uun-nda quida-nda ñà-lá vaha, vàchi queámà na ian có-chívàha vii-ndà vicò mà; te màsà cúníhnú chicuèhè stná ini-ndà, te ni màsà quidá-ndá ni-iin ñà-lá quini, vàchi nú ducán, dandu queámà na ian có-chívàha vii-ndà vicò, te na ian cóni cúxíó nsihi tàtnà nsidátáchí xí pan mà.

⁹ Nùù inga tutu nì tiai antes nì cachì xì-nsiá ñà-màsà cútnáhá-ndá xí nèhivì tùha càhàn xì ana cóni nándàhà xì-né.

¹⁰ Ducán nì tiai nùu-nsiá, doco có-cùnì cachàmà ñà-nacoo-nsia nsidanicuú nèhivì xíquida ducán ñuhiví yohó, vèchi cuisì inga ñuhiví cunduu lugar ndé mà cútnáhâ gá-ndà xì nècuàchìmà, vèchi ñuhiví yohó ndoó cuáhà ana có-quidá víi: xího-né cucumi-né cuàhà ñà-cuicà, o xidácuíhná-nê, te ò xicàn tàhvì-né nùu ñá-cô-nduú Dios.

¹¹ Doco ñà-nduá nì cachì nùu carta mà nduá yohó: nú nècuàchì có-quidá víi ma nduú iin ñani-ndà (iin-ni cahvi xi mii-yá), dandu màsà cútnáhâ gá-ndà xì-né nú iá cuàchi-ne sàhà nècuàchì ñahà, te ò túha-ne xihò-né ñà-ìcúmí ñanìtnaha-ne, te ò cahvi-né iin ñà-có-nduú Dios, te ò túha-ne canàhá-nè, te ò túha-ne xìni-ne, te ò xidácuíhná-nê, dandu màsà cútnáhâ gá-ndà xì-né. Ni nácóó dahuun-ndané; ni màsà cuáhàndee ini-ndà cuxi-nda xi-né.

¹²⁻¹³ Cunaha-nsiá, có-quidá tocar yùhù nsidandaì sàhà cuàchi nèhivì có-nchìcùn ichì mii-yá. Mii-yá quida xi ñà-jaàn. Doco mii-nsiá, fuerza icúmí-nsiâ cachi-nsià nansa cuu xi nèhivì cutnáhâ xí-nsiâ nú ni sàà-nè quida-ne cuàchi. Ñàyùcànduá, dohó cachì xì-nsiá: ni cúxíó dahuun tiàa iá falta-xi ma nùu-nsiá.

6

Màsà cúhùn-ndà nùu juez, te canicuàchi stnaha-nda sàhà-ndà, cachì Pablo

¹ Có-ndiá ìcà-nsiá canicuàchi stnahá-nsiá sàhà-nsiá nùu iin juez có-xiníndísá-xí ichì Dios. Chicá vaha nùu nèhivì xí mii-yá ni ndúndàà sàhà chuun xi-nsia.

² Amádi sà-ìnhá-nsiâ ñà-divi ndohó nèhivì xí-yá cunduu ana (chindee) nsidandaà-xì sàhà nèhivì ñuhiví yohó quivì juiciu. Pues nú ducán nduá, dandu ádi vátuni sàà-ndà nsidandaà-ndà sàhà chuun cuatiluha cuú ofrecer tiempu vichi.

³ Cunaha-nsiá, dècuèndè stná ángel icúmí-ndá nsidandaà-ndà sàhà-xí. Pues nú ducán, dandu ádi mà úhì nsidandaà stná-ndà sàhà chuun sencillu iá ñuhiví yohó-ní.

⁴ Ñàyùcànduá, nú iá iin pleitu xi-nsia, dandu xiñuhu nacàxin-nsia nèhivì tuxí inì-nsia chicá mà nchìchì, te mii-né nsidandaà sàhájàn.

⁵ Pues, ñà-jaàn cachì uin xì-nsiá áma cúcáhan nùu-nsiá sàhájàn. ¿A ndísá còò ni-iin ñani-ndà nchìchì mahì-nsiá? ¿A ndísá còò iin cui nsidandaà sàhà chuun xi iin-nsia inga-nsiá?

⁶ Doco (ndahví-nsiá), vèchi sàhàn-nsiá sanícuàchi stnahá-nsiá sàhà-nsiá, mate iin-ni ñaní xínduu-nda. Dècuèndè nùu iin juez có-xiníndísâ (xí Jesús) sàhàn-nsiá.

⁷ Ñàyùcànduá, iin falta cahnú xí-nsiá nduájàn, vèchi có-ndiá ìcà-ndà canicuàchi stnaha-nda sàhà-ndà. Chicá vaha ni cuàha-nda quidaquini-ne xì-ndà, te quidandee ini-ndà. Chicá vaha nacoo-ndané cahnìndàhvì-nèndó.

⁸ Doco mii-nsiá, có-quidándéé stnahá ini-nsiá sàhà-nsiá. Còó. Dècuèndè quidáquínì-nsiá xì ñanìtnaha-nsia, te xidándiáá-nsiá ñà-nduá icúmí-né, mate iin-ni ñaní xínduu nsidaa-nda.

⁹ Sà-ìnhá-nsiâ ñà-mà níhì nèhivì malu sàà-nè ñuhiví ìì xí Dios. Ñàyùcànduá, màsà dándàhvì ni-iin nèhivì mii-nsiá, vèchi mà cúndiátû anima ni-iin nèhivì nchìcùn xì ñahà, ni-iin stná nèhivì cahvi xi yuù ò figura, ni-iin stná nèhivì iá xì inga ana có-nduú nècuàchì vehe-ne, ni-iin stná nèhivì nduú ùì nèhivì,

¹⁰ ni-iin tècuíhnà, ni-iin stná ana túha xího xi ñà-ìcúmí inga nèhivì, ni-iin stná tè-xíni, ni-iin stná tè-túha canàhá, ni-iin stná tè-sàhníndàhvì xì ñanìtnaha xi. Ni-iin nècuàchì jaàn mà níhìtáhvì xì ñuhiví ìì xí Dios.

¹¹ Te mii-nsiá, divi ducán nìsa quida dava-nsia antes. Doco sàni ndoo cuàchi-nsiamà, te sàni ndu-ìì stná anima-nsiá. Ñàyùcànduá, nèhivì vaha sanduú-nsiá nùu mii-yá vichi. Ducán nì cuu xi-nsiá na ní (xiníndísá-nsiá palabra ìì, te nì) ndacùcahan-nsiá quivì Stoho-ndà Jesucristu, vèchi nì chindee stná Espíritu ìì xí Yua-nda Dios.

Nsidaa-nda xiñuhu quidañuhu-nda cuerpu xi-nda; màsà quidá ndevàha-nda xi mii-nda

12 (Cachí nêhivì:) “Vàtùni quida-nda ñà-nduá cudî ini-nda”. Pues vihini, doco màdì nsidaa ñàha nduá iin ñà-chìndéé xí-ndá. Mate vihini quida-nda ñà-nduá cuní-nda, doco màsà cuáha-nda cundee ni-iin ñà-có-íá vâha nù sàxínítnùnì-nda.

13 Vâchi dohó cachí stná iin dichu: “Tìxi-nda nduú fin xi ñà-nduá xixi-nda, te chuun quidá tìxi-nda nduú stná ñà-cuñuhamá”. Doco cunaha-nsiá, iin-ni fin icúmí nduájàn, vâchi vâxi iin quivì icúmí Dios dandáñúhú-yâ nsidaájàn. Te cuerpu xi-nda, ¿índù chuun icúmí? Pues màdì-ñá coo-nda xi ndéni ñahà ní cui; còó. Divi ñà-cunucuachi víi-nda nù Stoho-nda Señor nduú chuun xan. Te cunaha-nsiá, íá stná-yâ sàhà-nda.

14 Ñâyùcànduá, nacua nì natiacu-yâ nì quida Yuamáni-yâ Dios, divi ducán stná ndohó, icúmí-nda natiacu stná-nda quida ndudu ì xí-yá.

15 ¿A có-nsínúú inì-nsia ñà-ndahàsàhà Cristu nduu-nda? Te nú ducán, ¿a íá vâha coo stná-nda xì iin ñahà ndevâha, nú nahi ndahàsàhà-yâ sànduù-nda? Còó, màsà nunca quida-nda ducán.

16 ¿A có-nsínuu stná inì-nsia nansa íá xì iin tiàa nì quida iin cuàchi xi iin ñahà ndevâha, ñà-iin-ni nêhivì sàni nanduu-ne? Vâchi ducán cachí tutu ì: “Ín-ni nêhivì cunduu ndú-nè, (nècuàchì tiàa xi nècuàchì ñahà)”.

17 Doco nú sàni yâha-nda ndahà Stoho-nda Señor, dandu iin-ni anima sàni nanduu-nda xi mii-yá.

18 Ñâyùcànduá, nacoo dahuun-nsia cuàchi ñà-càhàn-nda xì inga ana cóni nándàhà xì-nda. Nsidaa cuàchi dava ga, có-quidá quíni guâ xì iquícúñú-nda. Doco nú ni quida-nda iin falta xì iin nècuàchì ñahà, dandu ñà-sàni quida-nda cuàchi nù cuerpu xi mii-nda nduájàn.

19 ¿A có-ínáhá-nsiâ ñà-vehe Espíritu ì xí-yá nduú cuerpu xi-nda, vâchi sàni nihítàhvì-nda Yâ-ì mà nù-yá? Ñâyùcànduá, màdiá mii-nda nduu-nda stoho-nda;

20 còó. Mii-yá, sàni xiin-yándó na ní dånáa-yâ sàhà-nda, te sàhámà nsidaa ñà-nduá quidà-nda na itiácú-nda xì cuerpu xi-nda, divi sàhà tnùñuhu xí mii-yá ni cúndúá.

7

Nansa xiñuhu quida-nda xi nècuàchì vehe-nda

1 Vichì cuàhìn càhìn xì-nsiá sàhà ñà-nduá nì tiàa-nsia nùí. Cunaha-nsiá, cuaha-ni íá nú íá mii iin tiàa, te có-íá-nè xì ni-iin nècuàchì ñahà.

2 Doco còtó quida nècuàchì mà iin cuàchi, chicá vâha ni nándàhà-né; te ducání stná nècuàchì ñahà, chicá vâha ni cúcúmí-nè ì-né.

3 Te cada iin iin tiàa sàni nandàhà, ndiá ìcà-né quida ndisa-ne cumplir chuun nì nihì-né ñà-coo-ne xì ñahàdìhì-nè. Stná nècuàchì ñahà, ndiá ìcà stná-nè quida vii-né cumplir nacua nduú chuun xi-ne ñà-coo stná-nè xì ì-né.

4 Màdì micuísì nècuàchì ñahà nduú ana cachi nansa quida-ne, a coo-ne xì ì-né, á coó. Icúmí cachi stná nècuàchì tiàa. Te ducání stná nècuàchì tiàa ma, màdì cuisì mii-né cachi stná-nè nansa quida-ne xì ñahàdìhì-nè, vâchi icúmí cachi stná nècuàchì ñahà.

5 Màsà cáchì-nsiâ “còó” nù nècuàchì vehe-nsia. Cuisì nú vihini cuní-nsiâ cunihì-nsiâ iin ù quivì sàhà-ñá càcàn tàhvì-nsiâ nù Dios. Dandu después nacua stnahá-nsiâ, vâchi nú coó, vihini dacà ñà-malu Satanás sàxínítnùnì-nsiâ ñà-có-cùndéé gâ ini-nsiâ cunihì-nsiâ.

6 Nsidaa ñà-jaàn cachí xì-nsiá, doco màdì ñà-dàndàcuí nù-nsiâ nduá; còó. Cuisì cachí xì-nsiá ducán sàhà-ñá cundaà ini-nsiâ nansa íá iin ñà-vâha cui quida-nsia.

7 Vâchi yùhù, cudì inì nú ni quidá nsidaa nêhivì nacua quidé, (ñà-có-ìé` xì ni-iin nècuàchì ñahà). Doco cada iin iin-nda según nansa nì nihítàhvì-nda nù Dios, vâchi tucu tucu sàhatahvì-yâ iin iin-nda.

8 Ñâyùcànduá, yùhù cachí xì nsidaa nècuàchì ñahà cuaán, xì nsidaa stná nècuàchì tañáha ga nandàhà, ndiaha gá coo xi-né nú ni quidá-né nahi yùhù (ñà-còni nándàhì).

⁹ Doco nú mà cúndéé ini-nè cunihii-né ducán, dandu ni nándàhà-né chicá vaha, te màsà cacánúú-né xího stnahá uun-ne.

¹⁰ Doco nèhivì sàni nandàhà, iá ndisa ñà-nduá dandacuí nùù-né. Te màdì cuísi yùhù cachí xì-né palabra yohó; vachi ducán dandacú stná Stoho-ndà Señor. Te dohó cachí-yà: ni-iin nècuàchì ñahà màsà nácóó-né ì-né.

¹¹ Doco nú sàni nacoó-ne nècuàchì mà, dandu (màsà nándàhà gá-nè xì inga tiàa). Iin-ni ni coó mii-né, te nú coó, ni nácóócuùin-nè nacuastnahá-né xì ì-né. Daaní, divi ducání xí stná nècuàchì tiàa, màsà cátéstnahá stná-nè xì ñahàdihí-nè.

¹² Daaní, mii-nsiá nècuàchì dava ga tu, cuísi cuàhìn cachí xì-nsiá ñà-nduá nacání uun inì, vachi có-nduá iin ley dandacú Dios. Nú iá iin ñani-ndà có-xiníndísá ñahàdihí-xi, màsà cáté-nè nècuàchì mà nú cudíi ini nècuàchì mà coo ndisa-ne xì ì-némà.

¹³ Te ducání stná xì nècuàchì ñahà: mate có-xiníndísá ì-né, doco chicá vaha màsà cáté stná-nè ì-né, nú cudíi ini nècuàchì mà coo ndisa-ne xì ñahàdihí-némà.

¹⁴ Vachi mate cuísi nècuàchì ñahà xiníndísá, doco sàhájàn chicá mà úhì cundiatú stná ì-né nùù Dios; te ducání stná nècuàchì ñahà có-xiníndísá, nú nècuàchì xiníndísá nduú ì-né. Doco nú nduú-nè có-xiníndísá-né, dandu ùhì iá cundiatú méè xi-ne. Doco nú xiníndísá-né, (mate imindaa-né), dandu méè ì ndisa cunduu-ve.

¹⁵ Doco cunaha-nsiá, nú cuní nècuàchì có-xiníndísá-má quecuaán-né, dandu mà cútnúú-ní, pues ni cùhùn-nè. Te nú sàcuàhàn-nè, dandu libre iá nècuàchì xiníndísá ni ndòò, ò sea nècuàchì tiàa ò nècuàchì ñahà ni cúndúú-né. Doco ¿índù ñà-chicá cuní Dios quida-nda? Divi ñà-cundoo manì-ndà.

¹⁶ Vachi iin nècuàchì ñahà, có-ínahá-nè ñà-vihini sàhà mii-né sàà nècuàchì vehe-ne càcu stná anima-nè. Te có-ínahá stná iin nècuàchì tiàa, pues vihini sàhà mii-né sàà stná ñahàdihí-nè càcu-ne.

Màsà nácání ini-ndà nansa ndenihì nèhivì ñuhiví yohó ndohó

¹⁷ Nacua nduú modo ni chitnùnì ini Dios cundoo-nda ñuhiví, ducán xiñuhu cundoo cuéyàa-ndà. Nacua iá-ndà na ní quìhi-nda ichì-yá, ducán xiñuhu quida-nda seguir. Divi palabra jaàn nduá cachí xì nsidaa nèhivì cahvi xi-yá.

¹⁸ Vachi nú sà-ítúú seña xi Dios ìcà-ndà na ní quìhi-nda ichì-yá, dandu màsà nándúcú-ndá nansa ndutu ñà-jaàn. Te ducání stná, nú còò seña mà ìcà-ndà na ní quìhi-nda ichì-yá, dandu màsà nándúcú-ndá nansa màcùtua ìcà-ndà.

¹⁹ Vachi seña mà, nú itúá, ò nú có-ítúá, còò ni-íñàha cuní cachàmà. Doco ñà-chivàha-nda ñà-nduá dandacú-yá, ñà-jaàn ndisa nduú ñà-ndiáá.

²⁰ Doco nacua ni sandoo iin iin-nda na ní quìhi-nda ichì-yá, divi ducán ni cúndóó ì-ndà.

²¹ Dava-nsia, có-ndòò-nsiá libre, fuerza quidáchúùn-nsiá nùù lamú xi-nsia, te ducán nìsa ìa stná quivì ni quìhi-nsia ichì-yá. Doco màsà nácání ini-nsiá sàhájàn; còò. Doco nú iá nansa cui caquee-nsia libre, dandu chicá vaha ni quidá stná-nsiá aprovechar.

²² Cunaha-nsiá, mate fuerza quidáchúún-ndá quidá inga nèhivì, doco nú ichì Stoho-ndà Cristu nduá nchícùn-ndà, dandu libre iá-ndà nùù mii-yá. Te divi ducán stná, nú nèhivì xicánúú libre nduu-nda vichi, dandu iá stná ana xinúcuáchí-ndá nùù-xì, divi mii-yá.

²³ Te sàni dànàà-yá sàhà-ndá. Ñàyùcànduá, màsà cuáha-nda quida-nda chuun ni dàndàcú ana nduú nèhivì ùùn.

²⁴ (Pues sàhà nsidaájàn yùhù cachí xì-nsiá) ñà-nacua ndoo-nda antes na táñaha ga quìhi-nda ichì-yá, divi ducán ni cúndóó ì stná-ndà vichi, ñáni.

²⁵ Vichi cuàhìn càhìn sàhà ñahà cuàchì táñaha ga nandàhà. Còò ni-íñàha ni cachí Stoho-ndà Señor xí sàhà nècuàchì mà, doco sàhà gracia xi-ya, vètùni cahvi-nsia xì conseju sáhi mii-nsiá. Pues sàhàmà cuàhìn cachí ñà-nduá nihnú uun inì:

²⁶ chicá vaha iin-ni ni cúndóó-ndá nacua ndoo-nda vichi cahan yùhù, vachi tiempu ùhì nduá vichi.

²⁷ Ñàyùcànduá, nú iá ñahàdihí-ndà, dandu màsà cátéstnàhà-ndà. Te nú còò ñahàdihí-ndà, dandu chicá vaha màsà nándúcú-ndá nansa nandàhà-ndà.

²⁸ Doco nú ni nándàhà iin tiàa, màdì cuáchi nduá. Te ò nú ni nándàhà iin ñahà chii, màdì cuáchi nduú stná. Cuisiá mà mánì tnùndoho yàha-ne, te yùhù, có-cùnì ndoho guá-nsià.

²⁹ Cunaha-nsiá, mà váxi ga cuàhà tiempu, ñàni. Ñàyùcàndùá, nú iá ñahàdihí-ndà, màsà cúníhnú ini-ndà nduámà iin chuun chicá cahnú.

³⁰ Te nú sacu-nda (sàhà iin tnùndoho), màsà ndúlócô gà-ndà sàhájàn. Te nú cudî ini-ndà sàhà iñàha, màsà cútúxí ini-ndà chuun chicá ndiaá nduá. Te nú sàni xiin-nda iin traste, màsà cúníhnú ini-ndà yàha ga xiñuhá nùù-ndà.

³¹ Te nú icúmí-ndá cuàhà chuun ñuhiví yohó, màsà ndúlócô cuàhà-ndà sàhájàn, vàchi ñuhiví yohó, icúmíâ ndañuhá.

³² Yùhù, có-cùnì nacani cuahà inì-nsia sàhà ni-iñàha. Iin nèhivì còò nècuàchì vehe-xi, (mà úhì) nihnú ini-nè sàhà chuun xi Stoho-ndà Señor nansa quida-ne, te cudî ini-yà.

³³ Doco iin nècuàchì iá ñahàdihí-xi, chicá nacání ini-nè sàhà chuun xi ñuhiví yohó, vàchi nandúcú-nè nansa cudî ini ñahàdihí-nè.

³⁴ Daaní, iin nècuàchì ñahà sàni nandàhà, tucu quidá stná-nè nùù iin nècuàchì còò íi-xí. Nècuàchì còò íi-xí, (mà úhì) nihnú ini-nè chuun xi Stoho-ndà Señor, vàchi cuní-nè cundiaa-nè mii-né, te coo ndoo anima-nè, dandu cunduu-ne iin nèhivì ìi xí-yá. Doco iin nècuàchì iá ìi-xí, chicá nihnú ini-nè chuun xi ñuhiví yohó, vàchi nacání ini-nè sàhà nècuàchì vehe-ne.

³⁵ Pues, nsidaa ñà-jaàn cachí xì-nsiá sàhà ñà-cunduu ñà-vàha xi-nsia, màdì sàhà-ñá cadì nùù-nsiá iin modo có-ndiá ìqué. Cuisì cuní quida-nsia ñà-íá viì, te niñi-nsiá cunucuachi víi-nsiá nùù Stoho-ndà Señor, màdiá coo iin ñà-mà cùì chivàha-nsia.

³⁶ Pues ni cachí-ndà iá iin tiàa yàha ga cuní nandàhà xì ana cudî inì-te, te có-quidá víi-té ñà-íá miá cahan-té. Pues nú ducán nduá xiñuhu coo, dandu vátùni quida-tè nacua nihnú inì-te, divi ñà-nandàhà-té xí-ñâ, màdì cuáchi cundua.

³⁷ Doco nú iin-ni sàni nacani vaha inì-te, te còò necesidad nandàhà-té, vátùni quidandee inì-te, cachí-te, dandu ñà-jaàn quidá víi-té. Iin-ni sàni nacani inì-te ñà-mà nándàhà-té, te amiga xi-te mà, señorita quida ìi-ñá seguir cunduu-ñà.

³⁸ Ñàyùcàndùá, (ndújàjàn, vátùni iá'): nú ni nándàhà-té xí-ñâ, vátùni iá ñà-nduá quidá-te; te nú ni cachí-te mà nándàhà-té, vátùni quidá stná-te, doco chicá nsiha ndujàn nùù ingà mà.

³⁹ Iin nècuàchì ñahà sàni nandàhà, iin-ni icúmí-nè coo-ne xì ìi-né ndè cachi sàà cui nècuàchìmà. Doco nú sàni xihì nècuàchìmà, dandu libre iá-nè nandàhà-né xì inga tiàa cudî ini-nè, cuisì-ní ni cundúú stná inga tiàa ma iin nèhivì xí Stoho-ndà Señor.

⁴⁰ Doco nú ni cachí-nè mà nándàhà-gá-nè, dandu chicá ndiaha quea, tuxí ini yùhù. Te yùhù quidé cuenta chindéé stná Espíritu ìi xí Dios sàxìnìtnùnì.

8

Màsà cáxi-nda ò cuxi-nda ñà-nduá chindóó nèhivì nùù ñà-nduá cahvi-né

¹ Vichi cuàhìn càhìn sàhà nansa quida-nda xi ñà-nduú ofrenda chindóó nèhivì nùù ñà-càhvì-né. Pues vihini cachi-ndà: “Nsidaa-nda ináhá vaha-nda (sàhà chuun jaàn)”. Doco nú ducán cachí-ndà ñà-ináhá cuàhà-ndà iñàha, dandu queámà na ian ndiaá gà-ndà tuxí ini-ndà. Doco nú cuú ndisa ini-ndà sàhà ñanìtnaha-nda, dandísá sàà-ndà cunduu-nda nèhivì ndiaá ndisa.

² Te nú tuxí ini-ndà ináhá cuàhà-ndà, dandu cumánì gá ñà-cundaà vaha ini-ndà nacua ndiá ìcà-ndà.

³ Doco nú cuú ini-ndà sàhà Dios, dandu mii-yá, ináhá ndisa stná-yà ndohó.

⁴ Ñàyùcàndùá, ñà-yòhó nduá cachí sàhà ofrenda chindóó nèhivì nùù ñà-càhvì-né. Ináhá-ndá ñà-imindaa Dios iá, te còò ni-iñàha ndiaá figura iá ñuhiví yohó,

⁵ mate cuàhà gá ñà-nduá cachí nèhivì nduú ana cahvi-né ansivi ò ñuhiví, vàchi cuàhà iñàha cachí-nè nduú dios xi-ne ò stoho-nè.

⁶ Doco nùù ndohó, imindaa Yua-nda Dios íá. Cuisì mii-yá nì quidavàha xi nsidaa ñàha, te xinúcuáchí-ndá nùù-yá. Te imindaa stná Stoho-ndà Jesucristu cahvi-nda, vèchi sàhà ndudu ìì xí-yá nì sàcòo nsidaa ñà-íá, dècuèndè stná ndohó.

⁷ Doco màdì nsidaa nèhivì sànihì váha ini-nè sàhájàn. Vèchi dava nècuàchì xiníndísá, quidá ìì-né cuenta ñà-dàcútiácú ndisa xi figura mà nduú ofrenda chindóo nèhivì nùá, vèchi antes ducán nìsa quida stná-nè. Ñàyùcànduá, na xixí-né ofrenda mà vichi, nihnú ini-nè ñà-sàni cumanchá anima-nè nduá, vèchi tàñáha ga cutùha vaha-ne nacuni-nè sàhámà.

⁸ Pues, nàhà claru màdì xì ñà-itiácú-ndà icúmí-ndá ndee vaha-nda nùù Dios, vèchi nú sàni saxí-ndà ñàha, màdiá chicá ndiaá-ndà, te ò nú có-cùní-ndà caxí-ndà ñàha, iin-ni íá stná-ndà, (còni xidá cuàchi-nda.)

⁹ Doco cuidadu ni cùndóo-ndá, vèchi mate íá derechu xi-nda (caxí-ndà ñà-yúcán), doco vihini coo iin nèhivì có-cùndàà ini-xi sàhámà, te vihini sàhà ndohó cuida cuàchi-ne.

¹⁰ ¿Índù modo? Pues, ni cachí-ndà sàni xini iin nèhivì mii-nsiá nècuàchì ináhá guá, te nì quìhvi-nsia vehe ndé itá ñà-nduá cahvi nèhivì, te ndoó-nsiá vehe ma, xixí-nsiá ofrenda xi-ñamà. Te nèhivì nì xini xì-nsiá mà, nú ni cùndúú-né iin nècuàchì có-cùndàà vaha inì-xi, vihini cuàhandee stná ini-nè caxí stná-nè ñà-jaàn.

¹¹ Ñàyùcànduá, sàhà-ñá tuxí mii-nsiá ináhá guá-nsiá (nansa quidá-nsiá), vihini dandáñuhú-nsiá anima ñanìtnaha-nsia, mate sàhà stná mii-né nì xihì Cristu.

¹² Ñàyùcànduá, có-queé víámà, vèchi nú ni quida-nda cuàchi nùù ñanìtnaha-nda ducán, dandu nùù stná Cristu nì quida stná-ndà cuàchi queámà, vèchi sàni dàtúcù-ndà sàxinítnùni nècuàchì mà ñà-có-sàà-nè cundaà vaha ini-nè.

¹³ Ñàyùcànduá, yùhù, nú cuàhàn iin ñanìtnahi quida-ne iin cuàchi sàhà ñà-nduá cuní caxí nì cùí, dandu chicá vaha màsà nunca caxí gué ni-iin cuñu mà, còtó cuida cuàchi iin ñanìtnahi.

9

Nansa nì cachi Pablo xì nèhivì xítñuhu xi-né ñà-quidáchúùn-né nahi dava ga nèhivì

¹ Yùhù, ¿amádi libre íé? ¿Amádi iin nècuàchì apóstol nduú stnáí? Dècuèndè mii Stoho-ndà Jesús sàni xinínùù stnáí. Te mii-nsiá, ináhá stná-nsiá nì quide chuun ndiaha xí-yá ndé ndoó-nsiá, te nì xinindisá-nsiá mii-yá.

² Vihini có-nàcùní dava nèhivì yùhù ñà-nduú ndise iin apóstol, doco mii-nsiá, ináhá vaha-nsia, vèchi ñà-sàhà yùhù sà-xiníndísá-nsiá ichì-yá, divi sàhámà cundàà vaha ini-ndà ñà-nùù mii-yá sàni nihítáhvì chuun quidé.

³ Vichi cuàhìn cachì ñàha xi-nsiá, vèchi ndoó dava nèhivì xítñuhu xí.

⁴ Pues, ¿amádi íá stná derechu xi-nsi (cahvi-nsi xì-nsiá) ñà-dacuxí-nsiá nsiùhù?

⁵ Te amádi íá stná derechu xi-nsi nandàhà-nsí, te cundaca-nsi iin ñahàdihí-nsi nacua quidá stná ñani Stoho-ndà Señor, xì stná Pedro, xì stná dava ga nècuàchì apóstol.

⁶ Vihini tuxí ini-nsiá ñà-cuisì Bernabé xì yùhù xínduu nèhivì còo derechu-xi; doco íá stná derechu xi-nsi naco-nsi chuun xi ñuhivì yohó, te quida-nsi cuisì chuun ìì.

⁷ Vèchi ducán íá xì-nsí na ian quidá soldadu, màdì cuenta xi mii-té sàhàn-te guerra. (Còo.) Daaní, nacua quidá stná tè-ndiàà xì yutnù quisi vídì, saxí stná-te iin ùi-si; te ò nú quisi ndacá-te, íá stná derechu xi-tè cuhni-tè tèndodo-sí coho-tè.

⁸ Te màsà cútuxí stná inì-nsia ñà-sàhà-ñá có-nduì mii-yá, ñàyùcànduá, có-ndiàà palabra cachí jaàn. Còo, vèchi divi ducán cachí stná ley ìì ndé nì tiaa Moisés

⁹ nùù tutu ìì, te nì cachi Dios: “Màsà cùñuhú ñunù yuhù buey na sànihni-sì trigu cóya”. Pues, nàhà claru, màdì sàhà-ñá màni guá quisi mà nùù-yá nduá dísàhà-xí nì cachi-yá ducán.

¹⁰ Còo, sàhà ndohó nì cachi-yá ducán, (vèchi ejemplu) nduá, te cuní cachàmà ñà-ndià ìcà coo tnùndé ini xi nècuàchì (chináhá palabra ìì) ñà-nihì-né iin algu, divi nacua íá stná xì iin nècuàchì xitú, te ò iin peón dacóyo nùni, nihnú ini-nè nihì stná-né iyuhá.

11 Te nsiùhù, nú sàni cachitnùhu-nsi xì-nsiá meru palabra cutiacu ndiaha anima-nsiá, dandu amádi iyuhu nduá nú ni cuáha-nsia nsiùhù iyuhu ñà-cutiacu-nsi ñuhiví yohó.

12 Te nú ndoó nêhiví ðava ga iá derechu-xi càcàn-nê ñà-jaàn nùù-nsiá, dandu ¿amádi chicá iá stná derechu xi nsiùhù sàhà ñà-jaàn?

Doco còó; có-xìcàn-nsi ni-iñàha nùù-nsiá, mate iá ndisa derechu xi-nsi. Cuisì quidándéé ini-nsi, còtó nú ni càcàn-nsi iñàha cadiàmà nùù nêhiví, te mà cúníndísâ gá-nè razón ndiaha xí Cristu.

13 Ádi sá-ínahá stná-nsiá nansa xíquida dùtù quida-xi chuun ì veheñùhu (xi nècuàchì raza Judea), xixí-né promesa sàa yucán. Vachi dùtù xinúcuáchí nùù mesa ì ndé xìxìn quisì nduú promesa, níhì-né iyuhu cuñu mà.

14 Ñàyùcàndüá, nàhà claru sàni chitnùnì ini Stoho-ndà Señor ñà-dùcán quida stná nêhiví cachitnùhu razón ndiaha, divi sàhà chuun quidá-némà icúmí-nê nihì stná-nè ñà-cutiacu-nè.

15 Doco yùhù, cóni xíquèn ñà-jaàn nùù-nsiá, mate iá derechu xi. Ni màsà cútúxí stná inì-nsia a tiaí carta yohó ñà-quidé reclamu ñà-nduú derechu xi. Còó, chicá vaha díhna ni cuí, te (màdiá quidejàn), vachi nú ducán, dandu mà cúí gá cachì xì nêhiví ñà-nduá cudí guá inì cachì xì-né, (divi ñà-có-xíquèn ni-iñàha).

16 Ñà-ndáa nduá, razón ndiaha xí Dios nduá cachitnùhi; doco có-nìhnú inì camánì nêhiví yùhù sàhámà, vachi nihnú inì ñà-fuerza cachitnùhi palabra mà, te ndahví (gà cuú inì) nú màsà cáchitnùhi razón ndiaha ma.

17 Ñàyùcàndüá, nú cuisì yùhù nì chitnùnì inì cacanui xì palabra mà nì cuí, dandu vihini coo ñà-cunduu nahi raya xi. Doco nú nihnú inì ñà-fuerza quide chuun ma, dandu sàhájàn cundaà ini-ndà iin chuun ì nì nihí nùù mii-yá nduá.

18 Doco te nú ducán nì nihí chuun ma, dandu ¿índü iñàha cunduu tnùmanì nihítáhvi? Pues, divi ñà-uun-ni cachitnùhi xì nêhiví razón ndiaha xí Cristu, te có-quíyàhvi, mate iá derechu xi càquiàn, doco có-xíquèàn nùù-né.

19 Yùhù, libre ié; còò ni-iin ana cachi xí nansa quide. Doco nihnú inì ñà-ìé` sujetu nùù nsidaa nêhiví áma vihini sàa stná-nè cunchicùn-nè ichì mii-yá.

20 Yùhù, voluntad xì chívàha stnáì estilu xi nècuàchì raza-xi Judea na hora cutnáhí xì-né, áma sàa ðava-ne cunindisá stná-nè. Ñà-jaàn nduá quidé mate nùù yùhù có-ndiáa gà ley sànaaha xì-némà, doco voluntad xì mií nchícuìàn áma sàa stná ðava-ne cunindisá stná-nè.

21 Daaní, nú ié` cutnáhí xì nêhiví có-nchícùn estilu xi ley mà, dandu có-nchícùn stnáì-ñà, áma (chíndéé stná mà) ñà-cunindisá stná ðava-ne ichì-yá. Doco màsà cúníhnú inì-nsia ñà-nduú iin nêhiví còò ni-iin ley xi Dios nùù-xí; còó, vachi nchícùn ndisa stnáì ley xi Cristu.

22 Daaní, na ié` cutnáhí xì nêhiví mà-fuerte anima-xi, dandu quidá stnáì na quidá mii-né, áma níhí dacuní stnáì ðava-ne ichì váha. Vachi ducání quidé xì nsidaa nêhiví: nacua quidá mii-né, ducán quidá stnáì, áma sàa stná-nè càcu anima-nè.

23 Nsidaa ñà-jaàn quidé sàhà-ñá chicá quee tnùñuhu xí razón ndiaha xí-yá, dandu nihítáhvi stnáì iin ñà-ndiaha sàhà palabra mà.

24 Sà-ínahá-nsiâ, na xinú tècuachi carrera, cuisì imindaa-té níhì xì premiù, mate cuáhà-té nì dàðavá stnahá-te. Pues ducání iá stná xì ndohó, xiñuhu cuàhandee ini-nda, dandu nihítáhvi stná-ndà nùù-yá.

25 Daaní, nú cuàhàn tècuachi ma ðavavá stnahá-te ducán, xíndiáa stná-te mii-té, có-quidá ndevàha-tè xì mii-té (áma níhì-té cóó fuerte-te). Te ¿índü chuun? Divi sàhà-ñá cuní-te nihì-té (iin premiù tii) mà cúnáhá ni-iin ratu, iin sìcàté ndahà cuí yutnù cuñuhu ðinì-té. Doco ndohó, iin corona ndiaha mà nunca cutuhú nduá nihì-ndà nú ni cuàhandee ini-nda (cunchicùn-ndà mii-yá).

²⁶ Ñàyùcànduá, yùhù sáhandee cahnú inì, nahi tè-xínú carrera, doco ináhî índù nùù-xí cuàhìn. Te na quidá stná tècuachi ídiquí box, ducán sáhandee stná inì, doco có-ídiquí uin; ináhî ñà-nduá quidé.

²⁷ Sadí nùù ñà-xíhoé quide. Có-sáhi ñà-quida ndevàhi xì mií, còtó mà nátùì guè nùù mii-yá mate cuáhà gá sàni càhìn xì nèhivì dava ga sàhà ichì-yá.

10

Màsà cáhví-ndá figura nahi nìsa quida nèhivì Israel sàhana na ní caquee-ne ñuu Egipto

¹ Ñánì, cuní cundaà inì-nsia nansa nì cuu xi nèhivì sàhana, nsidanicuú-né (nì chindee Dios-nè), nìsa xìca-ne tìxi còndàhvì iin vico xí-yá, te nsidaa-né nì yàha uun stná-nè mahì mar yucán.

² Ñàyùcànduá, na ian cùù-xì-ndà na cuhî-ndà, ducan quida-nda cuenta sàhà mii-né na ian nì cuhì stná-nè tìxi vico mà xì ini mar mà, te ducán nì nanduu-ne nèhivì xí Moisés.

³ Daaní, iin-ni nìsa itiacu stná nsidaa-né ñà-nduá nì sàhatahvì Dios-nè,

⁴ te iin-ni nìsa xihi stná-nè tècuí ndiaha, divi tècuí nì cana nùù iin cavà. Te cavà mà, seña nì sandua nahi Cristu, vachi nì cutnahá stná-yà xì-né ichì cuàhàn-nè.

⁵ Pues mate ducán nì cuu xi-né, doco cóni ndóo ini Dios xì modo xi-ne, te ñàyùcànduá cuáhà sàstnùhù-né nì xihì nùù yucù yucán.

⁶ Cunaha-nsiá, nsidaa ñà-nduá nì cuu xi nèhivì sàhana mà, divi sàhà-ñá cundaà ini ndohó vichi nduá, màdí nchihò stná ini-ndà quida chicuéhè-ndà na ian nì quida mii-né.

⁷ Ni màsà cáhvì stná-ndà figura na ian nì quida dava-ne, vachi ducán nacání tutu ì: “Nì sàcùndoo-ne nì xixi-ne, te nì xihi-ne, dandu después nì ndacuìta-ne nì ìtasaha-né (nùù figura xi-ne)”, cachá.

⁸ Ni màsà cáhàn-ndà xì ana cóni nándàhà xì-ndà nacua nìsa quida dava nècuàchì yucán, vachi después nì xihì òcò ùnì mil-nè iin quivì-nì.

⁹ Ni màsà quidá canúú-ndá ñà-có-cunì Stoho-ndà Señor, vachi ducán nì quida dava-ne, te sàhàjàn nì ndecoyo cuáhà còò, nì tniì-siné, te nì xihì-nè.

¹⁰ Ni màsà cáhàn ndiaa-ndà (dìquì-yá) nacua nì quida dava-ne, te nì ndañuhu cuáhà-né nì quida ángel xi-ya.

¹¹ Cunaha-nsiá, nsidaájàn nì cuu xi nècuàchì sàhana mà sàhà ñà-nì cundáà ini-ndà (màsà quidá stná-ndà ducán). Vachi divi sàhà ndohó nì tiaa nsidaámà nùù tutu ì sàhà-ñá cundaà ini-ndà nansa quida-nda quivì vichi na xínu tiempu.

¹² Ñàyùcànduá, nú nihnú ini-ndà sà-íà vaha-nda nùù Dios, dandu ni caquín-ndà cuidadu còtó sàà-ndà quida stná-ndà iin cuàchì có-nihnú ini-ndà.

¹³ Nsidaa ñà-nduá yàha-nda vichi, cuisì ñà-ndohó stná nsidanicuú nèhivì ñuhivì nduá. Te vátùni cahvi viì-ndà xì-yá ñà-mà cuáha-ya cuu xi-nda ñà-nduá mà cundéé ini-ndà sàhà-xí. Còò, vachi (nú cuàhàn-ndà quida-nda iin cuàchì ni cuí), dandu siempre datúì Dios nansa càcu-nda nùájàn sàhà-ñá vátùni quidandee ini-ndà.

¹⁴ Ñàyùcànduá, cuidadu ni cundóó-nsiá, ñani màní; màsà nunca cahvi-nsiá ni-iin figura.

Cuisì nùù Dios ni cuáha-nda promesa xi-nda; te màsà cáxi-nda ò cúxí-ndá ñà-nduá nì chindoo nèhivì nùù figura

¹⁵ Cuàhìn cachì xì-nsiá iñàha, te mii-nsiá cachi-nsià xì, amádi ndisa á coó, vachi quidé cuenta xinduu-nsia nèhivì cundáà inì-xì.

¹⁶ Na (nacuitàhvì-ndà, xihi-nda) ñà-ñuhú copa ndiaha mà, te naquímànì-ndà mii-yá. Pues ducan quida-nda, te nihnú ini nsidaa-nda ñà-sàhà ndohó nì xitià nì-yá. Te na xixì stná-ndà pan ì, dandu iin-ni nihnú stná ini nsidaa-nda nansa nì sàha-ya iquicúñú-yà (sàhà-ndà). Sà-ìnhá-nsià nsidaájàn.

17 Ñàyùcàndùá nahi imindaa nêhivì sàni nanduu nsidaa-nda, mate cuáhà-ndà ndoó, vâchi iin-ni pan (ìi) xixí nsidaa-nda.

18 Cundehè-nsiá nansa xíquida nècuàchì raza Israel nú sàni sàha-ne iin quisi nduú promesa, te nì xihì-si nùù mesa ìi, dandu después saxí-né cuñù-si. Pues sàhà ñà-sàxí-né promesa mà, nàhà xicà xínduu stná-nè ana (nihnú ini xì religiòn mà).

19-20 Pues cachi nsidaájàn xì-nsiá, doco có-cuní cachàmà ñà-itiácú ndisa figura cahvi nêhivì có-ínahá xí Dios, ni có-cuní cachi stná ñà-ndiáá ndisa promesa sàha-neñà. Còó, doco cunaha-nsiá, iá ndisa ana ònùù-xí sàha-ne promesa xi-ne. Divi nùù ñà-malu sàha-neà, màdì nùù Dios. Te yùhù, có-cuní dahuin cunihnu ini-nsià quisi mà.

21 Vâchi còò permisù cuitahvì-ndà coho-nda copa ìi xí Dios, te después coho stná-ndà ñà-nduá sàha-ne ñà-malu; còó. Vâchi còò permisù cuxi-nda pan ìi xí Dios, te después cuxi stná-ndà ñà-dàcùxí-nèsi.

22 Mii-nsiá, ¿a ndisá cuní-nsià dacuídà ini-nsià Stoho-ndà Dios ducán? ¿A tuxí ini-nsià chicá fuerte-nsià nùù-yá? (Doco mà ndisá.)

23 (Ñà-ndàà nduá), libre iá-ndà quida-nda nacua cudî ini-ndà, doco (xiñuhu nsinuu ini-ndà) màdì nsidaa ñàhà nduú iin ñà-vàha. Libre iá-ndà, cachí-ndà, doco màdì nsidaa ñàhà nduú iin ñà-cuàhàn chindee xi-nda.

24 Ñàyùcàndùá, màsà nándúcú-ndà ñà-nduá cudî inì-ni mii-nda; chicá ndiaha nanducu-nda nansa chicá yàha vàha ñanìtnaha-nda.

25 Nsidaa cuñu dicó tè-dicó yàhvi, vâtùni caxì-ndàñá. Còò necesidad nacani ini-ndà ndàcàtnùhù-ndà sàhàmà,

26 vâchi Stoho-ndà Señor nduú stoho nsidanicuú ñàhà iá ñuhiví yohó.

27 Daaní, na cánà-ndà cùhùn-ndà iin vicò iá vehe iin tiàa có-xiníndísá-xí-yâ, te cudî ini-ndà cùhùn-ndà, dandu vâtùni caxì stná-ndà nsidaa ñà-nduá taxí nècuàchìmà; ni màsà ndàcàtnùhù-ndà sàhà comida mà; màsà nácánì ini-ndà sàhá.

28 Doco vihini cachi iin nêhivì xì-ndà: “Cuñu yohó, promesa nì sandoo nùù figura cahvi-né nduá”. Pues nú ducán, dandu sàhà nècuàchìmà màsà cáxi-nda cuñu mà, còtò cuduchi ini-nè, vâchi vihini quida-ne cuenta nduájàn iin cuàchi.

29 Mate có-quidá mii-nda cuenta ducán, vihini nihnú ini mii-né ducán.

Doco ndohó, vihini cachi-ndà ñà-libre iá-ndà, te màdiá fuerza icúmí-ndà quida-nda ñà-nduá cuní inga nêhivì cachí ìi gá inì-xi.

30 Vâchi naquímànì-ndà Dios sàhà ñà-nduá saxí-nda, ñàyùcàndùá còò ñà-dìsàhà-xí cundoo nêhivì cuitnùhu-nèndó sàhà ñà-nduá saxí-nda.

31 (Vihini cachi-ndà ducán, doco de todos modos), nsidanicuú ñà-nduá quida-nda, sàhà ñà-nì quèé gá tñùñuhu ndiaha xí Dios ni cundúá, a ducán saxí-nda ò xihì-nda ñàhà, te ò ndéni ñàhà ni quida-nda.

32 Màsà dácùdúchì ini-ndà ni-iin nêhivì, a ducán nduú-né iin nècuàchì raza Judea, ò iin nêhivì inga raza (có-xiníndísâ), te ò iin nêhivì cahvi víi xi-yá.

33 Iin-ni ni quidá stná-nsià nacua quidá yùhù, có-nàndúquì ñà-cudiì inì mií, cuisì-ní quidé lucha ñà-màsà cùdúchì ini nêhivì sàhí, dandu vihini sàà stná-nè càcu anima-nè.

11

1 Ñàyùcàndùá, nacua quidá yùhù, ducánì quida stná mii-nsiá, vâchi divi Cristu nduú ana nchícuìn.

Nansa xiñuhu quida nècuàchì ñàhà na natácá-ndà

2 Cuaha-ni quidá-nsiá, ñánì, vâchi iin-ni nsinúú inì-nsia yùhù, te nsinúú stná inì-nsia palabra nì cachì xì-nsiá ñà-chivàha-nsia.

3 Te vichi cuní cundaà inì-nsia ñà-divi Cristu nduú ana dandacú nùù nsidaa nècuàchì tiàa, te nècuàchì tiàa nduú ana dandacú nùù nècuàchì ñàhà, ducánì nacua dandacú stná Yua-nda Dios nùù Cristu.

⁴ Cunaha-nsiá, có-ndúá ducán càcàn tàhvi iin tiàa nù Dios nú ñuhú-né mbelu, ni mà váha cachitnùhu stná-nè razón xi-ya nú ñuhú-nèàmà, vèchi có-ndúámà tnùñuhu xí dìni-né.

⁵ Doco nècuàchì ñahà, nú xícàn tàhvi-né, ò cachitnùhu-ne razón xi-ya, te có-ìdàhvi dìni-né ni-ìñàha, dandu xiñuhu cucahan núù-né sàhà dìni-né, vèchi davani queámà na ian sàni daté tehe-né.

⁶ Vèchi nú có-ìdàhvi dìni-né ni-ìñàha, dandu chicá vaha ni dátê cuati dìni-né. Te nú ni cúcáhán núù-né daté cuati-né, ò daté tehe-né, dandu xiñuhu ni cúdàhvi dìni-né.

⁷ Iin nècuàchì tiàa, có-xiñùhù cudàhvi dìni-né, (na xícàn tàhvi-né), vèchi nacua iá mii-yá ducán ni quidayucun-yànè, ñàyùcàndùá, xiñuhu tavà-né tnùñuhu xí-yá; doco nècuàchì ñahà, tnùñuhu xí nècuàchì tiàa tavá-né, ñàyùcàndùá (xiñuhu ni cúdàhvi dìni-né).

⁸ Vèchi màdì (iin iquì) nècuàchì ñahà ni cóyúcùn nècuàchì tiàa. Còó. Iquì tiàa ni cuyucun nècuàchì ñahà.

⁹ Te divi sàhà-ñá chindee-né iì-né, ñàyùcàndùá ni sàcòo-ne, màdiá ni sàcòo tiàa ñà-chindee-né nècuàchì ñahà.

¹⁰ Ñàyùcàndùá, xiñuhu cudàhvi dìni nècuàchì ñahà, te cunduumà seña ñà-íá ana dàndàcù-xì núù-né. Te sàhà stná (indéhe) ángel xi Dios, ñàyùcàndùá xiñuhu quida stná-nè ducán.

¹¹ Doco có-càchì ñà-cuisì nècuàchì tiàa nduú ana ndiáá, ni có-càchì stná ñà-cuisì nècuàchì ñahà ndiáá stná; còó, vèchi nú ndoo-nda nù Stoho-ndà Señor, dandu iin-ni xiñuhu stnahá nsidaa-nda.

¹² Ñàyùcàndùá, mate iin (iquì) nècuàchì tiàa ni sàcòo nècuàchì ñahà, doco vichi nècuàchì ñahà nduú ana datúinuú xì nècuàchì tiàa. Doco cunaha-nsiá, mii Dios nduú ana chitnùnì inì-xì sàhà nsidanicuú ñàha.

¹³ Mii-nsiá cachi-nsiá xí nansa tuxí inì-nsiá: ¿a vátùnì iá cahan-nsiá nú ni càcàn tàhvi iin nècuàchì ñahà nú uun-ni iá dìni-né?

¹⁴ Pues, nsidaa-nda, ducánì ináhà-ndá cucáhán núù iin nècuàchì tiàa nú ni ndunanì ididìni-né.

¹⁵ Doco nècuàchì ñahà, còó, cuàhà gá cudì ini-nè nú nanì ididìni-né, vèchi na ñàha ìdàhvi dìni-né nduá, te ducán ni nihítàhvi-né coo-ne.

¹⁶ (Pues ñà-jaàn nduá cachì xì-nsiá), doco nú có-ndòo ini iin nèhivì xì palabra yohó, dandu ni cúnáhà-nè cuisì ñà-jaàn nduú estilu xi-nda, te divi ñà-jaàn nduú stná estilu xi nsidaa gá nèhivì cahvi xi Dios.

Nansa ni cachi Pablo xì nècuàchì ñuu Corinto ñà-cò-quidá ví-né na nacútàhvi-né Cena ì xí Stoho-ndà Señor

¹⁷ Vichi cuàhìn cachì xì-nsiá ñàha, doco màdiá ndeníhì vahi mii-nsiá nduá; còó, vèchi cunaha-nsiá, có-queé ví na natácá-nsiá; mal queá.

¹⁸ Primeru cuàhìn càhìn xì-nsiá sàhà-ñá tucu tucu nihnú ini iin iin grupu-nsiá, vèchi ducán cachì nèhivì xí, te tuxí inì vihini ñà-ndáa ndua.

¹⁹ Vèchi vihini cachì stná-ndà ñà-ìcúmì coo itnii grupu núù-nsiá sàhà-ñá cundaà vaha ini-ndà ana xínduu nècuàchì chicá ndiáá, (doco màdì ñà-cáhàn sàhnù-ndà cundujàn).

²⁰ Ñàyùcàndùá, yùhù cachì, màdiá nacútàhvi ndisa-nsiá Cena ì xí Stoho-ndà Señor nduá na natácá-nsiá jaàn.

²¹ Vèchi cada iin iin-nsiá, yèchì quesáhà-nsiá xixì-nsiá ñà-nduá nihì iin iin-nsiá, te dava ga nèhivì, ni có-sàà comida xi-ne, te dava ga-nè, dècuèndè xihì-né.

²² Cunaha-nsiá, vehe-nda nduú lugar ndé ndiá ìcà-ndà cuxi-nda ducán. Màsà quidá-ndá relaju na natácá-ndà, vèchi nèhivì xí Dios xínduu-nda. Ni màsà dàndúcáhàn-ndá ñanìtnaha-nda nduú nècuàchì ndahví. Pues, ¿nansa tuxí inì-nsiá? ¿A cuàhìn ndenihi vahi-nsiá sàhà ñà-nduá quidá-nsiá? Còó, mà quidéa.

Nansa ni quida Jesús Cena ì primeru

²³ Nùù meru mii Stoho-ndà Jesús nì nihí palabra nacání nansa nì quida-ya na ní sanduu ñuú quivì nì cahìn-teyá. Te divi palabra yucán nduá sàni nacani xì-nsiá, nansa nì tnii-ya pan,

²⁴ te nì naquimani-yá (Yua-yá) sàhà-ñá, dandu nì dàcuàchí-yáñà, te nì cachi-yà: “Nahi iquicúñú mii nduá yohó, te divi iquicúñú nduá sáhatahvì sàhà mii-nsiá. Te nacua quidé vichi, divi ducán icúmí-nsiá quida stná-nsiá sàhà-ñá nsinuu inì-nsia yùhù”, nì cachi-yà.

²⁵ Daaní, na ní nsihi nì xixi nsidaa-né, dandu nì tnii-ya pocillu, te nì cachi-yà: “Ñà-ñùhú pocillu yohó nduú seña xi ichì saa nacóí cunchicùn nèhivì, vàchi nahi nì nduá. Te cada coho-nsia ndutè yohó, dandu nsinuu inì-nsia yùhù”, (nì cachi Stoho-ndà Señor).

²⁶ Te ndisa, cada xixi-nda pan mà, te xihì-nda ndutè ì mà, ñà-jaàn nsinúú ini-nda ñà-nì xihì-yà (sàhà-nda), te iin-ni icúmí-nda quida-nda ducán dècuèndè cachi sàà quivì naxicocuín-yà.

²⁷ Ñàyùcàndùá, nú cuní-nda nacuitahvì-nda cuxi-nda pan xi Stoho-ndà Señor, ò coho-nda yà-ì xí-yá, dandu màdiá nansa ni nì cui ni quida-ndañá, vàchi nú ducán, dandu cuàchi cundua, vàchi ñà-cóni chívàha-nda tnùñuhu xí iquicúñú-yà xì nù-yá nduá.

²⁸ Ñàyùcàndùá, xiñuhu nacani vaha ini-nda, te ndundoo anima-nda, dandu vátùni nacuitahvì víi-nda pan mà, te coho-nda yà-ì mà.

²⁹ Vàchi nú có-nihnú ini-nda pan mà nduú nahi cuerpu xi-ya xixì-nda, te xihí stná-nda yà-ì mà, dandu dacuidá cuàchi-nda mii-nda na quida-nda ducán.

³⁰ Pues, divi ñà-jaàn nduú meru ñà-dísáhà-xí cuhí cuàhà-nsiá, te ndohó-nsiá quidá cuèhè; dècuèndè sàni xihì stná dava-nsia.

³¹ Chicá vaha nacani vaha ini-nda, te ndundoo vii anima-nda antes, dandu mà níhì-nda castigu.

³² Doco te nú níhì-nda iin castigu nùù-yá, divi ñà-sáha-yàndó conseju nduájàn sàhà-ñá màsà ndáñuhú dahuun-nda nahi dava ga nèhivì ñuhivì.

³³ Ñàyùcàndùá, na natácá-nsiá, cundiatu-nsia cundoo nsihi-nsia, ñàni, dandu vátùni cuxi-nsia.

³⁴ Doco nú xihì ndisa iin nèhivì doco, dandu chicá vaha ndè vehe-ne ni cuxí-né, te màdiá nihì-nsiá castigu na natácá-nsiá cundua. (Ñà-jaàn nduá cachí xì-nsiá vichi) ndè cachi nasai yucán, dandu ndatnuhu gué` xì-nsiá sàhà chuun iá gà.

12

Nansa iá ñà-nduá nihítahvì ndiaha-nda cutáhvì-nda nùù Espíritu Ì

¹ Yùhù cuní cundaà ini-nsiá sàhà ñà-nduá nihítahvì ndiaha-nda nùù Espíritu Ì, ñàni.

² Sà-ínahá-nsiá nansa nì saquida-nsia antes na táñâha ga cunindisá-nsiá mii-yá, cuisì nacua nisa cachi nèhivì xì-nsiá, ducán nisa quida-nsia, nisa cahvi-nsiá cuàhà figura xì yùù, mate có-câhàn mà.

³ Ñàyùcàndùá, cuní cundaà inì-nsia palabra yohó: nú ndisa Espíritu Ì xí Dios nduú ana chindéé xí-nda câhàn-nda, dandu mà nunca cachi-nda sàhà Jesús ñà-có-ndiáá-yà. Te davani stná, nú màsà chindéé Espíritu Ì ndohó, dandu mà cúí cachi-nda: ñà-cuisì Jesús nduú Stoho-ndà Señor (dandacú inicutu).

⁴ Cunaha-nsiá, nsidanuu clase ñà-ndiaha sàni nihítahvì-nda nùù-yá, doco imindaa Espíritu Ì xí-yá nduú ana nì dàcútâhvì xì-ndañá.

⁵ Te cuàhà gá stná modo xinúcuáchí iin iin-nda nùù-yá, doco imindaa-ní Stoho-nda Señor nduú ana xinúcuáchí-nda nùù-xí.

⁶ Te cuàhà gá stná chuun ndiaha quidá Dios ini anima iin iin-nda, doco imindaa-yá nduú ana quidà-xì nsidaájàn.

⁷ Te iin iin-nda sàni nihítahvì nansa chindee ndiaha Espíritu Ì ndohó sàhà ñà-vaha xi nsidaa-nda.

⁸ Dava-nda, sàni nihitáhvi-nda ñà-càhàn nchichí-nda. Te dava-nda, sàni nihitáhvi-nda ñà-cundaà tui ini-nda, doco mismo mii Espíritu Ìi nduú ana chindéé xí-nda ducán.

⁹ Daaní, dava tu-nda, nùu mismo Espíritu Ìi sàni nihitáhvi ndiaha-nda cucumi váha-nda fe; te dava tu-nda, ni nihitáhvi-nda dandúvaha-nda nêhivì, doco mismo Espíritu Ìi nduú ana ni sàhatahvi xì-nda ducán.

¹⁰ Te ò vihini ni nihitáhvi-nda quida-nda milagru ndiaha, te ò cachitnùhu-nda ñà-nduú razón ndiaha xí-yá. Te dava ga tu-nda, vátuni cundaà ini-nda a dívi Espíritu Ìi, ò iin ñà-malu nduú ana quida-xi iñàha. Daaní, dava tu-nda, tùha-nda càhàn-nda inga dàhàn sàà, te dava ga tu-nda cachitnùhu-nda nansa cuní cachi dàhàn sàà mà.

¹¹ Doco nsidanicuú ñà-nduá ni nihitáhvi-nda mà, divi Espíritu Ìi nduú ana chindéé xí-nda quida-nda ducán, te iin iin-nda níhitáhvi-nda según nansa chitnùní ini-yà cuàhatahvi-yándô.

Nahi iquicúñú mii-yá xínduu nsidaa-nda

¹² Ndohó, iá ndahà-nda, te iá sàhà-nda; cuàhà iñàha sàni nihì iquicúñú-nda cucumiá, doco mindaa cuerpu xi-nda nduá. Mate cuáhà iñàha quidá, doco imindaa-ní cuerpu nduá. Pues, ducán iá stná Cristu xì ndohó na ian ndohó xì iquicúñú-nda.

¹³ Vàchi nsidanicuu-nda, nahi iin-ni cuerpu xi mii-yá sàni nanduu-nda na ní nduhii anima-nda ni quida Espíritu Ìi xí-yá. Vàchi iin-ni Espíritu Ìi sàni nihitáhvi ndiaha nsidaa-nda, ò xínduu-nda nècuàchì raza Judea, te ò nècuàchì inga raza, có-quidámà, ò xínduu-nda nècuàchì libre, te ò nècuàchì ndoó ana dandàcù-xì núu-xí.

¹⁴ Sà-ìnhá-nda, iá ndahà-nda, iá sàhà-nda; màdì uun-ni iá iquicúñú-nda.

¹⁵ Pues (nú ni cuí càhàn) iin sàhà-nda, vihini cachà: “Còó; yùhù, có-nduú iin ndahà, ñàyùcànduá, có-nduú cuerpu yohó”. Pues mate ducán ni cachá, doco iin-ni nduá sàhà-nda.

¹⁶ Te nú ni cachí stná tùtnù-nda: “Còó, yùhù, có-nduú iin nduchinúu, ñàyùcànduá có-nduú cuerpu yohó”. Pues, mate ducán ni cachá, doco divi iin-ni nduá tùtnù-nda.

¹⁷ Vàchi nú cuisì nduchinúu-nda ni cúndúú inicutu-nda, dandu ¿nansa cui tiacu-nda? Te nú cuisì tùtnù-nda ni cúndúú-nda, dandu ¿nansa cui sahan iñàha ditni-nda? Mà cúí.

¹⁸ Ñàyùcànduá, sàni quidavàha Dios iquicúñú-nda xì nsidaa ñà-nduá xichúân, te nsidaámà iá chuun quidá según nansa ni chitnùní ini-yà.

¹⁹ Vàchi nú cuisì iin-ni chuun ni cuí quida cuerpu xi-nda, dandu mà cúndúú ndisa-nda nêhivì.

²⁰ Doco còó, mate iin-ni cuerpu xi-nda nduá, doco nsidanuu clase chuun quidá.

²¹ Ñàyùcànduá, có-iá vaha cachi nduchinúu-nda xì ndahà-nda: “Có-xiñùhí mii-ní”. Ni mà váha cachi stná dìni-nda xì sàhà-nda: “Có-xiñùhí mii-ní”.

²² Còó, vàchi mate iá dava xaan xi-nda tuxí ini-nda có-xiñùhù guá, doco nahnú chuun quidá.

²³ Te nú iá ndé tuxí ini-nda mà vícò iá, divi jaàn chicá ndiaá-nda, te saquín-nda cuidadu sàhà-ñá màsà cúcáhàn núu-nda.

²⁴ Vàchi ndé vico-ni iá, có-xiñùhù (cundiaa guá-ndañá). Pues ducán ni chitnùní ini Dios coo cuerpu xi-nda sàhà-ñá chicá cundiaa-nda ndé xi-nda có-ndiaá cachí-nda mà.

²⁵ Dandu nsidaa ndahàsàhà-nda, icumíâ chindee tnahá, te iin-ni coo viì iquicúñú-nda.

²⁶ Vàchi mate imindaa lugar xi cuerpu-nda ndohó, doco inii iquicúñú-nda cuú stná sentir. Te nú cudî ini iin xaan xi-nda nahi ndahà-nda, dandu inii cuerpu xi-nda cudî stná inià.

²⁷⁻²⁸ Pues vichi cachí xì-nsiá ñà-nahi iquicúñú Cristu xínduu nsidaa ndohó nècuàchì cahvi xí-yá, te iin iin-nda sàni sàhatahvi-yá chuun quida-nda nùu-yá nacua quidá sàhà-nda, ò ndahà-nda. Dihna nsiùhù nècuàchì apóstol sàni nihitáhvi-nsí ñà-cacuanu-nsi quida-nsi chuun xi-ya. Daaní, nchícùn gà ana xínduu nècuàchì cachitnùhu razón ndiaha xí-yá. Daaní, nchícùn gà nècuàchì chináhá palabra ìi. Daaní, ndoó stná nècuàchì quidà-xì

milagru, xì stná nècuàchì dandúvaha xi-nda. Te ndoó stná nècuàchì xicánúú chindéé xí ñanìtnaha-xi, xì stná nècuàchì dandacú, xì stná nècuàchì cáhàn inga dáhàn sàà.

²⁹ Pues, nàhà xicà màdì nsidaa-nda ni níhì-ndà chuun cunduu-nda apóstol; ni màdì nsidaa-nda túha-nda cachitnùhu-nda razón ndiaha xí-yá, te màdì nsidaa stná-ndà túha-nda chinaha-ndà nèhivì; còó. Ni màdì nsidaa-nda quida-nda milagru,

³⁰ ò dandúvaha-nda nèhivì. Ni màdì nsidaa stná-ndà cáhàn-ndà inga dáhàn sàà, ni mà túha nsidaa-nda cachitnùhu-nda nansa cuní cachi dáhàn sàà mà. Còó.

³¹ Doco de todos modos, iin iin-nda xiñuhu cudìi cuáhà ini-ndà nihítáhvi-ndà más gà ñà-chicá ndiaha sàni cachi mà. Doco cunaha-nsiá, iá inga ichì chicá nsiha cunchicùn-ndà, te vichi cuàhìn cànìn xì-nsiá sàhámà.

13

Divi ñà-cuu stnahá ini-ndà sàhà-ndà nduú ichì chicá nsiha

¹ Ni cachì-ndà sàni nihítáhvi-ndà cáhàn-ndà nsidanicuú dáhàn ñuhivì xì ndè stná dáhàn ángel, doco nú có-cuú stnahá stná ini-ndà sàhà-ndà, ni mà cundiáá nsidaámà, vachi ducán queé ñà-cáhàn-ndàmà (nahi ruidu-ni), na ian cadì úun iin càa, ò iin platillu.

² Te ò vihini sàni nihítáhvi-ndà cachitnùhu-nda razón ndiaha, te sànihì stná ini-ndà sàhà nsidaa chuun nsiha chicá dèhé, te ináhá stná-ndà nsidanicuú iñàha, te iin-ni icúmí vâha-nda fe, dècuèndè vètùni dandacu-nda, te cuxio iin yucù. Doco te nú có-cuú stnahá ini-ndà sàhà-ndà, dandísá uun-ni nduú nsidaa ñà-nduá túha-nda quida-ndama.

³ Te nú ni dasán nsíhì-ndà ñà-cuicà-ndà, te ò ni cuáha-nda coco-nda (sàhà iin chuun vâha), doco te nú có-cuú stnahá ini-ndà sàhà-ndà, ni-iyuhu mà cundiáá nsidaámà.

⁴ Cunaha-nsiá, nú cuú stnahá ini-ndà sàhà-ndà, dandu mà úhì coo calma-ndà xì nèhivì, te cuhi ini-ndané. Te mà cúmbìdia stnahá stná ini-ndà sàhà-ndà, nú ducán. Ni mà cútúxí stná ini-ndà mii-nda nduu-nda mii-nda, ni mà cundàa cuadú stná-ndà.

⁵ Vachi nú cuú ndisa ini-ndà sàhà iin nèhivì, dandu mà quidá-ndà ni-iin ñà-quini xi-né. Ni mà cóó interesadu stná-ndà, ni mà cuidá yàchì stná ini-ndà sàhà-né, te mà chùhún stná ini-ndà sàhà-né.

⁶ Vachi cunaha-nsiá, nú cuú ndisa ini-ndà sàhà iin ñanìtnaha-nda, dandu mà cudìi ini-ndà nú ni quidá-né iin ñà-có-ndiáá. Còó, ñà-cunchicùn vii-né ichì ndàà nduá cuní-ndà quida-ne, nú cuú ini-ndà sàhà-né.

⁷ Te nú màni-né nùù-ndà ducán, dandu mà úhì quidandee stná ini-ndà sàhà-né; ni mà úhì cahvi stná-ndà xì-né ñà-chicá quida vii-né después, vachi siempre iá tnundé ini, cachi-ndà, te vètùni cucumi-nda paciencia.

⁸ Cunaha-nsiá, vaxi iin quivì, te mà cóó gá necesidad cachitnùhu nèhivì xì-ndà iin razón xi Dios, ni mà cáhàn gà-ndà dáhàn sàà, ni mà cóó cá stná necesidad cachitnùhu-ya xì-ndà iin ñà-có-ìnhá-ndà. Doco ñà-cuu stnahá ini-ndà sàhà-ndà, mà nunca ndutámà nùù-yá.

⁹ Quivì vichi, có-ìnhá nsihi-nda nsidaa iñàha; còó. Stná iin palabra dacáhàn-yà nèhivì, có-nduámà iin palabra cachitnùhu nsihi xi-nda nsidanicuú iñàha; còó.

¹⁰ Doco na sàà quivì cununa ndisa ñuhivì, dandu mà cáhàn gà-ndà nsidaa ñà-có-ìá nsihi ma.

¹¹ Na tíi, nahi mée nisa cànìn, vachi nacua nacánì ini nsidaa-vé, ducán nisa nacani stná ini; ducán nisa nihnu ini. Doco vichi sàni sahnui, te ñàyùcànduá, có-quidá gué nahi mée.

¹² Te ducán icúmí coo stná xì-ndà después. Vachi quivì vichi indéhe-nda (nansa yáha-nda, doco có-cundáà vâha ini-ndà), vachi na ian indéhe-nda nùù iin yùtátá có-tuì víi, ducán nduá. Doco vaxi iin quivì, dandu mà cóó gá ducán, vachi vivì-ni icúmí-ndà cundehè claru-ndà mii-yá. Quivì vichi cuisì iyuhu-ni cundáà ini-ndà, doco quivì yucán icúmí-ndà cundàà vâha ndisa ini-ndà nacua cundáà ini mii-yá sàhà ndohó.

¹³ Ñàyùcànduá, ùni iñàha xiñuhu quida-nda vichi. Ni cúcúmí vâha-nda fe, te ni cúnihnú vâha ini-ndà ñà-siempre chindee-yándô; daaní, ni cúcúú stnahá stná ini-ndà sàhà-ndà. Doco nùù nsì-ùni ñà-jaàn, chicá ndiáá ñà-cuu stnahá ini-ndà sàhà-ndà.

14

Nansa ndiá icà-ndà quida-nda na cáhàn-ndà inga dàhàn sàà quidá Espíritu Ìì

¹ (Ñà-ndàa ndua), xiñuhu cuu stnahá ndisa ini-ndà sàhà-ndà. Daaní, cuní stnái nanducu-nsiá nansa nihitáhvi gá-nsiá más tãhvi ndiaha xí-yá. Te ñà-chicá cuní nihitáhvi-nsiá nduú ñà-cachitnùhu-nsia razón ndiaha xí-yá.

² Vãchi na cáhàn-ndà dàhàn sàà, màdì nèhivì ñuhiví cáhàn xì-ndà. Còó. Dios cáhàn xì-ndà, doco nèhivì ñuhiví, có-cùndáa ini-nè nansa cachí-ndà. Divi Espíritu Ìì chindéé xí-ndá cáhàn-ndà ducán, doco iin chuun iá dèhé nduá cachí-ndà.

³ Doco na cachitnùhu-nda razón ndiaha xí-yá, dandísá nèhivì ñuhiví cáhàn xì-ndà, vátùni chindee-ndané ñà-chicá cunihnu vii ini-nèyà, te chicá nacuahandee ini-nè.

⁴ Doco nú dàhàn sàà nduá cáhàn-ndà na natácá-ndà, dandu ñà-chindee xi anima mii-ni-nda nduámà. Doco na cachitnùhu-nda razón ndiaha xí-yá, dandu nsidanicuú nèhivì nacuahandee ini-xi.

⁵ Mate cúdì inì nú ni cuáhatahvi Dios nsidaa-nsiá ñà-cáhàn-nsiá dàhàn sàà, doco chicá cudì inì nú ni nihitáhvi-nsiá cachitnùhu-nsia razón ndiaha xí-yá, vãchi chicá ndiaha ñà-jaàn. Doco nú ni cáhàn-ndà dàhàn sàà, te después cachitnùhu stná-ndà nansa cuní cachi palabra mà, dandu vátùni, vãchi (sàhà-ñá claru iá palabra mà) vátùni nihì stná nsidaa compañeru-ndà iin ñà-vàha xi mii stná-nè.

⁶ Ni cachí-ndà ni sái ndé ndoó-nsiá, te cuisì-ní inga dàhàn sàà ni cáhàn xì-nsiá. ¿A vátùni chindeámà mii-nsiá, ñàni? Còó, vãchi xiñuhu ñà-nacani claru stnái xì-nsiá iin palabra sàni dàtnúu ini Dios yùhù, te ò iin palabra nì cundaà tui inì nì quida-ya, te ò nú coó, iin razón ndiaha nì quixi nùu-yá, te ò iin ñà-vàha cui chinahì mii-nsiá.

⁷ Vãchi dècuèndè stná ñà-quidándáa-ndá, ni cùndúá iin pitu, ò iin yutnù cuerda, nú nansa-ni nì cui ni quidándáa-ndáñâ, dandu mà cùndáa ini nèhivì índù yaa tavá-nda.

⁸ Stná corneta sivi soldadu, nú có-sivi vii-té, mà cùndáa ini compañeru-te ñà-sà-íá hora quidayucùn-te cùhùn-te guerra.

⁹ Te ducání stná ndohó na cáhàn-ndà, nú có-cáhàn claru-ndà (dàhàn mii-nda), mà cúí cundaà ini nèhivì nansa cachí-ndà. Uun-ni queamà.

¹⁰ Pues cuàhà gá dàhàn iá ñuhiví, te iin ian vátùni cáhàn nèhivì, te cundaà stnahá ini-nè.

¹¹ Doco nú có-ináhá-ndá nansa cuní cachi dàhàn cáhàn iin nèhivì, dandu có-cùndáa ini-ndà nansa cachí-nè; nahì nèhivì inga ñuu xìcà nduú-né, te ni mii-né, có-cùndáa stná ini-nè ñà-nduá cachí ndohó.

¹² Pues ducání stná mii-nsiá (xì dàhàn sàà cáhàn-nsiá). Yùhù ináhî, yáha ga cuní-nsiá nihitáhvi-nsiá cuàhà iñaha nùu-yá. Doco ñà-chicá xiñuhu nduá nihitáhvi-ndà iin ñà-chindee xi ñanitnaha-nda natácá xì-ndà. Pues divi tãhvi clase jaàn nduá cuní nanducu-nsiá.

¹³ Ñàyùcàndúá, nú sàtùha-nda cáhàn-ndà inga dàhàn sàà, dandu xiñuhu stná ñà-càcàn tãhvi-ndà cuáhatahvi Dios-ndó ñà-cachitnùhu-nda nansa cuní cachi dàhàn mà na cáhàn-ndáñâ,

¹⁴ vãchi na cáhàn-ndà ducán, inì-ni anima-ndà cáhàn stná-ndà, xicàn tãhvi-ndà nùu-yá, doco ini sàxínitnùní-ndà, có-cùndáa ini-ndà nansa cachí-ndà.

¹⁵ Pues, nú ducán nduá, dandu ¿nansa chicá vaha quida-nda? Pues, cuàhàn-ndà càcàn tãhvi-ndà nùu-yá (xì dàhàn) ináhá espíritu xi-nda, doco màdì cuisì ñà-jaàn, Icúmí-ndá càcàn tãhvi stná-ndà nùu-yá xì iin palabra ñà-cùndáa ini-ndà. Stná ñà-coto-nda; cuàhàn-ndà coto-nda (xì dàhàn) ináhá espíritu xi-nda, dandu después coto stná-ndà iin alabanza cundaà ini-ndà nansa cachá.

¹⁶ Vãchi nú naquímànì-ndà mii-yá xì cuisì-ní dàhàn ináhá espíritu xi mii-nda, dandu ùhì cachi nècuàchì mà-túha “amén” (na ní nsihi nì cáhàn-ndà), vãchi ni có-cùndáa ini-nè nansa cachí-ndà.

¹⁷ Pues, ñà-naquimanì-ndà Dios, divi naquímànì váha-ndayá, vátùni iá mà, doco có-nihì ñanitnaha-nda cunduamà iin ñà-vàha xi stná anima mii-né.

¹⁸ Yùhù cachí, ansivéhé Dios, cuàhà gá cáhìn dàhàn sàà; chicá cáhìn ducán nùù nsidaa mii-nsiá.

¹⁹ Doco nú sàni nataca-ndà ñà-cahvi-nda mii-yá, dandu chicá nsiaha cáhìn siquiera ùhùn-ni palabra ñà-cundaà ndisa ini-nsià, te màdiá ùxìn mìl palabra inga dàhàn mà-cúndàà ini-nsia, vàchi cuisì nú cundaà vaha ini-nsià, dandu vátùni chinahì mii-nsiá ñàha.

²⁰ Màsà cúníhnú ini-nsià nahi méè, ñàni. Vátùni iá nú nihnú iquin ini-ndà sàhà chuun chicuéhè iá ñuhiví; doco (nú chuun sahnú nduá), dandu xiñuhu nacani ini-ndà nahi nècuàchì sahnú, màdi gá nahi méè.

²¹ Nùù tutu ìì dohó cachí mii-yá: “Icúmî cáhìn xì nècuàchì raza yohó, vàchi icúmí quixi nècuàchì inga ñuu cáhàn inga dàhàn, te cuenta-xi icúmí-né cáhàn-nè xì nècuàchì yohó, doco ni sàhà ñà-yúcán mà quíhìn cásû-nè, cachí Stoho-ndà Señor”.

²² Ñàyùcànduá, ñà-jaàn cundaà ini-ndà seña nduá cáhàn-ndà dàhàn sàà, áma cundaà ini nècuàchì có-xìníndísâ. Doco ñà-cachitnùhu-nda razón ndiaha, quidámà chuun sàhà nèhivì sàxìníndísâ, màdi sàhà nèhivì có-xìníndísâ.

²³ Ni cachí-ndà nú sàni nataca-nsià, te cáhàn iin iin-nsia dàhàn sàà, te yucán sàà stná nèhivì có-cúndàà ini-xi, ò nèhivì có-xìníndísâ. Pues ádi icúmí-né cachi-nè sàni culocó-nsià.

²⁴ Doco nú cachítñùhu iin iin-nsia iin razón ndiaha xí Dios (dàhàn cundaà ini-xi), dandu dansínúú iniàmàné cuàchi quidá-né, te cundaà ini-nè nansa iá ndisa anima-nè,

²⁵ dècuèndè natùì vate stná ñà-nduá iá dèhé nì quida-ne antes. Dandu màcuítasisi-né ñà-cahvi-né Dios, te cachi-nè iá ndisa Dios nùù-nsiá.

²⁶ ¿Ndíà nduá cuní cachi nsidaa ñà-jaàn? Pues dohó iá, ñàni: na natácá-ndà, iin iin-nda iá iin alabanza coto-nda, ò iin palabra vaha chinaha-ndà, te ò iin ñà-ndiaha sàni dàcùnì Dios ndohó, ò iin palabra xi iin dàhàn sàà, te ò cachitnùhu iin-nda ñà-nduá cuní cachi dàhàn sàà mà. Doco nsidaa ñà-jaàn, sàhà ñà-vaha xi nsidaa ana nì nataca ni cúnduá.

Nsidaa ñà-nduá quida-nda na natácá-ndà, xiñuhu quida vii-ndàñá, màdiá nansa ni nì cui

²⁷ Nú ndoó nèhivì cuní cáhàn dàhàn sàà, dandu vátùni cáhàn ùì-nè, ò ùni-nè, doco màsà yáha ùni-nè, te nì nsihì iin-ne, dandu quesaha inga-nè. Iin iin-ne nì cúcúmí-né tiempu xi-ne cáhàn-nè. Te xiñuhu coo stná iin ana cachitnùhu nansa cuní cachi palabra mà.

²⁸ Doco nú còò nì-iin-nsia tùha cachitnùhu sàhà ñà-jaàn, dandu màsà cáhàn nèhivì dàhàn sàà na natácá-nsià, cuisì-ní dècuèndè iá mii-né, dandu mii-né xì Dios cunini.

²⁹ Daaní, nècuàchì cachítñùhu razón ndiaha xí-yá, vátùni cáhàn ùì ò ùni-nè, te nì cúninì nèhivì dava ga, te cachi-nè a vátùni iá ñà-nduá nì cachi nècuàchìmà, á coó.

³⁰ Doco nú yucán iá inga nècuàchì datnúù Dios sàxìnítnùnì-xi iin palabra ndiaha, dandu xiñuhu cudadí nècuàchì primeru.

³¹ Vàchi nsidaa ana datnúù Dios iin razón ndiaha, vátùni cachitnùhu iin iin-ne razón mà na hora quidá-né tocar, dandu vátùni sàà nsidaa-nda cundaà ini-ndà, te nacuahandee stná ini-ndà.

³² Te nsidaa ana sàni nihítáhvi cachitnùhu razón ndiaha, icúmí-né dandacú-né nùù anima mii-né, (a cáhàn-nè, á coó).

³³ Cunaha-nsiá, màdi nansa-ni nì cui quidá ndevàha Dios ñà-nduá quidá-yá, còò; viví-ni, te cuéyàà-ni nduú modo quidá mii-yá.

Nacua quidá nsidaa nèhivì xí Dios nsidaa lugar ndé natácá-nè cahvi-néyà, (ducán cuní quida stná mii-nsiá),

³⁴ màsà cáhàn nècuàchì ñàhà na natácá nsidaa-nsiá ducán, vàchi còò permisú. Icúmí-né cunini-ne nacua cachí stná tutu nduú ley xi-ya.

³⁵ Nú cuní-nè ndàcàtnùhù-né, dandu ni càcàn tnùhù-né nùù nècuàchì vehe-ne nú sàni nasaa-nè vehe. Vàchi có-nduá ducán cáhàn iin nècuàchì ñàhà na natácá-nsià.

³⁶ Cuní nsinuu inì-nsia ñà-màdi mii-nsiá dìnùù-xí nì quésáhà palabra xi Dios. Ni màdi cuisì mii-nsiá nì xìníndísâ stná xì palabra mà.

³⁷ Te nú jaàn ndoó nèhivì tuxí inì-xi datnúù Dios sàxìnítùnì-xi, te ò ní nìhìtáhvì ndiaha-né cahan-né, dandu xiñuhu cundaà stná ini-nè ñà-divi palabra yohó nduú palabra nì dándàcú Stoho-ndà Señor.

³⁸ Doco nú cô-cùnì-nè nacuni-nè ñà-palabra ì xí mii-yá nduá yohó, dandu ni mii stná-nsià, màsà nácùnì stná-nsiànè ñà-ndùú-né ana nì nìhìtáhvì ndisa.

³⁹ Ducán iá, ñánì. Yùhù cunì nanducu-nsiá más gà nansa nìhìtáhvì-nsiá cachitnùhu-nsia razón ndiaha xí-yá. Te nèhivì cáhàn dàhàn sàà, màsà cádì-nsià nùù-né; còó.

⁴⁰ Doco nsidaa ñà-nduá quidá-nsiá (na natácá-nsià), vivì-ni ni quidá-nsiàña, te iin iin-nsia (ni cáhàn-nsià) nacua nchìcùn stnahá-nsiá.

15

Sàni natiacu ndisa Jesucristu

¹ Ñánì, cunì cundaà vaha ini-nsià sàhà palabra ndiaha nì cachitnùhi xì-nsiá daa. Vàchi nì xinindisá-nsiá palabra mà, te iin-ni dècuèndè vichi quidá stná-nsià seguir ducán.

² Te sàhà stná palabra mà icúmì-nsià càcu-nsia nú iin-ni ni cùnìhnú vaha inì-nsiaña. Vàtùnì càcu-nsia, cachì, doco ¿a víhínì uun-ni quee ñà-nì xinindisá-nsiá ducán? (Còó),

³ vàchi cunaha-nsiá, palabra ndiaá ndisa nduá nì cachitnùhi xì-nsiá daa, vàchi divi nduú stná palabra nì nìhì (nùù) Cristu, te nacáníamà nansa nì xihì-yà nì nacuida-ya cuàchi-nda nacua cachì nùù tutu ì.

⁴ Dandu nì ndùxin-ya, doco tìxi ùnì quivì nì natiacu-yà nacua cachì stná tutu mà.

⁵ Dandu nì ndecunu-ya nùù Pedro xì nùù stná dava ga nècuàchì dacuahá-yá; ùxìn ùnì nì sanduu-ne.

⁶ Daaní, después nì ndecunu stná-yà iin xichi na ní nataca más ùhùn cientu ñani-ndà. Te cunaha-nsiá, dècuèndè vichi xí-itiacu ì cuàhà vá nècuàchì mà, doco dava-ne sàni ndàhvà-nè ñuhivì yohó.

⁷ Daaní después, nì ndecunu stná-yà nùù Jacobo, xì nùù stná nsidanicuú nècuàchì xínduu apóstol.

⁸⁻⁹ Daaní, último nì ndecunu-ya nùù yùhù. Díin tiempu nì sandua, màdì iin-ni xì nècuàchì dava ga mà. Vàchi nùù nsidaa gà ana nì nìhì chuun nùù-yá, yùhù nduì ana chicá có-ndiáa. Ndisa nì nìhì chuun ndiaha nùù-yá, doco màdì sàhà-ñá vaha güè` nì sánduá; còó, vàchi yùhù, cuàhà gà nèhivì xí Dios nìsa quida quini xí.

¹⁰ Doco sàhà gracia xi-ya nì nìhìtáhvì cucumì chuun ì nùù-yá. Te màdì uun-ni sàni quee gracia nì quida-ya mà, vàchi cuàhà gà chuun ndiaha sàni quide, dècuèndè chicá más sàni quide nùù nècuàchì dava ga. Doco màdì ndisa yùhù nì quidà-xì nsidaa ñà-ndiaha ma; còó. Divi gracia xi-ya nì chindee xí.

¹¹ Doco có-quidámà, a sea yùhù, ò dava ga apóstol, doco iin-ni xìcachi nsidaa-nsì sàhà Jesús ñà-nì natiacu ndisa-ya, te divi palabra jaàn nduá nì xinindisá stná mii-nsiá.

Nansa icúmì-ndá natiacu-ndà

¹² Pues, nú ducán cachì-nsì sàhà Cristu ñà-nì natiacu ndisa-ya, dandu ¿índù chuun cachì dava-nsia ñà-mà cúí natiacu ni-iin nsì?

¹³ Vàchi nú mà cúí natiacu nsì ni cúí, dandu ni cónì nátiácú stná mii-yá.

¹⁴ Te nú cónì nátiácú-yà nì cúí, dandu uun-ni quee ñà-cáhàn-nsì xì nèhivì. Stná mii-nsiá, sàni xinindisá stná-nsiàyà, doco uun-ni quee stná mà nì cúí.

¹⁵ Te nsiùhù tu, na ian tnuhu-nsì cunì cachàmà, vàchi sàni cachì-nsì sàhà Dios nì dànátiácú-yà Cristu. Doco nú mà cúí natiacu ni-iin nsì (nacua cachì dava-nsia), dandu ñà-cónì nátiácú stná Cristu nduú stná mà.

¹⁶⁻¹⁷ Vàchi nú mà cúí natiacu nsì, dandu cónì nátiácú stná mii-yá, te iin-ni iá ì-ndà xì cuàchi-nda, cuquidá-xì nì xinindisa-nda, nú ducán.

¹⁸ Te divi ducán stná xì nèhivì xí-yá sàni caxihì, ñà-sàni ndañuhu dahuun stná-nè nduá, nú ducán.

19 Cunaha-nsiá, nêhivì chicá còò tnùndé inì-xi nduu-nda nú cuisì ñuhiví yohó-ní chindéé Cristu ndohó.

20 Doco (còò, ñà-ndáa cuisì nduá) sàni natiacu-yà; dihna mii-yá nì natiacu-yà, dandu después icúmí natiacu stná cuàhà gá ana nì xihì.

21 Sàhà cuàchi nì quida iin tiàa sàhana nì quesaha nêhivì xihì-nè. Doco vichi sàhà (mii-yá) ana nì nanduu na iin tiàa, ñàyùcànduá vètuni nìhìtáhvì stná cuàhà-né natiacu-nè.

22 Vàchi sàhà-ñá nduu-nda descendencia xi Adán, ñàyùcànduá xihì nsidaa nêhivì tiempu vichi. Doco nsidaa ana ndoó ladu xi Cristu, icúmí-nè sàa-nè natiacu-nè quida-ya.

23 Doco díin nduú quivì nì natiacu Cristu, te díin cunduu quivì quida tocar dava ga nêhivì. Dihna mii-yá nì natiacu-yà, te mii-yá nduú primeru nì cuu xi ducán; daaní, después natiacu stná ndohó nêhivì xí-yá quivì (naxicocuíin-yà, te) cuni-ndâyá.

24 Daa cunduu quivì icúmí-yâ cundee-yá nùu nsidaa ñà-malu cusáhnû, xì nùu stná nsidaa ana itá fuerte, xì nùu nsidaa gá stná ñà-fuerte iá ñuhiví. Daaní icúmí sàa quivì xinu tiempu, te dayáha Cristu chuun dandacú-yá ndè ndahà Yuamáni-yá.

25 Doco antes ñà-jaàn, iin-ni icúmí-yâ cusahnú-yá dècuèndè cundee-yá nùu nsidaa ana xiní ùhì xì-yá.

26 Pues sàhà ñà-yáha ga có-cudû ini-yà xihì nêhivì, ñàyùcànduá por último icúmí-yâ cundee-yá nùu ñà-xihì-ndà, te mà nunca cui gà-ndà.

27 Vàchi cachí tutu ì ñà-icúmí sàa nsidanicuú ñàha coa sujetu nùu-yá. Doco nàhà xicà màdì Yuamáni-yá coo stná sujetu nùu-yá, vàchi divi Yuamáni-yá nduú ana disàhà-xì nì cundee-yá nùu nsidaa ana xiní ùhì xì-yá.

28 Daaní, nú sàni cundee-yá nùu nsidaa contra xi-ya mà, dandu stná mii-yá, coo stná-yà sujetu nùu Yuamáni-yá, vàchi divi sàhà poder xi yà-yúcán nì cundee-yá ducán. Dandu quivì mà, mii Yua-nda Dios cunduu ana cusáhnû inicutu.

29 Inga casu: dava stná nêhivì, sàhàn-nè cuhî-né cuenta xi nêhivì sàni xihì. Pues, ¿Índu chuun quidá-né ducán, cuhî-né sàhà nsì ma nú ndisa mà cúí natiacu ni-iin nsì ni cúí?

30 Daaní, nsiùhù tu, tìxi cuàhà peligru ndoó-nsí nsidanicuú tiempu. (Doco uun-ni queamà nú mà sàa-ndà natiacu-ndà después.)

31 Quivì quivì yáha-nsi peligru cui-nsì, ñáni. Ñà-ndáa cuisì nduájàn divi nacua nduú stná ñà-ndácuìsì cudû gá inì sàhà-nsiá ñà-iin-ni nchícùn stná-nsià Stoho-ndà Jesucristu.

32 Yùhù, cuàhà vida nì xiní ñuu Éfeso nùu (nêhivì dana guá nahi) nsicaha. Doco ni mà cúndiáá stná mà (nú) nú mà nunca sàa-ndà natiacu-ndà. Vàchi te nú ducán, dandu chicá vâha quida-nda nacua cachí dichu: “Nì cuxí vâha-nda, te coho vâha-nda, vàchi tnaa cui-ndà”.

33 Màsà cuáha-nsia dandahví ni-iin nêhivì-nsiá (ducán, vàchi cachí stná dichu): “Nú chicuèhè nècuàchì nduú compañeru-ndà, dandu cuchicuehe stná modo xi-nda”.

34 Xiñuhu nàcùnihu vii inì-nsia, (ñàni). Màsà quidá gá-nsià cuàchi, vàchi sàni cundaa inì, dava-nsia ni có-ínahá-nsiâ Dios. Ducán cachí xì-nsiá áma ndúcáhán-nsiá (nacua ndiá ìcà-nsiá).

Nansa coo iquicúñú-ndà na natiacu-ndà

35 Doco vihini cachi iin nêhivì: “¿Índu modo cui natiacu iin nsì nú sàni xihì-nè? ¿Nansa cuàhàn coo iquicúñú-nè?”

36 Pues neciu-ndà nú ni cachí-ndà ducán. Vàchi dècuèndè stná tata chihì-ndà, icúmíâ ndùxan, dandu cuità.

37 Te tata chihì-ndàmà, có-ndùdává xí ñà-nduá cuàhàn nacuitià; còò, cutu íin tata uun nduá chihì-ndà, sea ni cúnduá nùnì trigu, ò inga nùnì.

38 Dandu dacuahnú Dios-ñà, te sàa coa nacua nì chitnùnì ini-yà coa. Te nú sàni sahnua, dandu díin díin nùnì cundua según iin iin clase nduá.

39 Pues ducání iá stná xì cuerpu xi iin iin ñà-ìá ñuhìví. Vàchi tucu tucu ndáa nèhivì, quisì, laa, siaca.

40 Stná ñà-nchìí itándiaa ansivi, tucu iá` nùù ñà-ìá ñuhìví yohó. Cuaha-ni iá ñà-ìá ansivi, te cuaha-ni iá stná ñà-ìá ñuhìví, doco tucu tucu xíndaa vico iin ian.

41 Ndiaha gá nchìí orá, te viconi iá nchìí yoo, doco tucu nchìí-si. Cuaha-ni iá nchìí stná sìtnùù, doco tucu tucu xíndaa vico iin iin-sì.

42 Pues ducán icúmí coo stná xì ndohó quivì natiacu-ndà, tucu nàcòo stná cuerpu xi-nda. Nú sàni ndùxin iin nsii, sívì iquìcúñú-nè, doco na sàa quivì natiacu-nè, iin-ni mà cúí gà-nè.

43 Te mate mà cuáhá-ní nisá ìa-ne na ní ndùxin-ne, doco ndiaha gá nàcòo-ne quivì natiacu-nè. Te còò gá ni-iin fuerza iin nsii na ndùxin-ne. Doco nú sàni natiacu-nè, yáha ga fuerte ndiaha nàcòo-ne.

44 Iin iquìcúñú ñuhìví yohó icúmí-ndá na ndùxin-nda. Doco nú sàni natiacu-ndà, dandu cuerpu ndiaha cundua, vètuni cundoo-nda gloria. Cuerpu xi-nda icúmí-ndá vichi, iin ñà-cundoo-nda ñuhìví yohó nduá, doco cunaha-nsiá, icúmí coo stná iin ñà-cundoo-nda inga ñuhìví.

45 Te dohó cachí stná nùù tutu ì: “Tiàa nì cuyucun primeru, nì sàcùnduu-ne iin nèhivì itiácú, divi nduú Adán”. Doco iá stná inga ana nduú nahi Adán, divi mii-yá nì quixi nchícùn gà, te nùù anima mii-yá níhìtáhvi nèhivì vida ndiaha.

46 Doco ¿nansa nisa ìa iquìcúñú nècuàchì nì quixi primeru mà? Pues divi primeru nì sàcòo iquìcúñú cui coo ñuhìví yohó-ní, te màdì ñà-nduá itiácú ndiaha na iin Espíritu Ì. Còò, siempre nchícùn gà vaxamá.

47 Ñàyùcànduá, nècuàchì primeru yucán, ñuhù ñuhìví yohó nì cuyucun-nè; doco ana nchícùn gà nì quixi ma, ansivi ní quixi-ya, te divi Stoho-ndà Señor nduú-yá.

48 Nèhivì ñuhìví, nacua nisa ìa xii-né nì cuyucun ñuhù, ducán xíndaa stná-nè vichi. Doco nsidaa nèhivì nduú nèhivì cuenta xì gloria, divi nacua iá mii-yá iá gloria, ducan xíndaa stná-nè.

49 Ñàyùcànduá, tiempu vichi ndáa-nda nahi xii-ndà nì cuyucun ñuhù, doco después icúmí-ndá nàcùnduu-nda nacua iá mii-yá iá gloria.

50 Doco cunaha-nsiá, na xínduu ì-ndà nèhivì ñuhìví yohó xì iquìcúñú-ndà, tàñáha ga cui sàa-ndà cundoo-nda ñuhìví ì xí-yá, ñánì. Te ducání stná, nú tàñáha ga dàma iquìcúñú-ndà, mà cúí sàa stná-ndà cundoo-nda ndé mà sívì gá iquìcúñú-ndà; vèchi tiempu vichi sívì-ndà na xíhì-ndà.

51 Ñàyùcànduá, cuàhìn cachì xì-nsiá iin palabra nisa ìa dèhé antes; cunaha-nsiá, mà sàa nsidaa-nda cui-ndà; doco nsidaa-nda icúmí-ndánadàma iquìcúñú-ndà.

52 Na tiácú sívì corneta último, dandu yáha ga yàchì, na ìn cáchì nadàma dahuun-nda. Vèchi icúmí sívì corneta, dandu natiacu nsii ñà-mà cúí gà-nè.

53-54 Tiempu vichi xíhì nèhivì ñuhìví, te sívì-né; doco ndohó, vèxi iin quivì dandu nadàma-nda, dandu nicanicuahàn cunaha iquìcúñú-ndà. (Ñà-ndáa nduá), xíhì-ndà vichi, doco nú sàni nadàma iquìcúñú-ndà, dandu mà nunca cui gà-ndà. Daaní, (na tiempu sàni níhìtáhvi-ndà ducán), dandu ñà-sàni cuu ndisa palabra cachì tutu ì cundua, vèchi dohó cachá: “Vichi ndisa sàni cundee dahuun Dios; mà cúnduú gá-ndà nsii.

55 Na ní xíhì-ndà, cuàhàn-ndà ndoho fuerte-ndà nì cúí, doco vichi còò. Mate ní xíhì-ndà, doco mà nunca cundee gá tnùndoho ma nùù-ndà”, cachá`.

56 Pues sàhà ñà-ìá cuàchi nèhivì, ñà-yùcán nduá dayúhì xì-né na xíhì-nè. Vèchi nacua fuerte iá castigu cachì ley ì, ducán fuerte icúmí coo stná tnùndoho níhì-né sàhà cuàchi nì quida-ne.

57 Doco nùù ndohó, còò, vèchi ansivéhé Dios, vètuni cundee-nda nùù nsidaájàn quida Stoho-ndà Jesucristu.

⁵⁸ Ñàyùcàndùá, iin-ni xiñuhu-ñá nacuàhandee ini-nsiá, ñani màní. Iin-ni ni cúníhnú vaha inì-nsia Stoho-ndà Señor, te quida stná-nsiá cuàhà obra ndiaha xí-yá, vachi ináhá-ndá, màdì úún-ní quee ñà-xìnúcuáchí-ndá nùù-yá.

16

Nansa ni xicàn Pablo nùù nècuàchì ñuu Corinto ñà-datacá-nè cooperación sàhà nècuàchì ndahví

¹ Vichi cuàhìn càhìn xì-nsiá sàhà nansa quida tnaha-nda cooperar ñà-chindee-nda dava ga nèhivì xí Dios. Cunaha-nsiá, nacua nì cachì xì nèhivì xí-yá ndoó ladu Galacia, ducán cuní quida stná mii-nsiá.

² Cada quivì domingu xiñuhu tavà cuàán iin iin-nsia iyuhu ñà-ndùá sàni quida-nsia ganar, dandu quivì sàì ndé ndoó-nsiá, có-ndùú gá ñà-càcàn gá-nsiá dìhùn.

³ Te nú sàni sàì, dandu icúmí stná-nsiá nacàxin-nsia iin ùì nèhivì techuín cùhùn ñuu Jerusalén ñà-cunihi-ne tnùmani xí-nsiá cùhùn. Te icúmí tiaa stnài iin carta cunihi-ne cùhùn ñà-ndùá iin chuun vaha.

⁴ Te nú tuxí inì vètùni cùhùn stnài, dandu cutnàhì xì nècuàchì mà cùhùn-nsì.

Nansa nihnú ini Pablo cacauu ga-nè ñuu te ñuu

⁵ Yùhù nihnú inì quihin ichì cùhìn ladu Macedonia. Te nú sàni yàhi ladu yucán, dandu icúmí sàà stnài ndé ndoó mii-nsiá ñuu Corinto jaàn.

⁶ Te vihini coo chíí xì-nsiá jaàn cahín, dècuèndè vihini coi inii tiempu vixin, dandu después chindee-nsiá yùhù cùhìn chicá nùù-xí ndé icúmí cùhìn.

⁷ Vàchi có-cuní yàha uin ndé ndoó-nsiá; có-cuní casàhú uin xì-nsiá. Cahnú gá Dios siquiera iyuhu tiempu cuní coi cutnahí xì-nsiá.

⁸ Doco vichi cuàhìn coi ñuu Éfeso yohó dècuèndè nacava vicò Pentecostés;

⁹ vachi ñuu yohó, ndiaha gá-sàni nuna ñuhivì nduá, vachi sà-íá cuàhà chuun xi mii-yá quida-nsi, mate ndoó cuàhà stná ana xidà inì-xì.

¹⁰ Nú ni sàà Timoteo ndé ndoó-nsiá, quidañuhu-nsiánè sàhà ñà-nì còó-né contentu na iá-nè jaàn, vachi iin-ni quidá stná-nè chuun xi Stoho-ndà Señor, nahi yùhù.

¹¹ Ñàyùcàndùá, màsà cáhìchì inì-nsianè. Te chindee-nsiánè na naquihin-ne ichì ndixi-ne ndé ié, vachi ndiatuí-nè nsiaa-nè xì compañeru-nè.

¹² Daaní, ñani-ndà Apolos, cuàhà gá nì sacundahví nùù-né áma cútnáhâ-né xì compañeru-nsì sàà-nè ndé ndoó-nsiá. Doco có-íá-nè dispuestu cùhùn-nè vichi-ni. Ndé iin quivì chicá cusaa-ne, dandu sàà-nè.

Nansa ni cachi Pablo ni casàhú-nè xì nsidaa nèhivì xí Dios ndoó ñuu Corinto

¹³ Cundoo tùha-nsia (ñà-màsà dándáhvì nèhivì-nsiá). Iin-ni cunindisá vaha-nsia, te cunihnu fuerte ini-nsiá, te nacuàhandee stná ini-nsiá.

¹⁴ Nsidanicuú chuun icúmí-nsiá xì ñanìtnaha-nsia, màsà nándodó-nsiá cuu manì stnahá ini-nsiá sàhà-nsiá.

¹⁵ Ináhá-nsiá sàhà Estéfanos xì nsidaa nèhivì vehe-ne, ñà-xínduu-ne nèhivì primeru nì xinindisa-xi mii-yá jaàn ladu Acaya. Te ináhá stná-nsiá ñà-cuàhà guá voluntad icúmí-nè chindee-né nsidaa nèhivì xí Dios, ñànì.

¹⁶ Ñàyùcàndùá, cuní quidañuhu stná-nsiánè xì nsidaa stná ana nihnú inì-xi nahi mii-né, xì nsidaa gá stná nècuàchì xinúcuáchì nùù-yá, te chindéé sàhà chuun nsiha, cuní quidañuhu víi-nsiánè.

¹⁷ Nì cudìi gá inì na ní quesaa Estéfanos xì Fortunato xì Acaico, vachi mate mànicùí quixi mii-nsiá, doco siquiera mii-né nì quesaa-nè, te sàhàjàn sà-íé` contentu.

¹⁸ Sàni nacuàhandee ini-nè anímè, te divi ducaní tùha stná-nè quida-ne xì mii-nsiá, ináhì. Ñàyùcàndùá, xiñuhu quidañuhu víi-nsiánè, mii-né xì nsidaa gá stná nèhivì nahi mii-né.

¹⁹ Nsidaa nèhivì natácá càhvì xì Dios ladu Asia yohó, cásàhú-nè xì-nsiá. Te cásàhú stná Aquila, xì Priscila, xì nsidaa gá stná nèhivì natácá vehe-ne; cuàhà gá (cudû ini-nè) ñà-ndòó-nsiá ladu xì mii-yá.

²⁰ Nsidanicuú nèhivì xí-yá (ladu yohó), cásàhú-nè xì-nsiá. Te mii-nsiá, nacasàhú stnahá víi stná-nsiá ñà-ndùú-nsiá nèhivì ìì xí-yá.

²¹ Ndahà yùhù Pablo tiaí palabra yohó, te cásàhú stnài xì nsidaa-nsiá.

²² Nú iá ana có-cùú inì-xi sàhà Stoho-ndà Jesucristu, dandu ni sàà-nè ndañuhu-né nùù-yá. Te vichi cachí-ndà xì-yá: “Naxicocuîin-ní cuní-nsì, Stoho-nsì Señor”.

²³ Ni cúcúmí víhí-nsiâ gracia xì Stoho-ndà Jesucristu.

²⁴ Te cunî nsinuu inì-nsia nansa cuú inì sàhà-nsiá ñà-iin-ni xínduu-nda nèhivì xí Jesucristu. Sà-íá.

Tutu Ùì Nì Tiaa San Pablo nù Nèhivì xí Dios Ndoó Ñuu Corinto

¹ Yùhù nduí Pablo, iin nècuàchì nì nìhì chuun ì nù Jesucristu, vèchi ducán nì chitnùnì ini Dios quide. Te yohó cutnàhá stnàì xì ñani-ndà Timoteo, te cásàhú-nsì xì mii-nsiá nècuàchì natácá cahvi xi Dios ñuu Corinto jaàn, te cásàhú stnà-nsì xì nsidaa gá nèhivì xì mii-yá ndoó inicutu ladu Acaya yucán.

² Nùu Yua-nda Dios xì nù Stoho-ndà Jesucristu ni quixí cuáhà gracia sàhà-nsiá, te ni yáha vaha-nsia nicanicuahàn quida-ya.

Nansa nì ndoho Pablo sàhà ñà-nchícùn-nè Jesús

³ ¡Ansivéhé cahnú Dios xi Stoho-ndà Jesucristu, divi Yuamáni-yá! Te Yua ndohó nduú stnà-yà, te cuáhà gá cuhí ini-yàndó, te nàcuàhandee stnà ini-yàndó, vèchi cahvi-ndayá.

⁴ Te nàcuàha-yàndó valor na hora yáha-nda tnùndoho. Ducán dandu vátùnì nacuàhandee stnà ini-ndà compañeru-ndà quìvì yáha stnà-nè tnùndoho, vèchi sàhà-ñá sàni chindee-yá ndohó, ñàyùcànduá vátùnì chindee stnà-ndà ñanìtnaha-nda.

⁵ Ñà-ndàà nduá, ndohó cuáhà-ndà na yáha-nda tnùndoho na ian nì yáha stnà Cristu, doco cunaha-nsiá, ndiaha gá nàcuàha stnà-yàndó valor sàhámà.

⁶ Ñàyùcànduá, nú ndohó nsiùhù, dandu sàhà-ñá nìhì stnà mii-nsiá ndufuerté anima-nsiá, te càcu-nsia nduájàn. Daaní, divi ducánì stnà, nú sàni nacuàhandee ini Dios anima nsiùhù, divini nduú stnà mà sàhà-ñá nacuàhandee stnà ini-nsì mii-nsiá. Dandu vátùnì nìhì stnà-nsiá quidandee víi ini-nsia na hora ndohó-nsiá nahi nsiùhù.

⁷ Ñàyùcànduá, ináhá váha-nsi, nú icúmí-nsiâ ndoho-nsia nahi nsiùhù, dandu icúmí quee viámà sàhà-nsiá, vèchi ndiaha gá icúmí-yâ nacuàhandee stnà ini-yà mii-nsiá nacua quidá-yá xì nsiùhù.

⁸ Ñánì, cunì-nsì cundaà ini-nsiá nansa nì yáha-nsi ladu Asia, cuáhà tnùndoho nì xini-nsì yucán. Mà cundéé ini-nsì nì cahan-nsí, cuàhàn-nsì cui dahuun-nsi nì tuxi-nsi,

⁹ te sàni sahnde ini-nsì sàhà vida xi-nsi. Doco ducán nì cuu xi-nsì sàhà ñà-nì cundàà ini-nsì màsà cáhvì-nsí xì mii-nsí; cuisì Dios ni cahvi xi-nda, vèchi mii-yá, mà úhì danátiácú stnà-yàndó mate sàni xìhì-ndà.

¹⁰ Te ñà-ndàà nduá, divi mii-yá nì dàcácu-ya nsiùhù nùu peligru cahnu-ma na cuàhàn-nsì cui-nsì nì cùí, te (ansivéhé gá-yà), vèchi dècuèndè quìvì vichi dacácu ì-yá nsiùhù. Te xiníndísá-nsí ñà-dècuèndè stnà tnaa idá icúmí-yâ quida-ya ducán,

¹¹ nú iin-ni chindéé stnà mii-nsiá xícàn tàhvì-nsiá nùu Dios sàhà-nsí. Daaní, nú ducán xícàn tàhvì cuáhà nèhivì sàhà-nsí, dandu cuáhà gá stnà nèhivì icúmí naquimanì xì-yá sàhà-ñá ndiaha guá quidá-yá sàhà-ndà.

Nansa nì cachi Pablo ñà-nduú-né nècuàchì seguru, có-dàndàhvì-nè nèhivì

¹² Cunaha-nsiá, cuáhà gá cudí ini-nsì ñà-ínáhá-nsí víi gá quidá-nsí ñuhiví yohó. Có-dàndàhvì-nsì ni-iin nèhivì, vèchi cuisì ichì mii-yá indéhe-nsí. Te na ní sandoo-nsi ñuu-nsiá yucán, chicá más nì sàhandee ini-nsì quida víi-nsí ducán. Cónì dátíáá uun-nsi nduú-nsí nècuàchì nchichí guá, na quidá dava nèhivì ñuhiví. Còó, cuisì gracia xi Dios nì chindee xi-nsí.

¹³ Te carta tiaá-nsí nùu-nsiá, (còò ni-iin palabra ndóo dèhé nùá), vátùnì cahvi-nsiañà, te mà úhì cundaà ini-nsiá ñà-nduá cachá. Vèchi cunaha-nsiá, yùhù cunì ni sàà-nsiá mànhì váha ini-nsiá.

¹⁴ (Ináhí), algu sàcuàhàn-nsiá cundaà ini-nsiá vichi, doco cumánì vá. (Te nú sàni sàà-nsiá nì cundaà váha ndisa ini-nsiá), dandu quìvì naxicocuín Stoho-ndà Jesucristu, icúmí-nsiâ cudí ini-nsiá sàhà-nsí, te cudí stnà ini nsiùhù sàhà mii-nsiá.

15-16 Pues sàhà-ñá ináhá vâhi nsidaájàn, ñàyùcàndùá nì nacani inì sàì ndé ndoó-nsiá nì cui. Te sàhà-ñá cui ñihítàhvì váha-nsia, ñàyùcàndùá ùì xichi nàcòtì mii-nsiá nì cahín. Primeru yàhi ndé ndoó-nsiá na cùhìn ladu Macedonia; dandu nayàha tui na ndixi nì cahín. Te después, nú sàni chindee-nsiá yùhù, dandu naquihin ichì cùhìn ladu Judea nì cui.

17 Doco (ñà-cónì sái), màdì ñà-cónì nácánì sahnú inì nduá. Còó, vâchi màdiá nansa nì nì cui nacánì inì; nì có-nácánì inì na iin ñèhivì còò Dios ini anima-xi. Vâchi nú ducán nì cùndúí, dandu “jaan” cachì vichi, te después “còó”.

18 Doco ináhá Dios (cónì dàmá-nsí palabra nì cachi-nsì xì-nsiá daa) na ian dajúùn-nsì vichi, te después “còó” cachì-nsì. Còó.

19 Yùhù xì Silvano xì Timoteo, palabra sàhà Dèhemanì Dios Jesucristu nduá nì càhàn-nsì xì-nsiá daa. Te mii-yá, mà nunca (dandahví-yà ñèhivì), te cachi-yà: “Jaan, (iá consuelu”, dandu después), còó. Vâchi nú “jaan” cachì-yà, dandu divi ñà-ndácuisì nduá.

20 Vâchi nsidaa ñà-nduá sàni quida Dios comprometer, seguru icúmîa cuu ndisa quida Cristu. Ñà-jaàn nduá disáhà-xí ndácùcahan-nda quivì Jesucristu na naquímànì-ndà Dios, te cachì-ndà xì-yá amén.

21 Te divi Dios nduú ana nácuàhandee ini xì-ndà ñà-cunchicùn vii-ndà Cristu, te sàni dàhî stná-yà sàxinítùnì-ndà.

22 Te ducán iá stná na ian nì dùcùn seña xi-ya anima-ndà; te nì sàhatahvì stná-yàndó Espíritu ìì xì-yá ñà-coo Yà-ìì mà ini anima-ndà, te cunaha-nsiá, cuisì tñumànì primeru nduú yà-jaàn, vâchi chicá más icúmî-ndá ñihítàhvì-ndà después.

Ñà-nduá disáhà-xí cónì sàà Pablo ñuu Corinto

23 Cunaha-nsiá, cuisì sàhà-ñá có-cuní càhàn ndeí xì-nsiá, ñàyùcàndùá disáhà-xí tàñáha ga sàà tui ñuu-nsiá jaàn. Ináhá Dios ñà-ndàà nduá cachì xì-nsiá, te nú dandahví, dandu nì cui chicá váha.

24 Doco màsà cúníhnú ini-nsiá ñà-cuní-nsì dandacú-nsí nùù-nsiá sàhà ñà-nduá xiníndísá-nsiá. Còó, vâchi sàni xiníndísá víi-nsiá. Cuisì cuní-nsì chindee-nsí mii-nsiá ñà-chicá contentu nì cùndóó-nsiá.

2

1 Ñàyùcàndùá, yùhù nì cachì ini anímè, mà cùhìn visita ndé ndoó-nsiá nú puru tñùnsì ini cundua.

2 Vâchi nú nì nácùndoo-nsia tñùnsì ini quide, dandu mà sái cudìi gá inì, vâchi divi mii-nsiá nduú ana cuní cudìi inì sàhà-xí.

3 Ñàyùcàndùá, nì tiai iin carta nùù-nsiá còtó sàì ndé ndoó-nsiá, te cuisì cuhuun inì sàhà-nsiá mate ñà-cudìi inì sàhà-nsiá nduá cuní. Ducán cachì, vâchi tuxí inì ñà-nduá cudìi ini yùhù sàhà-xí, divi nduú ñà-cudìi stná ini mii-nsiá sàhà-xí.

4 Cunaha-nsiá, cuàhà gá nì nacani inì na ní tiai carta mà; cuàhà gá nì dándòhí mií, ndè nì sacui. Doco màdì sàhà-ñá cuní dacúhúùn inì mii-nsiá nduá nì tiaiàmà; còó, cuisì sàhà-ñá nì cùndàà ini-nsiá ñà-cuàhà gá cuú inì sàhà-nsiá.

Xiñuhu cuicahnú ini-ndà sàhà iin nècuàchì nì quida xi cuàchi nú sàni cuu-ne arrepentir

5 Nú iá iin-nsia nì cuhuun ini dava-nda sàhà-xí, pues màdì yùhù nduú ana nìsa icumì guá tñùnsì ini jaàn. Còó, mii stná-nsiá nìsa icumì xi ñà-jaàn, siquiera iyuhá. “Iyuhá”, cachì, sàhá màsà quídá cuàhà güé'-ñà.

6 Doco vichi, sà-íá; còò gá necesidad càhàn duchi gá ini-nsiá xì nècuàchì nì quida falta mà nacua nì càhàn-nsiá xì-né na ní nataca-nsiá daa.

7 Vichi xiñuhu cuicahnú ini-nsia sàhà-né, te nacuaàhandee ini-nsiànè sàhá màsà cóó-né cuàhà tñùnsì ini, te cundeámà nùù-né.

8 Ñàyùcàndùá, sacúndáhví nùù-nsiá ñà-càhàn vii-nsiá xì-né vichi, te cachi-nsiá xì-né ñà-cùù ndisa ini-nsia sàhà-né.

⁹ Cunaha-nsiá, na ní tiai carta mà nùù-nsiá daa, divi sàhà-ñá cundaà inì a cúníní-nsiá, á coó nì sandua.

¹⁰ Ñàyùcàndùá, nú xicáhnû ini mii-nsiá sàhà falta xi iin nêhivì, dandu ducání quidá stná yùhù. Te nú iá ndisa ñà-ndùá xiñuhu cuicahnú inì sàhà-xí, dandu quideà. Vàchi sàhà ñà-vàha xi mii-nsiá nduá. Te indéhe Cristu; ináhá-yâ (nansa quida-nda). Pues xiñuhu cuicahnú tnahá ini-ndà sàhà-ndà sàhà-ñá

¹¹ màsà níhìndèè ñà-malu dacà-síndô, vâchi ináhá-ndá, maña cuàhà ndisa-sì.

Sàhà Jesucristu icúmí-ndá cundee-nda nùù nsidaa tnùndoho, xì sàhà nsidaa cuàchi

¹² Na ní quesai ñuu Troas ñà-cachitnùhi palabra ìì xí Cristu, dandu nì cundaà inì iá ndisa nansa quide cuàhà chuun xi Stoho-ndà Señor (ñuu yucán) nì cui.

¹³ Doco cóni cui coi contentu yucán, vâchi còò ñani-ndà Tito nì ndácùhin. Ñàyùcàndùá, nì ndaquindéi xì nècuàchi ñuu mà, te nì quihin tui ichì vâxi ladu Macedonia yohó.

¹⁴ Doco ansivéhé Dios, vâchi nicanicuahàn chindéé Jesucristu ndohó, vâtùni cundee-nda nùù nsidanicuú tnùndoho. Te chindéé stná-yàndó na cachitnùhu-nda palabra ìì xí-yá inicutu sàhà-ñá cundaà ini nêhivì nansa iá ichì-yá, dandu na ian inicutu xítìà iin dico tnami nduá.

¹⁵ Vâchi nsiùhù, (na cachitnùhu-nsi palabra) sàhà Cristu, dandu na ian xítìà iin dico ndiaha nduá, te na ian sahán tnamiá nùù Dios, (vâchi cudî ini-yà sàhà-ñá). Te nêhivì ñuhivì, na ian sahán stná dico palabra mà nùù-né, nì cùndúú-né nècuàchi cácu anima-xi, te ò nècuàchi ndañúhú anima-xi.

¹⁶ Nêhivì ndañúhú anima-xi, có-cudî ini-nè palabra mà, vâchi nahi dico nsìi nduá nùù-né, te yúhî-nè cui-nè quida. Doco nècuàchi icúmí cácu anima-xi, còò, na ian tnami gá palabra mà nùù-né, vâchi sàhámà vâtùni nihî-né vida ndiaha. Pues sàhà nsidaájàn, cuisì nêhivì vâha ndisa xiñuhu (cachitnùhu xi palabra mà).

¹⁷ Ñàyùcàndùá nsiùhù, có-quidá-nsí na quidá cuàhà nêhivì, quidá ndevàha-ne xì palabra ìì mà. Còó; có-dàndàhvî-nsì ni-iin nêhivì. Mii-yá ináhá-yâ nansa quidá-nsí, cachí ndàà-nsì xì-né nacua nì cachi-yà xì nsiùhù, cáhàn viì-nsí xì-né, vâchi nêhivì xí Cristu nduú-nsí.

3

Nansa iá tratu saa nì saquin Dios xì nêhivì

¹ Ñà-jaàn cachí-nsì xì-nsiá, doco màdì-ñá ndaníhí-nsí tnùñuhu xí mii-nsí nduú túá. Nì còò stná necesidad cunihi-nsi iin tutu nduú recomendación na sàà-nsì ndé ndoó-nsiá, nì còò stná necesidad càcàn-nsì iin tutu nùù-nsiá (ñà-cunihi-nsi cùhùn inga ñuu), mate ducán quidá dava nêhivì.

² Vâchi divi mii-nsiá nduú-nsiá nahi tutu (quidà-xì nsiùhù recomendar), vâchi mà úhì cundehè nêhivì (ñà-quidá ví-nsiá), te cundaà ini-nè (ñà-ndàà nduá cachí-nsì). Na iin carta xínduu-nsia, cachí, te na ian itándiaa palabra xan ini anima-nsì, ducán nduá.

³ Na iin carta nì tiaa mii Cristu nduú-nsiá, vâchi (na ní cachitnùhu-nsi palabra ìì xì-nsiá), dandu na ian nì dàsàà-nsì carta mà nì sandua. Doco màdì tinta nì tiaa Cristu carta mà. Còó, sàhà Espíritu ìì xí mii-yá iá nicanicuahàn, ducán nì tiaa-ya ini anima-nsiá, màdì icà iin yùù chipála.

⁴ Ináhá-nsí ñà-ndàà nduá cachí-nsì yohó, vâchi cundéé ini-nsì Dios sàhà-ñá xiníndísâ-nsí Cristu.

⁵ Doco có-tùxí ini-nsì vâtùni sàà mii-ní nsiùhù ñà-quida viì-nsí chuun yohó. Còó, cuisì nú chindee Dios nsiùhù, dandu vâtùni sàà-nsì quida-nsi chuun (xi-ya).

⁶ Ñàyùcàndùá, sàhà mii-yá vâtùni cachitnùhu viì-nsí xì nêhivì nansa iá ley saa xí-yá. Te ley mà, có-nduá palabra nì tiaa uun-ni; còó, palabra nì taxi Espíritu ìì xí-yá nduá. Vâchi nú letra uun ni cùndúá, dandu cuisì cuàhàn cachàmà xì-ndà ñà-cui-ndà; doco tucu quidá Espíritu ìì; puru vida ndiaha sàha-ya.

7-8 Ñà-ndáà nduá, ndiaha gá nisa ìa ley sàhana mate ìcà yùù chipála nì sàcùtandiaà. Vàchi (na ní nìhì Moisés ley mà), nì nanchiù ndiaha nùù-né, te sàhà ñà-yùcán mànicùì gá cundehè nèhivì Israel nùù-né. Doco inga iin ratu gá, dandu có-nchii gá mà. Ñàyùcànduá, nú ni cachí-ndà ndiaha gá nisa ìa ley primeru mà, te cutu ñá-sàà-ndà cui-ndà cachá, dandu chicá náhà xicà ndiaha gá iá (palabra cachí) Espíritu Ìì.

9 Cunaha-nsiá, sàhà ley sàhana ma vátùni nì cundaà ini-ndà iá castigu sàhà cuàchi-nda. Doco nú ni cachí-ndà ndiaha gá nì ìa na ní quesaa ley mà, dandu chicá más ndiaha palabra saa cachítnùhu xi-nda nansa ndee vaha-nda nùù-yá.

10 Te vichi, sàhà-ñá yáha ga nsiha palabra saa ma, ñàyùcànduá có-quidá gá-ndà cuenta nsiha gá ley primeru mà.

11 Doco nú ni cachí-ndà ley ndiaha nduú ley sàhana ma, te cóni ía naha cuáhà, dandu vihi gá ndiaha ndisa iá palabra saa, vachi nicanicuahàn icúmíá coa.

12 Te vichi, sàhà-ñá ináhà-ndá iá tnùndé ini ndiaha xi-nda ma, ñàyùcànduá có-yùhì-nsì càhàn vate-nsì xì nèhivì.

13 Có-quidá-nsì na ian nì quida Moisés, nì chidàhvi-ne nùù-né xì iin sìcoto sàhá màsà cúnì nècuàchì (raza-nè) Israel na cueé-ni cueé-ni ndáhvà ñà-tnùù ndiaha nùù-né.

14 (Te seña nduámà) ñà-còni cundáà vaha ini nècuàchì Israel yucán. Te dècuèndè stná tiempu vichi, ducán iá na ian ídàhvi sàxínítnùní-nè iin sìcoto, ñàyùcànduá có-sàà-nè cundaà ini-nè na iníní-né cahví nèhivì tutu xi ley sàhana. Cuisi-ní nú ni quíhvi-ne ichì Cristu, dandísá, vátùni sàà-nè cundaà ini-nè.

15 Te dècuèndè stná vichi, na cahví-né (tutu nì tiaa) Moisés mà, ducán iá na ian ídàhvi ìì sàxínítnùní-nè, (có-cundáà ini-nè).

16 Doco nú ni quíhvi-ne ichì Stoho-ndà Señor, dandísá cuxio ñà-dàdàhvi xi sàxínítnùní-nè, te claru mànìhì ini-nè.

17 Vachi Stoho-ndà Señor, divi Espíritu Ìì nduú-yá, te ndéni nì cui ni cóo Espíritu Ìì xí-yá, yucán ndisa nuná ñuhivì ìì xí-yá nùù-ndà.

18 Ñàyùcànduá, ndohó, sàni cundaà ini-ndà, có-ídàhvi ga nùù-ndà (nahi Moisés), cóo. Te ñà-ndiaha guá sàni nàcòo anima-ndà nì quida-ya, ñàyùcànduá, queámà na ian nduu-nda iin yùtátá nchii ndiaha quidá iin luz. Te cueé-ni cueé-ni dáma stná-ndà dècuèndè sàà-ndà coo ndiaha-nda nahi mii-yá. Pues divi ñà-jaàn nduá quidá-yá xì-ndà, vachi Espíritu Ìì nduú-yá.

4

1 Sàhà gracia xi Dios nì nìhítàhvi-nsì chuun ndiaha quidá-nsì; ñàyùcànduá, có-cùhúùn ini-nsì.

2 Mà túha-nsi quida dèhé-nsì ni-iin chuun chicuèhè, ni mà túha-nsi dandahví-nsì nèhivì; te mà túha stná-nsì dama-nsi palabra ìì xí-yá. Còo, puru ñà-ndácuìsì nduá cachítnùhu vate-nsì xì-né. Mà úhì cundehè-néndò, te cachi-nè a quidá víi-nsì á cóo. Te mii-yá, indéhe stná-yà nansa quidá-nsì.

3 Te nú cachítnùhu-nsi razón ndiaha xí-yá, te có-sàà nèhivì cundaà vaha ini-nè, pues ¿ndiá dísàhà-xí nduámà? Divi sàhà-ñá nchícùn-nè ichì ndé cuàhàn-nè ndañuhu-né.

4 Vachi quisì cahví guá nèhivì ñuhivì yohó, sàni dàcuàà-si anima nèhivì có-xíníndísà sàhà ñà-màsà dátñùù ndiaha Dios sàxínítnùní-nè; ñàyùcànduá mà cùì cundaà ini-nè razón vaha sàhà Cristu, mate ndiaha gá-yà, te mimíí nacua iá Yua-nda Dios, ducán iá stná-yà.

5 Cunaha-nsiá, na cachítnùhu-nsi palabra ìì, màdì sàhà mii-nsì càhàn-nsì. Còo, sàhà Stoho-ndà Jesucristu càhàn-nsì, te cuisì cachí-nsì sàhà nsiùhù ñà-nduú-nsì nèhivì xinúcuáchí nùù mii-nsiá, vachi ináhà-nsì (màni cuáhà-nsiá) nùù-yá.

6 (Vichi cunî nsinuu ini-nsià nansa nì cuu sàhana) na nisa ìin tnuu inicutu ñuhivì, te nì cachi Dios: “Ni cóo luz”, te nì sàcòa. Pues ducán nì quida stná-yà xì ndohó, nì dàtnùù-yà

ini anima-ndà, dandu nì cundaà ini-ndà ñà-ndiaha guá-yà, te divi sàhájàn na ian nchíí ndiaha stná nùù Jesucristu.

In-ni ni cúníhnu vaha ini-ndà Jesucristu nicanicuahàn

⁷ Ndisa ndudu ìì xí mii-yá nduá sàni ñhítáhvi-ndà vichi, te nahi ñà-cuicà-ndà nduú stná mà. Doco có-cùní cachà-mà ñà-càhnú gá poder icúmí ndohó, còó. Vàchi cuisì na iin quidi ñuhù ndé ñuhú ndudu ìì mà nduu-nda. Ñàyùcànduá nàhà xicà poder ndiaha xí mii-yá nduájàn.

⁸ Sahájàn, nsiùhù, có-cùhúún ini-nsì, mate yáha-nsi cuàhà tnùndoho, te nacání cuáhà ini-nsì dava xichi, doco siempre iá nansa càcu-nsi.

⁹ Quini quidá nèhivì xì-nsí, doco có-nàcòó nihni Dios nsiùhù. Sahní cuií-nè nsiùhù, doco mà cùì sàà-nè dandáñúhú dahuun-ne nsiùhù.

¹⁰ Na xicánúú-nsí ñuhívì yohó, siempre nihnú ini-nsì vihini cui-nsì nahi nì xihì stná Stoho-ndà Jesús. Doco nú ducán nihnú ini-nsì, dandu sàhámà vátùni cundaà stná ini nèhivì ñà-itiácú stná-yà, te chindéé-yàndò.

¹¹ Doco na ndoó ìì-nsí ñuhívì, nicanicuahàn ndoó-nsí tixi peligrú cui-nsì sàhà-yá sàhà-ñá cundaà ini nèhivì ñà-divi vida ndiaha xí-yá nduá icúmí-ndá, mate siempre iá peligrú cui-nsì.

¹² Ñàyùcànduá, nicanicuahàn ducán iá xì nsiùhù na ian cuàhàn-nsì cui-nsì, doco sàhà ñà-jaàn vátùni nihì mii-nsiá nansa cutiacu-nsià vida ndiaha xí-yá.

¹³ Nùù tutu ìì dohó nì tìaa iin nèhivì: “Yùhù xiníndísê mii-yá, ñàyùcànduá, nì cachì ñà-nduá nì cachì”. Pues nsiùhù, divi ducán nihnú stná ini-nsì mii-yá nahi nècuàchì yucán, te sàhájàn cáhàn vate stná-nsì palabra xi-ya.

¹⁴ Te nsinúú ini-nsì nansa nì quida Yua-nda Dios, nì dånátíácú-yà Stoho-ndà Jesús. Ñàyùcànduá, divi ducán icúmí-yà quida stná-yà xì ndohó, danátíácú stná-yàndò, dandu sàà nsidaa-nda nùù-yá.

¹⁵ Cunaha-nsiá, nsidanicuú ñà-nduá yáha-nsi, sàhà ñà-vàha xi mii-nsiá nduá. Te nú sàhámà chicá cuàhà nèhivì nihì xì gracia xi-ya, dandu chicá cuàhà stná-nè naquimanì xì-yá sàhà-ñá nì quèé gà más tnùñuhu xí-yá.

¹⁶ Ñàyùcànduá, có-cùhúún ini-nsì, vachi mate cueé-ni cueé-ni chicá cuítâ-nsì, doco anima-nsì, còó, vachi nsiquívì (chicá nàcuàhandee ini-nsì) na ian ndusáá-nsí.

¹⁷ Ñà-ndáà nduá, ndoho-nda vichi, doco quida-nda cuenta na ian, sacù-ni nduá, te yàchì icúmíâ nsiha. Doco sàhà-ñá ndoho-nda vichi, cuàhà sàstnùhù ñà-ndiaha ìì xí-yá icúmí-ndá ñhítáhvi-ndà después, te nicanicuahàn cundua.

¹⁸ Ñàyùcànduá, có-ndùlócò gà-ndà sàhà ñà-nduá indéhe-nda ñuhívì yohó, cuisì (nihnú ini-ndà) sàhà ñà-tàñáha ga sàà-ndà cuni-ndà. Vachi ñà-nduá tui indéhe-nda, ñà-yáha-ni nduá, doco (ñà-ndiaha ìì xí mii-yá), mate có-tuía cundehè-ndà, doco nicanicuahàn cunaha-ñá.

5

¹ Có-quidá nú ni sàà ndañuhu iquicúñú-ndà ñuhívì yohó, vachi nahi vehe ndé ndoó toó-ní-ndá nduá. Doco ináhá-ndá nú sàni nsiha, dandu cucumi-nda inga iquicúñú-ndà iá ansivi, te na iin vehe saín-ndà cundua, vachi Dios icúmí quidavàha xán, màdì nèhivì, te nicanicuahàn icúmíâ cunahá.

² Doco tiempu vichi na ian sácàn ini-ndà, vachi yáha ga cuní-ndà nihì-ndà iquicúñú saa iá ndé gloria mà. Vachi nahi vehe saa-nda cundua, te cunduu stná na ian màcùndixi-nda inga sìcoto saa.

³ Te ináhá-ndá, nú sàni nihì-ndà iquicúñú saa ma, màdì uun-ni coo anima-ndà na ian chaá; còó.

⁴ Doco mientras ndoó ìì-ndà xì iquicúñú-ndà ñuhívì yohó, sácàn ini-ndà, có-cuú vaha ini-ndà; doco màdì sàhà-ñá cuní-ndà cuxio iquicúñú-ndà icúmí-ndá vichi nduájàn, còó;

ñà-cùní-ndà naquihin-nda iquìcúñú saa-nda nduá, dandu mà sáà gà-ndà cui-ndà, vâchi vida ndiaha icúmí-ndá ñhì-ndà, te icúmíâmà cundee dahuan nù ñà-cui-ndà.

⁵ Pues divi Dios nduú ana chindéé xí-ndá ñà-ñhítáhvi-ndà ducán, vâchi sàni sàhatahvi-yándô Espíritu Ìi xí-yá, doco cuisì tñumanì primeru nduú Yà-ìi mà.

⁶ Ñàyùcànduá nihnú ndéé guâ ini-ndà vichi. Te ináhá stná-ndà ñà-mientras ndoó ñi-ndà cuerpu xi-nda, dandu tañáha ga cui cuni-ndà nù-yá.

⁷ Vâchi na ndoo-nda ñuhiví yohó, cuisì nihnú vâha ini-ndáyá, màdiá xinínù-ndáyá.

⁸ Pues vichi nihnú ndee ndisa ini-ndà, cachí. Doco chicá cudii ini-ndà nú ni nácóó-ndá iquìcúñú-ndà yohó, te cùhùn-ndà cundoo-nda nù-yá.

⁹ Ñàyùcànduá disáhà-xí sáhandee ini-ndà, áma cùdî ini-yà sàhà ñà-nduá quidà-ndà, a sea sàndòò-ndà nù-yá, te ò tañáha ga sàà-ndà nù-yá.

¹⁰ Vâchi nsidanicuu-nda icúmí-ndá màcuíta-nda nù Stoho-ndà Cristu, te cachi-yà xì-ndà nansa ndisa iá, a sàni quida vii-ndà ñuhiví yohó, ò á coó. Dandu cuàha-yàndó ñà-nduá ndiá ìcà iin iin-nda ñhì-ndà.

¹¹ Ñàyùcànduá, nsiùhù, yúhí-nsi còtó mà ndóo ini-yà sàhà-nsí, te sàhámà cáhàn-nsi xì nsidaa nêhivì áma (cúníndísâ stná-nèyà).

Vâha ndisa ni coó anima-ndà, màdiá datiaá uun-nda quida vii-ndà

Ináhá vâha Dios nansa iá anima-nsi, te cahnú gá Dios ni cundáà vâha stná ini mii-nsiá nansa nihnú ini-nsi.

¹² Tucutu cachí-nsi xì-nsiá ducán, doco màdi ñà-cùní-nsi cáhàn vii-nsí sàhà mii-nsí nduá, còó. Cuisì nandúcú-nsí nansa cui cudii inì-nsia sàhà-nsí, te ducán ñhì-nsiá nansa naxiconihí-nsiá nù nêcuàchì (xítñuhu xi-nsí), vâchi nêcuàchìmà, có-ndùlócò-nè nú iá vâha anima-ndà, á coó. Doco nú datiaá uun-nda quida vii-ndà, xì ñà-jaàn cudî ini-nè.

¹³ Te nú tuxí ini-nè loco-nsi, pues sàhà mii-yá nduá. Te nú ndisa nêcuàchì nihnú ví inì-xi nduú-nsí, dandu divi sàhà-ñá vâha xi mii-nsiá nduú stná mà.

Nansa cui nàcùndoo vâha nêhivì nù Dios

¹⁴ Cunaha-nsiá, yâha ga cuú ini Cristu sàhà nsidaa-nda, ñàyùcànduá icúmí-nsí quida-nsi ñà-nduá quidá-nsí. Vâchi ñi xìhì-yà sàhà-ndà, te mate imindaa ana ñi xìhì, doco cuenta xi nsidaa-nda nduámà. Ñàyùcànduá quidá stná-ndà cuenta na ian sàni xìhì stná nsidaa-nda.

¹⁵ Te nú sàni xìhì-yà sàhà nsidaa ndohó nêcuàchì itiácú, dandu có-xiñùhù gá-ndà cundoo uun-nda ñuhiví, te quida-nda cuisì ñà-cùdî ini mii-nda; còó. Cuisì mii-yá xiñuhu cunihnu ini-ndà, vâchi mii-yá ñi xìhì sàhà-ndà, te ñi natiacu-yà.

¹⁶ Ñàyùcànduá, vichi có-ndèñhí gá-nsi ñi-iin nêhivì na ian ndenihí stnahá nêhivì ñuhiví yohó. Còó. Mate antes dècuèndè stná Cristu ñi sandenihì-nsi na quidá nêhivì ñuhiví yohó, doco vichi còó cá.

¹⁷ Sàhámà (cundáà ini-ndà), nú ndoó ndisa-nda ladu xi Cristu, dandu nêhivì saa nduu-nda. Sàni yâha nsidaa ñà-nduá nisa ìa antes, te vichi sàni ndusaa nsidanicuu ñàha nù-ndà.

¹⁸ Pues nsidaámà, cuisì ñà-nduá ñi quida (Yua-nda) Dios sàhà-ndà nduá. Ñàyùcànduá, vâtùni ñi nàcùndoo vâha-nda xì-yá sàhà obra ñi quida Jesucristu. Te nsiùhù, sàni ñhítáhvi stná-nsi chuun ñà-cáhàn-nsi xì nêhivì sàhà-ñá nàcùndoo vâha stná-nè xì-yá.

¹⁹ Ñàyùcànduá, dohó cachí-nsi xì-né, ñà-ìá Yua-nda Dios anima Cristu (na ní xìhì-yà nchìca cruz), te ducán ñi ñhì-yá nansa nàcùndoo vâha nsidaa nêhivì ñuhiví nù-yá, mà cútní gá-yà cuenta sàhà cuàchi-ne. Daaní, ñi sàha-ya nsiùhù chuun ñà-cachitñuhu-nsi xì nêhivì nansa vâtùni nàcùndoo vâha-ne xì-yá.

²⁰ Sàhà ñà-jaàn cuenta xi Cristu xicánúú-nsí cáhàn-nsi xì nsidaa nêhivì. Doco (màdi ndisa nsiùhù cáhàn), Dios nduú ana cáhàn xì-né, na ian sacúndáhvi-yà nù-né sàhà palabra xi-nsi. Ñàyùcànduá, cáhàn-nsi cuenta xi Cristu, sacúndáhvi-nsi nù-né, á ma nàcùndoo vâha-ne xì (Yua-nda) Dios.

²¹ Vàchi Dèhemanì-yá, còò ni-iin cuàchi ni quidá-yá, doco sàhà ndohó nì chitnùnì ini Yuamánì-yá ñà-nacuìda-ya castigu xi-nda, na ìan mii-yá nì quida-ya nsidaa falta xi-nda. Te divi sàhámà nú nchícùn-ndàya, dandu ñà-sàni ndee vaha dahuun-nda nùu-yá nduá.

6

Quivì vichi nduú meru quivì nàcùndoo vaha-nda xi Dios

¹ Chuun ìì xí mii-yá nduá quidá-nsí, te cutnàhá stná-yà xì-nsí nùá; ñàyùcànduá, sacúndáhvî-nsí nùu-nsiá ñà-màsà cúnduá uun-ni nì nìhìtáhvì-nsiá gracia xi-ya.

² Vàchi dohó cachí-yà nùu tutu ìì:

Meru tiempu vaha nì sandua na (ní sacundahví-nî) nùí, ñàyùcànduá nì inini, te nì indehè ndahví mii-ní. Nì chindeí mii-ní, vachi meru quivì dacácuì nèhivì nì sandua.

Pues cunaha-nsiá, vichi vichi nduú meru quivì nìhì-ndà gracia xi-ya; divi quivì vichi nduú meru quivì (cuní-yà) dacácu-yàndó.

Nansa iá modo vù nì quida Pablo chuun ìì xí Jesús

³ Nsiùhù, quidá-nsí lucha ñà-màsà quidá-nsí ni-ìñàha ñà-cuitnùhu nèhivì nsiùhù, vachi có-cùnì-nsí daquéé cuàchi-ne dìquì chuun ìì quidá-nsí.

⁴ Mate cuáhà ìñàha yáha-nsi, doco cuní-nsí quida vù-nsí chuun, áma cúndáà ini nèhivì ñà-divi nùu Dios xinúcuáchí-nsí. Doco dava xichi cuáhà gá icúmí-nsí quidandee ini-nsí, te ndoho cuahà-nsí. Cuáhà vida yáha-nsi, xì cuáhà tnùndoho.

⁵ Dècuèndè sahní cuií-nè nsiùhù, te chicadí-nè nsiùhù; te dava xichi nacuídà stná-nè sàhà-nsí. Ùhì gá iá chuun quidá-nsí. Xicánúú-nsí desveladu, te xihì stná-nsí doco.

⁶ Doco quidá-nsí lucha ñà-màsà cóó ni-iin falta xi-nsi. Cuisì ñà-nduá ináhá-nsí (nùu Dios) nduá cachí-nsí xì nèhivì. Te quidándéé stná ini-nsí sàhà-né, vivì-ni quidá-nsí xì-né. Te chindéé stná Espíritu ìì xí-yá nsiùhù sàhà ñà-nì cùú ndisa ini-nsí sàhà-né.

⁷ Puru ñà-nduú ñà-ndácuisì xí Dios cáhàn-nsí xì-né, te chindéé stná ndudu ìì xí-yá nsiùhù. Te ¿índù arma nihí-nsí? Cuisì ñà-quidá víi-nsí nacua cuní mii-yá, divi ñà-jaàn nduá chindéé-nsí mii-nsí, te quidá-nsí mii-nsí defender.

⁸ ò sea cañuhu-né nsiùhù, te ò cahíchi ini-nè nsiùhù, iin-ni quidá-nsí seguir chuun xi-nsi. Mate daquéé cuàchi-ne dìquì-nsí, te ò tavá-né tnùñuhu xí-nsí, có-quidá mà. Tnuhu-nsí cahan-né, doco có-quidá, vachi micuísì ñà-nduú ñà-ndáà cáhàn-nsí xì-né.

⁹ Te mate dava-ne nacuaá-né nsiùhù, doco cuáhà gá stná-nè ináhà vaha-ne nsiùhù. Cuáhà xichi cuáhàn-nsí cui-nsí nì cùí, doco itiácú ìì-nsí. Dandohó stná-nè nsiùhù, doco tãñaha ga nihì-né cahni-né nsiùhù.

¹⁰ Mate iá nansa ndoó-nsí tnùnsí ini, doco nicanicuahàn ndoó stná-nsí contentu. Ndahví yáha stná-nsí, doco divi sàhà nsiùhù níhì cuáhà nèhivì ñà-cuicà (ndiaha xí Dios). Còò ni-ìñàha icúmí-nsí ñuhivì yohó, doco nsidanicuú ìñàha sàni nìhìtáhvì-nsí cucumi-nsí.

¹¹ Mii-nsiá nècuàchì ñuu Corinto, claru sàni dàtúi nùu-nsiá nsidaa ñà-nduá nihnú ini. Sàni cachì xì-nsiá nsidaa ñà-nduá ñuhú ini anímè.

¹² Ñàyùcànduá, nùu yùhù, còò desconfianza, vachi mànì cuáhà-nsiá nùí. Mii-nsiá nduú ana cuú desconfiar. Cuenta xi mii-nsiá nduájàn, màdì yùhù.

¹³ Na iin yua-nsiá, ducán cáhàn xì-nsiá vichi, te cachí xì-nsiá ñà-cùú ndisa inì sàhà-nsiá. Ñàyùcànduá sacúndáhvî nùu-nsiá ñà-ducánì ni quidá stná-nsiá xì yùhù.

Na iin vehe Dios nduu-nda

¹⁴ Màsà nácuátnáhá-ndá xí nèhivì có-xiníndísá-xí mii-yá, vachi nahi yunta có-ndùdává queámà. ¿A ndísá vátùni nacuaastnahá ñà-íá vù xì ñà-íá quini? Còó, ni mà cúí nacuaastnahá stná ñà-nchìí orá xì ñà-íín tnúú.

¹⁵ Ni mà cúí nacuatnahá stná Cristu xì ñà-malu Satanás. Stná iin nècuàchì xiníndísá, mà váha nacuatnahá-né xì iin nèhivì có-xiníndísá.

16 Te ò iin veheñuhu ìì xí Dios, ¿a váha cuita stná yùù yócò yucán? Còó. Pues cunaha-nsiá, nahi veheñuhu ìì ndé iá Dios vivu, ducán xínduu stná ndohó, vàchi dohó cachí-yà nùù tutu ìì:

Yùhù cuàhìn coi ndé ndoó-né, te cacanu stnàì mahì-né, vàchi ana cahvi-né cundui, te mii-né, nèhivì xí cunduu-ne.

17 Ñàyùcàndüá, dohó cachí stná-yà:

Quee cuaán-nsiá nùù nsidaa nèhivì (malu mà), màsà cùndóó gá-nsià mahì-né. Ni màsà tñí-nsiá ni-iin ñà-sìquini, dandu cudìì inì sàhà-nsiá,

18 te cundui na iin yua-nsiá, te mii-nsiá cunduu-nsia nahi dèhi, cachí Stoho-ndà Señor, divi mii-yá ana icúmí xí nsidanicuú poder.

7

1 Pues ducán sàni cachi-yà quida-ya xì-ndà, ñani màní. Ñàyùcàndüá, xiñuhu-ñá nacoo dahuun-nda nsidanicuú ñà-íá quini, a ducán nduá cuàchi quida-nda xi ndahàsàhà-ndà, te ò ñà-ndüá quida-nda cuisì inì anima-ndà. Nsìquívì chicá más xiñuhu cunihnu ìì ndisa ini-ndà, te yùhí stná-ndà (còtó mà cùdíì) ini-yà sàhà-ndà.

Nansa ni naxicocuïn ini nècuàchì ñuu Corinto sàhà falta xi-ne

2 Sacúndáhvì-nsì nùù-nsiá ñà-nì nácúníhnú vaha ndisa ini-nsià nsiùhù, vàchi cónì quidá quíní-nsí xì ni-iin-nsia; ni cónì dàtúcù-nsì ni-iin-nsia; ni cónì dandàhvì stná-nsì ni-iin-nsia.

3 Doco màdiá daquéè cuàchi dìquì-nsiá nduá cachí xì-nsiá ducán. Còó, vàchi sàni cachi xì-nsiá ñà-màni cuàhà-nsiá nùù, te nicanicuahàn nihnú inì mii-nsiá ini anímè, a ducán itíácú-ndà ñuhiví, te ò ni sàà-ndà cui-ndà.

4 Cuàhà gá confianza sà-icúmí xì-nsiá vichi, te cudìì gá inì sàhà modo nihnú inì-nsia, ñàyùcàndüá, mate ni sái yàhi cuàhà tñùndoho, doco cudìì inì, vàchi sàni ndòò vaha inì sàhà-nsiá, te contentu ié vichi.

5 Doco cunaha-nsiá, na ní quesaa-nsì ladu Macedonia yohó, mànicuí cundoo dadí-nsí. Cuàhà iñàha sadí xì nùù-nsí, te cuàhà nèhivì xiní ùhì xì-nsí, dècuèndè ini stná anima-nsì ni nacani cuahà ini-nsì.

6 Doco iá ana chindéé xí nècuàchì cuhúún inì-xi, divi mii-yá; ñàyùcàndüá na ní ndacùhun tnahá-nsí xì Tito, cuàhà gá ni nacuahandee ini-nsì na ní xini-nsìnè.

7 Te màdi cuisì sàhà-ñá nì quesaa nècuàchì mà nì cudìì ini-nsì; còó, vàchi sàhà stná ñà-nì cudìì guá ini mii-né sàhà-nsiá, ñàyùcàndüá ndiaha gá nì ndòò ini-nsì. Vàchi nì nacani-ne xì-nsí ñà-cudìì ini-nsià cuni-nsià nsiùhù inga tu, te cuú cuàhà stná-nsià sentir (sàhà ñá-ndüá nì quida-nsia). Sànihnú vaha inì-nsia nsiùhù, cachí-nè. Pues sàhà nsidaájàn chicá nì nihì yùhù nì ndudìì inì.

8 Cunaha-nsiá, mate ní sandoo-nsia tñùnsí ini nì quida tutu nì tiai daa, doco có-ìé' arrepentidu sàhàmà vichi, mate antes ndisa, nì nacani inì nanduu gué' nì tiaiàmà cahín, vàchi (nì xinì) nì sàcùndoo-nsia tñùnsí ini, mate iyuhu-ní quivì.

9 Doco vichi sàni ndudìì tú inì. Doco màdi sàhà-ñá nì cuhuun inì-nsia nduájàn. Còó, divi sàhà-ñá nì nihì-nsiá nì cuu-nsia arrepentir na ní nsihi nì cuhuun guá inì-nsia mà. Vàchi ñà-nì sàcùndoo-nsia tñùnsí ini mà, iin obra ndiaha xí Dios nì sandua, màdiá iin dañu nì quidá-nsí xì-nsiá.

10 Vàchi nú Dios nduú ana quidà-xì tñùnsí ini xi-nda, dandu vètùni sàà-ndà naxicocuïn ini-ndà, te nihì-ndà càcu-nda. Te nú sàni càcu-nda, dandu mà nunca naxicocuïn gá ini-ndà sàhájàn. Doco nú ndoo-nda tñùnsí ini nahi dava ga nèhivì ñuhiví, mà ùhì cahniámàndó.

11 Doco mii-nsiá, sàhà-ñá Dios nì sàha xi-nsiá tñùnsí ini mà, (cuàhà gá ñà-vaha sàni quea nùù-nsiá). Vàchi nì quesaha-nsiá nacani sahnú inì-nsia sàhà ñà-ndüá nì cuu, te nì cunsihi ini-nsià cuxio dahuun falta mà nùù-nsiá. Cónì ndóo ga inì-nsia sàhà chuun quini ma, dècuèndè nì yùhí stná-nsià. Dispuestu nì ndòò-nsia naquida vii tú-nsiá, te ndundà

vàha sàhà chuun ma. Dandu nì nsinuu stná inì-nsia yùhù. Pues vichi sàni cundaà inì nì quida-nsia, sà-lá vii anima-nsià.

¹² Na ní tiai carta mà, màdì cuisì sàhà nèhivì nì quida xi falta mà nì tiaià. Ni màdì cuisì sàhà stná nèhivì nì ndoho sàhà falta mà; còó. Nì tiai sàhà ñà-nì sàà-nsià mànihì váha inì-nsia ñà-cùú ndisa ini-nsi sàhà-nsiá, nacua ináhá mii-yá.

¹³ Te vichi sàhà-ñá sàni cundaà vaha inì-nsia ñà-dúcán nduá, ñàyùcànduá sàni ndòò vaha inì. Te chicá más nì cudì stná inì na ní xini ñà-contentu guá nì ndòò stná Tito sàhà-nsiá, vachi yáha ga nì cudì ini-nè nì quida-nsia.

¹⁴ Te divi nacua nì cachì xì-né antes ñà-ináhí, icúmí-nsiá quida vii-nsiá, (pues ducán nì cuu ndisa). Ñàyùcànduá, có-cùcáhán núi nì cachì ducán. Vachi nacua nì cachì xì-né, ducán nì xini-nè ñà-ndàà nduá nacua iá ndàà nsidaa palabra (ìi) nì cachì xì-nsiá antes.

¹⁵ Te mii-nsiá, chicá màni stná-nsià nù-né vichi, vachi cudì ini-nè na nsinúú ini-nè nansa nì quida-nsia, vachi nì quidañuhu-nsiánè na ní sàà-nè yucán, te nì inini vii-nsiánè dècuèndè nì quidi stná-nsià nì yùhì guá-nsià.

¹⁶ Ñàyùcànduá, yùhù cudì inì vichi, vachi ináhá vâhi vâtùni cahvi xì-nsiá (ñà-quida vii-nsiá).

8

Xiñuhu chindee tnaha-nda quivì iá necesidad xi ñanìtnaha-nda

¹ Ñánì, cuàhìn nacani xì-nsiá ñà-cuàhà guá gracia sàni quida Dios xì nèhivì xí-yá ndoó ladu Macedonia.

² Vachi mate cuàhà gá tnùndoho yáha-ne, doco contentu ndoó-né. Te mate ndahví gà-nè, doco nì cudì ini-nè, (nì quida stná-nè cooperar), ñàyùcànduá, cuàhà gá ñà-nduá nì taca.

³ Vaha ga voluntad icúmí-nè, ináhí, vachi nì sàha-ne ñà-nduá sàà-nè quida-ne; còó, dècuèndè más ñà-nduá sàà-nè quida-ne nì sàha-ne, mate ndahví dahuun-ne.

⁴ Doco nì sacundahví-nè nù-nsí, áma cuáha-nsi quida stná-nè cooperar chindee stná-nè nècuàchì (ndahví) nchícùn stná xì Yua-nda Dios.

⁵ Te divi ducán nì quida-ne. Te más gà nì quida-ne nù ñà-nduá nì tuxi ini-nsi cuàhàn-nè quida-ne, vachi primeru nì dáyaha-ne mii-né ndahà Stoho-ndà Señor, dandu después nì ndòò stná-nè cunini-ne ñà-nduá cachi nsiùhù según nansa cuni stná mii-yá.

⁶ Pues sàhà nsidaámà sàni cachi stná-nsi xì Tito ñà-nì cáhàn-nè xì mii-nsiá, áma quidá màni stná-nsià, te cuacatnahá nsihi cooperación xi-nsia, vachi divi nècuàchì mà nduú ana (nì cáhàn xì-nsiá) primeru sàhájàn.

⁷ Mii-nsiá, cuàhà gá sàni nihítahví-nsiá (nù Yua-nda Dios). Xiníndísá fuerte-nsiá, te cáhàn ndiaha stná-nsià palabra xi-ya. Sàcundáà vaha stná inì-nsia sàhà ichì-yá, te dii gá stná inì-nsia cunchicùn-nsià ichì mà. Daaní, cuú cuàhà stná inì-nsia sàhà-nsí. Ñàyùcànduá, ndiaha gá coo nú nì cútùha stná-nsià quida-nsia cuàhà obra ñà-chindee stnaha-nda.

⁸ Màdì-ñá dandacuí nù-nsiá nduá yohó, còó. Cuisì cuní cundaà inì-nsia ñà-cuàhà guá sàni cunsihi stná ini nèhivì dava ga (nì quida-ne cooperar), te cuní stná cunahà claru ñà-cuàhà guá cuú ini-nsià sàhà ñanìtnaha-nsia.

⁹ Vachi ináhá stná-nsià ñà-ndiaha guá nì quida Stoho-ndà Jesucristu; cuica sàstnùhù iá-yà (gloria xi-ya), doco sàhà ndohó nì quixi ndahví-yà, te ñàyùcànduá, vâtùni nì nihì-ndà ñà-cuicà ndiaha ndisa.

¹⁰⁻¹¹ Vichi cuàhìn cachì xì-nsiá ñà-nduá tuxí ini yùhù sàhà chuun yohó. Cunaha-nsiá, ndiaha gá nì quida-nsia agua na ní cunsihi inì-nsia, te nì quesaha-nsiá (datacá-nsià algu). Ñàyùcànduá, chicá vaha ni dáxínu dahuun-nsia obra mà vichi. Te nacua nisa cudì guá inì-nsia daa, ducani xiñuhu quida stná-nsià seguir vichi, te cuàha-nsia cooperación xi-nsia según nansa sàà iin iin-nsia cuàha-nsia.

¹² Vàchi nú iá vaha voluntad xi-nda cuàha-nda, dandu cudî ini Dios sàhà-ndà, (a cuáhà, ò iyuhá), vachi segùn ñà-ìcúmí-ndá nduá; có-xìcàn-ya ñà-có-ìcúmí-ndá.

¹³ Màdiá cuní ndundahví mii-nsiá, te nducuica nècuàchìmà. Còó.

¹⁴ Cuisì cuní ñà-dava dava ni coá. Vàchi vichi icúmí mii-nsiá algu, te vètuni chindeámà nèhivì iá guâ necesidad xi. Daaní, na quívì coo stná necesidad xi mii-nsiá, vètuni chindee stná nècuàchìmà mii-nsiá. Ducán dandu sàà ndudava ñà-nduá icúmí nsidaa-nda.

¹⁵ Cunaha-nsiá, divi ducán cachí stná nù tutu ì ndé cachá: “Nècuàchì nì dâtàcá cuàhà (ñà-cuxi-ne), cónì cùyódoá nù-né; te nècuàchì nì dâtàcá xì iyuhu-niá, ni cónì quidá mánìá nù-né”.

Nansa nì quida Pablo recomendar Tito nù nècuàchì ñuu Corinto

¹⁶ Ansivéhé Dios sàhà gracia nì quida-ya xì Tito, vachi iin-ni nihnú stná ini-nè nahi yùhù, iin-ni cuní stná-nè chindee-né mii-nsiá.

¹⁷ Ñàyùcànduá, na ní càhìn xì-né (ñà-nì cùhùn-nè ndé ndoó-nsiá) nì dándàa-nè. Te voluntad xi-ne nì sanduu stná, vachi cudî gá stná ini-nè sàhà-nsiá.

¹⁸ Daaní, iá stná inga ñani-ndà icúmí cutnahá stná xì Tito sàà. Cuàhà tnùñuhu icúmí-nè nù nsidaa nèhivì xì Dios ndoó cuàhà ñuu, vachi cuàhà gá chindéé-nè xítìá razón ndiaha xí-yá.

¹⁹ Te divi stná-nè nì quee-ne nombradu ñà-cutnahá-né xì-nsí chindee stná-nè xì obra quidá-nsí (sàhà nècuàchì ndahví). Te ¿índù chuun quidá-nsí obra mà? Divi sàhà-ñá nì queé más tnùñuhu xì Dios, te cundaà stná ini nèhivì ñà-cuàhà guá cudî ini-nsiá quida-nsia obra.

²⁰ Ñàyùcànduá, (cutnàhâ stná nècuàchìmà xì-nsí) sàhà-ñá màsà níhìndèè nèhivì cuitnùhu-ne nsiùhù sàhà òhùn mà, vachi cuàhà gá nduá sàni taca.

²¹ Cuní-nsì quida vii-nsí nù nsidanicuú chuun xi-nsi, vachi indéhe Dios. Doco nù stná nèhivì cuní-nsì quee vii stná mà.

²² Daaní, iá stná inga ñani-ndà techuún-nsí cutnahá stná-nè sàà jaàn. Cunaha-nsiá, cuàhà gá chuun sàni sàha-nsinè, ñàyùcànduá sàni cundaà ini-nsì cùnsìhi ndisa ini-nè quidá-né chuun xi mii-yá. Te vichi chicá más cudî ini-nè, vachi ináhá-nè cuàhàn-nsiá quida stná-nsiá cumplir vichi.

²³ Ñàyùcànduá, nú ndàcàtnùhù nèhivì ana nduú Tito, pues cachi-nsiá xì-né ñà-divi compañeru yùhù nduú-né; ndùì-nsì iin-ni quidá-nsí chuun ì xí-yá ñà-chindee-nsí mii-nsiá. Te nú ni ndàcàtnùhù stná-nè sàhà dava ga ñani-ndà (icúmí sàà), dandu cachì-nsia ñà-nduú-né nècuàchì nì quida nèhivì xì Dios nombrar, te quidá víi stná-nè nacua cuní Cristu.

²⁴ Ñàyùcànduá, quidañuhu-nsiá nsidaa nècuàchìmà sàhà-ñá cundaà ini-nè màni ndisa-ne nù-nsiá, te ducán cundaà stná ini nèhivì xí-yá ndoó cuàhà inga ñuu. Te nú ducán màni guá quida-nsia xì-né, dandu cunahà claru stná divi ñà-ndàà nduú nsidaa ñà-vàha sàni cachì xì nèhivì sàhà-nsiá.

9

Ñà-nduá disàhà-xì nì techuún Pablo nèhivì cùhùn ñuu Corinto quihin xi cooperación sàhà nècuàchì ndahví

¹ Vichi còó necesidad cachi guè xì-nsiá sàhà ñà-nduá datacá-nsiá sàhà nèhivì xì Dios,

² vachi ináhì iá cuàhà voluntad xi-nsia, te ducán sàni cachi stnáì xì nècuàchì ladu Macedonia yohó. Vàchi cudî inì nacani xì-né nansa quidá-nsiá ladu Acaya jaàn, dècuèndè agua sàndòò-nsiá dispuestu chindee-nsiá, cachì xì-né. Ñàyùcànduá, cuàhà gá stná nècuàchì ladu yohó sàni ndudii stná ini-nè (cuàha-ne).

³ Doco de todos modos, cuàhìn techuún iin ù ñani-ndà sàà ndé ndoó-nsiá (ñà-chindee-né) mii-nsiá datacá nsihi-nsia ñà-nduá cuàhàn-nsiá cuàha-nsia. Dandu

cunahà claru ñà-ndácuìsì nduá nì cachì (xì nècuàchì ladu yohó), màdì tnùhu, vàchi icúmí coo ndisa cooperación xi-nsia.

⁴ Vàchi cahví xì-nsiá ñà-coo listu nsidaámà, vàchi nú sàni sàà-nsì después, te tàñáha ga cuacatnahá, dandu cucahan núu-nsí, yùhù xì stná nècuàchì Macedonia cutnàhá xí. Te mii stná-nsiá, vihini cucahan núu-nsiá, nú cóa.

⁵ Ñàyùcànduá, nì nacani inì, chicá vaha càhìn xì iin ùi ñani-ndà yohó ñà-codònuù-né sàà-nè chindee-né mii-nsiá cuacatnahá ñà-nduá nì cachi-nsiá antes mà. Dandísá, coo listuá, te cundua na iin tnùmanì ndiaha nì sàhatahvì-nsiá, màdiá nahi dìhùn nì tavà-nsí nùu-nsiá.

⁶ Cuní⁶ nsinuu inì-nsia palabra yohó: nú iyuhu chihi-nda, dandu iyuhu cosecha nachivàha-nda; doco nú chihi cuahà-ndà, dandu cahnú coo stná cosecha xi-nda.

⁷ Cada iin iin-nda según cudí ini-ndà, ducan xiñuhu cuàhatahvì-ndà; nú có-cùnì ndisa-nda quida-nda cooperar, dandu còo necesidad cuàha-nda; màdì fuerza nduá. Vàchi Dios, cuàhà gá cudí ini-yà nú iá vaha voluntad xi-nda cuàhatahvì-ndà iñàha.

⁸ Te vátuni quida stná-yà cuàhà gracia sàhà-ndà, te nìhì-ndà nsidaa ñà-nduá xiñuhu nùu-ndà. Ni-ñàha mà-quidá falta nùu-ndà, dandu vátuni quida stná-ndà nsidanicuú clase obra vaha.

⁹ Vàchi dohó cachí stná nùu tutu ì: Nì dacútàhvì nècuàchì mà cuàhà nèhivì ndahví; cónì cùhì ini-nè biene xi-ne, ñàyùcànduá nicanicuahàn iá obra xi-nemà (nùu Dios).

¹⁰ Divi Dios nduú ana sàha xi-nda ñà-nduá chihi-nda, xì ñà-nduá xixí stná-ndà. Ñàyùcànduá, icúmí-yà cuàha stná-yàndó nsidaa ñà-nduá xiñuhu sàhà-ñá (quida-nda obra), dandu quee cuahà stná (ñà-vaha nùu-ndà). Vàchi nahi tata chihi-nda, ducán nduú biene xi-nda, te nahi cosecha nduú stná obra quida-ndama.

¹¹ Ñàyùcànduá, nú sàni nducuahà ñà-nduá icúmí-ndá, dandu chicá más cui dacútàhvì stnahá stná-ndà. Te divi sàhà tnùmanì cuàhàn-nsì dasàn-nsímà icúmí cuàhà nèhivì naquimanì-né Dios.

¹² Vàchi na chindéé-ndá ñanìtnaha-nda ducán, (cuàhà gá quidá), màdì sàhà cuiìsì necesidad xi-ne chindéá; còo, vàchi cuàhà gá stná nèhivì icúmí naquimanì ndiaha xi-yà sàhà obra mà.

¹³ Vàchi nú sàni xini-nè nansa nì chindee-nsiánè, dandu icúmí-nè ndenihi cahnú-néyà sàhà-nsiá ñà-sàni xini-nè ñà-ndáà nduá, nchícùn viì-nsiá razón ndiaha xí Cristu nacua cachí-nsiá. Te icúmí stná-nè naquimanì-néyà sàhà ayuda nì sàha-nsianè, xì sàhà stná nsidaa ayuda sàha-nsia ndéni nèhivì ní cui.

¹⁴ Ñàyùcànduá, màni gá icúmí-nè cunihnu ini-nè sàhà-nsiá, te càcàn tàhvì stná-nè sàhà-nsiá nùu-yà ñà-nì xini-nè cuàhà gá gracia quidá-yà sàhà-nsiá.

¹⁵ Te vichi, jansivéhé cahnú-yà sàhà tnùmanì ndiaha xí-yà nì sàhatahvì-yándô, (divi Dèhemani-yá)! Ni mà cúi sàà-ndà naquimanì-ndàyà nacua ndiá ìcà-ndà.

10

Nansa nì dànsínúú ini Pablo nècuàchì ñuu Corinto ñà-ìá derechu xi-ne, vàchi Jesús nduú ana nì sàha xi-né chuun ì quidá-né

¹⁻² Sà-ìnáhá-nsiá màni ini Cristu; mà dána-yà. Ñàyùcànduá, yùhù Pablo, sacúndáhvì nùu-nsiá ñà-màsà cóo ni-iin necesidad càhàn ndeí xì-nsiá na sái. Vàchi cachí dava nèhivì sàhì ñà-nduú iin nèhivì cùchitnu na ié cutnàhì xì-nsiá, doco na iá xìqué, (te tiaí carta xì), dandu mà úhì càhàn ndeí, cachí-nè. Pues ñà-ndáà nduá, vihini nihnú inì càhàn fuertí xì dava-nsia. Vàchi tuxí ini dava-nsia sàhà-nsí ñà-quidá ndevàha-nsi na quidá ndéni nèhivì ní cui ñuhivì yohó.

³ Pues, ñà-ndáà nduá, nèhivì ñuhivì yohó nduú-nsí, doco na cuní-nsì cundee-nsí (nùu ñà-có-ndiáà), có-quidá-nsí guerra na quidá nèhivì ñuhivì yohó.

⁴ Iá ndisa nahi arma xi-nsi, doco có-nduá arma xi ñuhíví yohó. Còó, arma ndiaha xí Dios nduá xichúûn-nsí, te nihá ndudu ìì xí-yá, ñàyùcànduá vátùni cundee-nsí nùù nsidaa ñà-có-ndiàá íá ñuhíví yohó mate fuerte gà-ñà.

⁵ Vátùni cundee-nsí nùù nsidaa palabra nchichí chítñuní ini nèhivì tuxí inì-xi mii-né nduú-né mii-né, te sadí-nè nùù (palabra cachítñuhu) nansa cunitnàhà-ndà xì Dios. Vátùni cundee stná-nsí nùù-né ñà-nì sàà-nè cunini stná-nè Cristu, te cunihnu vaha stná ini-nè cuisì nacua cuní mii-yá.

⁶ Te mii-nsiá tu, nú sàà-nsiá cunini vaha ndisa-nsiayà, dandu ndiaha gá coo. Doco nècuàchì iin-ni có-cùnì cunini (xi-yá), icúmí-nsí cuàha-nsinè iin conseju fuerte.

⁷ Yùhù cuní cundehè-nsiá nansa ndisa íá chuun yohó. Nú íá iin-nsia tuxí inì-xi nduú nèhivì xí Cristu, pues ni cúnáhá-nsiá ñà-stná nsiùhù nduú stná-nsí nèhivì xí-yá nahi mii-nsiá.

⁸ Mate ní càhàn ndeí iyuhu xi-nsiá na ní cachì ñà-íá ndisa derechu xi, doco có-cùcáhàn núùì sàhámà. Vàchi derechu mà, sàhà-ñá nacuahandee ini-nsí mii-nsiá nduá disáhà-xí nì nihì-nsiá nùù Stoho-ndà Señor, màdiá sàhà-ñá quida quini-nsí xi-nsiá.

⁹ Te màdi sàhà-ñá dayúhí stná-nsí mii-nsiá tiaá-nsí carta yohó. Còó.

¹⁰ Yùhù (ináhí) cachí dava nèhivì sàhí ñà-ndee càhìn nùù carta xi, te fuerte palabra tiaí, doco nú sà-íé' nùù-né, te indéhe-né núì, dandu mà finu guè, te ni mà túha guè càhàn viì', cachí-nè.

¹¹ Doco ni cúnáhá-nè ñà-divi nacua cachí-nsí nùù carta xi-nsi na ndoó xicá-nsí, divi ducán icúmí-nsí quida stná-nsí na sàà-nsí ndé ndoó-nsiá.

¹² Nsiùhù, ni-iyuhu có-cùnì-nsí dadavá stnahá-nsí xì nèhivì ndeníhí vaha guá xì mii-xí, còó; vàchi tucu dahuun xí quida-ne. Tuxí ini-nè ñà-cuisì modo xi mii-né nduú ley chicá ndiaá, te ndeníhí vaha tnahá iin-ne inga-nè. Ñàyùcànduá (nàhà xìcà), nècuàchì có-cùndàá inì-xi nduú-né.

¹³ Doco nsiùhù, có-nàndúcú-nsí ñà-quee tñùñuhu xí-nsí, ni có-dàquíhvi-nsi mii-nsí nùù iin chuun cóni sàha Dios nsiùhù. Cuisì chuun nì nihì-nsí nùù mii-yá nduá càhàn-nsí sàhà-xí. Te dècuèndè ndé ndoó-nsiá jaàn nì sàha stná-yà nsiùhù chuun quida-nsí.

¹⁴ Ñàyùcànduá, màdiá yàha-nsi nùù-xí ndé nì cachi-yà xì-nsí nduá. Tucu cundua nú màsà sàà-nsí ndé ndoó-nsiá nì cùì. Doco còó, nècuàchì primeru nì càhàn xì-nsiá razón ndiaha xí Cristu nduú-nsí.

¹⁵ Doco iin chuun cóni sàha-ya nsiùhù, còó, mà càhàn-nsí sàhámà na ian nduá chuun xi-nsí; còó. Doco nihnú ini-nsí quida ga-nsí más gà chuun xi-ya ndé ndoó-nsiá jaàn nú sàni nihì-nsiá nì xinindisá-nsiá chicá fuerte, doco siempre mà yàha-nsi ndé nduú nùù-xí nì cachi Dios xì-nsí.

¹⁶ Dandu después dècuèndè stná ñuu ndoó chicá nùù-xí cuní stná-nsí cùhùn-nsí cachitñuhu-nsi razón ndiaha xí-yá, doco ni xi ñà-jaàn, mà nàndúcú-nsí quee tñùñuhu xí-nsí sàhà iin chuun nì quida inga nèhivì.

¹⁷ Vàchi nú cuní-ndà tavà-ndà tñùñuhu xí mii-nda, dandu ni cúnáhá-ndá ñà-cuisì Stoho-ndà Señor nduú tñùñuhu xi-nda.

¹⁸ Vàchi ¿índù clase nèhivì icúmí ndee vaha nùù-yá? ¿A nèhivì tavá tñùñuhu xí mii-xí? Còó, cuisì ana cudî ini mii-yá sàhà-xí icúmí ndee vaha.

11

Ñà-nduá nì cachi Pablo sàhà nèhivì dananí uun nduú apóstol nì nihì chuun nùù Jesús

¹ Vichi cuàhìn càhìn iin ratu na iin tè-cùmání; ñàyùcànduá, sacúndáhvî nùù-nsiá ñà-quidandee inì-nsia sàhí, por favor.

² Vàchi yùhù, cuàhà gá nacání inì sàhà-nsiá na ian nacání stná ini Yua-nda Dios sàhà ndohó. Cunaha-nsiá, ducan íá stná na ian nì ndiadi tñuhu xi iin novia cuàhàn nandàhà. Vàchi mii-nsiá, na iin novia nduú-nsiá, te cuní sàà-nsiá ndé íá Cristu te cundoo-nsia

nùu-yá nicanicuahàn. Doco na sàa-nsiá yucán cuní cunduu-nsia (nèhivì viì ndisa) na iin novia siempre sàni quida viì.

³ Doco yúhî xî-nsiá, còtó dàcà dìni-nsiá, te mà cúníhnú vâha ga ndisa inì-nsiayà. Vâchi ducán nì cuu xi Eva sânahâ, (nì tnàtuu) còò (nduú ñà-malu), te ñà-tnùhù guá-si nì nìhì-sí nì dândàhvì-siné.

⁴ Ñâyùcàndùá, mii-nsiá, (caquin-nsiá cuidadu), vâchi nú ni sàa iin nèhivì nùu-nsiá, te càhàn-nè sàhà inga Jesús, mà úhì candisá-nsiánè, mate diín nduú Jesús xi nècuàchìmà, te diín nduú Jesús nì cachi nsiùhù xî-nsiá; te (xiní-nsì) mà úhì candisá stná-nsiá yâha-nsia ndahà inga espíritu (quida-ne), mate diín espíritu nduá, màdì Espíritu Ì nì nìhì-nsiá daa. Te (xiní-nsì), mà úhì stná cunindisá-nsiá inga palabra saa có-ndùdává xí palabra ì nì xinindisá-nsiá daa.

⁵ Doco siquiera, yùhù, davani ndiaá stnáì xì nècuàchì tuxí inì-xi xínduu guá apóstol ndiaha.

⁶ Mate vihini mà túha güé` càhàn vií, doco ináhá vâhi ñà-ndùá cachí`. Te mii-nsiá ináhá vâha stná-nsiá ñà-divi ñà-ndáà nduájàn, vâchi sàni xinínùu-nsiá nsidaa ñà-ndùá sàni quida-nsi.

⁷ Doco ¿a tuxí inì-nsia cuàchi nduá ñà-uun-ni nì cachitnùhi xî-nsiá razón ndiaha xí mii-yá? Dècuèndè menos nì ndòì sàhà-ñá cuní ni ndóo mii-nsiá xì chicá más tnùñuhu.

⁸ Vâchi na ní sa-ìe jaàn chindéì mii-nsiá, ¿índù nì quixi ñà-ñisa itiacuì? Pues divi nùu nèhivì xí-yá ndoó inga ñuu. Ñâyùcàndùá, yùhù quidé cuenta na ian nì sahnìndàhvì nècuàchìmà, te có-ndùá ducán.

⁹ Daaní, después na ní quida manì dihùn nùí, ni-iin centavu cóni xíquèn nùu-nsiá. Còò; divi ñani-ndà nì quixi ladu Macedonia nì taxi xi ñà-ndùá xiñuhí mà. Te cuàhà cuidadu nì saquin vâhi ñà-màsà quídá-nsiá ni-iin gastu sàhí, te nicanicuahàn ducan icúmî quide.

¹⁰ Te yùhù cachí` xî-nsiá nacua chindéé Cristu yùhù càhàn ndàì, mà nácóì cachì xì nèhivì inicutu ladu Acaya xi-nsia (ñà-có-tníì dihùn xî-nsiá). Còó, mà cuáhi cadì ni-iin nèhivì nùí cachì ñà-jaàn.

¹¹ Te, ¿índù chuun cachí` ducán? ¿A sàhà-ñá có-cùú inì sàhà-nsiá? Còó, vâchi ináhá Dios ñà-cùú ndisa inì sàhà-nsiá.

¹² Doco iin-ni icúmî quidé ñà-ndùá quide sàhà màsà níhìndèè nèhivì-mà coo cuadú gâ-nè, te cachi-nè davani iá stná chuun xi-ne xì chuun xi nsiùhù.

¹³ Vâchi cunaha-nsiá, tnùhu nduá cachí-nè ñà-nùu mii-yá nì nìhì-né chuun xi-ne. Dandahví uun-ne, te dananí uun-ne nduú-né apóstol xi Cristu.

¹⁴ Te mà úhì quida-ne ducán, vâchi stná ñà-malu Satanás, tùha stná-si dama-sì mii-sí nanduu-sì na iin ángel nchií ndiaha.

¹⁵ Ñâyùcàndùá, nècuàchì nchícùn xì-sí, mà úhì stná dama-ne modo xi-ne na iin nèhivì quida-xi iin chuun viì. Doco cunaha-nsiá, icúmî-nè nìhì-né (iin castigu) xi-ne nacua ndiá ìcà-né.

Nansa nì ndoho Pablo sàhà-ñá quidá-né chuun ì xí Jesús

¹⁶ Vichi tucutu cachí` xî-nsiá: màsà cútúxí inì-nsia iin tè-loco nduí. Doco nú ducán tuxí inì-nsia, dandu nì cuáha-nsia lugar càhàn chíì na iin tè-loco; vâchi stná yùhù cudì stná inì cachì nansa ndiaá güé` (nacua quidá dava nèhivì ndé ndoó-nsiá).

¹⁷ Doco ñà-ndùá cuàhìn cachì xî-nsiá vichi, có-ndùá na iin palabra (sahnú) nì nìhì nùu Stoho-ndà Señor; cuisì na iin palabra loco nduá, vâchi ñà-cuàhìn ndenihi vâhi míí nduá.

¹⁸ Vâchi sàni xinì, ñà-cuàhà guá nèhivì ndeníhí vâha xi mii-xí sàhà ñà-ndùá quidá-né, ñâyùcàndùá yùhù stná cuàhìn quide ducán.

¹⁹ Vâchi mii-nsiá, ñà-cuàhà guá ináhá-nsiâ, ñâyùcàndùá mà úhì candisá-nsiá càhàn iin tè-loco xî-nsiá.

²⁰ Dècuèndè candísâ stná-nsià nú xichúûn nèhivì mii-nsiá, te ò tnií-né ñà-ìcúmí-nsiâ, te ò dandacú ndee-né nùù-nsiá, te ò cachíchì ini-nè mii-nsiá, te ò caní-né nùù-nsiá; pues nsidaámà candísâ-nsiá.

²¹ Doco nsiùhù, cuicahnú gà inì-nsia sàhà-nsí, vèchi cónì quidá-nsí xì-nsiá ducán.

Doco nú (jaàn) ndoó guá nèhivì sáhandee inì-xi ndeníhí vaha xi mii-xí, ádi vátùni stná yùhù càhìn sàhà mií ducán. Cuisì cuní cundaà inì-nsia ñà-na ian cáhàn iin tè-loco nduá yohó.

²² Pues cachí nèhivì mà ñà-divi raza hebreu xínduu-ne. Doco yùhù, divi raza mà nduú stnáì. Daaní, nècuàchì ñuu Israel nduú stná-nè cachí-nè; pues divi ducaní stná yùhù. Daaní, cachí stná-nè ñà-Abraham nì sanduu yohòtéhè-né. Pues nì cúnáhá-nè yohòtéhè stnáì nì sanduu nècuàchì mà.

²³ Daaní, cachí-nè ñà-divi Cristu xinúcuáchí-nè nùù-xí. Pues divi ducaní stná yùhù. Doco chicá más chuun xi mii-yá sàni quide nùù mii-né. Mate na cáhàn tè-loco cáhìn, doco ducán cachí, más gà nì quide nùù mii-né. Chicá cuàhà nì ñàhni cuí. Te chicá cuàhà nì sandiadi nùù mii-né. Cuàhà gà xichi sà-ìé` ñà-cuì nì cuí.

²⁴ Ùhùn xichi nì casahnì cuí tè-raza Judea yùhù xì chirrión, 39 golpe nì nihí iin iin xichi.

²⁵ Te ùnì xichi nì ñàhni cuí stnáì xì vara, te iin xichi nì caniyuu-té yùhù sàhà-ñá cuí. Te ùnì xichi nì càhà stná barcu ndé cuàhìn, ñàyùcànduá iin ndui xì iin ñuu nì xique mahì tècuí mar.

²⁶ Cuàhà gà sàni xicanui. Dava yùte, ndé cùúnàhì nì yàhi. Te dava xichi ndiatú tècuìhnà yùhù yàhi. Dècuèndè stná nèhivì raza mií, cuní stná-nè quida quini-ne xí, mii-né xì stná nècuàchì inga ñuu. Cuàhà gà peligrú yáhi na xicánuí ñuu nahnú, te ò yucù dáná, ò mar. Te peligrú nduú stná na ié` mahì nèhivì dananí uun nchícùn xì mii-yá.

²⁷ Cunaha-nsiá, yáha ga ùhì chuun quidé, vèchi cuàhà vida yáhi xicánuí. Có-quídì, xíhì doco, xíhì tècuí; te nú cóámà, quidándéé inì, mate xíhì vixin ñà-còò sícoto vaha xi.

²⁸ Pues, ñà-jaàn nduá yáhi, te iá gà más ñà-cónì càchì xì-nsiá. Daaní, nsìquívì cuàhà gà nacaní stná inì sàhà nèhivì xí Dios ndoó iin iin ñuu.

²⁹ Vèchi nú débìl iá anima iin ñani-ndà, dandu stná yùhù, na ian débìl iá stnáì; te nú sàni tucù iin-ne nì quida nèhivì, dandu stná yùhù ndohó stnáì.

³⁰ Ñàyùcànduá, nú ndisa iá necesidad ndenihi vaha mií, dandu chicá vaha nacani xì-nsiá ñà-cuàhà guá vida yáhi, te dandohámà yùhù.

³¹ Cunaha-nsiá, ñà-ndácuisì nduú nsidaa ñà-nduá cachí xì-nsiá yohó, te ináhá stná mii-yá ana cahvi Stoho-ndà Jesucristu, divi Yuamánì-yá, ansivéhé-yá nicanicuahàn.

³² Na ní sa-ìe ñuu Damasco, iá stná iin gobernador xinúcuáchí nùù rey Aretas yucán, te divi-tè nì dándacú-te cundiaa soldadu yehè ñuu mà ñà-cuní-te tniì-tè yùhù.

³³ Doco (nì nani) nama ndiadi ñuu mà ndé iá iin ventana tii, te nì sàcùnacaì iin ìcà sìcàté, te nì danduu nèhivì yùhù (inga ladu), te ducán nì nihí nì càcui nùù gobernador mà.

12

Nansa nì dàcùnì Dios Pablo iñàha, te nì xini-nè cuàhà ñà-ndiaha

¹ Yùhù ináhì còò ni-iñàha nihìndèè-ndà nú ndeníhí vaha-nda mii-nda, doco cuàhìn quide seguir. Vichi cuàhìn càhìn xì-nsiá sàhà ñà-nduá dacuní Dios ndohó, vèchi cuàhà gà ñà-ndiaha xinì nèhivì dava xichi.

² Yùhù ináhì iin tiàa xiníndísá-xí Cristu, te sàcuàhàn-ndà iin ùxin cùmì cuà nì ndi-achi-né dècuèndè ansivi ùnì (chicá dìquì-xí). Có-ìnhá a ní sàhàn-nè yucán xì na iá iquìcùñú-nè, te ò cuisì anima-nè, sólo Dios ináhá.

³⁻⁴ Doco yùhù, ináhì nècuàchì mà, te nì ndiachi-né nì sàhàn-nè ndè (iin lugar ndiaha) nani paraíso, mate có-ìnhá a ní ndiachi stná iquìcùñú-nè nì sàhàn, te ò mii-ní anima-nè, cuisì Dios ináhá. Te ndè lugar yucán nì inini-ne palabra yáha ga ndiaha. Doco còò stná permisú cachi-ndà palabra mà xì nèhivì.

5-6 Pues iin nècuàchì nì xini ñà-jaàn, vihini taví tnũñuhu xí-né sàhà ñà-jaàn, vàchi màdì tnúhu nduá, te nì màdì palabra cumànì cundua nú nì cachí ducán nì cùí, (vàchi cunaha-nsiá, yùhù nduú nècuàchìmà). Doco còó, mà cáchí ñà-jaàn. Cuisì nacaní xì-nsiá ñà-nduú iin nèhivì úún, te ndohó stnái, còtó cutuxi ini nèhivì cuàhà gá ndiaí, mate tãñáha ga cuni-nè nansa ndisa quidé, te ò tãña'ha ga cunitnũhu-ne nansa ndisa iá modo xi.

7 Cunaha-nsiá, ñà-ndiaha guá iá ñà-nduá nì xini ansivi daa, ñàyùcànduá nì sàha Dios yùhù iin (ñà-dàndòhò-xí na ian) ihí iin iñù cahnú ìqué. Ducán (sàha-ya permisú) quida ñà-malu xí sàhà-ñá màsà ndénihí vaha güé mií.

8 Mate ùni xichi nì xicàn tàhvì nùù-yá áma dácúxíó-yáña,

9 doco dohó nì cachi-yá xí: “Cunaha-ní, vátuni sàa gracia xi nùù-ní. Vàchi nú cuítâ-ní, dandu chicá ndiaha icúmí chindeí mii-ní”, nì cachi-yá. Ñàyùcànduá, vichi cudí inì nú cuítê, vachi nú ducán, dandu chicá más icúmí nihitáhvì ndudu ì xí Cristu.

10 Sàhà ñà-jaàn, cudí inì nú còó fuerzì, te ò cánahá nèhivì xí, te ò yáha ndahvì, te ò taxi nèhivì yùhù, te ò yáhi cuàhà vida sàhà mii-yá, vachi nú (cuàhà gá ndohí), te còó fuerzì, dandu chicá cuàhà icúmí nihitáhvì ndudu ì xí-yá.

Ndiá dísàhà-xí nì nacani guá ini Pablo sàhà nèhivì xí Dios ñuu Corinto

11 Cunaha-nsiá, na ní ndenihi vaha güé mií xí palabra jaàn, na iin palabra cachí iin tè-cùmànì nì sandua. Doco fuerza nì cachí ducán sàhà ñà-nduá (cachí) mii-nsiá sàhí. Vachi mii-nsiá nduú ana ndiaí ìcà tavà xí tnũñuhu xí nì cùí. Mate nì cachí-ndà còó ni-iñàha ndiaí, doco siquiera dava-ni ndiaí xí nèhivì cachí guá xì-nsiá nduú-né apóstol xí mii-yá.

12 Vachi na ní sa-ìe xì-nsiá, cuàhà gá milagru fuerte nìsa quide. Cuàhà gá iñàha ñà-ndulocó nèhivì nì quide, te cuàhà gá nì quidandee stná inì (na ní xini cuàhà vida). Ñàyùcànduá, sàhà nsidaámà vátuni cundaà inì-nsia divi ana nì techuún mii-yá nduú.

13 Nacua siempre quidé xì nèhivì xí Dios inga ñuu, divi ducán nìsa quida stnái xí mii-nsiá. Cuisì imindaa iñàha cóni ndúdává, divi ñà-cóni tní dihùn xí-nsiá. Te nú cuàchi nduájàn, dandu sacúndahvì nùù-nsiá ñà-cuicahnú ini-nsiá sàhí, por favor.

14 Vichi sà-ìé ñà-sài ndé ndoó-nsiá inga tu, te vichi cundua ùni xichi. Doco ni-iñàha mà cáquin nùù-nsiá, vachi màdì ñà-ìcúmí-nsiá nduá cuú inì sàhà-xí, còó; mii-nsiá cuú inì sàhà-xí. Vachi (nahi dèhi xínduu-nsia, te) có-quidá tocar iin dèhe dacáyà biene ndutahvì yuadíhà. Còó, yuadíhà quidá tocar dandútâhvì xí biene xi nùù miá.

15 Ñàyùcànduá, dispuestu ié quide ndéni gastu nì cui sàhà ñà-vaha xi anima-nsiá, dècuèndè vida xi cuàha stnái nú iá necesidad. Doco ñà-nduá xini, mate ducán chicá más cuú inì sàhà-nsiá, doco chicá menos cuú ini mii-nsiá sàhí.

16 Dava stná nèhivì, cachí-nè sàhí ñà-ndáà nduá, cóni tní dihùn xí-nsiá, doco ñà-cuàhà guá maña icúmí, ñàyùcànduá, inga modo nì sahnìndahvì mii-nsiá, cachí-nè.

17 Doco ¿a ní sahnìndahvì ndise mii-nsiá na ní techuín nèhivì nì sàa nùù-nsiá? (Còó.) Te ¿a ní candiaa-nè dihùn xí-nsiá? (Còó.)

18 Nì sacundahvì nùù Tito (ñà-cùhùn-nè) ndé ndoó-nsiá, teayùcànduá cutnâhâ-né xí inga ñani-ndà nì sàa. Doco ¿a ndísá nì sahnìndahvì-nè mii-nsiá? (Còó.) Amádi iin-ni nì quida stná-nè nahi yùhù, vachi iin-ni nihnú stná ini-nè nahi yùhù.

19 Vihini tuxí inì-nsia cuisì cáhìn ducán sàhà-ñá ndòò vaha tu-nsi xì-nsiá. Doco còó. Indéhe Dios, ináhá-yá nansa cachí, te ndácùcahan stnái Cristu. Cuisì sàhà ñà-nacuàhandee inì mii-nsiá, ñàyùcànduá tiaí nsidaa ñà-yòhó, ñani màni.

20 Doco yúhî sàhà-nsiá còtó sài yucán, te mà cudí gá inì sàhà ñà-nduá quidá-nsiá, te ò mii-nsiá, mà ndóó stná inì-nsia sàhí. Ndisa, yúhî sàhà-nsiá, còtó sài, te ndoó-nsiá náâ tnahá-nsiá, cúmbidia inì-nsia, dacuidà stnahá inì-nsia, te ò ndeníhí ndiaha gá-nsiá mii-nsiá, te ò dandahvì tnahá-nsiá, te xítnũhu tnahá-nsiá, te ò cucuádû-nsiá, có-xicánúú ví gá-nsiá.

21 Ndisa, yúhî, còtó sàa tui, te ndòò cahin nùù Dios. Nacaní gá inì ñà-vihini cundoo nècuàchì nì quida cuàchi sà-ìá quivì, te tãñáha ga naxicocuín ini-nè sàhà-ñá. Ndisa icúmí

coi tnùnsí ini sàhà-né nú tàñáha ga cuu-ne arrepentir sàhà cuàchi nì quida-ne, a sea nì càhàn-nè xì ana cónì nándàhà xì-né, te ò iá viciu xi-ne, te ò ní quida-ne inga ñà-sìquini.

13

Nansa nì cachi Pablo na ní dàxínu-ne carta yohó, cuidadu ni cúndóó-ndá màsà quídá ndevàha-nda, cachí-nè

¹ Vichi cunduu ùnì xichi sàì ndé ndoó-nsiá. Te nú sàni sàì, (te quesáhá-ndá ndatnúhú-ndá sàhà ana có-quídá víi), dandu fuerza nduá cundoo ùì ò ùnì testigu, dandu cundaà ini-ndà índù ñà-ndùú ñà-ndácuìsì.

² Te vichi iá stná ñà-nduá cuní cachí xì nsidaa nèhivì nì xida cuàchi antes, te nì cúnínì stná nsidaa gá-nsiá, vachi nacua nì cachí na ní sàhìn visita ùì mà, ducán cachí stnáì vichi mate xica ié; nú ni sàì, mà dácâcui ni-iin nèhivì (xiñuhu conseju).

³ Ducán icúmî guide, vachi xicàn-nsiá iin seña cundaà inì-nsia, a ndísá divi Cristu nì sàha xí derechu ñà-càhìn xì-nsiá ducán, á coó. Cunaha-nsiá, màdì débil iá mii-yá ana dàndàcù-xì nùù-ndà, còò; quídá-yá poder xi-ya nùù-ndà.

⁴ Mate na ian débil nì ìa-ya na ní chituu-tèyá nchìca cruz, doco vichi, còò. Itiácú-yà vichi sàhà poder xi ndudu ùì xí Dios. Ñàyùcàndùá, stná nsiùhù, mate còò stná fuerza xi-nsi nahi Cristu daa, doco sàhà poder xi-ya icúmî-nsí cutiacu gà-nsì ñà-chindee-nsí mii-nsiá.

⁵ Nacani vaha inì-nsia, a xiníndísâ ndisa-nsia mii-yá, á coó. Cundehè váha-nsia anima-nsiá. Xiñuhu cuàha-nsia cuenta ñà-ínacáá Jesucristu ini anima-nsiá. Doco te nú còò-yá, dandísá, có-ndùú-nsiá nèhivì sàni natùì nùù-yá.

⁶ Doco cahnú gà Dios vètùni cundaà inì-nsia sàhà nsiùhù ñà-ndùú-nsí nècuàchì sàni natùì nùù-yá.

⁷ Te vichi xicàn tàhvi-nsí nùù-yá sàhà-nsiá ñà-màsà quídá-nsiá ni-iin falta. Doco có-càchí-nsì ducán sàhà ñà-cutuxi ini-nsiá vaha ga nsiùhù. Cuisì cuní-nsì quida-nsia ñà-ìá viì, mate vihini mà sàà-nsiá cundaà vaha inì-nsia ñà-sàni natùì stná-nsì nùù-yá.

⁸ Doco nú ñà-ndácuìsì nduú palabra chináhá-nsì, dandu mà cúí cadì nèhivì nùá, cuisìá cui quidañuhu-néà, te dacuítìà-nèà.

⁹ Te nsiùhù, mate nduú-nsí nahi nèhivì còò ni-iñàha-xi, doco cudî ini-nsì sàhàmà; cuisìá cuní-nsì ñà-cucumi-nsiá iin fe fuerte. Te iin-ni icúmî-nsí càcàn tàhvi gá-nsì nùù-yá sàhà-nsiá ndè cachì sàà-nsia nduhii dahuun inì-nsia.

¹⁰ Cunaha-nsiá, cuàhìn dasàì carta yohó nùù-nsiá na tañáha ga sàì nàcòtì-nsiá, còtó sàì, te icúmî dandacú ndeí nùù-nsiá. Vachi ñà-ndáà nduá, iá derechu xi sàni nihí nùù Stoho-ndà Señor, doco cuisì sàhà ñà-nacuàhandee inì mii-nsiá nduájàn, màdì sàhà-ñá quida quini xì-nsiá.

¹¹ Vichi, ni yáha vaha nsidaa-nsiá, ñánì. Quida-nsia lucha quida viì-nsiá nicanicuahàn. Te màsà cúhúún inì-nsia. Iin-ni ni cúníhnú stná ini nsidaa-nsiá, te cundoo manì-nsiá, dandu icúmî Dios cutnahá ndisa-ya xì-nsiá. (Ansivéhé-yâ), cuú ini-yá sàhà-ndà, te danácòò dadí ndiaha-yá ini-ndà.

¹² Nacasàhú stnahá víi-nsiá ñà-xínduu-nsia nèhivì ùì xí-yá.

¹³ Te nsidaa stná nèhivì xí-yá ndoó yohó, cásàhú stná-nè xì-nsiá.

¹⁴ Vichi ni cúcúmî-nsiá cuàhà gracia xi Stoho-ndà Jesucristu. Te ni sàà stná-nsiá cundaà inì-nsia ñà-cuàhà guá cuú ini Yua-nda Dios sàhà-ndà. Te nicanicuahàn ni cútnáhâ stná Espíritu ùì xí-yá xì nsidaa-nsiá. Amén.

Tutu Nì Tiaa San Pablo nù Nèhivì xí Dios Ndoó Ladu Galacia

¹ Yùhù nduí Pablo, iin ana nì nìhì chuun ì nù Jesucristu xì nù ana nì dãnátíacú xì-yá, divi Yua-nda Dios. Màdi nù nèhivì nì níhí chuun ma. Còó, màdi nèhivì ùún nduú ana nì sáha xí-ñà.

² Yùhù xì nsidaa nèhivì xí-yá cutnàhâ xí yohó, cásàhú-nsì xì nsidaa mii-nsiá nècuàchì ladu Galacia natáca cahvi xì-yá.

³ Ni cùcúmí cuáhà-nsiá gracia nù Yua-nda Dios xì stná Stoho-ndà Jesucristu. Te nì cùndóó cueé-nsiá quida-ya.

⁴ Pues divi Jesucristu nduú ana nì sàha nì xihì sàhà cuàchi-nda sàhà-ñá càcu-nda nù nsidaa ñà-có-íá vù íá ñuhiví yohó, vàchi ñà-jaàn nduá nì chitnùnì ini Yua-nda Dios coo,

⁵ ansivéhé cahnú-yá nicanicuahàn. Amén.

Còò cá inga palabra ì cunchicùn-ndà, te càcu-nda, cuisí-ní palabra ì xí Jesús

⁶ Cunaha-nsiá, cuáhà gá ndulóquî ñà-yàchì guá sàni nacoo-nsia ichì víi mii-yá ana nì cana xi-nda sàhà gracia xi-ya. Vàchi inga palabra sànhicùn-nsia vichi. Vàha palabra mà cahan-nsiá,

⁷ doco còó, mà sàà ndudava xi ñà-nduú palabra vaha ndisa xi mii-yá. (Cunaha-nsiá, nàhà xicà) jaàn ndoó dava nèhivì cuní dacà xì-nsiá, cuní-nè dama-ne ñà-nduú razón ndiaha xí Cristu.

⁸ Doco nú có-ndudává palabra xi-ne mà xì palabra nì cachitnùhu nsiùhù xì-nsiá daa, dandu ni sàà nècuàchìmà ndañuhu-né ndè andea chicá vaha, mate ángel nì quixi ansivi nduú-né; te ò stná nsiùhù, nú có-ndudává gá palabra cachí-nsì vichi xi ñà-primeru, dandu ni sàà stná-nsì ndañuhu-nsí chicá vaha.

⁹ Tucutu cachí xì-nsiá nacua sàni cachí xì-nsiá antes, ndéni nèhivì ní cui nì cáhàn xì-nsiá iin palabra tucu íá, te có-nduá palabra nì xinindisá-nsiá daa, pues ni sàà-nè ndañuhu-né andea chicá vaha.

¹⁰ Ducán cachí, doco màdi sàhà-ñá cuní ndòò vahi xì nèhivì ñuhiví nduá. Còó. Dios nduú ana cuní cudii inì-xi sàhí, vàchi nú nèhivì-ní, dandísá mà cúí cunduu guè iin nècuàchì xinúcuáchí nù Cristu.

Nansa nì nìhì Pablo chuun ì nù Jesucristu

¹¹ Cunaha-nsiá, màdi nèhivì ùún nì náchuhún tnahá xi palabra ndiaha nì cachitnùhi (xì-nsiá), ñàni.

¹² Màdi nèhivì ñuhiví yohó nì nácání xí palabra mà xí. Cóni dàcuahíà nù nèhivì ùún. Còó, divi Jesucristu nduú ana nì dàtnùú xì sàxínitnùnì sàhá mà.

¹³ Mii-nsiá, sà-ínahá-nsiá nansa nisa quide antes na ní sanchicuùn religión xi nècuàchì raza-nsì Judea, yáha ga nisa quida quini xì nèhivì natáca cahvi xi Dios, vàchi nisa cuní dandáñuhí nsidaa nècuàchìmà nì cùí.

¹⁴ Te yàchì nì quee stná cuáhà fama xi nù nèhivì religión xi-nsi, te menos nì ndòò nsidaa nècuàchì dava ga nùí, vàchi chicá ndee nì sanchicuùn estilu xi xì-nsí.

¹⁵ Doco Dios, sàhà ñà-sàni nacàxin-ya yùhù ndè na táñàha ga tùinuí ñuhiví, ñàyùcànduá nì quida-ya gracia sàhí, te nì cana-ya yùhù, vàchi ducán nì chitnùnì ini-yà

¹⁶⁻¹⁷ ñà-cuninuí Dèhemanì-yá, dandu después (cùhìn cacanuì) cachitnùhi xì nèhivì nsidaa ñuu (ñà-ndiaha guá) Dèhemanì-yá. Daaní, na ní nsihi nì xìnì mii-yá, dandu yàchì nì sàhìn ladu Arabia. Cóni sàhìn ndatnuhí xì nèhivì ñuhiví yohó, nì cóni sàhàn stnáí ñuu Jerusalén ndé ndoó nècuàchì apóstol mate dihna-ne nì nìhì-né chuun ì xí-yá, dandu yùhù. Còó, dihna ladu Arabia nì sàhìn, dandu nì ndixi tui ñuu Damasco.

¹⁸ Daaní, nì yàha ùni cuià, dandísá nì sàhìn ñuu Jerusalén, te nì xinitnàhí xì Pedro. Te yucán nì ìe sàhùn quivì nì sacutnahí xì nècuàchìmà.

¹⁹ Doco nècuàchì xínduu apóstol dava ga, còó, cóni xíní-nè, cuisì-ní ñani Stoho-ndà Señor nani Jacobo nì xini.

²⁰ Te cunaha-nsiá, nsidaa ñà-nduá tiaí nùu-nsiá yohó, ñà-ndácuìsì nduá, vàchi ináhá Dios.

²¹ Daaní, después, màndixi nì nsiaa tui ladu Siria, te después nì nsiaa stnái ladu Cilicia.

²² Doco nèhivì cahvi xi Cristu ndoó ladu Judea, cóni sàà-nè cunitnàhá-né xí,

²³ cuisì-ní nì xinitnùhu-ne ñà-có-quidá quini guè xì-né. Antes nìsa cunì dandáñúhì nècuàchì mà sàhà-ñá xiníndísâ-né mii-yá, doco vichi xicánúú stnái cachitnùhi xì nèhivì nansa cunindisá stná-nèyà. Pues divi palabra jaàn nduá nì xinitnùhu nècuàchì mà sàhì,

²⁴ te cuàhà gá nì naquimani-né Dios sàhámà.

2

Ñà-nduá nì cacachi dava ga nècuàchì apóstol na ní nataca-nè xì Pablo ñuu Jerusalén, te nì ndatnuhu-né

¹ Daaní, nì yàha ùxìn cùmì cuà, dandu nì sàhàn tui ñuu Jerusalén, cutnàhá stnái xì Bernabé, te ndacá stnái Tito.

² Vàchi nì dàtnúú Dios ini anímè ñà-icúmí cùhìn, ñàyùcànduá nì sàhìn ñuu mà. Te na ní sài yucán, dandu nì nataca cuaán-nsí, yùhù xì nèhivì idónuu, te nì ndatnuhí xì-né nì dàtúi nùu-né nansa ndisa iá palabra ì cachitnùhi xì nèhivì inga ñuu. Ducán nì quide sàhá màsà ndóo uun nsidaa chuun cuàhìn quide, ni màsà ndóo uun stná nsidaa ñà-nduá sàni quide antes.

³ Doco còó, cóni càchí-nè (iá ñà-quidámànì gá). Ni cóni càchí stná-nè icúmí màcùtuu stná seña xi Dios ìcà compañeruì Tito, mate nècuàchì inga raza nduú-né.

⁴ Ñà-ndáà nduá, yucán nì sandoo stná dava nèhivì (cachí ñà-fuerza màcùtuu seña mà), doco nèhivì nì tnàtuu dèhé uun ndé nataca-nsì nì sanduu-ne, có-nduú ndisa-ne nèhivì xì Yua-nda Dios, vàchi maña uun nì quida-ne, cuisì-ní cuní-nè cuitnùhu-ne nansa quida-nda ñà-có-nchícùn gà-ndà ley xi mii-né sàhà-ñá libre ndoo-nda nì quida Jesucristu. Doco vichi cuní-nè natenchicùn tu-nda ley xi-ne.

⁵ Doco nsiùhù, còó, ni-iyuhu cóni cándísâ-nsí palabra xi-ne, vàchi cuní-nsì ñà-iin-ni cucumi ì-nsiá palabra ndàcuìsì xí-yá nacua cachí razón ndiaha xí-yá.

⁶ (Nacua sàni cachì), yucán nì ndatnuhí xì nècuàchì cachí chicá idónuu. Doco nùu yùhù, có-quidámà a xínduu-ne nècuàchì iá fama xi, ò á coó, vàchi iin-ni indéhe Dios nsidanicuu-nda. Pues, cunaha-nsiá, cóni dandàcú nècuàchì mà nùí ñà-dami ñà-nduá quidé.

⁷ Còó, vàchi nì cundaà ini-nè ñà-yùhù quidá tocar cacanui mahì nèhivì cuàhà raza (cachitnùhi palabra ì); doco Pedro, còó, cuisì nèhivì raza-nsì Judea cachitnùhu xi-né palabra mà.

⁸ Te mate ducán nduá, doco imindaa mii-yá nduú ana chindéé xí nduì-nsì. Mahì nèhivì raza Judea xicánúú Pedro quidá-né chuun ì xí-yá, te yùhù, mahì nèhivì inga raza xicánúú, doco iin-ni chindéé-yâ nduì-nsì.

⁹ Ñàyùcànduá, nì sàà nècuàchì idónuu ma nì cundaà ini-nè nansa iá chuun ì sàni nihitáhví. Te sàhámà nì tnii ndahà tnàhá-né xí, xì stná Bernabé. Cunaha-nsiá, Jacobo xì Pedro xì Juan nì sanduu nècuàchì idónuu ma, te nì cachi-nè xì-nsí ñà-iin-ni chuun nduá quidá nsidaa-nsí, cuisì nùu nèhivì inga raza ni cùhùn nsiùhù, te mii-né, nèhivì raza Judea càhàn xì-né, nì cachi-nè.

¹⁰ Cuisì-ní (inga palabra gà) nì cachi stná-nè xì-nsí, divi ñà-màsà nándodó-nsí chindee-nsí nèhivì ndahví (ndoó ladu xi-ne). Ñàyùcànduá, yùhù siempre ñà-jaàn nduá nacánì inì quide.

Nansa nì cachi Pablo xì Pedro na ní ìa-ne ñuu Antioquía, nì sàha-ne nècuàchì mà iin conseju

11 Doco después, na ní quesaa Pedro ñuu Antioquía, dandu nì càhìn xì-né, nì indehè váhi nùù-né, te nì chinahí-nè, vàchi cónì quidá víi-né yucán.

12 Vàchi na táñâha ga quesaa nècuàchì ñuu-nsì vaxi cuenta xi Jacobo, dandu nì saxixi tàcá-nè xì nsidaa nècuàchì inga raza yucán. Doco na sání caquesaa nècuàchì inga mà, dandu nì naxicocuñin ini-nè, cónì xixí gá-nè xì nècuàchì inga raza mà, vàchi yúhî-nè cuitnùhu nècuàchì raza-nsì Judea.

13 Dandu después, nsidaa gá stná nècuàchì raza-nsì ndoó yucán, cónì quidá víi stná-nè, (vâchi nì quecuaán stná-nè), mate ináhá-nè nansa ndiá icà-né quida-ne; ndè stná Bernabé nì quida stná-nè ducán.

14 Doco yùhù, na ní xinì có-xîquida vii-né nacua cachí palabra ndàcuisì xí razón ndiaha, dandu nì cachì xì Pedro, te inínì nsidaa nèhivì yucán; nì cachì: “Mii-ní, iin nècuàchì raza-ndà Judea nduú stná-ní, doco vichi (sàquidà-ní nahi nèhivì inga ñuu), có-chívàha gà-ní estilu xi raza-ndà, vâchi vichi sàquidà-ndà na quidá nèhivì inga raza. Ñâyùcàndùá, ¿índù chuun sàni quida stná-ní na ian cuní-nî ñà-fuerza chivàha stná nècuàchì inga raza mà estilu xi raza-ndà?” (nì cachì xì-né).

Nansa icúmí nècuàchì raza Judea quida-ne sàhà-ñá càcu-ne, divi icúmí stná-nè cunindisá-né mii-yá

15 Nsiùhù nècuàchì raza Judea, có-nduú-nsì nècuàchì cuàchi nahi nècuàchì inga raza (cahan-nsì).

16 Doco ináhá vâha-nsi còò ni-iin ndee vâha nùù Dios sàhà-ñá chivàha uun-ne ley sànaaha. Còó, cuisì-ní nú ni cúnihnú vâha ini-ndà mii Jesucristu, dandísá càcu-nda, ináhá-ndá. Ñâyùcàndùá, divi ñà-jaàn nduá quidá-nsì, vâchi ináhá-nsì cuisì ñà-cunihnu vâha ini-ndà mii-yá ndiaá, te ducán ndee vâha-nda nùù-yá, màdiá chivàha-nda ley sànaaha ma, vâchi sàhà ley mà, mà sàà ni-iin nèhivì ndee vâha-ne nùù-yá.

17 Doco nú micúisi sàhà Cristu cuní nsiùhù nècuàchì raza Judea ndee vâha-nsi nùù (Yua-nda) Dios, dandu ñà-yucán queá ñà-nduú stná-nsì nèhivì cuáchi (nahi nèhivì dava ga). Doco te nú ducán nèhivì cuáchi nduú stná-nsì, dandu ¿a sàhà ñà-nchícùn-nsì Cristu nduájàn? Còó, ni loho có-nduá ducán.

18 Doco nú iladú sàni nacoo canúú-ndá iñàha (nahi ley sànaaha ma), te tucutu cuní-ndà natenchicùn-ndàñá, dandísá nsidá cuàchi-nda, doco cuisì mii-nda quidá xi mii-nda ducán.

19 Yùhù, sàhà-ñá (fuerte guá castigo) xi ley mà, nì sàni nì quide cuenta na ian sàni xihì nì quidamà; doco vichi sàni natiacu stná, te sà-itiácùì nùù Dios.

20 Vâchi quidé cuenta na ian nì cutnahí xì Dèhemanì-yá Cristu na ní sàcùtuu-ya nchìca cruz. Doco vichi, sà-itiácùì, vâchi inì anímè itiácú mii-yá, màdi ndisa yùhù. Mate ñuhivì yohó ié, te iá iquicúñù, doco cuisì sàhà ñà-nìhnú vâha inì mii-yá, ñâyùcàndùá itiácùì vichi. Cahví xì-yá, vâchi cuú íní-yà sàhí, te nì sàha-ya nì xihì-yà sàhí.

21 Ñâyùcàndùá, yùhù cachí, mà váha nacoo-nda gracia xi Dios iladu; (doco divi ducán quea) nú sàhà ley sànaaha ma sàni ndee vâha-nda nùù-yá nì cùí, vâchi nú ducán, dandu uun-ni nduá nì xihì Cristu.

3

Cuisì sàhà fe xi-nda cui ndee vâha-nda nùù Dios, màdi sàhà-ñá chivàha-nda ley sànaaha

1 ¡Ndahví mii-nsiá nècuàchì Galacia! vâchi có-nìhnú víi gá inì-nsia vichi. ¿Índù chuun nì sàha-nsia nì dândàhvì nèhivì mii-nsiá, te vichi có-nchícùn gà-nsià palabra ndàcuisì xí-yá, mate claru sàni cachitnùhi xì-nsiá sàhà Jesucristu, nansa nì xihì-yà nchìca cruz?

2 Pues vichi cuní cachì-nsiá xì: ¿ndiá nduá nì quida-nsia, te nì nìhì-nsiá Espíritu ìì xí Dios? ¿A ní chivàha-nsia iin ley sànaaha? (Còó), cuisì ñà-nì inini-nsia palabra ìì, te nì xinindisá-nsiá, ñâyùcàndùá nì nìhì-nsiá Espíritu ìì.

³ Ñàyùcàndüá, ¿índü chuun có-sâà-nsià cundaà inì-nsia? (Sà-ínáhá-nsiâ) ñà-divi Espíritu Ìi nduú ana nì chindee xi-nsiá na ní quesaha-nsiá xicá-nsiá ichì Dios. Te vichi ¿a tuxí inì-nsia ñà-micuísi-nsiá cuàhàn-nsiá daxínu-nsia (salvación xi-nsia)?

⁴ Cuàhà gá sàni ndoho-nsia (sàhà Jesús), te ¿a icúmí ndòo uun stná nsidaámà? Cahnú gá Dios ñà-màsà ndóo uan.

⁵ Daaní, jaàn iá stná iin ana dànhítàhvì xì-nsiá ñà-chindee Espíritu Ìi mii-nsiá, te quidá stná-nè milagru ndiaha. Doco ¿a sàhà ñà-nchícùn-nè ley sàhana nduá quidá-néamà? Còó, cuisì sàhà ñà-xiníndísâ-né mii-yá.

⁶ Pues, divi ñà-jaàn nduá nì quida stná Abraham sàhana, nì xinindisá-né Dios, te ñà-yùcán nì ndee vaha-ne nùu-yá.

⁷ Sàhà ñà-jaàn vátùni cundaà ini-ndà sàhà nsidaa nècuàchì sà-icúmí xí fe ñà-nahi descendencia xi Abraham xínduu stná-nè.

⁸ Vàchi nùu tutu ìi nì tiaa sàhana nì cachitnùhu Dios nansa icúmí nèhivì vichi ndee vaha-ne nùu-yá sàhà cuisì-ñá xiníndísâ-né mii-yá, mate nèhivì ndéni raza nì cui nì cundúú-né. Ñàyùcàndüá, nì cachitnùhu-ya xì Abraham iin ñà-vaha, cachí-yà: “Sàhà mii-ní icúmí nèhivì nsidaa ñuu nihítàhvì-né cuàhà gá ñà-ndiaha î”.

⁹ Ñàyùcàndüá, vátùni cundaà ini-ndà, nú xiníndísâ stná-ndàyá, dandu cundiatú stná anima-ndà na ian nì cundiatú Abraham sàhana na ní xinindisá-né mii-yá.

¹⁰ Doco nú cuisì cuní-ndà cundoo-nda sujetu nùu ley sàhana, dandu iin-ni icúmí stná-ndà nihì-ndà castigu cachí ley mà, vachi dohó cachá: “Nèhivì có-quidá ndisa nsidaa ñà-nduá cachí tutu yohó, tàhvì chíhán-né”, cachá`.

¹¹ Sàhámà náhà claru, mà sàà iin nèhivì ndee vaha-ne nùu Dios sàhà-ñá nchícùn-nè ley mà, vachi cachí stná tutu ìi mà: “Nèhivì xiníndísâ-xí-yâ, te ndeé vaha-ne nùu-yá, divi cucumi xi vida ndiaha”.

¹² Doco ley sàhana ma, màdì fe nduá xicàn cucumi-nda. Còó, vachi cachá: “Cuisì nú ni quidá ndisa-nda cumplir nsidaa ñà-nduá cachá, dandu nihì-ndà cutiacu ndiaha-nda”.

¹³ Doco ndohó, sàni xidahan Cristu-ndó nùu chihan cachí ley mà, vachi mii-yá, cuenta xi-nda nì ndoho-ya castigu sàhà chihan ma nacua cachí nùu tutu ìi: “Tàhvì chíhán nsidaa ana itácaa nùu iin yutnù”, (cachí Dios).

¹⁴ Pues divi ducán nì cuu xi Jesucristu sàhà-ñá vátùni nihítàhvì stná nèhivì nsidan-icuú ñuu ñà-ndiaha î nì cachi Dios xì Abraham. Ñàyùcàndüá, vichi cuisì xiñuhu cunindisa-ndayá, dandu nihítàhvì-ndà Espíritu Ìi nì quida-ya comprometer antes.

Tucu iá ley sàhana, có-ndüdává xí ñà-ndiaha î nì cachi Dios xì Abraham chicá antes

¹⁵ Vichi cuàhìn nacani xì-nsiá iin ejemplu tii, ñàni; cuàhìn nacani xì-nsiá nansa quidá nsidaa-nda ñuhivì yohó. Ináhà-ndá nú sàni cuyucun iin tutu ndé nì ndatnuhu sahnu-nda ñà-quida-nda iñàha, te sàni cua firmar, dandu iin-ni sàni ndòo, mà dáma, ni mà chíyôdo gá-ndà palabra nùá. Te ducán quida-nda mate tutu xi nèhivì ùún nduá.

¹⁶ (Pues divi ducán sàni quida stná Dios), nì saquin-yà compromisu nùu Abraham ñà-nihítàhvì-né ñà-ndiaha î xí-yá, mii-né xì ana cunduu descendencia xi-ne. Doco (na ní cachi-yà xì-né ducán), cóni càchí-yà icúmí nsidaa gá inga descendencia xi-ne nihítàhvì-né, na ian cuàhà-né (càhàn-yà sàhà-xì) nì cui. Còó, sàhà imindaa descendencia xi-ne nì càhàn-yà sàhà-xí, divi nduú Cristu.

¹⁷ Ñàyùcàndüá, yùhù cachí, nú ducán fuerte guá nì saquin Dios compromisu xì Abraham, te ùi xichi nì cachi-yà xì-né palabra mà, dandu mà cúí dàma-ña quida iin ley nì cuyucun 430 cuià después; còó, mà cúí ndòo uun ñà-nduá nì cachi-yà mate ní sàcòo inga ley mà.

¹⁸ Vachi nú sàhà ley mà nihítàhvì-ndà nì cui, dandu mà cundúá iin compromisu icúmí-yâ quida ndisa-ya cumplir. Còó. Doco ñà-ndiaha î nì cachi-yà xì Abraham mà, ñà-yùcán ndisa nduú compromisu.

¹⁹ Pues (sàhámà ndácàtnùhù-ndà), ¿índù chuun quidá ley sànahama vichi? Pues cuisì sàhà ñà-cundaà ini nèhivì índù-ñá nduú cuàchi, ñàyùcànduá nì sàha-yanè ley mà, dandu cucumi-nèa dècuèndè quesaa mii-yá ana nduú ndisa descendencia xi Abraham, vèchi divi mii-yá nduú ana cuàhàn nìhítáhvì xì ñà-ndiaha ì nì cachi Dios daa. Cunaha-nsiá, tìxi iin ángel mozo xi-ya nì sàha-ya ley mà, te Moisés nduú ana nì sàcuìn dava cuenta xi nèhivì nùù Dios.

²⁰ Doco nú cachí-ndà nì sàcuìn dava Moisés, pues cuní cachàmà ndoó ùì ana (ndatnúhú), màdiá imindaa (ana càhàn). Doco (na ní saquin Dios compromisu xì Abraham), còó, cuisì-ní imindaa mii-yá (nì càhàn, te sàhámà mà cúí ndòò uan).

Chuun quidá ley sànahà nduá chindéândô sàà-ndà cunindisa-nda Jesucristu

²¹ (Pues, ¿nansa cachi-ndà vichi?) ¿A sadí ley sànahà ma nùù compromisu nì cachi Dios quida-ya? ¿Còó, mà cúí! Vèchi nì có-sàà ley mà taxa vida ndiaha. Doco nú vètùnì quida ducán nì cúí, dandísá divi sàhájàn vètùnì ndee vaha-nda nùù-yá.

²² Doco còó, màdi ñà-jaàn nduú chuun quidá ley mà, cuisì nduá iin ñà-càchítñùhu uun xi-nda ñà-ndòò nsidaa-nda tìxi poder xì cuàchi-nda. Te ducán iá sàhà-ñá nì sàà-ndà cunindisa-nda Jesucristu, te nìhì-ndà ñà-ndiaha ì nì cachi Dios antes.

²³ Doco na táñaha ga sàà tiempu ñà-cuisì cunindisa-ndayá, dandu ley sànahà ma nduá nì sanchicùn-ndà, còò inga ñàhà, vèchi ducán nì chitnùnì ini Dios quida-nda, divi ñà-cundiatu uun-nda ndè cachi sàà quivì datúi-ya nansa cui cunindisa-nda (Jesús).

²⁴ Vèchi ley sànahà ma, na ian quidá nècuàchì ndiaá xì ñà-cuati, ducán nì saquida, cuisì nìsa chindeándô ndè cachi nì sàà tiempu nì quesaa Cristu, dandu cunindisa-nda mii-yá, te ducán ndee vaha-nda nùù-yá.

²⁵ Te vichi cuisì-ní fe mà nduá nchícùn-ndà, ñàyùcànduá có-xiñùhù gá cunindisa-nda ley sànahà ma na ian nduá ana ndiaá xì-ndà vichi.

²⁶ Còó, vèchi sàhà-ñá xiníndísá-ndá Jesucristu, ñàyùcànduá, nahi dèhe sahnú-yá sànduú nsidaa-nda.

²⁷ Vèchi, na ní cuhì-ndà quivì nì tenchicùn-ndà Cristu, dandu na ian nì dàma anima-ndà nduá, te nì nàcùnìhnu ini-ndà nahi mii-yá.

²⁸ Sàhámà mà cúí cachi gà-ndà diín nduú nècuàchì raza Judea, te diín nduú nècuàchì raza Grecia; còó. Stná nècuàchì nduú patrón, xì stná nècuàchì quidáchúûn saín nùù-né, na ian iin-nì sàni nanduu nsidaa-né vichi. Nì màdi (chicá ndiaá) stná nècuàchì tiàa nùù nècuàchì ñahà; còó. Iin-nì xínduu nsidaa-nda ñà-nchícùn-ndà Jesucristu.

²⁹ Te nú nèhivì xì Cristu nduu-nda, dandu vètùnì quida stná-ndà cuenta ñà-nduú stná-ndà descendencia xi Abraham, te ducán vètùnì nìhítáhvì stná-ndà ñà-ndiaha ì nì cachi Dios daa.

4

¹ Vichi chicá claru cuàhìn cachì xì-nsiá ñà-nduá cuní cachi nsidaa palabra jaàn. Nì cachí-ndà iá iin tètii icúmí ndutahvì xì ñà-cuicà nùù yua-té. Doco nú tii vá-te, dandu queámà na ian peón uun nduú-te, mate stoho nsidanicuú ñà-cuicà mà icúmí-tè cunduu-tè. Doco tii vá-te,

² ñàyùcànduá, iá-te ndahà ana ndiaá xì-té, te ndoó stná ana ndiaá xì ñà-cuicà témà ndè cachi sàà-te cuià-te nì cachi yua-té.

³ Pues divi ducán nìsa ìa stná xì ndohó na táñaha ga sàà-ndà cundaà vaha ini-ndà; nahi ñà-cuati nì sanduu stná-ndà; iin ichì chicá sencillu xi ñuhivì yohó-ní nduá nì sanchicùn-ndà, te cuisì ñà-nduá cachàmà nìsa quida-nda.

⁴ Doco na ní sàà meru tiempu vaha, dandu nì techuún Dios Dèhemanì-yá quixi-ya ñuhivì yohó ñà-tùinuù-yá nùù dihi-yá. Te (na nìsa ìa-ya yohó) nìsa ìa stná-yà sujetu nùù ley sahnù-ma.

⁵ Doco ñà-disáhà-xí nì quixi-ya nduú ñà-danáa-yá sàhà nsidaa nèhivì ndoó stná sujetu nùu ley mà, dandu càcu-ne. Ñàyùcàndùá, (sàhà-ñá-nì quida-ya ducán), vátùnì nì sàcùnduu-nda dèhe ndisa Yuamánì-yá.

⁶ Te Yuamánì-yá, sàhà stnámà sàni sàhatahvì stná-yàndó Espíritu xi Dèhemani-yá ñà-coo Yà-ì mà ini anima-ndà; te vichi cachí fuerte-yàmà “Yuamánì” (ini anima-ndà, cáhàn-yà cuenta xi-nda nùu Yua-nda Dios).

⁷ Ñàyùcàndùá có-nduú gá-ndà cuisì nahi peón xi-ya; còó. Dèhe ndisa-ya sànduù-ndà, te nú ducán, dandu cuàhà gá icúmí-ndá nìhítàhvì-ndà nùu-yá sàhà ñà-nchícùn-ndà Cristu.

Ñà-nduá nì cachi gà Pablo, ndulócô-nè sàhà-ñá nì tucù nècuàchì Galacia inga ichi

⁸ Antes, na táñàha ga cunaha-nsiá Dios, dandu stoho-nsiá nì sanduu ñà-có-nduú ndisa Dios, te ndee ní sacusahnúá nùu-nsiá.

⁹ Doco vichi, sà-ínáhá-nsiá mii-yá, te ò chicá vaha ni cachí-ndà sà-ínáhá-yá mii-nsiá. Ñàyùcàndùá, ¿índù chuun cuní tu-nsia nàcùndoo-nsia tìxi iin ley mà cúí chindee xi-nsiá? Vàchi ley mà, còò ni-íñàha nìhì-nsiá nùá.

¹⁰ Doco vichi cuàhà estilu chívàha-nsia; cuàhà quivì chívàha-nsia, xì cuàhà stná vicò, te nsidácáhnù stná-nsiá na natiácú yoo. Dècuèndè stná cuià nsidácáhnù-nsiá.

¹¹ Ñàyùcàndùá, cuàhà gá nacánì inì sàhà-nsiá, màdí ndòo uun nsidaa ñà-nduá sàni dàcuàhì mii-nsiá.

¹² Yùhù sacúndáhvî nùu-nsiá ñà-iin-ni ni nácúníhnú inì-nsia nacua nihnú ini yùhù, ñáni; vachi (na ní sàì yucán) ndè modo xi mii-nsiá nì nadàma stnái.

Mii-nsia, còò ni-íñàha ni quidá-nsiá xì yùhù.

¹³ A nsinúú inì-nsia ñà-sàhà iin cuèhè (nì ndòì ndé ndoó-nsiá), dandu nì càhìn xì-nsiá razón ndiaha xí mii-yá.

¹⁴ Te mii-nsiá, cóni cáhìchì inì-nsia yùhù, mate cuáhà vida nì xinì sàhà cuèhè mà, doco cóni nácóó-nsiá yùhù. Còó; nì naquimani-nsiá yùhù na ian ángel xi Dios nduí, ò nahi mismo Jesucristu.

¹⁵ Pues vichi, ¿ndiá nduá nì cuu? Vachi yáha ga nì sacudiì inì-nsia antes nì cúí. Yùhù ináhì, dispuestu nì sandoo-nsia dècuèndè cuàha stná-nsiá yùhù nduchínúu-nsiá nú nì cáquiàn nì cúí.

¹⁶ Dòcò vichi, ¿a sàni nacuni ùhì-nsiá yùhù ñà-nì cachì xì-nsiá cuisì ñà-nduú ñà-ndàa?

¹⁷ Nècuàchì sàni dándàhvì xì-nsiá, màni gá cáhàn-nè xì-nsiá, doco có-íá vaha, vachi cuisì cuní-nè danándodó-né mii-nsiá nsiùhù, te cunchicùn-nsiá mii-né.

¹⁸ Pues vátùnì iá ñà-cáhàn màni-ndà xì nèhivì, cuisì-nì iin chuun vaha ni cùndúá, dandu ñà-jaàn ndisa cudìi inì, mate có-íé` xì-nsiá jaàn.

¹⁹ Vachi cunaha-nsiá, nahi dèhi xínuu-nsia; doco vichi cuàhà gá dandohí míí sàhà-nsiá inga xichi, te iin-ni icúmí ndohi ndè cachi sàa-nsiá (nàcùnihnu vaha tu inì-nsia) nahi Cristu. Vachi na ian ndohó dihi-nda na quesáa-ndà ñuhivì, ducán ndohó stnái sàhà mii-nsiá.

²⁰ A sácú vaha ni cói ndé ndoó-nsiá vichi. Te a sácú vaha stná ñà-màsà cáhàn ndee gué` xì-nsiá nì cúí. De plano, có-cùndàà inì nansa ga quide xì-nsiá.

Ejemplu sàhà ùi nècuàchì ñàhà sànahà nani Agar xì Sara

²¹ Vichi cuàhìn cachì inga iin palabra xì mii-nsiá nècuàchì cuní cunchicùn xì ley sànahà. Cuní ñà-nsinuu ini-nsiá nansa cachí mismo ley mà ndé

²² nacáníá nansa nì quida Abraham sànahà. Ùi dèhe-ne nì tùinuù-xí ñuhivì, cachá, te dihi dèhe sahnú-né nì sanduu (Agar). Nècuàchì mà, iin nècuàchì có-íá libre nì sanduu-ne, vachi ducánì quidáchúùn saín-né. Doco dihi inga dèhe Abraham mà (nani Isaac, còó; meru ñàhàdihì-nè) nì sanduu nècuàchì mà, te iin nècuàchì libre nì sanduu-ne.

²³ Te iá inga ñàha sàhà dèhe criada mà, vàchi na ian quesáá nsidanicuú gá mée ñuhíví, ducán nì quesàa-te. Doco dèhe nècuàchì libre mà, còó. Milagru nì sandua nì tùinuù-vé ñuhíví, te ducán nì cuu ndisa palabra nì cachi Dios xì Abraham antes.

²⁴ Te cunaha-nsiá, ejemplu nduú stná nsidaájàn, vàchi nahi ùi ley xínduu stná nècuàchì ñahà mà. Agar yucán nduú ley nì ñhì nèhivì ndè yucù Sinaí, te nèhivì nchícùn xì ley mà vichi, có-ndóó-né libre.

²⁵ Ladu Arabia iá yucù mà, te ley nì ñhì nèhivì lugar yucán nduú nahi Agar mà. Te (ináhá-ndá) có-ndóó nèhivì nchícùn xì ley mà libre vichi, vàchi ñuu-nè Jerusalén, có-ndúa iin ñuu iá libre vichi.

²⁶ Doco ñuu ndohó Jerusalén iá ansivi, nahi dihi-nda nduá, te libre ndisa iá`.

²⁷ Vàchi dohó cachí tutu ìi:

Nècuàchì ñahà còò déhe-xì, nì cudíi ini-nè mate ni-iin dèhe-ne còò. Te xiñuhu ndàhì vico stná-nè, te cudíi ini-nè mate táñaha ga tùinuù ni-iin mée xi-ne, vàchi (cuàhà gá cundiatú-nè). Mate còò gá nècuàchì vehe-ne, vátuni cudíi ini-nè (na ian) ndoó cuàhà dèhe-ne.

²⁸ Pues cunaha-nsiá, nahi (dèhe Abraham nani) Isaac mà (xínduu nsidaa-nda), ñáni, vàchi dèhe ndisa mii-yá sàni nanduu-nda sàhà palabra ndiaha nì cachi-yà, na ian nì cuu xì stná Isaac mà.

²⁹ Doco ñani Isaac nì tùinuù-xì nahi nsidaa gá nèhivì ñuhíví, quini nì quida-tè xì ñani tii-té, divi tètii nì tùinuù ñuhíví nì quida Espíritu Ìi. Te iin-ni dècuèndè vichi ducán quidá stná nèhivì có-nchícùn xì Espíritu Ìi, quini quidá stná-nè (xì-ndà).

³⁰ Doco ¿índù gá ñà-càchí tutu ìi? Dohó cachá: “Tavà dahuun-ní criada mà xì dèhe-ne vehe-ní, vàchi mà ndútáhvì dèhe-ne nùù-ní, cuisì-ní dèhe nècuàchì libre ñhítáhvì”, ducán cachá`.

³¹ Ñàyùcànduá, (sàhà ejemplu mà sàni cundaà ini-ndà), divi nahi dèhe nècuàchì libre mà xínduu-nda, ñáni, màdì nahi dèhe nècuàchì có-íá libre.

5

In-ni ni cúndóó-ndá libre nùù ley sàhana

¹ Vichi sàni tavà Cristu ndohó libre nùù ley sàhana, te sàhájàn cuní-yà cundoo dahuun-nda libre nicanicuahàn. Ñàyùcànduá, iin-ni ni cúnáhá-nsiá ñà-jaàn, te màsà tucù-nsiá cunchicùn-nsiá ley sàhana ma, vàchi sadiámà nùù-ndà na iin yugu (xi buey).

² Cunini vaha-nsia; yùhù Pablo cáhìn xì-nsiá: mà cúí chindéé Cristu mii-nsiá te nú fuerza ni cácan-nsiá màcùtuu seña xi Dios ìcà-nsiá (nacula cachí ley sàhana).

³ Yùhù cachí xì nsidaa mii-nsiá nècuàchì cuní màcùtuu seña mà ìcà-xí, nú ducán ni cuu-xì-nsiá, dandu fuerza quida stná-nsiá cumplir nsidaa gá ñà-nduá cachí ley mà.

⁴ Vàchi nú cuní-nsiá ndee vaha-nsia nùù-yá sàhà ley mà, dandu còò ni-ñàha nduú gá Cristu nùù-nsiá. Vàchi ñà-sàni nacuaà-nsiá gracia xi-ya nduá.

⁵ Doco cunaha-nsiá, cuisì ñà-cunindisa-nda mii-yá nduá xiñuhu, te ducán chindéé stná Espíritu Ìi xí-yá ndohó quida-nda, vàchi sàhà cuisì ñà-jaàn nduá niñnú ini-ndà ndee vaha-nda nùù-yá.

⁶ Vàchi nùù ndohó nèhivì xì Jesucristu, có-quidámà a itúú seña mà ìcà-ndà, ò á coó, cuisì ñà-ndiáá nduú ñà-cunihnu vaha ini-ndà mii-yá, te cuu stnahá ini-ndà sàhà-ndà.

⁷ Mii-nsiá, ndiaha gá nì saquida-nsia antes na nisa xinindisá ví-nsiá. Doco vichi, ¿nansa nì ñhì nèhivì nì datúcù-nè mii-nsiá ñà-có-nchícùn gà-nsiá ñà-nduú ñà-ndácuìsì?

⁸ Pues (nàhà xicà), màdì mii-yá ana cana-xì-nsiá gloria nduú ana datúcù xì-nsiá ducán. Còó.

⁹ Te (ináhá-nsiá) iyuhu-ní tàtnà nsidátáchí xì pan quée, te cuàhà gá ndutáchâ. (Te ducán stná xì chuun malu, iyuhu-ní ñà-có-ndiáá, te sàni xitià inicutu.)

¹⁰ Doco yùhù cáhví xì Stoho-ndà Señor ñà-màsà cunchícùn gà-nsiá ichì mà. Te nècuàchì dacá xi dìni-nsiá, icúmí-nè cunsida-ne cuàchi-ne, ndéni nèhivì ní cui ni cúndúú-né.

11 Ñánì, nú ni quésáhî cachì xì nèhivì ñà-xiñùhù màcùtuu seña mà ìcà-né, dandísá mà quídá quini ga nècuàchì (raza Judea) xì' nì cùí, ni mà cùdúchí stná ini-nè sàhà palabra cachî sàhà (nansa nì xihì Jesús nchìca) cruz.

12 Nècuàchì dacá xi-nsiá, chicá vaha ni sàà-nè quida quini-ne xì mii-né, (màdì mii-nsiá).

13 Cunaha-nsiá, divi sàhà-ñá nihì-ndà quee-nda libre, ñàyùcàndùá nì cana Dios ndohó, ñánì. Doco màdì sàhájàn icúmí-ndá permisu quida ndevàha-nda; còó, mà cùí. Vàchi vichi ñà-ndùá xiñuhu nduú ñà-iin-nì cuu stnahá ini-ndà sàhà-ndà, te ducán nihì-ndà cunucuachi víi-nda nùù ñanìtnaha-nda.

14 Vàchi iá iin palabra tii cachí ley mà, te nú ni quida-ndañá cumplir, dandu queámà ñà-sànì chivàha stná-ndà nsidanicuú ley mà. Te divi palabra tii ma nduú ñà-xiñùhù cuu ini-ndà sàhà ñanìtnaha-nda nacua cuú stná ini-ndà sàhà mii-nda.

15 Doco nú nàá stnahà-ndà na iin quisi dàná, dandu vihini sàá stná-ndà dandáñúhú stnaha-nda.

Nansa chindéé Espíritu Ìi ndohó, sadí-yà nùù ñà-có-ìá víi cuní-ndà quida-nda dava xichi

16 Yùhù cachî xì-nsiá, iin-nì nì cándísâ-nda chindee Espíritu Ìi xí Dios anima-ndà, dandu mà quídá gá-ndà ñà-có-ndiáá xího nèhivì ñuhivì quida-ne.

17 Vàchi Espíritu Ìi, có-ndôo ini-yà sàhà ñà-chìcuéhè cuní ndahà sàhà-ndà quida, te nì có-càndísâ stná-mà quida ñà-ndùá cuní Espíritu Ìi, vachi có-xiñùhù tnàhá-yá xán, ñàyùcàndùá, ùhì iá quida-nda ñà-ndùá cuní-ndà quida-nda.

18 Doco nú Espíritu Ìi nduú ana dachítnùnì ini xì-ndà, dandu còò modo dandacú gá ley sàhana ma nùù-ndà.

19 Náhà xicà índù iñàha nduá xího nèhivì ñuhivì quida-ne, vachi xiní-ndà cáhàn-nè xì nèhivì cónì nándàhà xì-né. Quini quídá-né, doco có-cùcáhán nùù-né.

20 Cahvi-né ñà-có-ndùú Dios ndisa, te sàhàn stná-nè nùù tètàtnà xì nùù tètadí. Daaní, xiní ùhì stnahá stná-nè, te nàá stnahá stná-nè. Xího stná-nè ñà-ìcúmí ñanìtnaha-ne. Te yàchì xidà stná ini-nè. Ventaja xi mii-né nduá siempre cuní-nè tavà-né. Te mà ùhì cudoo stná-nè, te quecuaán-né xì nècuàchì xínduu nèhivì xí mii-né.

21 Tùha stná-nè cumbìdia ini-nè, te sahnì stnahá stná dava-ne. Xíni stná-nè, te quídá-né escándalo. Te cuàhà gá ñà-chìcuéhè nahi ñà-jaàn quídá stná-nè. Pues sàni cachì xì-nsiá sàhà nèhivì tùha ducán, te tucutu cachí guè xì-nsiá vichi sàhà-né ñà-mà nunca nihìtáhvi-né sàà-nè cundoo-ne ñuhivì Ìi xí Dios.

22 Doco diín iñàha nduá quídá Espíritu Ìi ini anima-ndà, vachi sàhà mii-yá vátùni cuu stnahá ini-ndà sàhà-ndà, te cudìi ndiaha stná ini-ndà. Vátùni cunihnu dadí ndiaha stná ini-ndà quida-ya. Te mà ùhì quidandee stnahá stná ini-ndà sàhà-ndà, nú chindéé-yândô. Te mà ùhì stná cáhàn màni stnaha-nda iin-nda inga-ndà, te cunduu stná-ndà nèhivì vaha. Sàhà mii-yá mà ùhì quida ndisa-nda cumplir;

23 te mà cóó dana stná-ndà. Te vátùni nihì stná-ndà cadì-ndà nùù-ndà ñà-màsà quídá ndevàha-nda. Cunaha-nsiá, (inìcutu ñuhivì) còò ni-iin ley cachí xì-ndà ñà-màsà quídá-ndà ñà-vàha yohó.

24 Vàchi nsidaa ndohó nèhivì xí Jesucristu, quida-nda cuenta na ian nì xihì stná-ndà na ní xihì-yà nchìca cruz, te sàháyùcàndùá mà xího gá-ndà quida quini-nda, ni mà cúnìhnú quínì gá stná ini-ndà.

25 Vàchi nú sàhà Espíritu Ìi itiacú-ndà vichi, dandu ni cuàha stná-ndà dacúndéhe-yândô ichì-yá.

26 Màsà cùcáhán-ndá mii-nda nduu-nda mii-nda, te cundoo-nda datnahá stnaha-nda. Còò, màsà cumbìdia stnahá ini-ndà sàhà-ndà.

6

Ndiá ìcà-ndà chindee stnaha-nda

¹ Ñánì, nú ni cándiáà sàhà iin-nsia nùù cualquier iin cuàchi, dandu viví-ni càhàn-nsià xì nècuàchì cónì quidá víi ma sàhà ñà-nìhì-né nacunihnu vii ini-nè, doco cuisì nèhivì chitu Espíritu Ìì xí Dios ni cúndúú ana càhàn xì-né. Te xiñuhu coo stná nècuàchì mà cuidadu màdí quida stná mii-né iin falta.

² Te nú ia iin ñanìtnaha-nda có-cùndáà vaha inì-xi, dandu siempre ni nácuàhandee ini-ndané, vachi ñà-chívàha vii-ndà ley xi Cristu nduámà.

³ Te nú tuxí ini-ndà cuàhà gá ndiáá-ndà, dandu cuisíá mii-nda dandahví-ndà mii-nda nduámà, vachi còò ni-iñàha ndiáá-ndà, nú ducán.

⁴ Ñàyùcàndúá, iin iin-nda xiñuhu nacani ini-ndà a vátùni iá ñà-ndúá quidà-ndà, á coó, te nú ducán, dandísá vátùni cudì ini-ndà sàhà mii-nda, màdiá cundehè-ndà ñà-ndúá quidá ñanìtnaha-nda, a ver, amádi chicá quidá víi ndohó.

⁵ Vachi iin iin-nda icúmí-ndá nacuahà-nda cuenta sàhà ñà-ndúá nì quida-nda.

⁶ Nsidaa nèhivì dacuahá palabra ìì nùù ana chìnáhá xì-né, ndiá ìcà stná-nè chindee-né nècuàchì mà xì ñà-ndúá icúmí-né.

⁷ Màsà cuàha-nsia dandahví nèhivì mii-nsiá. Mà cúí nàcuìdiqui uun-nda mii-yá, vachi cachí dichu: “Ñà-ndúá nì chihi-nda, divi nìhì-ndà”.

⁸ Vachi nú ni quida-nda cuisì ñà-ndúá xího ini mii-nda, dandu icúmí-ndá sàà-ndà ndañuhu dahuun-nda. Doco nú ni quida-nda nacua cuní Espíritu Ìì xí Dios, dandu sàhámà nihítàhvì-ndà vida ndiaha nicanicuahàn.

⁹ Ñàyùcàndúá, màsà cúñáñá-ndá quida-nda nsidaa ñà-íá vii, vachi nú iin-ni ni quida-nda ducán, te có-cùhúún ini-ndà, dandu cundiatú ndiaha anima-ndà.

¹⁰ Sàhájàn, nú iá nansa quida-nda obra nùù ñanìtnaha-nda, dandu ni quida-ndañá. Te nú nèhivì iin-ni cahví stná xì Yua-nda Dios nduú stná-nè, dandu chicá más xiñuhu chindee-ndané.

Ultimo ñà-ndúá nì cachi Pablo xì nècuàchì ladu Galicia, te ndahà mii-né nì tiaa-neà

¹¹ Vichi mií tiaí letra nahnú yohó.

¹² (Cuàhìn càhàn guè xì-nsiá sàhà) nècuàchì cuní màcùtuu seña xi Dios ìcà nèhivì. Cunaha-nsiá, cuisì sàhà-ñá cuní-nè ndòò vaha-ne xì nèhivì nduá, vachi yúhì-nè quida quini nèhivì xì-né (nú nchícùn-nè cuisì ichì mii-yá ana nì xihì) nchìca cruz, divi Cristu.

¹³ Te cunaha-nsiá, ni có-chívàha vii stná mii-né ley sàhà ma, mate cudì guá ini-nè itúú seña mà ìcà-né. Te cuní-nè màcùtuu stná mà ìcà mii-nsiá sàhà-ñá cundee-né nùù-nsiá, te ducán quee cuàhà tnùñuhu xì-né (cahan-né).

¹⁴ Doco yùhù, cuisì tnùñuhu xí ana nì xihì nchìca cruz nduá cuní quee, divi tnùñuhu xí Stoho-ndà Jesucristu. Te sàhà-ñá nì xihì-yà ducán, còò cá ni-iñàha iá ñuhivì yohó (ndiáá nùì), vachi quidé cuenta na ian sàni xihì stnài nchìca cruz xì mii-yá, te có-ndùlócò guè sàhà ñà-íá ñuhivì yohó.

¹⁵ Vachi nú nèhivì xí Jesucristu nduu-nda, dandu màdi ñà-cutuu seña ìcà-ndà nduá ndiáá. Te nú còò stná seña mà, ni mà chíndéé stná mà-ndó, cuisì ndiáá ñà-cucumi-nda iin anima saa.

¹⁶ Te nsidaa nèhivì nchícùn ndisa xi palabra yohó, ni sàà-nè cundiatú ndiaha anima-nè, te Dios ni cúndéhe ndahví xì-né, vachi quidá-yá cuenta na ian xínduu stná-nè nèhivì xí-yá Israel.

¹⁷ Vichi màsà cuáhachuún uun ga ni-iin nèhivì yùhù, vachi cuàhà gá (sàni ndohi sàhà) Jesús, cuàhà gá seña itándiaa ìqué (ndé nì ducùn).

¹⁸ Ni cúcúmí anima-nsiá cuàhà gracia xi Stoho-ndà Jesucristu, ñánì. Sà-íá.

Tutu Nì Tiaa San Pablo nùu Nèhivì xí Dios Ndoó Ñuu Éfeso

¹ Yùhù nduí Pablo, iin ana nì nihì chuun ìi nùu Jesucristu, vèchi ducán nì chitnùnì ini Dios guide. Te vichi tiaí carta yohó nùu nsidaa mii-nsiá nèhivì ìi xí-yá ñuu Éfeso, nsidaa mii-nsiá nècuàchì iin-nì cahvi stná xì Jesucristu.

² Contentu ni cúndóo-nsiá quida Yua-nda Dios xì Stoho-ndà Jesucristu, te cuàhà gá gracia xi-ya ni cúcúmí-nsiá.

Cuàhà gá cundiatú anima nsidaa nèhivì xí Jesús

³ Ansivéhé cahnú Yua-nda Dios, divi mii-yá ana cahvi stná Stoho-ndà Jesucristu, vèchi Yuamánì-yámà nduú-yá. Te sàhà-ñá nduu-nda nèhivì xí Dèhemanì-yá, ñàyùcàndùá sàni sàhatahvì-yándò nsidanicuú ñà-ndiaha ìi iá ansivi.

⁴ Te sàhà stná ñà-ndùá nì quida mii-yá, ñàyùcàndùá nì nacàxin Dios ndohó dècuèndè na táyòo ñuhivì sàhà-ñá cundoo-nda nùu-yá, te cunduu-nda nèhivì ìi còò falta xi.

⁵ Te sàhà ñá-cùu guá ini-yà sàhà-ndà, ñàyùcàndùá nì chitnùnì ini-yà sàà-ndà cunduu-nda dèhe ndisa-ya. Divi ñà-jaàn nduá nì nacani ini-yà, te sàhámà nì chitnùnì ini-yà ñà-nìhìtáhvì-ndà ducán sàhà (obra nì quida) Jesucristu.

⁶ Te vichi tavá-nda tnùñuhu xí-yá ñà-ndiaha guá nì quida-ya nì sàhatahvì-yándò gracia, te sàhà gracia mà sàni nihì-ndà nì cundiatú vaha anima-ndà nì quida Dèhemanì-yá.

⁷ Vèchi sàhà-ñá nì xihì Dèhemanì-yá, te nì xitià nì-yá, ñàyùcàndùá vètuni nì nacuidahan-yándò nùu tnùndoho, vèchi nì ndutu cuàchi-nda ñà-nì quida guá-yà gracia sàhà-ndà;

⁸ te sàhà gracia nì quida-ya mà, fuerte gá sàni dàtnùu-yà ini anima-ndà; ndiaha gá sàni nduhì sàxínìtnùnì-ndà nì quida-ya.

⁹ Tiempo antes nìsa ìa dèhé ñà-ndùá nì nacani ini-yà quida-ya quivì vèxi xi-nda, doco vichi sàni cachitnùhu-ya xì-ndà nansa iámà, nì cachi-yà nansa nì chitnùnì ini-yà quida-ya,

¹⁰ ñà-cunduu Cristu ana cusahnú nùu nsidanicuú iñàha, ñà-ìá ansivi xì ñá-ìá stná ñuhivì. Te seguru icúmì cuu ndisa nsidaámà na sàà meru quivì xán.

¹¹ Sàhà-ñá nduu-nda nèhivì xí Cristu, ñàyùcàndùá sàni nihìtáhvì guá-ndà nùu Dios, vèchi divi ñà-jaàn nduá nì nacani ini-yà antes. Te mii-yá, nacua chítnùnì ini-yà quida-ya, divi ducán siempre quidá ndisa stná-yà.

¹² Te nsihù nècuàchì primeru nì quìhvi ichì Cristu, ducán nì chitnuni ini-yà nihìtáhvì gá-nsì sàhà-ñá chicá más tnùñuhu xí-yá quee sàhà ñà-ndiaha guá nì quida-ya xì-nsì.

¹³ Daaní, después nì xinitnùhu stná mii-nsiá palabra ndàcuisì xí-yá, divi razón vaha nansa càcu-nda, te nì xinindisá stná-nsià Cristu. Ñàyùcàndùá nì nihì stná-nsià Espiritu ìi xí-yá, nacua nì quida-ya comprometer. Te Espiritu ìi mà nduú nahi seña ñà-sàni nanduu-nda nèhivì ìi xí-yá.

¹⁴ Doco cuisì-nì tnùmànì primeru nduú Espiritu ìi, vèchi más gá icúmì-ndà nihìtáhvì-ndà na sàà quivì nacua-yaándò, vèchi nèhivì xí mii-yá nduu-nda ñà-sàni dànáa-yá sàhà-ndà. Te cuàhà gá stná tnùñuhu ndiaha xí-yá icúmì quee quivì (nihìtáhvì guá-ndà ducán).

Nansa nì xicàn tàhvì Pablo nùu Dios ñà-nì cuáhatahvì-yá nèhivì xí-yá iin anima nchichì

¹⁵ Cunaha-nsiá, sàni xinitnùhi ñà-fuerte guá nihnú inì-nsia Stoho-ndà Jesús xì ñá-cuàhà guá cuú stná inì-nsia sàhà nsidaa nèhivì xí-yá. Ñàyùcàndùá,

¹⁶ siempre naquímànì Dios sàhà-nsiá, te xicàn tàhvì nùu-yá

17 ñà-nì ndúnychíhî ndiaha-nsiá quida Espíritu Ìi; te ni chíndéé stná-yà mii-nsiá mànhì ini-nsià sàhà Dios, dandu chicá cunaha váha-nsiayà. Divi ñà-jaàn nduá xicàn tàhvì nùu Yuandiaha-nda Dios, divi mii-yá ana cahvi stná Stoho-ndà Jesucristu.

18 Daaní, xicàn tàhvì stnái nùu-yá ñà-nì dátñùu-yà sàxínítnùnì-nsià sàhà-ñá cundaà vaha ini-nsià nansa iá tnùndé ini ndiatu-nda nùu-yá, vachi ñà-sàni cana-yàndó iá ndisa tnùndé ini xi-nda. Te xicàn tàhvì stnái ñà-nì sáa-nsià mànhì ini-nsià ñà-ndiaha guá sàni nihítàhvì-ndà cuàhà ñà-vaha nùu-yá, nsidanicuú ndohó nèhivì ìi xí-yá.

19 Te xicàn tàhvì stnái ñà-nì cúndàà inì-nsia ñà-cuàhà guá poder ndiaha icúmí-yá, te vátùni nacuahandee ini-yà ndohó nècuàchì xiníndísá-xí-yá. Te divi sàhà poder ndiaha ma

20 nì dånátíacú-yá (Dèhemanì-yá) Cristu, dandu nì nsihi nì natiacu-yà nì nana-ya ansivi dècuèndè gloria, te nì sàcòo-ya ladu cuahá Yua-nda Dios.

21 Te vichi dìquì-xí iá-yà, te cuàhà gá más ndiaá-yà nùu nsidaa ana cusáhnû, xì nùu nsidaa ana itá fuerte, xì nùu nsidaa ana icúmí xí poder, xì nùu nsidaa ana dándacú, xì nùu nsidanicuú gá stná ana ndácùcahan nèhivì tiempu vichi, te ò tiempu vaxi xi-nda inga ñuhiví.

22 Nsidanicuú iñaha, sàni ndòa sujetu nùu Cristu nì quida Yua-nda Dios. Te nsidaa ndohó nèhivì iin-ni cahvi xi-yá, sàni chitnùnì ini-yà dandacú Cristu nùu-ndà na ian dándacú dìni-ndà nùu-ndà.

23 Te ndohó, nahi iquicúnú mii-yá nduú stná-ndà. Te sàhà ndohó na ian sàni sacatnahá nsihi cuerpu xi-ya, na ian iá nsihi-ya vichi. Te mii-yá nduú ana iá inicutu ñuhiví xì ansivi.

2

Nansa cuú ini Dios sàhà-ndà, te nì dácácu-yàndó

1 Vichi sà-ìtiacú ndisa anima-nsià. Doco antes na ian còò vida xi anima-nsià nì sá-ìa nùu-yá ñà-cuàhà guá cuàchi-nsia;

2 vachi nìsa cudìi inì-nsia quida-nsia falta nahi nsidaa gá nèhivì ñuhiví. Nìsa inini-nsia tàchì malu cusáhnû nùu nsidaa gá ñà-malu xicá ansivi, te divi quisì jaàn dácàhàn xì nsidaa nèhivì có-inínì xí Dios.

3 Daaní, stná nsiùhù, nìsa xicanuu stná-nsì cutnàhâ-nsí xì nècuàchì có-quidá víi ma; vachi nsidaa-nda, nacua nìsa xicàn ini cuerpu xi-nda xì sàxínítnùnì-ndà, ducán nìsa cudìi ini-ndà quida-nda. Ñàyùcànduá, cuàhà gá castigu xi Dios nì càyà sàhà cuàchi-nda, nacua càyà-ñà sàhà nsidaa gá stná nèhivì cuàchi.

4 Doco Dios, cuàhà sàstnùhù cuhí ini-yàndó; vachi yáha ga cuú ini-yà sàhà-ndà;

5 ñàyùcànduá, nì quida-ya gracia sàhà-ndà, te nì dácácu-yàndó. Mate còò vida ndiaha nùu anima-ndà sàhà cuàchi nì quida-nda, doco nì quida-ya cuenta na ian nì natiacu stná-ndà na ní natiacu Cristu.

6 Ñàyùcànduá, ducán iá na ian nì cutnaha-nda xi-yá na ní natiacu-yà nì quida Yua-nda Dios. Te quidá stná-yà cuenta na ian sàni nana stná-ndà ndè gloria, te vichi cutnaha-nda xi Jesucristu ndoo-nda yucán xi-yá nì quida Yua-nda Dios.

7 Pues ñà-jaàn sàni quida-ya sàhà-ñá nicanicuahàn ni queé cuàhà tnùñuhu xí-yá sàhà gracia nì quida-ya na ní indehè ndahví-yàndó sàhà Jesucristu;

8 vachi micúisi gracia nduá sàni càcu-nda ñàni xinindisa-ndayá. Màdì iin chuun ni quidá ndohó nduá nì càcu-nda, còò. Ñà-nduá nì cutahví-ndà nùu Dios nduá.

9 Ni màdì obra vaha ni quida-nda nduá nì dácàcu xi-nda. Còò, còtó sàà iin-nda cucahan-nda chicá ndiaá-ndà.

10 Còò, mii-yá nì quida-ya obra xì ndohó, te sàhàjàn sàni ndusaa anima-ndà. Vachi na ní sàcùndoo-nda nùu Jesucristu nì ndusaa ínì-ndà sàhà-ñá cui quida stná-ndà cuàhà obra vaha nacua nì chitnùnì ini-yà quida-nda.

Nsidaa nèhivì xí Jesús, iin-ni nèhivì xínduu-ne

11 Ñàyùcàndùá, xiñuhu nsinuu ini nsidaa mii-nsiá nècuàchì inga raza, vàchi có-ndùú-nsiá nèhivì raza Judea. Nèhivì còò seña xi Dios ìcà-xí cachí nsiùhù nècuàchì raza mà xì mii-nsiá; te nèhivì seña xi Dios cachí-nsì xì mii-nsí, vàchi iá iin seña nì chituu nèhivì ìcà-nsí. Ñàyùcàndùá xiñuhu nsinuu ini-nsià nansa nìsa ìa xi-nsiá antes,

12 cónìsá níhnú inì-nsia Cristu antes, mànicùí (nìhìtáhvì-nsiá) nahi nèhivì ñuu-nsì Israel, te cónìsá ìnàhá stná-nsià ni-ìñàha sàhà tratu nì saquin-yà, te nì quida-ya comprometer cuàhà gá ñà-ndiaha. Còò ni-iin tnùndé ini nìsá ícúmí-nsiâ, nì còò stná Dios nìsá ìa nùù-nsiá.

13 Xica nìsa ìa-ya nùù-nsiá antes, doco vichi sàhà-ñá (nì xìhì) Cristu, te nì xitià nì-yá, ñàyùcàndùá vátùnì sàni tnàtuu yatni-nsia nùù-yá nduá, vàchi divi Jesucristu sàni xinìndisá stná-nsià.

14 ùi raza nì sanduu-nda antes, na ian nì tàhndè dava-nda; doco vichi sàni nacuatnaha-nda nì quida-ya; iin-ni nì nàcùnduu-nda quidá-yá cuenta vichi, te iá paz, có-xìní ùhì stnahá gá-ndà.

15 Cunaha-nsiá, sàhà-ñá nì nanduu-ya nèhivì, (te nì xìhì-yà), ñàyùcàndùá nì nìhì-yá nì nacadi-yà ichì ley sànahà. Cuàhà gá nìsa dandacú ley mà nùù-ndà, cuàhà gá nìsa xicàn-ñà quida-nda, doco nsidaámà, sàni cuxicá nì quida-ya, te vichi iin-ni nèhivì saa sàni nanduu-nda, có-ndùú gá-ndà ùi raza, ñàyùcàndùá, sà-ìá paz.

16 Vàchi na ní xìhì-yà nchìca cruz, nì nìhì-yá nì nàcùndoo vaha ndúì raza-ndà xì Dios, te nì nìhì stná-yà nì nachindoo vaha-yàndó, có-xìní ùhì tnahá gá-ndà vichi. Vàchi iin-ni nèhivì sàni nanduu nsidaa-nda nì quida-ya.

17 Na ní quixi Cristu, nihí-yá iin razón ndiaha nì quesaa, te nì cachitnùhu-ya nansa coo paz nùù nsidaa-nda. Mii-nsiá, mate xica nìsa ìa Dios nùù-nsiá, doco nì sàà stná palabra mà nùù-nsiá. Daaní, nsiùhù, na ian yatni nùù ichì-yá nì sandoo-nsi, te nì sàà stná palabra mà nùù-nsí.

18 Vàchi sàhà Jesucristu sàni nìhìndèè ndúì raza-ndà tnàtuu-nda nùù Yua-nda Dios. Te iá stná imindaa Espíritu ìi xí-yá, te chindee stná-yàmà ñà-tnàtuu-nda nùù-yá.

19 Mii-nsiá, có-ndùú gá-nsià nahi nèhivì xio, ò nèhivì fuera, còó. Meru nèhivì ìi xí ñuu Dios nduú stná-nsià vichi nahi nsiùhù. Dècuèndè nduú stná-nsià nahi nèhivì ndoó vehe-ya.

20 Te ndisa, na iin vehe nduú stná-ndà. Te nahi cimientu xan nduú apóstol xì nsidaa stná profeta nìsa cahàn cuenta xi-ya. Te nahi cavà cahnú indúhu esquina cimientu, ducán nduú Jesucristu.

21 Ñàyùcàndùá, base xi-nda nduú-yá, te na ian cueé-ni cueé-ni cudúcùn iin vehe na cuáha-ña, ducán stná ndohó, (cueé-ni cueé-ni nacuatnàhá-ndá) dècuèndè sàà-ndà cunduu ndisa-nda na iin veheñuhu ìi xí Stoho-ndà Señor.

22 Te mii-nsiá, sàhà-ñá nchìcùn stná-nsià mii-yá, vátùnì sàni nacuatnahá stná-nsià (xì nsiùhù), te ducán sàà nsidaa-nda cunduu-nda na iin vehe-ya ndé coo-ya nicanicuahàn sàhà Espíritu ìi xí-yá.

3

Nansa iá chuun xi Pablo ñà-cachitnùhu-ne palabra ùi xì nèhivì inga raza

1 Yùhù Pablo, ndiadí vehecàa vichi sàhà-ñá (quidè chuun ìi xí) Jesucristu. Te chuun ìi mà, sàhà ñà-vaha xi stná mii-nsiá nècuàchì inga raza nduú stná.

2 Ádi sá-ìnàhá-nsiâ nansa nì quida Dios gracia sàhí, te nì nìhìtáhvì quide chuun (chinhì) mii-nsiá.

3 Vàchi mii-yá, nì dàtnùù-yà sàxìnítnùnì yùhù nansa iá palabra ndiaha nìsa ìa dèhé antes. Te divi sàhámà nì tiaí iin carta tii (nì sàà nùù-nsiá) daa.

4-5 Ñàyùcàndùá, nú sàni cahvi-nsia carta mà, dandu vátùnì cundaà ini-nsià nansa nì nìhìtáhvì mànihì inì palabra sàhà Cristu nìsa ìa dèhé antes. Cunaha-nsiá, cóni nìhìtáhvì

nèhivì sànahà cunitnùhu-ne palabra mà; doco vichi sàni dàtnùu Espíritu Ìi sàxìnítnùní nsiùhù nècuàchì apóstol xi-ya, xì stná nècuàchì dava ga cáhàn cuenta xi-ya.

⁶ Te divi ñà-yòhó nduú (palabra mà): ñà-vàtùni nihitáhvi stná nèhivì inga ñuu nú ni cúníndísâ-né palabra xi-ya, mate có-nduú-né nècuàchì raza-nsi Judea. Nahi iin-ni nèhivì cunduu nduú raza mà. Ñàyùcànduá, vátùni nihitáhvi nècuàchì inga raza ñà-ndiaha ìi ni quida-ya comprometer, vèchi nèhivì xí Cristu cunduu stná-nè.

⁷ Cunaha-nsiá, ni quida Dios gracia sàhí ni sàhatahvi-yá yùhù chuun ñà-cachitnùhi palabra ìi xí-yá; te sàhà poder ndiaha xí-yá (ni cana-ya yùhù),

⁸ mate nduú iin ana chicá có-ndiáà nùu nsidaa nèhivì xí-yá, doco ni ñihí (chuun) ndiaha nùu-yá, divi ñà-cachitnùhi xì nèhivì nsidaa ñuu ñà-ndiaha guá iá ñà-nduá sàhatahvi Cristu ndohó.

⁹ Te ni ñihí stnáì chuun datúì nùu nsidaa nèhivì nansa ni chitnùní ini Dios quida-ya. Dècuèndè chicá sànahà ñisa ìa dèhámà, cuisì Dios ñisa inaha xán; iin-ni ndè antes ni quidavàha-ya ñuhivì ináhà-yàñà.

¹⁰ Doco vichi sàni dàtúì-ya nsidaámà sàhà-ñà ndulocó nsidaa ángel xi-ya xì nsidaa stná espíritu xicá ansivi, na indéhe-né ñà-ndiaha guá quidá-yá xì nèhivì càhvi xí-yá, dandu cundaà vaha ini-nè nchichí cuàhà-yá sàhà nsidaa chuun quidá-yá.

¹¹ Pues dècuèndè nicanicuahàn antes, ñà-jaàn nduá ni nacani ini-yà quida-ya, te divi ñà-jaàn ni ñihí stná-yà ni dàxínu-ya na ní quida Stoho-ndà Jesucristu (obra xi-ya).

¹² Te vichi nuná ñuhivì nùu-ndà, vátùni tnàtuu-nda nùu Dios, mà yúhí gà-ndà, vèchi xiníndísá-ndá Jesucristu.

¹³ Ñàyùcànduá, yùhù sacúndáhvi` nùu-nsiá nà-màsà cúhúún ini-nsià sàhà ñà-cuàhà guá ndohí sàhà mii-nsiá (nècuàchì inga ñuu); còó, vèchi xiñuhu quida-nsia cuenta na ian tnùñuhu xí-nsiá nduá.

Cuàhà sàstnùhù cuú ini Jesucristu sàhà-ndà

¹⁴⁻¹⁵ Cunaha-nsiá, nsidaa ñà-jaàn nduá dísáhà-xí cuàhìn càcàn tàhvi nùu Yua-nda Dios vichi. Siempre sàcuènn sísì nùu-yá, te cachí xí-yá Yua-nda Dios, vèchi mii-yá nduú yua nsidaa ndohó nècuàchì ndoó nùu-yá, a sea ndoo-nda ñuhivì yohó, te ò ansivi ndoo-nda.

¹⁶ Pues vichi xicàn tàhvi nùu-yá ñà-ni nácuàhandee ini Espíritu Ìi xí Dios mii-nsiá, vèchi cuàhà gá poder ndiaha icúmí-yá.

¹⁷ Te xicàn tàhvi stnáì nùu-yá ñà-nicanicuahàn ni cúníhnú vaha inì-nsia Cristu, te ducán coo-ya contentu ini anima-nsià. Te xicàn tàhvi stnáì nùu-yá ñà-ni cùú fuerte ndisa ini-nsià sàhà-yá xì sàhà stná ñanìtnaha-nsia na ian iín fuerte iin yutnù ducún, te ò indúhu fuerte iin vehe cahnú.

¹⁸⁻¹⁹ Te nú ducán, dandu vátùni mànihì váha ini-nsià ñà-cuàhà guá cuú ini Cristu sàhà-ndà. Te divi ducán xicàn tàhvi stnáì sàhà nsidaa gá nèhivì xí-yá, ñà-ni sàà nsidaa-nda mànihì ini-ndà ñà-yáha guá cuàhà cuú ini-yà sàhà nsidaa-nda, ndéni ana ni cui ni cúndúú-ndá, te ndéni ni cui ni cúndóó-ndá. Doco còó, ni mà cùì sàà-ndà cundaà nsihi ini-ndà sàhájàn, doco siquiera xicàn tàhvi ñà-chicá más ni cúndàà ini-nsià sàhà-ñà, te ducán sàà anima-nsià nachitúa mii Dios.

²⁰ Te vichi ansivéhé Dios, vátùni quida-ya nsidanicuú ñà-nduá xicàn tàhvi-ndà nùu-yá, dècuèndè yáha ga más cui quida-ya nùájàn, mate iin chuun cahnú sàstnùhù nduá ni cúníhnú ini-ndà càcàn-ndà, doco (vátùni ñihì-ndàñá), vèchi cahnú poder xi-ya, te divi poder mà quidáchúún stná ini anima-ndà.

²¹ ¡Ansivéhé cahnú-yá! Nicanicuahàn xiñuhu naquimani-ndàyá sàhà ñà-ndiaha guá iá Jesucristu xì ñà-ndiaha guá quidá stná-yà xì nsidaa ndohó nèhivì cahvi xi-yá. Te dècuèndè nicanicuahàn ducanicoó. Amén.

4

In-ni nèhivì sàni nanduu-nda ni quida Espíritu Ìi xí Dios

¹ Sàhà-ñá nchícùn Stoho-ndà Señor ié` vehecàa yohó. Ñàyùcàndùá sacúndáhvì nùù-nsiá ñà-nì cacánúú víi stná-nsià nacua ndiá ìcà-ndà, vèchi sàni cana-yàndó (ñà-cunduu-nda nèhivì ìi xí-yá).

² Sàhà ñà-jaàn xiñuhu cunihnu ndahvi ini-ndà, te cunihnu manì stná ini-ndà. Iin-ni ni quidándéé cahnú ini-ndà sàhà ñanìtnaha-nda. Calma ni cúndóó-ndá. Iin-ni ni cúcúú ini-ndà sàhà-né.

³ Vèchi nahi iin-ni nèhivì xínduu-nda nì quida Espíritu ìi xí-yá; ñàyùcàndùá, iin-ni ni cúndóó màni nsidaa-nda, vèchi chindéàmà ñà-màsà táhndè dava-nda.

⁴ Vèchi nahi iin-ni cuerpu mii-ya (nduú nsidaa-nda), te imindaa Espíritu ìi xí-yá iá stná, te iin-ni tnùndé ini ndiatú stná nsidaa-nda ñà-sàni cana-yàndó.

⁵ Te imindaa Stoho-ndà Señor iá stná, xì imindaa stná ñà-ndùá xiníndísá-ndá. Daaní, iin-ni sàni cuhì stná nsidaa-nda.

⁶ Vèchi imindaa Dios iá, te Yua nsidanicuu-nda nduú-yá, vèchi cusáhnû-yá nùù nsidaa-nda, te chindéé-yà nsidaa-nda, te iá stná-yà ini anima nsidaa-nda.

⁷ Doco cada iin iin-nda sàni nihítáhvì-ndà nùù Cristu según nansa nì cudì ini mii-yá cuàhatahvì-yándô.

⁸ Ñàyùcàndùá, dohó cachí nùù tutu ìi:
Sàni nana-ya ndè gloria, ndacá stná-yà cuàhà gá ana nì cundee-yá nùù-xí, dandu nì sàhatahvì stná-yà nèhivì ñuhiví cuàhà ñà-vàha.

⁹ Pues cachí tutu mà ñà-nì nana-ya (ansivi), doco ¿ndiá nduá cuní cachàmà? Dohó cuní cachà, ñà-antes nì nuu-ya ndè tìxi ñuhù ndé chicá cunú.

¹⁰ Daaní, después nì nana stná-yà ansivi ndé chicá ducún sàhà-ñá nachitu inicutu ñuhiví poder xi-ya.

¹¹ Te nì sàhatahvì stná-yà nèhivì cuàhà ñà-ndiaha. Dava-nsi nì nihítáhvì-nsí cunduu-nsi apóstol cacanu-nsi chuun xi-yá. Te dava-nda nì nihítáhvì-ndà cunduu-nda profeta cáhàn razón quixí nùù-yá. Te dava ga-ndà nì nihítáhvì-ndà cunduu-nda ana tùha víi cachitnùhu xì nèhivì nansa càcu anima-nè. Te dava stná-ndà nì nihítáhvì-ndà cunuù-ndà nèhivì xí mii-yá, te chinaha stná-ndané.

¹² (Ducán nì chitnùní ini-yà nihítáhvì iin iin-nda) sàhà-ñá cui chindee stnaha-nda, te sahájàn nihì stná-ndà cunucuachi víi-nda nùù-yá, dandu nacuahandee stná ini nsidaa-nda na ian cuàhàn ndufuerté cuerpu xi mii Dèhemanì-yá Cristu.

¹³ Ducán dandu vátùni sàà nsidaa-nda cunindísá víi-nda palabra xi-ya, te cunaha ndisa-nda Dèhemanì-yá. (Te ndiaha gá ñà-jaàn), vèchi nú ducán, dandu nàcùnihnu ini-ndà nahi iin nèhivì sahnú, te ini stná anima-ndà cuacatnahá stná nsidaa gracia xi Dèhemanì-yá Cristu.

¹⁴ Mà cúndúú gá-ndà nahi méé; (mà cúníndísá-ndá) nansa ni nì cui ñà-ndùá chináha nèhivì. (Mà tucù nahá-ndà inga ichì) na ian dandiachi tàchì-ndó yohó te yucán. Ni mà níhì stná nèhivì maña dandahví-nèndó, mate cuní-nè datúcù-nèndó iin ichì có-nduú ñà-ndáa.

¹⁵ Ñàyùcàndùá, sàhà-ñá màsà cúú xí-ndá ducán, xiñuhu ni cáhàn-ndà puru ñà-ndácuìsì xì ñanìtnaha-nda. Màni màni ni cáhàn-ndà xì-né, dandu sàà-ndà quida sahnù-nda nacua cuní Cristu, vèchi mii-yá, nahi dìnì-ndà (dandacu-xi nùù-ndà), ducán nduú-yá.

¹⁶ Te ndohó, nahi ndahàsàhà-yá nduu-nda, vèchi iin-ni sàni nacuatnahá nsidanicuu-nda nì quida-ya sàhà-ñá ni chindéé stnaha-nda, te cunduu-nda nahi iin-ni cuerpu xi-ya. Vèchi chuun xi mii-yá nduá dandacú-yá, te chuun xi ndohó nduá ñà-quida-nda chuun nì quida tocar iin iin-nda. Ñàyùcàndùá, ducán queé stná mà na ian sahnú cuerpu xi-ya, te ndufuértèa, dandu chicá (ndiaha gá) cucuu stnahá stná ini-ndà sàhà-ndà.

Nansa ndiá ìcà-ndà quida-nda ñà-sàni nihítáhvì-ndà vida ndiaha nùù Jesucristu

¹⁷ Ñàyùcàndùá, yùhù ndácùcahín Jesucristu, te chináhì mii-nsiá ñà-màsà quidá gá-nsià na quidá nèhivì có-ínahá xí Dios, vèchi cuisì ñà-chìcuéhè nihnú ini-nè.

18 Cò-dàtnúù Dios sàxìnítùnì-nè. Còò vida ndiaha xí mii-yá nùù-né, vèchi cò-cùndáà tnùnì ini-nè sàhà-yá ñà-caxin guá anima-nè.

19 Mà túha-ne cucahan nùù-né, mate cuàhà gá viciu icúmí-nè, vèchi ñà-diì xí-né nduá quidá sìquinì-né.

20 Doco mii-nsiá, còò. Tucu iá ichì Jesucristu nì dàcuàhá-nsiá.

21 Te (a sácú vaha) nú sàni sàà-nsià nì cundaà vaha ndisa inì-nsia sàhà-yá, te (a sácú vaha) nú sàni chinaha-yà mii-nsiá nacua nduú ñà-ndácuisì sàhà-yá.

22 Te dohó cachí palabra xi-ya, (ñà-có-íá vaha) ñà-nduá nìsa quida-nda antes. Xiñuhu nacoò dahuun-nda modo nìsa nihnu ini-ndà, vèchi ñà-yùcán cuàhàn dandáñúhú xí-ndá ni cuí. Cutu dandahviándó, te daxíhoándô cuàhà ñà-sìquini.

23 Ñàyùcànduá vichi xiñuhu nacani ini-ndà iin modo saa,

24 te quida-nda cuenta na ian sàni ndusaa-nda, na ian làcà nì quidavàha Dios ndohó, vèchi vichi sàni sàhatahvi-yándô ñà-cunduu-nda nahi mii-yá, vètùni quida-nda nacua cachí palabra ndàcuisì ndé cachí-yà xì-ndà ñà-cunihnu ì ini-ndà, te quida vii-ndà xì ñanìtnaha-nda.

25 Ñàyùcànduá, ni-iin xichi màsà dándáhvi stnàhá gá-ndà. Micuísì palabra ndàcuisì ni cáhàn-ndà xì ñanìtnaha-nda, vèchi iin-ni nèhivì xínduu nsidaa-nda vichi.

26 Te nú ni cuídà ini-ndà sàhà iñaha, cuidadu ni cúndóó-ndá ñà-màsà quidá-ndá iin cuàchi; màsà cuídà ini-ndà inii ndui yacá.

27 Màsà cuàha-nda lugar dacà ñà-malu sàxìnítùnì-ndà.

28 Nú nìsa xidacuihna-nda antes, màsà quidá gá-ndà ducán. Iin chuun vii ni quidáchúún-ndá vichi, dandu cucumi-nda iñaha xi mii-nda, te cui dacútâhvi-ndà nèhivì iá necesidad-xi.

29 Daaní, màsà cáhàn quini stná-ndà vichi. Còó, puru palabra vii ni cúnduá, cundaca xi anima-ndà, dandu ndiaha gá chindeá nècuàchì iníni na cáhàn-ndà.

30 Te màsà dácùhúún stná ini-ndà Espíritu Ìì xí Dios, vèchi mii-yá nduú seña ñà-nduù-ndà nèhivì ì xì-yá, te iin-ni cucumi-ndayá dècuèndè quivì càcu dahuun-nda.

31 Màsà chùhún gá ini-ndà sàhà iñaha. Te màsà cuídà gá stná ini-ndà. Ni màsà ndúdáná-ndá; còó. Ni màsà cànàhá stná-ndà, te màsà cáhàn quini ga stná-ndà. Ni màsà cúndéhe úhì stnàhá stná-ndà.

32 Còó, màni ni cúndóó-ndá xí ñanìtnaha-nda, te cuhi stnàhá stná ini-ndà. Te nsidaa-nda xiñuhu cuicahnú stnàhá ini-ndà sàhà-ndà nacua nì quida Yua-nda Dios xì ndohó (ñà-nì xihì) Cristu sàhà-ndà.

5

1 Ñàyùcànduá, na ian quidá Dios, ducan ni quidá stná-ndà, vèchi dèhe-ya nduu-nda, te màni cuàhà-ndà nùù-yá.

2 Iin-ni ni cúcúú stnàhá ini-ndà sàhà-ndà nacua cuú stná ini Cristu sàhà ndohó, vèchi sàhàmà nì sàha-ya vida xi-ya cuenta xi-nda, te ducán nì nihì-ndà nì cudii ini Yua-nda Dios sàhà-ndà.

3 Nèhivì xí mii-yá nduu-nda vichi, ñàyùcànduá, màsà cáhàn-ndà xi ana cóni nándàhà xì-ndà; màsà quidá sìquini-ndà, ni màsà xího-nda ñà-nduá icúmí inga nèhivì. Còó. Ni màsà ndácùcahan ga stná-ndà ni-iin chuun sì-quini mà, vèchi nèhivì ì xì mii-yá nduu-nda vichi.

4 Na cáhàn-ndà, màsà cáhàn-ndà palabra sìquini, ò palabra chicuèhè, ni màsà cuácùndiaa stnaha-nda. Còó, mà váha càhàn-ndà ducán. Lugar xi ñà-jaàn xiñuhu naquimanì-ndà Dios.

5 Vèchi ináhà-ndá, mà càcu ni-iin nèhivì có-quidá sahnú xi nècuàchì ñahà; mà càcu ni-iin nèhivì sìquini, ni-iin stná ana xího cucumi cuàhà iñaha, vèchi nèhivì xího guá ducán, queámà na ian cahvi-né ñà-jaàn. Pues ni-iin nèhivì quidá ducán, mà níhitâhvi-né ñuhivì ì xì Cristu, divi nduú ñuhivì ì xì Dios.

⁶ Nú dacáhàn nèhivì-nsiá ñà-quida-nsia ñà-có-ndiàá mà, màsà cuáha-nsia dan-dahví-nè mii-nsiá, vèchi icúmí Dios dandohó-yá nsidaa nèhivì có-íní ní xí-yá, te quidá-né ñà-chìcuéhè (sàni cachì mà).

⁷ Ñàyùcàndùá, màsà quíhvi tnahá-nsiá xì nèhivì quidá ducán.

Nansa ndiá ìcà-ndà quida-nda ñà-sàni dàtnúù Dios sàxìnítnùní-ndà

⁸ Ichì ñáa nduá nì sanchicùn-ndà antes, doco vichi sàni dàtnúù Stoho-ndà Señor sàxìnítnùní-ndà, ñàyùcàndùá, xiñuhu cacanuú vii-ndà vichi.

⁹ Vèchi nú ndisa datnúù ndiaha-yá ini-ndà, dandu cunduu-nda nèhivì vaha inì-xi nihnú ndàcuisì inì-xi, te cunchicùn vii stná-ndà palabra ndàcuisì.

¹⁰ Nsidaa ñà-nduá quidà-ndà, xiñuhu nacani ini-ndà a cudî ini Stoho-ndà Señor sàhà-ñá, á coó.

¹¹ Màsà quíhvi tnahà-nda xi nèhivì có-quidá víi, vèchi ichì ñáa xicá-né. Còó, vihi gá vaha dahíhì-ndàné.

¹² Vèchi ndóo cahan stná-ndà nú ndatnúhú-nè sàhà chuun sìquini quidá dèhé-nè.

¹³ Doco nú ni dáhíhì-ndàné dandu queámà na ian datnúù-ndà iin luz nùù chuun quidá-né sàhà-ñá cunahà xicà nansa iá chuun ma. Vèchi claru náhà nsidaa iñàha nú tnúù nihni iin luz nùá.

¹⁴ Ñàyùcàndùá, ducán cachí (dichu):

Ndacòo mii-ní nècuàchì quídì jaàn, te nsicuihnú inì-ní, na ian natiacù-ní, dandu datnúù ndiaha Cristu nùù-ní, cachá`.

¹⁵ Ñàyùcàndùá, xiñuhu nacani vaha ini-ndà nansa quida-nda mientras ndoo-nda ñuhivì yohó. Màsà cacánúú-ndá nahi nèhivì có-cùndàà inì-xi; ni cúníhnú sahnú ini-ndà.

¹⁶ Te nú iá nansa quida-nda (iin chuun vii), yàchì ni nácání ini-ndà quida-ndañá, vèchi ndoo cuàhà gá nèhivì có-quidá víi tiempu vichi.

¹⁷ Ñàyùcàndùá, màsà quidá-ndá nahi nèhivì neciu; cuàhà gá xiñuhu mànihì ini-ndà nansa divi cuní Stoho-ndà Señor quida-nda.

¹⁸ Ni màsà cóhó-ndá vinu, te xìni-nda, vèchi escándalo nduámà. Còó, fuerte ni coó Espíritu ìi xí Dios ini anima-ndà, chicá vaha.

¹⁹ Te na cáhàn-ndà ndatnúhú-ndá iin-nda xi inga-ndà, dandu coto stná-ndà salmu nacuatú-nda alabanza xi Stoho-ndà Señor xì alabanza datnúù Espíritu ìi xí-yá sàxìnítnùní-ndà. Nsidaa modo yohó coto-nda, te ndenihi vaha-nda mii-yá xì nsidaa anima-ndà.

²⁰ Nicanicuahàn xiñuhu ndacùcahan-nda Stoho-ndà Jesucristu, te naquimanì-ndà Yua-nda Dios sàhà nsidanicuú iñàha.

Nansa xiñuhu quida-nda xì nèhivì vehe-nda

²¹ Nsidaa-nda, xiñuhu cahvi stnahà-nda iin-nda xi inga-ndà, vèchi nsidaa-nda, iin-ni cahvi stná-ndà mii-yá.

²² Mii-nsiá nècuàchì ñahà, xiñuhu cahvi-nsiá ìi-nsiá na ian quidà-ndà xì Stoho-ndà Cristu.

²³ Vèchi nacua dandacú mii-yá nùù nèhivì càhvi xí-yá, ducán dandacú stná iin nècuàchì tiàa nùù ñahàdihí-nè. Vèchi divi Cristu nduú ana nì dácácu xi ndohó nèhivì xí-yá, te nahi cuerpu xi-ya nduú stná-ndà.

²⁴ Ñàyùcàndùá, nacua iníni-ndá mii-yá, ducán xiñuhu cunini stná nècuàchì ñahà nsidaa ñà-nduá cachí ìi-né.

²⁵ Daaní, mii-nsiá nècuàchì tiàa, icúmí-nsiá cuu ini-nsiá sàhà ñahàdihí-nsiá nacua quidá Cristu xì nsidaa ndohó nèhivì càhvi xí-yá. Vèchi nì sàha-ya vida xi-ya cuenta xi-nda

²⁶ sàhà-ñá nduhii ini-ndà, te ndoo cuàchi iá anima-ndà quida palabra ìi xí-yá, na ian nì ndoa xì tècuíí.

²⁷ Daaní, quivì cana-yàndó, vətùni sàà-ndà nùù-yá, te ndiaha gá cundoo-nda. Mà cóó gá ni-iin mancha anima-ndà, ni iin xaan ndé iá chicuéhè; còò ni-iñàha, vàchi nèhivì ìì xí-yá cunduu-nda. Mà cóó gá ni-iin falta xi-nda nùù-yá.

²⁸ Cunaha-nsiá, nacua cuú ini iin nècuàchì tiàa sàhà mii-né, ducán xiñuhu cuu stná ini-nè sàhà ñahàdihí-nè. Te nú ducán ni cuú ini-nè sàhà nècuàchimà, dandu queámà na ian cuú stná ini-nè sàhà mii-né.

²⁹ Te ináhá-ndá, còò ni-iin nèhivì cahíchì ini xì mii-xí. Còó, de por sí dacuxi-nda mii-nda, te ndiaá-ndà mii-nda. Te divi ducán quidá stná Stoho-ndà Señor xì nsidaa ndohó nècuàchì càhvi xì-yá.

³⁰ Vàchi nahi iquicúñú mii-yá nduu-nda.

³¹ Te divi ñà-jaàn nduú stná ñà-dìsáhà-xí nándàhà iin nècuàchì tiàa xì iin nècuàchì ñahà, te quecuáân-né nùù yuadíhí-nè. Ñàyùcàndùá, mate diín diín nì sanduu-ne antes, doco vichi na iin-ni nèhivì sàni nanduu-ne. (Ducán cachí tutu ìì.)

³² Te mate ùhì cundaà nsihi ini-ndà sàhà palabra ndiaha ma, doco cunaha-nsiá, sàhà stná Cristu cáhàn, xì sàhà stná ndohó nèhivì càhvi xì-yá.

³³ Doco de todos modos, xiñuhu cuu ini nècuàchì tiàa sàhà ñahàdihí-nè nacua cuú ini-nè sàhà mii-né. Te nècuàchì ñahà, xiñuhu cahvi vii stná-nè ìì-né.

6

Nansa ndiá icà quida nècuàchì cuàti xì stná nècuàchì cuàchì

¹ Daaní, nsiohó nècuàchì cuàti xì nècuàchì cuàchì, cunini-ndá yuadíhí-ndà, vàchi ñà-jaàn nduú ñà-íá vii nùù Stoho-ndà Señor.

²⁻³ Ni coó tñùñuhu xí-ndà nùù yuadíhí-ndà, dandu yàha vàha-ndá; caní cuià cundoo naha-ndá ñuhiví. Cunaha-ndá, ley jaàn nduú ñà-primeru nì cachi Dios ñà-cutahvi-ndà iin ñà-vàha (nú ni chívàha-ndañá).

⁴ Daaní, mii-nsiá nècuàchì tiàa xínduu yua, màsà dácuìdà uun inì-nsia dèhe-nsia; xiñuhu dacuahnú víi-nsiáñà. Consejo vii ni cuáha-nsia, te chinaha vii-nsiáñà nacua cuní Stoho-ndà Señor.

Nansa xiñuhu quida peón ndoó saín nùù lamú xi

⁵ Daaní, mii-nsiá nècuàchì xínduu peón, cunini vii-nsiá ñà-ndùá dandacú lamú xi-nsia ñuhiví yohó. Quidañuhu-nsiánè, te cahvi víi-nsiánè. Iin-ni cunihnu vàha inì-nsia na ian Cristu nduú ana xinúcuáchí-nsiá nùù-xí.

⁶ Doco màdiá cuisì na indèhe-né, dandu quidachuún víi-nsiá sàhà-ñá ndee vàha-nsia nùù-né; còò. Quidachuún-nsiá na ian Cristu nduú patrón quidáchúûn saín-nsiá nùù-xí; iin-ni ni cúníhnú ini-nsiá ñà-quida vii-nsiá nacua cuní Dios quida-nda.

⁷ Na quidáchúûn-nsiá, ni coó vàha voluntad xi-nsia ñà-quida-nsia iin chuun vii, quida-nsia cuenta na ian Stoho-ndà Señor xinúcuáchí-nsiá nùù-xí, màdi nùù nèhivì ùùn.

⁸ Vàchi ináhá-ndá, nùù mii-yá icúmí-ndá nìhì-ndà iin ñà-vàha xi-nda sàhà nsidanicuú chuun vii nì quida-nda, a ducán xínduu-nda nècuàchì libre, te ò nècuàchì ndoó saín nùù iin lamú.

⁹ Daaní, mii-nsiá nècuàchì xínduu lamú, divi ducaní quida stná-nsiá xì ana nduú peón xi-nsia. Màsà cáhàn dana-nsia, vàchi ináhá-ndá iá stná ana nduú Stoho-ndà, divi mii-yá iá ansivi, te (xiñuhu nsinuu ini-nsiá) ñà-nùù mii-yá iin-ni ndiaá nsidanicuú nèhivì.

Ñà-ndùá sáhatahvi Dios ndohó ñà-chindee xi-nda cundee-nda nùù ñà-malu

¹⁰ Imindaa inàha iá gà cachì, ñàni: iin-ni ni cúníhnú fuerte ini-ndà Stoho-ndà Señor, te ducán nìhì-ndà nacuahandee ini-ndà, vàchi yàha ga cahnú poder xi-ya.

¹¹ Cunaha-nsiá, cuàhà ñà-ndùá nì chitnùnì ini-yà cunduu nahi arma xi-nda ñà-chindee xi-nda sàhà-ñá màsà dáca ñà-malu-ndó, te dandahví-sindó.

¹² Vàchi màdi nèhivì ñuhiví yohó nduú ana náâ stnàhà xì-ndà. Còò. Divi ñà-malu náâ stnàhà xì-ndà. Cuàhà-sí, te fuerte-si, te ndoó stná ana xícusahnú nùù-sí. Cunaha-nsiá,

divi ñà-malu nduú ana dandacu-xi nùù nsidaa nèhivì nchícùn ichì ñáa. Divi quisì sìquini xicánúú ansivi nduú-si.

¹³ Ñàyùcàndùá, ni cuíchúún-ndá nsidaa ñà-ndùú arma ni chitnùnì ini Dios chindee xi-nda na quivì cuní ñà-malu tnàtuu fuerte-si nùù-ndà. Daaní, nú sàni cundee-nda (nùù-sí), vátùni cundoo fuerte ì-ndà.

¹⁴ Sàhà ñà-jaàn iin-ni ni cúníhnú fuerte ini-ndà. (Cuisì ñà-ndácuisì ni cúníhnú ini-ndà, te chindeámándó) na ian chindéé cinturón ndee nuhní tìxi soldadu (ñà-coo fuerza-te). Daaní, xiñuhu quida-nda puru ñà-íá viì, te cunduamà na iin dùhnù cáa ndixí soldadu ñà-chindee xi nchìca-tè.

¹⁵ Daaní, na ian mácùnàì soldadu ndisàn-té (ñà-cacanu-u-tè), ducán stná ndohó, ndiá icà-ndà cunihnu ini-ndà (cacanu-u-nda xi) razón ndiaha nansa nàcùndoo vaha-nda xi Dios.

¹⁶ Cunaha-nsiá (fuerte gà cuní ñà-malu dacà-síndô), na ian dandiachi-sí cuàhà flecha xíxìn icà-ndà; doco nú iin-ni nihnú vaha ini-ndà mii-yá, dandu chindéámándó na ian ni cùndúá iin ñà-sìcàté caxin (ñà-màsà cuída flecha mà-ndó).

¹⁷ Daaní, nahi mbelú càa soldadu, ducán nduú stná ñà-nìhnú ini-ndà ñà-sà-íá salvación xi-nda; daaní, nahi espada xi-nda nduú stná palabra ì ni cachi Dios, vachi divi palabra mà nduá xichúún Espíritu ì xí-yá.

¹⁸ Daaní, nicanicuahàn xiñuhu càcàn tàhvì-ndà nùù-yá nacua datnúù Espíritu ì xí-yá ini-ndà. Càcàn-ndà nùù-yá nsidaa ñà-ndùá xiñuhu, te iin-ni ni cùndóó tùha stná-ndà. Màsà cùdúsán-ndà càcàn tàhvì-ndà nùù-yá, còó. Xiñuhu càcàn tàhvì-ndà ñà-chindee-yá nsidanicuú ana nduú nèhivì xí-yá.

¹⁹ Daaní, sàhà stná yùhù ni càcàn tàhvì stná-nsià sàhà-ñá chindee-yá yùhù na càhìn xì nèhivì, te màsà dáyùhíà yùhù càhìn sàhà razón ndiaha xí-yá, divi razón nìsa ìa dèhé sàna.

²⁰ Cunaha-nsiá, divi sàhà-ñá ni cuítia palabra mà, ñàyùcàndùá ni techuún Dios yùhù ñà-cacanuì, te divi sàhà stná mà ié` vehecàa yohó. Ñàyùcàndùá, càcàn tàhvì-nsiá sàhí sàhà-ñá màsà yúhí` càhàn vatí palabra mà nacua ndiá ìqué.

Nansa ni dàxínu Pablo carta xi-ne, cásàhú-nè xì nsidaa nèhivì ñuu Éfeso

²¹ Yùhù cuní cundaà inì-nsia nansa yáhi xì nansa quidé yohó; ñàyùcàndùá sàni càhìn xì ñani màni-ndà Tíquico yohó, áma nacani-ne xì-nsiá nsidaájàn. Te cunaha-nsiá, cuàhà gà sàni chindee stná nècuàchì mà yùhù. Iin-ni quidá víi stná-nè nsidaa chuun xi Stoho-ndà Señor.

²² Pues vichi cuàhìn techuín-nè sàà-nè ndé ndoó-nsiá, dandu vátùni cachitnùhu-ne nansa yáha-nsi yohó sàhá màsà cúhúún gà ini-nsià.

²³ Vichi ndácùcahín Stoho-ndà Jesucristu, te xicàn tàhvì nùù Yua-nda Dios sàhà-nsiá, ñáni. Xicàn tàhvì ñà-nì cùndóó víi-nsiá, te ni cúcúú stnahá stná ini-nsià sàhà-nsiá; te nicanicuahàn ni cúníhnú vaha inì-nsia mii-yá.

²⁴ Te vichi ni cúcúmí cuàhà-nsiá gracia xi Stoho-ndà Jesucristu, nú ndisa iin-ni cuú ini-nsià sàhà-yá nicanicuahàn. Amén.

Tutu Nì Tiaa San Pablo nù Nèhivì xí Dios Ndoó Ñuu Filipos

¹ Yùhù nduí Pablo, te compañeruì yohó nduú Timoteo. Nèhivì xinúcuáchí nù Jesucristu nduú-nsí. Te tiaa-nsí tutu yohó nù nsidaa mii-nsiá nèhivì xí Jesucristu ndoó ñuu Filipos, xínduu-nsia ana idónuu, xì stná ana xinúcuáchí, xì nsidaa gá stná mii-nsiá nèhivì dava ga ndoó nù-yá.

² Contentu ni cúndóo-nsiá quida Yua-nda Dios xì Stoho-ndà Jesucristu, te cuàhà gá gracia xi-ya ni cúcúmí-nsiá.

Ñà-nduá ni xicàn tàhvì Pablo nù Dios ñà-quida-ya sàhà nècuàchì xiníndísâ

³ Yùhù, na cada nsinúú inì mii-nsiá, naquímánì Dios sàhà-nsiá.

⁴ Te cuàhà gá cudí stná inì na cada xicàn tàhvì sàhà-nsiá nù-yá,

⁵ vèchi nsinúú inì nansa quidá-nsiá chindéé stná-nsiá ñà-cuitià razón vaha xi-ya, nacua quidá yùhù. Te ináhì iin-ni sàni chindee stná-nsiá ducán ndè quivì nì xinitnàhì xì-nsiá xì ndè vichi.

⁶ (Ñàyùcànduá, nàhà xicà) iin obra ndiaha nduá sàni quesaha-yá quidá-yá ini anima-nsiá, te ináhì iin-ni icúmí-yâ quida-ya ducán dècuèndè sà quivì (naxicocuín) Jesucristu.

⁷ Te divi ducán ndiá ìqué cunihnu inì sàhà-nsiá, vèchi màni cuàhà-nsiá nù, te iin-ni nihitáhvi stná-nsiá gracia (xí Dios) nahi yùhù. Vèchi cunaha-nsiá, mate yohó ié`ndiadí vehecàa, doco sàhatahvì stná-yà yùhù gracia, te iin-ni icúmí nihitáhvi guè`ducán, mate (dacúhùn-te yùhù nù juez), doco siempre icúmí càhàn nihni sàhà razón ndiaha xí-yá ñà-nduá palabra ndàcuìsì.

⁸ Te mii-yá, ináhà-yâ ñà-cuàhà guá nsinúú inì nsidaa-nsiá, nacua quidá stná Jesucristu xì-ndà, cuàhà gá cuú ini-yà sàhà-ndà.

⁹ Ñàyùcànduá, yùhù xicàn tàhvì nù-yá ñà-chicá más ni sàa-nsiá cucuu stnahá ini-nsiá sàhà-nsiá, te iin-ni ni sàa stná-nsiá cundaà inì-nsiá índu chuun nduú ñà-íá viì, te índu chuun có-íá viì.

¹⁰ Nú ducán, dandu mà úhì cudí ini-nsiá quida-nsiá cuisì ñà-chicá ndiaha, te cunihnu ì ini-nsiá dècuèndè quivì naxicocuín-yà, mà cóo gá ni-iin falta xi-nsiá.

¹¹ Te mii-yá, icúmí-yâ chindee-yándô ñà-quida viì-ndà ducán, dandu chicá cuàhà ñà-vaha xi-nda quee, te chicá cuàhà naquimanì stná-ndàyá, te quee ga más tnũñuhu xí-yá.

Cuàhà gá ñà-ndiaha xí Jesucristu nihì-ndà nú ni cúnhicùn viì-ndàyá vida xi-nda ñuhivì yohó

¹² Ñàni, cuní cundaà ini-nsiá sàhà ñà-nduá yáhi yohó, vèchi divi sàhà ñà-nduá sàni cuu xí, ñàyùcànduá chicá más sàni xitià razón ndiaha xí-yá inicutu.

¹³ Dècuèndè nsidaa nèhivì ndoó vehechuún cahnú, xì nsidaa stná soldadu, sàni cundaà ini-nè ñà-divi sàhà Cristu ndiadí.

¹⁴ Te cuàhà gá stná ñani-ndà nchícùn xì Stoho-ndà Señor, sà-sàhà stná-nè valor vichi, vèchi sàni xini-nè (nansa quidé mate) ndiadí vehecàa yohó, te sàhàyùcànduá vichi có-yùhì gá-nè càhàn vate-né palabra xi-ya.

¹⁵ Yùhù ináhì nansa quidá dava nèhivì càhàn sàhà Cristu, cuisì quidá-né ducán ñà-cúmbidia ini-nè, vèchi có-ndô ini-nè xì (ñà-nduá cachí). Doco dava-ne, cóo, quidá víi ndisa-ne, vèchi sàhà ñà-íá vaha voluntad xi-ne, ñàyùcànduá càhàn-nè sàhà Cristu.

¹⁶ Doco nècuàchì có-quidá víi ma, sàhà-ñá interesadu gà-nè, ñàyùcàndùá cáhàn-nè sàhà-yá, có-nduá sàhà ñà-quidá víi ndisa-ne, còó; cuisì cuní-nè ñà-chicá màsà yáha vahi vehecàa yohó.

¹⁷ Doco tucu quidá nèhivì quidá víi ndisa ma, cuú ndisa ini-nè (sàhí) na cáhàn-nè sàhà-yá, vachi ináhá-nè iin-ni nihnú stná inì càhìn razón ndiaha xí-yá nicanicuahàn.

¹⁸ Pues vichi ¿nansa cachi-ndà sàhà nsidaajàn? Pues yùhù cachí ñà-có-quidámà, a dananí uun-ne, te ò cáhàn sahnú-né, ndéni modo nì cui, doco xitià palabra sàhà Cristu, te ñà-jaàn nduá cudí inì sàhà-xí. Te chicá más icúmí cudí gá inì después.

¹⁹ Vachi ináhí, icúmí chuun jaàn quee viá sàhí, vachi xicàn tàhvì-nsiá sàhí, te chindéé stná Espíritu ìi xí Jesucristu.

²⁰ Yùhù nicanicuahàn nacání inì còtó quide iin ñà-cui nducahin sàhà-xí. (Có-cuní quide ducán); iin-ni cuní quide nacua siempre quidé, divi ñà-cáhàn vatí sàhà-yá. Iin-ni cuní quida vii áma quéé más gà tñùñuhu xí Cristu a ducán ni cuí sàhà-yá, te ò cutiacu guè ñuhivì yohó.

²¹ Vachi nú itiácù-ve, dandu puru (ñà-taví más gà tñùñuhu) xí mii-yá cundua. Te ò nú ni sái cui stnáì (sàhájàn), dandu chicá ndiaha quee stnámà.

²² Doco nú ni cóo gué ñuhivì yohó, vihi-ni quida guè más gà obra xi-ya. Ñàyùcàndùá, có-ínáhí índù-ñá chicá nsiha cuu xí,

²³ vachi nduì chuun jaàn ndiaha gá iá, te ùhì nacàxin-ñà. Ian nduá ñà-nú ni cúì cùhìn coi nùù Cristu; te cuàhà gá nihnú stná inì ñà-jaàn, vachi chicá ndiaha queamà cahín.

²⁴ Daaní, ingà nduú ñà-nú ni nánihítàhvì gué ñuhivì. Ñà-jaàn ndisa chicá cunduu ñà-vàha xi mii-nsiá,

²⁵ ináhí. Ñàyùcàndùá, sàni cundaà inì, icúmí coo chii gué ñuhivì yohó sàhà-ñá cutnahí xì-nsiá, te chindee gué mii-nsiá ñà-chicá cunindisá víi-nsiáyà, te cudí gá inì-nsia sàhà-yá.

²⁶ Te cuàhà gá icúmí stná-nsià naquimanì-nsiáyà sàhí na sàà tui ndé ndoó-nsiá, te cutnahá túi xì-nsiá.

²⁷ Mii-nsiá, sà-xínduu-nsia nècuàchì nchícùn xì palabra ndiaha xí Cristu. Ñàyùcàndùá, xiñuhu quida-nsia cuisì ñà-íá vii nacua cachí palabra mà, a ducán ni sái nàcòtì-nsià, te ò màsà sái, có-quidá, ndéni modo nì cui, cuní cunitnùhi sàhà-nsiá iin razón vaha ñà-iin-ni nchícùn ìi-nsiá ichì víi, te iin-ni anima icúmí stná-nsià. Cuní cunitnùhi sàhà-nsiá ñà-iin-ni nihnú vaha inì-nsia, te sàhandee stná inì-nsia xiníndísà víi-nsiá razón ndiaha xí-yá.

²⁸ Te nècuàchì xiní ùhì xì-nsiá, màsà cuàha-nsia dayúhí-nè mii-nsiá ni-iyuhu. Te ñà-có-yúhí-nsià mà, divi cundua seña nùù-né ñà-mii-né icúmí-nè sàà-nè ndañuhu-né. Doco nùù ndohó, còó, seña cundua mà ñà-icúmí càcu anima-ndà nùù Dios.

²⁹ Vachi cunaha-nsiá, màdì cuisì ñà-cunindisa-nda Cristu nduá nì chitnùnì ini-yà quida-nda. Còó, vachi sàhà gracia xi-ya sàni chitnùnì stná ini-yà ñà-ndoho stná-ndà sàhà-yá.

³⁰ Te sàni xini-nsià, divi ducán nì cuu xi yùhù antes; cuàhà gá nì ndohi, te ndè vichi ndohó ìi' (sàhà-yá), ináhá-nsià.

2

Nansa nì nacoó chii Jesucristu gloria xi-ya, doco después nì nanihì-yá más gà tñùñuhu xí-yá nì quida Yua-nda Dios

¹ Ináhá-ndá, sàhà Cristu cuní-ndà quida vii-ndà; te sàhà-ñá màni stná-ndà nùù-yá ducán, ñàyùcàndùá sàhandee ini-ndà nchícùn vii-ndáyá. Te (ináhá stná-ndà) cutnahá Espíritu ìi' xì-ndà ndoo-nda ñuhivì, te cuhí stnahá stná ini-ndà.

2 (Pues sàhà nsidaájàn, cunî cuacundahví nùù nsidaa-nsiá) ñà-nì quidá-nsiá iin ñà-dacúdî ini xí; cunî ñà-iin-ni cunihnu ini nsidaa-nsiá. Cunî ñà-iin-ni cucuu stnahá ini-nsiá sàhà-nsiá, na ian iin-ni anima xì iin-ni sàxínítnùnì icúmí-nsiá.

3 Màsà quidá-nsiá ni-iñàha sàhà cuisì interés; còó. Ni mäsà cútúxí ini ni-iin-nsia ñà-mii-nsiá nduú-nsiá mii-nsiá, te quida-nsia iñàha. Còó. Chicá vaha cunihnu ndahvi ini-ndà; iin iin-nda ni cúníhnú ini-ndà ñà-chicá ndiaá ñanìtnaha-nda nùù mii-nda.

4 Ni màdì gá cuisì chuun xi mii-nda cunsihi ini-ndà quida-nda; còó. Xiñuhu nacani stná ini-ndà sàhà ñà-nduá cunì ñanìtnaha-nda.

5 Ni cúcúmí-ndá iin sàxínítnùnì nahi ñà-icúmí Jesucristu,

6 vachi mate Dios nduú-yá, doco cónì nácánì ini-yà ñà-chicá ndiaá nduá ñà-ndùdává-yá xì Yuandiáhá-yá; còó.

7 Ñàyùcànduá, nì nacooyá (nsidaa tñùñuhu ma), te nì nanduu-ya na iin (tiàa ñuhiví yohó; na iin) ana xinúcuáchí uun, ducán nì nanduu-ya.

8 Te sàhà ñà-jaàn nì nàcùnihnu ndahvi stná ini-yà, nì inini-ya nsidaa ñà-nduá nì ndacu nuù-yá quida-ya, dandu nì xihì-yà, dècuèndè nchìca iin cruz nì sàcùtuu-ya.

9 Ñàyùcànduá, vichi sàni nanihì-yá chicá cuàhà tñùñuhu ndiaha xí-yá nì quida Yua-nda Dios; te chicá ndiaá quìvì-yá nùù quìvì nsidanicuú gá nèhivì.

10 Sàhà ñà-jaàn (icúmí sàà iin quìvì) ndacùcahan vate xi quìvì-yá Jesús, dandu icúmí nsidanicuú nèhivì nàcùtasisi-né (nùù-yá), nsidaa nèhivì ñuhiví yohó, xì nsidaa stná ana ndoó ansivi xi tixi ñuhù,

11 nsidaa-né icúmí-nè nacuni-nè mii-yá, te cachi vate-né ñà-divi Stoho-ndà Señor nduú-yá, dandu chicá más icúmí quee tñùñuhu xì Yuandiaha-yá Dios.

12 Ñàyùcànduá cunî cunini-nsia ñà-nduá cachì xì-nsiá mate xica ié` nùù-nsiá, ñani màní. Na nisa ìe ndé ndoó-nsiá nisa inini vii-nsiá yùhù; doco vichi chicá más cunî cunini-nsia, te quida vii-nsiá lucha ñà-càcu-nsia (nùù chuun có-ìá vii yucán), vachi nú iin-ni ni cúníhnú ndahvi ini-nsiá, te cahvi víi-nsiá mii-yá, dandu vètùnì càcu-nsia.

13 Vachi Dios nduú ana datnúù xì ini-ndà ñà-quida-nda ñà-nduá cunì-yà, te chindéé stná-yàndó ñà-quida ndisa-nda cumplir nsidaámà.

Nicanicuahàn ni cúndóó mánì-ndà

14 Mäsà cúndóó-nsiá daquée cuàchi tnahá-nsiá, te nää stnahá-nsiá sàhà ñà-nduá quidá-nsiá.

15 Còó; iin-ni ni cúndóó mánì-nsiá sàhà-ñá mäsà cuidá cuàchi-nsia, vachi ducán nduá ndiá ìcà quida ana nduú ndisa dèhe Dios; vachi ndoó ìi-ndà ñuhiví yohó, te cuàhà ñanìtnaha-nda, malu-nè, có-nìhnú víi ini-nè. Ñàyùcànduá, mäsà quidá-ndá ni-iin ñà-có-ìá vii, vachi ndohó nduú ana datnúù Dios sàxínítnùnì-xi sàhà-ñá cundehè nèhivì ñuhiví ichì váha.

16 Sàhà ñà-jaàn iin-ni ni cúnchícùn-nsiá palabra cáhàn sàhà vida ndiaha, vachi nú ducán, dandu na quívì (naxicocuñin) Jesucristu, vètùnì cudìi cuàhà inì ñà-màdì uun-ni ni queé nsidaa ñà-nduá nì ndoho güé` na ní quide chuun ìì xí-yá (ndé ndoó-nsiá).

17 Ináhì xiníndísá víi-nsiá vichi, te ñà-jaàn nduú na iin chuun ndiaha quidá-nsiá nùù-yá, na iin ofrenda dócò-nsiá nùù-yá. Te yùhù, nú ni sái cui stnáì (sàhà-yá), dandu nahi inga ofrenda sáhatahvì gá-nsiàyà cunduu stná ñà-jaàn. Te cachì yùhù vètùnì iájàn, vachi cudìi stná inì sàhà-ñá. Ndè stná mii-nsiá, vètùnì cudìi stná inì-nsia sàhà-ñá.

18 Te divi ducán cunî quida-nsia.

Timoteo xì Epafrodito

19 Nú ni cúndéhe ndahví Stoho-ndà Jesús, yàchì icúmì techuín Timoteo sàà-nè ndé ndoó-nsiá, dandu (na nsiaa tu-ne), vètùnì nacunitnùhu stnáì nansa yáha-nsia jaàn, dandu ndòò vaha inì sàhà-nsiá.

20 Te divi Timoteo nduú ana cuàhèn techuín sàà, vachi ndé ié` yohó, còó cá ana nahi mii-né, còó cá inga ana cuú ndisa inì-xi sàhà-nsiá nahi mii-né.

²¹ Vàchi nsidaa gá nèhivì, cuisì chuun xì mii-né nsíhi ini-nè, có-nàndúcú-nê (nansa nducuahà) chuun ìì xí Jesucristu.

²² Doco sà-ìnhá-nsiâ Timoteo, ñà-vàha ndisa-ne; te ináhá stná-nsià cutnâhá-nsí nì xicanuu-nsi cachitnùhu-nsi razón ndiaha xí-yá, nacua chindéé iin dèhe ana nduú yua-né, ducán nì quida Timoteo.

²³ Ñàyùcàndùá, divi-ne cuní techuín sàà ndé ndoó-nsiá nú sàni cundaà inì nansa cuàhàn coo xí.

²⁴ Doco cahví xì Stoho-ndà Señor ñà-yàchì quee stnái libre yohó, te sàà stnái.

²⁵ Doco vichi tuxí inì chicá vaha techuín Epafrodito nasaa-nè. Cunaha-nsiá, na iin ñani mii nduú-né, vachi iin-ni quidá-nsí chuun ìì xí Capitán ndiaha xi-nda. Te divi nduú ana nì techuín stná mii-nsiá ñà-cunihi-ne ñà-ndùá xiñuhu nù quixi.

²⁶ Te vichi cuàhà gá cuní-nè cuni tu-ne mii-nsiá. Te cuhúún gá stná ini-nè, vachi ináhá-nè sàni xinitnùhu-nsia ñà-nì quicuehè-nè.

²⁷ Te ndisa, cuèhè dana nì sandua, cuàhàn-nè cui-nè nì cùí, doco nì indehè ndahví Dios-nè, (cóni xíhì-nè). Te màdì cuisì mii-né nì níhítáhvì ducán; cóò, vachi dècuèndè stná yùhù nì nihítáhvì sàhà-ñá nì nduvàha-ne, te vichi mà cóó gué` tnùnsí ini.

²⁸ Ñàyùcàndùá, chicá cuní naquihin-ne ichì nasaa-nè sàhà-ñá cudii gá stná ini mii-nsiá. Te nú ducán, dandu yùhù stná, chicá mà cóó gué` tnùnsí ini.

²⁹ Daaní, nú sàni nasaa tu-ne, dandu xiñuhu cudii ini-nsiá sàhà-né, te quidañuhu-nsiánè nacua ndiá ìcà-ndà quida-nda xì nsidaa ñani-ndà iin-ni (xinúcuáchí víi) stná nù Stoho-ndà Señor.

³⁰ Vàchi mii-né, sàhà chuun ìì xí Cristu cuàhàn-nè cui-nè nì cùí; ni cóni ndúlócô-nè sàhámà, cuisì-ní cuní-nè quida ndisa-ne cumplir chuun (nì nihì-né) ñà-chindee-né yùhù, vachi mii-nsiá, mà cùí quida-nsia ñà-jaàn (ñà-xica ndoó-nsiá).

3

Ñà-ndiáá ndisa sàhà ñà-ndee vaha-nda nù Dios

¹ Iá inga iñàha cuní cachì xì-nsiá, ñànì: nicanicuahàn xiñuhu cudii ini-ndà ñà-ndò-ndà nù Stoho-ndà Señor. Te nú divi palabra jaàn sàni tiai nù-nsiá antes, có-quidámà, vachi iin palabra chindee ndisa xi-nsiá nduá, te yùhù, có-cuñáñi natiaia.

² Cuidadu cundoo-nsia sàhà nèhivì malu chináhá xì ley chicuéhè, vachi nècuàchì quidá ducán, nihnú sìquini ini-nè na iin quisì. Te caquin stná-nsiá cuidadu sàhà nèhivì (cuní màcùtuu seña xi raza Judea ìcà nèhivì), vachi cutu ñà-dànácuèhè-nè nècuàchìmà queájàn.

³ Vàchi ndohó nduú nèhivì icúmí ndisa xi seña mà, doco ini anima-ndà iá, vachi anima-ndà nduú ndé cahvi-nda Dios. Cuisì Jesucristu cudii ini-ndà sàhà-xí, có-tuxí ini-ndà cui cundiaa inga iñàha quida-nda,

⁴ mate yùhù, vihini cunihnu inì ndiáá stnái, te chindeámà yùhù (nù Dios). Cunaha-nsiá, nú cuisì descendencia xi-nda, te ò obra xi-nda ni cundiaá nù-yá nì cùí, dandu cuisì yùhù chicá cundiaa.

⁵ Vàchi na ní tùinuú ñuhiví, nì sàcùtuu stná seña mà ìqué tìxi ùnà quivì (nacua cachí ley). Iin nècuàchì raza Israel nduú stnái, vachi descendencia xi dèhe Israel nani Benjamín nduí, te cáhàn stnái dàhàn hebreu nahi yuadíhí. Daaní, iin nècuàchì fariseu nduú stnái, te nacua (chívàha fuerte) nècuàchìmà ley sàhana, ducán nìsa quida stnái.

⁶ Yáha ga nìsa xinindisé (ley mà), te ñàyùcàndùá nìsa quida quini güé` xì nèhivì cahvi xi Jesús. Nsidaa ley sàhana ma nìsa chivàhi; cóò falta nì quidé dìquì ley mà.

⁷ Ñàyùcàndùá, vátùni cundiaa nsidaámà (nù Dios) nì cahín. Doco cóò, vachi na ní sàni nì cundaà inì sàhà Cristu, dandu nì sànihì stná inì ñà-ni-yuhu có-ndiáá nsidaa ñà-ndùá nìsa quide mà.

⁸ Te vichi nihnú inì vátùni ndañuhu nsidanicuú fama xi mà ñà-sà-ìnhá Stoho-ndà Jesucristu vichi, te yáha ga ndiaha ñà-jaàn. Doco nsidaa ñà-ndùá nìsa cahvi xí antes,

ndevàha iñàha nduá nùí vichi, còò cá chuan nùí. Ducán nihnú inì sàhà-ñá ni níhìtáhvì cutnahí xì-yà nicanicuahàn,

⁹ te ndahà mii-yá coi. Doco màdì sàhà obra xi mií icúmí ndee vahi nùù-yá, còò, vachi cuisì nùù ley sàhà ndiaá obra mà. Te vichi único ñà-ndiaá ndisa nduú ñà-cunindisa-ndayá, dandísá vátuni ndee vaha-nda nùù Yuamáni-yá, vachi xiníndísá-ndáyâ.

¹⁰ Ñà-jaàn nduá quidé vichi sàhà-ñá cui sàì cunaha váha ndise mii-yá, te cucumi stnái poder ndiaha xí-yá, vachi divi sàhà poder ndiaha ma nì nihì-yá nì natiacu-yà. Daaní, dispuestu iá stnái ndohi nahi mii-yá, te cunihnu stná inì nì xihì stnái na ian nì xihì-yà,

¹¹ áma níhìtáhvì natiacu stnái.

Xiñuhu cuàhandee ndisa ini-ndà áma níhìndèè-ndà cunduu-nda nèhivì vaha ndisa

¹² Tàñáha ga sàì cunduu ndise iin nèhivì nacua cuní Jesucristu cundui. Tàñáha ga sàì cundui iin ana còò ndisa falta xi; còò. Cuisì iin-ni nchícuìn mii-yá, áma ducán nihìndèí cundui iin nèhivì vaha ndisa nacua nihnú ini-yà cundui na ní cana-ya yùhù.

¹³ Ináhí tàñáha ga sàì cundui nacua icúmí cundui después; còò, ñáni. Doco iá ndisa iin ñà-nduá quidé: quidé lucha nandòdó dahuin nsidaa ñà-nduá sàni yàha, te sàhandee cahnú inì, áma níhì (chicá quida viì) quivì vaxi xi-nda.

¹⁴ Na ian quidá tècuachi dadavástnàhâ carrera, ducán quidé, iin-ni nchícuìn ichì cuàhìn, divi ichì mii-yá iá ansivi; dandu quivì nsihi (vida xì), nihnú inì nihì stnái iin ñà-vaha ndiaha nùù-yá, vachi divi sàhájàn nduá nì cana Dios ndohó ñà-cunchicùn-ndà Jesucristu.

¹⁵ Ñàyùcànduá, nsidaa ndohó ana xiníndísâ vaha, xiñuhu cunihnu ini-ndà nacua sàni cachì jaàn. Te nú tucu nacání ini-nsiá sàhà iñàha, dandu icúmí Dios datnúù-yà sàxínítnùnì-nsiá sàhámà.

¹⁶ Doco nsidaa ñà-nduá sàni sàà-ndà nì cundaà vaha ini-ndà, divi ñà-jaàn nduá xiñuhu cunchicùn ndisa-nda.

¹⁷ Ñáni, nacua quidá yùhù, ducán cuní quida stná mii-nsiá. Te sà-ináhá-nsiá nansa quidá-nsí, ñàyùcànduá, cundehè-nsiá ana quidá víi stná nahi nsiùhù, te ducání quida stná mii-nsiá.

¹⁸ Vachi ndoó cuáhà ana có-quidá víi. Cuáhà xichi sàni càhìn xì-nsiá sàhà nècuàchìmà, te vichi tucu tu dansínuu inì mii-nsiá sàhà-né, dècuèndè sacú stnái sàhámà. Vachi quidé cuenta na ian xiní ùhì nècuàchìmà (palabra nacání nansa nì xihì) Cristu nchìca cruz (sàhà-ndà).

¹⁹ Doco fin icúmí-nê nduú ñà-ndañuhu dahuun-ne, vachi còò ndisa Dios nùù-né, cuisì ñà-nduá xího mii-né nduá ndulócô-nè sàhà-xí, te tuxí ini-nè ñà-sàhà chuun sìquimi quidá guá-nèmà icúmí quee tñùñuhu xí-né, vachi cuisì ñuhivì yohó-ní nduá nihnú ini-nè.

²⁰ Doco ndohó, còò. Ansivi nduú ñuu-ndà, te dècuèndè yucán icúmí nuu ana dacácu xi-nda, divi nduú Stoho-ndà Jesucristu. Ñàyùcànduá, vichi ndiatú cuéyàà-ndà sàà quivì naxicocuìn-yà,

²¹ dandu nadama-ya iquicúñú icúmí-ndá vichi, vachi ñà-débil nduá, doco na sàà quivì yucán, icúmíâ dâma stná nahi cuerpu ndiaha mii-yá. Te mà úhì quida-ya ñà-jaàn, vachi cahnú poder xi-ya, vátuni cundee-yá nùù nsidanicuú iñàha, te cusahnú-yá.

4

¹ Pues sàhà nsidaájàn iin-ni nì cúníhnú vaha ini-ndà Stoho-ndà Señor.

Xiñuhu nàcùndoo vaha-nda xi ñanìtnaha-nda

Cunaha-nsiá, màni gá-nsiá nùí, ñáni; cuáhà gá nsinúú inì mii-nsiá, te cudí stná inì sàhà-nsiá. Na iin ñà-vaha-xi xínduu-nsiá nùí, vachi cuú ndisa inì sàhà-nsiá.

² Te yùhù, sacúndáhvì nùù Evodia xì nùù Síntique ñà-nì nàcùndoo vaha-ne, vachi iin-ni Stoho-ndà Señor càhvì-ndà.

³ Daaní, stná mii-ní nècuàchì nduú compañeru mànì jaàn, sacúndáhvî stnàì nùù-ní ñà-chindee-ní nècuàchì ñàhà jaàn, vâchi cuàhà gá nì chindee stná-nè yùhù; iin-ní nì xìcanuu nsidaa-nda nì dàcuítia-ndà razón ndiaha xí-yá, ndohó, xì mii-né, xì stná Clemente, xì dava ga stná compañeruì ndoó jaàn. Nsidaa-nsiá, sàni nacàva stná quivì-nsiá nùù tutu xì vida ndiaha.

Màsà nácánì ini-ndà, vâchi icúmì Jesús naxicocuûn-yà

⁴ Nìcanicuahàn xiñuhu cudîi ini-ndà ñà-ndòò-ndà nùù Stoho-ndà Señor. Tucutu cachî xì-nsiá, nì cudîi cuàhà ini-ndà sàhà-yá.

⁵ Mànì gá nì quida-nda xi nsidanicuú nèhivì, te (nsinuu stná ini-ndà) ñà-sà-ítúú Stoho-ndà Señor naxicocuûn-yà.

⁶ Màsà nácánì ini-ndà sàhà ni-íñàhà; còó. Nsidaa ñà-ndùá yáha-nda, ni cáhàn-ndà xì Dios sàhá. Nì cácan tàhvi-ndà nùù-yá, te naquimanì stná-ndà yá.

⁷ Dandu seguru sàà-ndà cunihnu dadí ndiaha ini-ndà quida-ya, te mà yúhî gà-ndà, ni mà ndúlócò gà stná-ndà, vâchi ndiaha gá chindéé Jesucristu, mate có-sâà-ndà mànìhì ini-ndà nansa quidá-yá, te ndañuhu ñà-yúhî-ndà.

Ndiá icà-ndà nacani ù ini-ndà

⁸ Ultimo ñà-ndùá cachî xì-nsiá nduá yohó: cuidadu ni cúndóó-nsiá sàhà ñà-ndùá nihnú ini-nsiá. Cuisi-ní ñà-ndùú ñà-ndácuìsì ni cúníhnú ini-ndà, ñáni; cuisì-ní ñà-íá tñùñuhu-xí, xì ñà-íá vii, xì ñà-ndùú chuun sahnú ò chuun ndiaha, nsidaájàn vâtùni nacani ini-ndà sàhà-xí. Vâchi nú íá tñùñuhu ví xán, te ò íá stná fama xan ñà-ndùá iin chuun vâha, dandu vâtùni cunihnu vâha ini-ndàñá.

⁹ Ni quidá ndisa-nsia cumplir nsidaa ñà-ndùá nì chinahì mii-nsiá na ní dàcuàhí-nsiá, vâchi nì xini stná-nsiá nansa íá modo xi, te nì inini stná-nsiá ñà-ndùá nì cachì xì-nsiá. Pues nsidaájàn xiñuhu quida ndisa-nsia cumplir, dandu vâtùni cundoo vâha-nsia xì Dios; te cunaha-nsiá, cuàhà gá cuní-yà cundoo manì-ndà.

Nansa nì cachi Pablo nì naquimanì-né nècuàchì ñuu Filipos sàhà ñà-ndùá nì cutahvi-né nùù nècuàchimà

¹⁰ Cuàhà gá cudîi inì sàhà mii-nsiá quidá Stoho-ndà Señor, vâchi sàni nsinuu tu ini-nsiá yùhù. Sà-íá quivì có-chindéé gâ-nsiá yùhù, doco cuisì sàhà-ñá mà cùì, màdiá sàhà ñà-nì nándódó ndisa-nsia yùhù.

¹¹ Te màdi sàhà ñà-íá cuàhà necesidad xi nduá cachî ducán; còó, vâchi sàni cutùhe coi contentu a yáha vâhi, á coó.

¹² Sàni càin yáha ndahví, te sàni càan stnàì nú icúmî cuàhà íñàhà; vâtùni íá nsidaájàn nùí. Vâchi a ducán xihì doco, te ò có-xihì doco, davani queá nùí, có-quidá, a ducán íá necesidad xi, te ò cuàhà íñàhà icúmî,

¹³ ndéni íñàhà nì cui yáhi, vâtùni ié ñà-quidandee ínì sàhá, vâchi divi Cristu nduú ana nácuàhandee ini xì.

¹⁴ Cunaha-nsiá, mate ducán cachî xì-nsiá, doco cuaha-ni íá ñà-ndùá nì quida-nsia nì chindee-nsiá yùhù sàhà necesidad nìsa icumí.

¹⁵ Te ináhá-nsiá nansa nì quida-nsia quivì primeru na ní xìcanui xì razón ndiaha, te nì quei ndé ndoó-nsiá ladu Macedonia jaàn vâxi. Pues còò cá nèhivì xí mii-yá nì náxícónihî iin ñà-vâha nùí, cuisì mii-nsiá nècuàchì ñuu Filipos.

¹⁶ Te màdi cuisì ñà-jaàn, vâchi iin ùì xichi nì techuún gà stná-nsiá iin cooperación xi-nsia na ní sa-ìe ñuu Tesalónica.

¹⁷ Doco cunaha-nsiá, màdi ñà-cùnî nihí cuàhà íñàhà nùù-nsiá nduá, còó. Cuisì cunî coo obra xi-nsia, te ducán nihì-nsiá cuàhà ñà-vâha nùù Dios.

¹⁸ Pues vichi sàni quesaa nsidaa ñà-ndùá nì techuún-nsiá nùí, vâchi sàni quida Epafrodito-ñà entregar nùí; ñàyùcàndùá, ndiaha gá sàni cundiatùì vichi, na ian sàni nducuiqué nduá. Te tñumanì xí-nsiá mà, na iin promesa nì dòcò-nsiá nùù Dios nduú

stná, na iin ñà-tnami nì sàhatahvì-nsiá mii-yá, te cudî gá ini-yà sàhà-ñá, vâchi divi ducán cuní-yà quida-nda.

¹⁹ Ñâyùcàndùá, nsidaa ñà-ndùá xiñuhu nùù mii-nsiá, icúmí-yâ taxi-yañà, vâchi cuàhà gá ñà-cuicà ndiaha icúmí-yâ, te sàhatahvì-yáñà ndohó sàhà ñà-ndùù-ndà nèhivì xí Jesucristu.

²⁰ ¡Ansivéhé cahnú-yá! Nicanicuahàn ni tavá-nda tnùñuhu xí-yá, vâchi Yuandiáhá-ndá nduú-yá. Amén.

Nansa nì casàhú stnahá Pablo xì nsidaa gá nèhivì ñuu Filipos

²¹ Casàhú-nsiá xì nsidaa gá ana nduú nèhivì xí Jesucristu ndoó jaàn. Te nsidaa stná compañeruì yohó, casàhú stná-nè xì mii-nsiá.

²² Stná nèhivì xí-yá quidáchúûn vehe rey cahnú César, cuàhà gá casàhú stná-nè xì-nsiá. Te nsidaa dava ga nèhivì xí-yá ndoó yatni yohó, casàhú stná-nè.

²³ Ni cúcúmí nsidaa-nsiá cuàhà gracia xì Stoho-ndà Jesucristu. Sà-ìá.

Tutu Nì Tiaa San Pablo nù Nèhivì xí Dios Ndoó Ñuu Colosas

¹ Yùhù nduí Pablo, iin ana nì nìhì chuun nù Jesucristu, vèchi ducán nì chitnùnì ini Dios. Te yohó iá stná ñani-ndà Timoteo,

² cutnâhâ-nsí cásâhú-nsí xì nsidaa mii-nsiá nèhivì ì xí Cristu ndoó ñuu Colosas, vèchi mii-nsiá, iin-ni nchìcùn vî stná-nsiá ichì-yá, te nahi iin-ni ñaní xínduu stná nsidaa-nda. Pues, vichi ni cúcúmí cuáhà-nsiá gracia xí Yua-nda Dios. Contentu ni cúndóó-nsiá quida-ya.

Ñà-nduá nì xicàn Pablo nù Dios na ní xicàn tàhvì-ne' sàhà nèhivì xiníndísa-xí-yâ

³ Nsiùhù, cada xicàn tàhvì-nsí nù Yuandiaha Stoho-ndà Jesucristu, naquímànì-nsí mii-yá sàhà-nsiá.

⁴ Vèchi sàni xinitnùhu-nsi ñà-cuàhà guá nihnú vâha ini-nsiá Dèhemanì-yá, xì ñà-cuàhà guá cuú stná inì-nsia sàhà nsidaa nèhivì xí-yá.

⁵⁻⁶ Ansivéhé-yâ, vèchi cuàhà gá tnùndé ini icúmí-ndá ñà-nìhìtâhvì-ndà ñà-ndiaha ì xí-yá iá ansivi. Te divi ñà-jaàn nduá nì xinitnùhu-nsia na ní sàa palabra ndàcuisì xí-yá nù-nsiá, te nì inini-nsia razón vâha xi-ya. Pues divi palabra mà nduá sàni xitià stná inicutu ñuhiví, te ndiaha gá chindéâ nèhivì. Te vichi cuàhà gá stná nèhivì sàni quìhvi ichì mà nacua nì quida mii-nsiá quivì nì xinitnùhu-nsia palabra mà, te nì cundaà inì-nsia nansa iá ndisa gracia xí Dios.

⁷ Pues inii dècuèndè quivì yucán sàni chindeámà mii-nsiá. Te gracia xi-ya mà nduú stná ñà-nduá nì dàcuàhá stná Epafras mii-nsiá. Vèchi iin-ni xinúcuáchí stná nècuàchìmà nù Cristu nahi nsiùhù, te màni cuáhà stná-nè nù-nsí. Vî gá quidá stná-nè nsidaa chuun ì xí-yá yucán ndé ndoó-nsiá.

⁸ Te divi nù mii-né nì xinitnùhu-nsi nansa yâha-nsia xì nansa cuú stná inì-nsia sàhà-nsí quidá Espíritu ì xí Dios.

⁹ Ñâyùcànduá, dècuèndè quivì nì cundaà ini-nsi ñà-jaàn, iin-ni xicàn tàhvì-nsí nù-yá sàhà-nsiá, xicàn tàhvì-nsí ñà-nì sàa-nsiá mànihi ini-nsiá nansa cuní-yâ quida-nda ñuhiví yohó. Te xicàn tàhvì stná-nsi ñà-nì sàa-nsiá cundaà nsihi inì-nsia sàhà ichì-yá, te cucumi-nsiá iin sàxínítnùnì ndiaha.

¹⁰ Ducán dandu nìhìndèè-nsiá cacanu vî-nsiá ñuhiví yohó nacua ndiá ìcà-ndà quida-nda ñà-nduù-ndà nèhivì xí Stoho-ndà Señor. Te ducán cudii stná ini-yâ sàhà-ndà, vèchi modo jaàn nìhì stná-ndà quida-nda nsidanicuú clase obra vâha, te sàa stná-ndà cunaha vâha-ndayá chicá más.

¹¹ Te sàhà-ñá ndiaha gá poder xi-ya, ñâyùcànduá xicàn tàhvì stná-nsi ñà-nì nácuàhandee ini-yâ mii-nsiá xì poder ndiaha ma, dandu vâtùni quidandee cahnú inì-nsia, (mate ni yâha-nsia tnùndoho), doco vâtùni cudii inì-nsia,

¹² te naquimanì stná-nsiá Yua-nda Dios (sàhà gracia xi-ya). Vèchi sàni dama-ya anima-ndà, te vichi vâtùni nìhìtâhvì stná-ndà cuàhà ñà-ndiaha ì xí-yá nacua nìhìtâhvì nsidaa gá nèhivì ì xí-yá, vèchi sàni dàtnúù-yâ sàxínítnùnì-ndà.

¹³ Te vichi sàni tavà-yándô nù ndahà (ñà-malu, vèchi) cuisì ichì ñáa nì sanduamà, te nì dàyâha-yándó ndè ndahà Dèhemanì-yá Jesús.

¹⁴ Sàni quee-nda libre (nù ndahà-sí), vèchi sàhà nì Jesús nì xitià, ñâyùcànduá vâtùni nì xicahnú ini-yâ sàhà cuàchi-nda.

Nansa nì nìhì-ndà nì nàcùndoo vâha-nda xi Dios sàhà-ñá nì xihì Jesucristu sàhà-ndà

15 Có-tùí Yua-nda Dios cundehè-ndàyá, doco mimíí nacua iá-yà, divi ducán iá stná Dèhemanì-yá (Jesús). Te divi Dèhemanì-yá nduú ana chicá ndiaá nùù nsidanicuú ìñàha iá ñuhìví.

16 Vàchi sàhà ndahà Dèhemanì-yá nì quidavàha-ya nsidaa ñà-lá ñuhìví xì ansivi, nsidaa ñà-nduá indéhe-nda, xì nsidaa stná ñà-có-tùí cundehè-ndà, divi sàhà ndahà Jesús nì cuyucun nsidaájàn. Vàchi nì quida vaha-ya ángel dandacú, xì stná ángel chicá xinúcuáchí, xì nsidaa gá stná ana fuerte xicánúú ansivi, nsidaa-némà, sàhà ndahà-yá nì cuyucàn sàhà-ñá nì queé gá más tnùñuhu xí-yá.

17 Tàyóo nì-ìñàha ñuhìví, te sà-lá mii-yá. Te sàhà stná poder xi-ya itnúí tnahá nsidanicuú ìñàha.

18 Te ndohó nècuàchì iin-ni cahvi xi-yá, nahi cuerpu xi-ya nduu-nda, te mii-yá, dandacú-yá nùù-ndà na ian dandacú ònì-ndà nùù-ndà. Nùù mii-yá sàni ñhì-ndà vida xi-nda. Dihna-ya nì natiacu-yà nùù nsidaa nèhivì, ñàyùcànduá nduú-yá ana chicá cusáhnù inicutu ñuhìví.

19 Vàchi sàni chitnùnì ini Yua-nda Dios cuñuhu chitu (vida saín xí-yá) ini anima Dèhemanì-yá.

20 Te cunaha-nsiá, ñà-nì xihì-yà nchìca cruz, te nì xitià nì-yá, sàhà ñà-jaàn nduá vátùni nàcùndoo vaha-nda nùù-yá, vátùni ñhìtáhvi nsidaa nèhivì nàcùndoo viè-né xí-yá, a ducán nduú-né ana ndoó ñuhìví yohó, te ò ana ndoó ansivi.

21 Antes cónisá ñhñú ini-nsiá mii-yá. Ndè nisa xini ùhì stná-nsiàyà sàhà chuun malu nisa quida guá-nsiá, doco vichi sàni nàcùndoo vaha-nsiá xí-yá.

22 Vàchi sàhà ñà-nì nanduu-ya nahi nèhivì ñuhìví, te nì xihì-yà, ñàyùcànduá vátùni nì ñhìtáhvi-ndà nàcùnihnu ì ini-ndà, te cuxio dahuun cuàchi-nda, ndutu nsihá. Ducán dandu vátùni sàà-ndà nùù (Yua-nda Dios) quida-ya.

23 Doco xiñuhu ñà-iin-ni cunihnu vaha ini-ndàyá; màsà nácóó-ndá fe xi-nda. Màsà nándodó-nda ichì-yá, nì màsà cuáha-nda datúcù nèhivì-ndó nùù razón ndiaha, vachi sàhà palabra mà iá tnùndé ini xi-nda. Te (ansivéhé Dios), sàni inini stná-nsiá palabra mà; daaní, dècuèndè stná inicutu ñuhìví sàni xitià stná. Te yùhù stná Pablo, xinúcuáchí stnáì (nùù chuun ma), cachítnùhi palabra mà xì nèhivì.

Ñà-nduú chuun nì ñhì Pablo ñà-cunucuachi-né nùù nsidaa nèhivì iin-ni cahvi xi Jesús

24 Mate cuáhà gá ndohí sàhà-nsiá, doco cudí inì, vachi nú nì ndohí ducán, dandu chicá yàchì cuacatnahá nsidaa ñà-ìcúmì ndoho gá Cristu sàhà nèhivì cahvi xi-yá, vachi nahi cuerpu-yà nduu-nda.

25 Te sàhà ñà-vaha xi mii-nsiá sàni chitnùnì ini-yà cunucuachí nùù nsidaa nèhivì cahvi xi-yá. Te chuun sàni ñhì nduú ñà-cachitnùhu nsihì palabra xi-ya.

26 Palabra nisa ìa dèhé antes nduá cachítnùhi. Caní cuià cónì cùndàà ini xì-ndà sàhámà. Doco vichi sàni datúì-yañà nùù nèhivì xí-yá.

27 Vàchi nì chitnùnì ini-yà cundaà ini-ndà ñà-ndiaha guá iá palabra mà, te cuní stná-yà cunitnùhu nèhivì nsidanicuú ñuu. Pues dohó cachí palabra mà: vátùni coo Cristu meru ini anima-ndà, te sàhámà vichi iá iin tnùndé ini ndiaha xi-nda ñà-sàà-ndà ndè gloria.

28 Ñàyùcànduá, divi mii-yá òsàhà-xì cáhàn-nsì xì nsidaa nèhivì, chináhà-nsînè, te sàha-nsinè ichì váha, áma sàà-nè cunihnu vaha ndisa ini-nè mii-yá nacua ndiá ìcà-né.

29 Pues ñà-jaàn nduú chuun sàhandee inì quide nacua chindéé-yà yùhù, vachi sàha fuerte-yà yùhù poder ndiaha xí-yá quideàmà.

2

1 Yùhù cuní cundaà inì-nsiá ñà-cuàhà guá (xìcàn tàhví nùù Dios) sàhà-nsiá xì sàhà stná nècuàchì ñuu Laodicea, te có-nàndodó stnáì nsidaa nèhivì ndoó jaàn tàñàha ga cuni nùù xí.

2 Xìcàn tàhví ñà-nì nàcuàhandee inì-nsiá, te iin-ni nì cuú stnahá stná inì-nsiá sàhà-nsiá. Te nì sàà stná-nsiá cundaà vaha inì-nsiá sàhà ichì-yá, dandu mà cùndóó gá-nsiá xì duda.

Te ndiaha gá cunduajàn, vèchi después icúmí-nsiâ sàà-nsiâ mànihì ndisá inì-nsia palabra sàhà-yá nisa là dèhé antes, divi palabra sàhà Jesucristu.

³ Vèchi cuisì ichì mii-yá nduú ichì nchichí ndiaha ndisa; cuisì ichì-yá nduú ichì ndé cundaà ndisa ini-ndà.

⁴ Ducán cachí xì-nsiá sàhá màsà chíyúhu ni-iin nèhivì mii-nsiá, te dandahví-nènsiâ.

⁵⁻⁶ Vèchi mate có-ìé` cutnàhî xì-nsiá yucán, doco nihnú inì mii-nsiá, te cudî gá inì na xinítnùhi quidá víi-nsiá, te xiníndisâ fuerte stná-nsiâ Stoho-ndà Jesucristu. Ñàyùcànduá, nacua nì quida-nsia na ní quìhvi-nsia ichì-yá, divi ducán quida-nsia seguir vichi, iin-ni nì cúnchícùn vii-nsiá ichì-yá.

⁷ Iin-ni màsà tucù-nsiâ quida inga palabra, te nsìquívì chicá más ni sàà-nsiâ cunihnu fuerte inì-nsia mii-yá sàhà-ñá màsà nunca naco-nsia ñà-nduá nì chinaha-nsi mii-nsiá. Iin-ni nì quidá-nsiá nsidaámà, te nicanicuahàn ni náquímànì stná-nsiâyà.

Nansa iá vida saa sà-icúmí-ndá ñà-nchícùn-ndà Jesucristu

⁸ Cuidadu ni cúndóo-nsiá màdí datúcù inga nèhivì mii-nsiá. Nchichí cáhàn-nè, doco dandahví uun-ne. Cutu estilu nì naco-nsiâ nèhivì nduá cachí-nè. Dàñùhù xi nèhivì ùún ñuhivì yohó nduá, có-nduá ley xi Cristu.

⁹ Doco mii-yá, meru Dios nduú-yá; mimí nacua iá Yua-nda Dios, ducán iá stná-yà, te iá stná iquécúñú-yà.

¹⁰ Te sàhà ñà-sànì ndèe anima-ndà ini anima mii-yá, ñàyùcànduá chitu stná anima-ndà mii-yá vichi. Te chicá fuerte-yà nùù nsidanicuú ángel, xì nùù stná nsidanicuú ñà-malu.

¹¹ Daaní, sàhà stná ñà-nchícùn-ndâyá, sàni sàcùtuu stná seña xi Dios, (ini anima-ndà); màdí icà-ndà nì sàcùtua. Te ¿índù ñà-cùnì cachì seña mà? Divi ñà-sànì cuxio cuàchi anima-ndà, nsidanicuú cuàchi nisa xicàn guá cuerpu xi-nda quida-nda.

¹² Te na ní cuhii-ndà, seña nì sanduamà na ian cutnaha-nda xi mii-yá nì ndùxin stná-ndà, te nì natiacu stná-ndà nahi mii-yá. Pues ducan quida-nda cuenta nì cuu xi-nda ñà-sànì xinindisa-nda cahnú gá poder icúmí (Yua-nda) Dios, te sàhámà nì dãnátíacú-yà Jesús.

¹³ Te mii-nsiá, sàhà falta xi-nsia, xì sàhà stná ñà-có-nduú-nsiá raza itúú seña xi-ya icà-xí, ñàyùcànduá còò vida ndiaha xí anima-nsiâ nìsá là. Doco tucu iá vichi, sàni natiacu-nsiâ quidá-yá cuenta, (nacua mii-nsiá, te ducán stná nsiùhù). Vèchi ñà-nì dãnátíacú-yà Jesús, divi ndiaá stná sàhà nsidaa ndohó. Te sàhà-ñá ducán nduá, sàni xicahnú stná ini-yà sàhà nsidaa cuàchi-nda.

¹⁴ Nì dandùtù-yà nsidaa ñà-nduá iníhíca-ndá nùù-yá. Nì ndutu dahuun cuenta itnífí-yá sàhà-ndà. Iá ndisa falta xi-nda nisa cachì cuenta ma, doco vichi sàni cuxio nsidaámà nì quida Jesucristu, vèchi nì sàcùtuu-ya nchìca cruz, te sàhà ñà-jaàn nduá nì ndutu cuenta mà.

¹⁵ Te nsidaa ñà-malu, mate yáha ga fuerte-si, te ò dana guá-si, doco nì cundee dahuun-ya nùù-sí. Yáha ga nì nducahan-sì nì quida-ya, vèchi ndiaha gá nì cundee-yá (na ní xihì-yà) nchìca cruz.

Xiñuhu nandòó dahuun-nda nsidaa estilu cáhàn sàhà cuisì modo xi ñuhivì yohó

¹⁶ Sàhà nsidaa ñà-jaàn, màsà ndúlócô-nsiâ nèhivì xítnùhu xi-nsiá sàhà ñà-nduá xixí-nsiá, ò ñà-nduá xihí-nsiá, te ò iin vicò (cuní-nè) chivàha-nsia, mate ni cúnduá iin vicò cahnú, ò vicò natiacú yoo, te ò iin quívì ndoó ndahà-nsiá.

¹⁷ Vèchi nsidaa estilu sàhana ma, seña uun nì sandua, vèchi divi Cristu nduú ana nì cachitnùhamà sàhà-xí.

¹⁸ Ñàyùcànduá, màsà cuáha-nsia (dandahví nèhivì-nsiá, vèchi nú ducán), dandu ndañuhu premiu xi-nsia. Cachí nèhivì dandahví mà ñà-xiñùhù cahíchi ini-ndà mii-nda, te cahvi stná-ndà ángel, cachí-nè, (vèchi) iá ñà-nduá nì dácùnì Dios-nè, cachí-nè. Mii-né nduú-né mii-né cáhàn-nè, doco cuisì ñà-íá ñuhivì yohó-ní nduá nihnú ini-nè.

¹⁹ Ducán quidá-né, doco ñà-có-nchícùn ndisa ga-nè Cristu nduá. Doco cunaha-nsiá, nahi dìni-ndà nduú mii-yá; te ndohó, nahi cuerpu xi-ya nduu-nda, ñàyùcànduá iin-ni cahnú sàni nanduu nsidaa-nda nì quida-ya, nacua ñuhú tnáhâ ndahàsáhâ iquicúñú-nda. Ñàyùcànduá, sàhà mii-yá siempre nácuàhandee ini-ndà, te ndufuértê anima-nda nacua chítñuní ini Yua-nda Dios cuu xi-nda.

²⁰ Vichi, xiñuhu quida-nda cuenta na ian nì cutnaha-nda xi Cristu na ní xihì-yà, te ñàyùcànduá có-xiñùhù gá ñà-cunihnu ini-ndà ni-iin ley cáhàn sàhà cuisì ñà-íá ñuhiví yohó-ní. Mate ndoo-nda ñuhiví, doco có-nduá ñà-chivàha-nda

²¹ Cuàhà ley cachí ñà-màsà tníi-ndá iin ñà-jaàn, ò màsà cúxí-ndá inga iñàha, te ò màsà dúcùn ndahà stná-nda ñà-yúcán.

²² Còó, vàchi ñà-ìcúmí nsihi-ni nduú nsidaájàn, te cuisì nèhivì ñuhiví nduú ana nì quidavàha xi ley jaàn.

²³ Vihini tuxí ini-nda iin palabra nchichí nduá cachí-nèmà, vàchi cachí-nè ñà-fuerte ni cuàhandee ini-nda sàhà religiòn mà, te ni cáhìchì stná ini-nda mii-nda, te ni dándóhò stná-nda mii-nda, cachí-nè. Doco cunaha-nsiá, ni-iyuhu mà cúí chindee ley mà ndohó ñà-cadi-nda nùù (cuàhà ñà-chìcuéhè) xího-nda quida-nda dava xichi.

3

¹ Bueno, sàhà-ñá quidà-nda cuenta cutnàhâ stná-nda xì Cristu na ní natiacu-yà, ñàyùcànduá xiñuhu nanducu-nda nansa quida vii-nda nacua nduú ley xi ansivi, vàchi ndè ansivi yucán iá-yà ladu cuahá Yua-nda Dios.

² Te vichi xiñuhu cunihnu ini-nda chuun xi (mii-yá iá) ndè gloria mà, màdì chuun xi ñuhiví yohó.

³ Vàchi ducán nduá na ian nì xihì stná-nda (na ní xihì mii-yá), doco vichi itiácú-nda sàhà poder xi-ya, te cutnàhâ stná-nda xì-yá ñuhu-nda (ndahà Yua-nda) Dios.

⁴ Daaní, na sàà quivì naxicocuñn-yà, dandu cutnahá stná-nda xì-yá cundoo-nda ndé yáha ga nchií ndiaha.

Nacoo dahuun-nda ñà-nduá nìsa quida-nda antes, te quida-nda ñà-vàha cachí Jesús

⁵ Ñàyùcànduá, xiñuhu dandáñuhú dahuun-nda nsidaa (chuun sìquini cudíi guá ini nèhivì) ñuhiví quida-ne. Màsà náxícócuñn gà-nda càhàn-nda xì ana cóni nándàhà xì-nda, te màsà cúniñnú sìquini ini-nda; màsà cúñuhú ini-nda ñà-coo-nda xi inga nècuàchì ñahà. Ni màsà xího stná-nda cucumi-nda cuàhà iñàha, vàchi na ian cahvi-nda ñà-jaàn queá.

⁶ Cunaha-nsiá, sàhà nsidaa cuàchi jaàn icúmí quixi castigu fuerte xi Dios dìquì nsidaa nèhivì có-ìníní xí-yà.

⁷ Te divi nsidaa cuàchi jaàn nìsa quida stná-nsià antes na nìsa cudíi gá inì-nsià sàhà.

⁸ Doco vichi xiñuhu nacoo stná-nda más gà falta xi-nda. Màsà cuída gà ini-nda; màsà ndúdáná gà-nda. Te màsà cundéhe úhì stnàhá stná-nda. Ni màsà dáquèe cuàchi-nda dìquì ñanìtnaha-nda; te màsà cáhàn quini-nda.

⁹ Ni màsà dándáhvì stnahá gá stná-nda, vàchi sàni nacoo dahuun-nda modo nìsa nihnu ini-nda antes; có-quidá gà-nda nahi antes.

¹⁰ Nahi nèhivì sàà sàni nanduu-nda, te cueé-ni cueé-ni cuàhàn ndusaa stná sàxìnítnuní-nda, dandu sàà-nda cundaà vaha ini-nda, te cunihnu stná ini-nda nacua nihnú ini mii-yá ana nì dándúsáá xí-ndá.

Có-quidá, ndéni nèhivì ní cui ni cundúú-nda, cuisì ndiaá ñà-nchícùn-nda Jesús, màdì raza-nda

¹¹ Nèhivì sàà xínduu-nda, có-quidá a nduu-nda nèhivì raza Grecia, te ò nèhivì raza Judea. Te ni có-quidá stná a itúú marca xi Dios ìcà-nda, ò á coó. Ni có-cuní cachì stná nú nduu-nda nècuàchì inga ñuu, mate nècuàchì siùmí nì sanduu-ne. Còó. Ni có-quidá stná a nduu-nda nèhivì libre, te ò nèhivì quidáchúñn saín nùù iin lamú. Còó, vàchi cuisì ñà-nchícùn-nda Cristu nduú ñà-ndiáá; te divi-ya iá stná ini anima nsidaa-nda.

Calma ni cúndóo-ndá xí ñañitnaha-nda, te nacuahandee stnahá ini-ndà

¹² Sàni nacàxin Dios ndohó. Nèhivì ìì xí-yá sàndùù-ndà vichi, te màni-ndà nùù-yá. Ñàyùcàndùá, xiñuhu cutùha-nda cuhi stnahá ini-ndà. Iin-ni ni cúníhnú máni ini-ndà, te cunihnu ndahvi stná ini-ndà. Màsà cóo dana-nda. Còó; iin-ni ni quidándéé ini-ndà.

¹³ Te nú iá iin ñañitnaha-nda nì quida xi iin falta, dandu ni quidándéé cahnú ini-ndà sàhà-né, te cuicahnú ini-ndà sàhà-né nacua nì xicahnú stná ini Cristu sàhà ndohó.

¹⁴ Daaní, ñà-chicá más xiñuhu nduú ñà-cuu stnahá ini-ndà sàhà-ndà, vachi nú ducani quida-nda, dandu ñà-sàni nacuatnahá nsidaa ñà-vàha xiñuhu quida-nda nduájàn.

¹⁵ Te ni caquín stná-ndà cuidadu ñà-màsà quidá-ndá ni-ñàha dandáñúhú xí ñà-nìhnú dadí ndiaha ini-ndà nacua cuní Dios cunihnu dadí ini-ndà. Vachi cunaha-nsiá, divi sàhà-ñá cundoo ndiaha-nda, te cunduu-nda nahi iin-ni nèhivì, ñàyùcàndùá nì cana-yàndó (ladu xi-ya). Te xiñuhu ñà-naquimanì stná-ndà yá.

¹⁶ Nicanicuahàn ni cóo chitu anima-ndà palabra ìì xí Cristu. Te xiñuhu càhàn stná-ndà iin-nda xi inga-ndà, te chinaha stnahá víi-nda palabra nchichí ndiaha xí-yá sàhà-ñá chicá ni cúnsihi ini-ndà (quida vii-ndà). Te coto stná-ndà nsidaa clase alabanza xi-ya, nacuat-nda, te coto stná-ndà alabanza nacua datnúù Espíritu ìì xí-yá ini-ndà. Te siempre naquimanì-ndà yá ini anima-ndà.

¹⁷ Nsidanicuú ñà-ndùá quidà-ndà, xí ñá-ndùá cachí-ndà, xiñuhu ndacùcahan-nda Stoho-ndà Jesús, te ducán naquimanì stná-ndà Yua-nda Dios.

Nansa quida-nda, te cundoo manì-ndà xì nsidaa nèhivì, a nduú-né tnahá-nda, ò lamú xi-nda, ò peón xi-nda

¹⁸ Mii-nsiá nècuàchì ñàhà, xiñuhu cahvi-nsiá ìì-nsiá nacua ndiá ìcà nèhivì xí Stoho-ndà Señor quida-ne.

¹⁹ Daaní, mii-nsiá nècuàchì tiàa, xiñuhu cuu ini-nsiá sàhà ñàhàdìhì-nsiá. Màsà dándácù ndee-nsiá nùù-né.

²⁰ Te nsiohó nècuàchì cuàtì xì nècuàchì cuàchì, ni cúnínì stná-ndá nsidaa ñà-ndùá cachí yuadíhì-ndá, vachi ducán dandu cudí ini Stoho-ndà Señor sàhà-ndá.

²¹ Daaní, mii-nsiá nècuàchì tiàa xínduu yua, màsà dácuìdà canúú inì-nsia dèhe-nsia sàhà màsà cùhúún inià.

²² Daaní, mii-nsiá nècuàchì ndoó saín nùù iin lamú, ni cúnínì víi-nsiánè. Màdiá cuisì na indéhe-né, dandu quidachuún víi-nsiá sàhà-ñá ndee vaha-nsia nùù-né. Còó. Chicá vaha nsinuu inì-nsia Dios, te iin-ni ni cúníhnú víi inì-nsia quidachuún víi-nsiá.

²³ Nsidanicuú chuun ndacú núù-nsiá, contentu nì quidá-nsiáña. Quida-nsia cuenta na ian Stoho-ndà Señor nduú patrón xi-nsia, te màdiá nèhivì úún.

²⁴ Vachi nùù Stoho-ndà Cristu icúmì-nsiá nìhìtáhvì-nsiá, te cundiatú stná anima-nsiá, vachi divi mii-yá nduú ana xinúcuáchì ndísá-ndá nùù-xí.

²⁵ Doco nèhivì có-quidá víi, icúmì nacuitacùhá-nè nacua quidá-né, te mà quíhín casu Dios ana nduú-né.

4

¹ Daaní, mii-nsiá nècuàchì nduú patrón, quida vii-nsiá xì peón xi-nsia nacua ndiá ìcà-ndà quida-nda, vachi ináhá-ndá dècuèndè gloria iá stná ana dandacu-xi nùù-ndà.

² Daaní, nsidaa-nsiá, iin-ni ni càcàn tàhvì-nsiá nùù Dios. Màsà nácóo-nsiá ñà-jaàn. Te naquimanì stná-nsiá mii-yá.

³ Te quida-nsia favor, sàhà stná nsiùhù ni càcàn tàhvì-nsiá sàhà-ñá ni cúnúná ichì cachitnùhu cuahà-nsí palabra xi Cristu, divi palabra nìsa ìa dèhé sàhana. Pues divi sàhà stná palabra (ndiaha ma ié` yohó) ndiadí vehècàa.

⁴ Ñàyùcàndùá, càcàn tàhvì-nsiá sàhì nùù-yá, áma níhì nansa càhàn vatí palabra mà xì nèhivì nacua ndiá ìqué quide.

⁵ Siempre xiñuhu quida vii-ndà xì nèhivì có-nchìcùn xì ichì-yá. Te nú iá nansa cui quida-nda iin obra, dandu yàchì nì quidà-ndàña.

⁶ Te na cáhàn-ndà xì nèhivì, vivì-ni ni cáhàn-ndà xì-né. Meru palabra xiñuhu ni cúndúa cachi-ndà xì-né. Chicá vaha nacani vaha ini-ndà nansa naxiconihí víi-nda nùu iin iin ana cáhàn xì-ndà.

Ultimo palabra cachí Pablo, cásàhú-nè xì nsidaa nèhivì ñuu Colosas

⁷ Ñani-ndà Tíquico, màni cuáhà-né nùu; cuáhà gá sàni chindee-né yùhù, te iin-ni xinúcuáchí víi stná-nè nùu Stoho-ndà Señor. Pues mii-né icúmí-nè nacani-ne xì-nsiá sàhí, nansa yáhi.

⁸ Ñà-jaàn nduá sàni sàcùnaha-né quida-ne na sàa-nè ndé ndoó-nsiá, cachitnùhu-ne xì-nsiá nansa iá chuun xi-nsi yohó sàhà ñà-ndòo vaha stná inì-nsia.

⁹ Daaní, icúmí cutnahá stná inga ñani-ndà (sàa-nè xì Tíquico), divi compañeru-nsià nani Onésimo. Iin-ni nihnú stná ini-nè ichì Yua-nda Dios, te cuáhà gá cuú stná inì sàhà-né. Pues ndúu nècuàchìmà, icúmí-nè nacani-ne xì-nsiá sàhà nsidaa ñà-íá yohó.

¹⁰ Cunaha-nsiá, iá stná inga compañeruì vehecàa yohó nani Aristarco, te cásàhú stná-nè xì-nsiá. Te (ñuu) yohó iá stná primu xi Bernabé nani Marcos, te cásàhú stná-nè xì-nsiá. Te Marcos mà, sàni cachì xì-nsiá sàhà-né ñà-nì quidáñúhú-nsiânè nú ni sàa-nè ndé ndoó-nsiá.

¹¹ Daaní, yohó iá stná Jesús Justo, te cásàhú stná-nè xì-nsiá. Cunaha-nsiá, còò cá más nècuàchì raza Judea yohó chindéé xí nùu chuun xi ñuhivì ì xì Dios, cuisì nècuàchì yohó, ñàyùcàndúá cuáhà gá cudí inì sàhà-né.

¹² Daaní, cásàhú stná Epafras, divi nècuàchì ñuu-nsià (iá yohó). Nècuàchìmà, xinúcuáchí vîi-né nùu Cristu, te cuáhà gá xícàn tàhvì-né nùu Dios sàhà-nsiá, sacúndáhvî-nè nùu-yá ñà-iin-ni ni cúníhnú vaha inì-nsia ichì-yá, te iin-ni ni quidá stná-nsià ñà-ndúá cuní-yà.

¹³ Yùhù nduí testigu ñà-cuáhà guá nacánì ini-nè sàhà-nsiá xì sàhà stná nècuàchì ñuu Laodicea xì ñuu Hierápolis.

¹⁴ Daaní, cásàhú stná doctor Lucas. Màni cuáhà nècuàchìmà nùu-ndà. Daaní, cásàhú stná Demas.

¹⁵ Te mii-nsiá, casàhú stná-nsià xì ñani-ndà ndoó ñuu Laodicea yucán. Te casàhú stná-nsià xì Ninfas xì nsidaa gá nèhivì natácá vehe-ne.

¹⁶ Nú sàni cahvi-nsia carta yohó, dandu dacúhùn-nsiàñà nùu nèhivì xí Dios ndoó ñuu Laodicea mà sàhà-ñà cahvi stná nècuàchìmàñà. Te carta (nì tiaa stnáì) nùu mii-né, cahvi stná-nsiàñà.

¹⁷ Daaní, cáhàn stná-nsià xì Arquipo cachi-nsià xì-né ñà-màsà nándodó-né quida ndisa-ne chuun ndiaha sàni nihì-né nùu Stoho-ndà Señor.

¹⁸ Yùhù nduí Pablo, te ndahà mii tiaí saludu yohó nùu nsidaa-nsiá. Te sacúndáhvî nùu-nsiá ñà-nì nsínuu inì-nsia ñà-yòhó ié` ndiadí vehecàa.

Ni cúcúmí-nsiâ cuáhà gracia xi-ya. Sà-íá.

Tutu Nuu Nì Tiaa San Pablo nù Nèhivì xí Dios Ndoó Nuu Tesalónica

¹ Yùhù Pablo, xì Silvano, xì stná Timoteo, cásàhù-nsì xì nsidaa mii-nsiá nècuàchì ñuu Tesalónica cahvi stná xì Jesús. Mii-nsiá, sàni natù-nsia nù Yua-nda Dios, xì nù Stoho-ndà Jesucristu. Te vichi ni cuní màni-yá mii-nsiá; contentu ni cundóó-nsiá quida-ya.

²⁻³ Nsiùhù, nicanicuahàn naquímànì-nsí Dios sàhà nsidaa-nsiá, te cáhàn-nsì xì-yá xícàn tàhvi-nsí sàhà-nsiá nsiquívi. Nsinúú ini-nsì nansa nì quida-nsia na ní xinindisá-nsiá mii-yá, te sàhàmà nì quesaha-nsiá quidá ví-nsiá cumplir. Ináhá-nsì cuú stnahá stná ini-nsiá sàhà-nsiá, te chindéé stnahá stná-nsiá. Daaní, ináhá stná-nsì ñà-iin-ni cundéé inì-nsia Stoho-ndà Jesucristu nsiquívi (nahi nsiùhù). Te sàhà-ñá indéhe stná Yua-nda Dios ndohó, ináhá stná-yà nsidaájàn.

⁴ Te cunaha-nsiá, cuú cuáhà ini-yà sàhà-nsiá, ñáni. Te ináhá váha stná-nsì ñà-sàni nacàxin stná-yà mii-nsiá ñà-cunduu-nsia nèhivì xí-yá.

⁵ Vàchi na ní sàà-nsì yucán, te nì cáhàn-nsì xì-nsiá ñà-nduú razón ndiaha xí-yá, màdi palabra uun ni sándúámà. Còó, vachi Espiritu Ì xí-yá nduú ana nì chindee stná xì-nsí, te nì quida stná-yà milagru xi-ya. Te ndee ní cáhàn-nsì xì-nsiá, vachi ináhá-nsí ñà-ndàà nduá. Te ináhá-nsiá nansa nìsa quida-nsi na ní sandoo-nsi yucán, ñà-cuisi sàhà ñà-cunduu bien xi-nsia nìsa quida-nsi nsidanicuú ñàha.

⁶ Daaní, mii-nsiá, nì quesaha stná-nsiá nì tenchicùn-nsiá ñà-nduú ichì nsiùhù, vachi divi ichì Stoho-ndà Señor nduú stnámà. Te divi palabra xi mii-yá nduá nì xinindisá-nsiá daa, ñàyùcànduá nì cudii cuáhà inì-nsia nì quida Espiritu Ì xí-yá, mate cuáhà gá nì dandòhó nèhivì-nsiá.

⁷ Dècuèndè stná nècuàchì xiníndisá ndoó ladu Macedonia xì ladu Acaya, nsidaa-né sàni cundaà stná ini-nè nansa ndiá ìcà-né quida stná-nè ñà-nì xinitnùhu-ne nansa quidá ví mii-nsiá.

⁸ Vàchi sàhà mii-nsiá nì xitià palabra xi Stoho-ndà Señor inicutu ladu yucán. Doco màdi cuisì ladu yucán, còó, vachi cuáhà gá stná ñuu nì xinitnùhu nansa nì quida-nsia na ní xinindisá-nsiá Dios. Cunaha-nsiá, nì còó gá necesidad cáhàn-nsì sàhà-nsiá xì nèhivì (inga ñuu mà), vachi dècuèndè stná mii-né,

⁹ nacání-né xì-nsí nansa nì quida-nsia na ní sàà-nsì ndé ndoó-nsiá, nì naco-nsia ñà-nduú yù yòcò, te nì tenchicùn-nsiá ichì mii-yá, vachi nì cudii ini-nsiá cahvi-nsiá ana nduú ndisa Dios itiácú nicanicuahàn.

¹⁰ Te vichi ndiatú cuéyàà stná-nsiá naxicocuín Dèhemanì-yá Jesús iá ndè gloria, vachi divi Yà-yucán nduú ana nì dånatiácú Yuamànì-yá, te divi stná-yà icúmí-yà dacácu-yàndó ñà-màsà níhì-ndà castigu icúmí quixi.

2

¹ Ináhá-nsiá nansa nì ìa na ní sàà-nsì ndé ndoó-nsiá, màdiá uun-ni nì sanduamà, ñáni.

² Còó, vachi nì chindee Dios nsiùhù, te cóni yúhí-nsì cáhàn ndee-nsí, nì cachitnùhu-nsì xì-nsiá razón ndiaha xí-yá, mate xiní ùhì nèhivì nsiùhù, te mate antes nì ndoho guá-nsì ñuu Filipos na ní quida quini-tè xì-nsí yucán. Sà-ìnáhá-nsiá nsidaájàn.

³ Te palabra nì cachitnùhu-nsi xì-nsiá, palabra ndàcuisì xí mii-yá nduá. Ni-iin ñà-siquini cóni càchí-nsì xì-nsiá, te ni-iyuhu cóni dandàhvi stná-nsì mii-nsiá.

⁴ Còó, vachi Dios nduú ana nì natù-nsi nù-xí ñà-nìhì-nsí chuun dacuítia-nsì razón ndiaha xí-yá. Ñàyùcànduá, divi ñà-jaàn nduá cachitnùhu-nsi xì nèhivì; te cunaha-nsiá, ñà-ndee váha-nsi nù mii-yá nduá nandúcú-nsí, màdiá nù nèhivì, vachi cuisì mii-yá nduú ana indéhe ini anima-ndà.

⁵ Sà-ínahá-nsiâ ñà-ni-iin xichi cóni cáhàn vico uun-nsi xì-nsiá. Te ináhá stná-yà, mà nunca nì dándáhví-nsi mii-nsiá sàhà-ñá tavà-nsí dìhùn nùù-nsiá.

⁶ Ni cóni xícàn-nsi quidañuhu-nsiá nsiùhù, ni mii-nsiá, te ni nèhivì dava ga, mate iá derechu xi-nsi càcàn-nsi ñà-quidañuhu nèhivì nsiùhù, vèchi divi Cristu nì sàha xi-nsí chuun quidá-nsí.

⁷ Doco còó, cóni xícàn-nsi ñà-jaàn. Vivíi-ni nì cáhàn-nsi xì-nsiá na ní sandoo-nsi yucán. Na ian quidá iin dihi ndiaá xì mée xi, ducán nìsa quida stná-nsi.

⁸ Nì cachitnùhu-nsi razón ndiaha xí-yá, doco màdì cuisì ñà-jaàn, vèchi ñà-cuàhà guá cuú ini-nsi sàhà-nsiá, ñàyùcànduá dispuestu nì sandoo stná-nsi cui-nsi sàhà-nsiá, ñà-màni guá-nsià nùù-nsí.

⁹ Te ádi nsinúú stná ini-nsià nansa nìsa quida-nsi, ñáni, ndui te ñuú nìsa quidachuún-nsí, dècuèndè nìsa xàví sàstnùhù stná-nsi, vèchi có-cùnì-nsi quida-nsia cuàhà gastu sàhà-nsí, ñàyùcànduá màdì cuisì-ní razón ndiaha xí Dios nì cáhàn-nsi xì-nsiá, còó; nìsa quidachuún stná-nsi.

¹⁰ Mii-nsiá, sàni xininùù-nsiá nansa nìsa quida-nsi na ní sandoo-nsi mahì-nsiá na ní quesaha-nsiá xiníndísâ-nsiá; stná Dios, ináhá-yâ nansa nìsa quida-nsi, modo cudí ini mii-yá nìsa quida-nsi, iin modo vaha; còó ni-iin falta nì quidá-nsí.

¹¹ Ináhá-nsiâ nansa nì cáhàn-nsi xì-nsiá ñà-xiñhù quida vii-nsiá, te nì nacuahandee stná ini-nsi iin iin-nsia na ian cáhàn iin yua xi dèhe-ne.

¹² Nì chinaha-nsí mii-nsiá ñà-cacanu vii-nsiá ñuhiví, vèchi ducán ndiá ìcà-ndà quida-nda ñà-sàni cana-yàndó sàà-ndà ñuhiví ìlì xí-yá ndé ndiaha guá iá.

¹³ Ñàyùcànduá nicanicuahàn naquímànì-nsí Dios, vèchi na ní cáhàn-nsi xì-nsiá palabra xi-ya, nì xinindísâ-nsiá, te nì cundaà ini-nsia palabra ndisa xi mii-yá nduá, màdì palabra xi nèhivì ùún. Te divi ñà-ndàà nduá, palabra xi mii-yá nduá, te ndiaha gá quidáchuân ini anima nsidaa ndohó nècuàchì xiníndísâ-xí-yâ.

¹⁴ Daaní, después, ducán nì cuu stná xì-nsiá nacua nì cuu xi nèhivì xí Jesucristu ndoó ladu Judea, vèchi cuàhà nèhivì xí-yá ladu yucán, nì ndoho stná-nè nì caquida tè-raza Judea. Te divi ducán nì ndoho stná mii-nsiá nì caquida nècuàchì ñuu-nsià, ñáni.

¹⁵ (Doco ndahví) nècuàchì raza Judea mà, vèchi nì casahnì-né Stoho-ndà Jesús, te nì casahnì stná-nè nècuàchì raza-nè nì cáhàn xì-né razón ndiaha xí-yá. Daaní, dècuèndè nsiùhù nì taxi stná-nè. De por sí, mà túha-ne quida vii-né nùù Dios; te xiní ùhì stná-nè nsidaa nèhivì.

¹⁶ Vèchi sadí-nè nùù-nsí na cunì-nsi cáhàn-nsi xì nèhivì inga raza sàhà-ñá nihì-né càcu anima-nè. Doco nècuàchì razí mà, có-sàha-ne quida-nsi ducán; ñàyùcànduá, cuàhà gá sàni yàha-ne nì xida cuàchi-ne. Doco vichi sàni sàà hora nihì-né castigu xi-ne ñà-ndoho-ne.

Nansa nì cachi Pablo ñà-cuú cuàhà ini-nè sàhà nècuàchì xiníndísâ ndoó ñuu Tesalónica

¹⁷ Nsiùhù, yáha ga cunì-nsi sàà-nsi nàcòtò-nsi mii-nsiá, ñáni. Ndahví-nsi, vèchi xica ndoó-nsiá, doco siempre nsinúú ini-nsi mii-nsiá, mate có-xìní stnaha-nda iin ùi quivì.

¹⁸ Ñàyùcànduá, nì quida-nsi lucha sàà-nsi yucán. Yùhù, Pablo, itnii xichi nì cunì sàì, doco nì sadi ñà-malu nùù-nsí.

¹⁹ (Doco màni cuàhà-nsiá nùù-nsí), vèchi ¿ana disáhà-xí cundua icúmí coo consuelu xi-nsi, te cudì cuàhà ini-nsí? Pues, divi mii-nsiá nduú ana disáhà-xí, vèchi sàhà mii-nsiá icúmí-nsí nihì-nsí iin ñà-vàha nùù Stoho-ndà Jesús, te cudì gá ini-nsi quivì naxicocuín-yà, te màcuíta-nda nùù-yá.

²⁰ Vèchi ndisa, sàhà mii-nsiá ndiaha sàstnùhù nihnú ini-nsi, te yáha ga cudí ini-nsi.

3

¹⁻² Daaní, después nì cachi-nsi chicá vaha sàà Timoteo ndé ndoó-nsiá, vèchi có-cùndéé gá ini-nsi ñà-nàcánì ini-nsi nansa nihí-nsiá cuàhàn, te cahan-nsí vátùni ndòò mii-nsí ñuu Atenas. Te Timoteo, ñani ndisa-nda nduú stná-nè, te xinícuàchì stná-nè nùù

Dios, cutnâhâ-né xî-nsí quidá stná-nè chuun ìì (dacuítia-ndà) razón ndiaha xí Cristu. Ñâyücândüá, (chicá vâha techuún-nsí mii-né sâà-nè cahan-nsí), dandu chindee-né mii-nsiá, nacuahandee ini-nènsiâ ñà-chicá fuerte ni cúníndísâ vâha-nsia,

³ te màdí ndulocó-nsiâ na quidá quini nèhivì xî-nsiá; vâchi seguru icúmí-ndá yâha-nda ducán, ináhâ-nsiâ.

⁴ Vâchi na ndoó vá-nsí ndé ndoó-nsiá, nì cachi-nsì xî-nsiá ñà-icúmí-ndá yâha-nda vida quida nèhivì. Te divi ducán nì cuu xi-nsiá sàni xini-nsiâ.

⁵ Ñâyücândüá, yùhù, ñà-nàcání guâ inì sâhâ-nsiá, nì techuín Timoteo nùhù-nè (nàcòtò-nè mii-nsiá, dandu) nacachitnùhu-ne xí nansa yâha-nsia, a íin-ní nihnú vâha inì-nsia mii-yá, á coó, vâchi yúhî-nsì dacà ñà-malu dìni-nsiá, te uun-ni ndòo chuun nì quida-nsi xî-nsiá.

⁶ Doco còo, vichi sàni nsiaa tu-ne ñà-nì nùhù-nè nì nàcòtò-nènsiâ, te iin razón vâha nduá sàni nacachitnùhu-ne xî-nsí, vâchi iin-ní nihnú vâha ndisa ini-nsiâyâ, te cuú stnahá inì-nsia sâhâ-nsiá. Te nsinúú stná inì-nsia nsiùhù, cachí-nè, vâchi nacua yâha ga cuní nsiùhù sâà-nsì nàcòtò-nsì mii-nsiá, divi ducán ndohó stná mii-nsiá sâhâ nsiùhù.

⁷ Ñâyücândüá, mate ndohó-nsí yohó, te yâha-nsi cuahà vida, doco ndiaha gá sàni ndòo vâha ini-nsì, ñánì, vâchi sàni cundaà ini-nsì iin-ní nihnú vâha ini-nsiâ mii-yá.

⁸ Cunaha-nsiá, dohó nduámà na ian natiácú-nsì (na nacúnitnùhu-nsi) iin-ní nchícùn vii-nsiá ichì Stoho-ndà Señor.

⁹ Te vichi ña cuahà guá naquímánì-nsí Dios sâhâ-nsiá! Te ináhâ-yâ yâha ga cudî ini-nsì sâhâ-nsiá.

¹⁰ Nduì te ñuú xícàn tàhvì cuahâ-nsí nùù-yá áma níhítâhvì-nsí nàcòtò gà-nsì mii-nsiá, te ducán cui chindee gá-nsì mii-nsiá ñà-cunindisá vâha ga-nsiâ.

¹¹ Te vichi, xícàn tàhvì stná-nsì nùù Yua-nda Dios xî nùù Stoho-ndà Jesucristu ñà-ní dâcûndéhe-yâ nsiùhù ichì sâà tu-nsi visita ndé ndoó-nsiá.

¹² Daaní, xícàn tàhvì stná-nsì nùù-yá ñà-chicá ni cúcúú stnahá ini-nsiâ sâhâ-nsiá xî sâhâ nsidaa gá stná nèhivì nacua cuú stná ini nsiùhù sâhâ mii-nsiá.

¹³ Vâchi nú ducán, dandu ñà-sàni nàcùnihu ìì ndisa inì-nsia cundua, te mà cóo gá falta xi-nsia nùù Yua-nda Dios na quívì naxicocuîin Stoho-ndà Jesucristu, te cutnahâ-yá xî nsidaa nèhivì xí-yá.

4

Màsà nâcání ini-ndà quida-nda iin falta xî iin nècuàchì ñahà

¹ Cuisì mindaa iñâha cachi gà-nsì xî-nsiá, ñánì. Sàni dàcuahâ-nsí mii-nsiá nansa ndiá icâ-nsiá cundoo vii-nsiá ñuhiví, dandu cudî ini Dios sâhâ-nsiá. Pues vichi chinaha-nsí mii-nsiá, te sacúndâhvì-nsì nùù-nsiâ ñà-chicá más quida-nsia ñà-jaàn cumplir.

² Vâchi ináhâ vâha-nsia ñà-ndüá nì dândâcú-nsí nùù-nsiâ na ní sandoo-nsi xî-nsiá, te nì càhàn-nsì xî-nsiâ cuenta xi Stoho-ndà Jesús.

³ Pues divi ñà-yòhó nduá cuní-yâ quida-nda sâhâ-ñâ cunduu-nda nèhivì ìì xí-yá: divi ñà-màsà càhàn-ndà xî ni-iin nèhivì còni nândâhâ xî-ndà.

⁴ Cuní-yâ cundaà ini-ndà nansa càcàn vii-ndà iin ana cunduu ñahàdìhí-ndà, dandu iin-ni coo sahnu-nda xi-né. Te nsidaa nècuàchì ñâha dava ga, ni coó stná tnùñuhu xi-nda nùù-né.

⁵ Màsà xího-nda coo-nda xi inga nècuàchì ñahà. Màsà quidá ndevâha-nda xi mii-nda nansa ni nì cui, vâchi ñà-jaàn nduá quidá nèhivì còo Dios nùù-xí.

⁶ Te màsà quidá-ndá iin falta dandahví-ndà ñanìtnaha-nda, te quìhvi tnaha-nda xi nècuàchì vehe-ne, vâchi icúmí Stoho-ndà Señor nachitacùhá-yâ sâhâ nsidaámâ. Ñà-jaàn sàni cachi-nsì xî-nsiâ antes na ní chinaha váha-nsi mii-nsiá sâhâjàn.

⁷ Ñâyücândüá, nacani ini-nsiâ, ¿índù chuun sàni cana Yua-nda Dios ndohó? Pues divi sâhâ-ñâ coo ndoo anima-ndà, màdì sâhâ-ñâ quida ndevâha-nda xî iin nècuàchì ñahà.

⁸ Ñàyùcàndùá, nú ndoó ana cahíchì ini xì palabra yohó, pues màdì nêhivì ùún nduú ana cahíchì ini-nè; còó, mii Dios cahíchì ini-nè, divi ana sàni sàhatahvì xì-ndà Espíritu Ì-xí.

Cuàhà gá cuú stnahá ini nècuàchì ñuu Tesalónica sàhà-né

⁹ Vichi (sàni cundaà inì), divi Dios nduú ana nì chindee xi-nsiá ñà-cuú stnahá guá inì-nsia sàhà-nsiá. Ñàyùcàndùá, còò necesidad tiai ni-iin palabra nùù-nsiá sàhàjàn.

¹⁰ Vàchi ináhí cuú ini-nsiá sàhà nsidaa nêhivì xí Yua-nda Dios ndoó inicutu ladu xi-nsia Macedonia. Doco cuní-nsiá chicá más quida-nsia ducán.

¹¹ Nacua sàà-nsiá, cundoo manì-nsiá xì nêhivì. Cuisi chuun xi mii-nsiá cunsìhi ini-nsiá, te quidachuún cuéyàà-nsiá oficiu xi-nsia, vàchi divi ducán nì dandàcú-nsí nùù-nsiá daa.

¹² Vàchi nú ducán ni quida-nda, dandu stná nècuàchì có-xiníndísá, quidañuhu stná-nèndó, te mà cóó stná ni-iñàha quidamanì nùù-ndà.

Nansa icúmí coo na naxicocuïn Jesús

¹³ Ñàni, cuní cundaà inì-nsia sàhà compañeru-ndà sàni caxihì, nansa cuàhàn cuu xi-né, dandu mà cùhúún gá inì-nsia sàhà-né. Vàchi nècuàchì có-xiníndísá, yáha ga cuhúún ini-nè sàhà nsì xi-ne, vàchi còò gá tnùndé ini icúmí-nê.

¹⁴ Doco ndohó, xiníndísá-ndá ñà-ndàà nduá nì xihì Jesús, te nì natiacu-yà, ñàyùcàndùá, divi ducán icúmí cuu stná xì ndohó nú xiníndísá-ndáyâ na xihì-ndà, icúmí-ndá natiacu stná-ndà quida (Yua-nda) Dios.

¹⁵ Pues vichi cachítnùhu-nsi xì-nsiá iin razón nì quixi nùù Stoho-ndà Señor. Cuna-nsiá, mate itiacú ì-ndà na sàà quivì naxicocuïn-yà, doco mà códonuu-nda nùù nècuàchì sàni ndàhvà ñuhivì. Còó,

¹⁶ vàchi icúmí-yâ nuu-ya ansivi quixi-ya, dandu tiacu-ndà ndáhì-yà dandacú-yá. Te tiacu stná-ndà tàchì iin aňgel cusáhnû, te ndee sivi stná corneta xi Dios. Dandu nêhivì xí Cristu xínduu nsii, icúmí-nê natiacu-nè primeru, (canacoyo-ne yavi xi-ne).

¹⁷ Daaní, nsidaa ndohó nêhivì (xí-yá) ndòo cutiacu daa, ndiachi stná-ndà nana-nda mahì vico nacuatnaha-nda xi nsidaa nècuàchì nsii ma nànchìcùn ìchì-ndà mii-yá mahì ansivi. Ducán cundoo-nda cutnaha-nda xi-yá nicanicuahàn.

¹⁸ Jaàn nì inini-nsia iin razón xi-ya. Ñàyùcàndùá, dansínúú tnahá ini-nsiá palabra yohó sàhà-ñá màsà cùhúún gá inì-nsia (sàhà nècuàchì nì xihì).

5

¹ Doco còò necesidad tiaa guè nùù-nsiá sàhà ñà-ndùá icúmí coo quivì vàxi xi-nda, ñàni, ² vàchi sà-ínáhá vâha-nsia nansa sàà quivì xi Stoho-ndà Señor, ñà-cundua iin tiempu có-nìhnú ini-ndà, na ian quixi tècuìhnà (vehe-nda) ñuú, te có-nìhnú ini-ndà.

³ Vàchi meru quivì cachí nêhivì dadí uun iá, còò ni-iñàha cuu xi-né, dandu nanáá quixi tnùndoho cahnu-ma, na ian quesáhá dolor xi nècuàchì ñahà cuàhàn tùinuù mèè-xi, dandu (nêhivì có-ndòó tùha), mà cácu-ne.

⁴ Doco ndohó, màdì ichì ñáa nduá nchìcùn-ndà, ñàni; ñàyùcàndùá mà cundúú quivì mà iin tiempu có-nìhnú ini-ndà.

⁵ Vàchi sàni dàtnúù Dios sàxìnítñuní-ndà, te ducán nduá na ian xicánúú-ndá ndui, màdiá ñuú; còó, vàchi có-ndùù-ndà nêhivì xí ichì ñáa.

⁶ Ñàyùcàndùá, màsà quídá-ndá na quídá nêhivì xicá ichì malu mà, vàchi mii-né, (có-ndùlócô-nè), na ian quídì-nè nduá. Doco ndohó, ni cundóó tùha-nda, te nacani sahnú ini-ndà.

⁷ Vàchi nècuàchì quídì, ñuú xíquidì-nè, te necuachi xini, ñuú xihí-né (cuàhà xichi).

⁸ Doco ndohó, nècuàchì nchìcùn ichì datnúù-yà sàxìnítñuní-xi nduu-nda, te na ian ndui (nduú ñuú) nùù-ndà. Ñàyùcàndùá, xiñuhu nacani sahnú ini-ndà, te cunindisá vâha-nda mii-yá. Te ni cuú stnahá stná ini-ndà sàhà-ndà, (dandu chindeámà anima-nda, na ian quídá soldadu), ndixí-te dùhnù cáa (chindee xi anima-te). Daaní, ñuhú stná-te iin mbelú

càa (chindee xi dìni-té). Pues ducání stná ndohó, íá iin tnündé ini xi-nda (chindéé xí sàxìnítnùní-ndà), divi nduú tnündé ini ñà-càcu-nda nùu Dios.

⁹ Vàchi màdì ñà-nìhì-ndà castigu nduá sàni chitnùní ini-yà cuu xi-nda. Còó, divi ñà-càcu-nda quida Stoho-ndà Jesucristu nduá sàni chitnùní ini-yà.

¹⁰ Vàchi mii-yá, nì sàha-ya nì xihì-yà cuenta xi-nda sàhà-ñá nìhì-ndà cundoo-nda nùu-yá nicanicuahàn, a ducán nduu-nda nècuàchì itiácú, te ò nècuàchì sàni xihì, doco nsidaa-nda icúmí-ndá cundoo-nda nùu-yá.

¹¹ Ñàyùcàndùá, càhàn-nsià nacuahandee stnahá ini-nsia nacua quidá-nsiá vichi.

Ultimo ñà-nduú ley xi Jesús nì cachi Pablo xì nècuàchì ñuu Tesalónica nùu tutu yohó

¹² Sacúndáhvi-nsi nùu-nsiá ñà-quidañuhu-nsiá nèhivì quidáchúùn chuun ìì xí mii-yá ndé ndoó-nsiá, ñánì, vachi nècuàchì xí-idònnùu nduú-né, te sàha-ne mii-nsiá ichì váha.

¹³ Sàhà chuun ndiaha quidá-né xiñuhu coo cuàhà tnùñuhu xí-nsiá nùu-né, te cuu stná ini-nsiá sàhà-né. Te nsidaa-nsiá, ni cúndóó mánì stná-nsiá.

¹⁴ Vichi chináhi mii-nsiá iin ùì gà iñàha icúmí-nsiá quida-nsia, ñánì: xiñuhu cuàha-nsia nècuàchì xicánúú xixín iin conseju vii: te nècuàchì cuhúún inì-xi, nacuahandee ini-nsiànè. Daaní, nècuàchì tãñáha ga cunindisá ví, chindee-nsiànè. Cuàhà gá calma cundoo-nsia xì nsidanicuú nèhivì.

¹⁵ Te nú quidá quínì-né xì-ndà, màsà náchítacùhá-ndà ñà-nduá nì quida-ne. Còó, cuisì-nì ni cúnihnú ini-ndà quida-nda ñà-nduú iin ñà-vaha xi ñanìtnaha-nda, a ducán nduú-né iin nècuàchì xiníndísá stná, te ò nècuàchì còó.

¹⁶⁻¹⁷ Nicanicuahàn xiñuhu cundoo-nda contentu, te nsidanicuú tiempu ni cácan tàhvi-ndà nùu Dios,

¹⁸ te naquimanì stná-ndàyá sàhà nsidaa ñà-nduá yáha-nda, vachi ñà-jaàn nduá cuní Dios quida-nda nú nduu-nda ana nchícùn xì Jesucristu.

¹⁹ Màsà cádí-ndà nùu ñà-nduá cuní Espíritu ìì quida-ya (ini anima-ndà),

²⁰ te màsà cáhìchì stná ini-ndà ñà-nduá cachì nèhivì na dacáhàn Dios-nè iin razón xi-ya.

²¹ Nsidanicuú chuun, xiñuhu ndàcàtnùhù váha-nda, a chúún vaha nduá, á coó; te nú (sàni cundaà ini-ndà) chuun vii nduá, dandu divi ñà-jaàn ni cunchícùn ndisa-nda.

²² Doco nsidanicuú chuun malu, còó; nacoo dahuun-ndañá.

²³ Ndiaha gá ndoo-nda ñuhivì quidá Yua-nda Dios. Te vichi xicàn tàhvi-nsí nùu-yá ñà-sàhà poder xi-ya ni sàà-nsiá cunihnu ìì ndisa ini-nsiá. Cahnú gá Dios màsà cóó ni-iin falta nùu-nsiá ndè cachi sàà quivì naxicocuñ Stoho-ndà Jesucristu. Màsà quidá-nsiá ni-iin falta ini anima-nsiá, ni ini stná sàxìnítnùní-nsiá, nì sàhà stná ndahàsàhà-nsiá; iin-ni ni coó ví nsidaájàn.

²⁴ Divi mii-yá sàni cana-yàndó, ñàyùcàndùá vátùnì cucumi-nda seguru ñà-quida ndisa-ya cumplir (nsidaa ñà-nduá sàni cachi-yà xì-ndà).

²⁵ Ñánì, cuàhà gá xíquèn càcàn tàhvi-nsiá nùu Dios sàhà-nsí.

²⁶ Nacasàhú-nsiá xì nsidaa hermanu. Cuàha-nsianè iin saludu vaha.

²⁷ Yuhù, nùu Stoho-ndà Señor chináhi mii-nsiá ñà-nì càhvi-nsiá carta yohó cunini nsidaa nèhivì iin-ni cahvi stná xì-yá.

²⁸ Ni cúcúmì cuàhà-nsiá gracia xì Stoho-ndà Jesucristu. Sà-íá.

Tutu Ùì Nì Tiaa Saṅ Pablo nùù Nèhivì xí Dios Ndoó Ñuu Tesalónica

1-2 Yùhù Pablo, xì Silvano, xì stná Timoteo, cásàhú-nsì xì nsidaa mii-nsiá nècuàchì ñuu Tesalónica nchícùn xì Yua-nda Dios xì Jesucristu, vèchi cahvi-nsiáyà. Pues vichi nì cunímànì-yá mii-nsiá; contenu nì cúndóó-nsiá quida-ya.

3 Nsiùhù, nicanicuahàn icúmí-nsì naquimanì-nsì mii-yá sàhà-nsiá, ñánì. Te ñà-jaàn ndiá ìcà-nsì quida-nsi, vèchi nsìquívì chicá más xiníndísà víi-nsiá, te chicá cuú stnahá stná ini nsidaa-nsiá sàhà-nsiá.

4 Ñàyùcàndùá, na xicánúú-nsì sàhàn-nsì visita ndé natácá nèhivì xí Dios, cudî ini-nsì nacánì-nsì xì-né nansa quidá-nsiá, iin-ni xiníndísà vaha-nsia, te quidándéé stná inì-nsia, mate quidá quínì nèhivì xì-nsiá, te yáha-nsia tnùndoho quidá-né.

Nèhivì dandoho-xi-nda vichi, icúmí-nê ndoho stná-nè quívì naxicocuïn Jesús

5 Cunaha-nsiá, sàhà-ñá quidándéé víi inì-nsia na ndohó-nsiá, seña nduájàn ñà-después icúmí Dios nsidandaà-yà sàhà-nsiá iin modo ndiaha, dandu natùì-nsia nùù-yá, te yàha-nsia ñuhivì ìì xí-yá. Vèchi (ináhî) divi sàhà-ñá nchícùn-nsiá ñuhivì ìì mà, ñàyùcàndùá dandohó nèhivì-nsiá vichi.

6 Sàhámà cuisì ñà-ndiá ìcà coo cundua na dandohó-yá nèhivì dandoho-xi-nsiá.

7 Mate quini quidá-né xì-nsiá vichi, doco icúmí-yâ cuàhatahvì-yánsiá ñà-vàha ndiá ìcà-nsiá ñhì-nsiá, vèchi icúmí-nsiá cutnahá-nsiá xì nsiùhù nàcùndoo ndiaha-nda paz quívì naxicocuïn Stoho-ndà Jesús. Icúmí-ndá cuni-ndà mii-yá na nuu-ya ansivi, cutnahá-yá xì ángel fuerte xi-ya.

8 Mahì ñuhu xíxìn icúmí-yâ nuu-ya, dandu ñhì nèhivì có-nàcúnì xì Dios castigu xiñuhu ñhì-né, vèchi có-ndùlócô-nè sàhà razón ndiaha xí Stoho-ndà Jesucristu.

9 Ñàyùcàndùá, icúmí-nê danáà-né; nicanicuahàn icúmí-nê ndoho-ne; vèchi icúmí-nê cuxica dahuun-ne nùù-yá; mà cúndóó-né cuni-nè cusahnú ndiaha-yá.

10 Doco ndohó nèhivì ìì xiníndísà-xí-yâ, cuàhà gá icúmí-ndá tavà-ndà tnùñuhu xí-yá, te naquimanì stná-ndà yá quívì naxicocuïn-yà. Pues ducán icúmí-ndá quida-nda, nsiùhù te mii-nsiá, vèchi stná mii-nsiá nì xiníndísà-nsiá na ní sàà-nsì nì cachitnùhu-nsì xì-nsiá sàhà-yá.

11 Ñàyùcàndùá, nicanicuahàn xícàn tàhvì-nsì nùù-yá sàhà-ñá vètùnì ndee vaha-nsia nùù-yá, vèchi sàni cana-yàndó (sàà-ndà nùù-yá). Te xícàn tàhvì stná-nsì ñà-chindee-yá mii-nsiá xì poder xi-ya, te ducán ñhì-nsiá quida ndisa-nsia nsidaa ñà-vàha ñhì-nsiá inì-nsia quida-nsia xì nsidaa stná obra cunì-nsiá quida-nsia ñà-xiníndísà-nsiáyà.

12 Vèchi nú nì quidá-nsiá ducán, dandu chicá más quee tnùñuhu xí Stoho-ndà Jesucristu. Daaní, stná mii-nsiá, sàhà gracia xi Yua-nda Dios xì Stoho-ndà Jesucristu, icúmí-nsiá quee stná tnùñuhu xí-nsiá.

2

Nansa icúmí ndecunu contra xi Cristu, te dandahví-te nèhivì có-nchícùn xì ley xi-ya

1 Vichi cuàhìn càhìn xì-nsiá sàhà quívì naxicocuïn Stoho-ndà Jesús, te nacuatnaha-nda nùù-yá, ñánì. Pues sacúndáhvì-nsì nùù-nsiá

2 ñà-màsà yúhî-nsiá nú cachí nèhivì ñà-vichi sàni sàà quívì xí Stoho-ndà Señor. Còó, màsà nácánì ini-nsiá, (vèchi có-ndùá ducán). Mate cachí-nè divi Espíritu ìì xí Dios nì cachitnùhu xi-né, te ò ducán cachí stná-nè na cáhàn-nè sàhù, te ò cachí-nè iá carta nùù-nsì cachí ducán, (doco còó, màsà cúníndísà-nsiánè).

³ Màsà cuáha-nsia dandahví ni-iin nêhivì mii-nsiá ni-iyuhu; vâchi mà cúí quixi quivì mà dècuèndè cachi sàà iin tiempu quesaha càhàn cuàhà nêhivì dìquì Dios, dandu ndecunu iin tiàa nihnú inì-xi micuísì cuàchi. Doco tèmà, mà cúí nihì-té càcu-tè nùu andea.

⁴ Vâchi icúmì-tè cuni ùhì-te nsidaa ñà-nduá cahvi nêhivì nduú dios xi-ne, te ducán stná nsidaa inga iñàha cahvi-né, vâchi chicá ndiaá mii-té cachì-te. Te icúmì stná-te màcòo-tè veheñùhu cahnú xí Dios, te cachì-te xi nêhivì ñà-cuisi mii-té ndiá ìcà-né cahvi-né.

⁵ ¿A sàni nandòdó-nsiá ñà-jaàn? Vâchi divi chuun jaàn ní chinahì mii-nsiá na nisa ìe ndé ndoó-nsiá.

⁶ Te vichi ináhá stná-nsiá ndiá nduá sadí nùu tèmà ñà-mà cùì ndecunu-tè vichi. Doco na sàà meru quivì xí-te, dandu ndecunu-tè.

⁷ Doco dècuèndè vichi, sà-ìá ley malu xi-tè ñuhivì yohó, mate quidáchúûn dèhá`. Te divi ducán icúmì coo dèhá` dècuèndè cachi cuxio ana (sadí xì nùu-té).

⁸ Dandísá ndecunu vate-té, divi tè-nìhnù-guá inì-xi micuísì cuàchi. Doco icúmì-tè cui-te quida tàchì Stoho-ndà Señor, vâchi icúmì stná-yà natùu-ya, te yáha ga ndiaha cunchii-yà na quivì naxicocuñ-yà, te divi sàhájàn icúmì-tè ndañuhu-té.

⁹ Cunaha-nsiá, divi ñà-malu Satanás nduú ana icúmì chindee xi-té ñà-ndecunu-tè ñuhivì yohó. Te divi sàhà poder xi quisì mà icúmì-tè quida-tè nsidanuu clase milagru xi-té ñà-ndulocó nêhivì, te cunindisá-nète. Doco nsidaámà, ñà-tnùhù cundua.

¹⁰ Te sàhà-ñá malu guá-te, icúmì-tè dandahví dahuun-tè nsidaa nêhivì icúmì sàà ndañuhu anima-xi. Divi sàhà-ñá cahíchì ini-nè palabra ndàcuisì xí Dios cundua mà, vâchi cóni cùú ini-nè sàhà palabra cuàhàn dacácu xi-né nì cùí.

¹¹ Ñàyùcànduá, icúmì-yâ nacoo dahuun-yanè sàhà-ñá dàcà sàxìnítùnì-nè, te cunindisá-né palabra tnùhù xí tèmà.

¹² Doco ducán icúmì coo sàhà-ñá nihì nsidaa nêhivì mà castigu nacia ndiá ìcà coo xi-né, vâchi có-xiníndisá-né palabra ndàcuisì; còó, cuisì ñà-có-ndiáá cudí ini-nè cunchicùn-nè.

¹³ Doco mii-nsiá, cuú ini Dios sàhà-nsiá, ñàni. Ñàyùcànduá ndiá ìcà stná-nsi naquimanì-nsí mii-yá sàhà-nsiá, vâchi dècuèndè tiempu chicá antes sàni chitnùnì ini-yà càcu-nsia nùu-yá. Te icúmì-nsiá càcu ndisa-nsia, vâchi sàni nduhii anima-nsiá nì quida Espíritu ìì xí-yá na ní xinindisá-nsiá ñà-nduú palabra ndàcuisì.

¹⁴ Te divi sàhà ñà-nì sàà-nsiá càcu-nsia mà, ñàyùcànduá nì cana-ya mii-nsiá na ní cachitnùhu-nsi xì-nsiá ñà-nduú razón ndiaha xí-yá, vâchi cuní-yà cutnahá stná-nsiá xì Stoho-ndà Jesucristu cundoo-nda xi-yá ndé ndiaha guá iá nsidaa iñàha.

¹⁵ Ñàyùcànduá, iin-ni cunihnu vâha inì-nsia mii-yá, ñàni. Te iin-ni quida stná-nsiá cumplir ñà-nduú ley nì chinaha-nsi mii-nsiá, a ducán nduá ñà-nì inini-nsia nùu-nsí, te ò ñà-nduá nì cahvi-nsia nùu carta nì tiàa-nsi.

¹⁶⁻¹⁷ Te vichi xicàn tàhvi-nsí nùu Stoho-ndà Jesucristu xì nùu Yua-nda Dios, vâchi divi-ya nduú ana nì quida iin obra ndiaha sàhà-ndà ñà-mànì guá-ndà nùu-yá, vâchi nì sàhatahvi-yándô gracia xi-ya, te ducán vátùnì nacuahandee ini-ndà nicanicuahàn, te ndiaha gá stná iá tnùndé ini (icúmì-ndá vichi. Pues) divi nùu mii-yá xicàn tàhvi-nsí ñà-nì nàcuahandee ini-yànsià càhàn-nsiá micuísì ñà-ìá viì, te cuisì ñà-nduú chuun viì ni quidá stná-nsiá, xicàn tàhvi-nsí.

3

Nansa nì xicàn Pablo ñà-nì càcàn tàhvi nècuàchì ñuu Tesalónica sàhà-né

¹ Ñà-yohó cachì guè xì-nsiá, ñàni. Sacúndahví nùu-nsiá ñà-nì càcàn tàhvi-nsiá nùu Dios sàhà-nsí ñà-vátùnì nihì-nsí dacuítia-nsi palabra ìì xí Stoho-ndà Señor nsidanicuú xaan. Te càcàn tàhvi stná-nsiá sàhà-ñá ni coó tnùñuhu xí nêhivì sàhà palabra mà nacia nì quida mii-nsiá.

² Daaní, càcàn tàhvi stná-nsiá sàhà-ñá vátùnì càcu-nsi nùu nêhivì malu, vâchi màdì nsidaa nêhivì nduú nêhivì xiníndisá.

³ Te vátùni cahvi-nda xi-yá, vèchi icúmí-yâ nacuàhandee ini-yà anima-ndà, te nacuidahan-yándô nùù ñà-malu.

⁴ Ñàyùcànduá, cahví-nsí xi-yá sàhà-nsiá; ináhá-nsí ñà-iin-ni icúmí-nsiá quida-nsia cumplir ñà-nduá nì chinaha-nsi mii-nsiá, divi nacua sàquidá-nsiá vichi.

⁵ Doco xicàn tàhvi-nsí nùù Stoho-ndà Jesucristu ñà-chicá ni nsínúú inì-nsia ñà-cuàhà guá cuú ini-yà sàhà-ndà, te chicá ni sàà-nsià quidandee stná ini-nsià nacua nì quida mii-yá.

Màsà cúndóo xixín-ndà ñuhiví

⁶ Nú iá iin compañeru-nsià túha cacanu xixín, te có-cuní-nè cunchicùn-nè ñà-nduá nì chinaha-nsi mii-nsiá, dandu màsà cútnáhâ gá-nsià xi-né. Nsiùhù ndácùcahan-nsí quivì Stoho-ndà Jesucristu, te cachí-nsi xi-nsiá ñà-nacoo-nsianè, ñáni.

⁷ Vèchi ináhá-nsià nansa ndiá ìcà-nsiá quida-nsia, divi nacua nìsa quida stná nsiùhù na ní sandoo-nsi xi-nsiá, cóni sácúdúsán-nsí.

⁸ Màdì uun-ni ni níhì-nsí ñà-nduá nì saxixi-nsi; cóo. Ndui te ñuú nìsa quidachuún-nsí, ndè nìsa xàví tehe-nsí sàhà-ñá màsà cuáhachuún-nsí mii-nsiá,

⁹ mate icúmí-nsí derechu càcàn-nsi ñà-chindee-nsiá nsiùhù, doco cóo. Nì quidachuún-nsí sàhà-ñá cundaà ini-nsià ducán xiñuhu quida stná mii-nsiá.

¹⁰ Vèchi ñà-yòhó nduú ley nì sàha-nsi mii-nsiá na ní sandoo-nsi xi-nsiá: nú có-cuní nèhivì quidachuún-né, cóo derechu icúmí-nê (càcàn-nè) ñà-cuxi-ne.

¹¹ Vèchi sàni xinitnùhu-nsi ndoó dava compañeru-nsià xicánúú xixín, có-quidáchúûn-né, cuisì daquíhi yuhù-né nùù chuun xi dava ga nèhivì.

¹² Ñàyùcànduá, nsidaa mii-nsiá nècuàchì quidá ducán, ni cúníní-nsiá, vèchi cuenta xi Stoho-ndà Jesucristu cáhìn, te cachí xiñuhu quidachuún-nsiá, te cundehè-nsiá chuun xi mii-nsiá, dandu cuenta xi mii-nsiá cutiacu-nsià. Ñà-jaàn nduá dandacuí nùù-nsiá.

¹³ (Vichi cáhìn xi nsidaa-nsiá), ñáni: iin-ni ni cunchicùn-nsià quida-nsia nsidanicuú chuun vii, te màsà cúñáñá-nsiá quida-nsia ducán.

¹⁴ Doco nú iá iin compañeru-nsià có-ndúlócô sàhà ñà-nduá cachí-nsi nùù tutu yohó, dandu cundehè-nsiá ana nduú-né, te màsà cútnáhâ gá-nsià xi-né. Nacoo-nsianè áma sàà-nè cucahan nùù-né.

¹⁵ Doco màsà cúndéhe úhì-nsiànè; cóo. Cuàha-nsianè ichì váha na ian cáhàn-ndà xi iin ñani-ndà.

Ultimo ñà-nduá nì cachi Pablo xi nècuàchì ñuu Tesalónica na ní xicàn tàhvi-né nùù Dios sàhà nècuàchimâ

¹⁶ Pues vichi xicàn tàhvi-nsí nùù Stoho-ndà Señor ñà-iin-ni ni cúndóo-nsiá contentu nsidanicuú quivì, ndéni nì cui nì cúndóo-nsiá, vèchi mii-yá, (cudí inì-yà) chindee-yándô cundoo-nda contentu ducán. Pues vichi ni ndóo nsidaa-nsiá xi-yá nicanicuahàn, (ñáni).

¹⁷ Yuhù nduí Pablo, te cásàhúì xi nsidaa-nsiá. Ndahà mí tíaí saludu yohó, vèchi divi nduú seña tíaí nùù nsidaa carta xi; ducán nduú modo tíaí (firma xi).

¹⁸ Nì cúcúmí nsidaa-nsiá cuàhà gracia xi Stoho-ndà Jesucristu. Sà-íá.

Tutu Nuu Nì Tiaa San Pablo nùu Timoteo

¹ Yùhù nduí Pablo, te cásàhùì xì mii-ní Timoteo. Yùhù nduí iin apóstol xicánúú chuun xi Stoho-ndà Jesucristu, vèchi ducán nì chitnùnì ini mii-yá xì Yuamàni-yá, divi ana nì dàcácu xi-nda, te vichi iá ndisa tnùndé ini xi-nda nùu-yá.

² Te vichi tiaí tutu yohó nùu mii-ní Timoteo, vèchi sàni xinindisá stná-ní (ichì-yá), te quidá ndísè cuenta nahi dèhi nduu-ní. Pues vichi xicàn tàhvì nùu Yua-nda Dios xì Stoho-ndà Jesucristu ñà-nì cùnì mánì-yá mii-ní. Ni cùndéhe ndahví-yà mii-ní, te iin-ni ni coo-ní contentu xicàn tàhvì.

Ñà-nduá nì cachi Pablo xì Timoteo sàhà nèhivì chináhá iin ichì có-nduú ndisa ichì Jesús

³ Na ní quihin ichì cuàhìn ladu Macedonia, nì xiquèn ñà-ndòo chii gá-ní ñuu Éfeso sàhà ñà-cachì-ní xì dava tiàa yucán ñà-màsà chináhá gà-nè ñà-có-nduú ñà-ndáa. (Pues nacua nì cachì xì-ní daa, divi ducán quida-ní vichi.)

⁴ Cachì-ní xì-né ñà-màsà ndúlócô-nè sàhà cuentu nacánì nèhivì, ni sàhà stná lista xi cuàhà xi-nda, vèchi còò fin xi ñà-jaàn, te còò stná ni-iin chuun vaha quidá stná, cuisì ñà-dacuáa xì nèhivì nduá. Ni có-chìndéâmándó cunucuachi víi-nda nùu Dios, vèchi cuisì fe xi-nda nduá chindéé xí-ndá quida-nda ducán.

⁵ Doco ¿índù-ñá disàhà-xí sàni sàcùnaha-nda chivàha-nda palabra ìi xí-yá? Pues divi sàhà ñà-ndundoo cuàchi anima-nda, dandu cunihnu vii ini sàxìnítnùnì-nda, te cunihnu vaha ndisa ini-ndáyá, vèchi nú ducán, dandu sàa stná-nda cucuu stnahá ndisa ini-nda sàhà-nda.

⁶ Doco dava nèhivì, có-quidá-né cumplir ducán, ñàyùcànduá, sàni tùcù-nè inga ichì, te vichi ndoó-né cáhàn cáhàn-nè chináhá-nè nèhivì, doco còò ni-íñaha níhì ndèè-né.

⁷ Maestru chináhá vii xì ley ìi nduú-né cahan-né, doco ni mii-né có-cùndáa ini-nè ñà-nduá dacuahá-né, mate ndee gá cáhàn-nè (xì nèhivì).

⁸ Ináhá-ndá, vaha ndisa ley xi mii-yá, doco nú cuàhàn-nda chinaha-ndañá, dandu xiñuhu chinaha-nda nacua ndiá ìcà-nda.

⁹ Te ináhá stná-nda cóni cùyúcùn ley mà sàhà-ñá cadia nùu nècuàchì nihnú ndàcuisì inì-xi; còò. Sàhà-ñá cadia nùu nèhivì cuáchi, ñàyùcànduá nì cuyucàn. Vèchi ndoó nèhivì nihnú chicúehè inì-xi, có-íní-né ley xi-ya, vèchì cahíchì ini-nè ley mà, te quidá ndevàha-ne cuàchi. Malu-nè, vèchi có-ndúlócô-nè sàhà ichì-yá. Dava-ne, dècuèndè caní stná-nè ana sahnú xí-né, te ò sahní stnahá-né.

¹⁰ Tùha-ne cundoo ñahà xí-né. Te ò dava-ne nduú tiàa nihnú inì-xi na ian nihnú ini nècuàchì ñahà, te dava-ne, xidácuíhna stnahá-né; tnuhu gá stná dava-ne; có-cáhàn sahnú-né. Sàhà nsidaa nècuàchì mà nì cuyucun ley ìi xí Dios, sàhà-ñá màsà quidá gà-nè ñà-nduá sàni cachì jaàn, te ò ndéni iñaha có-íá nacua cachí palabra ìi.

¹¹ Te palabra mà, divi nduú razón ndiaha cáhàn yùhù; vèchi nùu Dios ndiaha xi-nda sàni nihítàhvì ñà-càhìn razón mà xì nèhivì.

¹² Te vátùni nì nihìndéi quide chuun jaàn, vèchi nì nacuahandee ini-yà yùhù. Ñàyùcànduá, naquímánì mii-yá, divi Stoho-ndà Jesucristu. Ansivéhé-yá, nì ndenihi-ya yùhù ñà-nduú iin nècuàchì seguru, te ñàyùcànduá nì sàha-ya yùhù chuun ndiaha jaàn.

¹³ Yùhù, ndisa, antes nì sacahàn ndevàhì dìquì-yá, te nìsa quida quini xì nèhivì xí-yá; yáha ga dana nìsa ìe. Doco nì indehè ndahví-yà yùhù, vèchi sàhà-ñá cóni-cùndáa inì, ñàyùcànduá nìsa quide ducán, vèchi tàñáha ga sàì cunindisé.

¹⁴ Dandu cuàhà gá nì sàhatahvì Stoho-ndà Jesucristu gracia xi-ya, te nì nihí nì xinindisé mii-yá; nì quesahí cuú inì sàhà-yá.

¹⁵⁻¹⁶ Vèchi nì nuu-ya ndè ñuhivì yohó sàhà-ñá dacácu-ya ndohó nècuàchì iá cuàchi-xi. Palabra ndàcuisì nduájàn, te nsidaa-nda xiñuhu cunindisa-ndañá. Te yùhù, mate nècuàchì chicá malu nì sandui, doco nì indehè ndahví-yà yùhù. Te ¿índù chuun? Divi

sàhà-ñá cundaà ini nèhivì ñà-cuàhà guá quidándéé ini-yà sàhà iin ana chicá (có-quidá víi). Dandu nèhivì vaxi después, cunindisá stná-nè mii-yá nacua nì quida yùhù, te cucumi stná-nè vida ndiaha nicanicuahàn.

¹⁷ Sàhà nsidaajàn, nicanicuahàn xiñuhu tavà-ndà tnùñuhu xí-yá, te naquimani stná-ndàyá, vachi único ana cusáhnû nicanicuahàn nduú-yá; mate có-tuí-yá cundehe-ndà, doco iin-ni iá-yà nicanicuahàn. Mindalini Dios nduú-yá, te nchichí sàstnùhù-yá.

¹⁸ Nahi dèhi nduu-ní, Timoteo, te chináhî mii-ní ñà-quida-ní nacua sàni cachì xì-ní. Te divi ducán nì cacachi stná razón ndiaha nì quixi nùu Dios daa, te nì cachitnùha sàhà-ní. Ñàyucàndüá, nsinuu vaha inì-ní ñà-ndüá nì cachi palabra mà, vachi sàhàmà vätùni nihì-ní cuahàndee gá inì-ní (sàhà chuun ìi xí-yá), na ian sàhandee fuerte ini iin soldadu quidá víi chuun-xi, ducán quida-ní.

¹⁹ Màsà nácóó-nî ñà-xiníndísâ víi-ní. Cunsìhi inì-ní sàhà anima-ní ñà-nì còó víiá, vachi dava nèhivì, sàhà-ñá có-ndùlócô-nè sàhà anima-nè, ñàyucàndüá có-xiníndísâ víi gá-nè. Te ñà-jaàn ndisa ndüá tnùndoho.

²⁰ Ùi tiàa sàni quida ducán nduú Himeneo xì Alejandro. Ñàyucàndüá, sàni nacoo dahuin-nè ñà-coo-ne ndahà ñà-malu áma sàa-nè cundaà ini-nè ñà-mà váha càhàn ndevàha-nda sàhà ichì Dios.

2

Ñà-ndüá nì cachi Pablo sàhà nansa càcàn tàhvi-ndà nùu Dios

¹⁻² Primeru cachì xì-ní ñà-xiñùhù càcàn tàhvi-ndà nùu Dios sàhà nsidaa nèhivì. Cuàhà gá càcàn tàhvi-ndà sàhà nècuàchì cusáhnû nùu ñuu-ndà xì sàhà stná nsidaa ana nihì chuun. Càcàn tàhvi-ndà sàhà nsidaa-né áma chindee Dios-nè. Te naquimani stná-ndà mii-yá sàhà-né áma nihì-ndà cundoo cuéyàà-ndà ñuhivì, còò ni-ñàha màsà yáha-nda, te iin-ni cahvi víi-ndàyá, dandu quida vii-ndà nacua ndiá ìcà-ndà.

³ Vachi nsidaamá, chuun vaha ndüá nùu Dios, te divi ndüá cudû ini-yà sàhà-xí. Mii-yá nduú ana nì dàcácu xi-nda,

⁴ te cuní stná-yà càcu anima nsidaa stná nèhivì; cuní-yà sàa stná-nè cundaà vaha ini-nè ñà-ndüú palabra ndàcuisì xí-yá.

⁵⁻⁶ Vachi imindaa Dios iá, te imindaa ana càhàn nihni sàhà-ndà nùu-yá, divi nduú Jesucristu, vachi mii-yá, nì nanduu-ya iin nèhivì, te nì sàha-ya vida xi-ya nì xihì-yà cuenta xi nsidaa-nda sàhà-ñá dàñà-ndà nùu cuàchi-nda. Ndoó testigu, te sàhàmà meru tiempu vaha nì dàtúi-ne palabra mà nùu nèhivì.

⁷ Ñàyucàndüá, nì ndacu nuù stná yùhù ñà-cacanui cachitnùhi xì nèhivì palabra mà. Ñà-ndáa ndüá cachì, có-ndüá tnùhu, ináhá Cristu, divi nùu mii-yá nì nihì chuun mà ñà-chinahì nèhivì nsidaa ñuu nansa iá palabra ndàcuisì ndiá ìcà-né cunindisá-né.

⁸ Nsidanicuú lugar (ndé natácá-nsià), yùhù cuní càcàn tàhvi nècuàchì tiàa nùu Dios. Doco nú cuàhàn-nè càcàn tàhvi-né nùu-yá, te chitanini-ne ndahà-né (nùu-yá), dandu ni cundúú-né nèhivì iá ndoo anima-xi, nèhivì có-xidà inì-xi; ni màsà cundúú stná-nè nèhivì xiní ùhì stnahá.

⁹ Te nècuàchì ñahà, cuisì estilu iá vii ni cóó sìcoto ndixí-né, iin estilu có-ndâa quini, iin modo mà cuítñuhu nèhivì-né. Te màsà (dáyâha-ne) natnii vico-né dìni-né, ni màsà ndúcútú cuàhà-né xì oro, ò yùu mina, ò vestidu (yáha ga ndiaá).

¹⁰ Còó, anima-nè ni cóó víi chicá vaha sàhá ducán quida-ne cuàhà obra, vachi ducán xiñuhu quida nsidaa ñahà cachì cahvi ndisa xi Dios.

¹¹ Te na ndoó-né iníní-né chináhá nèhivì (palabra xi-ya), dandu ni cundóó dadí-né, te ni quidá-né cumplir ñà-ndüá cachì palabra mà.

¹² Te có-sâhi chinaha nècuàchì ñahà, ni có-sâhi dandacú stná-nè iin chuun nùu nècuàchì tiàa; còó. Icúmí-nè cundoo dadí-né.

¹³ Vachi dihna nècuàchì tiàa Adán nì quidavàha-ya, màdì nècuàchì ñahà Eva.

¹⁴ Te màdì Adán nduú ana nì dándàhví (ñà-malu), còó; nècuàchì ñahà nduú ana nì xinindisá tnùhu xi-sì, te ducán nì xida cuàchi-ne.

¹⁵ Doco iin nècuàchì ñahà quivì vichi, nú iin-ni xiníndísâ víi-né, te cuú ini-nè sàhà (nècuàchì vehe-ne), dandu vátùni càcu-ne na túinuù mèè xi-ne ñuhiví. Doco iin-ni ni coó sahnú ini-nè, te coo ì stná ini-nè, dandu càcu-ne na quesaa mèè xi-ne.

3

Índù clase nèhivì xiñuhu cunduu iin tiàa cunuù núù nèhivì xí Dios

¹ Nú cuní iin tiàa nihì-né chuun cunuù-né núù nèhivì xí Dios, dandu vátùni, vàchi ñà-ndàà nduá, iin chuun ndiaha nduá.

² Ñàyùcànduá, nècuàchì cuàhàn nihì chuun cunuù mà, icúmí-nê cunduu-ne iin nèhivì còò falta xi, iin nèhivì imindaa nècuàchì vehe-xi. Xiñuhu cunduu-ne nècuàchì sahnú inì-xi, iin nècuàchì iá tnùñuhu-xí; màsà cundúú-né nècuàchì quidá escándalo. Te xiñuhu stná ñà-cunduu-ne iin tiàa cudí inì-xi dayáha visita vehe-ne. Te xiñuhu stná cunduu-ne ana tùha chinaha vaha xi nèhivì.

³ Màsà cundúú-né nècuàchì tùha xini, ò iin nècuàchì tùha cani stnahá, còó; nècuàchì vaha inì-xi ni cundúú-né, nècuàchì màni inì-xi. Te màsà cundúú-né iin ana tùha nàá stnahá, ò iin ana tòó xì dihùn.

⁴ Iin tiàa dandacú víi núù nèhivì vehe-xi ni cundúú-né; xiñuhu cunini vii dèhe-ne, te ni coó stná tnùñuhu xán núù-né.

⁵ Vàchi nú mà tùha iin tiàa dandacú víi-né núù nèhivì vehe-ne, dandu mà cúí cunuù víi stná-nè núù nèhivì xí Dios.

⁶ Te cuidadu ni coó stná-ní ñà-màsà cundúú-né iin ana làcà saa-ní nì quihin ichì-yá, còtó cutuxi ini-nè cuàhà gá ndiaá-nè, vàchi nú ducán, ñà-sàni xidacuàchi-ne cundua nacua nì cuu xi ñà-malu.

⁷ Daaní, nì cundúú stná-nè iin ana icúmí tnùñuhu núù dava ga nèhivì ñuu-nè; vàchi nú có-quidá víi-né núù nècuàchì ñuu-nè mà, dandu mà úhì daquéè cuàchi nècuàchì mà dìquì-né, te ducán ñà-sàni quida ñà-malu ganar cundua.

Índù clase nèhivì cunduu nècuàchì nihì chuun xinúcuáchí nani diácono

⁸ Daaní, stná nècuàchì xinúcuáchí dasán obra, ni cécundúú stná-nè nècuàchì tnùñuhu, nècuàchì cumplidu ndisa. Màsà cundúú-né nècuàchì xihí cuàhà vinu; ni màsà cundúú stná-nè nècuàchì cuú inì-xi sàhà dihùn; còó.

⁹ Xiñuhu cunduu-ne nècuàchì cúnshì inì-xi sàhà anima-xi ñà-nì còó víiá. Te iin-ni ni cúnchícùn stná-nè ndudu ì nì dàtú Dios núù-ndà ñà-cunindisa-nda.

¹⁰ Te nú cuàhàn-nè cunucuachi-né ducán, dihna xiñuhu quidachuún chii-né chuun ma, dandu nú còò ni-iin falta xi-ne, dandu vátùni ndòò ndisa-ne xì cargu mà.

¹¹ Stná nècuàchì ñahà (cunucuachi ducán), xiñuhu cunduu stná-nè nècuàchì tnùñuhu, màdì nècuàchì tùha cuitnùhu, còó; nècuàchì sahnú inì-xi ni cundúú-né, nècuàchì mà tùha dandahví ni-iyuhu.

¹² Nècuàchì tiàa xinúcuáchí, mindaa ñahàdihí-nè ni cécúmí-nê, te ni cundúú stná-nè ana dandacú víi núù dèhe-xi, xì núù nsidaa gá nèhivì vehe-ne.

¹³ Vàchi nú ni cúnúcuáchí víi-nda chuun xi mii-yá, dandu nihì-ndà iin gradu ndiaha (núù-yá), te nihì stná-ndà ñà-mà yúhí gà-ndà càhàn-ndà sàhà Jesucristu, nansa xiníndísá-ndáyâ.

Nansa nì cachi Pablo ndià disàhà-xí nì tiaa-ne carta yohó

¹⁴⁻¹⁵ Yàchì sài jaàn ndé iá-ní cahín, doco nú ni cueé cuàhí coi yohó, dandu siquiera sàni tiai iin ù ñàhà ñà-cundaà vaha inì-ní nansa cacanuú vaha-ní. Vàchi ndohó, iin-ni nèhivì nihnú vaha ini xì Dios xínduu-nda; te mii-yá, mindaa ana itiácú nicanicuàhàn nduú-yá. Te sàni cana-ya nsidaa-nda ñà-cunduu-nda nèhivì xí-yá. Te icúmí stná-ndà palabra ndàcuisì xí-yá, ñàyùcànduá inúù-ndàñá, te ndiaá-ndàñá.

¹⁶ Ndisa, ñà-ndáà nduá, ndiaha gá palabra sàni dātúí-ya nùù-ndà, vàchi nacáníá nansa nì nanduu-ya nèhivì, te nì xini nèhivì ñuhiví-yà. Te sàhà Espíritu Ìì nì cundaà ini-nè, còò falta xi-ya. Daaní, stná ángel xi-ya, nì xini stná-nèyà, dandu nì dàcuítia nèhivì razón sàhà-yá mahì nèhivì ndoó cuàhà ñuu ñuhiví yohó, te cuàhà gá-nè nì xinindisá stná xì-yá. Daaní, mànuhù-yá ansivi ndè gloria xi-ya.

4

Nansa coo palabra tnùhu cuitià na sàà quivì xinu tiempu yohó

¹ Claru cachítñuhu Espíritu Ìì xí Dios nansa icúmí coo quivì xinu tiempu yohó. Dava nèhivì, dècuèndè sàà-nè nacuaà-né ñà-nduá xiníndísâ-né, cachí-yà, dandu cunchicùn-nè ñà-tnùhù cacachi ñà-malu, vàchi cunindisá-né nacua cunià cunindisá-né.

² Te tiàa icúmí dacuaha-xi-né ducán, vaha gà-te datiaá-te, doco tnùhu cundua cachì-te. Mà cúí gá mànhì inì-te índù chuun nduú iin chuun vaha, vàchi mà cúú gá sàxínítnùnì-te sentir, na ian (xíhì) iin quisi ndé dúcùn tnuni.

³ Te cuàhàn-te cachì-te xi nèhivì ñà-cuàchi nduá cucumi-nda ñahàdihí-ndà, te cuàchi nduú stná ñà-caxì-ndà dava ñà-nduá saxí-nda, cachì-te. Doco nsidaa ñà-itiácú-ndà, ñà-nduá nì quidavàha Dios nduá; nùù mii-yá vaxan, ñàyùcànduá vātùnì cutiacu-ndañá nú naquímánì-ndàyá sàhà-ñá, vàchi xiníndísá-ndá (ichì-yá), te ináhá-ndá ñà-nduú palabra ndàcuisì.

⁴ Vàchi nsidaa ñà-nduá nì quidavàha-ya, iá viiá. Te màsà cáhìchì ini-ndà ni-ñàha nì quidavàha-ya, vātùnì iá nsidaa nú ni náquímánì-ndàyá sàhà-ñá.

⁵ Vàchi sàhà palabra nì cachi-yà xì sàhà stná ñà-nàquímánì-ndàyá, ducan sàà ñà-cutiacu-ndà ndee vaha-ña nùù-yá.

Ñà-nduá nì cachi Pablo xiñuhu quida iin ana dacuaha-xi nèhivì nchícùn ichì-yá

⁶ Palabra nì cachì xì-ní jaàn cachi stná-ní xì nsidaa nèhivì iin-ni xícahvi xi Yua-nda Dios ducán. Dandísá cunduu-ní iin ana xinúcuáchí víi nùù Jesucristu, te chicá ndufuerté anima-ní ñà-xiníndísá vaha-ní, te nchícùn-ní dàñùhù iá vii mà.

⁷ Doco màsà ndúlócô-ní sàhà cuentu có-ndiáá, ò sàhà creencia-ni. Còò, ñà-nduá xiñuhu nduú ñà-fuerte cuàhandee inì-ní cunihnu inì-ní cuisì ichì mii-yá.

⁸ Cunaha-ní, nú fuerte nì quida-nda iin ejerciciu, dandu chindeámà iquicúñú-ndà iyuhu. Doco nú fuerte nihnú ini-ndà ichì-yá, ñà-jaàn ndisa, nsidanicuú modo chin-deámàndó, vàchi ducán nihì-ndà iin vida ndiaha na ndoo-va-nda ñuhiví yohó, xì stná na cundoo-nda inga ñuhiví.

⁹ Palabra ndàcuisì nduá yohó, te nsidaa-nda ndiá icà-ndà cunindisa-ndañá.

¹⁰ (Pues sàhà-ñá nduámà ñà-ndàcuisì), ñàyùcànduá sàhandee ini-ndà quida vii-ndà (chuun ìì xì-yá) mate quidá quínì nèhivì xì-ndà, vàchi mii-yá, nicanicuahàn itiácú-yà, te sàhámà iá tnùndé ini xi-nda nùù-yá, vàchi tùha-ya dacácu-ya nsidaa clase nèhivì, ñàyùcànduá nú nduu-nda nèhivì xiníndísá-xí-yá, dandu ináhá-ndá vātùnì càcu vii-ndà nùù-yá.

¹¹ Divi palabra jaàn icúmí-ní dacuaha-ní nèhivì, te chinaha-nínè quida-neà.

¹² Te mii-ní tu, xiñuhu (quida vii stná-ní), màdí cachìchì ini nèhivì mii-ní ñà-nduù-ní iin nècuàchì chiì. Ñàyùcànduá, càhàn vii-ní xì-né; te cacanuu vii-ní. Te ni cúcúú stná inì-ní sàhà nsidaa ñànitnaha-ní. Te siempre cunihnu vaha inì-ní mii-yá, vàchi ducán cundiaà-ní anima-ní. Daaní, nú indéhe nècuàchì xiníndísâ gá ñà-iin-ni quida-ní nsidaájàn, dandu vātùnì quida stná-nè ducán.

¹³ Mate cuèi dandu sàì ndé iá-ní, iin-ni quida-ní seguir cahvi-ní tutu ìì, te iin-ni ni nácuàhandee inì-ní nèhivì, te dacuahá stná-nínè (na natácá-nsià jaàn).

¹⁴ Te nsinuu stná inì-ní ñà-ìá iin ñà-ndùá nì nìhìtáhvi-ní (nùù Dios) daa na ní chitándòò nècuàchì sahnú ndahà-né dìni-ní, te nì càhàn-nè xì-ní razón ndiaha xí-yá. Ñàyùcànduá, iin-ni quida-ní ñà-ndùá sàni nìhìtáhvi-ní quida-ní.

¹⁵ Nsidaa ñà-ndùá cachí xì-ní yohó, nsinuu vaha inì-ní; iin-ni cunihnu vaha inì-ní, dandu cundaà ini nèhivì ñà-chicá más sàni cutùha-ní cunchicùn vii-ní ichì-yá.

¹⁶ Te cuidadu coo-ní xì mii-ní (ñà-quida vii-ní), te cuidadu coo stná-ní ñà-màsà dácuáhà ndevàha-ní nèhivì. Dandu nú iin-ni ni quida-ní nsidaa ñà-yòhó, vátùni càcu-ní nùù Dios, te càcu stná nèhivì iníni xí ñà-ndùá chináhà-ní.

5

Modo ndiá ìcà-ndà càhàn-ndà xì nècuàchì iá falta-xi na sáha-ndané ichì váha

¹ Nú ni quidá iin nècuàchì sahnú iin falta, màsà cánahá ndevàha-nda xi-né. Còó. Càhàn vii-ndà xì-né na ian càhàn-ndà xì iin yua-nda. Te nú tiàa chii nduú ana iá falta xi, dandu càhàn vii-ndà xì-né na ian iin ñani-ndà nduú-né.

² Te nú nècuàchì ñahà sahnú nduú ana (sáha-nda ichì váha), dandu càhàn vii stná-ndà xì-né na ian dihi-nda nduú-né; te ò nú nècuàchì ñahà chii nduú-né, dandu càhàn tnùñuhu-nda xi-né iin modo vii na ian ni cùndúú-nè iin cùha-nda.

Nansa xiñuhu chindee-nda tnaha-nda nú yáha ndahví-nè

³ Nú ndoó nècuàchì ñahà nì xihì ì-xí, dandu dacútiácú-nsià nècuàchì-mà, nú ndisa (còò tnaha-ne cundehè-né nùù-xí).

⁴ Doco nú ndoó dèhe-ne, ò déheñani-né, dandu xiñuhu cundaà ini nècuàchì-mà ñà-ndiá ìcà-né quidañuhu-né tnaha-nemà, te nachindee-né ana sahnú xí némà, vàchi cunduamà iin obra vaha nùù Dios, iin obra cudíi ini-yà sàhà-xí.

⁵ Doco cunaha-nsiá, nú nècuàchì cuaán ndisa nduú-né, te còò tnaha-ne cundehè-né nùù-xí, dandu cuisì Dios cundéé ini-nè, te iin-ni xicàn tãhvi stná-nè nùù-yá ndui te ñuú.

⁶ Doco nú tucu nihnú ini-nè, te cuisì cudíi ini-nè quida-ne ñà-nduú gustu xi mii-né, dandu mate itiácú-nè, doco ñà-sàni ndañuhu vida ndiaha xí-né nduá.

⁷ Nsidaa palabra jaàn chinaha vaha-ní nsidaa compañeru-ní sàhà-ñá màsà quidá-né ni-iin falta, te ducán nìhì nèhivì nansa daquéé cuàchi-ne dìquì-ndà,

⁸ vàchi cunaha-ní, chuun cahnú nduá chindee-nda tnaha-nda, te chicá más cahnú chuun nduú ñà-chindee-nda nèhivì meru vehe-nda, vàchi nú coó, dandu ñà-sàni nacuaà-ndà ichì Dios nduá, te chicá quini queá nùù modo xi nècuàchì có-xiníndisà.

Ñà-ndùá nì cachi Pablo quida nèhivì xí Jesús na cuáhàn-nè tavà-né lista xi nècuàchì ñahà sahnú nìhì xì ayuda

⁹ Cuisì nècuàchì cuaán sàni xìnu ùni dico (60) cuià ni cùndúú ana nàcàva nùù lista, cuisì ana nìsa ìa xi imíndaa nsì-ì-xí.

¹⁰ Te nì cùndúú stná-nè iin nècuàchì ináhà-nsiá nì quida cuàhà obra. Xiñuhu cundaà inì-nsia a ní dàcuàhnú víi-né luchì cuati, te ¿a túha stná-nè quidañuhu víi-né nèhivì sàa vehe-ne? ¿A túha stná-nè cunucuachi-né nùù dava ga nèhivì xí Dios, mate chuun cuati luha nduá? Te ¿a túha stná-nè chindee-né nècuàchì yáha tnùndoho, te ò ndéni nèhivì ní cui yáha ndahví? Nú ducán quidá-né, dandu vátùni nàcàva stná-nè nùù lista xi nèhivì (chindee-nsiá).

¹¹ Doco nècuàchì chicá cuachi, còó, vàchi (sàhà-ñá cuachi vá-né), mà úhì sàa-ne nacani tucu ini-nè, te nandòdó-né (chuun) cuní Cristu quida-ne, te nandàhà tú-né.

¹² Doco iin falta xi-ne cunduamà, vàchi ñà-ndùá nì cachi-nè, sàni nacoo-neà.

¹³ Nècuàchì chicá cuachi ma, mà úhì cuni dùsàn-né, te cacanu xixín-né vehe vehe. Te màdì cuisì ñà-jaàn, vàchi cutùha stná-nè cuitnùhu-ne, daquíhiyuhù-né nùù chuun xi nècuàchì dava ga, te cachi-nè ñà-có-ndiá ìcà-né cachi-nè.

14 Ñàyùcàndùá, yùhù cachí, chicá vaha ni nándàhà ñahàcuàán nú cuachi-né, te ni cúnsìhi ini-nè dèhe-ne, xì chuun vehe-ne, dandu mà ñihìndèè nècuàchì có-íá ladu xi-nda daquéé cuàchi-ne (dìquì-ndà sàhà nècuàchìmà).

15 Vàchi cunaha-ní, vichi sandoó dava nècuàchìmà sàni tùcù ichì ñà-malu.

16 Ñàyùcàndùá, nú íá iin nècuàchì tiàa xiníndísá, ò iin nècuàchì ñahà xiníndísá, te ndoó tnaha-ne ni xìhì ì-xí, dandu mii-né ndiá ìcà-né chindee-né nècuàchìmà sàhà-ñá màsà cóo necesidad cundehè nècuàchìmà nùù táçâ mii-nsiá. Vàchi nú chindee-nsiá tnaha-nsia ducán, dandu vátùni sàa-nsiá chindee-nsiá nècuàchì cuaán íá ndisa necesidad xì.

Nansa xiñuhu quidañuhu-nda nècuàchì sahnú inúù nùù nèhivì xí Dios

17 Nècuàchì sahnú inúù víi nùù nèhivì xí Dios, ndiá ìcà-ndà quidañuhu-ndané. Te nú nduú-né iin nècuàchì càhàn xì-ndà sàhù, te dacuahá-nèndó palabra ì xí-yá, dandu chicá más xiñuhu quidañuhu-ndané.

18 Vàchi cachí nùù tutu ì (iin ejemplu tii) ndé cachá: “Màsà cúñúhú ñunù yuhù buey na sánihni-sì sàcàyòcó trigu cóyo nùniá”. Daaní, cachí stná tutu mà: “Nú sàni quidachuun-nda, íá stná derechu xi-nda ñihì-ndà raya xi-nda”, cachá.

Nansa quida-nda nú daquéé cuàchi nèhivì dìquì iin nècuàchì sahnú inúù xì-ndà

19 Nú daquéé cuàchi iin nèhivì dìquì iin nècuàchì sàhnù-mà, doco imindaa ana daquéé cuàchi, dandu màsà cándísá-ní, vachi xiñuhu siquiera ù ò únì-nè, (dandu vátùni cunini vaha-ní ñà-ndùá cachí-nè).

20 Te nú ndisa íá falta xi nècuàchì xidá cuàchi ma, te có-ndùlócô-nè, dandu chihaha-nínè nùù nsidaa compañeru-nsiá sàhà-ñá (ni nácání ini-nè, te) yùhí-nè.

21 Yùhù cachí xì-ní, (Timoteo), iin-ni nacua nduú nsidaa ley yohó, ducán icúmí-ní quida-ní (xì nècuàchì sahnú dandacú); iin-ni icúmí-ní ndenihi-ní nsidanicuú-né, màdí chicá víi quida-ní xì ana íá vaha xi-ní. Ducán chináhî mii-ní quida-ní, te ináhá stná (Yua-nda) Dios xì Jesucristu, xì nsidaa stná ángel ì xí-yá.

Más gà conseju ni sàha Pablo Timoteo

22 Na cuáhàn-ní cuàha-ní iin nèhivì chuun ñà-dandacú-né, màdí nansa-ni ni cui quida-niá. Dihna nacani vaha inì-ní. Te màsà (cuàha-nínè chuun nú nduú-né) nècuàchì có-quidá víi, vachi nacuida stná-ní cuàchi quida-ne. Cundiaà-ní anima-ní.

23 (Ináhî) tutoo ndecuéhè-ní cuhí tìxi-ní, ñàyùcàndùá coho stná-ní chii vinu sì-uva, màdí cuisì tèculí uun.

24 Dava nèhivì, mate tàñáha ga sàà hora coo juicio xi-ne, doco nàhà xicà íá cuàchi-ne. Te dava ga-nè, cuisì ndè después natùì cuàchi-ne.

25 Te divi ducání stná xì nècuàchì quidá víi; vachi nú sàni quida-nda obra, claru tùia nùù nèhivì; te mate dèhé ni quida-ndañá, doco mà cúí coo dèhá` nicanicuahàn.

6

Nansa xiñuhu quida nècuàchì ndoó saín nùù iin lamú

1 Nècuàchì ndoó saín nùù iin lamú, ni cóo tññuhu xí-né nùù lamú xi-ne, vachi nú ducán, mà ñihìndèè nèhivì càhàn-nè dìquì mii-yá ana cahvi-nda, ni dìquì stná ñà-ndùá xiníndísá-ndá.

2 Te nú iin nècuàchì xiníndísá nduú lamú xi-ne, dandu màdí chicá menos quidañuhu-né lamú xi-nemà sàhà-ñá dava-ni nduú-né nùù Yua-nda Dios. Còó; chicá más ni cóo voluntad xi peón mà quidachuún víi-né, vachi iin-ni xí-xinindisá-né, te cuú stnahá stná ini-nè sàhà-né, ñàyùcàndùá chicá ndiá ìcà peón mà cunucuachi víi-né nùù nècuàchìmà.

Cunaha-ní nsidaa palabra yohó icúmí-ní cachitnùhu-ní xì nèhivì yucán, te dacuahá víi-nínè.

Contentu ni cúndóo-ndá xí ñà-ndùá icúmí-ndá, màsà xího-nda cuàhà iñàha, vachi sà-íá mii-yá ini anima-ndá

3-4 Nú ndoó nêhivì chináhá stnahá xì tucu palabra có-càchí nacua cachí palabra viì xí Stoho-ndà Jesucristu, dandu (màdì ichì mii-yá nduá), cutu tuxí ini nècuàchìmà ndiaá cuàhà-né. Te nú có-càndísâ-né palabra nacua nduú ichì ì mii-yá, dandu còò ni-iñàha ináhá ndisa-ne. Còó, cuisì-ní ñà-cùdî ini-nè cuàà-nè sàhà chuun cuatiluha nduá. Doco después mà úhì quesaha-né cumbídiâ stnahá ini-nè sàhà-né, te náâ stnahá stná-nè; dandu vihi gá pesadu cáhàn-nè dìquì ñanìtnaha-ne, te chicá indéhe díin stnahá stná-nè.

5 Dandu quesáhá-nè daquéè cuàchi stnahá stná-nè, vâchi sàni dàcà sàxìnínùnì-nè, te có-nìhnú gá ini-nè ñà-nduú ñà-ndácuisì. Cutu ñà-nìhì-ndà dìhùn nduá dísáhà-xì cunchicùn-ndà ichì Dios cahan-né. Pues nsidaa nècuàchì nìhnú inì-xi ducán, nacoò dahuun-nínè.

6 Pues ñà-ndàà nduá, cuàhà gá ñà-cuicà nduá nù-ndà nú nchícùn viì-ndà ichì-yá, te ndoo-nda contentu xì ñà-nduá sà-icúmí-ndá.

7 Vâchi còò ni-iñàha nihi-nda ni quésáá ñuhiví yohó, te còò ni-iñàha cunihi stná-ndà cùhùn na quee-nda yohó.

8 Ñàyùcàndùá, nú iá ñà-cutiacu-ndà xì ñà-cundixi-nda, xì ñà-jaàn-ní ni cúndóó-ndá contentu.

9 Dava nêhivì, yáha ga cuní-nè nducuica-né, doco cunaha-ní, cuàhà peligru ndacá mà, vâchi nú nìhnú ini-nè ducán, mà úhì sàà-nè dacuidá cuàchi-ne mii-né, te mà úhì dandahví ñà-malu-nè, te dacà-sí dìnì-né sàhà-ñá xího cuàhà-né iñàha. Doco mii-né quidáquiní-né xì mii-né, vâchi sàhà ñà-jaàn icúmí cuchicuehe anima-nè, te mà nátui ga-nè nù Dios.

10 Vâchi nú cuú ini-ndà sàhà dìhùn, mà úhì quida-nda nsidanuu clase cuàchi, vâchi nahi yohò cuàchi nduá. Doco divi ducán sàni quida dava nêhivì, nì cuu cuahà ini-nè sàhà dìhùn, te sàhàjàn nì tucù-nè inga ichì ndé có-xìníndísâ víi gá-nè, te cunaha-nsiá, dècuèndè vichi cuàhà gá dandohó-né anima-nè.

11 Doco mii-ní, iin nêhivì xí Dios nduu-ní. Ñàyùcàndùá ni-iin xichi màsà nácánì inì-ní quida-ní nacua quidá nècuàchì yucán. Iin-ni cuàhandee inì-ní quida-ní ñà-nduú ichì váha, te nanducu-ní nansa cahvi víi-ní mii-yá. Iin-ni ni cúníhnú inì-niyá, te iin-ni cuu stná inì-ní (sàhà-yá xì sàhà stná ñanìtnaha-ní). Quidandee inì-ní sàhà nsidaa iñàha, te siempre coo màni inì-ní.

12 Cuàhandee gá inì-ní ñà-màsà dáca xi dìnì-ní, te nacoò-ní fe vâha xi-ní; iin-ni cunsihi inì-ní ñà-seguru cucumi-ní vida ndiaha nicanicuahàn, vâchi sàhà-ñá nihi-níamà, ñàyùcàndùá nì cana Dios mii-ní, te ndee ní cachi stná-ní iin palabra vâha ñà-cuàhàn-ní cunchicùn viì-ní ichì-yá; te cuàhà stná nêhivì nì inini na ní cachì-ní ducán.

13-14 Ñàyùcàndùá, vichi chináhî mii-ní ñà-chivàha-ní palabra ndiaha nì cachi Dios. Ducán cachí xì-ní, te inínì stná mii-yá, divi mii-yá ana dipoder-xi itiácú nsidanicuú iñàha iá ñuhiví; te inínì stná Jesucristu, divi mii-yá, ana nì cachi vate stná ñà-nduú palabra ndiaha na ní dàtnátuu-tèyá nù Poncio Pilato. Ñàyùcàndùá, iin-ni chivàha-ní ñà-nduá nì ndacu nuù-ní nuù-yá. Màsà cúmánchá anima-ní, te ni-iyuhu palabra mà màsà nándòdó-ní ndè cachi sàà quivì naxicocuín Stoho-ndà Jesucristu.

15 Vâchi meru quivì xí-yá icúmí-yâ tui-ya nù-ndà quida Yua-nda Dios, (ansivéhé-yâ), vâchi ndiaha gá-yâ. Mindalini mii-yá dandacú-yá ñuhiví, cuisì mii-yá cusáhnû-yá nù nsidaa rey, xì nù nsidaa gá ana icúmí chuun ñuhiví yohó.

16 Cuisì mii-yá nduú ana de por sí icúmí xí vida ndiaha nicanicuahàn. Fuerte tnúù nihi ndiaha ndé iá-yá, te mà cù nìhì nêhivì cuyatni-ne. Còò ni-iin ana nì xìnínùù xì-yá, nì mà nunca sàà-nè cuni-nèyâ. Te vichi nicanicuahàn nì queé tnùñuhu xí-yá, te nicanicuahàn nì cúsáhnû fuerte-yâ (inicutu), amén.

Nansa xiñuhu cunihnu ini nècuàchì cuicà

17 Cáhàn-ní xì nêhivì icúmí xí ñà-cuicà ñuhiví yohó, te chinaha-nínè ñà-màsà cóo cuadú-nè, nì màsà cáhvi-né xì dìhùn xí-némà, vâchi còò seguru xan. Còó. Dios nì cahvi xi-nda, vâchi mii-yá, nicanicuahàn itiácú-yá, te cuisì mii-yá vâha ndisa inì-xi, te

sáha-yándó nsidanicuú ñà-ndùá xiñuhu nùù-ndà sàhà ñà-cundoo-nda contentu ñuhìví yohó.

¹⁸ Cachì-ní xì nècuàchì cuicà mà ñà-ndiá icà-né quida-ne obra; dispuestu ni cúndóó-né dasàn-né ñà-ndùá icúmí-nê, te cundehè ndahví-nè ñanìtnaha-ne, dandu obra ndiaha-ma cunduu ñà-cuicà-né.

¹⁹ Te na cáyà cuáhà ñà-jaàn, dandu cunduumà iñàha chindee xi-né dècuèndè stná inga (vida) vàxi xi-nda, te ducán ñhì stná-nè cutiacu ndisa-ne vida ndiaha.

²⁰⁻²¹ Yùhù cachí xì-ní Timoteo, cundiaa vàha-ní (palabra ìì) nì ndacu nuù-ní cundiaà-ní. Màsà quíhitnaha-ní xì nèhivì cáhàn ndevàha palabra loco mate cachí-nè chicá ndiaá ñà-ndùá ináhá mii-né. Ináhá-nê, cachí-nè, doco cachí va-ne, vàchi có-ndùá ducán. Dava nèhivì, ducán nì tuxi ini-nè, doco divi sàhámà nì tucù-nè nì quee-ne nùù ichì xiníndísâ víi-nda mii-yá.

Nì cúcúmí cuáhà-ní gracia xi-ya. Sà-íá.

Tutu Ùì Nì Tiaa San Pablo nùù Timoteo

¹ Yùhù nduí Pablo, iin nècuàchì nì nihì chuun ndiaha nùù Jesucristu, vèchi ducán nì chitnùnì ini Dios sàhí nacua nì chitnùnì stná ini-yà ñà-nìhì-ndà vida ndiaha nùù Jesucristu, vèchi ducán sàni cachi-yà xì-ndà.

² Te vichi cásàhùì xì mii-ní Timoteo, vèchi nahi dèhemaní nduu-ní. Te xicàn tàhví nùù Yua-nda Dios xì Stoho-ndà Jesucristu ñà-nì cuàha-ya mii-ní vihi gracia, te ni cùndéhe ndahví stná-yà mii-ní. Contentu ni coo-ní quida-ya.

Nansa nì cachi Pablo xì Timoteo ñà-nsinúú ini-nè nècuàchì mà

³ Nacua nìsa quida xì nìsa xinucuachi víi-né nùù Dios, ducán quidá stná yùhù vichi, còò ni-iin falta dandoho-xi sàxinìtnùnì. Pues divi nùù mii-yá xicàn tàhví sàhà-ní: ndui te ñuú naquímánì mii-yá sàhà-ní. Nicanicuahàn nsinúú inì mii-ní.

⁴ Mà cùì nándodí nansa nì sacu-ní daa. Yáha ga cuní cundehí mii-ní, dandu ndòò vaha inì anímè.

⁵ Yùhù nsinúú stná inì nansa quida-ní ñà-siempre nihnú vaha inì-ní mii-yá, màdiá danani úún-ní nduá. Primeru nitá xi-ní Loida, nìsa xinindisá-né mii-yá, dandu después dihi-ní Eunice, te vichi stná mii-ní, ducán nihnú vaha stná inì-níyà ináhí.

⁶ Ñàyùcànduá, xiñuhu nsinuu inì-ní nansa nì nihìtáhvì-ní na ní chitandòì ndahí dìnì-ní daa, te vichi cuní nandudì inì-ní quida-ní nacua nduú tàhví-ní.

⁷ Vèchi ¿índù ñàha quidá Espíritu xi Dios ini anima-ndà? ¿A chicá yúhì-ndà quidá-yá? Còò, ñà-chicá ndufuerté anima-ndà nduá quidá-yá; te sàhà mii-yá chicá cuú stnahá stná ini-ndà sàhà-ndà, te chicá nacání sahnú inì-ndà quidá-yá.

⁸ Ñàyùcànduá, màsà cùcáhán nùù-ní càhàn-ní xì nèhivì sàhà Stoho-ndà Señor, ni màsà cùcáhán nùù stná-ní sàhà yùhù ñà-ìé` vehecàa sàhà-yá. Còò. Dispuestu ni coo-ní ndoho stná-ní sàhà razón ndiaha xí-yá, vèchi icúmí-yâ chindee-yándò.

⁹ Nì dàcácu-ya anima-ndà, te nì cana-yàndò ñà-cunchicùn-ndà ichì ì-yá. Doco màdi sàhà obra vaha ni quida-nda nduámà; còò; cuisì sàhà-ñá ducán nì chitnùnì ini mii-yá, te sàhà-ñá màni gá stná ini-yà. Dècuèndè na táyòò ñuhivì, dandu nì chitnùnì ini-yà ñà-cuàha-yàndò gracia xi-ya nú sàni tenchicùn-ndà Jesucristu.

¹⁰ Te vichi sàni tùi vate gracia mà nì quida-ya, vèchi nì quixi Jesucristu ñuhivì yohó ñà-dacácu-yàndò, te sàhà-ñá nì cundee-yá nì càcu-nda, mà sàà-ndà cui ndisa-nda. Còò. Te vichi xitià razón ndiaha xí-yá, te ducán datnùù-yà anima nèhivì ñuhivì nansa nihì-né vida ndiaha nicanicuahàn ñà-mà nunca cui ndisa-ne.

¹¹ Pues divi razón mà nì nihì chuun cachitnùhi xì nèhivì, vèchi mii-yá, nì techuún-yà yùhù cùhìn chinahì nèhivì nsidanicuú ñuu.

¹² Te divi sàhà ñà-jaàn ìé` ndohí (quidá nèhivì). Doco có-cùcáhán nùù, vèchi ináhí ana xiníndísè; ndahà mii-yá sàni dàyáhi mií, te ináhí iin-ni icúmí-yâ cundiaa-yà vida xi dècuèndè quivì nasaì nùù-yá.

¹³ Dàñùhù nì dàcuàhì mii-ní, ñà-jaàn nsinuu vaha inì-ní, te màsà dàmá-níà, vèchi vètùnì chindeá mii-ní, cuisì xiñuhu ñà-iin-ni cunihnu vaha stná inì-ní mii-yá, te cuu stná inì-ní sàhà nsidaa nèhivì, vèchi ducán ndiá ìcà-ndà quida-nda nú nchícùn-ndà Jesucristu.

¹⁴ Sàhà poder xi Espíritu ìì cundiaa vaha-ní palabra ndàcuisì nì nacoì nùù-ní, vèchi iá-yà ini anima-ndà.

¹⁵ Nacua ináhá-ní tucu sàncánì ini nsidaa compañeru-ndà ndoó ladu Asia, có-cuú gá ini-nè sàhí. Iin nècuàchì mà nduú Figelo, te inga-nè mà nduú Hermógenes.

¹⁶ Doco Onesíforo, còò; có-cùcáhán nùù-né ñà-ìé` vehecàa yohó. Ni cùndéhe ndahví Dios-nè xì stná nèhivì vehe-ne, vèchi cuàhà xichi nì quixi-ne visita, te ndiaha gá nì ndòò vaha inì nì quida-ne.

¹⁷ Vàchi na ní quixi-ne ñuu Roma yohó, cuàhà nì xìcanuu-ne nì nanducu-né yùhù, dandu nì ndacùhun-ne yùhù.

¹⁸ Ñàyùcàndùá, ni cùndéhe ndahví Stoho-ndà Señor-nè na sáà quivì (nacuàha-nda cuenta nùù-yá). Vàchi mii-ní, ináhá vâha-ní ñà-cuàhà guá ñà-vâha nì quida stná-nè (xì-ndà) na ní sandoo-nda ñuu Éfeso.

2

Xiñuhu cuàhandee ini-ndà cunchicùn vii-ndà Jesucristu

¹ Nahi dèhe mií nduu-ní, te cachí xì-ní ñà-nì nsínúú vâha inì-ní nansa nì quida Jesucristu gracia sàhà-ndà, te nì ndèe anima-ndà ini anima mii-yá. Pues vichi divì sàhà gracia mà ni cúníhnú fuerte inì-ní.

² Cuàhà gá iñàha sàni dàcuàhí mii-ní, te nì inini stná cuàhà gá más nèhivì. Pues vichi xiñuhu nacàxin-ní itnii nècuàchì seguru, te chinaha stná-nínè ñà-nduú palabra nì dàcuàhí mii-ní, dandu vâtùni chinaha stná-nè más gà nèhivì.

³⁻⁴ Quidandee inì-ní sàhà nsidaa vida yáha-ní, nacia quidándéé ini iin soldadu vâha, vâchi soldadu xi Jesucristu nduú stná-ndà. Te cunaha-ní, nsidaa ana nduú soldadu, naóó níhni-te nsidaa chuun xi mii-té sàhà-ñá cuní-te cunchicùn vii-té ana dandacú nùù-té.

⁵ (Inga ejemplu): nú nduu-nda tècuachi dadavástnâhâ juego, dandu fuerza icúmí-ndà cunchicùn-ndà ley xi juego mà, vâchi nú coó, mà nunca quida-nda ganar.

⁶ Daaní, nú nduu-nda nècuàchì xitú, te quidáchúùn víi-nda itu-ndà, dandu primeru mii-nda cunduu nècuàchì níhì xì ñà-nduá caná viu mà.

⁷ Pues nacani vâha inì-ní sàhà ñà-nduá cachí xì-ní yohó, te icúmí Dios chindee-yá mii-ní ñà-cundaà vâha inì-ní sàhà nsidaájàn.

⁸ Nsinuu inì-ní sàhà Jesucristu ñà-nì natiacu-yà, te nduú stná-yà descendencia xi rey David. Divi ñà-jaàn nduá cachí xì nèhivì na (xicánúí) cachítñuhi xì-né razón ndiaha xí-yá.

⁹ Te sàhà-ñá quidé ducán, ñàyùcàndùá ndohí vichi, sà-ináhá-ní; dècuèndè ndiadí stnài vehècà vichi, vâchi quidá nèhivì cuenta ñà-nduú iin tè-tùha quini. Doco palabra xi Dios, còó, có-ndiàdíà, (xitià ìà).

¹⁰ Ñàyùcàndùá, quidándéé inì sàhà nsidaa ñà-nduá yáhi, vâchi nú ducán, dandu nihítáhvì nècuàchì nì nacàxin Dios sàà-nè càcu ndisa-ne quida Jesucristu, te nicanicuahàn cundoo ndiaha stná-nè nùù-yá (nahi ndohó).

¹¹ Ñà-ndáà nduú palabra yohó: nú icúmí-ndá cui-ndà sàhà-ñá nchícùn-ndà mii-yá, dandu icúmí stná-ndà natiacu-ndà, te cundoo-nda nùù-yá.

¹² Te nú dandohó nèhivì-ndó (sàhà-yá), dandu quivì sàà-yà cusahnú-yá, cutnahá stná-ndà xì-yá cusahnu-nda. Doco nú ni nácuáa-ndayá, dandu icúmí stná-yà nacuaà-yá ndohó.

¹³ Mate ndohó, có-xiníndísá-ndá, doco mii-yá, iin-ni icúmí-yâ quida vii-yá cumplir. Mà cúí nacuaà-yá (ñà-nduá sàni cachi-yà), vâchi mii-yá nduú-yá mii-yá.

Nansa xiñuhu quida nèhivì chináhá xì palabra xi Dios

¹⁴ Càhàn-ní xì nècuàchì (chináhá xì nèhivì xí Dios), te dansínúú inì-nínè sàhà palabra yohó. Cachí-ní xì-né ñà-Stoho-ndà Señor nduú ana ndácùcahan-nda, te sàháyùcàndùá màsà cùndóó-ndá nââ stnahá uun-nda sàhà chuun cuatiluha, vâchi nú ducán, mà níhìndèè-ndà ni-iyuhu ñà-vâha, cuisì danácání gá ini-ndà nèhivì iníní má.

¹⁵ Cuàhandee inì-ní (quida vii-ní) sàhà-ñá ndee vâha-ní nùù Dios, màdí cucahan nùù-ní (nùù-yá) na iin peón có-quidá víi. Quida vii-ní chuun xi-ní; chinaha vii-nínè palabra ndàcuisì divi nacia iá ndisa palabra mà.

¹⁶ Doco iin palabra chicuéhè, ni loho màsà quíhín casu-ní ñà-jaàn. Vâchi ¿índù iñàha nihì-ndà nùù palabra mà? Cuisì ñà-chicá más tùcù-ndà inga ichì có-nduú ichì mii-yá.

¹⁷ Vàchi nahi cuèhè xítia nihni iquicúñú-ndà, te saxá-ndó, ducán quidá stná dàñùhù (cò-ndiàá mà). Te divi ñà-jaàn nduá quidá stná dàñùhù chináhá Himeneo xì Fileto.

¹⁸ Vàchi sàni tùcù nècuàchìmà iin ichì tnùhù, te cachí-nè (màdiá quivì nùù-xí nati-acu-ndà); còó, ñà-sàni natiacu-ndà nduá, cachí-nè, te sàhà palabra jaàn sàni dacà-né dìni dava nèhivì, te có-xiníndísâ gá nècuàchìmà.

¹⁹ Doco tucu iá iin obra xi Dios; mà nunca ndañuhá; na iin cimientu fuerte nduá; te na ian itúú stná iin seña xi-ya ìcà-ñá (ndé cachá): “Ináhá Stoho-ndà Señor índù nèhivì nduú nèhivì xí-yá”. Te cachí stná palabra mà: “Nsidaa ana ndácùcahan xi quivì Cristu, ni nácóó dahuun-ne ichì malu”.

Ejemplu sàhà traste vehe nècuàchì cuicà

²⁰ Cuàhà traste yuhùnùhù ndoó vehe iin nècuàchì cuicà, te dava traste mà, oro ò plata nì cuyucàn, te cuisì ñà-viì quée inià. Doco dava traste mà, yutnù ò ñuhù nì cuyucàn, ñàyùcànduá xichúún-ndáñâ ndéni chuun nì cui.

²¹ (Pues ducán iá stná xì mii-nda.) Ñàyùcànduá, nú ni cúxíó nsidaa ñà-íá quini ini anima-ndà, dandu nahi traste vico-ma cunduu-nda, vàchi sà-íá ndoo anima-ndà, te vátùni quida-nda chuun nùù Stoho-ndà Dios; vátùni quida-nda nsidanicuú obra vaha.

²² Ñàyùcànduá, mii-ní, nandòdó dahuun-ní nsidaa ñà-nduá xího guá tècuachi dava ga, te cuisì ichì ndáa Dios cunchicùn-ní, divi ichì ndé nihnú vaha ini-ndà mii-yá, te cuú stnahá ini-ndà sàhà-ndà, vàchi ichì mà nihì-ndà cundoo màni nsidaa-nda. Divi ducán xiñuhu quida nsidaa ndohó nècuàchì iá ndoo anima-xi, te ndácùcahan-nda Stoho-ndà Señor.

²³ Doco nú ndoó nèhivì ndatnúhù cuàhà gá sàhà chuun cuatiluha có-ndiàá ndisa, dandu màsà quíhvítaha-ní xì-né, vàchi mà úhì quesaha-nsiá náâ stnahá-nsiá sàhà chuun nahi ñà-jaàn.

²⁴ Doco có-íá vaha nàá-ndà xì nèhivì, vàchi ana xinúcuáchí nùù Stoho-ndà Señor nduu-nda. Còó, vivíi xiñuhu càhàn-ndà xì-né, te dacuahá víi-ndané; ni cóó calma-ndà xì-né.

²⁵ Mate càhàn-nè dìquì ley xi-nda, doco vivíi-ni dansítnùù ini-ndané, vàchi vihini cundehè ndahví Dios-nè, te naxicocuñin ini-nè nacuni-nè índù palabra nduú palabra ndàcuisì,

²⁶ dandu nihì-né nacunihnu viì ini-nè, te càcu-ne nùù ndahà ñà-malu, vàchi quisì mà, nì dacà-sí dìni-né sàhà-ñá dandacú-si nùù-né nacua cudíi inì-si.

3

¹ Yùhù cuní cundaà inì-ní nansa icúmí coo quivì xínu tiempu yohó, vàchi tiempu ùhì cundua.

² Cuàhà gá nèhivì tiempu yucán chicá icúmí-nè cuu ini-nè sàhà mii-né, xì sàhà dìhùn stná; chicá ndiáa mii-né cucahan-né, te coo cuadú stná-nè, mà úhì càhàn-nè dìquì Dios. Ni mà ndúlócò gà-nè sàhà ñà-nduá cachí yuadíhí-nè; mà náquímànì stnahá gá stná-nè; te icúmí-nè cahíchì stná ini-nè nsidaa ñà-nduú chuun ì.

³ Te mà cúhí stnahá gá stná ini-nè. Mà cúcáhán gà-nè nàcùndoo vaha-ne; nècuàchì xicánúú uun xì ñà-tnùhù cunduu-ne, ni mà cá-chítnùnì gà ini-nè. Cuàhà gá icúmí-nè ndu-tehii stná-nè, te cahíchì stná ini-nè nsidaa ñà-nduú chuun vaha.

⁴ Mà úhì cahin stnahá-né, te mà cóó ì gá stná ndahà-né; mii-né nduú-né mii-né cucahan-né. Chicá cuu ini-nè sàhà ñà-cudíi ini-nè quida-ne, te màdì sàhà Dios.

⁵ Mate quidá-né na ian cahvi-néyà, doco mà cándísâ-né ndudu ì xí-yá. Doco mii-ní, màsà quíhvi tñaha-ní xì nècuàchì quidá ducán.

⁶ Vàchi nacua icúmí quida nèhivì tiempu mà, ducán sàquidá stná dava tiàa vichì, tùha-tè cacanu-tè vehe vehe, te na có-sàha nèhivì cuenta, dandu dacúníndísâ-te nècuàchì ñahà palabra xi-tè, vàchi mà fuerte ini nècuàchìmà sàhà-ñá dandoho guá cuàhà falta xi-ne mii-né; mà úhì quida ndevàha-ne cuàhà iñàha.

⁷ Ñàyùcànduá, cuàhà ley dacuahá-né, doco ni có-sâà-nè cundaà ini-nè ñà-nduú palabra ndàcuisì.

⁸ Te tiàa (chináhá chicuéhè xì-né) ducán, xíquida-tè nacua nì caquida tètàtnà nani Janes xì Jambres sàhana na ní cunì-te cadì-te nùu Moisés; te divi ducán quidá stná (tètnùhù) chináhá vichi, cuní stná-te cadì-te nùu (nèhivì chináhá viì) xì palabra ndàcuisì, vèchi yáha ga ndahví sàxínitnùnì-te, ñàyùcànduá có-cuní Dios cunindisa-nda palabra chináhà-te.

⁹ Doco cunaha-ní, divi jaàn-ní nùu-xí sàà-te, vèchi claru icúmí nsidaa nèhivì cundaà ini-nè sàhà tèmà ñà-loco-te, divi nacua nì xini stná nèhivì sàhana sàhà tètàtnà yucán.

¹⁰ Doco mii-ní, sàni xini-ní nsidaa ñà-nduá chináhì nèhivì; ináhá-ní xicánúú sahnúí, te nihnú vaha inì mii-yá. Ináhá stná-ní ñà-nduá nihnú inì quide vida xì. Te in áhá stná-ní ndee cahnú ínì, te cuú ndisa inì sàhà ñanìtnahi; quidá ndéé inì sàhà-né.

¹¹ Te sàni xini stná-ní ñà-cuàhà guá vida nì yàhi nì quida nèhivì, te nì ndoho cuahí, vèchi nì xini-ní nansa nì cuu xí na ní ìe ñuu Antioquía, xì ñuu Iconio, xì ñuu Listra. Ináhá-ní nansa nì quida quini nèhivì xì yucán. Doco (ansivéhé) Stoho-ndà Señor, nì xidahan-yá yùhù nùu nsidaa tnùndoho ma.

¹² (Pues ducán nì ndohi), vèchi nsidaa ana cuní cunchicùn viì ichì Jesucristu, icúmí stná-nè cuni-nè cuàhà vida quida nèhivì.

¹³ Doco nècuàhì malu, xì nècuàhì tnùhù, chicá más icúmí dàcà sàxínitnùnì-nè ñà-dàndàhvì stnahá-né.

¹⁴ Doco mii-ní, iin-ní cunihnu vaha inì-ní ñà-nduá sàni dàcuàhà-ní, te nì xinindisa-ní, vèchi ináhá-ní ana nduú nècuàhì nì chinaha xì-ní, ñà-nduú-né nècuàhì seguru.

¹⁵ Te ináhá stná-ní ñà-dècuèndè tii-ní sàni cundaà inì-ní nansa cachí tutu ì; te cunaha-ní, nú sàni cundaà ndisa ini-ndà nansa cachí tutu mà, te xiníndísà stná-ndà Jesucristu, vètùnì càcu anima-ndà.

¹⁶ Vèchi nsidaa ñà-nduá cachí nùu tutu ì, ñà-nì dàtnúu Dios sàxínitnùnì nèhivì nduá. Ñàyùcànduá, sàhà tutu mà vètùnì chinaha-ndà nèhivì ichì-yá. Vètùnì càhàn stná-ndà xì-né nú sàni tùcù-nè inga ichì, dandu chindee-ndané natenchicùn-nè ichì vaha, te dacuahá gá-ndané nansa cunduu-ne nèhivì ndàcuisì inì-xì. Pues sàhà nsidaa ñà-jaàn vètùnì quida tutu ì mà chuun

¹⁷ nùu ndohó nèhivì xí Dios, te ducán chindeá cuacatnahá nsidaa ñà-nduá xiñuhu nùu anima-ndà, mà quidá falta gá ni-iñaha nùu-ndà, te ducán mà úhì quida-nda ndéni chuun vaha nì cui.

4

¹ Vichi indéhe Yua-nda Dios xì Stoho-ndà Jesucristu, divi ana icúmí naxicocuïn cusahnú-yá, te nsidandaà-yà sàhà nsidaa nèhivì, nècuàhì itiacú xì nècuàhì nì xihì; pues mii-yá nduú ana indéhe, (te inínì-yá) ñà-chináhì mii-ni palabra cuàhìn cachì xì-ní yohó, (Timoteo):

² dacuítia-ní palabra ì xì-yá; coo tùha-ní (càhàn-ní xì nèhivì) nsidanicuú tiempu, ndéni hora nì cui. Nú iá falta xi-ne, càhàn viì-ní xì-né; dansítnùu inì-nínè sàhà falta xi-nemà, te nacuahandee inì-nínè áma naquida viì-né. Iin-ni quidandee inì-ní sàhà-né, te iin-ní dacuaha-nínè.

³ Vèchi vaxi iin quivì mà cándísà gá nèhivì cunini-ne palabra ndàcuisì. Còó, cuàhàn-nè nanducu-né cuàhà ana chinaha xì-né cuisì ñà-nduá cudí ini mii-né cunini-ne, vèchi ducán nchihò ini-nè quida-ne.

⁴ Cuàhàn-nè quidamaxínì-né. Mà cúnínì gá-né palabra ndàcuisì xí-yá, puru ñà-nduú cuentu uun cuàhàn-nè cunini-ne.

⁵ Doco mii-ní, nicanicuahàn nacani sahnú inì-ní. Quidandee inì-ní sàhà nsidaa tnùndoho icúmí-ní cunì-ní; (inicutu) cachitnùhu-ní razón ndiaha xí mii-yá, te daxínu viì-ní nsidaa chuun ì xì-yá sàni sàha-ya mii-ní.

⁶ Vèchi yùhù, sà-ìé ñà-nùhì (nùu Dios). Nahi promesa sàha-nda mii-yá nduí, vèchi sàni sàà hora caqui.

⁷ (Doco cunaha-ní, inii vida xi) sàni sàhandee gá inì quide ñà-nduá sàì quide; sàni xìnu nùu-xì ñà-nduá nì sàcùnahí quide, te iin-ni nihnú vaha inì Stoho-ndà Señor.

⁸ Sàháyùcànduá, icúmí-yá dacútáhvi-yá yùhù iin ñà-vaha na sàà quivì ndiaha vaxi xi-nda, vachi iin juez ndàcuisì inì-xi nduú-yá. Doco màdì cuisì yùhù nihitáhvi na sàà quivì mà. Còó, vachi cundiatú stná nsidanicuú ana cudí inì-xi cuninùu xì-yá na quivì naxicocuín-yà.

Ñà-nduá nì cachi Pablo na ní xicàn-nè favor nùu Timoteo, te nì ndaquindèè stná-nè xì nècuàchìmà

⁹ Sacúndáhvi` nùu-ní yàchì quixi-ní yohó.

¹⁰ Vachi sàni nacoo nihni Demas yùhù, vachi chicá nì cudì ini-nè ñà-nduá iá ñuhivì yohó, te ñàyùcànduá sàcuàhàn-nè ñuu Tesalónica. Daaní, Crescente, ladu Galacia cuàhàn-nè; te Tito, ndè ladu Dalmacia cuàhàn nècuàchìmà.

¹¹ Làcà mindaa Lucas iá xì vichi. Ñàyùcànduá, cachí xì-ní ñà-nacuaca-ní Marcos cutnahá-nsiá quixi, vachi (ináhì), vátùni chindee stná-nè yùhù ñà-quide chuun ì xì mii-yá.

¹² Daaní, Tíquico, sàni techuín-nè cuàhàn-nè ñuu Éfeso.

¹³ Cunaha-ní, iá iin dòí nì ndòo vehe Carpo ñuu Troas. Diviajàn naquihin-ní, te cunihi-ní quixi na quivì quixi-ní. Te cuní stnáì quixi tutu xi, xì stná libru xi; doco tutu mà nduá chicá xiñuhu (nùí).

¹⁴⁻¹⁵ Cuidadu coo-ní xì herreru nani Alejandro, vachi cuàhà gá dañu nì quida-ne nì càhàn quini-ne dìquí, xì dìquí stná ñà-nduá nì cachi-nsì. Doco icúmí Stoho-ndà Señor cuàha-yanè según ñà-nduá nì quida-ne.

¹⁶ Cunaha-ní, primeru xichi nì càhìn sàhà mií nùu juez, còò ni-iin tiàa ni chindéé xì. Cahnú gá Dios màsà cútní-yá cuenta sàhà ñà-nduá nì quida-nemà, vachi nsidaa-né nì nacoo nihni-ne yùhù.

¹⁷ Doco mii-yá, còó; iín stná-yà cutnàhâ-yá xì na ní sàhìn yucán, te nì nacuàhandee ini-yà yùhù, vátùni nì dàxínui chuun icúmí ñà-càhìn xì nèhivì palabra xi-ya, te cunini nsidanicuú raza nèhivì. Daaní, (na ní nsihi nì càhìn), dandu nì càcui, mate cuàhàn-te dandáñúhú dahuun-tè yùhù nì cùí.

¹⁸ Te cunaha-ní, icúmí Stoho-ndà Señor nacuidahan-yá yùhù nùu nsidaa ñà-nduá quida nèhivì malu, vachi iin-ni icúmí-yá cundiaa-yá yùhù ndè cachi sàì ñuhivì ì xì-yá iá ansivì. Ansivéhé cahnú-yá nicanicuàhàn, amén.

¹⁹ Casàhú-ní xì Prisca xì Aquila, xì stná Onesíforo xì nèhivì vehe-ne.

²⁰ (Cachitnùhu stnáì xì-ní) ñà-nì ndòo Erasto ñuu Corinto. Te Trófimo, ñuu Mileto nì ndòo-ne, vachi cuhí-nè.

²¹ Yùhù sacúndáhvi` nùu-ní ñà-nì quixí yáchì-ní antes tiempu vixin. Cásàhú Eubulu xì-ní, te cásàhú stná Pudente, xì Lino xì Claudia, xì nsidaa gá nèhivì nduú hermanu.

²² Ni cútnàhâ anima-ní xì Stoho-ndà Jesucristu, te cuàhà gracia xi-ya ni cùcúmí-nì. Sà-ìá.

Tutu Nì Tiaa San Pablo nùu Tito

¹ Yuhù nduí Pablo, iin ana xinúcuáchí nùu Dios. Ñàyùcàndùá xicánúí cáhìn xì nèhivì sàhà-ñá vátùnì sàà nècuàchì sàni nacàxin-ya cunindisá-néyà. Vàchi ñà-jaàn nduú chuun nì nihí nùu Jesucristu quide, dandu cundaà ini nèhivì índù-ñá nduú palabra ndàcuìsì sàhà nansa cahvi viì-ndàyá,

² xì sàhà stná tnundé ini ndiatu-nda ñà-nihì-ndà vida ndiaha nicanicuahàn, vàchi ndè na táyô ñuhiví, sàni quida-ya comprometer nihítàhvì-ndà ducán, te mii-yá, mà nunca dandahví-yàndó.

³ Te vichi sàni dàtúi-ya palabra mà, vàchi sàni sàà meru tiempu tùa, te cunìtnùhu-ndañá. Ñàyùcàndùá, xicánúí cachítnùhi palabra mà nacua nì dandàcú-yá nùu quide, vàchi mii-yá, cuní-yà dacácu-ya (nsidaa) nèhivì.

⁴ Pues, vichi tiaí tutu yohó nùu mii-ní, Tito, vàchi nahi dèhe ndise nduu-ní, ñà-iin-ni sàni xinindisá stná-ní ichì váha. Ñàyùcàndùá, xicàn tàhvì nùu Yua-nda Dios xì Stoho-ndà Jesucristu, divi ana nì dàcácu xi-nda, te xíquèn ñà-nì cuáha-ya mii-ní cuàhà gracia xi-ya, te ni cundéhe ndahví stná-yà mii-ní; contentu ni coo-ní quida-ya.

Ñà-nduú chuun nì ndacu nuu Tito quida-ne ñuu Creta

⁵ Na ní quei ndé iá-ní jaàn ñuu Creta, nì cachì xì-ní ñà-nì ndóo-ní daxínu-ní chuun cumáni yá. Te iin chuun ma nduú ñà-nacàxin-nda nècuàchì cunuù xì nèhivì xí Dios iin iin ñuu. Ñàyùcàndùá, nacua nì cachì xì-ní, divi ducán quida-ní.

⁶ Doco cuisì tiàa cò falta-xi nì cécúndúú ana nacàxin ma. Vàchi xiñuhu cunduu-ne tiàa iá xì imindaa nècuàchì vehe-xi, te nì cundúú stná-nè iin ana iníní víi dèhe-xi, vàchi nù cachí nèhivì escandaloso dèhe-ne, te ò có-íá sahnú inià, dandu màsà quéé nècuàchì mà nombradu.

⁷ Vàchi iin tiàa inùu xì nèhivì cahvi xi Dios, icúmí-nè cunduu-ne iin nècuàchì cò falta-xi, vàchi divi mii-yá nduú ana xinúcuáchí-nè nùu-xí. Ñàyùcàndùá, màsà cundúú-nè nècuàchì cuadú, ò iin nècuàchì xidá yàchì inì-xi; còo. Ni màsà cundúú stná-nè ana tùha coho, ò iin nècuàchì cáhàn tèhì. Ni màsà cundúú stná-nè iin ana cuú inì-xi sàhà dìhùn.

⁸ Te xiñuhu cunduu stná-nè iin tiàa cudí inì-xi dayáha visita vehe-xi; iin nèhivì cudí inì-xi sàhà nsidanicuú chuun vàha ni cundúú-nè. Doco màsà cundúú-nè nècuàchì quidá nansa ni nì cui xi mii-xí; còo. Nècuàchì sahnú inì-xi ni cundúú-nè, nècuàchì ì ndisa inì-xi, vàchi nsidaa nècuàchì inùu mà, xiñuhu cunduu-ne nècuàchì ndàcuìsì inì-xi.

⁹ Iin-ni xiñuhu cunchicùn viì-nè palabra ndàcuìsì xí-yá nacua nì dàcuàhá nèhivì-nè, dandu vátùnì nacua handee stnahá ini-nè, te nihì stná-nè naxiconihí víi-nè nùu nècuàchì xítñùhu, vàchi divi dàñùhù ndàcuìsì nduá nì dàcuàhá-nè.

¹⁰ Vàchi cunaha-ní, ndoó cuàhà nèhivì chináhá ndevàha iin palabra loco, te dandahví uun-ne nèhivì. Nècuàchì chicá quidá ducán xínduu nècuàchì raza Judea.

¹¹ Ñàyùcàndùá, xiñuhu cadi xì nùu-nè. Vàchi dava xaan sàni dacà-nè dìni nsidanicuú nèhivì ndoó iin vehe. Te dècuèndè quiyàhvì stná-nè na chináhá-nè palabra chicuèhè mà; ñàyùcàndùá, dìhùn chicuèhè nduú stná ñà-nduá níhì-nè mà.

Ñà-nduá nì sanduu modo xi nèhivì ñuu Creta sànahá

¹²⁻¹³ Ñà-ndáà nduá nì cachi iin tiàa ñuu jaàn na ní càhàn-te sàhù xì nècuàchì ñuù-te. Te dohó nì cachì-te: “Ndohó nècuàchì ñuu Creta yohó, de por sí tnuhu-nda; nahi quisì dàná nduú stná-ndà, vàchi ndadi sástñùhù-ndà, te dusan gá stná-ndà”, nì cachì-te. Ñàyùcàndùá, icúmí-ní chinaha víi-ní nècuàchì ndoó jaàn sàhà-ñá cunihnu viì ndisa ini-nè nsidaa ñà-nduá xiñuhu cunindisá-nè.

¹⁴ Màsà quíhín casu gá-nè ñà-nduú cuentu uun nacání tè-raza Judea xì-nè; ni màsà cúníní gá stná-nè ñà-nduá dandacú ni-iin nèhivì sàni tucù ichì ndàcuìsì.

¹⁵ Nú iá ndoo ndisa anima-ndà, dandu ndiaha gá iá nsidaa ñà-ìá ñuhiví nùù-ndà. Doco nèhiví nihnú sìquini inì-xi, te có-xiníndísâ-né, còó ni-ìñàha nduú ñà-vìì nùù-né, vèchi dècuèndè stná sàxinítnùnì-nè có-ìá viì gá. Ni có-cùcáhán gâ nùù-né ñà-quini guá nihnú ini-nè.

¹⁶ Vèchi ndahví gâ modo xi-ne, mà túha-ne cunini-ne, ñàyùcànduá mà cúí quida-ne ni-iin chuun viì. Mate cachí-nè ináhá-nê Dios, doco còó, vèchi sàhà modo quidá-né, ñà-jaàn cundáà ini-ndà sàni nacuaà-néyà.

2

¹ Doco mii-ní, cuisì ñà-ìá viì ni cúndúú ñà-nduá chinahà-ní nèhiví.

² Nècuàchì tiàa sahnú, màsà cóhó-né, te xíni-ne. Xiñuhu nacani sahnú stná ini-nè, te quida viì-né sàhà ñà-nì-còó tnùñuhu xí nèhiví nùù-né. Fuerte ni cúníndísâ stná-nè mii-yá. Te ni cuú stná ini-nè sàhà ñanìtnaha-ne nacua ndiá ìcà-né. Te iin-ni ni cóó calma stná-nè.

³⁻⁴ Daaní, stná nècuàchì ñahà sahnú, divi ducán ni quidá stná-nè. Ni cacánúú ví-né nacua xiñuhu quida nsidaa ndohó nèhiví xí mii-yá. Màsà cuítnùhu-ne ñanìtnaha-ne, te màsà tníí stná viciu-nè. Cuisì ichì váha ni cuáha-ne nècuàchì ñahà chicá cuachi sàhà-ñá ducán cutùha stná nècuàchì mà nansa cuu ndisa stná ini-nè sàhà ì-né xí sàhà dèhe-ne.

⁵ Te ni cútùha stná-nè nacani sahnú ini-nè, te cunihnu ì stná ini-nè. Ni cúnsìhi stná ini-nè chuun vehe-ne, te ni cúníhnú mánì stná ini-nè. Daaní, icúmí stná-nè cunini viì-né ì-né sàhà-ñá màsà sàà-nè dandáñúhú-nê tnùñuhu xí palabra xi Dios.

⁶ Daaní, nècuàchì tiàa chicá cuachi, cachì-ní xí-né ñà-nì cúndóó sahnú-né.

⁷ Te mii-ní tu, cuisì ichì váha ni cúnchícùn-ní sàhà-ñá màsà tucù nècuàchì dava ga. Te na chináhà-nínè, càhàn ndàà-ní xí-né, càhàn tnùñuhu-ní.

⁸ Cuisì ñà-ìá viì ni càhàn-ní xí-né sàhà-ñá màsà níhì ni-iin nèhiví cachì-nè iá falta xi-ní, vèchi nú ni càhàn viì-ndà, dandu cucahan nùù nècuàchì xiní ùhì xí-ndà ñà-có-níhì-né nansa daquéè cuàchi-ne dìquì-ndà.

⁹ Cachì-ní xí peón ndoó saín nùù lamú-xi ñà-nì cúnínì-né ñà-nduá cachí nècuàchì mà. Icúmí-nè quida-ne cumplir ñà-nduá dandacú lamú xi-ne; màsà náná táchì-né xí nècuàchì mà.

¹⁰ Ni màsà cuídá cuíhná stná-nè ñà-nduú biene xi nècuàchì mà; còó; nècuàchì ndàcuisì inì-xi ni cúndúú-né sàhà-ñá ducán ni cundáà ini nèhiví ñà-ndiaha guá iá ley xi mii-yá ana dacácu xi-nda.

¹¹ Vèchi vichi sàni sàà tiempu ni xinimànì Dios nèhiví ñuhiví; sà-ìá nansa càcu anima nsidaa-né.

¹² Te divi sàhà ñà-yùcán cundáà ini-ndà xiñuhu nacoò dahuun-nda ichì malu; màsà xího gá-ndà ñà-nduá xího guá nèhiví dava ga ndoó ñuhiví yohó. Còó, vèchi sàhà gracia xi-ya sàni cundáà ini-ndà nansa xiñuhu quida-nda na ndoo-va-nda ñuhiví yohó, ñà-cundoo sahnú-nda, te cunihnu ndàcuisì ini-ndà nacua cuní Dios quida-nda.

¹³ Te ndiatú stná-ndà sàà quivì ndiaha nduú tnùndé ini xi-nda, divi quivì nanchì ndiaha (ansivi), te cuninùù-ndà naxícócuñ Jesucristu, divi ana ni dàcácu xi-nda. Te mii-yá, nahnú gá obra xi-ya, vèchi Dios nduú-yá.

¹⁴ Te ni sàha-ya vida xi-ya ni dànáà-yá sàhà-ndà sàhà-ñá càcu-nda nùù ichì malu, te ndoo stná anima-ndà, dandu sàà-ndà cunduu ndisa-nda nèhiví xí-yá, te cudì ini-ndà quida stná-ndà cuàhà ñà-vàha.

¹⁵ Cunaha-ní, ñà-jaàn nduá icúmí-ní cachì-ní xí nèhiví yucán. Càhàn-ní xí-né sàhà-ñá quida-neà cumplir. Te nú iá falta xi-ne, dandu càhàn stná-ní xí-né, vèchi icúmí-ní derechu. Màdí cahíchì ini ni-iin nèhiví mii-ní.

3

Nansa xiñuhu quida-nda na ndoo-nda ñuhiví yohó

¹ Dansínúú inì-ní (nèhivì xí-ní) ñà-ìcúmí coo tnùñuhu xi-nda nùù nèhivì xí gobiernu xì nùù nsidaa stná tè-nìhí chuun. Ni cúníní-ndá ñà-ndùá cachí-te, te ni coó stná voluntad xi-nda chindee-nda nsidanicuú chuun vaha.

² Te màsà cáhàn quini-nda dìquì ni-iin nèhivì. Ni cúndóó mánì nsidaa-nda. Màsà náâ stnaha-nda. Còó. Ni cáhàn tnùñuhu-nda xi nsidaa nèhivì.

³ Vàchi ndohó stná, nahi quisì nì sandoo-nda ñuhiví antes. Cónisá íníní-ndá Dios. Iin ichì tnùhù nduá nì sanchicùn-ndà. Nsidanuu clase viciu nì tnii xi-nda, te cuàhà diversión chicuèhè nìsa nanducu-nda. De por sí, mà váha-nda dihna, vachi nìsa cumbidia stnahá ini-ndà, te nìsa cahíchì stnahá stná ini-ndà. Cuàhà gá nìsa xini ùhì stnaha-nda sàhà-ndà.

⁴ Doco nì sàà iin quivì nì xinitnùhu-nda sàhà Dios, ñà-vàtùni dacácu-yàndó, ñàyùcàndùá nì cundaà ini-ndà, vaha ga ini-yà, te màni gá stná ini-yà.

⁵ Dandu nì dàcácu-ya anima-ndà, doco màdì sàhà ñà-nì ía obra vaha ni quidá ndohó. Còó. Cuisì sàhà ñà-nì indehè ndahví-yàndó, ñàyùcàndùá nì càcu-nda, vachi nì nsidan-doo-ya cuàchi íá nùù anima-ndà ñà-nì nacacu saa-nda (ñuhiví ìì xí-yá), te nì ndusaa stná anima-ndà nì quida Espíritu ìì xí-yá.

⁶ Vachi ñà-nì dàcácu Jesucristu ndohó, ñàyùcàndùá cuàhà gá nì dàquixí stná Yua-nda Dios Espíritu xi-ya anima-ndà.

⁷ Ñàyùcàndùá, sàhà gracia xi-ya sàni ndee vaha-nda nùù-yá, te sà-íá ndisa tnùndé ini xi-nda ñà-nìhitáhvi-ndà vida ndiaha nicanicuahàn.

⁸ Nsidaa ñà-sàni cachì xì-ní yohó, vátùni cahvi-ní xán. Doco xiñuhu stná cáhàn fuerte-ní palabra yohó xì dava ga nèhivì cahvi stná xí-yá, áma cúnsihi ini-nè quida-ne nsidanicuú chuun viì. Vachi palabra ndiaha nduá, te nú ni quida-ndañá, dandísá, cuàhà gá ñà-ndiaha nìhì-ndà.

⁹ Doco nú xini-ndà náâ stnahá nèhivì sàhà iin chuun có-nduú ñà-ndiàá ndisa, dandu màsà quíhvi-ní sàhámà. Ni màsà ndúlócò stná-ní sàhà cuentu uun sàhà xii-ndà. Stná ley sàna, màsà náâ-ní xì nèhivì sàhámà, vachi còò ni-iñàha tavà-ndà quida-nda ducán.

¹⁰ Nú íá iin nècuàchì grupu xi-nsia tùha cahnde dava xi-nsiá, dandu cáhàn-ní xì-né iin ò ùi xichi. Te nú có-quihín casu-nè, dandu nacoo dahuun-nsianè.

¹¹ Vachi ináhá-ndá sàni tùcù-nè inga ichì. Íá ndisa cuàchi-ne, te mismo cuàchi-ne icúmí dayúhì xì-né.

Nansa nihnú ini Pablo quida-ne quivì nùù-xí

¹² Yùhù nihnú inì techuín Artemas ò Tíquico sàà-nè ndé íá-ní. Te nú sàni sàà-nè jaàn, dandu quida-ní lucha quixi-ní ñuu Nicópolis, vachi divi ñuu mà nihnú inì coi inii tiempu vixin.

¹³ Te na sàà stná Apolos xì abogadu nani Zenas ndé íá-ní, dandu cunsihi inì-ní chindee-ní nècuàchìmà. Quida-ní arreglar nansa cùhùn-nè chicá nùù-xí, te màsà cúmàni ni-iñàha nùù-né cùhùn-nè.

¹⁴ Cunaha-ní, nsidaa nèhivì xì-ndà, xiñuhu cutùha-ne quidachuún-né iin chuun vaha sàhà-ñá màsà cúndóó uun-ne ñuhiví, vachi nú ducán ni quida-nda, dandu vátùni chindee stná-ndà quivì íá necesidad nùù iin ñanìtnaha-nda.

¹⁵ Nsidaa nècuàchì ndoó yohó, cásàhú-nè xì-ní. Te mii-ní, casàhú stná-ní xì nsidaa nècuàchì cuú inì-xi sàhà-nsí ñà-iin-ni xiníndísá stná-nsì mii-yá. Ni cúcúmí cuàhà nsidaa-nsiá gracia xi-ya. Sà-íá.

Tutu Nì Tiaa San Pablo nùu Filemón

¹ Yùhù nduí Pablo. Te vichi ndiadí vehecàa sàhà-ñá nchícùn Jesucristu. Te ñani-ndà Timoteo, yohó iá stná-nè xí. Te cásàhú-nsì xì mii-ní Filemón, vèchi iin-ni quidá stná-ní chuun xì Jesús (nahi nsiùhù). Te màni cuáhà-ní nùu-nsí.

² Te cásàhú stná-nsì xì doña Apia, vèchi màni stná-nè nùu-nsí na iin cùha-nda. Daaní, cásàhú stná-nsì xì Arquipo, vèchi iin-ni nchícùn stná-te capitán ndiaha xí-nda. Stná nsidaa ana natácá cahvi xì Dios vehe-nsia, cásàhú stná-nsì xì-né.

³ (Pues vichi xícàn tàhvì-nsí nùu) Yua-nda Dios xì Stoho-ndà Jesucristu ñà-ni cùnì màni-yá nsidaa-nsiá, te contentu ni cúndóo-nsiá quida-ya.

Ñà-nduá nì xicàn Pablo nùu Filemón

⁴ Yùhù naquímánì mii-yá sàhà mii-ní na cada xicàn tàhvì nùu-yá sàhà-ní,

⁵ vèchi sàni xinitnùhi ñà-cuàhà guá cuú inì-ní sàhà nsidaa nèhivì xì Dios, te xiníndísá vaha stná-ní Stoho-ndà Jesús.

⁶ Ñàyùcànduá, xicàn tàhvì nùu Dios ñà-ni sàà-ní mànihì inì-ní ñà-cuàhà guá ñà-vaha ndiaha sàni nihitáhvi-ndà nùu Jesucristu, vèchi nú ducán cundaà vaha ini-ndà, dandu vátuni quida stná-ndà cuàhà obra, te ñà-jaàn nduá ndiá icà-ndà quida-nda nú sàni xinidisa-nda mii-yá.

⁷ Cunaha-ní, cuàhà gá cudû inì ñà-cùu guá inì-ní sàhà nèhivì xì Dios. Ndiaha gá sàni ndòo inì vichi, vèchi túha-ní nacuahandee inì-ní nèhivì xí-yá.

⁸ Ñàyùcànduá, sàhà-ñá nchícùn stná-ní Cristu, mà úhì dandacuí nùu-ní quida-ní favor sàhà iin chuun cuú ofrecer.

⁹ Doco còo, mà quidé ducán; chicá vaha cuacundahví nùu-ní, vèchi ináhì cuàhà gá cuú stnahá ini-ndà sàhà-ndà. Te cunì nsinuu stná inì-ní ñà-nduú iin nècuàhì chicá sàni sahnù cuahà, te ndiadí stná ñà-ìé`ladu xì Jesucristu.

¹⁰ Ñàyùcànduá sacúndáhvi` nùu-ní ñà-nacuaca-ní Onésimo, vèchi na iin dèhi nduú-né. Ndiadí vahi yohó, doco sàhà yùhù sàni nihì stná-nè nì xinindisá-né mii-yá.

¹¹ Cunaha-ní, mate antes cónì quidá víi-né na ní sa-ia-ne nùu-ní, doco vichi vátuni quida vii-né chuun vaha nùu-ní, xì stná nùu yùhù.

¹² Te vichi cuàhìn techuín-nè nasaa-nè ndé iá-ní. Ñàyùcànduá, quidamanì-ní nacuaca-nínè, vèchi màni cuáhà-né nùu.

¹³ Cachì-ní, vèchi nisa nihnu inì ndòo-ne xì yohó ñà-coo-ne cuenta xì mii-ní, te cunucuachi-né nùu na ié`vehecàa yohó sàhà-ñá chicá cuitià razón ndiaha xí-yá.

¹⁴ Doco còo, chicá vaha màsà ndòo-ne yohó nú tàñáha ga cachì mii-ní, vèchi có-cùnì cundua fuerza quida-ní favor mà. Còo, ñà-nduá cudû ini mii-ní ni cúnduá, cuní.

¹⁵ Mate iin ùi quivì nì quee-ne nùu-ní, doco quida-ní cuenta na ian ducán (nì quida Dios) sàhà ñà-vátuni nàcòo tu-ne xì-ní nicanicuahàn.

¹⁶ Doco vichi, mà cúnduú gá-nè peón nì xiin-ní, còo. Nahi ñani-ní cunduu-ne, te chicá ndiaá iin ñani-ndà nùu iin peón. Màni cuáhà-né nùu, doco chicá más icúmí-nè coo manì-né nùu mii-ní, vèchi cuàhàn-nè coo-ne xì-ní vehe-ní, cutnahá stná-nè xì-ní cahvi-nsiá Stoho-ndà Señor.

¹⁷ Ñàyùcànduá, nú nihnú stná inì-ní ñà-iin-ni xínduu-nda compañeru (nùu Dios), dandu quida stná-ní xì nècuàhì jaàn na ian quidà-ní xì yùhù.

¹⁸ Te nú iá iin cuàchi nì quida-ne nùu-ní, ò nú iá ñà-nduá iníhíca-nè, dandu nùu yùhù quida-níà cobrar.

¹⁹ Yùhù nduí Pablo, te icúmì danái-ñà. Cunaha-ní, ndahà yùhù tiaí palabra yohó. Doco sà-ináhà-ní, cuàhà gá iníhíca stná mii-ní nùu yùhù, te có-xiñùhù dansínúu inì mii-ní ñà-sàhà yùhù nì nanihitáhvi-ní vida xì-ní.

²⁰ Ñàni, sacúndáhvî` nùù-ní, quidamanì-ní xì ñà-jaàn, vàchi iin-ni nchícùn-ndà Stoho-ndà Señor. Quida-ní favor sàhà-ñá ni coí contentu, vàchi (ináhá-nî) iin-ni xiníndísá-ndá mii-yá.

²¹ Pues yùhù, cundéé inì mii-ní ñà-cunini-ní yùhù; te ináhî icúmí-nî quida-ní ñà-nduá cachî; ndè más gà icúmí-nî quida-ní, ñàyùcànduá, tiaí carta yohó nùù-ní.

²² Daaní, cuní stnàì ni coó tùha iin vehe tii ñà-coi ndé iá-nî, vàchi icúmî esperanza ñà-chindee Dios yùhù, vàchi divi ñà-jaàn nduá xícàn tàhvì-nsiá nùù-yá sàhí. Ñàyùcànduá, nihnú inì sàì ndé ndoó-nsiá.

²³ Yohó iá stná Epafra, ndiadí stná-nè sàhà-ñá nchícùn-nè Jesucristu. Te cásàhú stná-nè xì mii-ní,

²⁴ te cásàhú gà stná dava ga compañerùì xì-ní, divi Marcos, xì Aristarco, xì Demas, xì Lucas; vàchi xínduu stná-ne ana chindéé xî sàhà chuun (xi Dios).

²⁵ Pues vichi ni níhitàhvì cuáhà-nsiá gracia xi Stoho-ndà Jesucristu ini anima-nsiá. Sà-ìá.

Tutu Nì Tiaa Iin Nèhivì xí Dios nùu Nècuàchì Hebreu

Nì quixi Dèhemanì Dios, nì cachitnùhu-ya xì nèhivì ñuhivì ñà-nduú palabra xi Yua-yá

¹ Sàhaha na cuní Dios càhàn-yà xì xii-ndà, nìsa techuún-yá iin nèhivì ñà-cachitnùhu-ne xì nècuàchì mà palabra xi-ya. Cuàhà gá xichi nì quida-ya ducán, te cuàhà gá ejemplu nìsa xichuún-yá na ní cachitnùhu-ya palabra mà.

² Doco quivì vichi na cuàhàn xinu tiempu, Dèhemanì-yá nduú ana nì techuún-yá càhàn xii-ndà. Vàchi sàhà ndahà fuerte Dèhemanì-yá nì quidavàha-ya nsidanicuú ñuhivì iá, te nì chitnùní stná ini-yà ñà-divi Yà-mà cunduu ana nìhitàhvi dandacú sàhà nsidaámà.

³ Cunaha-nsiá, nacua ndiaha gá mii-yá, ducán ndiaha stná Dèhemanì-yá, na ian nduà-yá nduú Yà-mà, vàchi iin-ni nacua iá-yà, divi ducán iá stná Yà-mà. Te Yà-mà, sàha-ñá fuerte dandacú ndiaha-yá, ñàyùcànduá quidáchuún víi nsidanicuú ñà-íá ñuhivì. Te na ní nsihì nì nsidandoo-ya cuàchi-nda, dandu mànuhù-yá ansivi, te nì sàcòo-ya ladu cuàhá Yuandiáhá-yâ.

⁴ Ñàyùcànduá, chicá más ndiaá-yà nùu nsidaa ángel, vàchi nì chitnùní ini Yuamánì-yá ñà-cachi-ndà xì Jesús Dèhemanì-yá, te ñà-yòhó nduú ñà-chicá ndiaá nùu nsidaa ñà-nduá cachí-ndà xì iin ángel.

⁵ Vàchi còò ni-iin ángel nì nìhitàhvi cachi Dios xì-né dohó:

Dèhemanì nduu-ní: vichi sà-itiácù-ní nì guide.

(Còó, có-càchí-yà ducán xì ni-iin ángel.)

Daaní, inga xichi dohó nì cachi stná-yà (sàhà Jesús):

Na quidá iin yua, ducán icúmí guide xì mii-yá; te mii-yá, na iin dèhi cunduu stná-yà nùí.

(Nì cónì cachí Dios ducán xì ni-iin ángel.)

⁶ Daaní, nì chitnùní stná ini-yà quesaa Dèhemanì-yá ñuhivì yohó, te quivì nì cuu ducán, dandu nì cachi-yà (xì nsidaa ángel xi-ya):

Nsidaa nsiohó ana nduú ángel xi, icúmí-ndâ cahvi-ndá Dèhemanì yohó.

⁷ Doco na ní càhàn-yà sàhà ángel mà, dohó nì cachi-yà:

Nì quidavàha-ya ángel xi-ya (ñà-cacanuú yàchì-nè) nahi tàchì; vàchi nahi mozo xinúcuáchí nùu-yá nduú-né (sàha-ne castigu xi-ya) nahi ñuhu xixìn.

⁸ Doco na ní càhàn-yà sàhà Dèhemanì-yá, dohó nì cachi-yà:

Dios nduu-ní, te nicanicuahàn icúmí-nì cusahnu-ní; te micuísì modo vii icúmí-nì dandacu-ní nùu nèhivì.

⁹ Cuú ndisa ini-ní sàhà nsidaa ñà-íá vii, doco có-cuú dahuun ini-ní ni-iyuhu sàhà cuàchi. Ñàyùcànduá, nùu mii-yá ana cahvi-ní sàni nìhitàhvi-ní ñà-cudiì cuàhà ini-ní; cunaha-ní, chicá icúmí-nì cudiì ini-ní nùu nsidaa gá ana cutnàhâ xí-nì.

¹⁰ Daaní, (inga xaan nacánì nansa nì cachi stná nèhivì na càhàn-nè xì-yá):

Stoho-nsì Señor, sàhaha nì quidavàha-ní ñuhivì. Ndahà mii-ní nì cuàha stná nsidaa sitnúu itándiaa ansivi.

¹¹ Te mate nsidaájàn icúmíâ nsiha, doco mii-ní, còó; nicanicuahàn icúmí-nì coo-ní. Nsidaa ñà-íá ñuhivì, icúmíâ ndutuhá, na ian sìcoto.

¹² Te na ian nacáhnù vii nèhivì iin dùhnù-né, ducán icúmí-nì quida-ní xì ansivi, vàchi icúmíâ nadàma, na ian nadama-nda ñà-ndixì-ndà. Doco mii-ní, còó. Iin-ni icúmí-nì coo-ní; mà nunca sàà quivì ndañuhu-ní, nì cachi-nè.

¹³ Doco Dios, cónì càchí-yà xì ni-iin ángel palabra yohó; (cuisì mii Dèhemanì-yá nì cachi xì-yá dohó):

Yohó coo-ní ladu cuahî ndè cachi sàà cundeí nùu nsidaa ana xiní ùhì xì-ní; dandu cusahnú fuerte-ní nùu-né, nì cachi-yà.

¹⁴ Vàchi ángel, ináhá-ndá ñà-cuisì espíritu vii xinúcuáchí nùu Dios nduú-né; ndacú-ní nùu-né ñà-cacanu-ne cunucuachi-né nùu-yá, te chindee-né nsidaa ndohó nèhivì icúmí càcu anima-xi.

2

Màsà nunca nandòdó-nda gracia xi-ya ñà-cùnì-yà dacácu-ya anima-nda

¹ Sàhà nsidaájàn, cuàhà gá xiñuhu cunihnu vaha ini-nda razón ndiaha sàni xinitnùhu-nda, còtó cueé-ni cueé-ni tùcù-nda inga ichì.

² Vàchi ley sàhana, mate cuisì ángel nduú ana nì cachitnùhu xi-nda sàhà-ñá, doco fuerte nì sandiaa stná, te nècuàchì cónì ndúlócò sàhà-ñá, iin castigu cahnú nì nìhì-né nacua ndiá icà cuu xi nsidaa nèhivì có-ínì.

³ Ñàyùcàndüá, ndohó nècuàchì (tiempu vichi), ¿nansa cui càcu stná-nda nú màsà quíhín casu-nda sàhà palabra ndiaha cachí nansa càcu-nda? Vàchi divi Stoho-nda Señor nduú ana primeru nì cachitnùhu palabra mà, dandu después nì xinitnùhu stná ndohó nì quida nèhivì nì inini nì càhàn mii-yá.

⁴ Te nì chindee stná Yua-nda Dios sàhà-ñá cundaà ini-nda divi ñà-ndaà nduámà, vachi nì quida-ya nsidanuu clase milagru ndiaha, te nì sàhatahvì stná-yàndó Espíritu Ìì xí-yá; (te vichi) cuàhà gá ñà-ndiaha ìì quidá Espíritu Ìì sàhà-nda según nansa cunì Yua-nda Dios.

Nansa nì nanduu Jesús nahi nèhivì, te ducán nì nìhì-yá nansa dacácu-yàndó

⁵ Cunaha-nsiá, sàni cachì xì-nsiá sàhà inga ñuhivì vaxi xi-nda. Doco màdì ángel cunduu ana cusahnú nùá, vachi cónì chítñunì ini Dios ducán.

⁶ Nùu tutu ìì iá ndé nì càhàn iin nèhivì (xì-yá), te dohó nì cachi-nè: Nèhivì ñuhivì, có-ndiáà guá-nè, doco nihnú inì-nínè. Còò necesidad icúmí-nì ñà-nsinuu inì-nì nèhivì ñuhivì, doco divi nduá quida-nì.

⁷ Te sàni chitnùnì stná inì-nì ñà-sàhà sacu quivì mà-sàà nèhivì ñuhivì ndudava-ne xì ángel xi-nì. Te nì nìhìtáhvì stná-nè cuàhà gá tñùñuhu ndiaha nì quida-nì. Te nì chitnùnì stná inì-nì ñà-cusahnú-né nùu nsidaa ñà-ndüá nì quidavàha-nì.

⁸ Nsidanicuú iñàha, vètùni dandacú-né nùá nì quida-nì. Ducán cachá`.

Pues nú ducán sàni nìhìtáhvì nèhivì quida-ne, dandu nsidanicuú iñàha, mà cúí ndòo uan iladu, fuerza icúmí-nè dandacú-né nùu nsidanicuú iñàha. Doco quivì vichi náhà xicà, tàñàha ga sàà quivì dandacú ndisa-ne nùu nsidaa ñà-jaàn.

⁹ Doco Jesús, ndisa, sàni cundaà vaha ini-nda sàhà mii-yá, cuàhà gá tñùñuhu ndiaha sàni nanihì-yá. Vàchi sacù-ni quivì cónì ndúdává-yá xì ángel, doco sàhà gracia xi Dios nì ndoho-ya, te nì xihì-yà sàhà nsidaa-nda, te sàháyùcàndüá nì nanihì nsihì-yá tñùñuhu ndiaha xí-yá.

¹⁰ Dios nduú ana nì quidavàha xi nsidanicuú ñà-íá. Te sàhà ñà-nì còó más tñùñuhu xí-yá, ñàyùcàndüá nì sàcòò nsidaámà. Doco cunì stná-yà cundoo cuahà dèhe-ya gloria xi-ya. Ñàyùcàndüá, nì chitnùnì ini-yà ñà-ndoho Jesús, vachi ducán nduá xiñuhu cuu xi-yá sàhà-ñá nì cuácátnáhâ nsidaa ñà-ndüá icúmí cuu xi-yá. Ñàyùcàndüá, sàhà-ñá nì ndoho-ya ducán, ñà-jaàn nì nìhì-yá salvación xi-nda.

¹¹ Te cunaha-nsiá, mate divi-ya nduú ana ndiaha dandúhî xì anima-nda, doco iin-ni Yuamánì-yá icúmí-yâ nahi ndohó. Sàháyùcàndüá có-cùcáhán nùu-yá cachi-yà xì-nda ñà-ndüu-nda nahi tnaha-ya.

¹² Vàchi (nùu tutu ìì) dohó cachí-yá (xì Yuamánì-yá): Na natácá tnahi, dandu icúmí nacani xì-né (ñà-ndiaha guá) iá-nì, te coto stnáì alabanza nùu-nì, cachí-yà.

¹³ Daaní, inga xaan cachí stná: Yùhù icúmí cahvi xì mii-yá.

Te inga xaan cachí stná:

Cundehè-nsiá, yohó iá stnàì xì nèhivì nì chitnùnì ini Dios cunduu (nahi) dèhi.

¹⁴ Pues sàhà-ñá nduu-nda dèhe-ya, te iá iquicúñú-ndà, ñàyùcàndüá stná mii-yá, nì nìhì stná-yà iin iquicúñú (nahi ndohó), te ducán nì nìhì-yá nansa cui-yà. Ñàyùcàndüá, sàhà-ñá nì xìhì-yà, vátùni nì cundee-yá nùù ñà-malu, vàchi quisì jaàn nìsa dandacú sàhà-ñá cui nèhivì ñuhivì.

¹⁵ Te nèhivì, yúhì sàstnùhù-né cui-nè, ñàyùcàndüá, mà úhì dandacú-si nùù-né inii vida xi-ne. Doco vichi (sàhà-ñá nì cundee-yá nùù-sí), vátùni cuidahan-yándô nùù ndahà-sí.

¹⁶ Vàchi màdì ángel nì cùhì ini-yà na ní quixi-ya ñuhivì yohó; còó. Divi ndohó nècuàchì descendencia xi Abraham nì quixi-ya nì chindee-yá.

¹⁷ Ñàyùcàndüá nì xiñuhu nanduu-ya iin tiàa; meru nacua ndáa nèhivì ñuhivì yohó, ducán nì nanduu-ya, na iin tnahà-ne. Te sàhà ñà-jaàn vátùni nì sàcùnduu stná-yà nahi dùtù xi-nda nùù Dios, vátùni cahvi-nda xi-yá ñà-cundehè ndàhvì-yándó. Te sàhà stná nì nanduu-ya iin tiàa, vátùni nì dānāà-yá sàhà cuàchi-nda, te ducán mà níhì gá-ndà castigu sàhà cuàchi-nda.

¹⁸ Te sàhà-ñá nì yàha stná-yà cuàhà vida na ní ndoho guá-yà, ñàyùcàndüá vátùni chindee stná-yándó na quivì yàha stná-ndà tnùndoho.

3

Chicá ndiaá Jesús nùù Moisés mate ndahà nècuàchì mà nì quixi ley sànahà

¹ Cunaha-nsiá, iin-ni xínduu-nda nèhivì ì xí Dios, te iin-ni sàni cana stná-yándó ñà-sàà-ndà gloria xi-ya, ñàni. Ñàyùcàndüá, sàhà nsidaájàn nicanicuahàn xiñuhu cunihnu vàha ini-ndà Jesús, vàchi mii-yá nduú ana cahvi-nda, te divi stná-yà nduú ana nì techuún Dios ñà-quixi nùù-ndà, te nì sàcùnduu-ya dùtù xi-nda.

² Te na ní techuún Dios-yà quixi-ya, dandu nì quida ndisa-ya cumplir nsidaa ñà-ndüá nì sàcùnaha-yá, nacua nì quida stná Moisés sànahà na ní sandiaa-nè nèhivì xí-yá.

³ Doco chicá más tnùñuhu icúmì Jesús nùù Moisés mà. Vàchi ducán nduá na ian cuàha iin vehe, cuisì tnùñuhu xí ana nì quidavàha xán nduá queé, màdì tnùñuhu xí miá.

⁴ Te iin iin vehe, iá ana nì quidavàha xán, doco nsidanicuú ñà-íá ñuhivì, cuisì Dios nduú ana nì quidavàha xán.

⁵ Ñàyùcàndüá, ducán nìsa quida vii Moisés sànahà, nì sandiaa-nè nèhivì xí Dios na iin nècuàchì xinúcuáchì (nùù-yá); te chuun xi-ne nì sanduu stná ñà-cáhàn-nè sàhà palabra icúmì Dios datúi-ya después.

⁶ Doco Cristu, (tucu iá xì mii-yá, vàchi) Dèhemanì Dios nduú-yá. Te quidá víi stná-yà (nahi Moisés), doco chuun xi-ya nduá ñà-dàndacú-yá nùù nsidaa nèhivì xí Yuamáni-yá. Te divi nèhivì xí-yá sànduú stná ndohó nú màsà yúhì-ndà, te iin-ni ní cùdî ini-ndà cahvi-nda xi-yá dècuèndè na sàà xínu tiempu.

Nansa sàà nèhivì xí Jesús ndé iá descansu ndiaha xí-yá

⁷ Ñàyùcàndüá, xiñuhu quida-nda nacua cachì Espiritu ì xì-ndà nùù tutu ì ndé cachì-yà: Vichi sacúndáhvì nùù-nsiá ñà-nì cúnínì-nsiá ñà-ndüá dandacú Dios.

⁸ Màsà quidámáxìní-nsiá na ian nìsa quida xì-nsiá sànahà na ní xìca-ne yucù dānā. Cuàhà gá nì dàcuídà ini-nè yùhù, ndè nì nanduu-ne nahi contra xi.

⁹ Te ùi dico cuà nì xini nècuàchì mà milagru ndiaha nì quide xì-né; doco còó, iin-ni nì quida canúú-nè (ñà-ndüá dàcuídà ini xì).

¹⁰ Ñàyùcàndüá, yàha ga nì cuduchi inì sàhà nsidaa-né, te nì cachi: “Cutu cunì nècuàchì mà tùcù-nè inga ichì; mà túha-ne cunchicùn vii-né ichì”.

¹¹ Ñàyùcàndüá, nì xidà inì; ndee ní cachì xì-né palabra yohó, te mà dāmíà: “Mà nunca cuàhi yàha-ne (lugar ndiaha xì) ndé cundoo-ne descansu nì cùí”. Ducán nì cachì Dios.

¹² Ñàyùcàndüá, cuidadu ni cùndóó-nsiá ñàni, còtó coo iin-nsia nacání chicuéhè inì-xi, te nandòdó-nsiáyà, có-xiníndísà gá-nsiáyà, mate Dios iá nicanicuahàn nduú-yá.

¹³ Sàhájàn nsìquívì xiñuhu nacuàhandee stnahá ini-ndà, mientras iá va tiempu vichi, còtó sàà-ndà cunduu-nda nècuàchì quidámáxìnì, vàchi mà úhì dandahví cuàchi-nda ndohó, te cuu xi-nda ducán.

¹⁴ Vàchi cunaha-nsiá, cuisì nú iin-ni ni cúnchícùn vii-ndàyá ndè xínu tiempu, te cunihnu vaha ini-ndàyá nacua nì quesaha-nda, dandísá sàà-ndà nihítáhvì-ndà cundoo-nda nùu Cristu.

¹⁵ Ñàyùcàndùá, dohó cachí-yà (nùu tutu ì):

Vichi sacúndáhvì nùu-nsiá ñà-nì cúnínì-nsiá ñà-ndùá dandacú Dios. Màsà quidámáxìnì-nsiá na ian nisa quida nècuàchì sàhana, te cuàhà gá nì dàcuídà ini-nè yùhù, cachí-yà.

¹⁶ Te ¿índù nèhivì nduú nècuàchì nì inini xi (palabra xi-ya), te después nì cahíchì ini-nèà? Pues divi nsidaa nècuàchì nì tavà Moisés ñuu Egipto yucán.

¹⁷ Te ¿ana divi nduú nèhivì nì cuduchi guá ini Dios sàhà-xí inii ùi dico cuià mà? Pues, divi nècuàchì cuàchi ma, te ñàyùcàndùá disáhà-xí nì xihì-nè yucù dãná mà.

¹⁸ Te ¿amádi divi-ni stná-nè xínduu ana nì càhàn ndee guá-yà sàhà-xí ñà-mà yáha-ne lugar xi-ya ndé nihì-né descansu nì cùí? Pues jaan, vàchi nècuàchì mà, cóni cúnì-nè cunini-neyà.

¹⁹ Ñàyùcàndùá, vátùni cundaà ini-ndà, divi sàhà-ñá cóni cúnì-nè cunindisá-né, ñàyùcàndùá mà nì cùí yáha-ne (lugar ndiaha ma).

4

¹ Doco cunaha-nsiá, vichi iá va nansa cui sàà-ndà lugar ndiaha xí-yá nacua nì cachí-yà xì-ndà. Ñàyùcàndùá, cuidadu ni cúndóó-nsiá còtó ndañuhu-nsiá ichì sàni tñii-nsia cuàhàn-nsiá cundoo-nsia nùu-yá ducán.

² Vàchi nùu ndohó sàni cachitnùhu-ne ñà-nduú razón ndiaha xí-yá davani nacua nì cachitnùhu stná-nè xì nèhivì sàhana ma. Doco mii-né, cóni níhì-né ni-iin provechu nùu palabra mà, vàchi mate ní xinitnùhu-ne, doco cóni xínindísâ-né.

³ Doco ndohó nècuàchì xínindísâ, vátùni sàà-ndà ndé iá descansu ndiaha ma, vàchi (mà níhítáhvì gá nècuàchì sàhana ma, vàchi) dohó nì cachí-yà:

Yùhù, nì xidà inì; ndee ní cachì xì-né iin palabra, te mà dámíà: mà nunca cuàhi yáha-ne (lugar ndiaha xí) ndé cundoo-ne descansu nì cùí.

Ducán nì cachí Dios, vàchi dècuèndè tiempu nì quidavàha-ya ñuhivì sàni xínu chuun xi-ya.

⁴ Vàchi nùu tutu ì iá ndé cachí nansa (nì quida-ya) quívì ùsà; te dohó cachá`:

Quívì ùsà nì quetatu Dios, vàchi sàni xínu nsidaa chuun nì quida-ya.

⁵ Daaní, iá stná ndé cachí stná-yà inga palabra yohó nùu tutu mà:

Mà nunca cuàhi sàà nècuàchì mà lugar ndiaha xí ndé cundoo-ne descansu nì cùí.

⁶ Pues (nàhà xicà) fuerza icúmì cundoo dava nèhivì lugar ndiaha ma, doco nèhivì nì inini xi razón ndiaha primeru mà, cóni níhì-né sàà-nè cundoo-ne yucán, vàchi cóni xínindísâ-né.

⁷ Sàhà ñà-jaàn nì cachí stná-yà inga palabra después: vátùni iá inga tiempu vaha, cachí-yà, divi nduú quívì vichi. Vàchi nì yáha inga caní tiempu, dandu nì tiaa stná David inga palabra xi Dios. Divi nduú palabra làcà (nì tiai nùu tutu yohó) ndé cachí-yà:

Vichi sacúndáhvì nùu-nsiá ñà-nì cúnínì-nsiá ñà-ndùá dandacú Dios. Màsà quidámáxìnì-nsiá, cachí-yà.

⁸ Daaní, después nì sàà stná Josué (cusahnú-né nùu nèhivì sàhana ma, doco) ni sàhà mii-né cóni níhì nècuàchì mà descansu ndiaha ma. Vàchi nú jaan, dandu mà cachí Dios coo inga quívì (cui nihì-ndà descansu mà) después.

⁹ Doco divi sàhà ñà-jaàn vátùni cundaà ini ndohó ana nduú nèhivì xí Dios ñà-íà va iin lugar ndé cundoo-nda quetatu ndiaha-nda.

¹⁰ Vàchi cunaha-nsiá, nú sàni nìhì-ndà descansu mà, dandu ñà-sàni nsihi chuun xi-nda (ñuhiví yohó) cundua, divi nacua nì ìa stná xì mii-yá na ní xìnu chuun nì quida-ya, nì quetatu-yà.

¹¹ Ñàyùcàndùá, xiñuhu ñà-cuàhandee ini-ndà sàà-ndà lugar ndiaha ma ndé nìhì ndisa-nda descansu, còtó quida-nda nacua nì quida nèhivì sàhana ma, cóni xìníndísâ-né.

¹² Vàchi cunaha-nsiá, cahnú poder xi palabra ì xí Dios. Na ian itiácùá, teayùcàndùá (vátùni sàá yàchà ndé chicá ini anima-ndà) na ian nduá iin espada òn ndúi ladu-xi, doco palabra mà, chicá fuerteà nùu iin espada, vàchi dècuèndè meru espíritu xi-nda sàá stná, xì dècuèndè stná chicá ini sàxìnítnùnì-ndà. Te divi sàhà palabra mà vátùni cunahà claru nansa nacánì ndisa ini-ndà, xì nansa nihnú stná ini-ndà quida-nda.

¹³ Cunaha-nsiá, còò ni-ìñàha cui coo dèhé nùu Dios; vàchi nùu mii-yá túi claru nsidanicuú ìñàha, te indéhe stná-yà nsidaa ñà-nduá quida-nda, dandu después divi nùu mii-yá icúmì-ndá nacua-nda cuenta.

Jesús nduú dùtù ndiaha xi-nda

¹⁴ Dèhemanì Dios nduú Jesús, te vichi sàni nasaa-yà nùu Yuamánì-yá iá ansivi; dùtù ndiaha xi-nda nduú-yá vichi, ñàyùcàndùá iin-ni ni cúnchícùn viì-ndà ichì-yá nacua sàquidà-ndà vichi.

¹⁵ Vàchi mii-yá, vátùni cuhi ndisa ini-yàndó na yàha-nda tnùndoho, vàchi cuàhà gá ìñàha sàni yàha stná mii-yá, doco cóni quidá-yá ni-iin cuàchi.

¹⁶ Ñàyùcàndùá, màsà yúhì-ndà càcàn tàhvi-ndà nùu-yá, vàchi yucán iá-yà nùu silla ndiaha xí-yá ndé sàhatahvi-yá gracia xi-ya. Vàchi icúmì-yà cundehè ndàhvi-yàndó, te quida-ya gracia mà sàhà-ndà na meru xiñuhá.

5

¹ Nsidaa dùtù ñuhiví yohó, chuun nì nìhì-né nduá ñà-cáhàn-nè sàhà nèhivì nùu Dios, te dócò stná-nè promesa xi nèhivì nùu-yá. Stná promesa icúmì coco nùu-yá, icúmì-nè cahmi stná-nè nsidaámà sàhà cuàchi nèhivì.

² Te sàhà-ñá nduú stná-nè iin ana iin-ni ndohó nahi ñanìtnaha-xi, vátùni cuhi ini-nè nèhivì dava ga nú có-sàà nècuàchì mà cundaà vaha ini-nè, te ò nú sàni quee-ne ichì váha.

³ Doco sàhà-ñá nduú stná dùtù mà nèhivì ùún, ñàyùcàndùá icúmì-nè cuàha stná-nè promesa sàhà cuàchi mii-né nacua quidá-né sàhà nèhivì dava ga.

⁴ Te màdì mii dùtù nácàxin-ne mii-né ñà-nìhì-né chuun ndiaha ma; còò. Cuisì Dios nácàxin xi-né, na ian nì quida-ya xì Aarón sàhana.

⁵ Pues, ducánì stná Cristu, màdì mii-yá nì càchì-yà cunduu-ya dùtù sàhà-ñá chiigá tavà-yá tnùñuhu xì mii-yá; còò. Divi Yuamánì-yá nì sàha xi-yá chuun ma, vàchi dohó nì cachi yàmà xì-yá:

Mii-ní nduu-ní Dèhemanì; vichi sà-itiácù-ní nì guide.

⁶ Te divi ducán nì cachi stná-yà inga xaan xì tutu ì mà:

Nicanicuahàn cucumi-ní chuun cunduu-ní nahi dùtù, nacua iá chuun xi (dùtù sàhana nani) Melquisedec, nì cachi Dios.

⁷ Vachi (iin xichi) na iá va Jesús (ñuhiví yohó) nahi tiàa, dandu nì xicàn tàhvi fuerte-yà nùu Yuandiaha-yá Dios, vàchi sàhà-yámà vátùni càcu-ya ñà-màsà cúí dahuun-ya. Cuàhà gá nì sacundahví-yà, dècuèndè nì sacu stná-yà; te sàhà-ñá nihnú ndiaha guá ini-yà, ñàyùcàndùá nì cuhi ini Yuandiaha-yá mii-yá.

⁸ Cunaha-nsiá, mate meru Dèhemanì Dios nduú-yá, doco nì quida stná-yà tocar ndoho stná-yà sàhà-ñá cundaà vaha ini-yà nansa iá ñà-nchícùn-ndà nsidaa ñà-nduá nì ndacu nùu-yá.

⁹ Daaní, na ní nsihi nì ndoho-ya, dandu sà-íá, nicanicuahàn vátùni dacácu-ya nsidaa nèhivì inínì xí-yà.

¹⁰ Vàchi sàni cachi Yuamàni-yá ñà-mii-yá cunduu-ya dùtù chicá ndiaá, te quida-ya chuun xi dùtù na ian nisa quida Melquisedec mà (sàhana).

Ndahví nsidaa nèhivì nacóó xí ichì Jesús

¹¹ Cunaha-nsiá, iá cuàhà gá ñà-cùnì cachì xì-nsiá sàhà chuun yohó, doco ùhì chinahì mii-nsiá sàhà-ñá vichi, vachi ùhì sàà-nsiá cundaà vaha inì-nsia,

¹² mate vichi sàni sàà tiempu ñà-chinaha mii-nsiá dava ga nèhivì nì cùì, doco còó, xiñuhu ì ñà-danácuáhâ gá nèhivì mii-nsiá ndè palabra chicá mà ùhì xi-ya. Vachi nahi ñà-cuati nduú-nsiá, nahi ana tà cútùha cuxi comida fuerte, nahi mée chichi ì nduú-nsiá.

¹³ Vachi nèhivì tà cútùha vii nansa cunì cachi palabra xi ichì váha-ya, nahi mée xínduu-ne, na ian tëndodo itiácù-va-ne.

¹⁴ Doco nèhivì sàni cutùha nacunì índù ichì nduú ichì váha, pues nahi nècuàchì sahnú xixí xi comida fuerte xínduu-ne, vachi sàni sàhandee ínì-nè cutùha vaha-ne índù-ñá iá vaha, te índù-ñá có-íá vaha.

6

¹ Ñàyùcànduá, xiñuhu cunduu-nda nahi nècuàchì sahnú, te cutùha-nda palabra chicá nchichí xi Cristu, màdiá cuisì dàñùhù chicá sencillu cunihnu ini-ndà nicanicuahàn; còó. Màsà ndésáhá tú-ndá xí palabra primeru, vachi sàni cundaà vaha ini-ndà sàhà palabra mà, ináhá-ndá nacáníá nansa naxicocuìn ini-ndà sàhà cuàchi-nda ñà-còò chuan. Te sà-ináhá stná-ndà nansa icúmí-ndá cunihnu vaha ini-ndà Dios,

² xì nansa cuhì-ndà, xì nansa chitandòò-ndà ndahà-ndà dìni nèhivì (na xícàn tàhvi-ndà sàhà-né). Te sà-ináhá stná-ndà nansa icúmí nsì natiacu-nè, xì nansa icúmí coo stná juiciu final.

³ (Doco cumàni gá ñà-nduá xiñuhu cundaà ini-ndà sàhà-xí.) Ñàyùcànduá, cahnú gá Dios icúmí-ndá quida-nda seguir (ndè cachi ndufuerte fe xi-nda).

⁴⁻⁶ Vachi nú sàni dàtnùù Dios sàxínítnùnì iin nèhivì, te después sàà-nè naco-ne (ichì ndiaha ma), dandu mà cúì gá sàà-nè naxicocuìn ini-nè inga xichi sàhámà. Vachi sà-ináhá-nè nansa iá ñà-nihítàhvi ndiaha-nda nùù Dios, te sàni xini stná-nè nansa iá ñà-cucumi-nda Espíritu ìlì xí-yá. Ndè ináhá stná-nè ñà-ndiaha guá iá palabra ìlì xí-yá, te ini anima-nè sàni xini stná-nè milagru xi-ya nahi milagru xi inga ñuhivì vaxi xi-nda. Doco (ndahví-nè) nú sàni naco-ne ichì mà, vachi cunì cachàmà na ian nì nachituu-ne Dèhemanì-yá nchica cruz inga xichi tu, te nduú stná na ian sácùndiaa vate-néyà.

⁷ Ñàyùcànduá, (ducán icúmí cuu xi nècuàchì mà nahi ejemplu sàhà) ñuhù xi-nda, vachi nú sàni cuun ndiaha dàvi, te nì ndèe cunú ndèhì, dandu (tuxí ini-ndà) cuàhàn cundiatú-ndà, ádi cuàha vii itu-ndà. Te divi ducánì stná xì nèhivì. (Nú iin-nì nchícùn vii-né mii-yá), dandu vátùni cundiatú anima-nè.

⁸ Doco nú (naco-ne ichì-yá), dandu cunduu-ne nahi ñuhù ndé cuisì sahnú yùcù iñu, ò yùcù chicuéhè, vachi mà ndéé vaha-ne nùù-yá, te vichi sà-ítúú nihì-né iin castigu cahnú, te fin xi-ne cunduu ñà-coco-ne.

⁹ Doco tucu icúmí cuu xi mii-nsiá, ñani màní, ináhí, mate sàni cachì xì-nsiá ñà-nduá nì cachì. Vachi seguru icúmí mii-nsiá ñà-cundiatú anima-nsiá, te càcu-nsia.

¹⁰ Vachi vaha Dios, te mà nándodó-yá obra sàni quida-nsia; nì mà nándodó stná-yà nansa cuú guá inì-nsia sàhà-yá, te sàhámà nì chindee-nsiá dava ga nèhivì xí-yá; te dècuèndè vichi chindéé ìlì-nsiánè.

¹¹ Te nsiùhù, cunì-nsì iin-nì nì cúnsìhi inì-nsia quida-nsia ducán ndè quivì último sàhà-ñá cucumi-nsiá seguru cuàhàn-nsiá nihítàhvi ndisa-nsia ñà-ndiaha ìlì ndiatu-nda.

¹² Màsà cúdúsán-ndá; còó. Iin-nì nì cúníndísá-ndá, te quida ndee ini-ndà nacua nisa quida nèhivì sàni nihítàhvi ñà-ndiaha ìlì nì cachi-yà xì-ndà.

Iin trùndé ini ndiaha icúmí nsidaa nèhivì xí Dios

¹³ Na ní saquin Dios compromisu xì Abraham sàhana, nì cachi-yà xì-né: “Yùhù chináhí míí”. Ducán nì cachi-yà, vachi còó cá inga ana chicá ndiaá nùù mii-yá.

¹⁴ Te nì cachi stná-yà xì (Abraham) yucán: “Seguru icúmí cundiatú anima-ní quide; te cuàhà gá descendencia xi-ní icúmí cundoo”.

¹⁵ Ñâyùcàndüá, ducán nì sandiatu cuéyàà nècuàchìmà dècuèndè nì sàà quìvì nì nihì-né ñà-ndüá nì cachi Dios xì-né.

¹⁶ Nèhivì ñuhivì yohó, nú cuní-nè caquin fuerte-nè iin compromisu, dandu ndácùcahan-né quìvì iin ana chicá ndiaá nùù mii-né, (nahi Dios), te nú sàni chinaha-né mii-yá, dandu sà-íá, icúmí-nè nacahan-né Dios.

¹⁷ Ñâyùcàndüá, na ní quida Yua-nda Dios comprometer ñà-icúmí-ndá nihitáhvi-ndà ñà-ndiaha ìi xí-yá, dandu nì ndacùcahan-yá mii-yá, vèchi cuní-yà cundaà vaha ini-ndà iin palabra mà-dáma ndüá nì cachi-yà.

¹⁸ Ducán dandu ùi palabra nduámà, (dihna cuisì-ní nì cachi-yà, dandu después nì chinaha-yá mii-yá), ñâyùcàndüá, nicanicuahàn icúmí cundiaa palabra nì cachi sahnú-yá mà; mà nunca dandahví-yándó, seguru icúmí coo tnùndé ini fuerte xi nsidaa ndohó nècuàchì cundéé inì-xi ñà-dacácu-yándó, te sàni cahvi stná-ndà xì consuelu ndiaha sáhatahvi-yá.

¹⁹⁻²⁰ Te consuelu mà, vètùni chindeá anima-ndà, vèchi có-ndüá tnùhu; ñà-seguru ndüá. Vèchi dècuèndè lugar ndé (chicá inì-xi vehe ìi Dios ansivi), yucán sàni nansihvi Jesús, nì yàha-ya nùù ñà-sadí nihni nùù-ndà yucán, te dècuèndè lugar mà sáhatahvi-yándó tnùndé ini mà, vèchi dihna-ya nì sàà-yà yucán ñà-càhàn-yà sàhà-ndà. Vèchi vichi sàni nihì-yá chuun cunduu-ya dùtù xi-nda, te nicanicuahàn icúmí-yà quida-ya chuun ma, divi nacua nìsa quida Melquisedec sàna.

7

Nahi chuun xi dùtù nani Melquisedec, ducán nduú chuun quidá Jesús vichi

¹ Nècuàchì dandacú nùù ñuu Salem nì sanduu Melquisedec mà. Te nì sanduu stná-nè dùtù xi Stoho-ndà Dios, divi ana dandacú ndè chicá ansivi. Te divi-ne nì quee nì nanchìcùn ìchì xì Abraham na mándixi nècuàchìmà nì sàhàn-nè guerra nì cundee-né nùù cuàhà rey, dandu nì quee Melquisedec mà nì dàhî-ñánê.

² Te nì sàha nècuàchìmà-né diezmu sàhà nsidaa ñà-ndüá nihí-né. Te quìvì Melquisedec mà, cuní cachà “rey ndàcuisì inì-xi”. Te ñà-ndüú stná-nè rey xi ñuu Salem yucán, ñâyùcàndüá cuní cachi stná quìvì mà “rey xi ndé íá paz”, vèchi quìvì Salem mà, cuní cachà “íá paz”.

³ Te cunaha-nsiá, còò (ndé nacání sàhà) yuadíhí-nè, ni (sàhà) yohòtéhè-né, ni nansa nì tùinuè-né, ni nansa nì xihì-nè; ñâyùcàndüá, ducán queámà na ian nicanicuahàn quidá-né chuun xi dùtù nacua quidá Dèhemanì Dios.

⁴ Pues na cahnu-guá íá chuun nì nihì Melquisedec sàna ma, vèchi dècuèndè stná yua raza-nda Abraham nì sàha xi nècuàchìmà diezmu, divi diezmu nì tavà-né nùù ñà-cuicà nì nihì-né na ní sàhàn-nè guerra.

⁵ Daaní, después nì sàà iin tiàa nani Leví nì nihì-né chuun ñà-cunduu stná-nè dùtù, mii-né xì descendencia xi-ne. Te nì sàcùnaha nsidaa-né tavà-né diezmu nùù ñànìtnaha-ne raza-ndà nacua cachí ley ìi. (Ñâyùcàndüá, ducán nì quida-ne) mate iin-ni descendencia xi Abraham nì sanduu stná nsidaa ñànìtnaha-nemà.

⁶ Doco dùtù Melquisedec yucán, mate có-ndüú-né descendencia xi Leví, doco dècuèndè nùù stná Abraham nì cutahvi-né diezmu mà, dandu nì dàhî stná-nè nècuàchìmà, mate (iin ana ìi gá nduú nècuàchìmà) ñà-nì saquin Dios iin compromisu xì-né.

⁷ Ñâyùcàndüá, (chicá ìi Melquisedec), vachí ináhá vaha-nda, cuisì iin ana chicá ìi cui dahî xì inga nèhivì.

⁸ Te dùtù xínduu descendencia xi Leví, nèhivì ùún nduú-né, mà cútiácú-nè nicanicuahàn, doco tavà-né diezmu vichi. Doco tucu íá ñà-ndüá cachí (tutu ìi) sàhà Melquisedec, vèchi ducán càhàn mà sàhà-né (na ian) itiácú ìi-né.

9-10 Te mate vichi tavá descendencia xi Leví mà diezmu nùù nèhivì, doco tucu nduá nìsa quida-ne antes, vèchi como yohòtéhè Leví nduú Abraham, te nì dòcò-né diezmu nùù Melquisedec mà, ñàyùcànduá dècuèndè cui quida stná-ndà cuenta na ian stná Leví nì dòcò xì diezmu mà nùù nècuàchì mà na ní quee-ne nì sanchìcùn ìchì-né Abraham.

11 (Ináhá-ndá), nì nihì nècuàchì raza-ndà ley ì xí Dios sàhà ndahà dùtù descendencia xi Leví. Te tnahà Aarón nì sanduu stná nsidaa dùtù mà. Doco siempre cumàni gá quee viì chuun nìsa quida-ne, ñàyùcànduá nì ndecunu inga dùtù, (divi nduú mii-yá). Doco có-quidá-yá na ian nìsa quida Aarón sàhà; còó. Na ian nìsa quida Melquisedec, ducán quidá-ya.

12 Te ñà-sàni dama (Dios) modo quidá dùtù, ñàyùcànduá icúmí stná-yà dama-ya ley (nchìcùn nèhivì).

13 Vèchi Jesús nduú (dùtù saa) cáhàn-ndà sàhà-xí, te diín descendencia icúmí mii-yá; còò ni-iin yohòtéhè-yá nìsá quidáchùùn nahi dùtù nùù mesa ì xí Dios.

14 Vèchi ináhá-ndá, divi tiàa nani Judá nduú yohòtéhè Stoho-ndà Señor, doco còò ni-iin palabra nì cèchì Moisés sàhà nècuàchì yucán ñà-cunduu-ne iin dùtù, nì stná descendencia xi-ne.

15 Ñàyùcànduá, náhà chicá claru (ñà-ndáa nduá cachì xì-nsiá), vèchi vichi sàni ndecunu inga dùtù, te (nicanicuahàn) quidá-yá chuun ì mà nùù Dios nacua nìsa quida dùtù Melquisedec sàhà.

16 Vèchi divi sàhà-ñá itiácú-yà nicanicuahàn, te iá cuàhà poder xi-ya, ñàyùcànduá nì nihì-yá chuun xi dùtù mà, màdi sàhà-ñá nduú-yá descendencia (xi inga dùtù) nacua cachì iin ley.

17 Vèchi ducán nì cachi Yua-nda Dios xì Jesús:

Nicanicuahàn cucumi-ní chuun xi dùtù nacua nduú chuun nìsa quida Melquisedec.

18 Ñàyùcànduá, nì ndañuhu ley sàhà ma, vèchi cóni quèé víiá. Màncùí chindee cuáhà-ñá nèhivì,

19 màncùí nacuahandee iniànè ñà-sàà-nè quida viì-né nacua ndiá ìcà-né. Ñàyùcànduá nì sàhà-yàndó inga tnùndé ini chicá ndiaha, te divi sàhájàn vètùni thàtuu-nda nùù-yá vichi.

20 Cunaha-nsiá, na ní sàhà Yua-nda Dios Jesús chuun xi dùtù, nì chinaha-yá mii-yá (ñà-nicanicuahàn cunduu-yamà dùtù).

21 Doco dùtù (descendencia xi Leví mà), còó, cóni cáhàn-yà ducán na ní sàhà-yanè chuun yucán. Cuisì Jesús nduú ana nì nihítàhvì nì cáhàn xì Dios ducán, te dohó nì cachi-yà:

Yùhù nduí Stohò-ní Señor, te chináhì mií, (seguru cundua), mà dáma inì: nicanicuahàn cucumi-ní chuun xi dùtù nahi chuun nìsa quida Melquisedec.

22 Pues ducán nì cachi-yà xì Jesús, te sàhà-ñá fuerte guá palabra xi-ya, ñàyùcànduá chicá ndiáá tratu saa (nì saquin-yà).

23 Daaní, dùtù ùún-ní, màdi nicanicuahàn icúmí-nè chuun xi-ne, vèchi xíhì-nè; ñàyùcànduá, cuàhà-né sàni quida xi chuun xi dùtù mà.

24 Doco Jesús, còó; mà nunca sàa inga nèhivì cunduu-ne dùtù lugar xi-ya, vèchi nicanicuahàn itiácú-yà.

25 Ñàyùcànduá, nú xicàn tàhvì-ndà nùù Dios, te ndácùcahan-nda quivì Jesús, vètùni dacácu dahuun-yàndó nicanicuahàn, vèchi nicanicuahàn itiácú-yà cáhàn-yà sàhà-ndà.

26 Cunaha-nsiá, meru dùtù xiñuhu-nda nduú Jesús, vèchi ì ndisa-ya, mà dáná-yá, còò cuáchi-ya, tucu dahuun iá-yà nùù nècuàchì cuàchi, te vichi dècuèndè (gloria) chicá nùù-xí ansivi sàni sàà-yà.

27 Còò necesidad icúmí-yà dòcò-yá promesa nsiquivì sàhà-ñá nàa sàhà cuàchi nèhivì. Ducán quidá dava ga dùtù, dihna dócò-né promesa sàhà mii-né, dandu después sàhà nècuàchì dava ga. Doco Jesús, còó, iin xichi-ni nì sàhà-ya vida xi-ya nì sanduu-ya promesa nì dānāa dahuun-ya sàhà-ndà, te nicanicuahàn ndiáá ñà-jaàn.

²⁸ Daaní, cachí stná ley sàhana ma ñà-vàtùni cunduu nèhivì iin dùtù mate iá cuàchi-ne. Doco vichi, còo, sàni yàha ley mà, te sàni cachi fuerte Dios ñà-divi Dèhemanì-yá cunduu dùtù xi-nda; te nicanicuahàn cundiaa chuun ìi quidá mii-yá.

8

Nansa cáhàn Jesús sàhà-ndà nacua cachí ley saa sàni sàha Dios cunchicùn-ndà

¹ Nsidaa ñà-jaàn sàni cachí sàhà-ñá cundaà inì-nsia ñà-divi mii-yá nduú dùtù xi-nda, vàchi chuun jaàn quidá-yá vichi ndé iá-yà ansivi ladu cuahá silla ndiaha ndé iá Yua-nda Dios.

² Xinúcuáchi-yá ini vehe ìi-yá, vàchi vehe ma nduú veheñùhu ndisa xi-ya, te Stoho-ndà Señor nduú ana nì quidavàha xán, màdì nèhivì.

³ Daaní, nsidaa dùtù (ñuhivì yohó), chuun xi-ne nduá chíndoó-né promesa xi nèhivì nùu Dios, te sahmí stná-nè ñà-nduá dócò-né nùu-yá. Ñàyùcànduá nì xiñuhu cucumi stná Jesús ñà-cui chindòó stná-yà nahi promesa.

⁴ Vàchi nú ni coó ìi-yá ñuhivì yohó nì cuí, dandu mà cúí cunduu-ya dùtù, vàchi sàndòó cuahà dùtù xi ley xi Moisés, te (nsiquivì) chíndoó-né promesa xi nèhivì nùu Dios.

⁵ Doco cunaha-nsiá, seña uun nduú veheñùhu xi nèhivì, xì stná nsidaa ñà-nduá xichúûn-né nùu chuun xi dùtù mà, có-nduá ñà-ndiaha ndisa iá ansivi. Vàchi na cuahàn Moisés quidavàha-ne veheñùhu sìcoto sàhana, nì cachi Dios xì-né: “Caquìn-ní cuidadu ñà-quidavàha-ní nsidaájàn nacua iá veheñùhu nì dàcùnì mii-ní (na ní nana-ní) yucú yucán”.

⁶ Doco vichi icúmí Jesús iin chuun chicá ndiaha (nùu dùtù ndoó ñuhivì yohó), vàchi ley saa sàni sàha-ya vichi nduú iin ley chicá vàha, vàchi chicá ndiaha nì cachi-yà quida-ya xì-ndà vichi.

⁷ Vàchi ley primeru mà, nú còo ni-iñàha cumàni gá nùá, dandu mà cáquín gà Dios inga ley saa ma ni cuí.

⁸ Doco cóni ndóo ini-yà xì nèhivì (nchícùn ley primeru mà), ñàyùcànduá, dohó nì cachi-yà (nùu tutu ìi):

(Yùhù nduú) Stoho-nsià Señor, te cachí, vaxi iin quivì, dandu icúmí cuàhi iin ley saa cunchicùn nècuàchì ñuu Israel, xì stná nècuàchì ñuu Judea.

⁹ Te ley saa ma, tucu coa nùu ley nì sàhi xì-né quivì nì taví-nè nùu ñuu Egipto, te nì dàcúndêhí-nè ichì ndé nì caquee-ne; vàchi ley mà, cóni chívàha vii-néà. Ñàyùcànduá nì nacoì-nè.

¹⁰ Còo, tucu coo ley saa icúmí cuàhi nsidanicuú nècuàchì mà quivì nùu-xí, cachí. Vàchi meru ini sàxínitnùnì-nè icúmí chihi ley xi; dècuèndè meru ini anima-nè icúmí stná ndòo dahuan. Dandu mindaa yùhù cunduu ana cahvi-né, te mii-né cunduu ndisa-ne nèhivì xì.

¹¹ Te quivì yucán, mà cóo gá necesidad chinaha tnàhá-né sàhí sàhà-ñá cunaha tnàhá-né xì; còo, vàchi nsidanicuú-né, icúmí-nè cunaha-né yùhù, nècuàchì ndahví te nècuàchì cuìcà.

¹² Te yùhù icúmí cuicahnú stná inì sàhà nsidaa ñà-có-ndiàá nì quida-ne; te mà nunca nsinuu ga inì sàhà cuàchi-ne mà, nì cachi Dios.

¹³ Pues sàhà palabra jaàn (vátùni cundaà ini-ndà) ley tuhú sàni nanduu ley primeru mà, vàchi ley saa nduá cachí-yà (xì inga ley nì sàha-ya). Ñàyùcànduá, nú ñà-tùhú nduú ley sàhana ma, dandu sà-ítuú ndañuhu dahuan.

9

Veheñùhu iá ñuhivì yohó xì veheñùhu iá ansivi

¹ Ley primeru mà, nì cachà xì nèhivì nansa xiñuhu cunucuachi dùtù nùu Dios, xì nansa cuyucun stná iin vehe ìi ñuhivì yohó.

2-3 Ñàyùcànduá, nì cuyucun iin veheñùhu sìcoto ndiadí nihni xi iin sìcoto caní, dandu nì nandua ùi quartu. Te ini quartu primeru mà iín iin candleru, xì stná iin mesa ndé itádoó pan ìi nùù Dios. Daaní, inga ladu mà nduú vehe ndé cachí-nè nduú vehe chicá ìi.

4 Te icúmí lugar mà mesa oro ndé sahmí-né inciensu, te yucán iá stná caja ìi xí ley mà, idáducán iin chididà oro. Te ini caja mà inácaá iin quidi oro ndé ñuhú comida nani maná, te inácaá stná vara xi Aarón nì cana ita. Daaní, ñuhú stná ndùì tabla yùù ndé itándiaa palabra xi ley mà.

5 Te dìquì caja ìi mà xí-itasisi ángel ndiaha nani querubín, itaníní ndìxìn-né dìquì-nú, te tìxi ndìxìn-némà nì sanduu lugar ndé nisa xicahnú ini Dios sàhà cuàchi nèhivì. Doco vichì có-cúsái cáhàn cuàhà gué` xì-nsiá sàhà nsidaámà.

6 Pues nì nsihi nì cuyucun nsidaa iñàha ini veheñùhu sìcoto mà, dandu nsiquívì nisa sahàn dùtù ini quartu primeru mà ñà-quida-ne chuun icúmí-né quida-ne.

7 Doco quartu ùi iá chicá inì-xima, còó; cuisì dùtù chicá cusáhnù nduú ana quíhvi inì-xima, doco cutu iin quívì cada cuà quíhvi-ne, nihí-né nìi (quisì) sàha-ne sàhà cuàchi mii-né xì sàhà stná cuàchi nèhivì dava ga, divì cuàchi nì quida-ne cóni sàha-ne cuenta.

8 Pues sàhà-ñá ducán nì ndacu nuù nèhivì sàhana ma, seña nduá nì cachitnùhu Espíritu ìi ñà-tàyóo permisù yàha nèhivì ndè lugar chicá ìi xí-yá na quívì xichúùn vá-né vehe ìi primeru mà.

9 Pues cunaha-nsiá, iin ejemplu nduú nsidaa ley xi veheñùhu yucán sàhà-ñá cundaà ini ndohó nècuàchì tiempu vichì. Vàchi cachí ley mà ñà-xiñùhù dòcò-ndà cuàhà iñàha (veheñùhu), te cahmi stná-ndà quisì nduú promesa xi-nda. Doco mate ducan nì cahvi-ndayá, mà cúì dacúxióámà cuàchi-nda nuù sàxínitnùnì-nda.

10 Vàchi cuisì cáhàn ley mà sàhà índù comida xiñuhu cuxi-nda, te ò índù ñà-coho-nda, ò nansa icúmí ndoo traste xi-nda, xì nansa icúmí-ndá cuchi-nda; cuisì sàhà ñà-íá ñuhivì yohó-ní cáhàn ley mà. Vàchi nì chitnùnì ini Dios ñà-cuisì cundiaámà nuù-nda dècuèndè quívì quee inga ley saa xí-yá.

11 Doco vichì sà-íá Cristu, te mii-yá nduú-yá dùtù xi-nda sàhà-ñá cui nihitáhvi-nda ñà-ndiaha ìi xí-yá. Te xinúcuáchí-yà ini iin veheñùhu có-íá ñuhivì yohó, vàchi màdì ndahà nèhivì nì cùyúcàn, ñàyùcànduá chicá ìi-ñá, te chicá ndiaha stná.

12 Te mii-yá, iin xichi-ni nì quíhvi-ya ini lugar chicá ìi yucán, doco màdì nìi chelù, ò nìi litú nduá nihí-yá nì quíhvi. Còó; divì nìi mii-yá nduá nì sàha-ya, te sàhámà vátùnì nì nihí-yá nansa càcu dahuun-nda nicanicuahàn.

13 Vàchi nèhivì (antes), nú sàni quida-ne iin falta nuù ley xi-ne, te có-íá ndoo ga-nè (nacua cachí ley mà), dandu xihì buey, o xihì litú, te xixìn stná iin chelù dìhì, te nandúú-si nahi mii yàà. Dandu sódò nsiquìn dùtù nìi quisì mà, xì stná yàà mà dìquì nèhivì mà, dandu ñà-sàni ndañuhu falta xi-ne cundua. Sàni ndundoo-ne iyuhu, mate cuisì cuerpu xi-ne, (màdì anima-nè).

14 Te nú ducán nisa (quida nèhivì xì nìi quisì), dandu na cuahà gá más ndiaá nìi Jesús sàhà-ñá ndoo cuàchi anima-nda, nsidanicuú cuàchi cuàhàn dandáñuhú dahuun xi-nda nìi cuí. Vàchi sàhà-ñá itiacú anima-yà nicanicuahàn, ñàyùcànduá nìi sàha-ya meru vida xi-ya ñà-cundua na iin promesa; te promesa ndiaha ndisa nduá, vàchi còò ni-iin cuàchi nìi quidá-yá. Pues sàhà nsidaájàn, sàvátùnì cunucuachi víi-nda nuù mii-yá iá nicanicuahàn.

15 Vàchi sàhà ñà-nduá nìi quida (Dèhemanì-yá) Jesús, nìi sàha-ya inga ley saa xí-yá sàhà ñà-vàha xi-nda. Mate ní quida nèhivì falta ñà-cóni chívàha vii-né ley primeru mà, doco nìi xihì Jesús nìi dånàá-yá sàhà nsidaa falta mà, te vichì vátùnì cundiatú anima nsidaa ana caná-yá; vátùnì nihitáhvi-né ñà-vàha xi-ya dècuèndè nicanicuahàn.

16 Cunaha-nsiá, nú cunì-nda ndutahvi dèhe-nda biene xi-nda, dandu tiaa-nda iin tutu cachí nansa ndutahvi-né. Doco fuerza cundiatu-ne dècuèndè nú sàni xihì-nda,

¹⁷ Vàchi mate sàni tiaa-nda tutu mà, mà cúndiáá` dècuèndè cachi sàa cui-ndà; có-ndiáá` na itiácú ì-ndà.

¹⁸ Ñàyùcàndüá, na ní sàha Dios ley sàhana ma, nì chitnùnì stná ini-yà ñà-cui quisi, te cuitià nì-sí.

¹⁹ Vàchi (ducán cachí nùù tutu ì), nì nsihi nì cachitnùhu Moisés xì nèhivì nsidaa palabra nduú ley mà, dandu nì tnii-ne idi cuahá, xì yùcù nani hisopo, te nì dàndàxín-nèà xì nì chelù xì nì simbee, te nì dàcà stnahá nsidaámà xì tècuí, dandu nì sòdò nsiquìn-nè ndutè mà dìquì libru ì xí-yá, xì dìquì nsidaa stná nèhivì itá yucán.

²⁰ Te nì cachi-nè: “Sàhà nì yohó sàni saquin Dios iin ley ñà-chivàha-nsia vichi”.

²¹ Daaní, davani nì sòdò nsiquìn stná-nè nì mà inicutu ini veheñùhu sìcoto mà xì nùù stná nsidaa còhò xichúûn dùtù nùù chuun xi-ne.

²² Vàchi cachí ley mà ñà-casi nsidaa iñàha icúmí còdò nì mà ìcà-xí, te ducán ndundoa nùù Dios. Vàchi cunaha-nsiá, mà sàa-yà cuicahnú ini-yà sàhà ni-iin cuàchi-nda nú cò nì nì xitià.

Nansa nì sàha Jesucristu vida xi-ya sàhà-ñá cuxio cuàchi-nda

²³ Ñàyùcàndüá, na sàcuàhàn Moisés dahí-né veheñùhu sàhana ma, vátùni nì xichuún-né nì quisi, vachi veheñùhu ñuhivì yohó-ní nì sandua, te cuisì ejemplu uun nì sanduu stná, còni sándüá veheñùhu ndisa xi-ya iá ansivi. Doco meru vehe ì-yá iá yucán, promesa chicá ndiaha xiñuhá, màdì cuisì nì quisi.

²⁴ Ñàyùcàndüá, vichi sàni nasaa Jesús ndè meru ansivi ñà-màcuìn-yà nùù Dios sàhà-ndà. Màdì veheñùhu ñuhivì yohó nduú lugar ndé nì nasaa-yà, còó; vachi cuisì ejemplu uun nduú veheñùhu ñuhivì yohó, có-ndüú ndisa-ña vehe ì nì quidavàha mii-yá ansivi.

²⁵ Dùtù cusáhnû raza-ndà Judea, na quíhvi-ne ini quartu chicá ì xí veheñùhu, nì (quisi) nihí-né sàhàn, màdì nì mii-né. Te cuà cuà quidá-né ducán. Doco Jesús, còó; có-xiñùhù cuàha-ya vida xi-ya cuàhà xichi, còó.

²⁶ Vàchi nú ducan nì cundüá, dandu cuàhà gá xichi icúmí-yâ ndoho-ya dècuèndè na ní sàcò ñuhivì xì ndè vichi nì cuí. Doco còó, vachi na ní xinu tiempo antes, dandu nì quixi-ya ñuhivì yohó, te nì sàha-ya vida xi-ya, doco cuisì iin xichi-ní nì xihì-yà, vachi nì dānāà nsihí-yá sàhà-ndà, te nì nihì-yá nansa cuxio dahuun cuàchi-nda.

²⁷ Vàchi divi nacua icúmí nsidaa nèhivì sàa-nè cui-nè iin xichi, te después nsidandaa Dios sàhà-né,

²⁸ divi ducaní stná Cristu, iin xichi-ni nì sàha-ya vida xi-ya nì nacuida-ya cuàchi cuàhà gá nèhivì. Dandu después icúmí-yâ naxicocuìn-yà ñuhivì yohó, doco màdì gá sàhà-ñá (ndoho-ya sàhà) cuàchi-nda; còó. Cunaha-nsiá, divi sàhà ñà-càcu nsidaa ndohó nèhivì ndiatú naxicocuìn-yà cundumà.

10

¹ Ley sàhana ma, màdì meru ñà-chicá ndiaha ì xí Dios nì sándüú ndisa; cuisì nì cachitnùhu uan ñà-después icúmí quixi ñà-ndiaha ì ndisa xi-ya. Ñàyùcàndüá, mate nicanicuahàn dócò ì-né promesa cachí ley mà, te cuà cuà quidá dùtù ducán, doco mà cúí ndoo cuàchi nèhivì sàhàn nùù (veheñùhu) sàhámà.

² Vàchi nú jaan, dandu mà cuàha ga xì promesa mà, vachi mà dándóhò gá cuàchi nèhivì sàxínitnùnì-nè nì cùí.

³ Doco vichi, sàhà-ñá cuà cuà sàha ì-né promesa (cachí ley) mà, ñàyùcàndüá nsinúú ini-nè iá ì cuàchi-ne.

⁴ Vàchi sàhà nì buey, ò nì simbee, mà nunca cui cuxio cuàchi ni-iin nèhivì.

⁵ Ñàyùcàndüá, na ní quesaa Jesucristu ñuhivì yohó, dohó nì cachi-yà xì Yuamánì-yá: Mii-ní, màdì promesa nduá cuní gá-ní cuàha nèhivì mii-ní. Màdiá cui quisi coco gá-si nùù-ní nduá cuní-ní. Còó. Ñàyùcàndüá vichi sàni quidayucùn-ní iin iquicúñù cucumí.

⁶ Vàchi màdì quisì nì xixìn, nì màdì inga clase promesa sàhà cuàchi nduá cudî inì-ní sàhà-xí; còó.

⁷ Dandu yùhù, nì cachi: “Yohó vaxi ñà-quida ndise cumplir ñà-nduá cuní-ní, nacua cachí tutu ì sàhí, Dios míó”.

⁸ Cunaha-nsiá, jaàn nì cachi Dios ñà-có-cudî gá ini-yà sàhà promesa sáhatahvì nèhivì, nì có-cudî gá stná ini-yà sàhà quisì sahmí-né; còó, có-cudî ini-yà sàhà ni-iin ñà-jaàn nì sàha-ne sàhà cuàchi-ne, mate divi nduá cachí ley (primeru-mà) cuàha-ne.

⁹ Daaní, después nì cachi Jesucristu: “Yohó vaxi ñà-quida ndise cumplir ñà-nduá cuní-ní, Dios míó”. Pues ñà-jaàn cuní cachi cuàhàn-yà dandáñúhú-yà ley primeru mà, te caquin-yà inga ley saa xí-yá.

¹⁰ Te sàhà-ña nì quida ndisa-ya nsidaa ñà-nduá nì ndacu nuù-yá, ñàyùcànduá vátùni nduhì dahuun anima-ndà, vachi nì sàha-ya iquicúñú-yà nahi promesa ñà-danáa-yá sàhà-ndà. Iin xichi-ni nì quida-ya ducán, doco nicanicuahàn cundiaà.

¹¹ Quivì vichi itá dùtù raza-ndà, quidá-né chuun xi veheñuhu xi-ne; te nsiquívì sàha-ne cuàhà xichi promesa xi ley mà, mate mà nunca dacúxióá cuàchi-nda.

¹² Doco Jesús, còó, iin xichi-ni nì danáa-yá sàhà cuàchi-nda, te nicanicuahàn cundiaàmà, dandu nì sàcòo-ya ladu cuahá Yuamáni-yá,

¹³ te ndiatú-ní-yá dècuèndè cundee dahuun-yamà nuù nsidaa ana xiní ùhì xì-yá, te cusahnú-yá nuù-né.

¹⁴ Vachi iin xichi-ni nì danáa-yá (sàhà cuàchi-nda), dandu nicanicuahàn icúmí ndee vaha nsidaa ana sàni ndoo cuàchi anima-xi.

¹⁵ Te divi ducán cachí stná Espíritu ì xí-yá. Vachi primeru nì cachi Stoho-ndà Señor palabra yohó:

¹⁶ Tucu coo ley saa icúmí cuàhi nècuàchìmà quivì nuù-xí, cachí, vachi meru ini anima-nè icúmí nacoò dahuin ley mà; meru ini sàxìnítnùnì-nè icúmí chihà.

¹⁷ Dandu después cachí-yà:

Ndè nicanicuahàn mà nunca nsinuu ga inì sàhà cuàchi-ne.

¹⁸ Ñàyùcànduá, cunaha-nsiá, nú sàni ndutu dahuun cuàchi-nda, còó gá necesidad cuàha-nda ni-iin ga promesa ñà-danáa xì sàhà-ñá.

¹⁹ Sàhà ñà-jaàn, có-yúhì gá-ndà datnátuu-nda anima-ndà nuù Dios, mate iá-yà lugar xi-ya ndé chicá ì, vachi sàhà nì Jesús sà-nùná ichì, ñàni.

²⁰ Na iin ichì saa nduá, te divi mii-yá nì quidayucun xán, vachi sàhà-ñá itiácú ndiaha-yá, ñàyùcànduá iá ichì mà. (Antes iin sìcoto nìsa sadi nihni ndé nduú lugar chicá ì xí Dios, doco) sìcoto mà, ejemplu sàhà cuerpu xi Jesús nì sandua, (vachi na ní xihì-yà), divi sàhà ñà-jaàn nì nihì-ndà nansa yàha-nda nuù Dios.

²¹ Te vichi sà-icúmí-ndá iin dùtù ndiaha chindéé xí nsidaa ndohó ana nduú dèhe ndisa-ya.

²² Ñàyùcànduá, màsà yúhì-ndà datnátuu-nda anima-ndà nuù-yá. Iin-ni ni cúníhnú ndisa ini-ndà mii-yá; nì cúníndísà víi-ndayá, màsà cúcáhan-ndá a jaan á coó. Vachi sàhà-ñá nì xitià nì-yá, ñàyùcànduá sàni ndundoo sàxìnítnùnì-ndà, te có-dàndòhó gá-ndó; te ducán queámà na ian sàni xichi-nda tècuí limpiu.

Màsà nándodó-nda ichì-yá

²³ Pues sàhà nsidaa ñà-jaàn xiñuhu cunchicùn vii-ndà ñà-nduá xiníndísá-ndá; iin-ni ni cúníhnú vaha ini-ndà ñà-jaàn. Màsà dáma sàxìnítnùnì-ndà, vachi sàni sàha-ya palabra xi-ya, te mà dándáhvì-yàndó.

²⁴ Te xiñuhu stná nanducu-nda nansa nacuahandee stnahá ini-ndà sàhà-ñá chicá más ni cúcuú stnahá ini-ndà sàhà-ndà, te quida vii-ndà xì ñanìtnaha-nda.

²⁵ Nì màsà nácóó-ndá ñà-nataca-ndà na ian quidá dava nèhivì. Còó; vichi chicá xiñuhu cunuù stnahà-ndà, te nacuahandee stnahá ini-ndà, vachi sà-ìndéhe-nda chicá sà-cuyátní quivì (naxicocúin-yà).

²⁶ Vàchi cunaha-nsiá, nú sàni cundaà vaha ini-ndà nansa iá ichì ndàcuisi-yá, doco quidá canúú ñi-ndà cuàchi-nda, dandu còò cá ni-iin promesa cui danáà xì sàhà-ndà.

²⁷ Ndé cuisì-ní ndóo ga ñà-yùhí cuaá-ndà, vachi vaxi castigu cahnú, vaxi ñuhu níhi coco nsidaa ana có-ndóo ladu xi-ya.

²⁸ Nèhivì sàhana, nú nì cahíchi ini-nè ley xi Moisés, dandu fuerza cui-nè nú ndóo ùi ò ùnì testigu cachí nansa nì cuu, te nú ducán, dandu còò iin ni cuhí ini xì-né na ní xihì-nè.

²⁹ Doco nú meru Dèhemanì Dios nduú ana cahíchi ini iin nèhivì, dandu ¿nansa tuxí inì-nsia cuu? ¿Amadí cuàhà gá más castigu icúmí-nè nihì-né? Vachi nú có-quidáñúhú-nè ñà-nì xitià nì ndiaha-yá, dandu cahnú sàstnùhù coo castigu xi-ne, vachi sàhà nì mà nì ndoo anima-nè, te sàhà stná mà nì saquin Dios iin tratu xì-né. Daaní, stná Espíritu Ì xí Dios, gracia nì quida stná-yà xì nècuàchì mà, doco nú vichi cutu ni cahíchi ini-nè nsidaámà, dandu ndahví-nè.

³⁰ Ináhà-ndá ñà-divi Dios nduú ana nì cachi xì-ndà dohó: “Míi quidá tocar nachitacùhà sàhà falta xi nèhivì; còò cá ana icúmí nacuàha xi-né castigu”. Te cachí stná (tutu ì) ñà-divi mii-yá icúmí-yà nsidandaà-yà sàhà cuàchi nèhivì xí-yá.

³¹ Cunaha-nsiá, tnùndoho cahnú cundua nú ni níhì nèhivì castigu nùù ndahà Dios iá nicanicuahàn.

³²⁻³³ Doco mii-nsiá, xiñuhu nsinuu ini-nsià nansa nì cuu xi-nsiá quivì primeru na lácà nì dàtnúù-yà sàxínítnùnì-nsià, cuàhà tnùndoho nì yàha-nsia. Dava xichi nì canàhá nèhivì xì-nsiá, te dava xichi nì dàndòhó stná-nè mii-nsiá nùù tàcá nèhivì. Te dava xichi cuisì-ní nì quida-nsia acompañar nècuàchì nì ndoho ducán, doco calma nì quidandee inì-nsia sàhà nsidaámà.

³⁴ Te na ní sàcùndiadi stná compañeru-nsià, dandu nì indehè ndahví-nsiànè; te na ní candiaa nèhivì biene xi-nsia, (cóni cúhúún inì-nsia), còò, duha nì cudì inì-nsia, vachi ináhà-nsià, ndè gloria xi Dios chicá cuàhà iñàha icúmí-ndá, te chicá ndiaá mà, vachi nicanicuahàn cunaha-ñá.

³⁵ Ñàyùcàndüá, iin-ni ni cúníhnú vaha ini-ndà (ichì-yá), màsà nácóó-ndáñà, vachi iin ñà-vaha cahnú icúmí-ndá nihì-ndà nùù-yá.

³⁶ Iin-ni ni cúnchícùn cuéyàà-ndà ichì mà, vachi nú sàni nsihi nì quida-nda nsidaa ñà-ndüá cuní Dios quida-nda, dandu nihì-ndà ñà-ndiaha ñi sàni cachi sahnú-yá xì-ndà.

³⁷ Vachi dohó cachí tutu ì: Cunaha-nsiá, icúmí-yà naxicocuñn-yà: làcà sacu tiempu cumáni gá; mà cuéé gà-yà.

³⁸ Te (cachí stná-yà): “Nèhivì vaha xi, nú xiníndísà vaha-ne yùhù, dandu nihì-né vida ndiaha. Doco nú ni ndédúmá ini-nè, dandu ni-iyuhu mà ndóo inì sàhà-né”, cachí-yà.

³⁹ Doco ndohó, có-ndüù-ndà nèhivì ndedúmá ini-xi, vachi nú jaan, ndañuhu anima-ndà. Còò, nèhivì xiníndísà nduu-nda, ñàyùcàndüá icúmí-ndá càcu-nda nùù-yá.

11

Xiñuhu cunindisá víi-nda

¹ Nú ndisa xiníndísà vaha-nda Dios, dandu cuní cachàmà ñà-nìhnú cuisì ini-ndà icúmí cuu ndisa ñà-ndüá ndiatu-nda. Te nú xiníndísà-ndá ducán, dandu quidá stná-ndà cuenta na ian sà-lá ndisa ñà-tàñáha ga cuninùù-ndà.

² Te divi ñà-jaàn nduú stná ñà-ndüá nìsa quida xì-ndà sàhana, nì xinindisá-né mii-yá, te nì ndee vaha-ne nùù-yá.

³ Ndohó, xiníndísà-ndáyâ, te sàhájàn vätùni cundaà ini-ndà nansa nì quidavàha-ya ñuhiví, cuisì nì càhàn-yà, te nì sàcòà; ñàyùcàndüá, indéhe-nda iá ñuhiví vichi, doco màdì ñà-tùì cundehè-ndà ndüá nì cuyucàn; còò.

⁴ Daaní, Abel, na ní sàha-ne Dios promesa xi-ne, chicá nì sandiaámà nùù promesa nì sàha Caín. Te ¿índù chuun chicá ndiaámà? Divi sàhà-ñá nì xinindisá nècuàchì mà mii-yá. Ñàyùcàndüá, nì cachi-yà: “Sàni ndee vaha Abel nù; cudì inì sàhà promesa

xi-ne". Ñàyùcàndùá, mate còò cá Abel mà, doco dècuèndè vichi iá ì fama-nè ñà-nì xinindisá-néyà.

⁵ Daaní, Enoc tu, nì xinindisá stná-nè mii-yá, te vivu nì sàà-nè nùù-yá, cóni xihì-nè, nì ndañuhu uun-ne (nùù nèhivì), vàchi sàhà poder ndiaha xí Dios nì ndiachi-né dècuèndè ndé iá-yà. Te cachí tutu ì, ducán nì cuu xi-né ñà-nì cudii guá ini-yà sàhà-né.

⁶ Doco nú có-xinindisá-ndá, dandu mà nunca cudii ini-yà sàhà-ndà. Vàchi nú cuní-ndà sàà-ndà nùù-yá, dandu fuerza cunindisa-nda iá ndisa-ya, te seguru datnúù-yà sàxinítnùnì nsidaa ana nandúcu ndisa-xi-yá.

⁷ Daaní, stná Noé, nì xinindisá stná-nè mii-yá na ní cachitnùhu-ya xi-né ñà-ndùá icúmí cuu quivì nùù-xì; ñàyùcàndùá, nì quida-ne ñà-ndùá nì cachi-yà, nì quidavàha-ne iin barcu cahnú sàhà-ñá càcu-ne, mii-né xì stná nèhivì vehe-ne. Ducán nì quida-ne, te ñà-jaàn claru nì tui ñà-cóni quidá víi dava ga nèhivì ñuhivì. Doco mii-né, nì ndee vaha-ne nùù-yá ñà-nì xinindisá-néyà.

⁸ Daaní, stná Abraham; nì xinindisá stná-néyà, te ñàyùcàndùá nì quee-ne cuàhàn-nè na ní cana-yanè ñà-cùhùn xicà-né inga ñuu ndé icúmí-né sàà-nè cunduu-ne stoho nsidaa ñà-íá yucán. Ñàyùcàndùá, nì inini-ne ñà-ndùá nì ndacu nuù-né, mate có-cùndàà ini-nè índù cùhùn-nè.

⁹ (Dandu nì sàà-nè) ñuu ndé nì cachi Dios xi-né mà. Yohó te yucán nì ìa chii-né ñuu mà, nihnú ini-nè nduú-né nècuàchì inga ñuu, doco siempre iin-nì xinindisá víi-néyà. Cuisi vehe sìcoto nì sanduu vehe-ne, te divi clase vehe yucán nìsa xichuún stná (dèhe-ne) Isaac, xì stná (dèheñani-né) Jacob. Cunaha-nsiá, stná nècuàchì yucán, iin-nì nì sandiatu stná-nè cuu xi-né ñà-ndùá nì cachi Dios xì Abraham antes.

¹⁰ Vàchi nècuàchì mà, (na ní quee-ne ñuu-nè), nandúcu-nè iin ñuu sàni quidavàha-ya; vàchi nihnú ini-nè iá iin ñuu nì chitnùnì ini mii-yá coo, te fuerte ndisa cimientu xan.

¹¹ Daaní, stná (ñahàdihì-nè) Sara, nì xinindisá stná-nè mii-yá. Mate sáyàha ga sahnú-né, doco nì nihitáhvi-né valor ñà-coo iin mée xi-ne, vàchi antes sàni cachi sahnú Dios xi-né, te ñàyùcàndùá nì tui nuù iin dèhe-ne, vàchi xinindisá-né mà nunca dandahví-yànè.

¹² Ñàyùcàndùá, mate sàsahnú cuàha Abraham, doco nì ìa iin dèhe-ne, te sàhà imindaa dèhe-nemà nì sàà-nè nì sàcunduu-ne yohótéhè cuàhà gá mil nèhivì; cuàhà sàstnùhù nèhivì nì nanduu-ne nahi cuàhà sìtnùù ansivi, ò ñusì ndiquin yuhù mar, vàchi mà cù nandiahvia.

¹³ Cunaha-nsiá, nsidaa nècuàchì sàni nacani xi-nsiá sàhà-ximà, iin-nì nì xinindisá víi-né mii-yá dècuèndè nì xihì-nè. Te mate cóni sàà-nè cuninùù-né cuu ndisa ñà-ndùá nì cachi Dios xi-né, doco iin-nì nì xinindisá-né, mate tàyóa, te nì cudii ini-nè sàhà-ñá, vàchi (nì cundaà ini-nè) màdì ñuu ndisa-ne nduú ñuu-nè ñuhivì yohó, ñàyùcàndùá nì cachi-nè xì nèhivì ñà-cuisì-ní yáha uun-ne ñuhivì yohó.

¹⁴ Te nú ducán cachí nèhivì, dandu náhà claru inga ñuu nduá nandúcu-nè, iin ñuu ndé cunduu ñuu ndisa-ne.

¹⁵ Te nú cuàhàn-nè nsinuu ini-nè ñuu-nè primeru nì cùí, dandu vihini naxicocuïn-nè yucán.

¹⁶ Doco còò, cóni núhù-nè, vàchi nì cuni-nè cundoo-ne iin ñuu chicá ndiaha, divi ñuu mii-yá iá ansivi. Te sàhà-ñá (nì xinindisá-né ducán), ñàyùcàndùá có-nducáhán-yá cachí-yà ñà-nduú-yá ana cahvi-né, vàchi sàni quidayucun-yà iin ñuu (ndiaha) ndé cundoo-ne (xì-yá).

¹⁷ Daaní, después, nì cachi Dios xì Abraham ñà-nì cuàha-ne dèhe-ne Isaac cunduu-tè iin promesa. Ducán nì quida-ya sàhà-ñá cundaà ini-yà a cunini vii-néyà, á coó. Te (nì quida-ne cumplir), nì xinindisá-né mii-yá, dispuestu nì ìa-ne ñà-cunduu dèhe-ne promesa, mate mindaa-té nùù-né, te mate antes sàni cachi sahnú Dios xi-né

¹⁸ ñà-divi nùù tèchii Isaac mà icúmí quee cuàhà descendencia xi-ne.

19 Doco nì cundee ini-nè ñà-vàtùni danátíacú-yàte nú ni cuí-te. (Te ñà-nì càcu-tè) nì ndòo-tè vivu nùù-né, ñàyùcàndùá vátùni quida-nda cuenta na ian ndisa, sàni natiacù-te.

20 Daaní, después (nì cundaà ndisa inì-xi) ñà-xiníndísâ stná Isaac mà mii-yá, vàchi cuàhà gá ñà-ndíaha î nì cachitnùhu-ne xì (ùì dèhe-ne) Jacob xì Esaú sàhà nansa icúmí cuu xi-né quivì nùù-xí.

21 Daaní, Jacob mà, nì xinindisá stná-nè mii-yá, (ináhá-ndá), vàchi na sá-ítúú cuàhàn-nè cui-nè, dandu nì càhàn-nè xì iin iin dèhe José, nì cachitnùhu-ne xì dèheñani-né mà ñà-ìcúmí-tê nìhì-té cuàhà ñà-vàha ndiaha nùù Dios. Ducán nì cachi-nè, naquímànì-né Dios, te itúú-né nùù bastón xi-ne.

22 Daaní, José mà, nì xinindisá stná-nè mii-yá, (ináhá-ndá), vàchi na sá-ítúú cuàhàn-nè cui stná-nè, nì cachi-nè ñà-seguru icúmí caquee libre nsidaa nècuàchì raza-nè Israel nùù ñuu Egipto. Te nì nacoò stná-nè órden nansa quida nèhivì xì iquìcúñú-nè nú sàni xihì-nè.

23 Daaní, stná yuadíhí Moisés, nì xinindisá stná-nè mii-yá na ní tùinuù dèhe-ne mà. Te nì caxini-nè cuahani iá-vè, ñàyùcàndùá mate sàni dàndacú rey cui-vè, doco cóni yúhì-nè; ùnì yòò nì ìa dèhé-vè nì quida-ne.

24 Daaní, stná Moisés mà, nì xinindisá stná-nè mii-yá, te sàhámà na sàni sahnu-ne, cóni cùnì-nè cachi gá nèhivì ñà-dihi-né nduú dèheyoco rey.

25 Còó, chicá nì cudì ini-nè cùhùn-nè cutnahá-né xì nèhivì xí Dios, mate cuàhà gá nì ndòhó-né, te màdiá ndòo-ne (ndé iá-nè), te quida-ne ñà-vico sìquini iá ñuhivì yohó, vàchi cuisì sacù-ni tiempu coo ñà-vico ma.

26 Chicá nsiha ichì Cristu nì cúnchícùn-nè nihnú ini-nè, mate ni cáhìchì ini nèhivì-né; te cóni xího stná-nè ñà-cuicà ñuu Egipto yucán, vàchi iin-ni nihnú ini-nè ñà-cuisì nùù Dios icúmí-nè nìhitàhvì-né cuàhà ñà-ndiaha î.

27 Daaní, na ní quee-ne ñuu Egipto mà cuàhàn-nè, divi sàhà-ñá xiníndísâ-né mii-yá nì sandua. Ni cóni yúhì-nè ñà-nì xidà guá ini rey dandacú yucán, vàchi iin-ni nchícùn vîi-néyà na ian xinínùù-néyà, mate có-túì-yá indéhe-nda.

28 Daaní, ñà-sàni xinindisá-né mii-yá nduú stná na ní quida-ne vicò pascua primeru, mii-né xì nèhivì raza-nè, te nì dàcáa-ne nì (lelù ìcà yehè-né) sàhá màsà cúí dèhe sahnú-né quida ángel yàha yucán.

29 Daaní, na ní yàha-ne Mar Cuahá, te nì nduhìchì cahà mar mà nahi ñuhù íchì, divi sàhà-ñá nì xinindisá-né Dios nì sanduu stná` mà. Doco tè-ñuu Egipto, na ní cuni stná-te yàha-tè yucán, dandu nì càhà nsihi-tè.

30 Daaní, sàhà-ñá nì xinindisá stná nèhivì raza-ndà mii-yá, ñàyùcàndùá nì nacunundu-nè ñuu Jericó ùsà quivì, te nì caà nama ndiadì nùù ñuu mà.

31 Daaní, stná nècuàchì ñahà nani Rahab, mate cuàhà tiàa nì xicanuu xi-né (antes), doco nì sàà-nè nì xinindisá stná-nè mii-yá, vàchi na ní techuún Moisés iin ùì tiàa ñà-nacunì-te nansa iá ñuu nècuàchì mà, dandu nì chindee-néte. Ñàyùcàndùá, cóni xihì-nè nahi nèhivì dava ga có-xiníndísâ.

32 Pues vichi có-xiñùhù cachi guè (sàhà nèhivì sànaha ma), ni mà sàà stnáì nacani nsihi xì-nsiá sàhà nsidaa-né, divi sàhà Gedeón, xì sàhà Barac, xì Sansón, xì Jefte, xì David, xì Samuel, xì sàhà stná dava ga nècuàchì nìsa cahàn cuenta xì Dios.

33 Cunaha-nsiá, divi sàhà-ñá nì xinindisá nsidaa nècuàchì mà mii-yá, (ñàyùcàndùá nì quida-ne cuàhà obra ndiaha). Dava-ne nì cundee-né nùù nsidaa nèhivì ndoó inga ñuu. Dandu nì cusahnú víi-né, te nì nìhì-né ñà-vàha nì cachi sahnú Dios xi-né. Te dava-ne nì càcu-ne nùù nsicaha, cóni sàxì-siné.

34 Te dava stná-nè, nì cundee-né nùù ñuhu xíxìn, cóni quidá dañùà xi-né. Te dava-ne nì càcu-ne nùù nèhivì cuàhàn cahni xi-né xì espada nì cúí. Stná nècuàchì còò fuerza xi, nì xinindisá stná-nè mii-yá, te nì ndufuerté-nè, vátùni nì nacuahandee ini-nè, te na ní caquixi soldadu inga ñuu, vátùni nì chindee-né mii-né, te nì taxi-né nsidaa tèmà.

³⁵ Stná nècuàchì ñahà, nì xinindisá stná-nèyà, te ñàyùcànduá nì nìhìtáhvi dava-ne nì natiacu iin nèhivì vehe-ne. Doco dava stná nècuàchìma, nì dándòhó nèhivì-né, te nì xihì-nè; vihini dacácu-tèné nì cùí (nú nì nácóó-né ichì-yá); doco còó, cóni quidá-né ducán, vàchi cuní-nè nìhìtáhvi-né iin ñà-vàha chicá ndiaha, divi ñà-natiacu-nè.

³⁶ Daaní, dava stná nècuàchì sàhana ma, cuàhà gá nì sàcùndiaa nèhivì-né, te nì ñàhni cuií stná-nè. Te dava stná-nè, nì sàcùnuhni stná-nè cadena, te nì sàcùndiadi-nè.

³⁷ Te dava stná-nè, nì sahnì nèhivì-né xì yùù, ò machete. Te dava-ne, serruchu nì quedava-ne. Cuàhà gá nì candoho-ne nì quida nèhivì. Ñàyùcànduá, yohó te yucán nì xicanuu ndahví-nè, nìsa idáhvi-ne xì cuisì iin riì ò simbee, vàchi ndahví dahuun-ne, cuàhà tñundoho nì xini-nè; quini nì dándòhó nèhivì-né.

³⁸ Nì xicanuu ndahví-nè yucù dána, ò inga xaan ndé còò nèhivì, te yucán nì caquidì-nè ini cueva, ò ini iin chìcòhò cahnú. Ducán nì cuu xi-né mate chicá ndiaá-nè nùù nsidaa gá nèhivì ñuhivì.

³⁹ Doco nsidaa nècuàchì sàhana ma, mate ní nìhì-né nì ndee vaha-ne nùù Dios ñà-nì xinindisá-néyà, doco cóni nìhìtáhvi-né ñà-ndiaha ì nì cachi-yà (xì xii-ndà) antes.

⁴⁰ Còó, vàchi sàhà-ñá nihnú stná ini-yà ndohó, ñàyùcànduá nì chitnùnì ini-yà ñà-dècuèndè quivì vichi coo iin ñà-chicá ndiaha nìhìtáhvi-ndà, dandu iin-ni nacuat-naha-nda xi nècuàchì yucán cundiatú anima nsidaa-nda.

12

Cuisì Jesús ni cúndéhe-nda nùù-xí

¹ Vichi cuàhà sàstnùhù nèhivì (sàhana) sàni nacani xi-nda ñà-ndiaha guá iá (nú xiníndisá-ndá mii-yá). Ñàyùcànduá, xiñuhu nacoo dahuun-nda nsidaa iñaha sadí xì nùù-ndà. Ni nácóó-ndá nsidanicuú cuàchi quida-nda, vàchi ñà-yucán nduá dacá xi dìnì-ndà. Iin-ni nì cúnchìcùn vii-ndà mii-yá inii vida xi-nda; nacua quidá nècuàchì dadavá stnahá xinú carrera, ducán xiñuhu nacuahandee ini-ndà.

² Iin-ni nì cúndéhe-nda nùù Jesús, vàchi sàhà mii-yá nì quesaha-nda xiníndisá-ndá ichì-yá, te divi-ya icúmì chindee stná xì-ndà ndè cachi xinu vida xi-nda. Te mate nchìca cruz nì ndoho-ya, doco cóni ndúlócô-yà na ní cahìchì ini nèhivì-yá ñà-nì xihì-yà ducán, vàchi ináhá-yâ, después icúmì-yâ sàà-yà coo-ya contentu. Daaní, (mànuhù-yà gloria), te yucán nì sàcòò-ya ladu cuahá Yua-nda Dios.

³ Pues vichi xiñuhu nsinuu inì-nsia nansa nì cuu xi-yá, cuàhà gá nì quida quini nèhivì cuáchi xi-yá, doco nì quidandee ini-yà. Ñàyùcànduá, nsinuu inì-nsia ñà-jaàn, còò cucahan-nsiá mà cúndéé gá inì-nsia, te cuhuun inì-nsia.

⁴ Vàchi ñà-ndàà nduá, cuàhà lucha fuerte sàni quida-nsia ñà-màsà cúndéé nèhivì cuáchi ma nùù-nsiá, doco ni-iin-nsia tàñáha ga cahnì-né.

⁵ Doco nacua indéhì sàni nandòdó-nsiá nansa cachí Dios nùù tutu ì ndé cáhàn-yà xì-ndà na iin yua-nda. Pues dohó cachí-yà:

Hijos míos, màsà cúñáñá-nsiá nú nani-nsia nùù yùhù ana nduú Stoho-nsiá Señor; còó, ni màsà cúhúùn stná inì-nsia nú sàni sàhi-nsiá iin conseju tii.

⁶ Vàchi Stoho-nsiá nduú, te cuú inì sàhà nsidaa-nsiá, ñàyùcànduá fuerza nani-nsia, vàchi nsidaa ana sàni nacàxin ñà-cunduu-ne dèhi, icúmì-né ñàhni stná-nè, cachí Dios.

⁷ Ñàyùcànduá, xiñuhu quidandee ini-ndà na nani-nda nùù-yá, vàchi sàhà-ñá nduú ndisa-nda dèhe-ya nduájàn. Sà-ináhá-ndá, na cuati-nda, nsidanicuú-nda nì nìhì-ndà conseju nùù yua-nda.

⁸ Doco quivì vichi, nú còò ni-iin conseju níhì-ndà nùù mii-yá, dandu cuní cachàmà ñà-có-ndúú ndisa-nda dèhe-ya, vàchi nsidaa ana nduú dèhe ndisa-ya, ducán quidá-yá xì-né.

⁹ Vàchi yua-nda ñuhiví yohó, nìsa danáni stná-nèndó, te nìsa cahvi-ndané. ¿Amádi chicá ndiá ìcà-ndà cundoo stná-ndà sujetu nùu Yua-nda iá ansivi, te ducán nìhì-ndà cutiacu ndiaha-nda?

¹⁰ Vàchi sacu tiempu nì ndòo-nda nùu yua-nda ndoo ñuhiví yohó, te nacua cudî ini-nè, ducán nìsa danáni-nèndó. Doco mii-yá, cuisì sàhà ñà-cunduu ñà-vàha xi-nda nduá danáni-yàndó, te ducán cunduu ndisa-nda nèhivì ìi nahi mii-yá.

¹¹ Pues ñà-ndàà nduá, có-cudî ini-ndà na hora nìhì-ndà conseju; tnùndoho nduá cahan-nda; doco nú sàni yàha, te sàni sàà-ndà nì cundaà vaha ini-ndà, dandu chicá ndiaha coo vida xi-nda, vachi chicá vii sàni sàà-ndà nacani ini-ndà.

Cuàhà gá peligru ndácàn nú cahíchi ini-ndà palabra cachí Yua-nda Dios

¹² Ñàyùcànduá, màsà cúndóo-nsiá cuhúún gá inì-nsia na ian nì còyo ndahàsàhà-nsiá; còó. Iin-ni nì nàcuàhandee ini-nsià cuniá,

¹³ micuísì ichì váha-ya nanducu-nsiá sàhà-ñá màsà túcù iin nècuàchì tàcútùha vii cacanuu nacua ndiá ìcà-né. Te nú sà-íá iin ana tàcúndàà vaha inì-xi ducán, dandu nanducu-nsiá nansa ndufuerté anima-nè.

¹⁴ Nì cúndóó mánì-nsiá xì nsidaa ñanìtnaha-nsia, te nì cuáhandee stná inì-nsia cunihnu ìi inì-nsia nicanicuahàn, vachi nú có-nihnú ìi ini-ndà, mà nunca sàà-ndà cuni-ndà nùu Stoho-ndà Señor.

¹⁵ Te cuidadu nì cúndóó stná-nsià còtó nandòdó-nsiá gracia xi-ya, te sàà-nsià nanduu-nsia nèhivì malu ndedúmá inì-xi, vachi nacua quidá iin yohó yùcù dàná, ducán cui quida stná nècuàchì malu, mate imindaa-né, doco vihini cunduu-ne dañu xi cuàhà gá nèhivì.

¹⁶ Ñàyùcànduá, cuidadu cundoo-nsia, còtó coo iin-nsia cùtòó xì ñahà, te ò iin ana có-ndùlócò-xì ichì ìi-yá na ian nì quida Esaú sàna. Dèhe sahnú nì sanduu-ne, ñàyùcànduá, icúmí-nè ndutahvì-né cuàhà ñà-ndiaha nì cuí, doco nì dama-ne derechu mà sàhà cuisì iyuhu ñà-nduá nì xixi-ne.

¹⁷ Te ináhá-nsiá nansa nì cuu xi-né después, cóni nìhì-né ndutahvì gá-nè ñà-ndiaha ma nùu yua-né, mate yáha ga nì cuni-nè nìhì-né. Nì sacundahví-nè (nùu nècuàchì), te nì sacu fuerte-nè, doco mànicùí gá, vachi cóni nìhì-né nansa nadama-ne ñà-nduá sàni quida-ne mà.

Tucu iá ñà-nduá nì xini nèhivì sàna na ní sàha Dios-nè ley primeru

¹⁸ Vachi ndohó, cóni tnátuu-nda nùu iin yucù (ñuhiví yohó nacua nì quida nècuàchì Israel sàna), vachi yucù (Sinaí yucán), xixàn, te íin tnúú ndúchì, có-tùínúù, te caná fuerte tàchì.

¹⁹ Te nì sivi stná corneta; dandu nì tiacu cáhàn fuerte mii-yá. Doco nèhivì mà, nì sacundahví-nè nùu-yá ñà-màsà cáhàn gà-yà xì-né ducán.

²⁰ Vachi màni cúndéé gá ini-nè quida-ne cumplir palabra nì cachi-yà. Te dohó nì cachi stná-yà: “Màsà náná-nsiá ìcà yucù jaàn, te nì quisì xí-nsiá, vachi nú ducán, dandu icúmí-nsiá cahni-nsiási xi yúù, ò xì lanza”.

²¹ Cunaha-nsiá, yáha ga nì cayuhí cuaá nèhivì mà na ní indehè-né nansa nì cuu. Dècuèndè stná Moisés nì cachi-nè: “Ndé quidí cuisì ñà-yúhì güè”.

²² Doco ndohó, còó, vachi ichì yucù nani Sión sàni quihin-nda vichi, vachi yucù yucán nduú ñuu mii-yá iá nicanicuahàn. Te Jerusalén Nsiaha Iá Ansivi, ducán nani stná ñuu mà. Te sàni sàà stná-ndà ndé ndoo tàcá cuàhà mil ángel xi-ya,

²³ ndeníhì vaha-neyà. Te sàni nacuatnahá stná-ndà xì nsidaa gá nèhivì xínduu dèhe-ya, divi nsidaa ana itándiaa quivì-xì ndè gloria xi-ya. Te sàni dàtnátuu stná-ndà anima-nda nùu mii-yá ana icúmí nsidandaà sàhà nsidaa nèhivì, divi nduú Dios; te vichi iin-ni sànduú stná-ndà xì nèhivì nì ndee vaha nùu-yá sàna, doco vichi sàni nìhì stná-nè nì cundiatú ndiaha stná anima-nè.

²⁴ Vàchi nùù Jesús sàni tnàtuu anima nsidaa-nda, vàchi divi mii-yá nduú ana cáhàn nihni sàhà-ndà, te nì saquin stná-yà iin tratu saa xi-nda, divi nduú ñà-nì xitià nù-yà (sàhà-ndà); te cunaha-nsiá, chicá ndiaha quidá nù-yà mà nùù nùù Abel sàhana.

²⁵ Ñàyùcàndùá, cuidadu ni cúndóó-nsiá ñà-màsà nácuáa-nsiá mii-yá ana cáhàn xi-ndà vichi. Vàchi nú cóni cácu nèhivì sàhana na ní cahíchì ini-nèyà na ní cáhàn-yà xi-né ñuhivì yohó, dandu chicá mà cácu ndohó nú cahíchì ini-ndà palabra cachí-yà xi-ndà dècuèndè ansivi.

²⁶ Na ní cáhàn-yà antes, fuerte nì tnàa ñuhivì; doco vichi sàni cachitnùhu-ya xi-ndà inga palabra yohó, cachí-ya: “Inga xichi icúmí datnái ñuhivì. Doco màdì cuisì ñuhivì yohó icúmí tnàa; còó, dècuèndè stná ansivi icúmí tnàa”.

²⁷ Te na ní cachí-yà palabra mà ñà-inga xichi icúmí tnàa, pues cuní cachàmà ñà-icúmí cuxio nsihi nsidaa ñà-nduá nì quidavàha-ya ñuhivì yohó. Doco nsidaa ñà-cuàhàn cunaha nicanicuahàn, icumíâ ndò.

²⁸ Vàchi ñuhivì ì ndé icúmí-ndá cundoo-nda, mà nunca ndutá. Ñàyùcàndùá, iin-ni xiñuhu naquimanì-ndàyá sàhàmà sàhà-ñá vètùnì cunucuachi víi-nda nùù-yà nacua cuní-yà quida-nda, te cahvi víi-ndàyá; màsà nácuìdiqui uun-nda ichì-yá,

²⁹ vàchi nahi ñuhu níhi nduú-yá, te mà úhì cahmi nsihi-ya (ana cahíchì ini).

13

Nansa quida-nda, te cudì ini Dios sàhà-ndà

¹ Iin-ni nì cuú stnahá ini-ndà sàhà-ndà na ian iin-ni ñaní xínduu-nda.

² Màsà nándodó-nda coo manì ini-ndà xi nèhivì cóyo vehe-nda, vàchi dava nèhivì, ndè stná ángel xi Dios nì dàyáha-ne vehe-ne, te cóni cúndáà ini-nè.

³ Te xiñuhu nsinuu stná ini-ndà compañeru-ndà xíndiadi vehecàa; te ducán quida-nda cuenta na ian cutnàhâ stná-ndà xi-né ndiadi-ndà. Te nú quidá quini nèhivì xi dava ga compañeru-ndà, dandu cundehè ndahví stná-ndà nècuàchìmà, vàchi na nèhivì nduú stná-ndà, te vihini cuu stná xi-ndà ducán iin quivì.

⁴ Daaní, xiñuhu quida tnùñuhu stná-ndà xi nècuàchì vehe-nda. Màsà quidá-ndá ni-iin falta xi inga nèhivì. Vàchi iin castigu fuerte cuàha Dios ana nchícùn xi ñahà, te ò ana cáhàn xi nècuàchì có-nduú nècuàchì vehe-xi.

⁵ Màsà xího-nda cucumi-nda ñà-cuicà ñuhivì yohó. Nacua sà-icúmí-ndá, xi ñà-jaàn-ní nì cúndóó-ndá contentu, vàchi sàni cachí-yà: “Yùhù, mà nunca nandòdí mii-nsiá. Mà nunca nacoo nihni mii-nsiá”.

⁶ Ñàyùcàndùá, vètùnì cáhàn ndee-nda, cachí-ndà:

Divi Stoho-ndà Señor nduú ana chindéé xí. Mà yúhî, vàchi còò ni-ñàha cui quida nèhivì xí.

⁷ Daaní, xiñuhu nsinuu stná inì-nsia nècuàchì nìsa idònùù nùù-nsiá antes, divi nècuàchì nìsa dacuaha-xi-nsiá palabra ì xí Dios. Xiñuhu nsinuu ini-nsià nansa nìsa quida vèi-né vida xi-ne, te iin-ni nì cúndísâ stná-nsià nahi mii-né.

⁸ Cunaha-nsiá, iin-ni iá Jesucristu, dècuèndè sàhana xi vichi, te nicanicuahàn.

⁹ Màsà cuàha-nsia chiyuhù nèhivì-nsiá ñà-cunchicùn-nsiá inga ichì có-ínahá-nsiá, vàchi cuàhà ichì tùcù iá chináhà-nè; cuàhà gá ichì tàcùnì-ndà iá. Doco ndohó, chicá vaha cuisì gracia xi mii-yá ni cúníhnú ini-ndà, te ndufuerté anima-nda, màdìá cunchicùn-ndà iin ley cachí sàhà cuisì índù comida cui cuxi-nda, vàchi nèhivì nacání guâ inì-xi sàhàmà, còò ni-iin ñà-vàha xi anima-nè tavá-né.

¹⁰ Dùtù xinúcuáchì veheñùhu (xi raza-nda, itiácú-nè ñà-nduú promesa xi nèhivì). Doco ndohó, iá stná promesa xi-nda, (divi nduú Jesús); doco nècuàchì veheñùhu ma, còò derechu xi-ne nihitáhvi-né ni-ñàha nùù mii-yá.

¹¹ Vàchi quisì nduú promesa sàha-ne veheñùhu ma, xitià nùù-sí, dandu nihí dùtù-ñà sàhàn ndé nduú lugar chicá ì, te quidá-nèàmà presentar sàhà cuàchi nèhivì. Doco iquicúñú quisì mà, còò; ndè fuera ñuu icumíâ coca.

¹² Pues divi ducán nì cuu stná xì Jesús sàhà-ñá nìhì nèhivì ndoo ndisa cuàchi-ne sàhà nì-yá. Vàchi fuera ñuu nì ndoho stná-yà.

¹³ Ñàyùcàndùá ndohó, iin-ni ni cúnchícùn stná-ndàyá, mate icúmí-ndá naco-nda ñuu-ndà, te cahíchi ini nèhivì-ndó nacia nì quida-ne xì mii-yá.

¹⁴ Vàchi ni-iin ñuu iá ñuhiví yohó, mà cúndúá ñuu-ndà nicanicuahàn. Còó, iin ñuu quesaa quivì vaxi xi-nda nduá ndiatu-nda.

¹⁵ Ñàyùcàndùá, nicanicuahàn ndiá icà-ndà ndenihi vaha-nda Dios sàhà ñà-nduá nì quida Jesús. Vàchi na iin ofrenda xi-nda nùu-yá nduájàn na ndácùcahan-nda quivì-yá, te naquímànì-ndàyá.

¹⁶ Daaní, màsà nándodó stná-ndà quida-nda obra xì ñanìtnaha-nda, te chindee stnaha-nda, vachi ñà-jaàn ndisa nduú promesa cudí ini-yà sàhà-xí.

¹⁷ Nsidaa ñà-nduá cachí nècuàchì idónuu nùu-nsiá, cunini-nsia, te cundoo-nsia sujetu nùu-né; vachi inùu-né nùu-nsiá sàhà ñà-cunduu ñà-vaha xi anima-nsiá; te icúmí stná-nè nacua-nda-ne cuenta nùu Dios sàhà nsidaájàn. Ñàyùcàndùá, cunini-nsianè sàhà-ñá cudí ini-nè quida-ne chuun ma, te màdiá dacúhúun ini-nsianè; vachi nú ni cúhúun ini-nè quida-nsia, mà cúí cunduumà iin ñà-vaha xi-nsia.

¹⁸ Cacán tàhvì-nsiá nùu Dios sàhà-nsí, vachi ináhá-nsí còó ni-iin cuàchi dandoho-xi-nsí, te iin-ni cuní-nsí quida vii-nsí nsidanicuú tiempu.

¹⁹ Ñàyùcàndùá, sacúndáhvî nùu-nsiá ñà-nì cacán tàhvì cuáhà-nsiá sàhí sàhà-ñá chicá yàchì cui nasai ndé ndoó-nsiá.

²⁰ Ndiaha gá ndoo-nda ñuhiví quidá Yua-nda Dios, vachi sàhà-ñá nì xitià nì Stoho-ndà Jesucristu, ñàyùcàndùá nì saquin Yuandiaha-yá iin tratu saa xi nèhivì, te nduámà iin palabra mà nunca nsihi, vachi mate ní xihì Jesucristu, nì natiacu-yà nì quida Yuamánì-yá, te nì sàa-yà nì sàcùnduu-ya Pastor ndiaha xi-nda.

²¹ Te vichi cahnú gá Dios ni sàa-nsiá nìhìtàhvì-nsiá nsidanicuú ñà-vaha xi-ya sàhà-ñá cui quida-nsia cumplir ñà-nduá cuní-yà quida-nda; vachi nú ni nácuàhandee ini-yàndó (xì poder ndiaha) xì Jesucristu, dandu vātūni quida ndisa-nda ñà-nduá cudí ini-yà sàhà-xí. ¡Ansivéhé cahnú-yá nicanicuahàn! Amén.

²² Yùhù sacúndáhvî nùu-nsiá, ñánì, màsà cúdúchí inì-nsia sàhà conseju tii sàni tiai nùu-nsiá yohó, vachi iin ù-ni palabra nduá.

²³ Cunaha-nsiá, sàni quee ñani-ndà Timoteo vehecàa. Te nú ni quésáa yàchì-nè ndé ié' yohó, dandu cutnahá-nsí sàa-nsí ndé ndoó-nsiá.

²⁴ Cásàhúì xì nsidaa ana idónuu nùu-nsiá, cachi-nsiá xì-né. Te cásàhú stnài xì nsidaa gá nèhivì xì Dios. Daaní, nècuàchì ladu Italia cutnahá-xì yohó, cásàhú stná-nè xì-nsiá.

²⁵ Te nsidaa-nsiá, ni cúcúmí cuáhà-nsiá gracia xi-ya. Sà-ìá.

Tutu Nì Tiaa Santiago nù Nèhivì xí Dios

¹ Yùhù nduí Santiago, iin ana xinúcuáchí nù Yua-nda Dios xì nù Stoho-ndà Jesu-cristu, (te tiaí tutu yohó) nù nsidaa mii-nsiá nècuàchì nduú descendencia xì nsì-úxìn ù dèhe yohòtéhè-ndà Israel, doco vichi inicutu ñuhívì sàni xitià-nsiá. Yùhù cásàhùì xì nsidaa-nsiá.

² Ñàni, xiñuhu cudì ini-ndà na yáha-nda nsidanuu clase tnùndoho.

³ Vàchi iin tnùndoho, prueba nduá a ndisa xiníndísâ víi-ndayá, á cóo. Te cunaha-nsiá, divi sàhà tnùndoho ma vátùni cutùha stná-ndà quidandee ini-ndà.

⁴ Ñàyùcànduá, iin-ni ni quidándéé ini-ndà ducán dècuèndè nihì-ndà vátùni cundee ini-ndà sàhà ndéni ñàha nì cui, dandu cunduu ndisa-nda nèhivì ù inì-xi nacua cunì-yà cunduu-nda, te mà quidámànì gá ni-iin ñà-vàha nù anima-nda.

Nansa nihì-ndà cunchichí ndisa-nda quida Dios

⁵ Cunaha-nsiá, nú có-cùndàà ini-ndà nansa quida-nda, dandu ni cacán tàhvi-ndà nù Dios, te ducán cundaà vaha ini-ndà sàhàmà, vachi mii-yá, sáhatahvi-yándô ñà-nduá xiñuhu, mà dìhndiá-yà, te mà cánàhá-yà xì-ndà.

⁶ Doco ni cúníndísâ vaha-nda, te màsà nácánì ini-ndà a jáán, ò á cóo, vachi nú ducán, dandu cunduumà na ian quidá tècuì mar, yohó te yucán ndiachi-té quidá tàchì.

⁷ Te nú divi ducán quidá stná ndohó, dandu màsà cúníhnú ini-ndà nihitáhvi-ndà ni-ñàha nù Stoho-ndà Señor.

⁸ Vachi nèhivì mà-íin-ní nihnú inì-xi, mà nunca sàà-nè cutùha-ne quida vii-né nacua ndiá ìcà-né.

⁹ Ñàni, nú nècuàchì ndahví nduu-nda, dandu xiñuhu cudì ini-ndà, vachi cunaha-nsiá, nù mii-yá sàni nana ducún-ndà.

¹⁰ Doco nú nèhivì cuicà nduu-nda, te sàà-ndà yaha ndahví-ndà, dandu vátùni cudì stná ini-ndà sàhájàn, vachi nècuàchì cuicà, mà ùhì ndañuhu yàchì-nè na ian cuú xi ita caná yùcù iá campu.

¹¹ Vachi nú sàni xinu fuerte orá, te nì cuhìhni, dandu íchì yùcù mà, te ndáhvà ita-ñà, mà vícò gá iá-yà. Pues ducán iá stná xì iin nècuàchì cuicà, icúmí-nè ndañuhu yàchì stná-nè mahì chuun xi-ne.

Nansa xiñuhu quida-nda na yáha-nda tnùndoho

¹² Nansicáhàn-ndá nú ni quidándéé ini-ndà na yáha-nda tnùndoho, vachi nú ducán, dandu icúmí-ndá ndee vaha-nda nù Dios, te nihì stná-ndà iin ñà-vàha ndiaha xi-nda nù-yá, divi ñà-cutiacu-ndà nicanicuahàn, vachi ñà-jaàn nduá sàni quida-ya comprometer xì nsidaa nèhivì cuú inì-xi sàhà-yá.

¹³ Doco nú xího iin nèhivì quida-ne iin ñà-có-ndiàá, dandu màsà cáchì-nè Dios daxího xì-né. Còó, vachi Dios, mà cúí xihò-yá quida-ya ñà-có-ndiàá, ni có-dàxího stná-yà ni-iin nèhivì quida-ne ducán.

¹⁴ Cunaha-nsiá, cuisi-ní ini anima mii-nda xího quini-nda ducán, te ñà-jaàn nduá dítà xì-ndà ñà-cùnì-ndà quida quini-nda.

¹⁵ Daaní, nú ducán xího-nda quida-nda, dandu después sàà stná-ndà quida ndisa-nda iin cuàchi ma. Doco ¿índù fin cucumi cuàchi ma? Cuisì ñà-cahni dahuàn-ndó.

¹⁶ Ñàyùcànduá, (cachí xì-nsiá), ñani màní, màsà nunca cuàha-nda datúcù ni-iin nèhivì-ndó.

¹⁷ (Cunaha-nsiá), nù Yua-nda Dios iá ansivi quixí nsidaa ñà-vàha nù-ndà, vachi nsidaa ñà-ndiaha nihitáhvi-ndà, divi nù mii-yá quixá. Te chicá datnúu-yà (sàxínítnùnì-ndà) nù nsidaa ñà-tnùu iá ansivi. Doco mii-yá ni-iyuhu có-dâma-ya (nahi orá), vachi orá, xicá-yá, te iá còndàhvi-yá, doco Dios, còó, mà dáma-ya.

¹⁸ Te nì chitnùnì stná ini-yà ñà-cunini-nda palabra ndàcuisì xí-yá sàhà-ñá ducán sàà-ndà cunduu-nda dèhe ndisa-ya; dandu nùù nsidanicuú ñà-nduá nì quidavàha-ya, ndohó cunduu-nda ana chicá cudí ini-yà sàhà-xí na iin primicia ndiaha.

¹⁹ Ñàyùcànduá, siempre xiñuhu cundoo tùha-nda cunini vaha-nda sàhà iñàha, te màdià càhàn yàchì-ndà, te menos màsà cuídà yàchì ini-ndà, ñani màní.

²⁰ Vàchi nú nì cuídà ini-ndà sàhà iñàha, mà chíndéámàndó quida vii-ndà nacua cuní Yua-nda Dios.

²¹ Ñàyùcànduá, ni nácóó dahuun-nda nsidaa ñà-ía quini, xì nsidaa stná ñà-có-ndiáá iá guá ñuhívì yohó, te ni màsà ndúcuéhè stná-ndà; còó. Iin-ni ni cúnínì-ndá palabra ndiaha xí-yá nì chiñuhu-ya ini anima-ndà, vachi sàhà palabra ì mà vètùnì càcu-nda.

²² Doco màdí cunini uun-nda palabra mà. Xiñuhu ñà-quida ndisa stná-ndàñá cumplir, vachi nú coó, dandu cuisì-ní ñà-dàndàhvì-ndà mii-nda nduá.

²³ (Uun-ni queá) nú inínì-ndá palabra ì mà, te có-quidà-ndà ñà-nduá cachá, vachi ducán queámà na ian indéhe-nda nùù-ndà nùù iin yùtátá,

²⁴ te xiní-ndà nansa iá-ndà, doco nú sàni quee-nda cuàhàn-ndà, dandu nándòdó-nda nansa iá nùù-ndà.

²⁵ Doco nú inínì víi-nda ñà-nduá cachí ley ndiaha xí-yá, te có-nândodó-ndañá, iin-ni nchícùn-ndañá, dandísá, icúmí-ndá nihítàhvì-ndà gracia ñà-chindee xi-nda. Te divi ley mà nduá tavá xi-nda libre (nùù cuàchi-nda).

Nansa xiñuhu quida-nda nú cahvi ndisa-nda mii-yá nacua ndiá ìcà-ndà

²⁶ Dava nèhivì, tuxí ínì-nè nchícùn vii-né religión xi-ne, doco tùha stná-nè canàhà ndevàha-ne. Cunaha-nsiá, uun-ni queámà sàhà religión xi-ne, cuisì dandahví uun-ne mii-né.

²⁷ Vachi nú cuní-ndà cunucuachi ndisa-nda nùù Dios, dandu xiñuhu chindee-nda penchì ndahví, xì nècuàchì cuaán ndahví, te cundiaa-ndà mii-nda sàhà-ñá màsà dásìvì-ndà mii-nda xi chuun sìquini iá ñuhívì yohó, dandu ñà-jaàn ndisa cunduu iin religión vaha nùù Yua-nda Dios.

2

Màsà càhìchì ini-ndà ñanìtnaha-nda

¹ Ñánì, màsà càhìchì ini-ndà ni-iin nèhivì, vachi nèhivì xiníndísá-xí Stoho-ndà Jesucristu nduu-nda, te ndiaha gá mii-yá.

² Ni cachí-ndà nì sàà iin nèhivì ndixí vico lugar ndé natácá-ndà cahvi-nda mii-yá, te ñuhú stná iin anillu oro dìmìndàhá-nè. Daaní, ni cachí-ndà nì sàà stná iin nècuàchì ndahví yucán, te ndahví gá ndixí-né.

³⁻⁴ Doco nú màdi iin-ni quidáñúhú-ndá ndúì nècuàchìmà, mà váha. Màsà quidáñúhú-ndá (cuisì) nècuàchì ndixí víi, te cachi-ndà xì-né: “Yohó coo-ní iin lugar vii”, te nècuàchì ndahví mà, còó, cutu cachí-ndà xì-né: “Jaàn cuiin-ní”, te ò: “Yohó coo-ní ñuhù”, vachi ñà-jaàn nduá sàni càhìchì ini-ndà nècuàchìmà.

⁵ Cunini vaha-nsia palabra yohó, ñani màní. Mate iyuhu icúmí nècuàchì ndahví ñuhívì yohó, doco ¿amádi mii-né nduú ana (chicá) sàni nacàxin Dios ñà-nihítàhvì-né cunindisá-né mii-yá, te divi fe xi-ne nduú ñà-cuicà-né? Daaní, después sàà stná-nè cundoo-ne ñuhívì ì xí-yá, vachi ducán sàni quida-ya comprometer xì nsidaa ana cuú inì-xi sàhà-yá.

⁶ Doco mii-nsiá, (ndahví-nsiá), vachi càhìchì inì-nsia nècuàchì ndahví. ¿Amádi nècuàchì cuicà nduú nècuàchì sahníndàhvì xì-nsiá, te sanícuàchi stná-nè sàhà-nsiá?

⁷ ¿Amádi divi stná-nè càhàn quini guá dìquì quìvì ndiaha-yá, divi quìvì nì ndacùcahan-nda (na hora nì quìhvì-nda ichì-yá)?

⁸ Pues nú cuní-ndà quida viì-ndà, dandu xiñuhu quida ndisa-nda cumplir nacua cachí ley ì nì sàha mii-yá ana cusáhnû nù-ndà. Dohó cachí tutu nduú ley mà: “Nacua cuú inì-ní sàhà mii-ní, ducán xiñuhu cuu stná inì-ní sàhà ñanìtnaha-ní”, cachá.

⁹ Doco nú chicá quidáñuhú-ndá iin nêhivì nù inga-nè, dandu cuàchi nduá, iá ndisa falta xi-nda, cachí ley mà.

¹⁰ Vàchi cunaha-nsiá, nú ni chívàha viì-ndà nsidanicuú ñà-nduá cachí ley ì mà, te iá iin xaan ndé cóni quidà-ndà cumplir, dandu queámà na ian cóni chívàha-nda ni-ñàha,

¹¹ vàchi imindaa mii-yá nì sàha xi nsidaa ley mà. Cunaha-nsiá, iin ley xi-ya nduú ñà-màsà cáhàn-ndà xí inga ana có-nduú nècuàchì vehe-nda. Daaní cachí stná-yà ñà-màsà cáhni stnaha-nda. Pues mate có-nchìcùn-ndà inga nècuàchì ñahà, doco sahní stnaha-nda, dandu iá ndisa cuàchi-nda nù ley mà (mate iá iyuhá sàni chivàha-nda).

¹² Ñàyùcànduá, ndiá icà-ndà cáhàn viì-ndà, te quida viì stná-ndà. Vàchi divi nacua cachí ley ndiaha nì tavà xì-ndà libre, divi sàhájàn ícúmí ndundaà sàhà cuàchi-nda.

¹³ Te nú có-índéhe ndahví-ndà ñanìtnaha-nda vichi, dandu quìvì ndundaà sàhà-ndà, mà níhì-ndà cundehè ndahví stná-yà ndohó. Doco nú sàni indehè ndahví stnaha-nda, dandu mà yúhì-ndà quìvì ndundaà sàhà-ndà.

Màsà cáhí uun-nda xiníndísá-ndá mii-yá

¹⁴ Ñánì, ¿a cúndiáá ndisa ñà-càhí-ndà cahvi-nda mii-yá te nú cô-quidà-ndà obra? ¿A ndísá càcu anima-ndà nú ducán nduú modo cahvi-nda Dios?

¹⁵ Pues, ni cachí-ndà iá iin ñanìtnaha-nda xíhì vixin, te còò sìcoto vaha xi-ne; te xíhì stná-nè doco, vàchi còò ni-ñàha.

¹⁶ Daaní, ni cachí-ndà iá stná iin compañeru-ndà nì cachi xì nècuàchì ndahví mà: “Vàtùni cùhùn-ní; ni sàà-ní nadaà inì-ní, te ni sàà stná-ní chitu tìxi-ní”, cachí-nè. Doco nú có-sàha-ne nècuàchì mà ni-iin ñà-cutiacu-nè, amádi uun-ni queámà.

¹⁷ Ducán stná xì ñà-cahvi-nda mii-yá nú còò obra xi-nda. Vachi nú ducán, dandu náhà xicà có-càhvì ndisa-ndayá, vàchi cutu mindaa ñà-jaàn quidà-ndà.

¹⁸ Vihini cachí iin nêhivì: “Dava-nda cuisì fe xi-nda iá, te dava-nda, cuisì obra xi-nda iá”, doco còò, vàchi ¿nansa cui cundaà ini-ndà cahvi ndisa iin nêhivì mii-yá nú còò obra xi-ne? Doco nú iá stná obra quidá-né, dandu vátùni cundaà ini-ndà ndisa iá stná fe xi-ne.

¹⁹ Ndohó, xiníndísá-ndá ñà-imindaa Dios iá, te ndiaha gá iá ñà-xiníndísá-ndá ducán. Doco cunaha-nsiá, dècuèndè stná ñà-malu, ináhá stná-si imindaa-yá iá, te quidí stná-si ñà-yúhì-siyá.

²⁰ Ndahví-ndà, te neciu-ndà nú tuxí ini-ndà cuisì fe xi-nda nduá ndiaá, te còò obra xi-nda.

²¹ Amádi ináhá-nsiá sàhà xii-ndà Abraham nansa nì ndee vaha-ne nù Dios sàhà ñà-nduá nì quida-ne, ñà-nì ìa-ne dispuestu cuàhatahvì-né mii-yá (dèhe manì-né) Isaac, (dècuèndè sàni chinduhù-néte) nù mesa ì.

²² ¿A xiní-nsiá nansa nì quida nècuàchì yucán? Nì cahvi-né Dios, te nì quida stná-nè cumplir (ñà-nduá nì cachi-yà): ñàyùcànduá, nduìjàn nì sacatnahá, te sàhà obra xi-ne mà nì sàà-nè nì cahvi viì ndisa-ne mii-yá.

²³ Dandu nì cuu ndisa ñà-nduá cachí tutu ì ndé cachí palabra yohó: “Nì xinindísá Abraham Dios, te ducán nì ndee vaha-ne nù-yá”. Dècuèndè nì cachi stná Dios amigo xi-ya nduú Abraham mà.

²⁴ Ñàyùcànduá, náhà xicà, màdì cuísi-ní ñà-cahvi-ndayá nduá cuní-yà sàhà-ñá ndee vaha-nda nù-yá. Cuní stná-yà quida ndisa-nda cumplir nansa cachí-yà.

²⁵ Inga casu nduú stná nècuàchì sànaha nani Rahab. Iin nècuàchì ñahà cónisá ìa sahnú inì-xi nì sanduu-ne, doco na ní casaà nècuàchì (ñuu Israel) ñuu-nè, nì quidáñuhu-né nècuàchì mà, dandu después nì dānúhù-nè nècuàchì mà inga ichì. Pues sàhà-ñá nì quida-ne obra mà, ñàyùcànduá nì ndee vaha stná-nè nù Dios.

²⁶ Vàchi nú cahvi-nda Dios, doco có-quidá ndisa-nda ñà-nduá cachí-yà, dandu (mà chindéé) fe mà-ndó. Na ian sàni xihà nduá, vàchi cóa quidá, na iin cuerpu nsì cò cá anima-xi.

3

Cuidadu ni cúndóo-ndá sàhà ñà-nduá cachí-nda

¹ Chicá vàha màsà cúndúú cuáhà-nda nècuàchì chináhá (palabra ì), ñánì, vàchi cunaha-nsiá, chicá icúmí-yâ nandacàn-yà cuenta nùù nsiùhù nècuàchì chináhá.

² Nsidaa-nda, cuahà falta quida-nda. Te nú mà túha-nda cachi-nda ni-iin ñà-có-ndiáá, dandu iin nèhivì quidá víi ndisa sàndùù-nda, vàchi sàni cutùha-nda cadì-nda nùù nsidaa ñà-chìcuéhè vihini sàà-nda quida-nda.

³ Cundehè-nda idu, chicáá-nda frenu yuhù-sí sàhà-ñá cunini-sìndó, dandu vátuni cuitàndòò-ndásì mate nahnú-sì.

⁴ Stná barcu, mate nahnú cuáhà-nú, te ndee caná tàchì dandiàchì xì-nú, doco cuisì iin yutnù chipalá tii nduá dacaca-xi-nú cùhùn-nda ndéni nì cui cahan-nda.

⁵ Te divi ducán iá stná yuhù-nda. Tiá, doco cuahà gá chuun nahnú chiñúhà. (Ináhà-ndá), cuisì iin ñuhu tii cui dacuícùn xì inicutu iin yucù cahnú, te coco nsidaámà.

⁶ Te nacua quidá ñuhu mà, ducán quidá stná yuhù-nda: cuahà sàstnùhù chuun quini cáhàn sàhà-xí. Iá nùù cuerpu xi-nda, doco mà úhì dacúnsídá cuàcha-ndó. Inii vida xi-nda, ducán quidá yuhù-nda, cuahà gá chuun daquíñúhà, te ¿índù divi níhà' cachí quini guá? Pues divi nùù ñà-malu.

⁷ Nsidanicuú clase quisì, vátuni ndumansú-si quida nèhivì, a ducán nduú-si quisì yucù, ò laa, ò quisì cuàti, o quisì mar, nsidanicuú clase-si sàni nsidamansú nèhivì-sì.

⁸ Doco yuhù-nda, còó; tàñáha ga cundee ni-iin nèhivì nùá. Iin mal nduá; mà cándísà dandacu-nda nùá. Na ian quidá iin tàtnà dáná, ducán quidá stná, vàchi chituá ñà-có-ndiáá.

⁹ Xi yuhù-nda naquímànì-nda Yua-nda Dios, te después divi-nia (vihini) canáhà-nda xì ñanìtnaha-nda, mate nahi mii-yá iá stná-nè, vàchi nacua iá mii-yá, ducán nì quidayucun stná-yàndó.

¹⁰ Mismo yuhù-nda sàni naquimanì-nda mii-yá, te nì canáhà stná-nda (xì ñanìtnaha-nda). Pues cunaha-nsiá, mà váha quida-nda ducán, ñánì.

¹¹ Vàchi iin tè-dòcò, iin-ni ndéa tècuíí vàha, te ò iin-ni ndéa tècuíí ùhà.

¹² Te ò iin yutnù, ¿a vátuni cucàa quisì vídì-nu nú díin yutnù nduú-nu? Còó. Ni mà cúí cuàha stná sìhigu nùù nducu yòhò sì-uva. Te lugar ndé caná tècuíí ùhà, có-càná stná tècuíí vàha.

Cuisì nèhivì datnúù Dios sàxìnítnùnì-xi nduú nèhivì nchichí ndisa

¹³ ¿A nchichí dava-nsia (cahan-nsiá), te ò sàni dàcuahá stná dava-nsia? Nú jaan, dandu xiñuhu cunihnu ndahví stná ini-nsià, te quida-nsia puru ñà-íá vìì, dandísá, sàà cunahà xicà nchichí ndisa-nsia.

¹⁴ Doco nú túha-nsia cumbidia cuahà ini-nsià, ò cúisi sàhà mii-nsiá nacánì ini-nsià, dandu màsà cáchì gà-nsià nchichí-nsià, vàchi có-nduá ñà-ndáà; tnùhu nduá.

¹⁵ Vàchi modo xi-nsia mà, có-nduá nahi palabra nchichí vàxi nùù mii-yá iá ansivi. Vàchi nú cutu cáhàn nchichí-nda, te có-quidá víi-nda, dandu nàhà xicà, cuisì ñuhivì yohó vàxi palabra mà; dìni nèhivì ùùn nì quea, te divi ñà-malu nì chitnùnì ini xán.

¹⁶ Vàchi nú cumbídià ini nèhivì, te cuadú-nè, dandu seguru cundoo stná-nè nàá stnahá-nè, te quida stná-nè nsidanuu clase chuun có-ndiáá.

¹⁷ Doco nú nchichí ndisa-nda quidá mii-yá iá ansivi, dandu ñà-sàni ndu-ì sàxìnítnùnì-nda nduá, te túha-nda cundoo manì-nda; mà dáná-ndá. Cáhàn vìì stná-nda xì nèhivì, te cundehè ndahví stnahá stná-nda, vàchi vàha ini-nda, iin-ni cáhàn ndàà-nda nacua iá iin chuun, mà dánánì uun-nda.

18 Cunaha-nsiá, nú cuní-ndà cunduu-nda nèhivì quidá víi ndisa, dandu vivíi-ni ni cáhàn-ndà xì ñanìtnaha-nda sàhà-ñá cundoo manì nsidaa-nda, vèchi ducán queamà na ian chìhì-ndà iin tata vaha, dandu después ndanchito iin cosecha ndiaha.

4

Màsà cándisâ-nda cunchicùn-nda modo xi ñuhiví yohó

1 Dava-nsia indéhe úhì stnahá-nsiá, te náâ stnahá stná-nsiá. Pues, ¿ndiá disáhà-xí iá ducán, tuxí ini-nsiá? Amádi sáhà ñà-xího guá-nsiá iñàha, te dacá mà sàxìnìtnùnì-nsiá.

2 Xího-nsiá iñàha, te nú mà cùì níhì-nsiáñà, dandu (cuní-nsiá) ndañuhu nèhivì (icúmí xân). Te nú cumbídiâ stnahá ini-nsiá sàhà iñàha, te mà cùì níhì stná-nsiáñà, dandu náâ stnahá-nsiá, te cáhàn ndiaa stnahá stná-nsiá. Doco ¿índù chuun có-ìcúmí-nsiá ñà-nduá xího-nsiámà? Divi sàhà-ñá có-xícàn tàhvì-nsiáñà nùù mii-yá.

3 Te mate ni cácan tàhvì-nsiá nùù-yá, doco mà níhì-nsiáñà, vèchi mal xícàn-nsiá, cutu cuní-nsiá iñàha sàhà-ñá quida ndevàha-nsia nacua cudû ini mii-nsiá.

4 ¡Ndahví-nsiá! ¿Índù chuun nchícùn-nsiá ñà-có-ndiá ìcà-nsiá? ¿A có-ìnáhá-nsiá ñà-mà váha candisá-nda cunchicùn-nda modo xi ñuhiví yohó, vèchi ducán queá na ian có-ndóó vaha ga-ndà xì Dios?

5 Te ducán cachí stná tutu ìì: “Sànì nìhitáhvi-ndà nùù Dios ñà-coo Espíritu ìì xí-yá ini anima-ndà, te màni cuáhà-ndà nùù Yà-ìì mà; ñàyùcànduá, có-cùnì dahuun-ya cunihnu ini-ndà inga iñàha cunchicùn-nda”. Te cunaha-nsiá, màdì úún-ní cachí tutu ìì mà ducán, (ñà-ndáà nduá).

6 Doco Dios, chicá cuáhà gracia sáhatahvì-yándô. Ñàyùcànduá, dohó cachí stná tutu ìì: “Dios, sadí-yà nùù nsidaa nèhivì nducuehé, doco nèhivì nihnú ndáhvi inì-xi, sáhatahvì-yànè gracia xi-ya”.

7 Ñàyùcànduá, ni cúnìní-ndá nsidaa ñà-nduá dandacú-yá, doco ñà-nduá cuní ñà-malu, cóó; iin-ni màsà cuáha-nda cundee-sí nùù-ndà, vèchi nú màsà cuáha-nda quida-sì ducán, dandu icúmí-sí cunu-sì nùù-ndà.

8 Xiñuhu tnàtuu-nda nùù Dios, dandu mii-yá, chicá cuyatni stná-yà nùù ndohó. Te nú iá cuàchi-nda, dandu xiñuhu nsidandoo-nda anima-ndà na ian ndàhà-ndà. Te nú ùì ichì nduá nchícùn-nda, dandu xiñuhu ndoo stná anima-ndà.

9 (Vèchi nú iá falta xi-nda, dandu chicá vaha) ni dándóhó-ndá mii-nda, te cundoo-nda tnùnsí ini, te cuacu cuahà-ndà (sàhà cuàchi-nda). Xiñuhu cuhuun ini-ndà sàhájàn; màsà cudû gá ini-ndà, ni màsà cuácù gà-ndà; cóó. Xiñuhu cundoo-nda tnùnsí ini,

10 te cucahan nùù-ndà nùù Stoho-ndà Señor. Cuisì nú ducán, dandu nìhì-ndà nduvìì tú anima-ndà quida-ya.

Màsà cuítnùhu stnaha-nda

11 Ñánì, màsà cáhàn-ndà dìquì ñanìtnaha-nda, vèchi nú ni quida-nda ducán, te xítñuhu tnaha-nda, dandu ñà-sànì càhàn-ndà dìquì stná ley xi mii-yá nduá, te ducán queámà na ian xítñuhu stná-ndà ley mà. Te nú xítñuhu-nda ley mà, dandu có-nduú gá-ndà ana chívàha xán; cóó, ana xítñuhu xán nduu-nda.

12 Cunaha-nsiá, mindaa mii-yá nduú ana nì sàha xi ley ìì, te imindaa-yá nduú stná ana icúmí nsidandaà xì sàhà falta xi iin iin-nda. Còò ni-iin ana cachi a cácu-nda, á coó, cuisì mii-yá. Ñàyùcànduá, ¿ana tuxí ini-ndà nduu-nda te xítñuhu stnaha-nda ducán?

Có-ìnáhá-ndá nansa cuáhàn cuu xi-nda tnaa idá

13 Cunini vaha mii-nsiá nècuàchì cáhàn ndee guá. Vèchi cachí dava-nsia vichì ò tnaa cùhùn-nsiá inga ñuu cundoo-nsia yucán iin cuà, te cuiin-nsia, te nadicò-nsiá, nsidacuahà-nsiá dìhùn xí-nsiá cahan-nsiá.

14 Doco ni có-ìnáhá-nsiá nansa cuu xi-nsiá tnaa idá. Vèchi vida xi-nda, (yàchì nsiha) nahi vìcònùhù. Iin ratu tii iá, dandu còò cá.

¹⁵ Ñàyùcàndùá, ndiá ìcà-ndà cachi-ndà: “Pues, nú ducán cuní Stoho-ndà Señor, dandísá cutiacu-ndà, te ò nú cudû ini-yà, dandu dohó te dohó quida-nda”.

¹⁶ Doco mii-nsiá, ¿nansa quidá-nsiá vichi? Ndee gá cáhàn-nsiá. Mii-nsiá nduú-nsiá mii-nsiá cahan-nsiá. Doco mà váha cáhàn-ndà ducán.

¹⁷ Ñàyùcàndùá, (nsinuu inì-nsia palabra yohó): nú ináhá-ndá nansa ndiá ìcà-ndà quida-nda, te có-quidà-ndàñá, dandu cuàchi nduá.

5

Ñà-nduá nì cachi Santiago xì nècuàchì cuicà malu

¹ Cunini váha nsidaa mii-nsiá nècuàchì cuicà. Chicá váha cuacu-nsia, te cundoo-nsia tnùnsí ini, vàchi sà-ítúú tnùndoho nahnú dìquì-nsiá.

² Vàchi nsidaa ñà-cuicà-nsiá, sàni cuchicueha; nsidaa sìcoto vico xí-nsiá, sàni cusiq-uidiá.

³ Nsidaa oro xì plata xi-nsia, dìhùn chicúehè sàni nandua; sàni nana ditnu-ña. Te divi ñà-jaàn cunduu testigu ñà-cundaà ini nèhivì (cóni quidá víi-nsiá), te ducán icúmí quea na ian sàni saxì stná ditnu dìhùn mà ìcà-nsiá, na ian nì xìxìn cuñu-nsiá nì quidamà (ñà-cuàhà guá tnùndoho cucumi-nsiá), vàchi yáha ga sàni càyà ñà-nduá icúmí-nsiá nìhì-nsiá quivì xìnu tiempu.

⁴ Te peón ndahví nì ndanihi xi cosecha xi-nsia, nì dándàhvì uun-nsianè, vàchi cóni sáha-nsianè raya xi-ne nacua ndiá ìcà-nsiá, ñàyùcàndùá, raya xi-ne mà, na ian ndáhì stná-ña, te tiacú stná Stoho-ndà Señor, iníní-yá quidá peón mà reclamu nùù-yá. Te cunaha-nsiá, cuàhà gá mil soldadu dandacú-yá nùù-xí.

⁵ Vico gá sàni sandoo-nsia ñuhivì yohó; cuisì gustu xi mii-nsiá sàni quida-nsia. Doco nahi quisi sàni nei, te nì ndundatnù-sí, ducán nduú stná-nsiá; te vichi sàni sàà meru quivì cui-nsiá.

⁶ Vàchi tùha stná-nsiá canicuàchi-nsia sàhà nèhivì ndàcuisì inì-xi, te sàhà yuhù-nsiá xìhì-nè; mientras mii-né, có-nàndúcú-nè nansa chindee-né mii-né.

Màsà cúhúún ini-ndà, vàchi sà-ítúú naxicocuïn Jesús

⁷ Ñánì, iin-ni nì quidándéé ini-ndà dècuèndè sàà quivì naxicocuïn Stoho-ndà Señor. Quida-nda na quidá iin nèhivì campu, ndiatú-né ndè cuun dàvì nùù, (dandu xitú-né); daaní ndiatú cuéyàà-nè dècuèndè cuun dàvì dásìhì sàhà-ñá ducán cuida ndiaha viu xi-ne.

⁸ Te divi ducán stná ndohó, xiñuhu cundiatu cuéyàà-ndà dècuèndè naxicocuïn Stoho-ndà Señor. Ñàyùcàndùá, vichi xiñuhu nacuahandee ini-ndà, vàchi sà-ítúú-yá ndixi-ya.

⁹ Te màsà cáhàn cuàchi-nda sàhà compañeru-ndà, ñánì, vàchi nú ducán, dandu icúmí-yá danáni-yàndó, te cunaha-nsiá, sàni cuyatni ndisa quivì nsidandaà-yà sàhà-ndà.

¹⁰ Xiñuhu nsinuu stná inì-nsia nansa nì cuu xì nècuàchì sàhana nì sacahàn cuenta xi Stoho-ndà Señor, cuàhà gá nì dándòhó nèhivì-né, doco iin-ni nì quidandee ini-nè. Ñàyùcàndùá, nacua nì quida nècuàchì-mà, ducan ni quida stná ndohó vichi, ñánì,

¹¹ vàchi ndiaha gá nì quida-ne nì quidandee gá ini-nè. Te ináhá stná-ndà nansa nì cuu xi nècuàchì sàhana nani Job, iin-ni nì quidandee stná ini-nè, dandu después nì quee vù (ñà-nduá nì cuu xi-né), vàchi nì chindee Stoho-ndà Señor-nè. Ñàyùcàndùá, nàhà claru tùha ndisa Dios cuhi ini-yàndó te cundehè ndàhvì stná-yàndó.

¹² Màsà nunca chinaha-nda Dios, ñánì. Chuun cahnú nduá màsà quidá-ndá ducán. Ni màsà ndàcùcahan stná-ndà ansivi, ò ñuhivì. Còó. Ni-iin xichi màsà chínáhá-ndá ducán. Coó; vàchi nú nì cachí-ndà “Jaan”, dandu divi nì cùndúá, te ò nú nì cachí-ndà “Còó”, divi ñà-jaàn nì cùndúú stná. Ducan ni quida-nda sàhà màsà níhì-ndà castigu nùù-yá.

¹³ Nú iá tnùndoho yáha-nda, dandu xiñuhu càcàn tàhvì-ndà nùù-yá. Te nú cudû ini-ndà, dandu coto-nda alabanza xi-ya.

¹⁴ Te nú cuhí-ndà, dandu cana-nda nècuàchì sahnú ndiaá xì nèhivì xí Dios quixi-ne caquin-nè seña aceite dìni-ndà, te càcàn tàhvì-né nùu-yá sàhà-ndà, ndacùcahan-né quivì Stoho-ndà Señor.

¹⁵ Te nú xiníndísá-ndá na xícàn tàhvì-né, dandu càcu-nda nùu cuèhè mà, vèchi icúmí-ndá nduvàha-nda quida-ya. Te nú iá stná cuàchi nì quida-nda, dandu cuicahnú stná ini-yà sàhà-ndà.

¹⁶ Ñàyùcàndùá, ni náhmà-ndà falta xi-nda nùu ñanìtnaha-nda, te càcàn tàhvì stnàhà-ndà sàhà-ndà sàhà-ñá nduvàha-nda quida-ya. Vèchi iin nèhivì vaha, cuàhà gá ndiaá na xícàn tàhvì-né nùu Dios; cuàhà gá chindéâ.

¹⁷ Iin casu nduú Elías sànahà. Iin nèhivì ñuhiví nahi ndohó nì sanduu stná-nè, te nì xicàn tàhvì-né nùu Dios ñà-màsà cuún dàvì. Te ndisa, nì yaha ùnì cuià dava, te cónì cuún ni-iin dàvì.

¹⁸ Daaní, tucu tu nì xicàn tàhvì-né nùu-yá, te nì ndesaha tú dàvì, vètùnì nì cana tu itu.

¹⁹ Nú iá iin compañeru-ndà nì tùcù iin ichì có-nduú ñà-ndáâ, dandu ni càhàn-ndà xì-né áma naxicocuïn-nè ichì váha, ñánì.

²⁰ Vèchi cunaha-nsiá, nú ni càhàn-ndà xì iin nècuàchì nì tùcù ichì cuáchi, te nìhì-ndà natnahnù-nè ichì váha, dandu ndiaha gá queamà, vèchi sàhà ndohó sàni càcu anima-nè, mà sàà gá anima-nè cuià; mate cuàhà gá cuàchi-ne nì ìa, doco sàhà palabra xi-nda sàni ndutu nsidaámà.

Tutu Nuu Nì Tiaa San Pedro nù Nèhivì xí Dios

¹ Yùhù nduí Pedro, iin ana nì nihì chuun ndiaha nù Jesucristu, (te tiaí tutu yohó) nù mii-nsiá nècuàchì sàni xitià nihni inicutu ndé` ladu Ponto, ladu Galacia, ladu Capadocia, xì stná ladu Asia, xi ladu Bitinia.

² Mii-nsiá nduú stná-nsiá nèhivì nì nacàxin Yua-nda Dios, vèchi dècuèndè sàhana nì chitnùnì ini-yà ducan. Te sàhà-ñá sàni nduhì stná anima-nsiá nì quida Espíritu Ì xí-yá, ñàyùcàndùá sà-íní ní ví-nsiáyà vichi, te nì cuxio stná cuàchi-nsia nì quida nù Jesucristu. Pues vichi nì cùcúmí cuàhà-nsiá gracia xi-ya, te contenu nì cùndóó stná nsidaa-nsiá.

In tnùndé ini ndiaha icúmí-ndá nù Dios

³ Ansivéhé cahnú Yua-nda Dios, divi mii-yá ana cahvi stná Stoho-ndà Jesucristu, vèchi Yuamàni-yámà nduú-yá. Pues vichi sàni indehè ndàhvì-yàndó ñà-nì xihì Jesucristu (sàhà-ndà), te nì natiacu-yà; ñàyùcàndùá, vètùnì nì nacacu saa-nda ñuhivì Ì xí-yá, te vichi iá ndisa tnùndé ini xi-nda na ndoo-va-nda ñuhivì yohó.

⁴ Te ndiaha gá icúmí stná-ndà nihitáhvì-ndà nù-yá. Vèchi ndè gloria iá vèha nsidaa ñà-ndiaha Ì xí-ndàmà, te mà nunca sàà cusiquidiá, nì mà nunca sivi stná, dècuèndè nicanicuahàn icumíâ cunahá.

⁵ Te sàhà-ñá nihnú vèha ini-ndáyá, te ndiaá-yàndó xì poder xi-ya, ñàyùcàndùá vètùnì nihì-ndà salvación xi-nda; te vichi sà-lá listu salvación mà, doco ndè sàà xinu tiempu, dandu cundaà vèha ini-ndà (ñà-ndiaha guá) iámà.

⁶ Ñàyùcàndùá, cuàhà gá cudí ini-ndà vichi, mate vihini sàyáha-nda cuàhà clase tnùndoho sacu tiempu.

⁷ Vèchi ducán quidá-yá sàhà-ñá cunahà claru, a xiníndísâ ndisa-ndáyá, á cóo, nacua quidá nèhivì xì oro, dadáà títi-nèà nù ñuhu sàhà-ñá cundaà ini-nè (a oro vèha nduá, á cóo). Doco nú nihnú vèha ini-ndà Jesucristu, dandu chicá ndiaámà nù oro, vèchi oro, mà úhì ndañuhá, doco nú iin-ni nihnú vèha ini-ndà mii-yá mate yáha-nda tnùndoho, dandu sàhà ñà-yúcán sàà-ndà ndee vèha-nda nù-yá na quívì naxicocuñ-yà, te nihì stná-ndà cuàhà tnùñuhu ndiaha.

⁸ Mii-nsiá, tãñáha ga cuninù-nsiáyà, doco cuú inì-nsia sàhà-yá; te mate có-xinì-ndáyá vichi, doco xiníndísá-ndáyâ, te cudí gá ini-ndà ñà-ndiaha guá (quidá-yá), te ní có-sàà-ndà cachi nsihi-nda ñà-cuàhà guá cudí ini-ndà.

⁹ Daaní, icúmí stná-ndà nihì-ndà càcu anima-nda, vèchi divi sàhájàn nduá nì xinindisa-ndáyá.

¹⁰ Sàhana nìsa cahàn nècuàchì profeta ñà-nduú razón xi-ya, nì cachitnùhu-ne nansa cuàhàn cuu xi ndohó tiempu vichi, te nihì-ndà cuàhà gracia. Doco cuàhà gá nì nacani ini nècuàchì sahnu-ma, vèchi cóni cùndáà ini-nè nansa iá salvación icúmí-ndá nihì-ndà tiempu vichi,

¹¹ te nì cuni stná-nè cundaà ini-nè índù tiempu divi cuu nsidaájàn. Vèchi inácaa Espíritu Ì xí Cristu ini anima-nè, te nì cachitnùhu-ya xì-nè ñà-icúmí Cristu ndoho-ya, dandu después naquihin-ya tnùñuhu ndiaha xí-yá.

¹² Doco después na ní dàtnùú gá Espíritu Ì sàxínitnùnì-nè, dandu nì sàà-nè nì cundaà ndisa ini-nè ñà-màdì sàhà (tiempu xi) mii-nè cáhàn razón mà. Còo. Divi sàhà ndohó nì cáhàn mà, te mii-nè, cuisì-nì nì cachitnùhu uun-ne. Te vichi ndè ansivi sàni nuu Espíritu Ì xí-yá, te chindéé-yà nèhivì (xí-yá) ñà-cachitnùhu stná-nè razón ndiaha mà; teayùcàndùá, vichi mii stná-nsiá sàni xinitnùhu-nsia palabra mà. Te cunaha-nsiá, dècuèndè stná ángel xi Dios, cuní stná-nè chicá cundaà ini-nè sàhà razón mà (ñà-ndiaha guá).

Ni cúníhnú Ì ini-ndà na xicánúú-ndá ñuhivì yohó

¹³ Ñàyùcàndùá, ni nácuàhandee ini-ndà sàxínítnùníní-ndà, te nacani sahnú ini-ndà; iin-ni ni cúníhnú vaha ini-ndà ñà-nìhìtáhvi-ndà cuàhà gá gracia na quívì naxicocuín Jesucristu, te cuninù-ndáyá.

¹⁴ Iin-ni ni quidá ví-nda na ian quidá iin dèhe-nda tùha cunini vìì xì-ndà. Te màsà nácóó-ndá mii-nda xího ndevàha-nda na ian nìsa quida-nda antes na táñàha ga cundaà vaha ini-ndà. Còó.

¹⁵ Nacua ìì mii-yá ana nì cana xi-nda, ducání quida stná-ndà, ni cúníhnú ìì stná ini-ndà sàhà nsidaa chuun quida-nda.

¹⁶ Vàchi ducán cachí Dios nùù tutu xi-ya: “ìì gá yùhù, ñàyùcàndùá, stná mii-nsiá ni cúndúú stná-nsià nèhivì ìì”.

¹⁷ (Cunaha-nsiá), iin-ni ndeníhí Yua-nda Dios nsidanicuú nèhivì; te nacua quidá iin iin-nda, ducán icúmí-yâ nacuàha-yàndó. Ñàyùcàndùá, nsidaa ndohó nècuàchì ndácùcahan xi quívì-yá, cuàhà gá xiñuhu yùhí-ndà, còtó mà cúdí ini-yà sàhà ñà-ndúá quida-nda ñuhivì yohó.

¹⁸ Vàchi ináhá-ndá, sàni dãnáà-yá sàhà cuàchi-nda, te ducán sàni càcu-nda nùù estilu nì nacoò xì-ndà, vachi mànicuí chindeámàndó. Doco màdì oro ò plata nì dãnáà sàhà cuàchi-nda, vachi cuisì iñàha ñuhivì yohó-ní nduámà.

¹⁹ Còó, cuisì nì ndiaha Cristu nì dãnáà xì sàhà-ndà; na iin lelù còò ni-iñàha iá nì dòcò nùù Dios, ducán nì sanduu-ya.

²⁰ Vàchi dècuèndè na táyô ñuhivì sàni chitnùníní ini Yua-nda Dios ñà-cuu xi Jesús ducán, doco cuisì dècuèndè tiempu vichi na xínu tiempu, dandu nì cuu ndisa xi-yá ducán sàhà-ñá (càcu-nda).

²¹ Te divì sàhà Jesús sàni nìhì-ndà nì xinindisa-nda Yuamámì-yá. Te sàhà stná poder xi Yuandiaha-yá nì natiacu-yà, dandu nì naquihin-ya tnùñuhu ndiaha xí-yá. Pues divì sàhà ñà-jaàn nì nìhì-ndà cunihnu vaha ini-ndà Yua-nda Dios, te nì sàcòò stná iin tnùndé ini ndiatu-nda nùù-yá.

²² Vichi sàni chindee Espíritu ìì xí-yá, te xiníndísá-ndá palabra ndàcuisì xí-yá. Ñàyùcàndùá, sàni ndoo stná cuàchi anima-ndà, vátùnì cuu stnahá ndisa ini-ndà sàhà-ndà vichi, ñánì. Sàhámà fuerte ndisa xiñuhu cuu stnahá ini-ndà sàhà-ndà, te màsà dátíáá úún-ndá quida-nda ducán.

²³ Vàchi sàni nacacu saa-nda ñuhivì ìì xí-yá. Doco màdì nèhivì ñuhivì nì quidà-xì-ndà ducán, còó, divì palabra ìì xí Dios nì quida xi-nda ducán. Vàchi nsidaa nèhivì, xíhì-nè. Doco palabra mà, nicanicuahàn cunaha-ñá nùù-ndà na ian itiácúà nicanicuahàn.

²⁴ Vàchi nsidaa nèhivì ñuhivì, (yàchì nsihì-ne) nahi yùcù pastu, te nsidaa ñà-vico xí-né, (yàchì nsihì stná) nahi ita yucù; vachi íchì yùcù, te ndáhvà stná ita-ñà.

²⁵ Doco palabra sàni cachi Stoho-ndà Señor, còó, nicanicuahàn icúmíâ coa. Te divì palabra mà nduú razón ndiaha sàni cachitnùhu nèhivì xì-nsiá.

2

¹ Ñàyùcàndùá, xiñuhu nacoò dahuun-nda nsidaa ñà-có-ndiáá. Màsà dándáhvì stnahá gá-ndà, ni màsà dãnánì uun-nda nduu-nda nèhivì vaha. Te màsà cúmbìdia stnahá stná ini-ndà, ni màsà càhàn quini ga-ndà dìquì ñanìtnaha-nda.

² Na quidá mée tíquìn, yáha ga cudì ini-vè tëndodo, ducán xiñuhu quida stná-ndà; xiñuhu cudì cuàhà ini-ndà sàhà palabra ìì xí-yá, vachi vaha ndisa; dandu nìhì-ndà ndufuerté fe xi-nda.

³ Te nú ndisa sàni cundaà vaha ini-ndà mànì gá ini Stoho-ndà Señor, dandu (vátùnì nìhìtáhvi-ndà ducán).

Nahi cimientu fuerte nduú Jesús

⁴⁻⁵ Vichi xiñuhu tnàtuu-nda nùù-yá, te quida-nda cuenta na ian nduu-nda yùù (cuàha vehe), te mii-yá nduú-yá nahi cavà xí cimientu, (doco màdì cimientu ndisa, vachi)

itiácú-yà. Te mate ní cahíchì ini nèhivì-yá, doco nì cachi Dios ñà-ndùú-yá ana chicá ndiaá. Ñàyùcàndùá, ni cuàha-nda cuichuún-yàndó na ian quidáyúcún-yá iin vehe ndiaha-yá.

Daaní, nahi dùtù ìì xí-yá nduú stná-ndà; vètùni cuàha-ndayá promesa xi-ya, divi ñà-vàha ñuhú ini anima-ndà, vèchi sàhà (obra nì quida) Jesucristu icúmí Dios cudii ini-yà sàhà promesa mà.

⁶ Vèchi ducán cachí (Dios) nùù tutu ìì:

Cunaha-nsiá, icúmí techuín iin ana sàà Ñuu Sión; cunduu-ya ana chicá ndiaá; te yáha ga cuàhà tñùñuhu cucumi-yá; cuàhà gá cundiaa-yà. Te chuun quida-ya cunduu nahi chuun xi cavà cahnú nduú cimientu xi vehe. Te mà nunca naxicocuín ini nèhivì ñà-nì xinindisá-né mii-yá.

⁷ Ñàyùcàndùá, nùù nsidaa ndohó nècuàchì xiníndisá, ndiaá ndisa-ya, doco nùù nècuàchì có-xiníndisá, còó. Doco seguru icúmí cuu (nahi ejemplu nacání sàhà) cavà nì cahíchì ini albañil, vèchi nì sàà cavà mà nì nandua yùù vico indúhu esquina vehe. (Pues ducán nì cuu stná xì mii-yá.)

⁸ Te vichi nduú stná-yà na iin yùù cahnú caquìhi sàhà nèhivì (cahíchì ini xì-yá), te na ian nduá-nè, vèchi cudúchì ini-nè sàhà-yá. Ñàyùcàndùá icúmí-nè nìhì-né (tñùndoho) nì chitnùnì ini Dios cuu xi-né, na ian caquìhi sàhà-né, te nàcasàn-né, vèchi có-cùnì-nè cunini-ne.

⁹ Doco ndohó, còó, vèchi sàni nacàxin-yàndó, te vichi nduu-nda dèhe (ndisa-ya). Te nahi dùtù xínduu stná-ndà, te xinúcuáchì-ndá nùù rey xi-nda, divi mii-yá. Nèhivì ìì xí-yá nduu-nda vichi. Còó cá ana nduú Stoho-ndà, cuisì mii-yá. Pues sàhà nsidaájàn vètùni dacuítia-ndà palabra sàhà ñà-ndiaha guá-yà, vèchi sàni tavà-yàndó nùù ichì ñáa, te nì cana-yàndó cunchicùn-ndà ichì ndé datnúù ndiaha-yá ini-ndà.

¹⁰ Te mii-nsiá, mate còó tñùñuhu ndiaha xí raza-nsià antes, doco vichi sàni sàà stná-nsià cunduu-nsià nèhivì xí-yá. Te mate còó stná ni-iin ana nì indèhe ndahví xi-nsià antes, doco vichi (ndiaha gá) sàni indehè ndàhvì-yànsià.

In-ni ni cúnchicùn-ndà Jesús mate xítñuhu nèhivì-ndó

¹¹ Cuàhà gá cuú ìni sàhà-nsiá, te sàhàjàn cachí xì-nsià ñà-màdi ñuhivì yohó nduú ñuu-ndà vichi. Ñàyùcàndùá sacúndàhvì nùù-nsià ñà-màsà xího gá-nsià ñà-ndùú gustu quini iá ñuhivì yohó, vèchi sadiámà nùù ñà-vàha xi anima-ndà.

¹² Ndoó-nsiá mahì nèhivì có-ínahá xí Dios, te ñàyùcàndùá xiñuhu quida vìi-nsià. Ñà-ndàà nduá, xítñuhu-ne mii-nsià vichi; quini quidá-nsià, cachí-nè, doco nú sàni xini-nè obra vaha quidá-nsià, dandu quivì quixi (Dios ndàcàn-yà cuenta sàhà cuàchì nèhivì), dandu icúmí-nè sàà-nè ndanihi vaha-neyà.

¹³⁻¹⁴ Sàhà ñà-nì cúdiì ini Stoho-ndà Señor sàhà-ndà, ñàyùcàndùá icúmí-ndá cunini-nda nsidaa nècuàchì nihí chuun vehechuún, a ducán nduú-né ana chicá cusáhnù, te ò nduú-né nècuàchì cucuáchì, vèchi nècuàchìmà, quidáchúùn-né cuenta xi nècuàchì chicá cusáhnúmá, te dandohó-né nsidaa ana có-quidá víi. Doco nú quidá víi-nda, dandu cudii ini-nè sàhà-ndà.

¹⁵ Te divi ducán cunì stná Dios, cunì-yà quida vìi-ndà, dandu mate xítñuhu nècuàchì có-cúndàà inì-xi ndohó, doco icúmí-nè sàà-nè (nducahan-ne), mà cáchì gà-nè ni-iñàha.

¹⁶ Libre iá-ndà, (ñà-ndàà nduá), ñàyùcàndùá xiñuhu quida vìi-ndà nacua ndiá ìcà quida nècuàchì libre. Doco mà vaha cachi-ndà vètùni quida ndevàha-nda sàhà-ñá iá-ndà libre. Còó, vèchi iá stná iin Stoho-ndà dandacu-xi nùù-ndà, divi Dios.

¹⁷ Te xiñuhu cahví vaha-ndayá, te quidañuhu stná-ndà nsidanicuú nèhivì. Ni cúcuú stná ini-ndà sàhà nsidaa ana nduú stná dèhe ndisa-ya. Te nècuàchì dandacu-xi nùù-ndà, ni cóó stná tñùñuhu xi-nda nùù-né.

¹⁸ Mii-nsià nècuàchì peón xíndoo saín nùù iin lamú, cunini vìi-nsià ñà-ndùá dandacú nècuàchìmà, mate dana-ne. Màdiá cuisì cahví-nsiánè nú màni ini-nè.

Nú icúmí-ndá ndoho-nda, dandu xiñuhu nsinuu ini-ndà nansa nì ndoho Jesucristu sàhà-ndà

¹⁹ Vihini icúmí-ndá ndoho-nda sàhà-ñá nchícùn-ndà ñà-ndùá cachí Dios, mate còò ni-ñàha iníhíca-ndá. Doco vátùni iámà, te xiñuhu quidandee ini-ndà sàhá.

²⁰ Vàchi nú cuisì sàhà cuàchi-nda ndoho-nda, dandu mà níhì-ndà ni-iin ñà-vàha nú quidándéé ini-ndà sàhámà. Doco nú sàhà-ñá quidá víi-nda ni ndoho-nda, te quidá ndéé ini-ndà, dandísá, gracia xi Dios (icúmí-ndá nìhì-ndà).

²¹ Pues, divi ñà-jaàn nduú vida icúmí-ndá yàha-nda nú sàni cana-yàndó, vachi mii-yá, nì ndoho stná-yà, doco sàhà ndohó; te ducán vátùni nì cundaà ini-ndà nansa xiñuhu quidandee stná ini-ndà nacua nì quida mii-yá.

²² (Te ¿nansa nì quida-ya?) Pues còò ni-iin cuàchi nì quidá-yá, ni còò ni-iin xichi nì dandahví-yà nèhivì.

²³ Mate ní canàhá nèhivì xì-yá, doco mii-yá, cóni cánàhá-yà xì-né. Na ní ndoho-ya, cóni cáhàn dana-ya. Còó, nùù ndahà Dios nì nacoò-ya chuun xi-ya, vachi (ináhá-yà) tùha Dios nsidandaà-yà ñà-nduú ñà-ndácuisì.

²⁴ Te (na ní sàcùtuu-ya) nchìca cruz, nì nacuida-ya cuàchi-nda nùù iquicúñú-yà. Ñàyùcàndùá, vátùni nìhì-ndà (nacoò dahuun-nda cuàchi-nda), quida-nda cuenta na ian sàni xìhì-ndà, (te có-ndùlócò gà-ndà sàhá). Dandu sàhà obra xi-ya mà, vátùni nìhì stná-ndà quida vii-ndà ñuhivì yohó. Vachi na ní sahnì cuií-teyá, dandu sàhájàn nduá nì nìhì-ndà nì nduvìi anima-ndà.

²⁵ Vachi antes, nahi rii nì quecuaán nì sanduu-nda, doco vichi sàni naxicocuñn-nda nì nàcùndoo-nda nùù Stoho-ndà inùù xì anima-ndà.

3

Nansa ndiá icà-ndà quida-nda xi nècuàchì vehe-nda

¹⁻² Mii-nsiá nècuàchì ñahà sàni nandàhà, icúmí-nsiâ cahvi-nsiá ì-nsiá; dandu mate có-càhàn-né cunindisá-né palabra xi-ya, doco ñà-ìndéhe-né quidá víi-nsiá, vátùni sàà stná-nè cunindisá-né mate có-càhàn-nsià xì-né sàhámà. Ñàyùcàndùá, xiñuhu quida sahnú-nsiá, te cahvi tnahá stná-nsià.

³ Te nú cuní-nsià cundaà vico-nsiá, màsà cúcàhàn-nsiâ a cúisi xiñuhu ñà-natnii vico dìnì-nsiá, te ò nduvico-nsiá xì oro, o sìcoto finu.

⁴ (Còó, vachi ñà-cundaà vico ndisa-nsià nduá yohó:) divi ñà-cunihnu manì ini-nsià, xì ñà-coo calma-nsià. Ñà-jaàn ndisa icúmí cunaha nicanicuahàn, vachi ini anima-ni-nda iá dèhá. Te nùù Dios cuàhà gá ndiáá ñà-cunihnu ini-ndà ducán.

⁵ Te divi ducán nìsa quida stná nècuàchì ñahà ì nìsa xinindisa-xi Dios tiempu sàhana, vachi divi ini anima-nè nì sansida vico-né mii-né. Nìsa cahvi-né ì-né.

⁶ Vachi ducán nìsa quida stná (ñahàdihí) Abraham nani Sara, nì inini-ne ì-né, te dècuèndè “Señor xi” nìsa cachi stná-nè xì nècuàchìmà. Te nú quidá víi-nsiá, te có-yúhì stná-nsià ni-iin nèhivì, dandu vátùni ndudava stná-nsià xì-né.

⁷ Daaní, mii-nsiá nècuàchì tiàa iá ñahàdihí-xi, xiñuhu cundoo manì-nsiá xì nècuàchìmà nacua quidá iin nèhivì cundaà vaha inì-xi. Ináhá-nsiâ, mà fuerte guá-nè, ñàyùcàndùá xiñuhu cuhi ini-nsiànè, vachi iin-ni sàni nìhìtáhvì nduì-nsià vida ndiaha xí Dios. Te nú ducan nì quidá-nsiá, dandu mà cóó ni-ñàha cadi xì nùù palabra xi-nsià na hora xicàn tàhvì-nsiá nùù-yá.

Nansa xiñuhu cunihnu ini-ndà nú ni sàà-ndà ndoho-nda sàhà iin chuun vii nì quida-nda

⁸ Cuisì inga palabra yohó cachi guè: iin-ni sàxinítnùnì nì cúcúmì nsidaa-nsiá. Te cundehè ndàhvì stnahá stná-nsià. Te cucuu stnahá stná ini-nsià sàhà-nsiá, vachi iin-ni ñanì xínduu-nda. Nsidaa-nda, iin-ni nì cuhì stnahá ini-ndà sàhà-ndà, te cunihnu ndahví stná ini-ndà.

⁹ Te nú sàni quida quini nèhivì xì-ndà, màsà náchítácùhá-ndà nacua nì quida-ne xì-ndà. Te ò nú ni cànàhá-nè xì-ndà, màsà cànàhá stná-ndà dìquì-né; còó. Ni cànàn tàhvì-ndà nùù Dios sàhà-né, vèchi cuàhà gá nì nìhítàhvì-ndà na ní cana-yàndó.

¹⁰ Vèchi (dohó cachí tutu ìì):

Nú cuní-ndà cucumi-nda vida ndiaha, te yàha vaha-nda, dandu xiñuhu cundoo-nda cuidadu ñà-màsà cànàn quini-nda, ni màsà dándàhvì stnaha-nda.

¹¹ Te màsà tucù-ndà inga ichì malu; cuisì-ní ñà-ìá viì ni quida-nda. Te ni nándúcú stná-ndà nansa cundoo manì-ndà ñuhivì; cuàhà gá xiñuhu nacani ini-ndà nansa quida-nda ducán.

¹² Vèchi Stoho-ndà Dios, inùù-yá nsidaa nècuàchì nihnú vaha inì-xì, te inínì-yá na xícàn tàhvì-né. Doco nècuàchì quidá sìquini, na ian xinì ùhì-yà nsidaa nècuàchì mà.

¹³ Nú puru chuun vaha quida-nda, dandu ¿a quidá quini nèhivì xì-ndà sàhámà?

¹⁴ (Ádi coó); doco nú ni sàà-ndà ndoho-nda sàhà iin ñà-ìá viì nì quida-nda, dandu ndiaha gá queé stná mà. Ñàyùcàndùá, màsà yúhì-ndà na cànàn dana nèhivì xì-ndà, te ni màsà ndúlócò-ndà.

¹⁵ Iin-nì ni cúníhnú víi ini-ndà Jesucristu ñà-ndùú-yá Stoho ndiaha-nda. Te nú ndácàn tnùhù-né nùù-ndà índù chuun nihnú vaha guá ini-ndà (mii-yá) ducán, dandu siempre cundoo tùha-nda naxiconihí víi-nda nùù-né. Doco vivì-nì ni cànàn tnùñuhu-nda xi-né.

¹⁶ Màsà quidá-ndà ni-iin ñà-cui dandoho-xì sàxinítnùnì-ndà después. Daaní, mate ndoó nèhivì xítñuhu xì ñà-vaha quida-nda ñà-ndùù-ndà nèhivì xì Cristu, có-quidámà, vèchi icúmì-nè sàà-nè nducahan-ne.

¹⁷ Doco nú sàha-ya lugar ndoho-nda, dandu chicá vaha ndoho-nda sàhà iin ñà-viì nì quida-nda, te màdiá sàhà iin falta xi-nda.

¹⁸ Vèchi stná Cristu, nì ndoho stná-yà; iin xichi-nì nì ndoho-ya sàhà falta xi nsidaa ndohó nèhivì cuàchi ñuhivì, mate mii-yá, còò ni-iin cuàchi nì quidá-yá. Te sàháyùcàndùá, vátùnì nì nìhì-ndà nì nàcùndoo vaha-nda xi Dios. Ñà-ndàá nduá nì xihì iquicúñù-yà, doco espíritu xi-ya nì dånátíacú xì-yá.

¹⁹ Te divi espíritu xi-ya mà nì sàà ndé ndoó anima nì sandiadi, te nì cachitnùhu-ya xì-né iin razón.

²⁰ Anima yucán nduú anima nèhivì cónì sàxiníndísà sàhana tiempu xi Noé na ní quidandee guá ini Dios sàhà nèhivì ñuhivì, te nì sandiatu-ya nì cuyucun barcu cahnú (xi Noé) mà. Te sacu nèhivì nì càcu nùù barcu mà, cuisì ùnà-nè nì càcu nì quida tècuì mà.

²¹ Cunaha-nsiá, ejemplu nduú stná nsidaa ñà-jaàn, vèchi nduámà nahi ñà-cùhù-ndà tècuì quivì vichi, te càcu-nda sàhà-ñà nì natiacu Jesucristu. Doco ñà-cùhù-ndà mà, có-nduá ñà-ndundoo uun ñuma ìcà-ndà, còó; ñà-xícàn tàhvì-ndà nùù Dios nduá, divi ñà-xícàn tàhvì-ndà ndundoo sàxinítnùnì-ndà.

²² Te mii-yá, ndè gloria sàmànùhù-yá, iá-yà ladu cuahá Yua-nda Dios vichi, te nsidan-icuú ángel, icúmì-nè cunini-neyà, mate ángel chicá cusáhnù nduú-né, te ò inga ana iin fuerte.

4

Nacoo dahuun-nda nsidaa ñà-có-ìá vaha nìsa quida-nda antes

¹ Vichi xiñuhu (nsinuu ini-nda) nansa nì ndoho Jesucristu ñuhivì yohó, te dispuestu nì cúndóó-ndà ñà-ndoho stná-ndà, vèchi nú sàni ndoho stná-ndà ducán, dandu ñà-sàni nacoo-nda cuàchi-nda nduá.

² Vèchi nú nihnú ini-ndà ducán, dandu mà xího ndevàha ga-ndà ñà-chìcuèhè iá ñuhivì yohó na ian quidá nèhivì dava ga; vèchi puru ñà-vaha cudí ini Dios cunduu ñà-quida-nda.

³ Vèchi mii-nsiá, tiempu nì yàha xi-nda nìsa quida ndevàha-nsia nacua quidá nèhivì có-ìnáhá xì Dios, vèchi cuàhà viciu nìsa icumì-nsiá; cuàhà iñàha nìsa xihò-nsiá, te nìsa xìni stná-nsiá; cuàhà escándolo nìsa quida-nsia, vèchi nìsa xihì cuahà-nsiá. Cuisì figura yùù

nìsa cahvi stná-nsià antes, mate quini iá` quida-nda ducán. Doco vichi, mà quidá gá xì nsidaa ñá-jaàn.

⁴ Ñàyùcàndüá, ndulócô nècuàchì dava ga vichi, xítñuhu-ne mii-nsiá, có-cùndàà ini-nè indù chuun có-cùtnáhâ gá-nsià xì-né na quidá-né ñà-có-ndiàá mà.

⁵ Doco (vaxi iin quivì) dandu icúmí nècuàchìmà nacuaaha-ne cuenta (sàhà nsidaámà) nùu mii-yá. Te sà-ítúú ndàcàn-yà cuenta sàhà cuàchi nsidaa-némà, na nècuàchì itiacú, te ducán stná nècuàchì sàni xihì.

⁶ Ñàyùcàndüá, ndè stná nècuàchì nsì nì nihì-né nì xinitñuhu stná-nè razón vaha xi-ya sàhà-ñá vátuni cutiacu stná anima-nè vida xi Dios, mate na nìsa itiacu-nè nì nihì-nè castigu, vachi nèhivì ñuhivì nì sanduu stná-nè.

⁷ Cunaha-nsiá, sà-ítúú quivì nsìhi nsidaa iñàha. Ñàyùcàndüá, xiñuhu nacani vii ini-ndà, te cunihnu cuahà ini-ndà càcàn tàhvì-ndà nùu Dios.

⁸ Doco ñà-chicá xiñuhu nduú ñà-cuu cuahà ini-ndà sàhà ñanìtnaha-nda, vachi sàhà ñà-jaàn nduá mà úhì nandòdó-nda nsidaa falta nì quida nècuàchìmà mate cuahà gá nduá.

⁹ Xiñuhu nacuna-nda yehè nùu ñanìtnaha-nda (nú xicánúú ndahví-nè), te màsà cúñáñá-ndá quida-nda ducán.

¹⁰ Según nansa nì nihìtáhvì iin iin-nda, ducán xiñuhu cunucuachi-nda nùu ñanìtnaha-nda, vachi ducán ndiá ìcà-ndà quida-nda xi gracia nì nihìtáhvì-ndà nùu-yá, te cuahà clase gracia nduá yohó.

¹¹ Nú (sàni nihìtáhvì) iin nèhivì càhàn-nè (palabra ì), dandu ni cùndúámà nahi meru palabra nì cachi mii-yá. Te nú xicánúú-ndá indéhe ndahví tnaha-nda, dandu ni quida-nda chuun jaàn xì nsidaa valor níhì-ndà nùu Dios. Nsidanicuú ñà-nduá quidà-ndà, xiñuhu quida vii-ndàñá sàhà-ñá sàà nèhivì naquimanì-né mii-yá sàhà Jesucristu. (Ansivéhé-yâ), te nicanicuahàn ni cúsáhnû-yá, te ni queé stná cuahà tnùñuhu xí-yá (inicutu), amén.

Dispuestu ni cùndóo-ndá ñà-ndoho-nda sàhà Jesucristu

¹² Mii-nsiá nècuàchì màni guá nùu, màsà ndulócô-nsià nú ni yáha-nsia tnùndoho fuerte (quida nèhivì); cóndüá ñà-ndulocó-nsià na ian nduájàn iin ñà-cóni nihnú ini-nsià cuu xi-nsiá; còó.

¹³ Xiñuhu cudìi ini-ndà sàhámà vichi, vachi ñà-davani ndohó stná-ndà nahi Cristu nduá. Daaní, quivì cuni-ndà (naxicocuñ-yà) te nchíí ndiaha-yá, dandu yáha ga icúmí-ndá cudìi ini-ndà.

¹⁴ Te nansicáhàn stná-ndà nú ni càhàn quini nèhivì dìquì-ndà ñà-nchícùn-ndà mii-yá, vachi Espíritu ndiaha xí Dios icúmí chindee xi-nda na yáha-nda ducán. Ñà-ndàà nduá, quini càhàn-nè (xì-ndà) sàhà-yá, doco ndohó, còó. Tnúñuhu xí-yá nduá tavá-nda.

¹⁵ Te nú icúmí-ndá ndoho-nda, màsà cùndúámà sàhà-ñá nì sàhni stnaha-nda, te ò nì quidácuíhná-ndá iñàha, te ò nì quidà-ndà iin ñà-có-ndiàá, ò nì dáquìhvìyuhù-ndà nùu chuun xi inga nèhivì; còó.

¹⁶ Doco nú sàhà-ñá nduu-nda nèhivì xí Jesucristu ndoho-nda, dandu màsà nunca cucahan núu-ndà sàhájàn. Còó, ñà-naquimanì-ndà Dios nduámà.

¹⁷ Vachi vichi sà-íá cuahàn ndundaà sàhà ndohó nècuàchì nduú dèhe ndisa-ya. Te nú mii-nda nduú nècuàchì primeru, dandu ¿indù iñàha icúmí yáha nècuàchì có-ndulócô sàhà razón ndiaha xí-yá?

¹⁸ Vachi ndohó, nèhivì vaha xi-ya nduu-nda, te cuahà gá ndoho-nda, dandu sàà-ndà nùu-yá. Te nú ducán nduá, dandu yáha ga ndahví cunduu castigu xi nèhivì malu quida guá xì cuàchi.

¹⁹ Doco de todos modos, icúmí dava-nda ndoho-nda tiempu vichi, vachi ducán nì chitnùnì ini mii-yá. Ñàyùcàndüá, iin-ni xiñuhu ñà-quida vii-ndà ñuhivì yohó, te nsinuu ini-ndà ñà-ini ndahà-yá iá anima-ndà, vachi mii-yá nduú ana nì chitnùnì inì-xi cundoo-nda ñuhivì yohó, te vátuni cahvi-nda xi-yá (ñà-cundiaa-yàndó).

5

Nansa xiñuhu quida nèhivì sahnú idónuu, xì stná nècuàchì cucuáchí

¹ Vichi cuàhìn càhìn xì mii-nsiá nècuàchì cusáhnû jaàn. Yùhù nduú stnái iin nècuàchì sahnú dandacú. Cunaha-nsiá, yùhù nì xininúí nansa nì cuu na ní ndoho Cristu; te quivì natùì stná poder ndiaha xí-yá, dandu icúmí cuni stnái ñà-jaàn, nahi mii-nsiá.

² (Ñàyùcàndùá, yùhù cachî xì-nsiá) nì cúnúù víi-nsiá nèhivì xí Dios ndoó jaàn, nacua quidá pastor xì rìì xí-né. Doco nì cúnúúá xì nsidaa voluntad xi-nsia, màdiá fuerza nì quidá nèhivì xì-nsiá. Ni màsà quidá-nsiá chuun jaàn sàhà dìhùn, còó; ñà-cùdîi inì-nsia nì cúnúúá.

³ Ni màsà cúníhnú ini-nsiá nduú-nsiá lamú xi nècuàchì ndiaá-nsiá. Còó; chuun xi-nsia nduá quida víi-nsiá, dandu cundehè stná nèhivì ndiaá-nsiá, te quida stná-nè nacua quidá mii-nsiá.

⁴ Daaní, después na quivì naxicocuîin mii-yá ana ndiaá xì nsidanicuu-nda, dandu nihì iin iin-nda iin ñà-vàha xi-nda cunduu iin corona ndiaha cuñuhu dìni-ndà, te nicanicuahàn coo vicoá.

⁵ Daaní, mii-nsiá nècuàchì chicá cuachi, xiñuhu cunini-nsia ñà-ndùá xícachi nècuàchì sahnú dandacú. Cunaha-nsiá, nsidanicuú-nsiá, nicanicuahàn nì cúníhnú ndahvi inì-nsia, te cahvi tnahá stná-nsiá, vâchi Dios, sadí-yà nùù nsidaa nèhivì nducuéhê; doco nècuàchì nihnú ndáhví inì-xi, sáhatahvì-yánè gracia xi-ya.

⁶ Ñàyùcàndùá, xiñuhu cunihnu ini-ndà ducán, vâchi ndahà Dios ñuhú nsidaa-nda, te fuerte-yà. Dandu después sàà stná iin quivì quee ndisa tnùñuhu xi-nda nùù nsidaa nèhivì quida-ya.

⁷ (Doco vichi) nùù ndahà mii-yá nì ndóo nsidaa chuun nacání ini-ndà sàhà-xí, vâchi nihnú vâha ini-yàndó.

⁸ Nicanicuahàn xiñuhu cundoo-nda cuidadu, te cundoo tûha-nda, vâchi iá ana xicánúú xiní ùhì xì-ndà, divi nduú ñà-malu, te quidá-si na quidá sî-león, vâchi xicánúú-si ndáhî-si nandúcú-sî ñà-caxî-sí.

⁹ Doco màsà cuáha-nda mii-nda dítá-sindó, iin-ni nì cúníndísâ víi-nda mii-yá, te nsinuu ini-ndà ñà-divi ducán ndohó stná dava ga ñani-ndà ndoó inicutu ñuhíví.

¹⁰ Cunaha-nsiá, cuisì Dios nduú ana sáhatahvì xì-ndà gracia, te divi stná-yà sàni cana-yàndó ñà-cundoo ndiaha-nda nùù-yá nicanicuahàn quida Jesucristu. Ñàyùcàndùá, mate ndoho-nda vichi, doco ñà-yáha-ni nduá. Te mii-yá, icúmí-yâ nsida víi-yá anima-ndà, te nacuahà-yàndó valor. Icúmí-yâ nacuahandee stná ini-yàndó, te chindee-yàndó ñà-màsà quéé-ndá nùù ichì váha.

¹¹ Te vichi nì queé gá más tnùñuhu xí-yá, te iin-ni nì cúsáhnû stná-yà dècuèndè nicanicuahàn. Amén.

Ñà-ndùá nì cachi Pedro na ní ndaquìndèè-né xì nèhivì tiaá-né nùù-xí

¹² Iin ñani-ndà quidá víi ndisa nduú Silvano. Te divi mii-né nduú ana xichúin ñà-tiái tutu tii yohó ndé cáhìn xì-nsiá sàhà ñà-cundaà inì-nsia nansa xiñuhu quida-nda, te cundaà stná inì-nsia ñà-divi gracia ndiaha xi Yua-nda Dios nduá (sàni nihì-ndà). Ñàyùcàndùá, iin-ni nì cúníndísâ víi-nsiá gracia mà.

¹³ Ñuu Babilonia yohó ndoó stná nèhivì nì nacàxin stná Yua-nda Dios nahi mii-nsiá, te cásàhú stná-nè xì-nsiá. Daaní, yohó iá stná Marcos, iin nècuàchì nduú nahi dèhi, te cásàhú stná-nè xì-nsiá.

¹⁴ Te mii-nsiá, nacasàhú màni stnahá stná-nsiá entre mii-nsiá.

Nì cúnúú cueé nsidaa mii-nsiá nècuàchì nduú nèhivì xí Jesucristu. Sà-íá.

Tutu Ùì Nì Tiaa San Pedro nù Nèhivì xí Dios

¹ Yùhù nduí Simón Pedro, iin ana xinúcuáchí nù Stoho-ndà Jesucristu. Te divi nù mii-yá nì nihí chuun ndiaha quidé. Te vichi tiaí tutu yohó nù nsidaa mii-nsiá nècuàchì iin-ni sàni nihítáhvi stná gracia ndiaha xí-yá ñà-cunindisá-nsiáyà. Vàchi ducán nì chitnùní ini-yà quida-nda, divi mii-yá ana chiigá ndàcuisì inì-xi. Dios nduú-yá, te cahvi-ndayá, vachi mii-yá nduú ana nì dácácu xi-nda.

² Pues vichi nì cúcúmí-nsiâ cuàhà gracia xi-ya, te contentu ni cúndóó-nsiá sàhà-ñá ináhá-nsiâ mii-yá xì (Yuamàni-yá) Dios.

Nansa ndiá ìcà nèhivì xí Jesucristu quida-ne

³ Cunaha-nsiá, fuerte gá mii-yá, te ndiaha gá quidá-yá, ñàyùcàndùá nì cana-yàndó ñà-cunaha-ndayá. Dandu nì chindee ndudu ìì xí-yá ndohó, te nì nihítáhvi-ndà nsidan-icuí ñà-ndùá xiñuhu ñà-cundoo ndiaha-nda nù-yá, te cahvi-ndayá nacua ndiá ìcà-ndà.

⁴ Te sàhà-ñá fuerte guá-yà, te ndiaha guá-yà, ñàyùcàndùá nì cundiatú-ndà cuàhà gá ñà-vàha ndiatu-nda cuu xi-nda, te dècuèndè ndulócô-ndà ñà-ndiaha guá palabra sàni cachi-yà. Vachi sàhà palabra mà vátùni cucumi stná-ndà meru vida xi anima mii-yá, te ducán nihì ndèè stná-ndà naco-nda modo sìquini icúmí nècuàchì dava ga ñuhivì yohó, divi modo cudí guá ini-nè quida-ne.

⁵ Te divi sàhà-ñá nì cachi-yà xì-ndà palabra mà, ñàyùcàndùá xiñuhu cuàhandee ini-ndà (cunchicùn-ndà) chicá viì. Pues vichi sà-xiníndisá-ndáyâ, doco xiñuhu cutùha stná-ndà cunihnu viì ini-ndà. Daaní, xiñuhu sàà stná-ndà mànihì vaha ini-ndà (sàhà ichì-yá).

⁶ Daaní, xiñuhu cutùha stná-ndà cadì-ndà nù mii-nda. Daaní, xiñuhu cutùha stná-ndà quidandee ini-ndà; daaní, xiñuhu cutùha stná-ndà cunihnu vaha ini-ndà mii-yá nicanicuahàn.

⁷ Daaní, xiñuhu cutùha stná-ndà cunihnu manì ini-ndà sàhà ñanìtnaha-nda; daaní, xiñuhu sàà stná-ndà cuu stnahá ndisa ini-ndà sàhà-ndà.

⁸ Vachi cunaha-nsiá, nú nì cutùha vaha-nda nsidaa ñà-jaàn, te quida ndisa-ndañá cumplir, dandu màdi uun-ni cundoo-nda nù Stoho-ndà Jesucristu; nì màdi uun-ni quea ñà-ìnhá-ndáyâ.

⁹ Doco nèhivì còò ñà-vàha ma ini anima-xi, có-cùndáà vaha ini-nè, na ian quidámáxinì-nè, te có-nsinúú gá ini-nè nansa nì quida Dios na ní nsidandoo-ya cuàchi-ne.

¹⁰ Ñàyùcàndùá, chicá vaha cunsìhi ini-ndà cundoo-nda seguru ñà-ndù-ndà nèhivì nì nacàxin-ya, te nì cana-ya. Vachi nú nì quida ndisa-nda ñà-vàha jaàn, dandu mà sàà-ndà tucù-ndà ichì cuàchi.

¹¹ Còò, ndiaha gá icúmí quixi cuàhà gracia xi mii-yá ana nì dácácu xi-nda, divi Stoho-ndà Jesucristu, te dayáha stná-yàndó ñuhivì ìì xí-yá ndé dandacú-yá nicanicuahàn.

¹² Ñàyùcàndùá, cunì dansínuu ga inì mii-nsiá nansa (quida-nsia), mate sà-ìnhá-nsiâ iyuhu sàhàmà vichi, te nihnú vaha inì-nsia palabra ndàcuisì nì xinindisá-nsiá.

¹³ Doco yùhù tuxí inì, mientras itiácù-ve ñuhivì yohó, chicá vaha dansínuu inì mii-nsiá nansa xiñuhu cunihnu ini-nsiâ.

¹⁴ Vachi ináhì sà-ítúú quivì icúmí cui nacua nì cachi Stoho-ndà Jesucristu xì.

¹⁵ Doco icúmí nanduquí nansa cui nsinuu inì-nsia palabra yohó nú sàni xihì.

Nansa nì xini Pedro nì natnuù ndiaha Jesús

¹⁶ Cunaha-nsiá, palabra ìì nì cachitnùhu-nsi xì-nsiá, màdi cuentu nì nachuhun tnahá uun nèhivì maña nduá. Còò, vachi sàni xininù-nsí ñà-ndiaha guá iá Stoho-ndà Jesucristu, ñàyùcàndùá, nì nacani-nsi xì-nsiá sàhà poder xi-ya, xì nansa icúmí stná-yà naxicocuí-n-yà.

¹⁷ Vàchi nsiùhù, nì xini-nsì na ní tavà Yua-nda Dios tnùñuhu ndiaha xí-yá, te nì natnuú fuerte-yà. Dandu ndiaha gá nì càhàn Yuamáni-yá sàhà-yá na ní cachi-yàmà: “Dèhemanì nduú ana yohó, te cudî inì sàhà-yá”.

¹⁸ Nsiùhù, nì inini-nsi ñà-jaàn na ní sàhàn-nsi xì-yá dìnì yucù ìì yucán, te nì tiacu-nsi nì càhàn (Yuamáni-yá) ansivi.

¹⁹ Ñàyùcànduá, sàhà ñà-jaàn chicá más náhà claru ñà-ndácuisì nduá nì cacachi profeta nìsa càhàn sàhà-yá sàhana; te vichi ndiá ìcà-ndà cunihnu vaha ndisa ini-ndà palabra xi nècuàchìmà, vachi palabra mà, ndiaha gá datnúà sàxìnítùnì-ndà na iin ñuhu nchií fuerte ndé iín tnúú, te iin-ni icúmí chindee stná-màndó dècuèndè quìvì danátnùu ndiaha-yá nùu (nèhivì ndoó inicutu ñuhivì). Daaní, quìvì jaàn (icúmí-yâ datnúu-yà ini anima-ndà na ian) quidá sìtnùu cahnú cachítñuhu ñà-sàcuàhàn tùinuù inga quìvì.

²⁰ Cenaha-nsiá, chuun cahnú nduú ñà-sà-ndà cundaà vaha ini-ndà nansa iá palabra ìì nì cachítñuhu nèhivì sàhana ma, te nì tiaa-neà nùu tutu. Màdì sàhà cuisì sàxìnítùnì ndohó cui sà-ndà cundaà vaha ini-ndà nansa cuní cachàmà.

²¹ Vàchi nèhivì ìì sàhana ma, màdì inì-ni mii-né nì chítñùnì ini-nè ñà-nduá nì cachi-nè sàhà mii-yá. Còó, divi Espíritu ìì xí-yá nduú ana nì dàtnùu xì sàxìnítùnì-nè, te nì cachi-nè ñà-nduá nì cachi-nè.

2

Màsà nácuítñuhú-ndá ñà-tnùhù chináhá nèhivì

¹ Tiempu sàhana ma nì sandoo stná tètñuhù ñuu-nsi, datiaá uun-tè càhàn-te cuenta xi Dios. Doco vichi ndé ndoó stná mii-nsiá icúmí casaà stná tètñuhù nahi tè-sàhana ma. Te icúmí-tè daquíhvi dèhé-te iin dàñuhù chináhà-te. Ndé icúmí stná-te nacuaà-té Stoho-ndà Señor, mate sàni dànáà-yá sàhà cuàchi-nda. Doco cuisì mii-té quidá quini-tè xì mii-té, ñàyùcànduá yàchì icúmí-tè ndañuhu dahuun-tè.

² Doco cuàhà gá nèhivì icúmí tenchicùn xì ichì sìquini mà, dècuèndè sàà stná-nè cahíchi ini-nè ichì ndácuisì-yá.

³ Te tètñuhù mà, ñà-cuàhà guá cuú inì-te sàhà dìhùn, ñàyùcànduá, vico uun icúmí-tè càhàn-te xi-nsiá ñà-dandahví-te mii-nsiá, te ducán nsidandahví stná-te mii-nsiá. Doco dècuèndè sàhana sàni cachi Dios ñà-icúmí-tè cunsida-tè cuàchi-tè, te sà-ítuú sàà stná quìvì ndañuhu dahuun-tè.

⁴ Stná ángel nì sanduu mozo xi-ya, na ní caquida-ne cuàchi, cónì xícahnú ini-yá sàhà-né, vachi nì sàcùnuhni-nè cadena, te nì ndiachi-né ndé cahà andea ndé iín tnúú, te yucán ndiatú-né dècuèndè sàà quìvì ndundaà sàhà cuàchi-ne.

⁵ Stná nèhivì ñuhivì sàhana, cónì dácácu Dios-nè, vachi cuàhà gá cuàchi-ne nì-ia, teayùcànduá nì quixi diluviu dìquì-né. Doco tiàa nani Noé, còó. Nì càcu-ne. Cunaha-nsiá, cuàhà gá nì càhàn stná nècuàchìmà xì nèhivì sàhana ma áma quidá víi stná-nè, doco (cuisì) Noé mà xì inga ùsà gà tnaha-ne nì càcu.

⁶ Daaní, stná ñuu Sodoma xì ñuu Gomorra, nì xixìn nsiha, ndé cuisì yàà-ñá nì ndòo, vachi iin castigu xi mii-yá nì sanduu tnùndoho ma, áma yúhì stná nsidaa gá nèhivì malu icúmí cundoo ga ñuhivì quìvì nùu-xí.

⁷⁻⁸ Doco ñuu mà nìsa ìa stná iin nècuàchì vaha nani Lot. Te yáha ga nì cuduchi ini-nè sàhà modo sìquini xi nèhivì ñuu mà. Vachi yucán iá-nè mahì nècuàchìmà, te nsìquívì inínì-né, te indéhe-né ñà-quini guá quidá nècuàchìmà. Ñàyùcànduá yáha ga nì ndòo cahan-ne sàhà nècuàchìmà. Daaní, na (ní nìhì ñuu mà tnùndoho), nì dàcácu Dios-nè nùájàn.

⁹ Pues sàhà ñà-yucán náhà claru, tùha ndisa Dios tavà-yá nèhivì vaha xi-ya nùu tnùndoho yáha-ne nì cuí. Te ináhá vaha stná-yá nansa cuàhàn-yá quida-ya xì nèhivì malu vichi, itnìí-yá cuenta sàhà-né ndé cachi sàà quìvì juiciu, dandu ndoho-ne.

¹⁰ Te nècuàchì chicá icúmí ndoho nduú nècuàchì quidá sìquini guá xì mii-xí nacua nduú gustu xi-ne, te cahíchi stná ini-nè ñà-nduá dandacú mii-yá nùu-né.

Vàchi tètñhù mà, atrevidu gà-te, mii-té xínduu-tè mii-té. Mà ía yuhù-té; quini ga cáhàn-te sàhà ana fuerte (xicánúú) ansivi.

¹¹ Doco cunaha-nsiá, ndè ángel xi Dios, có-cânàhá quini-ne na cáhàn-nè sàhà falta xi ana fuerte mà nùù Stoho-ndà Señor, mate chicá cuàhà poder xi-ne (nùù témà), te chicá dandacú stná-nè.

¹² Doco témà, mate có-sàa-te cundaà inì-te sàhà iin chuun, doco quini ga cáhàn-te sàhà-ñá. Nahi quisì có-cùndàà inì-xi xínduu-tè, te quidá-te na ian còò anima-te. Ñàyùcàndùá, divi icúmí cuu xi-té na ian cùù-xì quisì yùcù, cuisì ndoó-si ñuhiví sàhà-ñá tñii nèhivì-sí, te cahni-nési; pues divi ducán icúmí cuu stná xì tètñhù mà, icúmí-tè ndañuhu dahuun-tè ñà-sàni cuchicuehe anima-te.

¹³ Iin castigu ùhì nduá ñhì-té, divi nacua nì quida-tè xì ñanìtnaha-tè. Doco vichi cudí inì-te quidá-te ndéni ñà-sìquini nì cui ndui (ò ñuú) ni cùndúá. Ñàyùcàndùá, ndohó, ndóo cahan-nda sàhà escándalo xíquida guá-te. Mate sàhàn stná-te ndé ndoo-nda vicò xì-ndà, doco dandahví uun-tè, vachi cudí gá inì-te dandahví-te.

¹⁴ Indéhe stná-te nsidaa nècuàchì ñahà, te cuní-te dàvá diquì-tené. Có-nàcòó-te cuàchi quidá-te. Te nèhivì mà-fuerte anima-xi, mà ùhì dandahví-tené. De por sí, cuàhà iñàha xího stná-te cucumi-té. Doco icúmí-tè ñhì chíhàn-te.

¹⁵ Vachi sàni nacoo-tè ichì váha mii-yá, te sàxínchicùn-te ichì malu nacua nì quida Balaam dèhe Beor sànahà; iin nècuàchì xinítú nì sanduu nècuàchì mà, doco cuàhà gá ñisa cuu ini-nè sàhà òhùn; mate iin chuun có-ndiàá nduá, doco quida-neà sàhà òhùn.

¹⁶ Doco nì ñhì-né iin conseju vaha nùù burru xi-ne, có-íá vaha ñà-nduá quidá-né, nì cachì-si xi-né. Mate quisì nduú-si, doco nì cáhàn-si na iin nèhivì, te nì sadì-si nùù nècuàchì mà ñà-màsà quidá-né chuun loco cuàhàn-nè quida-ne nì cùí.

¹⁷ Cunaha-nsiá, na iin pozo ndé nì ndoco tècuí, ducán xínduu tètñhù mà. (Còò ni-iñàha níhì-ndà) nùù-té, nahi vicò tàchí, còò ni-iñàha nihá. Ñàyùcàndùá icúmí-tè sàa-te iin xaan ndé iin tñúú ndúchí, te nicanicuahàn cundoo-tè yucán, cachí Dios.

¹⁸ Doco vichi, fuerte cáhàn-te na ian yáha ga ndiáa-te. Doco puru palabra chicuéhe nduá cachí-te, vachi chináhà-te ñà-vàtùni quida ndevàha-nda nansa ni nì cui; vátùni íá ñà-cuñuhu quini ini-ndà, cachí stná-te; te sàháyùcàndùá, nádítá-te cuàhà nèhivì ladu xi-tè, dècuèndè stná nèhivì sà-ítúú càcu nùù ichì malu mà nì cùí.

¹⁹ Libre cundoo-nda, cachí-te xi nèhivì, doco mà cùí, vachi ndè stná mii-té, dandacú stná cuàchi-tè nùù-té. Te nú sàni cundee iñàha nùù-ndà, dandu có-ndòò gá ndisa-nda libre.

²⁰ Vachi ni cachí-ndà íá iin nèhivì, te ñisa cundaà vaha ini-nè sàhà Stoho-ndà Jesucristu, te nì càcu stná-nè nùù modo sìquini xi ñuhiví yohó; doco nú tucu tu ni dácà òhì-né, te cundee cuàchi ma nùù-né, dandu chicá quini queamà nùù ñà-primeru.

²¹ Vachi chicá vaha màsà cúnitñuhu-ne sàhà ichì váha-ya nì cùí, te màdiá nì xinitñuhu-ne, dandu después nì naxicocuñ tu ini-nè, te nì nacoo-ne palabra ì nì cachì-yà xì-né.

²² Doco cunaha-nsiá, ducán cuú stná xì-né nacua cachí dichu sàhà sìhina: “Nì nsihi nì ndusan-sì, dandu naxícocuñ tu-sì saxí-si ñà-jaàn; te ò nacua quidá stná cochi, nú sàni xichi-sì, dandu tucutu ndécahnu-sì mahì ndèhì tuí nihí-sì”.

3

Icúmí naxicocuñ Stoho-ndà Jesús ñuhiví

¹ Ñà-ùì nduá tiaí nùù-nsiá vichi, ñani màní. Te nùù ndùì carta xi sàni quide lucha nacuaandee inì mii-nsiá sàhà-ñá ducán nsinuu ini-nsiá nacani viì ini-nsiá.

² Te cuní stnáì nsinuu inì-nsiá nansa íá palabra xi Dios nì cachitñuhu nèhivì ì sànahà, xì stná palabra nì sàcùnaha-nsiá nùù nsihù nècuàchì nì ñhì chuun nùù Stoho-ndà Señor nì dàcàcu xi-nda, vachi palabra xi mii-ya nduá.

³ Doco iá iñàha chicá cunî cundaà inì-nsia. Cunaha-nsiá, na sàà quivì xínu tiempu, dandu icúmí ndecoyo nèhivì cuàcùndiaa (sàhà ichì-yá). Icúmí-nê quida ndevàha-ne xì mii-né nansa ni nì cui.

⁴ Te dohó icúmí-nê cachi stná-nè: “¿Índù ní xini-nsì naxicocuîñ-yà nacua nì cachi-yà? Vàchi dècuèndè sàhana na ní xihì xii-ndà, còò ni-iñàha, vachi iin-ni iá ñuhivì vichi nacua nì sàcòà quivì primeru”, cachi-nè.

⁵ Doco na cachí nèhivì ducán, cuisì quidámáxini-nè sàhà nansa ni cuu sàhana na ní sàcòò ansivi, te nì xínu stná ñuhù íchí mahì tècuìí, nsidanicuú ladu ñuhú-te. Pues nsidaa ñà-jaàn nduá nì dandàcú Dios, te ducán nì cuu.

⁶ Doco sàhà divi tècuìí mà ní ndañuhu stná ñuhivì sàhana ma, vachi nì dàhvia dàvì inicutu.

⁷ Doco ansivi xi ñuhivì iá vichi, sàhà divi palabra nì cachi-yà antes mà iá stná orden xi-ya ñà-icúmíâ coco nsiha, cuisì ndiatú-yá ndè cachi sàà quivì ndundaà sàhà cuàchi nèhivì malu, dandu coco ñuhivì, te ndañuhu stná nsidaa nècuàchì malu mà.

⁸ Doco iá iin palabra cunî nsinuu ini-nsiá, ñani màní. Cunaha-nsiá, mate imindaa quivì, te ò mìl cuià nduá, doco iin-ni nduá nùù Stoho-ndà Señor.

⁹ Ñàyùcànduá, mate cachí nèhivì ¿índù chuun cucuèè-guá cuu ñà-nduá nì cachi-yà? doco còò; màdì ñà-cò-ndùlócò-yà nduá; ñà-quidándéé cahnú ini-yà sàhà-ndà nduá, vachi có-cuní-yà ndañuhu ni-iin-nda; còò; ñà-nì sàà nsidaa-nda naxicocuîñ ini-ndà sàhà cuàchi-nda nduá cuní-yà.

¹⁰ Doco cunaha-nsiá, (nanàá) icúmí sàà quivì quida ndisa Stoho-ndà Señor (nacua nì cachi-yà); na ian có-nìhnú ini nèhivì quixi tècuìhnà ñuú, ducán coo. Dandu yáha ga fuerte icúmí caha ndee, te ndañuhu dahuun ansivi; te nsidaa ñà-nduá nì cuyucun ñuhivì, icúmíâ dàà titiá, te coca, te ndañuhá, vachi ñuhivì yohó xì nsidaa ñà-ia nùá, icúmíâ coco nsiha.

¹¹ Pues vichi, sàhà-ñá sà-ináhá-ndá icúmí ndañuhu nsidaájàn, ñàyùcànduá xiñuhu ñà-cunsihi ini-ndà cacuanu vii-ndà ñuhivì nacua cuní mii-yá, te cunihnu ìì stná ini-ndà.

¹² Siempre ni nsínúú ini-ndà ñà-icúmí sàà quivì xí Dios, te quida-nda nacua cui quida-nda ñà-nì sàà yàchà. Vachi quivì yucán icúmí chiñuhu Dios ansivi, te coca, dandu ndañuhu dahuan; te nsidaa stná ñà-nì cuyucun ñuhivì, icúmíâ ndutea, te coca.

¹³ Doco ináhá vâha stná-ndà ñà-después icúmí nàcòò stná inga ansivi saa xi ñuhivì saa nacua nì cachi-yà xì-ndà, te ñuhivì saa ma, puru ñà-ia vii icúmí coo nùá.

¹⁴ Pues, ináhá vâha-nda ducán icúmí cuu, ñani màní, ñàyùcànduá, cuàhà gá xiñuhu cunsihi ini-ndà cundoo manì-ndà ñuhivì, màsà cóó ni-iin falta xi-nda, ni màsà cóó ni-iin mancha anima-ndà. Te iin-ni ni cóó ducán dècuèndè quivì naxicocuîñ-yà.

¹⁵ Te nú dacueé-yà, te quidandee gá ini-yà sàhà-ndà, dandu xiñuhu cunihnu ini-ndà ñà-cuisì sàha-yàndó tiempu càcu-nda nduájàn. Te divi ñà-jaàn nduá sàni tiaa stná ñani màni-ndà Pablo na ní tiaa-ne iin carta nùù-nsiá antes. Nchichí gà tiaá-né, vachi ducán nì nihitáhvi-né.

¹⁶ Te nùù nsidaa carta xi-nemà, cachítnùhu stná-nè sàhà chuun tiaí yohó. Ñà-ndàà nduá ùhì cundaà ini-ndà dava ñà-nduá cachí-nè nùù carta mà. Ñàyùcànduá, nèhivì có-sàà cundaà inì-xi, dasívì uun-ne palabra mà, vachi nèhivì có-xiníndisá vâha nduú-né. Te divi ducani dasívì stná-nè dava ga tutu ìì xí Dios, doco (ndahví-nè), vachi cuisì icúmí-nè sàà-nè ndañuhu-né sàhámà.

¹⁷ Doco mii-nsiá, sà-ínáhá-nsiâ nansa iá nsidaa ñà-jaàn, ñani màní. Ñàyùcànduá, cuidadu ni cúndóó-nsiá sàhà tètñuhù có-ndùlócò sàhà ley xi Dios, còtó naditá-te mii-nsiá ladu xi-tè, te sàà-nsiá quee-nsia nùù ichì vâha nchícùn vii-nsiá vichi.

¹⁸ Te sacúndáhvì stnáì nùù-nsiá ñà-nì cúnsihi inì-nsia nansa cucumi gá-nsiá más gracia xi Stoho-ndà Jesucristu, xì nansa nihì stná-nsiá cunaha vâha-nsiayà, vachi mii-yá nduú ana nì dàcácu xi-nda.

Ansivéhé cahnú-yá ndè quivì vichi, te nicanicuahàn. Amén.

Tutu Nuu Nì Tiaa San Juan nù Nsidaa Nèhivì xí Dios

Nansa iá vida ndiaha xí mii-yá

¹⁻² Cuní-nsi càhàn-nsi xì-nsiá sàhà mii-yá. Dècuèndè antes quesaha ñuhiví, sà-íá-yà. Te nsiùhù, sàni inini-nsi nì càhàn-yà; sàni xininùù-nsiyà, dècuèndè sàni tnii ndahà stná-nsi ìcà-yá. Te mii-yá nduú ana nì quixi xi palabra ì cachítnùhu nansa cutiacu ndiaha anima-ndà. Te sàhà mii-yá itiácú-ndà. Ñàyùcàndùá, (nì quixi-ya) ndè ñuhiví yohó, te nì xini nèhivì-yá. Dècuèndè stná nsiùhù, nì xininùù stná-nsiyà, ñàyùcàndùá, vichi cachítnùhu-nsi, te dansítnùù ini-nsi mii-nsiá sàhà-yá, vàchi mii-yá nduú ana sáhatahvì xì vida ndiaha nicanicuahàn. Nùù Yuamáni-yá nisa ìa-ya, dandu nì quesaa-yà ñuhiví yohó, te nì xini-nsiyà.

³ Te ñà-ndùá nì xini-nsi, te nì inini-nsi, divi nduá cachítnùhu-nsi xì-nsiá sàhà-ñá iin-ni nì cúníhnú vaha stná ini-nsià nacua quidá nsiùhù. Te nacua nihnú ini-ndà Yua-nda Dios xì Dèhemanì-yá Jesucristu, ducán nihnú stná ini-yà ndohó.

⁴ Te vichi, sàhà-ñá cuní-nsi ñà-chicá cudii inì-nsia, ñàyùcàndùá dísáhà-xí tiaá-nsí ñà-yòhó nùù-nsiá.

Na ian nchií ndai luz, ducán iá anima Dios

⁵ Cunaha-nsiá, palabra yohó nduá nì inini-nsi nì cachi Dèhemanì-yá (xì-ndà), te ñàyùcàndùá dohó cachítnùhu stná-nsi xì-nsiá ñà-nahi luz nchií ndai, ducán nduú stná (anima) Dios, (vachi micuísì ñà-vàha nduú-yá), te ni-iyuhu có-nìhnú ini-yà ichi ñáa.

⁶ Ñàyùcàndùá, nú ni cachí-ndà iá vaha-nda xi-yá, doco xicá stná-ndà ichi ñáa, dandísá, tnuhu-nda, te có-nchícùn-ndà ichi ndàcuisì-yá.

⁷ Doco nú xicánúú víi-nda, datnúù-yà sàxínítnùnì-ndà, te nihnú vaha ini-ndà nacua nihnú ini mii-yá, dandu mà úhì cundoo manì tàcá nsidaa-nda. Te nì Dèhemanì-yá Jesucristu nsidándóó xí nsidanicuú cuàchi-nda.

⁸ Nú ni cachí-ndà có-ndùù-ndà nèhivì cuáchi, dandu ñà-dàndàhvì-ndà mii-nda nduá, te ducán nàhà xicà có-nìhnú ini-ndà palabra ndàcuisì.

⁹ Doco nú ni cuáha-nda cuàchi-nda, dandu icúmí-yâ quida ndisa-ya cumplir, mà dándàhvì-yàndó, seguru cuicahnú ini-yà sàhà-ndà, te nsidandoo-ya nsidaa ñà-có-ndiáá ñuhú anima-ndà.

¹⁰ Doco nú ni cachí-ndà còò cuáchi ni quida-nda, dandu ducán queá na ian ndeníhí tnúhú-ndáyâ. Te nú ducán, dandu nàhà xicà, tàñáha ga sàà-ndà cunihnu ini-ndà palabra xi-ya.

2

Jesucristu nduú ana càhàn nihni sàhà-ndà nùù Dios

¹ Nahi dèhe mií xínduu-nsia, ñàyùcàndùá tiaí palabra yohó nùù-nsiá ñà-màsà quidá-nsiá cuàchi. Doco nú iá ana nì quida iin cuàchi, dandu (ni cúnáhá-nè) iá stná ana càhàn nihni sàhà-ndà nùù Yuandiaha-nda. Te ¿ana quidá ducán? Divi Jesucristu, vachi mii-yá, ndàcuisì ini-yà.

² Te divi sàhà ñà-ndùá nì quida-ya nì xihì-yà sàhà cuàchi-nda, ñàyùcàndùá, mà nsínúú gà ini Yua-nda Dios sàhà-ñá. Te màdì cuísì sàhà cuàchi ndohó nì xihì-yà, còó, vachi nì dànáà stná-yà sàhà cuàchi nsidanicuú nèhivì ñuhiví.

³ Te vichi nú ni chívàha-nda ñà-ndùá cachí-yà, dandu vátùni cundaà ini-ndà ñà-sàni xini stnáhá ndisa-nda xi-yá nduá.

⁴ Doco nú cachí iin nèhivì ináhá-nèyà, doco có-chívàha-ne ñà-ndùá cachí-yà, dandu (cundaà ini-ndà), tnuhu-né, có-nìhnú ndàà cuisì ini-nè palabra xi-ya.

⁵ Doco nú quidá-né cumplir ñà-nduá cachí-yà, dandísá sàni sàà-nè cuu ndisa ini-nè sàhà-yá, te ducán vátùni cundaà ini-ndà iin nèhivì xí-yá sànduú-né.

⁶ Vàchi nú ni cachí-nè nèhivì xí-yá nduú-né, dandu ndiá ìcà-né quida viì stná-nè nacua nì quida mii-yá.

Ñà-nduú palabra saa dandacú Dios chivàha-nda

⁷ Màsà cúcáhán-nsiâ iin ley saa nduá tiaí nù-nsiá vichi, ñáni. Còó, ley yucán nduá, divi ley nì xinindisá-nsiá na ní quìhvi-nsia ichì-yá, vachi divi ley yucán nduú palabra nì xinitnùhu-nsia daa.

⁸ Doco cunaha-nsiá, nahi ley saa nduú stná ñà-nduá tiaí nù-nsiá yohó. Te nú nsinúú ini-nsiá nansa nì quida mii-yá (na ní ìa-ya yohó), xì nansa (quidá stná-yà) xì ndohó vichi, dandísá vátùni cundaà ini-nsiá, ley saa nduá, vachi cueé-nì cueé-nì làcà iyuhu iín tnúú ini-ndà, te vichi ndiaha gá sàdàtnúù-yà sàxìnítùnì-ndà sàhà-ñá cundaà ini-ndà nansa iá ñà-ndàcuisì.

⁹ Nú iá iin ana cachí sàdàtnúù Dios sàxìnítùnì-xi, doco có-xiñùhù-né ñanìtnaha-ne, dandu ichì ñáa nduá nchícùn ì-né dècuèndè vichi.

¹⁰ Doco nècuàchì cuú ini-xi sàhà ñanìtnaha-xi, mii-né ndisa, iin-ni datnúù Dios sàxìnítùnì-nè, te có-nàcánì ini-nè sàhà inga iñàha cuida cuàchi-ne.

¹¹ Doco nècuàchì có-xiñùhù xì ñanìtnaha-xi, tàñáha ga tnùù ndiaha sàxìnítùnì-nè. Xicá ñáa-né, nì có-sàha tnunì ini-nè índù cuàhàn-nè, vachi iín tnúú ini anima-nè ñà-sàni quìhin-ne ichì ñáa.

¹² Hijos míos, tiaí tutu yohó nù-nsiá sàhà-ñá sàni xicahnú ini-yà sàhà cuàchi-nsia (na ní xinindisá-nsiáyà), te nì ndacùcahan-nsiá quìvì-yá.

¹³ Stná mii-nsiá nècuàchì sahnú, tiaá stnái palabra yohó nù-nsiá ñà-sà-ìnáhá stnahá stná-nsiá xì mii-yá ana itiácú nicanicuahàn. Daaní, mii-nsiá nècuàchì chicá cuachi, tiaá stnái nù-nsiá ñà-sàni cundee-nsiá nù ñà-malu.

Hijos, ñà-yòhó tiaí nù-nsiá sàhà ñà-sàni sàà stná-nsiá nì xini stnahá-nsiá xì Yuandi-aha-nda.

¹⁴ Te mii-nsiá nècuàchì sahnú jaàn, tiaá stnái ñà-yòhó nù-nsiá ñà-sà-ìnáhá stnahá stná-nsiá xì mii-yá ana itiácú nicanicuahàn. Daaní, mii-nsiá nècuàchì chicá cuachi, tiaá stnái ñà-yòhó nù-nsiá sàhà-ñá fuerte gá anima-nsiá, vachi nihnú ndisa ini-nsiá palabra ì xí Dios, te sàni cundee stná-nsiá nù ñà-malu.

¹⁵ Ni-iin-nsia, màsà cúú ini-nsiá sàhà ñà-nduú modo xi ñuhivì yohó, nì màsà xího stná-nsiá ñà-nduá iá nùá. Vachi nú ni cuú ini-ndà sàhà modo xi ñuhivì yohó, dandu (náhà xìcà) ñà-có-cúú ini-ndà sàhà Yua-nda Dios nduá.

¹⁶ Vachi nèhivì nihnú inì-xi ñuhivì yohó, xího cuàhà-né quida cahnú-né cuàchi-ne xì iquìcúñù-nè, te xího stná-nè cundehè-né cuàhà iñàha có-ndiáá, te nducuéhè stná-nè sàhà ñà-nduá icúmí-nè. Doco nsidaa ñà-jaàn, có-nduá ñà-cùdî ini Yua-nda Dios sàhà-xí. Còó, ñà-cùdî ini nèhivì ñuhivì yohó nduá.

¹⁷ Doco ñuhivì yohó, icúmíâ nsiha, te mà níhì gá nèhivì ñà-nduá nìsa xihò guá-nètà. Doco ana quidà-xi ñà-nduá cachí Dios, nicanicuahàn cundoo ndiaha-né.

Nansa cundaà ini-ndà índù ñà-nduú ñà-ndáà, te índù ñà-nduú ñà-tnùhù

¹⁸ Hijos míos, na ian vaxi xínu tiempu yohó nduá. Te sàni xinitnùhu-nsia icúmí quixi iin ana nduú contra xi Jesucristu, divi nduú Anticristu. Doco dècuèndè stná tiempu vichi ndoó stná cuàhà contra xi-ya. Ñàyùcànduá, vátùni cundaà ini-ndà ñà-vaxi xínu tiempu yohó nduá.

¹⁹ Tiàa xínduu contra xi-ya, antes nìsa cutnahá stná-nè xì-ndà, doco vichi sàni quecuaán-né, vachi cóni ía ndisa-ne ladu xi-nda, vachi nú nèhivì ladu xi-nda nduú-né nì cùí, dandu dècuèndè vichi cutnahá ì-né xì-ndà. Doco, còó, sàni quecuaán-né sàhà-ñá cunahà xìcà ñà-díin ladu iá-nè.

²⁰⁻²¹ Te mii-nsiá, nùu mii-yá ana chicá ì sàni nìhítáhvi sàxínítnùnín-nsiá, te sà-ínáhá nsi-daa-nsiá ñà-ndùú ñà-ndáa. Te ñà-sà-ínáhá-nsiâmà, ñàyùcàndùá tiaí tutu yohó nùu-nsiá, màdì sáhà-ñá có-ínáhá-nsiá, vèchi ndisa, ináhá-nsiá ñà-ndùú ñà-ndáa. Te sáhà-ñá nduá palabra ndàcuisì, ñàyùcàndùá ni-iyuhu mà cùndùá ñà-tnùhù.

²² Te ¿ana chicá nduú tètñùhù ndisa? Divi tiàa cachí sàhà Jesús ñà-có-ndùú-yá Cristu ndiaha nì quixi nùu Dios. Cunaha-nsiá, contra xi Jesucristu nduú ana cachí: “Còò ana nduú Yua-nda Dios, ni còò stná Dèhemani-yá”.

²³ Nú ni cachí-ndà: “Còò Dèhemani-yá”, dandu ducán queá ñà-sàni nacuaà stná-ndà Yua-nda Dios. Doco nú ndácùcahan-nda Dèhemani-yá, dandu Yua-nda Dios iá vaha stná xì-ndà.

²⁴ Ñàyùcàndùá, mii-nsiá, nicanicuahàn xiñuhu cunihnu inì-nsia palabra xi-yá, divi palabra nì xinitnùhu-nsia sàhana. Nú iin-ni ni cúníhnú ini-ndà ñà-ndùá nì xinitnùhu-nda daa, dandu iin-ni cunduu stná-ndà nèhivì xí Dèhemani-yá, nèhivì xí Yua-nda Dios.

²⁵ Te mii-yá, sàni quida-ya comprometer nìhì-ndà vida ndiaha nicanicuahàn.

²⁶ Cunaha-nsiá, tutu yohó tiaí nùu-nsiá sáhà-ñá cundaà vaha inì-nsia sáhà nèhivì tnùhù cuní dandahví xì-nsiá.

²⁷ Doco mii-nsiá, sàni nduhì sàxínítnùnín-nsiá nì quida-ya, te ducání iá dècuèndè vichi; còò necesidad dacuahá inga nèhivì mii-nsiá, vèchi sàni nsida ì-yá sàxínítnùnín-nsiá, te dècuèndè vichi chindéâmà mii-nsiá, vètùni cundaà ini-nsiá sáhà nsidaa ñàha, vèchi palabra ndàcuisì nduá nì chinaha-yà, còò ni-iin ñà-tnùhù nduá. Te divi nacua nì chinaha-yà mii-nsiá antes, divi ducán xiñuhu quida stná-nsiá vichi, nicanicuahàn ni cúníhnú ini-nsiá cunduu ì-nsiá nèhivì xí-yá.

²⁸ Hijos míos, vichi cachí xì-nsiá: iin-ni ni cùndùú-ndá nèhivì xí-yá, dandu quivì naxicocuñn-yà, mà yúhì-ndà, ni mà cùcáhán nùu-ndà cundehè-yándô.

²⁹ Ináhá-ndá, ndàcuisì ini-yà. Ñàyùcàndùá nú nihnú ndàcuisì stná ini ndohó, dandu vètùni cundaà ini-ndà ñà-sàni sàà-ndà cunduu ndisa-nda dèhe-ya nduá.

3

Dèhe ndisa Dios nduu-nda, cachí San Juan

¹ Hijos míos, na cuàhà guá cuú ini Yua-nda Dios sáhà-ndà, vèchi sàni nìhítáhvi-ndà cachí-yà xì-ndà ñà-ndùu-ndà dèhe ndisa-ya. Te divi xínduu-nda. Ñàyùcàndùá, nèhivì ñuhivì yohó, có-nàcúní-nè ndohó, vèchi ni mii-yá, cóni nàcúní-nèyà daa.

² (Cachí xì) mii-nsiá nècuàchì màni guá nù ñà-vichi sàndùu-ndà dèhe ndisa-ya. Te mate táñàha ga datúi-ya nùu-ndà índù forma nùu-xí sàà-ndà cunduu-nda, doco ináhá-ndá quivì naxicocuñn-yà, dandu nahi mii-yá nanduu-nda, vèchi mimí nacua iá-yà, ducán icúmí-ndá cuni-ndà nùu-yá.

³ Ñàyùcàndùá, nú ducán nihnú ini-ndà ñà-ìcúmí-ndá cuni-ndà nùu-yá, dandu cuàhàn-ndà nsidavì-ndà anima-ndà, ndoa nacua iá ndoo stná anima mii-yá.

⁴ Nú tùha nèhivì quida-ne cuàchi, dandu ñà-càhíchì stná ini-nè ley xi-ya queámà, vèchi nsidanicuú cuàchi, ñà-có-sàha ley xi-ya nduá.

⁵ Sà-ínáhá-nsiá ñà-dìsáhà-xí nì quixi-ya ñuhivì yohó; ináhá-nsiá nì quixi-ya ñà-dandutu-yá cuàchi-nda. Doco mii-yá, còò ni-iin cuàchi nì quidá-yá.

⁶ Nsidaa ndohó nècuàchì nduú ndisa nèhivì xí-yá, mà túha-nda quida ga-ndà cuàchi. Doco ana tùha quida ducán, tàcùní-nè mii-yá, ni tàcùní stná-nè nansa iá modo xi-ya.

⁷ Hijos míos, màsà cuàha-nsia dandahví ni-iin nèhivì mii-nsiá, vèchi (ináhá-ndá ñà-ndáa nduá yohó): nú quidávì-nda, dandu (vètùni cachí-ndà) ndàcuisì ini-ndà nahi mii-yá.

⁸ Nècuàchì tùha quida-xi cuàchi, iá-nè ladu xi ñà-malu, vèchi ñà-malu, dècuèndè yuté ñuhivì xì dècuèndè vichi, iin-ni quidá-si cuàchi. Te (ináhá-ndá) índù-ñá dìsáhà-xí nì quixi Dèhemani Dios ñuhivì yohó: divi sáhà-ñá dandutu-yá nsidaa ñà-ndùá quidá quisi mà.

⁹ Nsidaa ana nduú dèhe ndisa Dios, mà túha-ne quida-ne cuàchi, vàchi mii vida saín xi Dios ñuhú ini-nè, te mà sàa-nè quida-ne ducán, vàchi dèhe ndisa-ya nduú-né.

¹⁰ Mà úhì cundaà ini-ndà ana nduú dèhe-ya, te ana nduú dèhe ñà-malu. Iin nècuàchì có-quidá ví, ò iin nècuàchì có-cùú inì-xi sàhà ñanìtnaha-xi, có-nduú-né nèhivì xí Dios.

¹¹ Vàchi sàhana na ní xinitnùhu-nsia razón ndiaha sàhà-yá, te iin-ni dècuèndè vichi, ducán nì sàcùnaha-nsiá ñà-nì cùú stnahá ini-ndà sàhà-ndà.

¹² Màsà quidá-ndá na nì quida Caín (sàhana). Iá-te ladu xi ñà-malu, ñàyùcànduá nì sahnì-té ñanì-te. Te ¿ìndù chuun nì sahnì stnahá-te? Divi sàhà-ñá nì xini-te có-quidá ví mii-té, te ñanì-te, quidá ví-né.

¹³ Ñánì, màsà ndúlócô-ndà nú indéhe-nda có-xiñùhù nèhivì ñuhivì ndohó.

¹⁴ Divi sàhà-ñá cuú stnahá ini-ndà sàhà-ndà, ñàyùcànduá cundaà ini-ndà sàni yàha-nda ladu xi Dios ndé cutiacu anima-ndà nicanicuahàn; có-ìá gà-ndà ladu ndé xíhì anima-ndà.

Nú có-cùú ini iin nèhivì sàhà ñanìtnaha-ne, dandu náhà xicà tàñáha ga yàha-ne ladu ndé itiácu anima-ndà.

¹⁵ Vàchi nsidaa ana có-xiñùhù xì ñanìtnaha-xi, ndudává-né xì iin tè-sàhnì. Te ináhá-ndá, ni-iyuhu vida ndiaha có-ñùhù anima iin tè-quidá ducán.

¹⁶ Te vichi sàni sàa-ndà nì cundaà vaha ini-ndà nansa ndiá icà-ndà cuu stnahá ini-ndà sàhà-ndà, vàchi sàni xini-ndà ñà-nduá nì quida mii-yá, nì xihì-yà cuenta xi-nda. Ñàyùcànduá, ndiá icà stná-ndà cundoo-nda dispuestu cui-ndà sàhà ñanìtnaha-nda.

¹⁷ Vàchi nú indéhe iin nèhivì iá necesidad nùu iin ñanìtnaha-ne, te có-ìndéhe ndahví-nè nècuàchìmà, mate algu icúmí-nê, dandu ñà-jaàn cundaà ini-ndà có-cùú ini-nè sàhà Dios.

¹⁸ Hijos míos, màsà cáchì uun-nda ñà-cùú stnahá ini-ndà sàhà-ndà; màsà cáhàn uun-nda cachí-ndà ducán. Xiñuhu ñà-quida ndisa-nda cumplir, te quida stná-ndà obra nùu ñanìtnaha-nda.

¹⁹ Nú nì quida-nda ducán, dandu vètùni cundaà ndisa ini-ndà palabra ndàcuisì nduá sànhícùn-ndà, te mà yúhì gà-ndà sàhà anima-ndà nùu Dios.

²⁰ Vàchi nú dayúhì cuàchi-nda mii-nda, dandu (xiñuhu nsinuu ini-ndà), cahnú Dios xi-nda, te ináhá-yà nansa iá nsidaa iñàha.

²¹ Doco te nú còò ni-iñàha dayúhì xì anima-ndà, dandísá mà yúhì-ndàyá, (ñani) mànì,

²² vètùni càcàn tàhvì-ndà nùu-yá, te nihì-ndà ñà-nduá xicàn-ndà, vàchi chívàha-nda ñà-nduá cachí-yà, te quida-nda ñà-nduá cudí ini-yà sàhà-xí.

²³ Te ¿ndiá nduá nì dàndàcú-yà nùu-ndà? Divi ñà-cahvi-nda xi Dèhemanì-yá Jesucristu, te cuu stnahá stná ini-ndà sàhà-ndà nacua nì cachi-yà xì-ndà.

²⁴ Te nú chívàha-nda ñà-nduá cachí-yà, dandu ñá-sàni ndèe anima-ndà ini anima mii-yà nduá, te iá stná-yà ini anima ndohó. Te sàni sàhatahvì stná-yàndó Espíritu Ìì xí-yá, te ñàyùcànduá, vètùni cundaà ini-ndà iá ndisa Dios ini anima-ndà.

4

Nansa quidá Espíritu Ìì xí Dios, xì nansa quidá stná espíritu xi ana nduú contra xi Cristu

¹ Mii-nsiá nècuàchì mànì guá nùu, màsà cúníndísà ndevàha-nsia ñà-nduá cachí nèhivì nú cachí-nè Espíritu Ìì dacáhàn xì-né. Còó, vàchi xiñuhu-ñá quida-nsia prueba, a ndisa Dios dacáhàn xì-né, á coó. Vàchi cuàhà tètñùhù sàni quesaha xicánúú ñuhivì vichi, te cachí-te ñà-cuenta xi Dios cáhàn-te.

²⁻³ Doco nú ndisa Espíritu Ìì xí Dios dacáhàn xì iin nèhivì, dandu cuàhàn-nè candisá-né cachi-nè: “Ñà-ndàà nduá, nì sàcòo cuerpu Jesucristu, te nì tùinuù-yá ñuhivì yohó”. Ducán xiñuhu cachi-nè, dandu cundaà ini-ndà, divi Dios dacáhàn xì-né. Doco nú có-càchì-nè ducán, dandu cundaà ini-ndà màdì Dios dacáhàn xì-né; còó, iin espíritu iá ladu xi contra xi Cristu dacáhàn xì-né. Te sà-ìnhá-nsiá icúmí quixi ana nduú contra xi Cristu. Doco cunaha-nsiá, vichi sà-ìá espíritu xi tèmà ñuhivì yohó.

⁴ Hijos míos, nèhivì xí Dios xínduu-nda, te sàni cundee-nda nùu nèhivì (xínchicùn xì contra xi Cristu), vèchi chicá fuerte mii-yá iá nùu anima-nda, te chicá mà fuerte mii-sí xicánúú guá ñuhiví yohó.

⁵ Nèhivì (nchícùn contra xi-ya) mà, cuisì modo xi ñuhiví yohó nihnú ini-nè, te ñàyùcàndùá, modo xi ñuhiví yohó cáhàn-nè, te compañeru-nè, divi ducán nihnú stná ini-nè, te cudî ini-nè cunini-ne ñà-ndùá cachí guâ nècuàchìmà.

⁶ Doco ndohó, nèhivì (nihnú ini xì) Dios nduu-nda. Te nsidaa ana ináhá xí-yâ, cudî ini-nè cunini-ne palabra cáhàn-nda. Doco nècuàchì có-ndùú nèhivì xí-yá, có-cuní-nè cunini-ne. Ñàyùcàndùá, ducán nduú modo cundaà ini-nda a ndisa Espíritu ìi chindéé xí iin nèhivì, te ò iin espíritu malu dandahví xì-né.

Cuú ndisa ini Dios sàhà nsidaa nèhivì

⁷ Nicanicuahàn ni cúcúú stnahá ini-nda sàhà-nda, (ñani) màní, vèchi divi ñà-jaàn nduá cuní Dios quida-nda. Nsidaa ana cuú inì-xi sàhà ñanìtnaha-xi, dèhe ndisa Dios nduú-né, te ináhá stnahá-né xì-yá.

⁸ Doco nsidaa ana có-cúú inì-xi sàhà ñanìtnaha-xi, có-ináhá-né Dios, vèchi mii-yá, de por sí ducaní cuú ini-yà sàhà nèhivì.

⁹ Divi ñà-jaàn nduá òisáhà-xí nì techuún-yá mindaa Dèhemanì-yá nì quixi ñuhiví yohó sàhà-ñá nìhì-nda vida ndiaha nicanicuahàn. Sàhámà sàcùndàà vaha ini-nda ñà-cúú ndisa ini Dios sàhà-nda.

¹⁰ Vèchi màdì ñà-sàni cuu ini ndohó sàhà mii-yá nduá, cóo; divi ñà-cúú ini mii-yá sàhà ndohó nduá, te sàháyùcàndùá nì techuún-yá Dèhemanì-yá nì quixi-ya nì xìhì-yà sàhà-nda, dandu mà nsínúú gá ini-yà sàhà cuàchi-nda.

¹¹ Pues cunaha-nsiá, nú ducán tantu guá cuú ini Dios sàhà-nda, dandu ndiá ìcà stná-nda cucuu stná ini-nda sàhà ñanìtnaha-nda, ñani màní.

¹² Ni-iin nèhivì, tàñáha ga cuni-nè meru nùu Dios. Doco nú cuú stnahá ini-nda sàhà-nda, dandu vètùni cundaà ini-nda ñà-ini anima-nda iá-yà, te chindéé-yândô sàà-nda cuu stnahá ini-nda sàhà-nda nacua ndiá ìcà-nda.

¹³ Te sàni sàhatahvì stná-yándó Espíritu ìi xí-yá. Ñàyùcàndùá cundaà ini-nda ñà-sàni ndèe anima-nda ini anima mii-yá nduá, te mii-yá, iá stná-yà ini anima ndohó.

¹⁴ Te nsiùhù, sàni xininùù-nsí ñà-ndùá nì quida Yua-nda Dios nì techuún-yá Dèhemanì-yá nì quixi-ya ñà-dacácu-ya nèhivì ñuhiví. Ñà-jaàn nduá cachítnùhu-nsi xì nèhivì.

¹⁵ Vèchi nú sàni cachi vate-nda ñà-divi Dèhemanì Dios nduú Jesús, dandu iá Dios ini anima-nda, te sàni ndèe stná anima-nda ini anima mii-yá.

¹⁶ Sàni xini-nda ñà-cúú ndisa ini-yà sàhà-nda, te sàni xinindisá stná-nda ñà-jaàn. Vèchi mii-yá, de por sí ducani cuú ini-yà sàhà nèhivì. Ñàyùcàndùá, nú iin-ni cuú stnahá stná ini-nda sàhà-nda, dandu vètùni cundaà ini-nda ñà-sà-ìá anima-nda ini anima mii-yá, te mii-yá, iá stná-yà ini anima ndohó.

¹⁷ Ducán iá sàhà ñà-nì sàà-nda cuu ndisa ini-nda sàhà-yá, dandu na sàà quivì juiciu, vètùni cunihnu ini-nda, mà yúhì-nda, vèchi na ian nihnú ini mii-yá, ducán nihnú stná ini ndohó na ndoó gá-nda ñuhiví yohó.

¹⁸ Te nú cuú ndisa ini-nda sàhà-yá, dandu sadiámà nùu ñà-yúhì-nda. Doco nú yúhì-nda, dandu dandóhâmándó. Te cunaha-nsiá, nsidaa ana yúhì, cumáni vá sàà-nè cuu ini-nè sàhà-yá modo ndiá ìcà-né.

¹⁹ Ndohó, cuú ini-nda sàhà-yá, vèchi dihna mii-yá nì quesaha cuú ini-yà sàhà-nda.

²⁰ Doco vihini cachi iin nèhivì ñà-cúú ini-nè sàhà-yá, mate iá iin ñanìtnaha-ne có-xiñhù-né. Pues nú ducán, dandu (náhà claru) dandahví uun-ne. Vèchi nú có-cúú ini-nda sàhà iin nèhivì sàni xininùù-nda, dandu ¿nansa cui cuu ini-nda sàhà iin ana tàñáha ga cuninùù-nda nahi Dios?

²¹ Cunaha-nsiá, nsidaa ndohó nècuàchì cuú inì-xi sàhà-yá, sàni dándàcú stná-yà nùù-ndà ñà-nì cuú stná ini-ndà sàhà ñanìtnaha-nda.

5

Nansa cundee-nda nùù nèhivì malu ñuhivì yohó

¹ Nú sàni xinindisa-nda ñà-divi Cristu nì quixi ansivi nduú Jesús, dandísá, dèhe Yua-nda Dios xínduu-nda; te nú cuú ini-ndà sàhà mii-yá ana nduú Yua-nda, dandu cuàhàn-ndà cuu stná ini-ndà sàhà nsidaa dèhe-ya.

² Vàchi nú cuú ini-ndà sàhà-yà, te chívàha-nda ñà-nduá cachí-yà, dandu cundaà ini-ndà, cuú ndisa ini-ndà sàhà ñanìtnaha-nda xínduu stná dèhe-ya.

³ Vàchi ñà-chívàha-nda ñà-nduá nì cachi-yà, divi ñà-cuú ndisa ini-ndà sàhà-yá queé stná mà. Te ñà-nduá dándàcú-yá, mà cúñáñá-ndá chivàha-ndañá.

⁴ Vàchi cunaha-nsiá, nsidaa ana nduú dèhe ndisa-ya, nicanicuahàn icúmí-né cundee-né nùù nèhivì malu ñuhivì yohó. Vàchi divi sàhà-ñá xiníndísá-ndá mii-yá, ñà-jaàn nduá disàhà-xí níhì-ndà cundee-nda nuù nècuàchì mà.

⁵ Vàchi ¿ana gà cui cundee-xi nùù nsidaa nèhivì malu ñuhivì yohó? Cuisì nèhivì xiníndísá-xí Jesús ñà-nduú-yá Dèhemanì Dios cundee.

Ñà-nduá cachítnùhu xi-nda sàhà Dèhemanì Dios

⁶ Nì quixi Jesús ñuhivì yohó, te nì cuhii-yá xì tècuíí, te nì xitià stná nì-yá. Màdì cuísiá nì cùhii-yá xì tècuíí nduá; còó, divi sàhà-ñá nì cuítia stná nì-yá nduá nì quixi-ya. Te Espíritu Ìì xí-yá nduú ana datnúù xì anima-ndà sàhà nsidaájàn, vèchi micuísì ñà-ndàà nduá cachí Espíritu Ìì.

⁷ Cunaha-nsiá, nùù gloria na ian ndoó ùnì ana cachítnùhu xi-nda sàhà stná mà, divi Yua-nda Dios, xì (Dèhemanì-yá nani) Palabra Ìì, xì stná Espíritu Ìì xí-yá. Doco imindaa mii-yá nduú-yá.

⁸ Te ñuhivì yohó, ùnì stná modo iá cundaà ini-ndà sàhà Jesús, vèchi Espíritu Ìì xí-yá nduú iin ana cachítnùhu sàhà-yá; te iá stná tècuíí nì cuhii-yá, xì stná nì-yá nì xitià. Sàhà nsi-ùni modo jaàn cundàà ini-ndà sàhà-yá, doco iin-ni razón ndiaha nduú nsidaámà.

⁹ Cunaha-nsiá, nú nèhivì ùn cachítnùhu xi-nda iñàha, mà úhì xiníndísá-ndá palabra xi-ne. Te nú ducán, dandu chicá más ndiá icà-ndà cunindisa-nda razón ndiaha sàni cachítnùhu Dios sàhà Dèhemanì-yá, vèchi iá ñà-nduá sàni cachi-yà.

¹⁰ Te ndohó, ináhá-ndá palabra ndàcusì nduá, vèchi ñuhá anima-ndà, te ducán ñuhú stná anima nsidaa ana xiníndísá-xí Dèhemanì-yá. Doco nècuàchì có-xiníndísá, (ndahví-nè), vèchi ducán queá na ian ndaníhí tnúhú-né Dios, vèchi có-xiníndísá-né ñà-nduá sàni cachi-yà sàhà Dèhemanì-yá.

¹¹⁻¹² Te divi ñà-yohó nduá sàni cachi-yà: iá nansa nihítàhvì-ndà vida ndiaha nicanicuahàn quida-ya, te Dèhemanì-yá nduú ana sàhatahvì xì vida mà. Ana ináccáá Dèhemanì-yá anima-xi, sà-icúmí-né vida ndiaha ma, te ana còò-yá anima-xi, còò stná-mà nùù-né.

Nì càcàn tàhvì-ndà nùù Dios sàhà-ñá nihì-ndà gracia

¹³ Palabra yohó tiaí nùù mii-nsiá nècuàchì cahvi xi Dèhemanì-yá, te ndàcùcahan xi quivì-yá áma sàà-nsià cundaà vaha inì-nsia ñà-sàni nihì ndisa-nda vida ndiaha nicanicuahàn.

¹⁴ Te vichì có-yùhì-ndà càcàn tàhvì-ndà nùù-yá, vèchi nú iin chuun vaha nduá xicàn tàhvì-ndà, dandu iníní-yá, ináhá-ndá.

¹⁵ Te nú iníní-yá na xicàn tàhvì-ndà ducán, dandu ináhá-ndá sà-icúmí-ndá ñà-nduá nì xicàn-ndà, ndéni iñàha nì cui nì cúnduá.

¹⁶ Nú xiní-ndà iin nècuàchì iin-ni cahvi stná xì-yá ñà-nì quida-ne iin cuàchi có-nduú cuàchi cui-ndà sàhà-xí, dandu xiñuhu càcàn tàhvì-ndà nùù-yá sàhà-ñá nì níhì-né cutiacu

va-ne, nú ndisa có-nduá iin cuàchi cui-ndà sàhà-xí. Vàchi iá cuàchi cui-ndà sàhà-xí, te nú sàni quida iin nèhivì-ñá, dandu mà cácan tàhvì-ndà nùù-yá sàhà-né.

¹⁷ Nsidaa ñà-có-ndiáá, cuàchi nduá. Doco iá cuàchi mà cúí-ndà sàhà-xí.

¹⁸ Cunaha-nsiá, nú dèhe ndisa Dios nduu-nda, dandu có-quidá ndevàha ga-ndà cuàchi. Te ndiaá stná Dèhemani-yándô sàhá màsà tníí ñà-malu-ndó.

¹⁹ Divi Dios nduú Yuandiaha-nda, ináhá-ndá, doco nsidaa gá nèhivì ñuhiví, ndahà ñà-malu ndoó-né.

²⁰ Te ináhá-ndá nì quixi Dèhemani-yá, te nì sàà-ndà nì cundaà ini-ndà nì quida-ya, vátùni nì xini stnaha-nda xi mii-yá ana nduú Dios ndisa; te nì ndèe stná anima-ndà ini anima mii-yá, ñàyùcànduá, sà-ìá anima-ndà ini anima Dèhemani-yá Jesucristu. Te divi mii-yá nduú-yá Dios ndisa, te vida ndiaha nicanicuahàn sáhatahvì-yándô.

²¹ Hijos míos, cuidadu cundoo-nsia ñà-màsà cáhví-nsiâ nì-iñàha có-nduú ndisa Dios.

Tutu Ùì Nì Tiaa San Juan

¹ Yùhù nduí nècuàchì sahnú ináhá-ní, te tiaí tutu yohó nù mii-ní nècuàchì ñahà nì nacàxin Dios, xì nù stná dèhe-ní. Yùhù, cuú ndisa inì sàhà nsidaa-nsiá. Doco màdì cuisì yùhù, vàchi nsidaa gá ana cundáà inì-xi sàhà palabra ndàcuisì xí-yá, cuú stná ini-nè sàhà-nsiá.

² Vàchi iin-ni palabra ndàcuisì nchícùn-ndà, te nicanicuahàn icúmí coo palabra mà anima-ndà.

³ Pues vichi xícàn tàhvì nù Yua-nda Dios xì Dèhemanì-yá Stoho-ndà Jesucristu ñà-nì cuáha-ya mii-nsiá cuàhà gracia xi-ya. Ni cúndéhe ndahví stná-yà mii-nsiá, te contentu ni cúndóó-nsiá quida-ya. Te iin-ni, ni cúnchícùn vii-nsiá palabra ndàcuisì mà, te ni cúcúú stnahá stná ini-nsiá sàhà-nsiá.

⁴ Cuàhà gá nì cudii inì na ní xinitnùhì ñà-iin-ni quidá ví dèhe-ní nacua cachí palabra ndàcuisì nì cachí Yua-nda Dios quida-nda.

⁵ Te vichi sacúndáhvì nù mii-ní, señora, ñà-nì cùú inì-ní sàhà nsidaa ñanitnaha-ní. Vàchi màdì lácà vichi-ni nì sàcòo palabra cachí ducán, còó, dècuèndè tiempu nì quesaha xítia palabra xi-ya, ndè quivì yucán nì ndacu nuù-ndà cuu stnahá ini-ndà sàhà-ndà. Te vichi tiaí nù mii-nsiá ñà-iin-ni nì quidá stná-nsiá ducán.

⁶ Te ¿nansa divi iá ñà-cùú stnahá ini-ndà sàhà-ndà? Pues divi ñà-chivàha-nda ñà-nduá nì cachí-yà nduá. Te mii-yá, dècuèndè sànahà, ducán nì cachí-yà (xì-ndà) ñà-iin-ni nì cúnchícùn-ndà ichì ndé cuú stnahá ini-ndà sàhà-ndà.

Cuidadu ni cúndóó-ndá sàhà tètñùhù cuní datúcù xì-ndà inga ichì

⁷ Vàchi vichi sàni ndecoyo cuàhà tètñùhù; xicánúú-te ñuhiví, cachí-te ñà-cóni ía ndisa iquicúñú Jesucristu na ní quixi-ya ñuhiví, cachí-te. Cunaha-nsiá, divi-tè xínduu ndisa-tè tètñùhù, te xínduu stná-te contra xi Cristu queámà.

⁸ Ñàyùcànduá, cuidadu ni cúndóó-ndá sàhà-té, còtó ndañuhu chuun vaha sàni quida-nda; chicá vaha nì coó nsihi ñà-vaha icúmí-ndá nihì-ndà.

⁹ Vàchi nú nì túcù iin nèhivì inga ichì, te nacoo nihni-ne ichì Cristu, dandu ñà-jaàn cundàà ini-ndà, còò ndisa Dios nù anima-nè. Doco nèhivì iin-ni nchícùn ñà-nduá cachí Cristu, ía ndisa Yua-nda Dios ini anima-nè, te inácaa stná Dèhemanì-yá.

¹⁰⁻¹¹ Te nú nì sàà iin nèhivì vehe-nsiá (ñà-chinaha-nè mii-nsiá) iin dàñùhù có-nduú dàñùhù sàni cachimà, màsà dáyâha-nsianè vehe, nì màsà cásàhú gà-nsiá xì-né. Vàchi nú ducán nì quida-nda, dandu icúmí stná-ndà nacuida cuàchi-nda nahi mii-né.

¹² Cuàhà gá stná ñà-cùní guè cachì xì-nsiá, doco vichi tuxí inì chicá vaha màsà tiáá guè nù tutu yohó, vàchi nacání inì sàì nàcòtì mii-nsiá, dandu ndatnuhu váha-nda, te cudii gá ini-ndà.

¹³ Cunaha-ní, yohó ndoó stná dèhe cùhì-ní nì nacàxin stná Dios, te cásàhú stná-nè xì-ní. Sà-íá.

Tutu Ùnì Nì Tiaa San Juan

Nansa nì tiaa Juan nùù iin nècuàchì nani Gayo, te cachí-nè chuun vaha nduá quidá nècuàchìmà

¹⁻² Yùhù nduí nècuàchì sahnú ináhá-ní, te cásàhùì xì mii-ní Gayo. Cunaha-ní, màni cuáhà-ní nùù; cuú ndisa inì sàhà-ní. Te xícàn tàhvì stnái nùù Dios ñà-nì yáha vaha-ní nsidanicuú chuun, te màsà quícuéhè-ní; ni coó vaha-ní nacua iá viì stná anima-ní.

³ Yùhù nì cudíi cuáhà inì na ní caquesaa ñani-ndà, te nì nacani-ne xì sàhà-ní ñà-iin-nì xiníndísâ vii-ní palabra ndàcuisì xí Dios, cachí-nè, vachi iin-nì chívàha vii-ní ndudu ìì xí-yá.

⁴ Cunaha-ní, nahi dèhi xínduu-nsia, te yáha ga cudíi inì na xinítnùhi quidá víi-nsiá nacua cachí palabra ndàcuisì. Ndisa, divi ñà-jaàn nduú ñà-yáha ga cudíi inì sàhà-xí.

⁵ Ñani màní, sàni xinì ñà-tùha-ní quida vii-ní, vachi siempre chindéé-ní dava ga nèhivì xiníndísâ, te nú xínduu-ne nècuàchì vaxi inga ñuu, dandu chicá más cúnsìhi inì-ní chindee-ní nècuàchìmà.

⁶ Vachi sàni nacani-ne xì nsidaa nsiùhù na natácá-nsì cahvi-nsí Dios, cachí-nè xì-nsí nansa cuú cuáhà inì-ní sàhà-né. Ñàyùcàndùá, quida-ní seguir chindee-ní nècuàchì (sàa vehe-ní ducán), te màndaca ichi-nínè nacua cuní Dios quida-nda.

⁷ Vachi mii-né, sàhà-ñá cuú stná ini-nè sàhà-yá, ñàyùcàndùá nì caquihin-ne ichì ñà-cacanu-ne chuun ìì xí-yá. Ni có-xícàn stná-nè ni-iñàha nùù nèhivì có-xiníndísâ ñuu ndé yáha-ne.

⁸ Ñàyùcàndùá, ndohó, ndiá icà-ndà dayáha-nda nècuàchìmà vehe-nda, te ducán chindee stná-ndà (xì chuun quidá-né dacuítia-nè) palabra ndàcuisì xí Dios.

Nansa quidá Diótrefes, có-quidá víi-né, cachí Juan

⁹ Nì tiai iin carta nùù nèhivì xí Dios natácá (ndé iá-ní), doco Diótrefes, có-cuní-nè nacuni-nè nsiùhù, vachi mii-né cudíi ini-nè cunduu-ne ana dandacú.

¹⁰ Ñàyùcàndùá, na sái jaàn, icúmî càhìn xì-né, vachi có-quidá víi-né, cáhàn ùhì-nè dìquì-nsí. Te màdì cuisì ñà-jaàn; chicá mal quidá stná-nè. Vachi na xísàa ñani-ndà ñuù-nsia, dandu nacuaá-né nècuàchìmà. Te nú iá iin-nsia cuní dayáha xì nècuàchìmà vehe-xi, dandu sadí Diótrefes mà nùù-nsiá; còò gá permisú nataca gà-nsià xì nèhivì xí Dios, cachí-nè.

¹¹ Doco mii-ní ñani màní, màsà cúnchícùn-ní ichì malu; còó. Cuisì ñà-vaha ndisa ni cúnchícùn-ní. Vachi iin nèhivì quidá víi, nèhivì xí Dios nduú-né; doco iin nèhivì quidá quíni, ni có-sàha tnùnì ini-nè nansa ndisa iá-yà.

Nansa quidá nècuàchì nani Demetrio

¹² Daaní, jaàn iá stná Demetrio. Vaha ga quidá-né, cachí nsidaa nèhivì. Te náhà xicà palabra ndàcuisì nduá nchícùn-nè. Te stná nsiùhù, cachí stná-nsì vaha ndisa-ne, te ináhá-ní màdì tnúhu nduá cachí-nsì.

¹³ Cuáhà gá cuàhìn tiai nùù-ní ni cuí, doco vichi mà tiáá gué` nùù tutu yohó,

¹⁴ vachi nacání inì yàchì sàa mimíí nàcòtì mii-ní, dandu ndatnuhu-nda.

¹⁵ Ni cúcuéé ni-ní. Cásàhú nsidaa amigo xi-ní. Te mii-ní, casàhú stná-ní xì iin iin amigo xi-nda ndoó jaàn.

(Ducán nì nsihi carta ùnì nì tiaa San Juan.)

Tutu Nì Tiaa San Judas Tadeo nù Nsidaa Nèhivì xí Dios

¹ Yùhù nduí Judas, iin ana xinúcuáchí nù Stoho-ndà Jesucristu. Te nduú stnái ñani Jacobo. Te tiaí carta yohó nù mii-nsiá nècuàchì sàni nacàxin stná Yua-nda Dios. Màni gá stná-nsiá nù-yá, te divi Jesucristu nduú ana ndiaá xí stná-nsiá.

² Ni cúndéhe ndahví cuàhà-yá mii-nsiá, te ni cúcuê ni-nsia quida-ya. Te mii-nsiá, ni cuú stnahá stná inì-nsia sàhà-nsiá.

Cuidadu ni cúndóo-ndá ñà-màsà dándáhvì tètñhù ndohó

³ Ñani màni, cuàhà gá nì nacani inì tiaí iin tutu càhìn xì-nsiá sàhà salvación xi-nda ni cuí. Doco después nì cundaà inì chicá vaha tiaí, te cuacundahví nù-nsiá ñà-nì cuáhandee ini-nsiá (ñà-màsà dándáhvì nèhivì mii-nsiá) sàhà ñà-nduá xiníndísá-ndá. Nèhivì ì xí Dios xínduu-nda, te ndahà ndohó nì naco-ya palabra ì xiníndísá-ndá.

⁴ Doco cunaha-nsiá, xicánúú dava nèhivì quidá maña, te sàni quìhvi stnahá stná-nè xì-ndà. Malu sàstñhù-né, doco dècuèndè sàhana sàni tiaa nèhivì xí Dios sàhà nècuàchì mà ñà-ìcúmí-nè nihì-né castigu xi-ne, vachi tucu nihnú ini-nè sàhà gracia xí Yua-nda Dios. Tuxí ini-ne vátùni quida quini ndevàha-nda, vachi cuicahnú ini-yá sàhà-ndà, cachí-nè. Te ducán queámà na ian có-nàcúní-nè Stoho-ndà Jesucristu, divi mii-yá ana nduú mindaa Stoho-ndà Dios.

⁵ Ñàyùcànduá, cuní dansínúú inì mii-nsiá nansa nì cuu xi nèhivì raza Israel sàhana. Mate sàni caquee-ne libre nù ñuu Egipto nì quida Stoho-ndà Señor, doco después nì dándáñhù-yá cuàhà-né sàhà-ñá cóni xiníndísá-néyà. Sà-ínahá-nsiá ñà-jaàn, doco cuní dansínúú inì mii-nsiá.

⁶ Daaní, stná àngel (sàhana), cóni ndóo-ne lugar ndé dandacú-né; nì naco-ya lugar ndé ndiá ìcà-né cundoo-nemà. Ñàyùcànduá, nì sàcùndiadi vaha-ne, nì sàcùnuhni-nè cadena, te yucán cundoo-ne nicanicuahàn ndé iín tnúú dècuèndè cachi sà quivì cahnú xí Dios, dandu ndundaà sàhà cuàchi-ne.

⁷ Daaní, ducán nì quida stná nèhivì nì sandoo ñuu Sodoma xì ñuu Gomorra, xì ñuu yatni ga yucán, vachi nansa-nì nì cui nisa nacuìdiqui uun tiàa ñuu mà nècuàchì ñahà, te ducán nisa quida stná-te xi tiàa. Ñàyùcànduá, nì nihì-né iin castigu ñà-ndoho-ne mahi ñuhu xixìn nicanicuahàn, sàhà-ñá ducán cundaà ini nsidaa nèhivì ñà-mà váha quida-nda ducán.

⁸ Mate ñà-ndáà nduú nsidaa ñà-jaàn, doco tè-xídandahví mà, iin-ni có-quidáñhù-tè cuerpu xi-tè, có-ndulócô-te sàhà ñà-nduá cachí Stoho-ndà Señor; te tùha stná-te càhàn quini-tè sàhà ana fuerte ndoó ansivi. Ducán xiquida-tè, vachi ducán nì sàní-te, (cachí-te).

⁹ Doco cunaha-nsiá, dècuèndè àngel chicá dandacú nani Miguel, ni mii-né, cóni cànàhá-nè xì ñà-malu quivì nì nàá tnahá-né xì-sí na nì cunì-si nihì-sí iquìcúñú nsì-Moisés (sàhana). Vachi Miguel mà, cuisì ní cachi-nè xì-sí: “Dios ni cadí xì núu-ní”.

¹⁰ Doco tè-xídandahví mà, mate có-sàa-te cundaà inì-te sàhà iin chuun, doco mà úhì càhàn quini-tè sàhà-ñá, vachi cutu nihnú inì-te na iin quisi, mà cùì cundaà vaha inì-te, doco ñà-nduá de por sí nihnú inì-te, divi ñà-jaàn icúmí dándáñhù xí-tè.

¹¹ ¡Ndahví nsidaa-té! Vachi ichì tè-nì sanani Caín nduú ichì xínchicùn-te. Sàni tucù stná-te na ian nì tucù Balaam (sàhana); vachi Balaam mà, puru sàhà dihùn nisa quidachuún-te chuun ì xí-te. Daaní, ndudává stná tètñhù ndoó vichi xì (tiàa sàhana nì sanani) Coré. Cuàhà gá nì càhàn quini stná tèmà dìquì ana dandacú. Ñàyùcànduá, nì ndañuhu stná-te.

¹² Tètñhù ndoó vichi, cudî inì-te cutnahá-te xi-nsiá na natácá-nsiá ndoó màni-nsiá xixí-nsiá. Doco ndóo cahan-nda quidá-te, vachi có-chívàha-tè tññuhu nù ni-ñàha. Cuisì sàhà mii-té ndulócô-te. Nahì vicò tàchí, ducán xínduu-tè (ñà-còò chuun vaha

quidá-te). Ñàyùcànduá, ducán xínduu stná-te nahi yutnú có-càná ñà-vídi-xi tiempu xan, te ò nahi yutnú nì tnuhu-nda, (te nì ìchì) yohò-nú, ducan xínduu stná-te, ñàyùcànduá, ùi modo còo chuun vaha quidá-te.

¹³ Cunaha-nsiá, nahi mar ndé nacuahnú yucù tècuí, te vaxi chihìñù nùu-té, ducán xínduu stná tè-tnùhù mà ñà-quini guá xíquida-tè. Nahi stná sìtnùu xicá nihni ansivi, ducán quidá stná-te, (vachi sàni tùcù-te inga ichì), ñàyùcànduá lugar xi-tè cunduu iin xaan ndé iin tnùu nduchi nicanicuahàn.

¹⁴ Daaní, nì ìa stná Enoc sàna. Descendencia ùsà xi Adán nì sanduu nècuàchì yucán. Te nìsa cahàn stná-nè cuenta xi Dios, nì cachitnùhu-ne sàhà tètñùhù xicánúú vichi. Te dohó nì cachi-nè: “Cunaha-nsiá, icúmí Stoho-ndà Señor quixi-ya ñuhivì, cutnahá stná-yà xì cuàhà sàstnùhù ángel ìi xí-yá,

¹⁵ dandu ndàcàn-yà cuenta sàhà cuàchi nì quida nèhivì, vachi icúmí-yá dacúndâà ini-yà nècuàchì malu mà ñà-có-íá vaha ñà-nì quida quini-ne ducán, te nì có-íá vaha stná ñà-nì nandòdó-né ichì-yá, te nì càhàn ndevàha-ne dìquì-yá, vachi cuàchi cahnú nduámà”. (Ducán nì cachi Enoc sàhà tètñùhù ndoó vichi.)

¹⁶ Te cunaha-nsiá, có-ndòo stná inì-te sàhà ni-ñàha. Puru cudúchì inì-te sàhà nsidaá, te cuisì nandúcú-tè ñà-nduá xího mii-té quida-tè. Có-yùhì yuhù-té càhàn-te na ian mii-té nduú-te mii-té. Vihini coo nansa càhàn tnùñuhu-té xi nèhivì, doco cuisì sàhà interés xi mii-té nduájàn.

¹⁷ Doco mii-nsiá nècuàchì mánì guá nùí, xiñuhu nsinuu inì-nsia nansa nì cachi apóstol nì nihì chuun nùu Stoho-ndà Jesucristu,

¹⁸ vachi nì cachitnùhu nècuàchì mà ñà-seguru icúmí cundoo cuàhà tè-sácùndiaa, xì cuàhà stná tètùha quini.

¹⁹ (Te ñà-ndàà nduá), sàndòo-te vichi; divi xínduu tiàa siempre sahdé dava xi nèhivì. Cuisì quidá-te ñà-nduá xího mii-té quida-tè, vachi còo Espíritu ìi xí Dios ini anima-te.

Nansa ndiá ìcà-ndà quida-nda

²⁰ Doco mii-nsiá nècuàchì cùu guá inì sàhà-xí, chicá xiñuhu cunindisá vii-nsiá palabra ìi, vachi ducán nacuahandee ini-ndà. Te na xicàn tàhvì-ndà nùu Dios, ni cuàha-nda chindee stná Espíritu ìi xí-yá ndohó.

²¹ Ni-iyuhu màsà tùcù-ndà inga ichì còtó nandòdó-nda ñà-cuàhà guá cuú ini-yà sàhà-ndà. Te cuéyàani cundiatu-nda ndè cachi sàà quivì cundehè ndàhvì-yàndó, te nihì-ndà vida ndiaha nicanicuahàn.

²² Dava nèhivì, iá-nè xì cuàhà duda; ñàyùcànduá, càhàn vii-nsiá xì-né dècuèndè ni sàà-nè cundaà vaha ini-nè.

²³ Xiñuhu chindee-nda nècuàchì mà, vachi ducán queámà na ian meru cuàhàn-nè quìñuhu-nè, te nì dìtá-ndané, te nì càcu-ne. Te nsidaa stná nèhivì (sàni tùcù dahuun), cundehè ndàhvì stná-ndané, doco cuidadu ni cùndóo-ndá ñà-màsà cúmànchâ stná anima-ndà, vachi dava-ne, quini iá stná modo xi-ne.

Nansa nì dàxínu San Judas carta yohó, cuàhà gá naquímànì-né Dios

²⁴⁻²⁵ Cunaha-nsiá, mindaa mii-yá nduú Dios; cuisì mii-yá nduú ana nchìchì ndisa, te cuisì mii-yá nduú ana dacácu xi-nda; vātùni cundiaa-yàndó ñà-màsà tùcù-ndà inga ichì có-ndiàá; vātùni cundiaa-yàndó te ducán nihì-ndà sàà-ndà nùu-yá, ni-iin cuàchi-nda mà túi, dandu cundehè-ndà ñà-ndiaha guá-yà, te cudìi cuàhà stná ini-ndà. Pues vichi ndácùcàhín Stoho-ndà Jesucristu, te ducán naquímànì cuáhì mii-yá. Te xicàn tàhvì ni queé cuàhà tnùñuhu ndiaha xí-yá, te ni sàà-yà cusahnú fuerte-yà inicutu, te ni cùndàà stná ini nèhivì ñà-ndahà mii-yá iá nsidanicuú ñàha ndè sàna xì dècuèndè vichi, xì nicanicuahàn. Amén.

Ndudu Ì Nì Dàcùní Dios San Juan

Ñà-nduá cachitnùhu nùù tutu yohó

¹ Tutu yohó nduú tutu ndé cachitnùhu Jesucristu ñà-nduá sà-ítúú vaxi cuu. Nùù Yua-nda Dios nì nihì Jesucristu palabra yohó ñà-dacúndéhe-yá nsidaa nèhivì xinúcuáchí nùù-yá. Iin ángel mozo xi-ya nduú ana nì cachitnùhu xi palabra yohó, te nì inini yùhù. Juan naní, te nduú stnái iin nèhivì xí mii-yá.

² Nùù tutu yohó cáhàn Yua-nda Dios; te itándiaa stná palabra xi Jesucristu, xì stná nsidaa ñà-nduá nì xini yùhù. Yùhù testigu nduí, te nsidaa palabra itándiaa yohó, ñà-ndáà nduá.

³ Ndiaha gá coo xi ana cahvi xi tutu yohó, xì stná nèhivì iníni xân, nú ni chívàha-ne ñà-nduá cachá'; vachi palabra nì quixi nùù Dios nduá, te sà-ítúú cuu ndisa ñà-nduá (cachitnùha).

Nansa nì casàhú Juan xì nèhivì xí Dios, ndoó nùù ùsà ñuu

⁴⁻⁵ Yùhù Juan, cásàhúì xì nsidaa mii-nsiá nèhivì natácá càhvi xì-yá xíndoo ùsà ñuu ladu Asia. Ni cuní màni-yá mii-nsiá, te ni ndóo vaha inì-nsia quida-ya. Ducán cuní-yà cuu xi-nsiá, divi mii-yá ana itiácú nicanicuahàn. Dècuèndè nicanicuahàn iá-yà, te ndè nicanicuahàn quivì nùù-xí icúmí-yâ coo-ya. Te ducán cuní stná ùsà espíritu ndiaha itá ladu nùù silla ndiaha xí-yá. Te ducán cuní stná Jesucristu, divi ana nì cachitnùhu xi-nda puru palabra ndàcuisì. Làcà mindaa mii-yá nduú ana nì natiacu primeru, làcà mindaa-yá cusáhnù nùù nsidanicuú ana dandacú ñuhivì yohó. Ansivéhé-yâ, cuú ini-yà sàhà-ndà, te sàhà nì-yá (nì xitià), ñàyùcànduá nì ndoo cuàchi-nda nì quida-ya.

⁶ Sàhà mii-yá sàni nìhítàhvi stná-ndà chuun ñà-dandacu-nda, xì stná chuun nahi chuun xi dùtù ñà-cunucuachi-nda nùù mii-yá ana cahvi-yá, divi Yuandiáhá-yâ. Pues vichi nùù mii-yá ni coó tñùñuhu xí nsidanicuú nèhivì, te nicanicuahàn ni cúsáhnù-yá nùù-ndà, amén.

⁷ Cunaha-nsiá, icúmí-yâ naxicocuiñ-yà. Mahì vico icúmí-yâ nuu-ya tui-ya nùù nsidan-icuú nèhivì. Te icúmí cundehè stná nèhivì (nì xicàn) ni quíhvi lanza icà-yá. Dandu yáha ga tnana fuerte nsidaa nèhivì nsidanicuú ñuu iá ñuhivì na cuni-nèyà. Ducán icúmí coo, cachí.

⁸ Cachí mii-yá: “Nicanicuahàn ié’. Sàhà yùhù nì sàcòo nsidaa iñàha, te còo ni-iñàha chicá cunaha nùì. Ñàyùcànduá, ducán nduí nahi letra nuu nani A, te ducán nduú stnái nahi letra dansihí nani Z”.

Ducán cachí mii-yá ana nduú Dios vivu, vachi dècuèndè sàhana iá-yà, te nicanicuahàn coo stná-yà quivì vaxi xi-nda, te nsidanicuú iñàha, vètùnì quida-ya.

Nansa nì nìhítàhvi Juan nì dàcùní Dios-nè Jesucristu, te ndiaha gá-yà

⁹ Yùhù Juan, iin-ni nduú stnái dèhe Dios nahi mii-nsiá, iin-ni ndohó stnái sàhà-yá, te iin-ni ndiatú stnái sàà quivì cusahnú Jesucristu, te quidándéé inì dècuèndè sàà quivì mà. Cunaha-nsiá, yucán nìsa ìe ñuu nani ñuu Patmos, iin ñuu indúhu mahì mar. Divi sàhà-ñá nchícuiñ Palabra xi mii-yá, ñàyùcànduá nì sàì yucán (nì quida tè-xídandacú), vachi vate nì cachì ié' ladu xi Jesucristu, ñàyùcànduá nì sàì yucán.

¹⁰ Te nì cuu iin quivì (domingu), divi quivì xí mii-yá, te ié' ndahà Espíritu Ì xí Dios, na ian sánî, dandu nì tiacu cáhàn-yà yàtí, fuerte iá tàchì-yá, na ian sivi corneta.

¹¹ Te dohó nì cachi-yà:

—Nicanicuahàn ié'; sàhà yùhù nì sàcòo nsidaa iñàha, te còo ni-iñàha chicá cunaha nùì, vachi nahi letra A nduí, xì nahi letra Z. Vichi icúmí-yô tiau nùù tutu nsidaa ñà-nduá nì xinù, te dasàà-ñà nùù nèhivì-xí ndoó ùsà ñuu ladu Asia. Dohó nani ùsà ñuu yucán: ñuu

Éfeso, xì ñuu Esmirna, xì ñuu Pérgamo, xì ñuu Tiatira, xì ñuu Sardis, xì ñuu Filadelfia, xì ñuu Laodicea, ducán nani ñuu yucán —nì cachi-yà.

¹² Daaní, nì nacuicoé yàtí ñà-cundehí ana cáhàn, te primeru nì xinì yucán itá ùsà candelero. Oro nì cuyucàn, te itá iin iin isì xìxìn.

¹³ Daaní, mahì ùsà isì mà nì xinì jaàn iín mii-yá, na indéhe nèhivì indéhe-yá, ndixí-yá iin dùhnù quihín sàà ndè dìquì sàhà-yá. Te nchìca-ya nuhní iin siuhma nì cuyucun oro.

¹⁴ Cuxín yaa ididíni-yá nahi idì nì ndoo, ò nahi yùhà. Te nduchinúu-yá, tnùà nahi ñuhu.

¹⁵ Daaní, sàhà-yá, yéhè nina-ña na iin càa yahá nì dàà titi ini xìtnù. Te fuerte cáhàn stná-yà na ian cahá tèñuhu cuàhà.

¹⁶ Te ndahà cuàhà-yà iníndáhà-yâ ùsà sìtnúu, te iníyúhú-yâ na iin espada dìnn ndúu ladu-xi. Daaní, nùu-yá, nchiá na ian nchií fuerte orá.

¹⁷ Ducán nì xinì mii-yá, dandu nì nduè sàhà-yá na ian sàni xìhì. Doco ndahà cuàhà-yà nì tnii-ya ìqué, te nì cachi-yà:

—Còó, màsà yùhù. Cunahu, sàhà yùhù nì sàcòo nsidaa iñàha, te còò ni-iñàha chicá cunaha nùí.

¹⁸ Te vichi itiacuì. Ñà-ndáa nduá nì xìhì, doco sàni natiacuì, te nicanicuahàn icúmí cutiacuì. Yùhù nduú ana dandacú sàhà nsii, nansa cuu xi-né, te dandacú stnáì sàhà andea (ana cùhùn yucán).

¹⁹ Vichi tiaa-yó nsidaa ñà-nduá nì xinù yohó, te tiaa stná nansa iá tiempu vichi, xì nansa icúmí cuu stná quivì nùu-xì.

²⁰ Cunahu, cuàhìn cachì xùn ndiá nduá cuní cachi ùsà sìtnúu iníndáhà ndahà cuàhì nì xinù. Te cuàhìn cachì xùn ndiá nduá cuní cachi ùsà candelero oro yohó. Pues, ùsà sìtnúu yohó, xíndua ùsà nècuàchì cachítnùhu palabra-xi. Te ùsà candelero oro yohó, xíndua ùsà grupu nèhivì natáca iníni xí palabra xi mà ndè ùsà ñuu yucán.

2

Razón nì dàsàà Jesús nùu nèhivì xí-yá ñuu Éfeso

¹ Vichi, tiaa-yó iin tutu cùhùn nùu nècuàchì cachítnùhu palabra xi ñuu Éfeso, dandu cahvi-neà cunini nsidaa nèhivì-xí ndoo ñuu yucán. Dohó tiaa: Yùhù nduú mii-yá iníndáhà ùsà sìtnúu ndahà cuàhì, te xicánúí mahì ùsà candelero oro, te dohó cachí xì-ní:

² ináhì nansa quida-ní vida xi-ní. Ináhì nansa nì sàhandee inì-ní quida-ní (chuun xi), te nì quidandee inì-ní. Te nèhivì malu, có-cùdìi inì-ní modo xi-ne. Te dava nèhivì, nì cachi-nè xínduu stna-ne ana nì nihì chuun nùí, doco còó, mà ndisá. Dandu mii-ní, nì nanducu váha-ní sàhà ñà-nduá nì cachi-nè, te nì cundaà inì-ní, tnuhu-né.

³ Cuàhà gá sàni quidandee inì-ní, mate cuàhà vida nì yàha-ní sàhà yùhù, doco iin-ni sàni quida-ní chuun xi, cóni nácóó-nià.

⁴ Doco cunaha-ní, có-cùdìi inì sàhà iyuhu ñà-nduá quida-ní, vachi có-cùú gá inì-ní sàhì nacua nisa cuu inì-ní sàhì dihna.

⁵ Nàyucànduá, nsinuu inì-ní nansa nisa ìa-ní nà táñàha ga quida-ní falta, te naxicocuìn inì-ní sàhà falta mà, te quida tu-ní nacua nì saquida-ní antes. Vachi nú coó, sàì ndé iá-ní, te dacúxióe candelero xi-ní, nú màsà naxícocuìn inì-ní.

⁶ Doco iá iin ñà-vàha quida-ní, vachi có-xiñùhù-ní modo xíquida tè-nicolaíta. Yùhù, ni-iyuhu có-xiñùhì ñà-nduá quidá témà.

⁷ Nsidaa mii-nsiá nècuàchì natáca càhvì xì Dios, ni cúnini vaha-nsia ñà-nduá cachí Espíritu ìi xí-yá, vachi dohó cachí-yá: Nú ni cundéé-nsiá nùu nsidaa ana cuní datúcù xì-nsiá, dandu nùu yùhù nihítàhvì-nsiá caxì-nsiá quisi vídì caná nùu yutnù ndiaha iin ndé iá ñuu ndiaha Dios, vachi fruta mà cutiacù-nsia nicanicuahàn.

Razón nì dàsàà Jesús nùu nèhivì xí-yá ñuu Esmirna

8 'Daaní, nùù nècuàchì cachítñuhu palabra-xi ñuu Esmirna, dohó tiaa-yó, dandu cahvi-neà cunini nsidaa nèhivì-xí ndoó ñuu yucán: Cunaha-ní, sàhà yùhù nì sàcò nsidaa iñàha, te còò ni-iñàha chicá cunaha nùí. Ndisa, nì xihì, doco sàni natiacuí.

9 Yùhù ináhí ñà-nduá quida-ní, ináhí nansa yáha-ní cuàhà tnùndoho quidá nèhivì. Ináhí ndahví dahuun yáha-ní. Doco cunaha-ní, nùù yùhù cuica-ní. Te ináhá stnài nansa quidá dava nèhivì, quini ndatnúhú-nê sàhà-ní, nècuàchì raza Judea xínduu-ne, cachí-nè, doco còó, mà ndisá. Nèhivì natácá cuenta xi ñà-malu xínduu-ne.

10 Vichi icúmí-ní ndoho gà-ní quida nèhivì, doco màsà yúhí-ní ñà-nduá icúmí-ní yàha-ní. Dècuèndè cundiadi stná dava-nsia quida ñà-malu. Doco cunaha-nsiá, sàhámà vátùni cundaà inì-xi, a xiníndísá ndisa-nsia. Ûxin quivì coo tnùndoho ma. Doco mii-ní, iin-ni cunindisá vii-ní, mate ni cuí-ní quida-ne, dandu nìhítàhvì-ní iin ñà-vàha nùí, divi ñà-cutiacù-ní vida (ndiaha nicanicuahàn).

11 'Nsidaa mii-nsiá nècuàchì natácá càhvì xì Dios, ni cúníní vaha-nsia ñà-nduá cachí Espíritu Ìì xí-yá, vachi dohó cachí-yà: Nú ni cúndéé-nsiá nùù ana cuní datúcù xì-nsiá, dandu mà sáà-nsia cuì-nsia ùì xichì (nahi nècuàchì dava ga).

Razón ni dàsàà Jesús nùù nèhivì xí-yá ñuu Pérgamo

12 'Daaní, nùù nècuàchì cachítñuhu palabra-xi ñuu Pérgamo dohó tiaa-yó, dandu cahvi-neà cunini nsidaa nèhivì-xí ndoó ñuu yucán: Yùhù nduí ana nihi-xi espada diin ndúì ladu xi.

13 Yùhù ináhí ñà-nduá quida-ní; ináhí nansa iá ñuu ndé iá-ní, vachi mero ñuu ndé dandacu-guá ñà-malu nduá yucán. Doco ináhí mii-ní ñà-iin-ni nchícùn-ní yùhù, te ndácùcahan-ní quivì, cóni nácuáa-ní yùhù, iin-ni xiníndísá-ní, mate yucán nì sahnì-té iin ana nì cachí vate iá-nè ladu xi, cóni chidèhé-nè. Divi nduú Antipas, te yucán nì xihì-nè ñuu ndé iá fuerte guá ñà-malu.

14 Doco, cunaha-ní, có-cùdî inì sàhà iyuhu ñà-nduá quida-ní. Vachi jaàn ndé iá-ní ndoó stná dava nècuàchì nchícùn ley xi Balaam. Divi Balaam mà nduú nècuàchì nì càhàn xì tè-Balac sàhana, nì cachí-nè xì tèmà nansa chiyuhù-té nècuàchì Israel ñà-quida-ne ñà-có-ndiá icà-né, nì chiyuhù-téné caxi-né promesa nì sàcò nùù figura cahvi nèhivì, te nì chiyuhù stná-tené ñà-càhàn-nè xì nèhivì cóni nandàhà xì-né.

15 Daaní, jaàn ndé iá-ní ndoó stná dava nèhivì nchícùn ley xi tè-nicolaíta. Cunaha-ní, ni-iyuhu có-xiñùhí ley mà.

16 Ñàyùcànduá, naxicocuñ inì-ní. Te nú coó, yàchì sàì ndé iá-ní, te cuàhi mii-né castigu xi-ne. Sàhà espada iá yuhí, ñà-jaàn nìhì-né castigu.

17 'Nsidaa mii-nsiá nècuàchì natácá càhvì xì Dios, ni cúníní vaha-nsia ñà-nduá cachí Espíritu Ìì xí-yá, vachi dohó cachí-yà: Nú ni cúndéé-nsiá nùù nsidaa ana cuní datúcù xì-nsiá, dandu nìhítàhvì-nsiá cuxi-nsia comida ndiaha iá dèhé (nùù Dios), divi nduú maná ndiaha. Te dacútàhvì stnài iin iin-nsia iin iin yùù siòcò ndé itúú quivì saa iin iin-nsia. Còò inga ana cunaha xi quivì yucan, cuisì ana cutahví xì yùù mà.

Razón ni dàsàà Jesús nùù nèhivì xí-yá ñuu Tiatira

18 'Daaní, nùù nècuàchì cachítñuhu palabra-xi ñuu Tiatira dohó tiaa-yó, dandu cahvi-neà cunini nsidaa nèhivì-xí ndoó ñuu yucán: Yùhù nduí Dèhemanì Dios, te nduchínúí, nchiá na ian tnúù ñuhu, te sàhí, yéhè-ñà nahi càa yahá. Te dohó cachí xì-ní,

19 ináhí nansa quida-ní, te ináhí cuú inì-ní sàhà ñànitnaha-ní. Daaní ináha stnài nihnú inì-ní yùhù, te ináha stnài nansa chindéé stnahá-nsiá xì nansa quidá ndee inì-nsia (nú iá tnùndoho), te ináhá stnài iá cuàhà obra xi-ní, te vichi más iá obra xi-ní nùù antes.

20 Doco cunaha-ní, iá iyuhu ñà-disàhà-xí có-cùdî inì quida-ní, vachi sàha-ní permisú chináhá nècuàchì ñàhà nani Jezabel. Dios dacàhàn xì-né, cachí-nè, (doco còó). Dacuahá-né nèhivì-xí, te datúcù-nè nècuàchì mà, vachi cachí-nè iá permisú càhàn nèhivì xì

ana cóni nándàhà xì-né, te vátùni caxì stná-nè promesa nì sàcòo nùù figura cahvi nèhivì. (Ducán cachí ñahà mà.)

²¹ Pues, yùhù, nì sandiatui, áma naxicocuïñ ini-nè sàhà cuàchi quidá-né xì nècuàchì tiàa, doco còó, cóni nàxícócuïñ ini-nè.

²² Ñàyùcànduá, icúmí-nê quicuehè-nè guide, te cunduhù-né. Stná tiàa ni caquida xì cuàchi ma, icúmí stná-nè ndoho cuahà-né nú màsà cúú-né arrepentir sàhámà.

²³ Stná dèhe nècuàchì ñahà mà, icúmí stná-nè quicuehè-nè, te cui-nè. Dandu nsidaa nèhivì-xì ndoó nsidaa ñuu, sàhámà cundaà ini-nè ñà-yùhù ináhì nansa nihnú ini nsidaa nèhivì ini saxínítnùnì-nè, te segùn nansa quidá iin iin-ne, ducán icúmí-nè nihì stná-nè nùí.

²⁴ Doco vichi cuàhìn cachì inga iñàha xì nsidaa mii-nsiá jaàn có-nchícùn xì ley (chicuéhè) mà, vàchi có-dàcuahá-nsiá palabra sìquini sàhà ñà-malu, palabra cachí-nè palabra dèhé. Cunaha-nsiá, mà cáchí guè xì-nsiá ni inga iñàha chivàha-nsia,

²⁵ cuisì ñà-nduá sàni nihì-nsiá chivàha-nsia ndè vichi, divi ñà-jaàn quida ndisa-nsia seguir dècuèndè quivì nasai ndé ndoó-nsiá.

²⁶ 'Iin nèhivì, nú ni cúndéé-nè nùù nsidaa ana cuní datúcù xì-né, te iin-ni quida ndisa-ne ñà-nduá cachí dècuèndè quivì último, ndiaha gá coo xi-né. Vàchi icúmí-nè nihítáhvi-né dandacú stná-nè nùù cuàhà ñuu ñuhivì.

²⁷ Nahi yùhù, nùù Yuamánì nì nihítáhvi' cusahnú nùù ñuhivì, ducán icúmí stná mii-né cusahnú stná-nè, cunindaha-né iin vara càa cunduu seña, te nèhivì (có-ínínì, ndahví-ne), vàchi yáha ga fuerte icúmí-nè nàni fuerte-nè na ian cháh mà iin quidi còò chuun-xi.

²⁸ (Doco nèhivì nchícùn viì xì'), icúmí-nè nihítáhvi stná-nè cucumi-né sìtnúù cahnú xínu dàtnàà.

²⁹ Nsidaa mii-nsiá nècuàchì natácá càhvi xì Dios, ni cúnínì vaha-nsia ñà-nduá cachí Espíritu Ìì xí-yá.

3

Razón nì dàsáà Jesús nùù nèhivì xí-yá ñuu Sardis

¹ 'Daaní, nùù nècuàchì cachítnùhu palabra-xi ñuu Sardis, dohó tiaa-yó, dandu cahvi-neà cunini nsidaa nèhivì-xì ndoó ñuu yucán: Yùhù nduí ana icúmí xì usà espíritu ndiaha xì Dios, te iníndáhá stnáì usà sìtnúù. Te dohó cachí xì-ní, ináhì nansa quida-ní. Mate iá fama-ní quidá viì-ní, doco nùù Dios ndahví iá anima-ní na ian sàni xìhì-ní.

² Ñàyùcànduá, cuidadu coo-ní, te cundiaà-ní anima-ní ñà-màsà ndañúhú ni-iin ñà-vàha ñuhú anima-ní, vàchi iyuhá iá, te vihi-ni ndañuhá. Cunaha-ní, mà víi sàni quida-ní nùí, sàni xinì.

³ Sàhà ñà-jaàn, nsinuu inì-ní nansa iá palabra ndiaha nì cachì xì-ní antes, te nì inini-ní. Pues divi ñà-jaàn nduá cuní chivàha-ní vichí, te naxicocuïñ inì-ní sàhà cuàchi-ní. Vàchi nú màsà nácúníhnú viì inì-ní, te coo tùha-ní, dandu yàchì màsàì ndé iá-ní. Nanàá sàni yucán, te ni mà cúndàà inì-ní índù hora sàì.

⁴ Doco ndoó itnii nèhivì (vaha) jaàn ndé iá-ní ñuù-ní Sardis, te mii-né, cóni chúchícuéhé anima-nè. Ñàyùcànduá, icúmí-nè cutnahá-né xì na cacanui, te iin-ni cundixi stná-nè sìcoto cuxín na ian mií, vàchi ducán nátù-ne nihítáhvi-nè nùí.

⁵ Cunaha-ní, nú ni cúndéé iin nèhivì nùù nsidaa ana cuní datúcù xì-né, dandu nihítáhvi stná-nè cundixi cuxín-nè. Te mà nunca dandutí quivì-nè nùù tutu xì vida ndiaha. Te claru icúmí cachì xì Yuandiáhì ñà-divi nèhivì-xì nduú nècuàchì xiníndísámá; te divi ducán cachì stnáì xì ángel xi-ya.

⁶ Nsidaa mii-nsiá nècuàchì natácá càhvi xì Dios, ni cúnínì vaha-nsia ñà-nduá cachí Espíritu Ìì xí-yá.

Razón nì dàsáà Jesús nùù nèhivì xí-yá ñuu Filadelfia

⁷ 'Daaní, nùù nècuàchì cachítnùhu palabra-xi ñuu Filadelfia, dohó tiaa-yó, dandu cahvi-neà cunini nsidaa nèhivì-xí ndoó ñuu yucán: Yùhù nduí ana ì, te puru ñà-ndácuisì cáhìn. Yùhù nihí ndahàcáa xi rey David, te nú sàni nacune iñàha, còò ni-iin ana cui nacadi xán, te nú sàni nacadi, mà cúí gá nuna. Ñàyùcàndùá, ducán cachí xì-ní,

⁸ ináhî nansa quida-ní. Te cunaha-ní, nuná ñuhiví nùù-ní nahi yehè nuná, te còò ni-iin cui nacadi xán. Vàchi mate có-ndùú-nsiá nehivì chicá icúmí fuerza, doco vátùni, sàni chivàha-nsia palabra-xi, cóni nácuáa-nsiá yùhù.

⁹ Doco jaàn ndoó dava nèhivì cachí-nè xínduu-ne (nèhivì ndiaha), nèhivì raza Judea nduú-né, cachí-nè, doco tnuhu-né, vachi xínduu nsihi-ne ana nchícùn xì ñà-malu. Pues, yùhù icúmí datnátui mii-né nùù-ní ñà-cuitasisi-né nùù-ní, te quidañuhu-né mii-ní, dandu cundaà ini-nè, màni-ní nùí.

¹⁰ Cunaha-ní, vaxi iin tiempu ùhì inicutu ñuhiví na icúmí nèhivì ndoho-ne, te cundaà inì-xi nansa ndisa iá anima-nè. Doco mii-ní, mà cuáhi cunì-ní tiempu mà, vachi iin-ni sàni quidandee inì-ní (nì xinindisa-ní) nacua sàni cachí xì-ní.

¹¹ Cunaha-ní, yachì icúmí nasai ñuhiví. Ñàyùcàndùá, nacua sàni sà-ní quida vù-ní, iin-ni quida-ní seguir ducán, màdí nihì inga nèhivì ñà-ndùá cuàhàn cunduu premiu xi-ní.

¹² 'Nsidaa nèhivì-xí, nú ni cúndéé-nè nùù nsidaa ana cuní datúcù xì-né, dandu iin-ni icúmí-nè cundoo-ne nùù Dios na ian nduú-né iin castillu vehe ndiaha-yá, vachi mà quéé gá-nè nùù-yá. Te ìcà-né icúmí chituu stnái quivì Dios-xi, xì quivì saí, xì stná quivì ñuu Dios-xi, divi Jerusalén Saa, vachi ndè ansivi ndé iá-yà icúmí nuu ñuu mà quixa.

¹³ Ñàyùcàndùá, nsidaa mii-nsiá nècuàchì natácá càhvi xì Dios, ni cúníní vaha-nsia ñà-ndùá cachí Espiritu Ìì xí-yá.

Razón ni dásáa Jesús nùù nèhivì xí-yá ñuu Laodicea

¹⁴ 'Daaní, nùù nècuàchì cachítnùhu palabra-xi ñuu Laodicea, dohó tiaa-yó, dandu cahvi-neà cunini nsidaa nèhivì-xí ndoó ñuu yucán: Yùhù nduí ana chicá seguru. Micuísì ñà-ndácuisì cáhìn, mà dándáhvî, te divi ndahà yùhù nì cuyucun nsidaa iñàha iá ñuhiví xi Dios. Te ducán cachí xì-ní,

¹⁵⁻¹⁶ ináhî nansa quida-ní. ¡A sácú vaha coo dahuun-ní ladu xi, te ò claru cachí-ní mà cóo-ní ladu xi! Vàchi yùhù ndaníhí mii-ní nahi tècuí có-xihí vù, ñà-mà íhni-tê nì mà víxin-tè, te ñàyùcàndùá, vihini dacúxíóí mii-ní nùí, na ian quidá nèhivì xì tècuí có-xihí ví, sasí-nète.

¹⁷ Vachi dohó cachí-ní: Sà-íá ñà-cuìqué. Cuàhà biene xi, còò ni-iin necesidad icúmí, cachí-ní. Te ni có-cundáa inì-ní ñà-mii-ní nduú ana iá tnùndoho xi, te mii-ní nduú ana chicá ndahví ini anima-xi, te quidámáxiní stná-ní. Vachi nùù yùhù, mii-ní nduú ana chicá ndixí ndahví, (vachi ndahví iá anima-ní), te sàhàmà chicá vaha cuhi inì-ní mii-ní.

¹⁸ Ñàyùcàndùá, iin palabra vù cachí xì-ní, chicá vaha (nàcùnihu vù inì-ní), dandu nihì-ní ñà-cuìcà ndisa nùí, divi ñà-ndùú nahi oro nì dàà, te nì cundaà inì-xi, vaha-ña. Te xiñuhu stná (ñà-naquida vù-ní) na ian cuàhàn-ní cuiin-ní sìcoto cuxín nùí ñà-màsà cóo chaa gá-ní (nùí), te ducán màsà cúcáhán nùù-ní. Daaní, xiñuhu (ñà-cundehè-ní cuisì ichì váha. Vachi nú ducán, dandu queamà na ian cuàhàn-ní) cuiin-ní iin tàtnà nùí, te cutatna nduchìnuù-ní, te natùinuù-ní.

¹⁹ Cunaha-ní, nsidaa ana cuú inì sàhà-xí, sáhi-nè conseju, te danáni stnái-nè dava xichi. Ñàyùcàndùá, nacani vaha inì-ní, te naxicocuín inì-ní sàhà falta xi-ní.

²⁰ 'Pues, ducán iá na ian cáhìn yehè nèhivì, áma cunini-ne, te nacuna-ne quìhvi cutnahí xì-né, vachi nahi vicò ndé cundoo-nda cuxi vaha-nda, ducán queamà. Ñàyùcàndùá, cáhìn xì ndéni nèhivì nì cui áma cunini-ne, te quìhvi.

²¹ 'Cunaha-ní, ndéni nèhivì-xí, nú ni cúndéé-nè nùù nsidaa ana cuní datúcù xì-né, dandu icúmí-nè cutnahá stná-nè xí ndè (gloria) ndé coo stná-nè nùù iin silla ndiaha dandacú-né nacua nì quida yùhù, nì cundéí, dandu nì sàcòì silla ndiaha xí, te vichi cutnàhî xì Yuamání dandacú stnái.

²² Nsidaa mii-nsiá nècuàchì natácá càhvì xì Dios, ni cúníní vaha-nsia ñà-ndùá cachí Espíritu ìì xí-yá, —ni cachi Jesús.

4

Nansa cahvi-né Yua-nda Dios ansivi

¹ Daaní, nì nsihì nì xinì ñà-jaàn, dandu nì nuna iin yehè ansivi nì xinì. Te nì tiacú tàchì-yá càhàn-yà xì na ian nì càhàn-yà xì daa. Divi na ian sivi corneta, ducán tiacú, te nì cachi-yà xì:

—¡Nahà-ní dìquìxí yohó! Cuní dacuní mii-ní nansa cuàhàn cuu quìvì vaxi xi-nda.

² Dandu vichì vichì ducán nì sàcòì na ian sánî nì quida ndudu ìì xí Espíritu xi Dios. Te nì xinì yucán ndé gloria iín iin silla ndiaha ndé iá mii-yá.

³ Na iin yùù yéhè jaspè, ò iin yùù yéhè cuahá, ducán náhà-yà. Te dìquì stná silla mà iín iin sìcòyàhnchì, na iin yùù yéhè cuií nani esmeralda, ducán náhàmà.

⁴ Te nsidanicuú ladu silla xi-ya itá stná silla cuachi. Cuahani ndáa-nù, òcò cùmì-nú, te nùù iin iin-nù ndoó iin iin nècuàchì sahnú. Sìcoto cuxín xíndixi iin iin-ne, te xíñuhu stná corona dìni iin iin-ne.

⁵ (Te nì xinì), yucán silla cahnú xí-yá, yáha gà tása, te na ian càhàn dàvì, ducán tiacú, te ndee níhi stná. Te frente silla mà itá ùsà ñà-xìxìn nduú ùsà espíritu ndiaha xí Dios.

⁶ Te frente stná silla mà iá stná nahi mar nì cuyucun vidriu, ducán náhà lugar mà, te yéhà na iin yùù nchií ndai.

Daaní, nsidaa ladu mii-yá itá iin iin ana itá. Cùmì nduú-né, te iá stná cuàhà nduchìnù-né ladu nùù-né xì ladu yàtà-né.

⁷ Iin-ne, na iin nsicaha iá-nè; te inga-nè, na iin buey iá-nè, te inga-nè, nùù nèhivì nihí-né; te nècuàchì cùmì, na iin águila ndavá ansivi, ducán iá-nè.

⁸ Te iin iin-ne, iá ìñù ndìxìn-né, te iá chitu stná nduchìnùù-né ìcà ndìxìn-né. Te tìxi stná ndìxìn-né iá stná cuàhà nduchìnùù-né. Te nicanicuahàn ndui te ñuú ducán cána-ne cachí-nè dohó:

ìì gá mii-yá, divi mii-yá dandacú nùù nsidanicuú ìñàha. ìì gá-yà. Ndè sànaaha iá-yà, te vichì iá-yà, te ndè nicanicuahàn icúmí-yâ coo-ya. ìì gá-yà.

⁹⁻¹⁰ Ducán cachí-nè, ndaníhí cahnú-né mii-yá, te tavá-né tnùñuhu xí-yá, naquímànì-néyà, divi mii-yá iá nùù silla ndiaha, te itiácú-yà nicanicuahàn. Daaní, cada cachí-nè ducán, dandu càhàn stná òcò cùmì nècuàchì sahnú yucán, tutúyúhú-nè nùù sàhà-yá, te cahvi-néyà, chitáníní-né corona ndiaha-né nùù-yá, cachí-nè xí-yá:

¹¹ Ndaníhí cahnú-nsí mii-ní, Stoho-nsì Dios, te ni coó tnùñuhu xí-ní nùù nsidaa ana itiácú, te ni cúsáhnú-ní nùù nsidaa ñuu. Ducán ndiá ìcà coo, vachi mii-ní nì quidavàha-ní nsidanicuú ìñàha, nì chitnùnì inì-ní, te nì quidayucùn-ní nsidaa ìñàha, te ñàyùcàndùá ndè vichì iá ìì nsidaájàn.

5

Nansa nì quida Jesucristu xì tutu itúì

¹ Daaní, indéhí nùù silla ndiaha ndé iá mii-yá, te nì xinì ndahàcuàhá-yà iníndáhá-yà iin tutu itúì. Te tutu mà, itándiaa letra ndúì laduà. Te nì xinì, ùsà lugar xan nuhní, te iin iin ndé nuhní mà itúú iin sellu.

² Daaní, nì xinì yucán iín iin ángel ndacuì, ndáhì fuerte-nè, ndácàtnùhù-né, cachí-nè:

—¿Ana nátùì cunduu ana cui nacani xì ñà-nùhní tutu yohó, te nuna-ña?

³ Doco, cunaha-nsiá, còò ni-iin ni túi nacani xì tutu mà, vachi còò iin ni nátùì cui quida ducán, te cundehè-né ñà-ítándiaa yucán. Ni-iin ana iá ansivi, ni-iin ana iá ñuhivì yohó, ni-iin ana nduú nsì, ni-iin-ne màni cùí quida-neà.

⁴ Ñàyùcàndùá, nì quesahí sacú fuertí, vachi còò iin nátùì nacuna xi tutu mà cahvi-neà, ni còò stná ana nátùì siquiera cundehè-neà.

⁵ Dandu nì càhàn iin nècuàchì sahnù-mà nì cachi-nè xì:

—Màsà cuácú-ní, vàchi sàni tùi ana cui nacuna xi tutu jaàn, te nandaxin-xi ùsà ñà-nùhníà. Divi nduú descendencia ndiaha xí David, vàchi sàni cundee-yá (nùu contra xi-ya), ñàyùcàndùá vátùni nacuna-yañà. Te nani stná-yà Nsicaaha nduú descendencia xi Judá, ducan nani stná-yà.

⁶ Te nì ndacotì, te nì xinì yucán iín mii-yá, na iin lelù náhà-yà, te ducán iá na ian nì sahnì nèhivì-yá, doco vichi iín-yá dava mahì-xí silla ndiaha, xì òcò cùmì nècuàchì sahnú, xì nsì-cùmì ana itá saín nùu-yá. Ùsà nsiquì-yá na iin nsiquì riì, te ùsà nduchínùu-yá. Cunaha-nsiá, nsì-úsà nduchínùu mà xínduu stná ùsà espíritu vaha xi Dios, te inicutu ñuhívì xicánúu espíritu mà quidá-yá.

⁷ Te divi mii-yá iín dava mahì-xí yucán, nì tnàtuu-ya nùu ana iá nùu silla ndiaha, te nì tnii-ya tutu iá ndahàcuàhá-yàmà.

⁸ Te nì nsihi nì tnii-ya tutu ma, dandu nsicúmì ana itá nùu-yá mà xì nsidaa stná òcò cùmì nècuàchì sahnú-ma, nì tutuyuhu-né nùu sàhà mii-yá nduú Lelù Íi xí Dios. Nihí stná-nè iin iin yutnù cuerda quidandaa-né, te nihí stná-nè còhò oro chitu inciensu. Te inciensu mà, palabra nì cachi nèhivì na xícàn tàhvì-né nùu Dios nduá.

⁹ Daaní, nsidaa ana tutúyúhú ñuhù yucán, nì xito-ne iin alabanza saa, te nì inini mii-yá; te dohó cachí alabanza mà:

Icúmí-ní tnii-ní tutu itúì, te cahndè-ní ñà-nùhníà. Te vátùni quida-ní ducán, vàchi nì xihì-ní, nì xitià nì-ní, te ducán nì dànáà-ní sàhà nèhivì. Te divi sàhámà vátùni nì yaha-ne nì sàcùnduu-ne nèhivì xí Dios, xínduu-ne nèhivì nsidanicuú raza cáhàn nsidanicuú dàhàn xí nsidanicuú ñuu inicutu ñuhívì.

¹⁰ Te nì chitnùní inì-ní cunduu stná-nè nahi dùtù xinúcuáchì nùu Dios xi-nda. Te icúmí-né dandacú-né nùu nèhivì dava ga ñuhívì. (Ducán cachí-nè xitó-né.)

¹¹ Daaní nì ndacotì inga xichi, te nì xinì sàni nataca yaha ga cuàhà sàstnùhù mil ángel mozo xi Dios, itá-né nsidanicuú ladu ndé iá Dios, xì ndé itá nsicúmì ana itá nùu-yá, xì stná ndé ndoó nècuàchì sahnú. Te nì tiacuì

¹² cáhàn ndee nsidanicuú-né, cachí-nè:

Ndiaha gá nì quida mii-yá ana nani Lelù Íi xí Dios, vàchi nì xihì-yà (sàhà nèhivì).

Ñàyùcàndùá, icúmí-yà sàà-yà cusahnú-yá, icúmí-yà naquihin-ya ñà-cuicà ndiaha-yá, te icúmí-yà cuiin fuerte-yà, te (dandacú) nchichí-yà nùu nèhivì; te mii-né, icúmí-né ndenihì cahnú-néyà, te tavà-né tnùñuhu xí-yá, vàchi naquímànì-néyà.

¹³ Daaní nì inini cáhàn ndee nsidanicuú ana xíndoo ansivi xi ñuhívì, xì nsidaa stná nsii, xì nsidaa iñaha nì quidavaha Dios, ñà-íá ñuhívì xì ñà-íá tècuí cuáhà, nsidanicuú ñà-jaàn, nì tiacuì xícatchi-nè:

Naquímànì-nsí mii-yá iá nùu silla ndiaha; te naquímànì stná-nsi mii-yá nani Lelù Íi. Quidáñuhú-nsí mii-yá, te ducanicoó nicanicuahàn. Te ni sàà-yà cusahnú ndiaha-yá nicanicuahàn, nì cachi-nè.

¹⁴ Dandu nì cáhàn stná nsicúmì ana itá nùu-yá:

—Divi ducanicoó —nì cachi-nè.

Dandu nsì-òcò cùmì nècuàchì sahnú yucán, nì tutuyuhu-né nùu sàhà-yá, te nì cahvi-néyà.

6

Nansa icúmí cuu na cahnde Jesús iñu lugar ndé nuhní tutu itúì iá ansivi

¹ Daaní, nì xinì mii-yá nani Lelù Íi, nì sahnè-yà iin ñà-nùhní tutu itúì mà. Te nì tiacuì cáhàn iin ana iín saín nùu-yá; na cáhàn dàvì, ducán fuerte nì cáhàn-nè, cachí-nè:

—¡Naha!

² Te nì xinì nì quecunu iin idu cuxín. Te indánuú iin ana indánuú yàtà-sí, te nihí-né arcu. Te nì nihì stná-nè iin corona ñà-cuñuhu-ne. Ñàyùcàndùá, nì quee-ne cuahàn-nè, vàchi icúmí-nè cundee-né nùu cuahà ñuu.

³ Daaní, (nì xini), nì sahnde-yà ñà-ùì nuhní tutu itúimà, te nì tiacuì nì càhàn inga ana iín nùù Dios, te nì cachi-nè:

—¡Naha!

⁴ Te nì quecunu inga idu, idu cuahá nduú-si, te yàtà-sí indánuú inga ana indánuú, te icúmí-tê permisú dacà-té nèhivì ñà-nàá stnahá-né, te cahni stnahá-né. Te nì sàha xi-té iin espada cahnú.

⁵ Daaní, nì sahnde-yà ñà-únì nuhní tutu itúimà, te nì tiacuì nì càhàn inga ana iín nùù-yá, cachi-nè:

—¡Naha!

Te nì xini nì quecunu iin idu tnuu, te iá stná ana indánuú yàtà-sí, te iníndáhá-tê iin balanza.

⁶ Te tiacú càhàn ana càhàn mahì nsìcúmì ana itá nùù Dios, te dohó cachi-nè:

—Vichi ndiaá gà nùnì, quidáchúùn-ndá iin quivì, te cutu iin litro-ña níhì-ndà; te nú cebada, cuisì iin quartillu dava; doco aceite xì vinu, cóni nàná yàhvi guá —cachi-nè.

⁷ Daaní, nì sahnde-yà ñà-cúmì nuhní tutu itúimà, te nì tiacuì càhàn inga ana iín nùù-yá, cachi-nè:

—¡Naha!

⁸ Dandu nì xini nì quecunu inga idu, te idu cuaán nduú-si. Te iá ana indánuú yàtà-sí. Te muerte nduú quiviá, te jaàn nchícùn gà vaxi ingà, te diviamà nduú ana ndaca-xi nèhivì cùhùn ndé ñuhú vaha anima nsii. Sàhà ndú ñà-jaàn icúmì cui cuàhà nèhivì; nùù cada cùmì nèhivì icúmì cui iin-ne quida, vachi icúmíâ dandacúá nùù guerra, xì nùù tnama, xì nùù cuèhè, xì nùù quisì daná, te sàhà nsidaájàn icúmì cui cuàhà nèhivì.

⁹ Daaní, nì sahnde-yà ñà-ùhùn nuhní tutu itúimà, te nì xini tìxi mesa ndé sàha-ne promesa xi Dios, yucán ndoó anima nèhivì. Xínduu-ne nèhivì xiníndísâ palabra ì xí Dios, te sàhà ñà-jaàn nì sahnì nèhivì-né, vachi nì cachi vate-né ndoó-né ladu xi-ya.

¹⁰ Te vichi, cána fuerte-nè, cachi-nè xì Yua-nda Dios:

—Stoho-nsì Dios, ¿nadaa ga quivì, dandu nacuitacuhá sàhà-nsí? Vachi nèhivì ñuhiví, nì sahnì-né nsiùhù, ñàyùcàndùá xiñuhu ndoho-ne, vachi mii-ní, ì ndisa inì-ní, siempre tùha-ní quida vii-ní —nì cachi-nè.

¹¹ Dandu nècuàchì nsii ma, nì cutahvì-né iin iin dùhnù quihín cuxín yaa, te nì sàcùnaha-né cundiatu cuéyàà-nè quetatu chii gá-nè dècuèndè cui stná cuàhà compañeru-nè nchícùn ichì Dios, te cuacastnahá nsidaa ana icúmì cui stná nacua nì xihì mii-né.

¹² Daaní, nì sahnde-yà ñà-íñù nuhní tutu itúimà, te nì xini nì tnàa fuerte, te nì nàcùitnùù orá nahi sìcoto tnuu. Te yoo, nì nducuahá stná-si nahi nì.

¹³ Te nì còyo chitu stná sìtnúù ñuhiví yohó, na ian cóyo ñà-vídì quidá tàchì, ducán nì còyo-sì.

¹⁴ Te nì ndañuhu ansivi nì natuía na ian natúì iin tutu caní, te nsidaa yucù iá ñuhù íchì, xì nsidaa stná ñuu iá mahì mar, nì ndutá.

¹⁵ Dandu nsidanicuú nèhivì ñuhiví, nì xinu dèhé-nè yucù, nì chidèhé-nè mii-né ini cueva, te mahì cavà nahnú, xínduu-ne rey, xì gobiernu, xì nècuàchì cuicà, xì soldadu dandacú, xì nècuàchì idónuu, xì cuàhà stná-nè peón, xì nèhivì ùún.

¹⁶ Te nì cacachi nsidaa-né xì yucù, xì stná cavà ducún:

—A sácú vaha nì cóya dìquì-nsí te dàhvi-nsi, ñà-màsà túi-nsi nùù mii-yá iá nùù silla ndiaha, te màsà níhì-nsí castigu quida mii-yá nani Lelù Íi.

¹⁷ Vachi vichi sàni sàà quivì ndoho-nsi quida-ya, te còò iin cui cundee inì-xi na xidà ini-yà.

7

Nansa icúmì màcùtuu seña xi Dios tnaa cuàhà mil nèhivì raza Israel

¹ Daaní, nì nsihamá, dandu nì xini cùmi ángel, itá-né nsicúmì ladu ñuhiví, te sadí-né nùù tàchì caná nsidaa ladu sàhà-ñá màsà cáná gá tàchì mà nùù ni-iin ñuu, ni nùù mar, te ni nùù ni-iin yutnù.

² Te nì xini inga ángel nì nana-ne vaxi-ne dècuèndè ndé caná orá, nihí-né sellu ducùn nèhivì xí Dios. Te nì ndàhì ndee ángel mà nì càhàn-nè xì nsicúmì tnaha-nemà, divi ángel nì sàha Dios poder ñà-quida-ne dañu xì ñuhiví xì mar.

³ Dandu dohó nì cachi ángel mà xì tnaha-ne:

—Màsà quidá-nsiá ni-ñàha xì ñuhiví, ni xì mar dècuèndè nú sàni ducùn seña xì Dios tnaa nèhivì xinúcuáchi nùù-yá.

⁴ Dandu nì inini nì nacani-ne nadaa nèhivì icúmì nihì xì seña mà, te nsidaa nsidaa-né, 144,000 nèhivì xínduu-ne. Te nsidaa-né, nècuàchì descendencia xì Israel nduú stná-nè.

⁵ Te iin dèhe Israel mà nani Judá, te (nì xini) nì sàcùtuu seña mà nùù ùxin ùi mil nèhivì descendencia xì nècuàchì mà. Daaní, nì sàcùtuu stná seña mà nùù ùxin ùi mil nèhivì descendencia xì (ñani Judá mà) nani Rubén. Te nì sàcùtuu stná seña mà nùù ùxin ùi mil nèhivì descendencia xì inga (ñani-nè) nani Gad.

⁶ Stná ùxin ùi mil nèhivì descendencia xì inga (ñani-nè) nani Aser, xì stná ùxin ùi mil nèhivì descendencia xì inga (ñani-nè) nani Neftalí, xì stná ùxin ùi mil nèhivì descendencia xì Manasés, nì ducùn stná nsidaa-né seña mà.

⁷ Stná ùxin ùi mil nèhivì descendencia xì Simeón, xì inga ùxin ùi mil nèhivì descendencia xì Leví, xì stná ùxin ùi mil nèhivì descendencia xì Isacar, nì ducùn nsidaa-né seña mà.

⁸ Stná ùxin ùi mil nèhivì descendencia xì Zabulón, xì stná inga ùxin ùi mil nèhivì descendencia xì José, xì stná inga ùxin ùi mil nèhivì descendencia xì Benjamín, nì ducùn nsidaa-né seña mà.

Nansa nì xini Juan cuàhà mil nèhivì ndixí cuxín

⁹ Daaní, nì ndacoti, te nì xini yucán itá yáha ga cuàhà nèhivì, mà cùì nandiahvi nadaa xínduu-ne. Nèhivì nsidanicuú ñuu xínduu-ne, nèhivì nsidanicuú ladu xì nsidanicuú raza, te nsidanuu dàhàn xícahàn-nè. Te itá-né nùù mii-yá iá nùù silla ndiaha, xì nùù mii-yá nani Lelù Ìi, ndixí-né dùhnù quihín cuxín yaa. Te iníndáhá-nè ndahà nù-ñúù.

¹⁰ Te cána fuerte-nè, cachí-nè:

Còò inga ana nahi Dios, divi mii-yá iá nùù silla ndiaha, vàchi sàni dàcácu-yàndó. Còò inga ana nahi mii-yá nani Lelù Ìi, vàchi sàhà mii-yá sàni càcu-nda, nì cachí-nè.

¹¹ Daaní, nsidaa ángel mozo xì Dios, itá-né nsidaa ladu nècuàchì sahnú ndoo yucán xì stná nsicúmì ana itá nùù-yá, te nì tutuyuhu-né ñuhù nùù sàhà-yá ndé iá-yà nùù silla ndiaha xí-yá, te nì cahvi nsidaa-né mii-yá,

¹² xícachi-nè:

¡Amén! Mii-ní nduu-ní Dios, ñàyùcàndùá, ndaníhí ndiaha-nsí mii-ní, (te cachí-nsì xì-ní) yáha ga nchichí-ní. Sàhà nsidaájàn naquímànì-nsí mii-ní, te ni coó tnùñuhu xì nsidaa nèhivì nùù-ní, te ni sàà-ní cusahnú ndiaha-ní, te ni sàà stná-ní dandacú fuerte-ní inicutu. ¡Ducanicoó nicanicuahàn!

¹³ Dandu nì càhàn iin nècuàchì sahnú yucán xì yùhù, cachí-nè:

—¿A ináhá-ní índù nècùachì xínduu nècuàchì ndixí cuxín yaa yohó? ¿A ináhá-ní índù nì quixi-ne?

¹⁴ Te nì cachí xì nècuàchì mà:

—Còó, có-ináhí, señor; doco mii-ní, ináhá-ní.

Dandu nì cachi-nè xí:

—Nècuàchì yohó, xínduu-ne nèhivì nì xini cuàhà vida tiempo nani tiempo xì tnùndoho cahnú. Doco sàni ndoo cuàchi-ne ñà-nì xitià nì mii-yá nani Lelù Ìi, ñàyùcàndùá sàndixí cuxín yaa-ne vichi,

¹⁵ te xíndoo saín-né nùù silla ndiaha ndé iá Dios; ndui te ñuú xíxinucuachi-né nùù-yá, te ndoo-né ini vehe cahnú ndiaha-yá. Te mii-yá, nicanicuahàn cutnâhâ-yá xì-né ndiaá-yànè.

¹⁶ Ñâyùcàndùá mà nunca sàà-nè cui gà-nè doco, ni mà cúí gà-nè tècuí, ni mà nsûí gá-nè quida orá, ni mà cúí ihni gá-nè.

¹⁷ Vâchi mii-yá nani Lelù Íi, icúmí-yâ cunuù-yànè. Iín-yá ladu nùù silla ndiaha yucán, te icúmí-yâ cundaca-yanè sàà-yà xì-né ndé coho-ne tècuí ndiaha cutiacu-nè nicanicuahàn. Ni mà cuácú gá-nè, vâchi contentu cundoo-ne quida-ya.

8

Nansa cuàhàn cuu na tàhndè ñà-úsà ndé nuhní tutu itúí, te nachitu stná còhò oro inciensu

¹ Daani, ni sahn-de-yà ñà-úsà nuhní tutu itúimà, te ni nsihi ni quida-ya ducán, dandu ni nâcuíin dàdí inicutu ansivi nahi dava hora.

² Te ni xiní yucán nùù Dios sà-itá tûha ùsà gà ángel, nihí-né iin iin corneta ñà-sivi-nè.

³⁻⁴ Dandu ni tnâtuu inga ángel ni sàà-nè nùù iin mesa oro iá nùù silla ndiaha, divi mesa ndé sahmí-né inciensu nùù-yá. Te vichi nihí ángel mà iin còhò oro ni sàà, te ni sàha stná xì-né cuàhà inciensu ñà-cahmi-neà dìquì mesa mà sàhà-ñá cana ñùhmà-ñà mànana nùù Dios. Te na hora mà nana ñùhmà mà, dandu cutnahá stná palabra ni cachi nsidaa nèhiví xí Dios na ní xicàn tàhvì-né nùù-yá. Ñâyùcàndùá, divi ducán ni quida ángel mà, ndahà-né ni chitanini-ne nsidaámà nùù Dios.

⁵ Daaní, ni tavà-né chii ñuhu xíxin nùù mesa oro mà, te ni dàquée-neà ini còhò mà ndé ni chituá, dandu ni dândiàchì ndee-néà nùù ñuhiví. Dandu ni tiacu cuàhà gá ana cãhàn fuerte, te ni cãhàn ndee dàvì, te ni tàsa, te ni tnàa.

Nansa icúmí cuu na sivi ángel corneta xi-ne

⁶ Dandu ùsà ángel nihí corneta xi-ne, ni nsidayucun-nè cuàhàn-nè sivi-nè.

⁷ Te ni sivi ángel primeru corneta xi-ne. Te na ní tiacu ni sivi, dandu ni còyo iin nùù ñuhiví, doco dácà stnahá iin ma xì ñuhu xíxin, xì stná nì. Ñâyùcàndùá, nùù cada ùnì yutnù (itá ñuhiví) ni xìxin iin-nù, te ni xìxin nsihi stná yùcù iá campu.

⁸ Daaní, ángel ùi, ni sivi-nè corneta xi-ne, dandu ni xiní iñàha cuú mànuu na ian iin yucù xíxin, ducán nãhà, te ni nacava ini mar. Te cuàhà tècuí mar ni nanduu-tè nì (ni quidamà). Iyuhu cumáni gá, te cunduu davatahvi tècuí mar ni cuchicuehe ducán.

⁹ Stná nsidaa quisì ndùtè ñuhú ini mar, iyuhu cumáni gá, te cunduu stná davatahvi-sí ni xihì. Stná barcu, iyuhu cumáni gá, te cunduu stná davatahvi-nú ni sachi.

¹⁰ Daaní, ángel ùnì, ni sivi-nè corneta xi-ne, te dècuèndè ñuhiví ni nacava iin sìtnùù cahnú nisa ituu ansivi, xíxin fuerte-si, te tnùù nihni-sì na iin ñuhu cahnú. Te ni nacava-sì nùù ñuhiví ni còya nùù cuàhà yùte xì cuàhà pozo, iyuhu cumáni gá cunduu davatahvi yùte xi pozo ni còya nùù-xí.

¹¹ Te sìtnùù mà, Ajenjo nani-sí, te yáha ga ni ndu-uà yùcù tècuí ndé ni còyo-sì. Te cuàhà gá stná nèhiví ni xihì ñà-nì xihì-ne tècuí uà mà.

¹² Daaní, ángel cùmì, ni sivi stná-nè corneta xi-ne, te cuàhàn nsihi stná fuerza xi orá ni cúí, te cuàhàn nsihi fuerza xi yoo ni cúí xì stná sìtnùù; iyuhuni cumáni gá, te nsihi dava fuerza xi-sì. Ñâyùcàndùá, ni nanchiì ndahvi orá ndui, te ni nanchiì ndahvi yoo ñuú.

¹³ Te ni xiní meru dìquì-xí ansivi, yucán yáha ga ducún ndavá iin ángel, ndáhì ndee-né cachí-nè:

—Cunini nsidaa mii-nsiá nèhiví ñuhiví. Ndahví-nsià, vâchi ndahví cuàhà cuàhàn cuu xi-nsiá, vâchi cumáni gá ùnì gá xichi sivi ángel corneta xi-ne, te ndahví-nsià na hora sivi-nè.

9

¹ Daaní, ángel ùhùn, nì sivi-nè corneta xi-ne, te nì xinì dècuèndè ansivi xi dècuèndè ñuhíví nì nacava iin ana nchií nahi sìtnúù. Te nì nihì-né ndahàcáa ñà-nacuna-ne yavi cahnú cunú sàstnùhù.

² Te na ní nacuna-neà, dandu nì quecoyo cuàhà ñùhmà, na ian xíxìn ini xìtnù cahnú, te nì nanchiì ndahvi orá nì quida ñùhmà mà, te nì nàcuìtnùù inicutu.

³ Daaní, mahì ñùhmà mà nì caquee cuàhà sìca nì ndava-sì ñuhíví. Sàni nihitáhvi-sì cucumi-sì iñù ñà-cunduu-sì quisì daná nahi sìduhma.

⁴ Te nì sàcùnaha stná-sì ñà-màsà cáxi-sì yùcù itá ñuhíví, ni-iin stná ndahà yutnù, cuisì-ñá dandohó-sì nèhivì có-ìtúú seña xi Dios tnaà-xi.

⁵ Doco nèhivì tui-sì mà, mà cúí cúí-nè, còó, cuisì ndoho cuahà-né, na ian ndoho-nda na tuí sìduhma-ndó. Te ùhùn yòò icúmí cuu xi-né ducán.

⁶ Te mate nanducu-né modo cui dahuun-ne, doco mà níhì-né ñà-jaàn, mate yáha ga cucuni-nè ndañuhu-né ñuhíví, doco mà cúí.

⁷ Te nì xinì sìca ma, te ducán ndáa-sì nahi idu fuerte sáhàn guerra. Dìni-sì, sìcàté oro ñuhá. Te nùù-sì, nahi nùù nèhivì nduá.

⁸ Te idìdini-sì, na iá idìdini nècuàchi ñahà, ducán iá; te nùhu-sì, na iá nùhu nsicaha, ducán iá.

⁹ Te ìcà-sì, nahi càa nduá. Te na ndavá-sì ansivi, yáha ga ndee cahá ndixìn-sì, na ian cahá cuàhà gá carreta íditá idu, te cuàhàn-nu guerra.

¹⁰ Te ndohò-sì, nihá iñù nahi sìduhma, vátùni tui-sìndó. Te ùhùn yòò icúmí-sì dandohó-sì nèhivì.

¹¹ Daaní, iá stná ana dandacú nùù-sì, divi nduú ñà-malu dandacú nùù yavi cunú mà; Abadón nani-sì nùù dàhàn hebreu, te nùù dàhàn griegu Apolión nani-sì.

¹² Pues, vichi sàni yàha iin tnùndoho chicá cahnú. Doco cumàni gá ùi gá tnùndoho nahnú fuerte.

¹³ Daaní, ángel iñù, nì sivi-nè corneta xi-ne, dandu nì tiacuì iá ana cáhàn yucán ndé iín mesa oro nùù Dios. Nsìcúmì esquina mesa mà itúú iin iin ñà-íá nahi nsiquì quisì, te mahì ñà-jaàn tiacú cáhàn iin ana cáhàn

¹⁴ xì ángel làcà ní sivi xì corneta-xi, te dohó nì cachi-nè:

—Cuahán-nì ndaxi-nì cùmì ángel nuhní yuhù yùte cahnú nani Eufrates.

¹⁵ Ñàyùcànduá, ducán nì quida ángel mà, nì ndaxi-né cùmì ángel yucán, vàchi yucán ndoó tùha-ne sàà meru cuià, meru yòò, meru quivì, meru hora ñà-cacahni-né cuàhà nèhivì. Nùù cada ùni nèhivì ñuhíví, icúmí cui iin-ne.

¹⁶⁻¹⁷ Dandu nì xinì na ian nì sàní, te nì xinì cuàhà sàstnùhù idu, te itándoó nèhivì yàtà-sì. Ùi cientu millón nèhivì xínduu-ne, nì tiacuì, vàchi iá ana nì cachitnùhu nadaa-ne. Te xíndixi-ne dùhnù càa, color cuahá nduú dùhnù dava-ne, te dava ga-ñà color ndiaa, te dava ga-ñà, cuaán-ñà. Te dìni idu mà, na iá dìni nsicaha, ducán xí-ia-ña. Te yuhù-sì caná fuerte ñuhu xì ñùhmà xì stná azufre (sahán aya).

¹⁸ Cunaha-nsiá, sàhà nsì-ùni ñà-dàná queé yuhù-sì, sàhámà nì ca-xihì cuàhà nèhivì, iyuhu cumàni, te cunduu davatahvi nèhivì ñuhíví nì caxihì nì quida ñuhu mà xì ñùhmà mà xì azufre dana ma.

¹⁹ Te iin iin idu, iá ñà-dàná nùù dìni-sì xì nùù ndohò-sì, vàchi ndohò-sì, na iá còò, ducán iá, te iá dìniá nahi còò, vátùni tui-sìndó.

²⁰ Doco nèhivì nì càcu nùù nsidaa tnùndoho nahnu-ma, ni cóni cùú-né arrepentir sàhà cuàchi nì caquida-ne nì quidayucun-nè ñà-nduá cahvi-né. Còó, iin-ni nì quida-ne seguir sàha-ne promesa nùù ñà-malu, te cahvi-né cuàhà figura, sea oro nì cuyucàn, ò sea plata, ò sea càa yahá, ò sea yùù, ò sea yutnù nì cuyucàn. Te nsidaa ñà-nduá cahvi-némà, ni có-ìndéhá, ni có-ìtiácuà, ni có-xìcá.

²¹ Te nèhivì ndóo ga ñuhíví, ni cóni nàxícócuìin ini-nè sàhà cuàchi-ne, iin-ni nì caquida-ne ñà-nduá xíquida-ne, sahní stnahá-né, sáhàn tàtnà-né, sáhàn tàdí-né, te iá-nè xì ñahà xí-né, te xidácuìhná stná-nè.

10

Angel iníndáhá libru tii

¹ Daaní, nì xinì vaxi inga ángel fuerte, mànuu-ne dècuèndè ansivi vaxi-ne. Ídúcún-né iin vïcò, te ñuhú dìni-né iin sìcòyàhncì. Nchií nùu-né na ian nchií orá, te tnúu sàhà-né nahi ñuhu.

² Te iníndáhá-nê iin libru tii nuná. Te nì sàcuìin-nè ñuhiví, sàhà cuàhá-nè ián dìquì mar, te sàhà ìtní-nè, ián dìquì ñuhù íchí.

³ Te nì ndàhì ndee-né, na ian ndáhì nsicaha, ducan tiacú. Daaní, nì nsihi nì ndàhì-nè, dandu nì tiacu cáhàn iin ana cáhàn fuerte na ian cáhàn dàvì. Ùsà xichi nì cáhàn ana cáhàn mà.

⁴ Te yùhù, cuàhìn chitui ñà-nduá nì cachi-nè nì cùí, doco momentu mà nì tiacuì iá ana cáhàn ansivi, cachi-yà xì:

—Màsà chítúú-nì ñà-nduá nì cachi ana nì cáhàn ùsà xichi, te nì ìa na ian cáhàn dàvì, vachi icúmí coo dèhé palabra mà —nì cachi-yà.

⁵ Daaní, ángel iín mahì mar xì dìquì ñuhù íchí, nì ndanihi-ne ndahàcuàhá-nè ansivi,

⁶ te nì ndacùcahan-né mii-yá itiácú nicanicuahàn, divi mii-yá nì quidayucun xì ansivi, xì ñuhiví, xì mar, xì nsidaa iñàha iá lugar yucán. Te nì cachi-nè:

—Chináhí Dios, mà cuéé gà,

⁷ te sàà quivì cuu ndisa nsidaa ñà-nduá nì cachitnùhu nèhivì xí Dios sàhana, vachi na cuàhàn sivi trompeta xì ángel ùsà, dandísá, icúmí xinu nsidaa ñà-nduá cuní Dios quida-ya, te iá dèhá` vichi.

⁸ Daaní, inga tu nì tiacuì iá ana cáhàn ansivi, te dohó nì cachi-yà xì:

—Tnàtuu-ní nùu ángel iín mahì mar xì dìquì ñuhù íchí, te tnii-ní libru tii nuná ini ndahà-né.

⁹ Ñàyùcànduá, nì tnàtui nùu-né, te nì cachì xì-né:

—Taxi-ní libru tii nùí.

Te nì cachi-nè:

—(Yoho iá`.) Tnii-níà, te caxì-níà. Icúmí nduvidì yuhù-ní nahi ndudi ñùñù, doco nú sàni coco-níà, dandu icúmíà ndu-uà-ñà tìxi-ní.

¹⁰ Daaní, nì tnii libru iníndáhá-nêmà, te nì saxiá. Te (ñà-ndàà nduá), saxí vídià, nahi ndudi, doco nì nsihi nì coquíà, dandu nì nsicuihnú úa inì.

¹¹ Dandu nì cachi tu ángel mà xì:

—Icúmí-nì cachitnùhu gà-ní ñà-nduú razón ndiaha xí Dios sàhà cuàhà nèhivì ndoó cuàhà ñuu cáhàn cuàhà dàhàn. Daaní, stná cuàhà rey dandacú nùu ñuu mà, icúmí-nì cachitnùhu stná-ní sàhà-té —nì cachi ángel.

11

Ùì nèhivì cáhàn cuenta xi Dios

¹ Daaní, nì sàha-ya yùhù iin vara caní nahi metro, te nì cachi-yà xì:

—Ndacuiin-ní, cuahán-nì, chitacuhá-nì veheñuhu cahnú ndé cahvi nèhivì Dios, te chitacuhá stná-ní mesa ndé sàha-ne promesa ì xì-né, te nacahvi stná-ní nadaa-ne sàhàn cahvi xì-yá yucán.

² Doco patiu yàtà veheñuhu màsà chítacuhá-nì, vachi icúmí ndòamà ndahà tiàa inga raza. Tiàa ma, icúmí-tè cundoo-tè nsidanicuú gá lugar ñuu ì, te quida quini-tè xì nèhivì yucán. Ùì dico ùì (42) yòò cunduu tiempu caquida-tè ducán.

³ Doco yucán cuàhàn cundoo stná ùì nèhivì-xì icúmí nìhítàhvì cáhàn cuenta xi. Iin mil ùì cientu ùni dico quivì icúmí-nè cáhàn-nè xì nèhivì ñà-nduú razón xi. Te sìcoto cundixi-ne, sìcoto tnuu cundua —nì cachi-yà.

⁴ Cunaha-ní, mii-yá nduú-yá Stoho nsidaa ñuu iá ñuhíví. Te frente silla ndé iá-yá (ansivi) itá ùi nù-olivu, xì ùi candeleru. Pues na quidá nsidaa ñà-jaàn nùù-yá gloria, ducán quidá stná ùi nèhivì cáhàn cuenta xi-ya (ñuu mà).

⁵ Te nú xiní ùhì iin tiàa xi-né, te cuní-te quida quini-tè xi-né, dandu cuàhàn cana ñuhu yuhù-né coco-tè. Te ducán icúmí cuu xi nsidaa ana cuní quida quini xi-né.

⁶ Te ndahà stná ùi nècuàchìmà icúmí ndòo poder ñà-cadi xì dàvì ñà-màsà cuun ni-iin dàvì inii tiempu cáhàn-nè cuenta xi Dios. Te icúmí-nè dandacú stná-nè nùù tèculì ñà-nanduu-tè nì, te nú cuní-nè, vátùni dandohó stná-nè nèhivì nsidanuu clase tnùndoho, según nadaa xichi cuní-nè.

⁷ Daaní, nú sàni nsihì tiempu cáhàn-nè xì nèhivì cuenta xi Dios, dandu icúmí-nè cui-nè, vàchi iá iin quisì dàná iná cáá ini yavi cùnú sàstnùhù yúcán, te icúmí quisì ma nana-sì quee-sì, nàá-sì xi ndùì nèhivì cáhàn cuenta xi Dios mà, te icúmí-sì cundee-sì nùù-né, dandu cui-nè.

⁸ Te yucán mahì calle ñuu ndé nì xihì Stoho-ndà Señor nchìca cruz, yucán icúmí nsìi ma cuitànduhù-né. Te divi ñuu mà, Sodoma cachí stná-nè xán, te Egipto cachí stná-nè xán, (vàchi malu gà modo xi nèhivì ndoó yucán).

⁹ Pues, ñuu yucán cuitànduhù nsii ma, te cundehè cuàhà nèhivì-né, nèhivì cuàhà raza ndoó cuàhà ñuu, te cuàhà dàhàn cáhàn-nè. Ùni quivì dava cuitànduhù nècuàchìmà yucán, ni mà cuàha nèhivì cundùxin-ne.

¹⁰ Al contrario, cuàhàn-nè cudii ini-nè ñà-sàni xihì nsii ma. Cuàhàn-nè quida-ne vicò, te dacútàhvì stnahá-né iñàha, te cudii ini-nè, vàchi còò gà ndùì nècuàchì sàhnú nì sacahàn cuenta xi Dios, vàchi antes cuàhà gà nì ndoho-ne nì quida nècuàchìmà.

¹¹ Daaní, nú sàni yàha ùni quivì dava, dandu icúmí nsii ma natiacu-nè quida Dios, te ndacuìta-ne. Ñàyùcàndùá, yàha ga icúmí yuhì nsidaa nèhivì cundehè xi-né.

¹² Dandu icúmí tiacu tàchì ana cáhàn ansivi, te dohó cachi-yà:

—Nahà-nsia dìquì-xí yohó.

Dandu canana nècuàchì sàhnùmà dìquì-xí ansivi. Mahì vicò nana-ne cùhùn-nè, cundéhe nsidaa nèhivì xiní ùhì xi-né.

¹³ Dandu divi hora mà, ndee gà icúmí tnàa ñuhíví. Nùù cada ùxin vehe itànduhù ñuu mà, icúmí caà ian. Te icúmí cui ùsà mìl nèhivì sàhà-ñá icúmí tnàa guá ducán. Dandu nèhivì dava ga, cuàhà gà yuhì-nè, te nacuni-nè cahnú gà poder xi mii-yá iá ansivi.

¹⁴ Pues, ñà-jaàn nduú tnùndoho cahnú ñà-ùì. Doco cumàni gà ñà-ùni, te sà-ìtúú vàxa.

Nansa icúmí cuu na sivi ángel ùsà corneta xi-ne

¹⁵ Daaní, ángel ùsà, nì sivi-nè corneta xi-ne. Te nì inini ndee cána cuàhà-né ansivi, cachí-nè:

Sàni sàà quivì cusahnú Stoho-ndà Señor nùù nsidaa ñuu ñuhíví, te nicanicuahàn icúmí-yá cusahnú-yá, mii-yá xì Dèhemani-yá Cristu.

¹⁶ Dandu òcò cùmì nècuàchì sàhnú ndoó nùù Dios dìquì silla vico, nì tutuyuhu-né nùù sàhà-yá, te nì cahvi-néya,

¹⁷ cachí-nè:

Naquímanì-nsí mii-ní Stoho-nsì Dios, vàchi icúmí-ní nsidanicuú poder. Dècuèndè sànhà iá-ní, te nicanicuahàn icúmí-ní coo-ní. Ansivéhé-ní, vàchi sàni quesaha-ní cuàhàn-ní cusahnú dahuun-ní nùù ñuhíví, cuàhàn-ní dandacu-ní nùù nsidaa nèhivì ñuhíví.

¹⁸ Mii-né, nì xidá ini-nè, doco sàni sàà quivì nachitacùhá-nîne castigu xi-ne. Te sàni sàà stná tiempu nsidandaà-ní sàhà nècuàchì nduú nsii. Te vichi icúmí cundiatú stná anima nsidaa ana xinúcuáchì nùù-ní, nacua nècuàchì cáhàn cuenta xi-ní, te ducán stná nsidaa gà ana xinduu nèhivì xí-ní, divi ana cahvi xi-ní, a ducán nduú-né nèhivì ùún, ò nèhivì chicá nì nihì chuun nùù-ní. Doco nèhivì nì quida quini xi ñuhíví, còò, vàchi icúmí-ní dandáñuhú-nîne, nì cachi nècuàchì sàhnùmà.

¹⁹ Daaní, nì nuna veheñùhu ì xí Dios ansivi, te nì xinì ini veheñùhu ma iá caja ì ndé inácaa palabra nì cachi-yà na ní ndòo sahnú-yá xì nèhivì xí-yá sàhana. Dandu yáha ga nì tàsa, te nì tiacu cahá fuerte; te ndee gá nì càhàn stná dàvì, te nì tnàa. Te nì còyo stná iin.

12

Nansa nì xini Juan seña sàhà nècuàchì ñahà nì xinudèhé na ní xidà ini quisì cuahá

¹ Daaní, nì xinì iin seña cahnú ansivi. Nì natù iin nècuàchì ñahà. Tìxi sàhà-né iá luna, te tnùù nihni ñà-ndùá ndixí-né, vàchi orá nduá, te dìnì-né, ñuhá iin corona ndé itándiaa ùxìn ùì sìnsvì.

² Meru sà-ítúú tùinuù mèè xi-ne, ñàyùcàndùá, ndáhì-nè, vàchi nì quicuehè-nè, cuàhàn cacu dèhe-ne.

³ Te nì tùì inga seña nùù ansivi. Nì quecunu iin quisì cahnú cuahá, caní-si nahi còò nahnu-guá, te cuahá laà-si. Ùsà dìnì-sí, te ùxìn nsiquì-sí itá. Cada iin iin dìnì-sí ñuhú sícàté vico.

⁴ Te iá stná ndohò caní-si, te xi ndohò-símá nì cani-sì cuahà sítnúù itándiaa ansivi, nì dàndiàchì-ñásì nùù ñuhivì. Iin tantu sítnúù mà nì ndiàchì nùù ñuhivì, te ùì tantu-sì nì ndòo ansivi. Dandu nì sàcuìn quisì mà nùù nècuàchì ñahà mà, ndiatú-sì tùinuù mèè xi-ne, vàchi cuní-si caxì-sívè na sàni cacu-ve.

⁵ Dandu nì tùinuù-vé, tiàa nduú-vé, te nduú stná-vè mii-yá cuàhàn cusahnú nùù nsidanicuú ñuu, te mà cuáha-ya quida ndevàha-ne. Dandu (nì xinì) nì ndanchito-ya dècuèndè ndé iá Dios nùù silla ndiaha xí-yá.

⁶ Daaní, nècuàchì ñahà mà, nì xinudèhé-nè yucù dàná, vàchi yucán sàni nsidayucun Dios iin xaan ndé coo-ne, te yucán icúmí-nè nihì-né ñà-cutiacu-nè iin mìl ùì cientu ùni dico quivì.

⁷ Doco nì quesaha iá guerra ansivi. Àngel nani Miguel xì compañeru-nè nduú iin ladu, te quisì cuahá mà xì compañeru-si nduú inga ladu, te nì canáa stnahá-si.

⁸⁻⁹ Doco cóni cundéé-sì. Ñàyùcàndùá, nì taxi-nési ansivi, vàchi còò gá permisú cundoo gá-si yucán (ndé iá Dios). Nì dàndiàchì-yási nùù ñuhivì yohó, mii-sí, xì nsidaa ana nchícùn xì-sí. Vàchi quisì (cusahnuma), divi còò iá ndé sàhana nduú-si; ñà-malu nduú-si, te Satanás nani stná-si, te divi-sì nduú ana dandahví xì nèhivì inicutu ñuhivì.

¹⁰ Dandu nì tiacuì iá ana càhàn fuerte ansivi, te dohó cachì-nè:

—Vichi sàni càcu nsidaa nèhivì xí Dios. Te sàni sàà quivì cusahnú fuerte-yà, te cusahnú stná Dèhemanì-yá Cristu. Vàchi sàni ndiachi ñà-malu fuera, vàchi divi-sì nduú ana daquíee cuàchi xì dìquì ñani-ndà (iin-ni cahvi stná xì Yua-nda Dios), vàchi ndui te ñuú dacuidá cuàchi-sìnè.

¹¹ Doco mii-né, nì cundee-né nùù-sì ñà-nì ndacùcahan-né mii-yá nani Lelù Íì, divi mii-yá nì xitià nì-xí sàhà-ndà. Ni cóni cáyuhì-nè, nì cachi vate-né nchícùn-nèyà, vachi dispuestu nì sandoo-ne cui-nè, cóni cùhì ini-nè vida xi-ne.

¹² 'Pues vichi xiñuhu cudì ini nsidaa ana ndoó ansivi, (vàchi sàni cùxio ñà-malu). Doco nèhivì ndoó ñuhivì xì mar, ndahví-nè, vàchi yucán sàni nasaà-si, xidà cuahà inì-si, vachi ináhá-sì làcà iyuhu quivì ndóo nùù-sì (ñà-quida-sì ñà-ndùá cuní-si).

¹³ Daaní, na sàni cundaà inì-si ñà-sàni ndiachi-sì ñuhivì yohó nduá, dandu nì quesaha-sì náâ-si xi nècuàchì ñahà mà, divi nècuàchì nì tùinuù mèè xi.

¹⁴ Dandu mii-né, nì nihitáhvi-né coo ndixìn-né nahi ndixìn yanuni nahnú, te nì ndava-ne cuàhàn-nè yucù ndé coo dèhé-nè. Yucán icúmí-nè lugar (dèhé) xi-ne ndé nihì-né ñà-cutiacu-nè ùni cuià dava, te ducán càcu-ne nùù còò mà.

¹⁵ Doco yuhù còò mà nì cana cuahà tècuì nahi yùte, vàchi cuní-si tnani nècuàchì ñahà mà;

¹⁶ doco nì chindee ñuhivì nècuàchì mà, vàchi nì nsicà ñuhù nì ndèe nsihì tècuì nì cana yuhù-síma.

17 Ñàyùcàndüá, nì xidà gà inì-sì sàhà nècuàchì mà, te nì quesaha-sí xicánúú-sì nandúcú-sí dava ga dèhe-ne, vàchi, cuní-sì quida quini stná-sì xi nsidaa dèhe-ne chívàha xi ley xi Dios, te nchícùn vii xì ñà-ndüá cachí Jesucristu.

13

Nansa nì ndecoyo ùi gà quisì daná

1 Daaní, nì sàcuìn yuhù mar, te nì xinì mahì tècuí nì quecunu iin quisì daná, ùsà dìnì-sí, xì ùxin nsiquì-sí. Te iin iin nsiquì-sí ñuhú iin sicuté vico. Te ìcà iin iin dìnì-sí itándiaa quivì-sí, iin quivì iá quini, te cáhàn contra xi Dios.

2 Nahi tigre, ducán nàhà quisì nì xinì mà. Doco sàhà-sí, nahi sàhà sì-oso, ducán ndáa-ña. Te yuhù-sí, nahi yuhù nsicaha, ducán iá. Te quisì nì quecunu antes, te iá nahi còò, divi nùù quisì yucán nì nìhì quisì yohó poder dandacú-sì nùù ñuhiví. Ñàyùcàndüá, ndee ní cusahnú-sì; vàchi nùù inga quisì mà nì nìhì-sí coo-sì nùù silla cahnú dandacú-sì.

3 Daaní, nì xinì nì nacuehè-sì, iin dìnì-sí nì nacuehè, cuàhàn cuià cahín. Doco nì nduvàha ndé nì nacuehè xi-sì. Ñàyùcàndüá, nì ndulocó nsidaa nèhivì ñuhiví ñà-nì nduvàha-sì.

4 Sàháyùcàndüá, nì cahvi-né quisì nahi còò chindéé xì quisì ùi mà ñà-dàndacú-sí. Stná quisì ùi mà, nì cahvi stná-nèsi, cachí-nè:

—Còò ana ndudává xí quisì jaàn. Còò iin cui cundee xi nùù-sí nú ni náâ-nè xì-sí —xíachi-nè.

5 Te nì nìhì stná-sì ñà-màsà yúhí yuhù-sí cáhàn ndevàha-sì dìquì Dios; ndee nì cáhàn quini-sì dìquì-yá. Te nì nìhìtáhvì stná-sì ñà-cusahnú-sì ùi dico ùi (42) yòò.

6 Te ndee ní canàhá-sì dìquì Dios, quini gá nì cáhàn-sì dìquì-yá, xì dìquì lugar ndé iá-yá, xì dìquì nsidaa ana ndoó cutnàhá xí-yâ ansivì.

7 Te nì nìhì stná-sì ñà-quida quini-sì xì nèhivì xí-yá, te cuàhà-né nì sahnì-sí. Te nì nìhìtáhvì stná-sì ñà-dandacú-sì nùù nsidaa raza nèhivì ndoó nsidaa ñuu, ndéni dàhàn nì cui cáhàn-nè.

8 Te nsidanicuú nèhivì ñuhiví, cuàhàn-nè cahvi-nési. Doco ni-iin nèhivì mà, có-ítúú quivì-né nùù libru xi Lelù Íi. Vàchi cunaha-nsiá, dècuèndè na táyôo ñuhiví, dandu sà-itándiaa quivì nsidaa ana icúmí cutiacu nùù-yá.

9 Ni cúníní vaha nsidaa nèhivì nansa cachí palabra yohó.

10 Nú ni chícadí nèhivì-ndó, dandu mii stná-nè icúmí-nè cundiadi stná-nè; te nú ni cahní nèhivì-ndó machete, divi machete icúmí-nè cui stná-nè. Sàhà ñà-jaàn, xiñuhu cundoo-nda calma, te cunihnu vaha ini-ndà mii-yá, vàchi nèhivì xí-yá nduu-nda.

11 Daaní, nì xinì yucán nì quecunu inga quisì daná. Nùù ini ñuhù ñuhiví nì nana-sì. Itá ùi nsiquì-sí, nahi nsiquì lelù, doco nacua cáhàn quisì cahnú nahi còò mà, ducán cáhàn stná quisì yohó.

12 Ladu nùù quisì nì quecunu nùù mar, jaàn iín quisì yohó, te sàhá chindéé quisimà-sí, ñàyùcàndüá quidá-sì cuàhà iñàha ndulocó nèhivì. Te quidá stná-sì xi nèhivì ñuhiví ñà-fuerza cahvi-né quisì iá-sì nùù-xí, divi quisì nì nacuehè daná dìnì-xí, te nì nduvàha-sì.

13 Te quisì iín yucán, cuàhà gá iñàha quidá-sì ñà-quida tontó-te nèhivì, dècuèndè cóyo stná ñuhu ansivì cundehè-né, ducán quidá-sì,

14 dandáhvì-siné ñà-cuàhà guá quidá-sì, vàchi nì nìhì-sí ñà-quida-sì ducán nú iín-sì nùù inga quisì mà. Ñàyùcàndüá, cachí-sì xi nèhivì ñà-quidayucun-nè figura cahnú cunduu quisì nì nacuehè, te nì nduvàha ma.

15 Te figura mà, ndè nì dítá tàchá, vàchi ducán nì nìhì inga quisì mà quida-sì xán. Dècuèndè cáhàn stná nì quida quisì mà. Te nú có-càndísâ iin nèhivì cahví xán, dandu dandacú-sì cui nècuàchì mà.

16 Te icúmí stná-sì dandacú-sì màcùtuu iin tnuni xi-sì ìcà nsidanicuú nèhivì, ò sea màcùtua ini ndahàcuàhá-nè, te ò nùù tnaa-nè. Doco nsidanicuú-né, icúmí màcùtuu tnuni

mà ìcà-né, a sea ni cúndúú-né nèhivì nihí chuun, te ò nèhivì ùún, ò nècuàchì ndahví, ò nècuàchì cuicà, ò iin peón-ni, ò iin lamú.

¹⁷ Vàchi nú còò tnuni xi-sì, ò quivì-sí, te ò número xi quivì-sí ìcà-né, dandu còò permisú cuiin-ne ò dicò-né.

¹⁸ Cunaha-nsiá, palabra nchichí nduá cuàhìn cachì xì-nsiá yohó. Iin nècuàchì nchichí, vátùnì cahvi-ne nadaa nduá sáà número xi quivì quisì mà, vàchi número xi quivì iin tiàa nduá. Te divi 666 nduú número mà.

14

Alanbanza icúmí coto 144,000 nèhivì xí Jesús

¹ Daaní, nì xini dècuèndè yucù Sión, te yucán iin mii-yá nani Lelù Íi, te cutnâhâ-yá xì iin cientu ùi dico cùmì mil (144,000) nèhivì, te ìcà tnaa iin iin-ne itúú quivì Yuandiáhâ-yâ.

² Dandu nì inini ndè ansivi tiacú na ian cundáá nùu yutnù cuerda nani arpa. Te fuerte tiacú nahi tēñuhu cuáhà, na ian cáhàn ndee dàvì.

³ Te nì caxito nèhivì cuáhà mà iin alabanza saa, itá-né frente silla ndiaha xí-yá ndé itá stná cùmì ana itá saín nùu-yá, te ndé ndoó stná òcò cùmì nècuàchì sàhnú. Doco ni-iin nècuàchì dava ga, mànicùì cutùha stná-nè coto-ne alabanza mà, cuisì nèhivì cuáhà itá yucán, divi nèhivì xínduu iin cientu ùi dico cùmì mil tiàa ma. Te nsidaa-né nduú nèhivì nì càcu nùu ñuhiví yohó nì quida (Jesucristu).

⁴ Te nì còò ni-iin cuàchi nì quidá-né xì nècuàchì ñahà, vàchi cóni cáhàn-nè xì nècuàchì ñahà ni-iin xichi. Te vichi, nchícùn-nè mii-yá nani Lelù Íi ndéni nì cui nì cùhùn-yà. Antes mahì nèhivì ñuhiví nì sandoo-ne, doco vichi sàni càcu-ne ñà-nì dànáa-yá sàhà-né, te sàhájàn nì càcu-ne ñà-cunduu-ne na iin promesa chica ndiaha nùu Yua-nda Dios xì nùu Lelù Íi,

⁵ vàchi de por sí, mà túha-ne dandahví-nè; te nicanicuahàn ndoó-né nùu silla ndiaha ndé iá-ya, vàchi còò ni-iin falta xi-ne nùu-yá.

Ùni razón nì cachitnùhu ùni ángel ndavá ansivi

⁶ Daaní, nì xini ndavá inga ángel dìquì-xí ansivi, nihí-né razón vàha xi Dios, iin razón icúmí cunaha nicanicuahàn. Te cuàhàn ángel mà cachitnùhu-neà xì nsidaa nèhivì nsidanicuú ñuu iá ñuhiví, nsidanicuú raza-nè ndéni dàhàn nì cui cáhàn-nè.

⁷ Te dohó nì cachi ángel xì nèhivì mà:

—Cahvi-nsiá Dios, te tavà-nsiá tññuhu xí-yá, vàchi sàni sàà quivì nsidandaà-yà sàhà cuàchi nèhivì ñuhiví. Ñàyùcànduá, cahvi-nsiáyà, vàchi divi mii-yá nduú ana nì quidayucun xì ansivi, ñuhiví, mar, xì nsidaa stná ndé caná tècuíí.

⁸ Daaní, (nì xini) nchícùn gà vaxi inga ángel, te dohó nì cachi-nè:

—Sàni ndañuhu ñuu Babilonia, sàni chàhmà dahuan nì quida Dios, vàchi nì sàha nèhivì ñuu mà ñà-coho stná nèhivì inga ñuu, tè ñàyùcànduá, nì xini stná nècuàchìmà, te quini nihnú stná ini-nè vichi. Ñàyùcànduá, icúmì nècuàchì Babilonia mà nihì-né iin castigu fuerte —nì cachi ángel mà.

⁹ Daaní, nchícùn gà vaxi inga ángel, te vichi nduú ùni ángel sàni quecoyo. Te nì ndàhì ndee-né, cachí-nè:

—¡Ndahví nsidaa ana cahvi xi quisì daná mà ò figura-si! ¡Te ndahví stná ana sà-itúú tnuni xi-sì nùu tnaà-xi, ò ini ndahà-xí!

¹⁰ Vàchi yáha ga icúmì-nè ndoho-ne mahì ñuhu cahnú ndé xíxìn azufre sahán quini, te indéhe stná ángel ìi xí Dios, xì stná Lelù Íi. Te castigu mà, ducán quea na ian cuàhàn dacohó Dios-nè iin ndutè quini, te micuísì ndutè fuerte cunduu-tè, doco fuerza coho-nète, vàchi xidà ini-yà sàhà-né.

11 Ñàyùcàndùá icúmí-nê cundoo-ne ndoho-ne nicanicuahàn ndé (xíxìn ñuhu, te) caná ducún ñuhmà, ni mà nunca nihì gá-nè cundoo dadí-né, ndui te ñuú icúmí-nê ndoho-ne, vàchi nì cahvi-né quisì mà xì figura-sì, te nì sàcùtuu stná quivì-sì icà-né.

12 Ñàyùcàndùá, cuàhà paciencia xiñuhu cucumi nsidaa nèhivì xí Dios, divi nsidaa ana chívàha xi ley xi-ya, te nihnú vaha ini xì (Dèhemanì-yá) Jesús.

13 Daaní, nì tiacu tu iá ana cáhàn ansivi, cachí-nè xì:

—Vichi tiaa-yó palabra yohó cachí xùn: “Dècuèndè vichi xì quivì nù-xí, ndiaha gá coo xi nèhivì cui, te nú nduú-né ana nchícùn xì Stoho-ndà Señor”. Ñà-ndáà ndúa, cachí Espíritu Ìì xí Dios, icúmí nècuàchìmà quetatu vaha-ne, mà ndóhó gá-nè nù chuun quidá-né, te dècuèndè gloria nacuni stná mii-yá nsidaa obra nì quida-ne.

Nansa cuàhàn cuu quivì último

14 Daaní, nì xinì iin vïcò cuxín yaa, te nù vïcò mà iá ana indéhe nahi mii-yá ana nduú Tnaha Nèhivì Ñuhiví. Te dìni-yá, ñuhá iin corona oro, te iníndáhá-yá iin hoz dìin.

15 Dandu nì quee inga ángel nù veheñuhu ìì xí-yá, te nì ndàhì-nè nì càhàn-nè xì mii-yá iá nù vïcò, cachí-nè:

—Cahndè-ní viu ndanihi-ní cosecha, vàchi sàni xida viu ñuhiví, te vichi sà-ìá ndanchi-toa.

16 Daaní, nì sahnde-yà viu iá ñuhiví, te ducán nì ndanchito cosecha mà.

17 Dandu nì quee inga ángel nù veheñuhu ìì iá gloria mà, te iníndáhá stná-nè iin hoz dìin.

18 Dandu nì quee inga ángel nù ndé iín mesa ìì ndé cahvi-né Dios, te nduú-né ángel dandacú nù ñuhu xíxìn. Te nì ndàhì ndee-né, cachí-nè xì ángel iníndáhá hoz mà:

—Xì hoz dìin jaàn cahndè-ní nsidaa sì-uva caá nducuyòhò ñuhiví, vàchi sàni xìchi-sì —nì cachi-nè.

19 Ñàyùcàndùá, nì sahnde ángel mà sì-uva ñuhiví xì hoz xi-ne, te nì dàtácá-nè nsidaa-sì nì dàquéè-nèsi ini lugar ndé chàhmà-sì quee tècuí-sì. Te seña ñà-ìcúmí-sì chàhmà-símà nduú ñà-ìcúmí Dios cuàha-ya nèhivì malu iin castigo fuerte.

20 Vàchi cunaha-nsiá, fuera ñuu nì chàhmà-né, te nì xìtia nì-né, ducán cuàhà nì mà nahi yùte ndé queé cuàhà tèñuhu, te cunú nì xica (nahi ùì metro), na ian ducún iá frenu xi idu. Te ùni cientu kilómetro nduú ñà-càní yùte nì mà.

15

Ùsà ángel dandacú nù ùsà tnùndoho chicá nahnú

1 Daaní, nì xinì cuú inga seña ansivi, iin seña ndiaha. Te nì nduloquí, vàchi nì xinì ndoo ùsà ángel dandacú nù ùsà tnùndoho chicá nahnú, te ñà-último nduájàn, vàchi sà-ìá, xì ñà-jaàn-ní mà cuidà gà ini Dios nú sàni yàha.

2 Dandu nì xinì mar iá (ansivi) yucán, nahi vidriu nduá, te dácà stnahá stná vidriu mà xì ñuhu xíxìn, ducán nàhà. Te nù mar mà itá cuàhà nèhivì, xínduu-ne ana nì cundee nù quisì daná mà, xì nù figura-sì, xì nù número xì quivì-sì, nù nsidaa ñà-jaàn nì cundee-né, te vichi itá-né yucán, nihí-né yutnù cuerda cundaa.

3 Te nacuatú stná-nè, xitó-né alabanza xi Moisés nì xinucuachi nù Dios (sàhana), te xitó stná-nè alabanza xi Lelù Ìì, cachí-nè palabra yohó:

¡Ndiaha gá nsidaa obra quida-ní, Stoho-nsì Dios; ndulócô-nsì ñà-cuàhà guá quida-ní!

Nsidanicuú poder icúmí-nì. Doco micuísì ñà-ìá vii nduá quida-ní, cuisì ñà-ìá vaha nacua ndiá icà. Ansivéhé-nì, vàchi rey nduu-ní, te cusáhnú-nì nù nsidaa ñuu.

4 Te vichi xiñuhu cahvi nsidaa nèhivì mii-ní, Stoho-nsì Señor; xiñuhu nsidaa-nsì ndanihi cahnú-nsì mii-ní, vàchi cuisì mii-ní ìì ndisa-ní. Te icúmí nèhivì nsidaa ñuu tnàtuu-ne cuitasisi-né nù-ní, vàchi nù nsidaa-né nàhà claru iá vii nsidaa ñà-nduá nì quida-ní xì nèhivì ñuhiví.

Ducán nì cachi-nè.

⁵ Daaní, nì nsiamà, dandu nì xinì nì nuna quartu chicá ìi iá ini veheñùhu xi-ya ndé iá vaha ley ìi xí-yá.

⁶ Te nì caquee ùsà ángel mà vaxi-ne, diví ángel dandacú nùù ùsà tnùndoho nahnú icúmí ndoho nèhivì. Te ndixí-né sìcoto yéhè cuxín yaa, te nuhní nchìca-ne iin siuhma oro.

⁷ Dandu nì tnàtuu iin ana iín saín nùù-yá, te nì sàha-ne iin iin ángel mà iin yaxìn oro, chitu iin iin-sì castigu xi Dios, divi mii-yá itiácú nicanicuahàn, vàchi sàhà cuàchi nèhivì, ñàyùcàndùá, xídà inì-yà.

⁸ Daaní ñà-ndiaha fuerte guá-yà, te ñà-ndee guá dandacú-yá, ñàyùcàndùá nì cana ñùhmà, te nì xitià inicutu veheñùhu ìi mà. Te sàhà ñùhmà mà mànicùì nansihvi ga ni-iin nèhivì ini lugar mà dècuèndè sàni nsihì ùsà tnùndoho nahnú dandacú ángel mà nùù-xí.

16

Nansa icúmí dacóyo ángel ñà-ñùhú ini ùsà yaxìn oro, divi ñà-ndiúú tnùndoho nahnú

¹ Daaní, nì tiacuí iá ana cáhàn fuerte ini veheñùhu ìi mà, cachí-yà xì ùsà ángel mà:

—Cuahán-ndá dacóyo-ndá ñà-ñùhú ini iin iin yaxìn mà dìquì ñuhivì ñà-cundua castigu fuerte sàhà-ñá xídà ini Dios sàhà cuàchi nèhivì —nì cachi-nè.

² Dandu nì quee ángel primeru nì dacóyo-ne ñà-ñùhú ini yaxìn xí-né dìquì ñuhivì. Ñàyùcàndùá, nsidaa nèhivì itúú tnuni xi quisì daná mà, nì cana iin nsihì ùhì ìcà-né, quini iá, te yáha ga cuhià; nùù nsidanicuú ana cahvi xì figura quisì mà, nì cana nsihì ùhì mà ìcà-né.

³ Daaní, ángel ùì, nì dacóyo-ne ñà-ñùhú ini yaxìn xí-né mahì mar. Te nì nanduu nsihì tècuìì mà nì, nahi nì nèhivì nì xihì. Ñàyùcàndùá, nì xihì nsidanicuú quisì itiácú ñuhú mar.

⁴ Daaní, ángel ùnì, nì dacóyo-ne ñà-ñùhú ini yaxìn xí-né, nì còya nùù nsidaa yùte xì nùù nsidaa lugar ndé caná tècuìì, te nì nanduu stná tècuìì mà nì.

⁵ Dandu nì tiacuí cáhàn iin ángel dandacú nùù nsidaa tècuìì, te nì cachi-nè xì Yua-nda Dios:

—Stoho-nsì Señor, mii-ní nduú ana iá ndè nicanicuahàn sàhana. Te ìi gá stná-ní, ñàyùcàndùá, iá viì ñà-nduá sàni quida-ní xì nèhivì sàhà cuàchi-ne.

⁶ Vàchi mii-né, nì casahnì-né nèhivì vaha xi-ní; cuahà tiàa nì cáhàn cuenta xi-ní nì casahnì-né, te nì xitià nùù-né, ñàyùcàndùá, divi nì nduá icúmí nècuàchì mà coho-ne quida-ní. Ducán icúmí coo xi-né, vàchi malu-nè.

⁷ Dandu nì inini iá inga ángel yatni nùù mesa ìi ndé cahvi-né Dios, te nì cachi-nè:

—Ñà-ndáà nduá, Stoho-nsì Dios. Nsidanicuú poder icúmí-nì, te micuìsi ñà-iá viì nduá sàni quida-ní xì nèhivì sàhà cuàchi-ne, cuisì ñà-ndiá ìcà nduá sàni quida-ní xì-né.

⁸ Daaní, ángel cùmì, nì dacóyo-ne ñà-ñùhú ini yaxìn xí-né nùù orá, te ñàyùcàndùá nì nihitàhvi orá dansì fuerteà nèhivì. Nahi ñuhu xìxìn nì nandua,

⁹ te yáha ga cuahà nì nsì-né sàhà ñà-ihni gá. Ñàyùcàndùá, quini guá nì canàhá-nè dìquì Dios, vàchi divi-ya nduú ana nì dandacú coo tnùndohoma; doco cóni nácócuììn ini-nè sàhà cuàchi-ne, ni cóni nácúnì-nè ñà-viì nduá quidá-yá.

¹⁰ Daaní, ángel ùhùn, nì dacóyo-ne ñà-ñùhú ini yaxìn xí-né nùù silla ndé iá quisì daná mà, te nì nàcuììn tnùù inicutu ñuu ndé dandacú-sì. Te nèhivì ndoó yucán, mà cundéé gá ini-nè dolor ndohó-né, ñàyùcàndùá nì tnii nùhu-ne yáá-nè.

¹¹ Te nì canàhá quini-ne dìquì mii-yá iá ansivi ñà-cuahà guá tnùndoho yáha-ne, te ndohó stná-nè sàhà nsihì ùhì nì cana ìcà-né. Doco ni sàhà ñà-jaàn cóni cùú-né arrepentir sàhà ñà-có-ndiáá quidá-né.

¹² Daaní, ángel ìñù, nì dacóyo-ne ñà-ñùhú ini yaxìn xí-né dìquì yùte cahnú nani Eufrates. Dandu nì ndoco tècuìì, te ducán mà cádi yùte ma nùù soldadu cuahàn cundaca rey inga ñuu caquixi ladu ndé caná orá.

¹³ Daaní, nì xinì nì quee iin sì-dicui yuhù iin iin quisi yucán. Ñà-malu nduú sì-dicui ma. Iin-sì nì quee yuhù quisi cuahá nahi còò, te ingà-si nì quee yuhù quisi nì quecunu mahì mar, te ingà-si nì quee yuhù quisi cáhàn cuenta xi quisi úi mà.

¹⁴ Te espíritu xi ñà-malu nduú sì-dicui ma, te nì quee-sì cuàhàn-si ñà-chiyuhù-sí nsidaa rey dandacú ñuhiví yohó. Cuàhà gá icúmí quisi mà quida-sì ñà-ndulocó rey mà, te candisá-te quixi-tè nataca nsihi-tè, cundoo tùha-tè sàà quivì coo guerra, te cundua quivì cahnú xí Dios, divi mii-yá icúmí xí nsidanicuú poder.

¹⁵ Te vichi cachí-yà xì-ndà: “Cunaha-ndá, naànáá icúmí sàì ndé ndoo-ndá. Ñàyùcàndüá, cundoo tùha-ndá, te cunihnu vaha inì-ndá sàhá màsà cúcáhàn-nù-ndá na ian cucahan-nù iin nèhivì nú còò sìcoto xi-ne”.

¹⁶ Daaní, nì nataca nsihi soldadu, xì stná tè-dàndacú nù-té, nì casaà-te iin xaan nani Armagedón, vàchi ducán nani lugar mà dàhàn hebreu.

¹⁷ Dandu ángel ùsà, nì dàcòyo-ne ñà-ñùhú ini yaxìn xí-né mahì ansivi. Te nì tiacu fuerte cáhàn ndee ana cáhàn ini veheñùhu ìì xí Dios ansivi. Divi mii-yá iá nùù silla ndiaha nduú ana nì càhàn, te nì cachi-yà:

—jSà-íá!

¹⁸ Dandu nì tàsa cuahà, te nì nìhi fuerte, te yáha ga nì càhàn dàvì, te nì tnàa fuerte sàstnùhù. Chicá fuerte nì tnàa nùù nsidaa xichi inii tiempu ndoó nèhivì ñuhiví.

¹⁹ Te ñà-ndee guá nì tnàa, ñàyùcàndüá nì tàhndè ñuu cahnú yucán, ùnì ñuu nì nandua. Te nsidaa gá stná ñuu ñuhiví, nì caà nsihi vehe yucán. Dandu nì nsinuu ini Dios sàhá ñuu Babilonia, ñà-cuàha-ya ñuu mà iin castigu cahnú, vàchi xidà ini-yà sàhá nsidaa cuàchi nècuàchì ñuu mà, ñàyùcàndüá cuàhàn-yà quida-ya xì-né na ian dacohó-yánè iin ndutè có-cùnì-nè.

²⁰ Dandu nsidaa yucù iá ñuhiví, nì ndèa ini ñuhù, te nì ndèe stná ñuu iá mahì mar.

²¹ Daaní, ndè ansivi nì còyo iin nùù ñuhiví, nahnú sàstnùhù iin ní cacòyo ma, ùi dico kilo vèe iin ian, cunaha-nsiá. Te nèhivì ñuhiví, quini ga nì dàquée cuàchi-ne dìquì Dios, vàchi yáha ga nì ndoho-ne ñà-nì còyo guá iin nahnuma.

17

Nansa icúmí ndoho ñahà malu

¹ Daaní, iin ángel nùù nsì-úsà nècuàchì xí-inindhaha yaxìn, nì tnàtuu-ne nùì nì càhàn-nè xì nì cachi-nè:

—Cùhùn-ndà dacuní mii-ní nansa icúmí ndoho ñahà malu iá guá fama xi, te iá-ña ndé ñuhú cuàhà tècuíí.

² Divi ñahà mà nduú ana iá guá xì cuàhà tè-cùsáhnù ñuhiví yohó. Te divi nùù mii-ñá sàni cutùha stná dava ga nèhivì ñuhiví quida quini stná-nè nahi miá. Te queámà na ian iin-ni vinu xihí nsidaa-né xì-ñá, te ducán xini stná-nè —nì cachi ángel.

³ Ñàyùcàndüá, ndacá ángel mà yuhù cuàhàn xìcà-nsì dècuèndè ndé nduú yucù. Na ian sánî quidá Espíritu Ìì xí Dios, ducán nduá cuàhàn-nsì. Te na ní sàà-nsì yucù mà nì xinì iá iin ñahà indánuú-ña iin quisi daná cuahá, ùsà dìnì-sì xì ùxìn nsiquì-sì, te itándiaa cuàhà quivì sìquini cáhàn contra xi Dios.

⁴ Te ndixí-ña sìcoto moradu vico, xì sìcoto cuahá laa, te nì nducutá oro xì yùù yéhè, xì stná sidiqui cuxín vico. Te iníndáhá-ñá iin copa oro chitu nsidaa ñà-có-ndiáá xì nsidaa ñà-siquini, vàchi cuàchi ñahà mà nduú ñà-ñùhùmà.

⁵ Daaní, ìcà tnaà-ña itúú iin quivì ùhì mànhì ini-ndà. Dohó cachá: Ñuu cahnú Babilonia, divi ñahà nì dàcuàhà-xì dèhe yoco-xì ñà-quida quini stná-ña, te nsidaa ana quidá quini ñuhiví, xínduu stná-nè dèhe ñahà yohó, ducán cachá.

⁶ Te nì xinì ñahà mà, na ian xini-ñà, vàchi ñà-nì cudìi guá inì sàhá ñà-nì xìtìa nì nèhivì xí Dios, ñàyùcàndüá, ducán queá na ian xini-ñà nì quida nì mà, vàchi nì cudìi guá inì nì xihì nèhivì váha cáhàn vate sàhá Jesús. Te yuhù, cuàhà gá nì nduloquí indéhi ñahà mà.

⁷ Dandu nì cachi tu ángel mà xí:

—Màsà ndúlócô-ní, vâchi cuàhìn dacuní mii-ní ñàha ñà-cundaà vâha inì-ní sàhà ñahà mà xì sàhà stná quisì indánuú-ña, divi quisì íá ùsà ònì-xí, xì stná ùxìn nsiquí-sí.

⁸ Cunaha-ní, antes ñisa ìa quisì mà ñuhiví, te vichi còò cá-si, doco ícúmí-sí naquecunu-sì quee-sì yavi cunú cuàhà, dandu después sàa-si ndañuhu dahuun-sì. Te cuàhà gá nèhiví ñuhiví, ícúmí-nê ndulocó-nè na cuni-nè quisì mà ñà-nì ìa-sì ñuhiví, te còò cá-si, doco ícúmí-sí nandecunu tu-sì. Doco nèhiví mà, ni-iin-ne có-itàndiaa quivì-né nùù tutu xi Dios. Vâchi tutu mà, dècuèndè na táyôo ñuhiví, dandu sà-itàndiaa quivì nsidaa nèhiví cutiacu nicanicuahàn.

⁹ 'Pues vichi, yohó íá iin palabra nchichí cundaà ini nècuàchì nchichí. Cunaha-ní, nsì-ùsà ònì quisì mà, ùsà yucù nduá, te ònì yucù mà íá ñahà mà.

¹⁰ ùsà stná rey ndoó. Ùhùn-te sàni yàha, te iin-tè, dandacú-te vichi, te íá stná ingà-te, doco cumàni gá quesaa-te. Daaní, nú sàni quesaa-te, dandu iin ratu tii ícúmí-tè dandacú-te.

¹¹ Te quisì daná ñisa ìa, te vichi còò cá-si, pues divi quisì mà nduú stná-si iin rey dandacuma, divi rey ùnà cunduu-sì, doco nùù ùsà rey primeru, iin-tè nduú stná-si. Dandu después ícúmí-sí sàa stná-si ndañuhu dahuun-sì.

¹² 'Daaní, ùxìn nsiquí quisì mà, ùxìn rey xíndua, doco tàñáha ga ñhì-té ñuu ndé cusahnú-te. Cuisì imindaa hora ñhítáhvi-té cutnahá-te xì quisì daná ñà-cusahnú-te.

¹³ Vâchi nsì-ùxìn rey mà, iin-ni sàni candatnuhu váha-tè ñà-dayáha-tè ñuù-te ndahà quisì mà ñà-dandacú-si lugar xi-tè.

¹⁴ Te ícúmí stná-te quida-tè guerra nàa-te xi Lelù Íi, doco mii-yá, ícúmí-yâ cundee-yá nùù-té, vâchi Stoho-ndà Señor nduú-yá, te rey ndiaha nduú stná-yà, vâchi chicá fuerte-yà nùù nsidaa gá ana dandacú, xì nsidaa gá stná ana itá fuerte; te nsidaa ana nchícùn xi-yá, nèhiví nì cana-ya xínduu-ne, divi nèhiví nì nacàxin-ya, te iin-ni nchícùn-nè palabra xi-ya nicanicuahàn.

¹⁵ Dandu nì càhàn tu ángel cutnàhâ xí, cachí-nè:

—Cunaha-ní, nsidaa tècuì cuàhà ndé íá ñahà malu mà, nèhiví nduú-te, divi nèhiví ndoó cuàhà ñuu inicutu ñuhiví, vâchi cuàhà raza nduú-né, te cuàhà dàhàn càhàn-nè.

¹⁶ Doco ùxìn rey nduú ùxìn nsiquí itá ònì quisì daná mà, ícúmí-tè cuidà inì-te sàhà ñahà mà. Ñâyùcànduá, cuàhàn-te dacúxíó-te nsidaa ñà-ícúmí-ñâ. Còò ni-ìñàha cucumiá. Dandu cahní-tèñâ, te cahmi-tèñâ.

¹⁷ Iin-ni ícúmí nsidaa-tè nacani inì-te quida-tè ducán, vâchi ícúmí Dios danácánì ini-yàte quida-tè ñà-nduá nì chitnùnì ini-yà cuu, te sàhámà ícúmí-tè cuàha stná-te quisì mà dandacú-si lugar xi-tè dècuèndè cuu ndisa ñà-nduá sàni cachitnùhu-ya antes.

¹⁸ Te cunaha-ní, ñahà nì xinì-ní mà, divi ñuu cahnú dandacú nùù nsidaa rey ñuhiví nduú-ña.

18

Nansa ícúmí ndañuhu ñuu Babilonia

¹ Daaní, nì nsihì ñà-jaàn, dandu nì xinì mànuu iin ángel ansivi vâxi-ne. Iin ángel dandacú nduú-né, te nanchí fuerte ñuhiví ñà-yèhè guá-nè.

² Te nì ndàhì ndee-né, cachí-nè:

—Sàni ndañuhu dahuun ñuu cahnú Babilonia. Te vichi cuisì ñà-malu xíndoo yucán, cuisì espíritu ía quini, vâchi sàni nanduu lugar yucán nahi nchihò nsidanuu laa sìquini.

³ Vâchi ndè nùù ñuu mà (nì quesaha cuàhà estilù sìquini nì cutùha nèhiví nsidaa gá ñuu, te nì quida-ne nahi ñahà malu mà), na ian iin-ni sàni xihì-ne xì-ñá, te xìni stná-nè. Daaní, cuàhà stná rey ndoó ñuhiví, ñisa xi-ìa stná-nè xì ñahà mà. Te nèhiví nacuíín, te nadíco, sàni cucuica cuàhà stná-nè sàhà ñà-sìquini vico nì xiin nècuàchì ñuu mà.

⁴ Dandu nì tiacuì íá ana càhàn ansivi inga xichi, te dohó cachí-yà:

—Nsidaa nsiohó nêhivì-xí, caquee-ndá nùù ñuu sìquini jaàn sàhà-ñá màsà quidá stná-ndá cuàchi na ian quidá vecínu xi-ndá jaàn, dandu mà níhì stná-ndá castigu nahi mii-né.

⁵ Vàchi ndè ansivi iín dini cuàchi-ne, te vichi sàni sàà stná quivì mà-cúndéé gâ inì sàhà nsidaa ñà-có-ndiàá xíquida-ne.

⁶ Ñàyùcàndüá, vichi, nacia sàni quida quini-ne, divi ducán icúmí stná-nè níhì-né tnùndoho, dècuèndè ùi tantu icúmí-nê níhì-né sàhà cuàchi nì quida-ne, vachi yáha ga tùha-ne quida quini-ne xì nècuàchì dava ga, ñàyùcàndüá, iin doble icúmí nacuitacùhá-nè.

⁷ Yáha ga cuadú-nè ndoó-né ñuhiví, cutu ndoó vico-né quidá ndevàha-ne nicanicuahàn. Ñàyùcàndüá, dava ni tantu icúmí-nê ndoho-ne, te cundoo-ne tnùnsí ini, mate vichi nihnú ini-nè, cachí-nè: “Ndiaha mání iá vida xi. Yùhù nduí ana dandacú, còò ni-iñàha cuu xí, ni mà nunca sàì coi tnùnsí ini”.

⁸ Doco sàhà-ñá nihnú ini-nè ducán, ñàyùcàndüá icúmí-nê yàha-ne cuàhà tnùndoho, cuàhà gá icúmí-nê ndoho-ne, te tnana-ne, te coo stná tnama ñuu-nè, te cui cuàhà-né, dandu coco stná ñuu-nè. Te nsidaa tnùndoho ma, iin quivì-nì icúmí quixa dìquì-né, vachi fuerte gá mii-yá ana cuàha xi castigu mà, vachi divi Stoho-ndà Dios nduú-yá.

⁹ Daaní, nsidaa stná rey ñuhiví, icúmí-tê cuacu-tè, te cuhuun cuahà inì-te na cun-dehè-té xíxìn ñuu mà, te caná ñùhmà-ñà, vachi mii-té, iin-ni nìsa cutnahá stná-te nì caquida-tè cuàchi nahi nêhivì ñuu mà, iin-ni nì sacutnahá stná-te xi-né cundoo vico-né ñuhiví.

¹⁰ Ñàyùcàndüá, xica itá-te ñà-yúhì-te níhì stná-te castigu, te cachí-te:

—¡Ndahví nècuàchì ñuu cahnú Babilonia yucán! ¡Ndahví-nè! Vachi mate ñuu fuerte nì sandua, doco tìxi imindaa hora nì ndañuhu dahuan nì quida Dios.

¹¹ Daaní, stná tè-nàcuíin te nadíco ndoó inicutu ñuhiví, icúmí-tê cuacu stná-te sàhà ñuu mà, te cuhuun cuàhà inì-te, vachi còò cá nècuàchì ñuu ma cuiin xi ñà-ndüá nihí-te dicò-té.

¹² Vachi nihí-te oro, xì plata, xì yùù yéhe, xì sìdiqui cuxín vico, xì sìcoto cuxín finu, xì sìcoto moradu, xì sìcoto seda, xì sìcoto cuahá, xì yutnù sahán viì, xì stná cuàhà iñàha nì cuyucun nùhu elefante, xì cuàhà iñàha nì cuyucun yutnù finu, ò càa yahá, ò càa uun, ò yùù finu mármol.

¹³ Te nihí stná-te canela, xì cuàhà ñà-nì nchico sahán tnami, xì inciensu, xì vinu, xì tàtnà mirra, xì cutù, xì aceite, xì harina, xì trigu, xì idunsiquì, xì riì, xì idu, xì carreta, ndè stná nêhivì dicò stná-te. (Nsidaájàn ndüá nìsa xiin nècuàchì ñuu mà.)

¹⁴ Ñàyùcàndüá, dohó icúmí cachi nêhivì xì nècuàchì ñuu mà:

—¡Ndahví-nsià! vachi nsidaa ñà-vico xího guá-nsià, sàni ndañuhá. Nì saxixi vaha-nsià puru ñà-chicá viì, te vico gá nì sandixi stná-nsià, doco vichi còò cá ni ian mà, ni mà nunca tui ga nùù-nsiá.

¹⁵ Cunaha-nsiá, cuàhà gá nì cucuica nsidaa tè-dìcò ma sàhà ñà-ndüá nì sadicò-té nùù nècuàchì ñuu mà. Ñàyùcàndüá, itá xica-té, (indéhe-té), yúhì-te ñà-càhnù-guá tnùndoho iá ñuu mà, te sacú-te, tnaná-te,

¹⁶ cachí-te:

—¡Ndahví nècuàchì ñuu cahnú yucán! Vachi sìcoto cuxín finu nì sandixi-ne, xì sìcoto moradu, xì sìcoto cuahá, na iin nècuàchì ñahà ndixí vico ní nducutu xi oro, xì yùù yéhe, xì stná sìdiqui cuxín vico.

¹⁷ Doco cunaha-nsiá, tìxi iin hora-ni sàni ndañuhu nsidaa ñà-cuicà mà —nì cachí-te.

Daaní, nsidaa gá stná tiàa dacaca-xi barcu nahnú, itá xica stná-te, cutnàhà-te xi peón quidáchúùn nùù-té, xì stná cuàhà tiàa sàhàn viaji inì-nu,

¹⁸ itá nsidaa-té indéhe-té ndé caná ñùhmà xíxìn ñuu mà, te cachí-te:

—¡(Na cuaha guá) nìsa ià ñuu yucán! Còò cá ni-iin ñuu ndudává xân —cachí-te,

¹⁹ sacú-te, tnaná-te, sòdò-te ñuhù dìni-té, cachí-te— ¡Ndahví ñuu cahnú yucán! Vachi sàhà nêhivì ndoó yucán nì cucuica nsidaa tè-icúmí xí barcu xicá mar, ñà-cuica guá ñuu-nè. Doco, ndahví-nè, vachi tìxi iin hora-ni sàni ndutu nsihá —nì cachí-te.

²⁰ Pues vichi xiñuhu cudìi gá ini nsidaa ana ndoó ansivi, xì nsidaa stná nèhivì (ñuhivì) nì nìhì chuun nùù Dios, xì nsidaa stná profeta cáhàn cuenta xi-ya, xì nsidanicuú gá stná nèhivì xí-yá, vàchi vichi sàni nachitacùhá-yà sàhà ñà-quini guá nì quida nèhivì ñuu mà xì-né.

²¹ Daaní, nì (ndecunu) iin ángel fuerte, nì ndanihi-ne iin yùù cahnú nahi yùù yódò xí molinu, te nì dandiàchì-néà mahì mar, te nì cachi-nè:

—Cunaha-nsiá, ducán icúmí cuu stná xì ñuu cahnú Babilonia mà, icúmíâ ndañuhu dahuan, te mà nunca gà sàà ndecunua.

²² Mà nunca tiacu gà cundáá yutnù cuerda ñuu mà, ni stná pitu, ni mà síví gà stná ni-ñàha cundáá, vàchi mà cóó gá ni-iin músico yucán, ni mà cóó gá ni-iin tiàa quida-xi oficiu xi-tè, ni mà tiácú gà stná nchicó ni-iin nècuàchì (ñahà).

²³ Ni mà cútnùù gà ñuhu ni-iin vehe, ni mà cóó gá vicò nandàhà novia xì noviu. Vàchi nsidanicuú ñà-jaàn, mà cóó gà, mate yáha ga cuica nì sandoo nsidaa tè-dìcò ñuu mà antes, chicá cuica nì sandàa-tè nùù nsidaa tè-dava ga ñuhivì. Te ndè ñuu mà nì sandoo cuàhà stná tètàtnà xì tètadí, te nìsa dandahví-te nsidaa gà ñuu.

²⁴ Te ini ñuu mà nì casahnì nèhivì cuàhà tiàa cáhàn cuenta xi Dios, xì cuàhà gà stná nèhivì vaha xi-ya. Ñàyùcàndüá, icúmí ñuu mà cunsida cuàcha sàhà nsidaa nsì ma, xì sàhà nsidaa gà stná ana nì xìhì ñuhivì nì quida nèhivì.

19

¹ Daaní, nì nsìhi ñà-jaàn, dandu nì tiacu cáhàn ndee cuàhà gà nèhivì ansivi, te dohó xí cachi-nè:

¡Ansivéhé cahnú mii-yá! ¡Ansivéhé-yâ! vàchi sàni càcu dahuun nèhivì xí-yá. Yáha ga ndiaha nì quida-ya, ñàyùcàndüá, tavá-nda tñùñuhu xí-yá. Fuerte cusáhnû-yá vichi, vàchi Stoho-ndà Dios nduú-yá.

² Te cuisì ñà-íá viì sàni quida-ya, cuisì ñà-ndiá icà cuu nduá nì quida-ya na ní sàha-ya castigu ñahà malu íá guá fama xi, vàchi sàhà mii-ñá nì cuchicuehe anima nèhivì ñuhivì ñà-nì sanchicùn-nè modo sìquini xi-ñà. Ñàyùcàndüá, vichi sàni nachitacùhá-yà cuàchi-ñà nì sahnì-ñá nèhivì xinúcuáchì nùù-yá.

³ Daaní, ñà-ùì nì cacachi nsidaa nèhivì mà:

—¡Ansivéhé cahnú mii-yá! —nì cachi-nè—. (Te yucán tuí xica) caná ñùhmà ndé xíxìn ñuu mà nicanicuahàn.

⁴ Dandu òcò cùmì nècuàchì sàhnú, xì nsicúmì ana itá saín nùù-yá, nì tutuyuhu-né nùù sàhà-yá ndé íá-yà nùù silla ndiaha, te nì cahvi-néyà, cachí-nè:

—¡Ansivéhé cahnu-ní, amén!

⁵ Daaní, nùù yatni silla ndiaha xí-yá nì inini cáhàn iin ana cáhàn, cachí-nè:

Xiñuhu ndanihi cahnu-nda Yua-nda Dios, nsidaa ndohó ana xinúcuáchì nùù-yá, te xícahvi xi-yá, a ducán nduu-nda ana nihí chuun cahnú nùù-yá, te ò nduu-nda nèhivì ùùn.

Nansa cuàhàn coo vicò nandàhà gloria

⁶ Dandu nì inini cáhàn yáha ga cuàhà nèhivì, te ducán tiacú na ian cahá fuerte tèñuhu cuàhà, na ian yáha ga ndee cáhàn dàvì, te dohó cachí nèhivì cuàhà mà:

¡Ansivéhé cahnú mii-yá! Vàchi vichi sàcùsáhnû-yá, te nduú-yá Stoho-ndà Señor, divi mii-yá ana cui quida nsidanicuú ñàha.

⁷ Ñàyùcàndüá, cuàhàn-ndà cudìi cuàhà ini-ndà sàhà-yá, cuàhàn-ndà naquimanì-ndàyá, vàchi sàni sàà quivì nandàhà mii-yá nani Lelù íi.

⁸ Te vichi sàni nducutu ndiaha ana cuàhàn nandàhà xì-yá, vàchi sàni nìhìtáhvì-né cundixi-ne sìcoto cuxín yaa finu còò ni-iin mancha-xi, te na ian nchiá.

Ducán nì cachi-nè, vàchi nsidaa nèhivì xí-yá, icúmí-nè (cutnahá xi-yá cundoo ndiaha-né na ian) nì nandàhà-né xì-yá. Te sìcoto cuxín ndixí-né, obra vaha nì caquida-ne nduá.

⁹ Dandu nì cachi tu ángel mà xì:

—Dohó tiaa-ní: “Nansicáhán nsidaa ana cànà cundoo vicò nandàhà xí mii-yá nani Lelù ñi”.

Te nì cachi stná-nè xì:

—Palabra ndàcuisì xí Yua-nda Dios nduá yohó.

¹⁰ Dandu nì tutuyuhí ñuhù nùù sàhà ana nì càhàn xì, cuàhìn cahví-nè nì cùí. Doco nì cachi-nè xì:

—Màsà quidá-nì ducán, vàchi cutu nduú stnài iin ana xinúcuáchí nùù Dios, nacua quidá mii-ní, xì dava ga compañeru-ní càhàn stná sàhà Jesús. Iin-ni nduú stnài ñani-ní nahi mii-né. Còó; cuisì Dios nduú ana ndiá ìcà-ndà cahvi-nda. Te nú càhàn vate-nda sàhà ichì Jesús, dandu queámà ñá-iin-ni quidá stná-ndà nacua nì saquida nècuàchì sàhana nì sacahàn cuenta xi-ya —nì cachi ángel mà.

Nansa icúmí cuu na nuu Jesús ansivi, cuindànùú-yá idu cuxín

¹¹ Daaní, nì xinì nì nuna ansivi, te nì quecunu iin idu cuxín yaa, te indánuú mii-yá, divi mii-yá nani Quidá ndise cumplir, te nani stná-yà Ma túhe dandahví. Mii-yá, de por sí, quidá víi-yá na nsidándáa-yà sàhà cuàchi, te quidá víi stná-yà na sàhàn-yà guerra nàá-yà xì ana xinì ùhì xì-yá.

¹² Te nduchìnùú-yá, nahi ñuhu xìxìn, ducán iá`, te dìni-yá, cuàhà corona vico ñuhá, te ìcà corona mà itúú iin quivì-yá, doco ni-iin nèhivì có-ìnáhá xí quivì mà, cuisì mii-yá ináhá-yá.

¹³ Te ndixí-yá sìcoto nì nducuahá nì quida nì. Te nani stná-yà Palabra ìì xí Dios.

¹⁴ Daaní, dècuèndè ansivi nchícùn gà vaxi ana xínduu soldadu xi-ya. Cuàhà sàstnùhù-né, te itádoó stná-nè idu cuxín yaa, te xíndixi stná-nè sìcoto finu cuxín yaa.

¹⁵ Te yuhù mii-yá queé iin espada dìin, vàchi divi ñà-jaàn nàá-yà xì nèhivì nsidaa ñuu ñuhiví yohó, te ducán cundéé-yà nùù-né, dandu dandacú ndee-yá nùù-né. Pues divi-ya nduú ana icúmí dacháhmà xì nèhivì xidà gà ini Dios sàhà-xí, vàchi mii-yá nduú-yá mii-yá.

¹⁶ Te itúú stná inga quivì-yá nùù capa-yà xì ìcà dìhin stná-yà, te ducán cachá`: Rey dandacú nùù nsidaa rey nduí, te nduu stnài Stoho nsidanicuú ñà-ìá, ducán cachá`.

¹⁷ Daaní, nì xinì nùù orá, yucán iín iin ángel, ndáhì ndee-né, cachí-nè xì nsidaa laa ndavá ansivi:

—Nahà-ndá —nì cachi-nè—. Natacà-ndá ndé iá cuàhà iñàha caxì-ndá quida Stoho-ndà Dios.

¹⁸ Vàchi cuàhàn cui cuàhà rey, xì cuàhà gà stná tè-dàndàcú nùù soldadu, xì stná cuàhà soldadu fuerte, xì stná idu, xì stná tè-itàndòò yàtà-sí, xì stná peón, xì stná lamú xi-tè, xì stná nècuàchì chicá idónuu, xì stná nècuàchì nchícùn cahà-xí.

¹⁹ Dandu nì xinì sàni nataca nsidaa rey ndoó ñuhiví, xì nsidaa soldadu xi-tè, itá-te xi quisì daná mà, vàchi cuní-si quida-sì guerra xì mii-yá indánuú dìquì idu (cuxín) xì nsidaa stná ana nchícùn xì-yá.

²⁰ Doco (cónì cundéé-sì), vàchi nì tnì-sí, mii-sí xì stná inga quisì nì sacahàn cuenta xi-sì, te nduú stná quisì mà ana nì saquida guá cuàhà iñàha na iín-si nùù quisì primeru mà, vàchi ducán nì nihì-sí nì dandàhvì-si nèhivì ñuhiví, te nì sàcùtuu tnuni xí quisì mà nùù-né, te nì cahvi-né figura-si. Pues ndùì quisì mà, vivu nì dandiàchì xì-sí ndé xìxìn ñuhu cahnú sahan quini nahi azufre.

²¹ Te soldadu dava ga xi-sì, nì xihì-te nì quida mii-yá indánuú nùù idu. Divi xi espada queé yuhù-yá, ñà-jaàn nì sahnì-yáte. Dandu nì nataca nsidaa laa (nì cànà mà), te nì saxì-sítè nì chítu tìxi-sì.

20

Nansa icúmí Jesús dandacú-yá mìl cuià

¹ Daaní, nì xinì nì nuu inga ángel ansivi, nihí-né ndahàcáa xi yavi cunú cuàhà, te iníndáhá stná-nè iin cadena caní.

2-3 Te nì tnii-ne quisì cuahá nahi còò cahnú, nì chicuhni-nèsi nì chinacaa-nèsi ini yavi cunú mà, te nì sàcùndiadi vaha-sì ñà-màsà quée gà-si dècuèndè nsihi iin mil cuà ñà-màsà dándahví gà-si nèhivì ñuhiví. Vàchi còò mà nduú quisì xicánúú ñuhiví ndè sàhana, divi ñà-malu nduú-si, te Satanás nani stná-si. Pues yucán nì sàcùndiadi-si, doco nú sàni nsihi mil cuà mà, dandu icúmí-sí dàña-sí iin ratu tii.

4 Daaní, nì xinì, yucán itá cuahà silla ndiaha, te dìquì-nú ndoó stná ana sàni nìhítahví nsidandaà sàhà nèhivì. Te nì xinì anima nèhivì nì quendodò dìni-xí ñà-nì càhàn vate-né ndoó-né ladu xi Jesús, te ñàyùcàndùá nì xihì-nè, vàchi iin-ni nì xinindisá-né palabra xi Dios, te sàhámà cóni cándisá-né cahvi-né quisì daná mà, ni cóni càhvi-né figura-si, ni cóni dúcùn-nè tnuni xi-sì ni icà tnaa-nè, ni ini ndahà-né. Ñàyùcàndùá, nì natiacu-nè, te dava ni nì cusahnú stná-nè xì Cristu iin mil cuà, (nì xinì).

5 Cunaha-nsiá, ñà-jaàn cunduu primeru nátiacú nèhivì xínduu nsìi. Doco dava ga nsìi, còò, mà nátiacú-nè dècuèndè nsihí mil cuà mà.

6 Te nèhivì natiacu primeru mà, nansicáhàn-nè, vàchi cunduu-ne nèhivì ndiaha xí Dios. Mà sàa-nè cui-nè ñà-úi. Còò, vàchi icúmí-nè cundoo-ne cucumi-né chuun nùu Dios nahi dùtù, te cunucuachi-né nùu mii-yá xì nùu Cristu, te iin-ni cutnahá stná-nè xì Cristu cusahnú-né iin mil cuà.

7 Daaní, nì nsihi mil cuà mà, dandu icúmí Satanás dàña-sí quee-sì ndé ndiadí-si,

8-9 cacanu-sì chiyuhù-sí nsidanicuú nèhivì ndoó inicutu ñuhiví. Stná (tè-dàndacú nani) Gog, icúmí-sí dandahví stná-sité, mii-té xi nsidaa stná tè-ndòò ñuu-te Magog, dandu nataca nsihi-tè, nàa-te guerra xì ñuu ndé ndoó nèhivì xí Dios. Cunaha-nsiá, yáha ga cuahà-té, nahi ñusi cuahà ndoó yuhù mar, ducán cuahà-té. Te nì quecoyo-tè nì nana-tè nì sàcuíta-tè nsidaa ladu ñuu ndé ndoó nèhivì xí mii-yá, mero ñuu cùu-guá ini-yà sàhà-xí. Doco nì còyo ñuhu ansivi nì quida-ya, te nì sahmi nsiha tè-malu mà.

10 Te ñà-malu nì dàndahví xì-té, nì dàndiàchì xì-sí ini ñuhu cahnú ndé xíxìn azufre sahan quini ma. Te cunaha-nsiá, mahì ñuhu jaàn, ndoó ñi stná quisì daná xì stná quisì nìsa càhàn cuenta xi-sì. Te nsì-úni quisì mà, icúmí-sí ndoho-sì ndui te ñuu nicanicuahàn.

Juiciu final na mácòo Dios nùu silla cahnú cuxín, dandu ndàcàn-yà cuenta sàhà cuàchi nèhivì

11 Daaní, nì xinì iin silla cahnú. Ndiaha gá-nu, te cuxín yaa-nù, te yucán iá-yà nùu-nú. Te (nì xinì) nì ndañuhu ansivi xì ñuhiví, còò gá ñà-jaàn nùu-yá, ni còò cá stná ni-iin lugar ndé coa.

12 Dandu nì xinì stnái yucán nùu Dios nì sàcuíta nsidanicuú nsìi, nècuàchì cuicà xì nècuàchì ndahví. Te nì ìa stná ana nì nacuna xi tutu ndoó yucán nùu-yá. Te nì nacuna stná-nè inga tutu más gà, divi tutu xi vida ndiaha nicanicuahàn. Dandu nì ndundaà sàhà cuàchi nì quida nsidaa nsìi ma, según nansa cachá nùu nsidaa tutu primeru mà, según nansa nì quida iin iin-ne (ñuhiví yohó).

13 Te nì natiacu nèhivì nì càhà ini mar, xì nsidaa stná nsìi ndoó tìxi ñuhù, nsidaa anima ndoó vaha, nsidaa-né nì casaà-nè nùu-yá, te nì nsidandaà-yà sàhà cuàchi-ne según nansa nì quida iin iin-ne (na nì sandoo-ne ñuhiví).

14 Daaní cunduu quivì nsihi tiempo xihì nèhivì nahi vichi, ni mà cóo vaha ga anima-nè, cutu ñà-cundoo dahuun-ne mahì ñuhu cahnu ma. Divi ñà-jaàn nduá icúmí cuu xi nèhivì nú sàni xihì-nè ñà-úi cundua, icúmí-nè cundoo-ne mahì ñuhu cahnuma.

15 (Vàchi nì xinì), nú cóni-nàtùì quivì iin nèhivì nùu tutu xi vida nicanicuahàn, dandu nì dàndiàchì xì-né mahì ñuhu cahnuma.

21

Ansivi saa xì ñuhiví saa

1-2 Daaní, yuhù Juan, nì xinì nì sàcòo ansivi saa xì ñuhiví saa, vàchi ansivi nuu xì ñuhiví nuu, sàni yàha, te vichi còò gá ni-iin mar. Te nì xinì stnái ñuu ì nani Jerusalén Saa, ndè

nùu Dios ansivi nì quea mànuu. Ndiaha gá iá, vèchi sàni nducutá na iin novia cuàhàn nandàhà xì noviu.

³ Daaní, nì tiacuí cáhàn ndee iin ana cáhàn ansivi, cachí-nè:

—Cunaha-nsiá, sàni sàa tiempu coo saín Dios xì nèhivì ñuhiví, vèchi icúmí-yâ cut-nahá-yá xì-né ndé cundoo-ne. Te mii-né, nèhivì xí-yá cunduu-ne, te mii-yá, (cutnahá-yá xì-né) cunduu-ya Dios xi-ne.

⁴ Ñàyucànduá, nsidaa ndutènúu-né, icúmíâ ndèa quida-ya, mà cuácú gá-nè. Ni mà sáa gà-nè cui-nè, ni mà cóo gá-nè tnùnsí ini, ni mà tnáná gá-nè, ni mà cúhí gà-nè, vèchi mà cóo gá nahi antes.

⁵ Dandu mii-yá iá dìquì silla ndiaha cahnú, nì cachi-yà:

—Cunaha-nsiá, cuàhàn quidayucun saí nsidanicuú iñàha.

Te nì cachi stná-yà xì:

—Tiaa-ní palabra yohó, vèchi palabra ndisa nduá, mà dándáhvîà ndohó.

⁶ Dandu nì cachi-yà:

—Sà-iá. Nahi letra nuu nani A, ducán nduí, vèchi sàhà yùhù nì sàcòo nsidaa ñà-iá. Te nahi letra dansihi nani Z, ducán nduú stnáì, vèchi nsidaa iñàha, sàhà yùhù cucumiá fin xan. Cunaha-nsiá, nú iá ana xíhì tècuíi ndiaha, yùhù icúmí cuàhi-nè cuàhà tècuíi mà, vèchi iá ndé ndéa-tè caná ducún-te, coho nèhivì cutiacu-nè nicanicuahàn.

⁷ Te nsidaa ana cundee xi nùu ana cuní datúcù xì-né, icúmí-nè ndutahví-né nsidaa iñàha. Te yùhù cundui Dios xi-ne, te mii-né cunduu-ne dèhi.

⁸ Doco nsidaa nècuàchì ìa, xì nècuàchì có-xiníndísâ, xì nècuàchì quidá quini, xì nècuàchì sahní, xì nècuàchì tùha cundoo ñahà-xí, xì nècuàchì sáhàn xì promesa nùu yucù, xì nècuàchì cahvi xi yùu yócò ò figura, xì nsidaa stná nècuàchì tnùhù, (ndahví-nè), vèchi ñuhu cahnú nduú lugar ndiatù xì-né, divi ñuhu xíxìn xì azufre sahán quini. Ducán icúmí cuu xi-né na cui-nè ñà-ùì.

Ñuu Jerusalén Saa icúmí nuu ndè gloria

⁹ (Inaha-nsiá), ndoó ùsà ángel nì sa-icumi xi yaxìn ñuhú ùsà castigu mà. Pues iin-ne nì quixi nì cáhàn-nè xì, cachí-nè:

—Nahà-ní dacuní mii-ní ana nduú nahi novia, vèchi iá ana cunduu nahi ñahàdihí mii-yá nani Lelù Í.

¹⁰ Dandu Espíritu Ì xì Dios, nihí-yá yùhù nì tuxi cuàhàn xìqué ndè iin yucù cahnú ducún, te nì dàcùní-yà yùhù ñuu ì nani Jerusalén, dècuèndè nùu Dios mànuu ansivi vaxan.

¹¹ Nchií yéhè ndiahá quidá-yá, na ian yéhè guá iin yùu ndiaha yáha ga ndiaá, vèchi nahi yùu yéhè nina nani jaspe, ducán nchií ndai-ña.

¹² Te ndiadí ñuu mà iin nama cahnú sàstnùhù, te ducún-ña, te ùxìn ùì yehè icúmíâ. Iin iin yehè mà itá iin iin ángel. Te ìcà yehè mà itándiaa quivì descendencia ùxìn ùì dèhe Israel.

¹³ Te iin iin ladu ñuu mà iá ùnì yehè. Ladu ndé caná orá iá ùnì. Te ladu norte iá ùnì stná, xì stná ladu sur xì ladu quécáhu orá, iin iin ladu mà iá stná inga ùnì yehè.

¹⁴ Te sàhà nama ñuu mà itánduhù ùxìn ùì yùu nahnú xínduu cimientu xan. Te nùu cimientu mà itándiaa quivì ùxìn ùì nècuàchì nì nìhì chuun nùu mii-yá nani Lelù Í.

¹⁵ Daaní, (nì xini) iníndáhá ángel nì cáhàn xì iin nù-iin oro ñà-chitacùhá-nè ñuu mà xì yehá xì stná nama xan.

¹⁶ Cunaha-nsiá, cùmì laduá, vèchi iin-ni itácùhá nsicúmì laduá. Te na ní chitacùhá ángel ñuu mà xì nù-iin xi-ne mà, dandu iin mil ùì cientu (1,200) kilómetro itácùhá-ña. Te ñà-nduá caníá, divi ducún-ña, te divi xica stná-ña.

¹⁷ Dandu nì chitacùhá stná-nè nama yucán, te ùnì dico cùmì (64) metro nì quee ñà-ducún-ña. Na chitacùhá nèhivì ñuhiví, ducán nì chitacùhá ángel mà ñuu mà.

¹⁸ Cunaha-nsiá, yùu jaspe nì cuyucun nama mà, te ñuu mà, micúsi oro finu nduá. Te na nchií ndai vidriu, ducán nchií oro mà.

¹⁹ Te cimientu nama mà, ndiaha gá iá', vàchi puru yùù yéhè xínduu cavà mà, nsidanuu clase yùù yéhè. Cavà primeru xi cimientu xan nduú iin cavà cahnú puru yùù yéhè nani jaspe. Daaní, nchícùn gá indúhu cavà nduú puru yùù zafiro; te parte ùni nduú puru yùù ágata; daaní, ñà-cúmì, puru yùù esmeralda nduá;

²⁰ te ñà-úhùn, puru yùù ónice nduá; te ñà-íñù, puru yùù cornalina nduá; te ñà-úsà, puru yùù crisólito nduá; te ñà-únà, puru yùù berilo nduá; te ñà-íin, puru yùù topacio nduá; te ñà-úxìn, puru yùù crisoprasa nduá; te ñà-úxìn iin, puru yùù jacinto nduá; te ñà-úxìn ùi, puru yùù amatista nduá.

²¹ Te ùxìn ùi yehè nama mà, ùxìn ùi ñà-vico sibóla cuxín nani perla ni cuyucàn, iin mindaa perla cahnú ni cuyucun iin iin yehè. Te calle chicá ndé xicá nèhivì ñuu mà, mii oro finu ni cuyucàn, nahi vidriu nchií nihnú.

²² Cunaha-nsiá, còò veheñùhu ni xíní ñuu yucán, vàchi inicutu ñuu mà cahvi-né mii-yá icúmí-xí nsidanicuú poder, divi Stoho-ndà Dios xi mii-yá nani Lelù Íi.

²³ Te có-xiñùhù nècuàchì ñuu mà ni-iin orá, ni-iin yoo cunchiì yucán, vàchi mii Dios nchií ndiaha inicutu; mii-yá nani Lelù Íi itnúù-yà yucán.

²⁴ Ñàyùcàndüá tnúù ñuu mà, vátùni tuí núù nèhivì xicánúú yucán. Te icúmí casaà nèhivì nsidaa ñuu, xínduu-ne nèhivì ni càcu anima-xi. Te rey ndoó ñuhiví yohó, nihí-te ñà-cuicà-té quécoyo-tè ñuu mà, te dócò-téâ.

²⁵ Te mà nunca cundiadi yehá, vàchi nicanicuahàn cundua ndui, te mà nunca sàà cuñaa.

²⁶ Te yucán xínu stná ñà-vico iá cuàhà ñuu ñuhiví yohó, te cóyo stná nsidaa nècuàchì idónuu, nihí-né ñà-cuicà-né sàà.

²⁷ Doco mà nunca quíhvi ni-iin ñà-siquini yucán, ni-iin tè-nìhnú quini inì-xi, mà quíhvi-tè yucan, ni-iin stná tètñùhù. Cuisì quíhvi nèhivì itándiaa quivì-xí núù libru icúmí mii-yá nani Lelù Íi, divi nduú libru xi vida ndiaha nicanicuahàn.

22

¹ Daaní, ni dàcùnì ángel mà yùhù iin yùte caná dècuèndè ndé iin silla ndiaha xí Yua-nda Dios, xi Lelù Íi. Ndai gá tècuì ñuhú, na ian nchií-te. Te tècuì coho-nda, te cutiacu ndiaha-nda nduú-te.

² Te (ni xini stnáì) mahì ichì cahnú ñuu mà itá fila cuàhà yutnù, yutnù xí vida ndiaha nicanicuahàn nduú-nu. Te itá stná-nu ndúù ladu yùte ma. Te ùxìn ùi clase quisì vídì sáha-nù. Iin iin yòò sáha-nù diín diín quisì vídì. Daaní, ndahà cuì-nu, ñà-jaàn cutátná nèhivì ñuhivì ñà-nduvàha-ne.

³ Te inicutu ñuhiví mà cóó gá ni-iñàha ni tàhvi chíhán, cuisì icúmí coo Yua-nda Dios xi Lelù Íi dandacú-yá, te cundoo stná nèhivì xí-yá cunucuachi-né núù-yá.

⁴ Icúmí-né cundehè-né núù-yá, te màcùtuu stná quivì-yá tnaa-nè.

⁵ Te mà nunca cuñaa yucán. Ñàyùcàndüá, còò gá necesidad cucumi-né ñuhu cutnuù núù-né, ni còò stná necesidad cucumi-né iin orá cunchiì núù-né, vàchi mii Stoho-ndà Dios icúmí cunchiì núù-né ñà-cutùì nuù-né. Te nicanicuahàn icúmí-né cundoo-ne cusahnú stná-nè.

Sà-itúú naxicocuìn Jesucristu ñuhiví, cachí-yà

⁶ Daaní, ni cachi tu ángel mà xí:

—Palabra ndàcuisì xí Stoho-ndà Dios nduá sàni cachì xì-ní, vátùni cahvi nèhivì xán. Vàchi iin ángel xi mii-yá nduú ana ni quixi ni cachitnùhu xi nsidaa ana xinúcuáchì núù-yá sàhà-ñá cundaà ini-nè nansa icúmí cuu yàchì. Vàchi ducán ni saquida stná-yà sàhana, ni techuún-yá nèhivì ìi xí-yá quixi-ne cachitnùhu-ne palabra xi-ya.

⁷ (Dohó cachí Jesucristu:)

—Cunaha-nsiá, yàchì màsàì ndé ndoó-nsiá. Te ndiaha gá icúmí cundiatú nsidaa ana chivàha xì ñà-nduá cachitnùhu núù tutu yohó (—ni cachi-yà).

⁸ Yùhù Juan, nì xinì nsidaa ñà-jaàn, te nì inini nsidaa ñà-ndùá nì cuu. Daaní, nì nsihì nì xinì, te nì inini, dandu nì tutuyuhí ñuhù nùù sàhà ángel nì dàcùnì xì nsidaámà, cuàhìn cahví-nè nì cùí.

⁹ Doco nì cachi-nè xì:

—Màsà quidá-ní ducán. Vàchi yùhù, iin-ni nduú stnài iin ana xinúcuáchí nùù Dios, iin-ni (nchícùn stnài mii-yá) nahì mii-ní xì ñanìtnaha-ní cáhàn cuenta xi-ya, te iin-ni chívàha stnài nacua cachí nùù tutu yohó. Còó, micuísì Dios cahví-ní.

¹⁰ Te nì cachi stná-nè xì:

—Màsà chidéhé-ní ni-ñàha cachítñuhu nùù tutu yohó, vachi sà-ítúú cua.

¹¹ Ñàyùcàndùá, vichi ni cúnàhá tèmalu ni quidá-te seguir quida quini-tè; stná tètùha quini, ni quidá-te seguir quida-tè ducán, (mà cútñúnì). Doco nècuàchì nihnú ndàà cuisì inì-xì, iin-ni ni quidá-né seguir quida viì-né ducán, te iin-ni ni coó ndoo anima-nè.

¹² (Te dohó cachí stná Jesús:)

—Cunaha-ní, yàchì naxicocuñn ndé ndoó-nsiá, te cunihi iin ñà-vàha xi-nsia sàì dacútàhvì iin iin-nsia, según nansa nì quida viì iin iin-nsia.

¹³ Ndè sànhà iá yùhù, te ndè nicanicuahàn coi. Ñàyùcàndùá, ducán ié' nahì letra nuu nani A, xì stná letra dansihí nani Z, vachi sàhà yùhù nì sàcòò nsidanicuú ñàha, te còò ni-ñàha, chicá cunaha nùí.

¹⁴ Ndiàha gá coo xi nsidaa ana nsida ndoo xi anima-xi; vachi ducán queamà na ian sàni ndoo vaha sìcoto xi-ne (te sàndixí víi-né). Nsidaa ana quida ducán, nihítàhvì-né caxì-né quisi vídà yutnù tàtá cutiacu-nè nicanicuahàn, te nihítàhvì stná-nè quìhvi-ne yehè nahnú ñuu-yà (cundoo-ne yucán).

¹⁵ Doco nsidaa nèhivì tùha quini, mà sàà-nè quìhvi-ne, ni mà quìhvi stná tètàtnà, ni-iin stná tètadí, ni-iin stná tètòò cundoo ñahà-xí, ni-iin stná tè-sàhni canúú, ni-iin stná tè-càhvì xì yùù yócò ò figura, te ni-iin stná tètùha dandahví.

¹⁶ Yùhù nduí Jesús, te nì techuín ángel-xì sàà-nè càhàn-nè xì nsidaa mii-nsiá nèhivì natácá ndácùcahan xí, te nì cachitñuhu-ne xì-nsiá nsidaa palabra yohó. Pues yùhù nduí descendencia xi rey David. Te na ian quidá stná sìtnùù cahnú xínu dàtnàà (cachítñuhu-sì túinuù quìvì sàà), divi ducán quidá stná yùhù —nì cachi Jesús.

¹⁷ Te dohó cachí stná Espíritu Ìì (xì iin iin ana tàyóo vida ndiàha xí):

—¡Nahà-ní! (cunindisa-ní Jesús), —cachí-yà xì-né, te ducán cachí stná nèhivì xínduu nahì novia cuàhàn nandàhà (xì-yá).

Te nsidaa stná mii-nsiá ana sà-ínìní xí palabra yohó, divi ducán xiñuhu cachi stná-nsià, ñà-nì tnátuu nèhivì nùù-yá. Daaní, stná yùhù, cáhàn stnài xì nsidaa ana cunì (cucumì xi vida ndiàha), cachí xì-né:

—Nahà-nsiá (cunindisá-nsiá mii-yá), te nihítàhvì-nsiá coho-nsiá tècuí cutiacu-nsià nicanicuahàn, ni mà chívàhvì-nsiá.

¹⁸ Cunaha-nsiá, dohó cachí xì nsidaa ana inínì xí ñà-ndùá cachí Dios nùù tutu yohó: màsà chiyódo gá-nsià más nùù ñà-ndùá cachá, vachi nú jaan, dandu cuàhà castigu nihì stná-nsià nùù-yá, divi castigu cachítñuhu libru yohó sàhà-xí.

¹⁹ Te nú ni cándiáá iin nèhivì iyuhu ñà-ndùá cachí-yà nùù tutu yohó, dandu dandutu stná-yà quìvì-né nùù libru xi vida ndiàha nicanicuahàn, te mà nunca nihítàhvì-né cundoo-ne ñuu ìì xì-yá nacua cachí tutu yohó.

²⁰ (Dohó cachí Jesús vichi:)

—Yùhù nduí ana nì cachi xì-nsiá nsidaa ñà-jaàn, te cachítñuhu stnài xì-nsiá ñà-yàchì icúmì naxicocuñn ndé ndoó-nsiá —cachí-yà.

Pues ducanicoó, Señor Jesús. Yàchì cunì-nsì naxicocuñn-ní.

²¹ Ni cúcúmì nsidaa-nsiá gracia xi Stoho-ndà Jesucristu. Amén.